


Tuhun cha sañahá ra
Jesucristo chi yo



New Testament in Mixtec, Jamiltepec (MX:mxt:Mixtec,
Jamiltepec)

Tuhun cha sañahá ra Jesucristo chi yo
New Testament in Mixtec, Jamiltepec (MX:mxt:Mixtec, Jamiltepec)

copyright © 1983 Wycliffe Bible Translators, Inc.

Language: Mixtec, Jamiltepec

Translation by: Wycliffe Bible Translators, Inc.

Mixteco, Jamiltepec [mxt], Mexico

Copyright Information

© 1983, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, Jamiltepec

© 1983, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

Contents

San Mateo	1
San Marcos	54
San Lucas	87
San Juan	145
Hechos	185
Romanos	236
1 Corintios	258
2 Corintios	279
Gálatas	293
Efesios	301
Filipenses	309
Colosenses	315
1 Tesalonicenses	320
2 Tesalonicenses	325
1 Timoteo	328
2 Timoteo	334
Tito	338
Filemón	341
Hebreos	343
Santiago	359
1 Pedro	365
2 Pedro	372
1 Juan	376
2 Juan	382
3 Juan	383
Judas	384
Apocalipsis	386

Tuhun Nyoo Cha Tyaa San Mateo

*Ñáyivi vachi ra Jesucristo tata
(Lc. 3.23-38)*

¹ Ican ihya cuví sivi ñáyivi vachi ra Jesucristo tata. Tata ra David ta tata ra Abraham cuví chi ra.

² Sehe ra Abraham cuví chi ra Isaac, sutu ra Jacob. Ta sehe ra Jacob cuví chi ra Judá ta yañi ra.

³ Ta sehe ra Judá chihin cu Tamar cuví chi ra Fares ta ra Zara. Ta sehe ra Fares cuví chi ra Esrom sutu ra Aram.

⁴ Ta sehe ra Aram cuví chi ra Aminadab sutu ra Naasón. Ta sehe ra Naasón cuví chi ra Salmón.

⁵ Ta sehe ra Salmón chihin cu Rahab cuví chi ra Booz. Ta sehe ra Booz chihin cu Rut cuví chi ra Obed, sutu ra Isaí.

⁶ Ta sehe ra Isaí cuví chi rey David. Ta sehe rey David chihin ñaha cha cuví ñasihí ra Urías cuví chi ra Salomón.

⁷ Ta sehe ra Salomón cuví chi ra Roboam sutu ra Abías. Ta sehe ra Abías cuví chi ra Aza.

⁸ Sehe ra Aza cuví chi ra Josafat, sutu ra Joram. Ta sehe ra Joram cuví chi ra Uzías.

⁹ Sehe ra Uzías cuví chi ra Jotam, sutu ra Acáz. Ta sehe ra Acáz cuví chi ra Ezequías.

¹⁰ Sehe ra Ezequías cuví chi ra Manasés, sutu ra Amón. Sehe ra Amón cuví chi ra Josías.

¹¹ Sehe ra Josías cuví chi ra Jeconías ta yañi ra. Cacacu ra quívi catiñ ra ñuu Babilonia chi ñu Israel, cuahan coyo ñu cua sacuvi ñu tyiño nuu ñu.

¹² Cha yaha cuan, ta chicoo sehe ra Jeconías, ta ican cuví ra Salatiel sutu ra Zorobabel.

¹³ Ta sehe ra Zorobabel ican cuví chi ra Abiud sutu ra Eliaquim. Ta sehe ra Eliaquim cuví chi ra Azor.

¹⁴ Ta sehe ra Azor cuví chi ra Sadoc sutu ra Aquim. Ta sehe ra Aquim cuví chi ra Eliud.

¹⁵ Ta sehe ra Eliud cuví chi ra Eleazar sutu ra Matán. Ta sehe ra Matán cuví chi ra Jacob.

¹⁶ Ta ra Jacob cuví sutu ra José yí cu María. Ican ña cuví síhi ra Jesús ra cuví

Cristo, o cuñí chi catyí, ra cha saquichi Nyoo vatyí cuví ra rey cuenda yo.

¹⁷ Ra Abraham chicoo uchi cumi tahan tata ra nyacua nya cacu ra David. Ta ra David chicoo uchi cumi tahan tata ra nyacua nya quívi tñ ñu Babilonia chi ñu Israel. Ta nyacua nya quívi cuan chicoo uchi cumi ca tahan tata ñu nyacua nya quívi cacu ra Cristo.

*Nu cacu ra Jesucristo
(Lc. 2.1-7)*

¹⁸ Tyehe caa cacu ra Jesucristo: Cha yaha cundaa tyiño cha cutandaha cu María, síhi ra Jesús, chihin ra José. Ta cha ni cumañi ca coo ñu chihin tahan ñu, chicohon sehe ña, soco cha cuenda maa Tatyí Ii Nyoo.

¹⁹ Ta ra José ra cua cuvi yí ña, cuví ra noo ra vaha. Ta ña cuñí ra cuhva ra ticahan nuu chi ña, yucuan chaha tyaa ra cuhva cha sandoo xehe ra chi ña.

²⁰ Ta cha ni ri ca cha chicá xiñi ra tyicuan caa, tuví noo ángel Sutu Mañi yo nuu ra nu quixí ra. Ta nyehe ra ñumahna ta catyí ángel cuan chi ra tyehe caa:

—Yoho José, tata ra David cuvún. Ma caca iñun quehun chi cu María cuvi ña ñasihun, vatyí sehe ña cha cua cacu, cuenda Tatyí Ii Nyoo cuví.

²¹ Ta cha yaha cacu cha lee cuan, cusacunañun chi cue: Jesús. Tyicuan caa cunañi ra vatyí cusacacu ra chi ñáyivi chihin cuatyí ñu.

²² Tandihí ihya cuví tacuhva nachino cava tuhun cha cahan Sutu Mañi yo chihin yuhu ra cacuvi profeta ra ta cha naha, ra cachahá cuenda tuhun cahan ra.

²³ Ta catyí ra tyehe caa: Ñaha tyivaa cha ta coo ca rayí chi, cucohon sehe ña.

Ta coo noo sehe ña. Ta cunañi cue: Emanuel.

Ta sivi cuan cuñí chi catyí: “Nyoo nyaá ra chihin yo.” Catyí ángel cuan chi ra José chichi ñumahna.

²⁴ Cuhva cha nducachí iñi ra José, sacuvi ra tari cuhva catyí ángel cuan chi ra. Ta quehen ra chi cu María vatyí cuvi ña ñasihí ra.

²⁵ Soco ña chiyo ra chihin ña cha numi ri. Nyacua nya cha yaha cacu sehe ña. Ta sacunañi ra chi cue: Jesús.

2

Nu cuahan coyo ra chiñi tuñi cua nyehe ra nu cacu ra Jesús

¹ Cacū ra Jesús noo ñuu cha nañi Belén. Ta ñuu cuan nyaá chi nu cuví Judea. Ta rey Judea cuan nañi ra Herodes. Tyicuan ta chaá coyo suhva ra nya ñuu Jerusalén. Quichi coyo ra ityi nu caña ñanyii. Ta ra cachiñi tuñi xaan cacuví ra.

² Ta candacā tuhun ra chi ñáyivi tyehe caa:

—¿Nya nyaá ra cuvi rey cuenda ñu Israel? Vatyí ityi nu caña ñanyii nyehe ndi tiñoō cha chahā cuenda tyi cacū ra ityi ihya. Ta vachi ndi vachi sacahnu ndi chi ra —cacatyí ra.

³ Ta quivi cha chito rey Herodes tuhun cuan cutyoño cuñi ra. Ta tyicuan caa tucu tandihí ñáyivi ñuu Jerusalén cuan.

⁴ Tyicuan ta canā ra Herodes chi tandihí ra cacuví nuu chi tata sutu ta ra casacuahá ley vehe ñuhu. Ta ndacā tuhun ra chi ra, nya maa maa tahán chi cacu ra Cristo.

⁵ Ta canacahan ra cuan ta cacatyí ra tyehe caa:

—Ñuu Belén ityi Judea, yucuan tahán chi cacu ra vatyí tyehe caa catyaa ra profeta Nyoo nu tutu ta cha naha:

⁶ Ta yoho ñuu Belén ityi Judá, vasi ñuu luhlu ri cuvún cha nuu ñuu nahnu ca iyó ityi Judá nu nyaún.

Soco cahnu ca cucuvun vatyí Belén chiña cucacu minoo ra cunyaca ñaha.

Ta cusaha cumi ra chi ñu Israel ñáyivi cuende.

Tyicuan caa catyí nu tutu Nyoo, —cacatyí ra cuan chi ra Herodes.

⁷ Tyicuan ta canā xehe ra Herodes chi ra chiñi tuñi cuan, ta ndacā tuhun ra chi ra ñáá cuhva ta ñáá quivi caña tiñoō cuan.

⁸ Tyicuan ta tachi ra chi ra nya ñuu Belén, ta catyí ra chi ra:

—Cuahan ndo, ta nducu tuhun vaha ndo tuhun cha lee cuan. Ta tatu nañihi ndo chi cue, ta quichi catyí ndo chii, tacuhva vatyí cuhun tucu yuhu cusacahni chi cue —catyí ra Herodes chi ra.

⁹ Cha yahā cachiñi ra chiñi tuñi cuan cha catyí ra Herodes, caquehen ra ityi ta cuahan coyo ra. Ta tiñoō cha canyehe ra ityi nu caña ñanyii cuan, cuahan ti ityi nuu

ra. Ta chicuiñi ti maa maa siqui nu catuvi cha lee cuan.

¹⁰ Ta cuhva cha canyehe ra chiñi tuñi cuan tyi chicuiñi tiñoō cuan, si xaan cacuiñi ra.

¹¹ Ta caquihvi ra chichi vehe nu catuvi cha lee cuan. Ta cananyehe ra chi cue chihin cu María sihi cue. Ta chicuiñi chiti ra vatyí sacahnu ra chi cue. Tyicuan ta canuñā ra yuhu caja cha canyisó ra. Ta catavā ra regalo cha cuví xuhun cuaan, ta cutu vixi chahán, ta ndutya vixi chahán cha nañi mirra. Ta cachahā ra chi cue.

¹² Yahā cuan ta catahan ra ñumahna ta cutuñi iñi ra vatyí ña tahán chi canayaha ra ityi nu nyaá ra Herodes, yucuan chaha siñ ca ityi cuanuhu coyo ra.

Nu chinq xehe ra José ta cu María chihin cha lee nya Egipto

¹³ Cha yahā cuahan coyo ra chiñi tuñi cuan, tyicuan ta noo ángel Sutu Mañi yo tui nuu ra José chichi ñumahna. Ta catyí ra chi ra:

—Ndicuita, quehen chi ra lee ihya, ta chi sihi ra, ta cuhun ndo nya Egipto. Ta yucuan cunyaa ndo nyacua nya sacote chi ndo. Vatyí ra Herodes cunanducu ra chi cha lee ihya vatyí cahñi ra chi cue.

¹⁴ Tyicuan ta ndicuita ra José cha cuaa cuan. Ta quehen ra chi cha lee cuan ta chi sihi cue. Ta cuahan ñu nya Egipto.

¹⁵ Ta yucuan chinyaa ñu nyacua nya cha chihí ra Herodes. Tyehe caa cuvi tacuhva na chino cava tuhun cahán Nyoo cha tyaa ra profeta ta cha naha. Tyehe caa catyí ra: “Nya ñuu Egipto canē chi Sehi”, catyí ra.

Nu tachi ra Herodes na cahñi ra chi ra cuatyaa

¹⁶ Cha tui iñi ra Herodes vatyí ra cachiñi tuñi cuan sandavi ñaha ra chi ra, nduxaan vavaha ra. Ta tachi ra tyiño na cacahñi ra chi ra cuatyaa cha iyó ñuu Belén cuan ta ndaha ñuu ñandihí, ra cuatyaa cha ni cacu nyacua nya cha uvi cuiya. Tyicuan caa sacuvi ra vatyí nandichí xiñi ra vatyí tyicuan tahan cuiya ra Jesús tari cuhva catyí ra chiñi tuñi cuan chi ra.

¹⁷ Tyicuan caa chinq cava tuhun cahán Nyoo cha tyaa ra Jeremías profeta Nyoo ta cha naha, ta catyí ra tyehe caa:

18 Tyacú noo ndusu ñuu Ramá, cha chacú chaa ñáyivi, ta iyo tahan ñu.

Ta ican cuví ñáyivi tata cu Raquel, ñáyivi Israel, chacú chaa ñu cha cuenda sehe ñu.

Soco ña cuñí ñu cha naquehen ndahvi ñu chi ñu cha cuenda cha cachihí sehe ñu, catyí chi nuu tutu Nyoo.

19 Soco cha yaha cha chihí ra Herodes, tyicuan ta tuví tucu noo ángel cha tachi Sutu Mañi yo nuu ra José nu quixí ra ñuu Egipto. Ta catyí ra chi ra:

20 —Ndícuíta ta quehen chi cha lee chiña, ta chi síhi cue. Ta cuanuhu ndo nya ñuu Israel, vatyí cha chihí ra nducu cahñi chi cue.

21 Tyicuan ta ndícuíta ra José, ta quehen ra chi cha lee cuan ta chi síhi cue. Ta cuanuhu coyo ñu nya Israel.

22 Soco quívi chito ra José vatyí ra Arquelaó cuví ra rey tyiño nuu sutu ra, ra Herodes, nya Judea, nayuhvi ra ta ña cuñí ra cuhun ra yucuan. Ta vatyí sacoto Nyoo chi ra chichi ñumahna, yucuan chaha cuanuhu ñu nya Galilea.

23 Cha chaa ñu yucuan, cuahan ñu nya ñuu Nazaret, cua coo ñu. Ta yucuan chiyo ñu. Tyehe caa cuví tacuhva chino cava tuhun cha cahán Nyoo, cha catyaa ra profeta ta cha naha. Vatyí catyí ra tyí ra Jesús ra ñuu Nazaret cucunañi ra.

3

Ra Juan ra sacondutyá chi ñáyivi cahán ra tuhun Nyoo chihin ñu

(Mt. 1.1-8; Lc. 3.1-9, 15-17; Jn. 1.19-28)

1 Quívi cuan ra Juan ra sacondutyá chi ñáyivi cuahan ra noo chiqui ndí ityi Judea. Ta quichahá cahan ra tuhun Nyoo chihin ñu.

2 Ta catyí ra:

—Ndu uvi iñi ndo cuatyí ndo vatyí cha yatyin nyaá Nyoo ra cua cunyaca ñaha aña ndo.

3 Ican tuhun ra Juan ihya cuví cha tyaa ra Isaías ra cuví profeta Nyoo ta cha naha. Tyehe caa tyaa ra:

Chiñí yo cha caná chaa noo ra noo nu chiqui ndí ta catyí ra:

“Tari sanduvahá ndo noo ityi, tyicuan caa sanduvaha ndo aña ndo, vatyí cua quichi Sutu Mañi yo.

Nuña ndo noo ityi ndoo chi ra naquihvi ra aña ndo.”

4 Ta ra Juan ñihnó ra sahma chino chihin ixi camellu. Ta sincho ra, ñíi cuví. Ta maa maa ri pinchi chachí ra ta tyañuñu cuhu chihí ra.

5 Ñáyivi ñuu Jerusalén ta tandihí ñu ñuu cha nyicú Judea, ta ñu ca iyó yatyin ri ityi yuvi cahnu Jordán cuan, quichi coyo ñu, quichi tyasoho ñu tuhun cahán ra.

6 Ta cha yaha nahma ñu cuatyí ñu, ra Juan sacondutyá ra chi ñu yuvi cahnu Jordán cuan.

7 Soco ra Juan nyehe ra vatyí cuaha xaan ra fariseo, ra quichahá xaan ley vehe ñuhu, ta cuaha xaan ra saduceo, caquichi coyo ra vatyí condutyá ra. Ta catyí ra chi ra:

—iNyoho, tari noo tata coo xaan cuví ndo! ¿Yóo cha sacoto chi ndo vatyí chihin cha condutyá ri ndo ta ma tachi tuñi ca Nyoo chi ndo? Ña ndicha.

8 Coo ndo noo cha quetuví vaha tyi ndicha cha ndu uvi iñi ndo cuatyí ndo.

9 Ta ma cuyaa ndo catyí ndo vatyí tata ra Abraham vachi ndo. Vatyí nyacua nya chihin yuu ihya ta cuví savaha Nyoo ñáyivi tata ra Abraham.

10 Tari yutun cha ña chahá chiti, tyicuan caa cuví ndo. Vatyí ña sacuví ndo tari cuhva cuñí Nyoo. Ta yutun cha ña chahá chiti, cahnya ñáyivi chi tun. Ta cahmi ñu chi tun. Tyicuan caa tucu nyoho, cuhun ndo nu cayú ñuhu.

11 Cha ndicha vatyí yuhu sacondutyé chi ñáyivi chihin ndutyá, tari noo seña vatyí cha ndu uvi iñi ñu cuatyí ñu. Soco cha yaha sacondutyá yuhu chihin ndutyá, vachi inga ra cusacondutyá chi ñáyivi chihin Tatyí Ii Nyoo ta chihin ñuhu ihñi. Iyó ca tunyee iñi chi maa ra ta ñima ca yuhu. Ta ni cha cuise ndichan ra ta ña nañe, vatyí cahnu xaan ca ra cuví ra.

12 Tari noo ra cha cua naquehen vaha trigo ta natyihí vaha ra chichi yaca ta mihin cahmi ra, tyicuan caa cuví maa Sutu Mañi yo chihin yo. Tatu chinó iñi yo chi ra cunaquehen vaha ra chi yo. Ta cunyicu yo chihin ra. Soco tatu ña chinó iñi yo chi ra

cutyihí ra chí yo anyaya nu cayu ñuhu cha ma ndahva ca maa —catyí ra Juan.

Nu condutyá ra Jesús
(Mr. 1.9-11; Lc. 3.21-22)

¹³ Tyicuan ta quita ra Jesús Galilea ta cha ra yuvi cahnú Jordán nu ñohó ra Juan, vatyí cuñí ra cha sacondutyá ra Juan chí ra.

¹⁴ Cha xihna ri ña cuñí ra Juan sacondutyá ra chí ra, ta quichaha catyí ra chí ra Jesús tyehe caa:

—Yoho cuñún cha sacondutye chuun, soco ña tahán chí cha sacondutyá yuhu chuun. Maun tahán chí sacondutyon chí —catyí ra.

¹⁵ Soco ra Jesús catyí ra chí ra:

—Cha vityin, na cuví chí cuhva catyí yuhu chuun. Vatyí cuñí chí cha sacuví yo tandihí cha cuñí Nyoo —catyí ra chí ra Juan. Tyicuan ta ndoo ra Juan vaha.

¹⁶ Cha yahá ri condutyá ra Jesús ta quita ra chichí ndutyá. Ta nuña ri andiví, ta ra Jesús nyehe ra yoso caa vachi noó Tatyí Ii Nyoo, tari noo paloma, ta cha chí síqui ra.

¹⁷ Tyicuan ta tyacu noo ndusu ityí andiví, ta catyí chí tyehe caa:

—Ican ra ihya cuví Sehi, ra cuñí xain chí. Ta sí xaan cuñí chihin ra —catyí ndusu cuan.

4

Nu nducú nyehe cuihna chí ra Jesús
(Mr. 1.12-13; Lc. 4.1-13)

¹ Tyicuan ta Tatyí Ii Nyoo chinyaca chí ra Jesús noo chiqui ndí, tacuhva nducu nyehe cuihna chí ra.

² Ña chachí ra uvi xico quiví ta uvi xico ñuu. Ta yahá cuan ta cha soco chí ra.

³ Tyicuan ta tuhva cuihna chí ra, vatyí cuñí ra nducu nyehe ra chí ra. Ta catyí ra chí ra:

—Tatu ndicha cha Sehe Nyoo cuví chuun, sananduvi pan yuu ihya —catyí cuihna chí ra Jesús.

⁴ Soco ra Jesús nacahan ra ta catyí ra:

—Tuhun Nyoo catyí chí tyehe caa: “Ñima chihin cha cachi ri ñáyiví ta conyito ñu. Conyito tucu añima ñu chihin tuhun cahnú Nyoo” —catyí ra Jesús chí cuihna cuan.

⁵ Tyicuan ta chinyaca cuihna cuan chí ra Jesús nya ñuu Jerusalén. Ta sanda cuan chí ra xiñi yehe ñuhu cahnú cuan.

⁶ Ta catyí cuan chí ra:

—Tatu ndicha cha Sehe Nyoo cuvún, sandupehla nyacua nya nu sucun ihya ta nyacua nya nu ñuhú. Vatyí nyaá nu catyí chí nu tutu Nyoo tyehe caa: “Nyoo cusaquichi ra ángel, quichi saha cuenda chuun. Cunaquehen ra chuun chihin ndaha ra ta ma cuhva ra cha taxin chahin chihin yuu” —catyí cuihna cuan chí ra.

⁷ Ta nacahan ra Jesús ta catyí ra:

—Soco catyí tucu chí nu tutu Nyoo tyehe caa: “Ma nducu nyehun chí Sutu Mañi yo Nyoo” —catyí ra Jesús chí cuihna.

⁸ Tyicuan ta chinyaca tucu cuihna cuan chí ra noo yucu sucun. Ta sañaha cuan tandihí cha cahnú cuví nu nyacá ñaha rey ta ra cuví tyiño chí ñáyiví iyó síqui ñuhu ñáyiví.

⁹ Ta catyí cuihna cuan chí ra tyehe caa:

—Yuhu cuhve tandihí maa ihya chuun, tatu yoho ta cuiñi chitun nui ta sacahnun chí —catyí cuan chí ra.

¹⁰ Tyicuan ta nacahan ra Jesús ta catyí ra chí cuihna cuan:

—Canyaha chuun nui, yoho cuihna. Vatyí tuhun cahnú Nyoo nyaá chí nu tutu ta catyí chí tyehe caa: “Noo ri chí maa Nyoo sacahnú yo. Ta ñn ri chí maa ra quichaha yo.”

¹¹ Tyicuan ta cuahan cuihna cuan, ta ndoo ra Jesús, ta cha coyo ángel ta tyinyee ra chí ra.

Nu quichaha saha tyiño ra Jesús ñuu cha nyicú ityí Galilea

(Mr. 1.14-15; Lc. 4.14-15)

¹² Quiví cha chito ra Jesús vatyí ra Juan ñohó ra yehe caa, cuahan ra nya Galilea.

¹³ Soco ña ndoo ra ñuu Nazaret, nu chahnú ra. Cuahan ra cua coo ra nya ñuu Capernaum, noo ñuu cha nyaá yatyin ri yuhu miñi, cha nyaá yatyin ñuhú cuenda ra Zabulón chihin ñuhú ra Neftalí.

¹⁴ Tyehe caa cuví tacuhva chino cava tuhun cha tyaa ra Isaías nu tutu Nyoo ta cha naha. Catyí chí tyehe caa:

¹⁵ Ñuhú ra Zabulón ta ñuhú ra Neftalí cha nyaá yuhu miñi inga chiyo yuvi

cahnu Jordán, cha cuví Galilea nu iyó ñu ñima ñu Israel cuví.

16 Chinyicu ñima ñu nu ñaa iñi vatyí chinyaca ñaha ra ña vaha chi ñu chihin tuhun chihi, soco sandundichín ñuhú Sutu Mañi yo ñima ñu nu nyicú ñu, catyí ra Isaías.

17 Nyacua nya quivi cuan, ta quichaha cahan ra Jesús tuhun Nyoo chihin ñáyivi, ta catyí ra chi ñu:

—Ndu uvi iñi ndo cuatyí ndo vatyí yatyin ri nyaá Nyoo ra cua cunyaca ñaha ñima ndo —catyí ra Jesús chi ñáyivi.

Nu cana ra Jesús chi cumi tahan ra catín tiyaca

(Mr. 1.16-20; Lc. 5.1-11)

18 Ra Jesús chicá noo ra yuhu miñi cha nañi Tyañuhu Galilea cuan. Ta nanyehe ra chi uvi tahan ra chihin yañi ra, ra Simón cha nañi tucu Pedro, ta ra Andrés. Ra catín tiyaca cacuví ra. Ta cacañi ra yuhva ra nu ndutya.

19 Tyicuan ta quichaha catyí ra Jesús chi ninduvi ra tyehe caa:

—Cunyicon ndo chii. Ta yuhu cusacuvi vatyí tari ñihí ndo tiyaca, tyicuan caa cuñihi ndo anima ñáyivi (ta cutava ndo chi ñu nu quiñi caa na quihvi ñu cuenda Nyoo) —catyí ra Jesús chi ra.

20 Caa cuhva ri cuan casandoo ra yuhva ra ta cuahan coyo ra chihin ra Jesús.

21 Chiin ri ca chicá ra Jesús ityí nuu ca ta nanyehe ra chi uvi ca ra chihin yañi ra, ra Jacobo ta ra Juan. Sehe ra Zebedeo cacuví chi ra. Canyicú ra chichi noo canoa chihin sutu ra canaquicú ra yuhva ra. Ta cana ra Jesús chi ra.

22 Ta caa cuhva ri cuan casandoo ra canoa cuan ta chi sutu ra, ta cuahan coyo ra chihin ra.

Nu sañahá ra Jesús chi cuaha ñáyivi
(Lc. 6.17-19)

23 Cuahan ra Jesús chicá noo ra tandihí ñuu cha nyicú Galilea sañahá ra chichi vehe ñuhu tahan tahan ñuu. Cahán ra tuhun vaha yoso caa nyacá ñaha Nyoo ñima yo. Ta sanduvaha ra chi ñu cuhví chihin tandihí ri nuu cuehe cha iyó chi ñu.

24 Cachitó tandihí ñáyivi ñuu cha nyicú Siria tuhun ra Jesús. Ta quichi nyaca ñu

tandihí ñu cuhví chi ra: tandihí ñu siin siin cuehe tahán. Ta suhva ñu yihí tatyí ña vaha chi ñu. Ta yihí ñu, yihí cuehe chihi tañi chi ñu. Ta yihí ñu ña cuví nacanda ñu. Ta ra Jesús sanduvaha ra chi tandihí ñu.

25 Cuaha xaan ñáyivi nyicón chi ra Jesús: ñáyivi iyó ñuu cha nyicú Galilea, ñáyivi iyó ndi uchi ñuu Decápolis, ñáyivi iyó ñuu cha nyicú Judea, ta ñáyivi iyó inga chiyo yuvi cahnu Jordán ñandihí.

5

Nu cahán ra Jesús nuu ñáyivi nu chiqui
(Lc. 6.20-23)

1 Cuhva cha nyehe ra Jesús tyi cuaha xaan ñáyivi, ndaa ra noo nuu yucu. Ta chicunyaa ra yucuan. Tyicuan ta ñu nyicón chi ra chicunyicu ñu nicachico nu nyaá ra.

2 Tyicuan ta quichaha sañaha ra Jesús chi ñu tyehe caa:

3 —Tandihí ri ñu cha chitó vatyí chiñuhú Nyoo chi ñu, si xaan cucuvi chi ñu, vatyí tahán chi vatyí cunyaca ñaha Nyoo ñima ñu.

4 Ta tandihí ri ñu nducuihya iñi vityin cha catyí cuatyí ñu, si xaan cucuvi chi ñu. Vatyí cusanaa Nyoo cha cuihya iñi ñu.

5 Tandihí ri ñu cha ña cahnu sahá chi, si xaan cucuvi chi ñu, vatyí cuquehen cuenda ñu ñuhu ñáyivi cha catyí Nyoo tyi cuhva ra chi ñu.

6 Ta tandihí ri ñu cuñi xaan sacuvi cuhva catyí Nyoo, si xaan cucuvi chi ñu, vatyí Nyoo cutyinyee ra chi ñu tacuhva cuvi sacuvi ñu.

7 Ta tandihí ri ñu cha iyó tucahnu iñi chi, si xaan cucuvi chi ñu, vatyí Nyoo, cucoo ticahnu iñi chi ra chihin ñu.

8 Ta tandihí maa ñu ndundiñi ñima saha Nyoo, si xaan cucuvi chi ñu, vatyí ñu cuan, cunyehe ñu chi Nyoo.

9 Ta ñu nducú cuhva cha coo taxi ri ñáyivi chihin Nyoo si xaan cucuvi chi ñu, vatyí Nyoo, cucatyí ra tyi sehe ra cuví chi ñu.

10 Ta tandihí ñu cha tasi cuñi nyehe ñáyivi chi ñu cha catyí cha sacuví ñu tari cuhva catyí Nyoo, si xaan cuvi chi ñu, vatyí nyacá ñaha Nyoo ñima ñu.

11 Na cusii cuñi ndo tatu cahán ña vaha ñáyivi siqui ndo. Ta sanyehé ñu tindoho chi

ndo. Ta tavá ñu cuaha cuendu siqui ndo cha catyi yuhu.

¹² Na cusii cuñi ndo vatyí tatu tyehe caa sacuví ñu chihin ndo, sii xaan cucuvi chi ndo, vatyí cahnu xaan ta tyaqui xaan cha cutahan chi chi ndo, nachaa ndo andiví. Vatyí suri tyicuan caa chinyacuví tucu ñu cha ña vaha chihin ra cacuví profeta cuenda Nyoo ta cha naha.

Tatu sandihí yo cha chinó iñi yo chi Nyoo cuví yo tari ñii cha ndihí cha uhva (Mr. 9.50; Lc. 14.34-35)

¹³ 'Nyoho cha chinó iñi ndo chii, tari ñii vaha cuví ndo. Soco tatu ñii, ta ndihí cha uhva, ma sacu uhva ca chi cha cachi yo. Ña vaha ca ñii cuan. Tyicuan ta sacuita yo. Ta cuañi ñáyiví siqui chi.

Tatu vaha quichahá yo tuhun cahán Nyoo, cuví yo tari ñuhú cha sandundichín nu cuahan ñáyiví nu ñaa iñi

¹⁴ 'Nyoho cuví ndo tari ñuhú cha sandundichín nu cuahan ñáyiví. Noo ñuu cha nyaá xiñi noo yucu, ma cuví quihí xehe. Tyicuan caa tahán chi cuví ndo.

¹⁵ Ta yori yo cha tyaa yo noo ñuhú tima, ta tixehe yo chichi noo caja. Soco tyiso yo noo nu sucun vatyí sandichín chi chichi vehe tatu cua quihví ñáyiví, soco ndichin.

¹⁶ Ta tyicuan caa tahán chi sandundichin tucu nyoho chihin ñuhú Nyoo cha iyó aña ndo nu cuahan ñáyiví. Tyicuan ta nanyehe ñu cha vaha cha nyacuví ndo, ta sacahnu ñu chi Sutu yo Nyoo ra nyaá andiví.

Sañahá ra Jesús vatyí ñiñi xaan sacuvi yo ta sañaha yo tandihí tuhun cha tachí Nyoo chi yo

¹⁷ 'Ma cuñi ndo vatyí yuhu vachi sanai ley cha tachí Nyoo chi ra Moisés vatyí tyaa ra. Ta ni ri ña vachi sanai tuhun cha tyaa ra cacuví profeta cuenda Nyoo ta cha naha. Yuhu ña vachi vatyí sanai yucuan. Soco vachi quichahi tandihí cha catyí tuhun cuan, ta sañahá ñáá cha cuñí chi catyí.

¹⁸ Cha ndicha catyí chi ndo vatyí cha ni ri ca cha iyó ca andiví chihin ñuhu ñáyiví ma naa ni chiin cha tyaa ra Moisés ta ra cacuví profeta Nyoo ta cha naha, nyacua nya yaha cuví tandihí tari cuhva nyaá cha catyaa ra.

¹⁹ Yucuan chaha, tatu ña quichahá ñáyiví tuhun cha tachí Nyoo chi ñu, vasi noo tuhun luhlu ri cuví, ta tatu chasi ñu nu quichaha inga ñáyiví, luhlu xaan cucuvi ñu nu nyacá ñaha Nyoo. Soco ñu cha quichahá tandihí, ta sañahá tucu ñu chi inga ñáyiví. Ican ñu cuan cahnu xaan cucuvi ñu nu nyacá ñaha Nyoo.

²⁰ Vatyí cuñí chi cha quichahá vaha ca ndo chi Nyoo ican saha ra sacuahá cuenda ley vehe ñuhu, ta ra cacuví fariseo. Yucuan ta cuví quihví ndo nu nyacá ñaha Nyoo.

Nu sañahá ra Jesús chi yo vatyí ma cuxaan yo chi ñáyiví

²¹ 'Nyoho cha cuaha chaha chiñi ndo tuhun cha catyí Nyoo chi ñu chiyo ta cha naha. Catyí ra: "Ma cahñi ndo chi ñáyiví, vatyí tatu cahñi ndo ñáyiví, tahán chi cutuñi chi ndo."

²² Soco yuhu, catyí chi ndo, vatyí vasi cha cuxaan ri ndo chi noo ñáyiví, o vasi cha cahán uhvi ri ndo chi ñáyiví, o vasi cha cahán nyaa ri ndo chi ñáyiví, tahán chi cutuñi chi ndo. Ta siin ri saha cuenda ndo chi ndo coto cuhun ndo anyaya chihin cuatyí cuan.

²³ 'Ta yucuan chaha quiví cuahun vehe ñuhu, ta nyisón cha cucuhvon chi Nyoo, ta tatu cha nanyaun cha cua cuhvon ta nicohon iñun vatyí ña vaha iyó noo yañun chuhun.

²⁴ Sañdoo cha cua cuhvon chi Nyoo yucuan. Ta cuhun vatyí na coo vahun chihin yañun. Tyicuan ta ndichun nya vehe ñuhu, ta cuhva cuendon cha cua cuhvon chi Nyoo.

Sañahá ra Jesús vatyí cacan yo ticahnu iñi cuatyí yo coto cuhun yo anyaya (Lc. 12.57-59)

²⁵ 'Tatu yóo ra chicán cuatyí chahun, ta cuahan ra chuhun nya nuu ra cuví tyiño, nandacan ticahnu iñi chi ra ityi cuahun, coto cuhva cuenda ra chuun chi ra cuví tyiño. Ta ra cuví tyiño cua cuhva cuenda ra chuun chi policía. Ta policía cuan cutyihí ra chuun vehe caa.

²⁶ Soco catyí chuun vatyí ma cuví quiton vehe caa cuan nyacua nya tyiyahvun tandihí cha tahán chi tyiyahvun.

Sañahá ra Jesús vatyi ni cha ndichi xiñi yo cha coo nonga ñusihí, o nonga rayí chi yo, ta ña vaha

²⁷ 'Nyoho chiñi ndo tuhun vatyi catyi Nyoo ta cha naha vatyi nyoho cha iyó ñasihí ndo, ma coo inga ñusihí chi ndo.

²⁸ Soco yuhu catyí chi ndo, vatyi nya nyoho cha nyehé ndo chi noo ñusihí ta quihvi iñi ndo chi ñu, catyí chi ndo vatyi chihin yucuan ri ta cha chicoo cuatyí ndo.

²⁹⁻³⁰ 'Vatyi tatu chiti nuu chiyo vahun sanacavá chuun nu cuatyí, vaha taxin ca tava ta sacuiton cañi. Vatyi vaha ca quihvun nu nyacá ñaha Nyoo chihin noo chiti nuun, ta ñima ca chihin cha ninduvi chiti nuun ta cuhun nu cayu ñuhú chichi anyaya. O tatu ndahun sanacavá chuun nu cuatyí, vaha taxin ca cahnya ta sacuiton cañi. Vatyi vaha ca cha quihvun nu nyacá ñaha Nyoo chihin cha luu ndahun, ta ñima ca cha naniun ta cuhun nu cayu ñuhú chichi anyaya.

Nu sañahá ra Jesús siqui ra sandoo ñasihí (Mt. 19.9; Mr. 10.11-12; Lc. 16.18)

³¹ 'Ta suri catyí tucu Nyoo chi ñáyivi chiyo ta cha naha vatyi yóo ra sandoo ñasihí, cuñí chi cuhva ra noo tutu cuenda cha sandoo ra chi ña.

³² Soco catyí yuhu chi ndo, ñahri ityi iyó chi noo ra cha sandoo ra chi ñasihí ra tatu ña natuvi ña chihin inga rayí. Vatyi tatu sandoo ra chi ña, ta ñima cha catyí cuatyí cuan, chicoo cuatyí ra nuu Nyoo. Ta siin ri saccoo ra cuatyí ña vatyi tatu quehen ña inga ra, chicoo cuatyí ña nuu Nyoo. Ta chicoo tucu cuatyí ra cha quehen chi ña cuan.

Ma catyi yo "chito vaha maa Nyoo" tacuhva chino iñi ñáyivi vatyi ndicha cha cahán yo

³³ 'Ta chiñi tucu ndo, vatyi catyí tucu Nyoo chi ñu chiyo ta cha naha tyehe caa: "Tatu tyanaha ndo Nyoo tyi cusacuvi ndo noo cha cusacuvi ndo, tahan chi cha sacuvi ndo."

³⁴ Soco yuhu catyí chi ndo vatyi ma tyanaha ndo Nyoo tacuhva chino iñi ñáyivi vatyi ndicha cha cahán ndo. Ta ma tyanaha ndo ni tuhun andivi, vatyi yucuan nu nyaá maa Nyoo cuví.

³⁵ Ta ni ri tuhun ñuhu ñáyivi ihya ma tyanaha ndo, vatyi yucuan cuví nu chañí Nyoo. Ta ni ri tuhun ñuu Jerusalén, ta ma tyanaha ndo, vatyi yucuan cuví ñuu Nyoo ra cuví Rey cha cahnu ca.

³⁶ Ta ni ri tuhun xiñi ndo, ta ma tyanaha ndo, vatyi ma cuvi sanducuichin ndo ni noo ixi xiñi ndo. Ta ni ma cuvi sandutoon tucu ndo.

³⁷ "Ican" catyí ndo, tatu ican. Soco tatu ñima, "ñima", catyí ndo. Ta ma tyanaha ndo Nyoo vatyi ra ña vaha tyiyuhú chi ndo cuví cuan.

Nu sañahá ra Jesús vatyi tatu sacuvi ñáyivi cha ña vaha chihin yo, na sacuvi yo cha vaha chihin ñu (Lc. 6.29-30)

³⁸ 'Ta chiñi tucu ndo cha catyí tuhun cha tyaa ra Moisés ta cha naha: "Vatyi tatu noo ñáyivi cañi ñu nuu ndo, ta tahvi noo noho ndo, o tiví noo chiti nuu ndo, o nya chi ndo sañicuehe ñu, tahán chi vatyi sañicuehe tucu ñáyivi chi maa ñu, tari cuhva cha sañicuehe ñu chi ndo."

³⁹ Soco yuhu catyí chi ndo, vatyi ma nasacuvi ndo cha ña vaha cha nyacuvi ñu tasi iñi chi ndo. Vatyi tatu yóo cha cañi in chiyo xitin ndo, ma nduxaan ndo chi ñu. Soco cuhva tucu ndo inga chiyo xitin ndo na cañi ñu.

⁴⁰ O tatu chicán ñu cuatyí chaha ndo, ta cuñí ñu tinyaa ñu noo camisa ndo, ma cuxaan ndo chi ñu. Soco cuhva ndihí ndo chaqueta ndo chi ñu.

⁴¹ O tatu yóo cha catyí chi ndo na cuiso ndo cha chii ñu noo kilómetro, cuiso ndo uvi kilómetro.

⁴² Tatu yóo ñu chicán tumañi iñi chi ndo, cuhva ndo chi ñu. Ma catyí ndo cha ma saha ndo tumañi iñi cuan.

Na cuñi yo chi ñu xaan iñi chi yo (Lc. 6.27-28, 32-36)

⁴³ 'Ta chiñi tucu ndo tuhun cha catyí ñu chiyo ta cha naha vatyi cuñi ndo chi ra tahan ndo. Ta chi ra xaan iñi chi ndo quihí tisihi iñi ndo chi ra.

⁴⁴ Soco yuhu catyí chi ndo, cuñi ndo chi ñáyivi xaan iñi chi ndo. Ta sacuvi ndo cha vaha chihin ñáyivi cahan chi ndo, ta chi ñu ña cuñí nyehe chi ndo. Ta cacán tahvi ndo chaha ñu quiñi nyacuvi chihin ndo ta sanyehé tindoho chi ndo.

⁴⁵ Ta tyicuan caa sacuvi ndo tacuhva coto ñáyivi vatyi cuví ndo sehe Sutu yo ra nyaá andivi. Vatyi maa ra sacañá ra ñanyii, ta sacoón ra savi siqui tyiño sahá ñáyivi vaha ta ñáyivi ña vaha ñandihí.

⁴⁶ Tatu nyoho ta cuñí ndo chi ñáyivi cha vaha iyó chihin ndo ta ña cuñí nyehe ndo chi ñáyivi xaan iñi chi ndo, ñahri cha vaha cuñihi ndo. Vatyi suri tyicuan caa nyacuví tucu ra catavá xuhun cuenda gobiernu ñuu Roma. Ta quiñi ca iyó ra cuan cuñí maa ndo.

⁴⁷ O tatu chahá ndo nocumi chi ra tahan ri ndo, ñahri cha vaha xaan nyacuví ndo. Vatyi suri tyicuan caa sacuví tucu ñáyivi ña ñohó nuu Nyoo.

⁴⁸ Tari Sutu yo cha nyaá andivi maa maa ri cha vaha sacuví ra, tyicuan caa nyoho maa maa ri cha vaha sacuvi ndo.

6

Nu sañahá ra Jesús yoso caa sacuvi yo tumañi iñi

¹ Saha ndo cuenda ta ma cuyaa ndo ñáa tumañi iñi sacuvi ndo chi ñáyivi. Vatyi tatu cuyaa ndo nuu ñáyivi, ñahri cuñihi ndo nuu Sutu yo ra nyaá andivi.

² Cuhva cha sahá ndo tumañi iñi, ma sacoto ndo chi inga ñáyivi vatyi sahá ndo tumañi iñi. Ma sacuvi ndo tari sacuví ra sahá tyi vaha ta chicá noo ra nuyahvi ta chichi vehe ñuhu. Sahá ra tumañi iñi tacuhva na catyi ñáyivi vatyi vaha xaan ñáyivi cuví ra. Soco yucuan ri ñihí ra cuan ta ñahri ca cuñihi ra nuu Nyoo.

³ Soco nya quivi sahá ndo tumañi iñi chi ñu ndahvi, ma sacoto ndo ni chi ra tahan cahnu ndo.

⁴ Xehe ri sacuvi ndo, tacuhva cha ma coto ñáyivi. Tyicuan ta Sutu yo Nyoo nyehe ra cha sacuvi ndo tyicuan caa. Ta cuaha ca cha vaha cucuhva ra chi ndo.

Nu sañahá ra Jesús yoso caa cahan yo chihin Sutu yo Nyoo

(Lc. 11.2-4)

⁵ Ta cuhva cha chicán tahvi ndo chi Nyoo, ma cacán tahvi ndo tari cuhva sacuví ñu savahá chii. Vatyi ñu cuan tahán iñi ñu cacán tahvi ñu chi Nyoo nu tuvi ñáyivi, tacuhva catyi ñáyivi vatyi vaha xaan ñáyivi cuví ñu, vaha xaan chinó iñi ñu

chi Nyoo. Soco catyi chi ndo cha ndicha vatyi ñahri ca cuñihi ñu nuu Nyoo. Vatyi ñima cha ndicha sacuví ñu.

⁶ Soco nyoho ñáa quivi cacán tahvi ndo chi Nyoo, ma cacán tahvi ndo tacuhva nyehe ri ñáyivi chi ndo. Soco quihvi ndo chichi vehe ndo ta ñacasí ndo yuvehe ta cacán tahvi ndo chihin tandihí añima ndo. Ta noo tuhun ri maa Nyoo Sutu yo nyehe ra cha sacuvi ndo tyicuan caa vatyi nuu maa ra chicán tahvi ndo, ta ñima nuu ñáyivi. Ta cuaha ca cha vaha cucuhva ra chi ndo.

⁷ Cuhva cha cahán ndo chihin Nyoo ñima susuri tuhun cha ñima ri tuhun cahan ndo. Vatyi tyicuan caa sacuví ñu cha ñahri tuhun Nyoo caá añima. Cuñí maa ñu vatyi tyicuan caa ta cuiñi Nyoo cha cahán ñu. Vatyi cuaha xaan chaha cahán ñu susuri maa tuhun cuan.

⁸ Ma sacuvi ndo tyicuan caa. Vatyi Nyoo cha chitó ra ñáa cha chiñuhú chi ndo, cha ni ri ca cha cumañi ca cacán ndo chi ra.

⁹ Yucuan chaha nyoho, tatu cua cacán tahvi ndo chi Nyoo, tyehe caa catyi ndo:

Sutu Mañi yuhu, yoho cha nyaún andivi. Sacahnú xaan ndi chuun.

¹⁰ Na quichi quivi cha nyaca ñahun ihya siqui ñuhu ñáyivi, tari nyacá ñahun andivi.

Na sacuvi ñáyivi ihya siqui ñuhu ñáyivi tandihí cuhva cuñí maun, tari cuhva cuví gloria.

¹¹ Cuhva cha cachi ndi tacuhva cha yaha ndi noo noo quivi.

¹² Saha tucahnu iñi chi ndi ñáa ndihí cha ña vaha nyacuví ndi, tari maa ndi sahá ndi ticahnu iñi chi ñu sataśi iñi chi ndi.

¹³ Ma cuhvon cha nducu nyehe ra ña vaha chi ndi, tacuhva ma sacuvi ndi cuatyi nuun. Soco maun cuví ra sacacú chi ndi ndaha ra ña vaha.

Vatyi maun cuví ra nyacá ñaha tandihí. Ta maun cuaha xaan ca tunyee iñi iyó chuun. Ta tahán chi vatyi sacahnu tandihí ñáyivi chuun tyicuan ri maa. Ta na cuví chi tyicuan caa.

Tyicuan caa cuhva tahán chi cacán tahvi ndo chi Nyoo.

¹⁴ Vatyi tatu nyoho ta sahá ndo ticahnu iñi chi ñu nyacuví cha ña vaha chihin ndo,

tyicuan caa ta Sutú yo ra nyaá andiví, cusahá ra ticahnu iñi chi maa ndo.

¹⁵ Vatyí tatu ma saha ndo ticahnu iñi chi ñu nyacuví cha ña vaha chihin ndo, tyicuan caa tucu Sutú yo, ma saha ra ticahnu iñi cuatyí maa ndo —catyí ra Jesús.

Ñáá quiví ña chachí yo ta nanducú yo chi Nyoo, ma sacoto yo chí inga ñáyiví

¹⁶ Ta catyí tucu ra Jesús chi ñu chicá noo chihin ra:

—Quiví cha ña chachí ndo ta nanducú ndo chi Nyoo, ma cuihya nyehe ndo, tari ñu savahá chii. Vatyí cuñí ñu cha coto ñáyiví vatyí ña chachí ñu ta nanducú ñu chi Nyoo. Soco catyí chi ndo vatyí yucuan ri ñihi ñu. Ñahri ca cuñihi ñu nuu Nyoo.

¹⁷ Soco tatu nya quiví ña chachí ndo ta nanducú ndo chi Nyoo, nacatya ndo nuu ndo. Ta nacuaca ndo cuca xiñi ndo,

¹⁸ tacuhva vatyí ma tuví iñi ñáyiví vatyí ña chachí ndo ta nanducú ndo chi Nyoo. Tyicuan ta noo tuhun maa Nyoo nyehe ra cha sacuví ndo cha xehe ri cuan. Ta cuaha ca cha vaha cua cuhva ra chi ndo chihin nuu ñáyiví.

Nu sañahá ra Jesús vatyí ma sacaya yo cha iyó siqui ñuhu ñayiví

(Lc. 12.33-34)

¹⁹ Ma sacaya ndo cha tyayí ihya ñayiví. Vatyí coto tiví cha tyayí cuan. O cuví tucu quihví ra suhu, ta suhu ra tandihí cha tyayí ndo.

²⁰ Vaha taxin ca sacaya ndo cha vaha chi ndo nu nyaá Nyoo gloria. Vatyí nuu Nyoo ña ndihí cha vaha cuan. Vatyí ni ri ra suhu, ni quití, yori cha sativí iyó yucuan.

²¹ Ta catyí chi ndo vatyí nu nyaá cha tyayí ndo, yucuan cuví nu nyaá xiñi ndo. Ta yucuan cunyata añima ndo.

Tari sandichín chiti nuu yo chí yo tacuhva nyehe yo nu cuahan yo, tyicuan caa tucu sandundichín tuhun Nyoo añima yo

(Lc. 11.34-36)

²² Chiti nuu ndo noo cha sandundichin ityí cuahan ndo cuví. Ta tyicuan caa tucu añima ndo, tatu iyó cha ndichin Nyoo, vaha ñáyiví cuví ndo.

²³ Soco tatu ña vaha chiti nuu ndo, ña ndichin nyehe ndo nu cuahan ndo. Tandihí ri ta ñaa iñi. Ta tyicuan caa tucu

tatu ñahri cha ndichin Nyoo nyaá añima ndo, tari noo ra cuaa cuví ndo. Ña cuví nyehe ndo ityí vaha cha cuahan nu nyaá Nyoo.

Sañahá ra Jesús vatyí ma cuví quichaha yo chí Nyoo tatu cuñí xaan ca yo cha tyayí
(Lc. 16.13)

²⁴ Noo musu ma cuví coo uvi chitoho ra. Vatyí musu cuan cuñí ca ra chi noo ra ta ñima ca chí inga ra. Ta quichahá ra chí noo ra, ta chí inga ra ma quichaha ra. Ta tyicuan caa tucu nyoho, ma cuví cuñi ndo chí Nyoo, ta suri cuhva cuan cuñí ndo cha tyayí.

Sañahá ra Jesús vatyí ma caca xaan iñi yo ñáá ndihí cha chiñuhú chí yo

(Lc. 12.22-31)

²⁵ Yucuan chaha catyí chí ndo vatyí ma caca xaan iñi ndo yoso caa ñihi ndo cha cachi ndo ta cha coho ndo. Ni ma caca iñi ndo ñáá cha cuihno ndo. Vatyí yahví ca nyaá añima ndo ta coño ñuhu ndo nuu Nyoo, ican saha cha cachi ndo ta cha cuihno ndo. Vatyí maa ra chahá ra ñayiví coo ndo. Ta ña yí cuhva ra inga cha chiñuhú chí ndo ñandihí.

²⁶ Saha ndo cuenda chí saa. Ña savahá ti itu. Ta ña sahá tyiño ti. Ni ri ña naquehén vaha ti tyiño sahá ti chichi yaca. Soco Sutú yo Nyoo chahá ra cha cachi ti. ¿Atu ña yahví ca nyaá nyoho nuu Nyoo ta ñima ca saa cuan?

²⁷ Ni ri maa chicá xaan xiñi ndo ma cuví sandusucun ndo ni chiin ca chí ndo.

²⁸ Ta tatu ni chiin cuan ña cuví chí ndo, ¿ñáá tuhun cha chicá xaan xiñi ndo tuhun sahma ndo? Saha ndo cuenda yoso caa iyó tu ita nu chiquí. Vatyí ña taví tun. Ta ni ña conó tun isa.

²⁹ Soco catyí chí ndo vatyí ni rey Salomón cha tyayí xaan cuví ra, soco ña cuví cuihno ra cha tyaquí, tari cha sacuihnó Nyoo chí tu ita cuan.

³⁰ Ta tu ita cuan tyaquí xaan ñihno tun suhva ri quiví ta yaha cuan ta cuna ityí tun ta cucayu tun chichi horno. Ta nyoho, vaha ca cusacuihno Nyoo chí ndo. Soco chiin xaan chinó iñi ndo chí ra.

³¹ Yucuan chaha ma caca xaan xiñi ndo ta catyí ndo: “¿Ñáá cha cachi ndi, o ñáá cha coho ndi, o ñáá cha cuihno ndi?”

³² Vatyí ñáyiví cha ñahri tuhun Nyoo caá ańima, chicá xaan xińi ñu tuhun ihya. Soco nyoho ma caca ińi ndo tuhun cuan vatyí iyó noo Sutu ndo, ra nyaá andiví. Ta chitó ra ñáá ndihí cha chińuhu chi ndo.

³³ Yucuan chaha, cunyaa xińi ndo maa maa ri maa tuhun maa Nyoo. Ta nducu ndo cuhva cunyaca ñaha ra ańima ndo. Ta sacuvi ndo tari cuhva cuńi maa ra. Ta tyicuan caa ñihi ndo tandihí cuii maa cha chińuhú chi ndo.

³⁴ Tandihí quiví ta iyó tındoho chi ndo. Ma caca xińi ndo tuhun tındoho cha vachi. Vatyí Nyoo nyaá ra chihin ndo.

7

*Ma cahan yo cha caá inga ñáyiví
(Lc. 6.37-38, 41-42)*

¹ 'Ma cahan ndo cha caá inga ñáyiví. Tyicuan caa ta ma tĩn Nyoo cuenda cha caá ndo.

² Vatyí tari cuhva cahán ndo cha caá inga ñu, tyicuan caa cuhva cutachi tuńi Nyoo chi ndo.

³ ¿Yoso caa cha cuví nyehun cuatyí luhlu ra yańun ta ña cuví nyehún cuatyí cahnu cha iyó chi maun?

⁴ Tatu chiti nuu maun yihí noo vitu cahnu, ¿yoso caa cuví catyun chi ra yańun: "Nyaca, na tave mihin lee cha yihí chiti nuun"?

⁵ Yoho cha savahún chuun, tava xihna vitu cahnu cha yihí chiti nuu maun, tyicuan ta cuvi nyehe vahun mihin lee cha cutavon chiti nuu ra yańun.

⁶ 'Ma sańihi ndo cahan ndo tuhun Nyoo chihin ñu ña cuńi coto, vatyí coto cańi ñu chi ndo. Tari ina cha tĩn vavaha chi ndo, tyicuan caa cuví ñu. Ta tari quini cha chaca chaha ti cha yahvi nyaá, tyicuan caa cahán ña vaha ñu siqui tuhun Nyoo.

*Ma cundihńi yo cacan yo chi Nyoo, tyicuan ta cuhva ra chi yo
(Lc. 11.9-13; 6.31)*

⁷ 'Cacan ndo cha chińuhú chi ndo chi Nyoo. Ta cuhva ra chi ndo. Nanducu ndo, ta nańihi ndo. Sacachan ndo yuvehe, ta nuńa.

⁸ Vatyí tandihí ndo cha chicán ndo, ñihi ndo. Tatu nanducú ndo, nańihi ndo. Ta tatu sacachán ndo yuvehe, cunuńa yuvehe.

⁹ 'Tyicuan caa tucu nyoho cha iyó sehe ndo. Chahá ndo cha vaha chi sehe ndo. Ña tuhvá ndo chaha ndo noo yuu chi sehe ndo, tatu chicán ndotyín pan chi ndo.

¹⁰ Ta ña tuhvá ndo chaha ndo noo coo chi sehe ndo tatu chicán ndotyín noo tiyaca chi ndo.

¹¹ Nyoho cha quińi iyó ndo soco chitó ndo yoso caa cuhva ndo cha vaha chi sehe ndo. Ta vihi ca Sutu yo, ra nyaá andiví. Cuaha ca cha vaha cuhva ra chi ndo tatu cacan ndo chi ra.

¹² 'Tari cuńi maa ndo cha cunyacuvi ñáyiví cha vaha chihin ndo, tyicuan caa cunyacuvi tucu maa ndo cha vaha chihin ñu. Vatyí tyicuan caa catyí tuhun cha tachí Nyoo, cha tyaá ra Moisés ta ra cacuvi profeta Nyoo ta cha naha.

*Tihin yuvehe ta cuińi ityi cha cuahan nu nyaá Nyoo
(Lc. 13.24)*

¹³ 'Nducu ndo cuhva quihví ndo yuvehe tihin. Vatyí quehen yuvehe, ta quehen ityi cha cuahan nya nu cunaa ñáyiví anyaya. Ta cuaha xaan ñu cuahan ityi cuan.

¹⁴ Soco tihin yuvehe ta cuińi ityi cha cuahan ñáyiví cha ma naa ca maa nu cucoo ñáyiví vaha. Soco suhva ri ñáyiví nańihí ityi cuan.

*Chihin cha sacuví ri ñáyiví, ta nicohón nuu yo chi ñu tatu ñu vaha o ñu ña vaha cuví ñu
(Lc. 6.43-44)*

¹⁵ 'Saha ndo cuenda chi ra cuendu. Vatyí cacatyí ra vatyí cuenda Nyoo cahán ra. Soco ña ndicha. Vatyí vachi coyo ra tari noo mbee nu nyicú ndo. Sahá ra tyi ra vaha cacuví ra. Soco tari noo ñańa xaan cacuví ra.

¹⁶ Nyoho cuví nicohón nuu ndo chi ra chihin cha nyacuví ra. Tari noo yutun ña vaha, tyicuan caa cacuví ra. Vatyí noo tuńiyaca ma cuhva tun mango, ta ni ri noo ińu nduhva ma cuvi cuhva chi tichaha ndiví.

¹⁷ Ta tyicuan caa tucu tandihí yutun vaha. Chahá tun chiti vaha. Ta tandihí yutun ña vaha, chahá tun chiti ña vaha.

¹⁸ Ta yutun vaha, ma cuvi cuhva tun chiti ña vaha. Ta ni ri yutun ña vaha ma cuvi cuhva tun chiti vaha.

19 Ta tandihí yutun cha ña chahá chiti vaha, cahnya yo chi tun. Ta cahmi yo chi tun.

20 Ta tyicuan caa, chihin cha nyacuví ñáyivi cuví nichon nuu ndo chi ñu tatu ñu vaha cuví ñu, o ñu ña vaha cuví ñu.

Nu catyí ra Jesús vatyí ña tandihí ñáyivi quihví ñu nu nyacá ñaha Nyoo

(Lc. 13.25-27)

21 'Ma tandihí ñu cha catyí chii: "Sutu Mañi yuhu, Sutu Mañi yuhu", cuquihví ñu nu nyacá ñaha Nyoo gloria. Ñu sacuví tandihí cha catyí maa Nyoo Suti, ican ñu cuan cuquihví nu nyacá ñaha ra.

22 Quiví cha cucutuñi chi ñáyivi, cuaha xaan ñu cucatyí ñu chii tyehe caa: "Sutu Mañi yuhu. Yuhu cahin tuhun maun chihin ñáyivi. Ta chihin sivun tave tatyí ña vaha cha yihí aña ñáyivi. Ta cuaha xaan milagru savahí chihin sivun", cucatyí ñu chii.

23 'Tyicuan ta yuhu cucatyí chi ñu: "Ña ñohó nui chi nyoho. Canyaha ndo nu nyaí. Vatyí nyoho sacuví ndo maa maa ri cha ña vaha."

Nu sañahá ra Jesús yoso caa cucuvi chi ñu quichahá ta ñu ña quichahá tuhun cahán ra

(Lc. 6.47-49; Mr. 1.22)

24 'Ihya catyí chi ndo, yóo cha chiñí tuhun cahín ta sacuví tari cuhva catyí; cuví ra tari noo ra chiñí tuñi cha savahá ra vehe ra síqui cava.

25 Ta quichahá coon savi. Ta cama xaan yuvi ndutya yaha. Ta ñihi xaan caa tatyí. Soco ña cuví sanduva chi vehe cuan. Vatyí ñihi nanyaá síqui cava cuan.

26 Soco yóo cha chiñí tuhun cahín, ta ña sacuví ra tari cuhva catyí; cuví ra tari noo ra tondo, cha savahá ra vehe ra nu ñiti.

27 Ta chaa savi. Ta cama xaan yuvi ndutya yaha. Ta ñihi xaan caa tatyí. Ta vehe cuan tañi tyehe ri nduva —catyí ra Jesús chi ñu.

28 Cuhva cha ndihí cahan ra Jesús chihin ñáyivi, iyo xaan cuñi ñu tuhun cha sañahá ra.

29 Vatyí sañahá ra tari noo ra cha nyacá ñaha. Ta ña sañahá ra tari ra sacuahá cuenda ley vehe ñuhu.

8

Nu sanduvahá ra Jesús chi noo ra cuhví cha tyahyú coño

(Mr. 1.40-45; Lc. 5.12-16)

1 Cuhva cha noo ra Jesús yucu cuan, cuaha ñáyivi nyicón chi ra.

2 Ta chaa noo ra cha tyahyú coño, ta chicuñi chiti ra nuu ra, ta catyí ra chi ra:

—Sutu Mañi yuhu, tatu yoho ta cuñún, cuví sanduvahun chii —catyí ra chi ra.

3 Tyicuan ta sanacaá ra Jesús ndaha ra ta tñin ra chi ra, ta catyí ra:

—Cuñi sanduvahi chuun. Ta na nduvahun vityin ri —catyí ra.

Ta caa cuhva ri cuan ta nduvaha nu tyahyu cuan.

4 Tyicuan ta quichaha catyí ra Jesús chi ra:

—Nyehe, yori chihin cahun tuhun. Soco cuahan, ta sañahun chuun chi tata sutu, ta cuhva cuendon ofrenda cha catyí ra Moisés nu ley chahnu vatyí tacuhva coto ñu vatyí cha nduvahun.

Nu sanduvahá ra Jesús chi musu noo ra capitán

(Lc. 7.1-10)

5 Cuhva cha chaá ra Jesús Capernaum, noo capitán, ra ñuu Roma, chaá ra nu nyaá ra Jesús ta chacu ndahvi ra nuu ra,

6 ta catyí ra:

—Sutu Mañi yuhu, musi catuví ra nu cama. Cuhví ra. Ña cuví nducuita ra vatyí ñihi xaan tahán ra.

7 Ta catyí ra Jesús chi ra:

—Cuhun mai ta cusanduvahi chi ra —catyí ra chi ra.

8 Nacahan capitán cuan ta catyí ra:

—Sutu Mañi yuhu, ña nañé cha cuhun vehi; soco tacuhva catyí run, ta musi nduvaha ra.

9 Vatyí suri iyó ra nyacá ñaha chi mai. Ta iyó sindaro nyacá ñaha tucu mai. Ta tatu cha tave tyiño chi noo ra, cuhun ra. Ta tatu cane chi inga ra, quichi ra. Ta tatu cha tave tyiño chi musi, sacuvi ra.

10 Ta cha chiñi ra Jesús cha cahan ra, iyo xaan cuñi ra. Ta catyí ra chi ñu nyicón chi ra:

—Cha ndicha catyí chi ndo, vatyí ñuu cha nyicú nicañu Israel, ta nañihi que ni noo

ñáyivi cha chinó xaan iñi ñu tari chinó iñi ra ihya.

¹¹ Ta catyí chi ndo vatyi cuaha ñu inga ñuu cuquichi coyo ityi nu caña ñanyii, ta ityi nu quee ñanyii, ta cunyicu ñu cachi ñu chihin ra Abraham ta ra Isaac ta ra Jacob nya andivi.

¹² Ta ñu Israel cha tahán chi cahun andivi, yihí ñu, ma cahun ñu, vatyi cahun ñu nu ñaa iñi ityi chata. Ta yucuan cucuacu chaa ñu ta cucahñi noho ñu —catyí ra Jesús chi ñu.

¹³ Tyicuan ta quichaha catyí ra chi capitán cuan tyehe caa:

—Cuahan, ta na cuvi chi tari cuhva catyūn vatyi chinó xaan iñun chii —catyí ra.

Ta suri cuhva cuan nduvahā musu ra.

Nu sanduvahā ra Jesús chi maha tyiso ra Pedro

(Mr. 1.29-31; Lc. 4.38-39)

¹⁴ Ta cha yahā cuan, chaā ra Jesús vehe ra Pedro. Ta nanyehē ra chi maha tyiso ra Pedro, catuví ña nu chito chihin cahñi.

¹⁵ Ta tiñn ra ndaha ña, ta quitā cahñi cuan chi ña. Ta ndicuitā ña, ta quichahā tyiñuhu ña chi ra.

Nu sanduvahā ra Jesús cuaha ñu cuhvi

(Mr. 1.32-34; Lc. 4.40-41)

¹⁶ Ta cuhva cha cuaa cuan, quichij nyaca ñu cuaha xaan ñáyivi yihí tatyí ña vaha chi chi ra Jesús. Ta chihin noo ri tuhun cahan ra, tavā ñehe ra chi tatyí ña vaha cuan, ta sanduvahā ra chi tandihí ñu cuhvi.

¹⁷ Tyicuan caa cuvi tacuhva vatyi na chino cava tari cuhva catyí ra profeta Isaías, quivi catyí ra tyehe caa: “Maa ra quehen ra cuehe cha yihí chi yo, ta tinyaa ra cha uhvi chi yo.”

¿Yoso chiquihí chi yo tatu cuñi yo cunyi-con yo chi ra Jesús?

(Lc. 9.57-62)

¹⁸ Tyicuan ta nyehe ra Jesús vatyi nicachico nu nyaá ra nyicú ñáyivi. Ta catyí ra chi ñu vatyi cuyaha ra inga chiyo miñi.

¹⁹ Tyicuan ta chaā noo ra sacuaha ley vehe ñuhu ta catyí ra chi ra:

—Maestro, cuñi cunyiquen chuun tandihí ri ityi nu cahun —catyí ra.

²⁰ Ta ra Jesús catyí ra chi ra:

—Ñaña, iyó vehe ti, ta saa cha chicó nu tatyí, iyó taca ti. Soco yuhu Rayi cha quichi nya gloria, ñahri vehi ta ni ri nu cava xiñi ta ñahri —catyí ra.

²¹ Inga tucu ra chicá noo chihin ra catyí ra chi ra:

—Tata, cuhva na cahun xihne cutyihí chi suti chichi ñuhú, tyicuan ta quichi ta cunyiquen chuun —catyí ra.

²² Ta catyí ra Jesús chi ra:

—Ñaha yoho vatyi cunyi-con chii. Saña chi ñu ña ñohó nuu chi Nyoo, na tyihí maa ñu chi tahan ñu chichi ñuhú —catyí ra.

Nu sacutaxín ra Jesús tatyí xaan

(Mr. 4.35-41; Lc. 8.22-25)

²³ Tyicuan ta quihvi ra chichi canoa, ta ra cachicá noo chihin ra, cuahan coyo ra chihin ra.

²⁴ Ta chaā noo tatyí ñihí xaan nu miñi cuan, ta nyacua chasí ndutya cuan canoa ra soco maa ra Jesús quixí ra.

²⁵ Ta ra cachicá noo chihin ra sandoyō ra chi ra, ta cacatyí ra:

—¡Sutu Mañi yuhu, sacacu chi yo, vatyi cuñi cunaa yo!

²⁶ Ta catyí ra Jesús chi ra:

—¿Ñáá tuhun cha yuhvi xaan ndo? ¡Nyoho chiin xaan chinó iñi ndo chii!

Tyicuan ta nacandā ra ta sacutaxín ra tatyí nu miñi cuan, ta tandihí cutaxín.

²⁷ Ta iyo xaan cacuñi ra cuan ta cacatyí ra:

—¿Yóó ra cuví ra ihya? Vatyi nyacua nya tatyí ta nyacua nya ndutya ta quichahá chi ra —catyí ra.

Nu nduvahā uvi ra ñuu Gadara ra cayihí tatyí ña vaha chi

(Mr. 5.1-20; Lc. 8.26-39)

²⁸ Tyicuan ta chaā coyo ra inga chiyo miñi cha nyaá ñuhú cha nañí Gadara. Ta chaā coyo uvi tahan ra yihí tatyí ña vaha chii. Ta nu ñaña caquitā coyo ra cuan. Xaan vavaha ra, ta yori maa cuví yaha ityi cuan.

²⁹ Ta canachaá ra, ta cacatyí ra:

—¿Ñáá cha cuñún chihin ndi, yoho Jesús Sehe Nyoo? ¿Atu vachun vachi sanyehun tñdoho chi ndi cha ni cumañi ca chaa quivi? —cacatyí ra cuan.

³⁰ Ta yatyin ri cuan nyicú cuaha quini cachachí ti.

³¹ Ta catyí tatyí ña vaha cuan chi ra Jesús:
—Tatu cuatava ñehun chi ndi, cuhva cha quihvi ndi chichi quini cuan —cacatyí tatyí ña vaha cuan.

³² —Vaha. Quihvi ndo —catyí ra Jesús.

Ta caquita coyo tatyí ña vaha cuan, ta quihvi coyo chichi tandihí quini canyicú cuan. Ta tandihí quini cuan cachino ti ta canacoyo ti noo xahva yuhu miñi cuan, ta chihí ti chihin ndutya cuan.

³³ Tyicuan ta ra casaha cumi chi ti cuan, cachinó vavaha ra cuahan coyo ra chichi ñuu, ta canacatyí ra tandihí cha cuví chi ra cayihí tatyí ña vaha cuan chi.

³⁴ Ta tandihí ñáyivi ñuu, chahan ñu chinyehé ñu chi ra Jesús, ta chacu ndahvi ñu nuu ra na quita ra yucuan.

9

Nu sanduvahá ra Jesús chi noo ra cuhvi cha ña cuví nacanda
(Mr. 2.1-12; Lc. 5.17-26)

¹ Tyicuan ta quihvi ra Jesús chichi canoa ta yaha sava ra inga chiyo miñi, ta nachaa ra nya ñuu nu iyó ra.

² Nu nyaá ra yucuan chinyaca ñáyivi chi noo ra cuhvi cha ña cuví nacanda catuví ra nu chito. Ta cha nyehe ra Jesús vatyi chinó xaan iñi ñu chi ra, quichaha catyí ra chi ra cuhvi cuan:

—Saní iñun, suti vatyi cha chicoo ticahnu iñi cuatyun —catyí ra chi ra.

³ Tyicuan ta quichaha chica xiñi suhva ra sacuahá ley vehe ñuhu cha nyicú yucuan tyehe caa: “Ra ihya chicoo cuatyí ra nu Nyoo chihin tuhun cahán ra”, cachicá xiñi ra.

⁴ Soco ra Jesús chitó ri ra ñáá cha cachicá xiñi ra, ta catyí ra chi ra:

—¿Ñáá tuhun cha ña vaha maa chicá xiñi ndo?

⁵ Vatyi ¿nya cha yí ca catyí yo: atu yí ca catyí yo “Cuatyun cha yaha ndachi”, o yí ca catyí yo: “Ndícuíta ta cacon”?

⁶ Vaha. Cuasañahi chi ndo vatyi yuhu Rayí cha quichi nya gloria, iyó ityi chí siqui ñuhu ñáyivi ihya vatyi sahi ticahnu iñi cuatyí —catyí ra Jesús.

Tyicuan ta catyí ra chi ra cuhvi cuan:

—Ndícuíta, naquehen chiton ta cuanuhu nya vehun —catyí ra.

⁷ Tyicuan ta ndícuíta ra cuhvi cuan ta cuanuhu ra nya vehe ra.

⁸ Cuhva cha nyehe ñáyivi tuhun ihya, canayuhví ñu. Ta casacahnú ñu chi Nyoo vatyi chaha ra tunyee iñi cuan chi ñáyivi.

Nu caná ra Jesús chi ra Mateo
(Mr. 2.13-17; Lc. 5.27-32)

⁹ Quita ra Jesús yucuan, ta nanyehé ra chi noo ra cha nañi Mateo, nyaá ra quehen ra xuhun cha tyiyahví ñu Israel chi gobiernu ñuu Roma. Ta catyí ra chi ra:

—Coho chihin.

Tyicuan ta ndícuíta ra Mateo ta tyinyicon ra chi ra.

¹⁰ Tyicuan ta cuví chi noo chaha ra Jesús nyaá ra nya vehe ra Mateo, chachí ra. Ta cachaa coyo cuaha ra catavá xuhun cuenda gobiernu ñuu Roma ta inga ca ra ca iyó cuatyí. Ta cachicunyicú tucu ra yucuan nu mesa in ri chihin ra Jesús ta ra cachicá noo chihin ra.

¹¹ Soco cha canyehé ra fariseo cha tyicuan caa, candaca tuhun ra chi ra cachicá noo chihin ra Jesús, ta cacatyí ra:

—¿Ñáá tuhun cha vatyi ra sacuahá chi nyoho chachí ra chihin ra catavá xuhun cuenda ra nyacá ñaha nya Roma ta chihin ra ca iyó cuatyí? —cacatyí ra.

¹² Chiñi ra Jesús cha chahan ra, ta catyí ra chi ra:

—Ña chiñuhú doctor chi ñu iyó vaha, ñu ña cuhvi, soco chi ñu cuhvi chiñuhú ra.

¹³ Cuahan ndo ta cutuhva ndo cha cuñi chi catyí nu tutu Nyoo, nu catyí ra tyehe caa: “Yuhu cuñi vatyi cundahvi cuñi ndo chi ñáyivi, ta ñima ca cha cahni ndo quití ta cuhva cuenda ndo chii.” Ña vachi na cane chi ñu vaha, soco chi ñu iyó cuatyí, tacuhva na nasama ñu cuhva iyó ñu.

Nu catyí ra Jesús vatyi cha ni ri ca cha nyaá ca ra chihin ra cachicá noo chihin ra ña tahán chi cha saha ra ayunar
(Mr. 2.18-20; Lc. 5.33-35)

¹⁴ Tyicuan ta ra canyicón chi ra Juan, ra sacondutya chi ñáyivi, catuhva ra chi ra Jesús ta candaca tuhun ra chi ra ta cacatyí ra:

—¿Ñáá tuhun cha nyuhu ta ra cacuví fariseo, cuaha xaan chaha savaha ndi ayuno, ña chachí ndi ta nanducú ndi chi

Nyoo? ¿Ta ra cachicá noo chihin yoho ñima tyicuan caa sacuvi ra? —cacatyí ra nyicón chi ra Juan.

¹⁵ Ta nacahan ra Jesús ta catyí ra:

—¿Atu cuví cunyaa cuihya ñu nyicú vico cha ni ri ca cha nyaá ra cua tandaha chihin ñu? Soco vachi quivi vatyí cucuachiyo ra nu nyicú ñu, tyicuan ndicha ta cusavaha ñu ayuno.

Nu sañahá ra Jesús vatyí ña chachí tahan tuhun chahnu cha iyó ñu chihin tuhun chaa cha sañahá ra chi ñu

(Mr. 2.21-22; Lc. 5.36-39)

¹⁶ Yori naquicú noo vestido chahnu chihin noo sahma chaa vatyí coto cundiyo nu naquicu ñu chihin cha chaa cuan, ta cahnya chí cha chahnu cuan, ta nu tahnya cuan nducahnu ca.

¹⁷ Ta ni ña tyihí yo vinu chaa chichi ñi chahnu vatyí tatu sacuvi yo tyicuan caa, tahnya ñi cuan, ta tari cunaa vinu, ta cunaa ñi cuan. Yucuan chaha cuñí chí tyihí yo vinu chaa chichi ñi chaa, ta tyicuan ta ninduvi ta cusaha cuenda chí chí tahan chí.

Sehe ra Jairo, ta ñaha cha tñn sahma ra Jesús

(Mr. 5.21-43; Lc. 8.40-56)

¹⁸ Cha ni ri ca cha catyí ra Jesús tuhun ihya, chaá noo ra cuví nuu chí ñu Judea ta chicuiñi chíti ra nuu ra Jesús, ta catyí ra:

—Ni chihí sehi, soco tatu yoho quichun ta tyison ndahun siqui ña, cunandoto ña —catyí ra chí ra Jesús.

¹⁹ Ndicuita ra Jesús ta cuahan ra ñn ri chihin ra ta ra cachicá noo chihin ra ñandihí.

²⁰ Tyicuan ta noo ñaha, cuhví ña chihin cha chati niñi ña. Ta cha uchi uvi cuiya cuhví ña. Ta tuhva ña chí ra Jesús ityi chata ra, ta tñn ña yuhu sahma ra,

²¹ vatyí tyehe caa chicá xiñi ña: “Ma chihin cha tñn ri sahma ra ta nduvahi”, chicá xiñi ña.

²² Soco ra Jesús nanyocava ra nanyehe ra chí ña, ta catyí ra chí ña:

—Nduní iñun sihi, cha nduvahun vatyí chinó iñun —catyí ra.

Ta caa cuhva ri cuan ta nduvaha ña.

²³ Yahá cuan ta chaá ra Jesús vehe ra cuví nuu cuan, ta nyehé ra vatyí ra música canyatú tuhva ra cha cuhun coyo ra nu

quihvi cue chichi ñuhú. Ta ñáyivi cha nyicú cuan chacú chaa ñu.

²⁴ Ta catyí ra chí ñu:

—Quitá ndo ihya. Ñaha tyivaa ihya, ña chihí ña, soco quixí ña —catyí ra.

Ta chacú cuehe ri ñáyivi nyehe ñu chí ra.

²⁵ Soco ra Jesús tavá ra chí ñu ityi chata vehe, tyicuan ta quihvi ra ta tñn ra ndaha ñaha tyivaa cuan, ta maa ña ndicuita ña.

²⁶ Ta tandihí ityi cuan chitya tuhun cha cuví yucuan.

Nu sanduvaha ra Jesús chí uvi ra cuaa

²⁷ Cuhva cha quitá ra Jesús yucuan, uvi tahan ra cuaa canyicón chí ra suri caná chaa ra ta cacatyí ra:

—¿Cundahvi cuñi chí ndi, yoho ra vachi tata ra David! —cacatyí ra.

²⁸ Ta cuhva cha quihvi ra Jesús chichi vehe, ra cuaa cuan, catuhva ra chí ra, ta maa ra Jesús quichaha ndacá tuhun ra chí ra:

—¿Atu chinó iñi nyoho vatyí cuví sanduvahi chí ndo? —catyí ra.

Ta canacahan ra ta catyí ra:

—Ay, chinó iñi ndi chuun, Sutu Mañi yuhu —cacatyí ra.

²⁹ Tyicuan ta tñn ra Jesús chíti nuu ra ta catyí ra chí ra:

—Na cuví maa yoso cuhva chinó iñi ndo —catyí ra.

³⁰ Ta canduvaha chíti nuu ra. Ta catyí vaha ra Jesús chí ra tyehe caa:

—Nducu ndo cuhva cha yori coto.

³¹ Soco quitá coyo cuiri ra ta quichaha canacatyí ra cha sacuvi ra Jesús chihin ra chí ñáyivi tandihí ityi yucuan.

Nu sanduvaha ra Jesús chí noo ra ñihí

³² Cha ni ri ca cha caquitá coyo ra cucuaa cuan, suhva ñáyivi quichí nyaca ñu chí noo ra ñihí cha yihí noo tatyí ña vaha chí nu nyaá ra Jesús.

³³ Ta caa cuhva ri cha tavá ñehe ra Jesús tatyí ña vaha cuan, quichaha cuví cahan ra cuan. Ta iyo xaan cuñí ñáyivi, ta catyí ñu:

—Ni noo chaha ta cuví ca cha tyehe caa Israel Ihya —catyí ñu.

³⁴ Soco ra cacuvi fariseo, cacatyí ra:

—Ra ihya tavá ñehe ra tatyí ña vaha chihin tunyee iñi chi cuihna ra cuví nuu —catyí ra.

Nu catyí ra Jesús vatyí ña cuaha maa ñu sahá tyiño cuenda Nyoo iyó

³⁵ Ra Jesús chahan ra tandihí ñuu sañahá ra chi ñáyivi chichí vehe ñuhu tahan tahan ñuu. Cahán ra tuhun Nyoo yoso caa nyacá ñaha Nyoo aña ñáyivi. Ta sanduvahá ra tandihí nuu cuehe cha yihí ñu.

³⁶ Ta cha nanyehé ra chi ñáyivi, cundahvi cuñí ra nyehé ra chi ñu, vatyí nyehé ñu tindoho ta cuihya cuñí ñu, tari mbee quití cha yori sahá cumi chí.

³⁷ Tyicuan ta catyí ra chi ra cachicá noo chihin ra tyehe caa:

—Cha ndicha, cuaha tyiño iyó, soco ra sahá tyiño, ña cuaha ra.

³⁸ Yucuan chaha, çacan ndo chi chitoho tyiño yucuan, na tachí ra chi ra saha tyiño na sataca ra tyiño cuan.

10

Nu cachí ra Jesús chi ndi uchi uvi ra caca tyiño ra

(Mr. 3.13-19; Lc. 6.12-16)

¹ Tyicuan ta cana ra Jesús chi ndi uchi uvi ra chicá noo chihin ra ta chaha ra ityi chí ra vatyí tava ñehe ra chi tatyí ña vaha cha yihí aña ñáyivi, ta sanduvaha ra ndihí nuu cuehe ta cha uhvi ñandihí.

² Ican ihya cuví sivi ndi uchi uvi ra chicá tyiño ra: xihna ca, ra Simón, cha nañí tucu Pedro, ta yañi ra, ra Andrés, ra Jacobo ta yañi ra, ra Juan, sehe ra Zebedeo cacuví chí ra;

³ ta ra Felipe, ra Bartolomé, ra Tomás, ta ra Mateo ra tava xuhun cuenda gobiernu ñuu Roma, ra Jacobo sehe ra Alfeo, ra Lebeo cha nañí tucu Tadeo,

⁴ ta ra Simón cha yihí cuenda ityi ra cacuñí cahun cuatyí siqui gobiernu ñuu Roma cha nyacá ñaha chí ñu, ta ra Judas Iscariote, ra cha naxico tuhun chí ra Jesús.

Nu tachí ra Jesús chí ra cachicá noo chihin ra, na cuahan ra tuhun Nyoo

(Mr. 6.7-13; Lc. 9.1-6)

⁵ Ta tyehe caa tachí ra Jesús chí uchi uvi tahan ra cuan, ta catyí ra:

—Ma cahun ndo nu iyó ñu cha ñima ñu Israel cuví, ta ni ma quihvi ndo ñuu cha nyicú Samaria.

⁶ Cuahan ndo, soco nu nyicú mbee cha cuanaa cha cuví ñu ñuu Israel.

⁷ Cuahan ndo cuacahan ndo tuhun vatyí cha chaa cha cunyaca ñaha Nyoo aña ñáyivi.

⁸ Sanduvaha ndo chí ñu cuhvi ñu tyahyú coño, ta ñu yihí inga cuehe chii. Sanandoto ndo ndiyi, tava ñehe ndo chí tatyí ña vaha cha yihí chí ñu. Nyoho, naquehén cuenda ndo tunyee iñi ihya chihin cha ñahri yahvi, ta cotyíño ndo soco ma quehen ndo yahvi.

⁹ 'Ma cuiso ndo ni noo xuhun, ni xuhun cuan ni xuhun cuichin, ni xuhun cuaha.

¹⁰ Ma cuiso ndo ni yono cha cuenda cha caca ityi ndo. Noo ri camisa cha ñihnó ndo cahun chihin ndo. Ta ma cuiso ndo inga ityi ndichan, ni yutun ma tuvi ndo, vatyí ra sahá tyiño, iyó ityi chí ra cha coo yahvi ra.

¹¹ 'Cuhva cha chaa ndo noo ñuu, nducu ndo noo ñáyivi cachi iyó, ta ndo ndo vehe ñu nyacua nya quita ndo ñuu cuan.

¹² Cuhva cha cua quihvi ndo noo vehe, cuhva ndo nocumi chí ñáyivi iyó vehe cuan. Ta catyí ndo chí ñu: Na coo cha taxi Nyoo aña ndo, catyí ndo chí ñu.

¹³ Ta tatu ñu ñuu cuan ta nacotó ñu tyi chiñuhú cha taxi ri cuan chí ñu, cundoo cuan chihin ñu. Soco tatu ña nacotó ñu vatyí chiñuhú cuan chí ñu, ma ndoo cuan chihin ñu.

¹⁴ Ta tatu ña cuñí ñu quehen cuenda ñu chí ndo, ta ni ña cuñí ñu cuiñi ñu tuhun cahán ndo, tyicuan ta quita ndo vehe yucuan, o ñuu yucuan, ta naquisi ndo ñiyaca chaha ndo.

¹⁵ Cha ndicha catyí chí ndo vatyí quivi cutuñi chí ñáyivi, ñihi ca cutachi tuñi Nyoo chí ñu cuan, ta ñima ca ñáyivi ñuu Sodoma ta ñuu Gomorra.

Nu sañahá chí ñaa ndihí tindoho cunyehe ñu chicá tyiño Nyoo

¹⁶ 'iNyehe ndo! Yuhu tachí chí ndo, tari mbee mahñu lobo. Quiyi saha ndo chí ndo, tari coo, soco masu saha ndo chí ndo tari paloma.

¹⁷ Saha ndo cuenda chí ndo vatyí ñáyivi cucuhva cuenda ñu chí ndo chí ra cuví

tyiño, ta chichi vehe ñuhu cucañi ñu chi ndo.

¹⁸ Ta cha cuenda yuhu, nyacua cunyaca ñu chi ndo nuu gobiernu ta nuu rey. Ta tyicuan caa ta cuví cahan ndo tuhin nuu ra ta nuu ñu cha ñima ñu Israel cuví.

¹⁹ Soco tatu nacuhva cuenda ñu chi ndo chi ra cuví tyiño, ma caca xiñi ndo yoso caa cucahan ndo, vatyí tatu chaa cuhva cha cahan ndo, Nyoo cucuhva ra tuhun cha cucahan ndo.

²⁰ Vatyí ñima maa ndo cucahan, soco maa Tatyí li Sutu yo Nyoo cusacahan chi ndo.

²¹ 'Rayíi cunaxico tuhun ra suri chi yañi ra tacuhva na cacahñi ra chi ra. Ta yihí ra cunaxico tuhun ra chi sehe ra. Ta yihí ñáyivi cunanuhu ñu siqui sutu ñu ta sihi ñu, ta cusacuvi ñu, na cúvi ñu.

²² Tandihí ñáyivi, cucutasi cuñi nyehe ñu chi ndo cha catyí yuhu. Soco tatu ña ndu uvi iñi ndo chino iñi ndo chii, tyicuan ta cucacu aña ndo.

²³ Tatu chica nyicon ñu chi ndo noo ñuu, cono ri ndo inga ñuu. Vatyí cha ndicha catyí chi ndo ni cha ta ndihí ca cahan ndo tuhun Nyoo tandihí ñuu nu nyicu ñáyivi Israel ta yuhu Rayíi cha quichi nya gloria cuquichi inga chaha.

²⁴ 'Ni noo ra cutuhvá, ña cahnu ca ra cuví ra ican saha ra sacuaha chi ra. Ta ni noo musu, ña cahnu ca cuví ra ican saha chitoho ra.

²⁵ Ra cutuhva, cuñí chi ndoo ra vaha cha chaa ra cuví ra tari ra sacuaha chi ra, ta musu tari chitoho ra. Tatu yuhu ra cuví chitoho vehe, catyí ñu chii vatyí Beelzebú, cuihna ra cuví nuu, cuví, suri tyicuan caa cucatyí tucu ñu chi ñáyivi cuende.

*Yóo chi tahán chi cuyuhvi yo
(Lc. 12.2-7)*

²⁶ 'Yucuan chaha ma yuhvi ndo chi ñáyivi, vatyí ni noo tuhun xehe ta cuñun, tyi ma natuvi. Ta ni ñahri cha ñohó xehe, ta cuñun tyi ma coto tandihí ñáyivi.

²⁷ Tandihí cha catyí chi ndo nu ñaa iñi, catyí nyoho nu ndichin. Ta tandihí cha catyí chi ndo nu xehe, çana chaa ndo nya xiñi vehe, na coto tandihí ñáyivi.

²⁸ Ma yuhvi ndo chi ñu chahñi coño ñuhu yo, vatyí ma cuví cahñi ñu aña yo. Soco

yuhvi ndo chi ra cuví sanaa coño ñuhu yo ta aña yo chichi anyaya ñandihí.

²⁹ '¿Atu ñima chihin noo xuhun luhlu ri, sata yo uvi tahan saa? Ican. Soco ni noo ti ña canacava ti nu ñuhú tatu ña catyí maa Nyoo Sutu yo.

³⁰ Vatyí nyacua nya ixi xiñi nyoho ta chitó Nyoo yoso tahan nyaá.

³¹ Ma yuhvi ndo. Nyoho, yahvi ca nyaá ndo ta ñima ca ticuítí saa.

*Ma yuhvi yo cahan yo tuhun ra Jesu-
cristo nuu ñáyivi*

(Lc. 12.8-9)

³² 'Tandihí ñu cha cahán vaha tuhin nuu ñáyivi, yuhu tucu cucahan vahi cuenda ñu nuu Suti ra nyaá andívi.

³³ Soco ñu cahán nuu cahan tuhin, yuhu tucu ma cahan tuhun ñu nuu Suti ra nyaá andívi.

*Cha cuenda ra Jesús cusíin ñáyivi
(Lc. 12.51-53; 14.26-27)*

³⁴ 'Ma cuñi ndo vatyí yuhu vachi cuhve cha taxi ri coo ndo siqui ñuhu ñáyivi ihya. Ña vachi cuhve cha taxi ri, soco cha cañi tahan ñáyivi.

³⁵ Vatyí sasiín chi ndo. Vatyí noo ra cahun ra siqui sutu ra. Ta noo ña cahun ña siqui sihi ña. Ta ñu cuví chono cucañi tahan ñu chihin tyiso ñu.

³⁶ Ta tyicuan caa suri ñáyivi chi ndo cucuvi ñu ñu xaan iñi chi ndo.

³⁷ 'Ñu cha cuñí ca chi sutu o chi sihi ican saha chi yuhu, ña tahán chi cuví ñu ñu cuende. Ta ñu cuñí ca chi sehe, ican saha chi yuhu, ña tahán chi cuví ñu ñu cuende.

³⁸ Ta ñu cha ña cuñí nyehe tindocho ta cunyicon ñu chii, ña tahán chi cuví ñu ñu cuende.

³⁹ Vatyí ñu ña cuñí nyehe tindocho cha cuenda yuhu, cunyehe ñu tindocho anyaya, soco ñu nyehé tindocho ta chahá ñáyivi cha catyí yuhu, cucacu aña ñu.

*Yahvi cha tahán chi chi yo
(Mr. 9.41)*

⁴⁰ 'Ñu quehén cuenda chi ndo, chi yuhu quehén cuenda ñu, ta ñu quehén cuenda chi yuhu, quehén cuenda ñu chi ra cha tachí chii.

⁴¹ 'Ñu quehén cuenda noo ra profeta Nyoo cha cuenda vatyí cuenda Nyoo cahán

ra, cuñihi ñu suri tahan yahvi cha cuñihi profeta cuan. Ta ñu quehén cuenda chi noo ra vaha cha cuenda tyi ra vaha cuví ra, suri tahan yahvi cha cuñihi ra vaha cuan cuñihi ñu.

⁴² Ta savahri ñu cha cuhva vasi noo vasu ndutya vichin coho ñu nyihi ihya cha cuenda cha nyicón ñu chii, cuñihi ñu cha cucuhva Nyoo chi ñu —catyí ra Jesús.

11

Ra cha tachí ra Juan nu nyaá ra Jesús (Lc. 7.18-35)

¹ Ndihi chaha ra Jesús tuhun chi uchi uvi ra chicá noo chihin ra, tyicuan ta quita ra yucuan, vatyí cucahan ra tuhun Nyoo chihin ñáyivi cha iyó ñuu cha nyicú ityi cuan.

² Ta ra Juan nu ñohó ra vehe caa, ñihi ra tuhun cha sacuví ra Cristo. Tyicuan ta tachí ra chi uvi ra nyicón chi ra, cundaca tuhun ra noo tuhun chi ra Jesús. Ta cachaa coyo ra nu nyaá ra

³ ta cacatyí ra chi ra:

—¿Atu yoho cuvún ra Cristo cha tahan chi quichi sacacu chi ndi, o cuñí chi cha cuatu ndi chi inga ra? —cacatyí ra chi ra.

⁴ Nacahan ra Jesús ta catyí ra:

—Cuahan ndo ta catyí ndo chi ra Juan cha nyehé ndo, ta cha chiñí ndo.

⁵ Nacatyí ndo chi ra yoso caa nanyehé ñu cuaa, yoso caa nacacá ñu coxo, ta ñu tyahyu coño yoso caa nduvahá ñu, ta yoso caa naciñi ñu soho, ta ñu ndiyi nandoto ñu, ta chihin ñu ndahvi cahán ndi tuhun Nyoo yoso caa sacacu ra ñima ñu.

⁶ Sii xaan cuñí ñu ña chicá uvi iñi nyicón chii.

⁷ Cuhva cha cuahan coyo ra, ra Jesús quichaha cahan ra tuhun ra Juan chihin ñáyivi, ta catyí ra:

—¿Ñáá cha chahan nyoho chinyehe ndo chiqui ndi cuan? ¿Atu chinyehe ndo noo ndoo cha naquisí tatyí? ¿Ñáá cha nyehe ndo?

⁸ ¿Atu nyehe ndo noo ra vaha ñihnó? Ñima. Nyoho chitó ndo vatyí ra ñihnó vaha, nyaá ra vehe rey.

⁹ Tu tyicuan caa, ¿ñáá cha chahan ndo chi nyehe ndo? ¿Atu noo ra cuví profeta?

Ican. Soco noo ra cha cahnu ca cuví ican saha noo profeta cuenda Nyoo.

¹⁰ Vatyí ican ra Juan ihya, cuví cha cahán tuhun nu tutu Nyoo tyehe caa:

Yuhu cuví Nyoo ta tachí chi noo ra cahan tuhun ityi nuu nu cuhun.

Vatyí cucahan ra tuhun chihin ñáyivi nanasama ñu cuhva iyo ñu ta cuatu tuhva ñu quivi quichun.

¹¹ 'Cha ndicha catyí chi ndo, vatyí chichi cha tandihi ñáyivi, ni noo chaha ta coo ca noo ra cahnu ca cuví ican saha ra Juan ra sacondutyá chi ñáyivi. Soco ra cha nyacá ñaha Nyoo ñima, vasi cuví ra noo ra luhlu ca, soco cahnu ca ra ta ñima ca ra Juan.

¹² Nyacua nya quivi cha chaá ra Juan ta nya vityin, cuaha ñu ndachan sahá chii nducú sativi ñu tuhun Nyoo, ña cuñí ñu cha cunyacá ñaha Nyoo ñima ñáyivi.

¹³ Ra Moisés cahan ra tuhun yoso caa nyacá ñaha Nyoo ñima ñáyivi, ta tyicuan caa tucu tandihi ra profeta nyacua nya quivi quichi ra Juan.

¹⁴ Ta tatu cuñí nyoho chino iñi ndo tuhun cahín, catyí chi ndo vatyí profeta Elías cha tahan chi quichi, ra Juan cuví ra.

¹⁵ Yóo ñu cha cutuñi iñi, na tyasoho ñu tuhun cahín.

¹⁶ '¿Yóo chihin sandu inuu ri chi ñáyivi cha iyó tyembu ihya? Tari ra cuatyaa cuví ñu, vatyí chicunyaa ndotyin nuyahvi nyasiqui ndotyin, ta canachaa ndotyin chi ra tahan ndotyin, ta catyí ndotyin tyehe caa:

¹⁷ "Tivi ndi flauta, soco ña chita chaha ndo. Chita ndi yaa cuihya soco ña chacu ndo." Tyicuan caa tucu nyoho, ni noo cuhva ña tahan iñi ndo.

¹⁸ Vatyí quichi ra Juan, cha ña chachi ra ta ña chihí ra, ta nyoho catyí ndo vatyí noo tatyí ña vaha yihí chi ra.

¹⁹ Yahá cuan ta quichi tucu yuhu Rayii cha quichi nya gloria. Ta yuhu chachí ta chihí tandihi, ta catyí ndo tyi ra cuahyi ra tuhvá chihí cuví. Ta ña tahan iñi ndo cha cutahín chihin ra iyó cuatyí ta ra tavá xuhun. Soco vasi ni noo ndi ña naquehén cuenda ndo tuhun cahán ndi, soco Nyoo chahá ra cha chiñi tuñi ra chi ñu naquehén tuhun cahín ta tuhun cahan ra Juan, ta

maa ñu cusañaha chi ndo vatyí vaha cha chiñi tuñi Nyoo —catyí ra Jesús.

Uvi ñuu nu ña tyasohó ñáyivi tuhun Nyoo (Lc. 10.13-15)

²⁰ Tyicuan ta quichaha cahan ra Jesús chi ñu ñuu nu sacuvi ra cuaha milagru, vatyí ñáyivi cuan ña canasama maa ñu cuhva iyó ñu, ta catyí ra:

²¹ —¡Ndahvi nyoho, ñu ñuu Corazin! ¡Ndahvi nyoho ñu ñuu Betsaida! Vatyí nyehé ndo nyatu cahnu ta ña nasama ndo cuhva iyó ndo. Soco ñáyivi ñuu Tiro ta ñuu Sidón cha sanaa Nyoo ta cha naha cha cuenda cuatyí ñu ñahri nyatu cahnu nyehe ñu. Soco tyehe ta nyehe ñu nyatu cahnu quivi cuan tari cha nyehé nyoho vityin, tañi tyehe ri ndihvi noo ñu sahma tucuihya iñi ta cunyaa ñu nu ñiyaa. Tari cuhva costumbre iyó maa ñu, noo seña vatyí ndu uvi iñi ñu cuatyí ñu cuví cuan.

²² Soco catyí chi ndo vatyí quivi cutuñi chi nyoho nuu Nyoo, cahnu ca cha uhvi cunyehe ndo ta ñima ca ñáyivi Tiro ta Sidón.

²³ Ta nyoho ñu ñuu Capernaum, cuñi maa ndo tyi cundaa ndo nya andivi, soco cunoo ndo nya nu nyicú ñu ndiyi. Vatyí tyehe ta cuví milagru ñuu Sodoma cuan, tahán cha cuví ñuu ndo, ñuu cuan coo ca nyacua nya vityin.

²⁴ Soco catyí chi ndo vatyí quivi cutuñi chi nyoho, yaha ca cunyehe ndo tindocho, ta ñima ca ñu ityi ñuu Sodoma cuan.

Cuhva ndo chi ndo chii, ta cuhve cha nyitatu ndo, catyí ra Jesucristo (Lc. 10.21-22)

²⁵ Tyembu cuan catyí ra Jesús chi Nyoo tyehe caa:

—Sutu Mañi yuhu, Nyoo, ra nyacá ñaha andivi ta ñuhu ñayivi. Sacahní chuun vatyí sañahun tuhun maun chi ñu ñahri maa chitó. Ta tixehun tuhun maun chi ñu cha sahá tuhun tyi chitó xaan ta ñu chiñi tuñi ñandihí.

²⁶ Ndicha Sutu Mañi yuhu, vatyí tyicuan caa cuñi maun.

²⁷ Tyicuan ta catyí tucu ra:

—Suti nacuhva cuenda ra tandihí chii. Yori maa ñohó nuu noo cha ndicha chii, soco noo tuhun ri maa Suti ñohó nuu ra chii. Ta yori ñohó nuu noo cha ndicha chi

Suti, soco noo tuhun ri mai, cha cuví Sehe ra chii, ñohó nui chi ra. Ta ñáyivi cha cuñi mai cha cohon nuu chi ra, ican ñu cuan cua cohon nuu chi ra.

²⁸ Tandihí nyoho cha chitatu ndo cha sahá tyiño ndo, ta chihin carga cha nyisó ndo, quichi ndo nu nyaí, ta yuhu cuhve cha nyitatu ndo.

²⁹ Cuhva ndo cha cunyaca ñahi chi ndo ta cutuhva ndo cuhva iyó yuhu. Vatyí yuhu masu iñi ta cama iñi. Tyicuan caa ta ñihi ndo nu nyitatu añima ndo.

³⁰ Ña yhi cha cuhva ndo chi ndo cha cunyaca ñahi. Ta carga cha chahí chi ndo, ñahma.

12

Nu tohón ra cachicá noo chihin ra Jesús yoco trigu quivi nyitatu ñáyivi (Mr. 2.23-28; Lc. 6.1-5)

¹ Noo quivi nyitatu ñáyivi, yaha ra Jesús mahñu nu iyó cha tachí ñu. Ta chaa soco chi ra cachicá noo chihin ra. Ta quichaha catohon ra yoco trigu cuan ta quichaha cachachi ra chiti yoco cuan.

² Cuhva cha cananyehe ra fariseo cha tyicuan caa, cacatyí ra chi ra Jesús:

—Nyehe, ra cachicá noo chuhun sacuvi ra noo cha ña tahán chi sacuvi yo quivi nyitatu yo —catyí ra chi ra.

³ Soco maa ra Jesús catyí ra chi ra:

—¿Atu ta sacuaha ca nyoho cha sacuvi ra David chihin ra tahan ra quivi cha chisoco ra?

⁴ Quihvi ra chichi vehe Nyoo. Ta quehen ra pan ii cha cha yaha catuvi nuu Nyoo. Ta chachí ra ta ña tahán chi cachi ra, ni maa ra ni ra ndihí chihin ra, vatyí maa ri maa tata sutu tahán chi cachi pan cuan.

⁵ ¿O ta sacuaha ca ndo nu ley cha chaha Nyoo chi ra Moisés nu catyí chi vatyí ra cacuvi sutu, ña canyitatu ra quivi nyitatu yo, soco sahá tyiño ra chichi vehe ñuhu? Yucuan nyehé yo vatyí ñima cuatyí cuví cuan.

⁶ Ta catyí chi ndo, vatyí ihya nyaá yuhu cha cuví noo ra cahnu ca ican saha vehe ñuhu.

⁷ Nyoho, ta cutuñi ca iñi ndo nu catyí chi tyehe caa nu tuhun Nyoo: “Cha cuñi yuhu, cha cundahvi cuñi ndo nyehe ndo chi tahan ndo, ta ñima ca cha cahni ndo

quití ta cuhva cuenda ndo chii.” Tyehe ta cutuñí ñni ndo tuhun ihya, ma tyaa ndo cuatyí siqui ñáyivi cha ñahri sacuvi.

⁸ Yuhu cuví Rayi cha quichi nya gloria. Ta iyó ityi chii vatyí catyí chi noo noo ndo ñáá cha sacuvi ndo quivi nyitatu yo —catyí ra Jesús.

Nu nduvaha ra cha ityi ndaha
(Mr. 3.1-6; Lc. 6.6-11)

⁹ Tyicuan ta quitá ra Jesús yucuan, ta cuahan ra vehe ñuhu.

¹⁰ Ta yucuan ñohó noo ra ityi inchiyo ndaha. Ta nyicú tucu suhva ra nducu cuhva yoso caa ta catyaa ra cuatyí siqui ra Jesús. Yucuan chaha candaca tuhun ra chi ra ta catyí ra:

—¿Atu cuví sanduvaha yo chi noo ñu cuhví quivi nyitatu yo? —cacatyí ra chi ra Jesús.

¹¹ Ta nacahan ra Jesús ta catyí ra:

—¿Nya noo nyoho, tatu canacava noo mbee sana ndo chichi noo yavi quivi nyitatu yo, atu ma cuhun ndo ta tava ndo chi ti?

¹² Ta ¿atu ña yahvi ca nyaá noo ñáyivi ta ñima ca noo mbee? Yucuan chaha vatyí tahan chi sacuvi yo cha vaha quivi nyitatu yo —catyí ra.

¹³ Tyicuan ta catyí ra chi ra cha ityi ndaha cuan:

—Sanacaa ndahun —catyí ra.

Ta cuhva cha sanacaa ra, nduvaha ri ndaha ra tari inga chiyo cuan.

¹⁴ Tyicuan ta caquitá coyo ra fariseo cuandatumahan tahan ra yoso caa cacahni ra chi ra Jesús.

Noo profeta, ra chahá cuenda tuhun cahán Nyoo, cahan ra tuhun ra Jesús cha ni cumañi ca cacu ra

¹⁵ Cha chito ra Jesús tuhun tyi canducú ra chi ra, quitá ra yucuan ta cuaha ñáyivi chinyicon chi ra. Ta maa ra sanduvaha ra chi tandihi ñu cuhví.

¹⁶ Ta catyí ra chi ñu tyi ma cahan ñu tuhun vatyí ican ra sanduvaha chi ñu.

¹⁷ Tyicuan caa cuví tacuhva nachino cava tuhun cha tyaa ra Isaías ra cuví profeta Nyoo ta cha naha. Tyehe caa tyaa ra:

¹⁸ Ican ra ihya cuví ra sacuvi tyiño nui, ra cha nacachi vahi.

Cuñí xain chi ra, ta si cuñí chihin ra.

Cusacuti chi ra chihin Tatyí li cha iyó chii.

Ta cusacoto ra chi ñáyivi cha ñima ñu Israel cuví yoso caa sacuvahi chi ñu nui.

¹⁹ Ta ma xaan cahan ra ta ni ma cana chaa ra, ta ni yori cuiñi ndusu ra ityi cahnu.

²⁰ Ta ni noo ndoo yacua, ta ma cahnu ndihi ra.

Ta ni ma ndahva ndihi ra mecha cha caña ñuhma.

Nyacua nya cha sanicoo vaha ra chi ñáyivi chihin ra ta cunyaca ñaha vaha ra aña ñu.

²¹ Ta tandihi ñáyivi, ta chi ra cuquihí ñni ñu.

Nu catyí ñáyivi vatyí ra Jesús, tunyee ñni ra ña vaha iyó chi ra

(Mr. 3.20-30; Lc. 11.14-23; 12.10)

²² Tyicuan ta nu nyaá ra Jesús chinyaca ñu chi noo ra yihí tatyí ña vaha chi, cuaa ra ta ñihí ra. Ta ra Jesús sanduvaha ra chi ra. Ta cuví nacahan ra, ta cuví nanyehe ra.

²³ Iyo xaan cuñí tandihi ñáyivi, ta catyí ñu:

—¿Vasi ra vachi tata rey David cuví chi ra ihya? —catyí ñu.

²⁴ Soco cuhva cha cachiñi ra fariseo tuhun cuan, cacatyí ra:

—Chihin fuerza ra Beelzebú, ra cuví nuu chi cuhna, tavá ra ihya tatyí ña vaha —catyí ra.

²⁵ Soco ra Jesús chitó ra cha cachicá xiñi ra, yucuan chaha catyí ra chi ra:

—Tatu noo gobiernu ta cacusiñ ra, cuaha ri ityi nanduvi ra, cucañi tahan ra chihin tahan ra, ta cundihí tuhun cha canyacá ñaha ra. O tatu noo ñuu o tandihi ñáyivi noo vehe cacusiñ ñu chihin tahan ñu, cutivi nu nyicú ñu.

²⁶ Ta tyicuan caa tucu, tatu cuhna ta tava ra suri ra tahan maa ra, cuñí chi catyí vatyí ña ñin ri cacuví ra, ta cundihí fuerza cha iyó chi ra.

²⁷ Ta nyoho catyí ndo vatyí yuhu tavé tatyí ña vaha chihin fuerza ra Beelzebú. Tu tyicuan caa, ra nyicú chihin maa ndo, ¿yóo cha chaha fuerza vatyí tavá ra tatyí ña vaha? Maa ra na sacoto ra chi ndo cha ndicha, vatyí nyoho tondo ri chicá xiñi ndo.

²⁸ Yucuan chaha catyí chi ndo, vatyí yuhu tave tatyí ña vaha chihin fuerza Tatyí

Ii Nyoo. Ta cuñí chi catyi vatyí ndicha cuii Nyoo ra nyacá ñaha añima ñáyivi cha chaq ra nu canyicú ndo.

²⁹ 'Chichi vehe noo ra ñihi xaan, tari cuihna, ma cuví quihvi noo ra ta quehen ra tandihí cha chíi ra, soco tatu cuhñi xihna ra chí ra tyicuan caa ta cuví tinyaa ra tandihí cha chíi ra.

³⁰ 'Ñáyivi cha ña nyaá tumañi iñi chíi, ñáyivi xaan iñi chíi cuví ñu. Ta tatu ña tyinyeé ndo chíi cha cahán ndo tuhín nuu ñáyivi, cuñí chi catyi vatyí ña chahá ndo cha coto ñáyivi tuhún cahín.

³¹ 'Yucuan chaha catyi chí ndo vatyí Nyoo sahá ra ticahnu iñi cuatyí ñáyivi, ta ñáá cha ña vaha cahán ñu ñandihí, soco cha cahan ña vaha ñu siqui Tatyí Ii Nyoo, yucuan ndicha, ma coo ticahnu iñi cha cuenda ñu.

³² Ta yóo ri ñu cha cahán ña vaha siqui yuhu Rayii cha quichí nya gloria, coo ticahnu iñi chí ñu cha cuenda cuan. Soco ñu cahán ña vaha siqui Tatyí Ii Nyoo, ma coo maa ticahnu iñi chí ñu cha cuenda cuatyí cuan, niri ihya ñáyivi, ta niri inga ñáyivi ñandihí.

Chihin cha sacuvi ri ñáyivi ta nicohon nuu ri yo chí ñu tatu ñu vaha o ñu ña vaha cuví ñu

(Lc. 6.43-45)

³³ 'Noo yutun vaha chahá tun chíti vixi, chíti vaha. Ta noo yutun ña vaha chahá tun chíti ña vaha. Nicohón nuu ri yo tatu yutun vaha cuví tun chihin chíti cha chahá tun.

³⁴ ¡Nyoho, ñu quiñi iyó, tari tata coo xaan cuví ndo! ¿Yoso caa cuví quitá tuhún vaha yuhu ndo, ta ñáyivi quiñi caa añima cuví ndo? Vatyí cha quitá chichi añima yo ican cuan cahán yo.

³⁵ Noo ra vaha cahán ra tuhún vaha vatyí ñohó cha vaha añima ra. Ta ra quiñi iyó, maa maa ri tuhún quiñi caa cahán ra, vatyí cha quiñi caa ñohó añima ra.

³⁶ Ta yuhu catyi chí ndo vatyí quivi cucutuñi chí tandihí ñáyivi, cucuhva ñu cuenda tandihí tuhún cha ña saha ñu cuenda ta cahan ñu.

³⁷ Vatyí yoso cuhva cahún, yucuan cuhva cucutuñi chuun, tatu iyó o ñahri cuatyun.

Ñu quiñi iyó cuñí ñu nyehe ñu seña milagru

(Mr. 8.12; Lc. 11.29-32)

³⁸ Tyicuan ta suhva ra fariseo ta ra sacuahá ley vehe ñuhu cacatyí ra chí ra Jesús tyehe caa:

—Maestro, cuñí ndi vatyí sacuvun noo seña milagru vatyí nyehe ndi.

³⁹ Ta nacahan ra Jesús ta catyi ra:

—Ñu quiñi iyó ta ñu nyicón inga nyoo cuñí ñu nyehe ñu seña milagru. Soco ma nyehe ca ñu inga seña, noo ri seña ra Jonás ra profeta Nyoo, yucuan ri cunyehe ñu.

⁴⁰ Vatyí tari ñohó ra Jonás chichi tiyaca cahnu cuan uñi quivi ta uñi ñuu, tyicuan caa cucohon yuhu Rayii cha quichí nya gloria chichi ñuhú uñi quivi ta uñi ñuu.

⁴¹ Ta quivi cucutuñi chí tandihí ñáyivi, cundicuita ñu chiyo ñuu Ninive ta cha naha ta cucatyí ñu na tachi tuñi Nyoo chí nyoho ñáyivi cha iyó vityin, ta cucatyí ñu vatyí cucunaa ndo, vatyí maa ñu cha cuví ñu ñuu Ninive, canasama ñu cuhva iyó ñu quivi cahan ra Jonás tuhún Nyoo chihin ñu. Ta ihya nyaá ra cahnu ca cuví ta ñima ca ra Jonás.

⁴² Vatyí tyicuan caa tucu ñaha cha cuví reina ityi Sur, cundicuita ña quivi cucutuñi chí ñáyivi ta cucatyí ña vatyí cucunaa nyoho ñu iyó vityin, vatyí maa ña, vasi cañi ñuu ña soco quichí ña, quichí tyasoho ña tuhún cha chíti tuñi ra Salomón. Ta ihya cahnu ca cuvi ra cha cahán chihin ndo vityin ta ñima ca ra Salomón.

Yoso caa ndichi tucu tatyí ña vaha inga chaha añima ñáyivi tatu naa iñi ñu chí Nyoo

(Lc. 11.24-26)

⁴³ "Tatu noo tatyí ña vaha quita chí añima noo rayii, chicá noo chí noo nu ityi, nanducú chí noo nu nyitatu chí, soco ña nañihi chí nu nyitatu chí. Tyicuan ta ndichi xiñi chí:

⁴⁴ "Cunuhu tiqui nya vehi nu quite." Yucuan ta nachaa chí añima ra nu quita chí. Ta nanyehé chí vatyí ndii xaan, ta yori nyaá.

⁴⁵ Tyicuan ta cuanaquehen chí ucha ca tahan tatyí ña vaha, cha yaha ca cuhva ican saha maa chí. Tyicuan ta quihvi tandihí tatyí ña vaha cuan añima ra cuan. Yucuan

chaha, quiñi ca cunicoo ra ta ñima ca cuhva chiyo maa ra. Ta tyicuan caa cucuvi chi ñáyivi quiñi iyó ihya —catyí ra Jesús.

Tari yañi ra Jesús ta tari sihi ra cuví chi ñáyivi sacuví cuhva catyí Nyoo
(Mr. 3.31-35; Lc. 8.19-21)

⁴⁶ Ni cahán ca ra Jesús chihin ñáyivi, ta chaá sihi ra ta yañi ra, ta ndoo ñu chata vehe, ta cuñi ñu cahan ñu chihin ra.

⁴⁷ Tyicuan ta sacoto noo ñáyivi nyaá cuan chi ra Jesús, ta catyí ñu:

—Sihun ta yañun nyicú ñu chata vehe. Ta cuñi ñu cahan ñu chuhun.

⁴⁸ Tyicuan ta nacahan ra Jesús ta catyí ra chi ñu:

—¿Yóo cha cuví sihi ta yañi? —catyí ra.

⁴⁹ Tyicuan ta sañaha ndaha ra chi ra cachicá noo chihin ra, ta catyí ra:

—Ican ra ihya cuví sihi ta yañi.

⁵⁰ Vatyí tandihi ñáyivi cha sacuvi cuhva cuñi Suti ra nyaá andivi, ican ñu cuan cuví yañi, ta cuhve, ta sihi —catyí ra Jesús.

13

Tari noo ra chicá noo tachí, tyicuan caa cuví ra cahán tuhun Nyoo chihin ñáyivi
(Mr. 4.1-9; Lc. 8.4-8)

¹ Quivi cuan quita ra Jesús vehe ra ta chicunyaá ra yuhu miñi.

² Ta chaha cha cuaha ñáyivi nataca nu nyaá ra, quihvi ra chichi noo canoa ta chicunyaá ra. Ta tandihi ñáyivi ndoo ñu nyicú ñu nu ñiti cuan.

³ Tyicuan ta cuaha ri cha quichaha sañahá ra chi ñu chihin noo cuhva ta catyí ra:

—Noo chaha quita noo ra, tachí ra chiti trigu.

⁴ Ta nu cuahan ra quití ra chiti cuan, canacoyo suhva chiti cuan yuhu ityi. Ta quichi coyo saa ta cachachí ti.

⁵ Ta suhva ca canacoyo ticu yuu, nu ña cuaha ñuhú yihí. Ta yucuan caña chiti cuan cha numi ri vatyí ña cuaha ñuhú yihí chaha.

⁶ Soco cuhva cha caña ñanyii ñn na ityi ri tun, vatyí ña cono yihí yoho tun.

⁷ Suhva ca chiti canacoyo ticu iñu. Ta chahnu iñu cuan. Ta chasi chi nuu tun. Yucuan chaha ña chiyó chiti tun.

⁸ Soco suhva ca canacoyo nu ñuhú vaha. Ta quivi cachahnu tun, vaha xaan cachaha tun chiti, vatyí yihí tun noo cientu chiti chaha tun cha noo ri maa tun. Ta inga tun uñi xico, ta inga tun oco uchi chiti chaha tun.

⁹ ¡Tatu cutuñi iñi ndo, tyasoho ndo!

Nu sacoto ra Jesús ñáá tuhun cha chihin cuhva ri cahan ra ta ña cahán cachi ra
(Mr. 4.10-12; Lc. 8.9-10)

¹⁰ Tyicuan ta tuhva ra cachicá noo chihin ra Jesús, ta candaca tuhun ra chi ra, ta catyí ra:

—¿Ñáá tuhun cha chihin cuhva ri cahún chihin ñáyivi, ta ña cahán cachun chihin ñu? —cacatyí ra.

¹¹ Ta nacahan ra Jesús ta catyí ra:

—Chi nyoho sacotó Nyoo tuhun xehe, yoso caa nyacá ñaha ra, soco chi maa ñu ña chahá ra cha coto ñu.

¹² Vatyí ñáyivi cutuñi iñi tuhun cahín ta sacuví ñu, cuaha ca cucutuñi iñi ñu. Ta ñáyivi cha chiin ri cutuñi iñi, ta ña cuñi ñu sacuvi ñu, cutinyaa ndihi cha cutuñi iñi ñu.

¹³ Yucuan chaha vatyí chihin cuhva ri cahín chihin ñu, tacuhva nyehe ñu ta cuví chi tari cha ña ndichin nyehe ñu. Ta cuiñi ñu soco ma cutuñi iñi ñu, tari cha ña chiñi ñu cuví cuan.

¹⁴ Ta tyicuan caa ta chinó cava tuhun cha cahan ra Isaías ra profeta Nyoo ta chaha, ta catyí ra:

Cha ndicha vatyí nyoho cuiñi ndo tuhun, soco ma cutuñi iñi ndo. Ta cunyehe ndo cha sacuví, ta ma cutuñi iñi ndo.

¹⁵ Vatyí cha ndundava aña ñáyivi ihya, ta ña cachi vaha chiñi ñu.

Ta tahán nuu ñu, Tacuhva cha ma nyehe ñu chihin chiti nuu ñu.

Ta ma cuiñi ñu chihin soho ñu.

Ta ni ma cutuñi iñi ñu chihin aña ñu.

Ta ni ma nanducu ñu chii, tacuhva sanduvahi chi ñu.

¹⁶ 'Soco sii xaan cuví chi nyoho, vatyí nyehé ndo chihin chiti nuu ndo, ta chiñi ndo chihin soho ndo.

¹⁷ Cha ndicha catyí chi ndo, vatyí cuaha ra cacuvi profeta Nyoo ta cuaha ñáyivi vaha, cacuñi ñu nyehe ñu cha nyehé nyoho cha sacuví, soco ña nyehe ñu. Cuñi ñu cuiñi

ñu tandihí tuhun cha chiñi nyoho vityin, soco ña chiñi ñu.

Nu catyí ra Jesús ñáá cha cuñi chi catyi cuhva cha cahán ra
(Mr. 4.13-20; Lc. 8.11-15)

18 Tyasoho ndo ñáá cha cuñi chi catyi noo cuhva cha catyi chi ndo tuhun ra cha tachí chiti trigu cuan:

19 Ñáyivi cha chiñi tuhun yoso caa cuñi Nyoo cunyaca ñaha ra añima ñu, ta ña cutuñi ñi ñu, tari nu canacoyo chiti yuhu ityi, tyicuan caa cuví ñu. Vatyí quichí cuhna ta tava ra tuhun Nyoo cha caa añima ñu.

20 Ta tari nu canacoyo chiti tucu yuu cuan, tyicuan caa cuví tucu ñáyivi cha chiñi tuhun Nyoo, ta si xaan cuví chi ñu naquehen cuenda ñu noo ri cuhva.

21 Vatyí nu caña chiti tucu yuu cuan, chiin ri ñuhú yihí chaha. Yucuan chaha caña soco ña cuví tyihi yoho chi. Ta tyicuan caa ñu cuan. Suhva ri quívi chinó ñi ñu. Soco quívi cha quichaha nyehe ñu tindoho, ta satasi ñi ñáyivi chi ñu cha cuenda tuhun Nyoo ta sandihí ri ñu tuhun cha chinó ñi ñu.

22 Ta tari nu canacoyo chiti chichi ñu cuan, tyicuan caa cuví tucu inga ñu cha chiñi tuhun Nyoo. Chiñi ñu, soco ña cuñi ñu sacuvi ñu tari cuhva chiñi ñu. Vatyí nyaá xaan ca xiñi ñu tuhun tindoho ñáyivi ican saha tuhun Nyoo. Ta nyiyo ca ñi ñu cha tyayii. Ta tandihí tuhun cuan sayanga chi chi ñu, ta ña chahá nanducu vaha ñu chi Nyoo.

23 Soco tari nu canacava chiti nu ñuhu vaha, tyicuan caa cuví ñu chiñi tuhun Nyoo, ta cutuñi ñi ñu, ta sacuvi ñu tandihí tuhun cahán ra. Yihí ñu cuví ñu tari yutun cha chaha noo cientu chiti, ta inga ñu tari yutun cha chaha uñi xico, o tari yutun cha chahá oco uchi chiti noo noo tun.

Nu catyí ra Jesús yoso caa cuahan tuhun trigu ta cuhu ña vaha

24 Ta chaha tucu ra Jesús inga cuhva ihya chi ñu; ta catyí ra:

—Cha nyacá ñaha Nyoo añima ñáyivi cuví chi tari noo ra cha tachí chiti trigu nu noo ñuhú.

25 Soco cuhva cha caquixí tandihí ra casahá tyiño cuan, quihvi noo ra xaan ñi

chi ra, ta tachí ra chiti cuhu ña vaha, ta cuahan ra.

26 Ta quívi caña chiti trigu cuan, ta caña yoco chi, ta yucuan na tuvi tucu cuhu ña vaha cuan.

27 Tyicuan ta ra cacuví musu, cachahan ra chicatyí ra chi chitoho ra: “Tata, tatu maa maa ri maa chiti trigu tachun, ¿nya quita cuhu ña vaha cuan?” cacatyí ra.

28 Ta nacahan ra cuan ta catyí ra: “Iyó noo ra xaan ñi chi yo tachí.” Tyicuan ta musu cuan, catyí ra chi chitoho ra: “¿Atu cuñún cha cuhun ndi ta tohon ndi cuhu ña vaha cuan?”

29 Soco chitoho ra catyí ra: “Ma tohon ndo, coto cuhva cha tohon ndo cuhu ña vaha cuan, ta coyo ndihí trigu cuan.

30 Saña ndo, na cuahnu maa chi ñin ri chihin trigu cuan, tyicuan ta quívi cunicoñehi tyiño sahi, cutachi chi ra casaha tyiño cutohon xihna ca ra cuhu ña vaha cuan ta cuhñi ra cuenda sucun, vatyí cahmi ra. Ta yaha cuan ta canaquehen vaha ra cha vaha cuan chichi yaque.”

Nu catyí ra Jesús vatyí tari chiti mostaza cuví cha nyacá ñaha Nyoo añima yoo
(Mr. 4.30-32; Lc. 13.18-19)

31 Tyicuan ta catyí tucu ra Jesús inga cuhva ihya chi ñu:

—Cha nyacá ñaha Nyoo añima ñáyivi cuví chi tari noo chiti yutun cha nañi mostaza cha tachí noo ra nu ñuhú ra.

32 Vatyí ican chiti cuan cuví cha luhlu ca ican saha tandihí ca chiti. Soco quívi chahnun tun cuví tun noo yutun cahnu vavaha. Ta quichí coyo saa, ta casavahá ti taca ti nuu tun —catyí ra Jesús.

Nu catyí ra Jesús vatyí tari yuchan iya cuví cha nyacá ñaha Nyoo añima ñáyivi
(Lc. 13.20-21)

33 Ta catyí tucu ra Jesús inga cuhva ihya:

—Cha nyacá ñaha Nyoo añima ñáyivi cuví chi tari yuchan iya cha nasaca noo ñaha chihin uñi cuhva yutyi pan. Vatyí tari ndaa tandihí pan cuan chihin yuchan iya cuan, tyicuan caa cuahan nducuaha ca ñu nyacá ñaha Nyoo añima —catyí ra.

Yoso caa chotyíño ra Jesús noo cuhva cha cahán ra
(Mr. 4.33-34)

³⁴ Tandihí tuhun ihya cahan ra Jesús chihin ñáyivi chihin cuhva ri. Ta tandihí tuhun cha catyí ra chí ñu soco maa maa ri chihin noo cuhva ri.

³⁵ Tyehe caa sacuvi ra tacuhva chino cava tuhun cha cahán ra profeta ta cha naha ta tyaq ra tyehe caa:

Chihin cuhva ri cucahin chihin ñáyivi.

Cucatyí chí ñu tuhun cha ñohó xehe nyata savaha Nyoo ñuhu ñáyivi.

Nu catyí ra Jesús ñáá cha cuñí chí catyí tuhun cuhu ña vaha cha cañá mahñu chiti trigu cuan

³⁶ Tyicuan ta sacunuhu ra Jesús chí ñáyivi, ta ndihvi ra chichi vehe. Ta catuhva ra cachicá noo chihin ra chí ra, ta catyí ra chí ra:

—Nacatyí chí ndi ñáá cha cuñí chí catyí tuhun cha cañá cuhu ña vaha cuan nu ñuhu cuan.

³⁷ Tyicuan ta quichaha catyí ra Jesús chí ra:

—Ra cha tachí chiti trigu cuan ican cuví yuhu Rayí cha quichí nya gloria.

³⁸ Ta ñuhú cuan, ican cuví ñáima ñáyivi iyó siqui ñuhu ñáyivi. Ta chiti trigu cuan ican cuñí chí catyí ñáyivi cha nyicón chí Nyoo, ta chiti cuhu ña vaha cuan cuñí chí catyí ñáyivi cha nyacuví cuhva cuñí ra ña vaha.

³⁹ Ra cha tachí cuhu ña vaha cuan, ican cuví cuhna ra xaan iñi chí Nyoo. Ta quivi cunacoñehe ra tyiño saha ra, ican cuví quivi cucunaa ñuhu ñáyivi. Ta ra cha cunacoñehe chiti cuan, ican cuví ra cacuví ángel.

⁴⁰ Tari nasataca ra cuhu ña vaha cuan vatyí cayú chí, tyicuan caa cucuvi quivi naa ñáyivi.

⁴¹ Yuhu Rayí cha quichi nya gloria cuchi chí ángel cunasataca ra chí ñu sacco cuatyí inga ñu, ta ñu cha sacuví cha ña vaha.

⁴² Ta cutyihí ra chí ñu chichi horno nu cayú ñuhu. Ta cucuacu ñu ta cusacahñi ñu noho ñu.

⁴³ Ta ñu cha sacuví cuhva cuñí Nyoo cutuvi ñu nuu Nyoo Sutu yo. Ta tari cha ndichin ñanyii, tyicuan caa cucuvi ñu. Tatu cutuñí iñi ndo, tyasoho ndo tuhun cahín.

Noo xuhun cuaan cha ñohó xehe

⁴⁴ Cha nyacá ñaha Nyoo ñáima ñáyivi cuví chí tari noo xuhun cuaan ñohó xehe chichi ñuhú. Ta noo ra nañihí xuhun cuaan cuan, soco natyihí xehe tucu ra inga chaha ta sii xaan cuñí ra cuanuhu ra ta xico ra tandihí cha iyó chí ra, ta satá ra ñuhu nu ñohó xehe xuhun cuaan cuan.

Noo cuhva cha cahan ra Jesús cuenda noo perla cha yahvi xaan nyaá

⁴⁵ Ta cha nyacá ñaha Nyoo ñáima ñáyivi, cuví tucu chí tari noo ra satá ta naxicó perla finu.

⁴⁶ Ta cuhva cha ñihí ra noo cha yahví vavaha nyaá, ta xico ra ndi maa cha cumí ra, ta satá ra perla vaha cuan.

Nu sañahá ra Jesús noo cuhva cuenda tarraya

⁴⁷ Ta suri cuví tucu cha nyacá ñaha Nyoo ñáima ñáyivi tari tarraya cha cañí ra nu tyañuhu, ta ñihí ra ndihí nuu tiyaca chihin.

⁴⁸ Ta cuhva cha chitu tarraya cuan chihin tiyaca, catava ra ityí nu ñiti, ta yucuan canacachí ra chí ti, canaquehen vaha ra chí quiti vaha chichi noo tica, ta sacuita ra chí quiti ña vaha cuan.

⁴⁹ Ta tyicuan caa cucuvi quivi naa ñáyivi, cuquichí coyo ángel, quichí tava sin ra chí ñu vaha ta ñu ña vaha.

⁵⁰ Ta cutyihí ra chí ñu ña vaha cuan chichi anyaya nu cayú ñuhu, nu cucuacu ñu ta cusacahñi ñu noho ñu.

Nu sañahá chí vatyí vaha tuhun chahnu ta tuhun chaa Nyoo

⁵¹ Tyicuan ta ra Jesús ndaca tuhun ra chí ra cachicá noo chihin ra, ta catyí ra:

—¿Atu cutuñí iñi ndo tandihí tuhun ihya?

Ta nacahan ra ta cacatyí ra:

—Ay, Sutu Mañi yuhu. Cutuñí iñi ndi.

⁵² Tyicuan ta catyí ra Jesús chí ra:

—Tatu noo ra sacuahá cuenda ley vehe ñuhu, ta cutuhva ra tuhun yoso caa nyacá naha Nyoo ñáima ñáyivi, cumí ra cha vaha tuhun chahnu Nyoo, ta cumí tucu ra tuhun chaa cha sañahí. Ta cuví ra tari noo ra cuví nuu, ra chitó ta sañahá ra tuhun chahnu ta tuhun chaa cha sañahí —catyí ra Jesús.

Nu ñohó ra Jesús Nazaret ñuu nu chahnu ra
(Mr. 6.1-6; Lc. 4.16-30)

⁵³ Ndihi cahan ra Jesús cuhva ihya ta cuahan ra.

⁵⁴ Ta nachaa ra ñuu ra. Ta yucuan quichaha sañaha ra chichi vehe ñuhu ñuu cuan. Ta iyo cuñi ñáyivi ta catyí ñu:

—¿Nya maa maa cutuhva ra ihya cha chiñi tuñi xaan ra? ¿Ta yoso caa cuví sacuvi ra milagru?

⁵⁵ Vatyí sehe ra satyá vitu cuan cuví chi ra. Ta cu María cuví sihi ra. Ta yañi ra cuví chi ra Jacobo, ta ra José, ta ra Simón ta ra Judas.

⁵⁶ Ta cuhva ra ñandihí, iyó ñu ityi nu iyó yo. Tu tyicuan caa, ¿nya maa maa cutuhva ra tandihí tuhun ihya? —catyí ñu.

⁵⁷ Ta yucuan chaha ña cuñi ñu quichaha ñu chi ra. Soco ra Jesús catyí ra chí ñu:

—Tandihí ñáyivi tandihí ri ityi sahá ñu ñáyivi chí ra profeta. Soco ña quichahá ñu chí ra tatu ra ñuu ñu, o ra vehe ñu cuví chí ra —catyí ra.

⁵⁸ Ta ña cuaha milagru sacuvi ra yucuan cha cuenda vatyí ña chinó iñi ñu chi ra.

14

Nu catyí chi yoso caa chihí ra Juan ra sacondutyá

(Mr. 6.14-29; Lc. 9.7-9)

¹ Quivi cuan ra Herodes, ra cuví gobiernu nicahnu nu cuví Galilea, ñihí ra tuhun ra Jesús.

² Ta catyí ra chí ra nyicú chihin ra:

—Ican ra cuan cuví ra Juan ra sacondutyá chí ñáyivi, ra cha chihí ta vityin nandotó ra. Yucuan chaha iyó tunyee iñi chí ra cha sacuvi ra milagru.

³⁻⁴ Tyicuan caa catyí ra vatyí suri maa ra tyihí tyiño ta catiñ ra chí ra Juan. Ta chahñi ra chí ra chihin cadena, ta tyihí ra chí ra vehe caa. Tyicuan caa sacuvi ra tyi xaan cuñi ra tyi catyí ra Juan tyi ña vaha cha nyaá ra chihin cu Herodías cha cuví ña ñasihí yañi ra ra Felipe.

⁵ Ta yucuan chaha, ra Herodes, cuñi ra cahñi ra chí ra Juan, soco yuhvi ra chí ñáyivi, vatyí tandihí ñu chinó iñi ñu tyi ra Juan cuenda Nyoo cahán ra.

⁶ Soco noo quiñi cha vico ra Herodes, ta quichahá chita chaha sehe cu Herodías nu

nyicú ñu vico cuan. Ta tahañ xaan iñi ra Herodes.

⁷ Ta tyaa ra cuhva vatyí cuhva ra ñáá ri cha cacán ñaha tyivaa cuan, ta ma nacahnu ra tuhun cahan ra.

⁸ Tyicuan ta tyiyuhú sihi ña chí ña, na catyí ña chí ra Herodes tyehe caa:

—Cuhva xiñi ra Juan ra sacondutyá ñáyivi chí nu noo coho —catyí ña.

⁹ Cha chíñi rey Herodes tuhun cahañ ña, nducuihya cuñi ra. Soco cha cuenda cha tyaa ra cuhva vatyí cuhva ra ñáá ri cha cacán ña nuu ñu canyicú vico cuan ta ma cuvi nacahnu ra, yucuan chaha tachí ra nacuhva ra xiñi ra Juan chí ña.

¹⁰ Ta tachí ra tyiño na cutahnya sucun ra Juan nu ñohó ra vehe caa.

¹¹ Tyicuan ta caquichí nyaca ra xiñi ra, yihí noo nu coho. Ta cachaha ra chí ñaha tyivaa cuan. Ta maa ña nacuhva cuenda ña chí sihi ña.

¹² Tyicuan ta chaá coyo ra canyicon chí ra Juan ta canaquehen ra coño ñuhu ra, ta catyihí ra chichi ñuhu. Ta yaha cuan ta chahañ coyo ra chisacoto ra chí ra Jesús.

Nu chahá ra Jesús cha cachi ohon mil rayñi

(Mr. 6.30-44; Lc. 9.10-17; Jn. 6.1-14)

¹³ Cha chito ra Jesús tuhun ihya, quehen ra noo canoa, ta cuahan noo tuhun ri maa ra noo nu taxi ri iyó. Soco chito ri ñáyivi, ta quitá coyo ñu ñuu ñu, ta cuahan coyo ñu chata ra ityi nu ñuhú.

¹⁴ Cha quitá ra Jesús chichi canoa cuan, nanyehé ra cuaha xaan ñáyivi. Ta cundahvi xaan cuñi ra nyehé ra chí ñu. Ta sanduvaha ra chí ñu cuhvi cha chaá chihin ñu.

¹⁵ Ta vatyí cha cua cuaa, ra cachicá noo chihin ra Jesús cha coyo ra, ta catyí ra chí ra:

—Cha iñi xaan, ta yori ñáyivi iyó yatyin ri ihya. Yucuan cuenda natachi chí ñáyivi ihya na cunuhu coyo ñu nya ñuu cusata ñu cha cachi ñu —cacatyí ra chí ra Jesús.

¹⁶ Ta ra Jesús catyí ra:

—Ña tahañ chí cuhun ñu. Cuhva maa ndo cha cachi ñu.

¹⁷ Ta nacahañ ra ta cacatyí ra:

—Noo tuhun ohon tahañ siñ pan ta uvi tahañ siñ tiyaca cumí ndi.

18 Ta catyí ra Jesús:

—Nyāca ndo chii.

19 Tyicuan ta tachí ra tyiño na cunyicu ñáyivi nu cuhu cuan. Yahā cuan ta quehen ra ohon tahan pan cuan, ta ni nduvi tiyaca cuan. Ta nanyehe ndaa ra andivi, ta nacuhva ra tyahvi nyoo chi Nyoo ta tahvi ra pan cuan. Ta chahā ra chi ra cachicá noo chihin ra, na casacha ra chi ñáyivi cuan.

20 Ta tandihi ñu cachachí ñu ta ndaha iñi ñu. Yahā cuan ta canasatacā ra yiquin cha ndoo. Ta quitā uchi uvi tahan tica.

21 Ta cha tandihi ñu cachachí cuan, quitā ta cha ohon mil cha maa ri maa rayi. Ta ña quihvi cuenda ñusihi ni ra cuatyaa.

*Nu chicá ra Jesús nu ndutya
(Mr. 6.45-52; Jn. 6.16-21)*

22 Ta cha yaha tuhun cuan ta catyí ra Jesús chi ra cachicá noo chihin ra, na quihvi coyo ra chichi canoa, vatyi cayaha sava ra miñi cuan ta cuhun coyo ra inga chiyo. Ta niri ca cha cuahan coyo ra cuan, ra Jesús ndoo ra natachi ra chi ñáyivi na cuhun coyo ñu.

23 Cha yahā cha natachí ra chi ñu cuan, ta ndaa ra yucu cuan cua cacan tahvi noo tuhun ri maa ra chi Nyoo. Ta yucuan ñohó ra ta cuaa ndihi.

24 Ta cha ni ri ca cha chicán tahvi ra cha cuahan vavaha canoa cuan nya mahñu miñi. Ta ndutya miñi cuan cañi chi chi canoa cuan cha cuenda vatyi ñihi xaan caá tatyí nu cuahan coyo ra.

25 Ta cuhva cha ñaa ca cuan cua tuhva ra Jesús nu cuahan coyo ra chihin canoa cuan suri chicá ra nu ndutya.

26 Ta cuhva cha cananyehe ra chi ra, chicá ra nu ndutya cuan, canayuhvi xaan ra. Ta cacana chaa vavaha ra, ta catyí ra:

—¡Noo cha sayuhvi cuví!

27 Soco nacahan ra Jesús chihin ra, ta catyí ra:

—¡Sanñi ndo iñi ndo, yuhu cuví, ma yuhvi ndo! —catyí ra.

28 Tyicuan ta nacahan ra Pedro ta catyí ra:

—Sutu Mañi yuhu, tatu icon cuvún, catyi na quichi yuhu nu ndutya chiña nyacua nya nu vachun.

29 Ta ra Jesús catyí ra chi ra:

—Ñaha.

Tyicuan ta noo ra Pedro nu canoa cuan, ta quichahā chica ra nu ndutya vatyi cuhun ra nu vachi ra Jesús.

30 Soco cuhva cha tuví iñi ra tyi ñihi xaan fuerza tatyí cuan, nayuhvi ra ta quichaha nducu nyee ra, ta quichaha cana chaa ra ta catyí ra:

—¡Sacacu chii, Sutu Mañi yuhu!

31 Ta caa cuhva ri cuan, ta tñn ra Jesús ndaha ra, ta catyí ra chi ra:

—¡Chiin xaan chinó iñun chii! ¿Ñáá tuhun cha nacaca uvi iñun? —catyí ra Jesús chi ra.

32 Ta cuhva cha ndaa coyo ra nu canoa cuan, cutaxin ri tatyí cuan.

33 Tyicuan ta ra cañohó chichi canoa cuan cachicuiñi chiti ra nuu ra Jesús, ta cacatyí ra chi ra:

—Ndicha ndicha cuii vatyi Sehe Nyoo cuví chuun —cacatyí ra.

*Nu sanduvahā ra Jesús chi ñu cuhvi ñuu
cha nyicú nicacahnu Genesaret*

(Mr. 6.53-56)

34 Cha cayahā sava ra miñi cuan, cachaa coyo ra nu cuví Genesaret.

35 Ta cuhva cha canicohon nuu ñáyivi iyó yucuan chi ra Jesús, sacoto ñu chi tandihi ñáyivi ityi cuan. Ta quichí nyaca ñu tandihi ñu cuhvi nu nyaá ra.

36 Ta chacú ndahvi ñu nuu ra, na cuhva ra tñn ñu vasi chiin sahma ra. Ta tandihi ñu tñn sahma ra, nduvahā ñu.

15

*Nu sañahá chi ñáá cha sativi chi ñáyivi
(Mr. 7.1-23)*

1 Tyicuan ta suhva ra cacuví fariseo ta ra casacuaha ley vehe ñuhu quitā coyo ra Jerusalén. Ta chaa coyo ra nu nyaá ra Jesús ta candacā tuhun ra chi ra, ta catyí ra:

2 —¿Ñáá tuhun cha ña sacuví ra cachicá noo chuhun costumbre cha sañahá ra cacuví mandoñi ñuu yo? Vatyi ña canacatyá ra ndaha ra tari cuhva cha tahán chi, tatu cuacachi ra xita —cacatyí ra.

3 Soco ndacā tuhun ra Jesús chi ra, ta catyí ra:

—¿Ñáá tuhun cha ña quichahá tucu nyoho tuhun cahán Nyoo ta ñihi xaan ca quichaha ndo costumbre maa ndo?

⁴ Vatyí Nyoo catyí ra: “Saha ndo ñáyivi chi sutu ndo ta chi síhi ndo. Ta tandíhi ñu cha cahán ña vaha chi sutu o chi síhi, na cúvi ñu”, catyí Nyoo.

⁵ Soco nyoho catyí ndo tyi noo ñáyivi cuví catyí ñu chi sutu ñu o chi síhi ñu tyehe caa: “Ma cuvi tyinyei chuun vatyí tandíhi cha iyó chii cha yahá chahá cuende chi Nyoo.”

⁶ Ta tatu cha catyí ndo tyicuan caa, ña cuñí ca chi cha tyinyee ca ndo chi sutu ndo o chi síhi ndo, catyí ndo. Ta tyicuan caa sacuchiyó xiin ndo tuhun cha catyí Nyoo tyi sacuvi ndo, vatyí cuñí ndo sacuvi maa ndo cuhva costumbre maa ndo.

⁷ ¡Nyoho cha sahá ndo tyi vaha ndo! Ndicha vaha tuhun cha tyaá ra Isaías, ra profeta Nyoo ta cha naha nu catyí Nyoo tuhun ndo tyehe caa:

⁸ Ñáyivi ihya, chihin yuhu ri ñu catyí ñu tyi cuñí ñu chii.

Soco ñima chihin tandíhi añima ñu, tyi siin nu nyaá xiñi ñu.

⁹ Ta ñahri maa tuhun cha sacahnú ñu chii. Vatyí cha sañahá ñu maa maa ri cuhva sañahá ñáyivi ri cuví, tyehe caa tyaá ra Isaías tuhun ndo, catyí ra Jesús.

¹⁰ Tyicuan ta caná ra chi ñáyivi ta catyí ra chi ñu:

—Tyasoho ndo, ta cutuñi iñi ndo tuhun cahín.

¹¹ Vatyí cha quihví yuhu ñáyivi, ñima cuan sativí chi ñu nuu Nyoo. Soco cha quitá yuhu ñu, ican cuan sativí chi ñu.

¹² Tyicuan ta catuhvá ra cachicá noo chihin ra Jesús ta candacá tuhun ra chi ra, ta catyí ra:

—¿Atu chitón vatyí ra fariseo quiñi xaan cuñí ra cha cachiñi ra tuhun cahún?

¹³ Soco maa ra Jesús nacahan ra:

—Tandíhi yutun cha ña tachí Suti, ra nyaá andiví, cucoyo tun nya yoho tun.

¹⁴ Saña ndo chi ra vatyí ra cuaa cacuví ra, ta casañahá ra ityi chi inga ra cuaa. Ta tatu noo ra cuaa ta sañahá ra ityi chi inga ra cuaa, ni nduvi ra cucanacoyo ra chichi noo yavi.

¹⁵ Tyicuan ta quichaha catyí ra Pedro chi ra Jesús:

—Nacatyí chi ndi ñáá cha cuñí chi catyí cuhva cha cahun cuan.

¹⁶ Tyicuan ta ra Jesús catyí ra chi ra:

—¿Atu ni nyoho ta ña cutuñi iñi ndo?

¹⁷ ¿Atu ña cutuñi iñi ndo vatyí cha quihví ityi yuhu yo, chichi yo cuahan? Yahá cuan ta quita tucu.

¹⁸ Soco tuhun cha quitá yuhu yo, chichi añima yo quitá, ta ican cuan cuví cha sativí chi ñáyivi nuu Nyoo.

¹⁹ Vatyí nya chichi añima ñu quitá cha quiñi caá chicá xiñi ñu. Ta cuñun, cha chahñi ñu chi ñáyivi, cha quichi cuvi iñi ñu coo ñu chihin inga ñu cha ñima ñasihí ñu cuví. Ta tandíhi ca cha quiñi caa cha sacuvi ñu chihin coño ñuhu ñu. O yihí ñu cha suhu ñu cha chii ñáyivi. O sandaví ñaha ñu. O cahán ndasi ñu.

²⁰ Ican cuan cuví cha sativí chi ñáyivi. Soco cha ma sacuvi ñu costumbre cha nacatyá xaan ñu ndaha ñu cha ni cumañi ca cachi ñu, ña sativí cuan chi ñu —catyí ra Jesús.

Nu nachino iñi noo ñaha inga ñuu chi ra Jesús

(Mr. 7.24-30)

²¹ Quitá ra Jesús ñuu cuan ta cuahan ra ityi ñuu Tiro ta ñuu Sidón.

²² Ta noo ñaha ñuu Canaan iyó ña ityi cuan, suri caná chaa ña vachi ña nu vachi ra Jesús, ta catyí ña:

—Sutu Mañi yuhu, ra vachi tata rey David cuvún. Cundahvi cuñi nyehun chii, vatyí sehi yihí noo tatyí ña vaha chi ña, ta nyehé xaan ña tindoho —catyí ña.

²³ Soco ra Jesús ña nacahan ra nu cahán ña. Tyicuan ta tuhva ra cachicá noo chihin ra chi ra ta cachacu ndahvi ra nuu ra ta catyí ra chi ra:

—Catyí chi ña na cunuhu ña vatyí caná chaa xaan ña vachi ña chata yo.

²⁴ Tyicuan ta catyí ra Jesús chi ra:

—Nyoo noo ri nu tachí ra chii, cuenda mbee cha cuanaa. Ta mbee cuan ican cuví ñu ñuu Israel.

²⁵ Soco ñaha cuan tuhva ña ta chicuiñi chiti ña nuu ra ta catyí ña chi ra:

—Sutu Mañi yuhu, ¡tyinyee chii!

26 Ta ra Jesús catyí ra chi ña:

—Ña vaha cha tinyaa yo pan yuhu sehe yo ta cuhva yo cachi ina —catyí ra chi ña.

27 Soco maa ña ña quichaha ña ta catyí ña chi ra:

—Ndicha, Sutu Mañi yuhu. Soco nyacua nya ina ta chachi ti yiquin cha canacoyo nu mesa chitoho ti —catyí ña.

28 Tyicuan ta catyí ra Jesús chi ña:

—Sihi jñana cha chinó xaan iñun chii! Cua sacuvi tari cuhva cuñún.

Ta caa cuhva ri cuan ta nduvaha sehe ña.

Nu sanduvaha ra Jesús cuaha ñu cuhvi

29 Quita ra Jesús yucuan ta yaha ra yuhu miñi Galilea, ta ndaa ra noo yucu ta chicun-
yaa ra yucuan.

30 Ta cuaha ñáyivi cha coyo nu nyaá ra ta quichi nyaca ñu cuaha ñu cuhvi: ñu coxo, ñu cuaa, ñu luu, ñu ñihi. Ta cuaha ca ñu cuhvi quichi nyaca ñu nu nyaá ra. Ta chacun ñu chi ñu nuu ra, ta maa ra sanduvaha ra chi ñu.

31 Ta iyo cuñi ñáyivi nyehé ñu yoso caa nacahan ñu ñihi ta yoso caa nduvaha ñu luu, ta yoso caa nacacá ñu coxo, ta yoso caa nanyehé ñu cuaa. Ta quichaha casacahnu ñu chi ra cuví Nyoo cuenda ñu, ñu Israel.

Nu chahá ra Jesús cha cachi cumi mil rayi

(Mr. 8.1-10)

32 Tyicuan ta cana ra Jesús chi ra cachicá noo chihin ra, ta catyí ra chi ra:

—Ndahvi xaan cuñi nyehi chi ñáyivi ihya, vatyí cha uñi quivi nyicú ñu ihya chihin, ta ñahri maa cha cachi ñu nyisó ñu. Ta ña cuñi natachi chi ñu nya vehe ñu vatyí ta cachi ca ñu, coto coña ñu ityi cunuhu ñu —catyí ra Jesús.

33 Tyicuan ta ra cachicá noo chihin ra cacatyí ra chi ra:

—Soco ¿nya cuquehen yo cha cachi ñáyivi cuaha ihya, nu yori maa ñáyivi iyó ihya?

34 Tyicuan ta ra Jesús ndaca tuhun ra chi ra:

—¿Yoso tahan pan cumi ndo?

Ta maa ra catyí ra:

—Ucha tahan pan, ta uvi tahan tiyaca nyihi ri.

35 Tyicuan ta tachí ra na cunyicu ñáyivi cuan nu ñuhú.

36 Tyicuan ta quehen ra ndi ucha pan cuan ta tiyaca cuan, ta nacuhva ra tyahvi nyoo chi Nyoo. Tyicuan ta tahvi ra ta chaha ra chi ra cachicá noo chihin ra, ta maa ra cachicá noo chihin ra canasacha ra chi ñáyivi.

37 Tandihí ñu chachi ñu, ta chitú chichi ñu. Ta yaha cuan casacutu ra ucha tica chihin yiquin cha ndoo cuan.

38 Cumí mil rayi cachachi, ta ña quihvi cuenda ñusihí ni ri ra cuatyaa.

39 Yaha cuan ta sacunuhu ra chi ñáyivi, ta quihvi ra nu canoa, ta cuahan ra ityi nu cuví Magdala.

16

Ra fariseo ta ra saduceo cachicán ra chi ra Jesús na sacuvi ra noo milagru

(Mr. 8.11-13; Lc. 12.54-56)

1 Tyicuan ta ra fariseo ta ra saduceo chahan coyo ra nu nyaá ra Jesús. Vatyí cacuñi ra nducu nyehe ra chi ra yucuan chaha chicán ra na sacuvi ra noo milagru chihin tunyee iñi Nyoo.

2 Soco nacahan ra Jesús ta catyí ra chi ra:

—Cha cha iñi cuhva cha cuaa quee ñanyii, tuhvá ndo catyí ndo: “Vaha xaan cucuvi quivi tyaan, vatyí tyaqui xaan cuaha andivi.”

3 Ta cha ñaha ri catyí ndo: “Vityin ña tyaqui maa cucuvi quivi vatyí cuaha ta iñi ñaa xaan andivi”, catyí ndo. Nyoho vaha xaan chitó ndo ¿yoso caa nacotó ndo tuhun vico andivi soco ña cuví nacoto ndo yoso caa cuahan tuhun cha sañahá Nyoo chi ndo vityin?

4 Ñáyivi iyó vityin, quiñi iyó ñu ta ña chinó iñi ñu chi Nyoo. Cuñi ñu nyehe ñu noo cha iyo. Soco ma cuhve nyehe ñu vatyí cha yaha sañaha Nyoo cha iyó cha sacuvi ra chihin ra Jonás —catyí ra Jesús chi ra, ta sandoo ra chi ra, ta cuahan ra.

Tuhun cahán ra fariseo cuví chi tari yuchan iya

(Mr. 8.14-21)

5 Cuhva cha cayaha ra cachicá noo chihin ra Jesús inga chiyo miñi cuan, canaa iñi ra cacuiso ra pan.

6 Tyicuan ta catyí ra Jesús chi ra:

—Saha ndo cuenda chi ndo chihin yuchan iya ra fariseo ta ra saduceo —catyí ra Jesús chi ra.

⁷ Tyicuan ta quichaha candatuhun ra chihin ra tahan ra ta catyí ra:

—Cha cuenda vatyí ñahri pan nyisó yo vachi, yucuan chaha catyí ra tyicuan caa chi yo —catyí ra.

⁸ Ta tuví ñi ra Jesús tuhun candatuhún ra, ta catyí ra chi ra:

—Nyoho, chiin xaan chinó ñi ndo chii. ¿Ñáa tuhun cha catyí ndo vatyí ñahri pan nyisó ndo?

⁹ ¿Atu ta cutuñi ca ñi ndo? ¿Atu ña nicohón ñi ndo quivi sacachi chi ndi ohon mil rayi chihin ohon tahan ri pan? Ta ¿yoso tahan tica sacutu ndo chihin yiquin cuan?

¹⁰ ¿Atu ña nicohón ñi ndo quivi sacachi chi cumi mil ca ra chihin ucha tahan pan? Ta ¿yoso tahan tica sacutu ndo chihin yiquin cuan?

¹¹ ¿Yoso caa cha ña tuví ñi nyoho vatyí ñima tuhun pan cahín, cuhva cha catyí vatyí na saha ndo cuenda chi ndo chihin yuchan iya ra fariseo ta ra saduceo? —catyí ra Jesús chi ra.

¹² Tyicuan ta cacutuñi ñi ra vatyí ñima tuhun yuchan iya pan cuan cahán ra, soco na casaha ra cuenda chi ra chihin tuhun cha casañahá ra fariseo ta ra saduceo.

Nu catyí cachi ra Pedro vatyí ra Jesús cuví Cristo ra cha quita nu nyaá Nyoo
(Mr. 8.27-30; Lc. 9.18-21)

¹³ Cuhva cha chaá ra Jesús ityi ñuu Cesarea Filipo, ndaca tuhun ra chi ra cachicá noo chihin ra ta catyí ra:

—¿Ñáa catyí ñáyivi? ¿Yóo ra cuvi Rayi cha quichi nya gloria? —catyí ra.

¹⁴ Ta canacahan ra ta catyí ra:

—Yihí ñu catyí ñu tyi ra Juan ra sacondutya chi ñáyivi cuvún. Ta inga ñu catyí ñu tyi ra Elías, ta yihí tucu ñu catyí ñu tyi ra Jeremías, o inga ra cuví profeta Nyoo ta cha naha.

¹⁵ Tyicuan ta catyí ra chi ra:

—Ta cha cuenda chi nyoho, ¿Yóo ra cuvi yuhu?

¹⁶ Tyicuan ta nacahan ra Simón Pedro:

—Yoho cuvún ra Cristo, Sehe Nyoo nyitó —catyí ra.

¹⁷ Ta nacahan ra Jesús ta catyí ra:

—Si xaan cuví chi yoho, Simón sehe ra Jonás, vatyí ni noo rayi ña sañaha ra chuun tuhun ihya, soco maa Suti ra nyaá andivi sañaha chuun.

¹⁸ Ta yuhu catyí chuun tyi yoho cuvún ra Pedro. Ta siqui cava ihya, savahí vehe ñuhi. Ta ma cuvi chasaha tuhun chihi chi chi.

¹⁹ Yuhu cuhve ndaha ticu andivi nu nyacá ñaha Nyoo chuun. Ta cha cuhñun ihya siqui ñuhu ñayivi, cha nuhñi saha maa Nyoo nya andivi. Ta tandihi cha ndachun ihya siqui ñuhu ñayivi, cha ndachi maa Nyoo nya andivi.

²⁰ Tyicuan ta catyí ra Jesús chi ra cachicá noo chihin ra tyi yori chihin cacahan ra tuhun vatyí ican ra cuví Cristo cha quita nu nyaá Nyoo.

Nu sacotó ra Jesús tyi cucúvi ra
(Mr. 8.31—9.1; Lc. 9.22-27)

²¹ Nya ndaha quivi cuan quichaha catyí ra Jesús chi ra cachicá noo chihin ra, vatyí cuñí chi cha cuhun ra ñuu Jerusalén. Ta ra cacuví mandoñi, ta ra cacuví nuu chi tata sutu, ta ra sacuaha ley vehe ñuhu, cucasanyehe xaan ra tindoho chi ra. Ta catyí tucu ra vatyí cucahñi ra chi ra soco nu cuñi quivi ta cunandoto ra.

²² Tyicuan ta quehen ra Pedro chi ra ta quita sin ra chihin ra ta quichaha catyí ra chi ra Jesús vatyí ña vaha cha cahán ra ta catyí ra:

—Ña cuñí Nyoo ta cuvi chuun tyehe caa, Sutú Mañi yuhu.

²³ Soco nanyocava ra Jesús, ta quichaha catyí ra chi ra Pedro:

—¡Canyaha chuun nui, cuihna! Vatyí cha cahún tyiña caa nducú sanacavon chii. Vatyí ña chicá xiñun cuhva chicá xiñi Nyoo. Soco cuhva chicá xiñi ñáyivi chicá xiñun —catyí ra.

²⁴ Tyicuan ta ra Jesús catyí ra chi ra cachicá noo chihin ra:

—Tatu nya nyoho cuñí ndo cunyicon ndo chii, cuñí chi sanaa ndo ñi ndo tuhun maa ndo. Ta ma ndu uvi ñi ndo cha nyicón ndo chii, vasi nyehe ndo tindoho cha cuende vatyí yucuan cuví cruzi cha tahán chi cuiso ndo.

²⁵ Vatyí nya nyoho ña cuñí ndo nyehe ndo tindoho cha cuenda yuhu, cucúvi ndo

ta cuhun ndo anyaya. Soco nya ndo cuhva ndo ñayiví ndo cha cuende, cucacu añima ndo.

²⁶ Vatyí ñáá ri tuhun cha saha ganaa ndo tandihí cha tyayí cha iyó síqui ñuhu ñayiví tatu cunaa añima ndo. Vatyí ñahri chihin cutiyahví ndo ta cacu añima ndo.

²⁷ Vatyí yuhu Rayí cha quichí nya gloria, cuquichi tiquí soco chihin cha cahnu cuví Suti, ta cuquichi coyo ángel chihin. Tyicuan ta cutiyahví chi noo noo ndo yoso cuhva sacuví ndo.

²⁸ Cha ndicha catyí chi ndo, vatyí yihí nyoho cha nyicú ndo ihya cha ma cuví ñaha ndo nyacua nya nyehe ndo chi yuhu Rayí cha quichí nya gloria, cunyehe ndo yoso caa vachi cunyaca ñahi chi ndo —catyí ra Jesús.

17

Nu sañahá Nyoo yoso caa ra Jesús noo cha ndicha nu nyacá ñaha ra

(Mr. 9.2-13; Lc. 9.28-36)

¹ Iñu quiví cha yaha, ta quehen ra Jesús chi ra Pedro ta ra Jacobo, ta ra Juan yañi ra Jacobo. Ta cuahan coyo ra noo yucu sucun xaan chihin ra.

² Ta yucuan nasama cuhva caa ra Jesús nuu ra ndihí chihin ra. Ta xiño vavaha nanduví nuu ra tari ñanyii. Ta sahma ra cuichin xaan nanduví tari maa ñuhú cuichin.

³ Tyicuan ta cananyehe ra chi ra Moisés ta ra Elías, candatuhún ra chihin ra.

⁴ Ta quichaha catyí ra Pedro chi ra Jesús: —Sutu Mañi yuhu, vaha xaan cha nyicú ndi ihya. Tatu cuñún na savaha ndi uñi tahan vehe. Noo chuun, noo chi ra Moisés, ta nonga chi ra Elías —catyí ra Pedro chi ra Jesús.

⁵ Cha ní ri ca cha cahán ra Pedro, quichí ri noo vico cha xiño vavaha síqui ra. Ta sahvi cuan chi ra. Ta chichi vico cuan quitá noo ndusu cha catyí chi tyehe caa:

—Ican ra ihya cuví Sehi, ta cuñí xain chi ra. Ta sñi xaan cuñí chihin ra. Tyasoho ndo tuhun cahán ra —catyí ndusu cuan.

⁶ Cha cachiñi ra cachicá noo chihin ra Jesús tuhun cuan, cachicava ra nya ñuhu, ta cayuhví xaan ra.

⁷ Tyicuan ta tuhva ra Jesús nu cayucú ra, ta tñin ra chi ra, ta catyí ra:

—Ndícuíta ndo. Ma yuhví ndo.

⁸ Ta cuhva cha cananyehe ra, noo tuhun ri ca ra Jesús nanyaá, ta uvi ca ra cuan, yori ca ra.

⁹ Ta cuhva cha vachi noo coyo ra yucu cuan, catyí ra Jesús chi ra:

—Yori chihin cahan ndo tuhun cha nyehe ndo ihya. Cahán ndo tuhun soco nya yaha cuví ta nandoto yuhu Rayí cha quichí nya gloria —catyí ra.

¹⁰ Tyicuan ta candaca tuhun ra cachicá noo chihin ra chi ra,

—¿Ñáá tuhun cha catyí ra casacuahá ley vehe ñuhu vatyí xihna ca ra Elías tahán chí quichi?

¹¹ Ta nacahan ra Jesús ta catyí ra:

—Cha ndicha vatyí xihna ca ra Elías quichi ta cusanduvaha ra tandihí.

¹² Soco yuhu catyí chi ndo vatyí cha yaha quichí ra Elías, soco ña nicohon nuu ñayiví chi ra, ta casacuví ñu chihin ra tandihí cuhva cuñi maa ñu. Ta tyicuan caa tucu yuhu Rayí cha quichí nya gloria, cusanyehe ñu tindoho chí —catyí ra.

¹³ Tyicuan ta cacutuñi ñi ra vatyí tuhun ra Juan ra sacondutya cahán ra Jesús.

Nu sanduvaha ra Jesús chi noo ra tyivaa cha yihí noo tatyí ña vaha chi

(Mr. 9.14-29; Lc. 9.37-43)

¹⁴ Cuhva cha cachaa coyo ra nu nyicú ñayiví, tuhva noo ra ta chicuñi chí ra nuu ra Jesús, ta catyí ra chi ra:

¹⁵ —Tata, cundahví cuñi nyehun chí sehi, vatyí yihí noo cuehe chí tañi chí ra, ta cuaha xaan tindoho nyehé ra chihin cuehe cuan. Ta cuaha xaan chaha nduva ra nu ñuhu ta cayu ra, ta nduva ra nu ndutya ñandihí.

¹⁶ Ta quichí nyaque chí ra chí ra cachicá noo chuhun, soco ña cuví sanduvaha ra chí ra —catyí ra.

¹⁷ Ta nacahan ra Jesús ta catyí ra:

—¡Nyoho, ñu ña chinó ñi cuví ndo! ¡Ta nícaa ní quiñi iyó ndo! ¿Yoso tahan ca quiví cunyai chihin ndo ta cunyei tisihi ndo nyacua nya cutuhva ndo ta chino ñi ndo chí? Nyaca ndo chí ra tyivaa chíña tyehe —catyí ra.

¹⁸ Tyicuan ta tava ñehe ra Jesús chi tatyí ña vaha cuan, ta quita cuan chi ra tyivaa cuan. Ta caa cuhva ri cuan ta nduvaha ra.

¹⁹ Cha yaha cuan ta ndaca tuhun sin ra chicá noo chihin ra Jesús chi ra ta catyí ra:

—¿Ñáa tuhun cha ña cuvi tava nyuhu chi tatyí ña vaha cuan?

²⁰ Ta ra Jesús nacahan ra ta catyí ra:

—Cha cuenda cha chiin xaan chinó ñi ndo chii. Cha ndicha catyí chi ndo vatyí tyehe ta chinó ñi ndo chii, tari cuhva cha cahnu noo chiti mostaza, cuvi catyí ndo chi yucu ihya na canyaha chi ta cuhun chi inga ityi, ta yucu ihya cuhun chi inga ityi. Ta ñahri cha ma cuvi sacuvi ndo tatu ndicha cha chinó ñi ndo chii.

²¹ Soco tahan tatyí ña vaha cuan, quita chi chihin cha ma cachi yo ta cacan tahvi yo —catyí ra Jesús chi ra.

Inga tucu chaha cahán ra Jesús tuhun yoso caa cucahñi ñáyivi chi ra

(Mr. 9.30-32; Lc. 9.43-45)

²² Cha ni ri ca cha sin ri cachicá noo ra ityi Galilea cuan, ra Jesús catyí ra chi ra cachicá noo chihin ra:

—Yuhu Rayi cha quichi nya gloria, cucuhva cuenda ñu chii chichi ndaha ra xaan ñi chii. Ta cucahñi ra chii.

²³ Soco nu cu uñi quivi ta cunandote —catyí ra.

Ta canducuihya xaan ñi ra cachicá noo chihin ra cha cachiñi ra tuhun cuan.

Nu catyiyahvi ra cuenda vehe ñuhu cahnu

²⁴ Cuhva cha cha ra Jesús ta ra cachicá noo chihin ra ñuu Capernaum, ra catavá xuhun cuenda vehe ñuhu cuan, chahan coyo ra chinyehe ra nu nyaá ra Pedro ta candaca tuhun ra chi ra:

—¿Atu ña tyiyahvi ra sacuha chi nyoho xuhun cha tahan chi cuenda vehe ñuhu cahnu? —cacatyí ra chi ra Pedro.

²⁵ Ta nacahan ra Pedro ta catyí ra:

—Tyiyahvi ra.

Cuhva cha quihvi ra Pedro chichi vehe nu ca iyó ra, xihna ca ra Jesús nacahan ra ta catyí ra:

—¿Yoso caa catyí tucu yoho vityin Simón? Ra cuvi tyiño siqui ñuhu ñáyivi ihya, ¿yóo chi caquehen ra yahvi? ¿Atu chi ñu ñuu maa ra o chi ñu inga ñuu?

²⁶ Nacahan ra Pedro ta catyí ra:

—Chi ñu inga ñuu.

Ta catyí ra Jesús chi ra:

—Tu tyicuan caa, ñu ñuu maa ra ña tahan chi tyiyahvi ñu.

²⁷ Soco tacuhva vatyí ma cuhva yo tisihi chi ni noo ra, cuhan miñi cuan, ta tyihun anzuelo, ta tiyaca cha tavon cha xihna ri, chichi yuhu ti cunañihun noo xuhun. Ta ñihi tyiyahvun cha cuende ta cha cuenda maun. Quehun ta cutyiyahvun —catyí ra Jesús chi ra Pedro.

18

Nu sañahá ra Jesús yóo ra cha cahnu ca cucuvi nu nyacá ñaha Nyoo

(Mr. 9.33-37; Lc. 9.46-48)

¹ Quivi cuan catuhva ra cachicá noo chihin ra Jesús chi ra, ta candaca tuhun ra chi ra:

—¿Nya ndi cahnu ca cuvi nu nyacá ñaha Nyoo?

² Tyicuan ta ra Jesús cana ra chi noo ra cuehe luhlu, ta chinanyaa ra chi cue mahñu ra.

³ Ta catyí ra:

—Cha ndicha catyí chi ndo, vatyí tatu nyoho ta ma nasama ndo cuhva iyó ndo, ta tatu ma cuvi ndo tari ra cuatyaa, ma cuvi quihvi ndo nu nyacá ñaha Nyoo. Vatyí ra cuatyaa chahá ndotyin cunyaca ñaha sutu ndotyin chi ndotyin, ta tyicuan caa cuhva ndo chi ndo cunyaca ñaha Nyoo chi ndo.

⁴ Ta tyicuan caa ra cahnu ca cuvi nu Nyoo, ican cuvi ñu ña cahnu sahá chi, ta cuvi ñu tari ra cuehe luhlu ihya.

⁵ Ta ñáyivi cha natin cuenda chihin sivi chi noo ra ña cahnu sahá chi, tari ra cuehe luhlu ihya, chi yuhu natin cuenda ñu.

Nu sañahá ra Jesús chi yo yoso caa saha cuenda yo chi yo coto sacuvi yo cha ña vaha

(Mt. 5.29-30; Mr. 9.42-48; Lc. 17.1-2)

⁶ Tatu yóo ñu sanacavá nu cuatyí chi noo ra nachinó ñi chii ta cuvi ra tari minoo ra luhlu, vaha taxin ca, cuhñi ñu noo yuu vee sucun ñu ta tuchi ñu chi ñu nu cono tyañuhu.

⁷ Ñana cha ña vaha cha cuenda ñáyivi iyó siqui ñuhu ñáyivi, vatyí iyó tuhun cha sacoo ñu cuatyí tahan ñu! Ta tyicuan ri coo tuhun

cuan, soco jndahvi ñu ndahvi cha sanacava nu cuatyí chi inga ñu!

⁸ Yucuan chaha tatu ndahun o tatu chahun sanacava chuun nu cuatyí, vaha taxin ca cahnya ta sacuiton cañi. Vatyí vaha ca quihvun nu coun chihin Nyoo chihin cha luu ndahun o luu chahun, ta ñima ca cha naniun ta tuchi Nyoo chuun nu cayú ñuhu cha ma ndahva ca maa.

⁹ Ta tatu noo chiti nuun sanacavá chuun nu cuatyí, vaha taxin ca tava ta sacuiton cañi. Vatyí vaha ca quihvun nu coun chihin Nyoo chihin noo chiti nuun, ta ñima ca chihin cha ninduvi chiti nuun ta tuchi Nyoo chuun nu cayú ñuhu chichi anyaya.

Nu sañahá ra Jesús tyi tari noo mbee cha cuanaa, tyicuan caa cuví yo

(Lc. 15.3-7)

¹⁰ Ma tava xiin ndo chi ni noo ra cha cuví tari noo ra luhlu, vatyí catyí chi ndo tyi ángel cha sahá cuenda chi ra, tyicuan ri sacuví ra tyiño nuu Suti, ra nyaá andivi.

¹¹ Vatyí yuhu Rayi cha quichi nya gloria, vachi sacaqui chi ñayivi cha cuanaa chihin cuatyí ñu.

¹² ¿Yoso caa catyí nyoho? Tatu noo ra cumí ra noo cientu mbee, ta cuanaa noo ti, ¿atu ma sandoo ra ndi cumi xico chahun cumi tahan ca ti cuan yucu cuan, ta cuhun ra cunanducu ra chi quití cha cuanaa cuan? Yuhu catyí tyi sandoo ra ta cuhun ra.

¹³ Ta tatu nañihi ra chi ti, cha ndicha vatyí cusí ca cuñí ra chihin quití cuan, ta ñima ca chihin cumi xico chahun cumi ca quití cha ña chinaa cuan.

¹⁴ Ta tyicuan caa tucu, Sutu ndo ra nyaá andivi ña cuñí ra cha cunaa ni noo ñu cuví tari noo ra luhlu.

Yoso caa tahan chi sahayo ticahnu iñi chi tahan yo

(Lc. 17.3)

¹⁵ Tatu ra yañun ta sacuvi ra cha ña vaha chuhun, cahan chihin noo tuhun ri maa ra ta catyun chi ra tyi ña vaha cuhva sacuvi ra. Ta tatu quichaha ra tuhun cahún, cha saha ganaun chi ra cuví cuan.

¹⁶ Soco tatu ña quichahá ra chuun, tyicuan ta canon chi uvi o uñi ra, tacuhva tandihi cha cahun cucuvi ra testigu.

¹⁷ Tatu ña quichaha ra ni chi ra cha chahan coyo chuhun cuan, tyicuan ta cahan chihin ra chihin nuu ñayivi nyicú vehe ñuhu. Ta tatu ña quichaha ra chi ñu vehe ñuhu, tyicuan ta cuví saha ndo tuhun tyi tari noo ra ña chinó iñi chi Nyoo cuví ra, o tari ra catavá xuhun cuenda gobiernu ñuu Roma.

¹⁸ Cha ndicha catyí chi ndo, vatyí tandihi cha cuñi ndo ihya siqui ñuhu ñayivi, ta cha nuñi saha maa Nyoo nya andivi. Ta tandihi cha ndachi ndo ihya siqui ñuhu ñayivi, cha ndachi maa Nyoo nya andivi.

¹⁹ Ta suri catyí tiqui chi ndo, vatyí tatu uvi nyoho ihya siqui ñuhu ñayivi, ndu in ri ndo ta cacan tahvi ndo cuenda ñáá noo cha cuñí ndo cacan ndo, Suti, ra nyaá andivi cuhva ra chi ndo.

²⁰ Vatyí nu nyicú uvi o uñi ñu sacahnú chii, yucuan cunyai mahñu ñu —catyí ra Jesús.

²¹ Tyicuan ta chahan ra Pedro chindaca tuhun ra chi ra Jesús ta catyí ra:

—Sutu Mañi yuhu, tatu ra tahan ta sacuvi ra ñáá noo cha ña vaha chihin, ¿yoso tahan chaha tahan chi sahi ticahnu iñi chi ra? ¿Atu ucha tahan chaha?

²² Ta nacahan ra Jesús ta catyí ra:

—Catyí chuun vatyí ñima ucha tahan ri chaha, soco tandihi ri chaha.

Nu cahán ra Jesús noo cuhva cuenda noo ra cha ña cuñi saha ticahnu iñi

²³ Yucuan chaha cha nyacá ñaha Nyoo aña ñayivi cuví chi tari noo rey cha nacana chi tandihi musu vatyí cuanyehe ra yoso yosó yica ñu chi ra.

²⁴ Ta cuhva cha quichaha natava ra cuenda, ta quichi nyaca ñu chi noo musu cha cuaha millón pesu yosó yica chi ra.

²⁵ Ta musu cuan ñahri maa chihin tyiyahvi ra chi chitoho ra, ta chitoho ra catyí ra: “Cuaxico ndo chi ra in cuenda ri chihin ñasíhi ra, ta chihin sehe ra ta tandihi cha iyó chi ra tacuhva vatyí chihin xuhun cuan cunatyiyahvi ra cha yosó yica ra chii.”

²⁶ Tyicuan ta musu cuan chicuñi chiti ra nuu chitoho ra, ta chacu ndahvi ra nuu ra, ta catyí ra: “Tata, cuatu noo chiin chii, ta tyiyahvi mai tandihi chuun”, catyí ra.

27 Ta cundahvi cuñi chitoho ra chi ra, ta saha ra ticahnu iñi chi ra, ta sanaa ra tandihí cha yoso yica ra, ta saña ra chi ra.

28 Soco cuhva cha quitā musu cuan, nañihí ra chi noo ra tahan ra cha cuví musu tari maa ra. Ta ra cuan yosó yica ra chiin ri chi ra. Ta tñin ra chi ra cuan, ta quichaha quitu ra sucun ra, ta catyí ra chi ra: “Tyiyahvi cha yosó yicon chii.”

29 Tyicuan ta chicuiñi chiti ra cuan nuu ra, ta chacu ndahvi ra nuu ra ta catyí ra: “Cuatu noo chiin chii, ta tyiyahvi mai tandihí chuun”, catyí ra.

30 Soco maa ra ña cuñi ra, ta chahan ra ta tyihí ra chi ra vehe caa nyacua nya cha tyiyahvi ra cha yoso yica ra chi ra.

31 Cha canyehé inga ca musu cha sacuvi ra, uhvi xaan cacuví chi ra, ta chahan coyo ra chinacatyí ra chi chitoho ra cha sacuvi ra cuan.

32 Tyicuan ta chitoho ra cuan tachí ra tyiño na quichi ra ta catyí ra chi ra: “Musu ña vaha cuvún. Yuhu sahi ticahnu iñi tandihí cha yosó yicon chii, vatyí chacu ndahvun nui.

33 Tyicuan caa tucu cuñi chi cundahvi cuñun chi ra tahun cuan tari cundahvi cuñi nyehi chuun”, catyí ra chi ra.

34 Ta cuxaan xaan chitoho ra, ta tachí ra tyiño na tachi tuñi ñu chi ra, nyacua nya cha tyiyahvi ra tandihí cha yosó yica ra.

35 Ta nu ndihí cahan ra Jesús, ta catyí ra tyehe caa:

—Tyicuan caa tucu cusacuvi Suti, ra nyaá andivi, chihin ndo tatu ma saha ndo ticahnu iñi chihin cha tandihí añima ndo chi tahan ndo.

19

Nu sañahá ra Jesús tyi ña vaha sandoo ñáyivi chi ñasihí ñu o yñ ñu

(Mr. 10.1-12; Lc. 16.18)

1 Cha yaha cha catyí ra Jesús tuhun ihya, ta quitā ra Galilea cuan, ta cuahan ra ityi Judea cha nyaá inga chiyo yuvi cahnu Jordán, ityi nu caña ñanyii.

2 Cuaha ñáyivi chinyicon chi ra, ta yucuan sanduvaha ra chi ñu cuhvi.

3 Tyicuan ta suhva ra fariseo catuhva ra chi ra Jesús, vatyí cacuñi ra nducu ra cuhva tyaa ra cuatyí siqui ra. Ta candaca tuhun ra chi ra ta catyí ra:

—¿Atu vaha cha sandoo rayi chi ñasihí ra cha cuenda ñáá ri tisihi luhlu chaha ña chi ra?

4 Ta nacahan ra ta catyí ra:

—¿Atu ta sacuaha ca nyoho nu tutu Nyoo nu catyí chi vatyí ra cha savaha chi ndo nya quivi xihna ri, savaha ra rayi ta ñaha sihi?

5 Ta catyí tucu chi tyehe caa: “Tahán chi sandoo rayi chi sutu ra ta chi sihi ra, ta ndu ñin ri ra chihin ñasihí ra. Ta chichi cha ninduvi ñu, cucuvi ñu tari cha noo ri ñáyivi.”

6 Yucuan chaha, ñima ca uvi tahan cuví ñu, soco cha nanduví ñu noo ri ñáyivi. Yucuan chaha, cha sandu ñin ri Nyoo ña tahán chi cha sasiin ñáyivi —catyí ra.

7 Tyicuan ta candaca tuhun ra chi ra Jesús ta cacatyí ra:

—¿Ñáá tuhun cha tyaá ra Moisés vatyí cuví cahnya noo rayi tutu chihin ñasihí ra ta sandoo ra chi ña?

8 Ta ra Jesús catyí ra chi ra:

—Cha cuenda cha ndavá añima ndo, yucuan chaha, chaha ra Moisés cha sandoo ra ñasihí ra. Soco quivi xihna ri ñima tyicuan caa cuví.

9 Yuhu catyí chi ndo tyehe caa: Ra cha sandoo ñasihí, ta ñima cha cuenda cha natuví ña chihin inga ra, ta tandaha ra chihin inga ñu, chicoo cuatyí ra nuu Nyoo. Ta ra cha tandaha chihin noo ñaha sihi cha sandoo yñ chi, suri chicoo tucu cuatyí ra cuan —catyí ra.

10 Tyicuan ta ra cachicá noo chihin ra, cacatyí ra chi ra:

—Tatu tyicuan caa tahán chi coo rayi chihin ñasihí ra, vaha taxin ca ma tandaha yo.

11 Ta ra Jesús catyí ra chi ra:

—Soco ña tandihí ñáyivi cuví cutuñi iñi ñu tuhun ihya. Soco ñu cha chaha Nyoo cha cutuñi iñi, ican ñu cua cutuñi iñi.

12 Cha ña tandaha ñáyivi, cuaha ri cuenda cuví. Yihí ñu ña quichi cuví iñi ñu tandaha ñu vatyí ñin caa maa ñu cacu ñu. Ta inga ñu ña quichi cuví iñi ñu tandaha ñu vatyí cha yaha tava ñáyivi ñi ñu. Ta yihí ñu ña tandaha ñu cha cuenda cha cuñi ñu sacuvi ñu tyiño nuu Nyoo, na nducuaha añima cha nyacá ñaha Nyoo. Tandihí ñu

cuví sacuvi tyehe caa, na sacuvi ñu —catyí ra Jesús.

*Nu nasocó ra Jesús chi ra cuatyaa
(Mr. 10.13-16; Lc. 18.15-17)*

¹³ Tyicuan ta quichí nyaca ñu suhva ra cuatyaa chi ra Jesús tacuhva na tyiso ra ndaha ra síqui ndotyín, ta cacan tahvi ra chaha ndotyín. Soco ra cachicá noo chihin ra quichahá cacahan ra chi ñu quichí nyaca chi ndotyín.

¹⁴ Soco ra Jesús catyí ra:

—Saña ndo chi ra cuatyaa, na quichi maa ndotyín nu nyaí. Ta ma casi ndo. Vatyí ñu nyacá ñaha Nyoo añima, cuví ñu tari ra cuatyaa ihya —catyí ra.

¹⁵ Tyicuan ta tyiso ra ndaha ra síqui ndotyín. Yahá cuan ta cuahan ra.

Nu cahán noo ra tyivaa tyay# chihin ra Jesús

(Mr. 10.17-31; Lc. 18.18-30)

¹⁶ Noo ra tyivaa chahan ra chindaca tuhun ra chi ra Jesús ta catyí ra:

—Maestro vaha xaun. ¿Ñáa cha vaha tahan chi sacuvi ta ñihi ñayivi cha ma naa ca maa coi?

¹⁷ Ta ra Jesús catyí ra chi ra:

—¿Ñáa tuhun cha catyun tyi vaha yuhu? Noo ri ra vaha iyó ta ican ra cuan cuví Nyoo. [Ta cha catyun tyi vahi, nacotón tyi Nyoo cuvi.] Soco tatu cuñún quihvun ñayivi cha ma naa ca maa, sacuvun tandihi tuhun cha tachí Nyoo tyi sacuvi yo —catyí ra chi ra.

¹⁸ Ta ra tyivaa cuan catyí ra:

—¿Nya cha cuví cuan?

Ta ra Jesús catyí ra chi ra:

—Ma cahñun chi ñayivi. Ma coo inga ñusihí chuun. Ma suhun cha chii ñayivi. Ma cahun cuendu síqui ñu.

¹⁹ Saha ñayivi chi sutun ta chi sihun. Ta cuñun chi ñayivi, tari cha cuñún chi maun.

²⁰ Ta ra tyivaa cuan, catyí ra chi ra:

—Tandihí tuhun ihya ta quichahí nyata luhli ta nya vityin. ¿Ñáa ca cha cumañí chii?

²¹ Ta ra Jesús catyí ra chi ra:

—Tatu cuñún cuvun noo ra cuiti nuu Nyoo, cuahan ta xicon cha iyó chuun, ta cuhvon chi ñu ndahvi, ta cunyicon chii.

Tyicuan ta coo cha tyay# chuun nya gloria —catyí ra.

²² Soco cuhva cha chiñi ra tyivaa cuan cha cahán ra Jesús tyehe caa, cuihya xaan cuanuhu ra vatyí tyay# xaan ra.

²³ Tyicuan ta ra Jesús catyí chi ra cachicá noo chihin ra:

—Cha ndicha catyí chi ndo vatyí y# xaan cuhva ra tyay# cha cunyaca ñaha Nyoo añima ra.

²⁴ Catyí chi ndo inga chaha, vatyí numi ca yaha noo camellu xiyu noo yiqui ticu, ta ñima ca noo ra tyay# ta cuhva ra chi ra cha cunyaca ñaha Nyoo —catyí ra Jesús.

²⁵ Cha cachiñi ra cachicá noo chihin ra tuhun ihya, iyo xaan cacuñi ra, ta quichahá candaca tuhun ra chi ra tahan ra, ta cacatyí ra:

—Tu tyicuan caa, ¿yóo cha cuví cacu vii?

²⁶ Tyicuan ta nanyehe ra Jesús nu nyicú ra ta catyí ra:

—Ñáyivi ma cuvi sacuvi ñu tyehe caa, socio Nyoo cuví sacuvi ra tandihí.

²⁷ Tyicuan ta quichahá catyí ra Pedro chi ra:

—Sutu Mañi yuhu, nyuhu tandihí maa cha iyó chi ndi sandoo ndi ta nyicón ndi chuun. ¿Ñáa cha cuñihi ndi? —catyí ra chi ra.

²⁸ Ta nacahan ra Jesús ta catyí ra:

—Cha ndicha catyí chi ndo, vatyí quivi cha cunduchaa tandihí, yucuan quivi yuhu Ray# cha quichí nya gloria cucunyai ta cunyaca ñahi, ta nyoho cha nyicón ndo chii, cunyaa tucu nyoho nu uchi uvi tahan tyayu tyaqui. Ta cunyaca ñaha ndo chi ndi uchi uvi tahan ityi ñáyivi Israel.

²⁹ Ta tandihí ndo cha sandoo ndo vehe ndo, o yañi ndo, o cuhva ndo, o sutu ndo, o síhi ndo, o ñasihí ndo o sehe ndo, o ñuhú ndo cha catyí yuhu, cunañihi ndo noo cientu ca chaha síqui cuan, ta cunañihi tucu ndo ñayivi cha ma naa ca maa coo ndo.

³⁰ Cuaha xaan ñu cuahan ityi nuu vityin, ican ñu cuan, cuhun nya nu ndihí. Ta cuaha xaan ñu cuahan nu ndihí vityin, ican ñu cuhun ñu ityi nuu.

20

Nu sañahá ra Jesús noo cuhva cuenda ra casahá tyiño

1 'Cha nyacá ñaha Nyoo añima ñáyiví, cuví chi tari noo chitoho chacu yoho tichaha ndiví. Ta chitoho chacu cuan ñaha cuiri quitá ra cuanducu ra cuaha ri musu cusaha tyiño nu tyiño saha ra.

2 Ta sandaa ra tyiño chihin musu cuan vatyí cutiyahvi ra yahvi cha tahán chi chi ra cha noo quiví, ta tachí ra chi ra cusaha tyiño ra nu iyó tyiño sahá ra.

3 Yahá cuan ta quitá tucu ra cuhva cha caa ñn cha ñaha ri. Ta nanyehe ra chi suhva ca ra canyicú ri maa nuyahvi cuan.

4 Ta catyí ra chi ra: “Cuahan tucu nyoho cua saha tyiño ndo nu iyó tyiño sahí, ta tyiyahvi mai yahvi cha tahán chi chi ndo.” Tyicuan ta cuahan coyo tucu ra cuan.

5 Tyicuan ta chitoho chacu cuan quitá tucu ra inga chaha cuhva cha ora. Yucuan ta quitá tucu ra cuhva cha caa uñi cha cha iñi.

6 Ta yahá cuan ta quitá tucu ra cuhva cha caa ohon cha cha iñi ta nanyehe ra canyicú ri maa suhva ca ra nuyahvi cuan. Ta catyí ra chi ra: “¿Ñáá tuhun cha canyicú ri maa nyoho ndiyaca ihya, ta ña sahá tyiño ndo?”

7 Ta canacahan ra cuan ta catyí ra: “Yori maa cahan chihin ndi cha cusaha tyiño ndi.” Tyicuan ta catyí ra chi ra: “Cuahan tucu nyoho cua saha tyiño ndo nu iyó tyiño sahí. Ta tyiyahvi mai chi ndo yoso cuhva cha tahán chi chi ndo”, catyí ra.

8 Ta cuhva cha cuaa cuan, chitoho tyiño cuan catyí ra chi ra cuví nuu chi musu cuan: “Na canon chi musu, ta tyiyahvun chi ra. Quichaha tyiyahvun chi ra cha caquihví nu ndihí, ta nu ndihí ta tyiyahvun chi ra cha caquihví cha xihna ri”, catyí ra.

9 Tyicuan ta chaá coyo ra cha caquihví cuhva cha caa ohon cha cha iñi cuan. Ta tahan tahan ra quehen ra yahvi naní noo quiví.

10 Yahá cuan, ta cuhva cha tahán chi chi ra cha caquihví coyo cha xihna ri cuan, cacuñí maa ra vatyí cuaha ca cutiyahvi ra chi ra. Soco suri ñn ri yahvi noo quiví caquehen ra.

11 Ta cuhva cha caquehen ra, quichaha cacahan ra chi chitoho tyiño cuan.

12 Ta catyí ra: “Ra cha cachaa coyo nu ndihí ihya, noo tuhun hora casaha tyiño ra. Ta ñn ri cuhva tyiyahvun chi ra chihin

nyuhu cha saha tyiño ndi nu cahñi ndiyaca”, cacatyí ra.

13 Soco nacahan chitoho tyiño cuan, ta catyí ra chi noo ra cuan: “Amigo, ñahri cha ña vaha sacuví chuhun. ¿Atu ñima yahvi cha noo quiví catyí vatyí tyiyahvi chuun?”

14 Quehen yahvun, ta cuanuhu. ¿Atu ñahri ityi iyó chii cha tyiyahvi chi ra cha quihví nu ndihí ñn ri cuhva cha tyiyahví chí yoho?

15 ¿Atu ñahri ityi iyó chii cha sacuvi cha cuñí mai chihin xuhin? ¿Atu quiñi cuñún tyi vaha ñáyiví cuví chihin inga ra cuan?” catyí ra.

16 Ta tyicuan caa ñu quihví nu ndihí, cuhun ñu ityi nuu. Ta ñu cuahan ityi nuu, nya nu ndihí cuhun ñu. Vatyí cuaha xaan ñu nacaná Nyoo chi. Soco chiin xaan ri ñu nacachí ra.

Inga chaha sacotó ra Jesús yoso caa cucahñi ñáyiví chi ra

(Mr. 10.32-34; Lc. 18.31-34)

17 Cuhva cha cuñí cuhun ra Jesús nya Jerusalén, cana sñn ra chi ndi uchi uvi ra cachicá noo chihin ra ta catyí ra chi ra:

18 —Ta cha nyehe maa ndo vatyí cuahan yo Jerusalén vityin. Ta yucuan cucuhva cuenda ñu chi yuhu Rayí cha quichí nya gloria chi ra cacuví nuu chi tata sutu, ta chi ra casacuaha ley vehe ñuhu, ta cucatyí ra tyi tahán chí cúvi.

19 Ta cucuhva cuenda ra chii chi ra ñuu Roma, ta cucuacu nyaa ra chii, ta cucañi ra chii, ta cucahñi ra chii nu cruzi. Soco nu cu uñi quiví cunandote —catyí ra Jesús chi ra.

Nu chicán sihi ra Jacobo ta ra Juan noo tumañi iñi chi ra Jesús

(Mr. 10.35-45)

20 Tyicuan ta sihi ra Jacobo ta ra Juan sehe ra Zebedeo tuhva ña nu nyaá ra Jesús chihin ninduvi sehe ña. Ta chicuiñi chiti ña nuu ra vatyí cacan ña noo tumañi iñi chi ra.

21 Ta quichaha ndaca tuhun ra Jesús chí ña:

—¿Ñáá cha cuñún?

Ta catyí ña:

—Quiví cha cunyaun nu nyacá ñahun nya andiví, cuhva cha cunyaa ninduvi sehi xiun. Na cunyaa noo ra chiyo vahun, ta inga ra cunyaa ra chiyo satyun.

22 Soco nacahan ra Jesús ta catyí ra:

—Nyoho ña chitó ndo cha chicán ndo. ¿Atu cuví nyehe nyoho tindoho cha cunyehe yuhu? ¿Atu cuví cahun ndo tuhun chihi tari cuhva cahun yuhu? —catyí ra.

Ta canacahan ra ta catyí ra:

—Cuví chi ndi.

23 Ta catyí ra Jesús chi ra:

—Cha ndicha vatyí cunyehe ndo tindoho, ta cahun ndo tuhun chihi tari cahun yuhu tuhun chihi. Soco tuhun cha cunyaa ndo chiyo vahi ta chiyo satyín, ñima yuhu tahán chi cuhve chi ndo, soco maa Suti cucatyí ra yóo cha cuñihi nyatu cuan —catyí ra Jesús chi ra.

24 Ta cha cachiñi uchi ca ra cachicá noo chihin ra Jesús tuhun cuan cacuxaan ra chihin ninduvi ra cuan.

25 Soco cana ra Jesús chi ra ta catyí ra chi ra:

—Cha chitó maa ndo, vatyí ra nyacá ñaha chi ñáyivi iyó siqui ñuhu ñáyivi ihya, ñihi xaan nyacá ñaha ra chi ñu tari nyaca ñaha ra musu ra.

26 Soco ñima tyicuan caa tahán chi sacuvi nyoho. Vatyí ra cha cuñi cucahnu ca nu Nyoo, cuñi chi cuví ra musu tandihi ca ndo.

27 Ta nya nyoho cha cuñi ndo cuví ndo nuu, cuñi chi cuví ndo musu tandihi ca ñu.

28 Tari yuhu Rayi cha quichi nya gloria, ña vachi vatyí sacuvi ndo tyiño nui, soco vachi sacuvi tyiño nuu ndo, ta cuhve ñáyivi. Vatyí chihin cuan ta cuví sacaqui cuaha ñáyivi.

Nu sanduvahá ra Jesús chi uvi ra cuaa
(Mr. 10.46-52; Lc. 18.35-43)

29 Cuhva cha cua quitá coyo ra ñuu Jericó, cuaha xaan ñáyivi cuahan chihin ra Jesús.

30 Ta yuhu ityi cuan canyicú uvi tahan ra cuaa. Ta cuhva cha cachiñi ra vatyí cua yaha ra Jesús, quichaha canachaa ra. Ta catyí ra:

—Sutu Mañi yuhu, ra vachi tata ra David cuvún. ¡Cundahvi cuñi nyehun chi ndi! —cacatyí ra.

31 Ta ñáyivi quichaha cahan ñu chi ra na cacasi ra yuhu ra. Soco maa ra ñihi ca cacana chaa ra:

—Sutu Mañi yuhu, ra vachi tata ra David cuvún. ¡Cundahvi cuñi nyehun chi ndi!

32 Tyicuan ta chicuñi ra Jesús ta cana ra chi ninduvi tahan ra cuaa cuan, ta ndaca tuhun ra chi ra:

—¿Ñáa cha cuñi ndo cha sacuvi chihin ndo?

33 Ta canacahan ra ta catyí ra:

—Sutu Mañi yuhu, cuñi ndi nyehe ndi.

34 Tyicuan ta cundahvi cuñi ra Jesús nyehe ra chi ra, ta tin ra chiti nuu ra. Ta caa cuhva ri cuan cananyeha ra, ta cananyicon ra chi ra Jesús.

21

Nu quihvi ra Jesús Jerusalén

(Mr. 11.1-11; Lc. 19.28-40; Jn. 12.12-19)

1 Cuhva cha cua chaa coyo ra ñuu Jerusalén, ta cachaa ra ñuu Betfagé, yatyin ri nu cuví yucu yutun Olivo. Tyicuan ta tachí ra Jesús tyiño chi uvi ra chicá noo chihin ra.

2 Ta catyí ra chi ra:

—Cuahan ndo ñuu cha nyaá ityi nuu ihya. Ta yucuan cunañihi ndo noo burru sihi, nuhñi ti. Ta nyacá ti noo burru luhlu. Ndashi ndo chi ti, ta quichi nyaca ndo chi ti chii.

3 Ta tatu yóo cha catyí ñáa cha catyí chi ndo, catyí ndo chi ñu: “Vatyí chihuhú ti chi maa ra nyacá ñaha, soco numi ri quichi nanyaca ndi chi ti”, catyí ndo chi ñu —catyí ra.

4 Tyehe caa cuví tacuhva na chino cava tuhun cha catyí ra profeta nu tyaa ra tyehe caa:

5 Catyí ndo chi ñu ñuu Sión:

“Nyehe ndo, vachi rey maa ndo nu nyaá ndo.

Ndahvi ri vachi ra yosó ra noo burru luhlu, sehe noo quití cha tuhvá nyisó carga”, catyí ra profeta.

6 Tyicuan ta cuahan coyo ra cachicá noo chihin ra, ta casacuví ra tari cuhva catyí ra Jesús chi ra.

7 Caquichi nyaca ra chi ti chihin sihi ti. Ta catyiso ra sahma ra siqui ti, ta ndaa ra Jesús chi ti.

8 Ta cuaha xaan ñáyivi candica ñu sahma ñu ityi nu cuahan ra, ta inga ñu catohon ñu numa yutun ta cachacun ñu ityi.

9 Ta ñáyivi cha cuahan ityi nuu ta ityi chata, quichaha cana chaa ñu ta catyí ñu:

—¡Cahnu xaan cuví ra vachi tata rey David! ¡Cahnu xaan cuví ra vachi cuenda Sutú yo Nyoo! ¡Ta sacahnú xaan yo chi Nyoo nu nyaá ra ityi andívi! —catyí ñu.

¹⁰ Cuhva cha chaá ra Jesús ñuu Jerusalén cuan, tandíhi maa ñáyívi ñuu naquiqui, ta cuaha xaan ñu candacá tuhun ñu chi tahan ñu, ta catyí ñu:

—¿Yóó ra cuví ra ihya?

¹¹ Ta ñáyívi catyí ñu:

—Ra Jesús, ra chahá cuenda tuhun cahan Nyoo, ra ñuu Nazaret nu cuví Galilea cuví ra —catyí ñu.

Nu tavá ñehe ra Jesús chi ra caxicó chichi vehe ñuhu cahnu

(Mr. 11.15-19; Lc. 19.45-48; Jn. 2.13-22)

¹² Yahá cuan ta quihví ra Jesús chichi vehe ñuhu cahnu Nyoo. Ta tavá ñehe ra chi tandíhi ra casatá ta ra caxicó yucuan. Ta sanduvá ra mesa ra canasamá xuhun chi ñáyívi yucuan. Ta sanduvá ra tyayu ra caxicó paloma.

¹³ Ta catyí ra:

—Nu tutu Nyoo catyí chi tyehe caa: “Vehi, vehe nu chicán tahvi ñáyívi chíi cuví, ta tyicuan caa cucunañi chi. Soco nyoho cha nasahá ndo vehe nu nyicú ra suhu” —catyí ra.

¹⁴ Chichi vehe ñuhu cuan catuhvá suhva ra cuaa ta ra coxo chi ra Jesús. Ta maa ra sanduvahá ra chi ra.

¹⁵ Soco canyehe ra cacuví nuu chi tata sutu ta ra casacuahá ley vehe ñuhu cuan vatyí savahá ra Jesús milagru, ta canachaa ra cuatyaa chichi vehe ñuhu, ta catyí ndotyín:

—¡Cahnu xaan cuví ra vachi tata rey David! —catyí ndotyín.

Tyicuan ta cacuxaan tata sutu ta inga ra cuan cha canyehe ra ta cha cachiñi ra.

¹⁶ Ta cacatyí ra chi ra Jesús tyehe caa:

—¿Atu chiñún cha cahán ndotyín?

Ta nacahan ra Jesús ta catyí ra:

—Chíñi. Soco ¿atu ta sacuaha ca ndo nu tutu Nyoo nu catyí chi tyehe caa?

Sutu Mañi yuhu, sacuvun vatyí ra cuatyaa nyihi cata ndotyín.

Ta ra cuatyaa lee cha chaxín sacahnú ndotyín chuun, catyí chi, —catyí ra Jesús.

¹⁷ Tyicuan ta sandoo ra chi ra, ta quita ra ñuu cuan ta cuahan ra ñuu Betania. Ta yucuan ndoo ra cha cuaa cuan.

Nu tyanahá ra Jesús chi tu higo vatyí ñahri higo iñi nuu tun

(Mr. 11.12-14, 20-26)

¹⁸ Tuvi inga quívi. Ta cha ñaha ri, cua ndichi ra Jesús nya Jerusalén, ta chaá soco chi ra.

¹⁹ Ta nanyehe ra noo tu higo vatyín ri yuhu ityi cuan. Ta tuhva ra nu nanyaá tun, soco ñahri maa nañihi ra nuu tun. Maa maa ri maa numa ri iñi nuu tun. Tyicuan ta catyí ra chi tun tyehe caa:

—¡Ni nonga chaha ma cuhva con chíti!

Ta caa cuhva ri cuan ta na ityi tun.

²⁰ Ta cha nyehé ra cachicá noo chihin ra cha sacuví ra, iyo cacuñi ra, ta ndacá tuhun ra chi ra ta catyí ra:

—¿Ñáá tuhun cha numi xaan na ityi tu higo cuan?

²¹ Ta nacahan ra Jesús ta catyí ra:

—Cha ndicha catyí chi ndo, vatyí tatu chinó iñi ndo ta ma nacaca uvi iñi ndo, ñima ihya ri cha sacuví chi tu higo ihya cuví sacuvi ndo, soco cuví catyí ndo chi yucu ihya tyehe caa: “Canyaha chuun ihya ta cuahan nya chichi tyañuhu.” Ta tyicuan caa cucuvi.

²² Ta tandíhi cha cacán ndo nu chicán tahvi ndo, tatu chinó iñi ndo tyi cucuhva Nyoo, cuñihi ndo —catyí ra Jesús.

Nu sañahá chi yóó ra chahá tyiño chi ra Jesús

(Mr. 11.27-33; Lc. 20.1-8)

²³ Yahá cuan ta quihví ra Jesús chichi vehe ñuhu cahnu, ta cha ni ri ca cha sañahá ra yucuan, tuhva ra cacuví nuu chi tata sutu chi ra, ta ra cacuví mandoñi ñu ñuu Israel, ta candacá tuhun ra chi ra:

—¿Yóó cha tyaá tyiño vatyí sacuvun tyehe caa, ta yóó cha chahá tyiño cuan chuun?

²⁴⁻²⁵ Ta nacahan ra Jesús ta catyí ra:

—Yuhu tucu cua ndaca tuhun noo tuhun chi ndo. ¿Yóó cha tachí chi ra Juan vatyí sacondutya ra chi ñáyívi? ¿Atu Nyoo tachí chi ra, o ñáyívi? Tatu catyí ndo chíi, cucatyí tucu yuhu chi ndo yóó cha tyaá tyiño ihya chíi —catyí ra Jesús chi ra.

Tyicuan ta quichaha cacuvi yuhu ra chihin ra tahan ra, ta cacatyí ra:

—Tatu catyí yo tyi Nyoo tachí chi ra, cucatyí ra chi yo: “Tu tyicuan caa, ¿ñáá tuhun ña chinó iñi ndo chi ra?”

²⁶ Ta tatu catyí yo tyi ñáyivi, ñáyivi cuví nacanda ñu siqui yo, vatyí tandihí ñu chinó iñi ñu tyi ra Juan, cuenda Nyoo cahan ra —catyí ra chi ra tahan ra.

²⁷ Tyicuan ta quichaha cacatyí ra chi ra Jesús tyehe caa:

—Ña chitó ndi.

Tyicuan ta ra Jesús catyí ra chi ra:

—Ni yuhu, ta ma catyí chi ndo yóo cha tyaa tyiño ihya chii.

Nu cahán ra Jesús noo cuhva cuenda uvi tahan sehe noo ra

²⁸ Ra Jesús catyí ra chi ra:

—¿Yoso caa catyí ndo cuenda tuhun cha cua catyí ihya? Noo ra, iyó uvi tahan sehe ra. Ta catyí ra chi noo sehe ra: “Cuahan cua saha tyiño nu iyó tyiño sahí.”

²⁹ Ta nacahan sehe ra ta catyí ra: “¡Ma cuhin!” Soco yaha cuan ta nasama cuhva chicá xiñi ra ta chahan ra chisaha tyiño ra.

³⁰ Yaha cuan ta sutu ra chahan ra nu nyaá inga sehe ra. Ta catyí tucu ra chi ra na cuhun ra cusaha tyiño ra. Soco ra yucuan numi ri quehen ra tuhun, ta catyí ra: “Vaha, Tata, cuhin.” Soco ña chahan ra.

³¹ Chichi cha ninduvi tahan ra, ¿nya ra sacuvi ra cha catyí sutu ra? —catyí ra Jesús.

Ta nacahan ra ta cacatyí ra:

—Ra cha cahan ra chihin cha xihna ri.

Ta catyí ra Jesús chi ra:

—Cha ndicha catyí chi ndo, vatyí xihna ca ra catavá xuhun cuenda gobiernu, ta ñu cata iñi cuquihvi ñu nu nyacá ñaha Nyoo, ican saha nyoho.

³² Vatyí ra Juan ra sacondutya quichí ra, quichi sañaha ra chi ndo yoso caa tahan chi coo ndo, soco nyoho ña chino iñi ndo chi ra, soco ra catavá xuhun ta ñu cata iñi cachino iñi ñu chi ra. Ta nyoho vasi nyehe ndo ihya, soco ña nasama ndo cuhva iyó ndo, tacuhva chino iñi ndo chi ra.

Nu catyí ra Jesús vatyí ra cacahñi chi ra cuví ra tari ra sahá tyiño ña vaha (Mr. 12.1-12; Lc. 20.9-19)

³³ Tyasoho ndo inga cuhva ihya: Chiyo noo chitoho noo ñuhú, ta tachí ra yoho tichaha ndivi, ta tyihí ra noo chacu. Ta savaha ra noo nu cuhñi ra tichaha ndivi cuan ta tava ra ndutya chi. Ta savaha tucu ra noo vehe sucun tacuhva vatyí cuví saha ra cuenda tandihí.

Yaha cuan ta chaha noo ra ñuhú cuan chi suhva ra casahá tyiño, ta cuahan ra inga ñuu.

³⁴ Ta cha cha quivi cha iyó tichaha ndivi cuan, tachí ra chi suhva musu, na cucacan ra chi ra casahá tyiño cuan, na cuhva ra suhva tichaha ndivi cha tahan chi chi ra.

³⁵ Soco ra casaha tyiño cuan, catiñ ra chi musu cuan, ta cacañi ra chi noo ra. Ta chi inga ra cachahñi ra, ta catuchí ra yuu chi inga ra.

³⁶ Tyicuan ta cha inga chaha, cuaha ca musu tachí chitoho chacu cuan ta ñima ca cha xihna ri. Soco tari casacuvi ra chi ra cha xihna ri, sacuvi tucu ra chi ra ihya.

³⁷ Nu ndihí tachí ra chi maa maa sehe ra, vatyí cuñi maa ra vatyí cusaha ra ñáyivi chí sehe ra.

³⁸ Soco cuhva cha cananyehe ra casahá tyiño cuan chí sehe ra, catyí ra chi ra tahan ra tyehe caa: “Ican ra ihya cundoo chihin tandihí ihya. Na cahñi yo chí ra tacuhva ndoo maa yo chihin”, cacatyí ra.

³⁹ Tyicuan ta catiñ ra chí ra, ta catava ra chí ra ityi chata chacu, ta cachahñi ra chí ra —catyí ra Jesús.

⁴⁰ Tyicuan ta ndaca tuhun ra Jesús chí ñu:

—Quivi quichi chitoho ñuhú cuan, ¿ñáá cha cusacuvi ra chihin ra casahá tyiño quiñi iyó cuan?

⁴¹ Ta nacahan ra ta cacatyí ra:

—Ma cuatu ra, soco cahñi ra chí ra caquiñi iyó cuan. Ta cuhva ra ñuhú cuan chí inga ra casahá tyiño. Ta quivi coo tichaha ndivi, cunacuhva cuenda ra chí chitoho chacu cuan cha tahan chí chí ra.

⁴² Tyicuan ta quichaha catyí ra Jesús chí ñu:

—¿Atu ta sacuaha ca nyoho nu tutu Nyoo nu catyí chí tyehe caa?

Yuu cha ña cuñi ra casavahá vehe cotyiño ra,

ican cuan cuví yuu cha ñiñi ca.

Ican ihya cuví cha sacuvi Sutu yo Nyoo.

Ta tyaqui xaan tuhun cuan cha cuenda chi yo, catyí chi.

⁴³ Yucuan chaha catyí chi ndo vatyí ma cuhva ca Nyoo cuhun ndo nu nyacá ñaha ra, ta cucuhva ra chi ñu cha ndicha nyacá ñaha ra añima. Vatyí maa ñu cunacuhva cuenda ñu cha vaha cha tahán chi chi ra.

⁴⁴ Ta cha cuenda yuu cuan, yóo ñu cha nduva siqui chi, yiquin maa cucuvi ñu. Ta tatu yuu cuan ta canacava siqui yóo ñu, cutaxin nyihi maa ñu —catyí ra Jesús.

⁴⁵ Cuhva cha catuvi ñi ra cacuví nuu chi tata sutu cuan ta ra fariseo vatyí cuenda ra cahān ra Jesús cuhva ihya,

⁴⁶ cacuñí ra catiin ra chi ra, soco cayuhvi ra chi ñáyivi vatyí ñáyivi, chitó ñu vatyí ra Jesús cuenda Nyoo cahān ra.

22

Nu chahá ra Jesús noo cuhva cuenda vico tandaha

(Lc. 14.15-24)

¹ Quichahā cahan tucu ra Jesús chihin ñu inga chaha chihin cuhva, ta catyí ra:

² —Cha nyacá ñaha Nyoo añima ñáyivi cuví chi tari noo rey cha savahā noo vico cha cuenda cha cua tandaha sehe ra.

³ Ta tachí ra chi musu ra na cuhun ra cucana ra chi ñu cha nacatyí tuhun ra, soco ñu cuan, ña cacuñí ñu quichi coyo ñu.

⁴ Tachí ra inga chaha chi inga musu, ta catyí ra chi ra tyehe caa: “Catyí ndo chi ñu cha nacatyí tuhun, vatyí cha yahā chahñi sindiqui sane, ta inga quití cha xahan ñandihí, ta cha nyaá vaha nyayu, ta tandihí cha nyatú tuhva. Na quichi ñu vico tandaha”, catyí ra.

⁵ Soco ñu nacatyí tuhun ra, ña caquichahā ñu chi ra. Noo ñu chahan coyo ñu nu iyó chacu ñu, inga ñu chahan ñu nu tyiño sahá ñu.

⁶ Ta inga ñu tñin ñu chi musu rey cuan ta cañi vavaha ñu chi ra nyacua chahñi ñu chi ra.

⁷ Tyicuan ta rey cuan cuxaan vavaha ra, ta tachí ra chi sindaro ra, cucahñi ra chi ra cachahñi cuan, ta cahmi ra ñuu ra.

⁸ Tyicuan ta quichahā catyí ra chi musu ra: “Tandihí ta cha iyó vaha cha cuenda vico tandaha, soco ñu nacatyí tuhun cuan, ña tahán chi cha quichi coyo ñu.

⁹ Cuahan ndo tandihí calle ta nacatyí tuhun ndo chi tandihí ri ñu cha nañihi ndo na quichi coyo ñu vico tandaha”, catyí rey cuan.

¹⁰ Musu cuan cuahan coyo ra tandihí calle, ta casandu ñin ri ra chi tandihí ñu canañihí ra: ñu quiñi iyó, ta ñu vaha. Ta tyicuan caa chitu chichi vehe ra chihin ñáyivi.

¹¹ Tyicuan ta quihvi rey cuan cua nyehe ra chi ñáyivi cha canacatyí tuhun musu cuan. Ta nanyehe ra chi noo ra ñohó yucuan, soco ñahri sahma vico tandaha ñihnó ra.

¹² Ta catyí rey chi ra: “Amigo, ¿yoso caa cha quihvun ihya ta ñahri sahma vico tandaha ñihnón?” Soco ra cuan ña na cahān maa ra.

¹³ Tyicuan ta catyí rey cuan chi ra catyihí mesa cuan: “Cuhñi ndo chaha ra ta ndaha ra, ta tuchi ndo chi ra nu ñaa ñi ityi chata vehe, ta yucuan cucuacu ra, ta cusacahñi ra noho ra”, catyí ra.

¹⁴ Vatyí cuaha xaan ñu nacana Nyoo chii, soco chiin xaan ñu nacachi ra —catyí ra Jesús.

Nu candacá tuhun ra cuenda xuhun cha tavá gobiernu

(Mr. 12.13-17; Lc. 20.20-26)

¹⁵ Tyicuan ta catyihí tahan ra fariseo tuhun chihin tahan ra vatyí cusacahan ra chi ra Jesús noo cuhva cha ña tahán chi, vatyí tyicuan caa ta coo cuatyí catyaa ra siqui ra.

¹⁶ Ta tachí ra chi suhva ra cuenda ra, ñin ri chihin suhva ra cuenda ra Herodes. Ta cacatyí ra chi ra Jesús tyehe caa:

—Maestro, chitó ndi vatyí cha ndicha cahún. Ta chihin cha ndicha sañahún ityi Nyoo. Ta ña quichahún cha cahán ñáyivi, vatyí ña tñin cuendon cuhva caá ri ñu.

¹⁷ Catyí chi ndi yoso caa chicá xiñun: ¿Atu vaha cha tyiyahví yo cha chicán gobiernu ñuu Roma chi yo, o ma tyiyahvi yo?

¹⁸ Soco tuví ñi ra Jesús vatyí ña vaha cuhva cachicá xiñi ra, ta catyí ra chi ra:

—Nyoho sahá ndo tyi vaha ndo, soco ña ndicha ndo. ¿Ñáa tuhun cha nducu nyehe ndo chii?

¹⁹ Sañaha ndo xuhun cha tuhva ndo tyiyahvi ndo chi gobiernu —catyí ra.

Ta caquichí nyaca ra noo xuhun cha nañí denariu chi ra.

²⁰ Ta cuhva cha nanyehe ra Jesús, ta quichaha ndaca tuhun ra chi ra:

—¿Yóó chi nuu ta yóó chi sívì nyaá ihya?

²¹ Ta nacahan ra ta cacatyí ra:

—Chi ra nyacá ñaha.

Tyicuan ta catyí ra Jesús chi ra:

—Cuhva ndo chi ra nyaca ñaha cha tahán chi chí ra, ta cuhva tucu ndo chi Nyoo cha tahán chi chí Nyoo —catyí ra.

²² Cuhva cha cachiñi ra cha cahan ra Jesús, iyo xaan cacuñi ra. Ta cuahan coyo ra.

Nu canducu tuhun ra saduceo siqui tuhun cha nandotó ndiyi

(Mr. 12.18-27; Lc. 20.27-40)

²³ Suri quivi cuan suhva ra saduceo chahan coyo ra nu nyaá ra Jesús. Ta ra saduceo cuan ña cachino iñi ra cha cunandoto ndiyi quivi cu naa ñayivi. Yucuan chaha candaca tuhun ra chi ra Jesús, ta catyí ra:

²⁴ —Maestro, ra Moisés catyí ra vatyí tatu noo ra tandaha ta chihí ra ta ña chiyo sehe ra, tahán chi cha tandaha yañi ra chihin ñaha chihí yí cuan. Tyicuan ta coo sehe ra chihin ña cha cuenda yañi ra cha chihí.

²⁵ Vaha. Vityin tyehe caa cuví chi noo ra chiyo ucha tahan ra chihin yañi ra. Ra cha xihna ri tandaha ra. Yaha cuan ta chihí ra. Soco vatyí ña chiyo sehe ra, ndoo ñasihí ra chi yañi cu uvi ra.

²⁶ Ta suri tyicuan caa cuví chi yañi ra ra cu uvi. Ta yaha cuan, ta ra cu uñi quehen ra chi ña, ta suri chihí tucu ra. Ta tyicuan caa cuví chi ndi ucha ra.

²⁷ Ta cha yaha cuan nu ndihí tuhun chihí ndihí maa ña cuan.

²⁸ Ta cha tyicuan caa, quivi cunandoto ñu, chichi cha ucha ra chihin yañi ra, ¿nya ra cucuvi ñasihí chi ñaha cuan? ¿Vatyí tandihí ra tandaha ra chihin ña? —cacatyí ra.

²⁹ Nacahan ra Jesús ta catyí ra:

—Nyoho, cahán tondo ri maa ndo, cha cuenda vatyí ña chitó ndo cha nyaá nu tutu Nyoo, ni tunyee iñi Nyoo, ta ña chitó ndo.

³⁰ Vatyí quivi cunandoto ndiyi, ni ma tandaha ñu, ta ni ma cuhva ñu sehe ñu tandaha, vatyí tari ángel Nyoo ra nyaá andivi cucuvi ñu.

³¹ Soco tuhun cha nandotó ñu ndiyi, ¿atu ta sacuaha ca ndo tuhun cha catyí maa Nyoo chí ndo? Catyí ra tyehe caa:

³² “Yuhu cuví Nyoo cuenda ra Abraham, ta ra Isaac ta ra Jacob.”

Ihya nyehé yo vatyí canyito añima ra cuan, vasi cha naha chihí ra vatyí Nyoo ñima Nyoo cuenda ñu ndiyi cuví ra, soco Nyoo cuenda ñu nyitó cuví ra —catyí ra.

³³ Iyo cuñí ñáyivi cha chihí ñu tuhun sañahá ra Jesús.

Ley cha niñi ca cha chaha Nyoo

(Mr. 12.28-34)

³⁴ Cha cachito ra fariseo vatyí ra Jesús chasi ra yuhu ra saduceo, candu ñn ri ra.

³⁵ Ta noo ra cha cuví ra sacuahá ley vehe ñuhu, cuñi ra nducu nyehe ra chí ra Jesús. Ta quichaha ndaca tuhun ra chí ra, ta catyí ra:

³⁶ —Maestro, ¿nya mandamiento cha nyaa nu ley cuví cha niñi ca?

³⁷ Ta catyí ra Jesús chí ra:

—“Cuñun chí Sutu Mañi yo Nyoo chihin cha ni ñun ta chihin cha tandihí añimon, ta chihin cha tandihí cha chíni tuñi xiñun.”

³⁸ Ican ihya mandamiento cha niñi ca, ta cha xihna ri ñandihí.

³⁹ Ta cha cu uvi cha yatyin ri tyicuan caa, ta catyí chí: “Cuñun chí ñáyivi tahun tari cuñún chí maun.”

⁴⁰ Ican uvi tahan mandamiento ihya cuví cha nyisó chí ley cha chaha Nyoo chí ra Moisés ta tandihí tuhun cha casañaha ra profeta Nyoo ta cha naha.

Ra Cristo quichí ra tata ra David, ta suri cuví ra Sehe Nyoo

(Mr. 12.35-37; Lc. 20.41-44)

⁴¹ Cha ni ri ca cha canyicú ñn ri ca ra fariseo,

⁴² ra Jesús ndaca tuhun ra chí ra, ta catyí ra:

—¿Yoso caa chicá xiñi nyoho cuenda ra cuví Cristo? ¿Yóó chí tata vachi ra cuñí maa ndo?

Ta canacahan ra ta catyí ra:

—Tata ra David cuví chí ra.

⁴³ Tyicuan ta ra Jesús catyí ra chí ra:

—¿Ta yoso caa cha vatyi ra David cuan, maa Tatyí li Nyoo chotyíño chi ra? ta catyi ra vatyi ra cuví Cristo, ra nyacá ñaha chi ra cuví ra, vatyi catyi ra tyehe caa:

⁴⁴ Cahan Suti Nyoo chihin Suti ra Cristo, ta catyi ra chi ra:

“Cunyaa chiyo vahi nyacua nya quivi cuhve chi ra xaan iñi chuun vatyi cuaca chahun siqui ra” tyaá ra David.

⁴⁵ ¿Yoso caa cha ra vachi tata ra David cuví chi ra Cristo, tatu suri maa ra David catyi ra vatyi ra Cristo Sutu ra cuví chi ra? —catyi ra Jesús.

⁴⁶ Ta yori maa cuví nacahan ni noo tuhun. Ta nya ndaha quivi cuan, yori ca maa caña iñi candaca tuhun ñáá ca cha candaca tuhun chi ra.

23

Nu cahán ra Jesús chi ra sacuahá ley vehe ñuhu ta ra fariseo

(Mr. 12.38-40; Lc. 11.37-54; 20.45-47)

¹ Tyicuan ta ra Jesús catyi ra chi ñáyivi, ta chi ra cachicá noo chihin ra tyehe caa:

² —Ra sacuahá ley ta ra fariseo nyicú ra tyiño cha sañahá ra ley cha tyaá ra Moisés.

³ Ta cha tyicuan caa, quichaha ndo cha cahán ra ta sacuvi ndo tandihi cha cacatyí ra chi ndo. Soco ma quehen ndo cuhva iyó ra, vatyi maa ra, siin cha sañaha ra, ta siin cha sacuví ra.

⁴ Vatyi yori ndoyo carga cha tyaá ra siqui ñáyivi. Ta saniñi ra chi ñu na cuiso ñu, ta maa ra ni chiin nundaha ra ña nañi chata carga cuan.

⁵ Tandihi cha casacuví ra, cha cuñi ra na nyehe ñáyivi. Vatyi tahán iñi ra catyaa ra tuhun Nyoo tyaan ra ta soco ra chihin letra nahnu. Ta tahán iñi ra cacuihno ra sahma chihin adorno nañi.

⁶ Ta nu vaha ca, cuñi ra cunyicu ra vico, ta cachi ra. Ta nu vaha ca cuñi ra cunyicu ra chichi vehe ñuhu.

⁷ Ta nu chicá noo ra cacuñi ra vatyi cuhva ñáyivi nocumi chi ra chihin cha sahá xaan ñu ñáyivi chi ra. Ta cuñi tucu ra cha catyi ñu chi ra vatyi chito xaan ra.

⁸ Soco nyoho, ma cuhva ndo ityi cha catyi ñáyivi vatyi chitó xaan ndo. Vatyi tandihi

nyoho, yañi ndo cuví. Ta noo ri ra chitó iyó, ta ican ra cuví Cristo.

⁹ Ta ma catyi ndo Sutu ndo chi ninoo ra ñuhu ñáyivi ihya, vatyi iyó noo Sutu ndo, ta nyaá ra andivi.

¹⁰ Ta ma catyi ndo vatyi ra cuví nuu cuví ndo, vatyi noo ri maa ra Cristo cuví nuu.

¹¹ Ra cha sacuví tyiño nuu tandihi ca ra, ican ra cuan cuví ra cahnu ca nu nyicú ndo.

¹² Vatyi ra cahnu sahá chii, cunocuee ra. Ta ra ña cahnu sahá chii cucucahnu ra.

¹³ ¡Ndahvi nyoho ra sacuahá ley vehe ñuhu, ta ra fariseo! ¡Ndahvi nyoho cha sahá ndo tyi vaha ndo! Vatyi chasí ndo yuvehe nu nyacá ñaha Nyoo, tacuhva ma cuvi quihvi ñáyivi. Ta ni ri maa ndo ña quihvi ndo ta ni ña chahá ndo cha quihvi ñáyivi, ñu cuñi quihvi.

¹⁴ ¡Ndahvi nyoho ra sacuahá ley ta ra fariseo, nyoho cha sahá ndo tyi vaha ndo! Vatyi tinyaá ndo vehe ñu chihí yí, tyi ña cuví tyiyahvi ñu ñáá xuhun tavá ndo siqui ñu. Ta yahá cuan, ta naha chicán tahvi ndo nu tuvi vatyi sahá ndo tyi vaha ndo. Ta cuenda cha sacuví ndo tyehe caa, cahnu ca tindocho cunyehe ndo.

¹⁵ ¡Ndahvi nyoho ra sacuahá ley vehe ñuhu, ta ra fariseo. ¡Sahá ndo tyi vaha ndo, soco ña ndicha ndo! Vatyi nducú xaan ndo cuhva na cunyicon ñáyivi chi ndo. Ta tatu cha nandihvi ñu cuenda ndo, quiñi caa nicoo ñu saha ndo, ta ñima ca maa ndo. Ta cha tyicuan caa nyacuví ndo, ñihi ca sacuhún ndo chi ñu anyaya cha nuu maa ndo.

¹⁶ ¡Ndahvi nyoho ra ndahvi! Vatyi cuñi ndo saquehen ityi ndo chi ñáyivi, ¡soco cuaa ndo! Vatyi catyi ndo tatu noo ñu catyi ñu cha cusacuvi ñu noo cha cusacuvi ñu, ta tyanaha ñu chihin sivi vehe ñuhu, yucuan ña niñi cha sacuvi ñu. Soco tatu xuhun cuaan cha iyó vehe ñuhu cuan tyanaha ñu, yucuan ndicha, niñi cuñi chi cha sacuvi ñu, catyi ndo.

¹⁷ ¡Tondo xaan ndo ta cuaa ndo! ¿Nya cha niñi ca? ¿Atu niñi ca xuhun cuaan cuan, o vehe ñuhu cha sacu ii chi xuhun cuaan cuan?

¹⁸ Ta suri catyi tucu ndo: “Tatu yihí ñu catyi ñu cha cusacuvi ñu cha cusacuvi ñu, ta tyanaha ñu cuenda arta cha yoso cha

chahá cuenda ñu chi Nyoo, ña niñi cha sacuvi ñu. Soco tatu tyanaha ñu cuenda ofrenda cha yosó siqui arta cuan, yucuan ndicha niñi cuñi chi sacuvi ñu, catyí ndo.”

19 ¡Tondo xaan ndo ta cuaa ndo! ¿Nya cha niñi ca? ¿Atu niñi ca ofrenda o arta cuan cha sacu ii chi ofrenda cuan?

20 Vatyí ñu tyanahá cuenda arta cuan, ñima cuenda ri cuan tyanaha ñu, soco cha cuenda tandihi cha yosó nuu ñandihí.

21 Ta ñu tyanahá cuenda vehe ñuhu cahnu, ñima cuenda vehe ñuhu ri cuan, soco cuenda Nyoo tyanahá ñu ñandihí, vatyí iyó ra yucuan.

22 Ta tyicuan caa tucu ñu tyanahá cuenda andiví, tyanahá tucu ñu cuenda tyayu Nyoo ta suri cha cuenda maa Nyoo ñandihí, tyi maa ra cuví ra nyaá nyacá ñaha yucuan.

23 ¡Ndahvi nyoho ra sacuahá ley vehe ñuhu ta ra fariseo! sahá ndo tyi vaha ndo vatyí chahá ndo diesmo chi Nyoo cha cuví menta, ta añii, ta comino. Soco ña quichahá ndo tuhun cha niñi ca cha nyaá nu ley cha tahán chi sacuvi yo. Ta cuñun, cha sacuví yo cha vaha chihin tandihí ñáyiví, cha cundahvi cuñi yo chi ñu, cha chinó iñi yo chi Nyoo ta ma sandoo yo chi ra. Ican ihya cuñi chi sacuvi ndo, ta ma sandihí ndo cha cuhva ndo diesmo cuan ñandihí.

24 Nyoho cuñi ndo casaquehen ityi ndo chi ñáyiví, soco cuaa ndo. Vatyí sacuita ndo noo tiyucun luhlu, soco coco ndo noo camellu. Cuatyí luhlu ri nyehe ndo ta ña sahá ndo cuenda cuatyí cahnu cuví cuan.

25 ¡Ndahvi nyoho ra sacuahá ley vehe ñuhu ta ra fariseo, ra casaha tyi vaha! Vatyí ityi chata ri vasu ta ityi chata ri coho sanduvíí ndo, soco ityi chichi ña sanduvíí ndo. Vatyí chichi añima ndo tyitu ñohó cha quiñi caa. Chicá xiñi ndo cha ñihí ndo nu cusuhu ndo, ta ña cuví chasaha ndo cha quiñi caa cha quichi cuví xaan iñi ndo.

26 ¡Ra fariseo cuaa cuví ndo! Sanduvíí xihna ndo ityi chichi vasu ta coho, tyicuan ta cuvii tucu ityi chata.

27 ¡Ndahvi nyoho ra sacuahá ley vehe ñuhu ta ra fariseo, ra casavaha chii! Vatyí cuví ndo tari noo ñaña ndiyí cha nacahyu, vatyí ityi chata chi tyaqui xaan, soco ityi chichi tyitu ñohó yiquí ndiyí, ta tandihí nuu cha quiñi caa.

28 Tyicuan caa cuví nyoho. Vatyí ityi chata tari maa tyi vaha xaan ndo nuu ñáyiví, soco ityi chichi, tyitú ñohó cha cuendu ndo, ta cha quiñi caa.

29 ¡Ndahvi nyoho ra sacuahá ley vehe ñuhu, ta nyoho ra fariseo! Sahá ndo tyi vaha ndo ta ña ndicha. Nyoho samá ndo ñaña ra profeta Nyoo ra chiyo ta cha naha. Ta nyoho nacahyu ndo ñaña ñáyiví vaha ñu chiyo ta cha naha.

30 Ta yucuan ta catyí ndo! “Tyehe ta chiyo ndi quiví chiyo ñáyiví chahnu ndi, ma tyinyee ndi chi ra chahñi chi ra profeta Nyoo”, catyí ndo.

31 ¡Ma chihin yucuan ri! Suri maa ndo nacotó ndo vatyí vachi ndo tata ñu cachahñi chi profeta Nyoo.

32 ¡Vaha vityin, chaha chi cuhva savaha ndihí ndo cha quiñi caa cha quichaha savaha sutu chahnu ndo!

33 ¡Nyoho ñu quiñi iyó, ñu vachi tata coo! ¿Yoso caa cucacu nyoho tacuhva ma cuhun ndo anyaya? Ma cuví.

34 Yucuan chaha cutachi chi ra profeta Nyoo nu nyicú ndo, cutachi tiquí chi ra chiñi tuñi, ta ra sacuahá nu nyicú ndo. Soco nyoho cucahñi ndo chi ra ta cutyaa ndo chi suhva ra nu cruzi. Ta chi inga ra cucañi ndo chi ra chichi vehe ñuhu. Ta cacanyicon ndo chi ra tahan tahan ñuu.

35 Yucuan chaha, siqui ndo cucunyaa cuatyí cha cuenda cha cachihí tandihí ra vaha cha cachahñi ñu nyacua nya ra Abel ta nyacua nya ra Zacarías sehe ra Berequías ra cha chahñi ndo chichi vehe ñuhu yatyin nu nyaá arta cha yosó cha chahá cuenda yo chi Nyoo.

36 Cha ndicha catyí chi ndo, vatyí tandihí cuatyí ihya cucoso siqui ñáyiví cha iyó vityin —catyí ra Jesús chi ra.

Nu nducuihya iñi ra Jesús nyehe ra chi ñuu Jerusalén ta chacu ra (Lc. 13.34-35)

37 ¡Jerusalén, Jerusalén! ¡Ndahvi nyoho ñu iyó ñuu chiña! Vatyí chahñi ndo chi ra profeta Nyoo. Ta tuchi ndo yuu chi tandihí ra cha saquichí Nyoo nu nyicú ndo. Cuaha xaan chaha cuñi saha cuende chi ndo, tari noo ndiví cha sahá cuenda ti chi sehe ti, ta

naquehén ndahvi ti chi ti chichi ndichin ti, soco ña cuñi ndo.

³⁸ Nyehe ndo vityin, vatyí cha sando ndahvi chi ndo.

³⁹ Vatyí catyí chi ndo, vatyí ma nyehe ca ndo chii nyacua nya chaa chi quivi cucatyí ndo tyehe caa: “Cahnu xaan ra cuví ra vachi chihin tunyee iñi sivi Sutu yo Nyoo”, cucatyí ndo —catyí ra Jesús.

24

Nu catyí ra Jesús vatyí cutani vehe ñuhu cahnu

(Mr. 13.1-2; Lc. 21.5-6)

¹ Quita ra Jesús chichi vehe ñuhu cahnu cuan, ta cha cuñi cahun ra, ta catuhva ra cachicá noo chihin ra chi ra, ta quichaha casañaha ra vehe ñuhu cuan chi ra.

² Soco nacahan ra Jesús ta catyí ra:

—¿Atu nyehé ndo tandihí ihya? Cha ndicha catyí chi ndo, vatyí ihya ni noo yuu ta ma ndoo coso nyitahan. Tandihí ta cutani —catyí ra.

Nu catyí ra Jesús ñáá ndihí seña cucuvi cha ni cumañi ca naa ñayivi

(Mr. 13.3-23; Lc. 21.7-24; 17.22-24)

³ Tyicuan ta cuahan coyo ra yucu yutun Olivo. Ta cuhva cha nyaá ra Jesús yucuan, ra cachicá noo chihin ra quichí coyo ra ta catyí xehe ra chi ra tyehe caa:

—Cuñi ndi cha catyun chi ndi, ama cucuvi tuhun cuan. ¿Ñáá seña cucuvi cha cuquichun inga chaha ta cha cunaa ñayivi?

⁴ Tyicuan ta nacahan ra Jesús:

—Saha ndo cuenda chi ndo coto yóo cha sandahvi ñaha chi ndo.

⁵ Vatyí cuaha xaan ra cuquichi, ta cotyiño ra sivi, ta cucatyí ra tyehe caa: “Yuhu cuví Cristo ra cha saquichi Nyoo.” Ta cuaha ñu cusandavi ñaha ra.

⁶ Nyoho cuñihí ndo tuhun tyi iyó cuatyí ta cañi tahan ñayivi ityi cuan ityi ihya. Soco ma nayuhvi ndo, vatyí tyicuan caa tahan maa chi cuvi. Soco ta chaa ca quivi cunaa ñayivi.

⁷ Vatyí ñayivi noo ñuu cahnu, cucañi tahan ñu chihin ñayivi inga ñuu cahnu. Ta cucoo cuatyí noo ñuu chihin inga ñuu. Ta cucoo soco, ta cucoo cuehe, ta cha taan nahnu cuaha ri ityi.

⁸ Tandihí ihya ta nu cua quichaha ñayivi nyehe ñu tindoho cuvi.

⁹ Tyicuan ta cucuhva cuenda ñu chi nyoho vatyí sanyehe ra tindoho chi ndo. Ta cacahñi ra chi ndo. Ta tandihí ñu iyó siqui ñuhu ñayivi cutasi cuñi nyehe ñu chi ndo cha cuenda yuhu.

¹⁰ Quivi cuan cuaha xaan ñu cusandihí ñu cha chino iñi ñu chii, ta cutasi cuñi ñu nyehe ñu chi tahan ñu. Ta cunaxico tuhun ñu chi tahan ñu.

¹¹ Cuaha xaan ra cuendu cunatuvi, ta cucatyí ra vatyí cuenda Nyoo cacahan ra. Ta cuaha xaan ñayivi cucasandavi ñaha ra.

¹² Ta cuaha xaan cha quiñi caa cucoo. Yucuan chaha cuaha xaan ñu cusandihí ñu cha cuñi ñu chi tahan ñu.

¹³ Soco ñu cha ña ndu uvi iñi chino iñi chii nyacua nya nu ndihí, cucacu añima ñu.

¹⁴ Ta cucutya nicanhu ñayivi tuhun vaha cha nyacá ñaha Nyoo añima ndo, tacuhva coto tandihí ñayivi iyó siqui ñuhu ñayivi, tyicuan ta cunaa ñayivi.

¹⁵ Tandihí nyoho cha sacuahá ndo ihya, na cutuñi iñi ndo tuhun ihya: Ra Daniel, ra profeta Nyoo ta cha naha, tyaa ra tuhun noo cha sacuquiñi caa, noo cha sativi. Ta quivi nyehe ndo vatyí chaa ihya Nu Ii,

¹⁶ tyicuan ta ñu ñohó Judea, cuñi chi cono ñu ityi yucu.

¹⁷ Ta ñu yosó xiñi vehe, noo ñu, soco ma quihvi ñu chichi vehe ñu tava ñu cha iyó chichi vehe cuan.

¹⁸ Ta ñu ñohó nu chiqui, ni ma cunuhu ca ñu cunaquehen ñu ni sahna ñu.

¹⁹ ¡Ndahvi ñusihi cha cañohó sehe quivi cuan! O tatu iyó sehe ñu cha chaxín, ¡ndahvi ñu cuan!

²⁰ Cacan ndo chi Nyoo tacuhva cha ma tahan chi caca cono ndo quivi vichin, ni quivi nyitatu yo.

²¹ Vatyí cuaha xaan tindoho cucoo quivi cuan, noo tindoho cha ta coo ca maa nyata chingo ñuhu ñayivi, ta ni ma coo ca cha yaha tuhun cuan.

²² Soco tatu Nyoo, ta ma sanducuti ra quivi cuan, yori maa cacu. Soco cusanducuti ra cha cuenda cha cuñi ra chi ñu nacachi maa ra.

²³ Ta tatu yóo cha catyí chi nyoho: “Nyehe ndo, ma ra Cristo ihya” o “Nyehe ndo ma ra nyaá yucuan”, ma chino iñi ndo.

24 Vatyí cuquichi coyo ra casandavi ñaha ta cucatyí ra vatyí ra Cristo cacuví ra. Ta cucatyí ra vatyí ra profeta Nyoo cacuví ra. Ta cusavaha ra seña ta milagru nahnu tacuhva casandavi ñaha ra. Nyacua nya ñu cha nacachí maa Nyoo ta cusandavi ñaha ra tatu cuví chi ra.

25 Saha ndo cuenda vatyí cha yahá catyí chi nyoho cha ni cumañi ca cuví.

26 Yucuan chaha tatu catyí ñu chi ndo tyehe caa: “Nyehe ndo, ma ra Cristo nyaá nu chiqui ndíi cuan”, catyí ñu chi ndo, ma cuhun ndo. O tatu catyí ñu chi ndo: “Nyehe ndo, ma ra nyaá chichi cuarto ihya”, ma chino íñi ndo.

27 Vatyí tari noo cha quihví tacha cha nyehé yo cuxiño nya nu caña ñanyii ta nya nu quee ñanyii, tyicuan caa cucuvi quívi quichi yuhu Rayíi cha quichi nya gloria.

28 Nu caá coño chihí, yucuan cuchaa coyo chii.

*Yoso caa cuquichi ra Cristo inga chaha
(Mr. 13.24-37; Lc. 21.25-33; 17.26-30, 34-36)*

29 'Ta cha yahá ri cha nyehé ñu tindoho, ta cunduñaa ñanyii, ta yoo ma sacundichin ca chí. Ta tiñoo cucanacoyo tí andívi, ta nyacua nya cha iyó andívi cunacanda.

30 Tyicuan ta cuquetuvi noo seña ityí andívi nu vachi yuhu Rayíi cha quichí nya gloria. Cuquichi nu vico ityí andívi chihin tunyee íñi cahnu ta chihin cha cahnu cuví Nyoo. Ta tandihí ñáyívi iyó síqui ñuhu ñayívi, cucuacu chaa xaan ñu cha nanyehe ñu chii.

31 Ta cutachi ángel cuende tacuhva vatyí chihin cha ñihí tiví ra cutu ra ta cusandu in ri ra chí ñu nacachí maa Nyoo chí, cuquita ñu nicacahnu nu ñuhu ñayívi, nyacua nya nu ndihí ñuhu ñayívi ta nyacua nya nu ndihí andívi.

32 'Cutuñi íñi ndo noo cuhva yutun cha nañi hígo: Tatu cha yutya soco tun, ta caña ndaha tun, nyoho cha chitó ndo vatyí cha vachi vico savi.

33 Ta suri tyicuan caa, tatu cha nyehé ndo tandihí maa cha cucuvi ihya, coto ndo vatyí cha cuyatyin quichi. Cha nyañaí yuvehe cuví chi cuan.

34 Cha ndicha catyí chí ndo vatyí tandihí tuhun ihya, cucuvi cha ní ri ca cha iyó ñáyívi.

35 Andívi ta ñuhu ñayívi cundihí chí, soco tuhun cahán yuhu, ma ndihí chí. Ta cuchino cava tandihí tuhun cahin chihin ndo ihya.

36 'Soco quívi ta cuhva cha cucuvi cuan, yori chitó, ní ángel andívi ta ña chitó ra. Ní yuhu Rayíi cha quichí nya gloria ta ña chité. Noo tuhun ri maa Nyoo Suti chitó ra.

37 'Tari cuví quívi chiyó ra Noé, tyicuan caa cucuvi quívi quichi tucu yuhu Rayíi cha quichi nya gloria.

38 Quívi ta ní cumañi ca coon savi xaan, ñáyívi cuan, chachí ñu, ta chihí ñu, tandahá ñu, ta chahá ñu chí sehe ñu tandaha nyacua nya quívi quihví ra Noé chichi barcu cuan.

39 Ta sana íñi ñu ta chaá savi ta tyañi tandihí ñu. Ta tyicuan caa cucuvi tucu quívi quichi tucu yuhu Rayíi cha quichí nya gloria.

40 Quívi cuan, tu uvi ra ñohó ra nu chiqui. Noo ra cunaquehin, ta noo ra ndoo ra.

41 Tu uvi ñusihí nyicó ñu molinu. Noo ña cunaquehin, ta noo ña ndoo ña.

42 Cuatu tuhva vaha ndo vatyí ña chitó ndo ñáá cuhva cuquichi ra nyacá ñaha chí ndo.

43 Soco coto ndo tuhun ihya vatyí tatu noo chitoho vehe ta chitó ra ñáá cuhva cuquihví ra suhu chichi vehe ra, cuatu tuhva vaha ra ta ma cuhva ra cha quihví ra suhu cuan.

44 Yucuan chaha nyoho, cuatu tuhva ndo. Vatyí sana ri íñi ndo, ta cuquichi yuhu Rayíi cha quichi nya gloria.

*Ñu cha nyatú tuhva na ndichi ra Cristo,
ican ñu cuví musu vaha ra
(Lc. 12.41-48)*

45 'Noo musu cha tyasohó tuhun cahán chitoho, ta tyicuan ri sacuví ra tyiño tyaa ra chí ra, yucuan cuví noo musu vaha. Ta sahá cuenda ra vehe chitoho ra. Ta chahá ra cha cachi inga musu cha vahri cuhva.

46 Ta síi xaan cuví chí musu cuan tatu cuhva cha sahá tyiño ra ta nachaa chitoho ra. Vatyí quichahá ra tandihí cha tahán chí sacuvi ra.

47 Ta cha ndicha catyí chí ndo, vatyí chitoho ra cunatyaa ra tandihí cha cumí ra

ndaha ra, vatyí vaha quichahá ra chihin tyiño sahá ra.

⁴⁸ Soco tatu noo musu quiñi iyó ta chicá xiñi ra vatyí naha cuahan chitoho ra,

⁴⁹ ta quichaha nyacuvi ra cha ña vaha chihin inga musu cuan, ta quichaha chachi ra ta chihí ra ndixi chihin ra chiñi,

⁵⁰ tyicuan ta sana iñi ra ta ndichí chitoho ra quiñi cha ña nyatú ra chí ra.

⁵¹ Tyicuan ta chitoho ra ñihí xaan cutachi tuñi ra chí ra chihin ñáyivi quiñi iyó cha savaha chii soco ña ndicha. Tyicuan ta cucuacu ra ta cusacahñi ra noho ra.

25

Nu chahá ra Jesús noo cuhva cuenda uchi tahan ñu tyivaa

¹ Cha nyacá ñaha Nyoo aña ñáyivi cuví chí tari uchi tahan ñu tyivaa cha quehen ñu lámpara cha yihí acetye ta cuahan coyo ñu noo vico tandaha cua quehen cuenda ñu chí ra cha cua tandaha.

² Ohon tahan ñu, tondo xaan ñohó iñi ñu, ta ohon tahan ñu cachi xaan ñohó iñi ñu.

³ Ñu cha tondo ñohó iñi cuan, canyisó ñu lámpara ñu soco ña quehen ñu suhva ca acetye vatyí natyihí ñu chichi lampara ñu tatu ndihí.

⁴ Soco ñu cachi ñohó iñi cuan, canyisó sñin ñu yutyí acetye chihin lámpara ñu.

⁵ Ta vatyí cucuee ca chaa ra cha cua tandaha cuan, catñin ñumahna chí tandihí ñu, ta caquixí ñu.

⁶ Tyicuan ta ñáá cuhva ñuu, ta chiñi ñu noo ndusu cha catyí tyehe caa: “¡Cha vachi ra cha cua tandaha! ¡Quita ndo, quehen cuenda ndo chí ra!” catyí ndusu cuan.

⁷ Tandihí ñu tyivaa cuan canducuita coyo ñu ta quichaha casanduvaha ñu lámpara ñu.

⁸ Tyicuan ta quichaha catyí ohon ñu tondo ñohó iñi cuan chí inga ohon ñu cuan: “Cuhva ndo suhva acetye ndo chí ndi, vatyí cuñí ndahva lámpara ndi”, catyí ñu.

⁹ Soco ñu tyivaa cha cachi ñohó iñi cuan nacahan ñu tyehe caa: “Ma cuhva ndi vatyí coto ma ñihí, ni cha cuenda maa ndi ta ni cha cuenda maa ndo. Cuahan taxi ndo nya nu quiyahví chí, ta sata ndo cha cuenda ndo.”

¹⁰ Soco cha ni ri ca cha cuahan coyo ndi ohon ñu cha tondo ñohó iñi cuan, cua sata

ñu acetye, ta chaa ra cha cua tandahá cuan. Ta ñu tyivaa cha nyatú tuhva cuan, quiñivi coyo ñu chihin ra chichi vehe nu cuacoo vico tandaha cuan. Ta nicunyasí ri yuvehe.

¹¹ Yahá cuan ta cachaa coyo tucu ñu chisata acetye cuan, ta catyí ñu: “¡Tata! ¡Tata! ¡Ñuña yuvehe naquihví ndi!”

¹² Soco maa ra nacahan ra, ta catyí ra: “Cha ndicha vatyí ña ñohó nui chí nyoho.”

¹³ Tyicuan ta quichaha catyí ra Jesús:

—Cuatu tuhva ri nyoho, vatyí ña chító ndo nya quiñi ta ñáá cuhva cuquichi yuhu Rayi cha quichi Nya gloria.

Noo cuhva cuenda xuhun (Lc. 19.11-27)

¹⁴ Cha nyacá ñaha Nyoo aña ñáyivi cuví chí tari noo ra cha cha nyaá cha cua quita cuhun inga ñuu. Ta cana ra chí musu ra, ta chaha cuenda ra xuhun chí ra.

¹⁵ Chí noo ra chaha ra ta cha ohon mil xuhun, ta chí inga ra chaha ra ta cha uvi mil, ta chí inga ra tari noo mil. Chaha ra chí noo noo ra yoso cuhva cha cuví saha tyiño ra chihin. Tyicuan ta cuahan ra.

¹⁶ Musu cha quehen cuenda ohon mil xuhun cuan, saha ra lucha chihin xuhun cuan, ta saha ganaa ra nonga ohon ca mil chihin xuhun cuan.

¹⁷ Ta suri tyicuan caa tucu ra cha quehen cuenda uvi mil cuan, saha ganaa ra uvi ca mil chihin xuhun cuan.

¹⁸ Soco ra cha quehen cuenda noo ri mil cuan, chahan ra ta chatya ra noo yavi chichi ñuhú ta tixehe ra xuhun chitoho ra.

¹⁹ Cuaha quiñi yahá ta nachaa chitoho musu cuan. Ta quichaha natava ra cuenda chihin noo noo ra.

²⁰ Xihna ca ra cha quehen cuenda ohon mil xuhun cuan chaa, ta nacuhva cuenda ra ohon ca mil siqui cuan, ta catyí ra: “Tata, ohon mil chahun chii, ma inga ohon mil ihya cha saha ganai.”

²¹ Ta chitoho ra catyí ra chí ra: “Vaha. Noo musu vaha xaan cuvún. Ta sacuvun tandihí cha catyí. Ta vasi chiin ri xuhun chahí chuun soco vaha xaan chotyíñon chí chí. Vityin cuaha ca cucuhva cuende chuun. Quiñivi nu vaha ihya, ta cusí cuñun chihin.”

²² Yahá cuan ta chaa tucu musu cha quehen cuenda uvi mil xuhun cuan, ta

catyí ra: “Tata, uvi mil chahun chii, ma uvi ca mil ihya cha saha ganai siqui.”

²³ Ta catyí chitoho ra chi ra: “Vaha. Noo musu vaha xaan cuvún, ta sacuvún cha catyí. Vasi chiin ri xuhun चाहि चुन soco vaha xaan chotyíñon chi chi. Vityin cuaha ca cucuhva cuende chuun. Quihvi nu vaha ihya, ta cusii cuñun chihin”, catyí ra.

²⁴ Soco cuhva cha cha musu cha quehen cuenda noo mil ri xuhun cuan, catyí ra chi chitoho ra: “Tata, yuhu chité vatyí cuvún noo ra xaan ta cuñun naquehún xuhun noo nu ña sahá tyiñon, ta cuñun naquehun cosecha noo nu ña tachun.

²⁵ Yucuan chaha nayuhvi ta chahin ta tyihí xehi xuhun chichi ñuhú. Soco ma xuhun ihya cha chahun chii”, catyí ra.

²⁶ Tyicuan ta nacahan chitoho ra, ta catyí ra chi ra: “Musu quiñi iyó ta musu suchan cuví yoho. Tatu chitón vatyí cuñi naquehín nu ña saha tyiñe, ta quehín cosecha noo nu ña tachí,

²⁷ ¿ñáá tuhun ña chityihun xuhin banco? Ta cha ndichi ta, cunaquehin xuhun cuan chihin xuhun siqui cha saha ganaa chi”, catyí ra.

²⁸ Tyicuan ta quichaha catyí ra chi ñu nyicú cuan: “Tinya ndo noo mil xuhun cha nyisó ra, ta cuhva ndo chi ra cha nyisó uchi mil.

²⁹ Vatyí ñu iyó chii, cuhva que chi ñu, ta coo cuaha chi ñu, nyacua ndoo ca. Soco ñu ñahri chii, nyacua nya cha chiin cha cumí ñu, cutinyaa ndihi chi ñu.

³⁰ Ta musu cha ña chiñuhú ihya, tuchi ndo chi ra nu ñaa iñi ityi chata, ta yucuan cuacu chaa ra, ta cusacahñi ra noho ra chihin cha nyehe ra tindoho.”

Nu catyí ra Jesús vatyí cucutuñi chi tandihí ñáyivi

³¹ Quivi cuquichi yuhu Rayi cha quichi nya gloria, cuquichi chihin cuaha ángel cuende, ta cucunyai tyayu tyaqui ta cunyaca ñahi.

³² Ñáyivi tandihí ri ñuu cundu in ri ñu nui. Ta cusasin chi noo noo ñu, tari ra sahá cumi mbee tavá sin ra chi mbee ta tava sin ra ndixihyu.

³³ Ta cucuatyai chi mbee cuan chiyo vahi, ta chi ndixihyu cuan, chiyo satyin.

³⁴ Tyicuan ta yuhu cha cuví Rey cucatyí chi ñu nyicú chiyo vahi: “Ñaha nyoho vatyí nyoho ñáyivi cha nasocó Suti cuví ndo. Quehen cuenda ndo nu cuacunyaa ndo nu nyacá ñaha Nyoo, vatyí cha cuenda maa ndo chinq ihya nyata quivi savaha Nyoo ñuhu ñáyivi.

³⁵ Vatyí quivi chisoque, ta nyoho chaha ndo cha cachi. Quivi cu ityi ndutya ta chaha ndo cohi. Ta quivi chica noi tari ra inga ñuu ta nyoho chaha ndo vehe coi.

³⁶ Quivi cumañi sahme, ta nyoho chaha ndo sahme. Quivi cuhvi ta nyoho chahan ndo chinyehe ndo chii. Ta quivi ñohi vehe caa, ta quichi nyehe ndo nu ñohi.”

³⁷ Ta ñu cha vaha cuan cundaca tuhun ñu chii, ta catyí ñu: “Sutu Mañi yuhu, ¿ama nyehe ndi chisocon, ta chaha ndi cha cachun? ¿Ama nyehe ndi ityun ndutya ta chaha ndi cohun?

³⁸ ¿Ama nyehe ndi chuun chicá noun tari ra inga ñuu ta chaha ndi vehe coun? ¿Ama cumañi sahmon, ta chaha ndi chuun?

³⁹ ¿Ama nyehe ndi cuhvún, o ñohún vehe caa, ta chahan ndi chinyehe ndi chuun?” cucatyí ñu.

⁴⁰ Ta yuhu cha cuví Rey cucatyí chi ñu: “Cha ndicha catyí chi ndo, vatyí tandihí tumañi iñi sacuvi ndo chihin ra ndahvi, ra yañi ihya, chi yuhu sacuvi ndo tumañi iñi cuan.” Tyicuan caa cucatyí yuhu chi ñu.

⁴¹ Tyicuan ta yuhu cha cuví Rey cucatyí tiqui chi ñu nyicú chiyo satyin tyehe caa: “Canyaha ndo nui, nyoho ñu tahán chi cuhún anyaya. Cuahan ndo nu ñuhu cha ma ndahva ca maa. Vatyí yucuan cuví nu chinq cha cuenda cuhna ta cha cuenda tatyí ña vaha cuenda ra.

⁴² Vatyí chisoque, ta nyoho ña chaha ndo cha cachi. Cu ityi ndutya, ta ña chaha ndo ndutya cohi.

⁴³ Chica noi tari chicá noo ra inga ñuu, ta ña chaha ndo nu coi. Cumañi sahme ta ña chaha ndo sahma cuhne. Cuhvi ta ñohi vehe caa, soco ña chahan ndo chinyehe ndo chii nu ñohi”, cucatyí chi ñu.

⁴⁴ Tyicuan ta cucatyí ñu chii tyehe caa: “Sutu Mañi yuhu, ¿ama nyehe ndi chisocon, o ityun ndutya, o chicán noun tari ra inga ñuu, o ñahri sahmon, o cuhvún, o ñohun vehe caa, ta ña tyinyehe ndi chuun?” cucatyí

ñu.

⁴⁵ Ta yuhu cha cuví Rey cucatyí chi ñu tyehe caa: “Cha ndicha catyí chi ndo vatyí tandihí maa cha ña sacuví ndo chi ñáyiví ndahví ihya, suri ña sacuví tucu ndo chi yuhu cuví cuan”, cucatyí yuhu chi ñu.

⁴⁶ Tyicuan ta ñu cuan cuhun coyo ñu nu cayú ñuhū cha ma ndahva ca maa. Ta ñáyiví vaha cuan cuhun ñu cucoo ñu noo ñáyiví cha ma naa ca maa.

26

Nu canducu ra cuhva yoso caa catiñ ra chi ra Jesús

(Mr. 14.1-2; Lc. 22.1-2; Jn. 11.45-53)

¹ Cuhva cha ndihí catyí ra Jesús tuhun ihya, ta quichahā catyí ra chí ra cachicá noo chihin ra tyehe caa:

² —Nyoho chitó ndo vatyí uvi ca quiví ta sanducahnu yo vico pascua. Ta yuhu Rayíi cha quichí nya gloria cucuhva cuenda ñu chii vatyí tyaa ñu chii nu cruzi —catyí ra.

³ Quiví cuan ra cacuví nuu chi tata sutu, ta ra casacuahá ley vehe ñuhu, ta ra cacuví mandoñi ñu Israel, candu iñ ri ra nuquehe vehe tyiño ra Caifás, ra cuví nuu chi tata sutu.

⁴ Yucuan casandaa ra tyiño yoso caa ta sandavi ñaha ra chí ra Jesús ta catiñ ra chí ra ta cacahñi ra chí ra.

⁵ Soco cacatyí ra:

—Ma cahñi yo chí ra cha ni ri ca cha chichi vico, tacuhva cha ma naquiqui xaan ñáyiví —catyí ra.

Nu chosó noo ñaha sihi ndutya vixi chahan xiñi ra Jesús

(Mr. 14.3-9; Jn. 12.1-8)

⁶ Ra Jesús ñohó ra ñuu Betania, vehe ra Simón, cha catyí ñu Ra Tyahyu Coño chí, siví saca ra cuví cuan.

⁷ Ta tuhva noo ñaha nu nyaá ra Jesús, nyisó ña noo yutyí tyitú yihí ndutya vixi chahan. Ta yahví xaan nyaá ndutya cuan. Ta ra Jesús nyaá ra yuhu mesa ta choso ña ndutya cuan xiñi ra.

⁸ Cuhva cha cananyehe ra chicá noo chihin ra cacuxaan ra ta quichahā catyí ra:

—¿Ñáá tuhun cha sativí ña ndutya vixi chahan cuan?

⁹ Vaha ca tyehe ta xico ña, ta ñihi ña cuaha xuhun chihin ta tyinyee ña chí ñu ndahví chihin xuhun cuan —catyí ra.

¹⁰ Tyicuan ta chiñi ra Jesús, ta catyí ra chí ra:

—¿Ñáá tuhun cha sayangá ndo chí ñaha ihya? Vatyí cha sacuví ña chihin, noo cha vaha cuví.

¹¹ Vatyí ñu ndahví tyicuan ri cunyaa ñu chihin ndo, soco yuhu, ñima tyicuan ri cua cunyai chihin ndo.

¹² Choso ña ndutya vixi chahan siqui coño ñuhi, vatyí sanduvahā ña cuenda cha cohin chichi ñuhú.

¹³ Cha ndicha catyí chí ndo, vatyí tandihí ri nu cahan ñu tuhun Nyoo nicahnu ñáyiví, cunacatyí tucu ñu cha sacuví ñaha ihya, tacuhva nichon iñi ñáyiví chí ña —catyí ra Jesús.

Nu naxico tuhun ra Judas Iscariote chí ra Jesús

(Mr. 14.10-11; Lc. 22.3-6)

¹⁴ Tyicuan ta noo ra chicá noo chihin ra Jesús, ra cha nañi Judas Iscariote, chahan ra chichan ra chihin ra cacuví nuu chí tata sutu.

¹⁵ Ta catyí ra chí ra:

—¿Yoso cuhva ndo chii tatu cuhva cuende chí ra Jesús chí ndo?

Tyicuan ta ra cacuví nuu cuan cacatyí ra vatyí oco uchi tahan xuhun cuichin.

¹⁶ Ta nya cuhva cuan ta quichahā nducu ra Judas ñáá noo cuhva cuvi nacuhva cuenda ra chí ra Jesús chí ra cacuví nuu chí tata sutu cuan.

Nu cuxiñi ra Jesús chihin ra cachicá noo chihin ra

(Mr. 14.12-25; Lc. 22.7-23; Jn. 13.21-30; 1 Co. 11.23-26)

¹⁷ Quiví xihna ri cha quichahā vico ta chachí ñu pan cha ñahri yuchan iya yihí chihin, ra cachicá noo chihin ra Jesús tuhva ra chí ra ta quichahā candaca tuhun ra chí ra:

—¿Nya cuñun cha sanduvaha ndi cha cuxiñun cuenda vico pascua ihya?

¹⁸ Ta catyí ra Jesús chí ra:

—Cuahan ndo chichi ñuu ta cha ndo vehe noo ra cuan. Ta catyí ndo chí ra: “Ra Sacuaha catyí ra vatyí cha cuyatín cua cúvi ra, ta vehun cusanducahnu ndi vico pascua”, catyí ndo chí ra —catyí ra Jesús.

¹⁹ Tyicuan ta casacuví ra tari cuhva catyí ra Jesús chi ra. Yahá cuan ta casanduvahá ra cha cacuxiñi ra cha vico pascua cuan.

²⁰ Cuhva cha cuaa, chicunyaá ra Jesús nu mesa chihin ndi uchi uvi ra chicá noo chihin ra.

²¹ Ta cha ni ri ca cha cachachí ra, catyí ra Jesús chi ra:

—Cha ndicha catyí chi ndo vatyi noo nyoho cucuhva cuenda ndo chii chi ra xaan iñi chii.

²² Ta canducuihya xaan iñi ra, ta quichahá candaca tuhun ñin ñin ra chi ra ta cacatyí ra:

—Sutu Mañi yuhu, ¿atu yuhu cuví?

²³ Ta nacahan ra Jesús ta catyí ra:

—Ra cha chachí ñin ri coho chihin, ican ra cuan cua na cuhva cuenda chii.

²⁴ Yuhu Rayi cha quichi nya gloria, cuahin ityi cha catyí nu tutu tuhun Nyoo. Soco ndahvi ra ndahvi cha cunacuhva cuenda chii. Quitá vihi ca cuenda chi ra, tyehe ta ña cacu taxin ra —catyí ra Jesús.

²⁵ Tyicuan ta nacahan ra Judas, ra cha cua cuhva cuenda chi ra, ta catyí ra:

—Maestro, ¿atu yuhu cuví?

Ta nacahan ra Jesús, ta catyí ra:

—Ican yoho cuvún.

²⁶ Cha ni ri ca cha cachachí ra, ra Jesús quehen ra pan ta nacuhva ra tyahvi nyoo chi Nyoo, ta cha yahá tahvi sava ra, ta chahá ra chi ra cachicá noo chihin ra, ta catyí ra:

—Cachi ndo. Ican ihya cuví coñe.

²⁷ Yahá cuan ta quehen tucu ra copa, ta nacuhva ra tyahvi nyoo chi Nyoo, ta sayahá ra chi tandihi ra ta catyí ra:

—Coho tandihi ndo ihya.

²⁸ Vatyi ican ihya cuví niñi. Ta chihin niñi natyihí tahan Nyoo tuhun chaa chihin ndo, vatyi cucati niñi cha catyí cha vaha chi cuaha ñu, vatyi chihin niñi coo ticahnu iñi cuatyí ñu.

²⁹ Soco catyí chi ndo, vatyi ma coho que tahan vinu tichaha ndivi ihya, nyacua nya cha cohi vinu chaa chihin ndo nya nu nyacá ñaha Suti andivi —catyí ra.

Nu catyí ra Jesús vatyi cucatyí ra Pedro vatyi ña ñohó nuu ra chi ra

(Mr. 14.26-31; Lc. 22.31-34; Jn. 13.36-38)

³⁰ Cha yahá cha cachita ra yaa chi Nyoo, ta cuahan coyo ra yucu yutun Olivo cuan.

³¹ Tyicuan ta quichahá catyí ra Jesús chi ra:

—Tandihí nyoho ta cucaca uvi iñi ndo cha nyicón ndo chii vityin cha cuaa. Vatyi nu tutu Nyoo catyí chi tyehe caa: “Cucahñi chi ra sahá cumi mbee, ta mbee cuquiti cuatyí ti”, catyí chi.

³² Soco cha yahá nandote, xihna que cuhin Galilea, ican saha nyoho.

³³ Tyicuan ta nacahan ra Pedro ta catyí ra:

—Vasi tandihí ra ndu uvi iñi ra cha nyicón ra chuun, soco yuhu ma ndu uvi iñi.

³⁴ Tyicuan ta quichahá catyí ra Jesús chi ra:

—Cha ndicha catyí chuun vatyi suri maa cha cuaa ihya, cha ni cumañi ca cuacu loho, yoho cucatyun uñi chaha vatyi ña ñohó nuun chii —catyí ra.

³⁵ Ta ra Pedro catyí ra:

—Vasi cúvi chuhun, soco ma catyí cha ña ñohó nui chuun —catyí ra.

Ta suri tyicuan caa catyí tandihí ra chicá noo chihin ra.

Nu chicán tahvi ra Jesús chi Nyoo nu cuví Getsemaní

(Mr. 14.32-42; Lc. 22.39-46)

³⁶ Tyicuan ta chaá ra Jesús chihin ra cachicá noo chihin ra noo nu nañi Getsemaní, ta catyí ra chi ra:

—Cunyicu ndo ihya, cha niri ca cha cuahin yucuan, cua cacan tahvi.

³⁷ Ta quehen ra chi ra Pedro ta chi ni nduvi sehe ra Zebedeo, cuahan coyo chihin ra. Ta quichahá nducuihya cuñi ra, ta tyoño xaan cuñi ra.

³⁸ Tyicuan ta catyí ra chi ra:

—Cahnu xaan tucuihya iñi nyaá añime. Nyacua cuñi chi cahñi chi chii. Ndo ndo ihya ri ta conyito ndo chihin —catyí ra.

³⁹ Tyicuan ta cuahan ra Jesús chiin ca ityi nuu ca ta chicuiñi chiti ra ta chacun ra nuu ra nu ñuhú, ta chican tahvi ra chi Nyoo ta catyí ra:

—Sutu Mañi yuhu, tu yoho ta cuñun, cuhva cha ma nyehi tindoho ihya. Soco ma cuví tari cuhva cha cuñi mai, soco tari cuhva cuñi maun na cuví —catyí ra.

⁴⁰ Tyicuan ta nachaa ra nu nyicú ra cachica noo chihin ra, ta nyehe ra vatyí caquixí ra. Ta catyí ra chi ra Pedro tyehe caa:

—¿Atu ni minoo hora ña cuví conyito ndo chihin?

⁴¹ Conyito ndo, ta cacān tahvi ndo tacuhva cha ma cuvi chasaha cuihna chi ndo. Cha ndicha vatyí añima ndo, cuñí xaan chi nanducu chi Nyoo, soco coño ñuhu ndo vita cuñí chi —catyí ra Jesús chi ra.

⁴² Nu cu uvi chaha chahan ra, ta chican tahvi ra tyehe caa:

—Sutu Mañi yuhu, tatu ma cuvi cha ma nyehi tindoho ihya, tu tyicuan caa, na cuvi maa cuhva cuñún —catyí ra.

⁴³ Tyicuan ta nachaa ra inga chaha ta caquixí tucu ra cachicá noo chihin ra, vatyí nicunyasí maa chiti nuu ra chihin cha cacuñí ra cusu ra.

⁴⁴ Tyicuan ta sandoo ra chi ra, ta cuahan ra cha cu uñi chaha cua cacān tahvi ra. Ta catyí ra suri maa tuhun cha yahā cahan ra cha chican tahvi ra chi Nyoo.

⁴⁵ Tyicuan ta nachaa ra nu canyicu ra cachicá noo chihin ra, ta catyí ra chi ra:

—Vityin ndicha, cusu ndo ta nyitatu ndo. Vatyí cha chaā cuhva cha cua nacuhva cuenda ra chii chi ra quiñi iyó, ta Rayi cha quichi nya gloria cuví.

⁴⁶ Ndícuíta ndo, ta coho ndo. Vatyí cha vachi ra cha cunacuhva cuenda chii —catyí ra Jesús.

Nu catiñ ra xaan iñi chi ra Jesús cuahan ra vehe caa

(Mr. 14.43-50; Lc. 22.47-53; Jn. 18.2-11)

⁴⁷ Ni cahán ca ra Jesús tuhun ihya, ta chaā ra Judas, ta ra Judas cuví noo ra chicá noo chihin ra Jesús. Ta cuaha ra vachi coyo chihin ra, canyisó ra mityi ta yutun. Ra cuví nuu chi tata sutu, ta ra cacuví mandoñi ñu Israel, ican tachí chi ra.

⁴⁸ Ra Judas, ra cha chahá cuenda chi ra Jesús, cha yahā chahā ra noo seña chi ra cuan, tacuhva coto ra yóo chi tñin ra. Ta catyí ra:

—Ra cha cutyayuhi chi, ican ra cuan cuví. Tñin ndo chi ra.

⁴⁹ Tyicuan ta tuhva ra chi ra Jesús ta catyí ra:

—Nocumi chuun, Maestro.
Ta tyayuhú ra chi ra.

⁵⁰ Tyicuan ta nacahan ra Jesús ta catyí ra chi ra:

—Amigo, sacuvi ñáá tyiño vachun.

Tyicuan ta catuhva ra ta catiñ ra chi ra Jesús.

⁵¹ Tyicuan ta noo ra ndihi chihin ra Jesús, tava ra mityi ra ta chahnya ra soho noo musu ra cuví nuu chi tata sutu cuan.

⁵² Ta catyí ra Jesús chi ra:

—Natyihí mityun chichi vena. Vatyí tandihí ñu cacañi tahan chihin mityi, suri chihin mityi cúvi ñu.

⁵³ ¿Atu ña chitón vatyí tatu yuhu ta cuñí, cuví caquen chi Suti, ta maa ra cutachi ra vityin vityin yaha ca uñi xico uchi mil ángel, ta sacacu ra chii?

⁵⁴ Soco tatu tyicuan caa, ¿yoso caa chino cava cuhva nyaá nu tutu Nyoo? Vatyí catyí chi tyi tahn maa chi cuví chi yuhu tyehe caa —catyí ra.

⁵⁵ Ta catyí tucu ra Jesús chi ñáyivi:

—¿Atu vachi coyo nyoho vachi tñin ndo chii chihin cha xaan ta chihin yutun? Tari cha noo ra suhu cuví yuhu sahá ndo. Ndiquivi chinyají sañahi nu nyicú ndo chichi vehe ñuhu cahnu, soco ña tñin ndo chii cha cuhin vehe caa.

⁵⁶ Vatyí tandihí cha cuví chii vityin, ta chicunyasí nu tutu Nyoo, cha catyaa ra profeta Nyoo ta cha naha.

Tyicuan ta ndi ra cachicá noo chihin ra, cachino ra. Noo tuhun ca maa ra Jesús casando ra.

Nu cutuñi chi ra Jesús nuu ra cacuví tyiño cuenda ñu Israel

(Mr. 14.53-65; Lc. 22.54-55, 63-71; Jn. 18.12-14, 19-24)

⁵⁷ Ta ra cha catiñ chi ra Jesús cuan, chinyaca ra chi ra nuu ra Caifás, ra cuví nuu chi tata sutu. Suri yucuan canyicú ñin ri ra sacuaha ley vehe ñuhu ta ra cacuví mandoñi.

⁵⁸ Soco ra Pedro cuahan ra chata ra, nya sava ri nya nuquehe vehe ra cuví nuu chi tata sutu cuan. Ta quihvi ra ta ndoo ra nyaá ra chihin policía cuan, vatyí nyehe ra yoso caa quita tuhun cuan.

⁵⁹ Ra cacuví nuu chi tata sutu, ta ra cacuví mandoñi, ta tandihí ra cuví tyiño, canducu ra noo cuatyí catyaa ra siqui ra

Jesús, vasi ña ndicha, tacuhva vatyí chihin cuatyí cuan ta cuví cahñi ra chi ra.

⁶⁰ Soco ña cañihí maa ra cuatyí ra, vasi cuaha ñáyivi chahan ñu chicutyí ñu cuendu síqui ra. Soco nu ndihí tuhun, chaꝓ coyo uvi ca testigu cuendu.

⁶¹ Ta cacatyí ra:

—Ra ihya, catyí ra vatyí cuví satani ra vehe ñuhu cahnu Nyoo, ta chichi cha uñi quívi cunacananyaa ra inga chaha, na —cacatyí ra.

⁶² Tyicuan ta ra cuví nuu chi tata sutu cuan, ndicuita ra, ta catyí ra chi ra Jesús:

—¿Atu ña nacahun nu cahan ra ihya? ¿Ñáá cha cuvi cha cacatyí ra ihya sícun?

⁶³ Soco ra Jesús taxi ri nanyaá ra. Tyicuan ta quichaha catyí ra cuví nuu chi tata sutu cuan chi ra:

—Chihin sívi Nyoo nyitó, catyí chuun vatyí catyun cha ndicha vaha. ¿Atu ra Cristo Sehe Nyoo nyitó cuví chuun? —catyí ra.

⁶⁴ Ta catyí ra Jesús chi ra:

—Ican cuví, tari cuhva catyí maun. Ta suri catyí chi ndo, vatyí cunyehe ndo chi yuhu Rayí cha quichí nya gloria, cunyai chiyo vaha Nyoo ra iyó tandihí tunyee iñi chii, ta cunyehe ndo nu quichi tiqui nu vico ityi andívi —catyí ra.

⁶⁵ Tyicuan ta ra cuví nuu chi tata sutu cuan chahnya ra sahma ra tari noo seña tyi cuñí maa ra tyi ña vaha cha cahan ra Jesús, ta catyí ra:

—Ra ihya chicoꝓ cuatyí ra nuu Nyoo chihin tuhun cahán ra. ¡Nyehe ndo vityin! Ña niñi cha tava yo cha ndaa. Nyoho cha chiñi ndo tuhun ña vaha cahan ra.

⁶⁶ ¿Ñáá catyí ndo vityin?

Ta canacahan ra ta cacatyí ra:

—Iyó cuatyí ra, ta cuñí chi cha cúvi ra.

⁶⁷ Tyicuan ta catyicusí ra nuu ra ta ca-cañi ra chi ra. Inga ra cacatu ra nuu ra chihin chiqui ra.

⁶⁸ Ta cacatyí ra chi ra:

—Yoho, cha sahún Cristo chuun. ¡Nacoto yóo cha cañi chuun!

Nu catyí ra Pedro vatyí ña ñohó nuu ra chi ra Jesús

(Mr. 14.66-72; Lc. 22.56-62; Jn. 18.15-18, 25-27)

⁶⁹ Cha niri ca cha nyaá ca ra Pedro nuquehe ityi chata cuan, ta noo ñaha cha cuví musu tata sutu cuan, tuhva ña nu nyaá ra ta catyí ña chi ra:

—Yoho tucu chica noun chihin ra Jesús, ra Galilea cuan.

⁷⁰ Ta ra Pedro catyí ra vatyí ña ñohó nuu ra chi ra nuu tandihí ñu nyicú cuan, ta catyí ra:

—Ña chité ñáá tuhun cahún.

⁷¹ Tyicuan ta cuahan ra Pedro ityi yuvehe, ta nyehe inga ña chi ra, ta catyí ña chi ra nyicú cuan:

—Suri chica noo tucu ra ihya chihin ra Jesús, ra ñuu Nazaret cuan —catyí ña.

⁷² Ta inga chaha tucu tixehe ra Pedro cha ñohó nuu ra chi ra ta catyí ra:

—Cha ndicha vaha tyi ña ñohó nui chi ra cuan.

⁷³ Suhva ri ca cuhva cuan, ta ra canyicú cuan catuhva ra nu nyaá ra Pedro ta cacatyí ra chi ra:

—Ra tahan ra cuan cuví chi yoho, ndicha. Vatyí quetuvi nyacua nya cuhva cahún.

⁷⁴ Tyicuan ta iyo xaan tyanaha ra ta catyí ra:

—Chitó vaha Nyoo tyi ña ñohó nui chi ra cuan, ta nacahñi Nyoo chii tatu ña ndicha cha cahín —catyí ra.

Ta suri cuhva cuan nacuacu cha noo loho.

⁷⁵ Tyicuan ta nichohon iñi ra Pedro tuhun cha catyí ra Jesús chi ra: “Cha ni cumañi ca cuacu loho, yoho cha yaha catyun uñi chaha vatyí ña ñohó nuun chii.” Tyicuan ta quita ra Pedro yucuan, ta chacu vavaha ra cha cuihya iñi ra cha sacuvi ra tyicuan caa.

27

Nu cachahá cuenda ra chi ra Jesús chi ra Pilato

(Mr. 15.1; Lc. 23.1-2; Jn. 18.28-32)

¹ Cuhva cha cundichin, tandihí ra cacuví nuu chi tata sutu ta ra cacuví mandoñi ñuu cuan, catyihí tahan ra tuhun vatyí cacahñi ra chi ra Jesús.

² Ta nuhñi ra. Ta chahan coyo ra chicuhva cuenda ra chi ra chi ra Poncio Pilato, ra cuví gobiernu cuenda ñuu Roma cha nyacá ñaha ñuu Israel cuan.

Nu chihí ra Judas

³ Cha nyehe ra Judas, ra cha naxico tuhun chi ra Jesús, vatyí cuacúvi ra, ta ndu uvi ñni ra cha sacuvi ra, ta nacuhva ra ndi oco uchi xuhun cuichin cuan chi ra cacuvi nuu chi tata sutu cuan, ta chi ra cacuvi mandoñi ñuu cuan.

⁴ Ta catyí ra:

—Chicoo cuatyí yuhu, vatyí chaha cuende chi noo ra ñahri cuatyí na cúvi ra.

Soco maa ra canacahan ra ta cacatyí ra:

—Ta yucuan ¿ñáá cuenda nyuhu? ¡Nyehe maa yoho!

⁵ Tyicuan ta tuchi ra Judas xuhun cuan chichi vehe ñuhu cahnu, ta chahan ra ta chicuhñi ra yoho sucun ra ta suri maa ra chitacaá ra chi ra. Ta chihí ra.

⁶ Ra cacuvi nuu chi tata sutu cuan canaquehen ra xuhun cuan ta cacatyí ra:

—Ma cuvi tyihi yo xuhun ihya chichi caja ofrenda vatyí yahvi cha chahñi ñu noo ñáyivi cuví.

⁷ Tyicuan ta catyihí tahan ra tuhun, ta chihin xuhun cuan casata ra noo ñuhú cha nañi Ñuhú Ra Savahá Quisi. Vatyí coo nu cuchi ra chi ñu inga ñuu tu chihi ñu.

⁸ Yucuan chaha nañi ñuhú cuan nyacua nya vityin Ñuhú Sata Ñu Chihin Xuhun Yahvi Cha Chihí Ñáyivi.

⁹ Ta tyicuan caa chingo cava cha tyaa ra Jeremías profeta Nyoo ta cha naha. Catyí chi tyehe caa: “Quehen ra ndi oco uchi xuhun cuichin, yahvi cha tyaa ñu Israel chi ra.

¹⁰ Ta chihin cuan, casata ra Ñuhú Ra Savahá Quisi, tari cuhva catyí Sutu Mañi yo chii”, catyí chi.

Nu nyehe ra Pilato vatyí ñahri maa cuatyí ra Jesús

(Mr. 15.2-5; Lc. 23.3-5; Jn. 18.33-38)

¹¹ Cachinyaca ra chi ra Jesús nuu gobiernu, ta ra cuan ndaca tuhun ra chi ra, ta catyí ra:

—¿Atu ican yoho cuví rey cuenda ñu Israel?

Ta ra Jesús catyí ra chi ra:

—Ican, yuhu cuví. Ndicha cha cahún.

¹² Ta cuhva cha catyaa ra cacuvi nuu chi tata sutu cuan ta mandoñi cuatyí siqui ra, ra Jesús ña nacahan maa ra.

¹³ Tyicuan ta quichaha catyí ra Pilato chi ra:

—¿Atu ña chiñún tandihi cha cacahán ra sicun?

¹⁴ Soco ra Jesús ña nacahan ra. Ta nyacua iyo cuñi gobiernu cuan vatyí ña nacahan ra. Ta ña chitó ra ñáá cunyacuvi ra.

Nu cutuñi chi ra Jesús ta cacatyí ñu vatyí cucúvi ra

(Mr. 15.6-20; Lc. 23.13-25; Jn. 18.38—19.16)

¹⁵ Soco cha vico pascua cuan, iyó noo tuhun chi ñu vatyí tuhva ra gobiernu saña ra noo ra ñohó vehe caa, nya ra cachi maa ñáyivi.

¹⁶ Ta quivi cuan ñohó noo ra cha nañi Barrabás vehe caa. Ta chitó tandihi ñáyivi tuhun ra.

¹⁷ Ta cuhva cha canyicú ñn ri ñu, ra Pilato ndaca tuhun ra chi ñu, ta catyí ra:

—¿Yóó chi cuñi nyoho cha sañe? ¿Atu chi ra Barrabás o chi ra Jesús, ra nañi Cristo? —catyí ra.

¹⁸ Vatyí chitó ra vatyí cha cuenda cha tasi cuñi nyehe ñu chi ra Jesús, yucuan cuenda chaha cuenda ñu chi ra.

¹⁹ Cha ni ri ca cha nyaá ra Pilato nu tyayu ra, nu cuví ra tyiño, tachi ñasihí ra noo tyiño chi ra ta catyí ña: “Ma tyihun chuun chihin ra vaha chiña. Vatyí cuñi tahin noo ñumahna cha cuenda ra. Ta quiñi xaan tahin chihin”, catyí ña.

²⁰ Soco ra cacuvi nuu chi sutu ta mandoñi ñuu cuan, cacuñihi ra catyiyuhu ra chi ñáyivi na cacan ñu cha saña ra Pilato chi ra Barrabás, ta na cúvi ra Jesús.

²¹ Ta gobiernu cuan cahan ra chihin ñu inga chaha, ta catyí ra:

—Chichi cha ñanduvi ra, ¿nya ra cuñi ndo cha sañe?

Ta maa ñu nacahan ñu, ta catyí ñu:

—Chi ra Barrabás.

²² Ta ra Pilato ndaca tuhun ra chi ñu, ta catyí ra:

—¿Ta ñáá cha cusacuvi chihin ra Jesús cha nañi Cristo ihya?

Tandihí ñu nacahan ñu ta catyí ñu:

—¡Na cúvi ra nu cruzi!

²³ Tyicuan ta quichaha catyí ra Pilato chi ñu:

—Soco ¿ñáá cha ña vaha sacuvi ra?

Soco maa ñu nacana chaa tucu ñu inga chaha ta catyí ñu:

—¡Cahñi chi ra nu cruzi!

²⁴ Cuhva cha nyehe ra Pilato vatyí ñahri maa cha cuví sacuví ra, vatyí quiñi xaan cacuví ñu, chican ra ndutya, ta nacatya ra ndaha ra chihin nuu ñáyiví cuan, ta catyí ra:

—Yuhu ñahri cuatyí cha cua cúvi ra ñahri cuatyí ihya. Na ndoo siqui maa ndo.

²⁵ Ta tandihí ñáyiví canacahan ñu, ta catyí ñu:

—Na ndoo chi siqui maa ndi ta siqui sehe ndi.

²⁶ Tyicuan ta ra Pilato saña ra chi ra Barrabás, ta tachí ra na ndoho ra Jesús, ta nacuhva cuenda ra chi ra na cúvi ra nu cruzi.

²⁷ Tyicuan ta sindaro cuenda gobiernu cuan chinyaca ra chi ra Jesús nya vehe tyiño, ta casandu in ri ra chi tandihí sindaro cuan nicachico.

²⁸ Tyicuan ta catava ra sahma ra ta casacuihno ra noo sahma cuaha chi ra.

²⁹ Ta catyihí ra noo corona cha chino chihin iñu xiñi ra. Ta chaha ra noo yutun na quindaha ra chihin chiyo vaha ra. Tyicuan ta cachicuiñi chiti ra nuu ra, ta cachacu nyaa ra chi ra ta catyí ra:

—¡Nocumi chuun, yoho Rey cuenda ñu Israel!

³⁰ Ta catyicu si ra chi ra ñandihí. Ta quehen ra yutun cuan ta cañi ra xiñi ra.

³¹ Cha yaha cha cachacu nyaa ra chi ra ta catava ra sahma cuaha cuan chi ra ta sandihví noo tucu ra sahma maa ra chi ra. Tyicuan ta quehen ra chi ra cua cahñi ra chi ra nu cruzi.

Nu catyaa ra chi ra Jesús nu cruzi

(Mr. 15.21-32; Lc. 23.26-43; Jn. 19.17-27)

³² Cuhva cha caquita coyo ra yucuan, catahan ra chi noo ra ñuu Cirene, nañi ra Simón. Ta casaniñi ra chi ra na cuiso ra cruzi ra Jesús.

³³ Ta cacha coyo ra noo nu nañi Gólgota, ta cuñi chi catyí Nu Cuví Yiquí Xiñi Ndiyí.

³⁴ Ta yucuan cachaha ra vinu nasaca chihin cava uva coho ra Jesús. Soco cha yaha cha chihí ra chiin, ña cuñi ca ra coho.

³⁵ Ta cha yaha cha catyaa ra chi ra nu cruzi, tyicuan ta sindaro cuan caquehen ra sahma ra ta chahan ra noo sihva chihin. Ta nya ra saha ganaa, ñihí ra sahma cuan. Ta tyicuan caa chino cava tuhun cha tyaa noo

profeta Nyoo ta cha naha nu catyí chi tyehe caa: “Casacha ra sahme chihin cha chahan ra sihva”, catyí chi.

³⁶ Tyicuan ta cachicunyicu ra yucuan vatyí saha cuenda ra chi ra.

³⁷ Ta ityi xiñi ra catyaa ra noo letra cha catyí ñáá tuhun cua cahñi ra chi ra. Ta catyí chi tyehe caa: “Ican ra ihya cuví ra Jesús, rey cuenda ñu ñuu Israel.”

³⁸ Tacoyó tucu uvi ra suhu chihin ra nu uvi ca cruzi cuan. Noo ra chiyo vaha ra, ta inga ra chiyo satyin ra.

³⁹ Ta ñu yahá coyo cuan, cacahan ñu chi ra, ta quisí xiñi ñu,

⁴⁰ ta catyí ñu chi ra:

—¡Yoho cha catyun tyi cusanduvon vehe ñuhu cahnu, ta chichi cha uñi quiví ta nacananyaa tucun! ¡Sacacu chuun vityin! ¡Tatu Sehe Nyoo cuví chuun, noo nu cruzi chiña! —catyí ñu chi ra.

⁴¹ Ta suri tyicuan caa cachacú nyaa tucu ra cacuví nuu chi tata sutu chi ra, ta ra sacuahá ley vehe ñuhu, ta mandoñi ñuu ñandihí. Ta cacatyí ra chi tahan ra tyehe caa:

⁴² —Sacacu ra chi inga ñu, soco ña cuví sacacu ra chi maa ra. Tatu Rey cuenda ñu Israel cuví ra, na noo ra nu cruzi cuan, tacuhva chino iñi yo chi ra.

⁴³ Itá iñi ra chi Nyoo, vityin na sacacu Nyoo chi ra, tatu ndicha cuñi ra chi ra. Vatyí catyí ra chi yo vatyí Sehe Nyoo cuví chi ra.

⁴⁴ Ta nyacua nya ra suhu cha tacaá nu cruzi xiin ra ta cacahan ra chi ra ñandihí.

Nu chihí ra Jesús

(Mr. 15.33-41; Lc. 23.44-49; Jn. 19.28-30)

⁴⁵ Tyicuan ta tandihí siqui ñuhu ñáyiví nduña iñi, nyacua nya ora ta nyacua nya ca uñi cha cha iñi.

⁴⁶ Ta suri kuhva cuan, cana chaa ra Jesús chihin cha chaa ndusu ra. Ta catyí ra tyehe caa:

—Elí, Elí, ¿lama sabactani? —ta cuñi chi catyí: Nyoo Suti, Nyoo Suti, ¿ñáá tuhun cha sandoó ñihnon noo tuhun mai?

⁴⁷ Suhva ra canyicú cuan, cachiñi ra chahan ra, ta cacatyí ra:

—Chi ra Elías, ra profeta Nyoo ta cha naha, ican cana chaa ra.

⁴⁸ Ta caa cuhva ri cuan, cuahan vavaha noo ra cua quehen ra noo xixan, ta satyij ra chihin vinu iya, ta tyaa ra noo nu yutun, ta satuhva ra yuhu ra Jesús tacuhva na coho ra.

⁴⁹ Soco inga ra cacatyí ra:

—Saña chi ra. Na nyehe yo tatu quichi sacacu ra Elías chi ra.

⁵⁰ Inga tucu chaha cana chaa ñihi ra Jesús, tyicuan ta chihj ra.

⁵¹ Ta caa cuhva ri cuan ndata sava sahma cha tacaá chichi vehe ñuhu cahnu cuan, nyacua nya siqui ta nyacua nya yuvi ndata. Ta taan. Ta ndata yuu.

⁵² Ta nuña yuhu ñaña. Ta nyacua canandoto cuaha ñu chinó iñi chi Nyoo, ñu cachihj.

⁵³ Ta cha yaha nandoto ra Jesús caquita coyo ñu nu ñaña ta quihvi coyo ñu chichi ñuu Jerusalén, ta cuaha ñáyivi nyehe chi ñu.

⁵⁴ Tyicuan ta capitán ta sindaro cha casahá cumi chi ra Jesús, cayuhvi xaan ra cuhva cha taan. Ta cha canyehe ra inga ca cha cuvi, ta cacatyí ra:

—Ndicha ndicha cuii, vatyí Sehe Nyoo cuví chi ra ihya.

⁵⁵ Cuaha ñusihi cha chinyicon chi ra Jesús nya Galilea ta tyinyee ñu chi ra, nyicú ñu canyehé ñu nya sava ri yucuan.

⁵⁶ Ta ican suhva ñu ihya cuví cu María ñaha Magdala, ta cu María sihi ra Jacobo ta ra José, ta sihi sehe ra Zebedeo.

Nu cua cuhi ra chi ra Jesús

(Mr. 15.42-47; Lc. 23.50-56; Jn. 19.38-42)

⁵⁷ Cuhva cha cua cuaa, quichi noo ra tyayii cha nañi José. Ra ñuu Arimatea. Ta suri chinó iñi ra chi ra Jesús.

⁵⁸ Ta chahan ra chinyehe ra nu nyaá ra Pilato, ta chican ra coño ñuhu ra Jesús. Tyicuan ta tyihj ra Pilato tyiño na cuhva ra coño ñuhu ra chi ra.

⁵⁹ Tyicuan ta quehen ra José coño ñuhu ra, tyihj ra chichi noo sinduhu ndii.

⁶⁰ Ta tyihj ra chi ra chichi noo ñaña nicaa chaa cha cuví noo yavi yuu cha tyihj ra tyiño cachatya ra. Ta cha yaha cha nacasi ra yuhu ñaña cuan chihin noo yuu cahnu, ta cuahan ra.

⁶¹ Soco cu María ñaha Magdala, ta inga cu María, ndoo ñu nyicú ñu yuhu ñaña cuan.

Nu casahá cumi sindaro ñaña ra Jesús

⁶² Ta cha inga quivi, quivi nyitatu ñu cuví, ta ra cacuvi nuu chi tata sutu, ta ra fariseo chahan coyo ra chinyehe ra nu nyaá ra Pilato.

⁶³ Ta catyí ra chi ra:

—Tata, nichón iñi ndi vatyí ra cuendu cuan, catyí ra ta nyitó ca ra vatyí cha yaha cha uñi quivi cunandoto ra.

⁶⁴ Yucuan chaha tyihj tyiño na casaha cumi vaha ra ñaña cuan, nya yaha cha uñi quivi, coto quichi coyo ra cachica noo chihin ra cha cha cuaa, ta casuhu ra coño ñuhu ra. Yaha cuan ta cucatyí ra chi ñáyivi vatyí cha nandoto ra. Ta cha tyicuan caa nu ndihi tuhun ihya, yaha ca cuhva cucuvi —catyí ra.

⁶⁵ Ta ra Pilato catyí ra chi ra:

—Ma suhva sindaro chiña. Cuahan ndo, ta saha cumi vaha ndo ñaña cuan, yoso cuhva cha vaha cuví saha cumi ndo —catyí ra.

⁶⁶ Tyicuan ta cuahan coyo ra, ta casaha cumi vaha ra ñaña cuan, ta catyaa ra noo sellu chata yuu cha chasí cuan. Ta casandoq ra chi sindaro sahá cumi yucuan.

28

Nu nandoto ra Jesús

(Mr. 16.1-8; Lc. 24.1-12; Jn. 20.1-10)

¹ Cha yaha quivi cha nyitatu ñu, cuhva cha vachi cundichin, nu quichaha vitya cuví. Ta cu María ñaha Magdala cuan, ta inga cu María chahan coyo ñu nu ñaña.

² Ta quichi minoo cha taan vatyí quichj ángel Sutu Mañi yo noq ra nya ityi andivi, ta chaq ra nu ñaña cuan. Ta sacanyaha ra yuu cha nyasi yuhu cuan, ta chicunyaa ra siqui.

³ Ta xiño vavaha ra, tari cha quihvi tacha. Ta sahma ra cuichin vavaha.

⁴ Cuhva cha cananyehe sindaro cuan chi ra, canayuhvi vavaha ra nyacua nihí ra, ta nyacua coña ra chihin cha yuhvi ra.

⁵ Tyicuan ta quichaha catyí ángel cuan chi ñusihi cuan:

—Ma yuhvi ndo. Yuhu chité vatyí chi ra Jesús cha chihj nu cruzi nanducú ndo.

⁶ Yori ca ra ñohó ihya, vatyí cha nandoto ra, tari catyí ra. Ñaha ndo ta nyehe ndo nu catuvi ra.

⁷ Ta cuhun ndo numi ri, ta catyi ndo chi ra cachica noo chihin ra vatyí cha nandoto ra, ta cha cuahan ra Galilea, nyatú ra chi ra yucuan. Ican ihya cuví cha nyaa catyi chi ndo —catyí ángel cuan chi ñu.

⁸ Tyicuan ta numi ri quita coyo ñu nu ñaña cuan. Suhva ri yuhví ñu, ta suhva ri sii vavaha cuñí ñu. Ta chingo vavaha ñu cua catyi ñu chi ra cachica noo chihin ra Jesús.

⁹ Ta cuhva cuan tuví ra Jesús nuu ñu ta chaha ra nocumi chi ñu. Tyicuan ta catuhva ñu chi ra ta chicuñi chiti ñu nuu ra ta casacahnu ñu chi ra, ta suri numí ñu chaha ra.

¹⁰ Ta catyí ra chi ñu:

—Ma yuhvi ndo. Cuahan ndo cua sacoto ndo chí yañi vatyí na cuhun coyo ra Galilea, ta nyicuan cuñihi tahan ndi —catyí ra chí ñu.

Tuhun cha canacatyí sindaro

¹¹ Cha ni ri ca cha cuahan coyo ñu cuan, suhva sindaro cha casaha cumi yucuan, cuahan coyo ra nya ñuu, cua nacatyí ra cha cuví cuan chí ra cacuví nuu chí sutu.

¹² Tyicuan ta ra cacuví nuu cuan chahan coyo ra chichan ra chihin ra mandoñi ñuu vatyí catyíhi tahan ra tuhun yoso caa casacuví ra. Tyicuan ta cuaha xuhun cachaha ra chí sindaro cuan.

¹³ Ta cacatyí ra chí ra:

—Nyoho, catyi ndo vatyí cha cha cuaa cha ni ri ca cha quixí ndo, chahan coyo ra cachica noo chihin ra Jesús ta chिकासuhú ra coño ñuhu ra.

¹⁴ Ta tatu chito gobiernu tuhun ihya, cua nyehe maa ndi yoso caa catyi ndi chí ra, ta nyoho ma caca iñi ndo. Ñahri cucuvi chí ndo.

¹⁵ Tyicuan ta caquehen sindaro cuan xuhun, ta cuahan coyo ra cua casacuví ra cha cacatyí ra chí ra. Ta nya vityin ta tyicuan caa catyí ñáyivi ñuu Israel.

Nu tyaa ra Jesús tyiño chí ra cachicá tyiño ra

(Mr. 16.14-18; Lc. 24.36-49; Jn. 20.19-23)

¹⁶ Ta tyicuan caa, ndi uchi ñin ra cachica noo chihin ra, cuahan coyo ra nya Galilea nya yucu nu catyí maa ra Jesús chí ra vatyí cuhun coyo ra.

¹⁷ Ta cuhva cha cananyehe ra chí ra Jesús, casacahnu ra chí ra soco suhva ra chica uvi iñi ra.

¹⁸ Tyicuan ta tuhva ra Jesús chí ra ta catyí ra chí ra:

—Nyoo chaha ra cha cunyaca ñaha yuhu tandihí andiví ta siqui ñuhu ñayivi.

¹⁹ Yucuan chaha, cuahan ndo tandihí nu nyicú ñáyivi, tandihí ri ñuu, ta catyi ndo chí ñu na nanyicon ñu chii. Ta sacondutya ndo chí ñu chihin sivi Sutu yo Nyoo ta chihin sivi yuhu Sehe Nyoo, ta chihin sivi Tatyí Ii Nyoo.

²⁰ Ta sañaha ndo chí ñu na naquichaha ñu tandihí cha catyí yuhu tyi sacuvi ñu. Ta coto ndo vatyí yuhu cunyai chihin ndo tandihí quivi nyacua nya naa ñayivi —catyí ra Jesucristo chí ra cachicá tyiño ra.

Tuhun Nyoo Cha Tyaa San Marcos

Nu sacondutyá ra Juan chi ñáyivi ta cahán ra tuhun Nyoo chihin ñu

(Mt. 3.1-12; Lc. 3.1-9, 15-17; Jn. 1.19-28)

¹ Tyehe caa quichahá tuhun vaha ra Jesuscristo Sehe Nyoo.

² Ra Isaías profeta Nyoo tyaa ra tuhun ra Cristo ta tuhun ra Juan. Tyehe caa catyí Nyoo chi ra Cristo:

Cumañi ca cuhun siqui ñuhu ñayivi ta cutachi chi noo ra cusacoto chi ñáyivi vatyí nyaá cuhun nu nyicú ñu, catyí Nyoo chi ra Cristo.

³ Chiñi yo ndusu noo ra cha canachaá nu chiqui ndi,

ta catyí ra: “Tari sanduvahá ndo noo ityi, tyicuan caa sanduvaha ndo aña ndo vatyí cua quichi Sutu Mañi yo.

Nuña ndo noo ityi ndoo chi ra na quihvi ra aña ndo.”

Tyicuan caa tyaa ra profeta Isaías nu tutu Nyoo ta cha naha.

⁴ Ta tyicuan caa quichi ra Juan sacondutyá ra chi ñáyivi nu chiqui ndi cuan. Ta catyí ra chi ñu na ndu uvi ñi ñu cuatyí ñu, ta na condutyá ñu tari noo seña tyi nasama ñu cuhva iyó ñu, ta tyicuan caa ta Nyoo cusaha ra ticahnu ñi cuatyí ñu.

⁵ Ta tandihí ñáyivi ityi Judea quichi coyo ñu tyasoho ñu tuhun cahán ra, ta ñu ñuu Jerusalén ñandihí. Ta cha yahá nahma ñu cuatyí ñu, sacondutyá ra Juan chi ñu yuvi cahnu Jordán.

⁶ Ta sahama cha ñihno ra Juan cuan chihin ixi camellu chingo chi. Ta ñi cuví sinchu ra. Ta pinchi tuhvá ra chachí. Ta tyañuñu cuhu tuhvá ra chihí.

⁷ Ta cahán ra tuhun Nyoo ta catyí ra:

—Cha yaha yuhu ta vachi noo ra iyó xaan ca tunyee ñi chi ican saha yuhu. Ta ña nañé ni cha ndachi ñi xityin ndichan ra.

⁸ Yuhu sacondutyé chi ndo chihin ndutyá. Soco maa ra cusacondutyá ra chi ndo chihin Tatyí Ii Nyoo —catyí ra Juan.

Nu condutyá ra Jesús

(Mt. 3.13-17; Lc. 3.21-22)

⁹ Quivi cuan quita ra Jesús ñuu Nazaret, cha nyaá ityi Galilea, ta cuahan ra nya yuvi cahnu Jordán. Ta yucuan sacondutyá ra Juan chi ra.

¹⁰ Ta cha yahá condutyá ra Jesús, ta cuhva cha cua quita ra chichi ndutyá, ta nanyehe ra andivi cuahan nuña. Ta nyehe ra Tatyí Ii Nyoo tari noo paloma, vachi noó siqui ra.

¹¹ Ta tyacú noo ndusu ityi andivi ta catyí ndusu cuan tyehe caa:

—Yoho cuvún Sehi ta cuñi xain chuun. Ta si xaan cuñi chuhun —catyí ndusu cuan.

Nu nducú nyehe ra ña vaha chi ra Jesús

(Mt. 4.1-11; Lc. 4.1-13)

¹² Yahá cuan ta sacuhun Tatyí Ii Nyoo chi ra Jesús noo nu chiqui ndi.

¹³ Ta yucuan chinyaa ra uvi xico quivi nu chiqui ndi cuan, nu yori ñáyivi iyó, maa ri quití iyó. Ta nducu nyehe cuihna chi ra. Ta yahá cuan ta cha coyo ángel ta catyíñuhu ra chi ra.

Nu quichahá saha tyiño ra Jesús ityi Galilea

(Mt. 4.12-17; Lc. 4.14-15)

¹⁴ Cha yahá catyihí ñu chi ra Juan vehe caa, ta ra Jesús cuanuhu ra Galilea ta cahán ra tuhun vaha Nyoo chihin ñáyivi.

¹⁵ Ta catyí ra:

—Cha chaá cuhva cha cua cunyaca ñaha Nyoo aña ndo. Yatyin ri nyaá ra chihin ndo. Ndu uvi ñi ndo cuatyí ndo, ta chño ñi ndo tuhun Nyoo cha sacacu aña ndo —catyí ra Jesús.

Nu cana ra Jesús chi cumi tahan ra catín tiyaca

(Mt. 4.18-22; Lc. 5.1-11)

¹⁶ Chicá noo ra Jesús yuhu miñi cha nañi Tyañuhu Galilea. Ta nanyehe ra chi ra Simón ta chi yañi ra, ra Andrés, cacañi ra yuhva ra nu ndutyá, vatyí ra catín tiyaca cacuvi ra.

¹⁷ Ta catyí ra Jesús chi ra:

—Cunyicon ndo chii, ta yuhu cusacuvi vatyí tari ñihí ndo tiyaca, tyicuan caa cuñihi ndo aña ñáyivi, tava ndo chi ñu nu quiñi caa, na quihvi ñu cuenda Nyoo —catyí ra Jesús chi ra Simón ta chi ra Andrés cuan.

18 Caa cuhva ri cuan casandoꝝ ra yuhva ra, ta cuahan coyo ra chihin ra.

19 Yahā cuan ta chiin ri ca chica ra Jesús, ta nanyehe ra chi ra Jacobo, sehe ra Zebedeo, ta chi yañi ra, ra Juan. Cañohó ra chichi noo canoa canaquicú ra yuhva ra.

20 Canā ra Jesús chi ra. Ta ninduvi tahan ra casandoꝝ ra sutu ra, ra Zebedeo, chichi canoa chihin ra catyinyeé chi ra. Ta cuahan coyo ra chihin ra Jesús.

Nu nduvahā noo ra yihí tatyí ña vaha añima
(Lc. 4.31-37)

21 Ta chaā coyo ra ñuu Capernaum. Ta cuví chi noo quiví nyitatú ñáyiví, ta quihví ra Jesús chichi vehe ñuhu, ta quichahā sañaha ra tuhun Nyoo chi ñáyiví.

22 Ta iyo cuñí ñu tuhun cahán ra, vatyí sañahá ra tari noo ra iyó vaha ityi chíi cha cahán. Ña cahán ra cuhva cahán ra casacuahá cuenda ley vehe ñuhu.

23 Chichi vehe ñuhu cuan ñohó noo ra yihí tatyí ña vaha añima. Ta canā chaa ra ta catyí ra:

24 —¿Ñáá tuhun cha tyihún chuun chihin ndí, yoho Jesús ra ñuu Nazaret? ¿Atu vachun vatyí sanaun chi ndí? Yuhu ñohó nui chuun, ta chité vatyí Sehe Ii Nyoo cuví chuun —catyí ra yihí tatyí ña vaha cuan chi ra Jesús.

25 Nacahan ra Jesús ta catyí ra chi tatyí ña vaha cuan:

—¡Taxi ri! ¡Saña chi ra ndahvi chiña! —catyí ra.

26 Ta tatyí ña vaha cuan, chihí tañi ra cuhví cuan saha chi, ta iyo canachaā tatyí cuan quita chi ra.

27 Tandihí ñáyiví yuhvi xaan ñu cuví, ta candacā tuhun ñu chi tahan ñu, ta catyí ñu:

—¿Ñáá cha cuví ihya? ¿Ñana vaha tuhun chaa sañahá ra ihya? ¡Vatyí iyo vaha tunyee iñi chi ra, nyacua nya tatyí ña vaha, ta quichahá chi ra! —catyí ñu.

28 Ta numi ri cachito ñáyiví tandihí ñuu cha iyó Galilea cuan tuhun ra Jesús.

Nu sanduvahā ra Jesús chi maha tyiso ra Simón Pedro
(Mt. 8.14-15; Lc. 4.38-39)

29 Cuhva cha quita coyo ra chichi vehe ñuhu, ta cuahan ra Jesús vehe ra Simón ta ra Andrés. Ta cuahan tucu ra Jacobo ta ra Juan chihin ra.

30 Ta maha tyiso ra Simón catuví ña nu chito, cuhví ña chihin cahñi. Ta catyí ñu chi ra Jesús tyi cuhví ña.

31 Tyicuan ta tuhva ra Jesús, ta tiñ ra ndaha ña. Ta nacoñehe ra chi ña. Ta caa cuhva ri cuan, tinyaa cahñi chi ña. Ta quichaha tyiñuhu ña chi ra.

Nu sanduvahā ra Jesús chi cuaha ñu cuhví
(Mt. 8.16-17; Lc. 4.40-41)

32 Cuhva cha quee ñanyii ta cha cua cuaa, quichí nyaca ñu tandihí ñu cuhví ta ñu yihí tatyí ña vaha nu nyaá ra Jesús.

33 Ta tandihí ñáyiví ñuu cuan candu ñn ri ñu yuvehe cuan.

34 Ta cuaha ñu cuhví cha siñ siñ cuehe sanduvahā ra. Ta tava ñehe ra chí cuaha tatyí ña vaha, soco ña chahā ra cha cahan tatyí cuan, vatyí chitó cuan yóo ra cuví ra.

Nu cahán ra Jesús tuhun Nyoo ityi Galilea
(Lc. 4.42-44)

35 Ta cha inga quiví cuhva cha ni ñaa ca, ndicuitā ra Jesús, ta cuahan ra ityi chata ñuu. Cuahan ra noo nu yori sayanga chi ra cua cacan tahvi ra chí Nyoo.

36 Ta ra Simón ta ra tahan ra cuahan coyo ra cua nanducu ra chí ra.

37 Ta cuhva cha canañihí ra chí ra cacatyí ra chí ra:

—Tandihí ñáyiví nanducú ñu chuun —cacatyí ra chí ra Jesús.

38 Soco maa ra catyí ra chí ra:

—Coho ndo inga ñuu cha nyicú yatyin ri ihya, vatyí cahan tiqui tuhun Nyoo yucuan, vatyí yucuan tyiño vachi —catyí ra Jesús chí ra.

39 Yucuan chaha chica noo ra Jesús tandihí ri ñuu cha iyó Galilea, cahán ra tuhun Nyoo chichi vehe ñuhu tahan tahan ñuu. Ta tava ñehe ra tatyí ña vaha cha yihí añima ñáyiví.

Nu sanduvahā ra Jesús chi noo ra cha tyahyu coño
(Mt. 8.1-4; Lc. 5.12-16)

⁴⁰ Noo chaha tuhva noo ra cuhvi cha tyahyu coño nu nyaá ra Jesús. Ta chicuñi chiti ra nuu ra, ta catyí ra chi ra:

—Tatu cuñún, cuví sanduvahun chii —catyí ra.

⁴¹ Ta cundahvi cuñi ra Jesús nyehé ra chi ra, ta tyiso ra ndaha ra siqui ra, ta catyí ra:

—Cuñi sanduvahi chuun. Ta na nduvahun vityin ri —catyí ra chi ra.

⁴² Caa cuhva ri cha catyí ra tyehe caa, tinyaa cuehe cuan chi ra, ta nduvaha ra.

⁴³ Tyicuan ta catyí ra Jesús vatyí cha cuvi cuhun ra, soco catyí xaan ra chi ra na sacuvi ra tyehe caa:

⁴⁴ —Nyehe. Yori chihin cahun tuhun. Soco cuahan nu nyaá tata sutu. Ta sañahun chuun chi ra, ta cuhvon cha tahán chi cuhvon na ndundiun nu Nyoo tari cuhva catyí nu ley cha tyaa ra Moisés, vatyí tacuhva coto tandihí ñáyivi tyi cha nduvahun chihin cuehe cuan —catyí ra Jesús chi ra.

⁴⁵ Soco ra cuan chahan ra, ta quichaha nacatyí ra chi tandihí ñáyivi. Yucuan chaha ña cuvi ca quihvi ndichin ra Jesús chichi ni noo ñuu. Ta ityi chata ri ñuu chicá noo ra nu yori ñáyivi iyó, soco tandihí ri ityi quita coyo ñu, quichi nyehe ñu chi ra.

2

Nu sanduvaha ra Jesús chi noo ra cuhvi cha ña cuvi nacanda

(Mt. 9.1-8; Lc. 5.17-26)

¹ Suhva quivi yaha ta quihvi ra Jesús inga chaha chichi ñuu Capernaum. Ta cachito ñáyivi tyi nyaá ra vehe.

² Ta numi ri candu in ri cuaha ñáyivi. Ta nyacua ña chitahan ñu, ni yuvehe. Ta maa ra Jesús cahan ra tuhun Nyoo chihin ñu.

³ Tyicuan ta cumi tahan ra canyisó chi noo ra cuhvi cha ña cuvi nacanda, caquichí nyaca ra chi ra nu nyaá ra Jesús.

⁴ Soco ña cuvi caquihvi ra nya nu nyaá ra Jesús cha cuenda vatyí tuvi xaan ñáyivi. Tyicuan ta candaa ra ityi xiñi vehe. Ta sacuachiyó ra suhva tyiyo. Ta sanoó ra chi ra cuhvi cuan chihin chito.

⁵ Nyehe ra Jesús vatyí cachinó xaan iñi ra cuan. Ta catyí ra chi ra cuhvi cuan:

—Cha ndachi cuatyun, suti —catyí ra Jesús chi ra.

⁶ Soco suhva ra sacuahá cuenda ley vehe ñuhu nyicú ra cuan, ta cachicá xiñi ra tyehe caa:

⁷ “¿Ñáa tuhun cha caña iñi ra ihya cahan ra tyehe caa? Chicoó cuatyí ra nuu Nyoo chihin tuhun cahan ra vatyí yori cuví sandachi cuatyí, noo tuhun ri maa Nyoo cuví sandachi ra cuatyí”, cachicá xiñi ra.

⁸ Soco ra Jesús chitó ra cha cachicá xiñi ra. Ta catyí ra chi ra:

—¿Ñáa tuhun cha chicá xiñi nyoho tyicuan caa?

⁹ ¿Ñáa cha yí ca, cha catyí yo chi ra cuhvi ihya vatyí cuatyí ra cha yaha ndachi, o cha catyí yo chi ra vatyí nducuita ra ta naquehen ra chito ra ta caca ra?

¹⁰ Vaha, vityin chihin cha sanduvahi chi ra ihya, cusañahi chi ndo vatyí yuhu ra cuví Rayí cha quichi nya gloria, iyó ityi chii cha sandachi cuatyí ñáyivi —catyí ra Jesús chi ra.

Tyicuan ta quichaha catyí ra chi ra cuhvi cuan:

¹¹ —Catyí chi yoho, nducuita, naquehen chiton, ta cuanuhu nya vehun —catyí ra Jesús chi ra.

¹² Ta ra cuhvi cuan nducuita ra. Naquehen ra chito ra, ta cuanuhu ra. Ta tandihí ñu nyehe ñu, ta iyo cuñi ñu, ta sacahnú ñu chi Nyoo, ta catyí ñu:

—Ni noo chaha ta nyehe ca yo cha tyehe caa —catyí ñu.

Nu cana ra Jesús chi ra Leví

(Mt. 9.9-13; Lc. 5.27-32)

¹³ Yaha cuan ta cuahan tucu ra Jesús inga chaha yuhu miñi cuan. Ta cuhva cha nataca ñáyivi nu nyaá ra, quichaha cahan ra nuu ñu.

¹⁴ Tyicuan ta cuahan ra ta nu yaha ra nanyehé ra chi ra Leví sehe ra Alfeo, nyaá ra nu sahá tyiño ra, tavá ra xuhun cuenda gobiernu ñuu Roma. Ta catyí ra Jesús chi ra:

—Coho chihin.

Tyicuan ta nducuita ra Leví, ta cuahan ra chihin ra.

¹⁵ Yaha cuan ta tahan chi nyaá ra Jesús chihin ra cachicá noo chihin ra cachachí ra nu mesa vehe ra Leví. Ta nyicú tucu cuaha ra catavá xuhun chihin inga ñáyivi iyó cuatyí. Vatyí cuaha xaan ñu nyicón chi ra.

16 Soco ra casacuahá cuenda ley vehe ñuhu, ta ra cacuví fariseo, ra cha quichahá xaan ley vehe ñuhu, cha canyehę ra vatyí chachí ra Jesús chihin ra catavá xuhun, ta ñu iyó cuatyí, ta cacatyí ra chi ra cachicá noo chihin ra Jesús:

—¿Yoso caa cha ra sacuaha chi nyoho chachí ra ta chihí ra chihin ra catavá xuhun ta ñu iyó cuatyí?

17 Chiñi ra Jesús cha cacahan ra ta catyí ra:

—Ña chiñuhú doctor chi ñu ña cuhví, soco chiñuhú ra chi ñu cuhví. Vachi yuhu soco ñima cha cuenda cha vaha chi ñu vaha, soco cha cuenda cha vaha chi ñu iyó cuatyí —catyí ra Jesús chi ra.

Nu sañahá ra Jesús vatyí nya cha yaha canyaha ra chi ñu nyicón chi ra, tyicuan ta cutahan chi savaha ñu ayuno
(Mt. 9.14-15; Lc. 5.33-35)

18 Noo chaha, ra canyicón chi ra Juan ta ra canyicón chi ra fariseo, ña chachí ra ta nanducú ra chi Nyoo. Ta suhva ñáyivi quichí coyo ñu nu nyaá ra Jesús, ta ndaca tuhun ñu chi ra, ta catyí ñu chi ra:

—¿Ñáá tuhun cha ra canyicón chi ra Juan ta ra canyicón chi ra fariseo tuhvá ra savaha ra ayuno, ta ra cachicá noo chuhun ña tuhvá ra? —catyí ñu.

19 Ta nacahan ra Jesús ta catyí ra:

—Noo vico tandaha, ¿atu cuví cha ma cachi ra ñohó vico cha ni ri ca cha nyaá ra cha cua tandaha cuan chihin ra? Tatu nyaá ca ra cua tandaha cuan chihin ra, ma cuví cha ma cachi ra.

20 Soco vachi chi quívi cha cutinyaa ra chi ra tandaha cuan nu nyicú ra tahan ra. Yucuan ndicha quívi coo cuhva cha ma cachi ra ta nanducu ra chi Nyoo —catyí ra Jesús chi ñu.

Nu sañahá ra Jesús vatyí ña nacachi tahan tuhun chahnu cha iyó ñáyivi chihin tuhun chaa cha sañahá ra
(Mt. 9.16-17; Lc. 5.36-39)

21 Catyí ra Jesús:

—Yori naquicu noo sahma chahnu chihin noo sahma chaa, vatyí cha chaa cuan nandiyí ta cahnya chi sahma chahnu, ta nu tahnya cuan cunducahnu ca.

22 Ta ni ri ña tuhvá yo tyihi yo vinu chaa chichi ñi chahnu, vatyí vinu chaa chahnyá chi ñi, ta chati vinu, ta tiví ñi. Yucuan chaha cuñí chi cha tyihi yo vinu chaa chichi ñi chaa —catyí ra Jesús.

Nu catohon ra cachicá noo chihin ra Jesús yoco trigu quívi nyitatu ñáyivi
(Mt. 12.1-8; Lc. 6.1-5)

23 Noo quívi cha tuhvá ñáyivi nyitatu, cuahan ra Jesús chicá ra mahñu nu iyó cha tachí ñáyivi. Ta ra cachicá noo chihin ra quichaha catohon ra yoco trigo cuan cuhva cha yahá coyo ra.

24 Tyicuan ta quichaha cacatyí ra fariseo chi ra Jesús:

—¡Nyehhe xihna! ¿Ñáá tuhun cha sacuví ra cachicá noo chuhun tyiño cha ña tahan chi sacuví yo quívi nyitatu yo? —cacatyí ra.

25 Soco maa ra Jesús catyí ra chi ra:

—¿Atu ni noo chaha ta sacuaha ca nyoho cha sacuví ra David chihin ra tahan ra noo quívi cha cachisoco vavaha ra?

26 Quívi cha cuví ra Abiatar tyiño cha cuví ra nuu chi tata sutu, quihví ra David chichi vehe Nyoo. Ta chachí ra pan ii, cha tahan chi cachi maa ri maa ra cuví sutu. Ta chaha tucu ra cachi ra ndihi chihin ra —catyí ra Jesús.

27 Ta catyí tucu ra Jesús chi ra:

—Chicoo quívi nyitatu yo, cuenda cha vaha chi ñáyivi, soco ñáyivi ña chicoo ñu cha cuenda cha vaha chi quívi nyitatu yo.

28 Yucuan chaha yuhu Rayi cha quichi nya gloria, iyó ityi chii cha catyí chi noo noo ndo ñáá cha sacuvi ndo quívi nyitatu yo —catyí ra Jesús.

3

Nu nduvaha noo ra na ityi inchiyo ndaha
(Mt. 12.9-14; Lc. 6.6-11)

1 Quihví ra Jesús inga chaha chichi noo vehe ñuhu. Ta yucuan nyaá noo ra na ityi inchiyo ndaha.

2 Ta cañañí ra fariseo chi ra Jesús nyehé ra tatu sanduvaha ra chi ra quívi nyitatu ñu, vatyí tacuhva coo cuatyí tyaa ra siqui ra.

3 Tyicuan ta ra Jesús catyí ra chi ra na ityi ndaha cuan:

—Ndícuíta ta cuinanyaa mahñu ihya.

4 Yahā cuan ta ndacā tuhun ra chi inga ñu cha tayucú cuan, ta catyí ra:

—¿Ñáá cha tahán chi sacuvi yo quiví nyitatu yo? ¿Atu sacuvi yo cha vaha o cha ña vaha? ¿Atu tahán chi sanduvaha yo ñáyiví o cha cahñi yo? —catyí ra Jesús.

Tyicuan ta taxi taxi maa candoq ñu cuan.

5 Tyicuan ta xaan nanyehe ra Jesús chi ñu, ta cuihya cuñí ra vatyí ña cuñí ñu cutuñi ñi ñu. Ta catyí ra chi ra cuan:

—Sanacaa ndahun.

Ta sanacaa ra, ta nduvaha ndaha ra.

6 Tyicuan ta quitā coyo ra fariseo, ta quichahā catyihí tahan ra tuhun chihin ra cuenda ra Herodes, yoso caa cacahñi ra chi ra Jesús.

Nu nyicú cuaha ñáyiví yuhu miñi

7 Soco ra Jesús cuahan ra chihin ra cachicá noo chihin ra yuhu miñi, ta cuaha ñáyiví ityi Galilea canyicón chi ra.

8 Ta cha chitō ñáyiví tuhun nahnu cha sacuví ra, cuaha xaan ñu quichí coyo ñu ñuu Jerusalén ta inga ñuu cha iyó ityi Judea, ta ñuu cha iyó Idumea, ta inga chiyo yuvi cahnu Jordán, ta ñuu Tiro ta ñuu Sidón ñandihí, vatyí cuñí ñu nyehe ñu chi ra.

9 Yucuan chaha catyí ra Jesús chi ra cachicá noo chihin ra na casanduvaha ra noo canoa, tacuhva vatyí tatu ndutihin xaan chihin ñáyiví, cuví quihví ra chichi canoa cuan.

10 Vatyí cuaha xaan ñu cha yahā sanduvahā ra, ta yucuan chaha tandihí ñu cuhví cuahan ñu nu nyaá ra vatyí cuñí ñu tin ñu chi ra tacuhvā nduvaha ñu.

11 Ta ñu yihí tatyí ña vaha añima, chicuiñi chiti ri ñu nuu ra, ta canachaa tatyí ña vaha cuan, ta catyí chi tyehe caa:

—¡Yoho cuvún Sehe Nyoo!

12 Soco ra Jesús chasī ra yuhu tatyí cuan vatyí ma catyí ca chi yóo ra cuví ra.

Nu nacachi ra Jesús chi uchi uvi apóstol vatyí cacaca ra tyiño ra

(Mt. 10.1-4; Lc. 6.12-16)

13 Yahā cuan ta ndaā ra Jesús noo yucu ta canā ra chi ra cuñí maa ra nacachi ra. Ta quichí coyo ra nu nyaá ra.

14 Ta tyisō ra chi uchi uvi tahan ra vatyí cundihí ra chihin ra, ta vatyí tyatyiño ra chi ra na cucahan ra tuhun Nyoo.

15 Ta chahā ra ityi chi ra vatyí sanduvaha ra chi ñu cuhví, ta tava ñehe ra chi tatyí ña vaha.

16 Ta ican ra ihya cacuví ndi uchi uvi tahan ra: ra Simón cha sacunañi ra Jesús Pedro chi;

17 ra Jacobo ta yañi ra ra Juan, sehe ra Zebedeo. Ta Boanerges sacunañi ra chi ninduvi tahan ra ta cuñí chi catyí: ra ñihi cahán tari cahán savi,

18 ra Andrés, ra Felipe, ra Bartolomé, ra Mateo, ra Tomás, ra Jacobo sehe ra Alfeo, ra Tadeo, ta inga ra Simón cha yihí cuenda ityi ra cuñí cuhun cuatyí siqui gobiernu ñuu Roma cha nyacá ñaha chi ñu,

19 ta ra Judas Iscariote, ra cha naxico tuhun chi ra Jesús.

Nu tyaá ñáyiví cuatyí siqui ra Jesús, ta catyí ñu vatyí tunyee ñi cuihna iyó chi ra

(Mt. 12.22-32; Lc. 11.14-23; 12.10)

Yahā cuan ta quihví ra Jesús noo vehe chihin ra cachicá noo chihin ra.

20 Ta inga chaha natacā cuaha ñáyiví, ta nyacua ni ña cuví ca cachí ra.

21 Cha cachitō ñáyiví chi ra Jesús vatyí nyaá ra yucuan, quichí coyo ñu vatyí cunuhun ra chihin ñu, vatyí catyí ñáyiví chi ñu tyi nduloco ra.

22 Ta suhva ra casacuahá cuenda ley vehe ñuhu Jerusalén cha quichí coyo suri tyicuan caa cacatyí ra:

—Ra ihya, ra Beelzebú ra cuví nuu chi cuihna yihí chi ra. Ta chihin tunyee ñi cuihna tava ñehe ra tatyí ña vaha —cacatyí ra.

23 Tyicuan ta canā ra Jesús chi ra, ta catyí ra chi ra:

—¿Yoso caa, atu tavā ñehe cuihna suri chi ra tahan maa ra? Ma sacuvi cuihna tyicuan caa.

24 Tatu noo gobiernu cacusiin ra, ta ca-cañí tahan ra chihin tahan ra, gobiernu cuan ña naha cuacunyaca ñaha ra.

25 O tatu ñáyiví noo vehe, ña in ri cuví ñu chihin tahan ñu ta cañi tahan ñu, cutiví nu nyicú ñu.

26 Ta tatu cuihna cacusiin ra ta canducuita ra siqui tahan ra, ¿yoso caa cucuvi chi ra? Cundihí tuhun ra.

27 Yori cuví quihví chichi vehe noo ra ñihi tari cuihna ta tinyaa ra cha chii ra, tatu

ma cuhñi xihna ra chi ra. Yucuan ndicha ta cuví tinyaa yo cha chii ra.

²⁸ 'Cha ndicha catyí chi ndo vatyí cuví coo ticahnu iñi tandihí nuu cuatyí ñáyivi, ta tandihí cha quiñi caa cha cahán ñu.

²⁹ Soco ñu cahán ña vaha siqui Tatyí li Nyoo, ma cuví maa coo ticahnu iñi cuenda cuan, soco tyicuan ri maa coo cuatyí ñu —catyí ra Jesús.

³⁰ Tyicuan caa catyí ra Jesús chi ra casacuahá cuenda ley vehe ñuhu, vatyí maa ra cacatyí ra vatyí ñohó noo tatyí ña vaha chi ra.

*Yóo ñu cuví sihi ra Jesús ta yañi ra
(Mt. 12.46-50; Lc. 8.19-21)*

³¹ Tyicuan ta chaq coyo sihi ra Jesús ta yañi ra, soco ndoo ñu ityi chata vehe, ta tachí ñu cucana chí ra.

³² Ta ra nyicú nicachico nu nyaá ra Jesús cacatyí ra chi ra:

—Sihun ta yañun ta cuhvon nyicú ñu ityi chata vehe, ta nanducú ñu chuun —catyí ra chí ra.

³³ Soco maa ra catyí ra:

—¿Yóo ñu cuví sihi ta yañi? —catyí ra.

³⁴ Tyicuan ta nanyehę ra chí ñu nyicú nicachico, ta catyí ra:

—Ican ñu ihya cuví sihi ta yañi.

³⁵ Vatyí savahri ñu sacuví cuhva cuñí Nyoo, ican ñu cuan cuví yañi, ta cuhve, ta sihi —catyí ra Jesús.

4

*Tari noo ra chicá noo tachí, tyicuan caa
cuví ra cahán tuhun Nyoo
(Mt. 13.1-9; Lc. 8.4-8)*

¹ Inga chaha quichaha sañaha ra Jesús yuhu miñi, ta ndu ñn ri cuaha ñáyivi nu nyaá ra. Yucuan chaha quihvi ra chichi noo canoa cha tacaá nu ndutya yuhu miñi cuan. Ta chicunyaq ra, ta tandihí ñáyivi ndoo ñu nu ñiti.

² Tyicuan ta cuaha cha sañaha ra chí ñu chihin cuhva ri. Ta nu sañahá ra chí ñu, ta catyí ra chí ñu:

³ —Tyasoho ndo tuhun ihya. Minoo ra quitá ra vehe ra, cuahan ra nu iyó tyiño sahá ra. Ta quichaha quití ra chiti trigu nu ñuhú ra.

⁴ Ta ityi cuahan ra quití ra, suhva chiti cuan canacoyo yuhu ityi, ta quichí coyo saa ta cachachí ti.

⁵ Suhva ca chiti canacoyo ticu yuu nu ña cuaha ñuhú yihí. Ta chiti cuan numi ri caña, vatyí ña cono xaan yihí ñuhú cuan.

⁶ Soco cuhva cha caña ñanyii, na ityi chí vatyí ña cono yihí yoho chí.

⁷ Ta suhva ca chiti canacoyo chichi tu iñu. Ta chahnú tu iñu cuan, ta chasi tun nuu trigo cuan. Yucuan chaha ña chiyo chiti tun.

⁸ Soco suhva chiti cha canacoyo nu ñuhú vaha. Ta caña ta chahnú. Ta vaha chaha tun chiti. Suhva tun chaha tun oco uchi chiti cha noo noo tun. Inga tun chaha tun uñi xico chiti. Ta inga tun chaha ciento chiti —catyí ra Jesús chí ñu.

⁹ Ta catyí tucu ra chí ñu:

—Tatu cutuñi iñi ndo, tyasoho ndo tuhun cahín.

*Nu sacotó ra Jesús ñáá cuenda sañahá ra
chihin cuhva ri chí ñáyivi
(Mt. 13.10-17; Lc. 8.9-10)*

¹⁰ Yahá cuan ta ndoo maa ri maa ra Jesús chihin ñu nyicón chí ra ta ndi uchi uvi tahan ra chicá noo chihin ra. Ta candaca tuhun ñu chí ra ñáá cha cuñi chí catyí tuhun cuan.

¹¹ Ta catyí ra chí ñu:

—Chí nyoho sacotó Nyoo tuhun xehe yoso caa nyacá ñaha ra añima ñáyivi. Soco chí ñu cha ña chinó iñi chí ra, maa maa ri chihin cuhva ri sañahí chí ñu.

¹² Vatyí tatu nyehé ñu soco cuví chí tari cha ña nyehé ñu, ta tatu chiñi ñu soco ma cutuñi iñi ñu. Tacuhva cha ma nasama ñu cuhva iyó ñu ta ni ma coo ticahnu iñi cuatyí ñu —catyí ra Jesús chí ñu.

*Nu chaha ra Jesús cuenda yoso caa cuahan
tuhun ra tachí chiti cuan
(Mt. 13.18-23; Lc. 8.11-15)*

¹³ Ta catyí tucu ra chí ñu:

—¿Atu ña cutuñi iñi nyoho tuhun ihya? Tatu tyicuan caa ña cutuñi iñi ndo, ¿yoso caa cuví cutuñi ini ndo tandihí inga tuhun sañahí chí ndo?

¹⁴ Ra cha tachí chiti trigu cuan cuví ra tari noo ra cahán tuhun Nyoo.

¹⁵ Yihí ñáyivi cuví ñu tari nu canacoyo chiti yuhu ityi: chiñi ñu tuhun Nyoo, soco

cha yaha chiñi ñu, quichi cuihna ta tinyaa ra tuhun Nyoo cha tachí ra añima ñu.

¹⁶ Inga ñáyivi cuví ñu tari nu canacoyo chiti tucu yuu: chiñi ñu tuhun Nyoo ta sñi cuñi ñu natiin cuenda ñu noo ri cuhva.

¹⁷ Vatyí nu caña chiti tucu yuu cuan, chiin ri ñuhú yihí chaha, yucuan chaha caña soco ña cuví tyihi yoho vaha chi. Ta tyicuan caa ñu cuan, suhva ri quivi chino iñi ñu. Soco quivi vachi tindoho siqui ñu, o satasi iñi ñáyivi chi ñu cha cuenda tuhun Nyoo, sandihí ri ñu tuhun cha chinó iñi ñu.

¹⁸ Ta inga ñu cuví ñu tari nu canacoyo chiti chichi tu iñu: chiñi ñu tuhun Nyoo,

¹⁹ soco cutyoño ca iñi ñu cha cuenda tindoho cha iyó siqui ñuhu ñáyivi ihya. Cha tyayí sandaví ñaha chi ñu, ta cuñi ñu tandihí ri nuu cha iyó. Tandihí ihya quihví xiñi ñu ta ña nyaá ca xiñi ñu tuhun Nyoo, ta ña chahá chi sacuvi ñu cha vaha cha cuenda cuan.

²⁰ Soco yihí ñu cha chiñi ñu tuhun Nyoo ta naquehén cuenda ñu, ta vaha sacuvi ñu, tari nu canacoyo chiti nu ñuhú vaha cuví ñu. Yihí ñu cuví ñu tari yutun cha caña ta chahá tun oco uchi tahan chiti tahan tahan tun. Ta inga ñu cuví ñu tari yutun cha chahá uñi xico. Ta inga ñu tari yutun cha chahá ciento.

Ma tyihi xehe yo ñuhu cha sandundichin Nyoo añima yo coto tinyaa ra (Lc. 8.16-18)

²¹ Ta catyí tucu ra chi ñu:

—¿Atu quichi nyaca yo noo tima vatyí cananyaa yo chichi noo cajón o xiu chito? Ñima. Tima cuan cuñi chi tyiso yo noo nu sucun vatyí na sacundichin chi chichi vehe.

²² Ta tyicuan caa tucu, ñahri cha ñohó xehe, ta cuñun, tyi ma natuvi. Ta ñahri noo tuhun xehe, ta cuñun, tyi ma coto yo.

²³ Nyoho cha cutuñi iñi ndo, tyasoho ndo tuhun cahín —catyí ra Jesús chi ñu.

²⁴ Catyí tucu ra tyehe caa:

—Tyasoho vaha ndo tuhun cahín. Yoso cuhva sacuvi ndo chi ñáyivi, yucuan cuhva sacuvi Nyoo chihin ndo. Ta cuaha ca cuhva ra chi ndo tatu tyasohó ndo cha cahán ra.

²⁵ Vatyí ñu tyasohó cha cahín, cuaha ca cuhva Nyoo chi ñu. Soco ñu ña tyasohó, cutinyaa ndihí ra cha chiin cha cha yaha chahá ra chi ñu.

Nu sañahá ra Jesús cuhva chahnu noo chiti yutun

²⁶ Catyí tucu ra Jesús tyehe caa:

—Cha nyacá ñaha Nyoo añima ñáyivi cuví chi tari noo ra tachí noo chiti chichi ñuhú.

²⁷ Ta cuahan ra cua cusu ra. Yaha cuan ta ndicuita ra. Ta cuaha quivi yaha. Ta caña chiti cuan, ta chahnu yutun. Soco maa ra ña chitó ra yoso caa chahnu tun.

²⁸ Cha cuenda vatyí maa ñuhú cuan sacuvahá chi tun tyicuan ri caa. Xihna ca quita xityin tun, ta yaha cuan yoco tun, yaha cuan ta quita chiti nu yoco cuan.

²⁹ Ta tatu cha chityí chiti cuan, cutohon ra vatyí cha cha quivi cha coyo —catyí ra Jesús.

Nu sañahá ra Jesús vatyí tari chahnu noo chiti mostaza, tyicuan caa nducuaaha nu nyacá ñaha Nyoo

(Mt. 13.31-32; Lc. 13.18-19)

³⁰ Ta catyí tucu ra Jesús:

—¿Ñáá chihin sanandiqui tahin cha nyacá ñaha Nyoo añima yo? ¿Ñáá chihin sandu inuu ri yo?

³¹ Cuví chi tari noo chiti mostaza cha tachí yo nu ñuhú. Ican chiti cuan, lee ca cha nuu tandihí chiti iyó siqui ñuhu ñáyivi.

³² Soco tatu tachí yo, caña ta cuahnu. Ta cahnu vavaha cuví tun. Ta nahnu soco tun, ta nyacua nya saa cha chicó nu tatyí cuví nyitatu ti nu vati tun.

Yoso caa sañahá ra Jesús chihin cuhva ri chi ñáyivi

(Mt. 13.34-35)

³³ Tyehe caa sañahá ra Jesús chi ñu, chihin cuaha cuhva, nyacua nya nu cuví cutuñi iñi ñu.

³⁴ Ñahri maa cha catyí ra chi ñu tatu ñima chihin noo cuhva. Soco chi ra cachicá noo chihin ra, nacatyí vaha ra chi ra.

Nu sacutaxín ra Jesús tatyí ta miñi

(Mt. 8.23-27; Lc. 8.22-25)

³⁵ Suri maa quivi cuan, cuhva cha cuaa, catyí ra chi ra cachicá noo chihin ra:

—Coho ndo inga chiyo miñi cuan.

—Cuahunu nya vehun, nu nyaá ñáyiví chuun, ta nacatyun chi ñu tandihí cha sacuví Sutu yo Nyoo chuhun, ta yoso caa cundahví cuñi ra nyehe ra chuun.

²⁰ Ta ra cuan cuahan ra ta quichaha nacatyí ra chi ñáyiví tandihí ñuu Decápolis tandihí cha sacuví ra Jesús chihin ra. Ta tandihí ñu, iyo cuñí ñu.

Nu nduvahá sehe ra Jairo ta ñaha síhi cha tñin sahma ra Jesús

(Mt. 9.18-26; Lc. 8.40-56)

²¹ Ta cuhva cha nachaa ra Jesús chihin canoa nya inga chiyo miñi cuan, chaá coyo cuaha ñáyiví nu nyaá ra. Ta ndoo ra yuhu miñi cuan.

²² Tyicuan ta chaá noo ra cuví nuu vehe ñuhu. Nañí ra Jairo. Ta cuhva cha nanyehe ra chi ra Jesús, chicuñi chiti ra nuu ra.

²³ Ta chacu ndahvi ra nuu ra ta catyí ra:

—Cha cuñí cúvi sehi. Coho chihin ta tyison ndahun síqui ña na nduvaha ña ta ma cúvi ña.

²⁴ Tyicuan ta cuahan ra Jesús chihin ra, soco cuaha ñáyiví nyicón chi ra, ta nyacua nañi tahan ri ca maa ñu.

²⁵ Ta mahñu ñáyiví cuan ñohó noo ñaha cha cuhví. Cha quita uchi uvi cuiya ndoho ña cuehe cha chatí niñi ña.

²⁶ Ta cuaha tindoho nyehe ña cha cuaha xaan doctor nyehe chi ña. Ta cha sanaa ña tandihí maa cha iyó chi ña, soco ñahri maa tyinyee chi chi ña. Soco ñihi ndihí ca nanduvi.

²⁷ Cuhva cha chitó ña tuhun milagru cha sacuví ra Jesús, tuhva ña ityi chata ra ta tñin ña sahma ra.

²⁸ Vatyí chicá xiñi ña: “Ma chihin cha tñin ri sahma ra, ta nduvahi”, chicá xiñi ña.

²⁹ Ta caa cuhva ri cha tñin ña sahma ra ta cha chatí niñi ña cutaxin. Ta tuví iñi coño ñuhu ña tyi cha nduvahá ña chihin cuehe cuan.

³⁰ Tyicuan ta tuví iñi ra Jesús vatyí nduvahá noo ñáyiví chihin suhva tunyee iñi cha quita chi ra. Tyicuan ta nanyehe ra ityi chata ra ta quichaha ndaca tuhun ra:

—¿Yóo cha tñin sahme? —catyí ra.

³¹ Tyicuan ta ra cachicá noo chihin ra quichahá catyí ra chi ra:

—Cha nyehun vatyí ñáyiví tyandahá chuun tyi tñin xaan. ¿Yoso caa cha ndaca

tuhun: “Yóo cha tñin chii”? —cacatyí ra chi ra.

³² Soco ra Jesús nyehe ra ityi cuan ityi ihya, vatyí cuñi ra nyehe ra yóo cha tñin chi ra.

³³ Tyicuan ta ñaha cuan niñi ña chihin cha yuhví ña vatyí chitó ña ñáa cha cuví chi ña. Ta chahan ña chicuñi chiti ña nuu ra. Ta nacatyí ña tandihí cha ndicha chi ra.

³⁴ Ta catyí ra Jesús chi ña:

—Cha nduvahun, Síhi, vatyí chinó iñun. Cuahan, ta ma caca xiñun, vatyí cha nduvahun chihin cuehe cha ndohun —catyí ra Jesús chi ña.

³⁵ Ni cahán ca ra Jesús ta chaá coyo ñu vehe ra cuví nuu cuan, ta catyí ñu chi ra cha cuví sutu cha luhlu cuan:

—Sehun, cha chihí ña. Ñáa ri ca tuhun cha sayangon chi Ra Sacuaha chiña —catyí ñu.

³⁶ Soco ra Jesús ña quichahá ra cha chahan ñu, ta catyí ra chi ra cuví nuu vehe ñuhu cuan:

—Ma yuhvun. Chino iñun —catyí ra chi ra.

³⁷ Ta ña chahá ra yóo ca cha cuhun chihin ra, notuhun ri ra Pedro ta ra Jacobo ta ra Juan, yañi ra Jacobo.

³⁸ Ta cuhva cha cachaa coyo ra vehe ra cuví nuu vehe ñuhu, nyehe ra cha chacú chaa ñáyiví ta caná chaa ñu.

³⁹ Quihví ra ta catyí ra chi ñu:

—¿Ñáa tuhun cha iyo xaan cuví ndo, ta chacú ndo tyiña caa? Cuehe luhlu ihya, ña chihí cue, quixí cue —catyí ra chi ñu.

⁴⁰ Soco chacu cuehe ri ñu nyehe ñu chi ra. Tyicuan ta ra Jesús tava ra chi tandihí ñu, ta quehen ra chi sutu cue ta síhi cue ta chi ra cha chaá coyo chihin ra, ta quihví coyo ra nu catuví cue.

⁴¹ Ta tñin ra ndaha cue, ta catyí ra chi cue:

—Talita cumi —ta cuñí chi catyí cuan: Catyí chuun, yoho cuehe luhlu, jndicuita!

⁴² Ta caa cuhva ri cua ndicuita cuehe luhlu cuan. Iyó uchi uvi cuiya cue. Ta cuví nacaca cue. Ta ñáyiví iyó xaan cuñí ñu.

⁴³ Soco ra Jesús ñihi chahá ra tuhun chi ñu, tyi ma cahan maa ñu tuhun, ta catyí ra chi ñu na cuhva ñu cha cachi cue.

6

*Nu ñohō ra Jesús ñuu Nazaret
(Mt. 13.53-58; Lc. 4.16-30)*

¹ Tyicuan caa cuvī ta quitā ra Jesús yucuan, ta cuanuhu ra nya ñuu ra. Ta ra cachicá noo chihin ra cuahan coyo ra chihin ra.

² Ta chaq̄ quiṽi nyitatu ñáyivi, ta quichahā sañaha ra chichi vehe ñuhu. Ta cuaha ñáyivi chiñi tuhun cahán ra, ta iyo cuñi ñu, ta catyí ñu:

—¿Nya cutuhvā ra ihya tandihi tuhun ihya? ¿Yóó cha chahā cha chiñi tuñi ihya chi ra? ¿Yoso caa cha cuvī sacuvi ra milagru nahnu xaan ihya?

³ ¿Atu ñima ra satyá vitu cuan cuvī ra? Sehe cu María cuvī chi ra. Ta yañi ra Jacobo, ta ra José, ta ra Judas, ta ra Simón, ta cuhva ra iyó tucu ñu chihin yo ihya —catyí ñu.

Ta quiñi cuñi ñu nyehe ñu chi ra.

⁴ Soco catyí ra Jesús chi ñu:

—Tandihī ñu inga ñuu sahá ñu ñáyivi chi noo ra profeta Nyoo, soco ñu ñuu ra ña quichahá ñu chi ra, ni ñu vehe ra, ni ñáyivi chi ra —catyí ra Jesús.

⁵ Ta ña cuvī sacuvi ra ni noo milagru yucuan, soco tyiso ra ndaha ra siqui suhva ri ñu cuhvī, ta sanduvahā ra chi ñu.

⁶ Ta iyo cuñi ra vatyí ñu ñuu ra ña chinó iñi ñu chi ra. Ta chahān ra tandihī ñuu nyihī cha nyicū yatyin ri cuan, ta sañahā ra.

*Nu tyatyño ra Jesús chi ra cachicá noo
chihin ra nu cucahan ra tuhun Nyoo
(Mt. 10.5-15; Lc. 9.1-6)*

⁷ Yahā cuan ta canā ra chi ndi uchi uvi ra chicá noo chihin ra, ta quichahā tachi ra chi uvi uvi ra. Ta chahā ra ityi chi ra vatyí tava ñehe ra chi tatyí ña vaha yihí añima ñáyivi.

⁸ Ta catyí ra chi ra vatyí ñahri maa cha cacuiso ra ityi. Ni yono, ni cha cachi ra, ni xuhun. Ñahri maa cuquindaha ra, noo ri yutun tuvi ra cuiso ra.

⁹ Ndichan ri quihi chaha ra. Ta noo ri sahma cuhno ra, ñima uvi tahan.

¹⁰ Ta catyí ra chi ra:

—Cuhva cha chaā ndo noo ñuu ta quihvi ndo noo vehe, ndo ndo yucuan ri nyacua nya cha quita ndo ñuu cuan.

¹¹ Ta tatu ñáyivi iyó noo ñuu, ña cuñi ñu tñn cuenda ñu chi ndo, ta ña cuñi ñu tyasoho ñu tuhun cahan ndo, quita ndo yucuan ta naquisi ndo ñiyaca chaha ndo tari noo seña vatyí ña vaha sacuvi ñu. Chāndicha catyí chi ndo, vatyí quiṽi cucutuñi chi ñáyivi iyó siqui ñuhu ñayivi, ñu cha ma cuñi tñn cuenda tuhun cahan ndo, cuaha ca tindoho cunyehe ñu, ta ñima ca ñu ñuu Sodoma ta ñuu Gomorra —catyí ra Jesús chi ra.

¹² Tyicuan ta quitā coyo ra ta chichahān ra tuhun Nyoo chihin ñáyivi na ndu uvi iñi ñu cuatyí ñu, ta na nanducu ñu chi Nyoo.

¹³ Ta catavā ñehe ra cuaha tatyí ña vaha añima ñáyivi. Ta cahyū ra acetye chi cuaha ñu cuhvī ta casanduvahā ra chi ñu.

*Nu catyí chi yoso caa chihī ra Juan ra
sacondutyá chi ñáyivi
(Mt. 14.1-12; Lc. 9.7-9)*

¹⁴ Chito rey Herodes tuhun ra Jesús vatyí tandihī ñáyivi cahán ñu tuhun cha sacuvi ra, ta chicá xiñi ra tyehe caa:

—Ra Juan ra sacondutyā chi ñáyivi cuvī ra cuan. Nandoto ra cha yahā chihī ra, yucuan chaha iyó tunyee iñi chi ra —chicá iñi ra.

¹⁵ Inga ñu catyí ñu:

—Ra Elías profeta Nyoo ta cha naha cuvī ra ihya —catyí ñu.

Ta inga ñu catyí ñu:

—Inga profeta Nyoo cuvī ra, tari ra profeta Nyoo ra chiyo ta cha naha.

¹⁶ Cuhva cha chiñi ra Herodes tuhun ihya, catyí ra:

—Ican ra cuan cuvī ra Juan cha tyihī tyiño tahnya sucun, ta vityin nandoto ra —catyí ra Herodes.

¹⁷ Tyicuan caa catyí ra Herodes vatyí cha catyí cu Herodías, ta tyihī ra chi ra Juan vehe caa ta chahñi ra chi ra chihin cadena. Cu Herodías cuan, ñasihī ra Felipe, yañi ra Herodes, cuvī chi ña. Soco ra Herodes quehen ra chi ña vatyí cuvī ña ñasihī ra.

¹⁸ Ta ra Juan catyí ra chi ra Herodes vatyí ña vaha cha cunyaa ra chihin ñasihī yañi ra.

¹⁹ Yucuan chaha cu Herodías tasi xaan cuñi ña nyehe ña chi ra Juan, ta cuñi ña cahñi ña chi ra, soco ña cuvī.

²⁰ Vatyí ra Herodes chito ra vatyí ra Juan cuvī ra noo ra vaha, ra ii, ta yuhví ra chi

ra. Yucuan chaha sahá cuenda vaha ra chi ra, ña chaha ra cha sacuvi ña cha cuñi maa ña chihin ra. Ta vasi ña cuaha cutuñi iñi ra Herodes cha cahán ra Juan soco vaha cuñi ra chiñi ra cha cahán ra.

²¹ Soco cu Herodías ñihí ña noo cuhva nu ndihí ra Herodes cuiya, vatyí sacco ra noo vico cha cuenda ra cacuví tyiño, ta comandante cuenda síndaro, ta ra nahnu ca ityi Galilea cuan.

²²⁻²³ Ta quihví sehe cu Herodías vico cuan, ta quichaha chita chaha ña. Ta tahaan xaan iñi ra Herodes ta ra cha nyicú cuxiñi chihin ra. Ta tyaa ra cuhva vatyí cuhva ra ñáa cha cacán ña chi ra. Ta catyí ra chi ña:

—Çacán ñáa cha cuñún chii, ta cuhve chuun —catyí ra chi ña.

Ta catyí ra vatyí cuhva ra ñáa ri cha cacán ña, vasi sava ñuhú ñuu nu nyacá ñaha ra.

²⁴ Quita ña ta catyí ña chi sihi ña:

—¿Ñáa cha caquen chi ra? —catyí ña.

Ta catyí sihi ña:

—Çacán xiñi ra Juan ra sacondutyá —catyí ña chi sehe ña.

²⁵ Ta numi ri ndihví ñaha tyivaa cuan nu nyaá rey Herodes, ta catyí ña chi ra:

—Cuñi vatyí cahnyon xiñi ra Juan ra sacondutyá ta tyihun nuu noo coho ta cuhvon chii vityin vityin —catyí ña chi ra.

²⁶ Tyicuan ta nducuihya xaan iñi rey cuan. Soco cha tyaa ra cuhva vatyí cuhva ra chi ña, ta sin ri cachiñi ra canyicú chihin ra, ta ña cuñi ra nacañu ra cha catyí ra chi ña.

²⁷ Numi ri tachí rey cuan tyiño chi noo síndaro na quichi nyaca ra xiñi ra Juan.

²⁸ Chahan síndaro cuan chichi vehe caa cuan, ta chahnya ra xiñi ra Juan. Ta quichi nyaca ra, yihí nu noo coho. Tyicuan ta chaha ra chi ñaha tyivaa cuan, ta maa ña nacuhta ña chi sihi ña.

²⁹ Cha chito ra canyicón chi ra Juan, chahan coyo ra chinaquehen ra coño ñuhu ra, ta cachityihí ra chichi ñuhú.

Nu chaha ra Jesús cha cachi ohon mil rayi

(Mt. 14.13-21; Lc. 9.10-17; Jn. 6.1-14)

³⁰ Yaha cuan ta ndu ñn ri ra cha tyatyíño ra Jesús chi chihin ra, ta canacatyí

ra tandihí cha casacuvi ra, ta cha casañaha ra nu chahan ra chichan ra tuhun Nyoo.

³¹ Ta catyí ra Jesús chi ra:

—Ñaha ndo, na nyitatu yo chiin noo nu taxi ri iyó —catyí ra chi ra.

Tyicuan caa catyí ra vatyí cuaha ñáyivi cuahan ta vachi ñu, ta nyacua ña cacuyatyí ra cha cacachi ra.

³² Tyicuan ta maa ri maa ra Jesús ta ra cachicá noo chihin ra cuahan coyo ra chihin noo canoa noo nu yori maa ñáyivi nyicú, minoo nu taxi ri.

³³ Soco cuaha ñu nyehe nu quitá ra. Ta canicohon nuu ñu chi ra. Ta cuahan coyo vavaha ñu chihin chaha ñu, quita ñu tandihí ñuu ta xihna ca maa ñu cha coyo.

³⁴ Cuhva cha cha ra Jesús, quita ra chichi canoa ta nanyehe ra tyi cuaha xaan ñu nyicú yucuan. Ta cundahvi cuñi ra nyehe ra chi ñu, vatyí nyicú ñu tari mbee cha yori ra sahá cumi chi ti. Ta quichaha sañaha ra cuaha tuhun chi ñu.

³⁵ Cha cua iñi xaan, ta ra cachicá noo chihin ra catuhva ra ta catyí ra chi ra:

—Cha iñi xaan, ta yucu taxin cuví ihya.

³⁶ Çatyí chi ñu, na cuhun ñu ñuu cha nyicú yatyin ihya, ta sata ñu pan, vatyí ñahri cha cachi ñu iyó ihya —cacatyí ra chi ra.

³⁷ Soco nacañan ra Jesús, ta catyí ra:

—Cuhva maa ndo cha cachi ñu.

Canacahan ra ta catyí ra:

—Vasi saha tyiño ndi iñu yoo, soco ma caña xuhun cha cusata ndi pan cachi tandihí ñu ihya.

³⁸ Ta catyí ra Jesús chi ra:

—¿Yoso tahan pan nyisó ndo? Cuahan ndo cua nyehe ndo.

Ta cuhva cha cachito ra yoso tahan, cacatyí ra chi ra:

—Ohon tahan pan ta uvi tiyaca.

³⁹ Tyicuan ta catyí ra na cunyicú noo noo ticuiti ñu nu cuhu cuii cuan.

⁴⁰ Ta chicunyicu ñu cuenda ciento ta cuenda uvi xico uchi ñu.

⁴¹ Tyicuan ta quehen ra Jesús ndi ohon tahan pan cuan ta ninduvi tiyaca cuan. Ta nanyehe ndaa ra andivi, ta nacuhta ra tyahvi nyoo chi Nyoo, ta tahvi ra pan cuan, ta chaha ra chi ra cachicá noo chihin ra na casacha ra. Tyicuan ta casacha ra chi

ñáyiví cuan. Yaha cuan ta casachá tucu ra ninduvi tiyaca cuan chi ñu.

⁴² Tandihí ñu cachachí ta ndaha iñi ñu.

⁴³ Ta nyacua ndoo ca ta casacutú ra uchi uvi tica chihin yiquin pan ta tiyaca.

⁴⁴ Ta ohon mil rayi cachachí pan cuan.

Nu chicá ra Jesús nu miñi

(Mt. 14.22-27; Jn. 6.16-21)

⁴⁵ Tyicuan ta catyí ra Jesús chi ra cachicá noo chihin ra na quihví coyo ra chichi canoa vatyí cuhun coyo ra ityi nuu nya inga chiyo miñi cuan ñuu Betsaida. Vatyí maa ra Jesús cunasacha xihna ra ñáyiví, tyicuan ta cuhun ra catyí ra.

⁴⁶ Ta cha yahá cuahan coyo ra, ra Jesús cuahan ra nu yucu, cua cacan tahví ra.

⁴⁷ Ta cuhva cha cuaa, canoa nu ñohó ra cachicá noo chihin ra cha cuahan nya mahñu miñi cuan, ta ndoo noo tuhun ri maa ra.

⁴⁸ Ta nyehe ra vatyí ña cacuví vaha casacaca ra canoa cuan vatyí ñihi xaan tatyí. Ta cha ñaa ca cuan tuhva ra Jesús chicá ra nu ndutya cuan. Ta sahá ri ra cha cua yaha ra nu canoa cuan.

⁴⁹ Soco cananyehe ra chi ra, chicá ra nu ndutya. Ta cacuñi maa ra vatyí noo cha sayuhví cuví, ta cacana cháa ra.

⁵⁰ Vatyí tandihí ra canyehe ra chi ra ta cayuhví ra. Soco maa ra cahan ra chihin ra ta catyí ra:

—¡Sanyee ndo iñi ndo! ¡Yuhu cuví! ¡Ma yuhví ndo! —catyí ra.

⁵¹ Quihví ra chichi canoa nu canyicú ra, ta cutaxin tatyí cuan. Ta iyo xaan cacuñi ra

⁵² cha cuenda vatyí ta cutuñi ca iñi ra milagru cha sacuví ra chihin pan, vatyí ni ndava ca añima ra.

Nu sanduvahá ra Jesús chi ñu cuhví ñuu Genesaret

(Mt. 14.34-36)

⁵³ Cayahá sava ra miñi cuan ta cachaá coyo ra ñuu Genesaret, ta cachahñi ra canoa cuan yuhu ndutya ri cuan.

⁵⁴ Ta cha quitá coyo ri ra chichi canoa cuan, nichon nuu ri ñáyiví chi ra Jesús.

⁵⁵ Ta cachino vavaha ñu nichahnu ityi cuan sacotó ñu vatyí chaá ra. Ta quichí coyo ñu tandihí ri ñuu, quichí nyaca ñu chi ñu cuhví chihin chito nya nu nyaá ra Jesús.

⁵⁶ Ta tandihí ri ityi nu quihví ra chichi ñuu luhlu o chichi ñuu nahnu, o chichi cuhu, chacun ñu chi ñu cuhví yuhu ityi. Ta chacu ndahví ñu nuu ra na cuhva ra cha tñn ñu vasi chiin yuhu sahna ra. Ta tandihí ri ñu tñn chi ra, nduvahá ñu.

7

Nu sañahá ra Jesús ñáá cha sativí chi ñáyiví

(Mt. 15.1-20)

¹ Yahá cuan ta ra fariseo ta suhva ra sacuahá cuenda ley vehe ñuhu quichí coyo ra nya ñuu Jerusalén, ta catuhva ra chi ra Jesús.

² Ta canyehe ra vatyí yihí ra cachicá noo chihin ra Jesús cachachí ra ta ña nacatya ra ndaha ra tari cuhva cha tahán chi cha costumbre. Yucuan chaha cacahan nyaa ra chi ra.

³ Vatyí ra fariseo ta tandihí ñu Israel cuan nyicón ca ñu costumbre sutu chahnu ñu, vatyí ma cachi ra tatu ma ndoo ndaha ra cuaha chaha tari cuhva costumbre iyó chi ñu.

⁴ Ta tatu nachaa coyo ñu cha chahan ñu nuyahví, ma cachi ñu tatu ma sacuví ñu cuhva cuan cha canacatya xaan ñu ndaha ñu. Ta iyó cuaha ca costumbre cha canyicón ñu. Iyó noo cuhva cha tahán chi nacatya ñu vasu, jarra, ta tandihí ndaha tyiño caa cha iyó chi ñu ta cama ñu ñandihí.

⁵ Tyicuan ta ra fariseo ta ra sacuahá cuenda ley cuan candaca tuhun ra chi ra Jesús, ta catyí ra:

—¿Ñáá tuhun ña sacuví ra nyicón chuun cuhva costumbre sutu chahnu yo? Vatyí ña nacatya ra ndaha ra tari cuhva tahán chi tatu cuacachi ra xita —catyí ra chi ra.

⁶ Ta cacahan ra Jesús, ta catyí ra:

—Ndicha cha cahan ra Isaías tuhun ndo vatyí sahá ndo tyi vaha ndo ta ña ndicha ndo. Catyí ra tyehe caa:

Ñáyiví ihya, chihin yuhu ri ñu catyí ñu tyi cuñí ñu chii.

Soco ñima chihin cha tandihí añima ñu, tyi sñn nu nyaá xiñi ñu.

⁷ Nahri maa tuhun cha sacahnú ñu chii, vatyí cha sañahá ñu chi tahan ñu, maa maa ri maa cuhva sañahá ñáyiví ri cuví, tyaa ra Isaías tuhun ndo.

8 Vatyí nyoho sandoó ndo cuhva catyí Nyoo, ta nanyicón ndo cuhva costumbre ñáyivi ri, tuhun cha nacatya xaan ndo ndaha tyiño ndo, ta cuaha cha tyicuan caa sacuví ndo.

9 Nyoho sanducaxijn ndo tuhun cha catyí Nyoo tyi sacuvi ndo, tacuhva vatyí cuvi sacuvi ndo costumbre cha iyó ndo.

10 Soco ra Moisés catyí ra nu ley cha tyaa ra: “Saha ndo ñáyivi chi sutu ndo ta chi sihi ndo.” Ta catyí tucu ra: “Tandihí ñu cha cahán ña vaha chi sutu o chi sihi ñu, tahán chi cúvi ñu.” catyí ra Moisés nu ley Nyoo.

11 Soco nyoho catyí ndo tyi noo ñáyivi cuvi catyí ñu chi sutu ñu o chi sihi ñu tyi ma cuvi tyinyee ñu chi ñu vatyí tandihí cha iyó chi ñu Corbán cuví. (Cuñí chi catyí: “Cha चाहि chi Nyoo cuví.”)

12 Ta tatu catyí ñu tyicuan caa, ña cuñí ca chi cha tyinyee ñu chi sutu ñu o chi sihi ñu catyí ndo.

13 Ta tyicuan caa sacuachiyó ndo tuhun cha catyí Nyoo tyi sacuvi ndo, vatyí cuñí ndo sacuvi ri maa ndo tuhun cha iyó ndo. Ta cuaha ca cha inuu ri caa sacuví ndo —catyí ra Jesús.

14 Tyicuan ta cana tucu ra Jesús chi ñáyivi ta catyí ra chi ñu:

15 —Tyasoho vaha tandihí ndo tuhun cahín, ta natyihí tuñi iñi ndo. Cha quihví yuhu ñáyivi ta chachí ñu, ña cuví sativi chi chi ñu. Soco cha quitá aña ñu, ican cuan sativi chi ñu.

16 Nyoho cha cutuñí iñi ndo, tyasoho ndo tuhun cahín —catyí ra Jesús chi ñu.

17 Tyicuan ta sandoo ra Jesús chi ñáyivi cuan, ta quihví ra chichi vehe. Ta ra cachicá noo chihin ra candaca tuhun ra chi ra ñáa cha cuñí chi catyí tuhun cuan.

18 Ta catyí ra Jesús chi ra:

—Tu tyicuan caa, ni nyoho, ña cutuñí iñi ndo. ¿Atu ña cutuñí iñi ndo vatyí cha quihví chichi yuhu yo ña sativi chi chi yo?

19 Vatyí ñima aña yo quihví chi, soco chichi yo. Ta yaha cuan ta quita chi chichi coño ñuhu yo —catyí ra Jesús.

Chihin cuan cuñí ra catyí ra vatyí tandihí nyayu ta vaha cachi yo.

20 Ta catyí tucu ra:

—Cha quitá aña ñáyivi, ican cuan sativi chi ñu.

21 Vatyí aña ñu quitá cha ña vaha chicá xiñi ñu, ta sacuví ñu cha ña vaha. Yihí ñu iyó ñu chihin rayi o chihin ñusihi ta ñima ñasihi ra cuví, ta ñima yihí ñu cuví. Yihí ñu casuhú ñu. Yihí ñu cachahñi ñu.

22 Yihí ra iyó ñasihi ra ta chicá noo ra chihin inga ñu. Yihí ñu quichi cuvi iñi ñu cha chii inga ñáyivi. Yihí ñu sacuví ñu cha quiñi caa. Yihí ñu sandaví ñaha ñu. Yihí ñu iyó viciu chi ñu. Yihí ñu nyiyo iñi ñu. Yihí ñu ñi ñu cuendu. Yihí ñu cahnu sahá ñu chi ñu. Yihí ñu ña chaa cha chiñi tuñi xiñi ñu.

23 Tandihí tuhun ña vaha ihya, quitá chi ityi chichi aña ñáyivi, ta sativi chi chi ñu —catyí ra chi ra.

Noo ñaha inga ñuu cha chino iñi chi ra Jesús

(Mt. 15.21-28)

24 Yaha cuan ta quita ra Jesús yucuan, ta cuahan ra ityi ñuu Tiro ta Sidón. Quihví ra chichi noo vehe ta ña cuñí ra cha coto ni noo ñáyivi, soco ña cuví tixehe nuu ra.

25 Ta sihi noo ñaha tyivaa cha yihí noo tatyí ña vaha aña, numi ri chito ña tuhun ra Jesús. Ta chaa ña ta chicuiñi chiti ña nuu ra.

26 Ñaha cuan, ñaha inga ñuu cuví ña, ñaha ñuu Sirofenicia cuví ña. Quichi ña ta chacú ndahvi ña nuu ra Jesús na tava ra tatyí ña vaha cha yihí aña sehe ña.

27 Soco catyí ra Jesús chi ña:

—Saña, nacachi xihna ca ñu Israel ñu cuví sehe Nyoo, vatyí ña vaha cha tinyaá yo pan chi sehe yo ta cuhva yo cachi ina —catyí ra Jesús chi ña.

28 Ta nacahan ña ta catyí ña:

—Ndicha, Tata, soco ina cuan chachí tucu ti yiquin cha canacoyo xiu mesa cuan —catyí ña chi ra.

29 Tyicuan ta catyí ra Jesús chi ña:

—Vaha nacahun. Ta cha cuenda cuan cuví cahun, vatyí tatyí ña vaha cha yaha quita chi aña sehe —catyí ra chi ña.

30 Ta cuhva cha nachaa ña vehe ña, catuví sehe ña nu chito, ta tatyí ña vaha cuan cha yaha quita chi cue.

Nu sanduvaha ra Jesús chi noo ra soho ta ñihi

³¹ Ta quita tucu ra Jesús ñuu Tiro, ta yaha ra ñuu Sidón, ta cuahan ra ityi ñuu cha canañí Decápolis, ta nachaa ra miñi Galilea.

³² Nu nyaá ra Jesús yucuan, quichí nyaca ñu chi noo ra soho ta ña cuví vaha cahán ra. Ta chacu ndahvi ñu nuu ra Jesús na tyiso ra ndaha ra siqui ra.

³³ Tava sñin ra Jesús chi ra ñin chiyo xiin, nu yori ñáyivi, ta tyihí ra nundaha ra chichi soho ra, ta tyaa sñi ra nu yaa ra.

³⁴ Yucuan ta nanyehe ndaa ra andivi. Ta naxita ra tatyí ra, ta catyí ra:

—¡Efata! —ta cuñí chi catyí: ¡Nuña! —catyí ra.

³⁵ Ta chihin cuan nuña soho ra soho cuan, ta nduvaha yaa ra, ta nacahan vaha ra.

³⁶ Ta catyí ra Jesús chi ñu tyi yori chihin cahan ñu tuhun, soco tatu catyí ra chi ñu tyicuan caa, ñihi ca canacatyí ñu.

³⁷ Ta iyo cuñí ñu ta catyí ñu:

—Tandihí ta vaha sacuví ra. Nyacua cuvi nacuiñi ñáyivi soho sahá ra ta cuví tucu nacahan ñáyivi ñihí ñandihí.

8

Nu chaha ra Jesús cha cachi cumi mil ñáyivi

(Mt. 15.32-39)

¹ Quivi cuan nataca tucu cuaha xaan ñáyivi. Ta ñahri maa cha cachi ñu iyó. Tyicuan ta cana ra Jesús chi ra cachicá noo chihin ra, ta catyí ra:

² —Cundahvi cuñí nyehi chi ñáyivi ihya, vatyí cha uñi quiivi nyicú ñu ihya chihin, ta ñahri maa cha cachi ñu iyó.

³ Tatu natachi chi ñu nya vehe ñu cucachi ñu, coto coña ñu ityi, vatyí yihí ñu cañi quichí coyo ñu —catyí ra Jesús chi ra.

⁴ Ta nacahan ra cachicá noo chihin ra, ta catyí ra chi ra:

—¿Soco yoso caa cuhva yo cha cachi ñu ihya, ta yori maa ñáyivi iyó ta xico ñu chi yo?

⁵ Ta ndaca tuhun ra Jesús chi ra, ta catyí ra:

—¿Yoso tahan pan nyisó ndo?

Ta cacatyí ra:

—Ucha tahan.

⁶ Ta catyí ra na cunyicu ñáyivi cuan nu ñuhú. Ta quehen ra ucha pan cuan, ta nacuhva ra tyahvi nyoo chi Nyoo. Yaha cuan ta tahvi sava ra pan cuan, ta chaha ra chi ra cachicá noo chihin ra, na casacha ra chi ñáyivi cuan.

⁷ Ta canyisó tucu ra suhva tiyaca nyihi. Ta nacuhva tucu ra Jesús tyahvi nyoo chi Nyoo, ta chaha ra chi ra na casacha ra.

⁸ Tandihí ñu cachachí ñu, ta cachitu chichi ñu. Ta casacutu ra ucha tahan tica chihin yiquin cha ndoo ca.

⁹ Ta cha cumi mil tahan ñu cachachí. Yaha cuan ta catyí ra Jesús chi ñu na cunuhu coyo ñu.

¹⁰ Ta quihvi ra chichi noo canoa chihin ra cachicá noo chihin ra. Ta cuahan coyo ra ityi Dalmanuta.

Nu cacatyí ra fariseo chi ra Jesús na sacuvi ra noo milagru

(Mt. 16.1-4; Lc. 12.54-56)

¹¹ Tyicuan ta cachaa coyo ra fariseo, ta quichaha cuvi yuhu ra chihin ra Jesus. Ta cacatyí ra chi ra na sacuvi ra noo milagru tatu ndicha cha Nyoo tachí chi ra. Tyicuan caa catyí ra vatyí cuñí ra nducu nyehe ra chi ra.

¹² Ta ra Jesús uhvi uhvi naxita ra tatyí ra, ta catyí ra:

—¿Ñáa tuhun cha chicán ñáyivi iyó vityin milagru? Cha ndicha catyí chi ndo vatyí ma sacuvi ni noo milagru nyehe ndo —catyí ra chi ra.

¹³ Tyicuan ta sandoo ra chi ra, ta nandihvi ra chichi canoa ta cuahan ra inga chiyo miñi.

Cuhva iyó ra fariseo tari yuchan iya cuvi, catyí ra Jesús

(Mt. 16.5-12)

¹⁴ Naa iñi ra cachicá noo chihin ra Jesús cacuiso ra cha cacachi ra. Ta noo pan ri ñohó chihin ra chichi canoa cuan.

¹⁵ Tyicuan ta catyí ra Jesús chi ra:

—Saha ndo cuenda chi ndo chihin yuchan iya ra fariseo ta ra Herodes —catyí ra chi ra.

¹⁶ Ta ra cachicá noo chihin ra quichaha cacatyí ra chi ra tahan ra:

—Cha cuenda vatyí ñahri pan nyisó yo, yucuan cuenda cahān ra tuhun cuan —catyí ra chi ra tahan ra.

¹⁷ Tuví iñi ra Jesús cha ndatuhún ra, ta catyí ra chi ra:

—¿Ñáá tuhun cha catyí ndo tyi ñahri pan nyisó ndo? ¿Atu ta cutuñi ca iñi nyoho? ¿Atu ta coto ca ndo? ¿Atu ni ndava xaan añima ndo?

¹⁸ Nyaá chiti nuu ndo, ¿atu ña nyehé ndo? Nyaá soho ndo. ¿Atu ña chiñi ndo? ¿Atu ña nicohon iñi ndo

¹⁹ quivi cha sachē ohon tahan pan cuan chi ndi ohon mil rayi? ¿Yoso tahan tica yiquin naquehen ndo? —catyí ra Jesús, ndacá tuhun ra chi ra cachicá noo chihin ra.

Ta maa ra cacatyí ra:

—Uchi uvi.

²⁰ Ta catyí tucu ra Jesús chi ra:

—Ta quivi sachē ucha tahan pan chi cumi mil ñu, ¿yoso tahan tica tyitu nacoñehe ndo?

Ta cacatyí ra:

—Ucha tahan.

²¹ Tyicuan ta catyí ra Jesús chi ra:

—¿Atu ta cutuñi ca iñi ndo? —catyí ra chi ra cachicá noo chihin ra.

Nu sanduvahā ra Jesús chi noo ra cuaa ñuu Betsaida

²² Yaha cuan ta chaā ra Jesús chihin ra cachicá noo chihin ra nya ñuu Betsaida. Ta quichi nyaca ñu chi noo ra cuaa. Ta cachacu ndahvi ñu nuu ra na tñn ra chi ra.

²³ Tyicuan ta tñn ra ndaha ra cuaa cuan, ta cuahan ra chihin ra ityi chata ñuu. Ta tyaa ši ra chiti nuu ra, ta tyiso ra ndaha ra siqui ra, ta ndacā tuhun ra chi ra tatu cuví nyehe ra chiin.

²⁴ Ra cuaa cuan nanyehe ra ta catyí ra:

—Nyehe in cahnu ri maa chi ñáyivi. Cuhva caa yutun caa ñu cahvi iñi, soco chicá ñu —catyí ra.

²⁵ Tyicuan ta tñn tucu ra Jesús chiti nuu ra inga chaha, ta maa ra nanyehe vaha ra ta nduvahā ra. Nanyehe cachi vaha ra tandihi.

²⁶ Tyicuan ta natachi ra Jesús chi ra ta catyí ra chi ra:

—Ma quihvun chichi ñuu ta ni yori chihin cahun tuhun.

Nu catyí ra Pedro vatyí ra Jesús cuví Cristo

(Mt. 16.13-20; Lc. 9.18-21)

²⁷ Yaha cuan ta chahan ra Jesús chihin ra cachicá noo chihin ra ñuu cha ca iyó Cesarea Filipino. Ta ityi cuahan ra, ta ndacā tuhun ra chi ra cachicá noo chihin ra, ta catyí ra:

—¿Ñáá catyí ñáyivi? ¿Yóó ra cuví yuhu? —catyí ra chi ra.

²⁸ Ta canacahan ra ta catyí ra:

—Yihí ñu catyí ñu tyi ra Juan ra sacondutyá chi ñáyivi cuvún. Inga ñu catyí ñu tyi ra Elías cuvún. Ta inga ñu catyí ñu tyi inga ra profeta Nyoo cuvún —cacatyí ra chi ra.

²⁹ Tyicuan ta ndacā tuhun ra chi ra, ta catyí ra:

—¿Ta nyoho, yóó ra cuví yuhu, cuñi tucu nyoho?

Ra Pedro catyí ra chi ra:

—Yoho cuví Cristo.

³⁰ Soco catyí ra Jesús chi tandihi ra tyi yori chihin cacahan ra tuhun cuan.

Nu cahan ra Jesus tuhun tyi cucúvi ra

(Mt. 16.21-28; Lc. 9.22-27)

³¹ Tyicuan ta quichaha sañaha ra vatyí Rayi cha quichi nya gloria cunyehe ra cuaha xaan tñdoho. Ta ra mandoñi ta ra cacuví nuu chi tata sutu ta ra casacuahá cuenda ley vehe ñuhu ma cuñi ra natñn cuenda ra chi ra. Catyí ra Jesús chi ra vatyí cucahñi ñu chi ra soco chichi cha cu uñi quivi cunandoto ra.

³² Catyí cachi ra chi ra tuhun ihya. Tyicuan ta tava šiñ ra Pedro chi ra ta quichaha catyí ra tyi ña vaha cha cahan ra cha tyicuan caa.

³³ Soco ra Jesús nanyocava ra, ta nanyehe ra chi inga ra cachicá noo chihin ra. Ta quichaha cahan ra chi ra Pedro ta catyí ra:

—¡Cuachiyo chuun nui, cuihna! Vatyí yoho ña chicá xiñun tari cuhva chicá xiñi Nyoo, soco tari chicá xiñi ñáyivi, chicá xiñun —catyí ra Jesús chi ra Pedro.

³⁴ Tyicuan ta canā ra Jesús chi ñáyivi ta chi ra cachicá noo chihin ra ta catyí ra chi ñu:

—Tatu nya ndo cuñi ndo cunyicon ndo chii, cuñi chi cahnya ndo iñi ndo tuhun maa ndo. Ta ma ndu uvi iñi ndo cha yihí ndo cuende vasi nyehe ndo tñdoho cha

cuende. Vatyí yucuan cuví cruzi cha tahán chi cuiso ndo.

³⁵ Vatyí nya ndo ña cuñí ndo cúvi ndo cha cuende, suri cha cúvi maa ndo cuvi, ta cuhun ndihí ndo anyaya. Soco nya ndo cuhva ndo ñayiví ndo cha cuende ta cha cuenda tuhun Nyoo, cucacu añima ndo.

³⁶ Tatu sacunaa ndo añima ndo anyaya, ¿ñáá ri tuhun cha saha ganaa ndo tandihí cha tyayí cha iyó siqui ñuhu ñayiví?

³⁷ Vatyí tatu sacunaa ndo añima ndo, ñahri maa cha iyó cha cuví cuhva ndo ta sacacu ndo añima ndo.

³⁸ Tatu nya noo ndo cucahan nuu ndo nyehe ndo chii, ta cucahan nuu ndo tuhun cahín nuu ñáyiví cha iyó cuatyí ta ña quichahá tuhun Nyoo, yuhu Rayí cha quichí nya gloria cucahan tucu nuu mai nyehí chi ndo quiví quichi tiqui chihin ángel cuenda Nyoo. Vatyí cuquichi chihin cha tyaquí maa Suti.

9

¹ 'Cha ndicha catyí chi ndo, vatyí yihí ndo cha nyicú ndo ihya, ma cúvi ñaha ndo nyacua nya nyehe ndo yoso caa nyacá ñaha Nyoo. Vatyí cuquichi chihin tunyee iñi ra —catyí ra Jesús.

Nu sañahá Nyoo yoso caa ra Jesús noo cha ndicha nu nyacá ñaha ra (Mt. 17.1-13; Lc. 9.28-36)

² Iñu quiví yaha ta cuahan ra Jesús noo yucu sucun. Ta ra Pedro, ra Jacobo, ta ra Juan ri cuahan coyo chihin ra. Ta yucuan nasamā cuhva caa nuu ra Jesús.

³ Nduxiño xaan sahma ra ta cuichin xaan nanduví. Yori maa siqui ñuhu ñayiví ihya cuví nacatya ta nducuichin tyicuan caa.

⁴ Ta cananyehe ra tyi nanyaá ra Elías ta ra Moisés, candatuhún ra chihin ra Jesús.

⁵ Tyicuan ta ra Pedro catyí ra chi ra Jesús: —Maestro, ¡vaha xaan cha nyicú ndi ihya! Na savaha ndi uñi tahan tiyahva: noo cha cuenda maun, ta noo cha cuenda ra Moisés, ta nonga cha cuenda ra Elías —catyí ra Pedro,

⁶ vatyí ña chitó ra ñáá tuhun cahán ra. Vatyí maa ra ta inga ra cayuhví ra.

⁷ Tyicuan ta noo xica noo vico siqui ra ta sahví chi ra. Ta chichi vico cuan tyacu noo ndusu cha catyí:

—Ican ihya cuví Sehi, ta cuñí xain chi ra. Tyasoho ndo tuhun cahan ra —catyí ndusu cuan.

⁸ Ta cuhva cha cananyehe ra, yori ca ra tayucú chihin ra, noo ri ca maa ra Jesús.

⁹ Cuhva cha cuanoo coyo ra yucu cuan, catyí ra Jesús chi ra tyi ma cacahan ra tuhun cha canyehe ra yucuan, soco nya yaha cha nandoto Rayí cha quichi nya gloria, tyicuan ta cuví cahan ra tuhun.

¹⁰ Yucuan chaha ña cacahan maa ra tuhun, vasi cacatyí ra chi tahan ra ñana vaha tuhun cuví cha cunandoto ra.

¹¹ Tyicuan ta quichahā candaca tuhun ra chi ra Jesús:

—¿Ñáá tuhun cha catyí ra casacuahá cuenda ley vehe ñuhu vatyí cuquichi xihna ca ra Elías?

¹² Ta nacahan ra, ta catyí ra:

—Cha ndicha vatyí xihna ca ra Elías nyaá quichi ta sanduvaha ra tandihí. ¿Ta yoso caa catyí tuhun Nyoo cuenda Rayí cha quichi nya gloria? Catyí chi tyi cunyehe ra tindocho, ta ma cuñi nyehe ñáyiví chi ra.

¹³ Soco yuhu catyí chi ndo tyi cha yaha quichí ra Elías. Ta sacuví maa ñáyiví cha cuñi ñu chihin ra, tari cuhva catyí nu tutu Nyoo cha cucuvi chi ra —catyí ra Jesús chi ra.

Nu sanduvahā ra Jesús chi noo ra tyivaa cha yihí noo tatyí ña vaha chi (Mt. 17.14-21; Lc. 9.37-43)

¹⁴ Yahā cuan ta nachaa coyo ra nu nyicú inga ra cachicá noo chihin ra Jesús. Ta canyehe ra tyi cuaha ñáyiví tayucú nicachico. Ta nyicú tucu ra sacuahá cuenda ley yucuan, ta cacuví yuhu ra chihin ra.

¹⁵ Tyicuan ta cha nanyehe ñu chi ra Jesús, tandihí ñu iyo cuñi ñu, ta cachino ñu chicuhva ñu nocumi chi ra.

¹⁶ Tyicuan ta ndacā tuhun ra Jesús chi ra cacuvi yuhu cuan ta catyí ra:

—¿Ñáá cuenda cuví yuhu xaan ndo? —catyí ra chi ra.

¹⁷ Ta noo ra nanyaá chichi cha cuaha ñáyiví yucuan, nacahan ra ta catyí ra:

—Maestro, ihya vachi nyaque chi sehi. Yihí noo tatyí ña vaha chi cue ta sacuñihí chi cue.

18 Vatyí tandihí ri nu t̄in tatyí cuan chi cue, sanduva chi cue nu ñuhú, ta yucuan quita t̄iñi yuhu cue ta cahñi noho cue. Ta ndundava cue. Cha catyí chi ra cachicá noo chuhun na tava ra tatyí ña vaha cuan, soco ña cacuví chi ra —catyí ra cuan chi ra Jesús.

19 Nacahan ra Jesús ta catyí ra:

—¡Nyoho ñu ña chinó iñi cuví ndo! ¿Yoso tahan ca quiví cunyai chihin ndo ta cunyei tisihi ndo nyacua nya cha cutuhva ndo ta chino iñi ndo chii?

Ta catyí ra chi ra cuan:

—Nyaca chi ra luhlu chiña tyehe —catyí ra.

20 Quichí nyaca ra chi ra luhlu cuan. Ta cuhva cha nanyehé tatyí cuan chi ra Jesús, quehen tatyí cuan chi cue. Ta nduvá cue nu ñuhú, sacañuhú cue chi cue, ta quita t̄iñi yuhu cue.

21 Tyicuan ta ndacā tuhun ra Jesús chi sutu cue:

—¿Ama quichaha cuvi chi ra tyehe caa? —catyí ra chi ra.

Ta nacahan sutu cue, ta catyí ra:

—Nyata luhlu ra.

22 Ta cuaha chaha tyihí tatyí ña vaha ihya chi cue nu cayú ñuhú, o nu ndutya. Cuñí chi cahñi chi chi cue. Soco tatu cuví chuun, cundahvi cuñi nyehun chi ndi, ta tyinyeun chi ndi —catyí sutu cue chi ra Jesús.

23 Ta catyí ra Jesús chi ra:

—Tatu chinó iñun, tandihí ta cuví cha cuenda ñu chino iñi —catyí ra Jesús.

24 Tyicuan ta sutu cue canachaā ra ta catyí ra:

—¡Chinó iñi! ¡Tyinyee chii na chino ca iñi! —catyí ra chi ra Jesús.

25 Cuhva cha nyehé ra Jesús tyi cuaha ñáyiví candu iñ ri, ta tavā ñehe ra chi tatyí ña vaha cuan, ta catyí ra:

—Yoho tatyí ña vaha cha sañihí ta sasohó chi cue ihya, catyí chuun, na quiton. Saña chi ra luhlu ihya, ta ma ndihvi con chi ra —catyí ra Jesús chi tatyí ña vaha cuan.

26 Ta tatyí cuan quiñi xaan canachaā ta na quisi chi chi cue inga chaha ta quita. Ta sandoq̄ tatyí cuan chi cue tari noo ndiyí. Ta cuaha ñu catyí vatyí cha chihí cue.

27 Soco t̄in ra Jesús ndaha cue, ta nacoñehé ra chi cue, ta nicuinanyaā cue.

28 Tyicuan ta quihv̄i ra Jesús noo vehe, ta ra cachicá noo chihin ra candacā tuhun ra chi ra ta catyí ra:

—¿Ñáá tuhun ña cuví tava ndi chi tatyí ña vaha cuan?

29 Ta catyí ra Jesús:

—Cha cuenda vatyí tahan tatyí ña vaha ihya, quitá, soco chihin cha ma cachi yo ta cacan tahvi yo chi Nyoo —catyí ra chi ra.

Nu cahán ra Jesús tuhun inga chaha vatyí cucúvi ra
(Mt. 17.22-23; Lc. 9.43-45)

30 Quiví cha quitā coyo ra yucuan, yahá coyo ra ityi Galilea. Ta ña cuñí ra Jesús cha coto ñáyiví.

31 Vatyí sañahá ra chi ra cachicá noo chihin ra. Ta catyí ra chi ra vatyí Rayī cha quichi nya gloria cunacuhva cuenda ñu chi ra ndaha ñáyiví. Ta cucahñi ñu chi ra, soco cha cu uñi quiví cunandoto ra.

32 Soco ña cacutuñí iñi ra tuhun cahán ra chihin ra. Ta cayuhv̄i ra candacā tuhun ra chi ra.

¿Yóo ra cahnu ca?
(Mt. 18.1-5; Lc. 9.46-48)

33 Tyicuan ta cachaā coyo ra ñuu Capernaum. Ta cuhva cha nyicú ra nya vehe, ra Jesús ndacā tuhun ra chi ra ta catyí ra:

—¿Ñáá tuhun cuví xaan yuhu nyoho ityi vachi yo? —catyí ra ndacā tuhun ra.

34 Taxi taxi cacuví ra, vatyí ityi vachi coyo ra, ta cacuví yuhu ra nya ra cuví ra ra cahnu ca.

35 Tyicuan ta chicunyā ra Jesús ta canā ra chi ndi uchi uvi ra chicá noo chihin ra, ta catyí ra chi ra:

—¿Nya ndo cuñí ndo cuvi ndo nuu, cuñí chi cha cuví ndo ra nu ndihí cha nuu tandihí ra, ta sacuvi ndo tyiño nuu tandihí ra? —catyí ra Jesús chi ra.

36 Tyicuan ta quehen ra chi noo ra cuehe luhlu ta chinanyaā ra chi cue mahñu ra. Ta tyihí sucun ndaha ra chi cue, ta catyí ra:

37 —Ñáyiví cha natīn cuenda chi noo ra cuehe luhlu chihin sivi, chi yuhu natīn cuenda ñu. Ta ñu natīn cuenda chii, ñima chi yuhu ri natīn cuenda ñu, soco chi ra cha tachí chii ñandihí.

Tatu ña cuahan ñáyivi siqui yo, tumañi ñi chi yo cuahan ñu

(Mt. 10.42; Lc. 9.49-50)

³⁸ Tyicuan ta catyí ra Juan chi ra Jesús:

—Maestro, nyehe ndi chi noo ra cuan ta chihin sivun tavá ñehe ra chi tatyí ña vaha. Soco vatyí ñima chihin yo chicá noo ra, catyí ndi chi ra tyi ma sacuvi ca ra —catyí ra Juan chi ra Jesús.

³⁹ Soco catyí ra Jesús chi ra:

—Ma casi ndo. Vatyí ni noo ra cha casacuvi milagru chihin sivi ta yaha cuan ta caña ñi ra cahan ña vaha ra siqui.

⁴⁰ Vatyí ñu cha ña cuahan siqui yo, tumañi ñi chi yo cuahan ñu.

⁴¹ Tatu cuhva noo ñu, vasi noo vasu ndutya coho ndo chihin sivi, cha cuenda vatyí ñu cuenda yuhu ra Cristo cuví ndo, cha ndicha vatyí cuñihi ñu cha cuacuhva Nyoo chi ñu.

Yica xaan cha sanacava yo chi noo yañi yo nu cuatyí

(Mt. 18.6-9; Lc. 17.1-2)

⁴² Tatu yóó ñu sanacava nu cuatyí chi noo ñu chinó ñi chii, vaha taxin ca cuhñi ñáyivi noo yuu sucun ñu ta tuchi ñu chi ñu cuan nu tyañuhu.

⁴³ Tatu ndahun sanacavá chuun nu cuatyí, vaha taxin ca cahnya. Vatyí vaha ca cha quihvun nu coun chihin Nyoo chihin cha luu ndahun ta ñima ca chihin cha ninduvi ndahun ta cuhun anyaya nu cayú ñuhú cha ma ndahva ca maa.

⁴⁴ Ta yucuan ña chihí tindacu chachí chi ñu, ta ñuhú ña ndahva maa ni noo chaha.

⁴⁵ Ta tatu chahun ta sanacavá chuun nu cuatyí, vaha taxin ca cahnya. Vatyí vaha ca cuhun nu coun chihin Nyoo chihin cha luu chahun ta ñima ca chihin cha ninduvi chahun ta tuchi Nyoo chuun anyaya. Vatyí yucuan ma ndahva ca maa ñuhú.

⁴⁶ Ta ña chihí tindacu chachí chi ñu, ta ñuhú ni noo chaha ña ndahva.

⁴⁷ Ta tatu noo chiti nuu sanacavá chuun nu cuatyí, vaha taxin ca tava. Vatyí vaha ca cha quihvun nu nyacá ñaha Nyoo chihin noo chiti nuu ta ñima ca chihin ninduvi chiti nuun ta tuchi Nyoo chuun anyaya.

⁴⁸ Vatyí yucuan ña chihí tindacu chachí chi ñu, ta ni noo chaha ña ndahva ñuhú.

⁴⁹ 'Soco tandihí ñu nyicon chii, tari cha cayú ñu chihin ñuhú tatu nyehe ñu tindoho cha cuende, vatyí chihin cuan cua sanduvaha Nyoo chi ñu, tari nduvaha nyayu chihin ñi.

⁵⁰ Ñi vaha xaan. Soco tatu ndihí cha uhva, ¿yoso caa cuví cotyiño yo inga chaha? Tyicuan caa tucu nyoho, ma sandihí ndo cha coo tuhun Nyoo aña ndo cha cuví tari ñi vaha. Tyicuan caa ta coo taxi ri ndo chihin tahan ndo.

10

Nu sañahá ra Jesús tyi ña vaha sandoo rayi chi ñasihí ra

(Mt. 19.1-12; Lc. 16.18)

¹ Quita ra Jesús Capernaum ta cuahan ra ityi Judea nya inga chiyo yutya Jordán. Yucuan candu ñn ri ñáyivi inga chaha nu nyaá ra, ta quichaha sañaha tucu ra chi ñu tari tuhvá maa ra.

² Tyicuan ta suhva ra fariseo catuhva ra nu nyaá ra Jesús, vatyí nducu ra cuhva tyaa ra cuatyí siqui ra. Ta candaca tuhun ra chi ra tatu vaha cha sandoo noo rayi chi ñasihí ra.

³ Tyicuan ta nacañan ra Jesús ta catyí ra: —¿Ñáa cha catyí ra Moisés tyi sacuvi ndo?

⁴ Ta canacañan ra ta cacatyí ra:

—Ra Moisés chaha ra cha cuví cahnya noo ra tutu cha tandaha ra tyicuan ta cuvi sandoo ra chi ñasihí ra —catyí ra chi ra.

⁵ Tyicuan ta catyí ra Jesús chi ra:

—Catyí ra Moisés cha sacuvi ndo tyicuan caa soco cha cuenda cha ndava aña ndo.

⁶ Soco quivi xihna ri, quivi savaha Nyoo tandihí maa, savaha ra rayi ta ñaha sihi.

⁷ “Yucuan cuenda sandoó rayi chi sutu ra ta chi sihi ra vatyí ndu ñn ri ra chihin ñasihí ra.

⁸ Ta chichi cha ninduvi tahan ñu cucuvi ñu tari cha noo ri ñáyivi.” Yucuan chaha ñima ca uvi tahan cuví ñu, soco cha nanduví ñu noo ri ñáyivi.

⁹ Yucuan chaha, ña tahan chi cha sasñn ñáyivi cha sandu ñn ri Nyoo —catyí ra Jesús chi ra.

¹⁰ Yaha cuan ta nachaa coyo ra nya vehe, ta quichaha ndaca tuhun ra cachicá noo chihin ra inga chaha siqui tuhun cuan.

¹¹ Ta catyí ra Jesús chi ra:

—Ra cha sandoó ñasihí ta tandaha ra chihin inga ñu, chicoó cuatyí ra vatyí ña vaha sacuvi ra chihin ñasihí ra, ñaha cha xihna ri cuan.

¹² Ta tyicuan caa tucu ñusihí. Tatu sandoó ñu chi yí ñu ta tandaha ñu chihin inga ra suri chicoó tucu cuatyí ñu —catyí ra Jesús.

*Nu nasoco ra Jesús chi ra cuatyaa
(Mt. 19.13-15; Lc. 18.15-17)*

¹³ Tyicuan ta quichi nyaca ñu suhva ra cuatyaa chi ra Jesús tacuhva natyiso ra ndaha ra siqui ndotyín. Soco ra cachicá noo chihin ra ña chahá ca ra cha quichi nyaca ñu chi ndotyín.

¹⁴ Soco cuhva cha nanyehé ra Jesús, cuxaan ra. Ta catyí ra chi ra:

—Saña ndo. Na quichi nyaca ñu chi ra cuatyaa nu nyaí. Ta ma casi ndo. Vatyí ñu nyacá ñaha Nyoo añima, cuví ñu chinó iñi chi Nyoo tari chinó iñi ra cuatyaa ihya.

¹⁵ Cha ndicha catyí chi ndo vatyí tatu ma nacuhva cuenda ndo chi ndo chi Nyoo tari noo ra cuatyaa chihin sutu ndotyín, ma cuví quihvi ndo nu nyacá ñaha Nyoo —catyí ra Jesús chi ra.

¹⁶ Ta quehen ra chi noo noo ndotyín ta tyihí sucun ndaha ra. Ta tyiso ra ndaha ra siqui ndotyín, ta chican tahvi ra chaha ndotyín.

Nu ndatuhún minoo ra tyivaa tyayí chihin ra Jesús

(Mt. 19.16-30; Lc. 18.18-30)

¹⁷ Yahá cuan ta cuahan ra Jesús. Ta chingo vavaha noo ra cuan chata ra ta chicuiñi chiti ra nuu ra, ta ndaca tuhun ra chi ra, ta catyí ra:

—Maestro, ra vaha cuvún. ¿Yoso caa sacuvi ta ñihí ñayivi cha ma naa ca maa coi? —catyí ra chi ra Jesús.

¹⁸ Ta catyí ra Jesús chi ra:

—¿Yoso caa chitón tyi vahi? Noo ri ra vaha iyó, ta ican ra cuan cuví Nyoo. (Ta cha catyún tyi vahi, nacotón tyi Nyoo cuví.)

¹⁹ Yoho cha chitón cha catyí Nyoo cha sacuvi yo: “Ma coun chihin inga ñusihí tatu ñima ñasihun cuví. Ma cahñun. Ma suhun. Ma cahun cuendu siqui ni noo ñu. Ma sandavi ñahun. Sahun ñáyivi chi sutun ta chi sihun” —catyí ra Jesús chi ra.

²⁰ Ta nacahan ra cuan ta catyí ra:

—Maestro, tandihí ihya cha sacuvi nyata luhli —catyí ra.

²¹ Tyicuan ta cusí cuñí ra Jesús nanyehé ra chi ra. Ta catyí ra chi ra:

—Cumañi noo ri ca cha cumañi chuun. Cuahan ta xicon tandihí cha iyó chuun ta cuhvon chi ñu ndahvi. Tyicuan ta coo cha tyayíun nya andivi. Yaha cuan ta quichun cunyicon chii vasi nyehún tindocho —catyí ra Jesús chi ra.

²² Soco cha chiñi ra tuhun cahan ra Jesús tyehe caa, nducuihya iñi ra, ta cuihya xaan cuanuhu ra vatyí tyayí xaan ra.

²³ Tyicuan ta nanyehé ra Jesús nicachico chata ra, ta catyí ra chi ra cachicá noo chihin ra:

—¡Nana cha yí ta cuvi nacuhva cuenda ñu tyayí chi ñu na cunyaca ñaha Nyoo chi ñu! —catyí ra chi ra.

²⁴ Iyo cacuñí ra cachicá noo chihin ra tuhun cahan ra. Soco catyí ra Jesús chi ra inga chaha:

—Sehi, ñu cha tyaa xaan xiñi cha tyayí, iyí xaan quihvi ñu nu nyacá ñaha Nyoo!

²⁵ Tañi tyehe yaha noo camellu xiu noo yiquí ticu, ta ñima ca cha cuhva noo ñu tyayí cunyacá ñaha Nyoo chi ñu —catyí ra Jesús.

²⁶ Cha cachiñi ra tuhun ihya, iyo xaan cacuñí ra, ta candaca tuhun ra chi ra tahan ra, ta catyí ra:

—Tu tyicuan caa, ¿yóo cha cuví cacu añima? —catyí ra.

²⁷ Nanyehé ra Jesús chi ra ta catyí ra chi ra:

—Ñáyivi ña cuví sacuvi ñu ihya. Soco Nyoo cuví chi ra. Vatyí cha cuenda Nyoo ñahri cha yí sacuvi ra.

²⁸ Tyicuan ta catyí ra Pedro chi ra:

—Sutu Mañi yuhu, nyuhu sandoo ndi tandihí cha iyó chi ndi, ta vityin nyicón ndi chuun.

²⁹ Nacahan ra Jesús ta catyí ra:

—Cha ndicha catyí chi ndo vatyí tandihí ñu sandoo vehe, o yañi, o cuhva, o sutu, o sihi, o ñasihí, o sehe, o ñuhú, cha cuenda yuhu ta cha cuenda cha sacoto ñu chi ñáyivi tyi cuñí Nyoo sacacu ra chi ñu,

³⁰ cuañihi ñu ciento chaha siqui cha sandoo ñu ihya ñuhu ñayivi. Cuañihi ñu vehe ta

yañi ñu, ta cuhva ñu, ta sihi ñu, ta sehe ñu, ta ñuhú, vasi sanyehe ñáyivi tindocho chi ñu. Soco inga ñáyivi cha vachi, cuñihi ñu ñáyivi cha ma naa ca maa.

³¹ Soco cuaha xaan ñu cha cuvi nuu vityin, ñu nu ndihi cucuvi ñu. Ta cuaha xaan ñu cuví ñu nu ndihi vityin, ican ñu cucuvi nuu —catyí ra Jesús.

Nu cahán ra Jesús inga chaha tyi cucúvi ra
(Mt. 20.17-19; Lc. 18.31-34)

³² Cuahan coyo ra ndaa ra ityi cuahan ñuu Jerusalén, ta ra Jesús cuahan ra ityi nuu ñu nyicón chi ra. Ta maa ñu iyo cuñí ñu ta chihin cha yuhví ñu cuahan coyo ñu chata ra. Tyicuan ta cana siñ ra chi ndi uchi uvi ra cachicá noo chihin ra. Ta quichaha catyí ra cha cucuvi chi ra.

³³ Ta catyí ra:

—Tari cuhva nyehé ndo vityin, cua ndaa yo ityi cuahan ñuu Jerusalén nu cucuhva cuenda ñu chi yuhu Rayi cha quichi nya gloria chi ra cuví nuu chi tata sutu, ta chi ra sacuahá cuenda ley vehe ñuhu. Ta cucatyí ra tyi cucúvi ta cucuhva cuenda ra chii chi ra inga ñuu.

³⁴ Ta cucuacu nyaa ra chii, cucañi ra chii, cutyicu siñ ra chii. Ta cucahñi ra chii. Soco cha cu uñi quivi cunandote cha yaha cúvi —catyí ra Jesús.

Nu cachicān ra Jacobo ta ra Juan noo tumañi iñi chi ra Jesús
(Mt. 20.20-28)

³⁵ Tyicuan ta ra Jacobo ta ra Juan, ra cacuví sehe ra Zebedeo, catuhva ra nu nyaá ra Jesús, ta catyí ra chi ra:

—Maestro, cuñí ndi cha sañun noo tumañi iñi chi ndi —catyí ra.

³⁶ Ta ndacañ tuhun ra Jesús chi ra:

—¿Ñáá cha cuñí ndo cha sacuvi cha cuenda ndo?

³⁷ Ta canacahan ra ta catyí ra:

—Cuhva cha cunyaa ndi chuhun nu nyacá ñahun, noo ndi chiyo vahun, ta inga ndi chiyo satyun —catyí ra chi ra Jesús.

³⁸ Tyicuan ta catyí ra Jesús chi ra:

—Nyoho ña chitó ndo cha chicán ndo. ¿Atu cuví nyehe nyoho tindocho cha cuanyehe yuhu? ¿Atu cuví cuhun ndo tuhun chihí tari cuhun yuhu? —catyí ra chi ra.

³⁹ Ta canacahan ra:

—Cuví chi ndi.

Ta ra Jesús catyí ra:

—Cha ndicha vatyí cunyehe ndo tindocho ta cuhun ndo tuhun chihí tari cuhun yuhu.

⁴⁰ Soco tuhun cha cunyaa ndo chiyo vahi ta chiyo satyun, ñima yuhu tahañ chi cuhve chi ndo, soco maa Nyoo cucatyí yóó cha cuñihi nyatu cuan —catyí ra Jesús chi ra.

⁴¹ Cha cachihñi uchi ca tahan ra chicá noo chihin ra Jesús tuhun cuan, cacuxaan ra chihin ra Jacobo ta ra Juan.

⁴² Soco cana ra Jesús chi ra ta catyí ra chi ra:

—Chitó nyoho vatyí ra canyacá ñaha chi ñáyivi siqui ñuhu ñáyivi, ñihi xaan yosó ra siqui ñu.

⁴³ Soco ñima tyicuan caa tahañ chi sacuvi nyoho. Vatyí ra cuñí cucahnu ca, cuñí chi cuvi ra musu tandihí ca ndo.

⁴⁴ Ta nya nyoho cha cuñí ndo cuví ndo nuu, cuñí chi cuvi ndo musu tandihí ca ñu.

⁴⁵ Vatyí ni ri yuhu Rayi cha quichi nya gloria ta ña vachi vatyí sacuvi ñáyivi tyiño nui. Soco vachi vatyí sacuvi tyiño nuu ndo. Ta vachi vatyí cuhve ñáyivi tari noo cha cutyiyahvi ta cusacaqui cuaha ñáyivi —catyí ra Jesús.

Nu sanduvaha ra Jesús chi ra Bartimeo ra cha cuaa

(Mt. 20.29-34; Lc. 18.35-43)

⁴⁶ Tyicuan ta cachaa coyo ra ñuu Jericó. Ta cua yaha ri ra ñuu cuan. Ta cuhva cha quita ra Jesús ñuu cuan cuaha xaan ñáyivi cuahan chata ra, ñn ri chihin ra cachicá noo chihin ra. Ta yucuan nyaá noo ra cuaa cha nañi Bartimeo. Sehe ra Timeo cuví chi ra. Nyaá ra cuan yatyin ri yuhu ityi cuan, chicán ra caridaa.

⁴⁷ Ta cha chihñi ra cuaa cuan tyi cua yaha ra Jesús ra ñuu Nazaret, quichaha cana chaa ra, ta catyí ra:

—¡Yoho Jesús, ra vachi tata ra David, cundahvi cuñi chii! —catyí ra canachaá ra.

⁴⁸ Cuaha ñu chasi yuhu ra na cutaxin ra, soco maa ra ñihi ca cana chaa ra ta catyí ra:

—¡Yoho ra vachi tata ra David, cundahvi cuñi chii! —catyí ra.

⁴⁹ Tyicuan ta chicuñi ra Jesús ta catyí ra:

—Cana ndo chi ra.

Ta cacana ra chi ra cuaa cuan ta catyí ra chi ra:

—Sanii iñun. Nducuita, vatyi caná ra chuun —cacatyí ra chi ra.

⁵⁰ Tyicuan ta tuchi ñihno ra sahma ndichi ra. Ta ndava ra noo ta tuhva ra nuu nyaá ra Jesús.

⁵¹ Tyicuan ta quichaha ndaca tuhun ra Jesús chi ra:

—¿Ñáa cha cuñún cha sacuvi chuhun?

Ta nacahan ra cuaa cuan ta catyí ra:

—Maestro, cuñi cha sanduvahun chiti nui —catyí ra.

⁵² Ta catyí ra Jesús chi ra:

—Cuahan. Cha nduvahun vatyi chinó iñun chii.

Ta caa cuhva ri cuan cuví nanyehe ra cuaa cuan. Ta cuahan ra chata ra Jesús ityi cuahan ra.

11

Nu quihvi ra Jesús ñuu Jerusalén

(Mt. 21.1-11; Lc. 19.28-40; Jn. 12.12-19)

¹ Cachaa coyo ra yatyin ri ñuu Jerusalén, nu nyaá ñuu Betfagé ta ñuu Betania. Ta yucu yutun Olivo nyaá ityi nuu chiin ca. Tyicuan ta catyí ra Jesús chi uvi ra chicá noo chihin ra:

² —Cuahan ndo chichi ñuu cha nyaá ityi nuu chiña. Ta nu cua chaa ndo cunañihi ndo noo burru chaa nuhñi ti, quití ta quíhi ca tyayu cuví ti. Ndachi ndo chi ti, ta quíchi nyaca ndo chi ti.

³ Ta tatu yóo cha ndaca tuhun ñáa tuhun sacuví ndo tyicuan caa, catyi ndo chi ñu vatyi chiñuhú ti chi ra nyacá ñaha, ta numi ri cunanyaca ndo chi ti, catyi ndo chi ñu —catyí ra Jesús chi ra.

⁴ Tyicuan ta cuahan coyo ra, ta canañihi ra burru cuan nuhñi ti ityi cahnu yatyin ri noo yuvehe, ta candachi ra chi ti.

⁵ Ta suhva ra canyicú cuan catyí ra chi ra:

—¿Ñáa cha nyacuvi ndo? ¿Ñáa tuhun cha ndachí ndo burru chiña? —catyí ra chi ra.

⁶ Tyicuan ta canacahan ra tari cuhva cha catyi ra Jesús chi ra. Ta cachaha ra cuhun coyo ra.

⁷ Tyicuan ta caquehen ra burru cuan ta chinyaca ra chi ra Jesús. Ta catyiso ra sahma ra siqui ti, ta ndaa ra Jesús chi ti.

⁸ Ta cuaha ñu ndica ñu sahma ñu ityi cuahan ra, ta inga ñu chahnu ñu soco numa ta cachacun ñu.

⁹ Tyicuan ta ñu cha cuahan ityi nuu ra ta ñu cha cuahan ityi chata, quichaha cana chaa ñu ta catyí ñu:

—¡Cahnu xaan cuví Nyoo! ¡Na sacahnu yo chi ra vachi cuenda Sutu yo Nyoo!

¹⁰ ¡Sacahnu yo chi ra vachi nyacá ñaha tari chinyaca ñaha sutu chahnu yo ra David! ¡Cahnu xaan ca cuví ra nyaá andivi! —catyí ñu.

¹¹ Tyicuan ta quihvi ra Jesús chichi ñuu Jerusalén, ta cuahan ra vehe ñuhu cahnu. Ta cha yaha nanyehe ra ityi cuan ityi ihya, ndaca chata ra ñuu Betania chihin ndi uchi uvi ra chicá noo chihin ra vatyi cha iñi.

Nu soco ra Jesús chi yutun higo cha ñahri chiti iñi nuu tun

(Mt. 21.18-19)

¹² Cha inga quivi quita coyo ra ñuu Betania cuan, ta cha ni ri ca cha cuahan ra chicá ityi ra chaa noo soco chi ra Jesús.

¹³ Ta nyasava ri nanyehe ra noo tu higo cha nyaá numa. Ta chahan ra chinyehe ra tatu iñi chiti nuu tun, soco maa maa ri numa ri iñi, vatyi ta chaa ca quivi quita chiti tun.

¹⁴ Tyicuan ta cahan ra Jesús chihin tun, ta catyí ra chi tun tyehe caa:

—Ma coo ca chiti cachi ñáyivi nuun —catyí ra chi tun.

Ta ra cachicá noo chihin ra cachiñi ra cha cahan ra.

Nu tava ñehe ra Jesús chi ra caxicó chichi vehe ñuhu cahnu

(Mt. 21.12-17; Lc. 19.45-48; Jn. 2.13-22)

¹⁵ Yaha cuan ta nachaa coyo ra Jerusalén. Ta quihvi tucu ra Jesús chichi vehe ñuhu cahnu. Ta quichaha tava ñehe ra chi ra caxicó ta ra casatá yucuan. Sanduva ra mesa ñu canasamá xuhun chi ñáyivi. Ta suri tyicuan caa sacuvi ra chihin tyayu ra caxicó paloma.

¹⁶ Ta ña chaha ca ra ca cuiso ñu ñáa cha cuiso ñu ityi chichi vehe ñuhu cuan.

¹⁷ Ta quichaha sañaha ra chi ñu, ta catyí ra:

—Nu tutu Nyoo catyí chi: “Vehi, vehe nu chicán tahvi tandihi ñáyivi iyó siqui ñuhu ñáyivi cuví”, catyí Nyoo. ¡Soco nyoho

nasahá ndo vehe nu nyicú ra suhu! —catyí ra Jesús.

¹⁸ Ta ra cacuví nuu chi tata sutu ta ra casacuahá cuenda ley vehe ñuhu cachiñi ra cha cahán ra, ta quichaha canducu ra cuhva cha cacahñi ra chi ra vatyí cayuhví ra chi ra tyi cha tandihí ñáyivi iyo cuñi ñu cha sañahá ra.

¹⁹ Soco cuhva cha cua cuaa ra Jesús quitá ri ra ñuu cuan chihin ra cachicá noo chihin ra.

*Nu na ityi tu higo cha soco ra Jesús
(Mt. 21.20-22)*

²⁰ Cha ñaha ri cha inga quivi cuan, nayaha coyo ra nu nanyaá tu higo cuan. Ta cananyehe ra vatyí na ityi nyacua nya yoho tun.

²¹ Tyicuan ta nichon ñi ra Pedro vatyí soco ra Jesús chi tun ta catyí ra chi ra Jesús:

—Maestro, nyehe tu higo cha soco, cha na ityi tun —catyí ra.

²² Nacahan ra Jesús, ta catyí ra:

—Chino ñi ndo chi Nyoo.

²³ Vatyí cha ndicha catyí chi ndo vatyí nya nyoho catyí ndo chi yucu ihya, “Na canyaha ta cuhun nu tyañuhu”, ta tatu ña chicá uvi ñi ndo, ta chinó ñi ndo, tuhun cahan ndo cua cuvi.

²⁴ Yucuan chaha catyí chi ndo vatyí tandihí cha chicán tahvi ndo, ta tatu chinó ñi ndo tyi cha naquehen ndo, tyicuan caa cucuvi.

²⁵ Ta tatu chicán tahvi ndo chi Nyoo ta cuxaán ndo chi inga ñu, saha ndo ticahnu ñi chi ñu, tacuhva vatyí Sutú ndo, ra nyaá andivi, saha tucu maa ra ticahnu ñi cuatyí ndo.

²⁶ Soco tatu ña sahá ndo ticahnu ñi chi ñu, ni ri Sutú ndo, ra nyaá andivi, ma saha ra ticahnu ñi cuatyí maa ndo.

*Yóo cha chaha ityi chi ra Jesús vatyí
sacuvi ra cha sacuví ra
(Mt. 21.23-27; Lc. 20.1-8)*

²⁷ Tyicuan ta nachaa coyo ra Jerusalén. Ta cha niri ca cha chicá noo ra Jesús chichi vehe ñuhu cahnú cuan, catuhva ra cacuví nuu chi tata sutu, ta ra sacuahá cuenda ley, ta ra cacuví mandoñi nu nyaá ra.

²⁸ Ta candaca tuhun ra chi ra.

—¿Yóo cha tyaa tyiño chuun vatyí sacuvun tyehe caa? ¿Yóo cha chaha ityi chuun vatyí sacuvun? —cacatyí ra.

²⁹⁻³⁰ Ta nacahan ra Jesús, ta catyí ra:

—Cua ndaca tuhun tucu yuhu noo tuhun chi ndo. ¿Yóo cha tachí chi ra Juan vatyí sacondutya ra chi ñáyivi? ¿Atu Nyoo tachí chi ra, o ñáyivi? Tatu catyí ndo chii, tyicuan ta cua catyí tucu yuhu chi ndo yóo cha tyatyíño ihya chii —catyí ra Jesús chi ra.

³¹ Tyicuan ta quichaha cacuvi yuhu maa ra chihin tahan ra ta cacatyí ra:

—Tatu catyí yo tyi Nyoo tachí chi ra Juan, cucatyí ra chi yo: “Tu tyicuan caa, ¿ñáá tuhun ña chino ñi ndo chi ra?”

³² ¿Ta yoso caa catyí yo tyi ñáyivi tachí chi ra? Ma cuvi —cacatyí ra, vatyí cayuhví ra chi ñáyivi, vatyí tandihí ñu cachinó ñi ñu vatyí cha ndicha cuenda Nyoo cahan ra Juan.

³³ Tyicuan ta quichaha cacatyí ra chi ra Jesús:

—Ña chitó ndi.

Tyicuan ta ra Jesús catyí ra chi ra:

—Ni yuhu ma catyí chi ndo yóo cha tyaa tyiño chii tyi sacuvi cha sacuví —catyí ra Jesús chi ra.

12

*Nu chaha ra Jesús noo cuhva yoso caa
cucahñi ñu chi ra*

(Mt. 21.33-46; Lc. 20.9-19)

¹ Tyicuan ta chihin cuhva ihya quichaha cahan ra Jesús chihin ra, ta catyí ra chi ra:

—Chiyó noo ra cha tachí ra yoho tichaha ndivi. Ta chasi ra chaha. Ta savaha ra noo nu cuhñi ra tichaha ndivi. Ta savaha ra noo vehe sucun tacuhva vatyí cuví saha ra cuenda tandihí.

Yaha cuan ta chaha noo ra ñuhú cuan chi suhva ra casahá tyiño. Ta cuahan ra inga ñuu.

² Ta cha chaa quivi iyó chiti yoho cuan, chitoho ñuhú cuan tachí ra noo musu nu nyicú ra casahá tyiño cuan vatyí cacán ra suhva chiti cha tahán chi chi ra.

³ Soco catin ra chi ra. Ta cacañi ra chi ra. Ta canatachí ra chi ra chihin nu ndaha nu ndii ra.

⁴ Tyicuan ta chitoho ñuhú cuan tachí ra chi inga musu, soco chi ra ihya catuchí ra

yuu chi ra, catahvi ra xiñi ra, ta cacahan uhvi ra chi ra.

⁵ Ta inga tucu musu tachi chitoho ñuhú cuan. Ta chi ra cuan cachahñi ra. Yahá cuan ta tachi ra cuaha ca ra. Soco cacañi ra chi suhva ra. Ta chi suhva ca ra cachahñi ra.

⁶ Ta ndoo noo ri ca ra cha cuví tachi chitoho ñuhú cuan. Ican cuví sehe ra cha cuñi xaan ra. Ta nu ndihí tachi ra chi sehe ra vatyí cuñi maa ra chicá xiñi ra: “Cucasaha ra ñáyivi chi sehi”, cuñi ra chicá xiñi ra.

⁷ Soco nu chaá sehe ra, ra casahá tyiño cuan catyí ra chi tahan ra: “Ican ra ihya cundoo chihin tandihí ihya. Na cahñi yo chi ra, ta ndoo maa yo chihin”, catyí ra.

⁸ Ta tyicuan caa catiñ ra chi ra ta cachahñi ra chi ra. Tyicuan ta cachituchi ra coño ñuhu ra ityi chata chacu cuan —tyicuan caa cuhva cahan ra Jesús chihin ra cuan.

⁹ Tyicuan ta ndacá tuhun ra Jesús chi ra ta catyí ra:

—¿Ñáá cha cusacuvi ra cuví chitoho ñuhú cuan? Cuquichi ra ta cucahñi ra chi ra casahá tyiño cuan. Ta cuhva ra ñuhú cuan chi inga ra.

¹⁰ ¿Atu ta sacuaha ca nyoho nu tutu Nyoo nu catyí chi tyehe caa?

Yuu cha ña cacuñi ra casavaha vehe cotyiño ra,

ican cuan cuví yuu cha niñi ca.

¹¹ Ican ihya cuví cha sacuvi Sutu yo Nyoo. Ta tyaqui xaan tuhun cha cuenda chi yo, catyí chi nu tutu Nyoo —catyí ra Jesús chi ra cacuví nuu chi tata sutu cuan.

¹² Tyicuan ta canducu ra cuhva cha tyihi ra chi ra Jesús vehe caa vatyí cachitó ra vatyí cahan ra cuhva ihya soco cha cuenda maa ra. Soco vatyí cayuhví ra chi ñáyivi, casandoo ra chi ra, ta cuahan coyo ra.

Nu ndacá tuhun ra chi ra Jesús cha cuenda xuhun cha tavá gobiernu ñuu Roma (Mt. 22.15-22; Lc. 20.20-26)

¹³ Tyicuan ta catachi ra suhva ra cuenda ra Herodes ta suhva ra fariseo nu nyaá ra Jesús vatyí casacahan ra chi ra ta coo cuatyí catyaa ra siqui ra.

¹⁴ Chaá coyo ra ihya ta quichaha catyí ra chi ra Jesús:

—Maestro, chitó ndi vatyí cahún cha ndicha, ta ña quichahún cha cahán ñáyivi, ta ña natíin cuendon cuhva caa ri ñu. Ta ndicha sañahún ityi Nyoo. Yucuan chaha cuñi ndi coto ndi, ¿atu vaha cha tyiyahvi yo cha chicán gobiernu ñuu Roma chi yo, o ña vaha? ¿Atu tahán chi cha tyiyahvi yo, o ña tahán chi? —cacatyí ra chi ra Jesús.

¹⁵ Soco ra Jesús chitó ra vatyí ñima cha vaha chicá xiñi ra, ta catyí ra chi ra:

—¿Ñáá tuhun cha cuñi ndo sandavi ñaha ndo chii? Nyaca ndo noo xuhun chii, na nyehi —catyí ra.

¹⁶ Caquichi nyaca ra chi ra. Ta cuhva cha nanyehe ra ta ndacá tuhun ra chi ra, ta catyí ra:

—¿Yóó chi nuu ihya, ta yóó chi sivi nyaá ihya? —catyí ra chi ra.

Ta canacahan ra ta cacatyí ra:

—Chi gobiernu.

¹⁷ Tyicuan ta catyí ra Jesús chi ra:

—Cuhva ndo chi gobiernu cha tahán chi chi ra. Ta cuhva tucu ndo chi Nyoo cha tahán chi Nyoo —catyí ra Jesús chi ra.

Ta iyo cacuñi ra tuhun cha nacahan ra.

Nu canducu tuhun ra saduceo siqui tuhun cha nandotó ndiyi

(Mt. 22.23-33; Lc. 20.27-40)

¹⁸ Tyicuan ta cuahan coyo suhva ra saduceo nu nyaá ra Jesús. Ican ra saduceo ihya catyí ra vatyí ña nandotó ndiyi. Yucuan chaha cacahan ra tyehe caa ta catyí ra chi ra Jesús:

¹⁹ —Maestro, tyaa ra Moisés tuhun yoso caa tahán chi sacuvi yo tatu noo rayi ta chihí ra ta ndoo ñasihí ra soco ña chicoo sehe ra chihin ña. Catyí ra vatyí tahán chi tandaha yañi ra chihin ñaha cha chihí yí cuan, tacuhva vatyí coo sehe ña cha cuenda ndi yañi ra.

²⁰ Noo chaha chiyo ucha tahan ra chihin yañi ra. Ra cha xihna ri tandaha ra chihin noo ña, ta yori sehe ra chicoo.

²¹ Ta ra cu uvi tandaha ra chihin ñaha cha ndoo cuan. Ta suri chihí ra. Ta suri yori sehe ra chicoo. Ta tyicuan caa tucu cuví chihin ra cu uñi cuan.

²² Ta tyicuan caa ndi ucha tahan ra tandaha chihin ña. Ta ni noo ra ña cachiyo

sehe ra chihin ña. Ta nu ndihí tuhun, chihí ndihí maa ña.

²³ Ta vityin, quiví cunandoto ñáyiví, ¿nya ra cucuvi yí ña? Vatyí ndi ucha tahan ra cuan chiyo chihin ña —cacatyí ra chi ra Jesús.

²⁴ Tyicuan ta nacahan ra Jesús ta catyí ra chi ra:

—Nyoho cahán tondo ri maa ndo, vatyí ña chitó ndo cha nyaá nu tutu tuhun Nyoo. Ta ni ña chitó ndo yoso caa tunyee iñi Nyoo.

²⁵ Vatyí quiví cunandoto ndiyí, ni ma tandaha ñu ta ni ma cuhva ñu sehe ñu tandaha, vatyí tari ángel cha nyaá andiví tyicuan caa cucuvi ñu.

²⁶ Ta tuhun cha nandotó ndiyí cuan, ¿atu ta sacuaaha ca ndo nu libru ra Moisés yoso caa cahan Nyoo chihin ra nu cayú taca iñu cuan? Ta tyehe caa catyí ra chi ra: “Yuhu cuví Nyoo cuenda ra Abraham, ta cuenda ra Isaac, ta cuenda ra Jacob”, catyí Nyoo chi ra Moisés.

²⁷ Ta cha catyí Nyoo tyicuan caa cuñí chi catyí vatyí vasi cha naha cachihí ra, soco canyitó añima ra vatyí Nyoo ñima Nyoo cuenda ñu ndiyí cuví ra, soco Nyoo cuenda ñu nyitó cuvi ra. Yucuan chaha catyí vatyí nyoho cahán tondo ri ndo —catyí ra Jesús chi ra.

Ley cha niñi ca cha chaha Nyoo
(Mt. 22.34-40)

²⁸ Chaa tucu noo ra sacuahá cuenda ley vehe ñuhu cuan, ta chiñi ra cacuví yuhu ra. Ta vatyí chitó ra vatyí ra Jesús vaha nacahan ra nu cacahan ra yucuan, ta ndaca tuhun ra chi ra ta catyí ra:

—Chichi cha tandihí ley, ¿nya cha niñi ca sacuvi yo? —catyí ra.

²⁹ Ta nacahan ra Jesús ta catyí ra:

—Cha xihna ca sacuví yo cha nuu tandihí, ican cuví ihya: “Cuiñi ndo ñu Israel. Sutu yo Nyoo, noo ri maa ra iyó.

³⁰ Cuñun chi Sutu yo Nyoo chihin cha niñi iñun ta chihin cha tandihí añimon, ta chihin cha tandihí cha chiñi tuñi xiñun, ta chihin cha tandihí tunyee iñun.” Ican ihya cuví cha xihna ca cha tahan chi sacuvi yo.

³¹ Ta cha cu uvi catyí chi: “Cuñun chi tahan tari cuñun chi maun.” Ñahri ca tuhun cha niñi ca ican saha nduvi tahan ihya —catyí ra Jesús.

³² Tyicuan ta ra sacuahá cuenda ley cuan catyí ra chi ra:

—Vaha xaan nacahun, Maestro. Ndicha cha catyún vatyí noo ri Nyoo iyó, ta yori ca Nyoo iyó, noo tuhun ri maa ra.

³³ Ta cha cuñí yo chi Nyoo chihin cha niñi iñi yo ta chihin cha tandihí cha chiñi tuñi xiñi yo, ta chihin cha tandihí añima yo, ta chihin cha tandihí fuerza yo, ta cuñi yo chi tahan yo tari cha cuñi yo chi maa yo, vale ca cuan ta ñima ca tandihí quití cha chahá yo chi Nyoo cha chahñi yo ta chahmi yo —catyí ra sacuaaha cuenda ley cuan chi ra Jesús.

³⁴ Nyehe ra Jesús vatyí vaha nacahan ra chihin cha cachi xiñi ra. Ta catyí ra chi ra:

—Chiin ri ca cuñí chi ta ñihún cuhva yoso caa nacuhvon añimon chi Nyoo na cunyaca ñaha ra —catyí ra Jesús chi ra.

Ta ni noo ca ñu ña cañá ca iñi ñu candaca tuhun ñu ñáá cha ndaca tuhun ñu chi ra Jesús.

¿Yóo chi tata vachi ra Cristo?
(Mt. 22.41-46; Lc. 20.41-44)

³⁵ Sañahá ra Jesús chichi vehe ñuhu cahnu, ta catyí ra:

—¿Yoso caa cha cacatyí ra sacuahá cuenda ley vehe ñuhu vatyí ra Cristo vachi ra tata ra David?

³⁶ Vatyí suri maa ra David chotyíño Tatyí li chi ra ta catyí ra:

Cahan Suti Nyoo chihin Suti ra Cristo, ta catyí ra:

“Cunyaa chiyo vahi nyacua nya cuhve chi ra xaan iñi chuun vatyí cuaca chahun siqui ra”, catyí Nyoo chihin yuhu ra David ta cha naha.

³⁷ ¿Yoso caa cha ra vachi tata ra David cuví chi ra Cristo, ta suri maa ra David catyí ra vatyí ra Cristo cuví Sutu ra? —catyí ra Jesús.

Ta cuaha xaan ñáyiví nyicú yucuan sii xaan cacuñi ñu chiñi ñu tuhun cahán ra.

Nu catyí ra Jesús vatyí iyó cuatyí ra casacuahá cuenda ley vehe ñuhu
(Mt. 23.1-36; Lc. 11.37-54; 20.45-47)

³⁸ Nu sañahá ra Jesús ta catyí ra tyehe caa:

—Saha ndo cuenda chi ndo chihin ra casacuahá cuenda ley vehe ñuhu, vatyí tahan iñi ra cacuihno ra sahna nañi ta

chicá noo ra nuyahvi tacuhva saha ndo ñáyiví chi ra, ta cuhva ndo nocumi chi ra.

³⁹ Maa ra cananducú ra nu vaha ca cun-yicu ra chichi vehe ñuhu. Ta nu vaha ca cacuñí ra cachi ra nyayu nu iyó vico.

⁴⁰ Ta ican ra catinyaá vehe ñu chihí yí, vatyi ña cuví tyiyahví ñu ñáá xuhun tava ra síqui ñu. Ta cuñí ra sacuvaha ra chi ra nuu ñáyiví. Yucuan chaha naha chicán tahvi ra nu tuvi. Maa ra cuví cha cutachi tuñi ca Nyoo chii —catyí ra Jesús.

Noo cha chahá noo ñaha chihí yí
(Lc. 21.1-4)

⁴¹ Noo chaha nyaá ra Jesús chichi vehe ñuhu cahnu yatyin ri nu nyaá chatun nu cumí ñu xuhun cha chahá ñáyiví chi Nyoo. Ta nyehe ra yoso caa tyihí ñáyiví xuhun yucuan. Ta cuaha ñu tyayí chahá ñu cuaha xaan xuhun.

⁴² Tyicuan ta chaá tucu noo ñaha ndahvi chihí yí, ta tyihí ña uvi tahan xuhun cuatyí cha caha xaan nyaá.

⁴³ Tyicuan ta caná ra Jesús chi ra cachicá noo chihin ra, ta catyí ra chi ra:

—Cha ndicha catyí chi ndo vatyi ñaha ndahvi chihí yí ihya, cuaha ca chahá ña ta ñima ca inga ñu catyihí xuhun chiña.

⁴⁴ Vatyi tandihí ñu cachahá ñu cha ndoo ri ca chi ñu. Soco maa ña chihin cha ndahvi ña chahá ña tandihí cha cumí ña —catyí ra Jesús.

13

Nu catyí ra Jesús vatyi cutani vehe ñuhu cahnu

(Mt. 24.1-2; Lc. 21.5-6)

¹ Cuhva cha cua quita ra Jesús chichi vehe ñuhu cahnu cuan, noo ra chicá noo chihin ra catyí ra chi ra:

—¡Maestro, nyehe ñana cha tyaquí yuu yihí vehe ihya! ¡Ñana cha nahnu vehe ihya! —catyí ra chi ra Jesús.

² Soco nacahan ra Jesús, ta catyí ra chi ra:

—¿Atu nyehún vehe nahnu ihya? Soco catyí chuun vatyi ma ndoo ni noo yuu coso síqui tahan, vatyi tandihí cutani —catyí ra Jesús.

Seña cha cucuvi cha ni cumañi ca naa ñáyiví

(Mt. 24.3-28; Lc. 21.7-24; 17.22-24)

³ Tyicuan ta cuahan coyo ra nya yucu yutun Olivo cha nyaá inga chiyo xahva ityi nuu vehe ñuhu cahnu. Ta cuhva cha nyaá ra Jesús yucuan, ra Pedro, ra Jacobo, ra Juan, ta ra Andrés candaca tuhun xehe ra chi ra:

⁴ —Cuñí ndi cha catyun chi ndi ama cu-cuvi tandihí tuhun cha cahun tuhun. ¿Ñáá seña cucuvi tatu cha cua cuví? —catyí ra.

⁵ Nacahan ra Jesús ta catyí ra:

—Saha ndo cuenda chi ndo tacuhva yori sandavi ñaha chi ndo.

⁶ Vatyi cuaha xaan ra cuquichi coyo ra, ta cucotyíño ra sívi ta cucatyí ra: “Yuhu cuví ra Cristo.” Ta cusandavi ñaha ra chi cuaha xaan ñáyiví.

⁷ Soco tatu chiñí ndo tuhun tyi iyó cuatyí ta cañí tahan ñáyiví, ma nayuhvi ndo. Vatyi tyicuan caa tahán chi cucuvi, soco ta chaa ca quiví cunaa ñáyiví.

⁸ Vatyi noo ñuu cucañi tahan chi chihin inga ñuu, ta ñáyiví cuenda noo gobiernu cucañi tahan ñu chihin ñáyiví cuenda inga gobiernu. Ta cucoo cha taan nahnu cuaha ri ityi. Ta cucoo tama. Ta cunaquiqui ñáyiví. Ta tyehe caa cua quichaha cha nyehe ñáyiví tindoho.

⁹ Soco saha ndo cuenda chi ndo. Vatyi cucuhva cuenda ñu chi ndo chi ra cacuví tyiño. Ta cucañi ñu chi ndo chichi vehe ñuhu. Cucuhva cuenda ñu chi ndo nuu gobernador ta nuu rey cha cuenda yuhu. Ta tyicuan caa cuví cahan ndo tuhun nuu ra.

¹⁰ Vatyi cha ni cumañi ca naa ñáyiví, cuñí chi cucutya tuhun Nyoo yoso caa sacacú ra añima ñáyiví tandihí ñuu.

¹¹ Ta cuhva cha cunyaca ñu chi ndo nuu ra cacuví tyiño, ma caca xiñi ndo ñáá tuhun cucahan ndo, ni ma ndichi xiñi ndo. Cahan ndo cha catyí Nyoo chi ndo cha cahan ndo cuhva cuan. Vatyi ñima nyoho cucahan, soco maa Tatyí Ii Nyoo.

¹² Yihí ra cunacuhva cuenda ra nyacua nya chi yañi maa maa ra. Ta sacuvi ra na cacahñi ñu chi ra. Ta yihí ñáyiví cunacuhva cuenda ñu chi sehe ñu. Ta yihí ñu cunaquiqui ñu síqui sutu ñu ta síhi ñu. Ta cunacuhva cuenda ñu chi ñu na cahñi ra chi ñu.

¹³ Tandihí ñáyiví cutasí cuñi nyehe ñu chi ndo cha cuenda yuhu. Soco tatu cunyeé iñi ndo nyacua nya nu ndihí, cucacu ndo.

¹⁴ 'Ra Daniel, ra profeta Nyoo ta cha naha, tyaa ra yoso caa cuahan tuhun noo cha cusacaquiñi nu ii xaan. Ta cusatívi chi tandihí. Tatu nyehé ndo nanyaá yucuan nu ña tahán chí cuinanyaa, (nyoho cha sacuahá ndo ihya na cutuñi iñi ndo) cuñi chí cha cono tandihí ñu iyó Judea nya ityí yucu.

¹⁵ Ta ñu ñohó xiñi vehe quívi cuan, noo ñu, soco ma quíhvi ñu chichi vehe ñu tava ñu ñáa cha tava ñu.

¹⁶ Ta ñu ñohó nu chiqui, ma cunuhu ñu nya vehe ñu cha cunaquehen ñu sahma ñu.

¹⁷ ¡Ndahví ñusihí cha cañohó sehe quívi cuan! ¡Ndahví tucu cuví ñusihí cha chaxín sehe quívi cuan!

¹⁸ Cacan ndo chi Nyoo tacuhva cha ma tahan chí caca cono ndo quívi vichin.

¹⁹ Vatyí quívi tindoho cucuvi. Ta ni noo chaha ta cuví ca tyicuan caa nyata quívi chinó ñuhu ñayiví nyacua nya vityin. Ta ni ma coo ca tindoho tahán ihya nu cuahan ca chí.

²⁰ Tyehe ta ma sanducuíti Sutu Mañi yo tyembu cuan, yori maa cucacu. Soco cusanducuíti ra cha cuenda cha cuñi ra chí ñu cuenda ra, ñu cha nacachí maa ra.

²¹ 'Tatu yóo cha catyí chí ndo: "Nyehe ndo, ma ra Cristo ihya" o "Nyehe, ma ra nyaá yucuan", ma chino iñi ndo.

²² Vatyí cuquichi ra casandaví ñaha, cucatyí ra tyi ra Cristo cuví ra. Ta yihí ra cucatyí ra vatyí profeta Nyoo cacuví ra. Ta cucasavaha ra seña, milagru, vatyí canducú ra cuhva sandaví ñaha ra nyacua nya chí ñu cha nacachí maa Nyoo tatu cuví chí ra.

²³ Soco saha vaha ndo cuenda vatyí yuhu cha sacoté chí ndo cha ni cumañi ca cuví tyicuan caa —catyí ra Jesús.

Nu sacoté ra Jesús yoso caa cuquichi tucu ra inga chaha

(Mt. 24.29-35, 42-44; Lc. 21.25-36)

²⁴ Ta catyí tucu ra Jesús tyehe caa:

—Soco quívi cha yaha tindoho, cunduñaa ñanyii. Ma cundichin ca yoo.

²⁵ Tiño cunacoyo andiví. Ta nyacua nya tandihí cha iyó andiví ta cunacanda.

²⁶ Tyicuan ta cunyehe ndo chi yuhu Rayii cha quichí nya gloria inga chaha, vachí nu vico chihin cha ndicha ñuhu Nyoo, ta chihin cha cahnu cuví ra.

²⁷ Tyicuan ta cutachí chí ángel ta cusandu ñin ri chí ñu nacachí ñicahnu síqui ñuhu ñayiví, nyacua nya nu ndihí ñuhu ñayiví ta nyacua nya nu ndihí andiví.

²⁸ 'Cutuñi iñi ndo cuhva tu higo ihya: Tatu nduyutya soco tun ta caña numa tun cha chitó ndo vatyí cha cuñi chaa quívi coo chítí, cha vachí vico savi.

²⁹ Ta suri tyicuan caa tatu cha nyehe ndo tuhun ihya, coto ndo tyi cha nyaña yatyin quívi quichí tiqui. Cha nyañai yuvehe cuví cuan.

³⁰ Cha ndicha catyí chí ndo vatyí tandihí ihya cucuvi cha ni ri ca cha iyó ñáyiví.

³¹ Tyicuan ta cunaa andiví ta ñuhu ñayiví cha iyó cha vityin. Soco tuhun cahín tyicuan ri cucuvi tari cuhva catyí.

³² 'Soco yori chitó ñáa quívi ta ñáa cuhva cucuvi tandihí ihya, ni ángel Nyoo, ni yuhu Sehe Nyoo. Noo tuhun ri maa Nyoo Suti cuví ra chitó.

³³ 'Yucuan chaha conyito vaha ndo, ta saha ndo cuenda ta cacan tahví ndo, vatyí ña chitó ndo ñáa quívi cuchaa cuhva.

³⁴ Tari noo ra cha cua cuhun nu cañi. Ta cha ni cumañi ca cuhun ra, chaha cuenda ra vehe ra chí musu ra. Ta chaha ra tyiño chí noo noo ra. Ta tachí ra chí ra sahá cumi yuvehe cuan na saha ra cuenda.

³⁵ Yucuan chaha nyoho conyito ndo vatyí ña chitó ndo ñáa cuhva cuquichi ra cha cuví tari chitoho vehe cuan, an cha ni cua cuaa, an ñuu, an cuhva cha chacú chaa loho, an cha ñaha ri.

³⁶ Conyito ndo coto sana iñi ndo ta quichí ra, ta nañihi ra chí ndo quixí ndo.

³⁷ Cha catyí chí nyoho, catyí tiqui chí tandihí ñáyiví ñandihí. Na conyito ñu.

14

Nu canducú ra cuhva catiin ra chí ra Jesús

(Mt. 26.1-5; Lc. 22.1-2; Jn. 11.45-53)

¹ Uvi ca quívi cumañi ta cua tahan chí vico cha nañi pascua ta vico cha tuhva ñu chachí ñu pan cha ñahri yuchan iya yihí. Ta ra cacuví nuu chí tata sutu ta ra casacuahá

cuenda ley vehe ñuhu canducú ra cuhva catiñ xehe ra chi ra Jesús ta cacahñi ra chi ra.

² Soco cacatyí ra chi ra tahan ra:

—Ma tiñ yo chi ra cha chichi vico vityin coto naquiqui ñáyivi —cacatyí ra.

Nu choso noo ñaha sihi ndutya vixi chahán chi ra Jesús

(Mt. 26.6-13; Jn. 12.1-8)

³ Ñohó ra Jesús ñuu Betania vehe ra Simón, cha catyí ñu: “Simón ra cha tyahyu coño.” Ta cha ni ri ca cha nyaá ra mesa, cha noo ñaha sihi ndaha ña noo yutyi cha chingo chihin noo yuu cha nañi alabastro. Tyitu yihí chihin ndutya vixi chahán cha nañi nardo. Ta yahvi vavaha nyaá. Ta tahvi ña yutyi cuan ta choso ña ndutya vixi chahán cuan xiñi ra Jesús.

⁴ Soco suhva ra canyicú yucuan cacuxaan ra ta cacatyí ra chi tahan ra:

—¿Ñáa tuhun sativi ña ndutya vixi chahán cuan?

⁵ Tyehe ta quiyahvi cuan, cuenda mil cuñihi yo chihin chi, ta tyinyee chi chi ñu ndahvi —catyí ra.

Ta cahan ra chi ña.

⁶ Soco ra Jesús catyí ra:

—¿Saña ndo chi ña! ¿Ñáa tuhun cha sayangá ndo chi ña? Cha choso ña chii tyehe caa, cha vaha cuví.

⁷ Vatyí ñu ndahvi tyicuan ri cua cunyaa ñu chihin ndo, ta cuví sacuvi maa ndo cha vaha chihin ñu ñáa ri quivi cuñi ndo. Soco yuhu ñima tyicuan ri cua cunyai chihin ndo.

⁸ Ñaha sihi ihya sacuvi ña yoso cuhva cha cuví chi ña. Choso ña ndutya vixi chahán coño ñuhi, cha ni cumañi ca cucuvi ta quihvi chichi ñuhu.

⁹ Cha ndicha catyí chi ndo, vatyí tandihí ri nicahnu ñuhu ñáyivi nu cahan ñu tuhun Nyoo, cunacatyí tucu ñu tuhun cha sacuvi ñaha ihya, tacuhva nichon iñi ñáyivi tuhun ña —catyí ra Jesús.

Nu nacuhva cuenda ra Judas chi ra Jesús chi ra xaan iñi chi ra

(Mt. 26.14-16; Lc. 22.3-6)

¹⁰ Yaha cuan ta ra Judas Iscariote, noo ra chichi cha uchi uvi tahan ra cachicá noo chihin ra Jesús, chahan ra chindatuhun ra

chihin ra cacuví nuu chi tata sutu, vatyí casandaa ra noo tyiño ta nacuhva cuenda ra chi ra Jesús chichi ndaha ra.

¹¹ Cuhva cha cachiñi ra ihya, cusii xaan cacuñi ra, ta catyí ra vatyí cuhva ra xuhun chi ra. Tyicuan ta quichaha nducu ra Judas cuhva nacuhva cuenda ra chi ra Jesús.

Nu cuxiñi ra Jesús chihin ra cachicá noo chihin ra

(Mt. 26.17-29; Lc. 22.7-23; Jn. 13.21-30; 1 Co. 11.23-26)

¹² Cuví chi quivi quichaha vico cha chachí ñu pan cha ñahri yuchan iya yihí. Yucuan quivi cha vico pascua tuhvá ñu chahñi ñu mbee luhlu cha chahá ñu chi Nyoo. Ta ra cachicá noo chihin ra Jesús candaca tuhun ra chi ra, ta cacatyí ra:

—¿Nya maa maa cuñun cha sanduvaha ndi cha cuxiñun cha vico ihya?

¹³ Tyicuan ta tachí ra chi uvi tahan ra ta catyí ra chi ra:

—Cuahan ndo chichi ñuu, ta yucuan cunañihi ndo chi noo ra cha nyisó noo quivi ndutya. Cuahan ndo chata ra.

¹⁴ Ta nu quihvi ra, catyí ndo chi ra cuví chitoho vehe yucuan tyehe caa: “Ra Sacuaha cuñi ra coto ra nya nyaá cuarto nu cusanducahnu ra vico chihin ra cachicá noo chihin ra”, catyí ndo chi ra.

¹⁵ Ta maa ra cusañaha ra noo cuarto cahnu nu piso sucun chi ndo. Cha yaha nduvii, ta yucuan cusanduvaha ndo cha cuxiñi yo —catyí ra Jesús chi ra.

¹⁶ Cuahan coyo ra. Ta cha coyo ra chichi ñuu. Canañihí ra tari cuhva catyí ra Jesús chi ra, ta casanduvaha ra cha cuxiñi ra cha vico pascua cuan.

¹⁷ Ta cha cuaa cuan cha ra Jesús chihin ndi uchi uvi ra chicá noo chihin ra.

¹⁸ Ta cuhva cha canyicú ra nu mesa cachachí ra, ra Jesús catyí ra:

—Cha ndicha catyí chi ndo vatyí noo nyoho cha chachí ndo chihin cunaxico tuhun ndo chii.

¹⁹ Tyicuan ta canducuihya iñi ra ta quichaha candaca tuhun tahan tahan ri ra chi ra, ta cacatyí ra:

—¿Atu yuhu?

²⁰ Ta nacahan ra Jesús ta catyí ra:

—Noo ra chichi cha uchi uvi ndo. Ra cha satyíi pan ñn ri nu coho chihin, ican ra cuan cuví.

²¹ Vatyí yuhu Rayñi cha quichí nya gloria cucuvi chíi tari cuhva catyí nu tutu tuhun Nyoo. Soco ñndahvi ra ndahvi ra naxicó tuhun chíi! Vaha taxin ca cha cuenda ra, tyehe ta ña cacu ra —catyí ra Jesús.

²² Cha ni ri ca cha cachachí ra, ra Jesús quehen ra pan ta nacuhva ra tyahvi nyoo chi Nyoo. Ta tahvi ra ta chaha ra chi tandíhi ca ra, ta catyí ra:

—Quehen ndo. Ican ihya cuví coñe —catyí ra chi ra.

²³ Yaha cuan ta quehen ra vaso vinu. Ta cha yaha cha nacuhva ra tyahvi nyoo chi Nyoo, chaha ra chi ra. Ta tandíhi ra cachíhi ra cha ñohó chichi vaso cuan.

²⁴ Ta catyí ra chi ra:

—Vinu cha yíhi chichi vasu ihya tari ññi cuví. Ta chihin ññi tyihí tahan Nyoo tuhun chaa chihin ndo vatyí cucatí cha cuenda cha vaha chi cuaha ñáyivi.

²⁵ Cha ndicha catyí chi ndo vatyí ma coho que vinu nyacua nya quivi nachai nu nyacá ñaha Nyoo ta cohi vinu chaa —catyí ra Jesús chi ra.

Nu catyí ra Jesús tyi cucatyí ra Pedro tyi ña ñohó nuu ra chi ra

(Mt. 26.30-35; Lc. 22.31-34; Jn. 13.36-38)

²⁶ Cha yaha cha cachita ra yaa, ta caquita ra cuahan coyo ra nya yucu yutun Olivo.

²⁷ Tyicuan ta catyí ra chi tandíhi ra:

—Tandíhi nyoho cusandoo notuhun maa ndo chíi vityin cha cuaa. Vatyí catyí chi nu tutu tuhun Nyoo tyehe caa: “Cucahñi chi ra sahá cumi mbee, ta mbee cacacono ti ityi cuan ityi ihya”, catyí chi.

²⁸ Soco cha yaha cha nandote, xihna que cuhun ityi Galilea ican saha nyoho —catyí ra Jesús chi ra.

²⁹ Tyicuan ta quichaha catyí ra Pedro chi ra:

—Vasi tandíhi ra sandoo ra chuun, soco yuhu ma sandoi chuun —catyí ra chi ra Jesús.

³⁰ Soco ra Jesús catyí ra chi ra:

—Cha ndicha catyí chuun, vatyí suri maa cha cuaa ihya, cha ni cumañi ca cuacu loho uvi chaha, yoho cucatyun tyi ña ñohó nuun chíi uñi chaha —catyí ra Jesús chi ra Pedro.

³¹ Soco saniñi ra Pedro ta catyí ra:

—Vasi cúvi chuhun, soco ma tixehi cha ñohó nui chuun —catyí ra Pedro.

Ta tandíhi ra cacatyí ra tyicuan caa.

Nu chicán tahvi ra Jesús nu cuví Getsemani

(Mt. 26.36-46; Lc. 22.39-46)

³² Tyicuan ta cachaa coyo ra noo nu nañi Getsemani. Ta ra Jesús catyí ra chi ra cachicá noo chihin ra:

—Cunyicu ndo ihya ni ri cuhin cucacan tahvi —catyí ra Jesús.

³³ Ta quehen ra chi ra Pedro, ta ra Jacobo ta ra Juan cuahan chihin ra. Ta quichaha chica xaan iñi ra ta cutyoño cuñi ra.

³⁴ Ta catyí ra chi ra:

—Tuví iñi añime noo tucuihya iñi, ta cuñi cahñi chíi. Ndoo nyoho ihya, ta conyito ndo —catyí ra.

³⁵ Tyicuan ta cuahan ra chiin ca ityi nuu ca. Ta chicuiñi chiti ra nu ñuhú. Ta chicán ra chi Nyoo tatu cuví cha ma nyehe ra tindoho cha cua cuví chíi ra cuhva cuan, catyí ra chicán tahvi ra.

³⁶ Ta nu chicán tahvi ra, ta catyí ra:

—Sutu Mañi yuhu, cha cuenda yoho ñahri cha ma cuví chuun. Tu yoho ta cuñun na canyaha tindoho ihya chíi. Soco ma cuví tari cuhva cha cuñi mai, soco cuhva cha cuñi maun na cuví —catyí ra Jesús chicán tahvi ra.

³⁷ Yaha cuan ta nachaa ra nu nyicú ra. Ta nyehe ra tyi caquixí ra. Ta catyí ra chi ra Pedro:

—Yoho Simón, ¿atu quixún? ¿Atu ña cuví conyiton ni noo hora?

³⁸ Conyito ndo ta cacan tahvi ndo tacuhva cha ma sanacava ra ña vaha chíi ndo nu cuatyí. Cha ndicha, cuñi añima ndo sacuvi ndo cha vaha, soco coño ñuhu ndo vita xaan cuñi chíi —catyí ra Jesús chíi ra.

³⁹ Tyicuan ta cuahan ra inga chaha. Ta chicán tahvi ra suri maa cha chicán ra cha xihna ri.

⁴⁰ Tyicuan ta nachaa tucu ra inga chaha, nyehe ra tyi caquixí ra. Vatyí nicunyasi maa chiti nuu ra chihin cha cacuñi xaan ra cusu ra. Ta ña cachitó ra ñáa cha nacahan ra chihin ra Jesús.

⁴¹ Ta chahan ra cha cu uñi chaha, ta nachaa ra, ta catyí ra:

—Vityin ndicha cusu ndo, nyitatu ndo. Cha iyó vaha ri vityin, cha chaꝯ cuhva cha cucuhva cuenda ra chi yuhu Rayiꝯ cha quichi nya gloria ndaha ra ca iyó cuatyí.

⁴² Ndícuita ndo, cõho ndo. Cha vachi ra naxicó tuhun chii —catyí ra Jesús chi ra.

Nu catiꝯn ra chi ra Jesús

(Mt. 26.47-56; Lc. 22.47-53; Jn. 18.2-11)

⁴³ Ni cahán ca ra Jesús ta chaꝯ ri ra Judas, noo ra chichi cha uchi uvi tahan ra chicá noo chihin ra. Ta cuaha sindaro ta policia vachi coyo chihin ra canyisó ra mityi ta yutun. Vachi coyo ra cuenda ra cacuví nuu chi tata sutu, ta ra casacuaha cuenda ley vehe ñuhu, ta cuenda ra mandoñi.

⁴⁴ Cha ni cumañi ca cachaa coyo ra, ra Judas, ra cha naxicó tuhun chi ra, chahaꝯ ra noo seña chi ra ta catyí ra:

—Ra cha tyayuhi, ican ra cuan cuví. Tiꝯn vaha ndo chi ra na cuhun ra chihin ndo.

⁴⁵ Ta cuhva cha chaꝯ ra tuhvaꝯ ra nu nyaá ra Jesús ta catyí ra chi ra:

—Maestro.

Ta tyayuhꝯ ra xitin ra.

⁴⁶ Tyicuan ta catiꝯn ra chi ra Jesús ta cuahan ra vehe caa.

⁴⁷ Soco noo ra cha nyaá yucuan tavaꝯ ra mityi ra ta chahnyꝯ ra soho musu ra cuví nuu chi tata sutu.

⁴⁸ Tyicuan ta ra Jesús catyí ra chi ra cachaaꝯ coyo cuan:

—¿Atu vachi tiꝯn ndo chii chihin mityi ta chihin yutun, tari cha vatyí cuví yuhu noo ra suhu?

⁴⁹ Ndi quivi chinyai chihin ndo sañahi chichi vehe ñuhu cahnu cuan. Ta ni noo chaha ña tiꝯn ndo chii. Soco cuví chi tyehe caa vityin, tacuhva chino cava tari cuhva catyí nu tutu tuhun Nyoo —catyí ra Jesús chi ra.

⁵⁰ Tyicuan ta tandihi ra cachicá noo chihin ra, cachino ra ta casandoꝯ noo tuhun maa ra chi ra Jesús.

⁵¹ Soco noo ri ca ra tyivaa nyicón ra chi ra, ndichí ra noo sinduhu ta catiꝯn tucu ra chi ra.

⁵² Soco sandoꝯ ra sinduhu cuan ta cuahan vavaha ra vityiaa vityi cañi ra.

Nu cutuñi chi ra Jesús nuu ra cuví tyiño

(Mt. 26.57-68; Lc. 22.54-55, 63-71; Jn. 18.12-14, 19-24)

⁵³ Tyicuan ta cachinyacaꝯ ra chi ra Jesús nuu ra cuví nuu chi tata sutu, ta candu iꝯn ri tandihi ra chihin ra cacuví mandoñi, ta ra casacuaha cuenda ley vehe ñuhu.

⁵⁴ Ta ra Pedro cuahan ra chata ra nya sava ri, nyacua nya nuquehe vehe ra cuví nuu chi tata sutu cuan. Ta ndoo ra nyaá ra chihin policia sanasaá ra chi ra yatyin yunuhu.

⁵⁵ Ra cacuví nuu chi tata sutu, ta tandihi ra cuví tyiño canducu ra ñáá noo cuatyí tyaa ra siqui ra Jesús, tacuhva cuví cacahñi ra chi ra soco ña cañihí maa ra.

⁵⁶ Vasi cuaha ñáyivi cahꝯn ñu cuendu siqui ra, soco ña nacachí tahan tuhun cahán ñu.

⁵⁷ Yihí ñu candícuita ñu ta catyaaꝯ ri maa ñu cuendu siqui ra, ta cacatyí ñu:

⁵⁸ —Nyuhu chiñi ndi cha cahꝯn ra vatyí cusatani ra vehe ñuhu cahnu cha savahaꝯ ñáyivi. Ta chichi cha uñi quivi cunacananyaa ra inga vehe ñuhu cha ñima ñáyivi savaha, na —catyí ñu.

⁵⁹ Soco ni tyicuan caa ña nacachí tahan cha catyí ñu.

⁶⁰ Tyicuan ta ra cuví nuu chi tata sutu ndícuita ra mahñu nu nyicú tandihi ra yucuan, ta quichahaꝯ ndaca tuhun ra chi ra Jesús, ta catyí ra:

—¿Atu ña nacahan maun? ¿Ñáá cha cuví ihya cha cacahán ra sicun? —catyí ra chi ra.

⁶¹ Soco ra Jesús taxi ri nanyaá ra, ta ña nacahan maa ra. Ta ra cuví nuu chi tata sutu cuan ndacaꝯ tuhun ra chi ra inga chaha, ta catyí ra:

—¿Atu yoho cuvún Cristo, Sehe Nyoo ra cha iyó cha vaha chi?

⁶² Ra Jesús catyí ra chi ra:

—Ican, yuhu cuví. Ta nyoho cunyehe ndo chi yuhu Rayiꝯ cha quichi nya gloria, cucunyai chiyo vaha Nyoo ra cha iyó tandihi tunyee iñi chi. Ta cunyehe ndo chii quivi quichi nu vico andivi —catyí ra chi ra.

⁶³ Tyicuan ta ra cuví nuu chi tata sutu cuan, chahnyꝯ ra sahma ra tari noo seña vatyí ña tahan iñi ra, ta catyí ra:

—¿Ñáá ca cha ndaa cuñi yo?

⁶⁴ Nyoho cha chiñi ndo vatyí chicoꝯ cuatyí ra nuu Nyoo chihin tuhun cahán ra. ¿Yoso caa cuñi nyoho? —catyí ra.

Ta tandihi ra cacatyí ra vatyí tahán chi cúvi ra.

⁶⁵ Tyicuan ta suhva ra quichaha tyicu s̄i ra chi ra. Ta chas̄i ra nuu ra, ta cañi ra chi ra chihin chiqui ra ta cacatyí ra chi ra:

—¡Nacoto yóo cha cañi chuun! —cacatyí ra chi ra.

Ta policia cacatu ra nuu ra.

Nu catyí ra Pedro vatyí ña ñohó nuu ra chi ra Jesús

(Mt. 26.69-75; Lc. 22.56-62; Jn. 18.15-18, 25-27)

⁶⁶ Ra Pedro nyaá ra ityi yuvi nuquehe. Tyicuan ta chaá noo ñaha sahá tyiño chihin ra cuví nuu chi tata sutu cuan.

⁶⁷ Ta cuhva cha nanyehe ña chi ra Pedro vatyí sanasaá ra chi ra yunuhu cuan, ndoo ña nyehé vavaha ña chi ra, ta catyí ña chi ra:

—Yoho ñandihi, chica noun chihin ra Jesús ra ñuu Nazaret cuan —catyí ña chi ra.

⁶⁸ Soco ra Pedro tixehe ra, ta catyí ra:

—Ña ñohó nui chi ra, ña chité ñáá tuhun cahún —catyí ra chi ña.

Tyicuan ta quita ra ityi yuvehe. Tyicuan ta chacu noo loho.

⁶⁹ Tyicuan ta ñaha cha nyaá tyiño yoo cuan, nanyehe tucu ña chi ra inga chaha ta quichaha catyí ña chi ra canyicú yucuan:

—Noo ra tahan ra cuan cuví ra ihya —catyí ña.

⁷⁰ Soco tixehe ra inga chaha. Ta yaha suhva ri ca cuhva ta ra canyicú yucuan cacatyí tucu ra inga chaha chi ra Pedro:

—Cha ndicha vatyí noo ra yucuan cuví yoho, vatyí ra Galilea cuvún, vatyí tari cahán ñu, cahún —catyí ra chi ra.

⁷¹ Tyicuan ta iyo xaan tyanaha ra Pedro, ta catyí ra:

—¡Chitó vaha Nyoo tyi ña ñohó nui chi ra cha cahán nyoho tuhun! ¡Na cahni Nyoo chii tatu ña ndicha cha cahín! —catyí ra.

⁷² Ta caa cuhva ri cuan chacu ri loho cha cu uvi chaha. Tyicuan ta nicohon iñi ra Pedro tuhun cha cahan ra Jesús chihin ra: “Cha ni cumañi ca cuacu loho uvi chaha, yoho cucatyun vatyí ña ñohó nuun chi yuhu uñi tahan chaha.” Nicohon iñi ra Pedro ta quichaha chacu chaa ra.

15

Nu nanyaa ra Jesús nuu ra Pilato

(Mt. 27.1-2, 11-14; Lc. 23.1-5; Jn. 18.28-38)

¹ Cuhva cha cundichin candu ñn ri ra cacuví nuu chi tata sutu chihin ra cacuví mandoñi ta chihin ra casacuahá cuenda ley vehe ñuhu ta tandihi ra cuví tyiño ñu Israel. Ta ra Jesús nuhñi ra, chinacuhva cuenda ra chi ra chi ra Pilato.

² Ta ndaca tuhun ra Pilato chi ra, ta catyí ra:

—¿Atu rey cuenda ñu Israel cuví yoho?

Ta nacahan ra Jesús ta catyí ra:

—Ican, yuhu cuví. Ndicha cha cahún.

³ Ta ra cacuví nuu chi tata sutu cuaha xaan cha catyaa ra siqui ra.

⁴ Tyicuan ta quichaha ndaca tuhun tucu ra Pilato inga chaha chi ra, ta catyí ra:

—¿Atu ña nacahan maun? Nyehé yoso cha cuaha cha tyaá ra sicun.

⁵ Soco ra Jesús ña nacahan maa ra. Yu-cuan chaha ña chitó ra Pilato ñáá cha caca xiñi ra.

Nu cutuñi chi ra Jesús vatyí cucúvi ra

(Mt. 27.15-31; Lc. 23.13-25; Jn. 18.38—19.16)

⁶ Ta vico cuan tuhvá ra Pilato saña ra chi noo ra ñohó vehe caa, noo ra cha cacan maa ñáyivi.

⁷ Ta ñohó noo ra nañi Barrabás vehe caa cuan, ñn ri chihin inga ra cha cachahñi chi ñáyivi noo nu naquiqui ñáyivi siqui gobiernu.

⁸ Ta quichi coyo ñáyivi quichaha chican ñu chi ra Pilato na saña ra chi noo ra tari tuhvá maa ra.

⁹ Ta nacahan ra Pilato, ta catyí ra:

—¿Atu cuñi nyoho cha sañe chi Rey cuenda ñu Israel?

¹⁰ Tyicuan caa catyí ra vatyí tuví iñi ra vatyí ra cacuví nuu chi tata sutu cuan tasi cuñi ra chi ra Jesús tyi cuaha ñáyivi nyicón chi ra, yucuan chaha nacuhva cuenda ra chi ra.

¹¹ Soco ra cacuví nuu chi tata sutu cuan catyiyuhu ra chi ñáyivi na catyí ñu na saña ra chi ra Barrabás.

¹² Tyicuan ta ndaca tuhun ra Pilato chi ñu, ta catyí ra:

—¿Ta ñáá cha cuñi ndo sacuvi chihin ra cha catyí nyoho Rey cuenda ñu Israel chi? —catyí ra chi ñu.

13 Tyicuan ta nacanachaa ñu, ta catyí ñu:
—¡Na cúvi ra nu cruzi! —catyí ñu,
canachaá ñu.

14 Ta catyí ra Pilato chi ñu:
—Soco ¿ñáá cha ña vaha sacuví ra?
—catyí ra.

Soco canachaa ca ñu ta catyí ñu:

—¡Na cúvi ra nu cruzi! —catyí ñu.

15 Tyicuan ta vatyí cuñí ra Pilato cuvaha
ra nuu ñu, saña ra chi ra Barrabás. Tyicuan
ta tyihí ra tyiño na ndoho ra Jesús, ta cha
yaha cuan chahá cuenda ra chi ra vatyí
cúvi ra nu cruzi.

16 Tyicuan ta chinyaca sindaro chi ra
nuquehe vehe tyiño cuan. Ta casandu ñn
ri ra tandihí sindaro.

17 Ta casacuihno ra noo sahma tyacu
nyaa chi ra. Ta caquicu ra noo corona
chihin iñu. Ta catyihí ra xiñi ra.

18 Yahá cuan ta quichaha cacana chaa ra
síqui ra chacú nyaa ra chi ra, ta catyí ra:

—¡Nocumi chuun, yoho Rey cuenda ñu
Israel! —catyí ra.

19 Ta cacañi ra xiñi ra chihin noo yutun,
ta tyicú sí ra chi ra. Ta cachicuiñi chiti ra
casaha ra tyi sacahnu ra chi ra.

20 Cha yahá cha chacu nyaa ra chi ra
tyicuan caa, tinyaa ra sahma nyaa cuan chi
ra, ta sandihví noo ra sahma maa ra chi
ra. Yahá cuan ta cuahan ra chihin ra vatyí
cuatyaa ra chi ra nu cruzi.

Nu cuacúvi ra Jesús nu cruzi

(Mt. 27.32-44; Lc. 23.26-43; Jn. 19.17-27)

21 Yahá noo ra ñuu Cirene, nañí ra Simón.
Sutu ra Alejandro ta ra Rufo cuví chi ra. Ni
cua nachaa ra cha chahan ra nu chiqui. Ta
cuhva cha cua yaha ra ityi cuan, casaniñi
sindaro chi ra na cuiso ra cruzi ra Jesús.

22 Ta cachinyaca ra chi ra Jesús noo nu
nañí Gólgota. Ta cuñí chi catyí: Nu Cuví
Yiquí Xiñi Ndiyí.

23 Ta cachahá ra vinu nasaca chihin noo
tatan cha nañí mirra coho ra. Soco ra Jesús
ña chihí ra.

24 Cha yahá catyaa sindaro chi ra nu
cruzi, cachahan ra síhva chihin sahma ra
ta nya ra sahá ganaa caquehen ra sahma
ra.

25 Caa ñn cha ñaha ri catyaa ra chi ra nu
cruzi.

26 Ta letra cha catyaa ra xiñi cruzi cuan,
catyí chi ñáá cuatyí ra. Ta catyí chi tyehe
caa: “Ican ra ihya cuví Rey cuenda ñu ñuu
Israel.”

27 Ta chinanyaa ra uvi ca cruzi nu chita-
caa ra uvi tahan ra suhu, noo ra chiyo vaha
ra, ta inga ra chiyo satyin ra.

28 Ta tyicuan caa quita chi tari cuhva
catyí nu tutu tuhun Nyoo tyehe caa: “Sahá
ñu tuhun tyi cuví ra noo ra quiñi iyó.”

29 Ta ñu yahá coyo chacú nyaa ñu chi ra.
Ta quisí xiñi ñu, ta catyí ñu chi ra:

—¡Jaan! ¡Yoho cha catyūn tyi cusatanun
vehe ñuhu cahnu, ta chichi cha uñi quiví
cunacoñehun inga chaha!

30 ¡Sacacu maun chuun ta noo nu cruzi
chiña! —catyí ñu.

31 Ta tyicuan caa tucu ra cacuví nuu chi
tata sutu ta ra casacuahá cuenda ley vehe
ñuhu, cachacú nyaa ra chi ra, ta catyí ra chi
tahan ra:

—¡Chi inga ñu sacacu ra, soco ña cuví
sacacu ra chi maa ra!

32 Na noo ra nu cruzi vityin, na nyehe
yo ta chino iñi yo tyi Cristo Rey cuenda ñu
Israel cuví ra —catyí ra.

Ta nyacua nya ra tacaá inga cruzi
inchiyo inchiyo xiin ra ta cacahan ra chi
ra.

Nu chihí ra Jesús

(Mt. 27.45-56; Lc. 23.44-49; Jn. 19.28-30)

33 Cuhva cha cua cu hora, tandihí ñuhu
ñayiví nduñaa, nyacua nya caa uñi cha cha
iñi.

34 Ta suri cuhva cuan canachaa ra Jesús
chihin tandihí fuerza ra, ta catyí ra:

—Eloi, Eloi, ¿lama sabactani? —ta cuñí
chi catyí: Nyoo Suti, Nyoo Suti, ¿ñáá tuhun
sandoo noo tuhun maun chii? —catyí ra.

35 Suhva ra tayucu yucuan cachiñí ra ta
catyí ra:

—¡Xihna! Caná chaa ra chi ra profeta Elías
—catyí ra.

36 Tyicuan ta chingo noo ra yucuan
chiquehen ra noo tari caa xixan ta satyijí
ra chihin vinu iya. Ta tyaa ra noo nu yutun
ta satuhva ra yuhu ra na coho ra, ta catyí
ra:

—Cuatu ndo. Na nyehe yo tatu quichi ra
Elías sanoo ra chi ra —catyí ra cuan.

³⁷ Tyicuan ta ñihi xaan canachaa ra Jesús, ta chihí ra.

³⁸ Ta sahma cha tacaá chichi vehe ñuhu cahnu ndatá sava maa chi, nya siqui ta nyacua nya ityi yuvi.

³⁹ Ta noo capitán cuenda sindaro Roma nanyaá ra yatyin nuu ra Jesús cuan. Cha nyehe ra yoso caa cana chaa ra, ta yoso caa chihí ra, ta catyí ra:

—Cha ndicha ndicha cuii vatyi Sehe Nyoo cuví chi ra ihya —catyí ra.

⁴⁰ Ta nya sava ri tayucú tucu suhva ñusihí canyehé ñu. Ta mahñu ñu cuan nanyaá cu María ñaha Magdala, ta cu María sihi ra José ta ra Jacobo ra tyivaa ca. Ta nanyaá tucu cu Salomé.

⁴¹ Ican ñusihí ihya cachinyicon chi ra Jesús, ta tyinyeé ñu chi ra quivi chica noo ra ityi Galilea. Ta sin ri nyicú cuaha ca ñu cha chaa coyo chihin ra Jerusalén cuan.

Nu chicuchi ñu chi ra Jesús

(Mt. 27.57-61; Lc. 23.50-56; Jn. 19.38-42)

⁴² Cuví chi quivi cha sanduvaha ñu cha cachi ñu vatyi inga quivi tuhvá ñu nyitatu.

⁴³ Ta cha cuaa cuan chaa ra José ra ñuu Arimatea. Noo ra cuví tyiño. Nyatú tucu maa ra nu cunyaca ñaha Nyoo. Ta ndachan cuñí ra ta quihvi ra nu nyaá ra Pilato, ta chican ra coño ñuhu ra Jesús chi ra.

⁴⁴ Iyo cuñí ra Pilato cha nacoto ra vatyi cha chihí ra Jesús. Ta cana ra chi capitán vatyi ndaca tuhun ra tatu cha yaha chihí ra.

⁴⁵ Ta cha catyi capitán vatyi cha yaha chihí ra, ra Pilato chaha ra coño ñuhu ra chi ra José.

⁴⁶ Tyicuan ta sata ra José noo sinduhu cha chingo chihin sahma finu cha nañi lino, ta sanoo ra coño ñuhu ra. Ta siqui noo ra chihin sinduhu cuan. Yaha cuan ta chityihí ra chi ra noo chichi ñaña cha cachatya ra chichi noo yuu. Ta chasi ra yuhu ñaña cuan chihin noo yuu cahnu.

⁴⁷ Ta cu María ñaha Magdala cuan ta cu María sihi ra José, chaa coyo ñu nyehe ñu nu tyihí ra chi ra.

16

Nu nandoto ra Jesús

(Mt. 28.1-10; Lc. 24.1-12; Jn. 20.1-10)

¹ Yaha quivi nyitatu ñu. Tyicuan ta cu María ñaha Magdala ta cu María sihi ra Jacobo, ta cu Salomé sata ñu ndutya vixi chahán ta cuahan coyo ñu cua tyihí ñu coño ñuhu ra Jesús.

² Ta timingu cuví, quivi quichaha vitya, ñaha cuii ri cuhva cha vachi cundichin cuhva cha ni cua caña ñanyii, chaa coyo ñu nu ñaña.

³ Ta catyí ñu chi tahan ñu:

—¿Yóo cha cusacanyaha yuu yuhu ñaña cuan? —catyí ñu chi tahan ñu.

⁴ Soco cuhva cha nanyehe ñu, yuu cahnu cha nyasi yuhu ñaña cuan cha cuachiyó chi nya sava.

⁵ Quihvi coyo ñu chichi ñaña yucuan. Ta nanyehe ñu chi noo ángel tari caa noo ra tyivaa, nyaá ra chiyo vaha. Ta ñihno ra sahma cañi ta cuichin. Ta canayuhví ñu.

⁶ Soco catyí ra chi ñu:

—Ma yuhvi ndo. Nyoho nanducú ndo chi ra Jesús ra ñuu Nazaret, ra cha chihí nu cruzi. Soco cha nandoto ra. Ña ñohó ca ra ihya. Nyehe ndo nu chacun ra chi ra.

⁷ Cuahan ndo cua sacoto ndo chi ra Pedro ta chi inga ra cachica noo chihin ra. Catyi ndo chi ra vatyi na cuhun coyo ra ityi Galilea vatyi yucuan nyatú ra Jesús chi ra, tari cuhva catyi ra chi ra. Vatyi ra Jesús cha cuahan ra ityi nuu —tyicuan caa catyí ángel cuan chi ñu.

⁸ Tyicuan ta cuahan coyo vavaha ñu, vatyi suri canihí ñu cha cuenda cha yuhví ñu. Ta yori maa chihin cahán ñu tuhun cha cuenda cha yuhví ñu.

Nu tuví ra Jesús nuu cu María ñaha Magdala

(Jn. 20.11-18)

⁹ Cuví chi timingu quivi quichaha vitya cha nandoto ra Jesús. Yaha cuan ta xihna ca nuu cu María ñaha Magdala tuví ra. Maa ña cuví ñaha cha tava ñehe ra ucha tahan tatyí ña vaha.

¹⁰ Ta chahan ña chisacoto ña chi ra cachica noo chihin ra, vatyi canyicú cuihya ra ta cachacú chaa ra.

¹¹ Soco cuhva cha cachiñi ra vatyi iyó ra Jesús ta vatyi nyehe ña chi ra, ña cachingo iñi ra.

Nu tuv̄i ra Jesús nuu uvi tahan ra chica noo chihin ra

(Lc. 24.13-35)

¹² Cha yaha cuan, ra Jesús tuv̄i ra nuu uvi tahan ra cha cuahan coyo chica ityi ityi nu chiqui. Soco s̄in caa cuhva caá ra cananyehe ra chi ra.

¹³ Ta cuanuhu coyo ra ta sacoto ra chi tandih̄i ca ra. Soco suri ña cachinō iñi ra cha cacahan ra cuan.

*Tuhun cha chaha ra Jesús chi ra cha ty-
atyñ̄o ra chi*

(Mt. 28.16-20; Lc. 24.36-49; Jn. 20.19-23)

¹⁴ Ta cuee ca ta tuv̄i ra Jesús nuu ndi uchi ñin ra cha cachica noo chihin ra, cha ni ri ca cha canyicú ra nu mesa. Ta cahan ra chi ra cha cuenda cha ña cachinō iñi ra, ta cha cuenda cha candava añima ra vatyí ña cachinō iñi ra tuhun cahan ñu nyehe tyi nandoto ra.

¹⁵ Ta catyí ra chi ra:

—Cuahan ndo nicacahnu ñuhu ñayivi, ta cahan ndo chihin tandih̄i ñáyivi, ta catyi ndo chi ñu yoso caa sacacú Nyoo añima ñu.

¹⁶ Ta ñu cha chinó iñi ta condutya ñu, cucacu añima ñu. Soco ñu cha ña chinó iñi cundoo cuatyí ñu siqui ñu ta cunaa ñu.

¹⁷ Ta tandih̄i seña ihya cusacuvi ñu cha chinó iñi chii: Chihin sivi cutava ñehe ñu tatyí ña vaha. Cucahan ñu inga sahan cha ña chitó ñu.

¹⁸ Cutiñ ñu coo, ta tatu coho ñu cha yih̄i venenu, ma saha cuehe chi ñu. Ta s̄in ri cutyiso ñu ndaha ñu siqui ñu cuhv̄i, ta cunduvaha ñu.

Nu nandaq xica ra Jesús andivi

(Lc. 24.50-53)

¹⁹ Nu ndih̄i cahan Sutú Mañi yo Jesús chihin ra, ta nandaq xica ra andivi, ta chicunyaq ra chiyo vaha Nyoo.

²⁰ Tyicuan ta ra cachica noo chihin ra quita ra ta chahan coyo ra chichahan ra tuhun Nyoo yoso caa sacacú ra añima yo tandih̄i ri ityi. Suri maa Sutú Mañi yo tyinyee chi ra vatyí chaha ra cha sacuvi ra cuaha milagru. Ta tyicuan caa nyehé ñáyivi tyi ndicha tuhun cacahan ra.

Tuhun Nyoo Cha Tyaa San Lucas

Nu sacuhun ra Lucas noo tuhun chi ra Teófilo

¹⁻³ Cha chitón yoho Tata Teófilo, vatyí cha cuaha ñáyiví nducu ñu cuhva ta tyaa ñu nuu tutu tuhun cha cuví nu nyicú ndí. Tyaa ñu tari maa cuhva nacatyí ñáyiví chí yo, ñáyiví cha nyehe ta cahán tuhun ra Jesús nya quiví xihna ri. Ta vityin tahán tucu chí chí yuhu tyi sacote tuhun ra chuun. Vatyí cha yaha sacuahí ta nyehe vahi tandíhi nya nu quichaha. Ta vityin ñañi ñañi ri cuatyai tuhun ra.

⁴ Vatyí coto vahun tyi ndicha cha sacoto ñáyiví chuun.

Nu sacoto noo ángel chí ra Zacarías ama cucacu ra Juan ra sacondutyá chí ñáyiví

⁵ Quiví cha cuví ra Herodes rey nicahnu Judea, chiyó noo tata sutu, chinañi ra Zacarías. Ta yihí ra cuenda ityi tata sutu cha chinañi Abías. Ta ñasihí ra chinañi ña Elisabet. Ta vachi ñu tata ra Aarón, ra chiyó ta cha naha.

⁶ Ta ñahri maa cuatyí ñu iyó nuu Nyoo. Vatyí vaha xaan quichahá ñu tuhun cahán Nyoo. Ta yori maa cuví tyaa cuatyí síqui ñu.

⁷ Soco yori maa sehe ñu chicoo. Vatyí cu Elisabet, ña cuví coo sehe ña. Ta sñn ri nñduvi tahan ñu chahnu xaan ñu.

⁸ Ta noo quiví tahan chí ityi cuenda ra Zacarías cha sacuvi ra tyiño nuu Nyoo.

⁹ Tari cuhva costumbre maa tata sutu, nyehe ra nya ra tahan chí nyatu chí. Ta tahan chí nyatu chí ra Zacarías cha quihvi ra chichi vehe ñuhu, vatyí cahmi ra cutu.

¹⁰ Cha ní ri ca cha ñohó ra chahmí ra cutu cuan, cuaha xaan ñáyiví chicán tahvi ñu ityi chata vehe.

¹¹ Yucuan ta tuví noo ángel cuenda Nyoo nuu ra Zacarías. Ta chicuinanyaa ra chiyó vaha arta nu chahmí ra cutu.

¹² Ta cha nanyehe ra Zacarías chí ángel cuan, iyo xaan cuñí ra. Ta yuhví xaan ra.

¹³ Soco ángel cuan catyí ra chí ra:

—Zacarías, ma yuhvun. Vatyí Nyoo chíñí ra tuhun cahún. Ta ñasihun cu Elisabet

cucoo noo sehe ña. Ta Juan cusacunañun chí cue.

¹⁴ Sññ xaan cucuvi chuun. Ta cuaha xaan ñu, cusññ cuñi quiví cacu cue.

¹⁵ Vatyí sehun, cahnu xaan ra cucuví ra nuu Nyoo. Ma coho ra vinu ta ní ndixi. Ta ñihí xaan cuquihí Tatyí Ii Nyoo chí ra nyata cumañi cacu ra ta tandíhi tyembu cha coo ra.

¹⁶ Ta cuaha xaan ñáyiví Israel cunyicon chí Sutu yo Nyoo cha cuenda ra.

¹⁷ Ta cucoo tunyee iñi Nyoo chí ra. Ta cuquihí xaan Tatyí Ii Nyoo chí ra. Vatyí cucuvi ra tari ra Elías, ra cuví profeta Nyoo ta cha naha. Ta cusanicoo vaha ra chí ñáyiví chihin sehe ñu. Ta cusañaha ra chí ñáyiví quiñi iyó na quichaha ñu tuhun cahán Nyoo. Tyicuan caa cusanduvaha ra chí ñáyiví ta cuatu tuhva ñu chí Nyoo —catyí ángel chí ra Zacarías.

¹⁸ Ta ndaca tuhun ra Zacarías chí ángel, ta catyí ra:

—¿Yoso caa ta cote noo cha ndicha vaha? Vatyí yuhu cha chahnu xain. Ta ñasihí cha chahnu xaan ña ñandíhi —catyí ra.

¹⁹ Ta ángel cuan quichaha catyí ra:

—Yuhu Gabriel nañí. Ta chiqué tyiño Nyoo. Maa ra tachí chí vatyí cahin nuun ta sacote tuhun vaha ihya chuun.

²⁰ Ta vityin nduñihun. Vatyí ña chinó iñun tuhun cahín. Ta ma cuví cahun nyacua nya chino cava tuhun cahin chuhun —catyí ángel cuan chí ra.

²¹ Ta ñáyiví cha nyatú chí ra Zacarías ityi chata vehe, iyo xaan cuñí ñu ñáá tuhun cha cucuee xaan ra chichi vehe ñuhu.

²² Soco cuhva cha quitá ra Zacarías, ña cuví maa cahan ra chihin ñu. Tyicuan ta tuví iñi ñu vatyí iyó cha nyehe ra chichi vehe ñuhu cuan. Ta quichaha cahan ra chihin ñu chihin seña ri. Vatyí ña cuví cahan ra.

²³ Ta quiví cha ndihí tyiño saha ra Zacarías vehe ñuhu cuan, ta cuanuhu ra nya vehe ra.

²⁴ Ta cha yaha tuhun cuan chicoñon sehe ñasihí ra, cu Elisabet. Ta ña quitá maa ña chata vehe cha ní ri ca cha ohon yoo. Ta chicá xiñi ña:

²⁵ “Tyehé caa sacuví Sutu Mañi yuhu chihin, tacuhva ma cahan cuehe ca ñáyiví chí”, chicá xiñi ña.

Nu sacoto noo ángel chi cu María vatyí cucacu ra Jesús

²⁶ Nu cu iñu yoo cha ñohó sehe cu Elisabet, tachí Nyoo chi ángel Gabriel ñuu Nazaret ityi Galilea.

²⁷ Vatyí cucahan ra chihin noo ñaha tyivaa cha nañí María. Ta cha nyaña cha tandaha ña chihin noo ra nañí José. Ta ra José cuan vachi ra tata rey David.

²⁸ Ta tuví ángel cuan nu nyaá ña. Ta quichaha catyi ra chi ña:

—Nocumi chuun, María. Ñihun tumañi iñi nuu Nyoo. Vatyí maa ra nyaá chuhun. Ta chi yoho nasocó xaan ca Nyoo nuu tandihí ca ñusihí —catyi ángel cuan chi ña.

²⁹ Ta cuhva cha chiñi ña cha cahan ra, iyo xaan cuñi ña tuhun cahan ra. Ta ndichí xiñi ña: “¿Ñáa tuhun cha chaha ra ihya nocumi chi yo tyicuan caa?” ndichí xiñi ña.

³⁰ Ta catyi ángel cuan:

—Ma yuhvun, María, vatyí ñihún tumañi iñi nuu Nyoo.

³¹ Vatyí cuacohon noo sehun. Ta sacunañun Jesús chi ra.

³² Cahnu xaan ra cuacuvi ra. Ta cunañi ra Sehe Nyoo ra cuví nuu. Ta Nyoo Sutu Mañi yo cusacuvi ra rey chi ra. Tari cuví ra David, ra vachi ra tata.

³³ Vatyí cunyaca ñaha ra chi ñáyivi Israel tandihí maa tyembu. Ta ma ndihí maa cha cunyaca ñaha ra —catyi ángel cuan chi ña.

³⁴ Yucuan ta ndaca tuhun cu María chi ángel, ta catyi ña:

—¿Yoso caa cuahan tuhun ihya? Vatyí yuhu, ta coo ca yíi.

³⁵ Ta nacahan ángel ta catyi ra:

—Maa Tatyí Ii Nyoo cuquichi sicun. Ta tunyee iñi Nyoo cahnu cuquichi tari noo vico ta casi chi sicun. Yucuan chaha ra ii cha cucacu cunañi ra Sehe Nyoo.

³⁶ Tyicuan caa tucu cu Elisabet ñáyivi chuun. Cucacu noo sehe ña vasi cha chahnu ña. Ñaha cha catyi ñáyivi vatyí ña cuví maa coo sehe. Soco vityin cha ñohó sehe ña. Cha iñu yoo ñohó.

³⁷ Vatyí Nyoo ñahri cha ma cuví sacuvi ra —catyi ángel chi ña.

³⁸ Ta quichaha catyi cu María:

—Yuhu cuví musu Sutu yo Nyoo. Na sacuvi maa ra yoso cuhva catyún —catyi ña.

Yucuan ta cuahan ángel cuan.

Cuahan cu María cuanyehe ña chi cu Elisabet

³⁹ Cuví noo quivi cuan, numi xaan cuahan cu María noo ñuu ityi Judea nu maa ri maa yucu cuví.

⁴⁰ Ta quihvi ña chichi vehe ra Zacarías. Ta chaha ña nocumi chi cu Elisabet.

⁴¹ Cuhva cha chiñi cu Elisabet tuhun cahan cu María, natyoño cha lee cha ñohó chichi ña. Ta chitu ña chihin Tatyí Ii Nyoo.

⁴² Ta chaa nacahan ña, ta catyi ña:

—Nyoo sahá ra tumañi iñi chuun cha nuu tandihí ñusihí. Ta nasocó ra chi sehun.

⁴³ ¿Ta yóo ñaha cuví yuhu? Vatyí quichi sihi Sutu Mañi yo quichi nyehe ña nu nyai.

⁴⁴ Cuhva cha chiñi tuhun cahun, ta natyoño sehi cha ñohó chichi. Vatyí sii xaan cuví chi ra.

⁴⁵ Ta sii xaan cuñi añimon vatyí chinó iñun cha cuacuvi tuhun cahan Nyoo chuhun —catyi cu Elisabet.

⁴⁶ Ta quichaha catyi cu María:

—Sacahní chi Nyoo chihin tandihí añime.

⁴⁷ Ta sii xaan cuví chii vatyí sacacú Nyoo añime.

⁴⁸ Vatyí cuví yuhu noo ñaha ndahvi ta Nyoo tñin cuenda ra chii. Ta vityin tandihí quivi cucatyí ñáyivi chii vatyí cahnu xaan tumañi iñi ñihí.

⁴⁹ Vatyí Nyoo, cahnu xaan cuví ra. Ta cahnu cha sacuví ra chihin. Ta ii xaan sivi ra.

⁵⁰ Ta tyicuan ri ndahvi cuñi ra chi tandihí ñáyivi cha sahá ñáyivi chi ra.

⁵¹ Cahnu xaan cha sacuví ra chihin tunyee iñi iyó chi ra.

Sanaá ra cuhva chicá xiñi ñu cahnu sahá chi.

⁵² Sanocueé ra chi ñu sacahnú chii. Ta ra cha ña cahnu sahá chii, sacucahnú ra chi ra.

⁵³ Chahá Nyoo cha vaha chi ñu cuñi coto cha vaha,

ñu chitó vatyí chiñuhú Nyoo chi. Soco ñu tyayii cha cuñi maa tyi ñahri chiñuhu chi, chihin nundaha nu ndii ñu, sacuhún ra chi ñu.

54 Tyinyeé ra chi ñáyiví Israel cha cuví musu ra.

Ta ña naá iñi ra chi ñu. Nyehé ndahvi ra chi ñu.

55 Tari cuhva catyí Nyoo chi ra Abraham, sutu yo, ta chi sehe ra, tyicuan caa sacuví Nyoo tyicuan ri maa —catyí cu María.

56 Ta cu María ndoo ña chihin cu Elisabet uñi yoo. Ta cha yahá uñi yoo cuan ta cuanuhú ña nya vehe ña.

Quivi cacu ra Juan, ra cha sacondutya

57 Ta chaá quivi cha cuacacu cha lee sehe cu Elisabet. Cacu cue ta rayií cuví cue.

58 Ta cha chiñi ñáyiví cha nyicú yatyin yuvehe ña ta ñáyiví chi ña cha tyicuan caa, sií xaan cuví chi ñu. Ta sií xaan cuñi tucu maa ña. Vatyí vaha xaan cha sacuví Nyoo chihin ña.

59 Ta nu cu uña quivi cha cacu cue, chahan ñu chihin cue vehe ñuhu. Vatyí cuhva cuenda ñu chi cue chi Nyoo. Ta sahá ñu circuncidar chi cue tari cuhva iyó maa ñu. Chahnya ñu chiin ñií cue nu cuví cue rayií. Ta cuñi ñu sacunañi ñu Zacarías chi cue tari sutu cue.

60 Soco sihi cue catyí ña:

—Ma cuví. Juan, cunañi cue.

61 Ta quichaha catyí ñu:

—¿Ñáá tuhun sacunañún Juan chi cue? Yori ñáyiví chi ndo cha nañi tyicuan caa —catyí ñu.

62 Ta quichaha ndaca tuhun ñu chihin seña ri chi sutu cue. Vatyí coto ñu ñáá sivi cuñi ra cha cunañi cue.

63 Ta chican sutu cue noo vitu, ta nuu vitu cuan tyaa ra tyehe caa: “Juan cuví sivi cue”, tyaa ra.

Ta tandihí maa ñu cuan iyo xaan cuñi ñu tuhun cuan.

64 Ta nacahan ra Zacarías caa cuhva ri cuan. Ta quichaha sacahnu ra chi Nyoo.

65 Tandihí maa ñu iyó yatyin ri yuvehe ñu, yuhví xaan ñu tuhun ihya. Ta tandihí maa ñáyiví cha iyó yucu ityi Judea cuan nacatyí ñu chi tahan ñu tuhun ihya.

66 Ta tandihí maa ñáyiví cha chitó tuhun cuan, ndichí xiñi ñu, ta ndaca tuhun ñu chi tahan ñu:

—¿Yóó ra cuví cha lee cuan? —catyí ñu.

Vatyí ndicha, Nyoo nasoco xaan ra chi cue.

Nu sacahnú ra Zacarías chi Nyoo

67 Sutu cue, ra Zacarías, tyitú ra chihin Tatyí Ii Nyoo. Tyicuan ta quichaha cahan ra tuhun cha chahá Nyoo chi ra, ta catyí ra:

68 —Cahnu xaan ra cuví Sutu Mañi yo Nyoo cuenda yo ñu Israel.

Vatyí quichí ra nu nyicú yo, cha cuví yo ñáyiví chi ra.

Ta sacacu ra chi yo.

69 Ta chaha ra noo ra cahnu chi yo, cha cusacacu chi yo.

Tata ra David ra cha sacuví tyiño nuu Nyoo vachi ra.

70 Tyicuan caa cahan Nyoo chihin yuhu ra cacuví profeta cuenda ra ta cha naha.

71 Vatyí tyicuan caa cusacacu ra chi yo ndaha ra xaan iñi chi yo, ra cha tasi cuñi nyehé chi yo.

72 Tyicuan caa cundahvi cuñi nyehé ra chi ñáyiví chi yo ta cha naha.

Ta ma sanaa ra iñi ra tuhun cahan ra.

73 Ican ihya tuhun cahan Nyoo chihin ra Abraham sutu yo.

74 Catyí ra vatyí cusacacu ra chi yo ndaha ra xaan iñi chi yo.

Vatyí ma yuhvi ca yo sacahnu yo chi ra.

75 Ta maa ra sanducachi ra iyó yo nuu ra.

Ta vaha coo yo nuu ra tandihí quivi cha cuacoo yo ñáyiví —catyí ra Zacarías.

76 Ta catyí ra Zacarías chí cha lee cuan tyehe caa:

—Ta yoho sehi, profeta Nyoo cahnu cucatyí ñáyiví chuun.

Vatyí cuhun ityi nuu Sutu Mañi yo. ta cucahun tuhun ra chihin ñáyiví vatyí cha cuñi quichi ra.

77 Ta cusacoton chí ñáyiví vatyí cunasaha Nyoo tucahnu iñi cuatyí ñu.

Ta tyicuan caa ta cacu aña ñu.

78 Vatyí Sutu yo Nyoo cuñi ra chí yo. Ta cundahvi cuñi ra chí yo.

Ta saquichí ra noo ra tyinyeé chí yo. Tari noo ñuhu ñanyii cucuvi ra.

79 Vatyí chihin cha sañahá ra chí yo sacundichín ra nu nyicú yo nu ñaa iñi cha catyí cuatyí yo.

Ta cusañaha ra chí yo yoso caa quihvi yo ityi vaha —catyí ra Zacarías.

80 Ta cha luhlu cuan cuahan chahnu ra. Nyee cuñi ra chihin Tatyí Ii Nyoo. Ta

chicoo ra noo chiqui ndi nyacua nya quivi cha chicohon nuu ñáyivi Israel chi ra.

2

Quivi cacu ra Jesús (Mt. 1.18-25)

¹ Ta quivi cuan iyó noo ra nyacá ñaha, nañi ra Augusto. Tachi ra tyiño natyaa ra sivi tandihi ñáyivi nicahnu ñuhu ñayivi.

² Ta quivi cuan ra Cirenio cuví ra ra nyacá ñaha tandihi ñuu ityi Siria.

³ Ta tahañ chi cuhan tandihi ñáyivi nya ñuu ñu. Vatyí cuhva ñu sivi ñu yucuan.

⁴ Yucuan chaha quitá ra José ñuu Nazaret ityi Galilea. Ta chahan ra ityi Judea ñuu Belén nu cacu ra David. Yucuan chahan ra vatyí tata ra David vachi ra.

⁵ Ta chahan ra chi cuhva ra sivi ra chihin cu María. Ta cha cuñi tandaha ña chihin ra. Ta ñohó sehe ña.

⁶ Ta chiquitahan chaa quivi cha cacu sehe ña cha ni ri ca cha ñohó ñu Belén cuan.

⁷ Ta yucuan cacu sehe nuu ña. Ta natyihí ña chi cue chichi sahma. Ta nandacun ña chi cue chichi noo nu chachí quití. Vatyí cuaha xaan ñáyivi cha coyo ñuu cuan. Ta ña nuña ca ni minoo vehe nu cunyaa ñu.

Nu cahán ángel chihin ra sahá cumi mbee

⁸ Yatyin ñuu Belén cuan nyicú suhva ra casahá cumi mbee sana ra cha cha cuaa cuan.

⁹ Ta sana iñi ra ta tují noo ángel Nyoo. Ta cha ndichin Nyoo Sutu Mañi yo ndundichin nicachico ri nu canyicú ra. Ta nayuhví xaan ra.

¹⁰ Ta quichaha cahán ángel cuan, ta catyí ra tyehe caa:

—Ma yuhvi ndo. Vatyí cuacatyí mai noo tuhun chi ndo. Noo tuhun cha sii xaan cuacuví chi tandihi ñáyivi.

¹¹ Vatyí vityin cacu ra sacacú aña ndo ñuu ra David. Noo ra cuví Cristo, ra cuví Sutu Mañi yo.

¹² Ta ihya cuví seña chahi chi ndo, cunyehe ndo chi cha lee cuan, siqui noo cue sahma. Catuví cue chichi noo nu chachí quití —catyí ángel chi ra casahá cumi mbee cuan.

¹³ Ta caa cuhva ri cuan cha coyo cuaha xaan ca ángel casacahnú ra chi Nyoo, ta cacatyí ra:

¹⁴ Sacahnu yo chi Nyoo nu nyaá ra gloria. Ta ñáyivi iyó siqui ñuhu ñayivi cha ñihi tumañi iñi ra, na coo taxi aña ñu, catyí ángel cuan.

¹⁵ Yucuan ta cuanuhu coyo ángel cuan gloria. Tyicuan ta ra casahá cumi mbee quichaha catyí ra chi ra tahan ra:

—Coho ndo Belén. Cunyehe yo ñáa cha cuví. Vatyí maa Sutu yo Nyoo sacoto chi yo.

¹⁶ Tyicuan ta numi xaan cuahan coyo ra Belén. Ta nañihí ra chi cue chihin cu María ta ra José. Ta catuví cue noo nu chachí quití.

¹⁷ Ta yaha cha canyehe ra chi cue, ta canacatyí ra chi ñu ñáa ndihi tuhun cahan ángel chihin ra cuenda cha lee cuan.

¹⁸ Ta tandihi ñu chiñi tuhun cahan ra, iyo xaan cuñi ñu.

¹⁹ Soco cu María ta cuhva chicá ri xiñi ña tuhun cuan.

²⁰ Ta ra sahá cumi chi mbee cuan cuanuhu coyo ra. Ta casacahnú ra chi Nyoo cha cuenda cha cachiñi ra ta canyehe ra. Vatyí chino cava tandihi cha catyí ángel chi ra.

Nu cuacuhva cuenda ñu chi ra Jesús chi Nyoo vehe ñuhu cahnu

²¹ Ta nu cu uña quivi, saha ñu circuncidar chi cue, tari cuhva tuhva maa ñu. Ta sacunañi ñu chi cue, Jesús. Suri maa sivi cha catyí ángel chi cu María quivi cha cumañi ca cohon sehe ña.

²² Ta cha yaha quivi cha tahan chi vatyí ndundí ñu nuu Nyoo, tari cuhva catyí maa ley Nyoo cha tyaa ra Moisés, tyicuan ta cuahan ñu Jerusalén. Vatyí cuacuhva cuenda ñu chi cue chi Nyoo.

²³ Sacuví ñu tyicuan caa vatyí ñn caa maa catyí ley tyehe caa: “Tandihí rayi cha cuví sehe nuu ñu, cucuhva cuenda ñu chi Nyoo”, catyí ley cuan.

²⁴ Ta chahan ñu chicuhva cuenda ñu uvi tahan quití tari cuhva catyí maa ley Sutu yo Nyoo nu catyí chi tyehe caa: “Cuhva ndo uvi tahan cucu o uvi tahan ndicuiya”, catyí ley cuan.

²⁵ Ta quivi cuan iyó noo ra ñuu Jerusalén cha nañi Simeón. Ta cuví ra noo ra vaha, ra sacahnú chi Nyoo. Ta nyatú tuhva ra nya quivi cusacacu Nyoo chi ñáyivi Israel. Ta yihí ra Tatyí Ii Nyoo.

26 Ta sacoto Tatyí li Nyoo chi ra vatyi ma cúvi ra cha ni ri ca cha ta nyehe ca ra chi ra sacacú chi ñu Israel, ra cuví Cristo, ra cha cusaquichi Sutu yo Nyoo.

27 Ta ra cuan chahan ra vehe ñuhu cuhva catyi maa Tatyí li Nyoo chi ra. Cuhva cuan chahan tucu sutu ta sihi cha lee cuan chinyaca ñu chi cue vehe ñuhu cahnu, vatyi sacuvi ñu tari cuhva catyí maa ley.

28 Ta quehen ra Simeón chi ra Jesús. Ta tyihí sucun ndaha ra chi ra. Ta quichaha sacahnu ra chi Nyoo. Ta catyí ra:

29 —Sutu Mañi yuhu. Na cúvi mai vityin chihin cha vaha.

Vatyi cha sacuvun cha catyün chi yuhu cha cuví sehun.

30 Vatyi cha nyehí chihin nui chi ra cusacacu chi ndi.

31 Vatyi sañahun chi ra nuu tandihí ñáyivi.

32 Cha catyi ra ta cucahnu ñáyivi Israel nuu inga ñáyivi.

Ta ican ra cuví ra cha sacundichín añaima tandihí inga ñáyivi cha ñima ñu Israel cuví. Vatyi cusacuvi ra na cutuñi iñi ñu tuhun Nyoo —catyí ra Simeón.

33 Ta ra José chihin sihi ra Jesús, iyo xaan cuñi ñu cha cahan ra Simeón tuhun cha lee cuan.

34 Yucuan ta chican tahvi ra Simeón chi Nyoo chaha ñu. Ta catyí ra chi cu María sihi ra Jesús:

—Nyehe chi cha lee ihya. Vatyi cuaha xaan ñáyivi cuchino iñi ñu chi ra quivi coto ñu tuhun ra, ta cucacu añaima ñu. Soco cuaha ñu ma chino iñi ñu chi ra, ta cunaa ñu. Ta cucahan ñu chi ra.

35 Ta cha tyicuan caa cusanatuvi ra cha caa añaima noo noo ñáyivi. Soco cha cuenda yoho, María. tari cha uhvi cha yahá sava noo tyicaa añaima ñáyivi, tyicuan caa cha uhvi cunyahún cha catyi cha lee ihya —catyí ra Simeón.

36 Ta yucuan ñohó tucu noo ñaha cha cuví profeta Nyoo. Ta cha chahnu xaan ña. Nañi ña Ana. Ta sehe ra Fanuel noo ra vachi tata ra Aser cuví chi ña. Luhlu xaan ña ta tandaha ña, ta ucha ri cuiya chiyo ña chihin yi ña ta chihí ri ra.

37 Ta cha cumi xico cumi cuiya chihí yi ña. Ta vehe ñuhu cahnu ña quitá ña, vatyi ndiyaca ta ñiyaca chicán tahvi ña chi Nyoo.

Ta iyó cuhva cha ña chachí ña cha ni ri ca cha chicán tahvi ña.

38 Ta cuhva cha ñohó ra José ta cu María chihin cha lee, cha ña nu canyicú ñu. Ta nacuhva ña tyahvi nyoo chi Nyoo. Ta quichaha cahan ña tuhun ra Jesús chihin tandihí ñáyivi cha nyatú tuhva cha quita ñuu Jerusalén chichi ndaha ra ñuu Roma.

Nu cuanuhu ñu nya Nazaret

39 Cha yaha cha sacuvi ñu tandihí maa yoso caa catyí ley Sutu yo Nyoo, ta cuanuhu ñu nya Galilea nya ñuu ñu nu nañi Nazaret.

40 Ta ra Jesús cuahan chahnu ca ra. Ta cuahan ndunye ca ra ta cuahan chicoo ca cha chiñi tuñi Nyoo. Vatyi nasoco Nyoo chi ra.

Nu ñohó ra Jesús chichi vehe ñuhu

41 Ra José chihin sihi ra Jesús ndihí cuiya ri tuhva ñu chahán nya Jerusalén cha vico pascua.

42 Ta quivi ndihí ra Jesús uchi uvi cuiya, chahan tandihí ñu Jerusalén tari tuhvá maa ñu chahán cha vico.

43 Ta quivi ndihí vico ta cuandichi ñu, ta ra Jesús ndoo ra Jerusalén. Ta ña saha ñu cuenda.

44 Cuñi maa ñu vatyi cuandichi ra mahñu nu tuvi ñáyivi cuan. Yucuan chaha ñahri chicá iñi ñu chicá ityi ñu noo quivi. Tyicuan ta nanducu ñu chi ra chichi nu tuvi ñáyivi cuan,

45 ta ña nañihí ñu chi ra. Tyicuan ta cuanuhu chata ñu cuananducu ñu chi ra nya Jerusalén.

46 Cha yaha cha uñi quivi ta nañihí ñu chi ra chichi vehe ñuhu cahnu cuan. Nyaá ra chihin ra sacuahá cuenda ley vehe ñuhu. Ta tyasohó ra cuan tuhun cahan ra. Ta ndacá tuhun ra tuhun chi ra.

47 Ta tandihí ñu chiñi tuhun cahan ra, iyo xaan cuñi ñu chihin cha chiñi tuñi ra, ta chihin tuhun cha nacahán ra.

48 Cuhva cha nanyehé sutu ra ta sihi ra chi ra, iyo xaan cuñi ñu. Ta sihi ra catyí ña chi ra:

—Sehe luhli. ¿Ñáá tuhun cha sacuvun chi ndi tyehe caa? Sutun ta yuhu chica xaan iñi ndi ta nanducu xaan ndi chuun —catyí ña.

49 Tyicuan ta catyí ra Jesús:

—¿Ñáá tuhun cha nanducu ndo chii? ¿Atu ña chito ndo vatyí niñi cuñí chi cha cahin tuhun Suti chihin ñáyivi? —catyí ra.

⁵⁰ Soco ña cutuñí iñi ñu tuhun cahan ra.

⁵¹ Tyicuan ta cuanuhu ra chihin ñu nya Nazaret. Ta quichahá ra tuhun cahán ñu. Ta sihi ra naquehen vaha ña tandihi tuhun ihya chichi añima ña.

⁵² Yucuan cuví nu cuacuahnu ca ra Jesús. Ta cuahan chaa ca cha chiñi tuñi xiñi ra. Ta sii xaan cuví chi Nyoo chihin ra ta ñáyivi ñandihí.

3

Ra Juan, ra sacondutya, cahán ra tuhun Nyoo nuu ñáyivi

(Mt. 3.1-12; Mr. 1.1-8; Jn. 1.19-28)

¹ Nu ndihí chahun cuiya cha cuví ra Tiberio rey cahnu ñuu Roma, ta ityi Judea nyacá ñaha ra Poncio Pilato. Ta ra Herodes nyacá ñaha ra Galilea. Ta yañi ra, ra Felipe nyacá ñaha ra Iturea chihin Traconite. Ta ra Lisancias nyacá ñaha ra Abilinia quívi cuan.

² Ta ra Anás chihin ra Caifás, ican ra cuví ra ra cacuví nuu chi tandihí tata sutu. Ta quívi cuan cahán Nyoo chihin ra Juan sehe ra Zacarías noo nu chiqui ndii.

³ Ta ra Juan chicá noo ra tandihí ñuu cha nyaá yatyin ri nu nyaá noo yuvi cahnu cha nañi Jordán cahán ra tuhun Nyoo chihin ñáyivi. Ta catyí ra chi ñu na ndu uvi iñi ñu cuatyí ñu ta na condutya ñu. Tyicuan caa ta Nyoo saha ra tucahnu iñi chi ñu, catyí ra.

⁴ Tyehe caa cuví tari cuhva catyí nu libru cha tyaa ra Isaías profeta Nyoo ta cha naha. Ta catyí ra:

Chiñí yo cha caná chaa noo ra noo nu chiqui ndii, ta catyí ra:

“Tari sanduvahá ndo noo ityi, tyicuan caa sanduvaha ndo añima ndo vatyí cuaquichi Sutu Mañi yo.

Nuña ndo noo ityi ndoo chi ra na quihvi ra añima ndo.

⁵ Tari cha sanandutú ndo noo ticoho, ta tari sandundaá ndo noo yucu cahnu, ta tari sandundoó ndo cha yacua, ta tari sanduvií ndo nu quiñi caa, tyicuan caa nasama ndo cuhva iyó ndo.

⁶ Tyicuan caa ta tandihí ñáyivi ta nyehe ñu vatyí Nyoo chaha ra cha cacú añima ñu.”

⁷ Ta tyicuan caa cahán ra Juan chihin ñáyivi. Yucuan ta cuhva cha chiñi ñu tuhun cahán ra, ta catyí ñu chi ra vatyí na sacondutya ra chi ñu. Yucuan ta quichaha catyí ra chi ñu:

—¡Nyoho tari noo tata coo xaan cuví ndo! ¿Yóo cha sañaha chi ndo vatyí chihin cha condutya ri ndo ta ma tachi tuñi ca Nyoo chi ndo?

⁸ Nasama ndo cuhva iyó ndo, na nyehe ñáyivi vatyí cha ndu uvi iñi ndo cuatyí ndo. Ta ma catyí ndo vatyí tata ra Abraham vachi ndo. Vatyí nyacua nya noo yuu ihya, Nyoo cuví sananduvi ra noo ñáyivi chi ra Abraham.

⁹ Tari yutun cha ña chahá chiti, tyicuan caa cuví ndo. Vatyí ña sacuví ndo tari cuhva cuñí Nyoo. Ta yutun cha ña chaha chiti, cahnya ñáyivi chi tun. Ta cahmi ñu chi tun. Tyicuan caa tucu nyoho cha cuñí cuiri chuhun ndo nu cayu ñuhu —catyí ra Juan.

¹⁰ Yucuan ta quichaha ndaca tuhun ñáyivi chi ra:

—¿Yoso caa sacuvi ndi, cuñí yoho? —catyí ñu.

¹¹ Ta nacahan ra Juan, ta catyí ra:

—Yóo ra cha iyó uvi tahan camisa, tahan chi cuhva ra noo chi ra cha ñahri chi. Ta yóo ñu cha iyó cha cachi, tahan chi cuhva ñu cha cachi ñu ñahri chi —catyí ra.

¹² Ta chaá coyo tucu suhva ra catavá xuhun cuenda gobiernu Roma, ta cuñí ra condutya ra. Ta candaca tuhun ra chi ra Juan:

—Maestro, ¿yoso caa sacuvi tucu nyuhu? —catyí ra.

¹³ Ta catyí ra Juan chi ra:

—Tari cuhva catyí ley tava ndo xuhun. Ta ma tava ndo cuaha ca.

¹⁴ Yucuan ta quichaha candaca tuhun tucu suhva sindaro chi ra, ta catyí ra:

—Ta nyuhu tucu, ¿yoso caa sacuvi ndi? —catyí ra.

Ta nacahan ra Juan ta catyí ra:

—Ma tinyaa ca ndo cha chii ñáyivi. Ta ma tyanaha ndo chi ñu. Ma tyaa ndo cuatyí

siqui ñu tatu ñahri cuatyí ñu. Ta ndoo ndo vaha yoso cuhva yahvi ndo —catyí ra Juan.

¹⁵ Iyo cuñí ñáyivi tuhun cahán ra Juan. Ta cuñí ñu tyi ican ra cuví Cristo, ra cha sacacú chi yo.

¹⁶ Soco ra Juan catyí ra chi tandihí ñu:

—Cha ndicha vatyí sacondutyé chi ndo chihin ndutya. Soco cha yaha yuhu cuhin cuquichi inga ra cusacondutya chi ndo chihin Tatyí li Nyoo ta chihin ñuhú. Iyó ca tunyee iñi chi maa ra, ta ñima ca yuhu. Vatyí ña nañé cha cuví musu ra ta niri cha ndachi ñi xityin ndichan ra.

¹⁷ Tari noo ra cha cuanaquehen vaha niñi, ta natyihí vaha ra chichi yaca. Ta cahmi ra mihin. Tyicuan caa cuví maa Sutu Mañi yo chihin yo. Tatu chinó iñi yo chi ra, cunaquehen vaha ra chi yo, ta cunyicu yo chihin ra. Soco tatu ña chinó iñi yo chi ra cutyihí ra chi yo anyaya nu cayu ñuhú cha ma ndahva ca maa —catyí ra Juan.

¹⁸ Ta tyehe caa cahan ra Juan chihin ñu. Ta cuaha xaan ca tuhun cahan ra nuu ñu tyi cuaquichi Sehe Nyoo ta cua sacacu ra chi yo.

¹⁹ Ta cahán ra Juan chi ra Herodes cha cuenda tandihí cuii cha ña vaha nyacuví ra. Vatyí naquehen ra chi cu Herodías, ñasihí ra Felipe yañi ra. Ta cuaha ca cha ña vaha nyacuví ra.

²⁰ Soco ra Herodes tahán chi cha tyasoho ra tuhun ihya soco ña cuñí ra. Nu ndihí tuhun tyihí ndihí ra chi ra Juan vehe caa.

Quivi cua condutya ra Jesucristo

(Mt. 3.13-17; Mr. 1.9-11)

²¹ Cumañi ca cha cohon ra Juan vehe caa sacondutya ra chi tandihí ñáyivi. Ta sacondutya tucu ra chi ra Jesús. Ta cha niri ca cha chicán tahvi ra Jesús chi Nyoo ta nuña andivi.

²² Ta nyehe ra Tatyí li Nyoo quichí siqui ra tari noo paloma. Ta tyacu noo ndusu andivi cha catyí tyehe caa:

—Yoho cuvún Sehi cha cuñí. Ta si xaan cuñí chuhun —catyí ndusu cuan.

Ñáyivi vachi ra Jesucristo tata

(Mt. 1.1-17)

²³ Oco uchi cuiya ra Jesús ta quichaha saha tyiño ra tyiño Nyoo. Ta tandihí ñáyivi

cuñí maa ñu vatyí sehe ra José cuví chi ra. Ta ra José, sehe ra Elí cuví chi ra.

²⁴ Ta ra Elí, sehe ra Matat cuví chi ra. Ta ra Matat, sehe ra Leví cuví chi ra. Ta ra Leví, sehe ra Melqui cuví chi ra. Ta ra Melqui, sehe ra Jana cuví chi ra. Ta ra Jana, sehe ra José cuví chi ra.

²⁵ Ta ra José, sehe ra Matatías cuví chi ra. Ta ra Matatías, sehe ra Amós cuví chi ra. Ta ra Amós sehe ra Nahum cuví chi ra. Ta ra Nahum, sehe ra Esli cuví chi ra. Ta ra Esli, sehe ra Nagai cuví chi ra.

²⁶ Ta ra Nagai, sehe ra Maat cuví chi ra. Ta ra Maat, sehe ra Matatías cuví chi ra. Ta ra Matatías sehe ra Semei cuví chi ra. Ta ra Semei, sehe ra José cuví chi ra. Ta ra José, sehe ra Judá cuví chi ra.

²⁷ Ta ra Judá, sehe ra Joana cuví chi ra. Ta ra Joana sehe ra Resa cuví chi ra. Ta ra Resa, sehe ra Zorobabel cuví chi ra. Ta ra Zorobabel, sehe ra Salatiel cuví chi ra. Ta ra Salatiel, sehe ra Neri cuví chi ra.

²⁸ Ta ra Neri, sehe ra Melqui cuví chi ra. Ta ra Melqui, sehe ra Adi cuví chi ra. Ta ra Adi, sehe ra Cosam cuví chi ra. Ta ra Cosam, sehe ra Elmodam cuví chi ra. Ta ra Elmodam, sehe ra Er cuví chi ra.

²⁹ Ta ra Er, sehe ra Josué, cuví chi ra. Ta ra Josué, sehe ra Eliezer cuví chi ra. Ta ra Eliezer, sehe ra Jorim cuví chi ra. Ta ra Jorim, sehe ra Matat cuví chi ra.

³⁰ Ta ra Matat, sehe ra Leví cuví chi ra. Ta ra Leví, sehe ra Simeón cuví chi ra. Ta ra Simeón, sehe ra Judá cuví chi ra. Ta ra Judá, sehe ra José cuví chi ra. Ta ra José sehe ra Jonán cuví chi ra. Ta ra Jonán, sehe ra Eliaquim cuví chi ra.

³¹ Ta ra Eliaquim, sehe ra Melea, cuví chi ra. Ta ra Melea, sehe ra Mainán cuví chi ra. Ta ra Mainán, sehe ra Matata cuví chi ra. Ta ra Matata, sehe ra Natán cuví chi ra.

³² Ta ra Natán, sehe ra David, cuví chi ra. Ta ra David, sehe ra Isaí cuví chi ra. Ta ra Isaí, sehe ra Obed cuví chi ra. Ta ra Obed, sehe ra Booz cuví chi ra. Ta ra Booz, sehe ra Salmón cuví chi ra. Ta ra Salmón, sehe ra Naasón cuví chi ra.

³³ Ta ra Naasón, sehe ra Aminadab cuví chi ra. Ta ra Aminadab, sehe ra Aram cuví chi ra. Ta ra Aram, sehe ra Esrom cuví chi ra. Ta ra Esrom, sehe ra Fares cuví chi ra. Ta ra Fares, sehe ra Judá cuví chi ra.

³⁴ Ta ra Judá, sehe ra Jacob cuví chi ra.

Ta ra Jacob, sehe ra Isaac cuví chi ra. Ta ra Isaac, sehe ra Abraham cuví chi ra. Ta ra Abraham sehe ra Taré cuví chi ra. Ta ra Taré, sehe ra Nacor cuví chi ra.

³⁵ Ta ra Nacor, sehe ra Serug cuví chi ra. Ta ra Serug, sehe ra Ragau cuví chi ra. Ta ra Ragau, sehe ra Peleg cuví chi ra. Ta ra Peleg, sehe ra Heber cuví chi ra. Ta ra Heber, sehe ra Sala cuví chi ra.

³⁶ Ta ra Sala, sehe ra Cainán cuví chi ra. Ta ra Cainán, sehe ra Arfaxad cuví chi ra. Ta ra Arfaxad, sehe ra Sem cuví chi ra. Ta ra Sem, sehe ra Noé cuví chi ra. Ta ra Noé, sehe ra Lamec cuví chi ra.

³⁷ Ta ra Lamec, sehe ra Matusalén cuví chi ra. Ta ra Matusalén sehe ra Enoc cuví chi ra. Ta ra Enoc, sehe ra Jared cuví chi ra. Ta ra Jared, sehe ra Mahalaleel cuví chi ra. Ta ra Mahalaleel, sehe ra Cainán cuví chi ra.

³⁸ Ta ra Cainán, sehe ra Enós cuví chi ra. Ta ra Enós, sehe ra Set cuví chi ra. Ta ra Set, sehe ra Adán cuví chi ra. Ta ra Adán, sehe Nyoo cuví chi ra.

4

Nu nducú nyehe cuihna chi ra Jesús (Mt. 4.1-11; Mr. 1.12-13)

¹ Ta chitú ra Jesús chihin Tatyí Ii Nyoo cha yahá condutya ra. Yucuan ta quita ra nu cuví yuvi cahnu Jordán ta cuanuhu ra. Ta Tatyí Ii Nyoo chinyaca chi ra noo nu chiqui ndii.

² Yucuan chinyaá ra uvi xico quivi. Ta nducú nyehe cuihna chi ra. Ña chachi maa ra quivi cuan. Yahá cuan ta quichaha chisoco ra.

³ Yucuan ta quichaha catyí cuihna chi ra:
—Tatu ndicha cha Sehe Nyoo cuví chuun, catyí chi yuu cha catuví ihya, na nanduvi pan.

⁴ Ta ra Jesús nacahan ra, ta catyí ra:
—Catyí tuhun Nyoo tyi ñima chihin cha cachi ri ñáyivi ta conyito ñu. Soco conyito tucu añima ñu chihin tandihí tuhun cahán Nyoo —catyí ra Jesús chi cuihna.

⁵ Yucuan ta quehen cuihna chi ra Jesús. Ta cuahan ra chihin ra noo nu sucun ca. Ta numi ri sañahá ra tandihí nu nyacá ñaha ñáyivi síqui ñuhu ñáyivi.

⁶ Ta cuihna catyí ra chi ra Jesús:

—Ndaha yuhu nyaá tandihí ñáyivi ihya. Vatyí chahá Nyoo cha cunyaca ñahi tandihí ihya síqui ñuhu ñáyivi. Ta cuví cuhve yóo chi cuñí mai cuhve.

⁷ Cuhve tandihí ñáyivi cuan chuun tatu yoho ta cuiñi chitun nui, ta sacahnun chii —catyí cuihna cuan chi ra Jesús.

⁸ Soco ra Jesús catyí ra chi cuihna:
—Canyaha chuun nui, cuihna. Vatyí nyaá tuhun cahán Nyoo ta catyí chi tyehe caa: “Noo ri chi maa Nyoo sacahnu yo. Ta ñn ri chi maa ra quichaha yo.”

⁹ Yahá cuan ta quehen tucu cuihna cuan chi ra Jesús. Ta chinyaca ra chi ra nya ñuu Jerusalén. Ta sandaa ra chi ra xiñi vehe ñuhu cahnu. Ta quichaha catyí ra chi ra Jesús:

—Tatu ndicha cha Sehe Nyoo cuví chuun, sandupehla nyacua nya nu ñuhú.

¹⁰ Vatyí nyaá nu catyí chi nu tutu Nyoo tyehe caa:

Nyoo cusaquichi ra ángel, quichi saha cuenda chuun.

¹¹ Cunaquehen ra chuun chihin ndaha ra. Ta ma cuhva ra cha taxin chahun chihin yuu —catyí ra chi ra.

¹² Tyicuan ta nacahan ra Jesús, ta catyí ra:

—Soco catyí tucu nu tutu Nyoo tyehe caa: “Ma nducu nyehun chi Sutu Mañi yo Nyoo”, —catyí ra.

¹³ Ta cuihna ña cuví sandahvi ñaha ra chi ra Jesús. Ta cuahan ra suhva quivi.

Nu quichahá ra Jesús cahan ra tuhun Nyoo chihin ñáyivi

(Mt. 4.12-17; Mr. 1.14-15)

¹⁴ Cha yahá tuhun cuan, ta nachaa ra ityi Galilea. Ta tyitú ra yihí chihin tunyee iñi Tatyí Ii Nyoo. Ta cahán ñáyivi tuhun ra tandihí ri ityi.

¹⁵ Ta sañahá ra chi ñáyivi nu cuví vehe ñuhu tandihí ri ñuu. Ta tandihí ñu sacahnú ñu chi ra.

Nu nyaá ra Jesús Nazaret ñuu nu chahnu ra

(Mt. 13.53-58; Mr. 6.1-6)

¹⁶ Tyicuan ta nachaa ra Jesús nya Nazaret, ñuu nu chahnu ra. Ta noo quivi nyitatú ñáyivi, ta quihvi ra chichi vehe ñuhu, tari tuhva maa ra. Ta chicunanyaa ra vatyí cua sacuaaha ra tuhun Nyoo.

17 Ta chaha ñu noo libru Nyoo chi ra cha tyaa ra Isaías ra profeta Nyoo ta cha naha. Ta cuhva cha nuña ra, nañihí ra noo nu catyí tyehe caa. Ta quichaha sacua ra:

18 Nyaá Tatyí Ii Nyoo chihin vatyí maa ra tachí chii.

Vatyí nacachí ra chii vatyí sañahi tuhun vaha ra chi tandihí ñáyiví ndahví.

Tachí ra chii vatyí sanduvahi chi ñu uhvi añima.

Tachí ra chii vatyí sacote tuhun ra chi ñu nyaá ndaha ra ña vaha, vatyí cusacacu Nyoo chi ñu.

Tachí ra chii vatyí sanyehi chi ñáyiví cuaa. Ta sacote chi ñu nyehe tndoho vatyí cucacu ñu.

19 Ta sacote chi ñu vatyí cha chaá quiví cha chaha Nyoo tumañi iñi chi ñu.

20 Ndhí sacua ra ta nacasí ra nu libru cuan. Ta nacuhva ra chi noo ra cha nyaá vehe ñuhu cuan. Ta chicunyaá ra. Yucuan ta tandihí ñáyiví cha nyicú cuan ndoo ñu nyehe ñu chi ra.

21 Yucuan ta quichaha catyí ra chi ñu:

—Vityín quiví ihya chinó cava tuhun cha nyaá nu libru cha sacuahí nuu ndo —catyí ra Jesús chi ñu.

22 Tandihí ñu, vaha cahán ñu tuhun ra Jesús. Ta iyo cuñí ñu tuhun cha cahán ra vatyí vaha xaan cha cahán ra. Ta quichaha ndaca tuhun ñu chi tahan ñu:

—¿Atu ñima ra ihya cuví sehe ra José?

23 Ta quichaha catyí ra Jesús chi ñu:

—Chité cha nacacá iñi ndo. Vatyí tyehe caa cua catyí ndo chii: “Tatu ra sanduvahá cuvún, sanduvaha xihna ca chi maun. Tandihí cha chiñí ndi cha sacuvún ñuu Capernaum. Sacuví tucu ñuu maun vityín.”

24 Ta catyí tucu ra Jesús:

—Cha ndicha vatyí ni noo ra profeta Nyoo, ta ña quichaha ñáyiví ñuu ra chi ra.

25 Ta cha ndicha catyí chi ndo vatyí cuaha xaan ñu chihí yí chiyo Israel ihya cuiya cha chicá noo ra Elías. Ta cuiya cuan ña coon savi uñi cuiya sisava. Ta cuaha xaan tama chiyo.

26 Soco ña tachí Nyoo chi ra Elías vatyí tyinyee ra chi ni noo ñu chihí yí Israel cuan. Soco tachí Nyoo chi ra nu nyaá noo ñaha chihí yí ñuu Sarepta cha nyaá vatyín ñuu Sidón.

27 Ta tyicuan caa tucu cuaha ra yihí cuehe cha tyahyu coño chi chiyo Israel quiví chicá noo ra Eliseo, profeta Nyoo. Soco ña nduvaha ni noo ra Israel cuiya cuan. Minoo ri ra Naamán ra ñuu Siria nduvaha —catyí ra Jesús.

28 Ta cha chiñí ñáyiví nyicú vehe ñuhu cuan tuhun cuan, cuxaan xaan tandihí cuií ñu.

29 Ta nducuita ñu. Ta tññ ñu chi ra Jesús. Tava ñu chi ra xiñi noo yucu nya yuhu ñuu, vatyí tuchi ñu chi ra yucuan.

30 Soco ra Jesús yaha ri ra mahñu ñu ta cuahan ra.

Noo ra cha yihí tatyí ña vaha chi

(Mr. 1.21-28)

31 Ta cuahan ra Jesús Capernaum cha nya Galilea quiví nyitatu ñáyiví. Ta quichaha sañaha ra chi ñáyiví.

32 Ta iyo cuñí ñu tuhun cahán ra. Vatyí ñihi cahán ra tari noo ra iyó vaha ityi chi cha cahán.

33 Ta chichi vehe ñuhu cuan nyaá noo ra cha yihí tatyí ña vaha chi. Ta quichaha canachaa ra, ta catyí ra:

34 —Saña chi ndi, yoho Jesús ra ñuu Nazaret. ¿Ñáá tuhun cha tyihun chuun chihin ndi? ¿Atu vachi sanaun chi ndi? Yuhu, ñohó nui chuun. Ta chité vatyí Sehe Nyoo cuví chuun —catyí tatyí ña vaha cuan sacahan chi chi ra cuan.

35 Ta cahan ra Jesús chihin tatyí ña vaha cuan, ta catyí ra:

—Taxi ri. Saña chi ra ndahví chiña —catyí ra.

Tyicuan ta tatyí ña vaha cuan sanduva chi ra cuan nu ñuhú. Ta quita tatyí cuan chi ra ta cuahan. Ta ñahri ca sacuvi chi chi ra ndahví cuan.

36 Tandihí ñáyiví nayuhví ñu. Ta quichaha catyí ñu chi tahan ñu:

—¿Ñáá túhun cuví ihya? Ra Jesús ihya chihin cha iyó ityi chi ra ta chihin tunyee iñi ta tachi ra chi tatyí ña vaha cuan na quita. Ta quichaha chi nu cahán ra —catyí ñu.

37 Ta tandihí ri ityi cahán ñáyiví tuhun ra Jesús.

Nu sanduvaha ra Jesús chi maha tyiso ra Simón Pedro

(Mt. 8.14-15; Mr. 1.29-31)

³⁸ Ta quita ra Jesús chichi vehe ñuhu cuan. Ta chaꝥ ra vehe ra Simón. Ta tyiso ra Simón cuhví ña chihin cahñi. Ta quichaha cahán ñu chihin ra Jesús cha cuenda ña.

³⁹ Ta nanyehe noo ra nu catuví ña. Ta quichaha catyí ra chi cahñi cuan vatyí na quita. Ta caa cuhva ri cuan ta quita cahñi cuan chi ña. Ta nducuita ri ña. Ta quichaha tyiñuhu ña chi ra.

Cuaha xaan ñu cuhví sanduvaha ra Jesús (Mt. 8.16-17; Mr. 1.32-34)

⁴⁰ Ta cuhva cha quee ñanyii, tandihí maa ñu cha cumí chi ñu cuhví tandihí nuu cuehe, chinyaca ñu chi ra Jesús. Ta tyiso ra ndaha ra siqui noo noo ñu. Ta tyicuan caa ta sanduvaha ra chi ñu.

⁴¹ Ta chichi cha tandihí ñu yihí ñu cha yihí tatyí ña vaha chi, ta quita chi. Ta suri cana chaa chi cuahan coyo chi, ta catyí chi:

—Yoho Sehe Nyoo cuví chuun —catyí chi.

Soco ña chaha ca ra Jesús cha cahan chi. Vatyí chitó chi vatyí ra Cristo, ra cha saquichí Nyoo cuví ra.

Nu cahán ra Jesús tuhun Nyoo nuu tandihí cuii ñáyivi ñuu cha iyó Galilea (Mr. 1.35-39)

⁴² Cundichin cuan ta quita ra Jesús ñuu cuan. Ta cuahan ra noo nu taxi ri iyó. Soco ñáyivi nanducu ñu chi ra. Ta chaꝥ ñu nya nu ñohó ra. Ta ña cuñí ñu cha cuhun ra.

⁴³ Soco catyí ra Jesús chi ñu:

—Cumañi sacote chi ñáyivi inga ñuu tuhun vaha yoso caa nyacá ñaha Nyoo aña ñu. Vatyí yucuan chaha vachi siqui ñuhu ñáyivi.

⁴⁴ Ta tyicuan caa chicá noo ra Jesús cahán ra tuhun Nyoo vehe ñuhu ityi Galilea.

5

Nu chaha ra Jesús noo nyatu cha ñihi ra cuaha xaan tiyaca (Mt. 4.18-22; Mr. 1.16-20)

¹ Noo quivi nyaá ra Jesús yuhu miñi nu cuví Genesaret. Ta chaꝥ coyo cuaha xaan ñáyivi, vatyí cuñí ñu cuiñi ñu tuhun Nyoo. Ta tihin xaan ñohó ra Jesús mahñu ñu.

² Ta nanyehé ra uvi tahan canoa yatyin ri yuhu miñi cuan. Yori ñohó chichi. Vatyí

cha quita coyo ra catiín tiyaca cuan. Ta cha quichaha canacatyá ra yuhva ra.

³ Yucuan ta quihvi ra Jesús chichi noo canoa cuan. Ta canoa cuan chi ra Simón cuví. Ta catyí ra chi ra vatyí na tyandaha ra suhva ca cuhun nya mahñu ca cuan. Tyicuan ta chicunyaꝥ ra Jesús chichi canoa cuan. Ta quichaha sañaha ra chi ñáyivi.

⁴ Cuhva cha ndihí cahan ra, catyí ra chi ra Simón:

—Sacuhun canoa nya nu cama ca ndutya cuan. Ta tuchi ndo yuhva vatyí tñin ndo tiyaca —catyí ra Jesús chi ra.

⁵ Ta nacahan ra Simón ta catyí ra:

—Maestro, cha saha tyiño xaan ndi ñiyaca maa ta ni noo tiyaca ña ñihí ndi. Soco tatu maun catyí, cuatuchi tucu ndi yuhva —catyí ra Simón.

⁶ Cuhva cha cacañi ra yuhva cuan, cuaha xaan tiyaca ñihí ra. Ta nyacua tahnya yuhva ra chihin cha vee ti.

⁷ Tyicuan ta cachaha ra seña chi ra tahan ra, ra cha canyicú chichi inga canoa cuan, na quichi coyo ra ta tyinyee ra chi ra. Yucuan ta chaꝥ coyo ra cuan. Ta casacutu ra ninduvi canoa cuan chihin tiyaca. Ta nyacua cuñí nyee canoa cuan cha tyitu yihí tiyaca.

⁸ Cha nanyehe ra Simón Pedro cha tyicuan caa, ta chicuiñi chiti ra nuu ra Jesús. Ta catyí ra chi ra:

—Cuachiyo chuun nui, Sutu Mañi yuhu, vatyí yuhu ra iyó cuatyí cuví —catyí ra.

⁹ Vatyí ra Simón iyo xaan cuñi ra chihin tandihí ra canyicu chihin ra. Vatyí cuaha xaan tiyaca catiín ra.

¹⁰ Tyicuan caa tucu ra tahan ra Simón: ra Jacobo chihin ra Juan, sehe ra Zebedeo, iyo xaan cacuñí ra. Ta catyí ra Jesús chi ra Simón:

—Ma iyo xaan cuñun. Vatyí vityin ta nu cuahan ca chi quivi, ma tñin con tiyaca. Soco cunducun ñáyivi, tavon chi ñu nu quiñi caa na quihvi ñu cuenda Nyoo —catyí ra Jesús chi ra Simón.

¹¹ Yucuan ta casacunuhu ra canoa nya ñuhu ityi. Ta casandoꝥ ra tandihí cha iyó chi ra nyacua nya tiyaca cha tñin ra. Ta cuahan ra chihin ra Jesús.

Nu sanduvahā ra Jesús chi noo ra tyahyu coño

(Mt. 8.1-4; Mr. 1.40-45)

¹² Noo quiví ñohó ra Jesús noo ñuu nu iyo noo ra cuhví. Ta tyahyu xaan coño ra. Ta cha nanyehe ra chi ra Jesús, ta chicuñi chiti ra nuu ra. Ta nacañinoo ra xiñi ra nya nu ñuhu. Ta chacu ndahvi ra nuu ra, ta catyí ra:

—Sutu Mañi yuhu, tu yoho ta cuñún, cuví sanduvahun chii —catyí ra.

¹³ Tyicuan ta tyiso ra Jesús ndaha ra siqui ra. Ta catyí ra:

—Cuñí sanduvahi chuun. Ta na nduvahun vityin ri —catyí ra Jesús chi ra.

Ta caa cuhva ri cuan ta nduvahā ra cuan.

¹⁴ Tyicuan ta catyí ra Jesús chi ra:

—Ma nacatyun chi ñáyivi. Noo ri catyí chuun, cuahan nu nyaá tata sutu. Ta sañahun chuun chi ra. Ta cuhva cuendon cha tahán chi cuhvon tari cuhva catyí nu ley ra Moisés tacuhva coto ñáyivi vatyí nduvahun —catyí ra Jesús chi ra.

¹⁵ Vasi ña cuñi ra cha coto ñáyivi, soco cuaha ca ñáyivi ñihi ñu tuhun ra. Ta cuaha xaan ñáyivi ndu ñn ri ñu, vatyí cuñi ñu cuiñi ñu tuhun cahán ra. Ta cuñi xaan ñu nduvaha ñu.

¹⁶ Soco ra Jesús, canyaha canyaha ri ra nu iyó ñáyivi. Ta cuahan ra noo nu yori ñáyivi iyó. Ta yucuan chican tahvi ra chi Nyoo.

Nu sanduvahā ra Jesús chi noo ra cuhvi cha ña cuví nacanda

(Mt. 9.1-8; Mr. 2.1-12)

¹⁷ Noo quiví sañahá ra Jesús chi ñáyivi. Ta chicunycú suhva ra fariseo, ra quichahá xaan ley vehe ñuhu cha tyaa ra Moisés ta cha naha. Ta nyicú tucu suhva ra sacuahá cuenda ley vehe ñuhu cuan. Quichi coyo ra ñuu cha iyó Galilea, ta ñuu Jerusalén, ta tandihi ca ñuu cha iyó Judea. Ta iyó xaan tunyee ñi Nyoo chi ra Jesús, tacuhva vatyí sanduvaha ra chi ñu cuhvi.

¹⁸ Yucuan ta cha coyo ra canyisó chihin noo chito chi noo ra ña cuví nacanda. Ta cuñi ra quihvi ra chichi vehe ta cacun ra chi ra nuu ra Jesús.

¹⁹ Soco ña cuví quihvi ra vatyí tuvi xaan ñáyivi. Tyicuan ta canda ra ityi xiñi vehe. Ta sacuachiyō ra suhva tyiyo. Tyicuan ta

sanoo ra chi ra cuhvi cuan maa maa nuu ra Jesús mahñu nu tuvi ñáyivi cuan.

²⁰ Yucuan cuví nu nyehe ra Jesús vatyí cachinó xaan ñi ra chi ra. Ta quichaha catyí ra chi ra cuan:

—Xaa, cha chicoo ticahnu ñi tandihi cuatyun —catyí ra Jesús.

²¹ Tyicuan ta ra casacuahá cuenda ley vehe ñuhu chihin ra fariseo quichaha nacuaan ñi ra: “¿Yóo ra cuví ra ihya? Vatyí cuñi maa ra vatyí cuví saha ra ticahnu ñi cuatyí yo. Noo ri maa Nyoo cuví saha ra ticahnu ñi cuatyí yo”, ndichi xiñi ra.

²² Soco ra Jesús chitó ra tuhun chicá xiñi ra. Ta quichaha catyí ra chi ra:

—¿Ñáá tuhun chicá xiñi ndo tyehe caa?

²³⁻²⁴ ¿Ñáá cha yí ca catyí yo? ¿Atu yí ca catyí yo: “Cuatyun cha yaha ndachi”, o yí ca catyí yo chi noo ñáyivi: “Ndícuita ta cacon”? Soco vityin cua sañahi chi ndo vatyí iyó ityi chii cha sahi ticahnu ñi cuatyí. Vatyí yuhu Rayí cha quichi nya gloria cuví. Ta vityin cua sanduvahi chi ra ña cuví caca ihya —catyí ra Jesús.

Tyicuan ta quichaha catyí ra chi ra cha catuví cuan:

—Catyí chuun, ndícuita. Naquehen chiton ta cuanuhu nya vehun.

²⁵ Ta caa cuhva ri cuan nducuita ra cha cuhvi cuan, ta naquehen ra chito ra. Ta cuanuhu ra vehe ra, suri sacahnú ra chi Nyoo.

²⁶ Tandihi ñáyivi iyo xaan cuñi ñu. Ta yuhvi xaan ñu. Ta sacahnú ñu chi Nyoo, ta catyí ñu:

—Vityin ndicha nyehé yo minoo tuhun cha iyo caa —catyí ñu.

Nu cana ra Jesús chi ra Leví

(Mt. 9.9-13; Mr. 2.13-17)

²⁷ Yaha cuan ta quita ra Jesús vehe cuan. Ta nanyehe ra chi noo ra cha tavá xuhun cuenda gobiernu ñuu Roma. Ta nañi ra Leví. Ta nyaá ra nu tyiyahvi ñáyivi. Ta catyí ra Jesús chi ra:

—Coho chihin —catyí ra.

²⁸ Tyicuan ta nducuita ra Leví. Ta sandoo ra tandihi cha iyó chi ra. Ta cuahan ra chata ra Jesús.

²⁹ Tyicuan ta savaha ra Leví noo vico cahnu vehe ra cuenda ra Jesús. Ta cuaha

vavaha ra catavá xuhun cuenda gobiernu ñuu Roma canyicú ra mesa. Ta canyicú tucu inga ñáyivi.

³⁰ Soco ra fariseo chihin ra sacuahá ley vehe ñuhu quichaha cahan nyaa ra chi ra cachicá noo chihin ra Jesús ta catyí ra:

—¿Ñáá tuhun chachí ndo ta chihí ndo chihin ra catavá xuhun ta chihin ra cahnu cuatyí? —catyí ra.

³¹ Ta ra Jesús nacahan ra, ta catyí ra:

—Ña chiñuhú doctor chi ra iyó vaha. Chi ra cuhví, yucuan ra chiñuhú doctor chi.

³² Yuhu ña vachi tyinyei chi ñu vaha sahá chi, soco vachi tyinyei chi ñu chitó vatyí iyó cuatyí, vatyí tacuhva nasama ñu cuhva iyó ñu —catyí ra Jesús chi ra.

Nu sañahá ra Jesús vatyí cha yaha canyaha ra chi ñu nyicón chi ra, cusavaha ñu ayuno

(Mt. 9.14-15; Mr. 2.18-20)

³³ Tyicuan ta quichaha candaca tuhun ra chi ra Jesús, ta catyí ra:

—Ra canyicón chi ra Juan savahá ra ayuno, ña cachachí ra ta nanducú ra chi Nyoo, ta tyicuan caa tucu ra fariseo. Soco ra cachicá noo chihin yoho, ndi quiví maa chachi ra ta chihi ra. ¿Ñáá tuhun? —catyí ra.

³⁴ Ta nacahan ra Jesús, ta catyí ra:

—¿Atu cuví cha ma cuhva ndo cachi ñu canyicu vico tandaha tatu nyaá ra cha cua tandaha chihin ñu? Ma cuví. Vatyí sñi cuñí ñu, ta cuñí ñu cachi ñu.

³⁵ Soco cuchaa quiví cuachiyo ra tandaha cuan nu nyicú ñu. Yucuan ndicha quiví, ta cusaha ñu ayunar.

Nu sañahá ra Jesús vatyí ña nacachi tahan tuhun chahnu cha iyó ñáyivi chihin tuhun chaa cha sañahá ra

(Mt. 9.16-17; Mr. 2.21-22)

³⁶ Tyicuan ta cahan ra Jesús noo cuhva chihin ñu, ta catyí ra:

—Yori cahnya noo sahma chaa, ta chihin cuan naquicu ñu noo sahma chahnu. Vatyí tatu sacuvi ñu tyicuan caa, cundiysi sahma chaa cuan. Ta sñin ri ma cuhva chi chihin sahma chahnu cuan.

³⁷ Ta tyicuan caa tucu ma cuví tyihi ñáyivi vinu chaa chichi ññi chahnu. Vatyí cutahnya ññi cuan chihin vinu chaa cuan.

Ta tiví vinu cuan ta tiví ññi chahnu cuan ñandihí.

³⁸ Yucuan chaha tahán chi tyihi yo vinu chaa chichi ññi chaa. Vatyí tyicuan ta ninduvi ta saha cuenda chi tahan.

³⁹ Ta yori ñu chihi vinu chahnu, ta cuñí ñu coho ñu cha chaa. Vatyí catyí ñu, vaha ca vinu chahnu. Cuñí ca ñu vinu chahnu cuan vatyí ican cuan cuví costumbre cha iyó maa ñu.

6

Tohon ra cachicá noo chihin ra Jesús yoco trigu quiví nyitatu ñáyivi

(Mt. 12.1-8; Mr. 2.23-28)

¹ Noo quiví cha nyitatu ñáyivi, yahá ra Jesús mahñu cha tachí ñu. Ta ra cachicá noo chihin ra catohón ra yoco trigu. Ta casacoyó ra chihin ndaha ra. Ta cachachí ra chiti cuan.

² Tyicuan ta catyí suhva ra fariseo chi ra:

—¿Ñáá tuhun cha sacuví ndo noo tyiño cha ña tahán chi sacuvi yo quiví nyitatu yo?

³ Ta nacahan ra Jesús, ta catyí ra:

—¿Atu ta sacuaha ca ndo cha sacuvi ra David chihin ra tahan ra quiví cha chisoco ra?

⁴ Quihví ra chichi vehe Nyoo. Ta quehen ra pan cha chacun ñáyivi nuu Nyoo. Ta chachí ra. Ta chaha ra chi ra candihí chihin ra. Ta maa ri maa tata sutu tahán chi cachi pan cuan —catyí ra Jesús.

⁵ Yucuan ta catyí tucu ra Jesús:

—Yuhu cuví Rayñi cha quichí nya gloria. Ta iyó ityi chii vatyí catyí chi noo noo ndo ñáá cha sacuvi ndo quiví nyitatu yo —catyí ra.

Nu sanduvahá ra Jesús chi noo ra cha ityi ndaha

(Mt. 12.9-14; Mr. 3.1-6)

⁶ Inga quiví cha nyitatu ñáyivi, quihví ra Jesús chichi vehe ñuhu. Ta quichaha sañaha ra chi ñáyivi. Ta yucuan nanyehé ra chi noo ra cha na ityi chiyo ndaha vaha.

⁷ Ta ra casacuaha cuenda ley chihin ra fariseo, canducú nyehe ra chi ra Jesús, tatu sanduvaha ra chi ra cuhví cuan quiví nyitatu ñu. Tyicuan caa ta cuví tyaa ra cuatyí siqui ra.

⁸ Soco ra Jesús chitó ra tuhun chicá xiñi ra. Ta catyí ra chi ra cha ityi ndaha cuan:

—Ndūcuita. Ta cuinanyaun mahñu ihya.

Tyicuan ta ra cha ityi ndaha cuan nducit̄a ra. Ta chicunanyaa ra mahñu.

⁹ Tyicuan ta catyí ra Jesús chi ra canyicú cuan:

—Cua nducu tuhin noo tuhin chi ndo. ¿Yoso caa cuhva tahán chi cha sacuvi yo quiví nyitatú yo? ¿Atu tahán chi vatyí sacuvi yo cha vaha, o cha ña vaha? ¿Atu tahán chi vatyí sacacu yo chi ñáyiví, o cha cahñi ndihí yo chi ñu?

¹⁰ Tyicuan ta ra Jesús nanyehe ra chi noo noo ra canyicú cuan. Ta quichaha catyí ra chi ra cuhví cuan:

—Sanacaa ndahun.

Tyicuan ta ra cuhví cuan sanacaa ra ndaha ra. Ta nduvaha ndaha ra.

¹¹ Soco suhva ra canyicú cuan, cuxaan xaan ra. Ta quichaha candaca tuhin ra chi ra tahan ra:

—¿Yoso caa sacuví yo tacuhva cha ma cuví ca cahan ra Jesús nuu ñáyiví? —ca-catyí ra.

Nacachi ra Jesús ndi uchi uvi tahan ra tyi caca ra tyiño ra

(Mt. 10.1-4; Mr. 3.13-19)

¹² Quiví cuan ndaa ra Jesús noo yucu. Ta ñiyaca maa chicán tahvi ra chi Nyoo.

¹³ Cuhva cha cundichin, cana ra chi tandihí ri ñu nyicón chi ra. Ta nacachi ra uchi uvi tahan ri ra. Ta sacunañi ra chi ra, apóstol ra, ta cuñí chi catyí, ra caca tyiño nuu ra.

¹⁴ Ta ihya nyaá siví ndi uchi uvi tahan ra: Ra Simón ra cha sacunañi ra Cristo Pedro chi, ta yañi ra, ra Andrés, ta ra Jacobo, ra Juan, ra Felipe, ra Bartolomé,

¹⁵ ra Mateo, ra Tomás, ra Jacobo sehe ra Alfeo, ta ra Simón ra yihí cuenda ityi ra cacuñí cahun cuatyí siqui gobiernu ñuu Roma cha nyacá ñaha chi ñu.

¹⁶ Ta ra Judas, yañi ra Jacobo, ta ra Judas Iscariote, ra cha naxico tuhin chi ra Jesús.

Nu sañahá ra Jesús chi cuaha xaan ñáyiví

(Mt. 4.23-25)

¹⁷ Noo ra Jesús yucu cuan chihin ndi uchi uvi tahan ra. Ta chicutayucu ra nu ndaa cuan chihin ñu nyicón chi ra. Ta cuaha ri ityi quit̄a coyo ñáyiví. Quit̄a coyo ñu ñuu Jerusalén ta tandihí ca ñuu cha iyó Judea, ta ñuu Tiro chihin ñuu Sidón cha nyicú yuhu tyañuhu. Ta cha ñáyiví cuan vatyí cuiñi ñu

tuhun cahán ra Jesús. Ta tandihí ñu cuhví cuñí ñu vatyí sanduvaha ra chi ñu.

¹⁸ Ta tandihí ñu cha yihí tatyí ña vaha chi, nduvaha ñu saha ra.

¹⁹ Ta tandihí ñu cuñí ñu t̄in ñu chi ra. Vatyí nduvaha ñu chihin tunyee iñi Nyoo, vasi tacuhva t̄in ri ñu chi ra.

Ñu ñihí tumañi iñi, ta ñu ña ñihí tumañi iñi

(Mt. 5.1-12)

²⁰ Tyicuan ta nanyehe ra Jesús chi ra cachicá noo chihin ra. Ta quichaha catyí ra chi ra:

—Tandihí nyoho cha ndahvi ndo, sii xaan cuví chi ndo, vatyí tahán chi cha cun-yaca ñaha Nyoo aña ndo.

²¹ Tandihí nyoho cha chisocó ndo vityin, sii xaan cuví chi ndo. Vatyí coo quiví cha ma nyehe ca ndo soco. Tandihí nyoho cha chacú chaa ndo cha cuihya iñi ndo, sii xaan cuví chi ndo vatyí coo quiví ta ñahri ca tucuihya iñi coo chi ndo. Ta cuacu ndo chihin cha sii cuñi ndo.

²² Sii xaan cucuvi chi ndo, quiví cha tasi cuñí ñáyiví nyehé ñu chi ndo, quiví tavá ñehe ñu chi ndo nu nyaá ñu, quiví cahán ñu chi ndo, quiví catyí ñu vatyí ñáyiví ña vaha cuví ndo vatyí chinó iñi ndo chi yuhu Rayi cha quichi nya gloria.

²³ Sii xaan cucuvi chi ndo quiví nyehe ndo tindoho cuan vatyí tyicuan caa tucu sacuví ñáyiví ta cha naha. Cahán vavaha ñu chi ra cacuvi profeta Nyoo. Caña ndava ndo chihin cha sii cuñí ndo. Vatyí cahnu xaan cha cucuhva Nyoo chi ndo gloria.

²⁴ Soco ndahvi nyoho, ñu tyayii. Vatyí vityin sii xaan cuñí ndo chihin tandihí cha tyayii ndo. Soco coo quiví maa maa ri tundoho cunyehe ndo. Vatyí ñahri cuiñi ndo nuu Nyoo.

²⁵ Ta ndahvi nyoho cha cuñí maa ndo vatyí ñahri cumañí chi ndo cha vityin, vatyí coo quiví cunyehe ndo soco. Nyoho cha sii cuñí ndo cha vityin, ndahvi nyoho vatyí coo quiví cunyehe ndo tucuihya iñi. Ta cuacu chaa ndo.

²⁶ Ta ndahvi nyoho vatyí vaha cahán ñáyiví siqui ndo. Vatyí tyicuan caa tucu ñáyiví ta cha naha, vaha xaan cahán ñu siqui ra cha cahán cha ña ndicha.

Cuñi ndo chi ñu xaan iñi chi ndo
(Mt. 5.38-48; 7.12)

²⁷ Tandihí nyoho cha chiñí ndo tuhun cahín, catyí chi ndo tyehe caa: Cuñi ndo chi ñu xaan iñi chi ndo. Sacuvi ndo cha vaha chihin ñu cha tasi cuñi nyehe chi ndo.

²⁸ Cahan ndo cha vaha chihin ñu cha cahán ña vaha siqui ndo. Cacan tahvi ndo chaha ñu cahán chi ndo.

²⁹ Tatu yóo cha cañi inchiyo nuu ndo, cuhva tucu ndo inga chiyo nacañi maa ñu. Tatu yóo cha tinyaa chaqueta ñihno ndo, cuhva ndihí ndo camiseta ndo.

³⁰ Cuhva ndo ñáá ndihí cha chicán ñu chi ndo. Tatu tinyaa ñu ñáá cha iyó chi ndo, ma ndacan ndo chi ñu.

³¹ Tari cuhva cuñí ndo cha sacuvi ñáyivi cha vaha chihin ndo, tyicuan caa sacuvi ndo cha vaha chihin ñu.

³² Tatu cuñí ndo chi maa ri maa ñu cha cuñí chi ndo, ñahri cha vaha xaan sacuví ndo. Vatyí tyicuan caa nyacuví tucu ñu quiñi iyó, cuñí ñu chi ñáyivi ñohó nuu ri ñu.

³³ O tatu sacuví ndo cha vaha chihin ñu cha sacuví cha vaha chihin ndo, ñahri cha vaha xaan nyacuví ndo. Vatyí tyicuan caa nyacuví tucu ñu quiñi iyó.

³⁴ O tatu sacuví ndo tumañi iñi chi noo ñáyivi, ta yihí iñi ndo vatyí cusacuvi tucu ñu cuan tumañi iñi chi ndo, ñahri cha vaha nyacuví ndo. Vatyí tyicuan caa nyacuví tucu ñu quiñi iyó. Tatu ñáá noo tumañi iñi sacuví ñu chi tahan ñu, nyatú ñu cha nacuhva tucu ñu cuan tumañi iñi chi ñu.

³⁵ Soco nyoho, cuñi ndo chi ñu xaan iñi chi ndo. Ta sacuvi ndo cha vaha chi ñu. Ta cuhva noo ndo chi ñu. Soco ma cuatu ndo ñáá tumañi iñi cunacuhva ñu chi ndo. Tyicuan ta cahnu xaan cha cuñihí ndo nuu Nyoo ta cucuvi ndo sehe vaha Nyoo cahnu. Vatyí Nyoo vaha ñáyivi cuví ra chihin ñu cha ña nacuhva tyahvi nyoo chi ra ta chihin ñu quiñi iyó.

³⁶ Vaha ñáyivi cuví ndo chihin ñáyivi, tari maa Nyoo Sutu yo, vaha ñáyivi cuví ra chihin ndo.

Ma cahan yo cha caa inga tahan yo
(Mt. 7.1-5)

³⁷ Ma cahan ndo cha caá tahan ndo, tyicuan ta Nyoo ma tñn cuenda ra cha caá maa ndo. Ma soco ndo chi ñáyivi cha cahun ñu anyaya, tyicuan ta ma sacuhun

Nyoo chi ndo anyaya. Saha ndo tucahnu iñi chi ñáyivi. Ta Nyoo cusaha ra tucahnu iñi chi maa ndo.

³⁸ Cuhva ndo cha chiñuhú chi ñáyivi. Ta tyicuan caa cuhva tucu maa Nyoo cha chiñuhú chi maa ndo. Noo ñáyivi vaha, tatu xicó ñu ñáá cha xicó ñu chi ndo, tyitu maa chahá ñu chi ndo, tyicuan caa tucu cuhva Nyoo chi ndo. Vatyí tari cuhva cuhva ndo chi ñáyivi, tyicuan caa cuhva cuhva Nyoo chi ndo —catyí ra Jesús.

³⁹ Ta chahá ra Jesús cuhva ihya chi ñu, ta catyí ra:

—Noo ra cuaa ña cuví sañaha ra ityi chi nonga ra cuaa. Vatyí nñduvi ra ña nyehé ra ityi cuahan ra. Ta cuví canacoyo ra chichi noo xahva. Tyicuan caa tucu noo ra ña chitó ityi Nyoo, vasi cuñí ra, soco ma cuví sañaha ra ityi Nyoo chi nonga ra.

⁴⁰ Ni noo ra cuatyaa sicuela ma cuví coto ra cha chitó ra cha sañaha chi ra. Vatyí nicaa ni quichaha sacuahá ra. Coto ra soco nya ndihí sacuahá ra.

⁴¹ ¿Yoso caa tyi nyehún cuatyí luhlu cha cuví tari mihin lee ri cha yihí chiti nuu tahun, ta ña sahn cuenda cuatyí cahnu cha iyó chuun cha cuví tari vitu cahnu cha yihí nuu maun?

⁴² Tatu chiti nuu maun yihí noo vitu cahnu, yoso caa cuví catyun chi ra yañun: “Nyaca, natave mihin lee cha yihí chiti nuun.” ¡Yoho cha savahún chuun! Tava xihna vitu cahnu cha yihí chiti nuun. Tyicuan ta cuví nyehe vahun mihin lee cha cutavon chiti nuu yañun.

Chihin cha sacuví ñáyivi ta nicohon nuu ri yo chi ñu tatu ñu vaha, o ñu ña vaha cuví ñu
(Mt. 7.17-20; 12.34-35)

⁴³ Noo yutun vaha chahá tun chiti vixi, chiti vaha. Ta noo yutun ña vaha chahá tun chiti ña vaha.

⁴⁴ Tandihí yutun nicohon nuu yo chi tun chihin chiti ri tun. Vatyí tuñiyaca, ma cuhva tun mangu. Ta ni ri noo iñu nduhva ma cuhva tun tichaha ndivi.

⁴⁵ Ta tyicuan caa tandihí ñáyivi vaha, tuhun vaha cahán ñu. Vatyí yihí cha vaha añima ñu. Soco ñáyivi ña vaha, maa maa ri maa tuhun ña vaha cahán ñu. Vatyí yihí cha

caquiñi ña ñima ñu. Chihin yuhu ñu cahán ñu tandihí cha quiñi caa cha quitá ña ñima ñu.

Cacu ña ñima ñu quichahá tuhun cahán ra Jesús, ta ñu ña quichahá tuhun cahán ra, ma cacu ñu

(Mt. 7.24-27)

⁴⁶ ¿Ñáá tuhun cha catyí ndo chii, “Sutu Mañi yuhu, Sutu Mañi yuhu”, tatu ña sacuvi ndo tari cuhva cha catyí chi ndo?

⁴⁷ Ihya cua catyí chi ndo yóo chi ndacu nyoho cha vachi ndo nu nyaí, ta tyasohó ndo cha cahín, ta sacuvi ndo cha catyí.

⁴⁸ Tari noo ra chitó vaha savaha vehe cuví ndo. Vatyí xihna ca chatyá ra cono vavaha ta tahan ra yuu. Ta siqui yuu cuan savahá ra vehe ra. Ta quiñi coon xaan savi, ta cama xaan ndutya yahá, ta ña nduva vehe cuan vatyí siqui yuu nanyaá chi.

⁴⁹ Soco ñu cha chiñi tuhun cahín ta ña sacuvi ñu tari cuhva catyí, cuví ñu tari minoo ra ña chitó savaha vehe. Vatyí ña chatyá ra nu quiñi chaha vehe ra. Ta ñima nu yuu savahá ra vehe ra. Ta chaa quiñi cha coon savi. Cama xaan ndutya yaha. Ta chatya chi chaha vehe ra vatyí ñuhu ri cuví. Ta nduva vehe ra vatyí ña cunye. (Ta tyicuan caa cuví ñáyivi, tatu sacuvi ñu tari cuhva catyí, tyicuan ta cacu ñu. Soco tatu ma sacuvi ñu, ma cacu ñu) —catyí ra Jesús.

7

Nu sanduvahá ra Jesús noo musu capitán sindaro

(Mt. 8.5-13)

¹ Cuhva cha ndihí cahan ra Jesús chihin ñáyivi, ta cuanuhu tucu ra inga chaha nya Capernaum.

² Ta yucuan iyó noo capitán cha nyacá ñaha noo cientu sindaro cuatyí. Ta iyó noo musu ra cha cuñi vavaha ra. Ta cuhví ra. Ta cha cuñi cuví ra.

³ Quiñi cha chitó capitán cuan tuhun ra Jesús, tachi ra chi suhva ra cacuvi mandoñi ñuu Israel na cucahan ra chihin ra Jesús, vatyí na quichi ra vatyí sanduvaha ra chi musu ra.

⁴⁻⁵ Tyicuan ta chaá coyo ra mandoñi cuan nu nyaá ra Jesús. Ta quichaha catyí ra chi ra:

—Iyó noo capitán cuenda ñuu Roma. Ta vaha xaan ñáyivi cuví ra chihin yo cha cuví

yo ñáyivi Israel. Nyacua savaha ra noo vehe ñuhu yo. Ta tahán chi vatyí tyinyeun chi ra. Vatyí cuhví xaan noo musu ra. Ta cuñi ra vatyí sanduvahun chi ra.

⁶ Tyicuan ta cuahan ra Jesús chihin ra. Soco cuhva cha cumañi ca chaa ra nya vehe capitán cuan, capitán cuan tachi ra chi suhva ra tahan ra. Ta quichaha catyí ra chi ra Jesús:

—Tata, catyí capitán vatyí ma sayangon chuun cha cuhun nya vehe ra na. Vatyí ña naña ra cha cuhun, na.

⁷ Yucuan chaha ña caña iñi ra quichi ra nu nyaún. ¿Atu ma sahan noo tumañi iñi chi ra vatyí noo tuhun cahan run ihya ri, ta nduvaha ri musu ra, na?

⁸ Vatyí maa ra capitán cuví ra. Ta nyacá ñaha rey chi ra. Ta maa ra nyacá ñaha ra chi ra cuatyí ca cha nuu ra. Tatu tava ra tyiño chi noo ra cuatyí cuan, na cuhun ra. Cuhun ra. O tatu catyí ra chi nonga ra na quichi ra, quichi ra. O tatu tachi ra chi inga ra na sacuvi ra tyiño, sacuvi ra. Ta tyicuan caa tucu yoho, tatu catyun na nduvaha musu ra, tyicuan ta nduvaha ra na —catyí ra tahan capitán cuan chi ra Jesús.

⁹ Cha chiñi ra Jesús cha catyí ra cuan ta iyo xaan cuñi ra. Ta nanyehe ra chi ñáyivi cha nyicú chihin ra, ta catyí ra:

—Ndicha ndicha cuii vatyí chinó xaan iñi capitán cuan. Ta nañihi que chi ni noo ra Israel cha chinó xaan iñi tari ra cuan —catyí ra.

¹⁰ Yucuan ta cuanuhu ra tahan capitán cuan. Ta cha nachaa coyo ra nya vehe, ta nanyehe ra vatyí cha nduvahá musu cuan.

Nu sanandoto ra Jesús chi sehe noo ñaha ndahvi chihí yñi

¹¹ Cha yaha tuhun cuan ta cuahan ra Jesús noo ñuu cha nañi Naín. Ta cuahan tucu ra cachicá noo chihin ra, ta cuaha xaan ñáyivi ñandihí.

¹² Tyicuan ta cuhva cha cua chaa ra yatyn ñuu cuan, nanyehe ra cuaha ñáyivi quitá coyo ñuu cuan. Ta canyisó ñu noo ndiyi, cuacuchi ñu sehe noo ñaha ndahvi cha chihí yñi. Ta noo tuhun ri maa ra iyó chi ña, ta chihí ra.

13 Ta cha nanyehē ra Jesús chi ña, ta cundahvi cuñí nyehe ra chi ña. Ta quichaha catyi ra chi ña:

—Ma cuacun.

14 Tyicuan ta tuhva ra ta tñin ra chatun cha yihí ndiyi cuan. Tyicuan ta ra canyisó chi ndiyi cuan chicutayucu ra. Ta catyi ra Jesús chi ndiyi cuan:

—Ndicitu, ra cuehe —catyi ra.

15 Tyicuan ta ndicitu ndiyi cuan. Ta nicunyaa ra. Tyicuan ta quichaha cahan ra. Ta ra Jesús nacuhva cuenda ra chi ra chi sihi ra.

16 Cha nanyehē ñu cha tyicuan caa ta yuhvi xaan ñu cuvi. Ta quichaha sacahnu ñu chi Nyoo. Ta catyi ñu:

—Cahnu xaan ra profeta Nyoo tuví nu nyicú yo ihya.

Ta catyi tucu ñu:

—Maa Nyoo, ican vachi nu nyicú yo, vachi tyinyee ra chi yo —catyi ñu.

17 Ta tandihi maa ñáyivi nicahnu ityi Judea, chitó ñu cha sacuví ra Jesús.

*Nu tachí ra Juan uvi tahan ra chicá noo chihin ra nu nyaá ra Jesús
(Mt. 11.2-19)*

18 Ta ra cachicá noo chihin ra Juan nacatyí ra tuhun cha sacuví ra Jesús. Tyicuan ta cana ra Juan chi uvi tahan ra.

19 Ta tachí ra chi ra nu nyaá ra Jesús, vatyí cundaca tuhun ra chi ra tatu ican ra cuví Cristo ra cha cusaquichi Nyoo. Vatyí tatu ñima ra, tyi cuatu ra inga ra.

20 Tyicuan ta ra cha tachí ra Juan, cuahan coyo ra. Ta chaa ra nu nyaá ra Jesús. Ta quichaha catyi ra:

—Ra Juan, ra sacondutyá, tachí ra chi ndi vatyí ndaca tuhun ndi chuun tatu icon cuví Cristo ra cha cusaquichi Nyoo. Vatyí tatu ñimon, cuatu ndi chi inga ra —catyi ra.

21 Ta cuhva cha canyicú ra tachí ra Juan cuan, ra Jesús sanduvaha ra cuaha xaan ñu cuhví, ta cuaha xaan ñu yihí tatyí ña vaha chi. Ta sananyehē ra chi ñu cuaa.

22 Tyicuan ta catyi ra Jesús chi ra tachí ra Juan:

—Cuahan ndo. Ta nacatyí ndo chi ra Juan tandihi cha nyehe ndo, ta tandihi cha chiñi ndo. Ta catyi ndo chi ra yoso caa nanyehé ra cuaa, yoso caa nacacá ra

coxo, yoso caa nduvahá ra tyahyu coño, yoso caa nacuiñi ra soho, yoso caa nandotó ndiyi, yoso caa cahín tuhun Nyoo chihin ñu ndahvi yoso caa sacacú ra añima ñu. Ta catyi tucu ndo chi ra vatyí

23 si xaan cuví chi ñu ña chicá uvi iñi nyicón chii —catyi ra Jesús chi ra.

24 Cuhva cha cuahan coyo ra cha tachí ra Juan, ta quichaha cahan ra Jesús tuhun ra Juan chihin ñáyivi. Ta catyi ra:

—¿Ñáa cha chahan ndo chinyehe ndo quivi chahan ndo chiqui ndi cuan? ¿Atu chahan ndo chinyehe ndo noo ndoo cha naquisí tatyí?

25 ¿O noo ra cha ñihnó sahma vaha chinyehē ndo vaha? Ñima. Vatyí chitó ndo vatyí ra ñihnó sahma vaha iyó vaha ra ñáyivi ta iyó ra vehe rey.

26 ¿Atu ña chinyehe ndo chi noo profeta Nyoo? Ican. Ta cahnu ca ra cuví ra ican saha noo profeta.

27 Ican tuhun ra Juan nyaá nuu tutu cha tyaa ra Isaías ta cha naha. Ta catyi Nyoo tuhun ra tyehe caa:

Yuhu tachí chi noo ra cahan tuhun ityi nuu nu cuahun.

Vatyí cucahan ra tuhun chihin ñáyivi na nasama ñu cuhva iyó ñu, ta cuatu tuhva ñu quivi quichun.

28 Ta catyi chi ndo vatyí chichi cha tandihi ra cha cacu, yori profeta cha cahnu ca ican saha ra Juan. Soco ra cha nyacá ñaha Nyoo añima, vasi cuví ra noo ra luhlu ca soco cahnu ca ra ican saha ra Juan ra sacondutyá —catyi ra Jesús.

29 Cha chiñi ñu tuhun ihya, tandihi ñáyivi ta ra catavá xuhun cuenda gobiernu ñuu Roma cha sacondutyá ra Juan nacoto ñu vatyí cuhva sacuví Nyoo vaha xaan.

30 Soco tandihi ra fariseo chihin ra sacuahá cuenda ley vehe ñuhu, maa ra cuví ra ña cuñí cha sacondutyá ra Juan chi ra, vatyí ña cuñí ra quehen ra cha chahá Nyoo.

31 Ta catyi ra Jesús:

—¿Ñáa chihin sandu inuu ri chi nyoho, ñu iyó quivi ihya? ¿Yóo cha tari caa caá ndo?

32 Tari ra cuatyaa cuví nyoho. Vatyí ra cuatyaa nyasiquí ndotyin nuyahvi. Ta caná chaa ndotyin chi tahan ndotyin, ta

catyí ndotyin: “Tiví ndi tiyoo ta ña chita chaha ndo. Ta chita ndi yaa cuihya, soco ña chacu ndo.” Ta tyicuan caa ni noo cuhva ña tahán iñi ndo.

³³ Vatyí ra Juan ra sacondutyá, quichí ra ta ña chachí vaha ra. Ta ña chihí ra vinu. Ta nyoho catyí ndo vatyí tatyí ña vaha yihí chi ra.

³⁴ Ta quichí tucu yuhu Rayí cha quichi nya gloria. Ta chachí ta chihí. Ta nyoho catyí ndo vatyí ra cuahyí cuví ta cuví noo ra tuhvá chihí. Ta ña tahán iñi ndo cha cutahín chihin ra iyó cuatyí, ta chihin ra tavá xuhun. Soco vasi ni noo ndi ña quehen cuenda ndo,

³⁵ soco catyí chi ndo vatyí cha chiñi tuñi Nyoo, chahá ra chi ñu naquehen tuhun cahín ta tuhun cahán ra Juan. Ta maa ñu cusañaha ñu chi ndo vatyí vaha cha chiñi tuñi Nyoo —catyí ra Jesús.

Nu nyaá ra Jesús vehe ra Simón ra cuví fariseo

³⁶ Noo ra fariseo cha nañí Simón nacatyí tuhun ra chi ra Jesús noo vico vehe ra. Ta chaá ra Jesús vehe ra, ta chicunyaa ra mesa.

³⁷ Tyicuan ta noo ñaha cata iñi ñuu cuan chitó ña vatyí nyaá ra Jesús yucuan. Ta chaá ña chihin noo yutyí alabastro tyitu yihí ndutya vixi chahán.

³⁸ Ta chicunyaá ña yatyin ri chaha ra. Ta quichaha chacu chaa ña vatyí ndu uvi iñi ña cuatyí ña. Ta quitá ndutya nuu ña. Ta chihin ndutya nuu ña nacatyá ña chaha ra. Yaha cuan ta sana ityi ña chaha ra chihin ixi xiñi ña. Ta tyayuhu ña chaha ra. Tyicuan ta choso ña ndutya vixi chahán cuan siqui chaha ra.

³⁹ Cuhva cha nyehe ra fariseo cuan cha tyicuan caa, ndichí xiñi ra: “Tatu ndicha ndicha cha Nyoo saquichi chi ra ihya, coto ra yóo ñaha tñn chaha ra, vatyí ñaha cuan, ñaha iyó cuatyí cuví ña.”

⁴⁰ Tyicuan ta ra Jesús catyí ra chi ra fariseo cuan:

—Yoho Simón, iyó noo tuhun cua catyí chuun —catyí ra chi ra.

Tyicuan ta nacahan ra Simón:

—Vaha, catyí chii, Maestro —catyí ra.

⁴¹ Ta quichaha catyí ra Jesús tyehé caa:

—Uvi tahan ra yosoyicá ra xuhun chi noo ra cha tuhva chahá noo. Ta noo ra cuan yosiyicá ra ohon cientu denario. Ta nonga ra yosiyicá ra uvi xico uchi ri denario (tari ohon cientu ri pesu).

⁴² Ta ninduvi tahan ra ña cuví tyiyahvi ra. Ta ra tuhvá chahá noo cuan, saha ra ticahnu iñi chi ninduvi tahan ra. Ta vityin catyí chii, yoho Simón ¿nya ra cua cuñi ca chi ra cha chahá noo cuan? —catyí ra Jesús.

⁴³ Tyicuan ta nacahan ra Simón, ta catyí ra:

—Ra cha cuaha ca saha ra tucahnu iñi chi —catyí ra.

Tyicuan ta catyí ra Jesús:

—Ndicha cha cahún.

⁴⁴ Tyicuan ta nanyehé ra Jesús chi ñaha sihi cuan, ta catyí ra chi ra Simón:

—¿Nyhún chi ñaha ihya? Yuhu quihvi chichi vehun. Ta ña chahun ndutya cha ndoo chahi tari cuhva costumbre cha iyó chi yo. Ta ñaha ihya nacatyá ña chahi chihin ndutya nuu ña. Ta yaha cuan, ta sana ityi ña chihin ixi xiñi ña.

⁴⁵ Yoho ña tyayuhun ndahi, tari costumbre cha iyó chi yo, soco maa ña nyacua nya cuhva cha quihvi ihya ta ña sandihi ña cha tyayuhú ña chahi.

⁴⁶ Ta yoho ña tyihun aceitye xiñi, soco ñaha ihya tyihí ña ndutya vixi chahán chahi.

⁴⁷ Ta catyí chuun, yoho Simón, vasi cahnu xaan cuatyí ña, soco sahí ticahnu iñi chi ña. Yucuan chaha cuñi xaan ña chii. Ta ñu sahí tucahnu iñi chiin ri cuatyí, chiin ri cuñi ñu chii —catyí ra Jesús.

⁴⁸ Tyicuan ta quichaha catyí ra Jesús chi ña:

—Cuatyun cha yaha sandachi. Vatyí cha saha Nyoo ticahnu iñi chuun —catyí ra chi ña.

⁴⁹ Tyicuan ta ra nyicú chihin ra quichaha ndichí xiñi ra: “¿Yóo ra cuví ra ihya? Vatyí sahá ra tucahnu iñi cuatyí ñayivi.”

⁵⁰ Tyicuan ta quichaha catyí ra Jesús chi ñaha sihi cuan:

—Cuahan vityin, cha cacun vatyí chinó iñun chii. Cuahan chihin cha vaha —catyí ra chi ña.

8

Ñusihí cha tyinyeé chi ra Jesús

1 Cha yahā tuhun cuan, ta cuahan ra Jesús chicá noo ra noo noo ñuu cahnu ta noo noo ñuu luhlu. Ta cahan noo ra nuu ñáyivi. Ta sacoto ra chi ñu tuhun vaha yoso cuhva cuñi Nyoo cunyaca ñaha ra chi ñu. Ta ndi uchi uvi tahan apóstol, ra cha tyatyíño ra chi, cuahan coyo ra chihin ra.

2 Ta cuahan coyo tucu suhva ñusihi cha sanduvahā ra, ñu cuhvi ta ñu yihí tatyí ña vaha chi. Ta chihin ñu cuahan cu María noo ñaha ñuu Magdala, cha yihí ucha tahan tatyí ña vaha chi ta nduvahā ña.

3 Ta cuahan tucu cu Juana ñasihi ra Chuza ra cuví tyiño cuenda ra Herodes, ta cu Susana chihin cuaha xaan ca ñu cha tyinyeé chi ra chihin ñáá cha iyó chi ñu.

Nu sañahá ra Jesús vatyi tari noo ra chicá noo tachí, tyicuan caa cuví ra cahán tuhun Nyoo

(Mt. 13.1-9; Mr. 4.1-9)

4 Ta cuaha xaan ñáyivi quitá noo noo ñuu, vatyi cua nyehe ñu nu cahan ra Jesús tuhun Nyoo. Ta tuvi xaan ñu nyicú ñu, ta quichaha catyi ra chi ñu chihin noo cuhva:

5 —Quitá noo ra vehe ra. Ta cuahan ra nu iyó tyiño sahá ra, vatyi cua quití ra chiti trigu nu ñuhú ra. Ta cuhva cha quití ra canacoyo suhva chiti cuan yuhu ityi. Ta chañi ñáyivi siqui. Ta quichí saa ta chachí ti.

6 Ta suhva ca chiti cuan canacoyo ticu yuu. Cañá chiti cuan. Soco na ityi ri vatyi chiin xaan ñuhu yihí chaha. Ta siin ri ña cachin.

7 Ta suhva ca chiti canacoyo chichi chiti iñu, soco quivi cañá tun iin ri, tu iñu cuan chahñi chí tun.

8 Soco suhva ca chiti canacoyo nu ñuhú vaha ta quivi chahnu tun, vaha xaan chaha tun chiti. Vatyi noo ri chiti cuan, cientu chiti quitá chihin —catyi ra Jesús.

Ta cha yahā catyi ra tuhun cuan. Ta quichaha cana chaa ra vatyi na cuiñi ñáyivi, ta catyi ra:

—Tatu cutuñi iñi ndo, tyasoho ndo tuhun cahín —catyi ra.

Nu sacotó ra Jesús ñáá cuenda sañahá ra chihin cuhva ri

(Mt. 13.10-17; Mr. 4.10-12)

9 Yahā cuan ta ra cachicá noo chihin ra, ndacā tuhun ra chi ra ñáá cha cuñi chi catyi tuhun cha nacatyí ra chi ñáyivi.

10 Tyicuan ta quichaha catyi ra:

—Chi nyoho sacotó Nyoo tuhun xehe, yoso caa nyacá ñaha ra. Soco chi tandihi ca ñu cuan, cuhva ri chahí chi ñu. Tacuhva nyehe ñu ta cuví chi tari cha ña ndichin nyehe ñu, ta cuiñi ñu soco ma cutuñi iñi ñu ñáá tuhun cuví.

Nu sacotó ra Jesús ñáá cha cuñi chi catyi tuhun ra tachí cuan

(Mt. 13.18-23; Mr. 4.13-20)

11 'Cuhva cha catyi chi ndo, cuñi chi catyi tyehe caa: chiti cuan tari tuhun Nyoo cuví.

12 Ta tari nu canacoyo chiti trigu cuan yuhu ityi, tyicuan caa cuví noo ñu chiñi tuhun Nyoo. Soco quichí cuihna ta tinyaa ra tuhun Nyoo chi ñu tacuhva cha ma chino iñi ñu. Ta ma cacu ñu.

13 Ta tari nu canacoyo chiti cuan ticu yuu, tyicuan caa tucu inga ñáyivi cha chiñi tuhun Nyoo. Ta si xaan cuví chi ñu suhva ri quivi. Soco vatyi ña yihí vaha yoho ñu, suhva ri quivi chino iñi ñu, soco quivi cha quichaha nyehe ñu tindoho, ta sandihi ri ñu tuhun cha chinó iñi ñu.

14 Tari nu canacoyo chiti chichi iñu, tyicuan caa cuví tucu inga ñu chiñi tuhun Nyoo. Chiñi ñu tuhun Nyoo soco ña cuñi ñu sacuvi ñu tari cuhva chiñi ñu. Vatyi yihí ñu, nyaá ca xiñi ñu tuhun tindoho ican saha tuhun Nyoo. Ta nonga ñu nyiyo ca iñi ñu cha tyayí. Ta nonga tucu ñu si ca cuñi ñu chica noo yanga ri ñu. Ta tari cha ña chicoo chiti nuu ñu cuví cuan.

15 Soco tari nu canacava chiti nu ñuhú vaha, tyicuan caa cuví noo ñu cha chiñi tuhun Nyoo. Ta vaha añima ñu vatyi chinó iñi ñu chihin tandihi añima ñu. Ta vaha tyasohó ñu tuhun Nyoo, ta ña naa maa iñi ñu tuhun ra. Ta sacuvi ñu tandihi tuhun cahán ra.

Ma tyihi xehe yo ñuhu cha sandundichin Nyoo añima yo coto tinyaa ra

(Mr. 4.21-25)

16 'Yori yo cha natyaa yo ñuhu tima ta tixehé yo xiu chito o nonga nu xehe. Natyaa yo ñuhu tima soco cha cananyaa yo noo nu sucun. Ta cuhva quihvi ñáyivi chichi vehe soco ndichin.

17 Vatyí ñahri noo cha ñohó xehe, ta cuñún, tyi ma natuvi. Ta ni noo tuhun xehe, ta cuñun, tyi ma quita nu ndichin ta coto yo.

18 Yucuan chaha tyasoho ndo tuhun cahín. Vatyí tatu quichaha ndo tuhun cahín, cuaha ca cusañahi chi ndo. Soco tatu ma tyasoho ndo, tyicuan ta cutinyaa Nyoo tandihi maa chi ndo nyacua nya cha chiin ri cha cuñí maa ndo tyi cumí ndo.

Tari yañi ra, ta tari sihi ra, tyicuan caa cuví chi ñu quichaha tuhun Nyoo, catyí ra Jesús

(Mt. 12.46-50; Mr. 3. 31-35)

19 Tyicuan ta chaá sihi ra Jesús chihin yañi ra nu nyaá ra. Soco ña cuví chaá ñu vatyí tuví xaan ñáyivi.

20 Tyicuan ta sacoto ñáyivi canyicú cuan chi ra Jesús, ta catyí ñu:

—Sihun chihin yañun nyicú ñu chata vehe. Ta cuñí ñu cahan ñu chuhun.

21 Tyicuan ta nacahan ra Jesús, ta catyí ra:

—Tandihí maa ñáyivi cha chiñí ta sacuví tuhun Nyoo cha cahín, ican ñu cuví sihi, ta ican ñu cuví yañi —catyí ra Jesús.

Nu sacutaxin ra Jesús tatyí ñihi vavaha nu miñi

(Mt. 8.23-27; Mr. 4.35-41)

22 Cuví chi noo quivi cuan quihvi ra Jesús chichi noo canoa chihin ra cachicá noo chihin ra. Ta quichaha catyí ra chi ra:

—Coho ndo inga chiyo miñi ihya.

Yucuan ta cuahan coyo ra chihin canoa cuan.

23 Ta cha ni ri ca cha cuahan ra mahñu miñi cuan, tiñ ñumahna chi ra Jesús. Tyicuan ta sana iñi ra ta chaá noo tatyí ñihi vavaha. Ta quichaha tyihi chi ndutya chichi canoa cuan. Ta quichaha cuñí nyee canoa cuan vatyí cama xaan ndutya quihvi.

24 Tyicuan ta casandoyo ra chi ra Jesús. Ta quichaha catyí ra:

—¡Maestro! ¡Maestro! Cha cuñí nyee yo chichi ndutya —catyí ra.

Tyicuan ta nducuita ra Jesús. Ta quichaha catyí ra chi tatyí cuan ta chi ndutya cuan, na cutaxin chi. Ta cutaxin ri.

25 Tyicuan ta quichaha catyí ra chi ra cachicá noo chihin ra:

—¿Ñáá tuhun yuhví ndo? ¿Atu ña chinó iñi ndo vatyí yuhu sahá cuende chi ndo? —catyí ra.

Soco ra cuan, yuhvi xaan ra. Ta iyo xaan cuñí ra. Ta quichaha ndaca tuhun ra chi ra tahan ra:

—¿Yóó ra cuví ra ihya? Vatyí nyacua nya tatyí ta ndutya ta quichahá tuhun cahán ra.

Nu nduvahá noo ra yihí tatyí ña vaha ñuu Gadara

(Mt. 8.28-34; Mr. 5.1-20)

26 Tyicuan ta chaá coyo ra ityi Gadara cha nyaá inga chiyo miñi ityi nuu Galilea.

27 Ta quita ra chichi canoa cuan. Ta yucuan chaá noo ra cha quichi noo ñuu ityi cuan chisatahan ra chi ra. Ta yihí tatyí ña vaha chi ra. Ta cha naha xaan ña ñihnó maa ra sahma. Ni ri ña iyó ra vehe ra. Chicá noo ri maa ra nu ñaña calavari cuan.

28-29 Ta tuhvá tatyí ña vaha cuan naquiqui chi ra. Ta yucuan chaha chahñí ñu ndaha ra ta chaha ra chihin cadena. Soco tatyí ña vaha cuan chahá fuerza chi ra cha cahnya ra. Ta sacono chi chi ra. Ta chinyaca chi chi ra noo nu yori maa ñáyivi iyó. Ta cuhva cha nyehe ra chi ra Jesús, chicuiñi chiti ra nuu ra. Ta quichaha canachaa ra, ta catyí ra:

—¿Ñáá tuhun tyihún chuun chihin yuhu, yoho Jesús, Sehe Nyoo cahnu? Chiquén chuun vatyí ma sanyehun tundoho chii —catyí ra yihí tatyí ña vaha cuan chi ra Jesús.

Ta catyí ra tyehe caa vatyí ra Jesús tachi ra chi tatyí ña vaha cuan, na quita chi ra ndahvi cuan.

30 Ta quichaha ndaca tuhun ra Jesús chi tatyí ña vaha cuan, ta catyí ra:

—¿Ñáá nañún?

Ta tatyí ña vaha cuan sacahan chi ra cuan, ta catyí ra:

—Nyuhu nañí ndi, Legión.

Tyicuan caa catyí ra vatyí cuaha xaan tatyí ña vaha yihí chi ra. Cuenda mil tatyí ña vaha cuan yihí chi ra.

31 Tyicuan ta tatyí ña vaha cuan catyí chi ra Jesús vatyí ma tuchi ra chi chi nu tindoho nu ma cuvi maa quita chi.

³² Ta chicán tatyí ña vaha cuan chi ra Jesús nacuhva ra caquihví chi chichi quini cha canyicú yuhu miñi cuan. Tyicuan ta chaha ra Jesús permiso cha caquihví chi chichi quini cuan.

³³ Ta quitá tatyí ña vaha cuan chi ra ndahvi cuan. Ta caquihví chi chichi quini cuan. Tyicuan ta cachino quini cuan. Ta yatyin cuan nyaá noo xahva yuhu miñi cuan. Yucuan canacooyo ti chichi miñi cuan. Ta cachihi ti chihin ndutya cuan.

³⁴ Tyicuan ta ra casahá cumi chi quini cuan, yuhví xaan ra. Ta cuahan coyo vavaha ra cua nacatyí ra chi ñáyivi nya ñuu. Ta tandihi ri ñáyivi cha nyehe ra, ta nacatyí ra tuhun cuan.

³⁵ Tyicuan ta chaá coyo ñáyivi cua nyehe ñu ñáa cha cuví cuan. Tyicuan ta chaá ñu nu nyaá ra Jesús. Ta nañihí ñu chi ra cha yihí tatyí ña vaha cuan chi. Nyaá ra nuu ra Jesús. Ta ñihnó ra sahma ra. Ta vaha cuñí ra. Ta yuhví xaan ñu cuví.

³⁶ Tyicuan ta tandihi ñu cha nyehe cha cuví cuan, nacatyí ñu chi tandihi ca ñáyivi yoso caa quitá tatyí ña vaha chi ra ndahvi cuan, ta nduvahá ra.

³⁷⁻³⁹ Yucuan ta tandihi ñáyivi ityi Gadara cuan quichaha catyí ñu chi ra Jesús na cunuhu ra ityi nu quichi ra. Vatyí yuhví xaan ñu chihin cha sacuví ra chihin tatyí ña vaha cuan. Tyicuan ta ra cha quitá tatyí ña vaha cuan chi, catyí ra chi ra Jesús, na cuhva ra cha cuhun ra chihin ra. Soco catyí ra Jesús chi ra:

—Cuñuhu nya vehun. Ta nacuhva cuendon chi ñáyivi chuun ñáa cha sacuví Nyoo chuhun —catyí ra.

Yucuan ta ra Jesús nandihví ra chichi canoa cuan. Ta cuanuhu ra chihin ra cachicá noo chihin ra. Tyicuan ta ra ndahvi cha nduvaha cuan, cuanuhu ra nya ñuu ra. Ta ityi cuahan ra nacatyí ra chi tandihi ñáyivi ñuu cuan yoso caa sanduvahá ra Jesús chi ra.

Nu nduvahá sehe ra Jairo ta ñaha sihi cha tñin sahma ra Jesús

(Mt. 9.18-26; Mr. 5.21-43)

⁴⁰ Quiví cha nachaa ra Jesús cha chahan ra inga chiyo miñi cuan, cuaha xaan ñáyivi

nyatú ñu chi ra. Ta sii xaan cuñí ñu vatyí nachaa ra.

⁴¹ Tyicuan ta chaá noo ra cha nañí Jairo, ra cuví nuu vehe ñuhu, ta chicuñí chiti ra nuu ra. Ta quichaha chacu ndahví ra nuu ra, na cuhun ra vehe ra.

⁴² Vatyí iyó noo tuhun ri sehe ra, ta iyó uchi uvi cuiya ña. Ta cha cuñí cúvi ña chihin cuehe. Ta cuahan ra Jesús vehe ra. Ta cuaha xaan ñáyivi cuahan chihin ra Jesús, ta tihin xaan cuahan ra mahñu ñu.

⁴³ Ta chihin ñáyivi cuan cuahan noo ñaha cuhví. Cha iyó uchi uvi cuiya ndoho ña noo cuehe niñi. Ta cha ndihi maa xuhun ña sanaa ña, ta ña nduvahá ña.

⁴⁴ Soco chaá ña nu nyaá ra Jesús ityi chata ra. Ta tñin ña sahma ra. Ta caa cuhva ri cuan, ta chicunyasi cha chati niñi ña.

⁴⁵ Tyicuan ta quichaha catyí ra Jesús:

—¿Yóo cha tñin sahme?

Ta tandihi ñu cuahan chihin ñu catyí ra:

—Yori.

Ta catyí ra Pedro ta ra tahan ra chi ra Jesús:

—Maestro, cuaha xaan ñáyivi cuahan chuhun, ta tihin xaan cuahun. Ta suri maa ñu tyandahá ñu chuun. Ta ndacá tuhun con “¿Yóo cha tñin sahme?” —catyí ra.

⁴⁶ Soco ra Jesús catyí ra:

—Chitó mai vatyí iyó noo cha tñin sahme. Vatyí tuví iñi cuahan suhva tunyee iñi cha iyó chii —catyí ra.

⁴⁷ Tyicuan ta ñaha sihi cuan nyehe ña vatyí cha chitó ra. Ta quichaha nihi ña chihin cha yuhví ña. Ta chicuñí chiti ña nuu ra. Ta quichaha nacatyí ña chi ra ñáa tuhun cha tñin ña sahma ra, ta yoso caa nduvahá ña caa cuhva ri cuan. Ta chiñí tandihi ñáyivi cuan cha nacatyí ña.

⁴⁸ Yucuan ta catyí ra Jesús chi ña:

—Yoho sihi, cha nduvahun vatyí chinó iñun chii. Cuahan chihin cha vaha —catyí ra.

⁴⁹ Ni cahan ca ra Jesús tuhun ihya, ta chaá noo ra quitá vehe ra cuví nuu vehe ñuhu cuan. Ta quichaha catyí ra chi ra Jairo cuan:

—Sehun cha yahá chihi ña. Ma sayanga con chi Ra Sacuaha chiña —catyí ra.

⁵⁰ Soco cha chiñí ra Jesús tuhun cuan. Ta quichaha catyí ra:

—Ma yuhvun. Chino iñun. Ta sehun cua nduvaha ña —catyí ra.

⁵¹ Ta cuhva cha chaꞗ ra Jesús vehe ra Jairo, ña chahꞗ ra quihvi ñáyivi chichi vehe. Maa ri maa ra Pedro ta ra Jacobo ta ra Juan ta maa ra Jairo chihin ñasihí ra, quihvi ñu chichi vehe cuan nu catuví cuehe luhlu cha chihí cuan.

⁵² Ta tandihí ñu chacú chaa ñu cha cuenda vatyi chihí cue. Soco ra Jesús catyí ra chi ñu:

—Ma cuacu ca ndo. Vatyi ña chihí cue. Quixí cue —catyí ra.

⁵³ Soco chacú nyaa ñu tuhun cahan ra. Ta ña chinó iñi ñu. Vatyi chitó ñu tyi cha chihí cue.

⁵⁴ Tyicuan ta tñn ra Jesús ndaha cue. Ta ñihí cahan ra ta catyí ra chi cue:

—Nducuíta, cuehe luhlu —catyí ra.

⁵⁵ Tyicuan ta nandotoꞗ cue. Ta caa cuhva ri cuan ndicuitꞗ cue. Ta quichaha catyí ra Jesús:

—Cuhva ndo cha cachi cue.

⁵⁶ Ta sutu cue ta sihi cue, iyo xaan cuñí ñu. Soco catyí ra Jesús chi ñu vatyi yori maa chihin cahan ñu tuhun cha cuví cuan.

9

Nu tachí ra Jesús ndi uchi uvi tahan ra cachicá noo chihin ra vatyi cucahan ra tuhun Nyoo

(Mt. 10.5-15; Mr. 6.7-13)

¹ Sandu ñn ri ra Jesús ndi uchi uvi tahan ra cachicá noo chihin ra. Ta chahꞗ ra tunyee iñi chi ra vatyi cuví tava ra tatyí ña vaha, ta cuví sanduvaha ra chi ñu cuhví.

² Ta tachí ra tyiño chi ra vatyi na sanduvaha ra chi ñu cuhví, ta cahan ra tuhun Nyoo yoso caa nyacá ñaha ra añima ñáyivi.

³ Ta catyí ra chi tandihí ra cuan:

—Ñahri cha cuison ndo ityi cahun ndo, ni yutun ma tuvi ndo. Ni yitín, ta ni ri cha cachi ndo ta ma cuison ndo. Ta ni ri xuhun ta ma cuison ndo. Tacuhva ñihnó ri ndo cahun ndo.

⁴ Ta savaha ri vehe cha chaa ndo, cunya ndo yucuan nyacua nya cha chaa quivi cha cahun ndo inga ñuu.

⁵ Ta nu ña cuñí ñu cuiñi ñu tuhun cahan ndo, quita ndo ñuu cuan. Ta naquisi ndo ñiyaca chaha ndo. Tyehe caa sacuvi ndo na cuví chi tari minoo seña chi ñu, vatyi ña

cuñí ñu tyasoho ñu tuhun Nyoo —catyí ra Jesús chi tandihí ra cuan.

⁶ Tyicuan ta cuahan coyo ra tandihí cuii maa ñuu. Ta cahan ra tuhun vaha Nyoo ta yoso caa cuñí chi ta cacu ñu. Ta sanduvaha ra chi ñu cuhvi.

Nu cuñí ra Herodes coto ra yóo ra chicá noo cahan tuhun Nyoo ta sanduvahá chi ñáyivi

(Mt. 14.1-12; Mr. 6.14-29)

⁷ Ra Herodes ra cuví ra nyacá ñaha nicahnu ityi Galilea, ñihí ra tuhun cha sacuví ra Jesús. Ta ña ñihí vaha ra cuhva yóo ra cuví ra. Vatyi yihí ñu catyí ñu vatyi ra Juan, ican ra nandotoꞗ.

⁸ Ta yihí ñu catyí ñu vatyi ra Elías, ican ra nandotoꞗ. Ta yihí ñu catyí ñu vatyi inga ra profeta Nyoo ta cha naha, ican nandotoꞗ.

⁹ Soco catyí ra Herodes:

—Maa mai tyihí tyiño chicahnya sucun ra Juan. ¿Tu tyicuan caa, yóo ra chiñí xain tuhun ihya? —catyí ra.

Ta ra Herodes cuan nducú xaan ra cuhva yoso caa nyehe ra chi ra cha chicá noo cuan.

Nu chahꞗ ra Jesús cha cachi ohon mil rayi

(Mt. 14.13-21; Mr. 6.30-44; Jn. 6.1-14)

¹⁰ Ta cuhva cha nachaa coyo ra chicá tyiño nuu ra Jesús, canacatyí ra chi ra Jesús tandihí cuii maa cha cuví nu chahan coyo ra. Tyicuan ta tava siin ra Jesús chi ra ta cuahan coyo ra yatyin ri noo ñuu cha nañí Betsaida.

¹¹ Soco cuhva cha ñihí ñáyivi tuhun vatyi cuahan ra Jesús nyicuan, ta cuahan coyo vavaha ñu nya nu nyaá ra. Tyicuan ta quichaha cahan ra chihin ñu tuhun yoso caa nyacá ñaha Nyoo añima ñáyivi. Ta sanduvaha ra chi ñu cuhví.

¹² Ta cuhva cha cua iñi xaan, ndi uchi uvi tahan ra chicá noo chihin ra quichaha catyí ra chi ra:

—Catyí chi ñáyivi ihya na cunuhu ñu cun-yitatu ñu, ta na cunducu ñu noo cha cachi ñu noo ñuu cha nyaá yatyin ri cuan. Vatyi ihya ñahri maa cha cachi yo iyó —catyí ra.

¹³ Tyicuan ta quichaha catyí ra Jesús chi ndi uchi uvi tahan ra cuan:

—Cuhva ndo cha cachi ñu —catyí ra.

Tyicuan ta quichaha catyí ra chicá noo chihin ra chi ra tahan ra:

—Ñahri maa cha iyó ihya. Ohon tahan ri pan, ta uvi tahan ri tiyaca iyó. Soco ma ñihi cha cachi tandihi ñáyivi ihya. Ni ri cusata ndi soco ma ñihi —catyí ra.

¹⁴ Vatyí ohon mil rayi nyicú yucuan. (Ta siin ri nyicú ñusihi chihin sehe ñu.) Yucuan ta ra Jesús catyí ra chi ra cachicá noo chihin ra:

—Na cunyicu ñáyivi cha uvi xico uchi tahan ñu noo noo nu cunyicu ñu.

¹⁵ Tyicuan ta chicunyicu tandihi ñu.

¹⁶ Tyicuan ta quehen ra Jesús ohon tahan pan cuan chihin uvi tahan tiyaca cuan. Ta nanyehe ndaa ra andivi, ta nacuhva ra tyahvi nyoo chi Nyoo. Tyicuan ta tahvi sava ra pan ta tiyaca cuan. Ta chaha ra chi ra cachicá noo chihin ra na casacha ra chi ñáyivi.

¹⁷ Tyicuan ta tandihi ñu chachi ñu. Ta chitu chichi ñu. Yaha cuan ta ndoo ca yiquin ta sacutu ra uchi uvi tahan tica chihin yiquin cuan.

Nu catyí ra Pedro tyi ra Jesús cuví ra Cristo, ra sacacú chi yo

(Mt. 16.13-19; Mr. 8.27-29)

¹⁸ Noo quivi quita siin ra Jesús chihin ra cachicá noo chihin ra. Ta quichaha chicán tahvi ra chi Nyoo. Ta nu ndihi chicán tahvi ra, ta quichaha ndaca tuhun ra chi ra chicá noo chihin ra ta catyí ra:

—¿Ñáá catyí ñáyivi, yóo ra cuví yuhu?

¹⁹ Tyicuan ta nacahan ra cachicá noo chihin ra, ta catyí ra:

—Yihí ñu catyí ñu vatyí ra Juan ra saconduta chi ñáyivi cuvún. Ta yihí ñu catyí ñu vatyí ra Elías cuvún. Ta yihí ñu catyí ñu vatyí inga ra profeta Nyoo ta cha naha cuvún —catyí ra.

²⁰ Tyicuan ta ndaca tuhun ra Jesús chi tandihi ra, ta catyí ra:

—Ta nyoho, ¿yóo ra cuví yuhu, cuhva cha cuñi nyoho?

Tyicuan ta nacahan ra Pedro, ta catyí ra:

—Yoho cuví ra Cristo ra cha quita nu nyaá Nyoo.

Nu sacoto ra Jesús yoso caa cucahñi ñáyivi chi ra

(Mt. 16.20-28; Mr. 8.30—9.1)

²¹ Ta catyí ra Jesús chi ra cachicá noo chihin ra vatyí yori maa chihin cahan ra tuhun cuan.

²² Tyicuan ta catyí tucu ra chi ra:

—Yuhu Rayi cha quichi nya gloria cuví. Ta tahán chi vatyí cuaha xaan tundoho cunyehe. Ta ra cacuví mandoñi ta ra cacuví nuu chi tata sutu chihin ra casacuaha cuenda ley, ma chino iñi ra chii. Ta cucahñi ra chii. Soco nu cu uñi quivi cunandote —catyí ra.

²³ Tyicuan ta quichaha catyí tucu ra chi tandihi ra:

—Tatu nya nyoho cuñi ndo cunyicon ndo chii, cahnya iñi ndo cha cuñi maa ndo sacuvi ndo, tacuhva cuví sacuvi ndo cha cuñi Nyoo. Ma ndu uvi iñi ndo cha yihí ndo cuende vasi ndiquivi nyehe ndo tundoho. Vatyí yucuan cuví cruzi cha tahán chi cuiso ndo.

²⁴ Ta nya ndo ña cuñi ndo nyehe ndo tundoho cha catyí yuhu, cunyehe ndo tundoho anyaya. Soco nya ndo cuhva ndo ñáyivi ndo cha catyí yuhu, cucacu añima ndo.

²⁵ ¿Ñáá cuenda quita chi ndo cha saha ganaa ndo tandihi cha iyó ñáyivi, tatu cahun añima ndo anyaya?

²⁶ Vatyí tatu cahan nuu ndo cha cahán ñáyivi chi ndo cha catyí yuhu, ta cha catyí tuhun cahín, cucahan tucu nuu mai nyehi chi ndo nachaa quivi quichi inga chaha. Vatyí cuquichi chihin cha cahnu cuví, ta cha cahnu cuví Sutu yo Nyoo ta ángel cuenda ra. Vatyí yuhu cuví Rayi cha quichi nya gloria.

²⁷ Ta catyí chi ndo vatyí yihí ndo cha nyicú ndo ihya vityin, ma cúvi ndo nyacua nya nyehe ndo yoso caa cuví nu nyacá ñaha Nyoo.

Uñi tahan ra cachicá noo chihin ra Jesús nyehé ra yoso caa cuví nu nyacá ñaha Nyoo

(Mt. 17.1-8; Mr. 9.2-8)

²⁸ Uña quivi yaha cha catyí ra Jesús tuhun cuan. Ta ndaa ra noo yucu vatyí cua cacan tahvi ra chi Nyoo. Ta cuahan ra Pedro, ra Jacobo ta ra Juan chihin ra.

²⁹ Ta cha ni ri ca cha chicán tahvi ra Jesús, nasama cuhva caá sahma ra ta nuu ra. Tyaquí xaan cuichin nanduvi sahma ra. Ta xiño xaan.

³⁰ Tyicuan ta tuvi uvi tahan ra candatuhún chihin ra, ra Moisés ta ra Elías.

³¹ Ta ndichin xaan nu tayucú ra. Ta cacahán ra tuhun yoso caa cunyehe ra Jesús tundoho Jerusalén ta cúvi ra.

³² Ta vasi cuñí xaan ra Pedro chihin ra tahan ra cacusu ra, soco ña quixí ra. Ta nyehé ra cha ndichin xaan cuan nu nanyaá ra Jesús chihin ra cha tayucú chihin ra.

³³ Cuhva cha cuahan coyo ra tayucú chihin ra Jesús cuan, catyí ra Pedro:

—Maestro, vaha xaan cha nyicú ndi ihya. Na savaha ndi uñi tahan vehe, noo chuun, noo chi ra Moisés, ta noo chi ra Elías —catyí ra.

Soco ña chitó ra Pedro tuhun cahán ra.

³⁴ Ta cha ni ri ca cha cahán ra ta quichí noo vico síqui ra. Ta yuhví xaan ra cacuví cha caquihví ra chichi vico cuan.

³⁵ Tyicuan ta chichi vico cuan chiñi ra noo ndusu cha catyí:

—Ican ra ihya cuví Sehi, ta cuñí xain chi ra. Tyasoho ndo tuhun cahán ra —catyí ndusu cuan.

³⁶ Ta cha yaha cahan ndusu cuan, nanyehe ra Pedro ta ra ndihi chihin ra vatyí noo ri ca maa ra Jesús nanyaá yucuan. Ta yori maa chihin cacahan ra tuhun cha nyehé ra.

Nu sanduvaha ra Jesús chi noo ra cuehe luhlu cha yihí tatyí ña vaha chii

(Mt. 17.14-21; Mr. 9.14-29)

³⁷ Ta cha inga quivi cha noo ra Jesús yucu cuan, cuaha xaan ñáyivi chisatahan chi ra.

³⁸ Tyicuan ta chichi cha cuaha ñáyivi cuan, noo ra cana chaa xaan ra, ta catyí ra:

—Maestro, saha tumañi iñi chii. Nyehe ndahvi chi sehi. Vatyí noo tuhun maa ra iyó chii.

³⁹ Ta yihí ndihi tatyí ña vaha chi ra. Ta sacanachaa chi chi ra. Ta tuchí chi chi ra nyasava. Ta quitá tiñi yuhu ra. Ta quiñi xaan nyacuví chi chihin ra. Ta ña cuñí maa tatyí ña vaha cuan saña chi ra.

⁴⁰ Cha cahin chihin ra cachicá noo chuhun na tava ra tatyí ña vaha cuan, soco ña cuví chi ra —catyí ra.

⁴¹ Tyicuan ta nacahan ra Jesús ta catyí ra:

—Nyoho, ñu ña chinó iñi cuví ndo. Ta ni caa ni quiñi iyó ndo. ¿Yoso ca tahan quivi cunyai chihin ndo ta cunyehe iñi tisihi ndo nyacua nya cha cutuhva ndo ta chino iñi ndo chii?

Ta catyí ra chi ra cuan:

—Nyaca chi sehung.

⁴² Ta cuhva cha cua tuhva ra cuehe cuan nu nyaá ra Jesús, ta tuchi tatyí ña vaha cuan chi cue nya sava. Soco ra Jesús tava ra chi tatyí ña vaha cuan. Ta sanduvaha ra chi cue. Tyicuan ta nacuhva cuenda ra chi cue chi sutu cue.

⁴³ Ta tandihi ñáyivi, iyo xaan cuñí ñu cha cahnu cha sacuví Nyoo chihin ñu.

Inga chaha tucu cahan ra Jesús tuhun yoso caa cucahñi ñáyivi chi ra

(Mt. 17.22-23; Mr. 9.30-32)

Cha ni ri ca cha iyo cuñí ñáyivi cha sacuví ra Jesús, ta quichaha catyí ra chi ra cachicá noo chihin ra:

⁴⁴ —Tyasoho vaha ndo tuhun cahín. Ta ma naa iñi ndo. Vatyí yuhu Rayi cha quichí nya gloria, cucuhva cuenda ñu chii ndaha ra xaan iñi chii —catyí ra Jesús.

⁴⁵ Soco ra cachicá noo chihin ra ña cutuñi iñi ra ñáá tuhun cahán ra. Vatyí Nyoo ña chaha ra cha cacutuñi iñi ra. Ta cayuhví ra ndaca tuhun ra chi ra Jesús ñáá cha cuví cuan.

Nu sañaha ra Jesús yóo ra cha cahnu ca cucuvi nu nyacá ñaha Nyoo

(Mt. 18.1-5; Mr. 9.33-37)

⁴⁶ Yucuan ta ra cachicá noo chihin ra quichaha cacuvi yuhu ra tuhun nya ra cahnu ca cuví chichi cha uchi uvi tahan ra.

⁴⁷ Tyicuan ta chitó ra Jesús cha chicá xiñi ra, ta quehen ra chi noo ra cuehe luhlu.

⁴⁸ Ta quichaha catyí ra chi tandihi ra cuan:

—Tatu chihin sivi natín cuenda ndo chi noo ñáyivi ña cahnu sahá chi tari ra cuehe luhlu ihya, chi yuhu natín cuenda ndo. Ta tatu natín cuenda ndo chii, chi maa Nyoo cha saquichí chii, natín cuenda ndo. Vatyí ra cha ñima ri tuhun sahá maa ndo tuhun, ican ra cuví ra cahnu nuu Nyoo —catyí ra Jesús.

Ñu cha ña cahán chi yo, ican ñu cuan tyinyee chi yo

(Mr. 9.38-40)

⁴⁹ Yucuan ta ra Juan catyí ra chi ra Jesús:
—Maestro, nyehe ndi chi noo ra cuan. Cahán ra sivun ta tavá ra tatyí ña vaha. Soco ña chaha ca ndi. Vatyí ñima chihin yo chicá noo ra —catyí ra.

⁵⁰ Tyicuan ta catyí ra Jesús chi ra:
—Ma casi ndo nu cahan ra. Vatyí yóo ra ña cahán chi yo, tumañi ñi chi yo cuahan ra —catyí ra.

Nu catyí ra Jesús chi ra Juan ta chi ra Jacobo vatyí ña vaha cha chicá xiñi ra

⁵¹ Tuvi ñi ra Jesús vatyí cha nyaña yatyin cha tahán chi cunuhu ra gloria, ta sanduní ra ñi ra. Ta quehen ra ityi ta cuahan ra Jerusalén nu cucuví ra.

⁵² Ta tachí ra tyiño na cahun coyo ra cachicá noo chihin ra ityi nuu ca noo ñuu ityi Samaria. Vatyí canducu ra nu nyitatu ra.

⁵³ Soco ñu Samaria cuan, ña cuñí ñu cha ndoo ra yucuan, vatyí tuví ñi ñu vatyí Jerusalén cuahan coyo ra, ta ñu Samaria ña cuví nyehe ñu chi ñu Jerusalén.

⁵⁴ Cuhva cha chitó ra Jacobo ta ra Juan cha ña chahá ñu Samaria cuan cha ndoo ra yucuan, cuxaan ra. Ta quichaha catyí ra chi ra Jesús:

—Sutu Mañi yuhu, ¿atu cuñun cha sacuvi yo tari sacuvi ra Elías? cacan yo chi Nyoo na saquichi ra ñuhu andivi síqui ñáyivi Samaria cuan, vatyí cayu ñu vatyí ña cuñí ñu cha ndoo yo ñuu ñu —cacatyí ra.

⁵⁵ Tyicuan ta nanyehe ra Jesús chi ra. Ta cahan ra chi ra ta catyí ra:

—Taxi ri ndo. Vatyí ña cutuñi ñi ndo ñáá tyiño vachi yuhu.

⁵⁶ Vatyí yuhu Rayí cha quichí nya gloria, ña vachi vatyí sanai añima ñáyivi, Soco vachi vatyí sacaqui chi ñu —catyí ra.

Tyicuan ta cuahan coyo ra inga ñuu.

Ñu cha cuñí quihvi cuenda ra Jesús

(Mt. 8.19-22)

⁵⁷ Ta cuhva cha cachica ityi ra, quita noo ra, ta catyí ra chi ra Jesús:

—Sutu Mañi yuhu, cuñí cunyiquen chuun. Ta cuhin chuhun tandihí ri ityi cuahun —catyí ra.

⁵⁸ Yucuan ta catyí ra Jesús chi ra:

—¿Atu ndichon? Vatyí yuhu ñahri maa cha iyó chii. Ñaña iyó vehe ti. Ta saa iyó taca ti. Soco yuhu Rayí cha quichí nya gloria ñahri maa nu cava xiñi iyó —catyí ra chi ra cuan.

⁵⁹ Tyicuan ta catyí ra Jesús chi inga ra:

—Coho chihin.

Tyicuan ta nacahan ra cuan ta catyí ra:

—Tata, cuatu noo chii, na cahun xihne cucuchi chi suti —catyí ra.

⁶⁰ Tyicuan ta ra Jesús nacahan ra ta catyí ra chi ra:

—Sandoo chi ñu ña ñohó nuu chi Nyoo natyihí maa ñu chi tahan ndiyí ñu chichi ñuhu. Soco yoho cuahan cua cahan tuhun Nyoo chihin ñáyivi nacuhva cuenda ñu chi ñu chi Nyoo na cunyaca ñaha ra chi ñu —catyí ra.

⁶¹ Tyicuan ta quichaha catyí inga ra chi ra Jesús:

—Tata, cuñí cunyiquen chuun. Soco cuhva xihna na cuhin cuahin chihin ñu vehi —catyí ra.

⁶² Tyicuan ta ra Jesús catyí ra:

—Tari noo ra tahví ñuhú chihin arado, tatu nanyehe chata ra ña quita vaha yucun nu sahá tyiño ra. Ta tyicuan caa cuví noo ra nyicón chii, tatu yihí ñi ra cha sandoo ra, ña yihí vaha ñi ra cha cuví cunyaca ñaha Nyoo chi ra —catyí ra Jesús chi ra.

10

Nu tachí ra Jesús chi uñi xico uchi tahan ra cuahan tuhun Nyoo chihin ñáyivi

¹ Cha yaha tuhun cuan ta nacachí Sutu Mañi yo Jesús chi inga uñi xico uchi tahan ca ra. Ta tachí ra chi uvi uvi ra noo noo ityi cuahan ra tandihí ñuu ta tandihí ityi nu tahán chi cahun ra Jesús.

² Ta catyí ra chi ra:

—Tari noo itu cahnu vavaha, tyicuan caa nu tyiño sahí. Soco ña cuaha musu. Yucuan chaha cacan ndo chi Nyoo na saquichi ca ra musu. Vatyí tyinyee ra chi ndo cahan ndo tuhun ra chihin ñáyivi.

³ Ta cuahan ndo ta nyehe ndo vatyí cua sacuhin chi ndo tari mbee mahñu lobo. Vatyí lobo tuhvá ti chachí ti chi mbee. Ta tyicuan caa cucuñi ñáyivi satañi ñi ñu chi ndo.

4 Ta ma cuiso ndo ni yono ta ni cha quihí xuhun ndo, ni inga ityi ndichan ndo. Sanumi ndo. Ta ma cohon vaha ndo ityi ndatuhun ndo tuhun cha ñima ri tuhun.

5 Cuhva cha quihví ndo chichi vehe noo ñáyívi, çahan vaha ndo chihin ñu. Ta çatyí ndo, na coo cha vaha añima ñu.

6 Ta tyicuan caa tatu iyó ñáyívi vaha vehe cuan, ndoo cha vaha cuan chihin ñu. Soco tatu yori ñu vaha añima, ma ndoo cha vaha chihin ñu.

7 Ta ndoo ndo suri maa vehe cuan. Tatu chaha ñu cha cachi ndo, çachi ndo. Tatu chaha ñu cha coho ndo, coho ndo yucuan. Vatyí ra sahá tyiño, iyó ityi chi ra cha cachi ra cha sahá ganaa ra. ñin ri maa vehe cuan cunyaa ndo nyacua nya cha chaa chi quívi cha cahun ndo inga ñuu.

8 Ta nu chaa ndo noo ñuu ta vaha çahan ñu chihin ndo, çachi ndo ta coho ndo tandihí cha cuhva ñu chi ndo.

9 Ta sanduvaha ndo chi ñu cuhví ñuu cuan. Ta çatyí ndo chi ñu: “Cha nyaña yatyin Nyoo ra cunyaca ñaha añima ndo.”

10 Soco tatu chaa ndo noo ñuu ta ña cuñí ñu tyasoho ñu tuhun çahan ndo, quita ndo ityi çahnu. Ta çatyí ndo chi ñu:

11 “Nyacua nya ñiyaca ñuu ndo cha ñi chaha ndi, ta cunaquisi ndi. Vatyí tari noo seña vatyí ndoo cuatyí ndo siqui ndo. Vatyí Nyoo nyaña yatyin ra chi ndo ta ña tyasoho ndo tuhun çahán ra yoso caa cuñí ra cunyaca ñaha ra añima ndo.” Tyicuan caa çatyí ndo chi ñu —catyí ra Jesús chi ra nyicón chi ra.

12 Ta quichaha çatyí tucu ra chi ra:

—Quívi tachi tuñi Nyoo chi ñáyívi, yaha ca cuhva cunyehe ñáyívi ñuu cuan tundoho, ta ñima ca ñáyívi chiyó ta cha naha ñuu Sodoma, ñu chihí cha çatyí cuatyí ñu —catyí ra Jesús.

Ñáyívi ña tyasohó tuhun çahán ra Jesús cunyehe ñu tundoho

(Mt. 11.20-24)

13 Ta çatyí ra:

—¡Ndahvi nyoho, ñáyívi ñuu Corazín! Ta ¡ndahvi nyoho, ñáyívi ñuu Betsaida! Vatyí nyehé ndo nyatu çahnu, ta ña nasamá ndo cuhva iyó ndo. Soco ñáyívi ñuu Tiro ta ñuu Sidón cha sanaa Nyoo ta cha naha cha cuenda cuatyí ñu, ñahri nyatu çahnu nyehé

ñu. Soco tyehe ta nyehé ñu quívi cuan cha nyehé nyoho vityin, tañi tyehe ri ndihví noo ñu sahma tucuihya ñi ta cunyaa ñu nu ñiyaa. Tari cuhva costumbre iyó maa ñu, noo seña vatyí ndu uvi ñi ñu cuatyí ñu cuví cuan.

14 Yucuan chaha, nyoho ñuu Corazín chihin ñuu Betsaida, ñihi ca cutachi tuñi Nyoo chi ndo ícan saha ñáyívi Tiro ta ñáyívi Sidón cuan.

15 Ta nyoho ñu ñuu Capernaum, cuñí maa ndo vatyí cundaa ndo nyacua nya andívi. Soco cunoo ndo nyacua nya anyaya, vatyí ña quichahá ndo tuhun Nyoo —catyí ra Jesús.

16 Ta çatyí ra chi ndi uñi xico uchi tahan ra cuan:

—Ñáyívi cha tyasohó tuhun çahán nyoho, tuhun çahán yuhu tyasohó ñu cuví cuan. Ta ñu ña quichahá tuhun çahán nyoho, tuhun çahán yuhu ña quichahá ñu cuví cuan. Ta ñu ña quichaha tuhun çahán yuhu, tuhun çahán ra cha saquichí chii, ña quichahá ñu cuví cuan —catyí ra Jesús chi tandihí ra.

Nu nachaa coyo ndi uñi xico uchi tahan ra cha chicahan tuhun Nyoo

17 Yucuan cuví nu nachaa coyo ndi uñi xico uchi ra cha chicahan tuhun Nyoo chihin ñáyívi. Ta sii xaan cacuví chi ra. Ta cacatyí ra chi ra Jesús:

—Sutu Mañi yuhu, nyacua nya tatyí ña vaha ta quichahá tuhun çahán ndi tatu çahán ndi sivun —catyí ra.

18 Tyicuan ta çatyí ra Jesús chi ra:

—Ay, yuhu nyehí andívi nu cana cava cuihna, ra nañi Satanás. Tari noo tacha, tyicuan caa cana cava ra.

19 Ta yuhu, çahí fuerza chi ndo vatyí cuví çasaha ndo chi ra ña vaha cuan. Ta cuví cuaca chaha ndo siqui coo ta tisuhma, ta ñahri cha cuví chi ndo.

20 Soco ma sii xaan cuví chi ndo vatyí cuví tava ñehé ndo tatyí ña vaha cuan. Sii ca cuví chi ndo vatyí nyaá siví ndo nu libru Nyoo —catyí ra Jesús.

Nu sacahnú ra Jesús chi Nyoo vatyí sii cuñí ra vatyí sañahá Nyoo tuhun vaha chi ñu ndahvi

(Mt. 11.25-27; 13.16-17)

²¹ Cuhva cuan sii xaan cuñí ra Jesús sahá Tatyí Ii Nyoo, ta catyí ra:

—Sacahní chuun, Sutu Mañi yuhu, vatyí nyacá ñahun andívi ta ñuhu ñáyívi. Vatyí maun sañahún tuhun maun chi ñu ndahvi ihya. Ta ña sañahún chi ra chitó ta ra cha chiñi tuñi. Tyicuan caa Sutu Mañi yuhu vatyí tyicuan caa kuhva cuñún —catyí ra Jesús.

²² Ta catyí ra Jesús chi tandihí ra sacuví tyiño nuu ra:

—Tandihí maa tuhun cuan chaha Suti chii. Yori ñohó nuu chii, noo tuhun ri maa Suti ñohó nuu chii. Ta yori ñohó nuu chi Suti, noo tuhun ri mai ñohó nui chi ra. Ta chi ñáyívi cuñí mai sacote tuhun ra, chi ñu cuan cusacote —catyí ra.

²³ Tyicuan ta nanyehé ra chi ra cachicá noo chihin ra. Ta catyí ra chi ra:

—Sii xaan cuñí nyoho ta ñáyívi cha iyó vityin vatyí nyehé ndo cha sacuví.

²⁴ Vatyí cuaha xaan rey ta ra profeta Nyoo ta cha naha cuñi ra nyehe ra cha nyehé nyoho vityin. Soco ña nyehe ra. Ta cuñí ra cuñi ra tuhun cha chiñi nyoho vityin. Soco ña chiñi ra —catyí ra Jesús.

Nu sañaha ra Jesús chi yo vatyí tahán chi tyinyee yo chi ñáyívi savaha ri

²⁵ Tyicuan ta chaá noo ra sacuahá cuenda ley vehe ñuhu. Ta quichaha ndaca tuhun ra chi ra Jesús, Vatyí nducu nyehe ra chi ra. Ta catyí ra:

—Maestro, ¿yoso caa cunyacuvi ta cuhin nu coi noo ñáyívi cha ma naa ca maa?

²⁶ Tyicuan ta nacahan ra Jesús, ta catyí ra:

—¿Ñáá catyí nu ley? ¿Yoso caa tuhun cha sacuahún?

²⁷ Tyicuan ta nacahan ra sacuaha cuenda ley cuan ta catyí ra:

—Catyí ley, cuñi yo chi Nyoo chihin tandihí añima yo ta chihin cha ñi iñi yo, ta chihin tandihí fuerza yo, ta chihin cha tandihí cha chiñi tuñi xiñi yo. Ta cuñi yo chi ñáyívi tahan yo tari cha cuñi yo chi maa yo. Tyicuan caa catyí chi —catyí ra cuan.

²⁸ Tyicuan ta catyí ra Jesús chi ra:

—Ndicha cha cahún. Tyicuan caa sacuvun ta cacu añimon ta coun ñáyívi cha ma naa ca maa —catyí ra Jesús.

²⁹ Soco ra sacuaha cuenda ley cuan cuñí ra savaha ra chi ra, ta quichaha catyí tucu ra chi ra Jesús:

—¿Yóó cha cuví ñáyívi tahan? —catyí ra.

³⁰ Tyicuan ta nacahan ra Jesús, ta catyí ra:

—Noo ra quita ra Jerusalén ta cuahan ra nya ñuu Jericó. Ta tahan ra chi ra suhu. Ta suhu ra tandihí cuii maa cha nyiso ra, nyacua nya sahma ra. Ta cañi ra chi ra nyacua chacun taxin ra chi ra. Ta sandoo maa ra chi ra yucuan.

³¹ Tyicuan ta yaha noo tata sutu ityi cuan. Soco kuhva cha nanyehé ra chi ra catuví cuan nya sava ri yaha ra.

³² Tyicuan ta yaha tucu nonga ra cha yihí cuenda vehe ñuhu, cha nañi levita. Soco cha nanyehé ra chi ra catuví cuan suri nya sava ri yaha ra.

³³ Tyicuan ta quichi tucu noo ra Samaria. Ta cua yaha tucu ra suri ityi cuan. Ta nanyehé ra chi ra catuví yucuan, ta quichi nundahvi cuñi ra nyehe ra chi ra.

³⁴ Ta tuhva ra nu catuví ra, ta quichaha saha ra tatan chi ra. Ta tyihí ra aceitye ta vinu nu cahvi chi ra. Ta sahvi ra noo sahma chata ra. Yaha cuan ta sandaa ra chi ra burru sana ra, ta naquehen ra chi ra, ta cuahan ra chihin ra nu nyaá noo vehe. Ta yucuan saha cuenda ra chi ra.

³⁵ Ta cha inga quívi cha cuñi cuhun ra Samaria cuan. Ta tava ra uvi tahan xuhun. Ta chaha ra chi chitoho vehe cuan. Ta catyí ra chi ra: “Saha cuenda vahun chi ra ihya. Ta cuhvon cha cachi ra. Ta saton tatan chi ra na nduvaha ri ra. Tatu cuñi ca chi xuhun, tyiyahvi mai chuun nandichi”, catyí ra. Yucuan ta cuahan ra —catyí ra Jesús.

³⁶ Nu ndihí nacatyí ra Jesús tuhun ihya, quichaha ndaca tuhun ra chi ra sacuaha cuan, ta catyí ra:

—Vaha. ¿Chichi cha uñi tahan ra cuan, nya ra cuví ra tahan ra ndahvi cuan? —catyí ra Jesús.

³⁷ Tyicuan ta quichaha catyí ra sacuaha cuan:

—Ra cha cundahvi cuñi chi ra —catyí ra. Tyicuan ta quichaha catyí ra Jesús:

—Cuahan ta sacuvi tucu yoho tyicuan caa chihin ñáyiví cha iyó tundoho chii —catyí ra.

Nu chinyaa ra Jesús vehe cu Marta chihin cu María

³⁸ Ta quehen ra Jesús ityi cuahan ra. Ta chaá ra noo ñuu. Ta yucuan iyó noo ñaha cha nañi Marta. Ta chaá ra vehe ña.

³⁹ Ta cu Marta iyó noo cuhu ña cha nañi María. Ta cu María chicunyaá ña yatyin ri chaha ra Jesús, vatyí cuiñi ña tuhun cahán ra.

⁴⁰ Soco cu Marta cuaha xaan tyiño nyaá sacuvi ña. Ta chaá ña nu nyaá ra Jesús, ta quichaha catyí ña chi ra:

—Tata. ¿Atu ña chicá xiñi yoho vatyí cuhi sando maa ña chii chihin tyiño? Catyí chi ña na tyinyee ña chii —catyí ña chi ra.

⁴¹ Soco ra Jesús catyí ra chi ña:

—Marta, Marta, chicá xaan xiñun ta cu tyiño xaan cuñún chihin tyiño chiña.

⁴² Soco iyó noo tuhun cha tahán chi caca xiñi yo. Ta cu María ihya nacachi ña tyiño vaha ca sacuvi ña cha tyasohó ña tuhun cahín. Ta yuhu ma cuvi tinyai chi ña —catyí ra Jesús chi cu Marta.

11

Nu sañaha ra Jesús chi ra cachicá noo chihin ra yoso caa cacán tahvi ra chi Nyoo (Mt. 6.9-15; 7.7-11)

¹ Cuví noo chaha cha chicán tahvi ra Jesús. Ta cuhva cha ndihí chican tahvi ra, ta quichaha catyí noo ra chicá noo chihin ra chi ra:

—Sañaha chi ndi yoso caa cacán tahvi ndi chi Nyoo. Tari sañaha ra Juan chi ra chicá noo chihin ra —catyí ra.

² Tyicuan ta catyí ra Jesús chi ra:

—Cua cuhve cuhva chi ndo yoso caa. Tyehe caa cacán tahvi ndo:

Sutu Mañi yuhu, yoho cha nyaun andiví. Sacahnu xaan ndi chuun.

Na quichi quiví cha nyaca ñahun ihya siqui ñuhu ñayiví.

Na sacuvi ñáyiví ihya siqui ñuhu ñayiví tandihí cuhva cuñí maun, tari cuhva cuví gloria.

³ Cuhva cha cachi ndi tacuhva yoso cuhva yaha ndi noo noo quiví.

⁴ Saha tucahnu iñi chi ndi. Tari maa ndi sahá ndi tucahnu iñi chi ñu tasi iñi chi ndi.

Ma cuhvon cha nducu nyehe ra ña vaha chi ndi, soco sacacu chi ndi tacuhva ma sacuvi ndi cuatyí nuun.

Tyicuan caa cacán tahvi ndo —catyí ra Jesús.

⁵ Ta catyí tucu ra ñandihí:

—Saha yo tuhun tyi nyoho iyó noo amigon, ta chaa ra vehun cha ñuu ta catyí ra chuun: “Xaa, saha tumañi iñi chii, cuhva noo uñi tahan pan chii.

⁶ Vatyí noo ra tahin nichaa ra vehi. Ta cañi xaan quichi ra. Ta ñahri maa cha iyó chii cuhve chi ra.”

⁷ Ta yoho cunacahun ta catyun chi ra: “Ma sayangon chii, ndee. Vatyí nyasí yu-vehi. Ta ñiquixi chihin sehi. Ta ña cuvi nducuite ta cuhve cha cuhve chuun cha vityin.” Tyicuan caa cucatyun chi ra.

⁸ Ta catyí yuhu chuun. Vasi ra tahun cuví chi ra, ma nducuiton ta cuhvon chi ra cha numi ri. Soco tatu ndoo ra yucuan, ta ma cundihñi ra cacán ra chuun, sacachan ra yuehun ta cana chaa ra chuun tacuhva cha ma cuvi cusun, ta cundihñun cha sacachan ra yuehun, tyicuan ta nducuiton ta cuhvon chi ra, tacuhva cha ma sayanga ca ra chuun.

⁹ Ta tyicuan caa tucu nyoho, cacán ndo chi Nyoo. Ta cuhva ra chi ndo. Nanducu ndo ta ñihi ndo. Sacachan ndo yuehe ta nuña.

¹⁰ Vatyí tatu chican ndo, ñihi ndo. Tatu nducu ndo, ñihi ndo. Ta tatu sacachan ndo yuehe, nuña yuehe.

¹¹ Tyicuan caa tucu nyoho cha iyó sehe ndo. Chahá ndo cha vaha chi sehe ndo. Ña tuhvá ndo chahá noo yuu chi sehe ndo tatu chican ndotyín pan. Ta ña tuhvá ndo chaha ndo noo coo chi sehe ndo, tatu chicán ndotyín tiyaca.

¹² Ta ña tuhvá ndo chaha ndo noo tisuhma chi sehe ndo tatu chicán ndotyín ndiví cachi ndotyín.

¹³ Nyoho cha quiñi iyó ndo, soco chitó ndo yoso caa cuhva ndo cha vaha chi sehe ndo. Ta vihi ca Sutu Mañi yo cha nyaá andiví, cuaha ca cha vaha cuhva ra chi ndo tatu cacán ndo chi ra. Ta cuhva ra Tatyí Ii ra cunyaa aña ndo.

Ra xaan iñi chi ra Jesús catyí ra vatyí chihin fuerza cuihna sacuví ra milagru (Mt. 12.22-30; Mr. 3.20-27)

14 Ra Jesús tavá ra tatyí ña vaha cha yihí chi noo ra cha ñihi sahá cuihna. Ta cuhva cha quita tatyí ña vaha cuan chi ra ñihi cuan, nacahan ra. Tyicuan ta ñáyivi, iyo xaan cuñí ñu.

15 Ta yihí ñu catyí ñu:

—Ra ihya, tavá ra tatyí ña vaha soco chihin fuerza ra Beelzebú ra cuví nuu chi cuihna —catyí ñu.

16 Ta yihí ñu cuñí ñu nducu nyehe ñu chi ra, ta chican ñu chi ra Jesús na savaha ra noo seña chi ñu chihin tunyee iñi Nyoo.

17 Soco ra Jesús chitó ra tuhun chicá xiñi ñu. Ta quichaha catyí ra chi ñu:

—Tatu gobiernu ta cacusiin ra, cuaha ri ityi nanduvi ra, cucañi tahan ra chihin tahan ra, ta cundihi tuhun cha cunyaca ñaha ra. Tatu noo vehe ta cacusiin ñu chihin tahan ñu, cutivi nu nyicú ñu.

18 Ta tyicuan caa tucu cuihna. Tatu tandihi ra cacusiin ra chihin tahan ra cundihi fuerza cha iyó chi ra. Ta ihya catyí chi ndo tyehe caa vatyí nyoho catyí ndo vatyí chihin fuerza ra Beelzebú tavé tatyí ña vaha.

19 Soco tyehe ta tavé tatyí ña vaha tari cuhva catyí ndo, ndaca tuhun ndo chi ra nyicú chihin ndo yóó chi fuerza tavá maa ra tatyí ña vaha. Maa ra sacoto ra chi ndo cha ndicha vatyí nyoho tondo ri chicá xiñi ndo.

20 Soco catyí chi ndo vatyí yuhu tave tatyí ña vaha chihin fuerza Nyoo. Ta cuñí chi catyí cuan vatyí ndicha cuii Nyoo ra nyacá ñaha ñima ñáyivi cha chaq ra nu nyicú ndo.

Nu sañahá ra Jesús vatyí ñihi ca fuerza Nyoo ta ñima ca fuerza cuihna

21 Tatu noo ra iyó vavaha fuerza chi ra ta nyisó ra mityi ra, ta sahá cumi ra vehe ra. Ñohó xehe vaha ndaha tyiño ra chichi vehe ra tacuhva cha ma cuvi tinyaa ra suhu.

22 Soco tatu quichi inga ra cha cuaha ca fuerza iyó chi, ta cañi tahan ra chihin ra, ta cuvi chasaha ra chi ra, tyicuan ta tinyaa ra ndaha tyiño ra, ta sacha ra chi ra tahan ra.

23 Ñáyivi ña sahá tyiño chihin, sativi ñu tyiño sahí. Ta ñu ña tyinyee chii cha cahán

ñu tuhun Nyoo chihin ñáyivi, cuñí chi catyí vatyí ña chahá ñu cha coto ñáyivi tuhun cahín.

Nu sañahá ra Jesús chi yo yoso caa ndichi tucu tatyí ña vaha inga chaha tatu naa iñi yo chi Nyoo

(Mt. 12.43-45)

24 Tatu noo tatyí ña vaha quita chi noo ñáyivi, chicá noo chi noo ñuhu ityi, nanducú chi noo nu nyitatu chi. Soco ña nañihi maa chi nu nyitatu chi, tyicuan ta ndichi xiñi chi: “Cunuhu tiqui nya vehi nu quite.”

25 Yucuan ta nachaa chi ñima nu quita chi. Ta nanyehe chi vatyí ndii xaan ta vii xaan.

26 Tyicuan ta cua naquehen chi ucha ca tahan tatyí ña vaha cha yaha ca cuhva ta ican saha maa chi. Tyicuan ta in ri quihvi tandihi chi ñima ñu cuan. Yucuan chaha yaha ca cuhva nanduvi ñu ican saha cha cuvi maa ñu —catyí ra Jesús.

Ñu cha ndicha iyó vaha ñáyivi

27 Cha ni ri ca cha cahán ra Jesús tuhun cuan, ta cana chaa noo ñaha cha ñohó mahñu ñáyivi cuan. Ta quichaha catyí ña:

—Ñana cha sii cuví chi ñaha cha sacacu chuun ñaha cha chahá caxun —catyí ña.

28 Soco ra Jesús catyí ra:

—Sii ca cuñí ñu cha chiñi tuhun cahán Nyoo ta quichahá ñu —catyí ra.

Ñáyivi ña vaha, maa ri maa nyatu cahnu cuñí ñu nyehe ñu

(Mt. 12.38-42; Mr. 8.12)

29 Tyicuan ta chaq coyo ñáyivi nu nyaá ra Jesús. Ta quichaha catyí ra chi ñu:

—Ñáyivi cha iyó vityin quiñi xaan iyó ñu. Ta nyiyo iñi ñu. Cuñí ñu nyehe ñu seña ta cha iyo. Soco noo ri cunyehe ñu, tahan cha sacuvi Nyoo chihin ra Jonas.

30 Tari ra Jonás cuvi ra seña chi ñáyivi ñuu Nínive ta cha naha, tyicuan caa tucu yuhu Rayi cha quichi nya gloria, cuví tari noo seña chi ñáyivi cha iyó vityin.

31 Quivi tachi tuñi Nyoo chi ñáyivi cunandoto ñaha cuví reina ityi sur ta cha naha, ta cucatyí ña vatyí cahun ndo anyaya, vatyí maa ña vasi cañi ñuu ña, soco quichi ña, quichi tyasoho ña tuhun cha chiñi tuñi cahán ra Salomón. Ta ihya cahnu ca cuví

ra cha cahán chihin ndo vityin ta ñima ca ra Salomón.

³² Ta quívi cutuñi chi tandihí ñáyivi, cunducuita ñu chiyo ñuu Nínive ta cha naha, ta cucatyí ñu vatyí nyoho ñu cha iyó vityin cahun ndo anyaya, vatyí maa ñu ñu Nínive, canasama ñu cuhva iyó ñu quívi cahán ra Jonás tuhun Nyoo chihin ñu. Ta vityin yuhu ra cahnu ca cahán chihin ndo ta ñima ca ra Jonás.

Nu sañaha ra Jesús vatyí na saha yo cuenda aña yo coto vaha ñahri cha ndichin Nyoo nyaá

(Mt. 5.15; 6.22-23)

³³ Yori ndo tyaa ndo lámpara ta tyihí xehe ndo, o tyihí ndo chichí noo caja. Vatyí ñuhu cuan tahán chí coso minoo nu sucun. Tacuhva quíhvi ñáyivi vehe ndo, soco ndichin.

³⁴ Chití nuu ndo noo cha sandichin chí ndo cuví. Ta tyicuan caa tucu aña ndo, tatu iyó cha ndichin Nyoo aña ndo, vaha ñáyivi cuví ndo. Tatu ñahri cha ndichin Nyoo nyaá tari noo ra cuaa cuví ndo, ña cuví nyehe ndo ityi vaha cha cuahan nu nyaá Nyoo.

³⁵ Yucuan chaha saha ndo cuenda aña ndo. Tatu nyaá cha ndichin Nyoo chihin ndo, o nyaá cha ñaa iñi.

³⁶ Tatu tyitu aña ndo chihin cha ndichin Nyoo ñahri ca maa noo nu ñaa iñi iyó chí ndo, vatyí sandichin chí tandihí ndo. Tari cha nyaá noo lámpara sacatá chí ñuhu chí ndo cuví cuan —catyí ra Jesús.

Cahán ra Jesús chí ra casacuaha cuenda ley vehe ñuhu ta chí ra fariseo, ra caquichaha xaan ley cuan

(Mt. 23.1-36; Mr. 12.38-40; Lc. 20.45-47)

³⁷ Cuhva cha ndihí cahan ra Jesús nuu ñáyivi, noo ra fariseo, ra quichaha xaan ley vehe ñuhu, catyí ra chí ra Jesús, vatyí na cahun ra cucachí ra nya vehe ra. Ta cha ra Jesús vehe ra. Ta quíhvi ra chicunyaa ra mesa.

³⁸ Tyicuan ta ra fariseo cuan iyo cuñí ra vatyí ña nacatyá ra Jesús ndaha ra, tari cuhva costumbre maa ñu cha cumañi cachi ñu.

³⁹ Soco ra Jesús catyí ra chí ra:

—Nyoho, ra cacuví fariseo, tari cha chata ri vaso ta coho sanduvii nyoho. Soco ityi

chichí, quiñi caa. Vatyí ña nacatyá ndo. Tyicuan caa nyoho. Vatyí cuñí ñáyivi vatyí vaha ñáyivi cuví ndo. Soco xehe ri suhu ndo ta ña sacuví ndo cha vaha.

⁴⁰ Ndava xaan iñi ndo. ¿Atu ña chitó ndo vatyí ra cha savahá ityi chata vaso, suri maa ra savahá ityi chichí? Vatyí tari vaso cuví ndo.

⁴¹ Tahán chí sahá ndo tumañi iñi chí ñáyivi, ta tyinyee ndo chí ñu. Sacuví ndo cha vaha chihin ñu, tyicuan ta nduvii tucu ityi chichí ndo.

⁴² ¡Ndahvi nyoho ra fariseo! Vatyí nyoho vasi vaha chaha ndo diesmo chí Nyoo cuenda yucu cha nañí menta ta ruda ta ñáá ndihí ca yucu cha tachí ndo, soco ña quichahá ndo cuhva cha vaha cha cuñí Nyoo sacuví yo, ta cha cuñí yo chí ra. Ta ican ihya cuví cha tahán chí sacuví ndo, soco ma sandihí ndo cha cuhva ndo diesmo ñandihí.

⁴³ ¡Ndahvi nyoho cha cuví ndo fariseo! vatyí cuñí ndo cunyaa ndo nu tyayu vaha ca chichí vehe ñuhu. Ta cuñí ndo cha saha ñáyivi ñáyivi chí ndo nuyahvi.

⁴⁴ ¡Ndahvi nyoho ra sacuaha cuenda ley, ta nyoho ra fariseo! Vaha sahá ndo chí ndo, soco cuví ndo tari noo ñaña ndiyí cha ña quetuví. Vatyí yahá ñáyivi síqui soco ña chitó ñu ñáá cha ñohó chichí ñaña cuan. Vatyí ñahri seña catuví nu yihí ndiyí cuan. Cuñí maa ñu vatyí vaha ndo, soco ña chitó ñu vatyí ña vaha aña ndo —catyí ra Jesús.

⁴⁵ Tyicuan ta nacahan noo ra sacuahá cuenda ley vehe ñuhu, ta catyí ra:

—Maestro, cha catyún tyehe caa, nañi tucu chiin chí nyuhu —catyí ra.

⁴⁶ Tyicuan ta quichaha catyí ra Jesús chí ra:

—¡Ndahvi tucu nyoho ra casacuaha cuenda ley vehe ñuhu! Vatyí sanducuaha ca ndo ley cha tachí Nyoo ta cha naha. Ta ña tahán chí. Ta yori ndoyó carga cuan, ta sañiñi ndo na sacuví ñu ta ni maa ndo ni chiin ña tyinyee ndo chí ñáyivi.

⁴⁷ ¡Ndahvi nyoho! Vatyí sanduvahá vaha ndo ñaña nu ñohó yiqui ra profeta Nyoo cha cachahñi sutu chahnu ndo ta cha naha.

⁴⁸ Chihin cuan cuñí chí catyí vatyí ndo ndo vaha cha sacuví sutu chahnu ndo ta cha naha. Vatyí sutu ndo cachahñi ra chí

ra profeta Nyoo. Ta nyoho sanduvahá ndo ñaña ra.

⁴⁹ Yucuan chaha catyí Nyoo ta cha naha vatyí cutachi ra suhva ra profeta ta ra caca tyiño ra nu nyicú ndo. Ta cucahñi ndo suhva ra ta inga ra cusacono ndo chi ra.

⁵⁰ Ta ndicha tyicuan caa sacuví ndo. Nyoo cutachi tuñi ra chi ndo cha cuenda tandihí ra profeta ra cachahñi sutu chahnu ndo nyata chino ñuhu ñayiví ta nyacua nya vityin.

⁵¹ Nyacua nya niñi ra Abel cha chati cha chahñi ra Caín yañi ra, ta nyacua nya niñi ra Zacarías cha cachahñi ñu chichi vehe ñuhu yatyin nu nyaa arta. Yucuan chaha catyí Nyoo vatyí cutachi tuñi ra chi ñáyiví cha iyó vityin cha catyí cuatyí ñu chiyó ta cha naha.

⁵² ¡Ndahvi nyoho ra casacuaha cuenda ley vehe ñuhu! Vatyí tari cha tyihí xehe ndo ndaha ticu cuenda yuvehe nu quihví ñáyiví ityí Nyoo. Ta ni maa ndo ña quihví ndo nu nyaá Nyoo. Ta ni ri ña chahá ndo cha quihví inga ñáyiví cha cuñí quihví —catyí ra Jesús.

⁵³⁻⁵⁴ Ndihi cahan ra Jesús tuhun cuan, ta quitá ra. Soco ra casacuaha ley vehe ñuhu chihin ra fariseo, nduxaan xaan ra ta quichaha cuquiñi cuñi ra nyehe ra chi ra Jesús. Ta canducu ra cuhva yoso caa cahan ra Jesús noo tuhun ña vaha, ta tyaa ra cuatyí siqui ra.

12

Nu sañahá ra Jesús vatyí ma cuví tixehe yo cuatyí yo

¹ Cuenda mil ñáyiví ndu ñin ri nyacua nañi tahan ñu, vatyí cuaha xaan ñu. Tyicuan ta ra Jesús catyí xihna ca ra chi ra cachicá noo chihin ra:

—Saha ndo cuenda chi ndo chihin ra fariseo coto sandahvi ñaha ra chi ndo. Vatyí tari ndaa pan chihin yuchan iya, tyicuan caa cuví cuatyí ra tyi sahá ra tyi vaha ra. Soco ma cuví tixehe ra cuatyí ra.

² Vatyí ñahri noo cha ñohó xehe ta cuñún, tyi ma natuvi, ta ñahri cha xehe ta cuñun, vatyí ma coto ñáyiví.

³ Yucuan chaha ñáá ndihí tuhun cha cahán ndo nu xehe, cuquita chi nu ndichin.

Ta ñáá ndihí tuhun cha cahan ndo chichi vehe ndo, cucuiñi tandihí ñáyiví noo quiví.

¿Yóo chi tahán chi cuyuhvi yo, chi ñáyiví o chi Nyoo?

(Mt. 10.28-31)

⁴ Ta catyí chi ndo cha cuví ndo ra tahin, vatyí ma yuhvi ndo chi ra chahñi coño ñuhu ri. Vatyí yahá tuhun cuan ta ñahri ca cha cuví sacuví ra.

⁵ Soco cua catyí chi ndo yóo chi tahán chi cuyuhvi ndo. Yuhvi ndo ta quichaha ndo, soco chi maa Nyoo ra cuví tinyaa ñáyiví ndo. Ta yaha cuan ta cuví tyihí ra añima ndo anyaya.

⁶ Saa, ña yahvi nyaá ti. Cuví sata yo ohon tahan ti chihin uvi ri xuhun. Soco vasi nyihí ri ti, Nyoo ña naa iñi ra chi ni noo ti.

⁷ Ta nyoho, yahvi ca nyaá ndo nu Nyoo ta ñima ca cuaha saa ta nyacua nya ixi xiñi ndo ta chitó Nyoo yoso tahan nyaá. Yucuan chaha ma yuhvi ndo.

Mayuhviyo cahán yo tuhun ra Jesucristo nuu ñáyiví

(Mt. 10.32-33; 12.32; 10.19-20)

⁸ Catyí chi ndo vatyí nya ndo cahán ndo tuhun chihin ñáyiví, tyicuan caa tucu cucahin tuhun ndo nuu ángel Nyoo gloria. Vatyí yuhu Rayi cha quichi nya gloria cuví.

⁹ Soco nya nyoho cha cahán nuu ndo cahán ndo tuhun chihin ñáyiví, tyicuan caa tucu yuhu, ma cahin tuhun ndo nuu ángel cuenda Nyoo.

¹⁰ Ta vasi cahán ñáyiví chi yuhu Rayi cha quichí nya gloria, Nyoo cusaha ra tucahnu iñi chi ñu. Soco yóo cha cahán ña vaha siqui Tatyí Ii Nyoo ma ñihí ñu tucahnu iñi cuenda cuan.

¹¹ Cuhva cha cunyaca ñáyiví chi ndo chichi vehe ñuhu, o nu juez, o nuu ra cuví tyiño, ma caca xiñi ndo ñáá tuhun cunacahan ndo.

¹² Vatyí cuhva cha cua nacahan ndo, yucuan cuhva cuhva maa Tatyí Ii Nyoo ñáá tuhun tahán chi nacahan ndo —catyí ra Jesús.

Nu chahá ra Jesús cuhva vatyí ña tahán chi cunyicon yo cha tyayí

¹³ Noo ra cha ndihí chihin ñáyiví cuaha cuan, catyí ra chi ra Jesús:

—Maestro, catyi chi yañi vatyí natahvi sava ra cha tyayii cha sandoo sutu ndi chi ndi —catyí ra.

14 Tyicuan ta catyí ra Jesús chi ra:

—¿Yóó cha tyiso chi yuhu cha cuví juez ta catyi ndo vatyí tahvi sava yuhu cha chii ndo? —catyí ra.

15 Tyicuan ta quichaha catyí tucu ra:

—Saha ndo cuenda ta ma nyiyo iñi ndo cha tyayii. Vatyí ña chiñuhú ri cha coo cuaha ndaha tyiño yo tacuhva coo vaha yo ñayivi —catyí ra.

16 Tyicuan ta chaha ra Jesús noo cuhva ihya chi ñu:

—Chiyó noo ra tyayii. Ta cuaha xaan tyiño sahá ra iyó.

17 Tyicuan ta ndichi xiñi ra: “¿Yoso caa cusacuvi? Ñahri nu naquehen vahi tandihí tyiño sahi.

18 Soco cha chité yoso caa cunyacuvi. Cusatani yaca nyihi nu yihí niñi, vatyí nyihi xaan. Ta cusavahi cha nahnu ca. Ta yucuan cunaquehen vahi tandihí maa niñi cha cuquita nu iyó tyiño sahi.

19 Tyicuan ta cuaha cuiya ma saha tyiño que. Cunyatati ta cusii cuñi. Ta cachi vahi. Ta cucho vahi”, ndichi xiñi ra.

20 Soco catyí Nyoo chi ra: “Tondo xaan iyón. Vatyí vityin cha cuaa cucúvun. Ta cha cumí vahun ¿yóó chi cua ndoo?”

21 Tyicuan caa cuví chi ñayivi cha sacayá tandihí cha tyayii soco ñahri maa iyó chi ñu nuu Nyoo —catyí ra Jesús.

Ma caca xaan iñi yo ñáá ndihí cha chiñuhú chi yo
(Mt. 6.25-34)

22 Tyicuan ta quichaha catyí ra Jesús chi ra cachicá noo chihin ra:

—Catyí chi ndo, vatyí ma caca xaan xiñi ndo yoso caa ñihi ndo cha cachi ndo, ta tuhun sahma cuihno ndo.

23 Vatyí yahvi ca nyaá ñayivi yo ican saha cha cachi yo. Ta yahvi ca nyaá coño ñuhu yo ican saha cha cuihno yo.

24 Saha ndo cuenda saa vatyí ña sahá tyiño ti. Ta ni ri ña naquehen vaha ti cha cachi ti. Soco chachí ti, vatyí Nyoo chaha ra cha cachi ti. Ta nuu Nyoo yahvi ca nyaá nyoho ta ñima ca saa.

25 Ta vasi chicá xaan xiñi ndo soco ma cuví sandusucun ca ndo ni chiin ca chi ndo.

26 Tatu ni chiin cuan ña cuví chi ndo, ¿ñáá tuhun cha chicá xaan xiñi ndo tuhun tandihí ca cha chiñuhu chi ndo?

27 Saha ndo cuenda yoso caa iyó tu ita vatyí ña sahá tyiño tun. Soco catyí chi ndo vatyí ni rey Salomón chihin tandihí cha tyayii ra ta ña tyaqui cha ñihno ra tari cha sacuihno Nyoo chi tu ita cuan.

28 Tatu tyicuan caa sacuihno Nyoo chi tun ita cha iyó nu chiqui vityin, ta tyaan cucayu tun chichi horno, ta nyaca cuví chi nyoho ta ma sacuihno ra. Soco maa ndo ña chinó vaha iñi ndo chi ra.

29 Ma caca xaan xiñi ndo tuhun cha cachi ndo ta cha coho ndo.

30 Vatyí ñayivi cha ña chinó iñi chi Nyoo chicá xiñi ñu tuhun ihya. Soco nyoho chinó iñi ndo chi Sutu yo Nyoo ta maa ra chitó ra ñáá cha chiñuhú chi ndo.

31 Vaha ca cha nanducu ndo yoso caa nacuhva cuenda ndo chi ndo chi Nyoo vatyí cunyaca ñaha ra aña ndo. Ta tyicuan caa ta ñihi ndo tandihí cha chiñuhú chi ndo.

Cha vaha cha iyó gloria
(Mt. 6.19-21)

32 Ma yuhvi nyoho, mbee sane. Vasi ña cuaha ndo soco Sutu yo Nyoo cuñi ra chi ndo. Yucuan chaha cucuhva ra quihvi ndo nu nyacá ñaha ra.

33 Xico ndo cha iyó chi ndo. Ta cuhva ndo chi ñu ndahvi. Tatu sacuví ndo tyehe caa, sacayá ndo cha vaha nuu Nyoo cuví cuan. Vatyí nuu Nyoo ña ndihí cha vaha cuan. Vatyí ni ri ra suhu, ni quití, yori cha sativi iyó yucuan.

34 Vatyí nuu cunyaa cha tyayii ndo, yucuan cuví nu nyaá xiñi ndo. Ta yucuan cucunyaa aña ndo —catyí ra.

Nu sañahá ra Jesús chi yo yoso caa cuatu tuhva yo chi ra quivi quichi ra inga chaha

35 Cuatu tuhva vaha ndo quivi quichi inga chaha.

36 Ta cuví ndo tari musu cha canyatú tuhva chi chitoho ñáá cuhva ndichi ra cha cuahan ra noo vico tandaha. Ta nyatú tuhva ra, vatyí tacuhva tañi tyehe ri nuña ra yuvehe cuhva cha sacachan chitoho ra cha nachaa ra.

37-38 Ta caa cuhva ri cuan sîi xaan cuñi ra nyehe ra chi ra. Vatyí nyatú tuhva ra chi ra nyacua nya nachaa ra, vasi cha cuaa, vasi ñaa ca. Ta cuatyaa ra chi musu cuan yuhu mesa ta cacachi ra. Tyicuan ta sîi xaan cucuñi musu cuan. Vatyí tyicuan caa nyacuví chitoho ra chihin ra.

39 Ta coto ndo tuhun ihya vatyí tatu noo chitoho noo vehe, ta coto ra ñáá cuhva cuquihvi ra suhu vehe ra, saha ra cuenda vehe ra. Ta ma cuhva ra quihvi ra suhu cuan chichi vehe ra. Vatyí coto quehen ra tandihí cha iyó chi ra.

40 Ta tyicuan caa cuví tucu nyoho, cuatu tuhva ri ndo. Vatyí yuhu Rayíi cha quichi nya gloria, sana ri iñi ndo ta cuquichi —catyí ra Jesús.

Musu vaha ta musu ña vaha
(Mt. 24.45-51)

41 Tyicuan ta quichaha ndaca tuhun ra Pedro chi ra Jesús:

—¿Yóó chi cuenda cahun tuhun ihya? ¿Atu cha cuenda maa ri maa ndi, o cha cuenda tandihí ñáyiví?

42 Tyicuan ta nacañan ra Jesús, ta catyí ra chi ra:

—Musu cha tyasohó tuhun cahán chitoho, yucuan cuví musu vaha. Vatyí sahá cuenda ra vehe chitoho ra. Ta vaha ri cuhva chahá ra cha cachi tandihí ca musu cuan.

43 Ta sîi xaan cuví chi musu cuan tatu cuhva cha sahá tyiño ra, ta nachaa chitoho ra. Vatyí quichaha ra tandihí cha tahán chi sacuvi ra.

44 Ta catyí chi ndo vatyí cha ndicha cuví. Vatyí chitoho ra cunatyaa ra tandihí cuii cha cumí ra ndaha ra. Vatyí vaha quichahá ra chihin tyiño sahá ra.

45 Soco tatu chicá xiñi musu cuan vatyí naha xaan cuahan chitoho ra, ta quichaha nyacuvi ra cha ña vaha chihin ñu nyaá tyiño yoo, ta chihin ra canyicú tucu sahá tyiño cuan. Ta ña cuñi ra sahá tyiño ra. Tyiño chachí ta tyiño chihí ndixi iyó ra.

46 Tyicuan ta sana iñi ra ta ndichi chitoho ra quiví cha ña nyatú ra chi ra noo cuhva cha ña chito ra. Tyicuan ta cutachi tuñi chitoho ra chi ra, tari tuhva maa ra chihin musu cha ña quichahá tuhun cahán ra.

47 'Ta noo musu cha chitó yoso caa iyó chitoho ta ña sacuvi tari cuhva cuñi chitoho ra, cuaha xaan tundoho cunyehe ra.

48 Soco tatu noo musu cha ña chitó ta sacuvi ra cha ña vaha, tachi tuñi chitoho ra chi ra. Soco chiin ri, vatyí ña chitó ra, ta chinyacuví ra. Tatu noo musu ta cuaha cha chaha chitoho ra chi ra, cuaha tahán chi nacuhva cuenda ra chi chitoho ra. Ta ra cha cuaha xaan nyaá ndaha, cuaha xaan tahán chi nacuhva cuenda ra chi chitoho ra.

Nu catyí ra Jesús vatyí cha catyí ra cucañi tahan ñáyiví chihin tahan ñu
(Mt. 10.34-36)

49 'Tari cha sanatahín ñuhu siqui ñuhu ñáyiví, tyicuan caa cuví tyiño vachi. ¡Ñana cha cuñi cha nacayu catyín ri ñuhu ihya!

50 Vatyí nyaá yahi noo tundoho cahnu, ta ñana cha nyehí tundoho nyacua nya ndihí tyiño sahí.

51 Cuñi maa ndo vatyí cha vachi cuhve cha taxi ri coo ndo siqui ñuhu ñáyiví ihya. Soco yuhu vachi vatyí sasiin chi ndo.

52 Vatyí cha vityín ta ityi nuu ca, ohon ñáyiví noo vehe cucusiin ñu. Uñi ñu cañi tahan chihin uvi ñu. Ta uvi ñu cucañi tahan chihin uñi ñu.

53 Ta ra cuví sutu, cucañi tahan ra chihin sehe ra. Ta ra cuví sehe cucañi tahan ra chihin sutu ra. Ta ñu cuví sihi cucañi tahan ñu chihin sehe ñu. Ta ñu cuví sehe cucañi tahan ñu chihin sihi ñu. Ta ñu cuví tyiso cucañi tahan ñu chihin chono ñu. Ta ñu cuví chono cucañi tahan ñu chihin tyiso ñu —catyí ra Jesús.

Nu catyí ra Jesús chi ñáyiví vatyí ña nacotó ñu vatyí cha chaq quiví cha quichi Sehe Nyoo
(Mt. 16.1-4; Mr. 8.11-13)

54 Catyí tucu ra Jesús chi ñáyiví cuaha cha nyicú yucuan:

—Tatu cha nyehe ndo vatyí cha ndihvivi vico, catyí ndo vatyí cua coon savi. Ta tyicuan caa cuví.

55 Tatu cha nyehe ndo vatyí cha caá tatyí ityi tyañuhu, catyí ndo vatyí cha cha quiví ihñi. Ta tyicuan caa cuví.

56 Nyoho sahá ndo tyi chitó ndo, ta nacotó ndo tandihí tuhun andiví, ta tandihí tuhun ñuhu ñáyiví. Soco ¿ñáá tuhun cha ña nacotó ndo ñáá tyembu nyaá ndo vityín?

Nducu yo cuhva yoso caa coo vaha yo chihin ra chicán cuatyí chaha yo coto cuhun yo vehe caa

(Mt. 5.25-26)

⁵⁷ ¿Ñáá tuhun ña sahá ndo cuenda nya cha vaha ta nya cha ña vaha?

⁵⁸ Tatu noo ra chicán cuatyí chahun ta cuahun chihin ra nu nyaá ra cuví tyiño, ityi cuahun nducun cuhva ni coo vahun chihin ra cha cumañi ca chaa ndo nu nyaá ra cuví tyiño. Coto nacuhva cuenda ra chuun chi juez. Ta juez cuan cunacuhva cuenda ra chuun chi policía. Ta policía cuan cutyihi ra chuun chichi vehe caa.

⁵⁹ Tatu tyicuan caa cuvi, catyí chuun vatyi ma quiton nyacua nya tyiyahvun tandihí cha tahán chi tyiyahvun —catyí ra Jesús.

13

Cuñí chi cha nasama yo cuhva iyó yo o cunyehe yo tundoho

¹ Tyicuan ta suri quivi cuan canyicu suhva ra. Ta quichaha canacatyí ra chi ra Jesús yoso caa cha nyacuvi ra Pilato chihin suhva ra Galilea. Vatyi tyihi ra tyiño na cucañi sindaro chi ra Galilea cha cachaha ofrenda chi Nyoo vehe ñuhu. Ta nasaca ra niñi ra cuan chihin niñi quití cha cua cuvi ofrenda cuan.

² Ta nacahan ra Jesús ta catyí ra chi ra:

—¿Atu chicá xiñi nyoho vatyi cahnu xaan ca cuatyí ra Galilea cuan cha nuu tandihí ra ityi ñuu ra. Ta yucuan chaha cachihí ra?

³ Ñima. Vatyi tatu nyoho ta ma nasama ndo cuhva iyó ndo, tyicuan caa tucu cunaa nyoho.

⁴ Ta ndi chahun uñi ra cachihí cha canacava torre Siloé cuan siqui ra. ¿Atu cuaha ca cuatyí ra ta ican saha inga ra cha iyó ñuu Jerusalén cuñí maa ndo?

⁵ Ñima. Vatyi tatu nyoho ta ma nasama ndo cuhva iyó ndo, cunaa tucu nyoho.

Nu catyí ra Jesús noo cuhva yoso caa nyatú Nyoo cha nasama yo cuhva iyó yo

⁶ Tyicuan ta chaha ra Jesús noo cuhva. Ta catyí ra:

—Noo ra iyó yutun cha nañí higo chi ra. Ta nanyaá tun nu ñuhú ra. Ta chahan ra

chinyehe ra tatu iñi chiti tun. Ta nanyehe ra vatyi ñahri.

⁷ Ta quichaha catyí ra chi ra sahá cuenda chi tun: “Cha uñi cuiya tyito ri quichi nyehi tatu iyó chiti tun. Ta ñahri maa chiti tun iñi. Na cahnya yo chi tun. Vatyi ¿ñáá ri tuhun sayangá tun nu ñuhú ihya? Vatyi ñahri chiti chahá tun”, catyí ra.

⁸ Soco ra cha sahá cuenda ñuhú cuan quichaha catyí ra: “Tata, ma cahnya yo chi tun vityin. Na cuinanyaa maa tun nonga cuiya ihya. Cusanduvite ñuhú chaha tun ta cutyihi ñuhú tyahyu.

⁹ Vasi tyicuan caa ta cuhva tun chiti. Soco tatu ña chaha tun chiti, tyicuan ta cahnya yo chi tun”, catyí ra.

Quivi nyitatu ñáyivi sanduvaha ra Jesús chi noo ñaha tihí chata

¹⁰ Noo quivi cha nyitatu ñáyivi sañahá ra Jesús chi ñu chichi vehe ñuhu.

¹¹ Ta yucuan nyaá noo ñaha cha yihí tatyí ña vaha chi. Ta cha chahun uñi cuiya cuhvi ña cha ndutihí chata ña. Ta ña cuví ndundoo ña.

¹² Tyicuan ta nanyehe ra Jesús chi ña. Ta cana ra chi ña. Ta quichaha catyí ra chi ña:

—Cha nduvahun. Ñahri ca cuehe ndohún —catyí ra chi ña.

¹³ Tyicuan ta tyiso ra ndaha ra siqui ña. Ta caa cuhva ri cuan ta ndundoo ña. Tyicuan ta quichaha sacahnu ña chi Nyoo.

¹⁴ Soco ra cuví nuu vehe ñuhu, cuxaan xaan ra. Vatyi quivi nyitatu ñáyivi sanduvaha ra Jesús chi ña. Ta quichaha catyí ra chi ñáyivi canyicú cuan:

—Iyó iñu tahan quivi tahán chi saha tyiño yo. Yucuan quivi quichi ndo quichi cuvi tatan chi ndo. Ta ma quichi ndo quivi nyitatu yo —catyí ra.

¹⁵ Tyicuan ta ra Jesús quichaha catyí ra chi ra:

—Nyoho cha sahá ndo tyi vaha ndo. ¿Atu ña ndachi tucu nyoho quití sana ndo vatyi sacoho ndo ndutya chi ti quivi nyitatu yo?

¹⁶ Ta tyicuan caa tucu ñaha ihya, vachi ña tata ra Abraham. Ta cha chahun uñi cuiya nuhñí ña chihin cuehe ihya sahá ra ña vaha. Ta yori ndachi chi ña. ¿Atu ña tahán chi ndachi yo chi ña vasi quivi nyitatu yo? —catyí ra Jesús.

¹⁷ Tyicuan ta cuhva cha catyí ra Jesús tuhun cuan, tandihí maa ra xaan iñi chi ra cahān cuví nuu ra. Soco tandihí maa ñáyiví cusí cuñi ñu chihin cha cahnu cha sacuví ra Jesús.

Nu catyí ra Jesús vatyí tari noo chiti mostaza cuví cha nyacá ñaha Nyoo añima yo (Mt. 13.31-32; Mr. 4.30-32)

¹⁸ Tyicuan ta quichaha catyí ra Jesús:

—¿Ñáá chihin sandiquí tahin cha nyacá ñaha Nyoo añima yo? ¿Ñáá chihin sandu inuu ri yo?

¹⁹ Tari noo chiti mostaza, tyicuan caa cuví. Vatyí noo ra tachí ra noo chiti nu ñuhú, ta chahnu tun. Ta cuví tun noo yutun cahnu vavaha. Tyicuan ta chaá coyo saa nuu yutun cuan. Ta yucuan savahá ti taca ti.

Nu catyí ra Jesús vatyí tari yuchan iya tyicuan caa cuví cha nyacá ñaha Nyoo añima yo

(Mt. 13.33)

²⁰ Tyicuan ta quichaha catyí ra Jesús inga chaha:

—¿Ñáá ca chihin sandu inuu ri yo yoso caa nyacá ñaha Nyoo añima yo?

²¹ Cuví chi tari noo yuchan iya cha nasaca noo ñaha síhi chihin uñi cuhva yutyi pan. Vatyí tari ndaa pan cuan chihin yuchan iya cuan, tyicuan caa cuahan nducua ha ca ñu nyacá ñaha Nyoo añima —catyí ra.

Yuvehe tihin ta ityi cuiñi cha cuahan nu nyaá Nyoo

(Mt. 7.13-14, 21-23)

²² Ityi cuahan ra Jesús Jerusalén cahán ra tuhun Nyoo chihin ñáyiví tandihí ñuu nu yahā ra.

²³ Ta quichaha ndaca tuhun noo ra chi ra:

—¿Atu ña cuaha maa ñáyiví cucacu añima? —catyí ra.

Tyicuan ta nacahan ra Jesús, ta catyí ra:

²⁴ —Nanducu ndo cuhva quihví ndo yuvehe tihin. Vatyí yí xaan quihví ndo nu nyacá ñaha Nyoo. Vatyí cuaha xaan ndo cha cucuñi ndo quihví ndo yucuan. Ta ma cuví.

²⁵ Vatyí tari chitoho noo vehe tyicuan caa cuví Nyoo. Ta chitoho vehe cuan cunacasi ra yuvehe. Tyicuan ta nyoho cha nyicú

ndo ityi chata cusacachan ndo yuvehe, ta cucatyí ndo: “Ñuña yuvehe.” Ta ra cuan cucatyí ra chi ndo: “Ña chité nya ityi quichi nyoho.”

²⁶ Tyicuan ta nyoho cucatyí ndo: “Nyuhu chachí ndi ta chihí ndi chuhun. Maun sañahun tuhun Nyoo chi ndi ityi nu nyaá vehe ndi”, cucatyí ndo chi ra cuan.

²⁷ Soco ra cuan cunacahan ra chihin ndo ta cucatyí ra: “Cha catyí chi ndo vatyí ña chité nya ityi quichi nyoho. Canyaha ndo nu nyai, tandihí nyoho ñu nyacuví cha ña vaha”, cucatyí ra chi ndo.

²⁸ Yucuan ta cuacu ndo ta sacahñi noho ndo cha nyehe ndo chi ra Abraham ta chi ra Isaac ta chi ra Jacob, ta chi tandihí ra profeta Nyoo cha chiyo ta cha naha. Vatyí canyicú ra nu nyacá ñaha Nyoo. Ta nyoho ndoo ndo ityi chata.

²⁹ Ta cuquichi ñáyiví ityi tyañuhu, ta ityi norte, ta ityi nu caña ñanyii, ta ityi nu quee ñanyii. Ta cunyicu ñu cachi ñu chihin Nyoo nu nyacá ñaha ra.

³⁰ Ta yóo ñu cha cuñi cuhun ityi nuu, ican ñu cuhun nu ndihí. Ta ñu cuahan nu ndihí, ican ñu cuhun ityi nuu —catyí ra.

Nu nducuihya iñi ra Jesús nyehé ra chi ñáyiví ñuu Jerusalén

(Mt. 23.37-39)

³¹ Suri maa quiví cuan chaá coyo suhva ra fariseo. Ta catyí ra chi ra Jesús:

—Quíta ihya vatyí ra Herodes cuñi ra cahñi ra chuun —catyí ra.

³² Soco ra Jesús quichaha catyí ra chi ra:

—Cuahan ndo ta catyí ndo chi ra ñucuii quiñi iyó cuan, vatyí nyacua nya nu chaa maa chi quiví cha ndihí tyiño sahí cha tave tatyí ña vaha ta cha sanduvahi chi ñu cuhví, tyicuan ta cundihí tyiño sahí.

³³ Soco nya tahán chi cha ndihí maa tyiño sahí, tyicuan ta cuhun mai cucúvi nya Jerusalén. Vatyí ma cuví cha cúvi noo ra profeta Nyoo ityi chata Jerusalén.

³⁴ ¡Ndahví nyoho ñáyiví Jerusalén! vatyí chahñí ndo chi ra profeta ra cachahá cuenda tuhun cahán Nyoo chi ndo. Ta tuchi ndo yuu chi tandihí ra cha saquichí Nyoo nu nyicú ndo. Ta yuhu cuaha xaan chaha cuñi saha cuende chi ndo tari noo ndiví cha sahá cuenda ti chi sehe ti, ta

naquehen vaha ti chi ti chichi ndichin ti. Soco maa ndo ña cuñi ndo.

³⁵ Nyehe ndo vityin vatyi cha sandoi chi ndo. Ta catyi chi ndo vatyi ma nyehe ca ndo chii nyacua nya chaa chi quivi cuacatyí ndo vatyi cahnu xaan ra vachi chihin siivi Nyoo —catyi ra Jesús.

14

Nu sanduvaha ra Jesús chi noo ra cuhvi cha yihí cuiño chi

¹ Cuví chi noo quivi nyitatu ñáyivi. Ta ra Jesús cuahan ra cua cachi ra vehe noo ra cuví nuu chi ra fariseo. Ta suhva ca fariseo cuan cañañi ra chi ra Jesús tatu ñáa cha ña vaha cunyacuvi ra.

² Yucuan ta nuu ra Jesús nyaá noo ra cuhvi cha yihí cuiño chii.

³ Tyicuan ta quichaha catyi ra Jesús chi ra casacuaha ley vehe ñuhu ta chi ra fariseo:

—¿Atu vaha sanduvaha yo chi ñáyivi cuhvi quivi nyitatu yo? —catyi ra.

⁴ Tyicuan ta tandihi ra cuan, taxi taxi cacuvi ra. Yucuan cuví nu tyiso ra Jesús ndaha ra siqui ra cuhvi cuan. Ta sanduvaha ra chi ra. Ta natachi ra chi ra na cunuhu ra.

⁵ Tyicuan ta quichaha catyi ra Jesús chi ra fariseo:

—Tatu canacava noo burru sana ndo, o nonga quití sana ndo chichi noo xahva, ¿atu ma cutava ndo chi ti tañi tyehe ri, vasi quivi nyitatu yo cuví? —catyi ra.

⁶ Tyicuan ta inga chaha tucu taxi cuvi ra nicunyicu ra fariseo. Vatyi ña ñihi ca ra tuhun nacahan ra.

Nu sañaha ra Jesús chi yo vatyi ma cahnu saha yo chi yo

⁷ Cha nyehe ra Jesús vatyi tandihi ra canyicu vico cuan nacachi ra tyayu vaha ca cunyata ra. Tyicuan ta quichaha chaha ra tuhun ihya chi ra:

⁸ —Nya quivi cuhun ndo vico tandaha, ma nanducu ndo tyayu vaha ca cunyata ndo. Vatyi coto quichi inga ra cha cahnu ca cuvi ican saha ndo,

⁹ ta coto quichi ra cha nacatyí tuhun ta catyi ra chuun: “Cuhva tyayu chiña. Vatyi cunyata ra ihya.” Tyicuan ta yoho chihin

cha cahán nuun, ta cuhvon. Yucuan ta cunyata nu ndihi.

¹⁰ Soco catyi chi ndo, vatyi nya quivi nacatyí tuhun ra chi ndo, cunyata ndo noo nu ñima ri tuhun. Vatyi quichi maa ra cha nacatyí tuhun chi ndo ta catyi ra chi ndo: “Ra tahin, ñaha, cunyata nu tyayu vaha tyehe.” Ta tyicuan caa sacucahnu ra chuun nu ñáyivi nyicu yuhu mesa chuhun.

¹¹ Vatyi yoo ra cha cahnu sahá chii, cuquehen ra tichan nuu. Ta yoo ra cha ndahvi sahá chii, cahnu cucuvi ra —catyi ra Jesús.

¹² Tyicuan ta quichaha catyi tucu ra chi ra nacatyí tuhun chi ra:

—Nya quivi coo vico vehun, ma nacatyí tuhun chi ra tahun, ni chi yañun, ni ri chi ñáyivi chuun, niri chi ñu nyicu yuehun ñu tyayii. Vatyi ñu cuan cuví nacatyí tuhun ñu chuun, na coo tucu vico vehe maa ñu. Tyicuan ta nacahnya ñu cuenda cha chahan ñu vico vehun.

¹³ Soco cua catyi chuun vatyi nya quivi coo vico vehun, nacatyí tuhun chi ñu ndahvi, chi ñu cuhvi, chi ñu coxo, ta chi ñu cuaa.

¹⁴ Tyicuan ta sii cuvi chuun, vatyi ñu cuan ma cuvi natyiyahvi ñu chuun. Soco cuñihun yahvun quivi cunandoton chihin ñáyivi vaha.

Nu chaha ra Jesús noo cuhva yoso caa nacatyí tuhun ra chi yo vatyi quihvi yo nu nyaca ñaha Nyoo

(Mt. 22.1-10)

¹⁵ Ta chiñi noo ra cha nyaá yuhu mesa cuan tuhun cahán ra Jesús. Ta quichaha catyi ra chi ra:

—Sii xaan cuvi chi ñu cachi nu nyaca ñaha Nyoo —catyi ra.

¹⁶ Tyicuan ta catyi ra Jesús:

—Noo ra cuan savaha ra noo vico cahnu vavaha vehe ra. Ta nacatyí tuhun ra chi cuaha xaan ñáyivi.

¹⁷ Tyicuan ta cha cuhva cha cuxiñi ñu, ta tachi ra chi musu ra nacana ra chi ñu. Vatyi cha cha cuhva cha cuxiñi ñu.

¹⁸ Soco tandihi ñu cuan quichaha catyi ñu vatyi ma cuhun ñu. Ta noo ra cuan catyi ra: “Ni sate noo ñuhú. Ta cuñi chi cuhin cunyehe. Ican tuhun chiquén na saha ra tucahnu iñi chii vatyi ma cuhin.”

¹⁹ Tyicuan ta inga tucu ra cuan catyí ra: “Ni sata cuiiri ohon tahan yunta quití. Ta cuhin cunyehi tatu vaha ti. Ican tuhun chiquén tumañi iñi chi ra na saha ra tuc-ahnu iñi chii, vatyí ma cuvi cuhin.”

²⁰ Tyicuan ta inga tucu ra cuan catyí ra: “Ni ndihi tandahi, ta ma cuvi cuhin”, catyí ra.

²¹ Tyicuan ta musu ra cuan cuanuhu ra. Ta nacatyí ra tandihi tuhun cuan chi ra cha tachí chi ra. Cha chiñi ra savaha vico cuan cha tyicuan caa, ta cuxaan xaan ra. Ta catyí ra chi musu ra: “Cuahan tandihi maa ityi. Ta quichi nyacon chi ñu ndahvi, chi ñu cuhví, ta chi ñu coxó, ta chi ñu cuaa”, catyí ra.

²² Ta cha yaha nachaa musu cuan ta catyí ra chi ra cha tachí chi ra: “Cha sacuvi tandihi maa cha catyún. Ta nuñá ca chichi vehe”, catyí ra.

²³ Tyicuan ta chitoho ra catyí ra chi ra: “Cuahan cua nducu ca chi ñu tandihi maa ityi. Ta sanñun chi ñu na quichi coyo ñu, vatyí na cutu chichi vehi.

²⁴ Vatyí catyí chuun vatyí ni minoo ñu cha nacatyí tuhun cha xihna ri, ma cachi ñu chihin” —catyí ra Jesús.

Cuaha xaan tundoho nyehe yo tatu cuenda ra Jesús yihí yo
(Mt. 10.37-38)

²⁵ Cuaha xaan ñáyivi nyicón chi ra Jesús. Tyicuan ta nanyehe ra chi ñu, ta quichaha catyí ra:

²⁶ —Tandihí nyoho cha nyicón ndo chii, tatu cuñí ca ndo chi ñáyivi chi ndo ican saha chi yuhu, ñima cuende yihí ndo. Ta tatu cuñí ca ndo chi maa ndo ican saha chi yuhu, ñima cuende yihí ndo.

²⁷ Vatyí nya nyoho cha ña cuñí ndo nyehe ndo tundoho cha cunyicon ndo chii, ña tahán chi cuví ndo ñu cuende, vatyí cha nyehe ndo tindoho yucuan cuví cruzi cha tahán chi cuiso ndo.

²⁸ Vatyí tatu nya nyoho cuñí ndo savaha ndo noo vehe cahnu, xihna ca cunyaa ndo ta ndichi xiñi ndo tatu caña xuhun ndo cha cananyaa ndo vehe cuan.

²⁹ Vatyí tatu quichaha sacacu ndo vehe cuan, ta quichaha ña cuví sandihi ndo vatyí ñahri ca xuhun ndo, cuacu nyaa ñáyivi chi ndo.

³⁰ Ta cuacatyí ñu: “Ra cuan quichaha savaha ra vehe ra, ta ni ña cuví sandihi ra”, cucatyí ñu.

³¹ O tatu noo rey cha cuñí cañi tahan chihin inga rey ¿atu ña chicunyaa xihna ra ta ndichi xiñi ra tatu ñihi uchi mil sindaro cha cuahan chihin ra cua cañi tahan chihin inga rey cha vachi chihin oco mil sindaro cuan?

³² Tatu chitó ra vatyí ma cuvi chasaha ra chi inga rey cuan, tyicuan ta cañi ca vachi rey cuan, ta tachi ra chi noo musu ra vatyí cucatyí ra chi rey cuan na ndihi tuhun yucuan ri.

³³ Ta tyicuan caa cuví chi nyoho. Tatu ma cahnya iñi ndo tandihi maa cha cuñi ndo ta cha cumi ndo, ma cuvi cunyicon ndo chii.

Nu sañahá ra Jesús vatyí tari ñi cha ndihi cha uhva, tyicuan caa cuví yo tatu ndu uvi iñi yo cha chino iñi yo chi ra
(Mt. 5.13; Mr. 9.50)

³⁴ Vaha ñi vatyí sacu uhva chi cha cachi yo. Soco tatu ndihi cha uhva chi, ña vaha ca chi.

³⁵ Ñahri ca tyiño cuví saha chi. Ta sacuita yo vatyí ña vaha ca. Nya nyoho cha cutuñi iñi ndo, tyasoho ndo tuhun cahín —catyí ra Jesús.

15

Nu sañahá ra Jesús vatyí tari mbee cha cuanaa tyicuan caa cuví yo
(Mt. 18.10-14)

¹ Tandihí ra tavá xuhun cuenda gobiernu ñuu Roma, ta ra iyó cuatyí, tuhva ra nu nyaá ra Jesús, tacuhva cuiñi ra tuhun cahán ra.

² Tyicuan ta ra fariseo ta ra casacuaha ley vehe ñuhu quichaha cacahan nyaa ra, ta cacatyí ra:

—Ra ihya, cahán ra chihin ra iyó cuatyí. Ta chachí ra chihin ra —cacatyí ra.

³ Tyicuan ta ra Jesús cahán ra noo cuhva ihya, ta catyí ra:

⁴ —Ta nya nyoho cha iyó noo cientu mbee sana ndo, tatu cuanaa noo ti, ¿atu ma sandoo ndo chi tandihí ca ti cuan nu chiquí. Ta cunanducu ndo chi quití cha cuanaa cuan, nyacua nya cha nañihi ndo chi ti?

⁵ Ta cuhva cha nañihi ndo chi ti, ta natyiso soco ndo chi ti. Ta sñi vavaha cuví chi ndo.

⁶ Ta cuhva cha nachaa ndo vehe ndo, ta ndu ñn ri ndo chihin ra tahan ndo ta chihin ñu nyicú yatyin yuvehe ndo, yucuan ta catyi ndo chi ñu vatyí na cusñi cuñi ñu chihin ndo vatyí nañihí ndo chi mbee sana ndo cha chinaa.

⁷ Ta ihya catyí chi ndo, vatyí sñi xaan ca cuví chi ángel Nyoo andiví cha catyi noo ra cha iyó cuatyí ta nasama cuhva iyó ra, ta ñima ca cha catyi ndi cumi xico chahun cumi tahan ñáyiví cha ñahri cuatyí.

Ñaha sihi cha cuanaa xuhun ta nañihí ña

⁸ Ta catyí chi ndo, tatu iyó noo ñaha cha iyó uchi tahan xuhun ña, ta tatu cuanaa noo xuhun ña, tyaa ña noo candil. Ta tihví ña tandihí cuii maa chichi vehe ña. Ta nanducu ña tandihí cuii nyacua nya cha nañihi ña xuhun cuan.

⁹ Ta cuhva cha yaha nañihí ña, cuahan ña cua nanducu ña chi ñaha tahan ña, ta ñáyiví cha nyicú yuvehe ña, ta catyi ña chi ñu: “Cusñi cuñi ndo chihin vatyí cha nañihí xuhun cha chinaa”, catyí ña.

¹⁰ Ta catyí chi ndo vatyí tyicuan caa sñi cuví chi ángel Nyoo cha catyi noo ra iyó cuatyí ta ndu uvi iñi ra cuatyí ra —catyí ra Jesús.

Nu sañahá ra Jesús yoso caa cuñi Nyoo chi noo ra ndu uvi iñi cuatyí

¹¹ Tyicuan ta quichaha catyí tucu ra Jesús cuhva ihya:

—Noo ra, chiyó uvi tahan sehe ra.

¹² Ta noo chaha, ra luhlu ca cuan catyí ra chi sutu ra vatyí nacuhva ra cha tahan chi chi ra. Tyicuan ta sutu ra chaha ra chi ninduvi sehe ra.

¹³ Ta ña cuaha ri quiví cuan ta ra luhlu ca cuan xico ra tandihí cuii maa cha chaha sutu ra chi ra. Ta sandu ñn ri ra xuhun ra, ta quehen ra ityi ta cuahan ra noo ñuu cañi. Ta yucuan chiyó ra, sanaa ra tandihí maa xuhun ra chihin tusñi iñi. Ta quiñi xaan chicá noo ra.

¹⁴ Tyicuan ta chaa noo tama ityi nu iyó ra. Ta quichaha chisoco ra vatyí ndihí xuhun ra sanaa ra.

¹⁵ Tyicuan ta chahan ra chicacan ra tyiño chi noo ra ñuu cuan. Ta ra cuan tachí ra chi

ra noo nu iyó quini sana ra, vatyí cusaha cuenda ra chi ti.

¹⁶ Ta cuví noo chaha cuan chisoco xaan ra. Ta ñahri maa cha cachi ra iyó, nyacua quichi cuví iñi ra cachi ra cha cachachí quini cuan soco yori maa chaha cha cachi ra.

¹⁷ Tyicuan ta nichon iñi ra tuhun sutu ra. Ta ndichi xiñi ra: “¿Atu chiin cuaha ra casahá tyiño chihin suti? Soco ñahri maa cha cumañi chi ra. Ta yuhu cuñi cúvi soco ihya.

¹⁸ Vityin cunuhin nu nyaá suti. Ta catyi chi ra tyi chicoo cuatyí nuu Nyoo ta nuu maa ra.

¹⁹ Ta ña naña que cha cuví sehe ra chii, ta na saha ra tuhun vatyí noo musu ri ra cuví chii.” Tyicuan caa ndichi xiñi ra.

²⁰ Tyicuan ta quehen ra ityi cuanuhu ra nya vehe sutu ra. Cañi ca vachi ra ta nanyehé sutu ra chi ra, ta cundahví cuñi ra nyehe ra chi ra. Ta chinó ra chisatahan ra chi sehe ra. Ta nanumí ra chi ra.

²¹ Tyicuan ta quichaha catyí ra chi sutu ra: “Tata, chicoo cuatyí nuu Nyoo ta chicoo cuatyí nu maun. Ta yucuan chaha ña naña que cha cuví sehun chii”, catyí ra chi sutu ra.

²² Soco sutu ra tyihi ra tyiño, ta catyí ra chi musu ra: “Tava ndo sahna vaha ca ta sacuihno ndo chí ra. Ta tyihi ndo noo xehe nundaha ra. Ta nyaça ndo zapato quihi chaha ra ñandihí.

²³ Ta sñn ri cahñi ndo noo becerru cha xahan ca, vatyí cachi yo chi ti. Vatyí vityin cucoo yo noo vico.

²⁴ Vatyí ra sehi ihya cha chihí ra saha mai tuhun. Cuñi mai vatyí ma nyehe que chi ra, soco natuví ra”, catyí sutu ra. Tyicuan ta quichaha chicoo ñu vico. Ta sñi xaan cacuñi ñu vatyí natuví ra cuan.

²⁵ Tyicuan ta inga sehe ra, ra cha chahnu ca, ñohó ra nu chíqui. Ta cuhva cha cuanachaa ra nya vehe ra, ta quichaha chiñi ra yaa. Ta chiñi ra vatyí sñi xaan cachitá chaha ñu.

²⁶ Tyicuan ta cuhva cha cuyatyin ra nya vehe ra ta cana ra chi noo musu ra. Ta ndaca tuhun ra ñáa cha cuví cuan.

²⁷ Tyicuan ta musu ra quichaha catyí ra: “Yañun, ican nachaa. Ta yucuan chaha tachí sutun vatyí na cahñi ra chi noo be-

cerru xahan ca. Vatyí vaha ri nachaa yañun, ta ñahri cha cuví chi ra”, catyí ra.

²⁸ Tyicuan ta cuxaan xaan cuñi ra. Ta ña cuñi ra ndihvi ra chichi vehe. Soco sutu ra chahan ra chicahan ndahvi ra chihin ra, vatyí na ndihvi ra chichi vehe.

²⁹ Tyicuan ta nacahan ra ta catyí ra chi sutu ra: “¿Atu chiin cuiya sahá tyiñe chuhun? Ta tyasohí tuhun cahún. Ta ni noo chaha ta ta nacahnu que nu cahún. Soco ni noo ndixihyu lee ta cuhva con chii vatyí coi vico chihin ra tahin.

³⁰ Soco vityin cha nachaa sehun ihya, ra cha sanaa xuhun chihin ñu cata iñi. Ta vityin chahun noo becerro quití xahan ca chi ra”, catyí ra chi sutu ra.

³¹ Tyicuan ta nacahan sutu ra ta catyí ra chi ra: “Sehi, yoho tyicuan ri nyaún chihin. Ta tandihí cha cumi, chuun cuví.

³² Soco vityin tahán chi sacuvi yo vico ihya. Ta cusii cuñi yo. Vatyí nachaa yañun, ra cha saha mai tuhun vatyí chihí. Tari quivi nandoto ra cuví ihya. Ta chinaa ra, ta nañihí tucu yo chi ra inga chaha”, catyí ra chi sehe ra —catyí ra Jesús.

16

Nu sañahá ra Jesús chi yo yoso caa saha yo tumañi iñi chihin cha iyó chi yo

¹ Tyicuan ta quichaha catyí ra Jesús chi ra cachicá noo chihin ra:

—Iyó noo ra tyayii vavaha ra. Ta iyó noo ra yindaha tandihí tyiño sahá ra. Ta chahan coyo musu ra canacatyí ra chi ra tyayii cuan, vatyí ra yihí ndaha tyiño cuan, sanaa ra tandihí cha iyó chi ra.

² Tyicuan ta cana ra tyayii cuan chi ra yindaha tyiño cuan, ta catyí ra chi ra: “Cha cuaha xaan cuatyí chahún quichi nu nyaí. Nacuhva cuendon tandihí tyiño cha sacuvun chii. Vatyí ma saha tyiño con chihin”, catyí ra chi ra.

³ Tyicuan ta ra yindaha tyiño cuan ndichi xiñi ra: “¿Yoso caa cunyacuvi vityin? Chitohi ña cuñi ca ra cha sahá tyiñe chihin ra. Ta ñahri fuerza iyó chii cha saha tyiñe nu ñuhú. Ta cahán nui caye chichi ñuu.

⁴ Soco cha chité yoso caa cunyacuvi vityin, ta vaha coo ñayivi chihin quivi cha ma

coo ca tyiño sahi, ta vaha chai vehe ñu”, ndichi xiñi ra.

⁵ Tyicuan ta cana ra chi noo noo ra yosoyicá chi chitoho ra. Ta quichaha catyí ra chi noo ra cuan: “¿Yoso yosoyicón chí chitohi?” catyí ra.

⁶ Tyicuan ta nacahan ra cuan ta catyí ra: “Yuhu yosoyiqué noo cumi mil litru aceitye.” Tyicuan ta ra yindaha tyiño cuan catyí ra chi ra: “Quehen nonga tutu ihya. Ta natyaa uvi mil ri. Ta sacuiton tutu chahnu cuan”, catyí ra. Tyicuan caa sacuvi ra. Ta cuahan ra.

⁷ Tyicuan ta chaa inga ra. Ta quichaha ndaca tuhun tucu ra chi ra cuan ta catyí ra: “¿Yoso yosoyicá yoho chí chitohi?” Ta nacahan ra cuan ta catyí ra: “Yosoyiqué noo mil arroba trigu”, catyí ra. Tyicuan ta quichaha catyí ra yindaha tyiño cuan: “Quehen inga tutu, ta natyaun uña cientu ri arroba. Ta sacuita tutu chahnu chiña”, catyí ra.

⁸ Tyicuan ta chitó chitoho ra cha ña vaha cha chinyacuvi ra. Ta iyo xaan cuñi ra vatyí yatyí xaan saha ra cuan chi ra —catyí ra Jesús.

Ta quichaha catyí tucu ra chi ra cachicá noo chihin ra:

—Ñayivi ña vaha aña yatyí xaan ca sahá ñu chí ñu ican saha ñayivi vaha aña.

⁹ Ta catyí chí ndo, vatyí cotyíño ndo cha tyayii cha iyó siqui ñuhu ñayivi ihya, ta saha ganaa ndo amigo. Ta quivi cha ndihí cha tyayii cuan, cuñihí ndo nu cunyicu ndo nya nu nyaá Nyoo tyicuan ri maa.

¹⁰ Tatu chitó ndo cotyíño ndo chiin cha iyó chí ndo cha cuenda cha vaha, tyicuan caa coto tucu ndo cotyíño ndo tatu cuaha iyó chí ndo. Soco tatu ña chitó ndo cotyíño ndo chiin cha iyó chí ndo, tyicuan caa ma coto tucu ndo cotyíño ndo tatu cuaha coo chí ndo.

¹¹ Ta catyí chí ndo, tatu ña sahá ndo tumañi iñi chihin cha iyó chí ndo siqui ñuhu ñayivi ihya, Nyoo ma cuhva ra noo cha tyayii cha ndicha chí ndo.

¹² Tandihí cha iyó chí ndo maa Nyoo chaha noo chí ndo. Soco tatu ña sahá ndo tumañi iñi chihin cuan, ma cuhva ra cha tahán chí chí ndo.

13 'Noo musu ma cuvi coo uvi tahan chitoho ra. Vatyí musu cuan cuñí ca ra chi noo ra, ta ñima ca chi inga ra. O chi noo ra, vaha quichahá ra tuhun cahán ra, ta chi inga ra, ma quichaha ra cha cahán ra. Ma cuvi cuñí ndo chi Nyoo ta suri cuhva cuan cuñí tucu ndo cha tyayí —catyí ra Jesús.

14 Tyicuan ta cha chiñi ra fariseo tandihí tuhun cahán ra Jesús. Tyicuan ta quichaha chacu cuehe ra nyehe ra chi ra. Vatyí maa ra fariseo cuan cuñí xaan ra chi xuhun.

15 Tyicuan ta quichaha catyí ra Jesús chi ra:

—Vaha xaan sahá ndo chi ndo nuu ñáyivi. Soco chitó Nyoo vatyí añima ndo ña vaha. Ta tandihí cha catyí ñáyivi vatyí cahnu xaan ihya síqui ñuhu ñáyivi, Nyoo ña cuñí nyehe ra.

Nu sañahá ra Jesús tuhun ley ra Moisés, ta tuhun yoso caa cunyaca ñaha Nyoo añima yo chi yo

16 'Ley cha tachí Nyoo chi ra Moisés vatyí tyaa ra, ta tuhun cha tyaa ra profeta Nyoo ta cha naha, ican chi cuvi cha saquehen ityi chi ñáyivi nyacua nya quívi chaá ra Juan. Ta maa ra Juan quichaha cahan ra tuhun vaha vatyí cha cuñí quichi Nyoo vatyí cunyaca ñaha ra. Ta tandihí ñáyivi cha nducú cuhva yoso caa cunyaca ñaha Nyoo añima ñu, ican ñu quihvi ndaha ra.

17 'Soco catyí chi ndo, vasi cunaa andívi ta ñuhu ñáyivi, soco cha cuví ley Nyoo cha tyaa ra Moisés, ma naa nyacua nya cha yahá cuvi tandihí.

Sañahá ra Jesús vatyí ña vaha cha sandoo rayí chi ñasihí ra

(Mt. 19.1-12; Mr. 10.1-12)

18 'Tatu noo rayí iyó ñasihí ra, ta sanandoo ra chi ña, ta tandaha ra chihin inga ña, iyó cuatyí ra nuu Nyoo. Ta tatu tandaha noo rayí chihin noo ñaha cha sandoo yí chii, coo tucu cuatyí ra nuu Nyoo.

Nu sañahá ra Jesús tuhun noo ra tyayí chihin ra Lázaro

19 'Chiyó noo ra tyayí. Ta vaha ñihnó ra. Ta tandihí quívi iyó ra vico ta chachí vaha ra.

20 Ta chiyó tucu noo ra ndahvi cha nañí Lázaro. Ta cuaha xaan ndihyí iñi ra. Ta nyaá ra yuvehe ra tyayí cuan.

21 Ta ra ndahvi cuan, cuñí ra cachi ra, vasi cha canacoyo nu mesa ra tyayí cuan. Ta nyacua nya ina ta chaá ti nu nyaá ra, ta yuyaá ti nu cahvi chi ra.

22 Ta noo quívi cuan chihí ra ndahvi cuan. Ta ángel Nyoo quehen ra chi ra ta cua nyaca ra chi ra nya nu nyaá ra Abraham gloria. Tyicuan ta chihí tucu ra tyayí cuan. Ta chicuchi ñu chi ra.

23 Tyicuan ta ra tyayí cuan nyehé xaan ra tundoho nu ñohó ra anyaya. Ta nanyehe ra nu cañi. Ta nanyehe ra chi ra Abraham chihin ra Lázaro, nyaá ra chihin ra yucuan.

24 Tyicuan ta canachaa ra ta catyí ra: “Tata Abraham, cundahvi cuñi chii. Tachi chi ra Lázaro na satyí ra chiin nundaha ra. Ta na satoo ra ñn titi ndutya nu yai. Vatyí nyehé xain tundoho nu cayú ñuhu ihya”, catyí ra.

25 Soco ra Abraham catyí ra chi ra: “Ñicohon iñun vatyí vaha chiyon ñuhu ñáyivi. Ta ra Lázaro, ña vaha chiyó ra. Vityin vaha iyó ra ihya, ta yoho nyehún tundoho.

26 Ta sñn ri, mahñu ihya cono xaan. Ta ma cuvi yaha ra iyó tyehe cahun ra chiña. Ta ma cuvi yaha ra iyó chiña, quichi ra tyehe”, catyí ra Abraham chi ra.

27 Tyicuan ta quichaha catyí ra tyayí cuan: “Tata Abraham, sahun tumañi iñi chii. Ta tachun chi ra Lázaro nya vehe suti.

28 Vatyí iyó ohon tahan yañi. Ta cuñí vatyí nacatyí ra chi ra yoso caa iyé ihya nu nyehí tundoho, coto quichi coyo tucu ra cuan ihya”, catyí ra.

29 Tyicuan ta quichaha catyí ra Abraham: “Iyó ley cha tyaa ra Moisés. Ta iyó tuhun cha tyaa ra profeta Nyoo ta cha naha. Na quichaha ra tu cuñí ra”, catyí ra Abraham.

30 Tyicuan ta quichaha catyí ra tyayí cuan: “Tata Abraham. Ma quichaha ra. Soco tatu yóo cha nandoto, ta cahun cuncan chihin ra, yucuan ta tyasoho ra ta nasama ra cuhva iyó ra”, catyí ra cuan.

31 Soco ra Abraham catyí ra: “Tatu ña cuñí ra quichaha ra tuhun tyaa ra Moisés ta tuhun cha tyaa ra profeta Nyoo ta cha naha, ma chino iñi ra tuhun cahan noo ndiyí tatu nandoto ra ta cahan ra chihin ra.”

17

Nu sañahá ra Jesús chi yo yoso caa saha cuenda yo chi yo coto sacuvi yo cha ña vaha (Mt. 18.6-7, 21-22; Mr. 9.42)

¹ Tyehe caa catyí ra Jesús chi ra cachicá noo chihin ra:

—Tyicuan ri iyó cha quiñi caa cha sativí chi ñáyiví. Soco ndahvi ra ndahvi ra sativí chi ñáyiví.

² Vaha taxin ca cuhñi ra noo yuu sucun ra. Ta cutuchi ra chi ra nu tyañuhu. Coto sativí ra chi ñu ni nasama cuhva iyó ihya.

³ 'Saha ndo cuenda chi ndo. Tatu noo ra tahan ndo ta sacuvi ra noo cha ña vaha chihin ndo. Catyí ndo chi ra vatyí ña vaha cha sacuvi ra. Tatu nasama ra cuhva iyó ra, saha ndo tucahnu iñi chi ra.

⁴ Ta ni ri maa sacuvi ra cha ña vaha chihin ndo ucha tahan chaha cha noo quiví. Tatu ndi ucha tahan chaha ta catyí ra chi ndo vatyí ndu uvi iñi ra cha sacuví ra chi ndo, ndi ucha tahan chaha saha ndo tucahnu iñi chi ra.

Nu sañahá ra Jesús chi yo vatyí tatu chinó iñi yo chi ra, cuví sacuvi yo cuaha cha vaha

⁵ Tyicuan ta quichaha catyí ra cachicá tyiño nuu ra Jesús chi ra:

—Cuhva cha chinó ca iñi ndi chuun —catyí ra.

⁶ Tyicuan ta catyí ra Jesús chi ra:

—Tatu chinó iñi ndo chi yuhu vasi chiin ri tari cuhva noo chiti mostaza luhlu, cuví catyí ndo chi yutun sicómoro cha nanyaá ihya nacoyo tun, ta cucuinanyaa tun nu tyañuhu. Ta cucuvi nu cahan ndo —catyí ra Jesús.

Yoso caa tahan chi quichaha yo chi Nyoo

⁷ Ta catyí ra Jesús:

—Tatu noo nyoho ta iyó noo musu ndo. Ta nachaa ra cha chahan ra nu chiqui chi sahatyiño ra, o chi saha cumi ra quití sana ndo, ¿atu catyí ndo chi ra: “Cunyaa ta cachun”? Ña catyí ndo chi ra tyicuan caa.

⁸ Soco tyehe caa catyí ndo chi ra: “Sanduvaha cha cuxiñi. Ta tyihun cha cachi. Cha yaha cha cachi tyicuan ta cachi tucu maun”, catyí ndo chi ra.

⁹ Ni ña tuhvá ndo nacuhva ndo tyahvi nyoo chi ra vatyí sacuví ra ñáá noo tyiño tavá ndo chi ra.

¹⁰ Tyicuan caa tucu nyoho chihin Nyoo. Quiví ndihí sacuvi ndo cha catyí Nyoo chi ndo, tahan chi catyí ndo: “Nyuhu chiin ri cha tachun chi ndi, yucuan ri sacuví ndi. Ta ña yaha ca.”

Nu sanduvahá ra Jesús chi uchi tahan ra tyahyu coño

¹¹ Ityi cuahan ra Jesús ityi ñuu Jerusalén yaha ra nu cuví xahñi Samaria chihin Galilea.

¹² Nu chaá ra noo ñuu, quitá coyo uchi tahan ra cuhví chihin cha tyahyu coño ra. Ta chicuitayucu ra nyasava ri.

¹³ Ta quichaha cacanachaa ra chi ra Jesús, ta catyí ra:

—Yoho, Maestro Jesús, cundahvi cuñi chi ndi —catyí ra.

¹⁴ Tyicuan ta nanyehe ra Jesús chi ra ta catyí ra chi ra:

—Cuahan ndo. Ta cua sañaha ndo chi ndo chí tata sutu vatyí cha nduvahá ndo.

Tyicuan ta cuahan coyo ra cuan. Ta ityi cuahan coyo ra ta cananyehe ra vatyí nduvahá ra.

¹⁵ Tyicuan ta cuhva cha nanyehe noo ra cuan vatyí nduvahá ra, cuanuhu chata ra nu nyaá ra Jesús. Ta caná chaa ra, ta sacahnu ra chi Nyoo.

¹⁶ Ta chicuiñi chiti ra. Ta nacañi noo ra xiñi ra nya nu ñuhu nuu ra Jesús. Ta nacuhva ra tyahvi nyoo chi ra. Ta ra cuan, ra Samaria cuví ra.

¹⁷ Tyicuan ta catyí ra Jesús chi ra:

—¿Atu ñima uchi tahan ndo nduvahá? ¿Nya nyaá inga iñi tahan ca ra?

¹⁸ ¿Ñáá tuhun cha noo tuhun ri maa ra inga ñuu nandichi chata ra ta sacahnu ra chi Nyoo? —catyí ra Jesús.

¹⁹ Tyicuan ta quichaha catyí ra chi ra cuan:

—Nducuíta ta cuahan. Nduvahun vatyí chinó iñun —catyí ra Jesús chi ra.

Yoso caa cuquichi Nyoo cunyaca ñaha ra nu iyó yo ihya

(Mt. 24.23-28, 36-41)

²⁰ Candacá tuhun ra fariseo chi ra Jesús, ta catyí ra:

—¿Ama quichi Nyoo cunyaca ñaha ra?

Tyicuan ta ra Jesús quichaha catyí ra:

—Cha cunyaca ñaha Nyoo ihya siqui ñuhu ñayivi, ñima cha nyehé yo cuví.

²¹ Ma cuví catyí ñáyivi: “Ma ra nyaá ihya, o ma ra nyaá ityi cuan.” Vatyí Nyoo cha chaá ra mahñu ndo, ta nyacá ñaha ra aña ñáyivi cuenda ra —catyí ra chi ra.

²² Yahá cuan ta catyí ra chi ra cachicá noo chihin ra:

—Cuchaa chi quivi vatyí cucuñi ndo nyehe ndo chi yuhu Rayi cha quichi nya gloria. Soco ma nyehe ndo chii.

²³ Cuchaa tucu chi quivi ta cucatyí ñáyivi chi ndo: “Ihya nyaá ra”, o “Yucuan nyaá ra.” Soco ma cuhun ndo cunyehe ndo. Ta ma cunyicon ndo chi ra cuan vatyí ñime cuví.

²⁴ Vatyí tandihí ñáyivi cunyehe chi yuhu Rayi cha quichi nya gloria quivi quichi inga chaha. Tari nyehé tandihí ñáyivi nu quihvi tacha ñicahnu andivi, tyicuan caa cucuvi.

²⁵ Soco cunyehe xihne tundoho. Vatyí ñáyivi cha iyó cha vityin cua cutasi cuñi nyehe ñu chii.

²⁶ Tari cuví quivi ra Noé, tyicuan caa cucuvi quivi quichi yuhu Rayi cha quichi nya gloria inga chaha.

²⁷ Quivi ra Noé, chachí ñu. Chihí ñu. Tandahá ñu. Ta chahá ñu sehe ñu tandaha. Nya quivi quihvi ra Noé chichi barcu ra, ta coon savi xaan. Ta tandihí ñu cachihí ñu.

²⁸ Tyicuan caa tucu cuví quivi ra Lot. Chachí ñu. Chihí ñu. Satá ñu. Xicó ñu. Tachí ñu. Ta savahá ñu vehe ñu.

²⁹ Soco quivi cha quitá ra Lot ñuu Sodoma cuan, coon ñuhu chihin azufre andivi. Ta chihí tandihí ñáyivi Sodoma.

³⁰ Ta tyicuan caa cucuvi quivi cha quichi tucu yuhu Rayi cha quichi nya gloria inga chaha.

³¹ “Ta quivi cuan tatu nyicú ndo nuquehe ndo, ma ndihvi ndo chichi vehe ndo vatyí tava ndo ndaha tyiño ndo. O tatu chicá noo ndo nu chiqui, ma cunuhu ndo nya vehe ndo.

³² Ñicohon iñi ndo ñasihí ra Lot, ñáá cha cuví chi ña.

³³ Tandihí ndo cha cuñí ca ndo cha iyó siqui ñuhu ñayivi ihya, cucunaa ndo. Ta tandihí ndo cha ña quichaha ndo cha iyó ñáyivi ihya, cucacu ndo.

³⁴ “Ta catyí chi ndo vatyí cha cuaa cuan uvi tahan ra cucava noo nu chito. Noo ri ra cunaquehin. Ta nonga ra cundoo ra.

³⁵ Ta uvi tahan ñusihí ñn ri cu nyicó ñu quivi cuan. Noo ri ña, cunaquehin. Ta nonga ña cundoo ña.

³⁶ Ta catyí chi ndo vatyí uvi tahan ra cohon nu chiqui. Noo ra cunaquehin, ta nonga ra cundoo ra —catyí ra Jesús.

³⁷ Cuhva cha chihí ñu tuhun ihya, quichaha ndaca tuhun ñu chi ra Jesús.

—¿Nya maa maa cucuvi ihya Tata? —catyí ñu.

Tyicuan ta nacahan ra Jesús ta catyí ra:

—Nu catuví coño ñuhu chihí, yucuan cundu ñn ri chii.

18

Nu sañahá ra Jesús vatyí tari chicán noo ñaha chihí yí chi juez, tyicuan caa tahán chi cacan yo chi Nyoo

¹ Tyicuan ta chahá ra Jesús noo cuhva ihya. Vatyí na cacan tahvi ñu tyicuan ri maa, ta ma cundihñi ñu.

² Ta catyí ra:

—Iyó noo ñuu cha nyaá noo juez. Ta juez cuan ña sahá maa ra ñáyivi chi Nyoo. Ta ni ri ña quichaha maa ra chi ñáyivi.

³ Ta suri ñuu cuan iyó tucu noo ñaha ndahvi cha chihí yí. Ta chahan ña chican ña chihin ra, vatyí chicá ña cuatyí chaha noo ra xaan iñi chi ña.

⁴ Ta juez cuan ña quichahá maa ra chi ña. Ña sandaa maa ra tyiño chicá ña. Ta chahá xaan chicán ña. Tyicuan ta quichaha ndichi xiñi juez cuan: “Vasi ña yuhvi chi Nyoo, ta ñahri cuende chi ñáyivi,

⁵ soco ñaha ihya sayangá xaan ña chii. Ta yucuan chaha cua sacaqui chi ña. Vatyí coto quichi ca ña, ta sanaquiqui ña tisihí”, ndichi xiñi ra.

⁶ Tyicuan ta catyí ra Jesús:

—Tyicuan caa catyí juez ña vaha cuan. Tu juez cuan cha quíñi iyó ra ta tyinyee ra chi ñaha ndahvi cuan,

⁷ ta nyaca cuví Nyoo, ¿atu ma tyinyee ra chi ñáyivi cha chicán ndiyaca ta ndiquivi chi ra? ¿Atu cuatu xaan ra cha tyinyee ra chi ñu?

⁸ Catyí chi ndo, vatyí numi ri cutyinyee ra chi ñu. Soco quivi quichi yuhu, Rayi cha

quichi nya gloria, inga chaha, chitó Nyoo tatu nañihi que chi ñu cha ndicha chinó iñi chii —catyí ra Jesús.

Noo cuhva cuenda ra tavá xuhun cuenda gobiernu ñuu Roma ta cuenda ra fariseo

⁹ Tyicuan ta chaha ra Jesús nonga cuhva cuenda ra savahá chii, ta ña cuñi nyehe ra chi inga ra. Ta quichaha catyí ra:

¹⁰ —Iyó uvi tahan ra chahan chichi vehe ñuhu chicacán tahvi ra chi Nyoo. Noo ra cuan ra fariseo cuví ra. Ta inga ra cuan ra tavá xuhun cuenda gobiernu ñuu Roma cuví ra.

¹¹ Ta ra fariseo cuan chicuinanyaa ra, ta quichaha cahan ra chihin Nyoo. Ta cahnú saha ra chi ra. Ta catyí ra: “Sutu Mañi yuhu, nacuhve tyahvi nyoo chuun vatyí yuhu ñima tari inga ñáyivi cuví. Vatyí suhu ñu. Quiñi iyó ñu. Iyó ñasíhi ra ta iyó inga ñusíhi chi ra. Ta ni ri ñima tari ra tavá xuhun cuan cuví.

¹² Vaha ca quichahí tuhun maun ta ñima ca inga ñáyivi. Vatyí uvi chaha cha noo vitya ña chachí. Ta chahí uchi síqui noo noo cientu cha sahá ganai chuun”, catyí ra.

¹³ Soco ra tavá xuhun cuenda gobiernu Roma cuan cha cañi ri chiin nanyaá ra. Ta ña caña iñi ra nanyehe ndaa ra. Ta cañi ra ndaha ra añima ra vatyí ndu uvi iñi ra cuatyí ra. Ta catyí ra: “Sutu Mañi yuhu. Nyehe ndahvi chii vatyí iyó xaan cuatyí”, catyí ra —catyí ra Jesús.

¹⁴ Ta catyí tucu ra Jesús tyehe caa:

—Catyí chi ndo vatyí Nyoo sahá ra tucahnú iñi chi ra tavá xuhun cuan. Sanaa Nyoo cuatyí ra ta cuanuhu ra nya vehe ra. Soco ra fariseo cuan, ñahri tucahnú iñi ñihi ra, vatyí yóo ñáyivi cha savahá xaan chi nuu Nyoo, cusanocuee Nyoo chi ñu, ta ñu sanocuee chi, Nyoo cusanducahnu ra chi ñu —catyí ra Jesús.

Nu nasocó ra Jesús chi ra cuatyaa (Mt. 19.13-15; Mr. 10.13-16)

¹⁵ Tyicuan ta quichi nyaca ñáyivi chi ra cuatyaa chi ra Jesús vatyí na tyiso ra ndaha ra xiñi ndotyín. Soco cuhva cha nanyehe ra cachicá noo chihin ra vatyí tyicuan caa, ña chaha ca ra.

¹⁶ Tyicuan ta cana ra Jesús chi ra cachicá noo chihin ra, ta catyí ra chi ra:

—Saña ndo chi ra cuatyaa na quichi maa ndotyín nu nyai. Ta ma casi ndo, vatyí ñu nyacá ñaha Nyoo añima, cuví ñu tari ra cuatyaa ihya.

¹⁷ Ta catyí chi ndo vatyí tatu ña ita iñi ndo chi Nyoo, tari noo ra cuatyaa ita iñi ndotyín chi sutu ndotyín, ma cuvi quihvi ndo nu nyacá ñaha Nyoo.

Nu chahá ra Jesús tuhun vatyí yí xaan nacuhva cuenda noo ra tyayí chi ra chi Nyoo

(Mt. 19.16-30; Mr. 10.17-31)

¹⁸ Tyicuan ta noo ra cha cuví nuu cuenda vehe ñuhu ndacá tuhun ra chi ra Jesús, ta catyí ra:

—Maestro, ra vaha cuvún. ¿Yoso caa cunyacuvi ta ñihi ñayivi cha ma naa ca maa coi? —catyí ra.

¹⁹ Tyicuan ta catyí ra Jesús chi ra:

—¿Ñáa tuhun catyún vatyí ra vaha cuví? Noo ri maa Nyoo cuví ra ra vaha. (Ta cha catyún tyi vahi, nacotón tyi Nyoo cuví.)

²⁰ Yoho chitón tandíhi tuhun cha tachí Nyoo tyi sacuvi yo: “Cha ma coo inga ñusíhi chuun. Ma cahñun chi ñáyivi. Ma suhun. Ma cahun cuendu síqui ñáyivi. Ta sahun ñáyivi chi sutun ta chi síhun” —catyí ra Jesús.

²¹ Tyicuan ta ra cuan catyí ra:

—Tandíhi ihya ta quichahí nyata luhli ta nyacua nya vityín —catyí ra.

²² Nu chiñi ra Jesús cha catyí ra cuan, tyicuan ta catyí ra chi ra:

—Soco cumañi sacuvun nonga cha sacuvun. Xico tandíhi cha iyó chuun. Ta cuhva chi ñu ndahvi. Ta quichun chate. Tyicuan ta coo cha tyayí chuun nya gloria —catyí ra.

²³ Soco ra cuan nu chiñi ra tuhun cuan, nducuihya xaan iñi ra, vatyí tyayí xaan ra.

²⁴ Cha nanyehe ra Jesús vatyí nducuihya iñi ra, ta quichaha catyí ra:

—Yí xaan ta cuvi nacuhva cuenda ñu tyayí chi ñu na cunyaca ñaha Nyoo añima ñu.

²⁵ Tañi tyehe yaha noo camello xiu noo yíqui ticu, ta ñima ca cha quihvi noo ñu tyayí nu nyacá ñaha Nyoo —catyí ra.

²⁶ Ta ñu cha cachiñi tuhun ihya catyí ñu: —Tatu tyicuan caa, ¿yóo cha cuví cacu víi? —catyí ñu.

27 Tyicuan ta ra Jesús catyí ra:
—Tandihí cha ña cuví sacuvi rayíi, Nyoo cuví sacuvi ra —catyí ra.

28 Tyicuan ta ra Pedro catyí ra:
—Sutu Mañi yuhu, nyuhu tandihí maa cha iyó chi ndi sandoo ndi, ta nyicón ndi chuun —catyí ra.

29 Tyicuan ta catyí ra Jesús chi ra:
—Cha ndicha catyí chi ndo. Vatyí tandihí ndo cha sandoo ndo vehe ndo, o ñasihi ndo, o yañi ndo, o sutu ndo, o sehe ndo cha catyí cha chahá ndo cha cunyaca ñaha Nyoo añima ndo,

30 cuaha xaan cha vaha cunañihi ndo ihya ñáyivi ta cunañihi ndo inga ñáyivi cha ma naa ca maa —catyí ra Jesús.

Inga chaha sacotó ra Jesús yoso caa cuc-ahñi ñáyivi chi ra

(Mt. 20.17-19; Mr. 10.32-34)

31 Ta caná sñn ra Jesús chi ndi uchi uvi ra cachicá noo chihin ra, ta catyí ra chi ra:

—Vityin cuhun yo nya Jerusalén. Vatyí yucuan cuchino cava tandihí tuhín cha tyaa ra profeta Nyoo ta cha naha. Vatyí yuhu Rayíi cha quichí nya gloria cuví.

32 Vatyí cucuhva cuenda ra chii chi ra inga ñuu, ra cha ñima ra ñuu Israel cuví. Ta cucuacu nyaa ra chii. Ta cucahan ra chii. Ta cutycusi ra nui.

33 Ta cucañi ra chii, ta cucahñi ra chii, soco nu cu uñi quívi ta cunandote —catyí ra Jesús.

34 Ta ra cachicá noo chihin ra ña cutuñi iñi ra tuhun cuan ni ña cachitó ra ñáa tuhun cahán ra Jesús chihin ra. Vatyí ña chahá Nyoo vatyí cacutuñi iñi ra.

Nu sananyehé ra Jesús chi noo ra cuaa ñuu Jericó

(Mt. 20.29-34; Mr. 10.46-52)

35 Cuhva cha cua chaa ra Jesús ñuu Jericó. Ta yuhu ityi cuan nyaá noo ra cuaa. Ta chicán ra limuxtan.

36 Tyicuan ta chiñi ra vatyí cuaha xaan ñáyivi cua yaha. Ta ndacá tuhun ra ñáa cha cuví cuan.

37 Ta ñáyivi nacatyí ñu chi ra vatyí ra Jesús, ra ñuu Nazaret, ican cua yaha cuan.

38 Tyicuan ta quichaha cana chaa ra:
—¡Yoho Jesús, ra vachi tata rey David! ¡Cundahvi cuñi nyehun chii! —catyí ra.

39 Ta ra cha cuahan coyo ityi nuu cuan, quichaha cacatyí ra chi ra, nacasi ra yuhu ra. Soco chaa ca caná chaa ra, ta catyí ra:

—¡Yoho, ra vachi tata ra David! ¡Cundahvi cuñi nyehun chii! —catyí ra.

40 Tyicuan ta chicuiñi ra Jesús yucuan. Ta tachí ra tyiño na cuquehen chi ra cuaa cuan. Ta cuhva cha chaa ra cuaa cuan nu nanyaá ra Jesús, ta ra Jesús quichaha ndaca tuhun ra chi ra, ta catyí ra:

41 —¿Ñáa cha cuñún vatyí sacuvi chuun? Tyicuan ta ra cuaa cuan nacahan ra, ta catyí ra:

—Sutu Mañi yuhu, cuñi nanyehi —catyí ra.

42 Tyicuan ta catyí ra Jesús chi ra:

—Nanyehé. Cha nduvahá chiti nuun, vatyí chinó iñun chii —catyí ra.

43 Ta caa cuhva ri cuan, ra cuaa cuan nanyehé ra. Ta cuahan ra chata ra Jesús. Ta sacahnú ra chi Nyoo. Ta tandihí ñáyivi cha nyehe ñu tyicuan caa, sacahnú ñu chi Nyoo.

19

Nu cuahan ra Jesús vehe ra Zaqueo

1 Yucuan ta quihvi ra Jesús ñuu Jericó cuan. Ta cua yaha ra chichi ñuu cuan.

2 Ta yucuan iyó noo ra tyayíi vavaha. Nañi ra Zaqueo. Ta ra cuví nuu cuenda ra catava xuhun cuenda gobiernu ñuu Roma cuví ra.

3 Ta cuñi xaan ra cohon nuu ra chi ra Jesús. Ta ña cuví nyehe ra chi ra vatyí cuaha xaan ñáyivi. Ta maa ra tyaha xaan ra.

4 Yucuan ta chino vavaha ra cuahan ra ityi nuu, ta ndaa ra nu noo yutun cha nañi sicómoro cha nanyaá yuhu ityi nu cua yaha ra Jesús, tacuhva cuví nyehe ra chi ra.

5 Ta cuhva cha yahá ra Jesús nanyehé ndaa ra ityi siqui ta nanyehé ra chi ra Zaqueo. Ta quichaha catyí ra chi ra:

—Zaqueo, sanumi ta noun nu yutun chiña. Vatyí vityin cuhin vehun —catyí ra chi ra.

6 Tyicuan ta numi ri noo ra Zaqueo nuu yutun cuan. Ta si vavaha cuví chi ra. Ta quehen cuenda ra chi ra Jesús. Ta cuahan ra chihin ra nya vehe ra.

7 Ta cha nyehe ñáyivi cha tyicuan caa, ta tandihí ñu quichaha cahán nyaa ñu chi ra

Jesús. Ta catyí ñu vatyí ndoo ra vehe noo ra iyó cuatyí.

⁸ Nu canyicú ra chichi vehe cuan, ra Zaqueo nicuinanyaá ra. Ta quichaha catyí ra chi ra Jesús:

—Sutu Mañi yuhu, yuhu cua cuhve sava cha iyó chii chi ñu ndahvi. O tatu suhi chi ñáyivi chihin cha sandavi ñahi chi ñu, vityin cunacuhva cuende nya cumi ca tahan chaha chi ñu —catyí ra chi ra.

⁹ Tyicuan ta catyí ra Jesús:

—Vityin cacu añimon, ta ñáyivi chi ra Abraham cuvún. Vatyí nacuhva cuendon chuun chi Nyoo tari nacuhva cuenda ra Abraham chi ra chi Nyoo.

¹⁰ Vatyí yuhu Rayi cha quichí nya gloria vachi nandugui ta vachi sacaqui chi ñáyivi cha cua naa —catyí ra Jesús.

Nu sañahá ra Jesús na saha tyiño yo chihin cha chahá Nyoo chi yo (Mt. 25.14-30)

¹¹ Ta cha ni ri ca cha chiñi ñáyivi tuhun cahán ra Jesús, quichaha cahan tucu ra inga cuhva ihya. Vatyí cha cuyatyin chaa ra Jerusalén. Ta ñáyivi cuñi maa ñu vatyí cha cua quichaha ra cunyaca ñaha ra yucuan.

¹² Tyicuan ta catyí ra:

—Chiyo noo ra vaha ta cuñi cuhun ra noo ñuu cañi. Vatyí yucuan cunanduvi ra rey tacuhva vatyí ndichi ra ñuu ra, soco cha cuví ra rey.

¹³ Ta cuhva cha cumañi cuhun ra, cana ra chi uchi tahan musu ra. Ta chaha cuenda ra noo xuhun chi noo noo ra. Ta catyí ra chi ra: “Saha tyiño ndo chihin xuhun chiña nyacua nya ndichi mai”, catyí ra.

¹⁴ Soco suhva ñáyivi ñuu ra, tasi cuñi ñu nyehe ñu chi ra ta ña cuñi ñu cha cuví ra rey chi ñu. Ta tachí ñu chi suhva ra cuhun chata ra, vatyí catyí ra vatyí ña cuñi ñu cha cuví ra rey chi ñu.

¹⁵ Soco ra cuan nduvi ra rey. Tyicuan ta nachaa ra nya ñuu ra. Ta quivi cha nachaa ra, cana ra chi musu ra, ra cha sandoo ra xuhun chii. Vatyí coto ra yoso saha ganaa xuhun ra cha ni ri ca cha chahan ra.

¹⁶ Ta chaa noo ra cuan. Ta catyí ra: “Tata, saha ganai uchi ca tahan chaha siqui xuhun cha sandoun chii”, catyí ra.

¹⁷ Tyicuan ta quichaha catyí rey cuan chi ra: “Vaha xaan. Yoho vaha musu cuvún. Vatyí vaha saha tyiño chihin chiin xuhun cha chahí chuun. Ta vityin cunyaca ñahun uchi tahan ñuu”, catyí rey cuan chi ra.

¹⁸ Tyicuan ta chaa tucu inga ra cha chaha ra xuhun chii. Ta quichaha catyí ra: “Ma xuhun ihya. Saha ganai ohon tahan ca chaha siqui xuhun cha sandoun chii”, catyí ra.

¹⁹ Tyicuan ta catyí rey chi ra: “Yoho cunyaca ñahun ohon tahan ñuu”, catyí ra.

²⁰ Tyicuan ta chaa tucu inga ra cuan. Ta quichaha catyí ra: “Ma xuhun ihya cha chahun chii. Yuhu chicumi vahi chichi noo pañitu.

²¹ Vatyí yuhvi xain chuun, vatyí yoho cuvún noo ra xaan. Vatyí naquehun cha ñima chuun cuví. Ta naquehun tyiño saha inga ñáyivi”, catyí ra cuan.

²² Tyicuan ta rey cuan catyí ra chi ra: “Yoho musu ña vaha cuvún. Vityin suri chihin tuhun cha catyun chii, cucatyí tucu yuhu chuun. Tatu chitón vatyí yuhu, xain, ta chitón vatyí naquehin cha ñima chii cuví, ta naquehin cha ña saha tyiño,

²³ ¿ñáá tuhun ña chahun ta chityihun xuhin banco vatyí nachai soco cha nducua ca xuhin?” catyí rey cuan.

²⁴ Ta quichaha catyí ra chi ra canyicú cuan: “Tinya ndo xuhun cha chahí chi ra, ta cuhva ndo chi ra cha saha ganaa uchi ca tahan cuan”, catyí ra.

²⁵ Tyicuan ta quichaha catyí ra chi rey cuan: “Tata, soco ra cuan, cha iyó uchi tahan chi ra”, catyí ra.

²⁶ Tyicuan ta rey cuan catyí ra: “Soco catyí yuhu chi ndo. Vatyí ra cha vaha ca saha tyiño chihin cha chahí chi, cucuhva que chi ra. Ta ra cha chahí chiin ri, ta ña cuñi ra saha tyiño ra chihin cuan, cutinyaa ndihi chi ra.

²⁷ Ta tandihi ñu xaan iñi chii, ñu ña cuñi vatyí cunyaca ñahi chi ñu, nyaca ndo chi ñu tyehe vatyí cahni ndo chi ñu nui”, catyí rey cuan —catyí ra Jesús.

Nu cua chaa ra Jesús Jerusalén (Mt. 21.1-11; Mr. 11.1-11; Jn. 12.12-19)

²⁸ Cha yaha cahan ra Jesús cuhva cuan, ta sañihi ra cuahan ra ityí Jerusalén.

²⁹ Yucuan ta cua chaa ra ñuu Betfagé chihin ñuu Betania, yatyin ri noo yucu cha nañi Olivo, vatyí maa maa ri maa tun Olivo iyó yucuan. Ta tava ra tyiño chi uvi tahan ra cachicá noo chihin ra.

³⁰ Ta catyí ra chi ra:

—Cuahan ndo ñuu cha nyaá yatyin ri cuan. Ta yucuan cunañihi ndo noo burru luhlu, quiñi ta coto ca tyayu, nuñi ti. Ndachi ndo chi ti. Ta nyaca ndo chi ti tyehe.

³¹ Tatu yóo cha catyí chi ndo: “¿Ñáá tuhun cha ndachi ndo chi ti?” catyí ndo chi ñu: “Vatyí chiñuhú ti chi maa ra nyaca ñaha chi yo.”

³² Tyicuan ta ra cachicá noo chihin ra, cuahan coyo ra. Ta nañihí ra chi ti tari cuhva catyí maa ra Jesús.

³³ Ta cuhva cha candachi ra chi ti, cha coyo chitoho ti. Ta candaca tuhun ra chi ra:

—¿Ñáá tuhun cha ndachi ndo chi burru chiña? —catyí ra.

³⁴ Tyicuan ta canacahan ra cuan ta catyí ra:

—Ndachí ndi chi ti vatyí chiñuhú ti chi maa ra nyacá ñaha —catyí ra.

³⁵ Tyicuan ta quehen ra chi ti. Ta chinyaca ra chi ti nu nyaá ra Jesús. Ta tyiso ra sahma ra siqui ti. Tyicuan ta casandaa ra chi ra Jesús siqui ti.

³⁶ Tyicuan ta cuahan ra Jesús. Ta cuaha vavaha ñáyivi cachacun ñu sahma ñu ityi nu cua yaha ra, yosó ra burru cuan.

³⁷ Tyicuan ta cha cua cuyatyin tandihí ñu chihin ra Jesús nu iñi noo yucu Olivo cuan. Ta quichaha cana chaa tandihí ñu chinó iñi chi ra chihin cha sií cuví chi ñu. Ta sacahnú ñu chi Nyoo vatyí cuaha xaan cha vaha nyehe ñu cha sacuvi ra.

³⁸ Yucuan chaha catyí ñu:

—¡Na sacahnu yo chi Rey ihya vatyí vachi ra chihin siñi Nyoo! ¡Na coo cha taxi ri andivi! ¡Ta na sacahnu yo chi Nyoo! —catyí ñu.

³⁹ Tyicuan ta suhva ra fariseo cha cuahan coyo chihin ñáyivi cuan quichaha catyí ra:

—Maestro, sacutaxin chi ñu nyicón chuun —cacatyí ra.

⁴⁰ Nacahan ra Jesús ta catyí ra:

—Tatu ñáyivi ihya ta cu taxin ñu, nyacua nya yuu ta nacana chaa chi, ta sacahnu chi chii —catyí ra Jesús.

⁴¹ Yucuan ta cha cua chaa ra yatyin ri Jerusalén cuan. Ta nanyehe ra Jesús chi ñuu cuan ta quichaha chacu chaa ra vatyí cuihya iñi ra.

⁴² Ta catyí ra:

—Tyehe ta chitó nyoho, ta cutuñi iñi ndo yoso caa cha vaha cha vachi nyaque chi ndo quiñi ihya. Soco xehe xaan ñohó cha chiñi tuñi cuan, ta ña nañihí maa ndo.

⁴³ Soco cuchaa quiñi ña vaha vatyí ra xaan iñi chi ndo cutyihí chacu ra chi ndo. Vatyí tandihí ri ityi cuquichi coyo ra siqui ndo. Ta cucañi tahan ra chihin ndo.

⁴⁴ Ta cucacun ñuhú ra chi ndo ta cucañi ra chi ndo. Ta ni noo yuu yoso nyitahan ta ma sandoo ra. Tyicuan caa cucuvi vatyí ña cuñi ndo nacoto ndo cha quichí Nyoo quichi sacacu ra chi ndo.

Nu tava ñehe ra Jesús chi ra caxico chichi vehe ñuhu cahnu

(Mt. 21.12-17; Mr. 11.15-19; Jn. 2.13-22)

⁴⁵ Tyicuan ta ra Jesús quiñi ra chichi nuquehe vehe ñuhu cahnu. Ta quichaha tava ñehe ra tandihí ra caxicó ta casatá yucuan.

⁴⁶ Ta catyí ra chi ra:

—Nu tutu Nyoo catyí chi vatyí vehe Nyoo, nu chicán tahvi yo chi ra cuví. Soco nyoho sananduví ndo vehe nu nyicú ra suhu —catyí ra.

⁴⁷ Ta tandihí quiñi chahán ra Jesús chisañaha ra chi ñáyivi chichi vehe ñuhu cuan. Soco ra cacuví nuu chi tata sutu, ta ra casacuahá cuenda ley vehe ñuhu, ta ra cacuví nuu chi ñuu cuan, canducú ra cuhva yoso caa ta cahñi ra chi ra.

⁴⁸ Soco ña ñihí maa ra cuhva yoso caa sacuvi ra. Vatyí tandihí ñáyivi ta vaha tyasohó ñu tuhun cahán ra Jesús.

20

Nu ndaca tuhun ra fariseo chi ra Jesús yóo chatachí chi ra vatyí cahán ra nuu ñáyivi
(Mt. 21.23-27; Mr. 11.27-33)

¹ Noo quiñi cuan cha ni ri ca cha sañahá ra Jesús chi ñáyivi chichi vehe ñuhu cahnu, ta cahán ra tuhun yoso caa sacacú Nyoo chí ñu. Ta cha coyo ra cuví nuu chi tata sutu

chihin ra casacuahá cuenda ley vehe ñuhu, ñi ri chihin ra cacuví mandoñi.

² Ta cacatyí ra chi ra:

—Catyi chi ndi ¿yóó cha tyaa tyiño chuun vatyí sacuvun tyehe caa? —catyi ra.

³ Tyicuan ta ra Jesús quichaha catyi ra chi ra:

—Yuhu tucu cua ndaca tuhin noo tuhun chi ndo.

⁴ ¿Yóó cha tachí chi ra Juan vatyí sacondutya ra chi ñáyivi? ¿Atu Nyoo tachí chi ra, o ñáyivi?

⁵ Tyicuan ta cacatyí ra cuan chi ra tahan ra:

—Tatu catyi yo vatyí Nyoo tachí chi ra Juan cuan, cucatyí ra chi yo “Ñáá tuhun ña chinó ñi ndo tuhun cahan ra.”

⁶ Ta tatu catyi yo vatyí ñáyivi tachí chi ra, ñáyivi cahñi ñu chi yo chihin yuu. Vatyí tandíhi ñu, ta cuñi ñu vatyí Nyoo tachí chi ra —cacatyí ra.

⁷ Tyicuan ta cacatyí ra chi ra Jesús vatyí ña cachitó ra yóó cha tachí chi ra Juan vatyí na sacondutya ra chi ñáyivi.

⁸ Tyicuan ta ra Jesús catyi ra chi ra:

—Ñi ri yuhu, ta ma catyi chi ndo yóó cha tachí chii, cha sacuvi tyehe caa.

Nu sañahá ra Jesús vatyí tari ra sahá tyiño ña vaha tyicuan caa cuví ra cha cucahñi chi ra

(Mt. 21.33-44; Mr. 12.1-11)

⁹ Tyicuan ta quichaha catyi ra Jesús noo cuhva ihya chi ñáyivi:

—Noo ra tachí ra cuaha yoho tichaha ndívi nu ñuhú ra. Yahá cuan ta chahá noo ra ñuhú cuan chi suhva ra casaha tyiño. Tyicuan ta naha cuahan ra inga ñuu.

¹⁰ Ta chaá quívi cha ñiñi chiti cuan. Tyicuan ta tachí ra chi noo musu vatyí cuquehen ra suhva chiti cha tahán chi chi ra. Soco cacañi xaan ra casahá tyiño cuan chi musu cuan. Ta sacunuhu ra chi ra chihin nu ndaha nu ndí ra.

¹¹ Tyicuan ta chitoho yoho tichaha ndívi cuan tachí tucu ra chi inga musu. Suri cacañi xaan ra chi ra. Ta cacahan uhvi ra chi ra. Ta natachí ra chi ra. Soco suri ñahri cachaha ra cuiso ra cunuhu.

¹² Tyicuan ta chitoho cuan tachí tucu ra chi inga ra. Soco suri tyicuan caa chinyacuvi tucu ra chihin ra. Ta sañicuehe ra chi ra. Ta tavá ñehe ra chi ra yucuan.

¹³ Yahá cuan ta quichaha catyi chitoho ñuhu cuan: “¿Yoso caa cunyacuvi vityin? Cua tachi chi sehi, ra cha cuñi vavahi. Ta cha nanyehe ra chi ra, vasi casaha ra ñáyivi chi ra, vatyí sehi cuví chi ra.”

¹⁴ Soco cuhva cha cananyehe ra casahá tyiño cuan chi ra, catyi ra chi ra tahan ra: “Ican ra ihya cundoo chihin ñuhú ihya tatu chihi sutu ra. Soco nacahñi yo chi ra. Vatyí ndoo maa yo chihin ñuhú ihya”, catyi ra.

¹⁵ Tyicuan ta tavá ñehe ra chi sehe chitoho ñuhú cuan ityi chata chacu. Ta cachahñi ra chi ra —catyi ra Jesús.

Tyicuan ta catyi ra Jesús chi ñáyivi nyicú cuan:

—¿Ñáá cha cusacuvi chitoho ñuhú cuan chi ra cachahñi chi sehe ra cha cuhva cha cuñi nyoho?

¹⁶ Catyi chi ndo vatyí quichi ra ta cahñi ra chi ra casahá tyiño cuan. Ta cuhva ra ñuhú cuan chi inga ra —catyi ra Jesús.

Ta cuhva cha chiñi ñáyivi tuhun cuan, yuhví xaan ñu cuví. Ta quichaha catyi ñu:

—¿Ña cuñi Nyoo ta cuvi tyicuan caa! —catyi ñu.

¹⁷ Soco ra Jesús nanyehe ra chi ñu ta catyi ra:

—Tyicuan caa cucuvi. Vatyí nyaá nu tutu Nyoo ta catyi chi tuhin tyehe caa:

Yuu cha ña cuñi ra casavahá vehe cotyiño ra,

Ican cuan cuví yuu cha ñiñi ca.

¹⁸ Tari tahnu noo ra cha canacava siqui yuu, tyicuan caa tiví ñu ña cuñi quichaha tuhun cahín. Ta sñn ri, tari taxin nyihi noo ra cha canacava yuu siqui, tyicuan caa cunaa ñu ña cuñi quichaha tuhun cahín —catyi ra Jesús.

¹⁹ Ta ra cacuví nuu chi tata sutu ta ra casacuahá cuenda ley vehe ñuhu catuvi ñi ra vatyí tuhun cha catyi ra Jesús, chi maa ra nañi cuan. Ta cuñi ra catiñ ra chi ra Jesús vatyí cacahñi ra chi ra. Soco ña cachitó maa ra yoso caa. Vatyí yuhví ra chi ñáyivi.

Tuhun cha tyiyahví ñu xuhun chi gobiernu ñuu Roma

(Mt. 22.15-22; Mr. 12.13-17)

²⁰ Tyicuan ta catachí ra chi suhva ra vatyí cunducu nyehe ra chi ra Jesús. Ta casahá ra tyi ra vaha cacuvi ra. Vatyí coto ra ñáá noo tuhun ña vaha cahan ra Jesús tacuhva cuvi

catin ra chi ra. Ta cuhva cuenda ra chi ra chi gobernador.

²¹ Yucuan chaha candaca_{ca} tuhun ra casavaha chii cuan chi ra Jesús:

—Maestro, chitó ndi vatyí vaha tuhun cahún. Ta sañahún cha vaha chi ñáyiví. Ta ñima cuhva iyó ri ñu nyehun soco añima ñu ñandihí. Ta maa ri maa ityi Nyoo sañahún.

²² Catyi chi ndi ¿atu vaha cha tyiyahvi yo cha chicán gobiernu ñuu Roma chi yo, o ña vaha? —catyí ra.

²³ Soco ra Jesús tuví iñi ra vatyí cuñí ra nducu nyehe ra chi ra. Ta catyí ra chi ra:

—¿Ñáá tuhun cuñí ndo nducu nyehe ndo chii?

²⁴ Sañaha ndo noo xuhun chiña chii, na nyehi. ¿Yóó chi nuu ta yóó chi sivi nyaá nu xuhun ihya? —catyí ra.

Tyicuan ta nacahan ra cuan, ta catyí ra:

—Nuu gobiernu, ta sivi ra ñandihí —ca-catyí ra.

²⁵ Tyicuan ta catyí ra Jesús:

—Tu tyicuan caa, cuhva ndo xuhun chiña chi ra cuví gobiernu cuan vatyí chi maa ra tahán chi. Ta cuhva tucu ndo chi Nyoo cha tahán chi chi ra —catyí ra Jesús chi ra.

²⁶ Ta ña cuví maa sandahvi ñaha ra chi ra Jesús chihin tuhun cahán ra nuu ñáyiví. Ta iyo xaan cacuñí ra tuhun cha nacahan ra. Ta taxi ri cuví ra.

Nu cacuñí ra saduceo sandavi ñaha ra chi ra Jesús

(Mt. 22.23-33; Mr. 12.18-27)

²⁷ Cha yaha cuan ta cha_{ca} coyo suhva ra saduceo nu nyaá ra Jesús. Maa ra cuví ra casañahá vatyí ña nandotó ndiyí.

²⁸ Tyicuan ta catyí ra chi ra Jesús:

—Maestro, sando_o ra Moisés tuhun ihya vatyí tatu noo ra chihí ra ta ndoo ñasihí ra, tatu yori sehe ra chiyo_o chihin ña, tahán chi cha tandaha yañi ra chihin ña tacuhva cha ma cunaa tata yañi ra.

²⁹ Soco cuñí ndi coto ndi vatyí chiyo ucha tahan ra chihin yañi ra. Ta ra cha ñihí ca chico_o ñasihí ra, soco yori sehe ñu chiyo, ta chihí ra.

³⁰ Tyicuan ta naquehen ra cha cu uvi suri maa ña cuan. Ta yori tucu sehe ñu chiyo. Ta chihí tucu ra cuan.

³¹ Ta suri tyicuan caa cuví chihin ra cu uñi cuan. Ta suri tyicuan caa cuví chi ndi ucha ra. Ni noo ra ta yori sehe ra chiyo_o chihin ña.

³² Ta nu ndihí tuhun chihí ndihí maa ña.

³³ Ta cuñí ndi coto ndi yóó ra cuví ñasihí chi ña chichi cha ndi ucha tahan ra cuan nu cunandoto ñu nuu Nyoo —cacatyí ra saduceo cuan.

³⁴ Tyicuan ta nacahan ra Jesús, ta catyí ra:

—Ihya ñáyiví, rayí ta ñusihí tandaha ñu.

³⁵ Soco ñu cha tahán chi nandoto inga ñáyiví nu nyacá ñaha Nyoo, ña tandaha ca ñu ta ni ma cuhva ca ñu sehe ñu tandaha.

³⁶ Ta ñahri tuhun chihí iyó nyicuan. Soco cucuvi ñu tari ángel. Ta cuví ñu sehe Nyoo cha ndicha vaha vatyí nandoto_o ñu.

³⁷ Cha ndicha cuví vatyí ra Moisés nu sacoto ra tuhun cha cayu taca iñu cuan, yucuan sacoto ra chi yo vatyí ñu chihí nandoto_o ñu. Vatyí yucuan catyí ra vatyí Sutu Mañi yo Nyoo cuenda ra Abraham, ta Nyoo cuenda ra Isaac, ta Nyoo cuenda ra Jacob, cuví chi ra.

³⁸ Vatyí Nyoo ñima Nyoo cuenda ñáyiví chihí cuví ra. Nyoo cuenda ñu nyitó cuví ra. Vatyí cha cuenda Nyoo tandihí yo ta nyitó añima yo vasi chihí coño ñuhu yo —catyí ra Jesús.

³⁹ Tyicuan ta suhva ra casacuahá cuenda ley vehe ñuhu catyí ra:

—Vaha xaan nacahun Maestro —catyí ra.

⁴⁰ Yucuan ta ña caña ca maa iñi ra candaca tuhun ra ñáá ca tuhun chi ra Jesús.

Cristo vachi ra tata ra David, ta suri cuví tucu ra Sehe Nyoo

(Mt. 22.41-46; Mr. 12.35-37)

⁴¹ Tyicuan ta ndaca_{ca} tuhun ra Jesús chi ñu:

—¿Ñáá tuhun cha catyí ndo vatyí ra Cristo tata ra David vachi ra?

⁴²⁻⁴³ Vatyí suri maa ra David catyí ra nu libru Salmo tyehe caa:

Cahán Suti Nyoo chihin Suti ra Cristo, ta catyí ra chi ra:

“Cunyaa chiyo vahi nyacua nya cuhve chi ra xaan iñi chuun vatyí cuaca chahun siqui ra”, catyí Nyoo chihin yuhu ra David ta cha naha.

⁴⁴ ¿Yoso caa cha ra vachi tata ra David cuví chi ra Cristo, ta suri maa ra David catyí

vatyí Sutu ra cuví chi ra Cristo? —catyí ra Jesús.

Nu catyí ra Jesús vatyí cuaha xaan cuatyí ra casacuahá cuenda ley vehe ñuhu iyó

(Mt. 23.1-36; Mr. 12.38-40; Lc. 11.37-54)

⁴⁵ Tandihí ñáyiví cachiñí ñu tuhun cahán ra Jesús chihin ra cachicá noo chihin ra nu catyí ra tyehe caa:

⁴⁶ —Saha ndo cuenda chi ndo chihin ra casacuahá ley vehe ñuhu. Tahán xaan iñi ra cuihno ra sahma cañi. Ta cuñí ra vatyí saha ndo ñáyiví chi ra nuyahvi ta cuhva ndo nocumi chi ra. Ta nanducú ra tyayu vaha cunyaa ra chichi vehe ñuhu ta nu cuahan ra víco.

⁴⁷ Ta naha chicán tahvi ra chi Nyoo nu tuvi, cha cuñí ra cha catyí ñáyiví tyi vaha ñáyiví cuví ra. Soco suri maa ra tinyaá ra vehe ñu ndahvi cha chihí yí vatyí ña cuví tyiyahvi ñu xuhun cha tavá ra síqui ñu. Yucuan chaha ñihi ca cutachi tuñi Nyoo chi ra —catyí ra Jesús.

21

Noo ofrenda cha chahá noo ñaha síhi cha chihí yí

(Mr. 12.41-44)

¹ Ta nyehe ra Jesús vatyí cuaha xaan ñu tyayí catyihí ra xuhun chichi caja cha nanyaá chichi vehe ñuhu cahnu.

² Ta nyehe tucu ra noo ñaha ndahvi cha chihí yí. Ta tyihí ña uvi tahan ri xuhun cuatyí.

³ Ta catyí ra Jesús:

—Cha ndicha catyí chi ndo vatyí nuu Nyoo cuaha ca tyihí ñaha ndahvi ihya ta ñima ca tandihí ñu tyayí cuan.

⁴ Vatyí cha ndoó ri síqui chi ñu catyihí ñu. Soco ñaha ihya tyihí ña tandihí cha iyó chi ña —catyí ra.

Nu catyí ra Jesús vatyí cucani ñáyiví vehe ñuhu cahnu

(Mt. 24.1-2; Mr. 13.1-2)

⁵ Tyicuan ta suhva ñu ndatuhún ñu tuhun vehe ñuhu cahnu cuan. Ta catyí ñu vatyí tyaquí xaan yuu. Tyaquí xaan tacaá cha chahá ñáyiví. Tyicuan ta quichaha catyí ra Jesús:

⁶ —Coo quiví ta tandihí cha nyehé ndo ihya cutaní. Ni noo yuu ta ma coso ca síqui

tahan. Vatyí cusanacoyo ra xaan iñi chi ndo.

Ñáá ndihí seña cha cucuvi cha ni cumañi ca naa ñáyiví

(Mt. 24.3-28; Mr. 13.3-23)

⁷ Tyicuan ta quichaha candaca tuhun ra chi ra Jesús, ta catyí ra:

—Maestro, ¿ama cucuvi tandihí tuhun cahun ihya? ¿Yoso caa ta coto ndi tatu cha cuyatyin cha naa ñáyiví? —cacatyí ra.

⁸ Tyicuan ta catyí ra Jesús:

—Saha vaha ndo cuenda, coto sandavi ñaha ra chi ndo. Vatyí cuaha xaan ra cuquichi, ta cucotyíño ra sívi, ta cucatyí ra: “Yuhu cuví Cristo ra cha saquichí Nyoo chi. Cha cuñí cunaa ñáyiví”, cucatyí ra. Soco ma cunyicon ndo chi ra. Ta ma chino iñi ndo chi ra.

⁹ Ta quiví ñihi ndo tuhun tyi iyó cuatyí ta cañí tahan ñáyiví, ma nayuhvi ndo. Vatyí tandihí cuan cutahan chi cuvi xihna ca. Soco cumañi ca chaa quiví cha naa ñáyiví.

¹⁰ Ta catyí tucu ra:

—Ñáyiví iyó noo ñuu cucañi tahan ñu chihin ñáyiví inga ñuu. Ta cucoo cuatyí.

¹¹ Ta cutaan nahnu. Ta cucoo tama. Ta cucoo cuehe tandihí ri ityi. Ta cunyehe ñáyiví cuaha xaan cha yuhví andiví. Cuaha xaan seña nahnu cha ña tuhvá ñu nyehe cunyehe ñu.

¹² Soco cha cumañi ca cuvi ihya, cutasi iñi ñáyiví chi ndo. Ta cucacan ñu cuatyí chaha ndo. Vatyí cucutuñi chi ndo ta cucuhva cuenda ñu chi ndo chi tata sutu. Ta cutyihí ñu chi ndo chichi vehe caa. Ta cunyaca ñu chi ndo nuu rey ta nuu ra cacuví tyiño cha catyí yuhu.

¹³ Tyicuan ta cuvi cahan ndo tuhun chihin ñu.

¹⁴ Soco saha ndo cuenda ta ma caca xiñi ndo ñáá tuhun cunacahan ndo chihin ra cuví tyiño cuan.

¹⁵ Vatyí yuhu cucuhve tuhun cunacahan ndo. Ta cucuhve cha chiñi tuñi xiñi ndo. Vatyí ni noo ra xaan iñi chi ndo ta ma cuvi chasaha ra chi ndo chihin tuhun cahán ra.

¹⁶ Soco ñáyiví cunacuhva cuenda ñu chi ndo nuu ñu xaan iñi chi ndo. Nyacua nya sutu ndo ta síhi ndo, yañi ndo, tahan ndo, ta ra tahan ndo cunacuhva cuenda ra chi

ndo chi ñu xaan iñi chi ndo. Ta yihí nyoho cucahñi ñu chi ndo.

¹⁷ Tandihí ñáyivi ta cutasi cuñi ñu nyehe ñu chi ndo cha catyi yuhu.

¹⁸ Soco ni noo ixi xiñi ndo ta ma cunaa.

¹⁹ Tatu ma ndu uvi iñi ndo chii, cucacu añima ndo.

²⁰ Quivi nyehe ndo vatyí nicachico yuhu ñuu Jerusalén ihya nyicú sindaro, coto ndo vatyí cha cuñi chaa quivi cha sanaa ra ñuu ihya.

²¹ Ta ñáyivi cha nyicú ityi Judea, na cono ñu ta na tixehe nuu ñu ityi yucu. Ta ñu nyicú ñuu Jerusalén ihya, na quita ñu. Ta ñu nyicú nu chiqui, ma ndichi ñu ñuu ihya.

²² Vatyí yucuan quivi cutachi tuñi Nyoo chi ñáyivi ñuu ihya. Vatyí cuchino cava tandihí cuhva catyí maa nu tutu Nyoo.

²³ Ta ndahvi ñusihí cha ñohó sehe quivi cuan. Ta ndahvi ñu cha iyó cha lee sehe cha ni chaxín ca. Vatyí cuaha xaan tündoho cunyehe ñu ta tandihí ñáyivi. Vatyí cuxaan xaan Nyoo chihin ñáyivi ñuu Jerusalén ihya.

²⁴ Sindaro cucahñi ra chi suhva ñáyivi chihin mityi ra. Ta suhva ñu cutiin ra ta cunyaca ra chi ñu vehe caa inga ñuu. Ta ñáyivi cha ñima ñu Israel cuví, cucuaca chaha ñu Jerusalén nyacua nya quivi cha catyí maa Nyoo.

Yoso caa cuquichi Ray# cha quichi nya gloria inga chaha

(Mt. 24.29-35, 42-44; Mr. 13.24-37)

²⁵ Tyicuan ta cuaha cha iyo cunyehe ñáyivi nu ñanyii, ta nu yoo, ta nu tiño. Ta ihya siqui ñuhu ñáyivi cunayuhvi ñáyivi chihin cha iyo cunacatyin tyañuhu.

²⁶ Ta cucoña ñu chihin cha yuhví ñu cha chicá xiñi ñu ñáá ndihí cha cua cuvi ihya siqui ñuhu ñáyivi. Vatyí nyacua nya cha iyó andivi cunacanda.

²⁷ Tyicuan ta cunyehe ñu chi yuhu Ray# cha quichí nya gloria vachi chichi noo vico tyaqui chihin tunyee iñi Nyoo, ta chihin cha cahnu cuví ra.

²⁸ Ta cuhva cha quichaha tuhun ihya, sandun# ndo iñi ndo ta cusii cuñi ndo vatyí numi xaan ta cucacu ndo —catyí ra.

²⁹ Tyicuan ta chaha ra Jesús noo cuhva ihya, ta catyí ra:

—Saha ndo cuenda noo yutun cha nañi higuera, o ñáá nonga yutun.

³⁰ Tatu cha cua cuyatyin cha coon savi cha nduyutya numa tun.

³¹ Ta tyicuan caa tucu nyoho, tatu cha nyehe ndo vatyí cha quichaha tandihí tuhun cha catyí chi ndo, coto ndo vatyí cha cuyatyin quivi cha cunyaca ñaha Nyoo siqui ñuhu ñáyivi ihya.

³² Soco catyí chi ndo vatyí tuhun ihya cucuvi cha ni ri ca cha iyó ñáyivi.

³³ Ta coo quivi cucunaa andivi ta ñuhu ñáyivi, soco tuhun cahán yuhu, tyicuan ri cucuvi tari cuhva catyí.

³⁴ Ta saha ndo cuenda chi ndo coto ndundava añima ndo chihin vicio, ta coho xaan ndo ndixi, o caca xaan iñi ndo tuhun tundoho ñáyivi ihya. Ta coto sana iñi ndo ta chaa quivi quichí yuhu ta quichi tundoho siqui ndo.

³⁵ Vatyí tyicuan caa cucuvi chi tandihí ñáyivi iyó siqui ñuhu ñáyivi. Sana iñi ñu ta tari noo cha cua nacasi Nyoo nu ñohó ñu ta ma cuvi quita ñu.

³⁶ Soco nyoho cuatu tuhva ri ndo. Cacan tahvi ndo chi Nyoo tandihí quivi, tacuhva tyinyee ra chi ndo. Ta ma cunaa ndo quivi cuan, tacuhva cuvi chaa vaha ndo nuu yuhu Ray# cha quichi nya gloria —catyí ra Jesús.

³⁷ Ta cha ñucahñu sañahá ra Jesús chi tandihí ñáyivi chichi vehe ñuhu cahnu. Ta cha cha cuaa chahán ra yucu Olivo.

³⁸ Ta tandihí ñáyivi chaa coyo ñu chichi vehe ñuhu cahnu ndihí ñaha ri. Vatyí cuiñi ñu tuhun cahán ra.

22

Nu cua xico ra Judas Iscariote chi ra Jesús

(Mt. 26.1-5, 14-16; Mr. 14.1-2, 10-11; Jn. 11.45-53)

¹ Ta cha nyaña yatyin quivi cha coo vico pascua vico nu tuhva ñu chachi pan cha ñahri yuchan iya yihí chihin.

² Ta ra cacuví nuu chi tata sutu chihin ra casacuahá cuenda ley vehe ñuhu, nducú xaan ra cuhva yoso caa ta cacahñi ra chi ra Jesús. Soco cayuhví ra chi ñáyivi.

³ Tyicuan ta quihvi cuihna chi ra Judas cha catyí ñáyivi Iscariote chi. Ta maa ra

cuví noo ra cha uchi uvi tahan ra cha nacachi ra Jesús.

⁴ Ta ra cuan, chahan ra chi cahan ra chihin ra cuví nuu chi tata sutu, ta chihin ra cuví nuu chi ra sahá cuenda vehe ñuhu cahnu. Ta candatuhun tahan ra yoso caa cunacuhva cuenda ra chi ra Jesús.

⁵ Ta ra cuan sii xaan cacuví chi ra. Ta tyaa ra cuhva vatyí cuhva ra xuhun chi ra Judas.

⁶ Ta ra Judas ndoo ra vaha. Ta quichaha nducu ra cuhva yoso caa cuhva cuenda ra chi ra Jesús chi tata sutu cuan, cuhva cha yori ñáyivi nyicú chihin ra.

Nu cuxiñi ra Jesús chihin ra cachicá noo chihin ra

(Mt. 26.17-29; Mr. 14.12-25; Jn. 13.21-30; 1 Co. 11.23-26)

⁷ Ta chaa quivi cha cuví vico nu chachí ñu pan cha ñahri yuchan iya yihí. Ta suri quivi cuan tuhvá ñu chahñi ñu noo mbee luhlu cha vico pascua cuan. Vatyí cachi ñu chi ti.

⁸ Ta ra Jesús tachí ra chi ra Pedro chihin ra Juan, ta catyí ra chi ra:

—Cuahan ndo cua sanduvaha ndo mbee cha cuxiñi yo —catyí ra.

⁹ Tyicuan ta quichaha ndaca tuhun ra chi ra:

—¿Nya cuñún cha sanduvaha ndi cha cuxiñi yo? —cacatyí ra.

¹⁰ Tyicuan ta catyí ra Jesús chi ra:

—Cuahan ndo chichi ñuu. Ta yucuan cunañihi ndo chi noo ra nyisó noo quiyi ndutya. Ta cuahan ndo chata ra nyacua nya nu quihvi ra chichi vehe.

¹¹ Ta catyí ndo chi chitoho vehe cuan: “Ra Sacuaha, cuñí ra coto ra nya nyaá cuarto nu sanduvaha ra cha cuxiñi ra chihin ra cachicá noo chihin ra, vatyí casanducahnu ra vico pascua.” Tyicuan caa catyí ndo chi ra.

¹² Tyicuan ta maa ra cuan cusañaha ra cuarto cahnu ityi síqui nu cu uvi piso chi ndo. Ta cha yahá nduvii. Ta yucuan sanduvaha ndo cha cuxiñi yo —catyí ra chi ra.

¹³ Tyicuan ta cuahan coyo ra. Ta nañihi ra tandihi tari cuhva catyí ra Jesús. Tyicuan ta casanduvahá ra cha cuxiñi ra cha vico pascua cuan.

¹⁴ Yucuan ta cha chaá cuhva cha cuxiñi ra Jesús ta tandihi apóstol ra, cachicunyicu ra yuhu mesa.

¹⁵ Tyicuan ta ra Jesús quichaha catyí ra:

—Cuñí xain cuxiñi in caa ri chihin ndo cuenda vico pascua ihya cha ni ri ca cha cumañi ca cunyehi tundoho ta cúvi.

¹⁶ Vatyí nya ri ca ihya cua cachi ta cucúvi. Yucuan ta cachi tiqui soco nya nu nyacá ñaha Nyoo —catyí ra.

¹⁷ Tyicuan ta quehen ra noo vasu vinu. Ta nacuhva ra tyiahvi nyoo chi Nyoo, ta sayahá ra chi tandihi ra nyicú chihin ra. Ta quichaha catyí ra:

—Quehen ndo ihya. Ta coho ndo suhva suhva.

¹⁸ Vatyí catyí chi ndo vatyí ma coho que vinu tichaha ndivi nyacua nya quichi cha nyacá ñaha Nyoo ñayivi ihya —catyí ra.

¹⁹ Ta yahá cuan ta quehen ra pan. Ta nacuhva ra tyahvi nyoo chi Nyoo. Ta tahvi sava ra. Ta chahá ra chi ra cachicá noo chihin ra. Ta quichaha catyí ra:

—Ican ihya cuví coñe. Vatyí cha catyí ndo ta cua cuhva cuende chii ta cúvi. Tyicuan ri nichohon iñi ndo chii ta cuxiñi ndo tyehe caa —catyí ra.

²⁰ Ta cha yahá cuxiñi ra, tyicuan ta quehen tucu ra vaso vinu tichaha ndivi, ta quichaha catyí ra:

—Chihin ihya natyihí tahan Nyoo tuhun cha chihin ndo vityin. Vatyí vinu cha yihí chichi vaso ihya, tari ñiñi cuví. Ta cha catyí nyoho ta cucati ñiñi. Vatyí cucúvi cha catyí ndo.

²¹ ‘Soco vityin, ra cha cua nacuhva cuenda chii chi ra xaan iñi chii, in ri yoso ndaha ra chihin ndahi nu mesa ihya.

²² Vatyí yuhu Rayi cha quichi nya gloria cua cuví chii tari cuhva cha nyaá maa tyi cuví chii. Soco jndahvi ra ndahvi, ra cha cunacuhva cuenda chii! —catyí ra Jesús.

²³ Tyicuan ta ra cachicá noo chihin ra Jesús quichaha candaca tuhun ra chi tahan ra, nya ra cuví ra cua nacuhva cuenda chi ra chi ra xaan iñi chi ra.

Nu candatuhún ra cachicá noo chihin ra Jesús yoo ra cahnu ca cuví

²⁴ Yahá cuan ta quichaha candatuhun ra cachicá noo chihin ra Jesús nya ra cahnu ca cuví.

²⁵ Soco ra Jesús catyí ra:

—Chitó nyoho vatyí ra nyacá ñaha chi ñáyivi iyó síqui ñuhu ñayivi, ñihi xaan yosó

ra siqui ñu. Ta cacuñí ra vatyí catyí ñáyivi tyi tyinyee ra chi ñu.

²⁶ Soco nyoho ña tahán chi sacuvi ndo tari sacuví ra cuan. Vatyí tatu cuñí ndo cuví ndo ra cuví nuu, tahán chi sacuvi ndo tyiño nuu ñáyivi. Vatyí tatu sacuví ndo tyiño nuu ñáyivi, ican ndo cuví ra cuví nuu.

²⁷ Vatyí ihya siqui ñuhu ñáyivi ra cuví nuu cuví ra cha ña sahá tyiño. Ta nyaá ra yuhu mesa ta musu ra sacuví ra tyiño nuu ra. Soco yuhu ra cuví nuu cuví, ta sacuví tyiño nuu ndo.

²⁸ 'Soco nyoho tyicuan ri ndihi ndo chihin, tandihi chaha cha nyehí tundoho.

²⁹ Yucuan chaha, yuhu चाहí noo nu cunyaca ñaha ndo tari cha chaha Suti chii cha cunyaca ñahi.

³⁰ Vatyí cucachi ndo cucho ndo yuhu mesa chihin nya nu nyacá ñahi. Ta yucuan cunyaa ndo nu tyayu tyaqui. Ta cunyaca ñaha ndo chi ndi uchi uvi tahan ityi ñáyivi vachi tata ra Israel.

Catyí ra Jesús vatyí cua catyí ra Pedro vatyí ña ñohó nuu ra chi ra

(Mt. 26.31-35; Mr. 14.27-31; Jn. 13.36-38)

³¹ Tyicuan ta catyí ra Jesús chi ra Pedro:

—Nyehe vahun, yoho Simón. Vatyí cuihna, ra nañí Satanás, cha chicān ra chi Nyoo na cuhva ra ityi chi ra vatyí quisi ñihno ra chi ndo tari naquisi ñihno yo trigu, tacuhva ndu uvi iñi ndo chi Nyoo.

³² Soco chicān xain chi Nyoo cha catyun, vatyí ma ndihi cha chinó iñun chi ra. Ta quivi ndu uvi iñun cuatyun ta na chino vaha iñun chii cutyinyeun chi ra tahun cha ma sandihi ra cha cachino iñi ra chii —catyí ra Jesús chi ra Simón.

³³ Ta ra Simón catyí ra chi ra:

—Sutu Mañi yuhu, cha iyó vahi vatyí cuhin chuhun vasi vehe caa, vasi tuhun chihi —catyí ra.

³⁴ Tyicuan ta catyí ra Jesús chi ra:

—Pedro, catyí chuun vatyí vityin cha ni ri ca cha cumañi ca cuacu chaa loho, yoho cha uñi tahan chaha cucatyun vatyí ña ñohó nuun chii —catyí ra Jesús chi ra.

Nu cha cuñí chaa cuhva cha cunacuhva cuenda ra Judas chi ra Jesús

³⁵ Tyicuan ta ndaca tuhun ra Jesús chi ra cachicá noo chihin ra, ta catyí ra:

—Ñicohon iñi ndo quivi cha tachí chi ndo vatyí cucahan noo ndo nuu ñáyivi ta ñahri nyiso ndo, ni ri cha cachi ndo, ni ri xuhun, ni ri sahma ndo. ¿Atu chiyo cha cumañi chi ndo quivi cuan? —catyí ra Jesús.

Tyicuan ta canacahan ra, ta catyí ra:

—Ñahri cha cumañi chi ndi.

³⁶ Tyicuan ta quichaha catyí ra Jesús chi ra:

—Soco vityin, tatu iyó cha cachi ndo ta iyó xuhun ndo, cuiso ndo. Ta tatu ñahri mityi ndo, xico ndo noo sahma ndo ta sata ndo.

³⁷ Vatyí catyí chi ndo, vatyí tandihi tuhin cha nyaá nu tutu Nyoo cuchino cava vatyí tyehe caa catyí chi: “Sahá ñu tuhun tyi cuví ra noo ra quiñi iyó.” Tyicuan caa catyí tuhin nu tutu Nyoo. Ta tandihi cuan cuchino cava —catyí ra.

³⁸ Tyicuan ta quichaha catyí ra cachicá noo chihin ra:

—Ihya nyaá uvi tahan mityi —catyí ra.

Tyicuan ta catyí ra Jesús:

—Cha iyó vaha ri —catyí ra.

Nu chicān tahvi ra Jesús chi Nyoo Getsemani

(Mt. 26.36-46; Mr. 14.32-42)

³⁹ Tyicuan ta quita ra Jesús vehe cuan. Ta cuahan ra nya yucu Olivo. Tari cuhva tuhva maa ra chahan. Ta ra cachicá noo chihin ra cuahan coyo ra chata ra.

⁴⁰ Ta cuhva cha chaa ra yucuan, quichaha catyí ra chi ra cachicá noo chihin ra:

—Cacan tahvi ndo chi Nyoo tacuhva ma cuvi chasaha cuihna chi ndo.

⁴¹ Tyicuan ta cuahan ra Jesús cha cañi ca, tari cuhva cha chaa noo yuu tatu tuchi yo. Yucuan ta chicuñi chiti ra. Ta quichaha cahan ra chihin Nyoo,

⁴² ta catyí ra:

—Sutu Mañi yuhu, tu yoho ta cuñún, cuhva cha ma nyehi tundoho ihya. Soco ma cuvi tari cuhva cha cuñí mai. Soco na cuvi tari cuhva cha cuñí maun —catyí ra.

⁴³ Tyicuan ta tuví noo ángel, vatyí cuhva ca ra tunyee iñi chi ra.

⁴⁴ Ta cha ni ri ca cha nyehé xaan ra Jesús tundoho vatyí cuihya vavaha iñi ra, ta ñihi ca chicān tahvi ra chi Nyoo. Ta cuaha xaan

tyeen ra quitá ta canacoyó nu ñuhú, ta tari caa niñi caa.

⁴⁵ Yucuan ta nducuita ra cha ndihí cahan ra chihin Nyoo. Ta cuanuhu ra nu canyicu tandihí ra cachicá noo chihin ra. Ta nyehe ra vatyí caquixí ra, cha cuenda vatyí cacuihya xaan iñi ra, ña cacunyeē ra ñumahna ta caquixi ra.

⁴⁶ Tyicuan ta quichaha catyí ra Jesús chi ra:

—¿Ñáá tuhun cha caquixí ndo? Nducuita ndo. Ta cācan tahvi ndo chi Nyoo, tacuhva cha ma cuví chasaha cuihna chi ndo.

Nu chaha cuenda ra Judas chi ra Jesús chi ra xaan iñi chi ra

(Mt. 26.47-56; Mr. 14.43-50; Jn. 18.2-11)

⁴⁷ Ni cahan ca ra Jesús tuhun ihya, ta cuaha xaan ra cachaa coyo. Ta ityi nuu vachi ra Judas, noo ra chicá noo chihin ra Jesús cuví ra. Ta tuhva ra chi ra Jesús vatyí cua tyayuhu ra xitin ra.

⁴⁸ Tyicuan ta catyí ra Jesús chi ra:

—Judas, ¿atu chihin cha cua tyayuhun chii, nacuhvá cuendon chi yuhu, Rayñi cha quichi nya gloria, chi ra xaan iñi chii? —catyí ra Jesús.

⁴⁹ Ta ra canyicú chihin ra Jesús quichaha ndaca tuhun ra chi ra:

—Sutu Mañi yuhu, ¿atu sañicuehe ndi chi ra chihin mityi? —catyí ra.

⁵⁰ Yucuan ta noo ra, chahnya ra soho chiyo vaha noo ra cha cuví musu ra cuví nuu chi tata sutu.

⁵¹ Soco ra Jesús catyí ra chi ra:

—Saña ndo. Vaha ri —catyí ra.

Tyicuan ta naquehen ra Jesús soho ra cuan. Ta natyaa ra, ta nduvaha.

⁵² Ta ra cacuví nuu chi tata sutu chihin ra cacuví nuu chi ra sahá cuenda vehe ñuhu, chihin ra cacuví mandoñi, ican ra cuví ra quichi coyo vatyí catiñ ra chi ra Jesús. Ta quichaha catyí ra Jesús chi ra:

—¿Atu vachi coyo nyoho siqui chihin cha xaan ta chihin yutun tari cha vatyí minoo ra suhu cuví yuhu sahá ndo?

⁵³ Ndiquivi chinyaj chichi vehe ñuhu cahnu, ¿ñáá tuhun ña cuví tiñ ndo chii? Soco vityin chaa cuhva cha ñaa iñi vatyí ra ña vaha nyacá ñaha. Yucuan chaha vachi tiñ ndo chii.

Nu catyí ra Pedro vatyí ña ñohó nuu ra chi ra Jesús

(Mt. 26.57-58, 69-75; Mr. 14.53-54, 66-72; Jn. 18.12-18, 25-27)

⁵⁴ Tyicuan ta catiñ ra chi ra Jesús. Ta cua nyaca ra chi ra nya vehe ra cuví nuu chí tata sutu. Ta ra Pedro nyasava ri cuahan ra chata ra.

⁵⁵ Ta cha chaa coyo ra vehe ra cuví nuu chi tata sutu cuan, casanatahan ra ñuhu nuquehe. Ta chicunyicú cutya ra nicachico ri nu cayú ñuhu cuan. Ta chicunya tu cu ra Pedro mahñu ñáyivi cuan.

⁵⁶ Ta cuhva cha ndundichin cha cayu ñuhu cuan, tyicuan ta noo ñaha cha cuví musu tata sutu cuan nanyehe ña chi ra. Ta quichaha catyí ña:

—Ra ihya chicá noo ra chihin ra cuan —catyí ña.

⁵⁷ Soco ra Pedro catyí ra:

—Yuhu ña ñohó nui chi ra cuan.

⁵⁸ Tañi ri cuan ta nyehe tucu inga ra chi ra, ta catyí ra:

—Yoho, ra cuenda ra cuan cuvún —catyí ra.

Ta ra Pedro catyí ra:

—Ñima —catyí ra.

⁵⁹ Ta cha yaha noo ora, ta nanyehe tucu inga ra chi ra ta catyí ra chi ra tahan ra:

—Cha ndicha cuii vatyí ican ra ihya cuví noo ra cha chicá noo chihin ra cuan. Vatyí suri ra Galilea cuví ra —catyí ra.

⁶⁰ Tyicuan ta catyí ra Pedro:

—Ña chité ñáá tuhun cahún —catyí ra.

Ta caa cuhva ri cuan, ni cahan ca ra Pedro tuhun cuan, ta chacu chaa ri noo loho.

⁶¹ Tyicuan ta ra Jesús nanyehe ra nuu ra Pedro. Ta ra Pedro nicohon iñi ra tuhun cha catyí ra Jesús chi ra: “Cuhva cha ni cumañi ca cuacu chaa loho, yoho cha catyun tyi ña ñohó nuun chii uñi tahan chaha.”

⁶² Tyicuan ta quitá ra Pedro ityi chata vehe. Ta chacu vavaha ra cha cuihya iñi ra.

Nu cachacú nyaa ra chi ra Jesús ta cacañi ra chi ra

(Mt. 26.67-68; Mr. 14.65)

⁶³ Tyicuan ta ra casahá cuenda chi ra Jesús, quichaha chacu nyaa ra chi ra. Ta cacañi ra chi ra.

⁶⁴ Cachahñi ra sahma nuu ra, ta quichaha cacatu ra nuu ra. Ta cacatyí ra chi ra:

—Nacoto yóo cha cañi chuun —cacatyí ra chi ra.

⁶⁵ Ta cuaha vavaha ca cha cacahan ra chi ra.

Nu ndacá tuhun ra chi ra Jesús tatu Sehe Nyoo cuví chi ra

(Mt. 26.59-66; Mr. 14.55-64; Jn. 18.19-24)

⁶⁶ Ta cha cundichin inga quivi cuan. Ta candu ñin ri ra chahnu ñuu cuan chihin ra cuví nuu chi tata sutu, ta ra casacuahá cuenda ley vehe ñuhu. Ta caquehen ra chi ra Jesús. Ta cuahan coyo ra chihin ra nya nu cuví junta cahnu. Ta quichaha candaca tuhun ra chi ra:

⁶⁷ —Catyí chi ndi ¿atu ra Cristo ra cha saquichi Nyoo cuvún? —catyí ra chi ra.

Ta ra Jesús nacahan ra, ta catyí ra:

—Tatu catyí chi ndo vatyí ican, ma chino iñi ndo.

⁶⁸ O tatu ndaca tuhun ñáá cha ndaca tuhun chi ndo, ma nacahan ndo ni ma saña ndo chii.

⁶⁹ Soco vityin ta ityi nuu ca yuhu Rayi cha quichi nya gloria cucunyai chiyo vaha Nyoo ra cha iyó tandihí tunyee iñi chi —catyí ra.

⁷⁰ Tyicuan ta tandihí ra quichaha ndaca tuhun ra chi ra:

—Tu tyicuan caa, Sehe Nyoo cuví chuun —catyí ra.

Tyicuan ta nacahan ra Jesús ta catyí ra:

—Suri maa ndo catyí tyi ican cuví.

⁷¹ Tyicuan ta quichaha cacatyí ra cuan chi ra tahan ra:

—Nyehe nuu. Yuhu maa ra quita. Ña niñi ca cha tava yo cha ndaa. Vatyí suri maa yo chiñi —cacatyí ra.

23

Nu nyehe ra Pilato vatyí ñahri cuatyí ra Jesús

(Mt. 27.1-2, 11-14; Mr. 15.1-5; Jn. 18.28-38)

¹ Tyicuan ta tandihí ra nducuita ra. Ta cua nyaca ra chi ra nya nu nyaá ra Pilato, ra cuví gobernador.

² Tyicuan ta quichaha cacatyí ra chi ra Pilato:

—Ra ihya, sativí ra chi ñáyivi chihin cha cahán ra nuu ñu, ta catyí ra vatyí ña vaha tyiyahvi ndi xuhun chi gobiernu ñuu Roma. Ta ñin ri catyí ra vatyí ra Cristo ra cha saquichi Nyoo vatyí cuví ra rey cuví ra —cacatyí ra.

³ Tyicuan ta ra Pilato quichaha ndaca tuhun ra chi ra Jesús, ta catyí ra:

—¿Atu ican yoho cuví Rey cuenda ñu Israel? —catyí ra.

Ta nacahan ra Jesús, ta catyí ra:

—Ican, suri maun catyí.

⁴ Tyicuan ta quichaha catyí ra Pilato chi ra cuví nuu chi tata sutu ta chi ñáyivi:

—Ñahri cuatyí ra ihya —catyí ra chi ñu.

⁵ Soco xaan ca nanduvi ñu. Ta quichaha cacatyí ñu:

—Cahnu xaan cuatyí ra. Cuaha xaan tisihi chaha ra, vatyí cahán ra nuu ñáyivi. Cha xihna ri quichaha cahan noo ra nuu ñáyivi ityi Galilea. Ta nicañi maa ityi vachi ra cahán ra chihin ñáyivi nyacua nya chaa ra Judea ihya —catyí ñu.

Nu tachí ra Pilato chi ra Jesús nuu ra Herodes

⁶ Cuhva cha chiñi ra Pilato tuhun ihya, quichaha ndaca tuhun ra tatu ra Galilea cuví ra Jesús.

⁷ Ta catyí ñáyivi chi ra vatyí ican. Tyicuan ta sacuhun ra Pilato chi ra nya nu nyaá ra Herodes. Vatyí ra Herodes cuví ra gobernador nicañu Galilea. Soco quivi cuan ñohó ra ñuu Jerusalén.

⁸ Ta cuhva cha nanyehe ra Herodes chi ra Jesús, si xaan cuví chi ra. Vatyí cha naha xaan cuñi ra nyehe ra chi ra. Vatyí ñihí ra tuhun vatyí cuaha xaan milagru sacuví ra. Ta cuñi xaan ra nyehe ra noo milagru cha sacuví ra Jesús.

⁹ Ta cuaha xaan tuhun ndaca tuhun ra chi ra. Soco ra Jesús ña nacahan maa ra.

¹⁰ Ta yucuan canyicú tucu ra cuví nuu chi tata sutu ta ra casacuahá ley vehe ñuhu. Ta catyaa xaan ra cuatyí siqui ra.

¹¹ Tyicuan ta ra Herodes chihin sindaro cuenda ra chacu nyaa ra chi ra. Ta sandihvi noo ra noo sahma yahvi ta tyaqui chi ra, tari cha tuhvá rey ñihnó. Tyicuan ta nat-achí ra Herodes chi ra inga chaha nuu ra Pilato.

12 Ta quiví cuan ra Pilato chihin ra Herodes nduvaha iyó ra chihin tahan ra. Vatyí nu quichi chí, ña cuví canyehe ra chí tahan ra.

Nu cutuñí chí ra Jesús vatyí cucúvi ra
(Mt. 27.15-26; Mr. 15.6:15; Jn. 18.39—19.16)

13 Tyicuan ta ra Pilato sandu ñin ri ra chí ra cuví nuu chí tata sutu, ta chí ra cuví tyiño, ta chí ñáyivi ñandíhi.

14 Ta catyí ra chí ñu:

—Nyoho quichí nyaca ndo chí ra ihya chí. Ta catyí ndo vatyí satíví ra chí ñáyivi. Soco yuhu cha sacutuñí chí ra nuu ndo. Ta ñahri cuatyí ra ñañihí tari cuhva catyí ndo.

15 Ta ní ri ra Herodes ña ñañihí ra ní noo cuatyí ra. Yucuan chaha sandichí ra chí ra inga chaha nu nyai. Nyehe ndo vatyí ñahri cha sacuví ra, ñahri cuatyí ra. Ta ña tahán chí cha cúvi ra.

16 Yucuan chaha cua tachi tuñi ri chí ra. Yaha cuan ta sañe chí ra —catyí ra Pilato.

17 Tyicuan caa catyí ra Pilato vatyí cha ní ri ca cha iyó vico cuan, tahán chí cha saña ra noo ra ñohó vehe caa, tari cuhva cha tuhva maa ra.

18 Soco tandíhi ñu ñin ri nacanachaa ñu, ta catyí ñu:

—Cahñi chí ra Jesús. Ta saña chí ra Barrabás —catyí ñu.

19 Ta ra Barrabás cuan ñohó ra vehe caa cha cuenda cha cuñí ra nacanda ra síqui ra cuví tyiño. Ta ñin ri chahñí ra chí ñáyivi.

20 Ta ra Pilato cuñí ra saña ra chí ra Jesús. Ta quichaha catyí ra chí ñáyivi cuan inga chaha vatyí cusaña ra chí ra.

21 Soco ñáyivi chaa ca caná chaa ñu, ta catyí ñu:

—Na cúvi ra nu cruzi.

22 Tyicuan ta cha cu uñi chaha catyí ra Pilato chí ñu:

—Soco ¿ñáá cha ña vaha sacuví ra ihya? Nyehí tyi ña tahán chí cúvi ra. Tacuhva cutachi tuñi ri chí ra, ta sañe chí ra —catyí ra Pilato.

23 Soco ñáyivi caná chaa ca ñu, ta catyí ñu vatyí tyaa ra chí ra nu cruzi. Ta cuví chasaha ñu. Vatyí maa ñu ta ra cacuví nuu chí tata sutu caná chaa ñu.

24 Tyicuan ta sacuví ra Pilato tari cuhva catyí ñu.

25 Ta tari cuhva catyí ñáyivi, saña ra chí ra Barrabás cha ñohó vehe caa cha cuenda cha cuñí ra nacanda ra síqui ra cuví tyiño ta cha cuenda cha chahñí ra. Ta sacuví ra chí ra Jesús tari cuhva catyí ñu.

Nu cua cunyaa ra Jesús nu cruzi
(Mt. 27.32-44; Mr. 15.21-32; Jn. 19.17-27)

26 Yucuan ta quehen sindaro chí ra Jesús. Ta cuahan ra chihin ra. Ta catí ñin tucu ra chí noo ra Cirene cha ñañí Simón. Ra cuan ní cua ndichi ra cha chahan ra nu chiquí. Ta saniñi sindaro chí ra, na cuiso ra cruzi ra Jesús ta cuahan ra chata ra.

27 Ta cuaha xaan ñáyivi cuahan chata ra. Ta cuaha xaan ñusihí chacú chaa ñu cha cuihya iñi ñu cha catyí ra.

28 Soco ra Jesús nanyehe ra chí ñu. Ta quichaha catyí ra chí ñu:

—Tandíhi nyoho ñusihí ñuu Jerusalén, ma cuacu ndo cha catyí yuhu. Cuacu ndo, soco cha catyí maa ndo ta cha catyí sehe ndo.

29 Vatyí cuquichi quiví nu cunyehe xaan ndo tundoho. Ta cucahan ñáyivi chihin tandíhi ndo cha cuví ndo ñusihí cha yori sehe ndo iyó. Ta cucatyí ñu chí ndo: “Vaha xaan vatyí yori sehe ndo iyó vatyí cuaha xaan tundoho nyehé yo vityin”, cucatyí ñu chí ndo.

30 Vatyí quiví cuan cucuñí ñu vatyí na canacoyo yucu síqui ñu tacuhva sahvi chí chí ñu.

31 Vatyí tatu tyehe caa sacuví ñu chihin yuhu cha ñahri cuatyí. Yaha ca cuhva cunyacuví tucu ñu chihin maa ndo cha iyó cuatyí ndo —catyí ra Jesús.

32 Ta quehen tucu sindaro cuan chí uvi tahan ra quiñi iyó, vatyí cahñi ra chí ra ñin ri chihin ra Jesús.

33 Tyicuan ta cachaa ra noo nu ñañi Nu Cuví Yiquí Xiñi Ndíyi. Ta yucuan chicatacaá ra chí ra Jesús nu cruzi. Ta tyicuan caa tucu chinyacuví ra chihin ñinduvi tahan ra iyó cuatyí cuan. Noo ra chitacaá ra nuu cruzi chiyo vaha ra Jesús. Ta nonga ra cuan chitacaá ra nuu cruzi chiyo satyin ra.

34 Ta cuhva cha tacaá ra Jesús nu cruzi cuan, quichaha catyí ra:

—Sutu Mañi yuhu, saha tucahnu iñi chí ra. Vatyí ña chitó ra ñáá cha nyacuví ra chihin —catyí ra.

Tyicuan ta sindaro cuan chahan ra noo sihva chihin sahma ra Jesús. Nya ra saha ganaa caquehen ra sahma cuan.

³⁵ Ta ñáyivi tayucú ñu nyehé ñu. Ta nyacua nya ra cacuví nuu cuenda vehe ñuhu, ta chacú cuehe ra nyehé ra chi ra Jesús. Ta catyí ra:

—Sacacu ra chi inga ñáyivi. Soco vityin na sacacu tucu ra chi maa ra, tatu ndicha cha Cristo, ra cha saquichi Nyoo, cuví ra —cacatyí ra.

³⁶ Ta suri cahán cuehe tucu sindaro chi ra. Ta catuhva ra chi ra. Ta chaha ra vinu iya coho ra.

³⁷ Ta quichaha cacatyí ra chi ra:

—Tatu rey cuenda ñáyivi Israel cuvún. Sacacu chuun —cacatyí ra.

³⁸ Ta siqui cruzi ityi xiñi ra nyaá noo nu tyaá ra chihin griego, chihin latín, ta chihin hebreo. Tyehe caa quita cahán letra cuan: “Ican ra ihya cuví Rey cuenda ñu ñuu Israel” —catyí nu vitu cuan.

³⁹ Ta noo ra quiñi iyó cha tacaá xiin ra Jesús, quichaha cahan ra chihin ra, ta catyí ra:

—Tatu ndicha cha Cristo cuvún, sacacu chuun. Ta sacacu chi ndi ñandihí —catyí ra.

⁴⁰ Soco inga ra cuan catyí ra chi ra:

—¿Atu ña yuhvún chi Nyoo? Vatyí nyehún suri tundoho cha nyehé maa ra vityin.

⁴¹ Maa yo nyehé yo tundoho ihya vatyí iyó cuatyí yo. Soco ra ihya ñahri cuatyí ra iyó —catyí ra.

⁴² Tyicuan ta quichaha catyí ra chi ra Jesús:

—Yoho Jesús, ñicohon iñun tuhin quívi cunyaca ñahun —catyí ra.

⁴³ Tyicuan ta ra Jesús catyí ra chi ra:

—Cha ndicha catyí chuun vatyí tañi ri vityin ta cunyaun chihin nya paraíso nu nyaá añima ñu chinó iñi chi Nyoo —catyí ra Jesús chi ra.

Nu chihí ra Jesús

(Mt. 27.45-56; Mr. 15.33-41; Jn. 19.28-30)

⁴⁴ Tyicuan ta ñáá cuhva ora quichaha nduña ñáyivi, nyacua nya caa uñi cha cha iñi.

⁴⁵ Vatyí nduña ñanyii. Ta sahma cha tacaá chichi vehe ñuhu cahnú cuan, tahnú sava.

⁴⁶ Tyicuan ta quichaha cana chaa ra Jesús:

—Sutu Mañi yuhu, natyaí añime chichi ndahun —catyí ra.

Ta cuhva cha catyí ra tuhun ihya, ta chihí ra.

⁴⁷ Ta ra cuví nuu chi sindaro cuan, nyehé ra tandihí cha cuví cuan. Ta sacahnú ra chí Nyoo, ta catyí ra:

—Ñahri ndicha cuii cuatyí ra iyó —catyí ra.

⁴⁸ Ta tandihí ñáyivi cha canyicú yucuan canyehé ñu cha cuví cuan. Ta cuahan coyo ñu ta suri cacañi ñu ndaha ñu yiqui nyica ñu. Vatyí chitó ñu vatyí ña vaha cha chinyacuví ñu chihin ra Jesús.

⁴⁹ Ta tandihí ñu cha ñohó nuu chi ra Jesús, ta ñusihí cha chinyicon chi ra nya Galilea, canyicú ñu nya sava ri. Ta nyehé ñu tandihí cha cuví yucuan.

Nu cua cuchi ra chi ra Jesús

(Mt. 27.57-61; Mr. 15.42-47; Jn. 19.38-42)

⁵⁰ Ta iyó noo ra vaha, nañi ra José. Ta Arimatea ityi Judea cuví ñuu ra. Ta cuví ra noo ra cuví nuu cuenda Junta Cahnú ñu Israel.

⁵¹ Ta ra José cuan nyatú ra quívi cha cunyaca ñaha Nyoo. Ta ña ndoo ra vaha chihin cha sacuví ra tahan ra, ra cacuví nuu cuenda tata sutu cuan.

⁵² Tyicuan ta chahan ra chicacan ra coño ñuhu ra Jesús chi ra Pilato.

⁵³ Ta yaha cha sanoo ra José cuan coño ñuhu ra Jesús nu cruzi, ta natyihí ra chichi noo sahma cha cuví lino. Ta cuahan ra cua cuchi ra chi ra chichi noo ñaña chaa cha cuví yavi yuu cha savaha ñu.

⁵⁴ Ta viarni cuví, quívi cha sanduvahá ñáyivi cha cachi ñu cha sabarú inga quívi, quívi nyitatu ñu. Ta cha cuñi cuví sabarú.

⁵⁵ Ta tandihí ñusihí cha quichi chihin ra Jesús nya Galilea, cuahan ñu chata ra. Ta nyehé ñu chichi yavi yuu cuan. Ta nyehé ñu yoso caa chicava coño ñuhu ra.

⁵⁶ Ta cuanuhu coyo ñu nya vehe ñu. Ta sanduvaha ñu ndutya vixi chahan vatyí cutyihí ñu coño ñuhu ra Jesús coto coo xico. Vatyí tyicuan caa cuví costumbre cuiya

cuan. Tyicuan ta nyitatú ñu inga quivi cuan tari cuhva catyí maa tuhun cha tachi Nyoo chi yo.

24

Nu nandoto ra Jesús

(Mt. 28.1-10; Mr. 16.1-8; Jn. 20.1-10)

¹ Cundichin timingu quivi nu quichaha vitya. Ta ñaha cuiri cuahan coyo ñusihí cuan nya nu ñaña ra Jesús. Ta nyisó ñu ndutya vixi chahán cha sanduvahá ñu.

² Ta cuhva cha chaá coyo ñu, nanyehe ñu vatyi ña nyasí ca yavi yuu cuan tari cuhva chinyasí maa.

³ Ta quihvi ñu chichi, soco ña ñañihí ñu coño ñuhu Sutu Mañi yo Jesús.

⁴ Ta yucuan tayucú ñu chihin cha yuhví ñu. Ta ña chitó ñu ñáá cunyacuvi ñu. Ta tuví uvi tahan rayí nuu ñu. Ta xiño vavaha sahma cañihnó ra.

⁵ Ta chihin cha yuhví ñu, ta chicuiñi chiti ñu chihin nuu ñu nya nu ñuhú. Tyicuan ta quichaha cacatyí ra cuan chi ñu:

—¿Ñáá tuhun nanducú ndo chi ra Jesús ihya nu ñohó ndiyí?

⁶ Yori ra ñohó ihya, vatyi cha nandoto ra. Nícohon iñi ndo tuhun cha cahán ra chihin ndo quivi chicá noo ra Galilea.

⁷ Catyí ra vatyi tahán chi cucuhva cuenda ñu chi ra ndaha ra iyó cuatyí. Vatyi cuví ra Rayí cha quichí nya gloria. Ta tahán chi cucahñi ra chi ra nu cruzi. Soco nu cu uñi quivi cunandoto ra. Tyicuan caa catyí ra chi ndo —catyí ángel cuan chi ñu.

⁸ Tyicuan ta nicohon iñi ñu tuhun cahán ra Jesús quivi cuan.

⁹ Ta cuanuhu coyo ñu. Ta nacatyí ñu chi ndi uchi ñn tahan ra apóstol ra Jesús chihin tandihí ca ñáyivi.

¹⁰ Ta ñu sacoto tuhun cuan chi ra cuan cuví ñu cu María, ñaha Magdala, ta cu Juana, ta cu María sihi ra Jacobo, ta suhva ca ñusihí.

¹¹ Soco ra cachicá noo chihin ra Jesús cuñí maa ra vatyi cahán ri maa ñu. Ta ña chinó iñi ra tuhun cahán ñu.

¹² Soco ra Pedro nducuitá ra ta chingo vavaha ra cuahan ra cuanyehe ra nya chichi ñaña ra Jesús tatu ndicha. Ta nanyehe ra chichi yavi yuu cuan tyi sahma ri cayucú ñnchiyo xiin. Tyicuan ta cuanuhu

ra nya vehe. Ta iyo cuñí ra vatyi ñahri ca coño ñuhu ra Jesús catuví chichi ñaña cuan.

Noo cha cuví ityi Emaús

(Mr. 16.12-13)

¹³ Suri maa quivi cuan, uvi tahan ra chicá noo chihin ra Jesús cuahan coyo ra nya ñuu cha ñañí Emaús, tari noo cha uchi ñn kilómetro cha quita yo Jerusalén.

¹⁴ Ta cuahan coyo ra ta ndatuhún ra tuhun ñáá ndihí cha cuví.

¹⁵ Ta cha ñi ri ca cha candatuhún ra, ta ra Jesús natahan ra chi ra nu cuahan coyo ra.

¹⁶ Soco ñi ri maa nyehé ra chi ra Jesús, ña canicohon nuu ra chi ra. Vatyi tari cha iyó noo cha chasí nuu ra tacuhva cha ma canicohon nuu ra chi ra Jesús.

¹⁷ Tyicuan ta quichaha ndacá tuhun ra Jesús chi ra:

—¿Ñáá tuhun ndatuhún xaan ndo? ¿Ñáá tuhun cha cuihya xaan iñi ndo? —catyí ra chi ra.

¹⁸ Ta ra cha ñañí Cleofas, nacahan ra. Ta catyí ra:

—¿Atu ñima nya Jerusalén quichi yoho? ¿Atu ra inga ñuu cuvún? ¿Atu ña chitón cha cuví ñuu cuan? —catyí ra.

¹⁹ Tyicuan ta catyí ra Jesús chi ra:

—¿Ñáá cha cuví?

Ta quichaha canacatyí ra chi ra:

—Tuhun ra Jesús ra ñuu Nazaret. Vatyi cuví ra noo ra profeta Nyoo. Ta chihin tunyee iñi cahnu Nyoo sacuví ra cha vaha nuu Nyoo ta nuu ñáyivi.

²⁰ Soco ra cacuví nuu chi tata sutu ta ra cacuví nuu cuenda vehe ñuhu, nacuhva cuenda ra chi ra chi sindaro ñuu Roma. Ta cachahñi ra chi ra. Ta chihí ra nu cruzi.

²¹ Ta cha vityin cha iyó uñi quivi cuví tuhun cuan. Ta nyuhu cuñí maa ndi vatyi ican ra cuví ra cusacacu chi ñáyivi Israel.

²² Soco vityin iyo xaan cuñí ndi cha nacatyí suhva ñusihí chi ndi. Vatyi maa ñu, ñaha cuii ri chahan coyo ñu nu ñaña ra.

²³ Ta nacatyí ñu chi ndi vatyi ñahri ca coño ñuhu ra catuví. Ta nacatyí ñu vatyi nyehe ñu uvi tahan ángel. Ta catyí ángel cuan chi ñu vatyi ra Jesús nyitó ra.

²⁴ Yahá cuan ta chahan coyo tucu suhva ra tahan ndi nu ñaña. Ta nyehe ra vatyi cha ndicha cuví tari cuhva catyí ñusihí cuan.

Vatyi ñahri ca coño ñuhu ra Jesús catuvi —catyí ra chi ra.

²⁵ Tyicuan ta ra Jesús catyí ra chi ra:

—Chiin xaan cutuñi ñi ndo. Ta cuee xaan chinó ñi ndo tuhun tyaa ra profeta Nyoo ta cha naha.

²⁶ ¿Atu ña chitó ndo vatyi tahán chi cha cunyehe xihna ra Cristo tundoho? Yaha cuan ta tahán chi cuñihi ra tyiño cha cunyaca ñaha ra —catyí ra Jesús chi ra.

²⁷ Tyicuan ta quichaha nacuhva ra cuenda yoso caa cuahan tuhun ra nu tutu Nyoo. Ta quichaha cahan ra tuhun cha tyaa ra Moisés ta cha naha. Ta yaha cuan ta cahan ra tuhun tandihi libru cha tyaa ra profeta Nyoo.

²⁸ Ta cuhva cha chaá ra nya ñuu Emaús cuan nu cuahan coyo ra, ta saha ra Jesús vatyi cañi ca cuahan ra.

²⁹ Tyicuan ta cacatyí ra chi ra na ndoo ra chihin ra. Ta catyí ra:

—Ndoo chihin ndi vatyi cha cua quee ñanyii —cacatyí ra.

Tyicuan ta cuahan ra Jesús nya vehe ninduvi ra cuan.

³⁰ Ta cuhva cha chicunyaá ra yuhu mesa chihin ra, quehen ra pan. Ta chaha ra tyahvi nyoo chi Nyoo. Ta chahnú sava ra, ta chaha ra chi ra.

³¹ Ta caa cuhva ri cuan nuña nuu ra canicohon nuu ra chi ra Jesús. Soco ra Jesús cuanaa ri ra.

³² Tyicuan ta quichaha catyí ra chi ra tahan ra:

—Yucuan chaha vaha xaan cuñi aña yocuhva cha vachi ra chihin yo, ta nacatyí vaha ra yoso caa cuahan tuhun Nyoo cha nyaa nu tutu chi yo, ta nicohon nuu yo chi ra —cacatyí ra.

³³ Ñahri ca cha canyatu ra, ta cuanuhu coyo ra nya Jerusalén. Ta yucuan nañihi ra chi ndi uchi ñin ra chicá noo chihin ra Jesús, canyicú ra.

³⁴ Tyicuan ta quichaha canacatyí ndi uchi ñin tahan ra chi ra cha nichaa coyo cuan:

—Ndicha vatyi Sutu Mañi yo, nandoto ra. Vatyi ra Simón nyehe ra chi ra —cacatyí ra.

³⁵ Tyicuan ta ra cha ni nachaa coyo cuan canacatyí tucu ra yoso caa ndatuhun ra Jesús chihin ra ityi cuahan ra ñuu Emaús,

ta yoso caa canicohon nuu ra chi ra nu chahnú ra pan.

Nu tuvi ra Jesús nu canyicu ra cachica noo chihin ra

(Mt. 28.16-20; Mr. 16.14-18; Jn. 20.19-23)

³⁶ Ni cahan ca ra tuhun cuan ta tuvi ra Jesús nu canyicú ra. Ta chaha ra nocumi, ta catyí ra:

—Na coo cha taxi ri aña ndo.

³⁷ Tyicuan ta canayuhvi xaan ra. Ta cacuñi maa ra vatyi noo tatyí ri cuví.

³⁸ Tyicuan ta catyí ra Jesús chi ra:

—¿Ñáá tuhun cha nayuhvi ndo? ¿Ñáá tuhun cha chicá uvi ñi ndo?

³⁹ Nyehe ndo ndahi. Ta nyehe ndo chahi. Vatyi suri mai cuví. Tin ndo chii ta coto ndo. Vatyi tatyí, ñahri coño ñuhu. Ta ñahri yiqui tari cha nyehé ndo tyi yihí chi yuhu —catyí ra Jesús.

⁴⁰ Ta cuhva cha catyí ra tuhun ihya, sañahá ra ndaha ra ta chaha ra.

⁴¹ Soco maa ra chaha cha iyo cacuñi ra ta si cacuñi ra nyacua ña chinó vaha ñi ra. Tyicuan ta catyí ra Jesús chi ra:

—¿Atu iyo cha cachi? —catyí ra.

⁴² Tyicuan ta chaha ra chiin yuhu tiyaca tyihyo chihin tyañuñu chi ra.

⁴³ Ta quehen ra. Ta quichaha chachi ra.

⁴⁴ Ta catyí ra chi ra:

—Tandihí cha cuví chii, ican ihya cuví cha catyí chi ndo quivi cuan. Ta catyí chi ndo vatyi tyicuan caa cucuvi, tari cuhva nyaá tuhun cha tyaa ra Moisés ta ra profeta Nyoo ta cha nyaá nu libru salmo —catyí ra chi ra.

⁴⁵ Tyicuan ta chaha ra Jesús vatyi na cutuñi ñi tandihí ra cuan yoso caa catyí nu tutu Nyoo.

⁴⁶ Tyicuan ta catyí ra Jesús chi ra vatyi tyicuan caa nyaá nu tutu Nyoo vatyi tahán chi cha cúvi ra Cristo. Ta nu cu uñi quivi nandoto ra.

⁴⁷ Ta tahán chi coto ñayivi tuhun sivi ra Cristo ñuu Jerusalén, ta yaha cuan ta tandihí ñuu nichahnu ñuhu ñayivi. Tacuhva cuvi ndu uvi ñi ñu ta ndachi cuatyí ñu.

⁴⁸ —Ta nyoho cuví ndo cha ndaa tandihí tuhun ihya.

⁴⁹ Ta cusaquichi mai Tatyí Ii Nyoo siqui ndo tari catyí Suti tyi cuhva ra chi ndo.

Soco cunyicu ndo Jerusalén ihya. Ta ma quita maa ndo nyacua nya quichi tunyee ñi Tatyí Ii Nyoo cuquihi chi ndo —catyí ra Jesús.

Nu nandaq xica ra Jesús andivi

(Mr. 16.19-20)

⁵⁰ Tyicuan ta ra Jesús cuahan ra chihin tandihi ra cachicá noo chihin ra ityi chata ñuu, nya ñuu Betania. Ta sandaa ra ndaha ra. Ta nasoco ra chi ra.

⁵¹ Ta cha ni ri ca cha nasoco ra chi ra, nandaq xica ra andivi.

⁵² Tyicuan ta tandihi ra sacahnú xaan ra chi ra. Ta sii xaan cacuví chi ra, cuanuhu coyo ra Jerusalén.

⁵³ Ta tyicuan ri chinyicú ra chichi vehe ñuhu cahnu cuan, ta sacahnú xaan ra chi Nyoo.

Tuhun Nyoo Cha Tyaa San Juan

Tuhun Cahán Nyoo nanduví noo rayii, ta ican cuví ra Cristo

¹ Nyata quiví xihna ri, nyata ni cumañi ca coo tandihí cha iyó, ta cha iyó ra cuví Tuhun Cahán Nyoo. Nyaá ra chihin Nyoo. Ta Nyoo cuví ra.

² Ta chicoo ra chihin Nyoo nyata quiví xihna ri.

³ Ta chihin ra, savaha Nyoo tandihí cuui maa cha iyó. Ta ñahri savaha Nyoo cha maa ri maa ra.

⁴ Ta chihin ra cuví Tuhun Cahán Nyoo nyaá ñayiví cha ma naa ca maa. Ta ñayiví cuan, ican cuví cha sacundichín añima ñáyiví.

⁵ Ta cha ndichin ihya, sacundichín chi nu ñaa iñi. Ta cha ñaa iñi ña cuñihí chi ndahva chi cha ndichin cuan.

⁶ Chiyo noo ra cha tachí Nyoo chi. Ta nañi ra Juan.

⁷ Quichí ra cuví ra noo cha ndaa. Vatyí cahán ra tumañi iñi cuenda ra cuví cha ndichin cuan, tacuhva vatyí chino iñi tandihí ñáyiví chi ra.

⁸ Ra Juan, ñima cha ndichin cuan cuví ra. Noo cha ndaa ri cuví ra cha cuenda cha ndichin cuan.

⁹ Vatyí cha ndichin cha ndicha vaha cuan, ni cuachaa chi siqui ñuhu ñayiví, tacuhva vatyí sacundichín chi añima tandihí ñáyiví cha iyó siqui ñuhu ñayiví ihya.

¹⁰ Ra cuví Tuhun Cahán Nyoo quichí ra siqui ñuhu ñayiví. Ta ican ra cuví ra Cristo. Ta suri maa ra savaha ra ñuhu ñayiví. Soco ñáyiví iyó siqui ñuhu ñayiví, ña nichon nuu ñu chi ra.

¹¹ Quichí ra nu nyicú ñáyiví cha savaha ra, soco ñáyiví cha savaha ra ña natin cuenda ñu chi ra.

¹² Soco tandihí ñu natin cuenda chi ra, ta chinó iñi ñu chi ra, ican chi ñu cuan, chaha ra ityi vatyí nanduví ñu sehe Nyoo.

¹³ Vatyí nacacu chaa ñu. Soco ñima tari cacu ñu ta lee ñu cuenda coño ñuhu ñu. Ta ni ñima cha cuenda cha quichi cuví iñi noo

rayii coo ra chihin noo ñaha sihi. Ñima cha cuenda cha cuñi ñáyiví coo sehe ñu. Soco maa Nyoo sanacacu chaa chi ñu.

¹⁴ Ta ra cuví Tuhun Cahán Nyoo nanduví ra noo rayii. Ta chicoo ra chihin yo. Ta nyehe ndí cha cahnu cuví ra. Ta cahnu cuví ra vatyí Sehe mañi Sutu yo Nyoo cuví chi ra. Tyitu yihí ra chihin cha ndicha ta tumañi iñi cha cua cuhva ra chi yo.

¹⁵ Ta ra Juan cuan cahán ra tumañi iñi cuenda ra, ta catyí ra:

—Ican ra ihya cha cahin tuhun quiví cuan, vatyí ra cha vachi ityi chate, cahnu ca ra cuví ra ican saha yuhu. Vatyí nyata tyembu chahnu ta cha iyó maa ra —catyí ra Juan.

¹⁶ Tandihí yo naquehén cuenda yo tumañi iñi cahnu cha chaha ra chi yo, vatyí nasocó xaan ra chi yo.

¹⁷ Ra Moisés chaha cuenda ra ley Nyoo chi yo. Soco ra Jesucristo cundahví iñi ra chi yo ta saha ra ticahnu iñi cuatyí yo. Ta chaha ra cha ndicha coo chi yo.

¹⁸ Ta yori ca maa nyehé chi Nyoo. Nottuhun ri maa Sehe mañi ra cha iyó in ri chihin ra. Ican ra cuví ra chaha cha cohon nuu yo chi Sutu ra.

Nu cahán ra Juan, ra sacondutyá, tumañi iñi cuenda ra Jesucristo

(Mt. 3.11-12; Mr. 1.7-8; Lc. 3.15-17)

¹⁹ Ra cacuví nuu chi ñu Israel cha iyó ñuu Jerusalén, catachí ra chi tata sutu ta chi ra cacuví levita nu nyaá ra Juan na ndaca tuhun ra chi ra yoo ra cuví ra.

²⁰ Ta maa ra Juan catyí cachi ra:

—Yuhu ñima ra Cristo cuví.

²¹ Tyicuan ta candaca tuhun ra inga chaha chi ra:

—¿Yoo ra cuví yoho? ¿Atu ra Elías, ra cuví profeta Nyoo ta cha naha cuvún? —catyí ra chi ra.

Ta ra Juan nacahan ra:

—Ñima ra cuan cuví.

Ta sañihí ca ra candaca tuhun ra chi ra, ta catyí ra:

—Tu tyicuan caa, ¿atu icon cuví ra profeta Nyoo cha nyaá cha quichi?

Ta nacahan tucu ra Juan ta catyí ra:

—Ñima.

²² Ta inga tucu chaha candaca tuhun ra chi ra:

—¿Yóó ra cuví yoho? Vatyí cuñí chi cuiso ndi tyiño chi ra cha tachí chi ndi. ¿Yóó ra cuví yoho? —catyí ra chi ra.

²³ Ta ra Juan nacahan ra:

—Yuhu cuví ra cahán ta canachaá noo nu chiqui ndi, ta catyí: “Nuña ndo noo ityi ndoo chichi añima ndo vatyí cha vachi Sutu Mañi yo.” Tari cuhva cahan ra Isaías profeta Nyoo tuhin ta cha naha —catyí ra Juan chi ra.

²⁴ Ra cha cacahan chihin ra Juan, ra cacuví fariseo tachí chi ra.

²⁵ Ta candaca tuhun tucu ra chi ra:

—Tatu ñima ra Cristo, ni ra Elías, ni ra profeta cuan cuvún, ¿ñáá tuhun cha sacondutyón chi ñáyivi? —cacatyí ra chi ra Juan.

²⁶ Ta ra Juan catyí ra chi ra:

—Yuhu sacondutyé chihin ndutya. Soco mahñu ndo nanyaá noo ra cha ña ñohó nuu ndo.

²⁷ Ican ra cuví ra vachi chate. Soco cha iyó maa ra ta caqui. Ta ña naña mai ni cha cuví musu ra ta ndachi ñi xityin ndichan ra —catyí ra Juan.

²⁸ Tandihí tuhun ihya cuví noo nu nañi Betábara cha nyaá inga chiyo yuvi cahnu Jordán nu ñohó ra Juan sacondutyá ra.

Ra Jesucristo, Mbee Luhlu sana Nyoo cuví ra

²⁹ Cha inga quivi nanyehe ra Juan chi ra Jesús cuachaa ra nu nyaá ra, ta catyí ra Juan:

—Nyehe ndo, ican ra ihya cuví Mbee Luhlu sana Nyoo vatyí cucuhva ra ñayivi ra tacuhva cahnya ra cuatyí ñáyivi iyó siqui ñuhu ñayivi.

³⁰ Tuhun maa ra cahin quivi cha catyí chi ndo vatyí cha yaha yuhu ta vachi nonga ra cha cahnu ca cuví ta ñima ca yuhu, vatyí nyata tyembu chahnu ta cha iyó ra.

³¹ Ni yuhu ta ña ñohó nui chi ra quivi cuan. Soco vachi sacondutyé chihin ndutya tacuhva vatyí ñu ñuu Israel cohon nuu ñu chi ra —catyí ra Juan.

³² Ta catyí tucu ra Juan ñandihí:

—Yuhu nyehí chi Tatyí Ii Nyoo quichi ityi andivi vachi chi tari noo paloma, ta ndoo chi siqui ra.

³³ Yuhu ta coto que yóó ra cuví ra quivi cuan. Soco Nyoo, ra cha tachí chii na sacondutye chihin ndutya, catyí ra chii:

“Quivi nyehun Tatyí Ii yuhu, vachi noó siqui noo rayi, ican ra cuan cuví ra sacondutyá chihin Tatyí Ii yuhu”, catyí Nyoo chii.

³⁴ Yuhu cha yaha nyehí chi ra. Ta cuví cha ndaa vatyí ican ra cuví Sehe Nyoo —catyí ra Juan.

Ra cha xihna ca nanyicon chi ra Jesús

³⁵ Cha inga quivi, ra Juan nyaá tucu ra yucuan inga chaha, ta nyicú tucu uvi ra nyicón chi ra.

³⁶ Ta cuhva cha nyehe ra, yahá ra Jesús, ta catyí ra:

—Nyehe ndo, ican ra cuan cuví Mbee Luhlu sana Nyoo —catyí ra Juan.

³⁷ Cha chiñi ninduvi ra nyicon chi ra Juan tuhun cahan ra, ta cananyicon ra chi ra Jesús.

³⁸ Tyicuan ta nanyehe ra Jesús ityi chata ra, ta nyehe ra tyi canyicón ra chi ra, ta catyí ra:

—¿Ñáá cha nducú ndo?

Tyicuan ta canacahan ra ta catyí ra:

—Maestro, ¿nya iyón?

³⁹ Ta ra Jesús catyí ra chi ra:

—Coho ndo chihin. ta nyehe ndo —catyí ra chi ra.

Tyicuan ta cuahan coyo ra chihin ra. Ta canyehe ra nu iyó ra. Ta yucuan cuaa ndihí ra vatyí tari cha caa cumi cha cha ñi cuhva cha cha ra yucuan.

⁴⁰ Chichi cha ninduvi ra cha chiñi tuhun cahan ra Juan ta nanyicon ra chi ra Jesús, noo ra cuví ra ra Andrés yañi ra Simón Pedro.

⁴¹ Ta ra Andrés numi ri chinanducu ra chi yañi ra, ra Simón, ta catyí ra chi ra:

—Nañihí ndi chi ra cha cuví Mesías —catyí ra.

Ta tuhun Mesías cuan cuñi chi catyí, ra Cristo, o ra cha nacachi vaha Nyoo, vatyí cuví ra rey chi yo.

⁴² Tyicuan ta ra Andrés chinyaca ra chi ra Simón yañi ra nu nyaá ra Jesús. Ta cuhva cha nyehe ra Jesús chi ra Simón, ta catyí ra chi ra:

—Yoho Simón, sehe ra Jonás cuví chuun. Soco cunañun Cefas. —catyí ra chi ra.

Ta Cefas cuñi chi catyí Pedro chihin sahan griego, ta ninduvi tahan sivi cuan, cuñi chi catyí “yuu”.

Nu cana ra Jesús chi ra Felipe ta chi ra Natanael

⁴³ Cha inga quiví tyaa ra Jesús cuhva cuhun ra ityi Galilea. Tyicuan ta nañihí ra chi ra Felipe. Ta catyí ra chi ra:

—Cunyicon chii —catyí ra.

⁴⁴ Ra Felipe ihya, ra ñuu Betsaida cuví ra. Ta yucuan iyó tucu ra Andrés ta ra Pedro.

⁴⁵ Tyicuan ta chahan ra Felipe chinanducú ra chi ra Natanael. Ta catyí ra chi ra:

—Nyehe ndi chi ra cha tyaa ra Moisés tuhun nu libru ley, ta suri tuhun ra catyaa tucu ra profeta Nyoo ta cha naha. Jesús nañi ra. Sehe ra José ra ñuu Nazaret cuví chi ra.

⁴⁶ Ta catyí ra Natanael:

—¿Atu cuví quita cha vaha ñuu Nazaret cuan? —catyí ra chi ra Felipe.

Ta nacahan ra Felipe ta catyí ra:

—Ñaha ta nyehun —catyí ra.

⁴⁷ Yaha cuan ta cuachaa ra Natanael nu nyaá ra Jesús. Ta cuhva cha nanyehé ra Jesús tyi vachi ra, ta quichaha catyí ra:

—Ihya vachi noo ra cha ndicha ndicha ra ñuu Israel cuví. Ta ña tuhvá ra sandaví ñaha —catyí ra Jesús tuhun ra Natanael.

⁴⁸ Tyicuan ta ra Natanael ndaca tuhun ra chi ra:

—¿Yoso caa cha ñohó nuun chii?

Ta ra Jesús nacahan ra ta catyí ra:

—Yuhu nyehí chuun nyata ni cumañi ca cana ra Felipe chuun, cuhva cha nyaún chaha tun higo cuan —catyí ra Jesús chi ra.

⁴⁹ Tyicuan ta quichaha catyí ra Natanael:

—Sutu Mañi yuhu, yoho cuvún Sehe Nyoo. Yoho cuvún rey cuenda ndi ñu Israel.

⁵⁰ Ta ra Jesús catyí ra chi ra Natanael:

—¿Atu chinó iñun chii cha cuenda vatyí catyí tyi nyehí chuun chaha tun higo? Soco nahnu ca cha cunyeheun ican saha cuan —catyí ra chi ra.

⁵¹ Ta catyí tucu ra Jesús:

—Cha ndicha catyí chi ndo vatyí nyoho cunyehe ndo andiví cuitanuña ta cuaha ángel Nyoo cundaa ra, ta cunoo ra siqui yuhu ra cuví Rayi cha quichí nya gloria —catyí ra Jesús chi ra.

2

Noo vico tandaha iyó ñuu Caná ityi Galilea

¹ Yaha uñi quiví ta chicoo noo vico tandaha ñuu Caná ityi Galilea. Ta sihi ra Jesús ñohó ña yucuan.

² Ta suri canacatyí tuhun ñu chi ra Jesús ta chi ra cachicá noo chihin ra cha cuhun coyo ra vico tandaha cuan.

³ Tyicuan ta cuahan coyo ra. Ta nyicú ñu vico, ta ndihí vinu. Tyicuan ta catyí sihi ra Jesús chi ra:

—Ñahri ca vinu ñu —catyí ña.

⁴ Ta catyí ra Jesús chi ña:

—¿Ñáa cha cuñún cha sacuvi yuhu, Maha? Ta chaa ca cuhva cha sañahi chi ndo yóo ra cuví yuhu —catyí ra chi ña.

⁵ Soco sihi ra catyí ña chi ra cha catyinyeé vico cuan:

—Sacuvi ndo tandihí cha catyí ra chi ndo —catyí ña chi ra.

⁶ Ta tayucú iñu tahan quisi yuu nahnu cha quihí ndutya cha catuhvá ra Israel chotyíño nu tuhvá ra canacatyá xaan ra ndaha ra tari cuhva costumbre cha ca iyó maa ra. Ta tahan tahan quisi cuan chitahan tari uvi xico uchi o uñi xico uchi litru ndutya.

⁷ Tyicuan ta catyí ra Jesús chi ra cha catyinyeé vico cuan:

—Sacutu ndo quisi ihya chihin ndutya —catyí ra chi ra.

Tyicuan ta sacuvi ra tari cuhva catyí ra.

⁸ Tyicuan ta catyí ra Jesús chi ra:

—Vityin tava ndo suhva ta cunyaca ndo chi ra cuví nuu cuenda vico ihya —catyí ra Jesús chi ra.

Ta tyicuan caa casacuví ra.

⁹ Ra cuví nuu cuenda vico cuan chihí ra ndutya cha nanduví vinu cuan. Soco ña chitó ra nya quichí. Maa ri maa ra catyinyeé vico cuan cachitó ra, vatyí maa ra catava ndutya cuan. Tyicuan ta ra cuví nuu cuenda vico cuan cana ra chi ra cha tandaha cuan.

¹⁰ Ta catyí ra chi ra:

—Tandihí ñáyiví, xihna ca vinu vaha tuhvá ñu tava. Yaha cuan ta tatu cha cachihí xaan ñu, tyicuan ta tava ñu vinu pehe ca. Soco yoho chicumí vahun vinu vaha. Ta nya vityin tavon —catyí ra chi ra.

¹¹ Cha sacuvi ra Jesús ñuu Caná ityi Galilea, ican cuan cuví milagru cha xihna ri savaha ra vatyí sañaha ra cha cahnu cuví

ra. Ta ra cachicá noo chihin ra cachino iñi ra chi ra vatyí ican ra cuví ra cha tachí Nyoo.

¹² Cha yaha cuan ta cuahan ra ñuu Capernaum. Ta cuahan sihi ra, yañi ra ta ra cachicá noo chihin ra. Ta yucuan chinyicu ñu suhva quivi.

Nu tava ra Jesús chi ñu caxicó chichi vehe ñuhu cahnu

(Mt. 21.12-13; Mr. 11.15-18; Lc. 19.45-46)

¹³ Cha cuñí chaa quivi vico cha nañí pascua cha sanducahnú ñu Israel. Yucuan chaha cuahan ra Jesús ñuu Jerusalén.

¹⁴ Ta chaá ra ñuu cuan, ta quihvi ra nuquehe vehe ñuhu cahnu cuan, ta nanyehe ra chi ra caxicó sindiqui, mbee, ta paloma. Ta na nyehe tucu ra chi ñu nyicú nasama xuhun chi ñáyivi.

¹⁵ Ta cha nyehe ra Jesús cha tyicuan caa, savaha ra noo yoho. Ta chihin yoho cuan tava ñehe ra chi tandihí ñu nuquehe vehe ñuhu in ri chihin mbee ta chihin sindiqui sana ñu. Ta ñu nasamá xuhun cuan, sacuita ra xuhun ñu nu ñuhu ta sanduva ra mesa ñu.

¹⁶ Ta catyí ra chi ñu xicó paloma cuan:

—¿Tava ndo paloma chiña ihya! ¡Ma nasaha ndo vehe Suti tari noo nuyahvi! —catyí ra chi ñu.

¹⁷ Tyicuan ta ra cachicá noo chihin ra, canicohon iñi ra cha catyí nu tutu Nyoo tyehe caa: “Cuiño xain chihin vehun”, catyí chi, nicohon iñi ra.

¹⁸ Tyicuan ta quichaha candaca tuhun ra cacuví nuu chi ñu Israel chi ra:

—¿Ñáá seña cuhvon chi ndi ta sañahun vatyí chaha Nyoo ityi chuun cha sacuvun tyehe caa? —catyí ra chi ra.

¹⁹ Ta nacahan ra Jesús ta catyí ra:

—Sataní ndo vehe ñuhu ihya, ta chichi cha uñi quivi, yuhu cusanandai inga chaha —catyí ra chi ra.

²⁰ Tyicuan ta quichaha cacatyí ra cuan chi ra:

—Uvi xico iñu cuiya cañoho ra casavaha ra vehe ñuhu ihya. Ta yoho catyún tyi chichi cha uñi quivi cusanandaun inga chaha —catyí ra chi ra.

²¹ Soco vehe ñuhu cha cahan ra Jesús tuhun, ican cuví coño ñuhu ra.

²² Yucuan chaha ra cachicá noo chihin ra canicohon iñi ra tuhun ihya quivi nandoto ra Jesús. Ta cutuñi iñi ra vatyí tuhun cha nyaá nuu tutu Nyoo cahan chi cuenda ra Jesús. Ta canachino iñi ra tuhun cahan ra Jesús ta tuhun cha nyaá nu tutu Nyoo.

Ra Jesús chitó ra cha caá aña ñáyivi

²³ Quivi cha ñohó ra Jesús Jerusalén, quivi vico pascua cuan, cuaha xaan ñu nachino iñi ñu chi ra cha cuenda cha cuaha xaan milagru sacuvi ra.

²⁴ Soco ra Jesús ña cunhi iñi ra nyehé ra chi ñu vatyí chitó ra cha caá aña tandihí ñu.

²⁵ Ña chiñuhú ri cha nacatyí yo chi ra yoso caa ñáyivi, vatyí maa ra chitó ra ñáa cha caá chichi aña ñu.

3

Nu ndatuhún ra Nicodemo chihin ra Jesús

¹ Chiyo noo ra fariseo cha nañí Nicodemo. Ta cuví ra noo ra cuví nuu chi ra ñuu Israel.

² Ra Nicodemo ihya, chahan ra nu nyaá ra Jesús noo cha caa. Ta catyí ra chi ra:

—Maestro, chitó ndi vatyí Nyoo tachí chuun quichi sañahun chi ndi. Vatyí yori ñáyivi cuví sacuvi milagru tahan cha sacuvún, tatu yori Nyoo nyaá chihin ñu —catyí ra chi ra Jesús.

³ Tyicuan ta catyí ra Jesús chi ra:

—Cha ndicha catyí chuun vatyí tatu ma nacacu chaa ñáyivi inga chaha, ma cuví nyehe ñu nu nyacá ñaha Nyoo —catyí ra.

⁴ Tyicuan ta ndaca tuhun ra Nicodemo ta catyí ra:

—¿Yoso caa cuví cacu noo rayi inga chaha tatu cha chahnu ra? ¿Atu cuví ndihvi ra chichi sihi ra ta nacacu chaa ra inga chaha? —catyí ra.

⁵ Nacahan ra Jesús ta catyí ra:

—Cha ndicha catyí chuun vatyí ñima chihin cha cacu ri ñáyivi chihin coño ñuhu ñu ta cuví quihvi ñu nu nyacá ñaha Nyoo. Soco ñiñi tucu cuñí chi cha nacacu ñu chihin Tatyí Ii Nyoo.

⁶ Vatyí ñáyivi cha cacu chihin coño ñuhu, coño ñuhu ri nyisó ñu. Ta ñu cha nacacu chaa chihin Tatyí Ii Nyoo, iyó Tatyí Ii Nyoo aña ñu.

⁷ Ma iyo cuñun cha catyí chuun tuhun ihya vatyí tandihí ñu, cuñí chi nacacu chaa ñu.

⁸ Tari caá tatyí tandihí ri ityi nu cuñí chi ta chiñún cayú chi, soco ña chitón nya ityi quichi chi, ni nya ityi cuahan chi; ta tyicuan caa tandihí ñu nacacu chihin Tatyí Ii Nyoo —catyí ra Jesús chi ra.

⁹ Tyicuan ta ndaca tuhun tucu ra Nicodemo inga chaha chi ra:

—¿Yoso caa cuahan tuhun ihya? —catyí ra chi ra.

¹⁰ Nacahan ra Jesús ta catyí ra:

—Yoho cha cuvún noo ra sacuaha cuenda ñu Israel, tahán chi coton tuhun ihya.

¹¹ Cha ndicha catyí chuun vatyí cahín cha chité ta cuví cha ndaa cha nyehí. Soco nyoho ña chinó iñi ndo cha catyí chi ndo.

¹² Tatu ña chinó iñi ndo chii nu cahín tuhun ñayiví ihya chihin ndo, ¿yoso caa chino iñi ndo tu cahín tuhun andiví chihin ndo?

¹³ Yori chahan andiví chinyehé yoso caa iyó. Noo ri yuhu Rayí cha quichi nya gloria nyehí, vatyí yucuan iyé.

¹⁴ Tari nacatacaá ra Moisés noo coo cha chino chihin caa nu noo chiqui ndí, tyicuan caa cunacataca tucu ñu chi yuhu Rayí cha quichi nya gloria,

¹⁵ tacuhva vatyí tandihí ñu cha chinó iñi chii, ma cunaa ñu. Soco coo ñu ñayiví cha ma naa ca maa.

Nyoo cuñí xaan ra chi ñáyiví

¹⁶ Vatyí Nyoo cuñí xaan ra chi tandihí ñáyiví iyó siqui ñuhu ñayiví. Yucuan cuenda chahá ra vatyí cúvi Sehe mañi ra nu cruzi cha cuenda ñu. Tacuhva vatyí tandihí ñu cha chinó iñi chi Sehe ra, ma cunaa ñu, soco coo ñu noo ñayiví cha ma naa ca maa.

¹⁷ Nyoo ña tachí ra chi Sehe ra siqui ñuhu ñayiví vatyí sacunaa ra chi ñáyiví, soco tachí ra chi ra na sacacu ra añima ñu tacuhva ma cahun ñu anyaya cha catyí cuatyí ñu.

¹⁸ Vatyí ñu chinó iñi chi Sehe Nyoo ma cunaa ñu, soco ñu ña chinó iñi chi ra, cha cuanaa ñu cha cuenda cha ña chinó iñi ñu chi noo ri Sehe mañi Nyoo.

¹⁹ Ñu ña chinó iñi, cha cuanaa ñu. Vatyí quiví quichi ra cuví ñuhu ndichin cha sacundichín siqui ñuhu ñayiví, ña natíin

cuenda ñu chi ra tyi tahan ca iñi ñu nu ñaa iñi vatyí nyacuví ñu cha ña vaha.

²⁰ Tandihí ñu cha nyacuví cha ña vaha, ña tahan iñi ñu ñuhu ndichin, vatyí coto quetuvi cha ña vaha cha nyacuví ñu.

²¹ Soco ñu nyacuví cha ndicha, nanyitá ñu nu ndichin tacuhva na cundichin nyehe ñáyiví vatyí sacuví ñu cuhva cuñí Nyoo vatyí nyaá ra chihin ñu —catyí ra Jesús.

Nu cahán ra Juan, ra sacondutyá, tuhun ra Jesús inga chaha

²² Cha yahá tuhun ihya, ra Jesús chihin ra cachicá noo chihin ra cuahan coyo ra nu cuví Judea. Ta candoo ra suhva quiví yucuan, vatyí casacondutyá ra chi ñáyiví.

²³ Tyicuan caa tucu ra Juan cuan ñohó ra sacondutyá ra chi ñáyiví nu cuví Enón yatyin ri nu cuví Salim, vatyí yucuan ñohó cama ndutyá. Ta ñáyiví chaá coyo ñu ta condutyá ñu.

²⁴ Tuhun ihya cuví ta ni cumañi ca catyí ihi ra chi ra Juan vehe caa.

²⁵ Tyicuan ta suhva ra nyicón chi ra Juan quichahá cuví yuhu ra chihin noo ra ñuu Israel siqui yoso caa sandundí ñáyiví chi ñu nuu Nyoo.

²⁶ Tyicuan ta cuahan coyo ra nu nyaá ra Juan. Ta catyí ra chi ra:

—Maestro, ra cha ñoho chuhun inga chiyo yuvi cahnu Jordán, ra cha cahun tuhun chihin ndi, vityin sacondutyá ra ta tandihí ñu nanyicón ñu chi ra —catyí ra chi ra.

²⁷ Tyicuan ta ra Juan catyí ra chi ra:

—Ni noo yo ta ñahri cha cuví sacuvi yo, tyehe ta ña chahá Nyoo tunyee iñi ra chi yo.

²⁸ Suri maa ndo chiñi vaha ndo cha cahin vatyí yuhu ñima ra Cristo cuví. Noo ra cha tachí ri Nyoo ityi nuu ra cuví yuhu.

²⁹ Vatyí noo vico tandaha, ra nyaá xiin ñaha tyivaa cuan, ican ra cuan cutandaha chihin ña. Ta ra tahan ra nyaá ra yatyin ri cuan. Ta cusí cuñí ra chiñi ra tuhun cahán ra cha cuatandaha. Ta tyicuan caa tucu yuhu, sí cuñí vatyí naquehen ñáyiví tuhun cahán ra Jesús ta nyicón ñu chi ra.

³⁰ Maa ra cahnu ca ra cuacuvi ra. Ta yuhu cunocuee que vatyí tyicuan caa tahan maa chi.

Ra quita nya gloria ta quichi siqui ñuhu ñayivi

³¹ Ra cha quichi nya gloria, cahnu ca ra cuví ra cha nuu tandihi ñáyivi. Vatyí ra iyó siqui ñuhu ñayivi, cuenda ñuhu ñayivi cuví ra. Ta cahán ra tuhun ñuhu ñayivi. Soco ra quichi nya gloria, cahnu ca ra cuví ra.

³² Ta cahán ra cha nyehé ra ta cha chiñí ra, soco yori chinó iñi tuhun cahán ra.

³³ Soco tatu nya noo yo chinó iñi yo chi ra, cuví yo noo cha ndaa vatyí Nyoo ndicha cha cahán ra.

³⁴ Vatyí ra cha tachi Nyoo chii, tuhun Nyoo cahán ra vatyí Nyoo ña tyicuhvá ra Tatyí li ra chaha ra chi ra. Chaha ra naní Tatyí li ra chi ra.

³⁵ Nyoo Sutu yo cuñí ra chi Sehe ra. Ta natyaa ra tandihi ndaha ra.

³⁶ Ñu cha chinó iñi chi Sehe Nyoo, iyó ñu noo ñayivi chaa cha ma naa ca maa. Soco ñu ña cuñí chino iñi chi ra, ma coo ñu ñayivi cuan. Ta cutachi tuñi Nyoo chi ñu.

4

Nu ndatuhun ra Jesús chihin noo ñaha Samaria

¹ Cachitó ra cuví fariseo vatyí cuaha ca ñáyivi nyicón chi ra Jesús ican saha ra Juan. Ta cuaha ca ñu sacondutyá ra ñandihí.

² Vasi ñima maa ra Jesús sacondutyá, soco ra cachicá noo chihin ra, ican casacondutyá.

³ Ta quivi chito ra Jesús vatyí cachito ra tuhun ihya, ta quita ra Judea cuan ta cuanuhu ra nya Galilea.

⁴ Ta ityi cuanuhu ra, tahan chi yaha ra nu cuví Samaria.

⁵ Yucuan ta chaá ra noo ñuu cha nyaá ityi Samaria cha nañí Sicar yatyin nu nyaá ñuhú ra Jacob nu chaha ra chi ra José sehe ra.

⁶ Ta yucuan nyaá noo yavi ndutya cha catyí ñu tyi chi ra Jacob cuví. Ta vatyí chitatú xaan ra Jesús cha chica ityi ra, ta chicunyaá ra yuhu yavi cuan, ñáá cuhva hora cuví.

⁷⁻⁸ Ta ra cachicá noo chihin ra, yori ra canyicú vatyí cuahan coyo ra chichi ñuu, cuasata ra cha cacachi ra. Tyicuan ta chaá noo ñaha Samaria cuatava ña ndutya

chichi yavi cuan. Ta quichaha catyí ra Jesús chi ña:

—Cuhva chiin ndutya cohi —catyí ra chi ña.

⁹ Tyicuan ta ñaha Samaria cuan catyí ña chi ra Jesús:

—Yoho cha cuvún noo ra ñuu Israel, ¿yoso caa cha chicón ndutya cohun chi yuhu cha cuví ñaha Samaria? —catyí ña vatyí ñu Israel ña vaha iyó ñu chihin ñu Samaria.

¹⁰ Tyicuan ta ra Jesús nacahan ra ta catyí ra:

—Tyehe ta chitón cha chahá Nyoo, ta chitón yóo cha chicán ndutya chuun, maun cucacon ndutya chii. Ta yuhu cuhve ndutya nyitó chuun —catyí ra chi ña.

¹¹ Tyicuan ta catyí ña chi ra:

—Tata, ni ñahri vihi chihin tavon ndutya ihya. Vatyí yavi ihya cono xaan. ¿Nya cuquehun ndutya nyitó cuhvon cohi?

¹² Vatyí sutu chahnu yo, ra Jacob sandoo ra yavi ihya chi yo. Ta suri ihya chihí tucu maa ra ndutya. Ta suri ihya chihí tucu sehe ra ta quiti sana ra. ¿Atu cahnu ca ra cuví yoho ican saha ra cuan? —catyí ña chi ra.

¹³ Tyicuan ta nacahan ra Jesús ta catyí ra chi ña:

—Tandihí ñu chihí ndutya ihya, cu ityi ca ñu ndutya.

¹⁴ Soco ñu chihí ndutya cha chahá yuhu, ma cu ityi ca ñu. Vatyí ndutya cha chahí chi ñu cucaña chi tari noo ndohyo chichi aña ñu tacuhva coo ñu ñayivi cha ma naa ca maa —catyí ra chi ña.

¹⁵ Tyicuan ta quichaha catyí ña chi ra:

—Tata, cuhva ndutya cuan cohí, tacuhva cha ma cu ityi que ndutya, ta ni ma quichi que quichi tave ndutya chichi yavi ihya —catyí ña chi ra.

¹⁶ Tyicuan ta ra Jesús catyí ra chi ña:

—Cuahan cuacana chi yiun ta quichun —catyí ra chi ña.

¹⁷ Ta nacahan ña ta catyí ña:

—Yori yí iyó —catyí ña.

Tyicuan ta catyí ra Jesús chi ña:

—Ndicha cha cahun, vatyí yori yiun iyó.

¹⁸ Vatyí cha ohon tahan yiun chiyo, ta ra nyaá chuhun vityin ñima yiun cuví chi ra. Ndicha tuhun cha cahun —catyí ra chi ña.

¹⁹ Cha chiñí ña tuhun cahan ra, quichaha catyí ña chi ra:

—Tata, tuví iñi vatyí noo profeta cuenda Nyoo cuvún.

²⁰ Sutú chahnu ndi, ra Samaria, sacahnu ra chi Nyoo yucu ihya. Soco nyoho ñu Israel catyí ndo vatyí Jerusalén yucuan tahán chi sacahnu yo chi Nyoo —catyí ña chi ra.

²¹ Tyicuan ta ra Jesús nacahan ra ta catyí ra chi ña:

—Chino iñun tuhun cahín chuhun. Vatyí vachi cuhva vatyí cusacahnu ndo chi Sutú yo Nyoo. Soco ña chiñuhú ri cha quichi ndo yucu ihya o cuhun ndo nya Jerusalén.

²² Nyoho ñu Samaria, ña chitó ndo yóo chi sacahnú ndo. Soco nyuhu chitó ndi yóo chi sacahnú ndi. Vatyí chitó ndi vatyí cuenda noo ra Israel cuasacacu Nyoo chi ñáyivi.

²³ Soco chaa chi cuhva ta cuhva cuan nyaa yo vityin vatyí ñáyivi cha ndicha sacahnú chi Sutú yo Nyoo, cusacahnu ñu chi ra chihin aña ñu ta cha ndicha. Tari cuhva saquehen ityi Tatyí Ii Nyoo chi ñu. Vatyí Sutú yo Nyoo tyicuan caa cuñi ra cha sacuvi ñu cha sacahnú chi ra.

²⁴ Vatyí Nyoo Tatyí Ii cuví ra. Ta ñu sacahnú chi ra cuñi chi sacahnú ñu chi ra chihin cha ndicha tari cuhva saquehen ityi Tatyí Ii chi ñu —catyí ra chi ña.

²⁵ Ta nacahan ña ta catyí ña chi ra:

—Yuhu chité vatyí cuquichi ra cuví Mesías, ra Cristo, ra cuví rey chi yo. Ta quivi quichi ra, maa ra cunacatyí tandihi chi yo —catyí ña chi ra.

²⁶ Tyicuan ta nacahan ra Jesús ta catyí ra chi ña:

—Ra cha cahún tuhun cuan, ican ra cahán chuhun —catyí ra chi ña.

²⁷ Tyicuan ta canachaa coyo ra cachicá noo chihin ra ta iyo cacuñi ra cha ndatuhún ra Jesús chihin noo ñaha sihi. Soco ni noo ra ña caña iñi ra ndaca tuhun ra ñáa cha cuñi ra o ñáa cuenda ndatuhún ra chihin ñaha cuan.

²⁸ Tyicuan ta sandoo ña quiyi ña ta cuanuhu ña chichi ñuu. Ta catyí ña chi ñáyivi ñuu ña:

²⁹ —Ñaha ndo cunyehe ndo chi noo ra cha catyí tandihi cha cai. ¿Atu ñima ra Cristo cuví ra? —catyí ña chi ñu.

³⁰ Tyicuan ta quita coyo ñu ñuu cuan ta cuahan coyo ñu nu nyaá ra Jesús.

³¹ Ta cha niri ca cha cumañi chaa ñu nu nyaá ra, ra cachicá noo chihin ra, saniñi ra chi ra na cachi ra chiin. Ta cacatyí ra chi ra:

—Maestro, cachi chiin —catyí ra.

³² Soco catyí ra Jesús chi ra:

—Yuhu iyó noo nyayu cuacachi, ta nyoho ña chitó ndo —catyí ra chi ra.

³³ Tyicuan ta ra cachicá noo chihin ra quichaha candaca tuhun ra chi ra tahan ra, ta catyí ra:

—¿O iyó yóo cha quichi nyaca cha cachi ra, vaha? —catyí ra.

³⁴ Soco ra Jesús catyí ra chi ra:

—Cha chachí yuhu ican cuví cha sacuvi cuhva cuñi ra cha tachí chii ta sacuvi tyiño chaha ra chii.

³⁵ Nyoho catyí ndo: “Soco cumañi ca cumi yoo ta naquehen yo cha tachí yo.” Soco yuhu catyí chi ndo vatyí nyehé ndo ta saha ndo cuenda cha cuaha ñáyivi cuñi ñu quichi ñu chihin, cuví ñu tari noo itu cha cuaan ta cuñi chi cha cahnu yo niñi.

³⁶ Ra cha naquehén niñi cuan ñihi ra yahvi ra. Ta niñi cha naquehen vaha ra cuví ñu cha ñihi noo ñáyivi cha ma naa ca maa. Ta tyicuan caa cuví tacuhva vatyí ra cha tachí, ta ra cha naquehén niñi cuan in ri cacusi cuñi ra.

³⁷ Ta iyó noo tuhun ñáyivi cha catyí vatyí siin ñu tachí ta siin ñu naquehén niñi. Ta ndicha tuhun cuan.

³⁸ Yuhu sacuhin chi ndo vatyí cucahnu ndo niñi cha iyó nu ña saha tyiño ndo. Vatyí inga ra saha tyiño. Ta nyoho nyari cucahnu ndo ta naquehen vaha ndo niñi cuan —catyí ra Jesús chi ra.

³⁹ Ta cuaha xaan ñu ñuu Samaria cuan canachino iñi ñu chi ra Jesús cha cuenda cha catyí ñaha cuan, vatyí catyí ña: “Catyí ra tandihi cha cai chii”, catyí ña.

⁴⁰ Ta cuhva cha cachaa coyo ñu Samaria nu nyaá ra Jesús, cha cundahvi ñu nuu ra nandoo ra chihin ñu. Ta ra Jesús ndoo ra yucuan uvi quivi chihin ñu.

⁴¹ Ta cuaha ca ñu cachino iñi ñu cha chiñi ñu tuhun cahán maa ra.

⁴² Tyicuan ta quichaha catyí ñu chi ñaha sihi cuan:

—Vityin chinó iñi ndi, ñima cha cuenda vatyí catyun chi ndi, soco vatyí chiñi maa ndi chihin soho ndi tuhun cahán ra, ta

chitó vaha ndi vatyi ican ra cuví Cristo ra sacacú chi ñáyivi iyó siqui ñuhu ñayivi ihya —catyí ñu.

Nu sanduvahā ra Jesús chi sehe noo ra cuví tyiño

⁴³ Cha yahā uvi quivi ta quita ra Jesús ñuu Samaria cuan ta cuahan ra ityi nu cuví Galilea.

⁴⁴ Vatyi suri maa ra Jesús catyi ra vatyi ñáyivi ñuu noo ra cuví profeta, ra chahá cuenda tuhun cahán Nyoo, ña sahá ñu ñáyivi chi ra.

⁴⁵ Tyicuan ta cuhva cha chaā ra Galilea, ñu iyó yucuan vaha tyiñuhū ñu chi ra, vatyi chahan coyo tucu maa ñu Jerusalén vico cuan, ta nyehe ñu cha vaha cha sacuvi ra.

⁴⁶ Tyicuan ta cuanuhu tucu ra Jesús nya ñuu Caná nu cuví Galilea nu sananduvi ra vinu chihin ndutya. Ta iyó noo ra cuví tyiño cuenda rey, ta iyó noo sehe ra cha cuhvi ñuu Capernaum.

⁴⁷ Quivi cha chito ra cuan vatyi nachaa ra Jesús Galilea cha chahan ra Judea, chahan ra chinyehe ra chi ra, ta chican ra tumañi iñi chi ra na cuhun ra vehe ra ta sanduvaha ra chi sehe ra, vatyi cha cuñi cuii ri cúvi sehe ra.

⁴⁸ Tyicuan ta ra Jesús catyí ra chi ra:

—Nyoho ma chino iñi ndo tatu ma nyehe xihna ndo noo milagru —catyí ra chi ra.

⁴⁹ Soco ra cha vaha cuan catyí ra chi ra Jesús:

—Tata, coho chihin cha numi ri vityin cha ta cúvi ca sehi —catyí ra chi ra.

⁵⁰ Tyicuan ta ra Jesús catyí ra chi ra:

—Cuānuhu nya vehun. Sehun cha nduvahā ra —catyí ra chi ra.

Tyicuan ta ra cha vaha cuan chinó iñi ra tuhun cahān ra Jesús ta cuanuhu ra.

⁵¹ Ta cuhva cha cuanachaa ra nya vehe ra, quita coyo musu ra ta cacatyí ra chi ra:

—¡Cha nduvahā sehun!

⁵² Tyicuan ta quichaha ndaca tuhun ra chi ra ñáá cuhva nduvaha ra. Ta cacatyí ra chi ra:

—Icu cuhva ca ñn cha yahā hora tinyaa cahñi chi ra —cacatyí ra.

⁵³ Tyicuan ta tuví iñi ra cha vaha cuan, vatyi cuhva cuan catyí ra Jesús chi ra, “Cuānuhu vatyi sehun cha nduvahā ra.” Ta

maa ra ta tandihí ñáyivi chi ra nachino iñi ñu chi ra Jesús.

⁵⁴ Ican ihya cuví cha cu uvi milagru cha sacuvi ra Jesús cha nachaa ra Galilea cha chahan ra Judea.

5

Nu sanduvahā ra Jesús chi noo ra ña cuví caca

¹ Cha yahā tuhun cuan ta ra Jesús cuahan ra Jerusalén inga chaha vatyi ñu ñuu Israel sanducahnu ñu noo vico.

² Ta ñuu cuan iyó noo yuvehe cha nañi Yuvehe Cuenda Mbee. Ta yatyi ri nyaa noo vehe cahnu. Ta chichi vehe cuan ñohó ndutya. Ta cha chihin sahan hebreo nañi chi Betesda. Ta iyó ohon tahan corredor.

³ Ta yucuan cayucu cuaha ñu cuhvi: ñu cuaa, ñu coxo, ta ñu ña cuví nacanda. Canyatú ñu ñáá cuhva nacanda ndutya cuan.

⁴ Vatyi ña naha ña naha ri ta noó noo ángel sanacanda ra ndutya cuan. Ta yóo cha quihvi xihna ca cha yaha nacanda ndutya cuan, nduvaha ñu ñiri maa ñáá ca cuehe ndoho ñu.

⁵ Ta yucuan catuvi noo ra cuhvi cha iyó oco chahun uñi cuiya cuhvi ra.

⁶ Cuhva cha nanyehe ra Jesús chi ra catuvi ra yucuan, tuvi iñi ra vatyi cha cañi xaan cuiya caá ra tyicuan caa. Ta ndaca tuhun ra chi ra, ta catyí ra:

—¿Atu cuñún nduvahun?

⁷ Ta ra cuhvi cuan nacahan ra ta catyí ra:

—Tata, yori maa tyihi chii chichi tanque tatu cha nacandá ndutya. Vatyi tahan ri cha cuñi quihvi, inga ñu quihvi xihna ca —catyí ra cuhvi cuan chi ra Jesús.

⁸ Tyicuan ta catyí ra Jesús chi ra:

—Ndicuita ta naquehen yuvun ta cacon —catyí ra chi ra.

⁹ Ta caa cuhva ri cuan nduvahā ra, naquehen ra yuvi ra, ta nacaca ra. Soco vatyi quivi nyitatu ñu cuví,

¹⁰ ra cacuvi nuu chi ñu Israel catyí ra chi ra cha nduvahā cuan:

—Quivi nyitatu yo cuví vityin, ña tahan chi cuison yuvun —catyí ra chi ra.

¹¹ Ta ra cha nduvahā cuan nacahan ra ta catyí ra:

—Ra cha sanduvahā chii, ican ra catyí chii: “Naquehen yuvun ta cacon”, catyí ra chii.

¹² Tyicuan ta quichaha candaca tuhun ra chi ra, ta catyí ra:

—¿Yóo ra cha catyí chuun vatyí naquehun yuvun ta cacon?

¹³ Soco ra cha nduvahā cuan ña chitó ra yóo cha sanduvahā chi ra. Vatyí cuaha xaan ñáyiví yucuan, ta ra Jesús yori ca ra vatyí cha cuahan ra.

¹⁴ Yahā cuan ta nañihí ra Jesús chi ra chichi vehe ñuhu cahnu, ta catyí ra chi ra:

—Nyehe, vityin cha nduvahun, ma sacuví con cuatyí, coto ñáa ca cha cahnu ca cuví chuun —catyí ra chi ra.

¹⁵ Tyicuan ta chahan ra chicatyí ra chi ra Israel cuan vatyí ra Jesús cuví ra cha sanduvahā chi ra.

¹⁶ Ta cha cuenda cha sacuví ra Jesús tyehe caa quiví nyitatū ñu, yucuan chaha cuxaan xaan ra cacuví nuu chi ñu Israel chi ra Jesús. Ta cuñí ra cahñi ra chi ra.

¹⁷ Soco ra Jesús catyí ra chi ra:

—Maa Suti, nya vityin ta sahá tyiño ra. Ta yuhu tucu sahá tyiñe —catyí ra.

¹⁸ Ta cha cuenda cha chahan ra tuhun ihya, xaan ca cuñí ra Israel cuan. Ta ñihi ca cuñí ra cahñi ra chi ra vatyí cuñí maa ra vatyí ña sahá ra ñáyiví quiví nyitatū ñu, ta sijn rí tyi sahá ra tuhun tyi ñin ri cuví ra chihin Nyoo vatyí catyí ra tyi sutu ra cuví chi Nyoo.

Sehe Nyoo iyó xaan ityi chi ra cha cunyaca ñaha ra

¹⁹ Tyicuan ta ra Jesús catyí ra chi ra:

—Cha ndicha catyí chi ndo vatyí yuhu, cha cuví Sehe Nyoo, ñahri cha savahí cha maa ri mai. Soco sacuví cha nyehí sacuví Suti. Tandihí cha sacuví Suti ta sacuví tucu mai.

²⁰ Vatyí cuñí xaan Suti chii, vatyí Sehe ra cuví chii, yucuan chaha sañahá ra tandihí cha sacuví ra chii. Ta nahnu ca cha cusañaha ra, tacuhva cu iyo cuñi ndo.

²¹ Tari sanandotó Nyoo Suti chi ndiyí, ta chahá ra ñáyiví coo ñu, tyicuan caa tucu yuhu cha cuví Sehe ra, chahí ñáyiví chi ñu cuñí mai kuhve.

²² Ta Suti Nyoo ña sandaa ra cuatyí ni noo ñu, soco chi yuhu cha cuví Sehe ra chahā ra ityi na sandai cuatyí ñáyiví.

²³ Tyicuan caa sacuví Suti Nyoo vatyí cuñí ra tyi sacahnu ñáyiví chi Sehe ra tari sacahnú ñu chi maa ra. Ñu ña sacahnú chi yuhu Sehe Nyoo, niri chi Suti ta ña sacahnú ñu. Tyi maa ra tachí ra chi yuhu cha cuví Sehe ra.

²⁴ 'Ta cha ndicha catyí vatyí ñu tyasohó tuhun cahín ta chinó iñi ñu chi ra cha tachí chii, iyó ñu noo ñáyiví chaa cha ma naa ca maa. Ta ma cahun ca ñu anyaya cha catyí cuatyí ñu vatyí cha sacacu Nyoo añima ñu ndaha tuhun chihí, ta nacuhvā ra ñáyiví chaa coo ñu.

²⁵ Ñáyiví tari cha ndiyí cuví ñu soco cha ndicha catyí chi ndo vatyí vachi chi quiví vatyí cuiñi ñu ndusu Sehe Nyoo. Ta ñu cha quichahá cha cahán ra, cucoo ñu ñáyiví cha ma naa ca maa. Ta vityin cuví quiví cha cahín tuhun.

²⁶ Vatyí Nyoo Suti iyó ra ñáyiví cha ma naa ca maa. Ta chahā tucu ra ityi chi yuhu cha cuví Sehe ra vatyí kuhve ñáyiví coo ñáyiví.

²⁷ Ta Nyoo chahā ra vatyí sandai cuatyí ñáyiví, vatyí Rayñi cha quichi nya gloria cuví yuhu.

²⁸ Ma iyo cuñi ndo tuhun ihya, vatyí cuchaa chi quiví vatyí ñu ndiyí chichi ñaña cucuiñi ñu ndusu Sehe Nyoo.

²⁹ Ta cuquita coyo ñu chichi ñaña. Ta ñu cha sacuví cha vaha cunandoto ñu vatyí coo ñu noo ñáyiví chaa. Soco ñu ña sacuví cha vaha cunandoto ñu vatyí cahun ñu anyaya nu cutachi tuñi Nyoo chi ñu.

Nu sañahā chi vatyí ra Jesús iyó ityi chi ra cha kuhva ra ñáyiví chaa coo ñáyiví

³⁰ 'Yuhu ñima noo tuhun ri mai sacuví ñáa noo cha sacuví. Nyehí cha caá añima ñáyiví yoso kuhva catyí Suti. Ta vaha kuhva nyehí vatyí ña sacuví kuhva cuñí mai, soco kuhva cuñí Suti, ra cha tachí chii.

³¹ Ta tatu suri mai cuví cha ndaa chi mai, ñahri yahvi nyaá cha ndaa cuan.

³² Soco iyó inga ra cuví cha ndaa cuenda yuhu. Ta yuhu chité vatyí cha cahán ra cuende yucuan cuví noo cha ndaa ta cha ndicha.

³³ Nyoho chindacā tuhun ndo chi ra Juan. Ta tuhun cha cahan ra, ndicha vaha.

³⁴ Soco yuhu ña chiñuhú cha cuví rayi cha ndaa cuende. Soco catyí tuhun ihya chi ndo cha cuenda cha vaha chi ndo, tacuhva vatyí chino iñi ndo chii ta cacu añima ndo.

³⁵ Ra Juan cuví ra tari noo lámpara cha cayú ta sacundichín. Ta nyoho tahan iñi ndo cusñi iñi ndo nu ndichin ñuhú ra suhva ri quivi.

³⁶ Soco yuhu iyó noo cha ndaa vaha ca cha nuu cha catyí ra Juan. Vatyí tandihí cha sacuví yuhu, maa Suti catyí chii na sacuvi. Ta ican cuví cha ndaa cha nyehé ndo vatyí ndicha vatyí maa Suti tachí chii.

³⁷ Ta tyicuan caa tucu Suti, ra cha tachí chii, cuví ra cha ndaa cuende. Nyoho ta cuiñi ca ndo ndusu ra. Ta ni ta nyehe ca ndo chi ra.

³⁸ Ta tuhun ra cha cahín nuu ndo, ña ndoó chi añima ndo vatyí ña chinó iñi ndo vatyí Nyoo tachí ra chii.

³⁹ Nyoho chihin cuenda xaan sacuaha ndo nu tutu Nyoo, vatyí cuñí maa ndo vatyí nuu cuan cuanañihi ndo ñayivi chaa cha ma naa ca maa. Soco nu tutu Nyoo cuan, tuhun yuhu cahán chi.

⁴⁰ Ta nyoho ña cuñí ndo quichi ndo nu nyaí tacuhva vatyí cuhve ñayivi chaa cuan coo ndo.

⁴¹ Yuhu ña nduqui nu cuvahi nuu ñayivi.

⁴² Vatyí yuhu ñohó nui chi nyoho ta chité vatyí ña cuñí ndo chi Nyoo.

⁴³ Yuhu vachi cuenda Suti ta nyoho ña naquehén ndo tuhun cahín. Soco tatu inga ra vachi ra cuenda maa ra, chi ra cuan nachino iñi ndo.

⁴⁴ Nyoho ña cuví chino iñi ndo chii vatyí cuñí ndo cuvaha ndo nu tahan ndo. Ta ña nducú ndo nu cuvaha ndo nuu Nyoo cha noo tuhun ri maa iyó.

⁴⁵ Ma cuñi ndo vatyí cutyaa yuhu cuatyí chaha ndo nuu Suti. Ra Moisés cuví ra tyaá cuatyí chaha ndo vatyí ña sacuví ndo ley cha tyaa ra. Ta ley ra cuñí maa ndo vatyí cunyaca chi chi ndo andivi.

⁴⁶ Vatyí tyehe ta chinó iñi ndo tuhun cahan ra Moisés, chinó tucu iñi ndo tuhun cahan yuhu. Vatyí tuhun yuhu ican tyaa ra.

⁴⁷ Soco tatu ña chinó iñi ndo tuhun cha tyaa ra, ¿yoso caa cuchino iñi ndo tuhun

cahán yuhu? —catyí ra Jesús chi ra cacuví nuu chi ñu Israel.

6

Nu chaha ra Jesús cha cachi ohon mil rayi

(Mt. 14.13-21; Mr. 6.30-44; Lc. 9.10-17)

¹ Cha yaha cuan, ra Jesús cuahan ra inga chiyo miñi cahnu cha nañí Tyañuhu Galilea. Ta suri miñi cuan nañí chi Miñi Tiberias.

² Cuaha xaan ñayivi cuahan nyicon chi ra cha cuenda vatyí nyehé ñu milagru cha sacuví ra vatyí sanduvahá ra chi ñu cuhví.

³ Tyicuan ta ra Jesús ndaa ra noo yucu ta chicunyaá ra yucuan chihin ra cachicá noo chihin ra.

⁴ Ta cha nyañaa quivi vico cha nañí pascua cha sanducahnú ñu Israel.

⁵ Cha nanyehé ra Jesús vatyí cuaha ñayivi nyicón chi ra, ta quichaha catyí ra chi ra Felipe:

—¿Yoso caa cusata yo cha cachi tandihí ñayivi cuaha ihya? —catyí ra chi ra.

⁶ Soco catyí ri maa ra chi ra Felipe cha nducú nyehe ra chi ra ñáá catyí ra, vatyí ra Jesús chitó vaha ra ñáá cha cuasacuvi ra.

⁷ Tyicuan ta nacahan ra Felipe ta catyí ra: —Yahvi cha quehen yo cha saha tyiño yo ucha tahan yoo ta ma ñihi sata yo cha cachi ñu chiin chiin —catyí ra Felipe.

⁸ Ta ra Andrés nonga ra nyicón chi ra Jesús, ta yañi ra Simón Pedro cuví chi ra, catyí ra chi ra Jesús:

⁹ —Ihya nyaá noo ra cuehe luhlu nyisó cue ohon tahan pan cebada ta uvi tahan tiyaca. Soco ¿nyata cuví ihya ta cuaha ñayivi ihya? —catyí ra Andrés.

¹⁰ Tyicuan ta ra Jesús catyí ra chi ra:

—Catyí ndo chi tandihí ñu na cunyicu ñu —catyí ra.

Iyó vavaha cuhu yucuan ta chicunyicu ñu ta cha ohon mil rayi, ta sñin ri ñusihí chihin ra cuatyaa.

¹¹ Tyicuan ta quehen ra Jesús pan cuan ta cha yaha nacuhva ra tyahvi nyoo chi Nyoo, chaha ra chi ra cachicá noo chihin ra. Ta ra cachicá noo chihin ra casacha ra chi tandihí ñu canyicú cuan. Suri tyicuan caa sacuvi tucu ra chihin tiyaca cuan, chaha ra cachi ñu nyacua nya cha chitu chi ñu.

12 Ta cuhva cha ndaha iñi ñu, ra Jesús catyí ra chi ra cachicá noo chihin ra:

—Nācoñehe ndo yiquin cha ndoo tacuhva vatyí ñahri cha tiví —catyí ra chi ra.

13 Canacoñehe ra, ta casacutu ra uchi uvi tahan tica chihin yiquin cha ndoo cuan cha cuenda ohon tahan pan cuan.

14 Tyicuan ta cha yaha nyehe ñáyiví cuan milagru cha savaha ra Jesús, ta catyí ñu:

—Ican ndicha cuii ra ihya cuví profeta, ra chahá cuenda tuhun cahan Nyoo cha nyaá cha quichi siqui ñuhu ñayiví ihya —catyí ñu.

15 Soco tuví iñi ra Jesús vatyí cuñí ñu quehen ñu chi ra chihin fuerza vatyí sacuvi ñu rey chi ra. Ta cuahan ri ra nu sucun yucu cuan inga chaha vatyí cunyaa no-tuhun maa ra.

*Nu chicá ra Jesús nu ndutya
(Mt. 14.22-27; Mr. 6.45-52)*

16 Ta cha cuaa, ta noo coyo ra cachicá noo chihin ra Jesús yuhu miñi cuan.

17 Ta quihví coyo ra chichi canoa ta cuayaha sava ra mahñu miñi cuan vatyí cuchaa ra Capernaum. Cha cuñaa ta ra Jesús suri cha ta ndichi ca ra.

18 Tyicuan ta chaq noo tatyí ñihi. Ta iyo ndicuita ndutya miñi cuan.

19 Tyicuan ta cha cayaha ra chihin canoa cuan tari noo cha ohon o iñu kilómetro, ta cananyehe ra chi ra Jesús suri chicá ra nu ndutya cuan cuachaa ra nu nyaá canoa cuan, ta canayuhví ra.

20 Soco ra Jesús catyí ra chi ra:

—¡Yuhu cuví, ma yuhvi ndo!

21 Tyicuan ta chihin cha casií cuñi ra caquehen cuenda ra chi ra Jesús chichi canoa. Tyicuan ta tañi ri ta cachaa ra yuhu miñi nu cuahan coyo ra.

Nu nanducú ñáyiví chi ra Jesús

22 Tuvi inga quiví cuan cha ñaha cuii chitó ñáyiví cha ndoo inga chiyo miñi cuan vatyí ra cachicá noo chihin ra Jesús cuahan coyo ra chihin noo canoa cha iyó cuan. Vatyí noo ri maa iyó. Ta chitó ñu tyi ña cuahan ra Jesús chihin ra.

23 Soco chaq coyo ca canoa cha quita coyo ñuu Tiberias. Chaq chi yatyin ri ityi nu

cachachí ñu pan, yaha cha nacuhva Sutú Mañi yo tyahvi nyoo chi Nyoo.

24 Tyicuan ta cha nanyehe ñu tyi yori ra Jesús yucuan ta ni ra cachicá noo chihin ra, quihví coyo ñu chichi inga canoa cuan ta cuahan ñu nya Capernaum cuananducu ñu chi ra.

Ra Jesús cuví pan cha chahá ñayiví chaa coo yo

25 Cha chaq coyo ñu inga chiyo miñi cuan, nañihí ñu chi ra Jesús. Ta ndaca tuhun ñu chi ra:

—Maestro, ¿ama chaun ihya? —catyí ñu chi ra.

26 Soco ra Jesús catyí ra chi ñu:

—Cha ndicha catyí chi ndo vatyí nyoho nanducú ndo chii soco cha cuenda vatyí chachí ndo nyacua nya cha chitú chi ndo. Soco ñima vatyí nyehe ndo milagru cha sacuvi.

27 Ma saha tyiño ndo cuenda nyayu cha ndihí, soco saha tyiño ndo cuenda nyayu cha ña ndihí ta chahá chi noo ñayiví chaa cha ma naa ca maa coo ndo. Ican ihya cuví nyayu cha cucuhve chi ndo vatyí Nyoo Suti tyaq tyiño cuan chii vatyí yuhu cuví Rayi cha quichi nya gloria —catyí ra Jesús.

28 Tyicuan ta quichaha ndaca tuhun ñu chi ra ta catyí ñu:

—¿Ñáá cha cuví sacuvi ndi tacuhva sacuvi ndi cuhva cuñí Nyoo? —catyí ñu.

29 Tyicuan ta ra Jesús catyí ra chi ñu:

—Cha cuñí Nyoo cha sacuvi ndo ican cuví ihya: Cha chino iñi ndo chi yuhu, ra cha tachí ra chi —catyí ra Jesús chi ñu.

30 Ta candaca tuhun tucu ñu chi ra, ta catyí ñu:

—¿Ñáá seña cuhvon chi ndi tacuhva vatyí nyehe ndi ta chino iñi ndi chuun? ¿Ñáá cha cuasacuvun?

31 Sutú chahnu ndi chachí ñu maná chiqui ndi nu yori ñáyiví iyó quiví cuan, tari catyí tuhun Nyoo: “Nyoo chaha ra pan cha quichí ityi andiví cachi ñu” —catyí ñu chi ra Jesús.

32 Ta ra Jesús nacañan ra ta catyí ra:

—Cha ndicha catyí chi ndo. Ñima ra Moisés chaha pan cha quichí ityi andiví cachi ñu, soco Nyoo Suti cuví ra chahá pan cha ndicha vaha cha quichí ityi andiví.

³³ Vatyí pan cha chahá Nyoo, ican cuví ra cha noo ityi andiví. Ta ican cuví ra cha chahá noo ñayiví chaa coo ñu iyó siqui ñuhu ñayiví —catyí ra Jesús.

³⁴ Tyicuan ta quichaha cacatyí ñu chi ra:
—Tata, cuhva pan chiña cachi ndi tyicuan ri maa —catyí ñu.

³⁵ Ta nacahan ra Jesús ta catyí ra chi ñu:
—Yuhu cuví pan cha chahá cha conyito aña ndo. Ñu vachi nu nyaí ma cusoco ca aña ñu, ta ñu chino iñi chii ma cu ityi ca maa aña ñu.

³⁶ Soco cha yaha catyí chi ndo vatyí nyoho ña chinó iñi ndo vasi cha nyehé ndo chii.

³⁷ Tandihí ñayiví cha chaha Nyoo Suti chii, vachi ñu nu nyaí, ta ñu vachi nu nyaí, naquehén cuende chi ñu.

³⁸ Vatyí yuhu quichí ityi andiví soco ñima cha cuenda cha sacuví cuhva cuñí mai, soco sacuví cuhva cuñí ra cha tachí chii.

³⁹ Ta cuhva cuñí ra cha tachí chii, ican cuví ihya: cha ma sacunai ni noo ñu cha chahá ra chii, tacuhva vatyí sanandote chi ñu nu cuandihí quiví.

⁴⁰ Suti, ra cha tachí chii, cuñí ra vatyí tandihí ñayiví cha nyehe chi yuhu ra cha cuví Sehe Nyoo, ta chino iñi ñu chii, coo ñu noo ñayiví cha ma naa ca maa. Ta suri yuhu cusanandote chi ñu nu cuandihí quiví —catyí ra Jesús chi ñu.

⁴¹ Cha cuenda cha cahan ra Jesús tyehe caa, ñu Israel quichaha cacahan nyaa ñu chi ra vatyí catyí ra: “Yuhu cuví pan cha quichí ityi andiví”, catyí ra.

⁴² Tyicuan ta quichaha catyí ñu:

—¿Atu ñima ra cuví ra Jesús, sehe ra José vii? Yoó ñohó nuu yo chí sutu ra ta chí sihi ra. ¿Yoso caa cha catyí ra vatyí ityi andiví quichí ra? —catyí ñu.

⁴³ Tyicuan ta ra Jesús catyí ra chi ñu:

—Sandihí ndo tuhun cha cahan nyaa ndo.

⁴⁴ Yori maa ñu quichi nu nyaí tatu ñima Suti, ra cha tachí chii, cana chi ñu. Ta cusanandote chi ñu nu cuandihí quiví.

⁴⁵ Nu libru cha catyaa ra profeta Nyoo ta cha naha catyí chi tyehe caa: “Nyoo cusañaha ra chi tandihí ñayiví.” Yucuan chaha vatyí ñu cha tyasohó tuhun cahan

Nyoo Suti ta cutuhvá ñu tuhun cahan ra, ican ñu vachi nu nyaí.

⁴⁶ Ñima cha cuenda vatyí nyehé ñu chi Nyoo Suti, vatyí yori nyehé chi ra. Soco noo ri mai nyehé chi ra. Ta iquen cuví ra cha quita nu nyaá ra.

⁴⁷ Cha ndicha catyí chi ndo vatyí ñu chinó iñi chii coo ñu noo ñayiví chaa cha ma naa ca maa.

⁴⁸ Yuhu cuví pan cha chahá cha conyito aña ndo.

⁴⁹ Sutu chahnu ndo chachí ñu maná chiqui ndi cuan, soco suri cachihí ñu.

⁵⁰ Soco yuhu, tuhun pan cha quichí ityi andiví cahín chihin ndo, vatyí nya ñu cachi pan cuan, ma cuví aña ñu.

⁵¹ Suri mai cuví pan nyitó cha quichí ityi andiví. Yóo cha cachi pan ihya coo ñu tyicuan ri maa. Pan cha cuhva yuhu, ican cuví coño ñuhi. Ta cuhve ñayiví cha cuenda tandihí ñayiví iyó siqui ñuhu ñayiví —catyí ra Jesús chi ñu.

⁵² Tyicuan ta ra Israel cuan quichaha candatuhun ra chihin tahan ra ta cacatyí ra:

—¿Yoso caa cuhva ra cha cachi yo coño ñuhu ra?

⁵³ Ta ra Jesús catyí ra:

—Cha ndicha catyí chi ndo, yuhu cuví Rayi cha quichí nya gloria, ta tatu nyoho ta ma cachi ndo coño ñuhi, ta tatu ma coho ndo niñi, ma cuvi coo ndo ñayiví chaa.

⁵⁴ Ñu chachí coño ñuhi ta chihí ñu niñi, iyó ñu noo ñayiví chaa cha ma naa ca maa. Ta yuhu cusanandote chi ñu nu cuandihí quiví.

⁵⁵ Vatyí coño ñuhi ican cuví pan cha ndicha vaha cha tahán chi cachi ndo, ta niñi cuví vinu cha ndicha vaha cha tahán chí coho ndo.

⁵⁶ Ñu chachí coño ñuhi ta chihí niñi, ñn ri cuví ñu chihin. Ta mai ñn ri cuví chihin ñu.

⁵⁷ Suti ra tachí chii, Nyoo nyitó cuví ra. Ta yuhu iyé chihin tunyee iñi ra. Ta suri tyicuan caa tucu ñu chachí coño ñuhi, coo ñu chihin tunyee iñi iyó chii.

⁵⁸ Tuhun pan cha quichí ityi andiví cahín. Pan ihya ñima tari maná cha chachí sutu chahnu ndo, vatyí suri chihí ñu. Ñu chachí pan cha cuví coño ñuhi, coo ñu tyicuan ri maa —catyí ra Jesús.

⁵⁹ Ican tuhun ihya sañaha ra Jesús nu ndu ñin ri ñu chichi vehe ñuhu Capernaum.

⁶⁰ Cuaha xaan ñáyiví nyicón chi ra Jesús. Ta cuhva cha chiñi ñu tuhun ihya catyí ñu:

—Tuhun cha cahan ra ihya, yí xaan cha natin cuenda yo. Yori cuví quichaha tuhun cahán ra —catyí ñu.

⁶¹ Tyicuan ta tuví ñi ra Jesús vatyí ña cuñí ñu naquehen ñu tuhun cuan. Ta ndaca tuhun ra chi ñu:

—¿Atu quiñi cuñí ndo cha cahín tuhun ihya?

⁶² Ta ¿yoso caa sacuvi ndo tatu nyehe ndo chi yuhu Rayí cha quichi nya gloria nandaa xica tiquí inga chaha ityi nu quite quiví xihna ri?

⁶³ Tatyí li Nyoo ican cuví cha chahá ñáyiví chaa. Coño ñuhu, ña tyinyeé chi coo yo ñáyiví cuan. Ta tuhun cha cahín chihin ndo, Tatyí li Nyoo cuví ta chahá chi cha conyito aña ndo.

⁶⁴ Soco yihí suhva ndo cha ña chinó ñi ndo chii —tyicuan caa catyí ra Jesús.

Vatyí nya quiví xihna ri ta chitó ra yóo cha ña chinó ñi chi ra ta yóo cha cunaxico tuhun chi ra.

⁶⁵ Ta catyí ra:

—Yucuan chaha catyí chi ndo vatyí yori ñu cuví quichi nu nyaí tatu ñima Nyoo Suti cana chi ñu —catyí ra Jesús.

⁶⁶ Nya ndaha quiví cuan cuaha xaan ñu nyicón chi ra Jesús sandoo ñu chi ra. Ta ña chicá noo ca ñu chihin ra.

⁶⁷ Tyicuan ta ra Jesús ndaca tuhun ra chi ndihí uchi uvi tahan ra chicá noo chihin ra, ta catyí ra:

—¿Atu cuñí tucu nyoho cuhun ndo? —catyí ra chi ra.

⁶⁸ Soco nacahan ra Simón Pedro ta catyí ra:

—Sutu Mañi yuhu, ¿yóo chi cunyicon ndi? Ta noo tuhun yoho cahún tuhun ñáyiví cha ma naa ca maa coo ndi.

⁶⁹ Nyuhu chinó ñi ndi, ta ñoho nuu ndi chuun vatyí yoho cuvún ra cuví Cristo Sehe Nyoo nyitó.

⁷⁰ Ta nacahan ra Jesús ta catyí ra:

—¿Atu ñima yuhu nacachí chi ndi uchi uvi nyoho? Ta noo nyoho cuví cuihna —catyí ra.

⁷¹ Tuhun cha cahán ra Jesús ihya, tuhun ra Judas Iscariote sehe ra Simón cuví. Vatyí ra Judas cuví ra cucuhva cuenda chi ra Jesús chi ra xaan ñi chi ra, vasi noo ra cha uchi uvi cuan cuví ra.

7

Nu ña cachinó ñi yañi ra Jesús chi ra

¹ Cha yaha tuhun ihya, ta ra Jesús chicá noo ra ityi Galilea. Ña cuñí ra cuhun ra Judea vatyí ra cacuví nuu chi ñu Israel cuan cacuñí ra cacahñi ra chi ra.

² Ta cha nyaña quiví vico cha sanduc-ahnu ñu Israel ndi cuiya ri. Ta nañi chi vico Tabernáculo.

³ Yucuan chaha yañi ra Jesús cacatyí ra chi ra:

—Ma ndoun ihya. Cuahan Judea tacuhva vatyí ñu naquehén tuhun cahún cha nyicú yucuan nyehe ñu tyiño cha sacuvún.

⁴ Vatyí tatu cuñí yo cha cohon nuu ñáyiví chi yo, ma xehe ri sacuví yo cha sacuví yo. Ta yoho tatu ndicha cha sacuvún tuhun ihya, sacuvi nuu tandihí ñáyiví —cacatyí yañi ra chi ra.

⁵ Tyicuan caa cacatyí ra vatyí ni yañi ra ta ña chinó ñi ra chi ra.

⁶ Tyicuan ta ra Jesús catyí ra chi ra:

—Ta chaa ca cuhva cha cuhun yuhu. Soco nyoho savahri quiví cuví cuhun ndo.

⁷ Vatyí ñáyiví ña cutasi cuñí ñu nyehé ñu chi ndo, soco chi yuhu tasi cuñí ñu nyehé ñu cha cuenda vatyí cachi ri catyí chi ñu vatyí ña vaha cha nyacuví ñu.

⁸ Cuahan nyoho vico cuan. Yuhu ma cuhin vatyí ta chaa ca cuhva cha tahan chi cuhin —catyí ra.

⁹ Yaha cuan ta ndoo ra nya Galilea.

Nu ñohó ra Jesús vico Tabernáculo

¹⁰ Cha yaha cuahan coyo yañi ra Jesús, cuahan tucu maa ra vico cuan, soco xehe ri.

¹¹ Ta ra cacuví nuu chi ñu Israel canan-ducú ra chi ra vico cuan, ta cacatyí ra chi ra tahan ra:

—¿Nya nyaá ra cuan? —catyí ra.

¹² Ta ñáyiví ñohó vico cuan cacahan ñu tuhun ra. Ta yihí ñu catyí ñu: “Noo ra vaha cuví ra.” Ta inga ñu catyí ñu: “Ña vaha ra, sandaví ñaha ra chi ñáyiví”, catyí ñu.

13 Soco yori cahán ndichin tuhun ra cha cuenda cha yuhví ñu chi ra cacuví nuu cuan.

14 Cha cusava iyó vico ta quihví ra Jesús chichi vehe ñuhu cahnu quichahá cahan ra nuu ñáyiví.

15 Ta ra cacuví nuu cuan iyó cacuñí ra ta cacatyí ra chi ra tahan ra:

—¿Yoso caa chitó ra ihya ta ña sacuahá ra? —catyí ra.

16 Ta nacahan ra Jesús ta catyí ra:

—Tuhun cha sañahí, ñima cha cuenda mai cuví, soco cuenda ra cha tachí chii cuví.

17 Tatu yihí nyoho cha cuñí ndo sacuvi ndo cuhva cuñí Nyoo, cua coto ndo vatyí cuenda Nyoo sacote ta ñima cha cuenda mai.

18 Ra cha cahán cuenda maa, cahán ra na sacahnu ñáyiví chi ra. Soco ra nanducú cha sacahnu ñu chi Nyoo, ra cha tachí chi ra, ican ra cuan cahán cha ndicha. Ta ñahri cha sandaví ñaha ra.

19 ¿Atu ña ndicha vatyí ra Moisés chahá ley chi ndo? Soco ni noo nyoho ña quichahá ndo ley cuan. ¿Ñáá tuhun cuñí ndo cahñi ndo chii? —catyí ra.

20 Ta nacahan ñáyiví ta catyí ñu chi ra:

—Noo tatyí ña vaha yihí chi yoho. Yori cuñí cahñi chuun —catyí ñu chi ra.

21 Ta catyí ra Jesús:

—Cha catyí noo milagru cha sacuví quívi nyitatu yo, iyo xaan cuñí nyoho.

22 Soco ra Moisés catyí ra chi ndo vatyí sacuvi ndo costumbre circuncisión. Vasi ñima ra quichahá chihin tuhun cuan, soco ñáyiví chi ra ityí chata, casacuvi tyicuan caa. Yucuan chaha nyoho sacuví ndo costumbre cuan vasi tahán chi quívi nyitatu yo.

23 Ta vityin, vaha tatu cha cuenda cha ña cuñí ndo nacahnu ndo ley ra Moisés sacuvi ndo tyicuan caa vasi quívi nyitatu yo tahán chi. Soco tatu tyicuan caa sacuvi ndo, ¿ñáá tuhun cha cuxaan ndo chii cha cuenda vatyí sanduvahí nani coño ñuhu noo ra cuan quívi nyitatu yo?

24 Ma tyaa ndo cuatyí siqui ñáyiví tatu ña chitó vaha ndo ñáá cha sacuvi ñu. Cuatu ndo nya nyehe vaha ndo, tyicuan ta cucoto

ndo yoso caa sacutuñi ndo chihin cha ndaa ta chihin cha ndicha vaha.

Nu cahán ra Jesús tuhun maa ra

25 Tyicuan ta suhva ñu iyó Jerusalén, quichahá ndaca tuhun ñu:

—¿Atu ñima chi ra ihya canducu ra cha cahñi ra?

26 Ta maa ra nanyaá cuan cahán ra nuu ñáyiví. Ta yori maa catyí ñáá cha catyí chi ra. ¿O vasi ca chinó tucu iñi ra cacuví nuu vatyí ra ihya ra Cristo ra cuvi rey cha saquichi Nyoo cuví ra?

27 Soco yoó chitó yo nya quitá ra ihya. Soco quívi quichi ra Cristo yori coto nya ityí quichi ra cuan —catyí ñu.

28 Chitó ra Jesús tuhun cha ndatuhún ñu ihya cuhva cha sañahá ra chichi vehe ñuhu. Ta ñihi cahán ra ta catyí ra:

—¡An ñohó nuu ndo chii ta chitó ndo nya ityí quichi, cuñi maa ndo! Soco yuhu vachí soco ñima cuenda mai. Vachí cuenda ra cha tachí chii, ra cha cuví cha ndicha. Ta nyoho ña ñohó nuu ndo chi ra.

29 Yuhu ñohó nui chi ra vatyí cuenda ra vachi, ta maa ra tachí chii —catyí ra Jesús.

30 Tyicuan ta cuñí ñu tyihi ñu chi ra chichi vehe caa. Soco ni noo ñu ña tñin ñu chi ra cha cuenda vatyí ta chaa ca quívi cha tahán chi tñin ra chi ra.

31 Soco cuaha xaan ñu chinó iñi chi ra. Ta catyí ñu:

—Ican ra ihya cuví Cristo. ¿Atu cuaha ca milagru sacuvi inga ra tatu quichi ra? —catyí ñu.

Nu tachi ra cuví fariseo policía cuquehen chi ra Jesús cohon ra vehe caa

32 Cha chiñi ra fariseo cha cahán ñáyiví tuhun ra Jesús, maa ra ta ra cacuví nuu chi tata sutu catachí ra chi policía cuenda vehe ñuhu cuan cuquehen ra chi ra tyi cohon ra vehe caa.

33 Tyicuan ta ra Jesús catyí ra:

—Cunyai chihin ndo suhva ri ca quívi. Yahá cuan ta cunuhi nu nyaá ra cha tachí chii.

34 Nyoho cunanducu ndo chii. Soco ma nañihi ndo chii. Vatyí ma cuvi cahun ndo nu cuacunyai —catyí ra Jesús.

35 Tyicuan ta quichaha candaca tuhun ra cacuví nuu chi ñu Israel chi ra tahan ra:

—¿Nya cuhun ra ihya cha ma nañihi yo chi ra? ¿O cuhun ra nu nyaa ra Israel cha ca iyó ñuu Grecia vatyí sañaha ra chi ñu iyó yucuan, vaha?

³⁶ ¿Ñáá cha cuñí chi catyi tuhun cahan ra chihin yo? Vatyí catyi ra: “Cuananducu ndo chii soco ma nañihi ndo chii. Vatyí ma cuví cuhun ndo nu cucunyai” —tyicuan caa cacuví yuhu ra tuhun ra.

Ñu chinó iñi chi Nyoo cucohon Tatyí Ii ra añima ñu

³⁷ Quiví nu ndihi chiyo vico, yucuan quívi cha ñiñi ca. Ta quívi cuan ndicuita ra Jesús ta ñihi cahán ra ta catyí ra:

—Tatu nya noo ndo ityi añima ndo tuhun Nyoo, ñaha ndo ta nāchino iñi ndo chii.

³⁸ Ñu cha chinó iñi chii, chichi añima ñu cucono tari noo yuvi ndutya cha nyitó, tari cuhva catyí nu tutu Nyoo —catyí ra Jesús.

³⁹ Soco chihin cuan cuñí ra catyi ra vatyí ñu chinó iñi chi ra cunaquehen ñu Tatyí Ii Nyoo, vatyí quívi cuan ta quichi ca Tatyí Ii Nyoo vatyí ra Jesús, ta cunuhu ca ra nya gloria nu cusacahnu Sutu ra chi ra.

Nu cusñi ñáyivi cha ña tahán iñi tuhun cahan ra

⁴⁰ Suhva ñáyivi cha chiñi ñu tuhun ihya, catyí ñu:

—Ndicha vatyí ra ihya profeta Nyoo cha nyaá quichi cuví ra —catyí ñu.

⁴¹ Ta inga ñu catyí ñu:

—Ican ra cuví Cristo —catyí ñu.

Soco inga ñu catyí ñu:

—¿Yoso caa cha ra Galilea cuví ra Cristo?

⁴² Vatyí nu tutu Nyoo catyí chi vatyí ra Cristo cucuvi ra ñáyivi vachi tata rey David ta ra ñuu Belén cucuvi ra tari ra David —catyí ñu.

⁴³ Tyicuan ta ñáyivi cuan canatahví sava ñu cha cuenda ra Jesús.

⁴⁴ Yihí ñu cuñí ñu quehen ñu chi ra cutyíhi ñu chi ra chichi vehe caa. Soco yori tñi chi ra.

Ra cacuví nuu vehe ñuhu ña cachinó iñi ra chi ra Jesús

⁴⁵ Tyicuan ta policía vehe ñuhu cahnu cuan, cuanuhu coyo ra nu nyicú ra fariseo ta ra cuví nuu chi tata sutu. Ta candaca tuhun ra chi policía cuan ta cacatyí ra:

—¿Ñáá tuhun ña quehen ndo chi ra?

⁴⁶ Ta policía cuan cacatyí ra:

—¿Ni noo chaha ta ni yori tuhva cahan tari cahán ra cuan! —cacatyí ra.

⁴⁷ Tyicuan ta ra fariseo catyí ra chi policía cuan:

—¿Atu sandaví ñaha ndihi ra chi nyoho ñandihí?

⁴⁸ ¿Nyehé ndo vatyí ni noo ra cuví nuu chi ndi cha cuví ndi fariseo ta ña chinó iñi chi ra cuan?

⁴⁹ Soco maa ri ñáyivi cha ña chitó nyicón chi ra. Soco ña vaha ñu nuu Nyoo —catyí ra.

⁵⁰ Tyicuan ta ra Nicodemo, ra cha chahan nu nyaá ra Jesús cha cha cuaa, cuví ra noo ra fariseo, ta catyí ra chi ra:

⁵¹ —Catyí ley vatyí ma cuví tachi tuñi yo chi noo ra tatu ma cuiñi xihna yo tuhun cahan ra, tacuhva coto yo ñáá cha sacuví ra —catyí ra chi ra.

⁵² Tyicuan ta canacahan ra ta cacatyí ra chi ra:

—¿Atu suri ra Galilea cuví tucu yoho? Sacuaha nu tutu Nyoo ta nyehun, vatyí ni noo ra chahá cuenda tuhun cahán Nyoo ta ña nyaá chi cha quichi ra ityi Galilea —cacatyí ra.

Ñaha sihi cha natuvi chihin rayi ta iyó yñi

⁵³ Tyicuan ta tahan tahan ra cuanuhu coyo ra vehe ra.

8

¹ Soco ra Jesús cuahan ra yucu cha nañi Olivo.

² Ta cha inga quívi cuhva cha vachi cundichin, cuahan tucu ra inga chaha vehe ñuhu cahnu. Ta tandihí ñáyivi tuhva ñu nu nyaá ra. Ta maa ra chicunyaá ra ta quichaha cahan ra nuu ñu.

³ Tyicuan ta ra sacuahá cuenda ley ta ra cuví fariseo cha coyo ra chihin noo ñaha iyó yñi vatyí natñi ra chi ña nu cuatyí ña chihin inga rayi. Ta cuatyaa ra chi ña mahñu ñáyivi nyicú cuan.

⁴ Ta quichaha cacatyí ra chi ra Jesús:

—Maestro, ñaha sihi ihya natñi ndi chi ña nu cuatyí ña chihin inga rayi.

⁵ Ta ley cha tyaa ra Moisés catyí chi vatyí nacañi yo chihin yuu chi ñusihi cha sacuví

tyehe caa. ¿Ta yoho, yoso caa catyun vityin? —catyí ra chi ra.

⁶ Cacatyí ra tuhun ihya chi ra Jesús cha cuenda cha nducú nyehe ra chi ra tacuhva tyaa ra noo cuatyí síqui ra. Tyicuan ta ra Jesús chicunyaá tyayí ra nu ñuhú ta quichaha tyaa ra letra nu ñuhú chihin nundaha ra.

⁷ Soco vatyí candacá tuhun ca ra chi ra, tyicuan ta nicuinanyaá ra ta catyí ra chi ra:

—Xihna ca nyoho cha ñahri cuatyí ndo quehen ndo yuu ta cañi ndo chi ña —catyí ra chi ra.

⁸ Ta nicunyaá tucu ra ta quichaha sañihi ra tyaa ra letra nu ñuhú.

⁹ Soco maa ra cha cachiñi ra tuhun ihya, tuví iñi ra tyi iyó tucu cuatyí maa ra. Ta quichaha quita coyo tahan tahan ri ra, quichaha xihna ca ra chahnu. Ta cuhva cha ndihi ra quita coyo ta ndoo noo tuhun ca maa ra Jesús chihin ñaha síhi cuan mahñu nu nyicu ñáyivi.

¹⁰ Tyicuan ta nicuinanyaá ra Jesús ta nyehe ra tyi cha cuahan coyo ra cuan ta ndoo noo tuhun ri ca ñaha. Tyicuan ta catyí ra chi ña:

—¿Nya nyaá ra tyaa cuatyí sícun vityin? ¿Yori ni minoo ca ra cuñi cahñi chuun? —catyí ra chi ña.

¹¹ Ta nacahan ña ta catyí ña:

—Ni nonga ra, Tata.

Tyicuan ta ra Jesús catyí ra chi ña:

—Ni yuhu ta ma cahñi chuun. Cuahan vityin. Ta ma sacuvi con cuatyí —catyí ra chi ña.

Ra Jesús cuví cha ndichin cha sandichin aña ñáyivi

¹² Tyicuan ta cahan tucu ra Jesús nuu ñáyivi inga chaha, ta catyí ra chi ñu:

—Yuhu cuví ra cha sandichin aña ñáyivi iyó síqui ñuhu ñáyivi. Yóo cha nyicón chii, coo ñu noo ñáyivi chaa nu ndichin. Ta ma caca noo maa ñu nu ñaa iñi —catyí ra Jesús chi ñu.

¹³ Tyicuan ta ra cacuví fariseo cacatyí ra chi ra:

—Yoho, cahún tumañi iñi cuenda maun. Ta yucuan ña ndicha —catyí ra chi ra.

¹⁴ Nacahan ra Jesús ta catyí ra:

—Vasi suri mai cahín tumañi iñi cuende, soco ndicha cha cahin vatyí yuhu chité nya

ityi quichi ta nya ityi cuahín. Soco nyoho ña chitó ndo nya ityi quichi ni nya ityi cuahín.

¹⁵ Nyoho yatyin xaan cahan ndo cha caa ñáyivi. Soco yuhu, yori chi cahin cha caa.

¹⁶ Soco tatu catyí cha caa ñáyivi, catyí cha ndicha. Vatyí ñima noo ri mai nyehí, soco Suti ra cha tachi chii, ican ra nyehé chihin.

¹⁷ Nu ley nyoho nyaá vatyí tatu uvi ra chaha cha ndaa, cuñi chi chinó iñi yo cha ndaa cuan.

¹⁸ Ta vityin vaha, suri mai cuví cha ndaa cuenda mai. Ta Suti, ra cha tachi chii, cuví inga cha ndaa —catyí ra Jesús chi ra.

¹⁹ Tyicuan ta candacá tuhun ra chi ra:

—¿Nya nyaá sutun?

Ta ra Jesús catyí ra:

—Nyoho ña ñohó nuu ndo chi yuhu. Ta ni chí Suti ña ñohó nuu ndo. Tyehe ta ñohó nuu ndo chii, cohon nuu ndo chi Suti —catyí ra.

²⁰ Tuhun ihya cahan ra Jesús cha ni ri ca cha sañahá ra chichi vehe ñuhu cahnú, nu nyaá caja nu tyihí ñáyivi xuhun. Soco yori tyihí chi ra vehe caa, vatyí ta chaa ca quivi cha tahán chi cohon ra.

“Nu cuhun yuhu ma cuví cuhun ndo”, catyí ra Cristo

²¹ Ra Jesús catyí ra chi ra cacuvi fariseo inga chaha:

—Yuhu cuhin, ta nyoho cunanducu ndo chii, soco cucúvi ndo ta cundoo cuatyí ndo síqui ndo. Nu cuahan yuhu, nyoho ma cuví cuhun ndo —catyí ra Jesús chi ñu.

²² Tyicuan ta ra cacuví nuu chi ñu Israel cacatyí ra:

—¿Atu cucahñi maa ra chi ra? vatyí catyí ra vatyí ma cuví cuhun yo nu cuahan ra —cacatyí ra.

²³ Tyicuan ta ra Jesús catyí ra:

—Nyoho ra cuenda ityi yuvi ihya cuví ndo. Soco yuhu ra cuenda ityi síqui cuví. Nyoho ñu ñuhu ñáyivi ihya cuví ndo. Soco yuhu ñima ra ñuhu ñáyivi ihya cuví.

²⁴ Yucuan chaha catyí chi ndo vatyí cucúvi ndo ta cundoo cuatyí ndo síqui ndo. Vatyí tatu ña chinó iñi ndo cha yuhu cuví ra tinyaá cuatyí ndo, cundoo cuatyí ndo síqui ndo quivi cúvi ndo —catyí ra Jesús chi ra.

²⁵ Tyicuan ta quichaha candacá tuhun ra chi ra, ta catyí ra:

—¿Yóó ra cuví yoho?

Ta ra Jesús nacahan ra ta catyí ra:

—Cha yaha catyí chi ndo nyata quívi xihna ri.

²⁶ Cuaha xaan ca cha nyaá cha catyí chi ndo, ta cuaha xaan ca nyaá catyí cha caá ndo. Soco tuhun cha catyí yuhu chi ñáyivi iyó síqui ñuhu ñáyivi, tuhun cha chiñi cha cahán ra cha tachí chii cuví. Ta maa ra cahán ra cha ndicha —catyí ra.

²⁷ Soco maa ra cacuví nuu chi ñu Israel ña cutuñi ñi ra vatyí tuhun Nyoo Sutu yo cahán ra chihin ra.

²⁸ Yucuan chaha catyí ra chi ra:

—Cutyaa ndo chi ra cuví Rayí cha quichi nya gloria nu cruzi. Tyicuan ta cunacoto ndo vatyí yuhu cuví, ta cucoto ndo vatyí tyiño sahí ñima cha cuenda mai sacuví, soco cahín cha sañahá Suti chii.

²⁹ Vatyí Suti, ra cha tachí chii, nyaá ra chihin. Ta ña sandoó ra chii cha maa ri mai. Vatyí yuhu tyicuan ri sacuví cuhva cuñi ra —catyí ra Jesús.

³⁰ Cha cahán ra Jesús tuhun ihya, cuaha ra quichaha chino ñi ra chi ra.

Ñu cha cuví Sehe Nyoo ta ñu cha sacuví cha quiñi caa

³¹ Tyicuan ta catyí ra Jesús chi ra cacuvi nuu chi ñu Israel cha chinó ñi chi ra:

—Tatu nyoho ta sañihi ca ndo sacuvi ndo cuhva sañahí chi ndo, cuchaa ndo cuví ndo noo ñu yíhi cuende.

³² Ta cucoto ndo cha ndicha. Ta chihin cha ndicha cuan cundoo ndo libre —catyí ra.

³³ Ta canacahán ra ta catyí ra:

—Nyuhu ñáyivi vachi tata ra Abraham cuví ndi. Ta ni noo chaha ta cuví ca ndi musu chi ni noo ñáyivi. ¿Yoso caa cha catyí yoho tyi ndoo ndi libre? —catyí ra chi ra.

³⁴ Ta ra Jesús catyí ra:

—Cha ndicha catyí chi ndo vatyí tandihi ñu sacuví cha quiñi caa, musu cuenda cha quiñi caa cuví ñu.

³⁵ Noo musu ña nyaá ra vehe chitoho ra tyicuan ri. Soco noo sehe ra cuví chitoho cuan, nyaá ra tyicuan ri chihin sutu ra.

³⁶ Yucuan chaha tatu yuhu cha cuví Sehe Nyoo ta tave chi ndo ndaha ra ña vaha, ndicha cuii cucoo ndo libre.

³⁷ Cha chité vatyí ñáyivi chi ra Abraham cuví chi ndo. Soco yíhi ndo cuñi ndo cahñi ndo chii, vatyí ña tñn cuenda ndo tuhun cahin.

³⁸ Yuhu cahín cha sañahá Suti chii. Ta nyoho sacuví ndo cha catyí sutu ndo chi ndo —catyí ra chi ra.

³⁹ Ta canacahan ra ta catyí ra:

—Sutu ndi cuví chi ra Abraham —catyí ra.

Soco ra Jesús catyí ra chi ra:

—Tyehe ta ndicha cha sehe ra Abraham cuví chi ndo, sacuví ndo cha sacuví ra.

⁴⁰ Soco nyoho, vasi catyí chi ndo cha ndicha cha sañahá Nyoo chii, nyoho cuñi ndo cahñi ndo chii. ¡Ra Abraham ña sacuví ra cha tyicuan caa!

⁴¹ Nyoho tari sacuví sutu ndo, sacuví ndo —catyí ra chi ra.

Tyicuan ta nacahan ra ta catyí ra:

—Nyuhu ñima sehe ndahvi ñu cuví chi ndi. Iyó noo ri sutu ndi ta ican ra cuví Nyoo —catyí ñu.

⁴² Tyicuan ta ra Jesús catyí ra:

—Tyehe ta ndicha cha Nyoo cuví sutu ndo, nyoho cuñi ndo chii. Vatyí yuhu quite nu nyaá ra ta chaj nyehe. Ña vachí cuenda mai, soco Nyoo tachí chii.

⁴³ ¿Ñáá tuhun cha ña cutuñi ñi ndo tuhun cha catyí chi ndo? Cha cuenda tyi ña cuñi ndo tyasohó ndo tuhun cahín.

⁴⁴ Cuihna ican ra cuví sutu ndo. Ta sehe ra cuví chi ndo. Ta cuñi ndo sacuvi ndo cuhva cuñi ra. Ra chahñi ñáyivi cuví cuihna nyata quívi xihna ri. Ni noo chaha ña sacuví ra cha ndicha. Ta ni noo chaha ña cahán ra cha ndicha. Cuhva cha cahán ra cuendu, cahán ra cuhva caá ra, vatyí cuendu ra. Ta sutu ñu cuendu cuví chi ra.

⁴⁵ Ta yuhu vatyí cahín cha ndicha, ña chinó ñi ndo chii.

⁴⁶ ¿Nya noo nyoho cuví catyí ndo vatyí yuhu iyó noo cuatyí? Ni noo ndo. Ta cha tyicuan caa cahín cha ndicha, ¿ñáá tuhun cha ña chinó ñi ndo chii?

⁴⁷ Ñu cuenda Nyoo tyasohó ñu tuhun cahán Nyoo. Soco vatyí nyoho ñima ñu cuenda Nyoo cuví ndo, yucuan chaha ña cuñi ndo tyasoho ndo tuhun cahín —catyí ra Jesús.

Ra Cristo, nyata nicumañi coo ra Abraham, ta cha iyó ra

⁴⁸ Tyicuan ta ra cacuvi nuu chi ñu Israel cacatyí ra chi ra:

—¿Atu ña ndicha vatyí yoho ra ñuu Samaria cuvún, ta ñohó noo tatyí ña vaha chuun? —cacatyí ra chi ra.

⁴⁹ Ta nacahan ra Jesús ta catyí ra:

—Ñahri tatyí ña vaha ñohó chi yuhu. Chi Suti sacahní. Ta nyoho cahán ña vaha ndo siqui.

⁵⁰ Yuhu ña nanduquí nu sacahnu ñáyivi chii, soco iyó noo ra nanducú cha sacahnu ñu chii. Ta maa ra cunyehe ra tatu sacahnú ndo chii.

⁵¹ Cha ndicha catyí vatyí ñu quichahá tuhun cahín ma chaa tuhun chihi añima ñu —catyí ra Jesús chi ra.

⁵² Tyicuan ta ra Israel cuan canacahan ra ta catyí ra:

—Vityin chitó vaha ndi vatyí yihí noo tatyí ña vaha chuun. Vatyí ra Abraham ta tandihi ra cuví profeta Nyoo cachihí ra. Ta yoho catyún vatyí ñu quichahá tuhun cahún ma cúvi maa ñu.

⁵³ ¿Atu cahnu ca ra cuví yoho ican saha sutu ndi ra Abraham? Maa ra chihí ra ta ra cuví profeta Nyoo ñandihí. ¿Yóó ra cuví yoho cuñi maun? —catyí ra chi ra.

⁵⁴ Ta nacahan ra Jesús ta catyí ra:

—Tatu suri mai sacahní chii, ñahri maa vale cuan. Soco ra sacahnú chii, ican cuví Suti. Ta suri maa ra cuví cha catyí nyoho tyi Nyoo cuenda ndo cuví chi ra.

⁵⁵ Soco nyoho ña ñohó nuu ndo chi ra. Yuhu, ñohó nui chi ra. Ta tatu catyí tyi ña ñohó nui chi ra, cuví noo ra cuendu tari nyoho. Soco yuhu ndicha cha ñohó nui chi ra, ta quichahí tuhun cahán ra.

⁵⁶ Ra Abraham sutu chahnu ndo cusii xaan cuñi ra vatyí cunyehe ra quivi quichi yuhu siqui ñuhu ñáyivi. Ta nyehe ra ta cusii xaan cuñi ra —catyí ra Jesús chi ñu.

⁵⁷ Tyicuan ta ra Israel cuan cacatyí ra chi ra Jesús:

—Ni uvi xico uchi cuiya ta quita con, ta catyún tyi nyehun chi ra Abraham.

⁵⁸ Ta ra Jesús nacahan ra ta catyí ra:

—Cha ndicha catyí chi ndo vatyí nyata ni cumañi coo ra Abraham ta cha iyó yuhu —catyí ra Jesús chi ra.

⁵⁹ Tyicuan ta quehen ra yuu vatyí cañi ra chi ra Jesús. Soco maa ra quihvi xehe ra, ta quita ra chichi vehe ñuhu cuan. Ta yaha ra mahñu ra ta cuahan ra.

9

Nu sanduvaha ra Jesús chi noo ra cha cuaa nyata cacu

¹ Cuhva cha yaha ra Jesús noo nu yaha ra, nyehe ra chi noo ra cha cuaa nyata cacu.

² Ta quichahá ndaca tuhun ra cachicá noo chihin ra Jesús chi ra:

—Maestro, ¿ñáá tuhun cha cacu cuaa ra ihya? ¿Atu cha cuenda cuatyí sihi ra ta sutu ra, o cha cuenda cuatyí maa ra? —cacatyí ra chi ra.

³ Ta ra Jesús nacahan ra ta catyí ra:

—Ñima cuatyí maa ra, ta ni ñima cuatyí sihi ra ta sutu ra. Soco cha cuenda vatyí cuví sañaha Nyoo tunyee iñi ra chihin ra.

⁴ Cha ni ri ca cha ñicahñu, cuñi chi cha sacuvi tyiño ra cha tachí chii. Vatyí vachi cha cuaa cha ma cuví ca saha tyiño yo.

⁵ Cha ni ri ca cha nyaí siqui ñuhu ñáyivi ihya, ñuhu ndichin cuenda ñáyivi iyó siqui ñuhu ñáyivi cuví.

⁶ Cha yaha cha catyí ra Jesús tuhun ihya, ta tyicu sii ra nu ñuhú. Ta savaha ra chiin nyahyu chihin sii ra ta tyaa ra chiti nuu ra cuaa cuan.

⁷ Tyicuan ta catyí ra chi ra:

—Cuahan cuanacatyá nuun nya tanque Siloé cuan. —Sivi cuan cuñi chi catyí: “Tachí Chuun.”

Tyicuan caa ta ra cuaa cuan chahan ra chinacatyá ra nuu ra. Ta cuhva cha nachaa ra, cha nyehe ra.

⁸ Tyicuan ta ñu nyicú yatyin yuvehe ra, ta ñu cha nyehe chi ra cha cucuaa ra ta caya ra, catyí ñu:

—¿Atu ñima ra ihya cuví cha tuhva chinyaa chican caridaa? —catyí ñu.

⁹ Yihí ñu catyí ñu:

—Ican ra.

Inga ñu catyí ñu:

—Ñima ra cuví ra, soco ndacú xaan ra chi ra.

Soco maa ra catyí ra:

—Ican yuhu cuví —catyí ra.

¹⁰ Tyicuan ta quichaha candaca tuhun ñu chi ra:

—¿Ta yoso caa cha cuví nyehun vityin?
—catyí ñu.

¹¹ Ta catyí ra:

—Ra cha nañí Jesús cuan, ican savaha nyahyu ta tyaa ra chiti nui ta catyí ra chii: “Cuahan nya tanque Siloé ta nacatyon nuun.” Tyicuan ta chahin. Ta cha yaha nacatye nui ta nanyehi —catyí ra chi ñu.

¹² Tyicuan ta quichahá ndaca tuhun ñu chi ra:

—¿Nya nyaá ra cuan vityin?

Ta maa ra catyí ra:

—Ña chité —catyí ra chi ñu.

Nu casanahma ra cuví fariseo chi ra cha cucuaa ta nanyehé

¹³ Tyicuan ta chinyaca ñu chi ra cha cucuaa cuan nuu ra cuví fariseo.

¹⁴ Vatyí quivi cha savaha ra Jesús nyahyu ta sanduvaha ra chi ra cha cucuaa cuan, quivi nyitatú yo cuví.

¹⁵ Yucuan chaha ra fariseo candaca tuhun tucu ra chi ra yoso caa cha vatyí nanyehé ra. Ta maa ra catyí ra:

—Tyaa ra nyahyu chiti nui, ta nacatye ta vityin ndichin nyehí —catyí ra chi ra.

¹⁶ Tyicuan ta suhva ra fariseo cacatyí ra:

—Ra cha sacuvi tyehe caa ñima ra cuenda Nyoo cuví ra, vatyí ña sahá ra ñáyivi quivi nyitatú yo —cacatyí ra.

Soco inga ra cacatyí ra:

—¿Yoso caa cha cuví sacuvi ra milagru ihya tatu ra iyó cuatyí cuví ra? —catyí ra.

Ta siin siin cha cacahan ra. Ta cacusiin ra.

¹⁷ Ta candaca tuhun tucu ra inga chaha chi ra cha cucuaa cuan, ta catyí ra chi ra:

—¿Ta yoho, ñáa catyún cuenda ra cha sanduvaha chiti nuun? —catyí ra.

Ta nacahan ra ta catyí ra:

—Yuhu catyí vatyí noo profeta cuenda Nyoo cuví ra —catyí ra.

¹⁸ Soco ra cacuvi nuu chi ñu Israel ña cuñí ra chino iñi ra cha cucuaa ra cuan ta vityin nyehé ra. Ta nyacua nya cha cacana ra chi sihi ra ta chi sutu ra cha nduvaha cuan.

¹⁹ Ta candaca tuhun ra chi ñu, ta catyí ra:

—¿Atu ican ra ihya cha cuví sehe ndo cha catyí ndo tyi cuaá ra ta cacu ra? ¿Yoso caa cha cuví nyehe ra vityin? —catyí ra.

²⁰ Ta nacahan sutu ra ta sihi ra ta catyí ñu:

—Chitó ndi vatyí ican ra ihya cuví sehe ndi. Ta cuaá ra nyata cacu ra.

²¹ Soco ña chitó ndi ñáa tuhun cha cuví nyehe ra vityin. Ta ni ña chitó ndi yóo cha sanduvaha chiti nuu ra. Ndaca tuhun ndo chi maa ra. Cha iyó cuiya ra. Ta cuví nacatyí maa ra chi ndo —catyí ñu chi ra.

²² Sutu ra sihi ra catyí ñu tyehe caa cha cuenda cha yuhví ñu chi ra cacuvi nuu chi ñu Israel, vatyí cha catyihí tahan ra tuhun vatyí cutava ñehe ra chi ñu vehe ñuhu, yóo ri ñu cha catyí vatyí ra Jesús cuví Cristo.

²³ Yucuan chaha catyí ñu: “Cha ñihi ra. Ndaca tuhun ndo chi maa ra.”

²⁴ Tyicuan ta canacana tucu ra chi ra cha cucuaa cuan inga chaha. Ta cacatyí ra chi ra:

—Chihin nuu Nyoo catyí cha ndicha chi ndi. Vatyí nyuhu chitó ndi tyi rayi cuan, ra iyó cuatyí cuví ra —cacatyí ra.

²⁵ Tyicuan ta nacahan ra cha cucuaa cuan ta catyí ra:

—Yuhu ña chité tatu ra iyó cuatyí cuví ra, o ñima. Soco noo ri cha chité vatyí yuhu cucuai, ta vityin ndichin nyehí —catyí ra.

²⁶ Ta candaca tuhun tucu ra chi ra inga chaha ta catyí ra:

—¿Ñáa cha sacuvi ra chuun? ¿Yoso caa sacuvi ra ta nanyehún? —cacatyí ra chi ra.

²⁷ Ta catyí ra:

—Cha catyí chi ndo, ta ña quichahá ndo chii. ¿Ñáa tuhun cha cuñí ndo cha catyí inga chaha? ¿Atu cuñí tucu nyoho cunyi-con ndo chi ra?

²⁸ Tyicuan ta cacahan ra chi ra, ta catyí ra:

—Yoho yihún cuenda ra, soco nyuhu cuenda ra Moisés yihí ndi.

²⁹ Nyuhu chitó ndi tyi Nyoo cahan chihin ra Moisés. Soco ra cuan, ña chitó ndi nya quitá ra —cacatyí ra.

³⁰ Tyicuan ta nacahan ra cucuaa cuan ta catyí ra:

—¿Ñana vaha cha cuví ihya! Nyoho ña chitó ndo nya quitá ra, ta chi yuhu sananyehé ra.

³¹ Chitó vaha yo vatyí Nyoo ña tyasohó ra nu chicán ra iyó cuatyí. Soco ra cha sacahnú chi ra ta sacuvi cuhva cuñí ra, tyasohó Nyoo nu chicán ra cuan.

³² Ni noo chaha ta cuiñi ca yo vatyí iyó noo ra sananyehe chi noo ra cuaá nyata cacu.

³³ Tyehe ta ra ihya ta ñima cuenda Nyoo vachí ra, ñahri cha cuví sacuvi ra —catyí ra chi ra.

³⁴ Tyicuan ta cacatyí ra chi ra:

—Yoho ra iyó cuatyí cuvún nyata cacun. ¿Ta cuñún sañahun chi nyuhu? —cacatyí ra.

Ta catava ñehe ra chi ra vehe ñuhu.

Ñu cha ñahri tuhun Nyoo caa aña tari cha cuaa ñu

³⁵ Ra Jesús chitó ra vatyí catava ñehe ra chi ra cucuaa cuan vehe ñuhu. Ta cuhva cha nañihí ra chi ra ta catyí ra chi ra:

—¿Atu chinó iñi yoho chi Rayi cha quichi nya gloria? —catyí ra chi ra.

³⁶ Ta nacañan ra ta catyí ra:

—Tata, catyí chii, yóo ra cuví ra vatyí chino iñi chi ra —catyí ra chi ra.

³⁷ Ta ra Jesús catyí ra:

—Cha nyehun chi ra. Ta ican ra ndatuhún chuhun —catyí ra chi ra.

³⁸ Tyicuan ta chicuiñi chiti ra chaha ra Jesús ta catyí ra chi ra:

—Chinó iñi chuun, Sutu Mañi yuhu —catyí ra chi ra Jesús.

³⁹ Ta ra Jesús catyí ra:

—Yuhu vachí vatyí catyí cha caá aña ñáyivi iyó siqui ñuhu ñayivi ihya. Vatyí ñu cuaa, ñu ña chitó tuhun Nyoo cunanyehe ñu vatyí cucava tuhun Nyoo aña ñu. Ta ñu cuñi maa tyi ndichin nyehe tyi catyí ñu tyi chitó ñu tuhun Nyoo, coto ñu tyi cuaa ñu tyi ña chinó iñi ñu chii —catyí ra Jesús.

⁴⁰ Tyicuan ta suhva ra cuví fariseo cha nyicú yucuan chiñi ra cha cañan ra Jesús, ta catyí ra chi ra:

—¿Atu cuaa tucu nyuhu ñandihí? —catyí ra.

⁴¹ Tyicuan ta catyí ra Jesús chi ra:

—Tyehe ta cuaa nyoho, nicohón nuu ndo tyi chiñuhú tuhun Nyoo chi ndo, ta ma coo cuatyí ndo. Soco vatyí catyí ndo tyi nyehé ndo ta chitó ndo, yucuan chaha ndoó cuatyí siqui ndo —catyí ra chi ra.

10

Mbee sana Nyoo cuví ñáyivi yihí cuenda ra, ta ñohó nuu ñu chi ra cha tachí Nyoo vatyí sahá cumi ra chi ñu

¹ Cahán ca ra Jesús ta catyí ra:

—Cha ndicha catyí chi ndo, tatu noo ra cuaquihvi chichi noo chacu mbee, ta cha nuu cha quihvi ra yuhu chacu, quihvi ra inga ityi, ra suhu cuví ra.

² Soco ra quihvi ityi yuhu chacu, ra sahá cumi mbee cuan cuví ra.

³ Ra nyaá yuhu chacu cuan nuña ra na quihvi ra sahá cumi mbee cuan. Ta mbee cuan nicohón soho ti ndusu ra. Noo noo ti ta iyó sivi ti sahá ra, ta cana ra chi ti ta tava ra chi ti ityi chata chacu.

⁴ Ta cha yahá tava ra chi ti, ta cuahan ra ityi nuu ti ta nyicón ti chi ra, vatyí nicohón soho ti ndusu ra.

⁵ Soco tatu ña ñohó soho ti ndusu ra, chinó ti chi ra ta ma cunyicon ti chi ra.

⁶ Tyehe caa tuhun cañan ra Jesús chihin ñu. Soco maa ñu ña cutuñi iñi ñu ñaá tuhun cuñi ra cahán ra cha tyicuan caa.

Ra Jesús cuví ra sahá cumi vaha mbee

⁷ Tyicuan ta catyí ra Jesús inga chaha chi ñu:

—Cha ndicha catyí chi ndo vatyí yuhu cuví tari noo yuhu chacu nu quihvi coyo ñáyivi cuende cha cuví ñu tari mbee sane.

⁸ Tandihí ra cha yahá caquichí coyo, ra suhu cacuví ra. Soco mbee ña quichahá ti cha cacañan ra.

⁹ Yuhu cuví yuvehe gloria. Ñu quihvi cuende, cacu ñu cha ma cuhun ñu anyaya. Ta cuví ñu tari noo mbee cha quihvi ta quitá chichi chacu cuan. Ta ñihí ti cuhu cachi ti.

¹⁰ Noo ra suhu vachí ra, soco vachí suhu ra, vachí cahñi ra, vachí sativi ra. Soco yuhu vachí vatyí coo ndo noo ñayivi chaa cha ma naa ca maa.

¹¹ Yuhu cuví noo ra vaha sahá cumi mbee. Vatyí ra sahá cumi mbee chahá ra ñayivi ra cuenda sana ra.

¹² Soco ra cuví musu, tatu nyehé ra vachí lobo cha cuví noo quití xaan, sandoo maa ra chi mbee sana chitoho ra. Ta chinó ra. Vatyí ñima sana maa ra cuví ti. Tyicuan ta tin quití xaan chi mbee cuan. Ta saquicono ti chi ti ityi cuan ityi ihya.

13 Musu cuan chino ra cha cuenda vatyí cha cuenda xuhun ri sahá tyiño ra. Ta ñahri cuenda ra chi mbee, tyi ñima sana ra cuví.

14 'Yuhu cuví ra sahá cumi vaha mbee sane. Ta ñohó nui chi ti. Ta maa ti ñohó nuu ti chii,

15 tari ñohó nuu Suti chii, ta yuhu ñohó nui chi ra. Yuhu चाहि ñayiví cuenda mbee sane.

16 Iyó tucu inga mbee sane cha ñima chichi chacu ihya iyó ti. Cuñí chi cha cuhin cunaquehin chi ti. Ta cuquichaha ti chii. Ta coo noo ri nu quihí tandihí ti. Ta noo ri ra sahá cumi chi ti cucoo.

17 'Suti cuñí ra chii vatyí चाहि ñayiví cha catyí ñáyiví cuende. Soco yaha cuan, nacuhva tucu ra ñayiví inga chaha.

18 Yori tinyaá ñayiví, soco cha iyó vaha iñi mai ta चाहि. Iyó ityi chii cha cuhve ñayiví ta cúvi, ta iyó tucu ityi chii cha naquehen tiqui inga chaha vatyí cunandote. Ican ihya cuví tyiño cha tyaa Suti chii —catyí ra Jesús.

19 Cha cachiñi tucu ra cacuví nuu chi ñu Israel tuhun cha cahán ra Jesús ihya, cacusiñ tucu ra chihin tahan ra inga chaha.

20 Ta cuaha xaan ra catyí ra:

—¿Ñáa tuhun cha quichaha ndo chi ra chiña? Ta yihí noo tatyí ña vaha chi ra, ta loco ra —cacatyí ra.

21 Ta inga ra catyí ra:

—Yori ñu ñohó tatyí ña vaha chi cahán tyehe caa. ¿Atu cuví sananyehe noo tatyí ña vaha chi noo ra cuaa? —catyí ra.

Nu ña cuñí ra cacuví nuu chi ñu Israel chi ra Jesús

22 Nya ñuu Jerusalén yoo vichin cuví. Ta sanducahnú ñu noo vico quiví nanduchin cuiya cha suhñi ñu vehe ñuhu cahnu cuan.

23 Ta ra Jesús chicá noo ra vehe ñuhu cuan ityi corredor ra Salomón.

24 Ta ra cacuví nuu chi ñu Israel cachicuitayucu cutya ra nuu ra. Ta quichaha ndaca tuhun ra chi ra:

—¿Ama catyí cachun chi ndi tatu icon cuví Cristo? ingaña ri catyí cachi chi ndi.

25 Ta ra Jesús catyí ra:

—Cha yaha catyí chi ndo, ta ña chinó iñi ndo chii. Tyiño sacuví nuu Suti ican cuví cha ndaa cuende.

26 Soco nyoho ña chinó iñi ndo chii vatyí ñima mbee sane cuví chi ndo. Tari cuhva catyí chi ndo ndaa ri.

27 Mbee sane nicohón soho ti ndusi, ta yuhu ñohó nui chi ti. Ta maa ti nyicón ti chii.

28 Yuhu चाहि ñayiví cha ma naa ca maa coo ti. Ta ma cunaa ti. Ta ni yori maa cuví tinyaa chi ti chichi ndahi.

29 Maa Suti chaha chi ti chii. Ta cahnu ca cuví maa ra ican saha tandihí ca. Ta yori cuví tinyaa chi ti chichi ndaha ra.

30 Yuhu ta Suti Nyoo, noo ri cuví ndi —catyí ra Jesús.

31 Tyicuan ta ra cacuví nuu chi ñu Israel cuan caquehen tucu ra yuu vatyí tuchi ra chi ra.

32 Ta ra Jesús catyí ra chi ra:

—Cuaha xaan cha vaha sacuví yuhu nuu ndo chihin tunyee iñi Suti. ¿Ta nya cuenda cuan cua tuchi ndo yuu chii? —catyí ra Jesús chi ra.

33 Ta ra cacuví nuu chi ñu Israel cuan cacatyí ra:

—Ñima cha cuenda noo cha vaha sacuvun cutuchi ndi yuu chuun, soco cha cuenda vatyí yahun nuu Nyoo chihin tuhun cahún. Noo rayi ri cuvún, soco sahún tari Nyoo chuun —cacatyí ra chi ra.

34 Tyicuan ta catyí ra Jesús chi ra:

—Nu tutu tuhun Nyoo nyaá vatyí Nyoo catyí ra: “Nyoho cuví ndo nyoo”, catyí Nyoo.

35 Chitó yo vatyí cha cahán tuhun Nyoo, ma cuví catyí yo tyi ña ndicha. Ta Nyoo sacunañi ra nyoo chi ñu naquehen tuhun cahán ra.

36 Ta tatu maa Nyoo nacachi chi yuhu ta tachi ra chii siqui ñuhu ñayiví ihya ¿yoso caa catyí nyoho vatyí yaha yuhu nuu Nyoo nu catyí tyi Sehe Nyoo cuví chii?

37 Tatu ña sacuví cha sacuví Suti, ma chino iñi ndo chii.

38 Soco tatu sacuví, vasi ma chino iñi ndo chii, soco chino iñi ndo tyiño sacuví. Tyicuan ta cucoto cachi ndo vatyí Nyoo Suti ñn ri cuví ra chihin. Ta yuhu ñn ri cuví chihin Nyoo Suti —catyí ra Jesús.

39 Inga tucu chaha cacuñi ra catyíhi ra chi ra vehe caa, soco ra Jesús cuahan ri ra.

⁴⁰ Tyicuan ta cuanuhu ra ityi nu caña ñanyii inga chiyo yuvi cahnu Jordán cuan nu sacondutyā ra Juan ta xihna ri.

⁴¹ Cuaha ñáyiví chahān chinyehe chi ra, ta catyí ñu:

—Ndicha, vasi ni noo milagru ña sacuví ra Juan, soco tandihí tuhun cha cahān ra cuenda ra ihya ta ndicha —catyí ñu.

⁴² Ta cuaha xaan ñu cachino ñi ñu chi ra Jesús ityi cuan.

11

Nu chihí ra Lázaro

¹ Iyó noo ra cuhví cha nañí Lázaro ñuu Betania nu cuví ñuu cu María ta cu Marta cuhu ña.

² Ta cu María, cuhva ra Lázaro cuan ican ña cuví ñaha cha choso ndutya vixi chahān chaha Sutu Mañi yo, ta chihin ixi xiñi ña nacuhva ña.

³ Ta tyicuan caa ninduvi tahan ñu, cu María chihin cuhu ña, tachí ñu tyiño na cucatyí ra chi ra Jesús tyehe caa;

—Sutu Mañi ndi, amigon cuhví ra —catyí ñu, tachí ñu tyiño.

⁴ Ta cha chiñi ra Jesús tuhun ihya ta catyí ra:

—Cuehe cuan ma cahñi chi chi ra. Cuhví ra tyehe caa tacuhva vatyí quiví nduvaha ra cunyehe ñáyiví tyi cahnu xaan ca ra cuví Nyoo ta tyicuan caa tucu Sehe ra —catyí ra Jesús tuhun maa ra.

⁵ Cuñí vavaha ra Jesús chi cu Marta ta chi cuhu ña, ta chi cuhva ña, ra Lázaro.

⁶ Soco cuhva cha catyí ñu chi ra tyi cuhví ra Lázaro, ndoo ra nu ñohó ra uvi ca quiví.

⁷ Tyicuan ta catyí ra chi ra cachicá noo chihin ra:

—Coho ndo inga chaha nya Judea —catyí ra.

⁸ Tyicuan ta ra cachicá noo chihin ra cacatyí ra chi ra:

—Maestro, ta cunaha ca cha cuñí ra cacuví nuu chi ñu Israel cahñi ra chuun chihin yuu. Ta vityin, ¿inga chaha cuñún cuhun yucuan? ¿Ñáá tuhun?

⁹ Ta catyí ra Jesús:

—¿Atu ñima uchi uvi hora iyó noo quiví? Vatyí tatu cha ñicahñu chicá noo noo ra, ma nduva ra vatyí ndichin nyehé ra ta sacuví ra tyiño nuu Nyoo.

¹⁰ Soco tatu cha cha cuaa chicá noo ra, nduva ra vatyí ñahri ñuhu.

¹¹ Tyicuan ta quichaha catyí tucu ra Jesús:

—Amigo yo, ra Lázaro quixí ra. Soco cuhin cusandoye chi ra —catyí ra chi ra.

¹² Tyicuan ta catyí tucu ra cachicá noo chihin ra:

—Tata, tatu quixí ra, cuñí chi catyí vatyí cuanduvaha ra —cacatyí ra.

¹³ Soco ra Jesús cuñí ra catyí ra vatyí cha chihí ra Lázaro. Ta ra cachicá noo chihin ra, cuñí maa ra vatyí cha ndicha quixí ra cuan.

¹⁴ Tyicuan ta catyí cachi ra Jesús chi ra:

—Ra Lázaro cha chihí ra.

¹⁵ Ta cusii cuñí vatyí yori chinyaa yucuan. Vatyí tyicuan caa vaha ca cha cuenda nyoho, tacuhva chino ñi ndo chii. Coho ndo cunyehe ndo chi ra —catyí ra chi ra.

¹⁶ Tyicuan ta ra Tomás, cha catyí ñu: “ra tñihí cuan”, catyí ra chi inga ra cachicá noo chihin ra Jesús:

—Coho tucu yo vatyí cúvi yo ñin ri chihin ra —catyí ra.

Ra Jesús cuví ra sanandotó chi yo ta chahá ra ñáyiví coo yo

¹⁷ Cha chaā ra Jesús Betania, ñihí ra tuhun vatyí ra Lázaro cha cumi quiví ñohó ra chichi ñuhú.

¹⁸ Ñuu Betania cuan nyaá chi yatyin ri nu nyaá ñuu Jerusalén, tari noo uvi kilómetro sisava.

¹⁹ Ta cuaha ra cacuví nuu chi ñu Israel cuahan ra cuanyehe ra nu nyaá cu Marta ta cu María vatyí chihí cuhva ñu.

²⁰ Ta ñihí cu Marta tuhun vatyí cha cuachaa ra Jesús. Ta cuahan ña cuasatahan ña chi ra. Soco cu María ndoo ña vehe.

²¹ Ta cu Marta catyí ña chi ra Jesús:

—Sutu mañí yuhu, tyehe ta nyaun ihya, ma cúvi cuhve.

²² Soco yuhu chité vatyí Nyoo cusacuví ra tandihí cha cacon chi ra —catyí ña chi ra.

²³ Ta ra Jesús catyí ra chi ña:

—Cuhvon cunandoto ra.

²⁴ Ta cu Marta catyí ña:

—Ndicha, chité vatyí cunandoto ra quiví nandoto ndiyi nu cuandihí quiví —catyí ña.

²⁵ Tyicuan ta catyí ra Jesús chi ña:

—Yuhu cuví ra sanandotó chi ndiyi. Ta chahí cha conyito ñáyivi. Ñu chinó iñi chii, vasi cha chihí ñu soco coo tucu ñu.

²⁶ Ta tandíhi ñu nyitó ca ta chinó iñi ñu chii, ma cúvi maa ñu. ¿Atu chiñó iñun tuhun ihya? —catyí ra chi ña.

²⁷ Ta maa ña catyí ña:

—Chinó iñi, Sutu Mañi yuhu, vatyí yoho cuvún Cristo Sehe Nyoo, ra cha nyaá cha quichi síqui ñuhu ñáyivi ihya —catyí ña.

Nu chacu ra Jesús nu ñaña ra Lázaro

²⁸ Cha yahá cha catyí cu Marta tuhun ihya, ta chahan ña chiquehen ña chi huhu ña, cu María, ta catyí xehe ña chi ña:

—Cha chaá Ra Sacuaha. Ta tachí ra tyiño nacuhun nu nyaá ra —catyí ña.

²⁹ Ta cha chiñi cu María tuhun ihya, nducuitá ri ña, ta cuahan ña nu nyaá ra Jesús,

³⁰ Ta ra Jesús ta quíhvi ca ra chichi ñuu cuhva cuan, nyaá ra nu nañihí cu Marta chi ra.

³¹ Ta nya vehe cu María, nyicú ra cacuví nuu chi ñu Israel tyinyeé ra chi ñu. Ta nyehe ra vatyí numi ri quitá ña. Ta cuñi maa ra tyi cuahan ña nu ñaña cuacuacu ña. Ta cuahan coyo ra chata ña.

³² Ta cuhva cha chaá cu María nu nyaá ra Jesús chicuñi chiti ña chaha ra, ta catyí ña:

—Sutu Mañi yuhu, tyehe ta chinyaun ihya, cuhve ma cúvi ra —catyí ña.

³³ Nyehe ra Jesús cha chacú cu María chihin ra Israel cha vachi coyo chihin ña, ta nducuihya xaan cuñi añima ra.

³⁴ Ta ndaca tuhun ra chi ñu:

—¿Nya maa maa tyihí ndo chi ra? —catyí ra.

Ta catyí ñu:

—Tata, cohó ta nyehun —catyí ñu chi ra.

³⁵ Ta ra Jesús chacu ra.

³⁶ Tyicuan ta catyí ra Israel cuan:

—Nyehe ndo yoso cha cuñi ra chi ra —catyí ra.

³⁷ Soco suhva ñu catyí ñu:

—Ican ra ihya cha sananyehe chi ra cuaa cuan. ¿Atu ña cuví sanduvaha tucu ra chi ra Lázaro ihya? —catyí ñu.

Nu sanandotó ra Jesús chi ra Lázaro

³⁸ Nducuihya cuñi ra Jesús inga chaha ta tuhva ra nu ñaña cuan. Noo chichi yuu cuví. Ta nyasí noo yuu yuhu chi.

³⁹ Ta catyí ra Jesús:

—Sacanyaha ndo yuu chiña —catyí ra.

Ta cu Marta, cuhva ndiyí cuan, catyí ña:

—Soco cha caña xico, Sutu Mañi yuhu, vatyí cha cumi quívi cha chihí ra —catyí ña.

⁴⁰ Soco ra Jesús catyí ra chi ña:

—¿Atu ña cha catyí chuun vatyí tatu chinó iñun, cunyahun yoso cha cahnu cuví Nyoo? —catyí ra chi ña.

⁴¹ Tyicuan ta sacanyaha ñu yuu cuan. Ta ra Jesús nanyehé ndaa ra ityí andívi, ta catyí ra:

—Sutu Mañi yuhu, tyahvi nyoo chuun tyi chiñun cha cahín.

⁴² Yuhu chité vatyí tyicuan ri chiñun tuhun cahín. Soco tyehe caa cahín cha cuenda cha vaha chi ñáyivi nyicú ihya, tacuhva nachino iñi ñu tyi yoho tachí chii —catyí ra Jesús chi Nyoo.

⁴³ Cha yahá cha catyí ra tuhun ihya, canachaa ra, ta catyí ra:

—¡Lázaro, quita chiña!

⁴⁴ Ta quitá ra cha chihí cuan, nuhñi ndaha ra ta nuhñi chaha ra chihin sahma. Ta nuhñi nuu ra chihin noo sahma. Ta ra Jesús catyí ra chi ñáyivi nyicú yucuan:

—Ndachi ndo chi ra. Ta saña ndo chi ra nacuhun ra —catyí ra Jesús chi ñu.

Nu nducú cahñi ñu chi ra Jesús

(Mt. 26.1-5; Mr. 14.1-2; Lc. 22.1-2)

⁴⁵ Ta cuaha xaan ra cacuví nuu chi ñu Israel cha chahan coyo chihin cu María nachino iñi ñu cha nyehe ñu cha sacuví ra Jesús.

⁴⁶ Soco suhva ra chahan ra chisacoto ra chi ra fariseo cha sacuví ra Jesús.

⁴⁷ Tyicuan ta ra fariseo ta ra cacuví nuu chi tata sutu sacoo ra noo junta ta cacatyí ra:

—¿Ñáá cha sacuví yo? Vatyí cuaha xaan milagru sacuví ra cuan.

⁴⁸ Tatu cuhva yo cha sacuvi ca ra tyicuan caa, tandíhi ñáyivi cuchino iñi ñu chi ra. Ta ra cacuví tyiño nya ñuu Roma cuquichi ra ta cusatani ra vehe ñuhu yo ta ñuu yo —cacatyí ra chi ra tahan ra.

⁴⁹ Soco ra cuví nuu cahnu ca chi tata sutu cuiya cuan, ra nañí Caifás chahan ra ta catyí ra chi ra:

—Nyoho ñahri maa cha chitó ndo.

⁵⁰ Ni ña cutuñí iñi ndo vatyí vaha ca cha cúvi noo ri rayi cha cuenda tandihí ñáyivi ñuu, ta ñima ca cha cúvi tandihí yo —catyí ra Caifás.

⁵¹ Soco ra Caifás cuan ñima cha cuñí maa ra ta cahán ra, soco vatyí ra cuví nuu cahnu ca chi tata sutu cuiya cuan cuví ra, yucuan chaha maa Nyoo sacahan chi ra. Vatyí catyí ra vatyí ra Jesús cucúvi ra cha cuenda tandihí ñáyivi ñuu Israel.

⁵² Ta ñima cha cuenda ri ñu cuan, soco vatyí cusandu in ri ra chi tandihí ñu cuví sehe Nyoo cha iyó inga ñuu ñandihí.

⁵³ Yucuan ta nyacua nya quívi cuan ta ra cacuví nuu chi ñu Israel cuan, nducu ra cuhva yoso caa cahñi ra chi ra Jesús.

⁵⁴ Yucuan chaha tyi ra Jesús ña chicá noo ndichin ca ra nu nyicú ñu Israel. Ta quita ra ityi Judea cuan. Ta cuahan ra noo ñuu cha nañí Efraín cha nyaá yatyin ri ñuhu ityi. Ta yucuan ndoó ra chihin ra cachicá noo chihin ra.

⁵⁵ Ña cuaha ri ca quívi ta chaá vico cuenda ñu Israel, vico cha nañí pascua. Ta cuaha xaan ñáyivi quita ñu ñuu ñu ta cuahan ñu Jerusalén cuasacuví ñu cha tuhvá maa ñu sacuví cha sandundí ñu chi ñu nuu Nyoo cha ni cumañi ca cha quívi vico cuan.

⁵⁶ Nanducú ñu chi ra Jesús. Ta cuhva cha nyicú ñu chichi vehe ñuhu cahnu cuan ta ndaca tuhun ñu chi tahan ñu, ta catyí ñu:

—¿Yoso caa cuñí nyoho? ¿Atu cuquichi ra vico ihya, o ma quichi ra? —catyí ñu chi tahan ñu.

⁵⁷ Ta ra cacuví fariseo ta ra cacuví nuu chi tata sutu, catyí ra vatyí tatu nya noo ñu chitó ñu nya nyaá ra Jesús, nacatyí ñu. Vatyí cutiin ra chi ra vatyí cohon ra vehe caa.

12

Nu chosó cu María ndutya vixi chahán chaha ra Jesús

(Mt. 26.6-13; Mr. 14.3-9)

¹ Cumañi iñu ca quívi cha cuatahan chi vico pascua, ta chaá ra Jesús ñuu Betania nu iyó ra Lázaro, ra cha sanandoto ra Jesús chi.

² Yucuan savaha ñu cha cuxiñi ra Jesús. Cu Marta tyihí ña coho nu mesa. Ta chicunyaá ra Jesús nu mesa. Ta nyaá tucu ra Lázaro chihin ra.

³ Tyicuan ta cu María quehen ña ta cha sava litro ndutya vixi chahán cha chingo chihin maa ri nardo, noo cha yahvi xaan nyaá. Ta cuhvi ña chaha ra Jesús chihin ndutya vixi chahán cuan. Yahá cuan ta sana ityi ña chihin ixi xiñi ña. Tandihí chichi vehe cuan chitu chihin xico ndutya vixi chahán cuan.

⁴ Ta yucuan nyaá tucu ra Judas Iscariote, sehe ra Simón. Cuví ra noo ra chicá noo chihin ra Jesús. Ta suri maa ra cuví ra cha naxico tuhun chi ra Jesús nuu ra xaan iñi chi ra. Ta quichaha catyí ra Judas cuan chi ñu cuan:

⁵ —¿Ñáá tuhun ña xico ndo ndutya vixi chahán ihya chi ñáyivi, cuhva ñu cuenda mil chi ndo chihin, ta tyinyee ndo chi ñu ndahvi? —catyí ra.

⁶ Soco ra Judas ña catyí ra tuhun ihya cha cuenda cha ndahvi cuñí ra nyehe ra chi ñu ndahvi, soco vatyí ra suhu cuví ra. Ta vatyí ndaha maa ra nyaá yitin xuhun ta tuhvá ra suhu ra cha tyihí ñu chichi yitin cuan.

⁷ Tyicuan ta catyí ra Jesús chi ra:

—Saña chi ña, vatyí ñaha ihya sacuví ña tyehe caa cha cuenda cha cuquihvi coño ñuhi chichi ñuhu.

⁸ Ñu ndahvi tyicuan ri cu cunyicú ñu chihin ndo, soco yuhu ña tyicuan ri —catyí ra Jesús chi ra Judas cuan.

Nu nducu cahñi ra chi ra Lázaro

⁹ Cuaha xaan ñu Israel ñihí ñu tuhun tyi ra Jesús ñohó ra Betania, ta chahan coyo ñu nyicuan. Ñima cha cuñí ñu nyehe ñu chi ra Jesús ri, soco cuñí tucu ñu nyehe ñu chi ra Lázaro, ra cha sanandoto ra Jesús chi.

¹⁰ Tyicuan ta ra cacuví nuu chi tata sutu catyihí tahan ra tuhun vatyí cucahñi tucu ra chi ra Lázaro ñandihí.

¹¹ Vatyí cha cuenda ra ta cuaha xaan ñu Israel cacusin ñu chihin ra ta nachino iñi ñu chi ra Jesús.

Nu quihvi ra Jesús ñuu Jerusalén

(Mt. 21.1-11; Mr. 11.1-11; Lc. 19.28-40)

¹² Cuaha xaan ñáyivi cuahan ñu Jerusalén cha vico pascua. Ta cha inga quívi cachitó ñu tyi ra Jesús cuachaa ra.

¹³ Tyicuan ta chahnya ñu ndaha tunduc-aha ta cuahan coyo ñu cuasatahan ñu chi ra Jesús. Ta canachaa ñu, ta catyí ñu:

—¡Cahnu xaan ca cuví maa Nyoo! ¡Nasoco xaan Nyoo chi ra vachi ihya chihin tuncyee iñi Nyoo! ¡Nasoco xaan Nyoo chi Rey cuenda yo ñu Israel! —cacatyí ñu, canachaa ñu.

¹⁴ Ta ra Jesús ñihí ra noo burru ta chicoſo ra chi ti tari cuhva catyí maa nu tutu Nyoo tyehe caa:

¹⁵ Ma yuhvi ndo ñáyiví ñuu Sión Nyehe ndo, vachi Rey ndo.

Yosó ra noo burru —catyí chi nu tutu Nyoo.

¹⁶ Quiví cuan ra cachicá noo chihin ra Jesús, ña cacutuñí iñi ra tuhun cuan cha nyaá nu tutu Nyoo. Soco cha yaha cuanuhu ra Jesús gloria, canicohon iñi ra vatyí tandihí tuhun cuan ta nyaá nu tutu Nyoo tyí tyicuan caa cucuvi chi ra. Ta tyicuan caa cuví chi ra.

¹⁷ Ta ñáyiví cha nyehe quiví cha cana ra Jesús chi ra Lázaro chichi ñaña, quiví sanandotó ra chi ra, nacatyí ñu cha nyehe ñu.

¹⁸ Ta yucuan chaha cuaha xaan ñáyiví chisatahan ñu chi ra Jesús, vatyí chitó ñu milagru cha sacuví ra.

¹⁹ Tyicuan ta ra cuví fariseo cacatyí ra chi ra tahan ra:

—Cha nyehé maa ndo tyí ñahri maa cuví sacuví yo, vatyí tandihí ñáyiví nyicón chi ra —cacatyí ra.

Nu nducú suhva ra ñuu Grecia chi ra Jesús

²⁰ Ñohó tucu suhva ra ñuu Grecia mahñu ñáyiví cha chahan coyo chisacahnu vico ñuu Jerusalén cuan.

²¹ Tyicuan ta catuhva ra ñuu Grecia cuan nu nyaá ra Felipe, ra ñuu Betsaida nu cuví Galilea, ta cachacu ndahvi ra nuu ra ta cacatyí ra:

—Tata, cuñí ndi cahan ndi chihin ra Jesús —cacatyí ra.

²² Ta ra Felipe chahan ra chicatyí ra chi ra Andrés. Ta ninduvi ra chinacatyí ra chi ra Jesús vatyí ra Grecia cuan cuñí ra cahan ra chihin ra.

²³ Ta nacahan ra Jesús, ta catyí ra:

—Chaa cuhva vityin vatyí yuhu cha cuví Rayí cha quichi nya gloria, cuananuhu tiquí nya gloria, ta cusacahnu Suti chii.

²⁴ Cha ndicha catyí chi ndo vatyí tatu noo chiti ta ma quihí chichi ñuhú ta ma

tyahyu chi, noo ri chiti cucuvi chi tyicuan ri maa. Soco tatu tyahyu chi, nduchaa chi inga chaha ta coo cuaha ca chiti chi.

²⁵ Ñu cuñí xaan ñáyiví iyó ñu, cucunaa ñu. Soco ñu ña cuñí ñáyiví ñuhu ñáyiví ihya, cunañihi ñu noo ñáyiví cha ma naa ca maa cucoo ñu.

²⁶ Tatu yihí ndo cuñí ndo sacuvi ndo tyiño nui, cunyicon ndo chii. Ta nu cuacunyai, yucuan cucunyata tucu ñu sacuví tyiño nui. Tatu nya nyoho sacuví ndo tyiño nui, Suti cusacahnu ra chi ndo.

Nu cahan ra Jesús tuhun yoso caa cucúvi ra

²⁷ Vityin chicá xaan xiñi. Ta ¿ñáá cha cucatyí? ¿Atu catyí chi Suti na sacanyaha ra tindocho cha nyaá cunyehe vityin? Ma catyí cha tyicuan caa vatyí cha cuenda cuan vachi siqui ñuhu ñáyiví ihya.

²⁸ Vaha ca catyí chi Suti: “Sutu Mañi yuhu, sacahnu sivun” —catyí ra Jesús.

Tyicuan ta cahan noo ndusu ityi andiví ta catyí chi tyehe caa:

—Cha yaha sacahni sivi, ta cusacahni inga chaha —catyí ndusu cuan.

²⁹ Ta ñu nyicú yucuan, chiñi ñu ndusu cuan, ta catyí ñu vatyí savi cahan. Ta inga ñu catyí ñu:

—Noo ángel cahan chihin ra.

³⁰ Tyicuan ta ra Jesús catyí ra chi ñu:

—Ñima cha cuenda cha vaha chi yuhu cahan ndusu cuan soco cha cuenda cha vaha chi maa ndo cuví.

³¹ Vityin cuví cuhva cutachi tuñi Nyoo chi ñáyiví iyó siqui ñuhu ñáyiví. Ta vityin cuhva cutava ñehe Nyoo chi ra nyacá ñaha siqui ñuhu ñáyiví ihya.

³² Ta cuhva cha cuitacai nu cruzi, yucuan cuhva cunaxite chi tandihí ñáyiví —catyí ra Jesús.

³³ Cahan ra tyehe caa cha cuñí ra na cutuñi iñi ñu tyí tyicuan caa cuhva cucúvi ra.

³⁴ Ta ñáyiví nacahan ñu ta catyí ñu chi ra:

—Tuhvá ndi chiñi ndi sacuaha ra nu libru ley yo vatyí ra cuví Cristo tyicuan ri maa cucoo ra. ¿Yoso caa cha catyí yoho tyí cusandaa ñu chi Rayí quichi nya gloria nu cruzi? ¿Yóo ra cuví Rayí cha quichi nya gloria cha cahun tuhun? —catyí ñu, ndacá tuhun ñu chi ra.

³⁵ Tyicuan ta ra Jesús catyí ra chi ñu:

—Iyó cha ndichin nu nyicu ndo, soco suhva ri ca quívi. Caca ndo ityi nu ndichin cha ni ri ca cha ndichin. Coto sana ri iñi ndo ta nduñaa iñi, vatyí ñu chicá noo nu ñaa iñi ña chitó ñu nya ityi cuahan ñu.

³⁶ Chino iñi ndo chi yuhu ra cuví ñuhu ndichin cuan, cha ni ri ca cha nyaá que chihin ndo. Tyicuan ta cuví ndo ñáyivi iyó nu ndichin.

Cha yaha catyí ra Jesús tuhun ihya tixehe nuu ra chi ñu.

Nu catyí chi ñaa tuhun cha ña cachinó iñi ra cacuvi nuu chi ñu Israel chi ra Jesús

³⁷ Vasi cuaha xaan milagru sacuvi ra Jesús nuu ñu soco ña chinó iñi ñu chi ra.

³⁸ Vatyí tahán chi cha cuví tari catyí ra Isaías profeta Nyoo, nu cahan ra tyehe caa: Sutu Mañi yuhu, yori cuñi chino iñi tuhun cahán ndi.

Yori cutuñi iñi tunyee iñi iyó chuun, Sutu Mañi yuhu, catyí ra Isaías ta cha naha.

³⁹ Ta cha cuenda tuhun ihya cha nyaá nu tutu, yucuan chaha vatyí ña cuví chino iñi ñu vatyí suri tyaa tucu ra Isaías tyehe caa:

⁴⁰ Nyoo sanducuaa ra chi ñu. Ta sandundava ra aña ñu, tacuhva cha ma nyehe ñu chihin chiti nuu ñu,

ta ma cutuñi iñi aña ñu, ta ni ma nacuhva cuenda ñu chi ñu chi ra tacuhva sanduvaha ra chi ñu.

⁴¹ Ra Isaías catyí ra tyehe caa vatyí nyehe ra nu nyacá ñaha Sutu Mañi yo Jesús ta cahan ra tuhun ra.

⁴² Soco cuaha ñu Israel chinó iñi chi ra Jesús, ta nyacua nya suhva ra cacuvi nuu, soco ña saquetuvi ra nuu ñáyivi vatyí yuhvi ra chi ra cacuvi fariseo coto tava ñehe ra chi ra vehe ñuhu.

⁴³ Vatyí cuñi ca ra cuvaha ra nuu ñáyivi ta ñima ca cha cuvaha ra nuu Nyoo.

Tuhun cahan ra Jesús cusacutuñi chi ñáyivi

⁴⁴ Ñihi cahán ra Jesús, ta catyí ra:

—Ñu chinó iñi chii, ñima chi maa ri mai chinó iñi ñu, soco chinó tucu iñi ñu chi ra cha tachí chii.

⁴⁵ Ta ñu nyehé chii, nyehé tucu ñu chi ra cha tachí chii.

⁴⁶ Yuhu cha cuví tari noo cha ndichin vachi ñuhu ñáyivi ihya, vatyí tacuhva vatyí ñu chinó iñi chii ma ndoo ñu nu ñaa iñi.

⁴⁷ Soco tatu yihí ndo chiñi ndo tuhun cahín, ta ña sacuvi ndo cha cahín, ñima yuhu tachi tuñi chi ndo. Vatyí ña vachi yuhu ñuhu ñáyivi ihya vatyí tachi tuñi chi ñáyivi. Soco vachi sacaqui aña ñu.

⁴⁸ Ñu ña cuñi naquehen tuhun cahín ta ña cuñi ñu sacuvi ñu tari cuhva cuñi, iyó cha cutachi tuñi chi ñu. Tuhun cha cahín, ican cuan cutachi tuñi chi ñu nu cundihi quívi.

⁴⁹ Vatyí ñima cuenda mai cahín. Suti ra cha tachí chii, chaha ra tuhun chii ñaa cha cucahin ta ñaa cha cusañahi.

⁵⁰ Ta chité vatyí tuhun cha chaha ra, chahá chi noo ñáyivi cha ma naa ca maa coo ñáyivi. Yucuan chaha, tuhun cha cahín, cahín soco cuhva catyí maa Suti cha cahín cuví.

13

Nu nacatyá ra Jesús chaha ra cachicá noo chihin ra

¹ Nonga quívi cumañi ta chaa vico pas-cua chitó ra Jesús vatyí cha chaa cuhva cha cuaquita ra ñuhu ñáyivi ihya ta cunuhu ra nu nyaá Sutu ra. Tyicuan ri cuñi xaan ra chi ñu cuenda ra cha iyó siqui ñuhu ñáyivi ihya. Ta vityin cua sañahá ra chi ñu tyi cuñi xaan ra chi ñu vatyí cuacúvi ra cha cuenda ñu.

² Ta cuxiñi ra Jesús chihin ra cachicá noo chihin ra. Ta cha quihvi cuihna aña ra Judas Iscariote sehe ra Simón tyiyuhu ra chi ra, naxico tuhun ra chi ra Jesús ta nacuhva cuenda ra chi ra chi ra xaan iñi chi ra.

³ Soco ra Jesús chitó ra vatyí chaha cuenda Sutu ra tandihi chi ra vatyí cunyaa ndaha ra. Ta chitó ra vatyí nu nyaá Nyoo quita ra ta suri yucuan cunanuhu ra. Ta nyaá ra Jesús cuxiñi ra.

⁴ Tyicuan ta nicuinanya ra ta tava ra sahna chata ra, ta chahñi ra noo toalla chichi ra.

⁵ Tyicuan ta tyihí ra ndutya chichi noo caa ta quichaha nacatya ra chaha ra cachicá noo chihin ra. Ta quichaha nacuhva ra chihin toalla cuan.

⁶ Ta cha cuanacatya ra chaha ra Simón Pedro ta catyí ra Simón chi ra:

—Sutu Mañi yuhu, ¿atu yoho cuacacatyon chahi?

⁷ Tyicuan ta catyí ra Jesús:

—Vityin ña cutuñi iñun cha sacuví. Soco cucutuñi maa iñun nu cuahan ca chi.

⁸ Soco ra Pedro catyí ra chi ra:

—Ni noo chaha ta ma nacatyon chaha yuhu.

Ta catyí ra Jesús chi ra:

—Tatu ma nacatye chahun, ñima ra cuende cuvún.

⁹ Tyicuan ta catyí ra Pedro chi ra Jesús:

—Tu tyicuan caa, Sutu Mañi yuhu, ñima chaha ri nacatyon, soco nacatya tucun ndahi ta xiñi ñandihí —catyí ra.

¹⁰ Soco ra Jesús catyí ra chi ra:

—Ñu cha ni chityi, ña cuñi chi cha ndoo tandihí coño ñuhu ñu. Chaha ri ca ñu cuñi chi, vatyí cha ndi maa nani ñu. Nyoho cha ndi ndo, vasi ña tandihí ndo —catyí ra Jesús.

¹¹ Ta catyí ra vatyí ña tandihí ra ndi ra vatyí chitó ra yóo cha cunaxico tuhun chi ra chi ra xaan iñi chi ra.

¹² Ta cha yahá cha nacatya ra Jesús chaha ra cachicá noo chihin ra, ndihvi noo ra sahma ra, ta nicunyaa tucu ra inga chaha nu mesa ta catyí ra chi ra:

—¿Atu cutuñi iñi nyoho cha sacuví chi ndo?

¹³ Nyoho catyí ndo chii, Maestro ta Sutu mañi yuhu, ta ndicha vatyí ican cuví.

¹⁴ Yuhu cha cuví Ra Sacuaha ta Sutu Mañi ndo, nacatye chaha ndo, tyicuan caa cuñi tucu chi cha nacatya ndo chaha tahan ndo.

¹⁵ Yuhu chahi noo cuhva chi ndo vatyí sacuvi ndo tari cuhva sacuvi mai.

¹⁶ Cha ndicha catyí chi ndo vatyí ni noo musu ta ña cahnu ca ra ican saha chitoho ra. Ta ni noo ra cha cuahan tyiño, ña cahnu ca ra ican saha ra cha tachí chi ra.

¹⁷ Tatu cutuñi iñi ndo tuhun ihya, ta sacuví ndo, sii xaan cucuví chi ndo.

¹⁸ Ñima cha cuenda tandihí ndo cahín. Yuhu chité yóo chi nacachí mai. Soco cuñi chi cha cucuvi tari catyí tuhun Nyoo tyehe caa: “Ra cha chachí pan chihin, ican ra cuan cunaxico tuhun chii chi ra xaan iñi chii”, catyí chi nu tutu Nyoo.

¹⁹ Catyí chi ndo tuhun ihya cha ni cumañi ca chino cava tacuhva vatyí quivi nacuvi

tyehe caa, chino iñi ndo tyi iquen cuví ra cha tinyaa cuatyí ndo.

²⁰ Cha ndicha catyí chi ndo vatyí ñu tiñ cuenda chi ñu tachí yuhu chi, chi yuhu tiñ cuenda ñu cuví cuan. Ta ñu cha tiñ cuenda chi yuhu, tiñ cuenda tucu ñu chi ra cha tachí chii —catyí ra Jesús.

Nu sacotó ra Jesús vatyí cunaxico tuhun ra Judas chi ra chi ra xaan iñi chi ra

(Mt. 26.20-25; Mr. 14.17-21; Lc. 22.21-23)

²¹ Cha yahá cha catyí ra Jesús tyehe caa, quichahá nducuihya xaan cuñi añima ra, ta catyí cachi ra:

—Cha ndicha catyí chi ndo, vatyí noo nyoho cunaxico tuhun ndo chii nuu ra xaan iñi chii —catyí ra Jesús.

²² Tyicuan ta ra cachicá noo chihin ra, quichahá canyehe ra nuu tahan ra, ta ña cachitó ra yóo chi tuhun cahán ra Jesús.

²³ Noo ra chicá noo chihin ra nyañaá ra chi ra Jesús nu cuxiñi ra. Ta ican ra cuví ra cha cuñi xaan ra Jesús chi.

²⁴ Ta ra Simón Pedro savahá ra seña chi ra, na ndaca tuhun ra yóo chi tuhun cahán ra.

²⁵ Tyicuan ta nyañaá ra chi ra Jesús, ta ndaca tuhun ra chi ra:

—Sutu Mañi yuhu, ¿yóo ra cuví ra cha cahún tuhun?

²⁶ Ta nacahan ra Jesús ta catyí ra:

—Cuasatyí chiiin pan, ta ra cha cuhve chi, ican ra cuan cuví ra —catyí ra.

Tyicuan ta quehen ra chiin pan ta satyí ra, ta chahá ra chi ra Judas Iscariote, sehe ra Simón.

²⁷ Ta cha quehen ra Judas pan cuan ta quihvi ra ña vaha añima ra. Tyicuan ta ra Jesús catyí ra chi ra:

—Tuhun cha yihí iñun sacuvun, sacuvi cha numi ri —catyí ra Jesús chi ra Judas.

²⁸ Soco ni noo ra canyicú nu mesa cuan, ña cacutuñi iñi ra ñáá tuhun cha catyí ra chi ra tyicuan caa.

²⁹ Soco cha cuenda vatyí ndaha ra Judas nyaá yitin xuhun, yucuan chaha yihí ra cuñi maa ra vatyí cuñi ra Jesús cha cusata ra cha chiñuhú chi ra cha cuenda cha vico cuan, o nacuhva ra suhva xuhun cuan chi ñu ndahvi, cacuñi maa ra.

³⁰ Cha yaha chachi ra Judas pan, tyicuan ta quita ra. Ta cha cuaa cuví cuan.

Ley cha chaha ra Jesús cha cuñi yo chi tahan yo

³¹ Cha yaha cha cuahan ra Judas, ra Jesús catyí ra:

—Vityin cunyehe ñáyivi yoso cha cahnu yuhu cha cuví Rayi cha quichi nya gloria. Ta cuanyehe ñu yoso cha cahnu Nyoo cha cuende.

³² Ta tatu Rayi cha quichi nya gloria sacahnú ra chi Nyoo, tyicuan ta Nyoo cusacahnu ra chi ra. Ta cha cha quivi cuasacahnu ra chi ra.

³³ Sehe luhli, ña naha ca cuacunyai chihin ndo. Nyoho cunanducu ndo chii, soto tari catyí chi ra cacuví nuu chi ñu Israel cuan, catyí chi ndo vityin, vatyí ma cuví cuhun ndo nu cuahin.

³⁴ Chahí noo tuhun chaa chi ndo. Cuñi ndo chi tahan ndo. Tari cuñi yuhu chi ndo, tyicuan caa cuñi chi cha cuñi ndo chi tahan ndo.

³⁵ Tatu cuñi ndo chi tahan ndo, tandihi ñáyivi ta coto ñu vatyí ñu nyicón chii cuví ndo.

Nu catyí ra Jesús vatyí ra Pedro cucatyí ra vatyí ña ñohó nuu ra chi ra

(Mt. 26.31-35; Mr. 14.27-31; Lc. 22.31-34)

³⁶ Ra Simón Pedro ndaca tuhun ra chi ra Jesús ta catyí ra:

—Sutu Mañi yuhu, ¿nya cuhun? —catyí ra.

Ta ra Jesús nacahan ra ta catyí ra:

—Nu cuahan yuhu, vityin ma cuví cunyicon chii. Soco nu cuahan ca chi, ta cunyi-con chii —catyí ra Jesús.

³⁷ Tyicuan ta catyí ra Pedro chi ra:

—Sutu Mañi yuhu, ¿ñáa tuhun ma cuví cunyiquen chuun vityin? Nyaí cha cuhve ñáyivi cha cuendon —catyí ra.

³⁸ Ta nacahan ra Jesús ta catyí ra:

—¿Atu ndicha cha cuhvon ñáyivun cha cuende? Cha ndicha catyí chuun, vatyí cha ni cumañi ca cuacu chaa loho, yoho cucatyun uñi chaha tyi ña ñohó nuun chii —catyí ra Jesús chi ra Pedro.

14

Ra Jesús cuví ityi cuhun yo ta chaa yo nu nyá Sutu yo Nyoo

¹ Ta catyí ra Jesús:

—Ma caca xaan xiñi ndo. Chino iñi ndo chi Nyoo, ta chino iñi ndo chii.

² Vehe Suti cuaha xaan nuu coo ndo iyó. Tyehe ta ñima tyicuan caa, cha naha catyí yuhu chi ndo. Ta cuhin cusanduvahi noo nu coo ndo.

³ Ta cha yaha cha cuhin ta sanduvahi nu coo ndo, ta cuquichi inga chaha, quichi naquehin chi ndo. Tacuhva cunyaa ndo nu cuacunyai.

⁴ Nyoho chitó ndo nya cuhin, ta chitó ndo ityi.

⁵ Ta catyí ra Tomás chi ra:

—Tata, ña chitó ndi nya cuhun. Ta ¿yoso caa coto ndi ityi? —catyí ra.

⁶ Ta ra Jesús catyí ra:

—Yuhu cuví ityi cha cuahan gloria. Ta yuhu cuví cha ndicha. Ta suri yuhu cuví ra chahá ñáyivi coo ndo. Noo tuhun ri cha cuenda yuhu, cuví chaa ndo nu nyaá Suti.

⁷ Ñohó nuu ndo chii, ta cha cuenda cuan ñohó nuu tucu ndo chi Suti. Ta nya vityin ta nu cuahan ca chi, ñohó nuu ndo chi ra, vatyí cha nyehé ndo chi ra —catyí ra Jesús.

⁸ Tyicuan ta catyí ra Felipe chi ra:

—Tata, cuhva cha nyehe ndi chi Sutu yo Nyoo, ta chihin yucuan ri ta ndoo ndi vaha.

⁹ Ta nacahan ra Jesús, ta catyí ra:

—Yoho Felipe, cha naha nyaí chihin ndo, ta ¿yoso caa cha catyún cha ta cohon nuu con chii? Ñu cha nyehé chii, nyehé tucu ñu chi Nyoo Suti. Ta ¿ñáa tuhun catyún chii: “Cuhva cha nyehe ndi chi Sutu yo Nyoo”?

¹⁰ ¿Atu ña chinó iñun tyi ñn ri cuví yuhu chihin Suti Nyoo? Ta maa ra ñn ri cuví ra chihin. Tuhun cha catyí chi ndo, ñima yuhu ri catyí, soco Suti cha nyaá chihin, ican ra sacuví tyiño ra chihin.

¹¹ Chino iñi ndo chii vatyí ñn ri ra cuví chihin Nyoo Suti. Ta Nyoo Suti ñn ri ra cuví ra chihin. O cuví tucu chino iñi ndo chii cha cuenda tyiño Nyoo Suti cha sacuví.

¹² Cha ndicha catyí chi ndo vatyí ñu chinó iñi chii, cusacuvi tucu ñu cha sacuví yuhu. Ta cahnu ca cusacuvi ñu, vatyí yuhu cuhin nu nyaá Nyoo Suti.

13 Ta tandihí cha cacan ndo chihin sivi, yuhu cusacuvi tacuhva vatyí sacahnu ñáyiví chi Suti Nyoo cha cuenda cha cuví Sehe ra.

14 Yuhu cusacuvi ñáá cha cacan ndo chihin sivi.

Nu catyí ra Jesús vatyí cuhva ra Tatyí Ii ra chí yo

15 'Tatu cuñí ndo chii, quichaha ndo tuhun cahín.

16-17 Ta cacan tahvi mai chi Nyoo Suti na saquichi ra noo ra naquehen ndahvi chi ndo. Ta ican ra cuan cuví Tatyí Ii Nyoo, ra cha cahán maa ri cha ndicha. Ta cucunyaa ra chihin ndo tyicuan ri maa. Soco ñáyiví cha tahán ca iñi cha iyó siqui ñuhu ñáyiví ihya ma cuvi naquehen ñu Tatyí Ii Nyoo vatyí ña cuví nyehe ñu chi ra. Ta ni ña caá ra añima ñu. Ta ni ña ñohó nuu ñu chi ra. Soco nyoho ñohó nuu ndo chi ra vatyí nyaá ra chihin ndo ta cuandoo ra chihin ndo.

18 Ma sandoo maa ri mai chi ndo. Quichi tiqui nu nyaá ndo.

19 Chiin ri ca, ta ñáyiví cuenda ñuhu ñáyiví ma nyehe ca ñu chii. Soco nyoho nyehé ndo chii. Vatyí yuhu iyé, yucuan chaha nyoho coo ndo ñandihí.

20 Quiví cuan cucoto ndo tyi yuhu ñin ri cuví chihin Suti. Ta nyoho ñin ri cuví ndo chihin. Ta yuhu ñin ri cuví chihin ndo.

21 Ñu cha cumí vaha tuhun cahín, ta sacuví ñu cuhva catyí, ican ñu cuan cuví ñu cha cuñí chii. Ta ñu cha cuñí chii, Suti cucuñi ra chi ñu. Ta cuñí tucu yuhu chi ñu ta cusañahi chi ñu yóo ra cuví yuhu —catyí ra Jesús.

22 Ta catyí ra Judas, ñima ra Judas Iscariote, inga ra.

—Sutu Mañi yuhu, ¿yoso caa cha chi nyuhu cusañahun chuun, ta ñima chi ñu cuenda ñuhu ñáyiví?

23 Nacahan ra Jesús ta catyí ra:

—Ñu cuñí chii, sacuví ñu tuhun cahín. Ta Suti cuñí ra chi ñu. Ta quichi ndi nu nyaá ñu ta coo ndi chihin ñu.

24 Ñu ña cuñí chii, ña sacuví ñu cha catyí. Ta tuhun cahín cha chiñi ndo, ñima tuhun mai cuví, tuhun cahán Suti, ra cha tachí chii cuví.

25 'Catyí tandihí tuhun ihya chi ndo cha ni ri ca cha nyaí chihin ndo.

26 Soco nu cuahan ca chi cutachi Suti Tatyí Ii ra tyiño nui. Maa ra cuví ra cutyinyee chi ndo ta cunaquehen ndahvi ra chi ndo ta cusañaha ra tandihí chi ndo. Ta cusanicohon ra iñi ndo tuhun cha yaha cahin chihin ndo.

27 'Sandoí noo cha taxi coo añima ndo, tari cha taxi cuñí añime. Ican चाहí chi ndo. Ñima tari cha taxi cha ñihí ndo siqui ñuhu ñáyiví ihya. Ma caca xaan iñi ndo ta ma yuhví ndo.

28 Chiñi ndo tuhun cha cahin nu catyí vatyí cuahin ta quichi tiqui nu nyicú ndo. Tatu cuñí ndo chii, cucusi cuñi ndo tyi catyí vatyí cuahin nu nyaá Suti. Vatyí cahnú ca cuví Suti ican saha yuhu.

29 Ta vityin catyí tiqui chi ndo cha ni cumañi ca cuhin, tacuhva quiví cuhin, cunachino iñi ndo chii.

30 'Ma cahan cuaha que chihin ndo. Vatyí vachi ra nyacá ñaha siqui ñuhu ñáyiví ihya. Vasi ña nyacá ñaha ra chii.

31 Soco cuñí chi nacoto ñáyiví iyó siqui ñuhu ñáyiví vatyí yuhu cuñí chi Nyoo Suti, ta sacuví tyiño tyaa ra chii.

'Ndícuíta ndo. Cōho ndo, naquita yo ihya.

15

Tari noo yoho tichaha ndiví cha ndicha vaha cuví ra Jesucristo

1 'Yuhu cuví yoho tichaha ndiví cha ndicha vaha. Ta Suti cuví ra sahá cumi chí yoho cuan.

2 Chahnyá ra soco cha ña chahá chiti. Ta soco cha chahá chiti nacahnyá ra nuu chi, ta sanduvií ra, tacuhva nacuhva ca chí cuaha ca chiti.

3 Suti cha sandundií ra chí ndo chihin tuhun cha cahín chihin ndo.

4 Sañihi ca ndo cu ñin ri ndo chihin, tari yuhu ñin ri cuví chihin ndo. Tari noo soco yoho cuan ma cuvi cuhva chí chiti cha maa ri maa chí tatu ña nyañaá chí chata yoho cahnú, tyicuan caa nyoho, ma cuvi sacuvi ndo cha vaha tatu ña ñin ri cuvi ndo chihin.

5 'Yuhu cuví yoho cahnú cuan. Ta nyoho cuví ndo soco yoho cuan. Ñu cha nyañaá chii, ta yuhu nyañaí chí ñu, cuaha cha vaha sacuví ñu, vatyí ñahri cha cuví sacuvi ndo tatu yori yuhu nyaá chihin ndo.

⁶Ñu cha ña nyaña chii, cusacuita Suti chi ñu, tari sacuitá yo soco yoho cha chahnyá yo vatyí ña chahá chiti. Ta na ityi ta nasataca yo, ta cucayu nu ñuhu.

⁷Tatu nyoho ta tyicuan ri nyaña ndo chii, ta ña naa iñi ndo tuhun, cacan ndo ñáá cha cuñi ndo, ta yuhu cuhve.

⁸Tatu cuaha cha vaha sacuví ndo, sacahnú xaan ndo chi Suti. Ta tyicuan caa sañahá ndo tyi cuví ndo noo ñu ndicha cha nyicón chii.

⁹Yuhu cuñi chi ndo, tari cuñi Suti chii. Ma naa iñi ndo cuhva cuñi chi ndo.

¹⁰Tatu quichahá ndo tuhun cahín, cuacuñi que chi ndo. Tari yuhu quichahí nu cahán Suti, ta cuñi xaan ra chii.

¹¹'Cahín tyehe caa chihin ndo tacuhva na cusii cuñi ndo chihin. Ta cucusii vavaha cuñi ndo.

¹²Tuhun cha catyí chi ndo, ican cuví ihya: na cuñi ndo chi tahan ndo, tari cuñi yuhu chi ndo.

¹³Tatu yaha xaan cuñi yo chi tahan yo, caña iñi yo cuhva yo nyacua nya ñayivi yo cha cuenda ñu.

¹⁴Nyoho cuví ndo amigue, tatu sacuví ndo cha catyí chi ndo.

¹⁵Ña catyí que vatyí musi cuví chi ndo, vatyí noo musu ña chitó ra ñáá cha sacuví chitoho ra. Amigue, catyí chi ndo vatyí sacote chi ndo tandihi maa cha catyí Suti chii.

¹⁶Nyoho ña cachí ndo chii. Mai nacachí chi ndo. Ta catyí chi ndo na cuhun ndo ta sacuvi ndo tyiño nui. Ta tyiño sahá ndo cucuvaha xaan tari cuvaha noo itu. Ta cuaha vavaha niñi cucoo, ta ma tiví maa chi. Ta tyicuan caa ta Suti cuhva ra tandihi cha cacan ndo chihin sivi.

¹⁷Ican ihya cuví cha catyí chi ndo: Cuñi ndo chi tahan ndo.

Ñáyivi cuenda ñuhu ñayivi tasi cuñi nyehé ñu chi ra Jesús ta chi ñu nyicón chi ra

¹⁸'Tatu ñu cuenda ñuhu ñayivi ña cuñi nyehé ñu chi ndo, coto ndo vatyí xihna ca chi yuhu ña cuñi nyehé ñu.

¹⁹Tyehe ta cuví ndo ñu cuenda ñuhu ñayivi, cucuñi ñu chi ndo tari cuñi ñu chi tahan ñu. Soco yuhu nacachí chi ndo mahñu ñu. Ta yucuan chaha tasi cuñi

nyehé ñu chi ndo, vatyí ñima ca ñu cuenda ñuhu ñayivi cuví ndo.

²⁰Ñicohon iñi ndo tuhun cha catyí chi ndo, tyi ni noo musu ta ña cahnu ca ra ican saha chitoho ra. Ta tatu quichahá ñu tuhun cahín chihin ñu, tyicuan caa cuquichaha tucu ñu tuhun sañaha ndo chi ñu. Ta tatu satasí iñi ñu chii, cusatasi iñi tucu ñu chi nyoho.

²¹Tandihí ihya cusacuvi ñu chi ndo cha catyí yuhu, vatyí ña ñohó nuu ñu chi ra cha tachí chii.

²²'Tyehe ta ña quichí cahin chihin ñu, yucuan ndicha ñahri cuatyí ñu. Soco vityin ñahri siqui tyaa ñu cuenda cuatyí ñu, vatyí cha yahá catyí chi ñu.

²³Ñu cha tasi cuñi nyehé chii, tasi cuñi nyehé ñu chi Suti ñandihí.

²⁴Ñahri cuatyí ñu, tyehe ta ña sacuví milagru cha ni nonga ñáyivi ta sacuvi ca. Soco cha nyehé ñu tandihí ihya. Ta vasi cha nyehé ñu soco tasi cuñi nyehé ñu chii, ta chi Suti ñandihí.

²⁵Soco tandihí tuhun ihya cuví chi tyehe caa, vatyí cuñi chi cha chino cava tari cuhva catyí nu tutu ley cha sacuaha ñu nu catyí chi tyehe caa: "Ñahri vihi tuhun, ta cutasi cuñi ñu nyehé ñu chii", catyí chi.

²⁶'Soco cuquichi Tatyí Ii, ra cha cahán maa ri cha ndicha. Maa ra cuví ra cha naquehen ndahvi chi ndo. Nachai nu nyaá Suti ta cusaquichi ndi chi ra nu nyicú ndo. Ta quivi quichi ra, cucahan ra tumañi iñi cuende.

²⁷Ta nyoho tucu cucahan ndo tumañi iñi cuende, vatyí nyaá ndo chihin nyata quivi quichahá sahatyiñe.

16

¹Catyí tuhun ihya chi ndo tacuhva cha ma sandihí ndo cha chinó iñi ndo chii.

²Cutava ñehe ñáyivi chi ndo vehe ñuhu. Ta cuchaa chi quivi vatyí ñu cahñi chi ndo, cucuñi ñu vatyí tyiño nuu Nyoo sacuví ñu.

³Tyehe caa cusacuvi ñu cha cuenda vatyí ni chiin maa ta cohon nuu ca ñu ni chi Suti ta ni chi mai.

⁴Catyí tuhun ihya chi ndo tacuhva vatyí quivi chaa chi tari cuhva catyí chi ndo, ñicohon iñi ndo vatyí cha yahá catyí chi ndo.

Tyiño sahá Tatyí Ii Nyoo

Ña catyí tuhun ihya chi ndo quiví xihna ri cha cuenda tyi nyaá que chihin ndo.

⁵ Soco vityin cuhin vatyi cunyai chihin ra cha tachí chii. Ta ni noo nyoho ña ndacá tuhun ndo chii nya cuhin.

⁶ Soco nducuihya ndihí ñi ndo cha catyí tuhun ihya chi ndo.

⁷ Soco catyí cha ndicha chi ndo: vaha ca cha cuhin cha cuenda cha vaha chi ndo. Vatyí tatu ma cuhin, ma quichi Tatyí Ii cha naquehen ndahví chi ndo. Soco tatu cuhin, cutachi mai chi ra.

⁸ Ta quiví quichi ra cusacoto ra chi ñáyiví iyó síqui ñuhu ñayiví vatyi iyó cuatyí ñu. Ta cusañaha ra chí ñu vatyi iyó noo cuhva vaha tahán chí coo ñu. Ta cusacoto ra chí ñu vatyi cutuñi chí ñu nuu Nyoo.

⁹ Cusacoto ra chí ñu tyi iyó cuatyí ñu cha cuenda cha ña chinó ñi ñu chii.

¹⁰ Cusacoto ra chí ñu tyi iyó noo cuhva vaha cha tahán chí coo ñu, vatyi yuhu cuhin nu nyaá Suti ta ma nyehe ca ndo chii.

¹¹ Ta cu coto ñu tyi cusandaa Nyoo cuatyí ñu vatyi cha yaha cundaa cuatyí ra cuví cuihna, ra nyacá ñaha síqui ñuhu ñayiví ihya.

¹² Ta cuaha ca tuhun nyaá catyí chí ndo, soco ma cutuñi ñi ndo vityin.

¹³ Soco quiví quichi Tatyí Ii cha cahán maa ri cha ndicha, maa ra cusañaha tandihí cha ndicha chí ndo. Vatyí ñi ma cuenda maa ra cuahan ra, soco cuahan ra tandihí cha chíñí ra. Ta cusacoto ra tuhun ñáá cha cucuví nu cuahan ca chí.

¹⁴ Cusacahnu ra chii, vatyi cunaquehen ra tuhun ta cusañaha ra chí ndo.

¹⁵ Tandihí cha iyó chí Suti, chí mai cuví ñandihí. Yucuan chaha vatyi Tatyí Ii cuquehen cuenda ra cha iyó chii, ta cusañaha ra chí nyoho.

Ra cha cachicá noo chihin ra Jesús cuihya ñi ra, soco nu cuahan ca chí cucusí cuñi ra, catyí ra Jesús

¹⁶ Ña naha ca ta ma nyehe ca ndo chii, soco yaha cuan ta cunyehe tucu ndo chii, vatyi yuhu cuhin nu nyaá Suti —catyí ra Jesús.

¹⁷ Tyicuan ta suhva ra cachicá noo chihin ra, candaca tuhun ra chí tahan ra ta catyí ra:

—¿Ñana vaha tuhun cahán ra ihya? Catyí ra chí yo vatyi ña naha ca ta ma nyehe ca yo chí ra, ta yaha cuan ta cunyehe tucu yo chí ra inga chaha vatyi cuhun ra nu nyaá Suti ra.

¹⁸ ¿Ñáá cha cuñí chí catyí cha ña naha ca cuan? Ña cutuñí ñi yo ñáá tühun cahan ra —cacatyí ra.

¹⁹ Ra Jesús tuví ñi ra vatyi cacuñí ra candaca tuhun ra chí ra, ta catyí ra:

—Yuhu catyí chí ndo vatyi ña naha ca ta ma nyehe ca ndo chii, soco yaha cuan ta nanyehe tucu ndo chii. ¿Atu ican ihya cuví cha ndacá tuhun ndo chí tahan ndo?

²⁰ Cha ndicha catyí chí ndo vatyi nyoho cucuacu ndo ta cunducuihya ñi ndo, soco ñu cuenda ñuhu ñayiví cusí cuñi ñu. Soco vasí cuihya ñi ndo vityin, tucuihya ñi cha iyó chí ndo cunanduví chí tusí ñi.

²¹ Cuhva cha cuacu sehe noo ñaha síhi nyehé ña cha uhví. Soco cha yaha cha cacu cha lee cuan, ni tuhun cha uhví cuan ña nicohón ca ñi ña cha cuenda cha sí cuñí ña vatyi cacú noo cha lee sehe ña.

²² Tyicuan caa tucu nyoho vityin, nducuihyá ñi ndo. Soco cunanyehe tiquí chí ndo inga chaha. Tyicuan ta cundusí tucu ñi añima ndo. Ta yori cuví tinyaa tusí ñi cuan chí ndo.

²³ Quiví cuan ñahri ca cha candaca tuhun ndo chii. Cha ndicha catyí chí ndo vatyi Nyoo Suti cucuhva tandihí cha cacán ndo chí ra chihin sívi.

²⁴ Nya vityin ta ta ñaha ca cha cacán ndo chihin sívi yuhu. Cacán ndo ta cuñihí ndo tacuhva na cusí xaan cuñi ndo.

Ra Jesucristo cuví chasaha ra chí cha ña vaha iyó ñayiví

²⁵ Maa maa ri chihin cuhva ri sañahí chí ndo. Soco nu cuahan ca chí, ñi ma ca chí hin cuhva cuasañahi chí ndo, soco cuacatyí cachi chí ndo tuhun Suti.

²⁶ Quiví cuan chihin sívi cucacán ndo cha cacán ndo chí ra. Ta ña chíñuhú ca cha cucuacu ndahví nuu Suti cha cuenda ndo.

²⁷ Vatyí maa Nyoo Suti suri cuñí ra chí ndo. Cuñí ra chí ndo vatyi nyoho cuñí ndo chii. Ta nachinó ñi ndo vatyi nu nyaá Nyoo quite.

²⁸ Nu nyaá Suti quite vatyi quichi síqui ñuhu ñayiví ihya. Soco vityin cusandoi ñuhu

ñayiví ihya vatyi cunuhi nu nyaá ra —catyí ra Jesús.

²⁹ Tyicuan ta ra cachicá noo chihin ra cacatyí ra:

—Vityin ndicha catyí cachun chi ndi.

³⁰ Vityin nyehe ndi vatyi chitón tandihí maa tuhun, ta ña nyatun cha ndaca tuhun ndi chuun, vatyi cha chitón nyacua nya tandihí cha chicá xiñi ndi. Yucuan chaha chinó iñi ndi vatyi nu nyaá Nyoo quiton —cacatyí ra chi ra Jesús.

³¹ Ta catyí ra Jesús:

—Ta vityin ¿atu chinó iñi ndo chii?

³² Soco catyí chi ndo vatyi cha vachi chi cuhva ta vityin cuví cuhva vatyi nyoho cuquiti cuatyí ndo siin siin ityi, ta cusandoo ndo notuhun mai. Soco ñima notuhun ri mai nyaá, vatyi nyaá Suti chihin.

³³ Catyí tuhun ihya chi ndo tacuhva na coo cha taxi ri añima ndo cha cuenda cha ñin ri cuví ndo chihin. Ñuhu ñayiví ihya cunyehe ndo tindoho, soco sanyee ndo iñi ndo vatyi yuhu cha cuví chasahí chi cha ña vaha cha iyó ñuhu ñayiví ihya.

17

Nu chicán tahvi ra Jesús cuenda ra cachicá noo chihin ra

¹ Cha yahá cha catyí ra Jesús tuhun ihya, nanyehe ndaa ra ityi andiví ta catyí ra:

—Sutu Mañi yuhu, cha chaá cuhva vityin. Sacahnu chi yuhu cha cuví sehun, tacuhva sacahnu tucu yuhu chuun.

² Vatyi tyaun tyiño chii siquí tandihí ñayiví, vatyi cuhve ñayiví cha ma naa ca maa chi tandihí ñu chahun chii.

³ Ta ihya cuví cuhva coo ñu ñayiví cha ma naa ca maa: Cha cohon nuu ñu chuun vatyi noo tuhun ri maun cuví Nyoo cha ndicha vaha, ta cohon nuu ñu chi yuhu ra Jesucristo ra cha tachun chi.

⁴ 'Cha sacahní chuun ihya siquí ñuhu ñayiví ta cha sandihí tyiño cha chahun chii.

⁵ Ta vityin, Sutu Mañi yuhu, cua ndichi nu nyaun, ñacuhva cha cahnun cuví maun chii, tari cuhva cha chiyo chii nyata ni cumañi ca chino ñuhu ñayiví.

⁶ 'Tandihí ra cha chahun chii ra cha natavá vahun mahñu ñu iyó siquí ñuhu ñayiví ihya sacote chi ra yóo ra cuví yoho.

Chi maun cuví chi ra ta chahun chi ra chii. Ta quichahá ra tuhun cahún.

⁷ Vityin cachitó ra vatyi tandihí cha chahun chii, nu nyaún quita.

⁸ Vatyi catyí chi ra tuhun cha catyun chii, ta maa ra canatín cuenda ra. Ta tuví iñi ra vatyi ndicha cha quite nu nyaún, ta chinó iñi ra tyi maun tachí chii.

⁹ 'Yuhu chiquén cha cuenda ra chuun. Ña chiquén cha cuenda ñayiví ña ñohó nuu chuun, soco chiquén cha cuenda ra cha chahun chii, vatyi chi maun cuví chi ra.

¹⁰ Tandihí cha iyó chii, chi maun cuví. Ta tandihí cha chuun, chi mai cuví. Ta tandihí cuan sacahnú chii.

¹¹ 'Yuhu ma ndoo que ñuhu ñayiví ihya, soco maa ra cundoo ra ñuhu ñayiví ihya. Ta yuhu cuhin tyi cunyai chuhun. Sutu Mañi yuhu, saha cumi chihin cha ndicha ñuhu chi ra cha chahun chii, tacuhva na cu ñin ri ra chihin ra tahanan ra, tari yoho chihin yuhu, ñin ri cuví yo.

¹² Quiví chinyai ñuhu ñayiví ihya chihin ra, saha cumi chi ra cha chahun chii chihin cha ndicha ñuhun. Ta sahí cuenda chi ra. Ta ni noo ra ña cuanaá soco noo tuhun ri ra cha cha nyaá maa cunaa, ican ra cuan cunaa, tacuhva chino cava tari cuhva catyí nu tutu maun.

¹³ 'Vityin cha vachi nu nyaún, soco cha ni ri ca cha nyaí siquí ñuhu ñayiví ihya, catyí tuhun ihya tacuhva na cusí cuñi ra tari mai.

¹⁴ Yuhu catyí chi ra tuhun cahún, soco ñayiví cuenda ñuhu ñayiví tasi cuñi nyehe ñu chi ra nyicón chi yo, cha cuenda vatyi ñima ra cuenda ñuhu ñayiví cuví ra, tari yuhu, ñima ra cuenda ñuhu ñayiví cuví.

¹⁵ Ña chiquén chuun cha tavon chi ra nyicón chi yo nu ñuhu ñayiví ihya, soco saha cumun chi ra coto ñáá cha saha ra ña vaha chi ra.

¹⁶ Tari yuhu ñima ra cuenda ñuhu ñayiví cuví, tyicuan caa tucu ra ihya, ñima ra cuenda ñuhu ñayiví cuví ra.

¹⁷ Cuhva cha ndicha chi ra nasacuvi ra maa maa ri cuhva cuñi maun. Tuhun cahún, ican cuví cha ndicha.

¹⁸ Tari tachun chi yuhu nu nyicú ñu iyó siquí ñuhu ñayiví, tyicuan caa tachí tucu yuhu chi maa ra nyicón chi yo nu nyicú ñu iyó siquí ñuhu ñayiví.

¹⁹ Ta cha cuenda cha vaha chi ra, sacuvi yuhu maa maa ri cuhva cuñí maun, tacuhva vatyí chihin cha ndicha, cuví sacuvi tucu maa ra maa maa ri cuhva cuñí maun.

²⁰ 'Soco ñima cha cuenda ri ra ihya chiquén chuun, soco chicán tiqui cha cuenda ñáyiví cha cuchino iñi chii chihin tuhun cahán ra ihya nu cuahan ca chi.

²¹ Chiquén chuun na tandihí ñu ta ñin ri na cuví ñu chihin tahan ñu. Ta noo ri na cuví ñu chihin yo, Sutu Mañi yuhu. Tari yoho nyaún chihin ta yuhu nyaí chuhun, na cu ñin ri cuví ñu chihin yo, tacuhva vatyí tandihí ñáyiví iyó siqui ñuhu ñáyiví chino iñi ñu tyi maun tachí chii.

²² Yuhu चाहि cha ndicha ñuhu chi ñu nyicón chi yo, suri cha ndicha ñuhu cha चाहुन chii. Vatyí chihin cuan na ñin ri cuví ñu tari yoho chihin yuhu noo ri cuví yo.

²³ Yuhu nyaí chihin ñu ta yoho nyaún chihin, tacuhva na cuví yo noo ri chihin ñu. Tyicuan caa ta coto tandihí ñáyiví iyó siqui ñuhu ñáyiví tyi maun tachí chii, ta cuñí xaun chi ñu nyicón chi yo tari cuñún chi yuhu.

²⁴ 'Sutu Mañi yuhu, maun चाहुन chi ñu chii. Ta cuñí cha cunyaa ñu chihin nu cuacunyai, tacuhva nanyehe ñu cha ndicha ñuhu cha चाहुन chii vatyí cuñún chii nyata ni cumañi ca chino ñuhu ñáyiví.

²⁵ Sutu Mañi yuhu, ra vaha cuvún, ta ñu cuenda ñuhu ñáyiví ña ñohó nuu ñu chuun, soco yuhu ñohó nuu chuun. Ta ra nyicón chi yo ihya chitó ra tyi maun tachí chii.

²⁶ Cha catyí chi ra yóo ra cuvún, ta cucatyí tiqui inga chaha, tacuhva vatyí tari cuhva cuñún chii, tyicuan caa cuhva cuacuñi tucu maa ra chi ra tahan ra. Ta yuhu cunyai aña ma ra.

18

Nu cuahan ra Jesús vehe caa

(Mt. 26.47-56; Mr. 14.43-50; Lc. 22.47-53)

¹ Cha yaha cha catyí ra Jesús tuhun ihya, quitá ra ta cuahan ra chihin ra cachicá noo chihin ra inga chiyo yuhu yuvi Cedrón. Ta yucuan nyaá noo chacu yutun yucu. Ta

yucuan quihví ra Jesús chihin ra cachicá noo chihin ra.

² Ta ra Judas, ra cha naxicó tuhun chi ra, chitó ra nu cuahan ra Jesús. Vatyí tuhvá ra Jesús चाहán ra yucuan chihin ra cha cachicá noo chihin ra.

³ Ta yucuan चाह ra Judas chihin cuaha sindaro ta cuaha policia cuenda vehe ñuhu cha tachí ra cuví nuu chi tata sutu ta ra cuví fariseo. Chaha coyo ra yucuan, canyisó ra mityi, ta canyiso ra lámpara ta ñuhu yiti.

⁴ Ta vatyí ra Jesús cha chitó ra tandihí cha cucuvi chi ra, quitá ra ta ndaca tuhun ra chi ra:

—¿Yóo chi nanducú ndo? —catyí ra.

⁵ Ta cacatyí ra chi ra:

—Chi ra Jesús ra ñuu Nazaret.

Ta catyí ra Jesús:

—Yuhu cuví —catyí ra.

Ta ra Judas, ra cha naxicó tuhun chi ra Jesús nuu ra xaun iñi chi ra, nanyaá ra chihin ra yucuan.

⁶ Ta cuhva cha catyí ra Jesús: “Yuhu cuví”, tandihí ra canandaca chata ra ta canduva ra nu ñuhú.

⁷ Tyicuan ta inga tucu chaha ndaca tuhun ra Jesús chi ra, ta catyí ra:

—¿Yóo chi nanducú ndo?

Ta cacatyí ra:

—Chi ra Jesús ra ñuu Nazaret.

⁸ Ta catyí ra Jesús:

—Cha catyí chi ndo tyi yuhu cuví. Tatu chii nanducú ndo, saña ndo chi ra chica noo chihin na cunuhun coyo ra —catyí ra Jesús chi ra.

⁹ Ican tyehe caa catyí ra Jesús tacuhva na chino cava cha catyí maa ra ta ityi chata ca nu catyí ra: “Ra cha chaha Suti chii, ni noo ra ña cuanaá.”

¹⁰ Tyicuan ta ra Simón Pedro nyisó ra noo mityi. Ta tava ra ta चाहnya ra soho chiyo vaha noo ra cha nañi Malco. Cuví ra cuan musu ra cuví nuu chi tandihí tata sutu.

¹¹ Soco ra Jesús catyí ra chi ra Pedro:

—Natyihí mityun chichi veno. Tatu Nyoo Suti ta cuñí ra cha nyehi tindoho, tahán chi cha nyehi —catyí ra Jesús chi ra.

Nu nanyaq ra Jesús nuu ra cuví nuu chi tata sutu

(Mt. 26.57-58; Mr. 14.53-54; Lc. 22.54)

¹² Tyicuan ta sindaro cuan chihin capitán ra, ta policia cuenda vehe ñuhu, catiñ ra chi

ra Jesús, ta chahñi ra chi ra vatyí cuhun ra vehe caa.

¹³ Tyicuan ta chinyaca ra chi ra vehe ra Anás, vatyí ra Anás cuan tyiso ra Caifás cuví chi ra. Ta cuiya cuan cuví ra Caifás ra cuví nuu chi tata sutu.

¹⁴ Ican ra Caifás ihya cuví ra cha catyí chi ra cacuví nuu chi ñu Israel vatyí vaha ca cha cúvi noo ri rayi cha cuenda tandihí ñáyivi ñuu.

Nu catyí ra Pedro tyi ña ñohó nuu ra chi ra Jesús

(Mt. 26.69-70; Mr. 14.66-68; Lc. 22.55-57)

¹⁵ Ra Simón Pedro ta nonga ra cha chica noo chihin ra Jesús, canyicón ra chi ra Jesús nu cuahan ra nuquehe vehe ra Anás cuan. Ta ra cuví nuu chi tata sutu cuan ñohó nuu ra chi inga ra cuan. Yucuan chaha quihvi ra cuan chihin ra Jesús nuquehe ra cuví nuu cuan.

¹⁶ Soco ra Pedro ndoo ra yuvehe chata vehe. Yucuan chaha quita ra cha ñohó nuu chi ra cuví nuu chi tata sutu cuan, ta cahan ra chihin ñaha cha nyaá yuvehe cuan. Ta tyihí ra chi ra Pedro chichi nuquehe cuan.

¹⁷ Tyicuan ta ñaha cha nyaá yuvehe cuan ndaca tuhun ña chi ra Pedro, ta catyí ña:

—¿Atu ñima noo ra chica noo chihin rayi cuan cuvún?

Ta ra Pedro catyí ra:

—Ñime cuví —catyí ra chi ña.

¹⁸ Tyicuan ta musu ta policia cha tayucú yucuan, casanatahan ra ñuhu vatyí vichin xaan. Ta tayucú ra casanasaá ra chi ra. Ta ñohó tucu ra Pedro cuan yunuhu cuan, sanasaá ra chi ra.

Nu sanahma ra cuví nuu chi tata sutu chi ra Jesús

(Mt. 26.59-66; Mr. 14.55-64; Lc. 22.66-71)

¹⁹ Tyicuan ta ra cuví nuu chi tata sutu quichaha ndaca tuhun ra chi ra Jesús, yóo ra cuví ra cachicá noo chihin ra, ta ñáa cha sañahá ra chi ñáyivi.

²⁰ Ta ra Jesús catyí ra chi ra:

—Yuhu chihin nuu tandihí ñáyivi cahín. Ta sañahí chichi vehe ñuhu tahan tahan ñuu ta chichi vehe ñuhu cahnu ñuu ihya nu ndu iin ri tandihí ñu Israel. Ta ñahri tuhun xehe cahín.

²¹ ¿Ñáa tuhun cha ndaca tuhun chii? Vaha taxin ca ndaca tuhun chi ñu cha chiñi tuhun cahin, ta maa ñu nacatyí ñu ñáa tuhun cahin chihin ñu. Maa ñu chitó ñu ñáa tuhun cahin —catyí ra Jesús chi ra.

²² Cuhva cha catyí ra Jesús tuhun ihya, noo policia vehe ñuhu cha nanyaá cuan, cañi ra noo nuu ra Jesús ta catyí ra:

—¿Atu tyiña caa nacahún nu cahán ra cuví nuu chi tata sutu? —catyí ra chi ra Jesús.

²³ Ta ra Jesús catyí ra:

—Tatu cahin noo tuhun ña vaha, catyí chii nya maa maa ña vaha cahin. Soco tatu cahin tuhun vaha, ¿ñáa tuhun cha cañun chii? —catyí ra Jesús chi ra cuan.

²⁴ Yahá cuan ta nuhñi ra Jesús, ta tachí ra Anás chi ra nu nyaá ra Caifás, ra cuví nuu chi tata sutu.

Nu catyí ra Pedro inga chaha vatyí ña ñohó nuu ra chi ra Jesús

(Mt. 26.71-75; Mr. 14.66-72; Lc. 22.58-62)

²⁵ Ta ra Pedro nanyaá ca ra yunuhu cuan sanasaá ra chi ra. Ta catyí ñu chi ra:

—¿Atu ñima noo ra chicá noo chihin ra cuan cuví yoho? —catyí ñu chi ra.

Ta ra Pedro tixehe ra, ta catyí ra:

—Ñime.

²⁶ Tyicuan ta noo musu ra cuví nuu chi tata sutu, noo ra cha cuví ñáyivi chi ra cha chahnya ra Pedro soho, quichaha ndaca tuhun ra ta catyí ra:

—Ta caa cuiri tyi nyehi chuun chihin ra chichi chacu cuan —catyí ra chi ra Pedro.

²⁷ Ta ra Pedro tixehe ra inga chaha, ta caa cuhva ri cuan ta chacu noo loho.

Nu nanyaá ra Jesús nuu ra Pilato

(Mt. 27.1-2, 11-14; Mr. 15.1-5; Lc. 23.1-5)

²⁸ Yahá cuan ta quita coyo ra chihin ra Jesús vehe ra Caifás ta chinyaca ra chi ra vehe tyiño gobernador. Cha vachi cundichin ta ra Israel ña caquihvi ra chichi vehe tyiño cuan vatyí ñima vehe ñu Israel cuví. Ta vatyí catyí ñu tyi yica cha quihvi ñu vehe savahri vatyí coto ma cuví cuxiñi ñu quivi vico pascua cuan.

²⁹ Yucuan chaha quita ra Pilato vatyí cahan ra chihin ra, ta catyí ra:

—¿Ñáá cuatyí tyaá ndo síqui ra ihya?
—catyí ra Pilato chi ra ñuu Israel.

³⁰ Ta canacahan ra Israel ta catyí ra:

—Tyehe ta ñima noo ra iyó cuatyí cuví ra, ma nacuhva cuenda ndi chi ra chuun —cacatyí ra chi ra Pilato.

³¹ Tyicuan ta ra Pilato catyí ra chi ra:

—Quehen maa ndo chi ra, na cutuñi chi ra nuu maa ndo tari cuhva catyí ley maa ndo.

Ta nacahan ra ñuu Israel cuan ta cacatyí ra:

—Soco nyuhu ñu Israel ñahri ityi iyó chi ndi cha cahñi ndi chi ni noo ñáyivi —catyí ra.

³² Tyicuan caa chino cava cha catyí ra Jesús yoso caa cucúvi ra.

³³ Tyicuan ta nandihvi tucu ra Pilato chichi vehe tyiño cuan inga chaha. Ta cana ra chi ra Jesús ta ndaca tuhun ra chi ra:

—¿Atu yoho cuvún rey cuenda ñu Israel? —catyí ra chi ra.

³⁴ Ta ra Jesús catyí ra:

—¿Atu cha cuenda maun ndaca tuhun, o inga ñu nacatyí ñu tuhin chuun? —catyí ra Jesús chi ra Pilato.

³⁵ Ta catyí ra Pilato:

—Ñima ra ñuu Israel cuví yuhu. Suri ra ñuu maun ta ra cuví nuu chi tata sutu ñuu maun cuví ra canacuhva cuenda chuun chii. ¿Ñáá cha sacuvun? —catyí ra chi ra Jesús.

³⁶ Tyicuan ta nacahan ra Jesús ta catyí ra:

—Nu nyacá ñahi ñima cuenda ñuhu ñayivi ihya cuví. Tyehe ta ican, ra nyicón chii cañi tahan ra tacuhva ma cunyai ndaha ra Israel. Soco nu nyacá ñahi, ñima cuenda ihya cuví —catyí ra Jesús chi ra Pilato.

³⁷ Tyicuan ta ra Pilato catyí ra chi ra:

—¿Tu tyicuan caa, rey cuvún vii? —catyí ra Pilato chi ra Jesús.

Ta nacahan ra Jesús ta catyí ra:

—Rey cuví tari catyun chiña. Yucuan cuenda caqui ta vachi ñuhu ñayivi ihya, vatyí catyí ñáá cha cuví cha ndicha. Tandihí ñu quichaha cha ndicha, tyasohó ñu tuhun cahín —catyí ra Jesús.

³⁸ Ta ra Pilato catyí ra chi ra:

—¿Ta ñáá cha cuví cha ndicha? —catyí ra.

Nu cuacacahñi ra chi ra Jesús

(Mt. 27.15-31; Mr. 15.6-20; Lc. 23.13-25)

Cha yahá cha ndaca tuhun ra tuhun ihya, quita ra Pilato chicahan ra chihin ra Israel inga chaha ta catyí ra:

—Yuhu ña nañihi mai ni noo cuatyí ra ihya.

³⁹ Soco nyoho iyó noo costumbre chi ndo cha chican ndo na sañe chi noo ra ñohó vehe caa cha vico pascua ihya. ¿Atu cuñi ndo cha sañe chi ra cha cuví rey cuenda ndo ñu Israel? —catyí ra Pilato chi ra.

⁴⁰ Tyicuan ta tandihí ra quichaha canachaa ra ta catyí ra:

—¡Ma sañon chi ra chiña! ¡Chi ra Barrabás sañon! —catyí ra.

Ta ra Barrabás cuví ra noo ra suhu.

19

¹ Tyicuan ta quehen ra Pilato chi ra Jesús ta tachí ra na cucañi sindaro chi ra.

² Ta sindaro savaha ra noo corona chihin iñu ta catyihí ra xiñi ra Jesús. Ta sacuihno ra chi ra chihin noo sahma tyacu nyaa tari cha tuhvá rey cañihnó.

³ Tyicuan ta catuhva ra nu nanyaá ra ta chacú nyaa ra chi ra, ta cacatyí ra:

—¡Nocumi chuun yoho Rey cuenda ñu Israel! —cacatyí ra, ta cacatu ra chi ra.

⁴ Tyicuan ta quita tucu ra Pilato inga chaha ta catyí ra chi ra:

—Nyehe ndo cuatave chi ra ityi nuu ndo tacuhva nanyehe ndo vatyí ni noo cuatyí ra ña nañihi —catyí ra Pilato chi ra.

⁵ Ta quita ra Jesús yihí corona iñu cuan xiñi ra, ta ñihnó ra sahma tyacu nyaa cuan. Tyicuan ta ra Pilato catyí ra chi ra:

—¡Ma ra ihya! —catyí ra chi ra.

⁶ Cuhva cha cananyehe ra cacuví nuu chi tata sutu ta policía chi ra, quichaha cacana chaa ra ta catyí ra:

—¡Cahñi chi ra nu cruzi! ¡Cahñi chi ra nu cruzi! —cacatyí ra.

Soco ra Pilato catyí ra chi ra:

—Quehen maa ndo chi ra ta cahñi maa ndo chi ra nu cruzi. Vatyí yuhu ni noo cuatyí ra ña nañihí.

⁷ Soco nacahan ra Israel cuan ta cacatyí ra:

—Iyó noo ley chi ndi, ta cuhva catyí ley ndi, cuñí chi cha cúvi ra vatyí nasahá ra Sehe Nyoo chi ra —cacatyí ra.

⁸ Cha chiñi ra Pilato tuhun ihya, nayuhví ca ra.

⁹ Ta ndihví tucu ra inga chaha chichi vehe tyiño, ta ndaca tuhun ra chi ra Jesús:

—¿Nya quitá yoho? —catyí ra chi ra.

Soco ra Jesús ñahri cha nacañan ra.

¹⁰ Tyicuan ta ra Pilato catyí ra chi ra:

—¿Ñáá tuhun ña nacañun nu cahán yuhu? ¿Atu ña chitón vatyí ra cuví tyiño cuví ta iyó ityi chii cha tyai chuun nu cruzi, ta iyó tucu ityi chii cha sañe chuun? —catyí ra Pilato chi ra Jesús.

¹¹ Ta nacañan ra Jesús ta catyí ra:

—Tyehe ta ña chaha Nyoo tyiño cuan chuun, ñahri ityi iyó chuun cha tachi tuñun chii. Yucuan chaha, ra cha cachaha cuenda chii chuun, cahnu ca cuatyí ra ican saha yoho —catyí ra Jesús chi ra Pilato.

¹² Nya cuhva cuan ta nducu ra Pilato cuhva saña ra chi ra Jesús, socio ra Israel cacana cha ra siqui ra, ta catyí ra:

—¡Tatu sañon chi ra, ñima amigo rey cahnu cuví chuun! Vatyí tandihí ri ra cha catyí tyi rey cuví ra, ra xaan iñi chi rey cahnu cuví ra —cacatyí ra.

¹³ Tyicuan ta cha chiñi ra Pilato tuhun ihya, tachi ra na quita ra Jesús ityi chata vehe. Ta chicunya ra Pilato nu tyayu ra nu tuhvá ra sandaa cuatyí ñáyivi nu nañí chi Gabata chihin sahan hebreo, ta cuñí chi catyí: “Nu yihí yuu”.

¹⁴ Ta cuví chi noo quivi cha ni cumañi ca vico pascua, ñáá cuhva ora. Tyicuan ta ra Pilato catyí ra chi ra Israel cuan:

—¡Ma rey ndo chiña!

¹⁵ Soco maa ra Israel canacha ra ta cacatyí ra:

—¡Na cúvi ra! ¡Na cúvi ra! ¡Cahñi chi ra nu cruzi! —cacatyí ra.

Ta ra Pilato catyí ra chi ra:

—¿Atu cahñi nu cruzi chi rey ndo?

Soco ra cacuví nuu chi tata sutu cacatyí ra:

—Yori ca rey iyó. Noo tuhun ri ra César, cha cuví rey cahnu —catyí ra.

¹⁶ Tyicuan ta ra Pilato chaha cuenda ra chi ra Jesús chi ra na cunyaa ra nu cruzi. Ta

quehen sindaro chi ra, ta cuahan ra chihin ra.

Nu chihí ra Jesucristo nu cruzi

(Mt. 27.32-44; Mr. 15.21-32; Lc. 23.26-43)

¹⁷ Ta nyisó ra Jesús cruzi ra, cuahan ra noo nu nañí: “Yiqui Xiñi Ndiyí”. Ta chihin sahan hebreo nañí chi Gólgota.

¹⁸ Ta yucuan catyaa ra chi ra nu cruzi chihin clavu. Ta ñn rí chihin ra catyaa ra uvi ca ra. Noo ra tacaá ra noo nu cruzi inchiyo xiin ra ta inga ra inga chiyo xiin ra. Ta ra Jesús tacaá ra mahñu.

¹⁹ Ta ra Pilato tachi ra tyiño na cunyaa letra xiñi cruzi cuan. Ta catyí chi tyehe caa: “Ra Jesús ra ñuu Nazaret, Rey cuenda ñu ñuu Israel.”

²⁰ Ta cuaha ñu Israel sacuañu ñu tuhun cuan, vatyí yatyin ri ñuu ñu cuví nu chinanya ra cruzi ra Jesús. Ta letra cuan nyaá chihin sahan hebreo, ta sahan griego, ta sahan latín.

²¹ Yucuan chaha ra cacuví nuu chi tata sutu cacatyí ra chi ra Pilato:

—Ma tyaun: “Rey cuenda ñu ñuu Israel”, vaha ca tyaun: “Ican ra ihya cha catyí vatyí rey cuenda ñu ñuu Israel cuví ra” —cacatyí ra.

²² Soco ra Pilato catyí ra:

—Noo cha yaha tyai, nandoo maa tyicuan caa —catyí ra chi ra.

²³ Cha yaha cha catyaa sindaro cuan chi ra Jesús nu cruzi, canaquehen ra sahma ra ta cha cumi tahan ra quehen ra noo noo sahma ra. Ta ndoo nonga sahma ra cha ña quicu ñu. Noo ri savaha ñu nyacua nya siqui ta nya yuvi.

²⁴ Ta sindaro cuan cacatyí ra chi ra tahan ra:

—Ma cahnya yo. Cuhun yo noo sihva, nyehe yo yóo chi tahan chi sahma cuan —cacatyí ra.

Tyicuan caa cuví tari cuhva catyí nu tutu Nyoo nu catyí chi tyehe caa: “Casacha ra sahme ta chahan ra noo sihva chihin chi, nyehe ra yóo ra saha canaa.” Ta ican ihya casacuví sindaro cuan.

²⁵ Ta chaha cruzi ra Jesús nanyaá sihi ra. Ta nanyaá tucu cuhu ña, ta cu María ñasihi ra Cleofas, ta cu María ñaha Magdala.

²⁶ Ta nanyehe ra Jesús chi sihi ra, nanyaá ña yatyin ri. Ta nanyehe tucu ra chi ra cha

chica noo chihin ra, ra cha cuñi xaan ra chi. Ta catyí ra chi sihi ra:

—Ma sehun nanyaá chiña —catyí ra.

²⁷ Tyicuan ta catyí ra chi ra cha cuñi xaan ra chi:

—Ma sihun nanyaá chiña —catyí ra chi ra.

Ta nya quivi cuan ta naquehen cuenda ra chi ña cuanuhu ña vehe ra.

Nu chihí ra Jesús

(Mt. 27.45-56; Mr. 15.33-41; Lc. 23.44-49)

²⁸ Cha yaha tuhun ihya, cha nyehe ra Jesús vatyi cha ndihí tyiño saha ra. Tyicuan ta catyí ra:

—Ityi ndutya —catyí ra.

Ta chihin tuhun cuan nachino cava tuhun cha nyaá nu tutu Nyoo.

²⁹ Ta yucuan nanyaá noo quiyi tyitú chihin vinagre. Tyicuan ta casatyí ra chihin noo xixan ndutya iya cuan. Ta tyaa ra noo nu soco yutun cha nañi hisopo, ta catyañaa ra nya yuhu ra.

³⁰ Chihí ra Jesús ndutya cuan ta catyí ra:

—Cha iyó vaha tandihí vityin —catyí ra.

Tyicuan ta nacañi noo ra xiñi ra ta chihí ra.

Nu quiñi lanza yiqui naha ra Jesús

³¹ Noo ri ca quivi cumañi ta cuvi quivi cahnu ca vico pascua cuan, ta ra cacuvi nuu chi ñu Israel ña cuñi ra cha ndoo coño ñuhu cuan nu cruzi quivi nyitatu ñu, vatyi quivi nyitatu ñu quivi ii cuvi. Yucuan chaha chican ra tumañi iñi chi ra Pilato na tachi ra na cucahnu sindaro sihin ra cha catacoyo nu cruzi cuan tacuhva na cacuvi ra cha numi ri, ta cañehe ra coño ñuhu ra.

³² Tyicuan ta cuahan coyo sindaro nu tayucú cruzi cuan. Ta chahnu ra sihin noo ra cha tacaá yucuan. Tyicuan ta chahnu tucu ra sihin inga ra cha taca xiin ra Jesús.

³³ Soco cuhva cha cuatuhva ra nu tacaá ra Jesús, cananyehe ra vatyi cha chihí ra. Ta yucuan chaha ña cachahnu ca ra sihin ra.

³⁴ Soco suvita ri noo sindaro cuan quiñi ra lanza yiqui naha ra Jesús. Ta quitá niñi ta ndutya.

³⁵ Ra cha nacatyí tuhun ihya, noo ra cha nyehe cuvi ra. Ta cha ndicha cahán ra, vatyi maa ra chitó ra vatyi cha ndicha cahán ra, tacuhva nachino tucu iñi nyoho.

³⁶ Vatyi tuhun ihya cuvi chi tyehe caa tari cuhva catyí tuhun Nyoo nu catyí chi: “Ni noo yiqui ra ta ma tahnu.”

³⁷ Ta iyó nonga tucu nu catyí chi nu tutu Nyoo tyehe caa: “Cunyehe ñu chi ra cha quiñi ra lanza chi.”

Nu quihvi ra Jesús chichi ñuhú

(Mt. 27.57-61; Mr. 15.42-47; Lc. 23.50-56)

³⁸ Cha yaha tuhun ihya, ra José ra ñuu Arimatea chican ra chi ra Pilato nacuhva ra cha naquehen ra coño ñuhu ra Jesús. Ta ra José cuan cuvi ra noo ra yihí cuenda ra Jesús vasi xehe ri cha cuenda cha yuhvi ra chi ra cacuvi nuu chi ñu Israel. Tyicuan ta chaha ra Pilato permisú chi ra, ta ra José chahan ra chinaquehen ra coño ñuhu cuan.

³⁹ Chahan tucu ra Nicodemo, ra cha chahan chichan chihin ra Jesús cha cha cuaa. Chaa ra chihin ndutya vixi chahan. Ta noo ndutya vixi chahan cha nañi mirra nasaca ñu chihin inga cha nañi áloe. Ta quitá chi tari noo oco uchi kilu cha tandihí.

⁴⁰ Yucuan ta ra José ta ra Nicodemo caquehen ra coño ñuhu ra Jesús ta canasiqui noo ra chi ra chihin sahna cuiñi cahyu ra ndutya vixi chahan cuan, tari cuhva noo tuhun cha iyó chi ñu Israel tu cuatyihí ñu noo ndiyi chichi ñuhú.

⁴¹ Yatyin nu cachahni ra chi ra Jesús nu cruzi nyaá noo chacu yutun yucu vixi. Ta chichi chacu cuan nyaá noo ñaña chaa nu ta cohon ca ni noo ndiyi.

⁴² Yucuan tyihí ra coño ñuhu ra Jesús vatyi yatyin ri cuan nyaá ñaña cuan ta vatyi cha cua quichaha quivi nyitatu ñu Israel.

20

Nu nandoto ra Jesús

(Mt. 28.1-10; Mr. 16.1-8; Lc. 24.1-12)

¹ Cha timingu cha ñaa ca, cu María ñaha Magdala cuan chahan ña nu ñaña. Ta nyehe ña tyi ñahri ca yuu nyasí yuhu ñaña cuan.

² Tyicuan ta chinó vavaha ña cuahan ña nu nyaá ra Simón Pedro ta inga ra chica noo chihin ra Jesús, ra cha cuñi xaan ra Jesús chi. Ta catyí ña chi ra:

—Quehen ñáyivi coño ñuhu Sutu Mañi yo chichi ñaña, ta ña chitó yo nya chinyaca ñu

—catyí cu María chi ra Pedro ta chi inga ra cuan.

³ Tyicuan ta ra Pedro ta inga ra cuan cuahan coyo ra nu ñaña.

⁴ Ninduvi ra ñin ri cuahan coyo ra cachino ra. Soco chino ca inga ra cuan ícan saha ra Pedro, ta xihna ca ra chaá nu ñaña.

⁵ Quichaha nyehe ñihñi ra chichi ñaña, ta nyehe ra sahma cuiñi cha yihí coño ñuhu ra Jesús, catuví cuan. Soco ña quihví ra chichi ñaña.

⁶ Yahá cuan ta chaá ra Simón Pedro chata ra, ta quihví ra chichi ñaña cuan. Suri nyehe tucu ra cuan sahma cuan catuví.

⁷ Ta suri nyehe tucu ra vatyí sahma cha siquí noo xiñi ra Jesús, ña ñin ri cayucú chihin inga sahma cuan, soco catuví ñin.

⁸ Tyicuan ta quihví tucu inga ra chica noo chihin ra Jesús cuan, ra cha chaá cha xihna ri nu ñaña cuan. Ta nyehe ra cha cuví cuan, ta chinqo ñi ra.

⁹ Vatyí cha cuví maa ta cutuñi ca ñi ra cha catyí nu tutu Nyoo, vatyí ra Jesús cuñi chi cha nandoto ra cha yahá chihi ra.

¹⁰ Tyicuan ta ra cachica noo chihin ra Jesús cuanuhu coyo ra nya vehe.

Nu tuví ra Jesús nuu cu María ñaha ñuu Magdala

(Mr. 16.9-11)

¹¹ Soco cu María ndoo ña chata yatyin ri yuhu ñaña, chacú chaá ña. Cha ñiri ca cha chacú ña, nyehé ñihñi ña chichi ñaña.

¹² Ta nyehe ña uvi tahan ángel ñihnó ra sahma cuichin, nyicú ra nu catuví coño ñuhu ra Jesús. Noo ra nyaá ityi nu catuví xiñi ra, ta nonga ra ityi nu catuví chaha ra.

¹³ Ta ángel cuan ndaca tuhun ra chi ña ta catyí ra:

—Maha, ¿ñáá tuhun chacú chaun?

Ta catyí ña:

—Vatyí quehen ñu chi Sutu Mañi yuhu, ta ña chité nya tyihí ñu chi ra —catyí ña chi ángel cuan.

¹⁴ Ni cahán ña tuhun ihya ta nanyocava ña ta nanyehé ña chi ra Jesús yucuan. Soco ña chitó ña cha ra Jesús cuví ra.

¹⁵ Tyicuan ta ra Jesús ndaca tuhun ra chi ña:

—¿Ñáá tuhun chacún? ¿Yóó chi nanducún? —catyí ra chi ña.

Cuñi maa ña vatyí ra sahá cumi chacu cuan cuví ra. Ta catyí ña:

—Tata, tatu yoho quehun chi ra Jesús, catyí chii nya sandoun chi ra, vatyí naquehin chi ra —catyí ña chi ra.

¹⁶ Tyicuan ta catyí ra Jesús chi ña:

—¡María! —catyí ra chi ña.

Maa ña nanyehé ña ta cahan ña chihin ra chihin sahan hebreo, ta catyí ña:

—¡Raboni! —Ta cuñi chi catyí: “Maestro”.

¹⁷ Ta catyí ra Jesús chi ña:

—Ma tiun chii, vatyí ta nandaa que nu nyaá Suti. Soco cuahan ta catyun chi tandihí yañi vatyí cuahin nu nyaá Suti, ta suri Sutu ndo cuví chi ra. Cuahin nu nyaá Nyoi, ta suri Nyoo ndo cuví chi ra —catyí ra Jesús chi ña.

¹⁸ Tyicuan ta chahan cu María ñaha Magdala cuan chisacoto ña chi ra cachica noo chihin ra Jesús vatyí nyehe ña chi ra Jesús ta catyí ra tuhun cuan chi ña.

Nu tuví ra Jesús nuu ra cachica noo chihin ra

(Mt. 28.16-20; Mr. 16.14-18; Lc. 24.36-49)

¹⁹ Suri maa quiví cuan cha quichaha vitya, cha cuacuaa ta candu ñin ri ra cachica noo chihin ra Jesús. Ta nyaá vaha yuvehe nu nyicú ra cha cuenda cha yuhví ra chi ra cacuví nuu chi ñu Israel. Ta ra Jesús tuví ra ta chicuinanyaá ra mahñu. Ta chaha ra nocumi chi ra, ta catyí ra:

—Na coo cha taxi ri añima ndo —catyí ra.

²⁰ Cha yahá cha catyí ra tuhun ihya ta sañaha ra ndaha ra ta yiqui naha ra. Ta maa ra cacusiñi cuñi ra cha nanyehé ra chi Sutu Mañi yo.

²¹ Ta catyí tucu ra Jesús inga chaha chi ra:

—Na coo cha taxi ri añima ndo. Tari tachí Suti tyiño chii, tyicuan caa tachí tyiño chí nyoho —catyí ra chi ra.

²² Tyicuan ta tiví ra siquí ra ta catyí ra chi ra:

—Naquehen ndo Tatyí Ii Nyoo.

²³ Ñu cha sahá ndo tucahnu ñi chi, iyó tucahnu ñi chi ñu. Ta ñu cha ña sahá ndo tucahnu ñi chi, ñahri tucahnu ñi iyó chí ñu —catyí ra Jesús chi ra.

Nu nyehe ra Tomás chi Sutu Mañi yo cha yahá nandoto ra

²⁴ Soco ra Tomás, noo ra chica noo chihin ra Jesús, ra cha catyí ñu: “ra tñihí”, yori ra nyaá chihin ra cuhva cha quichí ra Jesús.

²⁵ Yahá cuan ta canacatyí ra cachica noo chihin ra Jesús chi ra:

—Nyehe ndi chi Sutu Mañi yo —cacatyí ra chi ra.

Soco ra Tomás catyí ra:

—Tatu ma nyehi ndaha ra nu cahví nu yihí clavu, ta tatu ma tyihi ndahi nu yihí clavu cuan, ta tatu ma tyihi ndahi yiqui naha ra, ma chino iñi —catyí ra Tomás.

²⁶ Uña quivi yahá ta canyicú tucu ra cachica noo chihin ra Jesús noo vehe. Ta nyaá ra Tomás chihin ra. Tyicuan ta vasi nyasí vaha yuvehe soco quihví ra Jesús ta chicuinanyaa ra mahñu ra. Ta chahá ra nocumi ta catyí ra:

—Na coo cha taxi ri añima ndo.

²⁷ Tyicuan ta quichaha catyí ra chi ra Tomás:

—Tyihi nu ndahun nu cahví ndahi. Ta tyihi ndahun yiqui nahi. Ta ma caca uvi iñun, soco chino iñun —catyí ra Jesús chi ra Tomás.

²⁸ Tyicuan ta nacahan ra Tomás ta catyí ra:

—¡Sutu Mañi yuhu! ¡Nyoo Suti cuví chuun! —catyí ra Tomás.

²⁹ Ta catyí ra Jesús chi ra:

—Yoho Tomás, vityin chinó iñun tyi nyehún chi. Sii ca cuñi ñu cha ña nyehe ta chinó iñi ñu —catyí ra Jesús chi ra Tomás.

Nu sacoto ra Juan ñáa cuenda chinqo libru ihya

³⁰ Ta cuaha ca milagru sacuvi ra Jesús nuu ra cachica noo chihin ra, ta ñahri chicunyya nu libru ihya.

³¹ Soco chicunyyaa tuhun ihya vatyí tacuhva chino iñi ndo vatyí ra Jesús cuví Cristo, ra cuví Sehe Nyoo, ta vatyí coo ndo ñayivi cha ma naa ca maa tatu chinó iñi ndo chi ra.

21

Nu tuví ra Jesús nuu ucha tahan ra cachica noo chihin ra

¹ Cha yahá cuan ta tuví tucu ra Jesús nuu ra cachica noo chihin ra inga chaha. Tyehe caa tuví ra yuhu miñi Tiberias.

² Iñ ri nyicú ra Simón Pedro ta ra Tomás cha catyí ñu: “ra tñihí” chi, ta ra Natanael, ra ñuu Caná nu cuví Galilea. Nyicú tucu sehe ra Zebedeo ta uvi ca ra cachica noo chihin ra Jesús.

³ Ta catyí ra Simón Pedro chi ra:

—Cuahin cuatiin tiyaca —catyí ra.

Ta cacatyí ra chi ra:

—Cuhun tucu nyuhu chuhun —cacatyí ra.

Cuahan coyo ra ta quihví coyo ra chichi noo canoa, soco cha cuaa cuan ni noo tiyaca ña catiñ ra.

⁴ Cha vachi cundichin cuan tuví ra Jesús nu ñiti yuhu miñi cuan. Soco ra cachica noo chihin ra, ña canicohón nuu ra chi ra.

⁵ Tyicuan ta catyí ra chi ra:

—Yoho ra tahan yo, ¿atu ta ñihi ca ndo tiyaca?

Ta canacahan ra ta catyí ra:

—Ta ñihi ca ndi.

⁶ Tyicuan ta nacahan ra Jesús ta catyí ra: —Tyihi ndo tarraya chiyo vaha canoa chiña, ta ñihi ndo —catyí ra Jesús chi ra.

Tyicuan caa casacuvi ra, ta yaha cuan ta nyacua ña cuví tava ra tarraya cuan nu ndutya chaha cha cuaha tiyaca yihí.

⁷ Ta ra cha cuñi xaan ra Jesús chii catyí ra chi ra Pedro:

—¡Sutu Mañi yo cuví! —catyí ra chi ra Pedro.

Cha chiñi ra Simón Pedro vatyí Sutu Mañi yo cuví, ndihví noo ra sahma ra, vatyí tavá ra cha cuatiñ ra tiyaca, ta quiñi ra cuahan ra chichi ndutya cuan.

⁸ Ta inga ra cachica noo chihin ra Jesús chaá coyo ra nya yuhu miñi cuan chihin canoa, caxitá ra tarraya cuan tyitú yihí tiyaca, vatyí yatyin ri yuhu miñi cuan cañohó ra ta cha noo cientu metru ri.

⁹ Cuhva cha canoó ra nu ñuhú, cananyehé ra noo nu caá titi ñuhú. Ta catuví noo tiyaca siqui titi ñuhú cuan, ta pan ñandihí.

¹⁰ Ta ra Jesús catyí ra chi ra:

—Nyaca ndo suhva tiyaca cha ni tiñ ndo —catyí ra Jesús chi ra.

¹¹ Ta ra Simón Pedro ndaa ra nu canoa ta quichaha xita quiñoho ra tarraya tyitú yihí tiyaca nahnu. Cientu uvi xico uchi uñi tahan ti ñohó. Ta vasi cuaha ti, ña tahnya tarraya cuan.

12 Tyicuan ta catyí ra Jesús chi ra:

—Ñaha ndo ta curumusa ndo —catyí ra Jesús chi ra.

Ta ni noo ra cachica noo chihin ra ña cacaña ñi ra candaca tuhun ra yóo ra cuví ra vaty cachitó ra vaty Sutu Mañi yo cuví ra.

13 Tyicuan ta tuhva ra Jesús ta quehen ra pan, ta chaha ra chi ra. Ta suri tyicuan caa sacuvi ra chihin tiyaca.

14 Ican ihya cuví chaha cu ñi cha tui ra Jesús nuu ra cachica noo chihin ra cha yaha cha nandoto ra.

Nu cahán ra Jesús chihin ra Simón Pedro

15 Cha yaha cha curumusa ra Jesús, ndaca tuhun ra chi ra Simón Pedro:

—Simón, sehe ra Jonás, ¿atu cuñi con chii ican saha ra ihya?

Ta nacahan ra Pedro ta catyí ra:

—Ay, Sutu Mañi yuhu, maun chitón tyi cuñi chuun —catyí ra Pedro.

Ta catyí ra Jesús chi ra:

—Cuhva cha cachi mbee nyihi sane —catyí ra Jesús chi ra Pedro.

16 Ta ndaca tuhun ra Jesús chi ra inga chaha:

—Simón sehe ra Jonás, ¿atu cuñun chii? —catyí ra Jesús chi ra.

Ta nacahan ra Pedro ta catyí ra:

—Sutu Mañi yuhu, maun chitón tyi cuñi chuun —catyí ra Pedro chi ra.

Ta catyí ra chi ra:

—Saha cumi mbee sane —catyí ra Jesús chi ra Pedro.

17 Ta chaha cu ñi ndaca tuhun ra chi ra:

—Simón Pedro, sehe ra Jonás, ¿atu cuñun chii? —catyí ra Jesús chi ra.

Cuhva cha ndaca tuhun ra chi ra cha cu ñi chaha tatu cuñi ra chi ra, ra Pedro nducuihya ñi ra, ta catyí ra chi ra:

—Sutu Mañi yuhu, maun chitón yoso caa ñime ta maun chitón tyi cuñi chuun —catyí ra Pedro.

Ta ra Jesús catyí ra chi ra:

—Saha cuenda mbee sane.

18 Cha ndicha catyí chuun vaty ta tyivaun ndihvi noun sahmon ta chahun nu cuñun. Soco na cuchahnun, cusanacaun ndahun ta inga ra cusandihvi noo chuun. Ta cunyaca ra chuun nu ña cuñun cahun —catyí ra Jesús chi ra Pedro.

19 Cha catyí ra Jesús tuhun ihya cuñi ra catyí ra yoso caa cucuvi ra Pedro ta cusacahnu ra chi Nyoo cha cuenda cuan. Yaha cuan ta catyí ra Jesús chi ra Pedro:

—¡Cunyicon chii! —catyí ra chi ra.

Nu cahán ra Juan tuhun maa ra

20 Tyicuan ta nyocava ra Pedro ta nanyehē ra vaty nyicón inga ra cha chica noo chihin ra Jesús, ra cha cuñi xaan ra Jesús chi. Suri maa ra chinyaña ra chi ra Jesús cha cuxiñi ra quivi cuan. Ta ndaca tuhun ra ta catyí ra: “Sutu Mañi yuhu, ¿yóo ra cunaxico tuhun chuun?” catyí ra, ndaca tuhun ra quivi cha ni cumañi cúvi ra Jesús.

21 Cuhva cha nanyehē ra Pedro chi ra, ndaca tuhun ra chi ra Jesús:

—Sutu Mañi yuhu, ta ra ihya, ¿ñáa cha cucuvi chi ra? —catyí ra chi ra.

22 Nacahan ra Jesús ta catyí ra:

—Tatu cuñi mai cha coo ra nyacua nya ndichi inga chaha, ¿ñáa cha cuenda yoho? Yoho cunyicon chii —catyí ra Jesús chi ra Pedro.

23 Tyicuan ta chitya tuhun ihya nu canyicú yañi yo vaty ra cuan, ma cúvi ra. Soco ña catyí ra Jesús cha ma cúvi ra. Catyí ra: “Tatu cuñi yuhu cha coo ra nyacua nya quichi inga chaha, ¿ñáa cha cuenda yoho?”

24 Yuhu cuví ra yucuan, ra cha cahán ra Jesús tuhun. Ta nyehi tandihí cuíi maa cha cuví ta tyai nu libru ihya. Yuhu chite vaty tandihí cha tyai, ndicha.

25 Iyó cuaha ca cha sacuvi ra Jesús. Tyehe ta chicunyañ tahanan tahanan tuhun cuan nu libru, cahví ñi tyi naní ñuhu ñayivi ma cutahan tandihí libru cuan.

Tyiño Cha Casacuví Ra Apóstol: Ra Cha Tyatyíño Ra Jesucristo Chi

Nu catyí ra Jesús tyi cuaquichi Tatyí Ii Nyoo

¹ Yoho Teófilo, yuhu ra Lucas sacuhin tutu chuun quivi cuan. Ta nu sacuhin tutu cha xihna ri cuan, tyaj tandihí cha quichahá sacuvi ra Jesús ta tandihí cha sañahá ra nya quivi xihna ri

² ta nya quivi nandaá xica ra andivi. Ta cha cumañi ca nandaá ra andivi, nacachi ra chi ra apóstol cuenda ra. Ta tyatyíño ra chi ra chihin Tatyí Ii Nyoo tyi cacaca ra tyiño ra.

³ Ta maa ra Jesús nyehe ra tindoho ta chihí ra. Ta cha yaha cuan, nandoto ra ta tuví ra nu canyicú ra apóstol. Ta chichi cha uvi xico quivi, cuaha xaan chaha tuví ra nu canyicú ra, vatyí na cacoto ra vatyí ndicha cha nyitó ra. Ta cahan ra tuhun yoso caa nyacá ñaha Nyoo chi yo.

⁴ Cuhva cha nyaá ca ra chihin ra, ra Jesús catyí ra chi ra:

—Ma quita ndo Jerusalén ihya, nyacua nya naquehen ndo Tatyí Ii cha catyí Suti tyi cuhva ra chi ndo, tari catyí chi ndo quivi cuan.

⁵ Chihin ndutya sacondutya ra Juan chi ñáyivi. Soco nyoho ña cuaha ca quivi ta cucondutya ndo chihin Tatyí Ii —catyí ra Jesús.

Nu nandaá xica ra Jesús andivi

⁶ Cuhva cha canyicú ra apóstol ñin ri chihin ra Jesús, ta candacá tuhun ra chi ra:

—Sutu Mañi yuhu, ¿atu vityin ri cusacacun chi ñuu yo Israel ihya ndaha ra ñuu Roma? —catyí ra.

⁷ Ta nacahan ra Jesús ta catyí ra:

—Ña tahan chi coto nyoho nya quivi. Noo tuhun ri maa Nyoo Sutu yo cuacatyí ra ama.

⁸ Soco cuhva cha quichi Tatyí Ii siqui ndo cunaquehen ndo tunyee ñni, ta cuquita ndo vatyí cahan ndo tuhun Jerusalén ihya ta tandihí ñuu cha nyicú Judea ta Samaria, ta nicahnu ñuhu ñáyivi.

⁹ Ta cha yaha cha catyí ra Jesús tuhun ihya, ta cha ni ri ca cha canyehé ra chi ra, nandaá xica ra andivi, ta quihvi ra chichi noo vico. Ta ña canyehé ca ra chi ra.

¹⁰ Ta cuhva cha canyehé ndaa ra andivi, ta tuví uvi tahan ángel yatyin nu canyicú ra. Ñihnó ra sahma cuichin.

¹¹ Ta cacatyí ra cuan chi ra:

—Nyoho ra Galilea, ¿ñáá tuhun cha ndoo ndo nyehé ndaa ndo andivi? Suri maa ra Jesús cha nyehe ndo nandaá xica ihya, tyehé caa cuaquichi tucu ra inga chaha.

Nu canacachí ra apóstol chi ra Matías vatyí ndihvi ra tyiño nuu ra Judas

¹² Tyicuan ta quita coyo ra apóstol nu chinyicu ra yucu nu iyó yutun olivo cuan. Ta cuanuhú coyo ra ñuu Jerusalén. Ta yatyin ri nyaá ñuu cuan, tari sava hora ri. Ta sava ri hora cuví caca ñáyivi quivi nyitatú ñu, vatyí tyicuan caa catyí ley cha tyaá ra Moisés.

¹³ Cuhva cha nachaa coyo ra Jerusalén cuan, candaá ra nu cu uvi piso noo vehe nu ca iyó ra. Ta tandihí ra cuan, ican ra cuví, ra Pedro, ra Jacobo, ra Juan, ra Andrés, ra Felipe, ra Tomás, ra Bartolomé, ra Mateo, ra Jacobo sehe ra Alfeo, ta ra Simón cuenda ra cacuñi naquiqui siqui gobiernu Roma, ta ra Judas yañi ra Jacobo.

¹⁴ Ta nyita ri ndu ñin ri ra ta ñin ri cuhva cachicá xiñi ra ta cachicán tahvi ra chi Nyoo. Ta nyicú tucu yañi ra Jesús ta cu María sihi ra, ta inga ñusihi ñandihí.

¹⁵ Tari noo ciento oco ñáyivi ndu ñin ri ñu quivi cuan. Ta nicuinanyaá ra Pedro. Ta catyí ra chi ñu:

¹⁶ —Nyoho yañi, cuñi chi cha cuví tari cuhva catyí nu tutu Nyoo. Vatyí cahan Tatyí Ii chihin yuhu ra David yoso caa cuhva cuenda ra Judas chi ra Jesús chi ra xaan ñni chi ra.

¹⁷ Ta ra Judas cuví ra noo ra chindihí chihin yo. Ta ñin ri chicá ra tyiño Sutu Mañi yo chihin yo.

¹⁸ Soco chahan ra, ta satá ra noo ñuhú chihin xuhun cha ñihí ra cha chahá cuenda ra chi ra Jesús. Yaha cuan ta canacava ra chihin xiñi ra, ta ndatá chichi ra ta quita tandihí chiti yihvi ra.

¹⁹ Ta quiví cha cachito ñu ca iyó Jerusalén ihya cha chihí ra, casacunañi ñu chi ñuhu cuan Acéldama. Ta cha chihin sahan maa ñu cuñi chi catyí Nu Catuvi Niñi.

²⁰ Vatyí nu libru Salmo catyí chi tuhun ra Judas tyehe caa:

Na ndoo maa ri maa vehe ra.

Ta yori coo chichi.

Ta catyí tucu chi:

Inga ra cunanduvi tyiño nuu ra.

²¹⁻²² Ta vityin nyicú ra cachica noo chihin yo quiví chinyaa Sutu Mañi yo Jesús chihin yo; nya quiví sacondutya ra Juan chi ra, ta nya quiví nandaa xica ra andivi. Ta vityin cuñi chi cha ndu ñin ri noo ra chihin yo, vatyí cuvi ra cha ndaa cha cuenda cha nandoto ra Cristo —catyí ra Pedro.

²³ Tyicuan ta cacana ra chi uvi tahan ra, chi ra José cha nañi Barsabás, ta suri nañi tucu ra Justo; ta cacana tucu ra chi ra Matías.

²⁴ Ta cachican tahvi ra tyehe caa:

—Sutu Mañi yuhu, yoho chitón cha caa añima tandihí ndi. Sañaha chi ndi chichi cha uvi tahan ra ihya, nya ra cha nacachi maun,

²⁵ vatyí sacuvi ra tyiño cha sacuna ra Judas cha cuenda cuatyí ra, ta cuahan ra nu tahan chi cuhun ra —cacatyí ra, chicán tahvi ra.

²⁶ Tyicuan ta cachahan ra noo sihva, tacuhva nyehe ra nya ra tahan chi nyatu cuan chi. Ta tahan chi chi ra Matías. Ta yucuan cuví nu ndu ñin ri ra chihin ndi uchi ñin apóstol.

2

Nu chaq Tatyí Ii

¹ Ta ñin ri nyicú ñáyivi yihí cuenda ra Jesús ta cha quiví vico Pentecostés cha sanducahnú ñáyivi Israel. Ta ñin ri cuhva chicá xiñi ñu.

² Ta sana iñi ñu ta nacuñi ñu noo cha cayu vachi ityi andivi. Tari cha cayu yahá noo tatyí ñihi. Ta iyo cuví tandihí chichí vehe nu canyicú ñu.

³ Tyicuan ta tuví tari yaa ñuhu quití cuatyí siqui noo noo ñu.

⁴ Ta tandihí ñu chitu ñu chihin Tatyí Ii. Ta quichaha cahan ñu inga sahan yoso cuhva saquehen ityi maa Tatyí Ii chi ñu.

⁵ Ta quiví cuan cuaha xaan ra Israel ra vaha chicá chihin Nyoo canyicú ra ñuu Jerusalén cuan. Cuaha xaan ra ca iyó inga ityi nicahnu siqui ñuhú ñáyivi cha coyo vatyí casanducahnu ra vico Pentecostés.

⁶ Ta cha cachiñi ra cuan cha iyo xaan cuví nu canyicú ñu, ta cuahan coyo ra ta nataca ra yatyin ri nu nyicú ñu. Ta ña cutuñi iñi ra ñáa cha cuví cuan, vatyí noo noo ra cachiñi ra cahan ñu cuhva sahan cha cacahan maa ra.

⁷ Iyo cuñi ra ta catyí ra chi ra tahan ra:

—¿Atu ñima ñu Galilea cuví tandihí ñu cha cahan ihya?

⁸ ¿Ñáa tuhun cha chiñi yo cahan ñu cuhva sahan noo noo yo?

⁹ Ihya nyicú yo cha cuví yo ñu Partia, ta ñu Media, ta ñu Elam, ta ñu Mesopotamia, ta ñu Judea, ta ñu Capadocia, ta ñu Ponto, ta ñu Asia.

¹⁰ Ta ñu Frigia ta ñu Panfilia, ta ñu Egipto, ta ñu iyó ityi nuu ca Cirene ityi Africa. Ta nyicú tucu ñu ñuu Roma cha iyó ñuu ihya. Ta suhva ñu cuví ñu ñu Israel nya quiví cacu ñu. Ta inga ñu cuví ñu ñáyivi nanduví cuenda ñu Israel ta nyicon ñu ley ra Moisés.

¹¹ Iyó tucu ñáyivi ñuhú Creta ta ñu Arabia. Soco tandihí yo ta chiñi yo cahan ñu chihin sahan cha cahan yo. Ta nacatyí ñu cha cahnu cha sacuví Nyoo —cacatyí ra.

¹² Tandihí ra, iyo xaan cacuñi ra, ta yihí ra ndacá tuhun ra chi tahan ra:

—¿Ñáa cha cuñi chi catyí chi tandihí tuhun ihya? —catyí ra.

¹³ Soco inga ra cahan nyaa ra ta cacatyí ra vatyí cachiñi ñu.

Nu cahan noo ra Pedro nuu ñáyivi

¹⁴ Tyicuan ta nicuinanyaa ra Pedro chihin inga uchi ñin tahan apóstol. Ta chihin cha cha cahan ra ta catyí ra:

—Nyoho yañi, cha cuví ndo ra Israel, ta tandihí nyoho cha iyó ndo Jerusalén ihya. Coto ndo tuhun ihya. Ta cuñi vaha ndo tuhun cha cuacatyí chi ndo.

¹⁵ Vatyí cuñi maa ndo tyi chiñi ndi. Soco ña chiñi ndi, vatyí ña tuhvá ñáyivi chiñi cha cuhva ihya, vatyí ni ca ñin cha ñaha ri cuví.

¹⁶ Soco ihya cuví tuhun cha cahan ra Joel, ra cuví profeta Nyoo ta cha naha. Vatyí catyí ra:

- 17 Nu cuandihí ca quívi, catyí Nyoo, cusaquichi Tatyí li síqui tandihí ñáyívi. Ta cucahan sehe ndo cuende. Ta ra tyivaa ta ñu tyivaa cunyehe ñu cha sañaha Nyoo chi ñu. Ta ra chahnu cunyehe ra ñumahna.
- 18 Cusaquichi Tatyí li síqui ñu sacuví tyiño nui. Ta cucahan ñu cuende, catyí Nyoo.
- 19 Ta catyí ra vatyí cusañaha ra cha iyo cucuvi ityi andívi. Ta ityi nu ñuhu ñayívi cusañaha ra seña, seña niñi, seña ñuhu, ta vico ñuhma.
- 20 Cunduñaa ñanyii. Ta yoo tari caa tyacu niñi cunanduvi. Tyicuan caa cucuvi cha niri ca cha chaá quívi quichi Sutu Mañi yo. Ta cucuvi noo quívi cahnu vatyí cucutuñi chi yo nuu ra.
- 21 Ta tandihí ñu chicán tahvi sívi ra cucacu ñu. Tyicuan caa catyí ra Joel.
- 22 'Cuiñi ndo nyoho ra Israel. Cuiñi ndo tuhun cha cuacatyí ihya. Ra Jesús ra Nazaret cuví ra noo ra cha cachí Nyoo chi vatyí quichi ra nu nyicu yo. Ta chitó yo vatyí ndicha vatyí cuaha xaan cha iyo, ta cuaha xaan milagru ta seña sacuví Nyoo nu canyicú yo cha cuenda ra Jesús. Ta nyoho chitó vaha ndo tuhun ihya.
- 23 Soco quívi quehen cuenda ndo chi ra, sacuví ndo tari kuhva tyaa maa Nyoo kuhva nyata quívi xihna ri. Vatyí chaha cuenda ndo chi ra chi ra quiñi iyó. Ta chitacaá ra chi ra nu cruzi. Ta tyicuan caa chahñi ndo chi ra.
- 24 Soco Nyoo sanandoto ra chi ra vatyí sacacu ra chi ra ndaha tuhun chihi. Vatyí tuhun chihi ña cuví cunyaca ñaha chi ra.
- 25 Vatyí ra David cahan ra tuhun ra Cristo ta cha naha, ta catyí ra:
Tyicuan ri nyehí chi Sutu Mañi yo ityi nui. Maa ra nyaá ñn chiyo vahi ta ñahri maa cha cuví sayuhvi chii.
- 26 Yucuan chaha cusí xaan cuñi añime. Ta chité yaa chihin cha sí cuñi.
Ta sñn ri coño ñuhi cunyatatu chi vatyí chité tyi cunandote.
- 27 Vatyí yoho Nyoo Suti, ma sandoun añime nu nyicu ñu chihi, ta ni ma kuhvon cha tyahyu coño ñuhi.
Vatyí sehe iun cuví chii.
- 28 Sañahún ityi cha cuahán nu coi ñayívi chaa cha ma naa ca maa. Ta sacutún chii chihin tusí iñi vatyí nyaún chihin, catyí ra David ta cha naha.
- 29 'Nyoho yañi, chitó cachi yo vatyí ra David sutu chahnu yo chihí ra ta quíhví ra chichi ñuhu. Ta ñaña ra nyaá ca chi ihya nya vityin.
- 30 Soco ra David cuví ra noo profeta cuenda Nyoo. Ta chitó ra vatyí Nyoo tyaa ra kuhva ta ñn ri tuhun cahan ra chihin ra vatyí suri tata maa ra ican cuacacu ra Cristo. Ta ra Cristo, ican ra cunyaca ñaha.
- 31 Ta tyicuan caa ra David tari cha vatyí nyehe ra cha cuacuvi nu cuahan ca chi quívi. Ta cahan ra tuhun cha cunandoto ra Cristo. Ta catyí ra vatyí ma ndoo añima ra nu nyicu ñu chihí. Ta ni ma tyahyu coño ñuhu ra, catyí ra.
- 32 Ta ra Jesús ihya sanandoto Nyoo chi ra. Ta tuhun ihya tandihí maa ndi cuví ndi cha ndaa.
- 33 Nyoo sacahnú ra chi ra Jesús, ta cuatyaá ra chi ra chiyo vaha ra andívi. Ta ra Jesús naquehen cuenda ra Tatyí li cha catyí Sutu yo Nyoo ta cha naha vatyí kuhva ra chi yo. Ta ican cuví cha chahá ra chi ndi vityin. Ican cuví nyehé ndo ta chiñi ndo.
- 34 Vatyí ñima ra David nandaá ra andívi. Vatyí suri maa ra David cahan ra tuhun ra Jesús, ta catyí ra:
Catyí Suti Nyoo chi Suti ra Cristo: "Cunyaá chiyo vahi
- 35 cha niri ca cha caquin chi ra xaan iñi chuun chahun", catyí Nyoo chi ra Cristo chihin yuhu ra David.
- 36 'Nyoho ta tandihí ca ñu Israel, coño vaha ndo vatyí tuhun ra Jesús ican cahín ihya. Chitacaá ndo chi ra nu cruzi. Soco Nyoo cuatyaá ra chi ra tyi cuvi ra Sutu Mañi yo, ra nyaca ñaha chi yo —catyí ra Pedro.
- 37 Kuhva cha chiñi ñu tuhun cahan ra Pedro ihya, nducuihya iñi ñu. Ta ndaca tuhun ñu chi ra Pedro ta chi tandihí ca ra apóstol, ta catyí ñu:
—Nyoho yañi, ¿yoso caa sacuví ndi vityin? —catyí ñu chi ra.
- 38 Yucuan ta catyí ra Pedro chi ñu:
—Noo noo ndo ndu uvi iñi ndo cuatyí ndo ta nasama ndo kuhva iyó ndo nuu

Nyoo. Ta condutya ndo chihin sivi ra Jesucristo. Tacuhva na saha ra ticahnu iñi cuatyí ndo. Tyicuan caa ta cua kuhva Nyoo Tatyí li ra chi ndo.

³⁹ Vatyí cha naha catyí Nyoo vatyí kuhva ra Tatyí li ra chi maa ndo, ta chi sehe ndo, ta chi ñu cha cañi nyaa ñandihí. Vatyí tandihí ñu cha nacana Sutú Mañi yo Nyoo chii cucuhva ra Tatyí li ra chi ñu.

⁴⁰ Chihin tuhun ihya ta chihin inga tuhun, ra Pedro chahá ra tuhun chi ñu ta catyí ra chi ñu:

—Nducu ndo kuhva na sacacu Nyoo chi ndo, tacuhva cuví sandoo ndo cha caa ñáyivi quiñi iyó ihya —catyí ra chi ñu.

⁴¹ Tyicuan ta tandihí ñu cha natin cuenda tuhun cahan ra Pedro condutya ñu. Ta quita tari noo uñi mil ñu, ta ndu ñin ri ñu chihin ñu yihí cuenda ra Jesucristo.

⁴² Ta tyicuan ri ndu ñin ri tandihí ñu, ta chihin cha ñi iñi ñu tyasoho ñu cha sañahá ra apóstol chi ñu. Ta ñin ri cuví ñu chihin tahan ñu, ta chicán tahvi ñu ta chachí ñu pan ta chihí ñu vinu vatyí nicohón iñi ñu tyi chihí ra Cristo tyiño nuu ñu.

Cuhva iyó ñu yihí cuenda Sutú Mañi yo Jesucristo quivi cuan

⁴³ Ta cuaha milagru ta seña sacuvi Nyoo chihin ndaha ra apóstol. Ta tandihí maa ñáyivi iyo cuñi ñu.

⁴⁴ Tandihí ñu yihí cuenda ra Cristo ñin ri cacuví ñu chihin cha iyó chi ñu.

⁴⁵ Xicó ñu cha tyayí ñu ta cha iyó chi ñu. Ta sachá ñu xuhun ñu chi tahan ñu yoso kuhva cha chiñuhú chi noo noo ñu.

⁴⁶ Ndiquivi ta ndu ñin ri ñu nya vehe ñuhu cahnu. Ta ndu ñin tucu ri ñu noo noo vehe tahan ñu ta chachí ñu pan ta chihí ñu vinu. Ta ñin ri cachachí ñu chihin cha siñ cuñi añima ñu. Ta chahá ñu cha cachi tahan ñu chihin cha ñi iñi ñu.

⁴⁷ Ta sacahnú ñu chi Nyoo. Ta vaha cahán tandihí ñáyivi siqui ñu. Ta tahan tahan quivi cuahan sanducuahá ca Sutú Mañi yo chi ñu cha cuahán sacacu ra.

3

Nu nduvahá noo ra coxo

¹ Noo quivi cuahán coyo ra Pedro chihin ra Juan vehe ñuhu cahnu. Cuví chi kuhva

caa uñi cha cha iñi, kuhva cha tuhvá ñáyivi Israel cachicán tahvi ñu chi Nyoo.

² Ta ndi quivi maa nyaá noo ra ndahvi, ra coxo nyata cacu, yuvehe ñuhu cahnu cuan. Vatyí chinyacá ñu chi ra na cacan ra limuxtan chi ñáyivi quihvi yuvehe cuan, ta nañi chi: Yuvehe Tyaqui.

³ Tyicuan ta nanyehé ra coxo cuan chi ra Pedro ta chi ra Juan cha cuaquihvi ra chichi vehe ñuhu cahnu. Ta chicán ra noo limuxtan chi ra.

⁴ Ta cananyehé ra Pedro ta ra Juan chi ra. Ta ra Pedro catyí ra chi ra:

—Nyehe chi ndi —catyí ra.

⁵ Tyicuan ta quichahá nyehe ra coxo cuan chi ra. Cuñi maa ra vatyí iyó cha cuacuhva ra chi ra.

⁶ Soco ra Pedro catyí ra chi ra:

—Ñahri maa xuhun cuichin ta xuhun cuaan iyó chii, ta kuhve chuun. Soco nonga cha iyó chii cua kuhve chuun. Chihin sivi ra Jesucristo ra Nazaret, catyí chuun, ndicuita ta cacon —catyí ra Pedro chi ra.

⁷ Tyicuan ta tin ra Pedro ndaha chiyo vaha ra ta nacoñehé ra chi ra. Ta caa kuhva ri cuan nicoo fuerza chaha ra ta tatu chaha ra.

⁸ Tyicuan ta ra coxo cuan ndava ra noo, ta nicuinanyaá ra. Ta quichahá chica ra. Ta quihvi ra chihin ra chichi vehe ñuhu. Ta chicá ra. Ta cañá ndava ra. Ta sacahnú ra chi Nyoo.

⁹ Tandihí ñáyivi nyehe ñu chicá ra ta sacahnú ra chi Nyoo.

¹⁰ Ta iyo xaan cuñi ñu ta yuhví ñu cha cuenda cha nduvahá ra cuan. Vatyí nicohón nuu ñu chi ra. Ta chitó ñu vatyí suri maa ra cuví cha tuhva chinyaa Yuvehe Tyaqui cuan chican ra limuxtan.

Nu cahán noo ra Pedro tuhun ra Cristo nuu ñáyivi nu cuví corredor ra Salomón

¹¹ Ra coxo cha nduvahá cuan, ña saña maa ra chi ra Pedro ta ra Juan. Ta tandihí ñáyivi iyo cuñi ñu ta chino ñu nataca ñu nu nyicú ra, nya nu cuví corredor ra Salomón chichi vehe ñuhu.

¹² Cha nanyehé ra Pedro cha tyicuan caa, catyí ra chi ñáyivi:

—Nyoho ra Israel, ¿ñáá tuhun cha iyo xaan cuñi nyoho? ¿Ñáá tuhun cha nyehé xaan ndo chi nyuhu? Tari cha vatyí chihin

tunyeē iñi maa ndi, o cha cuenda cha cachi iyó ndi nuu Nyoo, sanduvaha ndi chi rayī ihya, cuñī maa ndo.

13 Nyuhu ña cuví sanduvaha ndi chi ñáyivī. Nyoo cuenda sutu chahnu yo, ra Abraham, ra Isaac, ta ra Jacob, ican ra sacahnú xaan ca ra chi Sehe ra, ra Jesús. Ta maa ndo chaha cuenda ndo chi ra chi ra Pilato, ra cuví tyiño. Ta maa ra cuñī ra saña ra chi ra. Soco nyoho ña chaha ndo.

14 Cha nuu cha cacan ndo cha saña ra chi ra vaha, ra ii cuan, nyoho chican ndo cha saña ra chi noo ra tuhvá chahñī ñáyivī.

15 Tyicuan caa chahñī ndo chi ra cha chahá ñáyivī chaa coo yo chihin Nyoo. Soco Nyoo sanandotō ra chi ra. Ta ña ndō ra chihin ñu chih̄i. Ta nyuhu cuví ndi cha ndaa.

16 Ta suri maa ra Jesús cuví ra chaha fuerza chaha ra coxo ihya. Vatyí chinó iñi ndi tyi iyó tunyeē iñi chi ra Jesús. Yucuan chaha ndunyeē chaha ra ihya, ta ñohó nuu vaha ndo chi ra ihya. Ta nduvaha ra vatyí chinó iñi ndi chi ra Jesús. Ta tandih̄i nyoho cha nyehe maa ndo vityin.

17 'Chité yañi —catyí ra Pedro— vatyí quivī cha chahñī ndo chi ra Jesús, ña chitō ndo tyi ña vaha cha nyacuví ndo. Ta tyicuan caa tucu ra cuví nuu chi ndo, ña cachitó ra.

18 Soco tyehe caa chinó cava tuhun cahan Nyoo chihin yuhu ra profeta cuenda ra ta cha naha, vatyí catyí ra vatyí ra Cristo cunyehe ra tindoho.

19 Yucuan chaha ndu uvi iñi ndo cuatyí ndo. Ta nacuhva ndo añima ndo chi Nyoo, tacuhva na ndachi cuatyí ndo. Tyicuan ta Sutu Mañi yo sandunyeē ra añima ndo vatyí cohon ra añima ndo.

20 Tyicuan ta cutachi ra chi ra Jesús ra cuví Cristo na quichi ra inga chaha. Vatyí quivī xihna ri tyaā Nyoo cuhva tyi quichi ra cha cuenda ndo.

21 Tahán chi cha ndoó ra Jesucristo andivī cha vityin nyacua nya sanduchaa Nyoo tandih̄i maa. Tari cuhva catyí maa ra chihin yuhu ra profeta cuenda ra ta cha naha.

22 Vatyí tyicuan caa catyí ra Moisés chi sutu chahnu yo: “Cusaquichi Sutu yo Nyoo chi noo ra cahan cuenda ra. Ta suri

ñáyivī chi yo cucuvi ra. Ta cuacahan ra tuhun Nyoo chihin ndo tari cahán yuhu. Quichaha ndo tandih̄i cha catyí ra chi ndo.

23 Vatyí tandih̄i ñu cha ma tyasoho tuhun cahan ra, cunaa ñu, vatyí ma cu ñn ri ñu chihin ñáyivī cachi Nyoo chii”, catyí ra Moisés.

24 “Ta tyicuan caa tucu tandih̄i profeta cuenda Nyoo nya quivī ra Samuel ta nyacua nya vityin, casacotō ra tuhun cha cuví vityin.

25 Tandih̄i promesa cha chaha Nyoo cha cahan ra profeta tuhun ta cha naha, chi maa ndo cuví. Ta tuhun cha natyih̄i tahan Nyoo chihin sutu chahnu yo, chihin ra Abraham, suri cha cuenda maa ndo cuví. Vatyí catyí Nyoo chi ra Abraham: “Tandih̄i ñáyivī cha iyó siquī ñuhu ñáyivī cunasoque chi ñu cha cuenda ñáyivī chuun.”

26 Ta quivī sanandotō Nyoo chi Sehe ra, xihna ca nu nyicú ndo tach̄i ra chi ra, vatyí nasoco ra chi ndo. Tacuhva vatyí tahan tahan ndo sandoo ndo cha quiñī caa —catyí ra Pedro chi ñu.

4

Nu catīn ra cacuví nuu vehe ñuhu cahnu chi ra Pedro ta chi ra Juan

1 Ni cahán ca ra Pedro ta ra Juan chihin ñáyivī, ta chā coyo tata sutu cuenda ñu Israel chihin ra cuví nuu chi ra sahá cumi vehe ñuhu, ta chihin ra cuví saduceo.

2 Cacuxaan xaan ra vatyí ra Pedro ta ra Juan sañahá ra chi ñáyivī ta catyí ra vatyí ndicha cha nandotō ñu chih̄i, vatyí ra Jesús nandotō ra.

3 Tyicuan ta catīn ra chi ra. Ta catyih̄i ra chi ra vehe caa. Ta candō ra nyacua nya inga quivī vatyí cha iñi xaan cuhva cuan.

4 Soco cuaha ñu cha chiñī tuhun cahán ra Pedro nachinó iñi ñu. Ta candu ñn ri ñu chihin ñu yih̄i cuenda ra Jesús. Ta cha tandih̄i ñu vasī quita ohon mil ñu cha maa ri maa rayī ri.

5 Tuvi inga quivī ta candu ñn ri ra cacuví tyiño chi ñu Israel, ra chahnu, ta ra casacuaha cuenda ley cha tyaā ra Moisés, nya Jerusalén cuan.

6 Ta ñohó tucu ra Anás ra cuví nuu chi tata sutu. Ta ra Caifás, ta ra Juan, ta ra

Alejandro. Ta nyicú tucu tandihí ñáyiví chi ra cacuví nuu chi tata sutu.

⁷ Tyicuan ta catachí ra tyiño chiquehen chi ra Pedro ta chi ra Juan. Ta chitayucu ra chi ra mahñu. Ta candaca tuhun ra chi ra:

—¿Yóó cha chaha ityi chí ndo vatyi sanduvaha ndo chi ra cuan? ¿Yóó chi cha cuenda nyacuví ndo tyehe caa? —cacatyí ra chi ra.

⁸ Ta ra Pedro tyitu ra yihí Tatyí Ii Nyoo. Ta catyí ra chi ra:

—Nyoho ra nyacá ñaha Israel ñuu yo ihya. Ta nyoho ra chahnu.

⁹ Vityin ndacá tuhun ndo chi ndi tuhun vaha cha cuví chi noo ra coxo ihya, vatyi cuñí ndo coto ndo yoso caa nduvaha ra.

¹⁰ Yucuan chaha cunacatyí ndi chí ndo tacuhva nacoto tandihí ñáyiví Israel. Vatyi ra ihya nanyaá ra nuu tandihí ndo. Vatyi nduvaha ra chihin tunyee iñi ra Jesucristo ra ñuu Nazaret, ra cha chaha cuenda ndo vatyi cúvi ra nu cruzi. Soco Nyoo sanandoto ra chi ra.

¹¹ Ta suri ra Jesús ihya cuví yuu cha chiñuhú ca cha ña cuñí ra savahá vehe cotiño ra, tari cuhva catyí nuu tutu Nyoo. Ta ícan ndo cuví tari ra savahá vehe ta ña cuñí ndo yuu cha chiñuhu ca cuan.

¹² Vatyi yori inga ra cuví sacacú chi yo. Vatyi noo tuhun ri maa ra chaha Nyoo vatyi sacacu ra chi yo. —catyí ra Pedro chi ñu.

¹³ Tyicuan ta cachiñi ra cacuvi tyiño cuan vatyi ñi xaan iñi ra Pedro ta ra Juan cacahan ra. Ta ñima ra cañoho vaha sicuela cacuví ra. Ta iyo xaan cuñi ra. Tyicuan ta nicohon nuu ra chi ra vatyi ícan ra cuví ra cha cachica noo chihin ra Jesús.

¹⁴ Ta sün ri, ra cha nduvaha cuan, nanyaá ra chihin ra yucuan. Yucuan chaha ña cuví cahan ña vaha ra cacuvi tyiño cuan síqui ra Pedro ta ra Juan.

¹⁵ Tyicuan ta catyí ra chi ra naquita coyo ninduñi ra chata vehe. Ta candoo maa ra cacuví tyiño cuan candatuhun tahan ra.

¹⁶ Ta catyí ra:

—¿Yoso caa cunyacuvi yo chihin ra ihya? Vatyi tandihí maa ñu Jerusalén chitó ñu seña cha casacuví ra ihya. Ta ma cuví catyí yo vatyi ña ndicha.

¹⁷ Soco tacuhva cha ma cono tuhun ihya nicahnu chichi ñuu ihya, cutyanaha yo chi

ra, tacuhva vatyi ma cahan ca ra tuhun ra Jesús chihin ñáyiví —cacatyí ra.

¹⁸ Tyicuan ta cacana ra chi ra Pedro ta ra Juan. Ta catyí ra chi ra vatyi ni chiin ca maa ta ma cahan ca ra tuhun ra Jesús. Ta ma sañaha ca ra chí ñáyiví.

¹⁹ Soco ra Pedro ta ra Juan canacahan ra ta catyí ra:

—Ndíchi xiñi nyoho ta nyehe ndo tatu vaha ca cha quichaha ndi chí maa ndo o vaha ca cha quichaha ndi chí Nyoo.

²⁰ Vatyi nyuhu ma cuví cha sandihí ndi cha nacatyí ndi tuhun cha nyehe ndi ta chiñi ndi —cacatyí ra.

²¹ Tyicuan ta nacatyanaha tucu ra chi ra. Soco saña ra chí ra vatyi ña ñihí ra cuhva tachi tuñi ra chí ra. Vatyi tandihí ñáyiví sacahnú ñu chí Nyoo cha cuenda cha cuví cuan.

²² Vatyi rayi cha nduvaha cuan, yaha ca uvi xico cuiya ra, ta tyicuan cuiya nyehe ra tindocho ta nduvaha ra saha Nyoo.

Nu chican ñu yihí cuenda ra Cristo tunyee iñi Nyoo

²³ Ta casaña ra chí ra Pedro ta chí ra Juan. Tyicuan ta cuahan coyo ra nu nyicú ra tahan ra. Ta canacatyí ra tandihí cha cacatyí ra chahnu ta ra cacuví nuu chí tata sutu chí ra.

²⁴ Cuhva cha cachiñi ñu tuhun ihya tandihí ñu ta ñi ri quichaha chican tahvi ñu chí Nyoo. Ta catyí ñu:

—Sutu Mañi yuhu, yoho savahun andiví ta ñuhu ñáyiví. Savahun tyañuhu. Ta tandihí ca cha iyó, maun savaha.

²⁵ Ta yoho chihin Tatyí Iun sacahun chí ra David ta cha naha. Ta catyí ra:

¿Ñáá tuhun cha naquiqui ñáyiví ña ñohó nuu Nyoo? ¿Ñáá tuhun chicá xiñi ñu cha ñima ri tuhun?

²⁶ Rey ta inga cha nyacá ñaha síqui ñuhu ñáyiví ihya candu cuita ra sicun Sutu Mañi yuhu, ta síqui ra Cristo, catyí ra David.

²⁷ Sutu Mañi yuhu, ndicha vatyi ra Herodes, ta ra Poncio Pilato candu ñi ri ra ñuu Jerusalén ihya chihin ra ñuu Roma ta chihin ra Israel vatyi cahni ra chí ra Jesús Sehe iun cha cachí vahun.

28 Ta tyicuan caa ta casacuví ra, tari cuhva cha catyí maun ta cha naha tyi cucuvi.

29 Ta vityin, Sutú Mañi yuhu, nyehé cha tyanaha ra chi ndi. Ta cuhva cha cuní ca ñi ndi tyi tyiño nuu maun sacuvi ndi, Sutú Mañi yuhu. Ta cuhva cha cahan ndi tuhun chihin cha ña yuhví ndi.

30 Ta chihin fuerza maun ta cunduvaha ñu cuhví, ta cunyehe ndi seña ta milagru cha cuenda tunyee ñi ra Jesús Sehe iun —catyí ñu chicán tahvi ñu.

31 Ta cuhva cha ndihí savaha ñu oración ta taan nu nyicu ñu. Ta tandihí ñu chitu ñu chihin Tatyí Ii ta cahan ñu tuhun Nyoo chihin cha ñi ñi ñu.

Ñahri cha cumañi chi ñu yihí cuenda Nyoo

32 Tandihí ñu cha chinó ñi, ñn ri cuví ñu, ta ñn ri cuhva chicá xiñi ñu. Ni noo ñu ta ña catyí ñu vatyí chi maa ñu cuví cha iyó chi ñu, soco chi tandihí ñu cuví, catyí ñu. Vatyí ñn ri nyicú ñu.

33 Ta chihin tunyee ñi cahnu, cacahán ra apóstol tuhun cha nandotó Sutú Mañi yo Jesús. Ta Nyoo nasocó xaan ra chi tandihí ra.

34 Ta ni noo ñu ta ñahri cumañi chi ñu vatyí tandihí ñu cha iyó vehe o ñuhú, xicó ñu. Ta quichi nyacá ñu xuhun,

35 ta chahá cuenda ñu chi ra apóstol. Ta maa ra nasachá ra chi noo noo ñu yoso cuhva cha chiñuhú chi ñu.

36 Tyicuan caa sacuví noo ra cha nañi José. Ra cuan vachi ra tata ra Levi. Ta cacú ra ñuhú Chipre cha nyaá mahñu tyañuhu. Ta ra apóstol sacunañi ra Bernabé chi ra. Ta cuñí chi catyí sivi cuan: Ra Naquehen Ndahvi.

37 Ta ra Bernabé cuan xico ra ñuhú ra. Ta chaha ra xuhun cuan chi ra apóstol.

5

Cuatyí ra Ananías ta cu Safira

1 Soco noo ra cha nañi Ananías chihin cu Safira ñasihí ra, xico ñu noo ñuhú.

2 Soco tixehe ñu suhva xuhun. Tyicuan ta chinyaca ra Ananías suhva xuhun chi ra apóstol. Ta catyí ra vatyí tandihí xuhun cha quiyahví ñuhú cuví cuan.

3 Tyicuan ta catyí ra Pedro chi ra:

—Yoho Ananías, ¿ñáá tuhun cha chahun cha quihví ra ña vaha añimon, vatyí cuñun

sandavi ñahun chi Tatyí Ii, ta catyún vatyí tandihí xuhun cha quiyahví ñuhu cuví ihya ta ndoún chihin suhva?

4 Chuun cuví ñuhú, ta chuun cuví xuhun cha ñihun cuenda ñuhú cuan. ¿Ñáá tuhun cha cuñun sandavi ñahun chi Nyoo ta catyún tyi tandihí xuhun chahun? Ñima chi nyuhu sandaví ñahun, chi Nyoo sandaví ñahun —catyí ra Pedro chi ra Ananías.

5 Cha chiñi ra Ananías tuhun cha cahan ra Pedro, nduva ra ta chihí ra. Ta quichi noo cha yuhví cuñí ñáyivi cha chitó ñu tuhun ihya.

6 Tyicuan ta quichi coyo suhva ra tyivaa ta tyihí ra coño ñuhu ra chichi noo sahma. Ta chahan ra chityihí ra chi ra chichi ñuhú.

7 Yahá noo uñi hora ta cha ñasihí ra Ananías ta quihví ña nu nyicú ra apóstol. Soco ña chitó ña cha cuví cuan.

8 Ta quichaha ndaca tuhun ra Pedro chi ña ta catyí ra:

—¿Atu tyehe cuví yahví cha quiyahví ñuhú ndo? —catyí ra.

Ta nacahan ña ta catyí ña:

—Ay, tyehe cuví yahví chi —catyí ña chi ra.

9 Tyicuan ta catyí ra Pedro chi ña:

—¿Ñáá tuhun cha ñoho naha ndo tuhun ta sandavi ñaha ndo chi Tatyí Ii Sutú Mañi yo Nyoo? Cha cuandichí coyo ra cha chahan chityihí chi yun chichí ñuhú. Ta vityin cuhun tucu ra cutyihí ra chi yoho —catyí ra Pedro chi ña.

10 Caa cuhva ri cuan ta nduva ña chaha ra Pedro, ta chihí ña. Ta caquihví coyo ra tyivaa cuan, ta nyehé ra vatyí chihí ña. Ta canacoñehé ra chi ña ta chityihí ra chi ña xiin yñ ña.

11 Ta tandihí ñáyivi yihí cuenda ra Cristo, ta tandihí ca ñu chitó tuhun cuan, canayuhví xaan ñu.

Cuaha milagru ta seña sacuvi ra apóstol

12 Cuaha seña ta milagru sacuvi ra apóstol sahá Nyoo nu nyicú ñáyivi. Ta tandihí ñu yihí cuenda ra Cristo ndu ñn ri ñu nu cuví corredor ra Salomón.

13 Ta ni nonga ñu cha inga cuenda ta ña cañá ñi ñu cutahan ñu chihin ñu yihí cuenda ra Cristo. Soco vaha cahan ñáyivi siqui ñu.

14 Ta cuaha xaan ñáyiví nachinó iñi chi Sutu Mañi yo Jesús, tari rayii ta ñusihí.

15 Ta nyacua tavá ñu chi ñu cuhví ityi cahnu, chacún ñu chi ñu nu chito. Vatyí tatu yaha ra Pedro soco vasi xiñahñu ra yaha siqui ñu, ta nduvaha ñu.

16 Tyicuan tucu ñu iyó yatyin ri Jerusalén cuan, quichí nyaca ñu chi ñu cuhví ta ñu cha yihí tatyí ña vaha chi. Ta nduvaha tandihí ñu.

Nu nyehé ra Pedro ta ra Juan tindocho

17 Tyicuan ta ra cuví nuu chi tata sutu, ta ra cayihí cuenda ra cuví saduceo, quiñi cuñi ra nyehe ra chi ra apóstol cha cuenda cha vaha cha casacuví ra chihin tunyee iñi chahá Nyoo chi ra.

18 Tyicuan ta catiñ ra chi ra apóstol. Ta catyihí ra chi ra vehe caa.

19 Soco cha cuaa cuan quichí noo ángel cha tachi Sutu Mañi yo, ta nuñá ra yuvehe caa cuan. Ta tavá ra chi ra. Ta catyí ra chi ra:

20 —Cuahan ndo ta cuinanyaa ndo chichi vehe ñuhu cahnu. Ta nacatyí ndo chi ñáyiví yoso caa cuví coo ñu ñáyiví chaa cha iyó ndo —catyí ángel cuan chi ra.

21 Cha cachiñi ra tuhun cahan ángel cuan, ta cuahan coyo ra. Ta ñaha cuii ri quihví coyo ra chichi vehe ñuhu cahnu. Ta quichaha sañaha ra chi ñáyiví. Ta cha ni ri ca cha sañahá ra apóstol cuan, ndu in ri ra cuví nuu chi tata sutu ta ra ndihí chihin ra. Ta caná ra chi ra cacuví tyiño cuenda ñáyiví Israel vatyí coo ra junta. Tyicuan ta tachi ra na cuquehen chí ra apóstol nu cañohó ra vehe caa cuan.

22 Soco cuhva cha chaá coyo policia chichi vehe caa cuan, ña nañihí ra chi ra apóstol. Ta cuanuhu coyo ra cuanacatyí ra chí ra cuví nuu chi tata sutu.

23 Ta cacatyí ra chi ra:

—Nyasi yuvehe caa cuan ta chaá ndi. Ta sindaro, tayucú ra yuvehe casahá cumi ra. Soco cuhva cha nuñá ndi, ña nañihí ndi chi ni noo ra chichi vehe caa cuan —catyí ra chí ra.

24 Cuhva cha cachiñi tata sutu chihin ra cuví nuu chi ra, ta ra cuví nuu chi ra casaha cuenda vehe ñuhu tuhun ihya, iyo xaan cuñi ra. Ta candatuhun tahan ra yoso caa sacuvi ra ta cundihí tuhun cuan.

25 Tyicuan ta chaá noo ra ta catyí ra:

—Ra cha tyihí ndo vehe caa cuan, nyicú ra chichi vehe ñuhu sañahá ra chi ñáyiví —catyí ra.

26 Tyicuan ta ra cuví nuu chi ra casahá cuenda vehe ñuhu, chahan ra chihin policia, ta chiquehen ra chi ra chihin cha vii ri ta ña cañi ra chi ra, vatyí yuhví ra chi ñáyiví coto tuchi ñu yuu chi ra.

27 Chinyaca ra chi ra nuu ra cacuvi tyiño vehe ñuhu cahnu. Ta ra cuví nuu chi tata sutu catyí ra chí ra:

28 —Nyuhu catyí cachi ndi chi ndo vatyí ma cahan ca ndo tuhun ra Jesús. Soco nyoho ña tyasohó maa ndo. Cha ndihí maa chichi ñuu Jerusalén sacotó ndo tuhun ra. Ta cuñi ndo natyaa ndo siqui ndi vatyí nyuhu chahñi ndi chi ra cuan —catyí ra cuví nuu chi tata sutu chí ra apóstol.

29 Tyicuan ta nacahan ra Pedro ta inga ra apóstol, ta catyí ra:

—Nyaá siqui ndi cha quichaha xihna ca ndi chí Nyoo ta ñima ca chí rayii.

30 Nyoo cuenda sutu chahnu yo ican sanandoto chí ra Jesús, ra cha chitacaá ndo nu cruzi ta chahñi ndo chí ra.

31 Ta ra Jesús ican ra cuví ra cha sacahnu xaan Nyoo chí, ta cuatyaá ra chí ra chiyo vaha ra, vatyí cunyaca ñaha ra tandihí. Ta noo tuhun ri maa ra cuví ra sacacú chí yo. Vatyí tyicuan caa chahá ra cuhva chí yo cha cuví yo ñu Israel na ndu uvi iñi yo cuatyí yo tacuhva saha ra ticahnu iñi cuatyí yo.

32 Ta nyuhu cuví ndi cha ndaa cuenda ihya. Ta tyicuan caa tucu Tatyí Ii cha chahá Nyoo cunyaa aña ñu quichahá chí ra —catyí ra Pedro chí ra.

33 Ta cha cachiñi ra cha catyí ra Pedro, nduxaan xaan ra. Ta cuñi ra cahñi ra chí ra.

34 Soco mahñu ra cacuví tyiño cuan ñohó noo ra cuví fariseo cha nañi Gamaliel. Ta cuví ra ra sacuahá cuenda ley ra Moisés. Ta ñáyiví sahá xaan ñu ñáyiví chí ra. Ta ra Gamaliel cuan, nicuinanyaá ra. Ta tachi ra naquita coyo ra apóstol cuan noo cuhva ri. Tyicuan ta quita coyo ra.

35 Ta quichahá catyí ra Gamaliel cuan chí inga ra cacuví tyiño:

—Nyoho ra nyacá ñaha ñu Israel, saha ndo cuenda chi ndo chihin cha cua cunyacuvi ndo chihin ra chiña.

³⁶ N̄icohon iñi ndo vatyí cha iyó suhva quiví ndicuita noo ra cha nañi Teudas. Ta catyí ra vatyí cuví ra noo ra vaha. Ta tari cha cumi cientu rayi chinyicon chi ra. Soco yaha cuan chahñi ñáyivi chi ra. Ta tandihí ra chinyicon chi ra nacutya cuatyí ra. Ta ndihí tuhun.

³⁷ Yaha cuan ta nu cuahan ca chi, quiví nacahvi ra gobiernu chi ñáyivi, ta ndicuita ra Judas ra ityi Galilea cuan. Ta cuaha ñu chinyicon chi ra. Soco suri chahñi ñáyivi chi ra. Ta tandihí ñu cha chinyicon chi ra chitya cuatyí ñu.

³⁸ Yucuan chaha saña ndo chi ra chiña. Ta ma tyihí ndo chi ndo chihin ra vatyí tatu tuhun ñáyivi ri cuví cha chicá noo ra, cundihí tuhun.

³⁹ Soco tatu ndicha tyi tuhun Nyoo cuví, ma cuví chi nyoho sativi ndo. Saha ndo cuenda chi ndo coto vaha chihin Nyoo cañi tahan ndo —catyí ra Gamaliel chi ra.

⁴⁰ Tandihí ra ndoo ra vaha. Tyicuan ta cana ra chi ra apóstol. Cacañi policia chi ra. Ta chasi ra nu cahan ca ra tuhun ra Jesús. Tyicuan ta saña ra chi ra.

⁴¹ Ta quitá coyo ra apóstol nuu ra cuví tyiño. Ta sii xaan cacuñi ra vatyí chaha Nyoo cuhva vatyí nyehé ra tindoho cha cuenda ra Jesús.

⁴² Ta ña casandihí ra cha cacahán ra. Ta ndiquivi ri sañahá ra tuhun ra Jesucristo vehe ñuhu ta vehe ñáyivi ñandihí.

6

Nu nacachí ñu yihí cuenda ra Jesús ucha tahan ra vatyí saha cuenda ra ñáa cha chiñuhu chi ñu

¹ Ta nu cuahan ca chi quiví cuaha xaan nanduví ñáyivi cha yihí cuenda ra Cristo. Tyicuan ta ñu cha cahán sahan griego quichaha cahan ñu siqui ñu cha cahán sahan hebreo cuan. Vatyí catyí ñu tyi ña tyiñuhú vaha ra cha cahán sahan hebreo chi ñu chihí yí cuenda ñu, cuhva cha sachá ra cha cacachi ñu ndiquivi ri.

² Tyicuan ta ndi uchi uvi tahan apóstol sandu ñn ri ra chi tandihí ñu yihí cuenda ra Cristo. Ta cacatyí ra chi ñu:

—Ña vaha cha sandihí ndi cha cahan ndi tuhun Nyoo ta sachá ndi cha cachi ndo.

³ Yucuan chaha yañi, nanducu ndo ucha tahan ra nu canyicú ndo ihya, ra vaha iyó chihin Nyoo, ra chiñi tuñi, ra tyitú yihí chihin Tatyí Ii. Ta cuhva yo tyiño ihya chi ra.

⁴ Ta nyuhu sañihí ndi cacan tahvi ca ndi. Ta cuasañaha ca ndi tuhun Nyoo —catyí ra apóstol.

⁵ Tandihí ñu ndoo ñu vaha. Ta nacachi ñu chi ra Esteban. Vatyí chinó xaan iñi ra chi Nyoo. Ta tyitu ra chihin Tatyí Ii. Ta nacachi tucu ra chi ra Felipe, ta chi ra Prócoro, ta chi ra Nicanor, ta chi ra Timón, ta chi ra Parmenas, ta chi ra Nicolás cha cuví ra noo ra ñuu Antioquía, ta nanduví ra noo ra Israel.

⁶ Tyicuan ta quichí nyaca ra chi ra nu nyicu ra apóstol. Tyicuan ta catyiso ra ndaha ra xiñi noo noo ra ta cachican tahvi ra chi Nyoo cha cuenda ra.

⁷ Ta cuahan chitya ca tuhun Nyoo. Ta nducuañ ca ñu yihí cuenda ra Cristo ñuu Jerusalén. Ta na chinqo iñi tucu cuaha tata sutu cuenda ñu Israel ñandihí.

Nu catyihí ra chi ra Esteban vehe caa

⁸ Ra Esteban cuví ra noo ra cha tyitú chihin tunyee iñi Nyoo. Ta vaha xaan ñáyivi cuví ra vatyí tyitu aña ra chihin cha vaha Nyoo. Ta cuaha xaan milagru ta seña sacuví ra nu nyicú ñáyivi.

⁹ Tyicuan ta suhva ra vehe ñuhu ñuu Israel cha nañi Vehe Ñuhu Cuenda Ñáyivi Ndo Libre, candu ñn ri ra chihin ra ñuu Cirene, ta ra ñuu Alejandría, ta ra ityi Cilicia, ta ra ityi Asia. Ta quichaha cuví yuhu ra chihin ra Esteban.

¹⁰ Soco ña cacuvi chasaha ra chi ra, vatyí ra Esteban cahán ra chihin cha chiñi tuñi cha chaha Tatyí Ii chi ra.

¹¹ Tyicuan ta catyiyahvi ra cuan chi suhva ra vatyí canducu ra cuendu chaha ra Esteban ta catyí ra cuendu cuan vatyí ra Esteban cahán ña vaha ra siqui ra Moisés, ta siqui Nyoo.

¹² Yucuan chaha tandihí ñáyivi cuan naquiqui ñu. Tyicuan ta ra chahnu ta ra

sacuaha cuenda ley ra Moisés, catiïn ra chi ra Esteban. Ta chahan ra chinyaca ra chi ra nu ndu ïn ri ra cuví tyiño cuenda vehe ñuhu ñu Israel.

¹³ Ta canducü ra chi ra cahan cuendu chaha ra. Ta maa ra catyí ra tyehe caa:

—Ra Esteban ihya, ña sandihí ra cha cahan cuehe ra siqui vehe ñuhu yo ta siqui ley ra Moisés.

¹⁴ Ta chiñi ndi cahan ra vatyi ra Jesús ra Nazaret cuan cusatani ra vehe ñuhu cahnu ihya. Ta cunasama ra costumbre cha sandoo ra Moisés chi yo na —catyí ra cuendu cuan siqui ra Esteban.

¹⁵ Tyicuan ta ra cacuví tyiño ta ra canyicú yucuan canyehe ra chi ra Esteban vatyi tari maa nuu ángel tyicuan caa nuu ra cuhva cuan.

7

Nu cahán ra Esteban tuhun Nyoo chihin ñáyivi nducú cahni chi ra

¹ Tyicuan ta ra cuví nuu chi tata sutu ndacá tuhun ra chi ra Esteban, ta catyí ra:

—¿Atu ndicha cha catyí ra ihya?

² Tyicuan ta nacahan ra Esteban ta catyí ra:

—Nyoho yañi, ta nyoho tata, cuiñi ndo tuhun cahín. Sutu yo Nyoo cha cahnu ca tuví ra nuu sutu chahnu yo, ra Abraham quivi nyaá ra ityi Mesopotamia cha niri ca cha cumañi cucoo ra nya ñuu Harán.

³ Ta catyí ra chi ra: “Sandoo ñuun, ta chi tandihí ñáyivi chuun. Ta cunuhu inga ñuu cha cusañahi chuun”, catyí Nyoo chi ra Abraham.

⁴ Tyicuan ta ra Abraham quitá ra ñuu Caldea ityi Mesopotamia cuan, ta cuanuhu ra nya ñuu Harán. Ta yucuan cuví nu chihí sutu ra. Yaha cuan saquichí Nyoo chi ra ñuhú nu iyó yo vityin.

⁵ Soco ñahri ñuhú chahá Nyoo chi ra quivi cuan. Ni noo nu cuinanyaa chaha ra ta ña chahá ra. Soco catyí Nyoo chi ra vatyi cucuhva ra. Ta cutahan chi chi sehe ra chata cha yaha cúvi ra. Tyicuan caa catyí Nyoo chi ra Abraham, vasi ta coo ca sehe ra quivi cuan.

⁶ Ta sïn ri catyí Nyoo chi ra vatyi ñáyivi chi ra cucoo ñu inga ñuu. Ta cusacuvi ñu tyiño nuu ñáyivi ñuu cuan, ta ma tyiyahvi

ñu chi ñu. Ta cunyehe ñu tindoho cumi cientu cuiya.

⁷ Soco catyí tucu Nyoo chi ra tyehe caa: “Ñáyivi ñuu cuan cusanyehe ñu tindoho chi ñáyivi chuun. Yucuan cuenda cuatachi tuñi yuhu chi ñu. Ta yahá cuan ta cuquita ñáyivi chuun ñuu cuan ta cuquichi ñu ihya. Ta cusacuvi ñu tyiño nuu mai ihya”, catyí Nyoo chi ra Abraham.

⁸ Tyicuan caa natyihí tahan Nyoo tuhun chihin ra. Ta chahá Nyoo noo costumbre cha cuasacuvi ñu coto naa iñi ñu. Chahá ra tyi cutahnya chiin ñi xiñi ndivi cha lee sehe ñu, o cha sahá ñu circuncidar chi sehe ñu cuví cuan. Ta cha yahá uña quivi cha cacü ra Isaac sehe ra Abraham, tyicuan caa chinyacuvi ra chihin ra. Ta suri tyicuan caa sacuvi tucu ra Isaac chihin ra Jacob sehe ra. Ta ra Jacob tucu chihin uchi uvi tahan sehe ra, tyaa ra noo seña cuan chi noo noo sehe ra. Ta ican ra cuan cacuví sutu chahnu yo.

⁹ Ta ican uchi ïn tahan ra sehe ra Jacobo ihya catasi cuñí ra nyehe ra chi ra José yañi ra cha cuenda vatyi vaha ca ra nuu sutu ra. Yucuan chaha caxico ra chi ra na cuhun ra Egipto. Soco Nyoo ña sandoo ra chi ra José.

¹⁰ Ta sacacü ra chi ra nu nyehé ra tindoho. Ta chahá ra cha chiñi tuñi ra chi ra. Ta chahá ra cha vaha coo ra nuu ra Faraón, ra cuví rey Egipto. Ta rey cuan chahá ra cha cuvi ra José gobiernu Egipto cuan. Ta chinyaca ñaha tucu ra vehe maa rey ñandihí.

¹¹ Tyicuan ta chiyo tama nicahnu ityi Egipto ta ityi Canaán. Ta nyehe xaan ñáyivi tindoho. Ta tandihí sutu chahnu yo cha chicoo tyembu cuan ña cañihí ra cha cachi ra.

¹² Soco quivi chito ra Jacob vatyi iyó trigu nya Egipto, ta tachí ra chi sehe ra na cuquehen ra. Ta chahan coyo ra noo chaha.

¹³ Ta cha cu uvi chaha cha chahan coyo ra, ra José sacoto ra chi ra vatyi yañi ra cuví chi ra. Yucuan quivi chito ra Faraón yóo chi tata vachi ra José.

¹⁴ Tyicuan ta tachí ra José tyiño na quichi sutu ra, ra Jacob, chihin tandihí ñáyivi chi ra, uñi xico chahun tahan ñu.

¹⁵ Ta tyicuan caa cuvi cha cuahan ra Jacob cuacoo ra Egipto cuan. Yaha cuan ta

chihí ra yucuan. Ta chihí tucu sehe ra, ra cacuví sutu chahnu yo.

¹⁶ Tyicuan ta chaá quiví cha chinanyaca ñu yiquí ra Jacob ta yiquí sehe ra nya Siquem. Ta yucuan quihví ra chichi ñuhú nu sata ra Abraham noo ñaña chi sehe ra Hamor ta cha naha.

¹⁷ Soco cha ni cumañi ca quita ñu Egipto, ñáyiví chi ra Abraham cha iyó Egipto cuan cuaha xaan nanduvi ñu. Ta cha nyaña yatyin quiví cha cuacuhva Nyoo ñuhú chi ñu tari cuhva catyí cachi ra chi ra Abraham.

¹⁸ Tyicuan ta quichaha nyaca ñaha noo rey cha ña ñohó nuu chi ra José.

¹⁹ Rey cuan sandaví ñaha ra chi ñáyiví chi yo cuan. Ta sanyehe xaan ra tindocho chi ñu, ta saniñi ra chi ñu na sanandoo ñu chi sehe ñu cha ni cacu vatyi na cúvi ndotyin.

²⁰ Ta suri quiví cuan cacu ra Moisés. Ta tahan xaan iñi Nyoo chi ra lee cuan. Ta uñi yoo sacuahnu sihi ra chi ra nya vehe ña.

²¹ Yaha cuan ña cuví ca tixehe sihi ra chi ra. Ta sandoo ña chi ra chichi noo tica yuhu yutya. Tyicuan ta sehe maa rey Egipto cuan nañihí ña chi ra. Ta naquehen ña chi ra. Ta sacuahnu ña chi ra, tari cha sehe ña cuví chi ra.

²² Yucuan chaha cutuhva ra Moisés tandihí cha chitó ñu Egipto. Ta sin ri nyee xaan cuhva cahan ra, ta cuhva sacuví ra ñandihí.

²³ Ta quiví cha chaá uvi xico cuiya ra Moisés quichi cuví iñi ra cuhun ra cunyehe ra nu nyicú ñu Israel, ñáyiví chi ra.

²⁴ Tyicuan ta noo quiví nyehe ra nu cañi noo ra Egipto cuan chi noo ra Israel cuan. Tyicuan ta chahñi ra Moisés chi ra Egipto cuan vatyi satasi iñi ra chi ra Israel ra ñuu ra.

²⁵ Cuñi maa ra Moisés cuan vatyi ñáyiví Israel cuan cutuñi iñi ñu tyi Nyoo tachí chi ra vatyi cusacacu ra chi ñu. Soco maa ñu ña tuví iñi ñu cha tyicuan caa cucuvi.

²⁶ Tyicuan ta cha inga quiví cuan nyehé ra Moisés chi uvi tahan ra Israel cha cacañi tahan ra. Ta ra Moisés, cuñi ra cha ma cacañi tahan ca ra, ta quichaha catyi ra: “Ña vaha cha cacañi tahan nyoho, vatyi suri yañi ndo cuví”, catyi ra chi ra.

²⁷ Tyicuan ta ra cha cañi chi tahan cuan tyandaha ra chi ra Moisés, ta catyi ra chi ra:

“¿Yóo cha tyatyíño chi yoho vatyi cunyaca ñahun ta cuvun juez chi ndi?”

²⁸ ¿Atu cuñun cahñun chii tari chahñun chi ra Egipto cuan icu?” catyi ra chi ra Moisés.

²⁹ Cuhva cha chiñi ra Moisés cha catyi ra, chinó ra. Ta cuahan ra nya ñuu Madián. Yucuan ñihí ra ñasihí ra. Ta yucuan chiyo uvi tahan sehe ra.

³⁰ Yaha uvi xico cuiya. Tyicuan ta noo quiví chicá noo ra Moisés chiqui ndi yatyin noo yucu cha nañi Sinaí. Ta nyehe ra noo taca iñu cha cayú. Tyicuan ta tuvi noo ángel chichi ñuhú cha cayu cuan.

³¹ Iyo xaan cuñi ra Moisés cha nyehé ra yucuan. Ta cuhva cha tuhva yatyin ca ra vatyi tacuhva nyehe vaha ra, chiñi ra noo ndusu Sutu Mañi yo. Ta catyi ra tyehe caa:

³² “Yuhu cuví Nyoo cuenda sutu chahnun, Nyoo cuenda ra Abraham, ta ra Isaac, ta ra Jacob”, catyi Nyoo chi ra. Tyicuan ta ra Moisés quichaha nihi ra chihin cha yuhvi ra. Ta ña caña iñi ra nanyehe ra.

³³ Ta quichaha catyi tucu Sutu Mañi yo chi ra: “Tava ndichan chahun vatyi ñuhú nu chañun, ñuhú ii cuví.

³⁴ Yuhu nyehí tandihí tindocho cha nyehé ñáyiví cuende ñuu Egipto chiña. Ta chiñi ndusu ñu cha chacú chaa ñu. Yucuan chaha noó xique vityin vatyi sacaqui chi ñu. Ñaha, vatyi cutachi chuun nya Egipto”, catyi Nyoo chi ra Moisés.

³⁵ Quiví cuan ña cuñi ñáyiví Israel chi ra Moisés cha cunyaca ñaha ra chi ñu, ta catyi ñu chi ra: “¿Yóo cha tyatyíño chi yoho vatyi cunyaca ñahun ta cuvun juez chi ndi?”, catyi ñu chi ra. Ta vasi ña cuñi ñu cha cunyaca ñaha ra chi ñu, soco Nyoo tachí chi ra vatyi cuví ra nuu, ta sacacu ra chi ñu. Vatyi tyicuan caa catyi ángel cha tuví nuu ra nu taca iñu cha cayu cuan.

³⁶ Ta ican ra Moisés cuan tava chi ñáyiví Israel Egipto cuan. Ta cha yaha savaha ra milagru ta seña ñuu cuan, ta sacuvi tucu ra nu yaha ñu Tyañuhu Cuaha. Ta nu chica noo ñu ñuhú ityi chichi cha uvi xico cuiya sacuvi tucu ra ñandihí.

³⁷ Ta suri maa ra Moisés cuan cuví ra cha catyi chi ñu Israel ta cha naha tyehe caa: “Nyoo cutachi ra noo profeta ra tari tachí

ra chi mai. Ta cucuvi ra noo ra Israel tari maa ndo. Quichaha ndo chi ra”, catyí ra.

³⁸ Ta suri maa ra Moisés cuan ndihí ra chihin ñáyiví chahnu yo nu chica noo ñu ñuhú ityi cuan. Ta ican ra cuví ra cha cahan ángel cuan chihin nya yucu Sinaí. Ta ican ra quehen cuenda ra tuhun yoso caa coo ñáyiví ta sañaha ra chi yo.

³⁹ 'Soco ñáyiví chahnu yo ña quichaha ñu chi ra. Tava xiin ñu chi ra. Ta cacuñi ñu cunuhu coyo ñu nya Egipto.

⁴⁰ Yucuan chaha cuhva cha nyaá ca ra Moisés yucu Sinaí ta cahan ñáyiví chihin ra Aarón ta catyí ñu: “Savahun suhva nyoo cha cuhun coyo ityi nuu ndi. Vatyí ña chitó ndi ñáá cha cuví chi ra Moisés, ra cha tava chi ndi Egipto”, catyí ñu.

⁴¹ Tyicuan ta casavaha ñu noo becerru xuhun cuan. Tyicuan ta cachahñi ñu quití vatyí cuhva cuenda ñu chi xitohyo cuan. Ta si xaan cuñi ñu cachiyo ñu vico cuenda xitohyo cha casavaha ñu chihin ndaha ñu.

⁴² Tyicuan ta Nyoo cuachiyó ra chi ñu. Ta saña ndaha ra chi ñu vatyí cusacahnu ñu chi ñanyii, chi yoo, ta ñáá ndihí tiño cha iyó ityi andiví. Vatyí tyehe caa catyaa ra profeta cuenda Nyoo nu libru ta cha naha: Nyoho ñáyiví Israel, ¿atu chahñi ndo quití vatyí cuhva cuenda ndo chi yuhu chichi cha uvi xico cuiya cha chica noo ndo ñuhu ityi? Ñima.

⁴³ Soco sacahnu ndo chi nyoo cha nañí Moloc, ta sacahnu tucu ndo chi nyoo cha nañí Renfán cha caá tari caá tiño andiví.

Suri maa ndo savaha xitohyo cuan, vatyí sacahnu ndo.

Yucuan chaha yuhu cuatave chi ndo ñuu ndo, ta cuasacuhin chi ndo noo nu cañi ityi nuu ca Babilonia, catyí Nyoo chi ñu.

⁴⁴ 'Nu chicá noo sutu chahnu yo ñuhú ityi cuan, chicumi ra noo vehe ñuhu cha chingo chihin ñi quití. Ta chichi vehe cuan chicumi ra tabla yuu cha nyaá ley Nyoo nuu. Ta ra Moisés tachí ra tyiño na savaha ñu vehe ñuhu cuan ta ityi chata ca tari cuhva sañaha maa Nyoo chi ra.

⁴⁵ Yucuan ta ra Josué nanduví ra nuu chi ñu. Ta quehen ñu vehe ñuhu ta chicoo ñu chihin nu nyaá yo ihya vityin. Vatyí Nyoo

tava ñehe ra chi ñáyiví chiyo ñuhu ihya ta nacuhva cuenda ra chi ñu Israel ñáyiví chi yo. Ta chotyño ñu vehe ñuhu cuan nyacua nya quiví chiyo rey David.

⁴⁶ Ta rey David ñihí ra tumañi iñi nuu Nyoo. Ta cuñi ra savaha ra noo vehe vaha nu coo Nyoo. Suri Nyoo ihya sacahnu ra Jacob ta cha naha.

⁴⁷ Soco ra Salomón savaha vehe Nyoo.

⁴⁸ Vasi ña iyó Nyoo chichi vehe ñuhu cha savaha ñáyiví. Tari catyí ra chihin yuhu ra profeta ta cha naha tyehe caa:

⁴⁹ Andiví cuví tyayu nu nyaí ta nyacá ñahi tandihí. Ta ñuhu ñáyiví, yucuan cuví nu chañi chahi.

¿Atu cuví savaha ndo vehi ta coi chichi, cuñi maa ndo?

¿Ta nya maa maa cuví nyitati, cuñi maa ndo?

⁵⁰ ¿Atu ña chitó ndo vatyí mai savahi andiví ta ñuhu ñáyiví? catyí Nyoo.

⁵¹ 'Soco nyoho —catyí ra Esteban— tyicuan ri tuhvá ndo sandava ndo iñi ndo. Ta ña cuñi ndo naquehen ndo tuhun cahan Nyoo. Tyicuan ri ña quichahá ndo chi Tatyí Ii. Inuu ri caa ndo chihin sutu chahnu ndo.

⁵² Sutu chahnu ndo satañi iñi ra ta cachahñi ra chi tandihí ra profeta cuenda Nyoo ta cha naha. Ta ican ra cuan cacatyí vatyí cuquichi noo ra vaha. Ta cha quichi ra vityin, nyoho ña cuñi nyehe ndo chi ra, ta cachahñi ndo chi ra.

⁵³ Nyoho naquehen cuenda ndo ley Nyoo cha chaha ángel chí ndo, soco ña cuñi ndo sacuvi ndo cuhva catyí ley cuan —catyí ra Esteban.

Nu chihí ra Esteban

⁵⁴ Cuhva cha chiñi ra cacuví tyiño vehe ñuhu cahnu tuhun ihya, xaan xaan cuñi ra, nyacua casacahñi noho ra nyehé ra chí ra Esteban.

⁵⁵ Soco ra Esteban tyitú cuí maa ra chihin Tatyí Ii ta nanyehé ra ityi andiví. Ta nyehé ra cha cahnu cuví Nyoo. Ta suri nyehe ra chí ra Jesús nanyaá ra chiyo vaha Nyoo.

⁵⁶ Tyicuan ta catyí ra Esteban:

—¡Nyehe ndo! Nyehe tanuña andiví. Ta nyehí chí ra Jesús, Rayi cha quichi nya gloria, nanyaá ra chiyo vaha Nyoo —catyí ra Esteban.

⁵⁷ Soco ra cuan cachasi ra soho ra, cha ma cuiñi ra tuhun cahán ra Esteban. Tyicuan ta vaa ri cananduvi ra. Ta tandihi ra cuahan coyo ra siqui ra Esteban.

⁵⁸ Tyicuan ta catava ra chi ra yuhu ñuu. Ta ca chahñi ra chi ra chihin yuu. Ta ra cha casacuví cha ña vaha cuan, casandoo ra sahma cha nyaa chata ra vatyí sahadumi noo ra tyivaa cha nañi Saulo.

⁵⁹ Cha niri ca cha cacañi ra yuu chi ra Esteban, quichaha chican tahvi ra Esteban chi Nyoo, vatyí tuvi ñi ra cuacúvi ra. Ta catyí ra tyehe caa:

—Sutu Mañi yuhu Jesús, naquehen añime —catyí ra.

⁶⁰ Yahá cuan, tyicuan ta chicuiñi chiti ra, ta cha canachaa ra ta catyí ra:

—Sutu Mañi yuhu, ma tin cuendon cuatyí cha sacuví ñu —catyí ra.

Ta cha yahá catyí ra tyehe caa, ta chihí ra ra.

8

Nu chicá nyicon ra Saulo chi ñáyivi yihí cuenda ra Cristo

¹ Ta ra Saulo ña chinó ñi ra chi ra Jesús, ta ndoó ra vaha cha chahñi ra chi ra Esteban.

Ta suri quivi cuan quichaha nducu xaan ñáyivi chi ñu yihí cuenda ra Cristo ñuu Jerusalén cuan vatyí cucahñi ñu chi ñu. Soco ra apóstol ña caquita ra. Candoo ra nyicú ra Jerusalén. Ta tandihi ca ñu cachino ñu, cuahan coyo ñu cuacoo ñu ityi Samaria, ta ityi Judea.

² Ta suhva ra cha nyicón vaha chi Nyoo Jerusalén cuan, catyihí ra coño ñuhu ra Esteban chichi ñuhú. Ta cachacu xaan ra cha cuenda ra.

³ Cha niri ca cha tyicuan caa, ra Saulo chicá nyicon vavaha ra chi ñáyivi yihí cuenda Cristo. Ta tahan tahan vehe ñu chahan ra. Ta suri quiñoho ñaa ra chi ñu, ta chaha cuenda ra chi ñu vatyí cohon ñu vehe caa, rayi ta ñusihi.

Nu cacahán ñu tuhun ra Cristo ityi Samaria

⁴ Soco tandihi ñu cha quita ñuu Jerusalén, cahán ñu tuhun yoso caa sacacú ra Cristo añima ñu tandihi ri maa ityi nu cha coyo ñu.

⁵ Minoo ra cha nañi Felipe cha ra noo ñuu ityi Samaria. Ta quichaha cahan ra tuhun ra Cristo chihin ñu.

⁶ Ta tandihi ri ñáyivi ta tyasoho ñu tuhun cha cahán ra. Ta nyehé ñu milagru ta seña cha savahá ra.

⁷ Vatyí cuaha vavaha ñáyivi cha yihí tatyí ña vaha chii nduvaha ñu. Vatyí tatyí ña vaha cha yihí chi ñu, quita chi ta suri canachaa chi cuahan chi. Ta cuaha vavaha ñáyivi coxo ta ñáyivi cha ña cuví nacanda, nduvaha ñu.

⁸ Yucuan chaha ñáyivi ñuu cuan, si xaan cacuví chi ñu.

⁹ Soco ñuu Samaria cuan iyó noo ra tasi cha nañi Simón. Ta sandaví ñaha ra chi ñáyivi cuan. Catyí ra vatyí cuví ra noo ra cahnu.

¹⁰ Ndi cuii maa ñáyivi tyasohó ñu tuhun cahan ra, nya ñu tyayii, ta nya ñu ndahvi. Ta cacatyí ñu:

—Ndicha ndicha cuii, vatyí tunyee ñi Nyoo nyaá chihin ra ihya —catyí ñu.

¹¹ Quichahá xaan ñu tuhun cahán ra vatyí cha naha xaan sandaví ñaha ra chi ñu chihin tuhun tasi.

¹² Tyicuan ta quichi ra Felipe. Ta sacoto ra chi ñu yoso caa nyacá ñaha Nyoo añima ñáyivi. Ta yoso cuhva cha cahnu cuví ra Jesucristo. Ta yucuan ta chino ñi ñu chi ra Cristo, rayi ta ñusihi. Ta condutyá ñu.

¹³ Nyacua nya ra Simón cuan, ta nachino ñi ra chi ra Cristo, ta condutyá ra. Ta quichaha chica noo ra chihin ra Felipe. Ta iyo xaan cuñi ra nyehe ra milagru, ta seña cha sacuví ra Felipe cuan.

¹⁴ Tyicuan ta ra apóstol cha canyicú ñuu Jerusalén cuan ñihí ra tuhun cha canachinó ñi ñáyivi ityi Samaria cuan tuhun Nyoo. Ta catachi ra chi ra Pedro ta chi ra Juan.

¹⁵ Cuhva cha cha coyo ra yucuan, ta chican tahvi ra chaha ñu quihvi cuenda ra Cristo vatyí tacuhva tyi naquehen ñu Tatyí Ii.

¹⁶ Vatyí ñu cuan, ta naquehen ca ñu Tatyí Ii. Tacuhva condutyá ri ñu chihin sivi Sutu Mañi yo Jesús.

¹⁷ Tyicuan ta ra Pedro ta ra Juan catyiso ra ndaha ra siqui ñu, ta naquehen ñu Tatyí Ii.

18 Ta ra Simón cuan nyehe ra cuhva cha catyiso ra apóstol ndaha ra siqui ñu cuan, ta naquehen ñu Tatyí Ii.

19 Ta quichahā catyí ra tyehe caa:

—Yoso xuhun cuñí ndo ta cuhva ndo tunyee iñi chiña chii, vatyí tacuhva cuvi tyise ndahi siqui ñáyivi, ta naquehen tucu ñu cuan Tatyí Ii —catyí ra Simón cuan chi ra apóstol.

20 Tyicuan ta nacahan ra Pedro ta catyí ra:

—Na cunaun ñin ri chihin xuhun chiña. Vatyí chicá iñun tyi cuví sata yo chihin xuhun nyatu cha chahá maa Nyoo chi yo.

21 Yoho, ña tahan chi tyihun chuun chihin tuhun ihya. Vatyí añimon ña vaha nuu Nyoo.

22 Ndu uvi iñun cuhva chicá xiñun chiña, vatyí cahnu cha quiñi caa cuví cuan nuu Nyoo. Ta çacan tahvi chi ra na nyehe yo tatu saha ra tıcahnu iñi chuun cha cuenda cha caa chichi añimon.

23 Vatyí nyehí tyi chichi añimon tyitú maa yihí cha quiñi caa cha cuvi tari cha uva. Ta cha quiñi caa cuan, ña chahá coton cha vaha. —catyí ra Pedro chi ra Simón cuan.

24 Tyicuan ta nacahan ra Simón ta catyí ra:

—Çacan tahvi maa ndo cha cuende nuu Nyoo, ta cuhva cha ma quichi tandihı tuhun cha catyún chiña siqui —catyí ra Simón chi ra Pedro.

25 Cha yahā cuan ta ra apóstol nacatyí ra tandihı cha nyehe ra cha sacuvı ra Cristo. Ta cahan ra tuhun Nyoo. Tyicuan ta cuanuhı coyo ra nya Jerusalén. Ta suri sacoto ra tuhun yoso caa sacuvı yo ta cacu añima yo tandihı ñuu ityi Samaria nu yahā ra.

Nu cahán ra Felipe tuhun Nyoo chihin noo ra Etiopía

26 Cha yahā tuhun cuan tyicuan ta cahan noo ángel Nyoo chihin ra Felipe, ta catyí ra:

—Ndıcuıta ta cuhun ityi sur, ityi quita nya Jerusalén ta cuahan nya Gaza —catyí ángel cuan chi ra.

Yucuan cuvi ityi cha yahá noo ñuhú ityi.

27 Tyicuan ta ra Felipe ndıcuıta ra ta cuahan ra. Ta ityi cuahan ra ta ñihi tahan ra chihin noo ra ñuu Etiopía. Ta cuvi ra eunuco. Cuvı ra noo ra cuví tyiño cahnu ñuu Etiopía, vatyí sahá cuenda ra xuhun cu

Candace, ñaha cha cuví reina ñuu Etiopía cuan. Ta chahan ra Etiopía cuan chisacahnı ra chi Nyoo nya Jerusalén.

28 Ta ityi cuanuhú ra nya ñuu ra nyaá ra siqui carru ra. Ta sacuahá ra libru cha tyaa ra Isaías ra profeta cuenda Nyoo ta cha naha.

29 Tyicuan ta Tatyí Ii catyí chi ra Felipe:

—Satuhva ca nu cuahan carru cuan.

30 Ta cuhva cha tuhva ra Felipe, chiñi ra vatyí sacuahá ra cuan nu libru cha tyaa ra Isaías. Ta ndaca tuhun ra chi ra:

—¿Atu cutuñı iñun cha sacuahún? —catyí ra.

31 Tyicuan ta nacahan ra cuan ta catyí ra: —¿Yoso caa cutuñı iñi ta yori sañahá chii? —catyí ra chi ra.

Ta chican ra chi ra Felipe na ndaa ra ta cunyaa ra chihin ra.

32 Ta nu cuahan sacuahā ra, catyí chi tyehe caa:

Chahñı ra chi ra tari chahñı ra noo mbee.

Vatyí tari ña chacú mbee tatu cuasatya ra ixi ti, ta tari ña chacú ti tatu chahñı ra chi ti, tyicuan caa cuví ra cuan tyi nyehe ra tındoho ta ñahri maa catyí ra.

33 Sanocuee ñu chi ra ta yori cuñı sacacu chi ra.

¿Yóo ra cuvi nacatyı tuhun sehe ra cha cuacoo?

Yori, vatyí chihı ra.

Catyí chi nu tutu cha sacuahā ra cuan.

34 Tyicuan ta ra cuan quichahā ndaca tuhun ra chi ra Felipe, ta catyí ra:

—Saha tumañı iñi chii, ta çatyun chiin chii yóo chi tuhun cahán ra profeta ihya. ¿Atu tuhun maa ra, o yóo chi tuhun cahán ra? —catyí ra chi ra Felipe.

35 Tyicuan ta ra Felipe quichahā cahan ra siqui tuhun cha cha yahā sacuahā ra cuan, ta nacatyí ra chi ra vatyí tuhun ra Jesús cahán ra cuan. Ta nacatyí ra vatyí ra Jesús cuví ra cha sacacú chi yo.

36 Tyicuan ta cha cuayaha ra noo nu ñohó ndutyā. Ta ra cuan quichahā catyí ra chi ra Felipe:

—Ihya ñohó ndutyā. ¿Atu ma cuvi condu-tye vityin? —catyí ra.

37 Tyicuan ta nacahan ra Felipe, ta catyí ra:

—Tatu chinó iñun chihin cha tandihí añimon, cuví condutyon —catyí ra chi ra.

Tyicuan ta nacahan ra cuan, ta catyí ra:

—Chinó iñi yuhu vatyí Sehe Nyoo cuví chi ra Jesucristo —catyí ra.

³⁸ Tyicuan ta ra cuan catyí ra chi musu ra na sacucuiñi ra carru cuan. Tyicuan ta canoo nduvi tahan ra. Ta caquihvi ra chi ndutya. Tyicuan ta sacondutya ra Felipe chi ra.

³⁹ Ta cuhva cha caquita coyo ra chichi ndutya cuan, Tatyí Ii Sutu Mañi yo naquehen chi chi ra Felipe. Ta ra cuan ña nyehe ca ra chi ra. Soco sii xaan cuví chi ra, cuanuhu ra.

⁴⁰ Ta ra Felipe cha ra ñuu Azoto. Ta cuahan ra tahan tahan ñuu, ta cahan ra tuhun ra Cristo chihin ñáyivi nyacua nya cha cha ra ñuu Cesarea.

9

Nu nachinó iñi ra Saulo chi ra Cristo (Hch. 22.6-16; 26.12-18)

¹ Cha ni ri ca cha chicá noo ra Felipe cahán ra tuhun ra Cristo chihin ñáyivi, ra Saulo ña sandihí ra tuhun cha nducú cahni ra chi ñu yihi cuenda Sutu Mañi yo. Ta chahan ra nu nyaá ra cuví nuu chi tata sutu,

² chicacan ra noo tutu chi ra, tacuhva nacuhva ra cuhun ra vehe ñuhu ñuu Damasco, ta tiin ra chi ñu cuahan ityi ra Cristo, ta quichi nyaca ra chi ñu vehe caa Jerusalén, rayi o ñusihi.

³ Ñihi ra Saulo tutu cuan ta cuahan ra. Ta cuhva cha cuachaa ra ñuu Damasco cuan, sana cui ri iñi ra, ta quichi noo nduva ñuhu ityi andivi, sacundichin nicachico maa nu cuahan ra.

⁴ Tyicuan ta ra Saulo nduva ra nu ñuhú. Ta chiñi ra noo ndusu cha catyí tyehe caa:

—Saulo, Saulo, ¿ñáá tuhun cha chicá nyicon chi yuhu? —catyí ndusu cuan chi ra.

⁵ Tyicuan ta nacahan ra Saulo ta ndaca tuhun ra chi ra ta catyí ra:

—¿Yóó yoho Tata? —catyí ra.

Tyicuan ta nacahan ndusu cuan chihin ra, ta catyí:

—Yuhu cuví ra Jesús, ra chicá nyicon chi. Suri chi maun sañicuehún, tari sañicuehé sindiqui quití tahví ñuhu chi ti cha chañi

nyaa ti nu noo cha xaan cha saquehen ityi ra chi ti —catyí ra Jesús chi ra.

⁶ Tyicuan ta ra Saulo suri ñihi ra chihin cha yuhvi ra. Ta catyí ra:

—Sutu Mañi yuhu, ¿ñáá cha cuñún tyi sacuvi? —catyí ra.

Tyicuan ta Sutu Mañi yo catyí ra chi ra tyehe caa:

—Ndicuita ta quihvun chichi ñuu Damasco chiña. Ta yucuan cucatyí noo ra chuun ñáá cha cusacuvun —catyí ra Jesús chi ra Saulo.

⁷ Ra cha candihí chihin ra Saulo, yuhvi xaan ra cacuvi. Ta ña cañihí ra tuhun cahan ra vatyí cachiñi ra ndusu cuan soco yori chi nyehe ra.

⁸ Tyicuan ta ra Saulo ndicuita ra. Soco cuhva cha nuña ra chiti nuu ra, ña cuví ca maa nyehe ra vatyí nducuaa ra. Yucuan chaha, ra tahan ra cayindaha ra ndaha ra ta chinyaca ra chi ra ñuu Damasco cuan.

⁹ Yucuan chinyaa ra uñi tahan quivi. Ta ña cuví nyehe ra. Ta niri ña chachi ra, ta ña chihí ra ndutya.

¹⁰ Ñuu Damasco cuan iyó noo ra chinó iñi chi Nyoo. Ta nañi ra Ananías. Ta nyehe ra noo visión nu catyí Sutu Mañi yo chi ra tyehe caa:

—¡Ananías! —catyí ra chi ra.

Tyicuan ta nacahan ra Ananías, ta catyí ra:

—Ma yuhu ihya, Sutu Mañi yuhu —catyí ra chi ra.

¹¹ Tyicuan ta Sutu Mañi yo catyí ra:

—Ndicuita, ta cuhun noo ityi cahnu cha nañi Ndo. Ta nanducun vehe noo ra cha nañi Judas. Ta ndaca tuhun sivi noo ra cha nañi Saulo, ra ñuu Tarso. Vatyí chicán tahvi ra chi Nyoo.

¹² Ta nyehé ra noo visión, ta nyehé ra chi noo ra nañi Ananías. Ta chaá ra nu nyaá ra, ta tyisó ra ndaha ra siqui ra tacuhva cuví nanyehe ra inga chaha —catyí Sutu Mañi yo chi ra Ananías.

¹³ Tyicuan ta nacahan ra Ananías ta catyí ra:

—Sutu Mañi yuhu, cuaha xaan ñáyivi nacatyí chii vatyí cuaha xaan cha ña vaha chinyacuvi ra Saulo cuan chihin ñu yihi cuendon nya ñuu Jerusalén.

14 Ta vityin vachi tucu ra ihya vatyí chahá ra cacuví nuu chi tata sutu ityi chi ra cha tyihi ra chi ñáyiví chicán tahvi chihin sivun vehe caa —catyí ra Ananías chi Sutu Mañi yo.

15 Soco Sutu Mañi yo catyí ra chi ra:

—Cuahan vatyí yuhu cha nacachí vahi chi ra Saulo cuan, vatyí cahan ra tuhin chihin ñáyiví inga ñuu, ta chihin rey inga ñuu, ta suri cahan tucu ra chihin ñáyiví Israel ñandíhi.

16 Yuhu cusañahi chi ra yoso caa cha cuaha tindoho cunyehe ra cha cuende —catyí Sutu Mañi yo chi ra Ananías.

17 Tyicuan ta cuahan ra Ananías vehe nu nyaá ra Saulo. Chaá ra vehe cuan ta quíhví ra chichi vehe. Ta tyiso ra ndaha ra síqui ra Saulo, ta catyí ra chi ra tyehe caa:

—Yañi Saulo, Sutu Mañi yo ra Jesús ra tuví nuun ityi vachun, ican ra tachí chí vatyí tacuhva cuvi nanyehun inga chaha. Ta cusacutu ra chuun chihin Tatyí Ii ra —catyí ra Ananías chi ra Saulo.

18 Caa cuhva ri cuan ta caná coyo noo cha tari caa soo tiyaca cha yihí chiti nuu ra Saulo. Tyicuan ta cuví nanyehe ra inga chaha. Yahá cuan ta condutyá ra.

19 Yahá cuan ta chachí ra. Ta ndunyeé coño ñuhu ra inga chaha. Ta ndoo ra suhva quívi chihin ñu yihí cuenda ra Cristo ñuu Damasco cuan.

Nu quichahá cahan ra Saulo tuhun ra Cristo chihin ñáyiví ñuu Damasco

20 Tyicuan ta numi ri quichahá cahan ra Saulo tuhun ra Cristo chihin ñáyiví tandíhi vehe ñuhu ñu Israel ñuu Damasco cuan. Ta catyí cachi ra vatyí ra Jesús, Sehe Nyoo cuví chi ra.

21 Ndií cuii maa ñáyiví cha chíñi tuhun cahán ra, iyo vavaha cuñi ñu. Ta catyí ñu chi tahan ñu:

—¿Atu ñima ra ihya cuví ra cha chica nyicon chi ñu chicán tahvi chihin sivi ra Jesús ityi ñuu Jerusalén cuan? ¿Atu suri ñima ra cuví cha vachi tñn chi ñu ityi tyehe vatyí cucuhva cuenda ra chi ñu chi ra cacuví nuu chi tata sutu? —catyí ñu.

22 Soco ra Saulo ñihi ca cahán ra tuhun ra Cristo chihin cha ñi ca iñi ra. Ta sañahá ra

vatyí ra Jesús cuví ra Cristo, Sehe Nyoo. Nyacua ña cutuñi iñi ra Israel nyicú Damasco cuan nya ityi chino iñi ra.

Nu chinó xehe ra Saulo chi ra Israel

23 Cha yaha suhva quívi, ta ra Israel cha ña chinó iñi chi ra Cristo catyihí tahan ra tuhun cha cahñi ra chi ra Saulo.

24 Ta ndiyaca ta ñiyaca canyatú ra chi ra yuvehe cahnu ñuu cuan. Soco ra Saulo cuan numi ri chito ra tuhun cuan.

25 Tyicuan ta ñáyiví cha chinó iñi chi ra Cristo ñuu cuan catyihí ñu chi ra chichi noo tica cahnu. Ta noo cha cuaa casanoo ñu chi ra ityi ventana noo vehe cha cacú chihin barda cha nyaá nicachico yuhu ñuu cuan. Ta tyicuan caa chinó ra cuahan ra.

Nu ñohó ra Saulo Jerusalén

26 Quívi cha chaá ra Saulo Jerusalén, cuñi ra ndu ñn ri ra chihin ñu yihí cuenda ra Cristo. Soco tandíhi maa ñu cuan ta yuhví ñu chi ra. Vatyí ña chinó iñi ñu cha yihí ra cuenda ra Jesús.

27 Soco noo ra cha nañi Bernabé, naquehen ra chi ra. Ta chahá cuenda ra chi ra chi ra apóstol. Ta nacatyí ra chi ra yoso caa nyehe ra Saulo chi Sutu Mañi yo ra Cristo ityi ñuu Damasco; ta nacatyí ra yoso caa cahan Sutu Mañi yo chihin ra. Ta yoso caa cahan ra tuhun ra Cristo chihin cha ña yuhvi ra nya ñuu Damasco cuan.

28 Tyicuan ta ndoo ra Saulo Jerusalén chihin ñu yihí cuenda ra Cristo.

29 Ta cahan ra tuhun Sutu Mañi yo chihin cha ña yuhvi ra. Ta ndatuhún xaan ra tuhun ra Cristo chihin ra Israel cha cahan sahan griego. Soco ra cuan cananducú ra cuhva yoso caa ta cacahñi ra chi ra.

30 Soco cachitó ra hermano cuan vatyí tyicuan caa yihí iñi ra cuan. Yucuan chaha chinyaca ra chi ra Saulo nya ñuu Cesarea. Ta yucuan ta natachí ra chi ra nya Tarso ñuu ra.

31 Tyicuan ta ñu yihí cuenda ra Cristo cha nyicú tandíhi ityi Judea, ta ityi Galilea, ta ityi Samaria, vii xaan nyicu ñu vatyí ña cuxaan ca ñáyiví chi ñu. Ta ndunyeé ca iñi ñu chihin fuerza Nyoo vatyí quichahá vaha ñu cuhva catyí Nyoo, vatyí yuhví ñu coto ma sacuvi ñu cuhva cuñi ra. Iyó ñu chihin

cha tyinyeé Tatyí li chi ñu. Ta cuaha xaan ñu cuahan nanduvi.

Nu nduvaha ra Eneas

³² Tyicuan caa cuví ta ra Pedro tuhvá ra chica noo ra nyehe ra yoso caa canyicu hermano noo noo ñuu. Ta chahan tucu ra chinyehe ra nu nyicu ñu yihí cuenda ra Jesucristo noo ñuu cha nañí Lida.

³³ Yucuan nañihí ra chi noo ra cuhvi. Nañi ra Eneas. Ta cha uña cuiya catuví ra ña cuvi nacanda ra vatyí ndundava coño ñuhu ra.

³⁴ Soco ra Pedro catyí ra chi ra:

—Yoho Eneas, ra Jesucristo sanduvaha ra chuun. Ndícuita ta natuvi yuvun —catyí ra chi ra.

Tyicuan ta caa cuhva ri cuan ndícuita ra Eneas.

³⁵ Ta nyehe tandihí ñáyivi ñuu Lida cuan tyi nduvaha ra. Ta ñáyivi ñuu Sarón ñandihí. Tyicuan ta ñu cuan nachino ñi ñu chi Sutu Mañi yo. Ta sandoq ñu tuhun chahnu cha chingo ñi ñu ta cumañi ca coto ñu tuhun ra Cristo.

Nu nandoto cu Dorcas

³⁶ Quiví cuan chiyo noo ñaha chinó ñi chi ra Cristo ñuu Jope. Ta nañí ña Tabita, soco chihin sahan griego, Dorcas nañí ña. Ta tyicuan ri sacuví ña cha vaha chihin ñáyivi. Tyinyeé ña chi ñu ndahvi.

³⁷ Ta quiví cuan cu Dorcas quehen noo cuehe chi ña ta chihí ña. Ta cha yaha sacutyí ñu chi ña, chicacun ñu chi ña chichi noo cuarto nu cu uvi piso.

³⁸ Ñuu Jope cuan yatyin ri nyaá chihin ñuu Lida, nu nyaá ra Pedro. Ta ñu cha yihí cuenda ra Cristo ñuu Jope cuan chitó ñu vatyí nyaá ra Pedro ñuu Lida cuan. Tyicuan ta tachí ñu chi uvi tahan ra na cucatyí ra chi ra Pedro vatyí naquichi ra cha numi ri. Cuahan ra cuan ta catyí ra chi ra Pedro:

—Coho nya Jope. Sanumi ta ma cucueun —catyí ra chi ra.

³⁹ Tyicuan ta ra Pedro ndícuita ra ta cuahan ra chihin ra. Ta cuhva cha chaa ra, chinyaca ra chi ra nya cuarto nu caa ndiyí cuan. Ta tandihí maa ñu chihí yí catuhva ñu nicachico chata ra. Suri chacú chaa ñu. Ta sañahá ñu sahma cha quicu cu Dorcas ta chinyito ña.

⁴⁰ Tyicuan ta ra Pedro tava ra chi tandihí ñáyivi cuarto cuan. Tyicuan ta chicuiñi chiti ra ta quichaha chican tahvi ra chi Nyoo. Tyicuan ta nanyehe ra chi ñaha chihí cuan catuvi ña. Ta quichaha catyí ra chi ña:

—Hermana Tabita, ndícuita —catyí ra chi ña.

Tyicuan ta nandica ña chiti nuu ña. Ta cuhva cha nanyehe ña chi ra Pedro, nicunyaá ña.

⁴¹ Tyicuan ta ra Pedro tiin ra ndaha ña ta sandícuita ra chi ña. Tyicuan ta cana ra chi ra hermano, ta chi ñu chihí yí. Ta nacuhva cuenda ra chi ña chi ñu vatyí nandoto ña.

⁴² Yaha cuan ta ndií cuii maa ñu Jope chitó ñu cha nandoto ña cuan. Ta cuaha vavaha ñu nachino ñi chi Sutu Mañi yo.

⁴³ Ta ra Pedro ndoo ra cuaha ri quiví ñuu cuan. Nyaá ra vehe noo ra satyahyu ñi. Nañí ra Simón.

10

Ra Pedro ta ra Cornelio

¹ Ñuu Cesarea iyó noo ra cha nañí Cornelio. Ta cuví ra capitán cuenda noo ciento sindaro. Ta ityi sindaro cuan, Italia nañí.

² Ta ra Cornelio cuan yuhví ra chi Nyoo ta vaha sacahnú ra chi ra, maa ra ta ñáyivi chi ra ñandihí. Ta sin ri cuaha vavaha xuhun chahá ra chi ñu ndahvi ñu Israel. Ta tyicuan ri chicán tahvi ra chi Nyoo.

³ Ta cuví noo quiví cuan cuhva cha caa uñi cha cha ñi, nyehe ra noo visión. Ta yucuan cuví nu cachi xaan nyehe ra vatyí noo ángel cha tachí Nyoo quihví nu nyaá ra, ta catyí ra chi ra:

—¡Yoho Cornelio! —catyí ángel cuan chi ra.

⁴ Tyicuan ta nanyehe ra Cornelio chi ángel cuan. Ta yuhvi xaan ra cuvi. Ta quichaha ndaca tuhun ra ta catyí ra:

—¿Ñáa cha cuví ihya, Tata? —catyí ra chi ángel cuan.

Tyicuan ta ángel cuan quichaha catyí ra chi ra:

—Nyoo chiñi ra ndií cuii maa cha chicón chi ra. Ta tahán ñi ra vatyí tyinyeé xaun chi ñu ndahvi.

⁵ Ta vityin cuñi chi cha tachun tyiño nya ñuu Jope na cuquehen chi noo ra cha nañí Simón Pedro.

⁶ Ta maa ra cuan cuacatyí ra chuun ñáá cha tahán chi sacuvun. Ta iyó ra vehe noo ra cha nañí tucu Simón, cuví ra noo ra satyahyú ñi. Ta iyó vehe ra yuhu tyañuhu —catyí ángel cuan chi ra Cornelio, ta cuahan ángel cuan.

⁷ Ta cha yahá cuahan ángel cuan, ra Cornelio caná ra chi uvi tahan musu ra, ta chi noo sindaro cha chinó xaan iñi chi Nyoo. Ta cuví tucu ra noo ra sahá cuenda chi ra Cornelio ñandihí.

⁸ Ndií cuíi tuhun cahán ángel cuan chihin ra Cornelio ta nacatyí ra chi nduñi tahan ra cuan. Ta tachí ra chi ra ñuu Jope.

⁹ Tuví inga quívi ta cuahan coyo ra cuan. Ta cuhva cha cuachaa coyo ra yuhu ñuu Jope cuan, ra Pedro ndaa ra xiñi vehe vatyí cuacacan tahvi ra chi Nyoo, ta cha cuñi hora cuví cuhva cuan.

¹⁰ Ta chaá noo soco chi ra ta chisocó vavaha ra. Soco cha niri ca cha sanduvahá ñu cha cachi ra, quichahá nyehe ra noo visión.

¹¹ Ta nyehe ra vatyí nicuitacoho andívi. Ta nyehe ra cua noo noo sahma cahnu vavaha ityi andívi. Ta tari quívi nuñi noo noo tutun sahma cuan ta cuahan noo ityi nu ñuhu.

¹² Ta chichi sahma cuan ñohó tandihí maa nuu quíti cha cumi tahan chaha. Ta tandihí nuu coo, ta tandihí nuu saa.

¹³ Tyicuan ta chiñi ra noo ndusu cha catyí chi ra:

—Pedro, ndícuíta ta cahñi quíti ihya, ta cachun —catyí ndusu cuan chi ra.

¹⁴ Soco ra Pedro nacahan ra ta catyí ra:

—Ma cachi, Sutu Mañi yuhu. Yuhu ña tuhvé chachi quíti cha catyí ley tyi yíca cha cachi ndi —catyí ra Pedro.

¹⁵ Tyicuan ta quichaha catyí tucu ndusu cuan chi ra inga chaha:

—Ma catyun vatyí yíca cha cachun noo cha cha yahá sanduvíi yuhu —catyí ndusu cuan chi ra Pedro.

¹⁶ Uñi tahan chaha sañahá Nyoo visión ihya chi ra. Tyicuan ta sahma cahnu cuan nandaá cuanuhu tucu ityi andívi.

¹⁷ Cha niri ca cha chicá xiñi ra Pedro ñáá cha cuñi chi catyí visión cuan, chaá coyo musu cha tachí ra Cornelio. Ta candaca tuhun ra nya nyaá vehe ra Simón.

¹⁸ Ta cha chaá coyo ra ityi yuvehe candaca tuhun ra tatu yucuan iyó noo ra cha nañi Simón Pedro.

¹⁹ Ta ra Pedro suri cha chicá xiñi ra ñáá cha cuñi chi catyí visión cha nyehe ra. Tyicuan ta Tatyí li quichahá catyí chi ra:

—Nyehe Pedro, uñi tahan ra nanducú chuun.

²⁰ Ndícuíta ta cuhun chihin ra, ta ma quívi uvi iñun vatyí mai tachí chi ra ihya —catyí Tatyí li chi ra.

²¹ Tyicuan ta ra Pedro noo ra nu canyicu ra cha tachí ra Cornelio, ta catyí ra chi ra:

—Yuhu cuví ra nanducú ndo. ¿Ñáá tyiño vachi ndo?

²² Tyicuan ta canacahan musu ra Cornelio ta catyí ra:

—Ra Cornelio, ra cuví capitán chi ndi ican tachí chi ndi. Noo ra vaha xaan ñáyivi cuví. Ta vaha xaan quichahá ra nu cahán Nyoo. Ta tandihí maa ra Israel ityi Judea ihya cacuñi ra chi ra chaha cha cuenda cha vaha ñáyivi cuví ra. Ta noo ángel Nyoo catyí chi ra vatyí na cana ra chuun, vatyí cuhun vehe ra vatyí tacuhva cuñi ra tuhun cha cuacahun —cacatyí musu ra Cornelio chi ra Pedro.

²³ Tyicuan ta chahá ra Pedro quívi coyo ra chichi vehe. Ta candoo ra chihin ra cha cuaa cuan. Ta cha inga quívi cuan ta cuahan ra Pedro chihin ra. Ta cuahan suhva ra hermano cha iyó Jope cuan ñandihí.

²⁴ Cha inga quívi chaá coyo ra nya Cesarea nu nyatú ra Cornelio chi ra chihin ñáyivi chi ra, ta chihin tandihí ra tahan ra.

²⁵ Cuhva cha chaá ra Pedro vehe ra, ra Cornelio quita ra ta cahan ra chihin ra. Ta chicuñi chiti ra nuu ra ta quichaha sacahnu ra chi ra.

²⁶ Soco ra Pedro nacoñehé ra chi ra, ta catyí ra chi ra:

—Ndícuíta vatyí noo rayi ri cuví yuhu tari yoho, ta ñima Nyoo cuví —catyí ra chi ra.

²⁷ Ta cha niri ca cha cahán ra chihin ra, quívi ra ta nanyehe ra cuaha ñáyivi candu iñi ri.

²⁸ Tyicuan ta catyí ra Pedro chi ñu:

—Nyoho chitó ndo vatyí ley nyuhu cha cuví ndi ñu Israel, ña chahá chi cha cu iñi ri ndi chihin ñáyivi inga ñuu. Ta ni ri chichi vehe ñu ta ma cuví quívi ndi. Soco Nyoo

sañaha ra chii, ta catyí ra: “Yoho, ma catyun chi ni noo ñáyivi tyi ña vaha ñu”, catyí Nyoo chii.

²⁹ Yucuan chaha quivi cha cana ndo chii, numi ri vachi. Ta vityin cuñi cote ñaa cuenda cana ndo chii —catyí ra Pedro chi ra Cornelio.

³⁰ Tyicuan ta nacahan ra Cornelio, ta catyí ra:

—Cha iyó cumi quivi vityin, suri maa cuhva ihya cha nyaí vehi ta ña chachi ta chicán tahvi chi Nyoo cha cha iñi. Ta tuví noo ra nui. Ñihnó ra noo sahama xiño vavaha.

³¹ Ta catyí ra chii: “Yoho Cornelio, Nyoo chiñi ra cha chicán tahvun. Ta nicohón iñi ra cha sacuvún vatyí tyinyeún chi ñu ndahvi.

³² Tachi tyiño nya ñuu Jope na quichi ra Simón Pedro. Nyaá ra vehe inga tucu ra cha nañi Simón, noo ra cha satyahyu ñi. Ta vehe ra nyaá yatyin ri yuhu tyañuhu. Ta na quichi ra Simón Pedro ta cahan ra chuhun”, catyí ángel cuan chii.

³³ Tyicuan ta numi ri tachi tyiño vatyí cuquehen chuun. Ta vaha vatyí vachun. Ta vityin tandihi yo nyicú yo nuu Nyoo. Ta cuñi ndi cuiñi ndi tandihi cuii maa cha tachi Sutu Mañi yo chuun vatyí nacatyun chi ndi.

Nu cahán ra Pedro tuhun ra Cristo vehe ra Cornelio

³⁴ Tyicuan ta quichaha cahan ra Pedro ta catyí ra:

—Vityin cutuñi iñi vatyí Nyoo cuñi ra chi tandihi ñáyivi. Cuví ri yo ñu Israel, o cuví ri yo ñu inga ñuu.

³⁵ Soco naquehen ra chi yo tatu quichaha yo chi ra, ta sacuví yo cha vaha.

³⁶ Cahan ra chihin nyuhu ñu vachi tata ra Israel, ta sacotó ra vatyí nduvaha coo yo chihin ra cha cuenda ra Jesucristo. Maa ra nyacá ñaha tandihi maa yo.

³⁷ Nyoho chitó vaha ndo tandihi cha cuví ñuu Israel ñui, yoso caa quichaha chi nu cuví Galilea cha yaha cha cahan noo ra Juan nuu ñáyivi, ta sacondutyá ra chi ñu.

³⁸ Chitó ndo yoso caa chaha Nyoo tunyee iñi Tatyí Ii ra chi ra Jesús, ra Nazaret. Ta chica noo ra sacuví ra cha vaha, sanduvaha ra chi tandihi ñu cha nyehé tindoho

sahá ra ña vaha. Tyehe caa sacuví ra Jesús vatyí Nyoo nyaá ra chihin ra.

³⁹ Nyuhu cuví ndi cha ndaa tandihi cha sacuví ra Jesús nicahnu Judea ta ñuu Jerusalén. Yaha cuan ta chahñi ñu chi ra nu cruzi.

⁴⁰ Soco sanandoto Nyoo chi ra nu cu uñi quivi. Ta tuví ra nuu ndi.

⁴¹ Ña tuví ra nuu tandihi ñáyivi. Soco tuví ra nuu nyuhu vatyí nacachi ra chi ndi nyata ityi chata ca vatyí cuví ndi cha ndaa cuenda ra. Nyuhu chachi ndi ta chihí ndi chihin ra cha yaha cha nandoto ra.

⁴² Ta tachi ra chi ndi vatyí cahan ndi tuhun ra chihin ñáyivi. Ta cuví ndi cha ndaa vatyí Nyoo cuatyaá ra chi ra Jesús tyi cuví ra juez chi ñu cha nyitó ta ñu cha chihí.

⁴³ Ta tyicuan caa tucu nyata ityi chata ca, cacahan tandihi ra profeta Nyoo tuhun ra Jesús. Ta cacatyí ra vatyí tandihi ñu cha chinó iñi chi ra Jesús, cusandachi Nyoo cuatyi ñu cha cuenda maa ra.

Nu naquehén ñu Tatyí Ii ta ñima ñu Israel cuví ñu

⁴⁴ Ni cahán ca ra Pedro ta noo xica ri Tatyí Ii siqui tandihi ñu tyasohó tuhun cahán ra.

⁴⁵ Ta ra Israel cha cayihí cuenda ra Jesús cha chaá coyo chihin ra Pedro iyo xaan cuñi ra vatyí chaha tucu Nyoo Tatyí Ii ra chi ñu cha ñima ñu Israel cuví.

⁴⁶ Chitó ra tyi tyicuan caa cuví vatyí chiñi ra cahán ñu inga sahan, ta sacahnú ñu chi Nyoo.

⁴⁷ Tyicuan ta quichaha catyí ra Pedro chi ra cha chaá coyo chihin ra:

—Ma cuví casi yo nu condutya ñáyivi ihya. Vatyí cha naquehen tucu maa ñu Tatyí Ii tari maa yo —catyí ra chi ra.

⁴⁸ Tyicuan ta tachi ra Pedro chi ñu ni ñihí Tatyí Ii na condutya ñu chihin siyi ra Jesucristo. Tyicuan ta chacu ndahvi ñu nuu ra Pedro vatyí cuñi ñu cha ndoo ra suhva quivi chihin ñu.

11

Nu nacatyí ra Pedro chi ñu yihí cuenda ra Cristo Jesús nya Jerusalén yoso caa cuahan chitya tuhun ra inga ñuu

¹ Ra apóstol ta inga ra hermano cha nyicú Judea, ñihí ra tuhun vatyí nyacua nya ñu cha ñima ñu Israel cuví ta naquehén ñu tuhun Nyoo.

² Tyicuan ta nachaa ra Pedro Jerusalén. Ta ra cha catyí vatyí cuñí chi cha sacuvi yo costumbre circuncisión ta cuhva cuvi cacu yo, xaan xaan cuñí ra nyehe ra chi ra Pedro.

³ Ta cacatyí ra chi ra tyehe caa:

—¿Ñáa tuhun cha chahun vehe ñu cha ñima ñu Israel cuví ta chachun chihin ñu? —catyí ra.

⁴ Tyicuan ta ra Pedro nacatyí ra nya nu quichaha tandihí cha cuví chi ra ta catyí ra:

⁵ —Yuhu nyaí ñuu Jope. Ta cuhva cha chicán tahvi chi Nyoo ta nyehí noo visión. Ta nyehí tari noo sahma cahnu cha noó ityi andiví. Tari cha nuhñí noo noo tutun ta cuahan noo ityi nu ñuhú nu nyaí.

⁶ Ta nanyehe vahi ñáa cha ñohó chichi. Ta nyehí quití cha cumi chaha, quití cuhu, ta coo, ta saa.

⁷ Ta chiñi noo ndusu cha catyí chii: “Ndícuíta Pedro. Cahñi quití ihya ta çahun”, catyí ndusu cuan chii.

⁸ Ta nacahin ta catyí tyehe caa: “Sutu Mañi yuhu, ma cuvi, vatyí ni noo chaha ta ta cachi que coño quití quiñi caa.”

⁹ Tyicuan ta ndusu andiví nacahan chi chihin inga chaha, ta catyí chi: “Ma catyí yoho vatyí ma cachun noo cha yahá sanduvij”, catyí ndusu cuan chi.

¹⁰ Uñi chaha cuví tyehe caa. Yahá cuan ta nandaá tandihí chihin sahma cuan ityi andiví.

¹¹ Ta caa cuhva ri cuan chaá coyo uñi tahan ra vehe nu nyaí, quitá ra ñuu Cesarea ta nanducú ra chii.

¹² Ta Tatyí Ii tachí chii na cuhin chihin ra. Ta catyí ra chii tyi ma caca iñi cha ñima ñu Israel cuví ñu. Ta chahan coyo tucu iñu tahan ra yañi yo ihya chihin. Ta cha chaá ndi nya Cesarea quihví ndi chichi vehe noo ra.

¹³ Ta nacatyí ra cuan chi ndi yoso caa nyehe ra chi noo ángel chichi vehe ra. Nanyaá ángel cuan ta catyí ra chi ra vatyí na tachi ra musu ra ñuu Jope na cana ra chi noo ra cha nañi Simón Pedro.

¹⁴ Vatyí ican ra cucatyí ra chi ra yoso caa cacu añima ra ta añima tandihí ñáyiví chi ra, catyí ángel cuan chi ra cuan na.

¹⁵ Ta sacuvi ra cuan tari cuhva catyí ángel cuan chi ra. Ta cuhva cha chají vehe ra quichaha cahín chihin ñu. Ta quichí ri Tatyí Ii siqui ñu tari quichí siqui yo cha xihna ri.

¹⁶ Tyicuan ta nicohon iñi cha catyí Sutu Mañi yo quiví cuan. Ta catyí ra tyehe caa: “Ndicha vatyí ra Juan sacondutyá ra chi ñáyiví chihin ndutya. Soco nyoho cucondutya ndo chihin Tatyí Ii”, catyí ra.

¹⁷ Nyoo chaha tucu ra Tatyí Ii ra chi ñu cuan tari chaha ra chi maa yo quiví chino iñi yo chi Sutu Mañi yo Jesucristo. Ta cha tyicuan caa ¿yóo ra cuví yuhu vatyí casi cha sacuví Nyoo? —catyí ra Pedro chi ra.

¹⁸ Tyicuan ta cuhva cha cachiñi ra yañi yo ra Jerusalén tuhun cuan ña nacahan ca ra. Ta casacahnú ra chi Nyoo. Ta cacatyí ra:

—Tu tyicuan caa cuví, cuñí chi catyí vatyí Nyoo chahá tucu ra chi ñu cha ñima ñu Israel cuví vatyí ndu uvi iñi tucu maa ñu cuatyí ñu, ta coo ñu ñayiví cha ma naa ca maa —cacatyí ra.

Ñu yihí cuenda ra Cristo ñuu Antioquía

¹⁹ Quiví cha cachahñi ra chi ra Esteban, quichaha chica nyicon ra chi inga ñu yihí cuenda ra Cristo. Ta yihí ñu cachino ñu ta cuahan coyo ñu ityi Fenicia. Ta inga ñu nya noo ñuhú cha nyaá mahñu tyañuhu cha nañí Chipre. Ta yihí ñu chaá coyo ñu ñuu Antioquía. Ta suri cahan ñu tuhun ra Cristo soco ñn ri maa chihin ñu Israel.

²⁰ Ta chihin ñu cha cuahan coyo cuan, ndihí suhva ñáyiví ñuhú Chipre. Ta yihí tucu suhva ñu ñuu Cirene. Ta cha chaá coyo ñu ñuu Antioquía, ta quichaha cahan tucu ñu cuan chihin ñu cha ñima ñu Israel cuví. Ta sacoto ñu tuhun Sutu Mañi yo Jesús, ra cha sacacu añima yo.

²¹ Ta tunyee iñi Sutu Mañi yo nyaa chihin ñu. Ta yucuan chaha cuaha ñáyiví casando ñu tuhun chahnu cha chino iñi ñu. Ta nachino iñi ñu chi Sutu Mañi yo.

²² Tyicuan ta chaá tuhun cuan nya Jerusalén. Ta ñu yihí cuenda Cristo tachí ñu chi ra Bernabé na cuhun ra nya Antioquía.

²³ Ta cha chaá ra Bernabé Antioquía cuan, nyehe ra yoso caa nasocó Nyoo chi ñu. Ta ndusíi xaan cuñí ra. Ta cahán ra nuu ñu na cunyicon ñu chi Sutu Mañi yo chihin cha ñi ñi ñu.

²⁴ Tyicuan caa sacuví ra Bernabé vatyí cuví ra noo ra vaha. Tyítú ra chihin Tatyí Ii. Ta chinó xaan ñi ra chi Nyoo. Ta tyicuan caa ta cuaha ñáyívi quíhví ñu cuenda Sutu Mañi yo.

²⁵ Cha yaha cuan ta cuahan ra Bernabé cuananducu ra chi ra Saulo nya ñuu Tarso. Ta cha nañihí ra chi ra, chinyaca ra chi ra nya ñuu Antioquía.

²⁶ Ta cachinyicu ra chihin ñu yihí cuenda Nyoo ñuu cuan noo cuiya naní ta sañaha ra tuhun Nyoo chi cuaha ñáyívi. Ta suri ñuu Antioquía cuan cuví nu quichaha catyí ñáyívi: Cristiano chi ñu, o ñu yihí cuenda ra Cristo cuví cuan.

²⁷ Ta quívi cuan chaá coyo ra cachaha cuenda tuhun cahán Nyoo, ra cacuví profeta. Quita ra ñuu Jerusalén ta chaá coyo ra Antioquía.

²⁸ Ta noo ra cuan nañí ra Agabo chicuinanyaá ra nu nyicú ra yihí cuenda ra Cristo ta cahan ra tuhun cha chaha Tatyí Ii chi ra. Ta catyí ra vatyí cuquichi noo tama nicacahnu ñáyívi. Ta tyicuan caa cuví quívi chinyaá ra Claudio cuví ra rey cahnu.

²⁹ Tyicuan ta ñu yihí cuenda Cristo nya Antioquía tyihí tahan ñu tuhun vatyí cucuhva ñu yoso cuhva cundaa ñi maa noo noo ñu, vatyí cutyinyee ñu chi ñu yihí cuenda Cristo cha iyó ityí Judea.

³⁰ Tyicuan caa sacuví ñu ta sacuhun ñu xuhun chi ra cuví nuu chi ñu yihí cuenda Cristo nya Jerusalén. Ta ra Bernabé ta ra Saulo chinyaca ra xuhun cuan.

12

Nu chihí ra Jacobo ta nu quíhví ra Pedro vehe caa

¹ Ta quívi cuan quichaha chica nyicon rey Herodes chi suhva ñu yihí cuenda ra Cristo.

² Ta tachí ra tyiño vatyí na cahñi ra chi ra Jacobo yañi ra Juan chihin mityí.

³ Ta nyehe ra Herodes vatyí tahan xaan ñi ñu Israel cha sacuví ra tyicuan caa, ta

tyihí ra tyiño vatyí tin ndihí ra chi ra Pedro. Ta cuví chi noo quívi vico pascua nu tuhva ñu chachi ñu pan cha ñahri yuchan iya yihí chihin.

⁴ Cha yaha cha tin ra chi ra Pedro, tyihí ra chi ra vehe caa. Ta cumi ityí sindaro sahá cumi chi ra. Ta cumi sindaro cha noo ityí ra ta sahá cuenda ra suhva suhva cuhva chi ra. Ta tyaá ra Herodes cuhva vatyí nayahá vico cuan ta cucuhva cuenda ra chi ra chi ñáyívi.

⁵ Ta tyicuan caa ñohó ra Pedro vehe caa. Ta sindaro cuan sahá cumi vaha xaan ra chi ra. Soco cha ñi ri ca cha ñohó ra yucuan, ñu yihí cuenda ra Cristo chicán tahvi xaan ñu nyita cuí ri maa cha cuenda ra.

Nu sacacu Nyoo chi ra Pedro vehe caa

⁶ Ta tyaá ra Herodes cuhva vatyí cha ñaha ri inga quívi cuan cutava ra chi ra Pedro nuu ñáyívi. Ta suri cha cuaa cuan ra Pedro quixí vavaha ra mahñu uvi sindaro cuan. Ta nuhñí ra chihin uvi cadena. Ta uvi ca sindaro canyicú ra yuvehe casahá cumi ra.

⁷ Ta tañi ri ta tuví noo ángel cha tachí Sutu Mañi yo. Ta ndundichin ri chichi vehe caa cuan. Ta ángel cuan tin ra xiin ra Pedro. Ta sandoyo ra chi ra. Ta catyí ra chi ra:

—Sanumi. Ndícuíta —catyí ángel cuan chi ra.

Tyicuan ta ndachí cadena cha nuhñi ndaha ra Pedro.

⁸ Ta ángel cuan catyí ra chi ra:

—Nacuhñi vaha chichun ta natyihí ndichan chahun —catyí ángel cuan.

Tyicuan caa sacuví ra Pedro. Ta catyí ángel chi ra:

—Quehen sahmon ta tyaun chaton ta quichun chate —catyí ángel cuan chi ra Pedro.

⁹ Ta ra Pedro quita ra chata ángel cuan. Soco ña chitó ra tatu cha ndicha o cha ña ndicha cuví cuan, ta cuñi maa ra vatyí visión nyehé ra.

¹⁰ Soco cuahan ra chata ángel cuan ta cayaha ra noo nu sahá cumi sindaro. Tyicuan ta cayaha ra inga tucu nu casahá cumi sindaro cuan. Yaha cuan ta chaá coyo ra yuvehe caa cahnu nu quita ñáyívi ta quíhví ñu chichi ñuu. Ta yuvehe cuan nuña ri maa. Ta quita coyo ra. Ta cha yaha yaha

ra noo ityi cahnu, ta sandoo ángel cuan chi ra.

¹¹ Tyicuan ta nacoto ra Pedro vatyí ndicha ta quichaha catyí ra:

—Ndicha, ñima visión cuvi. Soco maa Sutu Mañi yo tachí ra noo ángel vatyí sacacu ra chii ndaha ra Herodes ta ndaha ra Israel —catyí ra Pedro.

¹² Chicá xiñi ra tuhun ihya ityi cuahan ra. Ta chaq ra vehe cu María sihi ra Juan Marcos. Ta cuaha xaan ñu canyicú cuan chicán tahvi ñu chi Nyoo.

¹³ Ta cuhva cha sacachan ra Pedro yuvehe nuquehe, quitá noo ñaha tyivaa cha nañi Rode chinyehe ña yóo cha sacachan cuan.

¹⁴ Soco cuhva cha nichon soho ña ndusu ra Pedro, ña nuña ña yuvehe. Vatyí sii xaan cuñi ña, ta chino ña cua nacatyí ña. Ta catyí ña vatyí ra Pedro nanyaá ra yuvehe.

¹⁵ Tyicuan ta quichaha catyí ñu chi ña:

—Loco yoho —catyí ñu chi ña.

Soco ña cuan catyí ña vatyí ndicha cha cahán ña. Soco ñu cuan catyí ñu tyi ñima ra Pedro cuví ra, soco ángel cuenda ra cuví, catyí ñu.

¹⁶ Ta ra Pedro sañihí ca ra sacachan ra yuvehe. Ta cuhva cha nuña ñu ta nanyehe ñu chi ra, iyo xaan cuñi ñu ta yuhvi ñu cuví.

¹⁷ Soco savaha ra seña chihin ndaha ra nacutaxin ñu. Ta nacatyí ra chi ñu yoso caa tava Sutu Mañi yo chi ra vehe caa. Ta catyí ra chi ñu:

—Nacatyí ndo chi ra Jacobo ta chi inga yañi yo —catyí ra.

Ta quitá ra ta cuahan ra inga ityi.

¹⁸ Cuhva cha cundichin, iyo cacuvi sindaro cha sahá cumi chichi vehe caa cuan, vatyí ña cachitó ra yoso caa quitá ra Pedro.

¹⁹ Tyicuan ta tachí ra Herodes cunanducu chi ra. Ta vatyí ña nañihí ra chi ra, tyicuan ta tachí ra na cacahñi ra chi ra sahá cumi vehe caa cuan. Yaha cuan ta quitá ra Herodes ityi Judea cuan ta cuahan ra ñuu Cesarea cuacoo ra.

Nu chihí ra Herodes

²⁰ Ta ra Herodes cuxaan xaan ra chihin ñáyivi ñuu Tiro ta ñáyivi ñuu Sidón. Soco cuñi ñu cuan nduvaha coo ñu chihin ra vatyí ñuu cha nyacá ñaha ra yucuan quitá cha cachi ñu. Tyicuan ta ndu in ri ñu ta

cuahan coyo ñu cuacutahan ñu chihin noo ra cha nañi Blasto. Ican ra sahá cuenda chi ra Herodes. Ta chicán ñu cha nduvaha coo ra Herodes chihin ñu.

²¹ Tyicuan ta catyí ra Herodes vatyí cuhun ñu nu nyaá ra noo quivi. Ta cha quivi cuan ta ndihvi noo ra sahma tyiño ra. Ta chicunyaa ra nu tyayu cahnu ra. Ta cahan noo ra nuu ñu.

²² Tyicuan ta quichaha canachaa ñáyivi, ta catyí ñu:

—Ra cha cahán ihya ñima noo rayi ri cuví ra. Nyoo cuví ra —catyí ñu.

²³ Ta caa cuhva ri cuan noo ángel Sutu Mañi yo chaha ra noo cuehe chi ra Herodes vatyí chaha ra cha catyí ñáyivi tyi Nyoo cuví ra. Ta quihvi tandacu chi ra, ta chihí ra.

²⁴ Soco tuhun Nyoo cuahan chitya ca. Ta cahan ñu tuhun Nyoo tandihí ri ityi.

²⁵ Quivi cha ndihí tyiño saha ra Bernabé ta ra Saulo nya Jerusalén, cuanuhu coyo ra ñuu Antioquia. Ta cuahan tucu ra Juan Marcos chihin ra.

13

Nu quichaha cachicá ra Saulo ta ra Bernabé tyiño Nyoo

¹ Vehe ñuhu Antioquia cuan iyó ra cacuví profeta Nyoo. Ta iyó tucu ra cha sañahá tuhun Nyoo chi ñáyivi. Ta sivi ra cuan ican cuvi ihya: Ra Bernabé, ra Simón Toon, ra Lucio ra ñuu Cirene, ra Manaén cha chahnu in ri chihin ra Herodes cha cuví rey ityi Galilea, ta ra Saulo.

² Ta noo quivi nyicú tandihí ra ta casacahnú ra chí Sutu Mañi yo. Ta casahá ra ayunar: ña cachachi ra ta cananducu ra chi Nyoo cuví cuan. Tyicuan ta catyí Tatyí li chi ra:

—Tava siin ndo chi ra Bernabé ta ra Saulo cha cuenda tyiño cha cané chi ra —catyí Tatyí li chi ra.

³ Tyicuan ta cha ndihí saha ra ayunar, ta catyiso ra ndaha ra siqui ra, ta cachican tahvi ra chi Nyoo cha cuenda ra. Ta cacahan ra chihin ra tahan ra ta cuahan coyo ra.

Nu cahán ra apóstol tuhun Nyoo ñuhu Chipre

⁴ Yaha cuan tachi Tatyí Ii chi ra Bernabé ta chi ra Saulo noo ñuu cha nañí Seleucia. Tyicuan ta cuahan coyo ra. Ta yucuan caquihví ra chichi noo barcu ta cuahan ra nya ñuhú Chipre cha nya mahñu tyañuhu.

⁵ Yucuan ta cachaꝯ coyo ra noo ñuu yuhu tyañuhu cha nañí Salamina. Ta quichaha cahan ra tuhun Nyoo vehe ñuhu ra Israel. Cuahan tucu ra Juan chihin ra vatyí tyinyee ra chi ra.

⁶ Tyicuan ta cuahan coyo ra cahán ra tuhun Nyoo noo noo ñuu cha nya Chipre cuan nyacua nya chaa coyo ra ñuu cha nañí Pafos. Ta yucuan nañihi ra chi noo ra Israel cha nañí Barjesús. Ta chitó ra tuhun tasí. Cuví ra noo ra cuendu vatyí catyí ra vatyí cuenda Nyoo cahán ra.

⁷ Ta ra tasi cuan nyaá ra chihin gobernador Sergio Paulo. Ta ra Sergio cuví ra noo ra cachi iñi. Ta canꝯ ra chi ra Bernabé ta chi ra Saulo, vatyí cuñí ra cuiñi ra tuhun Nyoo.

⁸ Ta ra tasi cuan nañí tucu ra Elimas, ta chasí ra nu chino iñi gobernador cuan chi ra Cristo.

⁹ Tyicuan ta ra Saulo cha nañí tucu Pablo, tyitú ra chihin Tatyí Ii. Ta nyehꝯ vavaha ra chi ra Elimas cuan.

¹⁰ Ta catyí ra chi ra:

—Yoho ra sandaví ñaha, cuendu xaun. Sehe cuihna cuví chuun. Ta cuñún sativun tandihi cha vaha. Ta tyicuan ri chasún ityí vaha Sutu Mañi yo.

¹¹ Ta vityin Sutu Mañi yo cutachi tuñi ra chuun, vatyí cunducuaun. Ta ma cuvi nyehun ñuhꝯ ñanyii suhva quiví —catyí ra Pablo chi ra Elimas.

Tyicuan ta caa cuhva ri cuan ta nducuaa ra. Ta ndoo ra nu ñaa iñi. Ta nducꝯ ra noo ra tin ndaha ra vatyí ña ndichin ca nyehé ra.

¹² Cuhva cha nyehꝯ gobernador cuan cha cuví chi ra Elimas, chino iñi ra chi ra Jesucristo. Vatyí iyo cuñi ra nyehꝯ ra cha sañahá Sutu Mañi yo.

Cuahan ra Pablo ta ra Bernabé nya ñuu Antioquía ityí Pisidia

¹³ Ra Pablo ta ra tahan ra quihví ra chichi noo barcu ñuu Pafos. Ta cuahan coyo ra nya ñuu Perge ityí Panfilia. Soco ra Juan

Marcos sandoꝯ ra chi ra ta cuanuhu ra nya Jerusalén.

¹⁴ Yaha cuan ta caquita ra Perge cuan, ta cuahan coyo ra ñuu Antioquía cha nyaá ityí Pisidia. Yucuan quihví coyo ra chichi vehe ñuhu ñu Israel ta cuví chi noo quiví nyitatu ñu. Ta chicunyicu ra.

¹⁵ Tyicuan ta quichaha sacuaaha ñáyiví nu libru ley cha tyaa ra Moisés. Ta sacuaaha tucu ñu libru cha tyaa ra cacuvi profeta Nyoo ta cha naha. Yaha cuan ta ra cacuvi nuu vehe ñuhu catyí ra chi ra hermano nyicú cuan, vatyí tatu iyó noo tuhun cuñí ra cahan ra chihin ñáyiví, cuví cahan ra.

¹⁶ Tyicuan ta ndicuita ra Pablo ta sacuvi ra noo seña chihin ndaha ra vatyí na cntaxin ñu. Ta catyí ra:

—Cuiñi ndo nyoho ra Israel, ta nyoho cha quichahá ndo chi Nyoo.

¹⁷ Nyoo cuenda yo, ñu Israel, nacachi vaha ra chi sutu chahnu yo. Ta quiví cha iyó ca ñu ityí Egipto sacuvi ra noo ñuu cahnu chi ñu. Vasi ñima ñáyiví ñuu cuan cuví ñu, soco sanducuaaha ra chi ñu. Yaha cuan ta tava ra chi ñu ityí cuan chihin tunyee iñi chi ra.

¹⁸ Ta cunyeꝯ iñi Nyoo tandihi cuhva chiyo ñu nu chicá noo ñu ñuhú ityí chichi cha uvi xico cuiya.

¹⁹ Ta sanaꝯ ra ucha tahan ñuu nahnu cha chiyo nicahnu Canaán, vatyí chaha ra ñuhú cuan chi sutu chahnu yo.

²⁰ Yaha cuan ta sacuvi Nyoo vatyí cunyaca ñaha maa maa ri juez chi ñáyiví cuan. Tari noo cumi ciento sisava cuiya chinyaca ñaha juez chi ñu nyacua nya quiví chinyaca ñaha ra profeta Samuel chi ñu.

²¹ Tyicuan ta maa ñu chican ñu noo rey cha cunyaca ñaha chi ñu. Ta Nyoo chaha ra chi ra Saúl sehe ra Cis chi ñu, vatyí cunyaca ñaha ra chi ñu. Ta ra Saúl vachi ra tata ra Benjamín. Ta uvi xico cuiya chinyaca ñaha ra chi ñu.

²² Yaha cuan ta Nyoo tava ra chi ra Saúl cha cuví ra rey. Ta chaha ra vatyí cuví ra David rey. Ta catyí ra: “Nyehí vatyí ra David sehe ra Isaí cuví ra noo rayii cha tahan iñi cuhva iyó. Ta cusacuvi ra tandihi cha cuñí yuhu”, catyí Nyoo tuhun ra David.

²³ Ta minoo ra vachi tata ra David cuan ican cuví ra Jesús. Ta maa Nyoo tachi chi ra

vatyí sacacu ra chi yo ñu Israel, tari catyí ra chi sutu chahnu yo.

²⁴ Ta cumañi ca quichi ra Jesús, ra Juan ra sacondutya chi ñáyivi cahan ra nuu tandihí ñáyivi Israel. Ta catyí ra chi ñu vatyí cuñí chi cha ndu uvi iñi ñu cuatyí ñu, ta condutya ñu.

²⁵ Ta cha cuandihí tyiño saha ra Juan ta catyí ra: “¿Atu cuñí maa ndo vatyí yuhu cuví noo ra cahnu cha saquichí Nyoo? Soco ñima yuhu cuví ra cahnu cuan. Vatyí chata cha yahá yuhu ta vachi nonga ra. Ta ni ndichan nyaá chaha ra ta ña nañé cha ndachi. Vatyí cahnu xaan ra cuvi ra”, catyí ra Juan.

²⁶ ‘Hermano —catyí ra Pablo— nyoho ñu vachi tata ra Abraham, ta nyoho cha quichahá ndo chi Nyoo. Cha cuenda nyoho cuví tuhun ihya tyi sañahá Nyoo chi yo yoso caa cacu aña yu.

²⁷ Ñáyivi ñuu Jerusalén ta ra cuví nuu chi ñu cuan, ña chitó ñu vatyí ra Jesús cuví ra cha sacacú chi yo. Ta ni ña cutuñí iñi ñu tuhun cha catyaa ra profeta Nyoo ta cha naha, vasi sacuaaha vavaha ñu tuhun cuan tandihí quivi cha nyitatu ñu, soco ña cutuñí iñi ñu. Ta quivi chahñi ñu chi ra Jesús chino cava tari cuhva catyí ra profeta Nyoo cuan.

²⁸ Vatyí vasi ñahri cuatyí ra nañihí ñu, soco chican ñu chi ra Pilato na tyihí ra tyiño cucahñi chi ra.

²⁹ Ta cha yahá sacuvi ñu chi ra tari cuhva catyí maa tuhun ra nu libru Nyoo ta chihí ra. Tyicuan ta sanoo ñu chi ra nu cruzi. Ta tyihí ñu chi ra chichi ñuhú.

³⁰ Soco Nyoo sanandoto ra chi ra.

³¹ Ta chichi cha cuaha quivi tuví ra nuu ra cha quichi coyo chihin ra quivi quita ra ityi Galilea, ta quichi ra Jerusalén. Ta ican ra cuan cacahán tuhun ra chihin ñáyivi vityin.

³² Ta yucuan chaha nyuhu cahan ndi tuhun vaha cha catyí Nyoo chi sutu chahnu yo vatyí cuhva ra chi yo.

³³ Vatyí cha cuenda cha vaha chi maa yo cha cuví yo ñáyivi vachi tata ñu cuan, sacuvi maa Nyoo cha catyí ra. Vatyí sanandoto ra chi ra Jesús tari cuhva nyaá nu cu uvi salmo nu catyí Nyoo tyehe caa: “Sehi cuví chuun, ta yuhu chahí ñáyivi coun vi-

tyin”, catyí Nyoo.

³⁴ Nyoo tyaa ra cuhva vatyí sanandoto ra chi ra, tacuhva cha ma tyahyu coño ñuhu ra. Vatyí catyí nu tutu Nyoo: “Cuhve chí nyoho cha vaha cha catyí chi ra David.”

³⁵ Yucuan chaha catyí tucu nu inga salmo tyehe caa. “Ma cuhvon cha tyahyu coño ñuhu Sehe iun”, catyí chi.

³⁶ Ra David sacuvi ra tyiño nuu ñu cha chiyó quivi chiyó ra, yoso cuhva cha catyí Nyoo chi ra tyi sacuvi ra. Yahá cuan ta chihí ra ta chicuchí ñu chi ra tari chicuchí ñu chi sutu ra. Ta tyahyu coño ñuhu ra.

³⁷ Soco ra cha sanandoto Nyoo chi, ña tyahyu coño ñuhu ra.

³⁸ Yañi, cuñí chi coto ndo vatyí cha cuenda cha chihí ra Jesús tyiño nuu yo, Nyoo sahá ra ticahnu iñi cuatyí yo.

³⁹ Ta cha cuenda ra Jesús sahá Nyoo ticahnu iñi chí tandihí ñu cha chinó iñi chí ra, tyi ley ra Moisés ña cuví sacuvaha chi yo nuu Nyoo.

⁴⁰ Saha ndo cuenda coto ndoo siqui ndo cha catyaa ra profeta Nyoo nu catyí ra tyehe caa:

⁴¹ Nyehe nyoho, ra chacú nyaa, tahán chi cha iyo cuñi ndo ta cunaa ndo. Vatyí yuhu cuví Nyoo, ta sacuví minoo cha cahnu quivi cha iyó ndo vityin.

Soco ma chino iñi ndo tandihí cha sacuví yuhu vasi nacatyí ñáyivi chí ndo, catyí Nyoo.

⁴² Ndihi cahan ra Pablo ta cuaquita ra chata vehe ñuhu cuan chihin ra tahan ra. Tyicuan ta ñu cha ñima ñu Israel cuví quichaha catyí ñu chi ra, vatyí na cahan tucu ra tuhun ihya chihin ñu inga vitya quivi cha nyitatu ñu.

⁴³ Cuhva cha ndihí ndu ñn ri ñu, cuaha xaan ñu Israel ta ñu cha yihí cuenda ñu Israel, cachinyicon ñu chi ra Pablo ta chí ra Bernabé. Ta chahá ra tuhun chí ñu vatyí na cahun ca ñu ityi nuu ca chihin Nyoo. Ta ñaquehen vaha ñu tumañi iñi cha chahá Nyoo chí ñu.

⁴⁴ Cha inga vitya quivi nyitatu ñu, ndu ñn ri ñu. Ta cha yatyin cha tandihí ñáyivi ñuu cuan ndu ñn ri ñu vatyí cuiñi ñu tuhun Nyoo.

⁴⁵ Soco cuhva cha canyehe ra Israel, cuxaan ra vatyí nyehe ra vatyí cuaha ñáyivi

nyicón chi ra cuan. Ta quichaha cacuvi yuhu ra chihin ra Pablo, ta cacahan ra chi ra.

⁴⁶ Soco ña yuhví ra Pablo ta ra Bernabé. Ta quichaha cacatyí ra chi ra:

—Cuñi chi cha cahan xihna ndi tuhun Nyoo chihin nyoho cha cuví ndo ñu Israel. Soco ña cuñí ndo naquehen ndo. Ta cuñí maa ndo vatyí ña naña ndo cha ñihi ndo ñayiví chaa cha ma naa ca maa. Yucuan chaha chahun ndi cucahan ndi chihin ñu cha ñima ñu Israel cuví.

⁴⁷ Vatyí tyicuan caa tachí Sutu Mañi yo chi ndi ta catyí ra tyehe caa:

Tyaji chuun tari ñuhu chi ñáyiví nicahnu ñuhu ñayiví.

Tacuhva vatyí cusañahun ityi chi ñu yoso caa cacu añima ñu, catyí Nyoo.

⁴⁸ Cuhva cha cachiñi ra cha ñima ra Israel cuví, ndusi cuñi ra. Ta quichaha catyí ra vatyí tuhun Nyoo vaha xaan. Ta nachino ñi tandihi ñu cha nacachi maa Nyoo chii, vatyí coo ñu ñayiví chaa cha ma naa ca maa.

⁴⁹ Ta tyicuan caa chitya tuhun Nyoo tandihi ityi ñuu cuan.

⁵⁰ Soco ra Israel cacahan ra chihin suhva ñusihi tyayii cha nyicón ley ra Moisés. Catyí ra chi ñu vatyí ña vaha tuhun cahán ra Pablo. Ta cahán tucu ra chihin ra cuví nuu chi ñuu cuan. Ta yucuan cuví nu quichaha chica nyicon ñu chi ra Pablo ta chí ra Bernabé, nyacua nya cha tava ñehe ñu chi ra ñuu cuan.

⁵¹ Tyicuan ta canaquisi ra ñiyaca chaha ra tari noo seña vatyí ndoo cuatyí ñáyiví cuan síqui maa ñu. Ta cuahan coyo ra ñuu Iconio.

⁵² Soco ñu yihí cuenda Nyoo ñuu Antioquía cuan sii xaan cacuví chi ñu. Ta tyitu ñu chihin Tatyí Ii.

14

Nu ñohó ra Pablo ta ra Bernabé ñuu Iconio

¹ Ñohó ra Pablo ta ra Bernabé ñuu Iconio. Ta caquihví ra chichi vehe ñuhu ñu Israel. Ta vaha xaan cacahan ra tuhun Nyoo chihin ñáyiví. Ta cuaha xaan ñu nachino ñi ñu chi ra Cristo, ñu Israel ta ñu cha ñima ñu Israel cuví ñandihí.

² Soco ra Israel cha ña chinó ñi chi ra Cristo catyiyuhu ra chi ñu cha ñima ñu Israel cuví vatyí caca ña vaha ñi ñu nyehe ñu chi ra yihí cuenda ra Cristo.

³ Yucuan chaha ra Pablo ta ra Bernabé candoo ra yucuan cuaha quivi. Ta chihin cha ñi ñi ra cacahán ra tuhun ra Cristo. Ta chinó xaan ñi ra chí Sutu Mañi yo. Ta Sutu Mañi yo tyinyee ra chi ra cha cacahán ra tuhun ra yoso caa cuñí ra chi yo. Ta chaha Sutu Mañi yo cha casacuvi ra seña ta milagru tacuhva coto ñáyiví tyi ndicha cha cahan ra.

⁴ Soco ñáyiví ñuu, ña ñi ri cuví ñu. Yihí ñu cuahan ñu tumañi ñi chi ra Israel. Ta inga tucu ñu cuahan ñu tumañi ñi chi ra apóstol.

⁵ Tyicuan ta ra Israel ta ra cha ñima ra Israel cuví, catyihí tahan ra tuhun chihin ra cuví tyiño, vatyí cahan ña vaha ra síqui ra, ta catuchí ra yuu chi ra.

⁶ Soco ra Pablo ta ra Bernabé ñihí ra tuhun vatyí cusacuvi ra tyicuan caa, ta cuahan coyo ra nya ñuu Listra, ta nya ñuu Derbe ityi Licaonia. Ta cachica noo ra ityi cuan.

⁷ Ta cacahan tucu ra tuhun Nyoo yoso caa sacacu ra añima yo.

Nu cañi ñáyiví yuu chi ra Pablo nya ñuu Listra

⁸ Nya Listra iyó noo rayii cha pehe chaha. Ta nya ndaha cacu ra ta ña cuví caca ra. Vatyí pehe ñinduvi chaha ra.

⁹ Ta suri maa ra pehe chaha cuan tyasoho vavaha ra nu cahán ra Pablo. Ta ra Pablo, tuví ñi ra vatyí chinó ñi ra cuan vatyí cuví nduvaha ra.

¹⁰ Tyicuan ta ra Pablo cahan ra chihin cha chaa ndusu ra, ta catyí ra:

—Ñicuinanyaa ndoo —catyí ra Pablo chi ra.

Ta ra cuan, noo ri caña ndava ra, ta nicuinanyaa ra. Ta quichaha chica ra.

¹¹ Cha nyehé ñáyiví cha sacuvi ra Pablo, quichaha cana chaa ñu chihin sahan Licaonia, ta catyí ñu:

—Nyoo cha tari caá rayii cha coyo nu nyicú yo —catyí ñu.

¹² Ta catyí ñu tyi ra Bernabé cuví ra noo nyoo cha nañí Júpiter, ta ra Pablo cuví nyoo cha nañí Mercurio, vatyí ican ra cuví ra cahán.

13 Ta iyó noo tata sutu cuenda Júpiter cuan, saha cumí ra vehe ñuhu cha nyaá yuhu ñuu ri cuan. Ta quichí nyaca ra toro ta ita vatyí maa ra ta ñáyiví cuñí ñu sacahnu ñu chi ra Pablo ta chi ra Bernabé. Ta cuacahñi ñu toro tyi cuacuhva cuenda ñu chi ra, vatyí cuñí ñu tyi nyoo cacuví ra.

14 Soco cuhva cha catuví iñi ra apóstol, ra Bernabé ta ra Pablo, cha chicá xiñi ñu, quichahá chahnya ra sahma ra. Ta casacuví ra tyicuan caa tari noo seña vatyí ña ndoó ra vaha. Ta quihví coyo ra mahñu nu tuvi ñáyiví, ta cacana chaa ra,

15 ta catyí ra:

—Nyoho tata, ¿ñáá tuhun cha nyacuví ndo tyehe caa? Nyuhu rayí ri cuví ndi tari maa ndo. Ta vachi ndi vatyí catyí ndi chi ndo vatyí na saña ndo cha sacuvi ndo tyehe caa. Vatyí ña chiñuhu maa cha tyehe caa. Ta na cunyicon ndo chi Nyoo nyitó. Vatyí ican ra savahá andiví ta ñuhu ñayiví. Ta savahá ra tyañuhu ta tandihí cha iyó chichi tyañuhu cuan.

16 Ta tyiambu chahnu ta nya vityin, Nyoo saña ndaha ra chi ñáyiví na sacuvi maa ñu yoso cuhva cuñí ñu,

17 vasi tyicuan ri sañahá ra chi ñu yóo ra cuví ra, chihin cha vaha cha sacuví ra. Maa ra sacoón ra savi nu canyicú yo. Chahá ra cha vaha coo tyiño saha yo quiví tahan chi. Ta chahá ra cachi yo. Ta chahá ra cha cusí cuñí aña yo —catyí ra Pablo chi ñu.

18 Soco vasi catyí ra tyicuan caa, yí xaan ta chasi ra cha cahñi ñu toro cuan, vatyí cuñí ñu sacahnu ñu chi ra chihin cuan.

19 Tyicuan ta chaá coyo suhva ra Israel, ra ña chinó iñi chi ra Cristo, ra ñuu Antioquía, ta ra ñuu Iconio. Ta tyiyuhú ra chi ñáyiví, ta catyí ra vatyí na tuchi ñu yuu chi ra Pablo. Ta tyicuan caa sacuví ñu. Ta cuñi maa ñu vatyí cha chihí ra. Ta xita quiño ñu chi ra ityí chata ñuu.

20 Soco candu ñn ri ra cayihí cuenda Nyoo nu catuví ra Pablo. Ta ndicuita ri ra. Ta quihví ra inga chaha chichi ñuu. Ta cha inga quiví cuahan ra ñuu cha nañí Derbe ta cuahan ra Bernabé chihin ra.

21 Ta cahan tucu ra tuhun Nyoo nya ñuu Derbe yoso caa sacacu Nyoo aña yo. Ta cuaha ñáyiví nacuhva ñu chi ñu chi Nyoo. Yahá cuan ta cuanuhu coyo ra ityí quichi

ra. Ta yahá ra ñuu Listra ta ñuu Iconio inga chaha, ta nachaa ra nya Antioquía.

22 Ta tandihí ñuu cuan sanduní ca ra iñi ñu yihí cuenda Nyoo. Ta catyí ra chi ñu na cuhun ñu ityí nuu ca chihin cha chino iñi ñu Nyoo. Ta catyí tucu ra chi ñu vatyí tatu cuñí yo cha cunyacá ñaha Nyoo chi yo, cuñí chi cha nyehe yo tindocho.

23 Ta canatyiso ra chi ra ca quihí ndaha chi ñu yihí cuenda Nyoo noo noo vehe ñuhu. Ta cananducu ra Nyoo chihin cha ña chachí ra xita ta cachican tahvi ra chi Nyoo cha cuenda ra. Yahá cuan ta catyí ra chi ra: —Chino iñi ndo chi Sutu Mañi yo. Maa ra na cocumi ra chi ndo —catyí ra chi ra.

Nu cuanuhu coyo ra Pablo ta ra Bernabé Antioquía ityí Siria

24 Yahá cuan ta yahá coyo ra Pablo ta ra Bernabé ityí Pisidia, ta chaá coyo ra ityí Panfilia.

25 Cacahan ra tuhun Nyoo ñuu Perge. Yahá cuan ta chahan ra ñuu Atalia.

26 Yucuan quihví coyo ra chichi noo barcu ta cuanuhu coyo ra Antioquía. Yucuan cuví ñuu nu natyaa ñu chi ra ndaha Nyoo tyi cusacuvi ra tyiño nuu ra, ta vityin cha nachaa coyo ra.

27 Cuhva cha nachaa coyo ra Antioquía sandu ñn ri ra chi ñu yihí cuenda Nyoo. Ta nacatyí ra chi ñu tandihí cha sacuví Nyoo chihin ra. Ta yoso caa nuña Sutu Mañi yo ityí vatyí chinó tucu iñi ñu cha ñima ñu Israel cuví.

28 Ta naha xaan ndoo ra Pablo ta ra Bernabé chihin ñu yihí cuenda Nyoo ñuu cuan.

15

Nu casandaa ra apóstol tyiño nya Jerusalén

1 Nyaá ca ra Pablo ta ra Bernabé Antioquía, ta chaá coyo ra quita coyo ityí Judea. Ta quichahá sañahá ra chi ra yihí cuenda Nyoo. Ta catyí ra vatyí cuñí chi sacuvi ra costumbre circuncisión tari cuhva catyí ra Moisés, tyicuan ta cacu ra.

2-3 Ta ñihi xaan cahan ra Pablo ta ra Bernabé chihin ra cuan cha cuenda cuan. Tyicuan ta catyiso ñu hermano Antioquía cuan chi ra Pablo ta ra Bernabé chihin suhva ca ra vatyí cuhun coyo ra Jerusalén.

Vatyí cusandaa ra tyiño ihya chihin ra apóstol ta ra yihí ndaha ñu nyicu vehe ñuhu ñuu Jerusalén cuan. Tyicuan ta cuahan coyo ra. Ta ityi cuahan ra, yahá ra ityi Fenicia ta Samaria. Ta canacatyí ra chi ñu yihí cuenda Nyoo yoso caa sañá ñu cha ñima ñu Israel cuví tuhun chahnu cha chino iñi ñu. Vatyí nacuhvá cuenda ñu chi ñu chi Nyoo. Ta tandihí ñu hermano cusii xaan cuñí ñu cha chitó ñu tuhun cuan.

⁴ Quiví chaq coyo ra Pablo ta ra Bernabé Jerusalén, cuahan ra nu ndu ñin ri ñu yihí cuenda Nyoo. Ta tandihí ñu chihin ra apóstol, ta ra yihí ndaha chi ñu, chahá ñu lugar chi ra. Ta canacatyí ra tandihí cha sacuví Nyoo chihin ra.

⁵ Soco suhva ra fariseo cha cachinó iñi chi ra Cristo, nicuinanyaa ra ta catyí ra:

—Tandihí ra cha ñima ra Israel cuví ta chinó iñi ra chi ra Jesús, niñi cuñí chi cha sacuvi ra costumbre circuncisión. Ta cuñí tucu chi cha sacuví ra cuhva catyi ley cha tyaa ra Moisés —catyí ra.

⁶ Tyicuan ta candu ñin ri apóstol ta ra yihí ndaha chi ñu vehe ñuhu vatyí candatuhun vaha ra tuhun cuan.

⁷ Cha yahá cha cuviyuhu vavaha ra ta ndicuita ra Pedro, ta catyí ra:

—Yañi, chitó ndo vatyí chichi cha tandihí yo cachí Nyoo chi yuhu ra ndahví quívi cuan, vatyí cahin tuhun yoso caa cacu añima yo chihin ñu cha ñima ñu Israel cuví, vatyí nachino iñi ñu chi Sutu Mañi yo.

⁸ Ta Nyoo, ra chitó añima tandihí ñáyivi, sañahá ra chi yo vatyí cuñí ra chi ñu cuan. Ican tuhun chahá ra Tatyí Ii ra chi ñu, tari chahá ra chi yo.

⁹ Nyoo ña sahá ra tyi vaha ca yoó cha nuu ñu cuan. Soco sanduvií tucu ra añima maa ñu cha cuenda cha chinó iñi ñu chi ra.

¹⁰ Vityin naçaca xiñi yo cuhva cuñí Nyoo. Vatyí ña vaha cha tyisó yo ley ra Moisés siqui ñu. Vatyí niri maa sutu chahnu yo ta niri maa yo ta ña cuví naquehen vaha yo ley cuan.

¹¹ Ñima tyicuan caa cacú yo. Yoó chitó yo vatyí cacú yo chihin tumañi iñi cha sacuví Sutu Mañi yo Jesús chihin yo. Ta tyicuan caa tucu ñu cuan —catyí ra Pedro chi ra.

¹² Tyicuan ta taxi ri cacuví tandihí ra. Ta tyasohó ra tuhun cahan ra Bernabé ta

ra Pablo. Vatyí canacatyí ra seña ta milagru cha sacuví Nyoo nu cacahan ra tuhun Nyoo nu nyicú ñu cha ñima ñu Israel cuví.

¹³ Cuhva cha ndihí cahan ra, quichaha cahan ra Jacobo, ta catyí ra:

—Nyoho yañi, cuiñi ndo tuhun cahín.

¹⁴ Cha nacatyí ra Simón Pedro chi yo yoso caa quichaha chahá Nyoo tumañi iñi chi ñu cha ñima ñu Israel cuví. Vatyí cachí tucu ra chi suhva ñu vatyí cuví ñu noo ñáyivi cuenda ra.

¹⁵ Ta ñin ri nanduvi tuhun ihya chihin tuhun cha cahan ra profeta cuenda Nyoo ta cha naha, tari cuhva nyaa nu tutu Nyoo tyehe caa:

¹⁶ Yaha tandihí tuhun ihya cuquichi tiqui nu nyaá ndo.

Quiví chiyo ra David, vaha sacahnu ñáyivi chii.

Soco yahá cuan sandihí ñu tuhun cha sacahnu ñu chii.

Soco cuquichi tiqui ta tari cha cunacoñehi vehe ñuhu ra David inga chaha.

Vatyí cusacahnu tucu ñáyivi chii.

¹⁷ Tacuhva cuví nanducu tandihí ca ñáyivi chii, tandihí ñu cha ñima ñu Israel cuví cha chicán tahvi chihin siñi.

¹⁸ Tyicuan caa catyí Sutu Mañi yo ta sañahá ra tuhun ihya chi ñáyivi chiyo ta cha naha ta chi ñáyivi cha iyó vityin.

¹⁹ Yucuan chaha catyí yuhu vatyí ña vaha sayanga yo chi ñáyivi cha ñima ñu Israel cuví cha sandoo ñu tuhun cha chiyo ñu ta quihvi ñu cuenda ra Cristo. Ña vaha catyi yo tyi cuñí chi cha quichaha ñu ley chahnu.

²⁰ Vaha ri maa chihin cha sacuhun yo tutu chi ñu. Ta catyi yo chi ñu vatyí ma cachi ñu coño cha chahá cuenda ñáyivi chi xitohyo. Ta ni noo ñu ta ma coo ri maa ñusihi o rayi chi ñu, tatu ñima ñasihi o yi ñu cuví. Ta ma cachi ñu coño quití chihí cha cava ñu sucun ta ña chati niñi. Ta ma cachi ñu niñi.

²¹ Vatyí nyata tyembu ta chiyo ra cha sañahá ley ra Moisés vehe ñuhu ñu Israel ta sañaha ra tuhun cuan tahan tahan ñuu. Ta tahan uña quívi quívi nyitatú ñu, sacuaha ra tuhun cha tyaa ra Moisés —catyí ra Jacobo chi ra.

²² Tyicuan ta ra apóstol ta ra cayihí ndaha chi ñu nyicú vehe ñuhu chihin tandihí ñu

yihí cuenda Nyoo nacachi ñu chi suhva ra. Ta yaha cuan ta tachi ñu chi ra vatyí cuhun ra Antioquía chihin ra Pablo ta ra Bernabé. Ta ra cha canatyiso ñu ican cuví ra Judas cha nañí Barsabás, ta ra Silas. Ican ra cacuví ra ra cananyiso tyiño vehe ñuhu ñuu Jerusalén cuan.

²³ Ta chihin ra tachi ñu noo carta. Ta catyí carta cuan tyehe caa:

“Nyuhu ra apóstol, ta ra yihí ndaha chi ñu nyicú vehe ñuhu ta yañi ndo cuenda Nyoo, tandihí ri ndi chahá ndi nocumi chi nyoho cha ñima ra Israel cuví ndo vatyí yañi ndi cuví chi ndo vasi ñima ñu Israel cuví ndo. Tandihí ri ndo cha iyó ndo Antioquía ta nyoho ñu Siria, ta ñu Cilicia ñandihí, sacuhún ndi carta ihya chi tandihí ri ndo.

²⁴ Chitó ndi vatyí quitá suhva ra ityi nu nyicú ndi ihya. Ta cuahan ra nu nyicu ndo. Soco ña catyí nyuhu chi ra tyi cuhun ra cusayanga ra chi ndo chihin tuhun cahan ra. Satondo ra cuan xiñi ndo vatyí catyí ra chi ndo tyi cuñí chi cha sacuví ndo costumbre circuncisión ta naquehen vaha ndo ley ra Moisés. Soco ñima nyuhu catyí tyi cuhun ra cucatyí ra chi ndo tyicuan caa.

²⁵ Yucuan chaha ndu ñn ri ndi ta nacachi tahan tuhun cahan ndi ta vaha cuñi ndi cha tachi ndi chi ra hermano ihya chihin ra Pablo ta ra Bernabé nu nyicu ndo.

²⁶ Nduvi tahan ra ihya nyehé xaan ra tindoho cha cuenda Sutu Mañi yo. Ta vasi cuñí ñáyivi cahñi ñu chi ra soco ña sandihí ra tuhun cha sacoto ra tuhun Sutu Mañi yo Jesucristo.

²⁷ Ta yucuan chaha tachí ndi chi ra Judas ta chi ra Silas. Ta maa ra cucahan ra chihin yuhu ra chihin ndo, vatyí nacatyí ra tandihí cha tyaa ndi nu tutu ihya.

²⁸ Vatyí ñiri Tatyí Ii ta ñiri nyuhu ta ña cuñí ndi tyiso ca ndi carga siqui ndo, soco ihya ri cha ñiñi ca tahán chi cha naquehen vaha ndo.

²⁹ Ma cachi ndo coño cha chaha cuenda ñu chi xitohyo. Ta suri ma cachi ndo ñiñi, ni coño quití cha chihí ta ña chatí ñiñi tí. Ta ma coo ñusihi o rayí chi ndo tatu ñima ñasihi ndo o yí ndo cuví. Tatu ma sacuvi ndo tyicuan caa, vaha xaan cuacoo ndo. Ta Nyoo na cocumi ra chi ndo”, catyí ra nu carta cuan.

³⁰ Ta cuahan coyo ra cha catachi ra chi cuan. Ta chaá coyo ra Antioquía. Ta sandu ñn ri ra chi tandihí ñu, ta nacuhva cuenda ra carta cuan.

³¹ Cuhva cha sacuhva ñu carta cuan ndusi xaan cuñí ñu vatyí vaha xaan cahan chi.

³² Ta ra Judas ta ra Silas cuví tucu ra cuan profeta cuenda Nyoo. Ta sanduní ra ñni ra hermano chihin tuhun cahan ra.

³³ Ta cha yaha chinyicu ra cuan suhva quivi ta cuanuhu coyo ra nya nu nyicú ñu catachi chi ra. Ta tandihí ñu yihí cuenda ra Cristo catyí ñu vatyí na cuhun vaha ra.

³⁴ Soco ra Silas natyaa ra cuhva vatyí cundoo ra.

³⁵ Ta ra Pablo ta ra Bernabé candoo tucu ra Antioquía yucuan. Ta maa ra chihin cuaha ca ra casañaha ca ra chi ñáyivi. Ta cacahan ca ra tuhun Sutu Mañi yo chihin ñu.

Nu cu uvi chaha cuahan ra Pablo tuhun Nyoo ta nu cusin ra chihin ra Bernabé

³⁶ Ta cha yaha suhva quivi ta catyí ra Pablo chi ra Bernabé:

—Coho inga chaha cunyehe yo nu nyicú ñu yihí cuenda ra Cristo tandihí ri ñuu nu cahan yo tuhun Sutu Mañi yo. Vatyí nyehe yo yoso caa canyicu ñu —catyí ra chi ra.

³⁷ Ta ra Bernabé cuñí ra cha cuhun tucu ra Juan Marcos chihin ra.

³⁸ Soco ra Pablo ña tahán ñni ra cha cuhun ra Juan chihin ra, vatyí sandoo ra chi ra nya Panfilia quivi cuan. Ta ña chahan ca ra chisaha tyiño ra chihin ra.

³⁹ Ta ña chitahan ñni ni noo ra, ta cacusin ra. Ra Bernabé cuahan ra chihin ra Juan Marcos. Ta quihvi ra chichi noo barcu ta cuahan coyo ra Chipre.

⁴⁰ Ta ra Pablo cachí ra chi ra Silas. Ta cha yaha chican tahvi ra hermano chi Nyoo na tyinyee ra chi ra, ta cuahan coyo ra.

⁴¹ Ta yaha ra ityi Siria, ta ityi Cilicia, ta sanduní ca ra ñni ñu yihí cuenda Nyoo noo ñuu.

16

Nu cuahan ra Timoteo chihin ra Pablo ta ra Silas

¹ Ra Pablo ta ra Silas chaá coyo ra ñuu Derbe, ta ñuu Listra. Ta yucuan nañihí ra chi noo ra yihí cuenda Cristo. Nañí ra

Timoteo. Ta sihi ra cuví ña noo ñaha Israel. Ta suri yihí tucu ña cuenda ra Cristo. Soco sutu ra ra Grecia cuvi ra.

² Vaha xaan chicá ra Timoteo chihin Nyoo catyí ñu yihí cuenda Cristo ñuu Listra ta ñuu Iconio.

³ Ta ra Pablo cuñí ra cha cuhun ra Timoteo chihin ra. Ta saha ra circuncidar chi ra Timoteo. Vatyí coto ma cuiñi ñu Israel cha iyó ityi cuan tuhun ra Cristo cha cahán ra. Vatyí tandihí ñu chitó ñu vatyí sutu ra cuví ra ra ñuu Grecia.

⁴ Tyicuan ta cuahan coyo ra noo noo ñuu. Ta nacatyí ra chi ñu yihí cuenda ra Cristo tuhun cha chaha ra apóstol ta ra yihí ndaha chi ñu nyicu vehe ñuhu Jerusalén chi ra.

⁵ Ta tyicuan caa ta nduní ca iñi ñu yihí cuenda ra Cristo ta chino ca iñi ñu chi Nyoo. Ta tahan quiví ta cuahan nducuaha ca ñu.

Nu nyehé ra Pablo noo visión chi noo ra Macedonia

⁶ Ña chaha Tatyí Ii cha cahan ra tuhun Nyoo ityi Asia. Yucuan chaha yaha sava ra ityi Frigia nu iyó xahñi ñuhu chihin ityi Galacia.

⁷ Ta cha coyo tucu ra ityi Misia. Ta cuñí tucu ra cuhun coyo ra ityi Bitinia, soco Tatyí Ii ra Jesucristo ña chaha cuhun coyo ra.

⁸ Tyicuan ta nya sava ri yaha ra ñuu Misia ta cano coyo ra ñuu Troas cha nyaá yuhu tyañuhu.

⁹ Cañohó ra ñuu Troas cuan, ta noo cha cuaa nyehé ra Pablo noo visión. Nyehé ra chi noo rayí ityi Macedonia. Nanyaá ra ta chacú ndahvi ra nuu ra, ta catyí ra chi ra: “Ñaha, vatyí tyinyeun chi ndi”, catyí ra.

¹⁰ Ta cha nyehé ra Pablo visión cuan, yuhu ra Lucas chihin ra Pablo ta inga ra sanduvaha ndi chi ndi ta cuahan ndi nya Macedonia cuan. Vatyí chitó vaha ndi vatyí Nyoo cana chi ndi, vatyí cahan ndi tuhun ra yoso caa sacacú ra añima yo chihin ñáyiví ityi cuan.

Nu ñohó ra Pablo ta ra Silas ñuu Filipos

¹¹ Quíhví ndi noo barcu ñuu Troas. Ta chahan ndoo ityi ri ndi nya Samotracia noo ñuhú luhlu iyó mahñu tyañuhu. Ta cha inga quiví cha ndi ñuu Neápolis.

¹² Ta yucuan quita ri ndi ta cuahan ndi ñuu Filipos cha cuví noo ñuu cuenda ñu

Roma. Ta cuví chi noo ñuu cahnu ca cha nuu tandihí ñuu ityi Macedonia cuan. Ta yucuan chinyicu ndi suhva quiví.

¹³ Noo quiví cha nyitatu ñáyiví ta quita ndi ityi chata ñuu, yatyín noo yutya nu tuhvá ñu chican tahvi ñu chi Nyoo. Chicun-yaá ndi yucuan ta cahan ndi tuhun Nyoo chihin ñusihi cha candu in ri yucuan.

¹⁴ Noo ñaha nañí ña Lidia. Ta ñuu ña cuví Tiatira. Ta tuhvá ña xico ña sahma finu, tyacu nyaa. Yucuan cuví tyiño sahá ña. Ta sacahnú ña chi Nyoo tari ñu Israel. Ta chiñí ña cha cahán ra Pablo. Ta Nyoo nuña ra añima ña na quichaha ña cha cahan ra.

¹⁵ Ta condutya ña chihin ñáyiví chi ña. Ta yaha cuan ta chacú ndahvi ña nuu ndi, ta catyí ña:

—Tatu nyehé ndo vatyí ndicha cha chinó iñi chi Sutu Mañi yo, ñaha ndo, coo ndo vehi —catyí ña chi ndi.

Ta saniñi ña chi ndi cha ndoo ndi vehe ña.

¹⁶ Ta cuví noo chaha cha cuahan ndi nu chicán tahvi ndi. Ta cha niri ca cha cuahan ndi, tahan ndi chi noo ñaha tyivaa. Yihí noo tatyí ña vaha chi ña. Yucuan chaha cuví nacoto ña ñáá ndihí cha cucuvi ityi nuu. Ta cuví ña noo ñaha iyó chitoho. Ta cuaha xaan xuhun sahá ganaa ña cuenda chitoho ña, vatyí cuví nacotó ña.

¹⁷ Ta ñaha tyivaa cuan quichaha nyicon ña chi ndi, ta chi ra Pablo ñandihí. Ta cana cha ña ta catyí ña:

—Rayí ihya ra casacuví tyiño nuu Nyoo cahnu cuví ra. Ta cahán ra tuhun yoso caa cuví cacu añima yo —catyí ña.

¹⁸ Cuaha quiví sacuvi ñaha tyivaa cuan tyicuan caa. Tyicuan ta ra Pablo ña cunye ca iñi ra, ta nanyocava ra ta catyí ra chí tatyí ña vaha cha yihí chi ña:

—Chihin sivi ra Jesucristo catyí chuun vatyí quíton chi ñaha tyivaa ihya —catyí ra.

Ta tatyí ña vaha cuan quita chi chi ña caa cuhva ri cuan.

¹⁹ Soco cuhva cha canyehé chitoho ña vatyí ma cuvi ca saha ganaa ra xuhun chihin ña, catiín ra chi ra Pablo ta ra Silas chinyaca ra chi ra nya vehe tyiño.

²⁰ Ta cachican ra cuatyí chaha ra nuu ra cacuví tyiño. Ta catyí ra:

—Ra Israel ihya sanaquiquí ra chi ñáyiví ñuu yo.

21 Ta sañahá ra costumbre cha ña cuví naquehen yo, ñiri ña cuví sacuvi yo vatyí ñu cuenda ñuu Roma cuví yo —catyí ra.

22 Tyicuan ta nduxaan ñáyivi chi ra Pablo ta ra Silas. Ta ra cacuví tyiño cuan chahnya ra sahma ra Pablo ta ra Silas ta tachí ra tyiño nacañi ra chi ra chihin yutun.

23 Cha yahá cha cañi vavaha ra chi ra, ta catyihí ra chi ra vehe caa. Ta tachí ra chi ra sahá cumi chi ra na saha vaha ra cuenda chi ra.

24 Cuhva cha quehen ra sahá cumi cuan tuhun, tyihí ra chi ra nya chichi cuí vehe caa. Ta tyihí vaha ra chaha ra ticu vitu.

25 Soco ñáá cuhva hora ñuu cuan cachitá vavaha ra Pablo ta ra Silas. Ta cachicán tahvi ra chi Nyoo. Ta ra cañohó vehe caa cuan catyasohó ra.

26 Ta saná iñi ra ta quichí noo cha taan ñihi vavaha. Ta naquisi chi cimientu vehe caa cuan, ta caa cuhva ri cuan nuña tandihí yuvehe, ta ndachi cadena tandihí ra ñohó vehe caa cuan.

27 Ta cha ndoyo ra sahá cumi cuan, nyehe ra vatyí tacoho yuvehe. Tyicuan ta tava ra mityí ra vatyí cahñi maa ra chi ra. Vatyí chicá xiñi ra vatyí ndihí ra ñohó vehe caa cuan cachino.

28 Soco ra Pablo cana cha ra chi ra, ta catyí ra:

—Ma cahñun chuun, vatyí tandihí ndi nyicú ndi ihya —catyí ra chi ra.

29 Tyicuan ta ra sahá cumi cuan chican ra noo ñuhu. Ta quicono ra quihvi ra nu cañohó ra. Ta ñihí ra chihin cha yuhví ra. Ta chicuñi chiti ra nuu ra Pablo ta ra Silas.

30 Numi ri tava ra chi ra nu ñoho ra yucuan. Ta ndacá tuhun ra chi ra ta catyí ra:

—¿Nyoho Tata, yoso caa sacuvi ta cacu añime? —catyí ra chi ra.

31 Ta ra cuan canacahan ra ta cacatyí ra:

—Chino iñi chi Sutu Mañi yo Jesucristo ta cacun, maun ta ñáyivi chuun ñandihí —catyí ra.

32 Ta cacahan ra tuhun Sutu Mañi yo chihin ra ta chihin tandihí ñu nyicu vehe ra.

33 Ta suri maa cha cuaa cuan ra sahá cumi vehe caa cuan nacatyá ra nu cahvi chi nduvi tahan ra nu cañi ra chi ra. Yahá cuan ta maa ra ta tandihí ñáyivi chi ra condutya ñu suri cha cuaa cuan.

34 Tyicuan ta chinyaca ra chi ra nya vehe ra. Ta chaha ra cha cachi ra. Ta maa ra chihin ñáyivi chi ra sii xaan cuñi ñu vatyí chinó iñi ñu chi Nyoo. [Tyicuan ta cuanuhu coyo ra nya vehe caa cuan coto cuxaan ra cuví tyiño chihin ra saha cumi chi ra.]

35 Tuví inga quivi ta catachí ra cacuví tyiño chí policia nu nyaá ra sahá cumi cuan, ta catyí ra vatyí na saña ra chi ra Pablo.

36 Tyicuan ta ra sahá cumi vehe caa cuan catyí ra chi ra Pablo:

—Chaa tyiño chii saha ra cuví tyiño, vatyí sañe chi ndo. Ican tuhun cha cuví quita ndo vityin —catyí ra chi ra.

37 Soco ra Pablo catyí ra:

—Chi nyuhu cha cuví ndi ra cuenda ñuu Roma ican cañi ra nu tuvi. Ta ni ña cutuñi chi ndi tari cuhva tahan chi. Ta tyihí ra chí ndi vehe caa. Ta vityin cuñi ra saña xehe ra chi ndi. Soco ma cuví. Naquichi tava maa ra chi ndi —catyí ra Pablo chi ra sahá cumi cuan.

38 Ta ra policia nacatyí ra chi ra cacuví tyiño. Ta ra cuan cayuhvi ra cuví cha cachitó ra vatyí ra cuenda ñuu Roma cuví ra Pablo.

39 Ta chahan coyo ra chinandacan ra ticahnu iñi chí ra Pablo ta chi ra Silas. Tyicuan ta catava ra chi ra ta cachacu ndahvi ra nuu ra na quita ra ñuu cuan.

40 Ta cha quita coyo ra vehe caa, chahan coyo ra vehe cu Lidia. Ta yahá cuan ta chinyehe ra chi ra hermano ta sanduní ra iñi ra ta cuahan coyo ra.

17

Nu naquiquí ñáyivi ñuu Tesalónica

1 Nu cuahan coyo ra Pablo ta ra Silas, cayaha coyo ra ñuu Anfípolis, ta ñuu Apolonia. Yahá cuan ta chaa coyo ra ñuu Tesalónica nu nyaá noo vehe ñuhu ñu Israel.

2 Ta chahan ra Pablo vehe ñuhu cuan tari cuhva tuhva maa ra chahan noo noo ñuu. Ta cahan ra tuhun Nyoo chihin ñáyivi chichi vehe ñuhu cuan uñi tahan quivi nyitatu ñu.

3 Quehen ra libru tuhun Nyoo ta sañaha ra tuhun ra Cristo chí ñu yoso caa catyí chí vatyí cunyehe ra tindoho ta cucúvi ra. Yahá cuan cunandoto ra. Ta catyí ra chí ñu

vatyí suri maa ra Jesús cha cahán ra tuhun chihin ñu cuví ra Cristo.

⁴ Ta suhva ñáyiví Israel cuan nachino ñi ñu. Ta candu ñn ri ñu chihin ra Pablo ta ra Silas. Ta cachino tucu ñi cuaha ñu Grecia cha sacahnú chí Nyoo. Ta cuaha ñusihi tyayí ñuu cuan ñandíhi.

⁵ Soco ra Israel cha ña chinó ñi, quiñi cacuñí ra cha nyehé ra vatyí nyicón ñáyiví chi ra Pablo. Ta sandu ñn ri ra chi noo ityi ra quiñi iyó cha cachicá noo yanga ri maa. Ta sanaquiquí ra ñuu cuan. Ta quihví ra vehe ra Jasón, nanducú ra chi ra Pablo ta chi ra Silas, vatyí tava ra chi ra, ta nacuhva cuenda ra chi ra chí ñáyiví.

⁶ Soco cha cuenda cha ña nañihí ra chi ra Pablo ta ra Silas yucuan, ta quehen ra chi ra Jasón. Ta xitá quiño ra chi ra ta chi suhva ca ra hermano ta cuahan coyo ra nuu ra cuví tyiño ñuu cuan. Ta caná chaa ra ta catyí ra:

—Ra ihya cuví ra cachicá noo satondó chi tandíhi ñáyiví nicahnu ñuhu ñayiví. Ta vityin chaa coyo tucu ra ihya.

⁷ Ta ra Jasón chiña chahá ra vehe ra cun-yicu ra. Ta tandíhi maa ra ña sahá ra ñáyiví chi ra cuví rey cahnu nya Roma. Vatyí catyí ra vatyí iyó nonga rey ta nañí ra Jesús.

⁸ Cha cachiñi ñu tuhun cuan, ñáyiví ta ra cacuví tyiño canaquiquí ñu.

⁹ Soco ra Jasón ta inga ra cachahá ra xuhun ta caquita yíca ra.

Nu cuahan coyo ra Pablo ta ra Silas ñuu Berea

¹⁰ Ta suri cha cuaa cuan quiyi cuii ri casacuhun ra hermano chi ra Pablo ta ra Silas ityi ñuu Berea. Ta cha chaa coyo ra yucuan ta chahan coyo ra vehe ñuhu ñu Israel.

¹¹ Ta ra Israel cha iyó ñuu Berea cuan vaha ca ñáyiví cacuví ra ta ñima ca ra Tesalónica. Vatyí chihin cha ñi ñi ra naquehen ra tuhun Nyoo. Ta ndiquivi nanducú ra nuu tutu Nyoo, nyehé ra tatu ndicha cha cacatyí ra Pablo ta ra Silas ta ra Timoteo chi ra.

¹² Yucuan chaha cuaha vavaha ñu nachino ñi ñu chi ra Cristo. Ta ñu Grecia nachino tucu ñi ñu cuan, tari ñusihi tyayí ta rayí ñandíhi.

¹³ Soco cha cachito ra Israel cha ca iyó ñuu Tesalónica vatyí ra Pablo ñohó ra Berea cahán ra tuhun Nyoo, ta chahan coyo ra ta sanaquiquí ra chí ñáyiví yucuan.

¹⁴ Soco ra hermano numi cuii ri tachí ra chí ra Pablo nya ityi yuhu tyañuhu. Soco ra Silas ta ra Timoteo candoo ra Berea.

¹⁵ Ta ra cha cuahan coyo chihin ra Pablo chinyaca ra chí ra nya ñuu Atenas. Tyicuan ta cuanuhu coyo ra nya Berea cuanacuhva ra tyiño cha tachí ra Pablo chí ra Silas ta chí ra Timoteo, na sanumi ra ta cahun ra nu nyaá ra.

Nu ñohó ra Pablo ñuu Atenas

¹⁶ Cha ñiri ca cha nyatú ra Pablo chí ra Silas ta ra Timoteo ñuu Atenas cuan quiñi cuñí ñima ra cha nyehé ra vatyí cuaha xaan xitohyo iyó ñuu cuan.

¹⁷ Yucuan chaha chahan ra chihin ra Israel, ta chihin inga ra cha tuhvá sacahnú chí Nyoo chichi vehe ñuhu cuan. Ta ndí quiñi cahán ra chihin ñu cha nyicu nuyahvi ñandíhi.

¹⁸ Ta ñihí tahan ra chihin ñu cha sacuaha tuhun sañahá noo ityi ñáyiví cha nañí ñu epicúreo. Ta ñihí tahan tucu ra chihin ñu cha sacuaha tuhun sañahá ñáyiví estoico. Ta cacahan ñu chihin ra. Ta yíhí ra catyí ra:

—¿Ñáá tuhun cahan xaan ra ihya? —catyí ra.

Ta inga ra catyí ra:

—Tuhun inga nyoo cahán ra ihya —catyí ra.

Tyehe caa catyí ra vatyí ra Pablo cahán ra tuhun ra Jesús, ta cahán tucu ra tuhun cha nandoto ñáyiví chíhi.

¹⁹ Tyicuan ta chinyaca ra chí ra Pablo noo nu nañí Areópago, nu tuhva ra cacuvi tyiño ndu ñn ri ra. Ta cacatyí ra chí ra:

—Cuñí ndi coto ndi tuhun chaa cha vachi sañahún.

²⁰ Vatyí sacotón tuhun cha ña chitó ndi. Ta cuñí ndi coto ndi ñáá cha cuñí chí catyí tandíhi tuhun ihya —cacatyí ra chí ra.

²¹ Vatyí tandíhi ñu Atenas ta ñu inga ñuu cha iyó yucuan tahán xaan ñi ñu tyasoho ñu ta nacatyí ñu ñáá ndíhi tuhun chaa.

²² Tyicuan ta ra Pablo nicuinanyaa ra mahnu nu nyicu ñu yucu Areópago, ta catyí ra:

—Nyoho Tata ñuu Atenas, yuhu nyehí vatyi chinó xaan iñi ndo chi cuaha nyoo.

²³ Vatyi chahin chinyehi nu tuhvá ndo savaha ndo culto. Ta nañihí noo arta nu nyaá letra cha catyí: “Cuenda Nyoo cha ña ñohó nuu yo”, catyí letra cuan. Nyoho sacahnú ndo chi Nyoo cuan vasi ña ñohó nuu ndo chi ra. Ican Nyoo cuan cuví cha cahín tuhun chihin ndo.

²⁴ Nyoo cha savahá ñuhu ñayiví ta tandihí cha iyó siquí ñuhu ñayiví. Chi maa ra cuví andiví ta ñuhu ñayiví. Ta ña iyó ra chichi vehe ñuhu cha savahá ñáyiví.

²⁵ Ta ña itá iñi ra cha tyinyee ñáyiví chi ra. Vatyi suri maa ra chahá ra ñayiví coo tandihí yo. Ta chahá ra tatyí cha xitá yo. Maa ra chahá tandihí chi yo.

²⁶ Cha xihna ri savahá Nyoo chi noo tuhun ri rayí. Ta maa ra cuví sutu tandihí yo. Yucuan chaha noo ri niñi nyisó tandihí yo. Ta chahá Nyoo cha coo yo nicahnu ñuhu ñayiví. Cha ni cumañi ca savahá ra chi yo ta catyí ra ñáa cuiya coo noo noo yo siquí ñuhu ñayiví ihya. Ta catyí tucu ra nya cucoo noo noo yo.

²⁷ Tyicuan caa sacuví ra vatyi tacuhva quichaha nanducu yo chi ra. Tari nanducú minoo ra cuaa noo cha nanducú ra chihin ndaha ra, vasi tyicuan caa ta cuví nañihí yo chi ra. Soco cha ndicha, Nyoo ña cañi nyaá ra chihin noo noo yo.

²⁸ Vatyi cha cuenda Nyoo iyó yo ta candá yo. Tari catyí tucu noo ra ñuu ndo, vatyi catyí ra: “Ñáyiví chi Nyoo cuví chi yo”, catyí ra.

²⁹ Tatu ñáyiví chi Nyoo cuví yo, ña tahán chi caca xiñi yo vatyi Nyoo cuví ra noo xitohyo cha chinó chihin xuhun cuaan, o xuhun cuichin, o chihin yuu vaha cha savahá ñáyiví cuhva chicá xiñi maa ñu.

³⁰ Nyoo sahá ra ticahnu iñi chi ñu chiyo ta cha naha, vatyi ña chitó ñu. Soco vityin catyí ra chi tandihí ñáyiví tandihí ri ityi vatyi na ndu uvi iñi ñu cuatyí ñu.

³¹ Vatyi Nyoo tyaá ra cuhva vatyi coo noo quívi cha cucutuñi chi ñáyiví iyó siquí ñuhu ñáyiví nuu noo ra cha nacachí vaha maa ra chi. Ta sañahá ra chi tandihí yo vatyi tyicuan caa cuví vatyi sanandoto ra chi ra cuan cha yahá chihí ra —catyí ra Pablo.

³² Cuhva cha chiñí ñu tuhun cha nandotó

ñu chihí, yihí ñu chacu nyaá ñu, ta inga ñu catyí:

—Quichun inga quívi ta cahun tuhun ihya chihin ndi —catyí ñu.

³³ Tyicuan ta cuahan ra Pablo.

³⁴ Soco yihí ñu chinyicon ñu chi ra, ta nachino iñi ñu chi Nyoo. Ta noo ra nañí ra Dionisio, ta cuví ra noo ra cuví tyiño ñuu cha tuhvá ndu ñin nya Areópago cuan. Ta noo ñaha sihi cha nañí Dámaris chino tucu iñi ña, ta inga tucu ñu ñándihí.

18

Nu ñohó ra Pablo ñuu Corinto

¹ Yahá cuan ta quita ra Pablo ñuu Atenas ta cuahan ra ñuu Corinto.

² Ta yucuan nañihí ra chi noo ra Israel tari maa ra. Nañí ra Aquila. Ta ñuu Ponto cacu ra. Ta maa ra chihin ñasihí ra, cu Priscila quita ñu Italia. vatyi ra Claudio, ra cuví rey cahnu yucuan, tava ra tandihí ra Israel. Catyí ra na quita ra ñuu Roma. Ta ra Pablo cuahan ra nu nyaá ñu ñuu Corinto cuan.

³ Ta ñin ri tyiño sacuví ra chihin ñu. Savahá ñu vehe sahma. Ta ndoo ra chihin ñu vatyi sahá tyiño ñu ñin ri.

⁴ Ta quívi nyítatu ñu Israel tahan vitya, ra Pablo chahan ra vehe ñuhu ñu. Ta ndatuhun tahan ra chihin ñu Israel ta chihin ñu cha ñima ñu Israel cuví. Vatyi nducú ra cuhva cha chino iñi ñu chi ra Jesucristo.

⁵ Ta quívi chaá coyo ra Silas ta ra Timoteo cha quita ra Macedonia, ra Pablo sandoo ra tyiño sahá ra ta ñin ri ca tyiño cha cahán ra tuhun Nyoo nicunyaá ra. Ta catyí cachi ra chi ñu Israel vatyi ra Jesús cuví Cristo ra cha nyatú xaan ñu.

⁶ Soco ñu cuan xaan cuñi ñu. Ta quichaha cahan ña vaha ñu siquí sutu Mañi yo. Tyicuan ta ra Pablo naquisí ra sahma ra tari noo seña vatyi cuandoo cuatyí ñu siquí ñu. Ta catyí ra chi ñu:

—Cuatyí maa ndo cuví tatu cuhun ndo anyaya. Ñahri ca nyaá siquí. Vityin ta ityi nuu ca cuhin cucahin chihin ñu cha ñima ñu Israel cuví —catyí ra chi ñu.

⁷ Ta quita ra vehe ñuhu cuan. Ta cuahan ra vehe noo ra cha nañí Justo. Noo ra cha sacahnú chi Nyoo. Ta nyaá vehe ra ityi xiin vehe ñuhu cuan.

⁸ Ta noo ra cha nañí Crispo, ra cuví nuu vehe ñuhu cuan nachingo iñi ra chi Sutu Mañi yo, ta ñáyivi chi ra ñandihí. Ta cuaha ca ñáyivi iyó Corinto cuan, cha yaha cha chiñi ñu tuhun cahán ra Pablo, nachingo tucu iñi ñu chi ra Jesús, ta condutya ñu.

⁹ Tyicuan ta noo cha cuaa nyehe ra Pablo noo visión. Ta cahan Sutu Mañi yo chihin ra, ta catyí ra:

—Ma yuhvun. Cahan ca tuhin ta ma sandihun cha cahun.

¹⁰ Vatyí yuhu nyaí chuhun. Ta yori cuví sata si iñi chuun. Vatyí cuaha xaan ñáyivi nyaá sacaqui ñuu ihya —catyí Sutu Mañi yo chi ra Pablo.

¹¹ Yucuan chaha ra Pablo ndoo ra noo cuiya sisava ñuu Corinto cuan. Sañahá ra tuhun Nyoo chi ñáyivi.

¹² Soco quivi cha cuví ra Galión gobernador nicahnu ityi Acaya cuan, candu in ri ra Israel siqui ra Pablo. Ta cachican ra cuatyí chaha ra nuu ra gobernador.

¹³ Ta cacatyí ra chi gobernador cuan:

—Ra ihya tyiyuhú ra chi ñáyivi na sacahnu ñu chi Nyoo noo cuhva cha ñahri nyaá nu ley ndi —cacatyí ra.

¹⁴ Tyicuan ta cuhva cha cuanacahan ra Pablo, nacahan ri ra Galión, ta catyí ra chi ra Israel cuan:

—Nyoho ra Israel, tatu cuenda noo cuatyí cahnú o cuatyí ndiyi cuví sandai yoso cuhva tahán chi.

¹⁵ Soco maa maa ri tuhun cahán ri cuví ihya. Ta yuhu ña cuñi sandai tyiño ihya, ta sin ri cuenda ley maa ndo cuví. Nyehe maa ndo. Sandaa ndo tyiño vatyí yuhu ña cuñi cuví juez cuenda ihya —catyí gobernador cuan.

¹⁶ Ta tava ra chi ra nu cuví vehe tyiño ra.

¹⁷ Tyicuan ta tandihí ra Grecia catiin ra chi ra Sóstenes, ra cuví nuu vehe ñuhu ñu Israel. Ta cacañi ra chi ra suri maa nuu ra Galión, ra cuví gobernador cuan. Soco ra Galión cuan ña cahan ri ra.

Nu cuanuhu ra Pablo ñuu Antioquía. Yaha cuan ta cuahan tucu ra tuhun Nyoo, cha cu uñi chaha

¹⁸ Ta ra Pablo ndoo ca ra ñuu Corinto cuaha quivi. Yaha cuan ta catyí ra chi ra hermano vatyí cahun ra. Ta cuahan ra Aquila chihin cu Priscila chihin ra Pablo.

Tyicuan ta cha coyo ñu Cencrea. Ta ra Pablo satya ndi ra xiñi ra vatyí sacuví ra noo cha tyaá ra cuhva tyi sacuvi ra nuu Nyoo. Tyicuan ta caquihvi ñu chichi noo barcu cha cuahan ityi Siria.

¹⁹ Ta cha cha barcu cuan nya ñuu Éfeso, ta caquita ñu. Ta ra Aquila chihin cu Priscila ndoo ñu yucuan. Ta ra Pablo cuahan ra vehe ñuhu ñu Israel. Ta cahan ra chihin ñu Israel cha ndu in ri yucuan.

²⁰ Ta chacu ndahvi ñu nuu ra na ndoo ra cuaha ca quivi. Soco ña cuñi ra.

²¹ Ta catyí ra chi ñu vatyí cha cuahan ra, ta catyí tucu ra tyehe caa:

—Cuñi chi cha cuhin ñuu Jerusalén vatyí sanducahni vico cha vachi cutahan. Soco cuquichi inga chaha nu nyicu ndo tatu Nyoo ta cuñi ra —catyí ra chi ñu.

Tyicuan ta cuahan ra quihvi ra chichi noo barcu cha cuahan ityi Siria.

²² Quivi nachaa ra ñuu Cesarea ityi Siria cuan, chahan ra chicuhva ra nocumi chi ñu yihí cuenda Nyoo Jerusalén. Yaha cuan ta cuahan ra Antioquía.

²³ Ta cha yaha chinyaa ra suhva quivi yucuan, quita ra ta cuahan ra tahan tahan ñuu ityi Galacia ta Frigia. Ta sanduní ra iñi tandihí ñu yihí cuenda Nyoo.

Nu cahán ra Apolos tuhun Nyoo ñuu Éfeso

²⁴ Quivi cuan cha noo ra Israel ñuu Éfeso. Nañi ra Apolos. Ta ñuu ra cuvi Alejandría. Ta cuví ra minoo ra vaha cahán tuhun Nyoo. Ta chitó xaan ra tuhun Nyoo tuhun chahnu cha nyaá nu libru.

²⁵ Ta vaha xaan cutuhva ra tuhun Sutu Mañi yo. Ta cahán ra chihin cha ni iñi ra. Ta vaha xaan nyicón ra chi Nyoo. Ta cachi xaan sañahá ra tuhun ra Jesús. Vasi cuhva cha sacondutya ra Juan ri chitó ra.

²⁶ Ta quichaha cahan ra chichi vehe ñuhu chihin cha ni iñi ra. Ta cuhva cha chiñi ra Aquila ta cu Priscila, tava sin ñu chi ra ta nacatyí cachi ca ñu tuhun ityi Nyoo chi ra.

²⁷ Tyicuan ta quichaha cuñi ra Apolos cahun ra ityi Acaya. Ta ra hermano catyinyee ra chi ra. Ta catyaa ra noo carta chi ñu yihí cuenda Nyoo ityi cuan, ta catyí ra chi ñu vatyí na vaha cahan ñu chihin ra tatu cha ra. Tyicuan ta cuahan ra.

Ta cuhva cha chaꝥ ra Acaya cuan tyinyee xaan ra chi ñu chinó iñi chi Nyoo cha cuenda tumañi iñi cha chahaꝥ ra chi ñu.

²⁸ Vatyí nu tuvi sañahaꝥ cachi xaan ra yoso caa cuhva ña vaha cha sacuví ñu Israel. Ta sañahaꝥ ra cha catyí nu tutu Nyoo vatyí ra Jesús cuví Cristo, ra cha nyatú xaan ñu chi.

19

Nu cuahan tucu ra Pablo ñuu Éfeso

¹ Cha ni ri ca cha ñohó ra Apolos ñuu Corinto, ra Pablo yahaꝥ ra ityi yucu ta chaꝥ ra nya ñuu Éfeso. Ta yucuan nañihí ra chi cuaha ri ra yihí cuenda Nyoo.

² Ta ndacaꝥ tuhun ra chi ra:

—¿Atu naquehen ndo Tatyí Ii quívi nachino iñi ndo? —catyí ra Pablo chi ra.

Ta canacahan ra cuan ta catyí ra:

—Ni chiiñ ña chitó ndi cha iyó Tatyí Ii.

³ Tyicuan ta ra Pablo ndacaꝥ tuhun ra chi ra:

—¿Ñáá chihin condutyá nyoho? —catyí ra.

Ta nacahan ra ta catyí ra:

—Chihin cuhva sacondutyá ra Juan yucuan cuhva condutyá ndi —catyí ra.

⁴ Tyicuan ta catyí ra Pablo chi ra:

—Ra Juan sacondutyá ra chi ñáyivi cha ndu uvi iñi cuatyí. Soco catyí tucu ra chi ñu vatyí cuñi chi cha chino iñi ñu chi ra cha cuaquichi ta ican ra cuan cuví ra Cristo Jesús —catyí ra Pablo chi ra.

⁵ Cuhva cha cachiñi ra cha catyí ra Pablo tuhun ihya, tyicuan ta nacondutyá ra inga chaha chihin sívi Sutu Mañi yo Jesús.

⁶ Ta cuhva cha tyisoꝥ ra Pablo ndaha ra síqui ra, quichí Tatyí Ii síqui ra. Ta quichaha cahan ra inga sahan. Ta sahaꝥ ra profetizar, o chahaꝥ cuenda ra tuhun chahaꝥ Tatyí Ii Nyoo chi ra cuví cuan.

⁷ Ta uchi uvi tahan ra cha tandihí ra.

⁸ Tyicuan ri chicaꝥ ra Pablo vehe ñuhu ñuu cuan chichi cha uñi yoo. Ta cahan ra tuhun Nyoo chihin cha ñi iñi ra. Ta ñihi cahán ra chihin ñu yoso caa nyacá ñaha Nyoo añima yo.

⁹ Soco yihí ñu sandavaꝥ ñu añima ñu. Ta ña cuñi ñu chino iñi ñu. Ta cahán ña vaha ñu síqui tuhun ra Cristo nuu ñáyivi, ta catyí ñu vatyí ña vaha ityi Sutu Mañi yo. Tyicuan ta ra Pablo canyahaꝥ ra nu nyicú ñu. Ta

chinyacaꝥ ra chi ñu chinó iñi chi ra Cristo noo sicuela ra cha nañi Tiranno. Ta yucuan cahán ra tuhun ra Cristo chihin ñáyivi ndiquívi ri.

¹⁰ Ta tyicuan caa chinyacuví ra chichi cha uvi cuiya. Ta tandihí ñáyivi ñicahnu ityi Asia cuan chiñi ñu tuhun Sutu Mañi yo Jesús, tari ñu Israel ta ñu cha ñima ñu Israel cuví ñándihí.

¹¹ Ta nahnu milagru sacuví Nyoo chihin ndaha ra Pablo.

¹² Vatyí nyacua nya pañitu ta sahma cha tñin ra Pablo, ta chinyacaꝥ ñu chi ñu cuhví ta nduvahaꝥ ñu. Ta ñu yihí tatyí ña vaha chi, quitaꝥ chí chi ñu.

¹³ Ta iyó suhva ra Israel cha cachicaꝥ noo tahan tahan ñuu. Catavaꝥ ra tatyí ña vaha chí ñáyivi. Ta cacuñi ra cotyiño ra sívi Sutu Mañi yo Jesús vatyí tavaꝥ ra chí tatyí ña vaha. Ta catyí ra chí tatyí ña vaha cuan:

—Chihin sívi ra Jesús cha cahán ra Pablo tuhun catyí chí ndo vatyí quita ndo —catyí ra.

¹⁴ Tyehe caa chinyacuví ndi ucha tahan sehe noo ra Israel cha nañi Esceva. Ta ra Esceva cuan cuví ra noo ra cuví nuu chí tata sutu.

¹⁵ Ta cha cacahan ra cuan chihin tatyí ña vaha cuan, nacahan tatyí ña vaha cuan chihin ra ta catyí chí tyehe caa:

—Ñohó nui chí ra Jesús. Ta chité yóo ra cuví ra Pablo. Soco nyoho zyóo ra cuví nyoho? —catyí tatyí ña vaha cuan chí ra.

¹⁶ Tyicuan ta ra cha yihí tatyí ña vaha cuan chii, ndavaꝥ ra síqui ra cuan. Ta chihin cha cuaha fuerza ra cuví chasaha ra chí tandihí ra. Ta chahnyaꝥ cuatyí ra sahma ra. Ta sanduvityaaꝥ ra chí ra. Ta sañicuehe ra chí ra. Yucuan ta chihin cha cayuhvi ra ta cachinoꝥ ra ta cuahan coyo ra.

¹⁷ Tyicuan ta tandihí ñu Éfeso, ñu Israel, ta ñu cha ñima ñu Israel cuví ñándihí, chito ñu tuhun cuan. Ta yuhví xaan ñu cuví. Ta sacahnú ñu sívi Sutu Mañi yo Jesús.

¹⁸ Ta cuaha xaan ñu chinó iñi ñu chí ra. Ta chaꝥ coyo ñu ta nahmaꝥ ñu cuatyí ñu, tandihí cha ña vaha cha chinyacuví ñu ta ityi chata ca.

¹⁹ Ta cuaha ñu cha sacuaahaꝥ tuhun tasi, quichí nyaca ñu libru ñu. Ta chahmí ñu libru cuan nuu tandihí ñáyivi. Ta natavaꝥ

ñu cuenda yoso yahvi libru cuan. Cha tandihí quita ta cha uvi xico uchi mil xuhun cuichin.

²⁰ Ta tyicuan ri ta cuahan chitya ca tuhun Sutu Mañi yo. Ta nducuaḥa ca ñu yihí cuenda ra. Ta tyicuan caa nyehé ñáyiví yoso cha cahnu tunyee iñi iyó chi ra.

²¹ Ta cha yaha tuhun ihya, ra Pablo natyaḥa ra cuhva cha cuhun ra ityi Macedonia, ta ityi Acaya. Yaha cuan ta cunuhu ra nya Jerusalén tyaá ra cuhva. Ta catyí ra vatyí yaha cuan ta cuñi chi cha cuhun ra nya ñuu Roma.

²² Tyicuan ta tachí ra chi uvi tahan ra tyinyeé chi ra nya Macedonia, ra Timoteo ta ra Erasto. Soco ndoo maa ra suhva ca quiví ityi Asia cuan.

Nu naquiquí ñáyiví Éfeso siqui tuhun Nyoo

²³ Ta suri quiví cuan naquiquí ñáyiví ñuu Éfeso siqui tuhun Nyoo,

²⁴ vatyí noo ra cha nañí Demetrio sanaquiquí. Vatyí maa ra tuhvá ra saha tyiño chihin xuhun cuichin. Savahá ra vehe ñuhu nyihi nyoo Diana chihin xuhun cuichin cuan. Ta cuaha sahá ganaa ra chihin ra casahá tyiño chihin ra.

²⁵ Ta cana ra Demetrio cuan chi ra cha sahá tyiño chihin ra. Ta cana tucu ra chi ra cha casahá tyiño in ri tyiño cuan. Ta catyí ra chi ra:

—Nyoho ra tahan yo, chitó ndo vatyí chihin tyiño ihya iyó cha tyayí yo.

²⁶ Soco nyoho nyehé ndo ta chiñí ndo yoso caa sacuví ra Pablo ñuu yo Éfeso ihya, ta nicahnu ityi Asia. Vatyí catyí ra tyi nyoo cha savahá ñáyiví ñima Nyoo cuví. Ta cuaha xaan ñáyiví nachino iñi sahá ra.

²⁷ Ta ña vaha cha sacuví ra vatyí ma quiyahvi ca xitohyo cha savahá yo. Ta sin ri ma sacahnu ca ñáyiví chi nyoo Diana ta ma saha ca ñu ñáyiví vehe ñuhu ña, ta ña vaha tyicuan caa, vatyí ñaha cuan cahnu xaan cuví ña. Ta tandihí ñáyiví ityi Asia chihin ñu nicahnu ñáyiví sacahnú ñu chi ña. Ta nu cuahan ca chí quiví ma sacahnu ca ñáyiví chi ña tatu chino iñi ñu cha cahán ra Pablo —catyí ra Demetrio.

²⁸ Ta cuhva cha cachiñi ra cha catyí ra, Xaan xaan cacuñi ra. Ta quichaha cacanaḥa chaa ra ta cacatyí ra:

—Cahnu xaan cuvi cu Diana, nyoo cuenda ñáyiví Éfeso ihya —catyí ra.

²⁹ Ta cutondo xiñi tandihí ñu ñuu cuan. Ta catiñ ñu chi ra Gayo, ta chi ra Aristarco, uvi ra Macedonia cha chicá noo chihin ra Pablo. Ta caxita quiñoho ra chi ra nyacua nya nu tuhva ñu candu in ri ñu.

³⁰ Ta ra Pablo cuñi ra quihvi ra nu nataca ñáyiví vatyí cahan ra chihin ñu. Soco ra hermano, ña chaha ra.

³¹ Ta tyicuan caa tucu suhva ra cuví tyiño ityi Asia, ra cuví amigo ra Pablo, tachí ra tyiño vatyí ña tahan chi tyihi ra chi ra yucuan.

³² Ta nu ndu in ri ñu yucuan, suhva ñu caná chaa noo tuhun. Ta inga ñu caná chaa ñu inga tuhun. Vatyí naquiquí ñu. Ta cuaha xaan ñu cha ni ña chitó ñu ñáá tuhun cha natacá ñu.

³³ Tyicuan ta ñu Israel, tyatyíño ñu chi noo ra cha nañí Alejandro na quita ra ityi nuu. Ta suhva ñu tayucú yucuan nacatyí ñu chi ra yoso caa cuahan ra. Tyicuan ta sacuví ra seña chihin ndaha ra vatyí na taxi ri cuví ñu vatyí cuñi ra catyí ra vatyí ñahri cuatyí ñu Israel.

³⁴ Soco cuhva cha chitó ñu vatyí ra Israel cuví ra, tandihí maa ñu canaḥa chaa ñu. Ta chichi cha uvi hora caná chaa ñu, ta catyí ñu:

—Cahnu xaan cuví cu Diana nyoo cuenda ñu Éfeso —catyí ñu, caná chaa ñu.

³⁵ Tyicuan ta secretario ñuu cuan cuhva cha cuví sacutaxin ra ñáyiví, ta catyí ra:

—Nyoho tata ñuu Éfeso ihya. Tandihí ñáyiví chitó ñu vatyí nyaá siqui yo ñu Éfeso cha saha cumi yo vehe ñuhu cu Diana tyi cahnu xaan cuví ña. Ta cumí yo xitohyo ña cha canaḥa cava ityi andiví.

³⁶ Ta yori cuvi catyí tyi ña ndicha. Taxi ri ndo, ta ma cunyacuvi ri maa ndo tatu ña chitó ndo ñáá cha cuacunyacuvi ndo.

³⁷ Vatyí ra cha quichí nyaca ndo ihya ñahri cha suhu ra vehe ñuhu ndo. Ta ni ña cahán ña vaha ra siqui nyoo cuenda ndo.

³⁸ Tatu ra Demetrio ta ra cha sahá tyiño chihin ra chicán ra cuatyí chaha noo ra,

na cuhun ra nu nyaá juez. Cuví cacán ra cuatyí nuu ra cuan, ta maa ra cusandaa ra cuatyí cuan.

³⁹ Ta tatu inga tuhun chicán ndo, cuñí chi sacuví ndo nu nyicu ra cuví tyiño, tari cuhva catyí ley.

⁴⁰ Vatyí tatu coto gobiernu ta cana ra chi yo cha cuenda cha cuví ihya, ta ma ñihi yo tuhun cahan yo tatu ndacá tuhun ra chi yo ñáá cuenda naquiquí yo —catyí ra cuví secretario cuan.

⁴¹ Ta cha yahá catyí ra tuhun cuan catyí ra vatyí na cunuhu ñu nya vehe ñu.

20

Nu yahá ra Pablo ityi Macedonia ta cuahan ra Grecia

¹ Cha yahá tuhun cha naquiquí ñáyivi ñuu Éfeso cuan, cana ra Pablo chi tandihi ñu yihí cuenda Nyoo, vatyí cahan ra suhva nuu ñu ta cuhva ca ra tunyee iñi chi ñu. Vatyí maa ra chaá chi quívi cha cuhun ra inga ityi. Ta cahan ra chihin ñu. Tyicuan ta cuahan ra Macedonia.

² Ta chahan ra tandihi ityi cuan ta sanduní ca ra iñi tandihi ñu yihí cuenda ra Cristo cha iyó ityi cuan chihin tuhun cahán ra. Tyicuan ta chaá ra ityi Grecia.

³ Ta yucuan ndoó ra uñi yoo. Ta cha nyaá ra cha cuaquehen ra barcu ta cuhun ra Siria, ta chito ra vatyí nducú ñáyivi Israel chi ra vatyí cahñi ñu chi ra. Yucuan chaha natyaá ra iñi ra cha cuhun ra chihin chaha ra ityi nu ñuhu ri. Ta nayahá ra inga chaha ityi Macedonia.

⁴ Ta cuahan ra Sópater, ra ñuu Berea chihin ra. Ta cuahan ra Aristarco ta ra Segundo, ta uvi tahan ra ihya, Tesalónica cuví ñuu ra. Ta cuahan ra Gayo, noo ra ñuu Derbe, ta ra Timoteo, ta uvi tahan ra ityi Asia, ra Tíquico ta ra Trófimo.

⁵ Ra hermano ihya cayahá ra ityi nuu ta canyatú ra chi ndi ñuu Troas.

⁶ Ta nyuhu nyatú ndi na yaha vico pas-cua nu tuhvá ñu Israel chachí ñu pan cha ñahri yuchan iya yihí. Tyicuan ta quita ndi ñuu Filipo chihin barcu. Ta nu cu ohon quívi ta natahan ndi chi ra cha cuahan ityi nuu nya ñuu Troas. Ta yucuan ndoó ndi ucha quívi.

Nu cahán ra Pablo tuhun Nyoo ñuu Troas

⁷ Ta cha timingu cuan ndu ín ri ndi chihin ñu yihí cuenda Nyoo ñuu Troas cuan. Ta quívi cuan cuacachi ndi pan ta coho ndi vinu vatyí nicohon iñi ndi tyi chihí ra Cristo cha cuenda cuatyí yo. Ta ra Pablo cahán ra nuu ñu ta cuvi ora ñuu, vatyí cha nyaá cha cuhun ndi inga quívi cuan.

⁸ Canyicú ndi noo cuarto nu cu uñi piso. Ta ndichin xaan nu canyicú ndi chichi vehe cuan vatyí cuaha xaan ñuhu candil cayú.

⁹ Ta noo ra tyivaa cha nañi Eutico nyaá ra ventana tyasohó ra, soco ña cunyeé ra ñumahna vatyí ra Pablo, cha vehe xaan cahan ra. Quixí ra Eutico, ta ña chito ra canacava ra nya nu ñuhu. Ta nacoñehé ra chi ra soco cha chihí ra.

¹⁰ Tyicuan ta ra Pablo noo ra ta chaá ra nu catuví ra tyivaa cuan. Ta natyihí nundaha ra chi ra tyivaa cuan, ta catyí ra chi ndi hermano:

—Ma yuhvi ndo. Nyitó ra —catyí ra.

¹¹ Tyicuan ta nandaá tucu ra Pablo ta chachí ndi pan ta chihí ndi vinu cha cuenda Sutu Mañi yo. Tyicuan ta cahan ca ra Pablo tuhun Nyoo nyacua nya cundichin. Tyicuan ta cuahan ra.

¹² Ta ra tyivaa cuan nandoto ra ta cuanuhu ra nya vehe ra. Ta si xaan nanduví cuñi ñu.

Nu quita ra Pablo ñuu Troas ta cuahan ra nya ñuu Mileto

¹³ Nyuhu yahá ndi ityi nuu ta cuahan ndi chihin barcu nya ñuu Asón. Vatyí yucuan cuñihi tahan ndi chihin ra Pablo, vatyí tyicuan caa sandaa maa ndi tyiño chihin ra. Vatyí maa ra cuñí ra cuhun ra ityi nu ñuhú ri chihin chaha ra.

¹⁴ Ta cuhva cha nañihí tahan ndi chihin ra nya ñuu Asón cuan, quívi ra chichi barcu chihin ndi ta cuahan ndi nya ñuu Mitilene.

¹⁵ Quita ndi yucuan ta yahá ndi ityi nuu noo ñuhú luhlu cha nañi Quío nyaá mahñu tyañuhu. Ta cha inga quívi cuan chaá ndi inga ñuhú luhlu cha nañi Samos. Yahá ndi yucuan ta nyitatu ndi ñuu Trogilio. Ta cha inga quívi chaá ndi nya ñuu Mileto.

16 Tyicuan caa cuvı vatyı ra Pablo ña cuñı ra cunyaa ca ra cuaha quıvı ityı Asia. Ña cuñı ra cuhun ra Éfeso vatyı numı ri cuñı ra chaa ra ñuu Jerusalén, vatyı tatu cuhva chi cuhva cunyaa ra quıvı vıco Pentecostés cha sanducahnú ñu Israel.

Nu cahán ra Pablo chihin ra ñuu Éfeso vatyı cuhun ra ta ma quıchı ca ra

17 Ta cuhva cha nyıcu ndı ñuu Mileto, cana ra Pablo chi ra yıhı ndaha chi ñu yıhı cuenda Nyoo Éfeso.

18 Ta cuhva cha chaa coyo ra, catyı ra tyehe caa chi ra:

—Maa ndo chıtó ndo yoso caa cuhva chıca noi nyata quıvı xihna ri cha chajı Asia ihya.

19 Tandıhı quıvı cha chınyajı chihin ndo ta sacuvı tyıño nuu Sutu Mañı yo chihin cha nduquı cuhva cha ma cahnu sahi chıı, vasi cuaha tındoho chihin cha cuaha tucuihya iñı. Ta cuaha tındoho quıchı sıquı sacuvı ñáyıvı Israel.

20 Soco ña sandıhı cha cahán noi tuhun Nyoo nuu ndo. Vatyı ihya cuvı tandıhı cha chıñuhú chi ndo tacuhva coo vaha ndo. Ta sañahı tuhun Nyoo chi ndo nu ndu ñn ri ndo ta nya vehe ndo ñandıhı.

21 Ta sañahı tuhun ihya chi ñu Israel ta chi ñu cha ñıma ñu Israel cuvı. Sañahı chi ñu na nasama ñu cuhva iyó ñu nuu Nyoo ta nachıno iñı ñu chi Sutu Mañı yo Jesucristo.

22 Ta vıtyın cuhin nya ñuu Jerusalén vatyı maa Tatyı İı catyı. Ta ña chıté ñáá cha cucuvı chıı yucuan.

23 Soco noo ri cha chıté vatyı tandıhı ri nu cuahın Tatyı İı catyı chıı vatyı nyatú vehe caa chıı, ta cuaha tındoho ñandıhı.

24 Soco ni noo ihya ta ña chıca xıñı. Ta ni ñayıvı ta ña vale cha cuenda mai, tacuhva vatyı chihin tusı iñı ta cuvı sañıhi sahatyıñe tyıño cha chaha Sutu Mañı yo Jesús chıı, cha sañahi tuhun vaha yoso cuhva cuñı Nyoo chi yo.

25 Ta vıtyın chıtó vahi vatyı tandıhı nyoho cha cahın tuhun Nyoo chihin ndo, ma nyehe ca maa ndo chıı.

26 Yucuan chaha cuñı catyı chi ndo vıtyın vatyı ñahri ca cuatyı yuhu cha cuenda ni noo nyoho.

27 Vatyı chihin cha ñıñı cuñı ta cahın tuhun Nyoo chihin ndo ta ñahri cha tıxehı.

28 Yucuan chaha saha ndo cuenda chi ndo. Ta saha tucu ndo cuenda chi tandıhı ñu yıhı cuenda Nyoo. Vatyı maa Tatyı İı tyatyıño chi ndo vatyı saha cuenda ndo chi ñáyıvı iyó vehe ñuhu Sutu Mañı yo. Maa ra sata ra chi ñu chihin ñıñı ra.

29 Vatyı chıté vatyı quıvı cuhin, cuquıchı inga ra. Ta cuñı ra satıvı ra chi ñu yıhı cuenda Sutu Mañı yo. Tari lobo xaan cha chahñı chi mbee, tyicuan caa cuquıchı ra cuan satıvı ra añıma ndo.

30 Ta surı nu nyıcu ndo, cundıcuıta suhva ra. Ta cusañaha ra cha ña ndıcha tacuhva cunyıcon ndo chi ra.

31 Yucuan chaha saha vaha ndo cuenda. Nıcohon iñı ndo vatyı chıchı cha uñı cuiya ña sandıhı cha cahın tuhun Nyoo nuu ndo. Cha ñıcahñu ta cha cuaa cahın chihin noo noo nyoho, ta chihin cha cuihya iñı coto sandıhı ndo tuhun Nyoo.

32 Ta vıtyın nyoho yañı, natyaı chi ndo ndaha Nyoo. Saha ndo cuenda ndı tuhun cahan ra chihin yo. Sacotó ra chi yo tyı cuñı xaan ra chi yo. Ta yucuan sandunyeé xaan chi iñı yo tacuhva cuvı yo ñáyıvı yıhı vaha cuenda ra chihin tandıhı inga ñu cha nacuhva cuenda ñu chi ñu chi ra.

33 Yuhu ña nyıyó iñı ni mınoo cha iyó chi ndo. Nı ri xuhun ndo, nı ri sahma ndo.

34 Nyoho chıtó vaha ndo vatyı sahá tyıño xain chihin ndahi tacuhva ñıhi cha chıñuhú chıı chihin ra chıca noo chihin.

35 Tyicuan ri sañahı chi ndo vatyı cuñı chi cha saha tyıño ndo ta tyınyee ndo chi ñu iyó cha chıñuhu chi. Ta nıcohon iñı ndo tuhun cahán Sutu Mañı yo Jesús nu catyı ra tyehe caa: “Sı ca cuñı noo ñáyıvı ñu chahá, ta ñıma ca ñu ita iñı”, catyı Sutu Mañı yo.

36 Cha yaha cha catyı ra Pablo tuhun ihya, chıcuıñı chıtı ra. Ta chıcan tahvı ra chihin tandıhı ñu.

37 Ta tandıhı ñu cuihya xaan nduvı iñı ñu ta chacu xaan ñu. Ta nanumi ñu chi ra.

38 Vatyı ra Pablo catyı ra tyı cuhun ra inga ñuu ta ma cuhun ca ra nu nyıcu ñu. Tyicuan ta chınyaca ñu chi ra nyacua nya nu quıhvı ra chıchı barcu.

Nu cuahan ra Pablo ñuu Jerusalén

¹ Tyicuan ta sandoꝝ ndi chi ra hermano ta quihvi ndi chichi barcu. Ta cuahan ndi ñn ndoo ityi ri nya Cos noo ñuhú luhlu mahñu tyañuhu. Ta cha inga quivi chaꝝ ndi nya Rodas inga ñuhú luhlu ri. Yucuan ta cuahan ndi nya Pátara.

² Ta ñuu Pátara cuan nañihí ndi nonga barcu cha cuahan nya Fenicia. Ta quihvi ndi chichi inga barcu cuan ta cuahan ndi.

³ Ta cha cuahan ndi nyehe ndi ñuhú Chipre chiyo satyin ndi. Ta yaha ri ndi cuahan ndi ityi nu ca, ityi Siria. Ta chaꝝ ndi nya ñuu Tiro vatyí yucuan cuatava ra carga cha nyisó barcu cuan.

⁴ Ta cha nañihí ndi chi ñu yihí cuenda Nyoo ñuu cuan, ndooꝝ ndi chihin ñu ucha quivi. Ta catyí ñu chi ra Pablo vatyí ña tahán chi cha cuhan ra Jerusalén vatyí tyicuan caa sañahaꝝ Tatyí Ii chi ñu.

⁵ Soco cha ndihí ucha quivi cuan quitaꝝ ndi ñuu cuan. Ta nu cuaquita ndi tandihí ra hermano chihin ñasihí ra ta sehe ra chinyacaꝝ ñu chi ndi nyacua nya ityi chata ñuu. Ta nu ñiti yuhu tyañuhu cuan nicuiñi chiti ndi, ta chicán tahvi ndi chi Nyoo.

⁶ Tyicuan ta nanumi ndi chi tahan ndi. Tyicuan ta quihvi ndi chichi barcu. Ta maa ñu cuanuhu coyo ñu vehe ñu.

⁷ Ta quitaꝝ ndi ñuu Tiro cuan ta cuahan ndi nya ñuu Tolemaida. Ta yucuan chahaꝝ ndi nocumi chi ñu hermano. Ta ndooꝝ ndi chihin ñu noo quivi.

⁸ Ta cha inga quivi quitaꝝ ndi ta cuahan ndi ñuu Cesarea. Ta yucuan chahan ndi vehe ra Felipe ra cha sacotó xaan chi ñáyivi yoso caa sacacu Nyoo añima ñu. Cuví ra noo ra chichi cha ucha tahan ra nyisó tyiño vehe ñuhu. Ta yucuan ndooꝝ ndi chihin ra.

⁹ Ra Felipe, iyó cumi tahan ñu tyivaa sehe ra cha ta tandaha ca. Ta tuhvá ñu chahá cuenda ñu tuhun cahan Nyoo. O cuvi chi cuan sahá ñu profetizar.

¹⁰ Ta cha cuaha ri quivi cha chaꝝ ndi yucuan, tyicuan ta chaꝝ noo profeta Nyoo cha nañí Agabo. Quichí ra ityi Judea.

¹¹ Quichí nyehe ra nu nyicu ndi. Ta quehen ra sincho ra Pablo, ta cháhñi ra chaha ra ta ndaha ra, ta catyí ra:

—Tatyí Ii Nyoo catyí chii vatyí tyehe caa cunuhñi chitoho sincho ihya nya Jerusalén. Ta cucuhva cuenda ñáyivi Israel chi ra chi ra inga ñuu —catyí ra Agabo.

¹² Cha chiñi ndi tuhun ihya, nyuhu ta ra ñuu Cesarea chacú ndahvi ndi nuu ra Pablo vatyí ma cuhan ra Jerusalén.

¹³ Soco ra Pablo catyí ra:

—¿Ñáá tuhun chacú ndo ta sanducuihyá ndo iñi? Yuhu ñahri cuende. Ñima cha cunuhñi ri, vasi cahñi ra chii soco cha cuenda Sutu Mañi yo Jesús —catyí ra chi ndi.

¹⁴ Ta cha nyehe ndi tyi ña cuvi chasaha ndi chi ra, saña ndi. Ta catyí ndi:

—Na cuvi maa cuhva cuñi maa Sutu Mañi yo.

¹⁵ Cha yaha tuhun ihya sanduvahaꝝ ndi chi ndi ta cuahan ndi nya Jerusalén.

¹⁶ Ta cuahan suhva ra Cesarea ra yihí cuenda ra Cristo chihin ndi. Ta cuahan tucu noo ra ñuhú Chipre. Mnasón nañi ra. Cuaha xaan cuiya chinó iñi ra chi ra Cristo. Maa ra chinyacaꝝ ra chi ndi nya vehe ra cha nyaá Jerusalén vatyí yucuan cunyaa ndi.

Nu cuanyehe ra Pablo nu nyaá ra Jacobo

¹⁷ Cuhva cha chaꝝ ndi Jerusalén, ñu yihí cuenda ra Cristo chihin cha siñ cuñi ñu cahan ñu chihin ndi.

¹⁸ Ta inga quivi cuan cuahan ndi chihin ra Pablo cuanyehe ndi nu nyaá ra Jacobo. Ta yucuan nyicú tucu tandihí ra yihí ndaha vehe ñuhu.

¹⁹ Chahaꝝ ra Pablo nocumi chi ra. Yaha cuan ta nacatyí ra tahan tahan ri tuhun yoso caa chotyíño Nyoo chi ra nu cahan ra tuhun Nyoo chihin ñu cha ñima ñu Israel cuvi.

²⁰ Cuhva cha cachiñi ñu tuhun ihya, casacahnu ñu chi Nyoo, ta catyí ñu chi ra Pablo:

—Vaha yañi yo, soco cha nyehun vatyí cuaha xaan mil ñu Israel chinó iñi ñu chi ra Cristo. Ta tandihí ñu catyí ñu vatyí niñi cha cunyicon yo ley ra Moisés.

²¹ Ta ñihí ñu tuhun vatyí yoho sañahún chi tandihí ñu Israel cha iyó inga ñuu vatyí ma quichaha ca ñu ley cha sañahaꝝ ra Moisés, ta catyún chi ñu vatyí ña tahán chi sacuví ñu costumbre circuncisión chihin

cha lee sehe ñu, ta ni ma sacuvi ca ñu costumbre chahnu yo.

²² ¿Yoso caa sacuvi yo vityin? Vatyí ñáyivi cuañihi ñu tuhun tyi chaun ihya.

²³ Vaha taxin ca cha sacuvun tyehe caa. Ihya iyó cumi tahan rayi cha nyaá sacuvi ra noo cha tyaa ra cuhva tyi sacuvi ra nuu Nyoo.

²⁴ Cuahan chihin ra na ndundiun nuu Nyoo chihin ra. Ta yoho tyiyahvun cha tahan chi tyiyahvi ra. Tyicuan ta maa ra cuvi satya ndi xiñi ra cuhva catyí ley. Ta cha sacuvun tyicuan caa ta coto tandihi ñáyivi vatyí ña ndicha cha cahán ñu sicun, soco cunyehe ñu vatyí quichahá tucu yoho ley ra Moisés.

²⁵ Ta cha cuenda ñu cha ñima ñu Israel cuví, ta nachinó iñi ñu tuhun Nyoo, cha sacuhun ndi tutu chi ñu, ta catyí ndi chi ñu vatyí ña tahan chi caca xiñi ñu tuhun ihya. Soco noo cha ma cachi ñu coño cha chahá ñáyivi chi xitohyo. Ni ma cachi ñu niñi ni coño quití cha cava ñu sucun ta ña chati niñi. Ta ni noo ñu ta ma coo ñusihi o rayi chi ñu tatu ñima ñasihi o yi ñu cuví —catyí ra chahnu vehe ñuhu chi ra Pablo.

Nu nacandá ñu Israel siqui ra Pablo

²⁶ Tyicuan ta tuví inga quívi ta cuahan ra Pablo chihin ndi cumi tahan ra cuan. Ta sandundi ra chi ra nuu Nyoo in ri chihin ra cuan. Tyicuan ta quihvi ra chichi vehe ñuhu cahnu vatyí sacoto ra chi tata sutu ama cundihí cha ucha quívi cha ndundi ndi cumi tahan ra cuan, ta cuacuhva ra ofrenda cha cuenda noo noo ra.

²⁷ Soco cha cuñí cuii ri ndihí ucha quívi cuan, ta suhva ra Israel cha quichí nya Asia canyehe ra chi ra Pablo chichi vehe ñuhu. Ta casanaquiquí ra chi tandihí ñáyivi, ta catiin ra chi ra Pablo.

²⁸ Ta cacanachaá ra ta cacatyí ra:

—Nyoho ñáyivi Israel, tyinyee ndo chi ndi. Ican ra ihya cuví ra cha chicá noo tandihí ri ityi. Ta sañahá ra chi tandihí ñáyivi. Catyí ra vatyí cha ñima ri tuhun cuví yo ñu Israel. Ta catyí ra tyi ña vaha ley cha tyaa ra Moisés, ta ña vaha vehe ñuhu ihya. Ta sin ri vityin tyihí ra chi suhva ra Grecia chichi vehe ñuhu sativí ra nu ii ihya —catyí ra canachaá ra.

²⁹ Tyehe caa cacatyí ra vatyí ta ityi chata ca canyehe ra chi ra Pablo chichi ñuu, chicá noo ra chihin ra Trófimo, noo ra ñuu Éfeso. Ta cacuñí maa ra vatyí ra Pablo chinyaca chi ra chichi vehe ñuhu.

³⁰ Ta tandihí ri ñáyivi ñuu naquiquí ñu. Ta ñáyivi chinó vavaha ñu vachí coyo ñu. Tyicuan ta catiin ñu chi ra Pablo. Ta caxita quiñoho ñu chi ra nya ityi chata vehe ñuhu, ta numi ri nacasi ñu yuvehe.

³¹ Cha cuñí ñu cahñi ñu chi ra, ta cha tyiño chi comandante cuenda sindaro vatyí tandihí ñu Jerusalén iyó xaan naquiquí.

³² Tyicuan ta comandante cuan sandu in ri ra capitán ta sindaro. Ta cachino ra cuahan coyo ra nu nyicú ñáyivi. Cuhva cha nanyehe ñu chi comandante chihin sindaro, sandihí ñu cha cañí ñu chi ra Pablo.

³³ Tyicuan ta tuhva comandante nu nyaá ra Pablo. Ta tachí ra tyiño natiin sindaro chi ra, ta chahñi ra chi ra chihin uvi tahan cadena. Yaha cuan ta ndaca tuhun ra chi ra yóo ra cuví ra, ta ñáá cha sacuvi ra.

³⁴ Soco ñáyivi sin sin tuhun canachaá ñu. Ta comandante cuan ña cutuñí maa iñi ra cha cuenda cha quiñi cuvaa ñu. Ta tachí ra cha cunyaca sindaro chi ra Pablo nya cuartel.

³⁵ Cuhva cha cachaá ra nu cuayí yuvehe cuartel cuan, quiñi xaan nanduví ñáyivi ta ña chahá ca ñu caca ra Pablo. Yucuan chaha catyaa soco sindaro cuan chi ra.

³⁶ Vatyí tandihí ñu nyicón ñu chi ra, ta canachaá ñu ta catyí ñu:

—¡Cahñi ndo chi ra! —cacatyí ñu.

Nu sacacú ra Pablo chi ra nuu ñáyivi

³⁷ Cuhva cha cuatyihí ra chi ra Pablo chichi cuartel, ta quichaha catyí ra chi comandante:

—¿Atu cuhvon cha catyí noo tuhun chuun? —catyí ra chi ra.

Ta comandante cuan catyí ra:

—¿Atu cuví cahún griego?

³⁸ Tu tyicuan caa, ñima yoho cuví ra ñuu Egipto cha quichí quívi cuan ta sacañi tahan ra chi ñáyivi siqui gobiernu ta chinyaca ra chi cumi mil tahan ñáyivi ityi ñuhu ityi —catyí comandante cuan chi ra Pablo.

³⁹ Tyicuan ta ra Pablo catyí ra chi ra:

—Yuhu noo ra Israel cuví ta caqui noo ñuu cha nañi Tarso cha cuví minoo ñuu cahnu ityi Cilicia. Soco saha noo tumañi ñi chii vatyí cuhvon nacahin chiin chihin ñáyivi —catyí ra Pablo chi comandante cuan.

⁴⁰ Tyicuan ta chaha comandante cuan permiso chi ra. Tyicuan ta nicuinanyaa ra nu cuayi ta chaha ra noo seña chi ñu na cutaxin ñu. Ta cahán ra chihin sahan hebreo, ta catyí ra:

22

¹ —Nyoho tata, ta nyoho yañi, cuiñi ndo cha catyí chi ndo tyi coto ndo vatyí yuhu ñahri cuatyí —catyí ra Pablo chi ñáyivi cuan.

² Cha cachiñi ñu vatyí cahán ra chihin ñu chihin sahan hebreo, taxi ri cacuvi ñu. Ta ra Pablo catyí ra:

³ —Yuhu ra Israel cuví tari maa ndo. Ta caqui ñuu Tarso ityi Cilicia. Soco Jerusalén iha chahni. Ta ra Gamaliel sañaha chii tandihí maa cuhva yoso caa quichahi ley sutu chahnu yo. Ta tyicuan ri nduquí cuhva sacuví tyiño nuu Nyoo chihin cha tandihí añime, tari maa cuhva nyacuví nyoho quivi vityin.

⁴ Yuhu, nu quichi chi chica nyiquen ta satai ñi chi ñu yihí cuenda ra Cristo. Ta nacuhva cuende chi ñu na cacahni ra chi ñu. Ta tyihí chi ñu chichi vehe caa, rayi ta ñusihi.

⁵ Ra cuví nuu chi tata sutu chihin ra cacuví mandoñi, cacuví ra cha ndaa vatyí ican ra chaha tutu vatyí cuvi tiin chi yañi yo, ra yihí cuenda ra Cristo ñuu Damasco. Chahin nyicuan chinanduqui chi ñu chinó ñi chi ra Cristo, vatyí tacuhva cunuhni ñu chihin cadena, ta quichi nyaque chi ñu nya Jerusalén iha vatyí cutachi tuñi ra chahnu chi ñu.

*Nu nacatyí ra Pablo yoso caa nanduvi ra cuenda ra Cristo
(Hch. 9.1-19; 26.12-18)*

⁶ Soco cuhva cha cuahin ityi cha cuachaa ndi Damasco, ñáa cuhva ora cuví cuan. Ta sana ñi ta ndundichin nicachico nu cuahin chihin noo nduva ñuhu cha quichi ityi andivi.

⁷ Tyicuan ta nduve nu ñuhú. Yaha cuan ta chiñi noo ndusu cha catyí chii: “Saulo,

Saulo, ¿ñáa tuhun cha chicá nyicon chii tyehe caa?” catyí ndusu cuan chii.

⁸ Tyicuan ta ndacá tuhun chi ra ta catyí: “¿Yóo yoho tata?” Ta catyí ra chii: “Yuhu cuví ra Jesús, ra ñuu Nazaret, ra chicá nyicon chi”, catyí ra.

⁹ Ndi ra cha cuahan coyo chihin canyehe ra ñuhu cuan, ta nayuhvi ra. Soco ña cachiñi ra ndusu ra cha cahán chihin.

¹⁰ Tyicuan ta quichahá catyí yuhu chi ra: “Sutu Mañi yuhu, ¿ñáa cha tahán chi sacuvi?” Ta catyí ra chii: “Ndicuita ta cuahan nya Damasco. Ta yucuan cucatyí noo ra chuun tandihí cha tahán chi sacuvun”, catyí Sutu Mañi yo chii.

¹¹ Ta vatyí nducuai saha ñuhu cuan, ra tahin cayindahá ndahi ta cachinyaca ra chii nya Damasco.

¹² Ta yucuan iyó noo ra cha nañi Ananías. Ta sacahnú xaan ra chi Nyoo cuhva catyí ley cha tyaa ra Moisés. Ta tandihí ñu Israel cha iyó Damasco catyí ñu vatyí vaha xaan ñáyivi cuví ra Ananías.

¹³ Quichi nyehe ra cuan chii. Ta cuhva cha cha ra, catyí ra chii: “Yañi Saulo, nanyehe inga chaha”, catyí ra chii. Ta caa cuhva ri cuan nanyehi. Ta cuví nyehi chi ra Ananías cuan.

¹⁴ Ta catyí ra chii: “Nyoo cuenda sutu yo nacachi ra chuun nyata ityi chata ca, vatyí coton cuhva cuñi ra, ta nyehun chi ra Jesucristo vatyí vaha ra, ta cuiñun ndusu ra.

¹⁵ Vatyí yoho cuacahun tuhun ra nuu tandihí ñáyivi. Cuanacatyun cha nyehun ta cha chiñun.

¹⁶ Ta vityin, ma cuatu con. Ndicuita ta condutyon. Ta caçan tahvun chi Sutu Mañi yo tyi cuasandachi ra cuatyun”, catyí ra Ananías chii.

Nu nacatyí ra Pablo yoso caa chaha Nyoo tyiño chi ra vatyí cuhun ra inga ñuu cucahan ra tuhun ra Cristo

¹⁷ Yaha cuan ta cuanuhin Jerusalén ta cuhva cha nachai, chahin vehe ñuhu cahnu chicacån tahvi. Ta nyehi noo visión.

¹⁸ Nyehi chi Sutu Mañi yo. Ta catyí ra chii: “Sanumi. Quita cha numi ri Jerusalén vatyí ma chino ñi ñu tuhun cha cucahun”, catyí ra chii.

¹⁹ Tyicuan ta quichaha catyí yuhu chi ra: “Sutu Mañi yuhu, maa ñu chitó ñu vatyí yuhu चाहिं tandihi vehe ñuhu. Ta तिं chi ñu chinó iñi chuun, ta tyihí chi ñu vehe caa ta cañi chi ñu.

²⁰ Ta quivi chati niñi ra Esteban ra cha cahan cuendon, yuhu ñandihí nyaí yucuan. Ta ndoi vaha cha चाहिं ñu chi ra. Ta sahadumi sahma ra cha cachahñi chi ra”, catyí yuhu chi Sutu Mañi yo.

²¹ Tyicuan ta catyí ra chii: “Cuahan, vatyí tachí chuun nu cañi, nu nyicu ñu cha ñima ñu Israel cuví”, catyí Sutu Mañi yo chii.

Nu nyaá ra Pablo ndaha ra comandante cuenda ñuu Roma

²² Ihya ri tyasohó ñu tuhun cahan ra Pablo. Tyicuan ta quichahá canacháá ñu ta catyí ñu:

—¡Cahñi ndo chi ra chiña! Ña tahán chi coo ra ñayivi —catyí ñu.

²³ Ta canacháá ca ñu. Ta sacaá ñu sahma ñu. Ta sacaá ñu ñiyaca nu tatyí cha cuenda cha xaan xaan cuñi ñu.

²⁴ Yucuan chaha comandante cuan catyí ra na cutyihí sindaro chi ra chichi cuartel. Ta tachí ra tyiño na cañi ra chi ra, vatyí cuñi ra cha quita cha ndaa ñáá tuhun cha canacháá ñayivi siqui ra cha tyicuan caa.

²⁵ Soco cha yaha cachahñi ra chi ra ta cuacañi ra chi ra, tyicuan ta ra Pablo nacatyí ra chi capitán cha nanyaá yucuan:

—¿Atu iyó ityi chi nyoho cha cañi ndo chii? Vatyí yuhu ra cuenda ñuu Roma cuví ta sin ri ta cutuñi ca chii nu juez —catyí ra Pablo chi ra.

²⁶ Cuhva cha chiñi capitán cha cahan ra Pablo, cahan ra chisacotó ra chi comandante. Ta catyí ra chi ra:

—Saha cuenda chuun chihin cha nyacuvún. Vatyí ra cuan, ra cuenda ñuu Roma cuví ra —catyí ra chi ra.

²⁷ Tyicuan ta comandante cuan cuahan ra nu nyaá ra Pablo. Ta ndacá tuhun ra chi ra tatu ndicha vatyí ra cuenda ñuu Roma cuví ra. Ta ra Pablo catyí ra vatyí ican.

²⁸ Tyicuan ta catyí comandante cuan chi ra:

—Yuhu cuaha xaan xuhun tyiyahvi ta nanduvi noo ra cuenda Roma.

Ta ra Pablo catyí ra:

—Soco yuhu ra cuenda Roma cuví nyata caqui —catyí ra.

²⁹ Ta tyicuan caa ta sindaro cha cuacañi chi ra canyaha ra ta cuahan coyo ra. Ta nyacua nya comandante ta nayuhvi ra cha cuenda cha chahñi ra chi ra chihin cadena. [Vatyí cuatyí cuví cha sacuví ra cha tyicuan caa chihin noo ra cuenda ñuu Roma.]

Nu nanyaá ra Pablo nu candu in ri ra Israel

³⁰ Tuvi inga quivi ta comandante cuan cuñi ra coto ra ñáá cuatyí tyaá ñu Israel chaha ra Pablo. Ta ndachí ra cadena cha nuñi ra. Ta tachí ra tyiño na ndu in ri ra cuví nuu chi tata sutu, ta tandihí ra cuenda junta. Tyicuan ta tava ra chi ra Pablo vehe caa ta chinyaca ra chi ra nu iyó junta cuan.

23

¹ Ta ra Pablo nyehe ra chi tandihí ra chihin cha ña cahan nuu ra, ta catyí ra chi ra:

—Nyoho ra yañi yo, nyacua nya quivi ihya iyó vahi nuu Nyoo ta ñahri cha ña vaha sacuví nuu ra —catyí ra Pablo.

² Tyicuan ta ra Ananías ra cuví nuu chi tata sutu tachí ra chi ra nyicú yatyin ri nu nyaá ra Pablo, na nacañi ra ndaha yuhu ra.

³ Soco ra Pablo nacahan ra nu cahan ra ta catyí ra:

—¡Xihna ca chi maun cucañi Nyoo, vatyí sahá xaun tyi ra vaha cuvún nyaún chiña! ¿atu cutuñi chii nuun tari cuhva catyí ley? ¿Ñáá tuhun cha tachun nacañi ra chii? ta ñima tyicuan caa catyí ley —catyí ra Pablo.

⁴ Tyicuan ta ra canyicu yucuan catyí ra chi ra:

—Ña vaha cha cahun chi ra cuví nuu chi tata sutu cuenda Nyoo —catyí ra chi ra Pablo.

⁵ Tyicuan ta ra Pablo catyí ra:

—Yañi yuhu, ña chite tatu ra cuví nuu chi tata sutu cuví ra. Vatyí catyí tuhun Nyoo tyi ma cahan ña vaha yo siqui ra cuví tyiño ñuu yo —catyí ra.

⁶ Tyicuan ta tuvi iñi ra Pablo vatyí suhva ra cuenda junta cuan, yihí ra cuenda ityi ra cuví saduceo. Ta inga ra yihí ra cuenda ra cuví fariseo. Tyicuan ta cahan ra chihin cha ñihi ndusu ra ta catyí ra:

—Nyoho yañi, yuhu ra fariseo cuví tari suti. Ta cutuñi chi nuu ndo vatyí chinó iñi tyi nandotó ñu chihi —catyí ra Pablo.

⁷ Cuhva cha catyí ra tuhun ihya, ra fariseo ta ra saduceo, quichaha candatuhun tahan ra suri chihin tahan maa ra, ta cacusiñ ra.

⁸ Vatyí ra saduceo catyí ra vatyí ña nandotó ndiyi. Ta ni yori ángel ta ni yori tatyí ña vaha iyó catyí ra. Soco ra fariseo chinó iñi ra tandihi ihya.

⁹ Tandihi ra vaa ri ca cananduví ra. Ta ndicuita ra fariseo, ra sacuahá cuenda ley ra Moisés, ta catyí ra:

—Nyehe xihna ndo, ñahri cha ña vaha sacuví ra ihya. Soco tatu noo ángel cahan chihin ra, saha yo cuenda coto vaha siqui Nyoo cahan ña vaha yo —catyí ra.

¹⁰ Cha chiñi ra tuhun ihya, vaa ri ca cananduví ra. Nyacua nayuhví comandante cuan coto cahnya cuatyí ra chi ra Pablo. Yucuan chaha tachi ra tyiño na tava sindaro chi ra Pablo nu nyicú ra, ta cunanyaca ra chi ra nya cuartel.

¹¹ Ta cha cuaa cuan tuví Sutu Mañi yo nuu ra Pablo ta catyí ra chi ra:

—Sandunñi iñun, Pablo. Vatyí tari cahun tuhun Jerusalén ihya, tyicuan caa tucu cahan tucun nya ñuu Roma —catyí Sutu Mañi yo chi ra Pablo.

Nu tyaá ra Israel kuhva cahñi ra chi ra Pablo

¹² Cha inga quivi, suhva ra Israel catyihí tahan ra tuhun. Catyí ra vatyí ni ma cachi ra, ni ma coho ra nyacua nya cahñi ra chi ra Pablo. Ta nya noo ra ma sacuvi tyicuan caa na sanaa Nyoo chi ra siqui ñuhu ñáyivi, cacatyí ra.

¹³ Yaha ca uvi xico ra catyihí tahan tuhun ihya nuu Nyoo.

¹⁴ Chahan coyo ra nu nyicu ra cuví nuu chi tata sutu ta ra cacuví mandoñi cuenda ñu Israel. Ta catyí ra chi ra:

—Nyuhu ñin ri tuhun cahan ndi nuu Nyoo vatyí ma cachi ndi ta ni ma coho ndi cha ni ri ca cha ma cahñi ndi chi ra Pablo. Ta na sanaa Nyoo chi ndi tatu ma sacuvi ndi tari kuhva catyí ndi.

¹⁵ Ta vityin nyoho sacuhun ndo tuhun chi comandante. Catyí ndo chi ra na quichi nyaca ra chi ra Pablo nuu ndo ityaan.

Saha ndo tuhun vatyí cuasandaa vaha ndo tyiño, ta nyuhu cuatu tuhva ri ndi nu yahá ra ta cucahñi ndi chi ra —catyí ra chi ra.

¹⁶ Soco sehe kuhva ra Pablo chiñi cue cha cahan ra. Ta chahan cue chisacotó cue chi ra Pablo nya cuartel.

¹⁷ Tyicuan ta ra Pablo cana ra chi minoo capitán. Ta catyí ra chi ra:

—Cuanyaca chi ra cuehe luhlu ihya nuu comandante vatyí iyó noo tuhun cuñi cue sacoto cue chi ra —catyí ra Pablo chi ra.

¹⁸ Tyicuan ta chinyaca capitán cuan chi cue nuu comandante. Ta catyí ra chi ra:

—Ra Pablo cha ñohó vehe caa cana ra chii ta catyí ra chii vatyí quichi nyaque chi ra cuehe luhlu ihya vatyí cuñi cue cahan cue chuhun —catyí ra chi ra.

¹⁹ Tyicuan ta tiñ comandante ndaha ra cuehe luhlu cuan ta tava siñ ra chi cue ta catyí ra chi cue:

—¿Ñáá túhun cuñún catyun chii?

²⁰ Ta ra cuehe luhlu cuan catyí cue chi ra:

—Ra Israel catyihí tahan vaha ra tuhun vatyí catyí ra chuun na sacuhun chi ra Pablo nu iyó junta tyaan. Vatyí casaha ri maa ra cha cuñi ra cha cutuñi vaha ca chi ra.

²¹ Soco ma chino iñun chi ra vatyí yaha ca uvi xico tahan ra nyatú xehe chi ra ityi. Ta tyanaha ra chihin nuu Nyoo vatyí ma cachi ra ta ma coho ra nyacua nya cahñi ra chi ra Pablo. Ta tatu ña cuví cahñi ra chi ra, vaha taxín ca nacuvi noo noo maa ra na. Ta vityin nyatú tuhva ra coto ra ñáá cucatyí maun —catyí cue.

²² Tyicuan ta catyí comandante chi ra cuehe luhlu cuan vatyí yori chihin cahan cue tuhun cha catyí cue chi ra. Yaha cuan ta natachi ra chi cue.

Nu cacu ra Pablo ndaha ra Israel ta cuahan ra nuu ra gobernador cha nañi Félix

²³ Tyicuan ta comandante cana ra chi uvi capitán, ta catyí ra chi ra:

—Sanduvaha ndo chi ndo vatyí cahun ndo Cesarea kuhva caa ñin cha cha cuaa. Cuacuhun uvi ciento sindaro chihin chaha ra, ta uñi xico uchi ra chihin caballo, ta uvi ciento ra cuiso ra lanza.

²⁴ Sanduvaha ndo caballo coso ra Pablo. Ta saha cuenda vaha ndo chi ra ityi cuahan

ndo na chaa vaha ra nu nyaa ra Félix gobernador —catyí comandante chi capitán cuan.

²⁵ Tyicuan ta tyaá ra noo tutu quindaha ra cuhun ra. Ta tuhun cha tyaá ra nu carta, ican cuví ihya:

²⁶ “Yuhu ra Claudio Lisias sacuhin noo carta ihya chi yoho, tata gobernador Félix, vatyí vaha ñáyivi cuvun. Ihya vachi nocumi chuun.

²⁷ ‘Ra Pablo ihya, catiin ra Israel chi ra. Ta cacuñí ra cacahñi ra chi ra. Soco cuhva cha chite vatyí ra cuenda ñuu Roma cuví ra, chahin chihin sindaro ta sacaquí chi ra.

²⁸ Ta vatyí cuñí cote ñáá cuatyí tyaá ñu síqui ra, chinyaque chi ra nu iyó junta ra cacuví mandoñi ñu Israel.

²⁹ Soco cuenda ley ri maa ñu cuví. Ta cha cuenda ley yoó, ñahri cuatyí ra ta cahñi yo chi ra. Ta ni ri ña tahán chi cohon ra vehe caa.

³⁰ Soco vatyí ñihí tuhun vatyí ra Israel canducu cahñi ra chi ra, yucuan chaha tachí chi ra nuu yoho. Ta catyí tiquí chi ra cha tyaá cuatyí síqui ra, na cuhun ra nu nyaun na cacan ra cuatyí ra nuu maun”, catyí ra Claudio chi ra Félix nu tutu cha tyaá ra.

³¹ Tyicuan ta quehen sindaro chi ra Pablo tari cuhva catyí ra Claudio chi ra, ta chinyaca ra chi ra nya Antípatris suri maa cha cuaa cuan.

³² Cha inga quivi sindaro cha cuahan chihin chaha, canandichí coyo ra nya cuartel. Ta ra cha cayosó caballo cuahan coyo ca ra chihin ra Pablo.

³³ Ta cuhva cha chaá coyo ra ñuu Cesarea, cachaha ra carta cuan chi ra Félix, gobernador, ta cachaha cuenda ra chi ra Pablo chi ra ñandihí.

³⁴ Cha yaha cha sacuahá ra Félix carta cuan, quichaha ndacá tuhun ra chi ra Pablo nya ñuu ra. Ta cha chito ra vatyí ra Cilicia cuví ra

³⁵ ta catyí ra chi ra:

—Na quichi xihna ra tyaá cuatyí chahun. Tyicuan ta cusandai tyiñon —catyí ra chi ra.

Tyicuan ta tachí ra tyiño na casaha cumi sindaro chi ra nya vehe tyiño cha savaha ra Herodes ta cha naha.

24

Nu cutuñí chi ra Pablo nuu ra Félix

¹ Yahá ohon quivi ta ra Ananías, ra cuví nuu chi tata sutu, chaa ra ñuu Cesarea cuan chihin suhva ra cacuví mandoñi, ta chihin noo ra cahan chaha ñáyivi cha nañí Tértulo. Chaá coyo ra nuu ra gobernador Félix vatyí cacan ra cuatyí chaha ra Pablo.

² Tyicuan ta tachí ra Félix na quichi nyaca sindaro chi ra Pablo. Tyicuan ta quichaha chican ra Tértulo cuatyí chaha ra Pablo. Ta catyí ra chi ra Félix:

—Tyahvi nyoo chuun, tata gobernador. Vatyí taxi ri iyó ñuu ndi, ta vaha iyó ndi vatyí yindaha vahun ñuu ndi.

³ Nacuhvá xaan ndi tyahvi nyoo chi yoho tata Félix, vatyí yoho, vaha ñáyivi cuvun.

⁴ Soco ña cuñí sayangué chuun chihin cha cuaha tuhun cahin, yucuan chaha chiquén noo tumañi ñi chuun na cuiñun suhva tuhun cuacahan ndi.

⁵ Vatyí chitó ndi tyí rayi ihya ñima ra vaha cuví ra, noo cuehe cuví ra. Ta tandihí ri ityi sanaquiquí ra chi ñu Israel. Ta ican ra cuví xiñi noo ityi ñáyivi nyicón chi ra Jesús ra ñuu Nazaret.

⁶ Nyacua cuñí ra sacuvi ra noo cha ña tahán chi vatyí ña sahá ra ñáyivi vehe ñuhu cahnu. Ta nyuhu tin ndi chi ra, tacuhva tachí tuñi ndi chi ra tari cuhva ley maa ndi.

⁷ Soco comandante Licias chasi ri ra ta chihin cuaha fuerza ta tinyaa ra chi ra chi ndi.

⁸ Ta catyí ra vatyí tatu cuñi ndi cacan ndi cuatyí chaha ra, cuñi chi cha cacan ndi nuu maun. Nyehé maun. Sanahmon chi ra ta cotton tyí ndicha cha catyí ndi —catyí ra Tértulo.

⁹ Tyicuan caa tucu ra Israel cha canyicu yucuan, catyí ra vatyí ndicha tandihí tuhun cahan ra Tértulo.

¹⁰ Tyicuan ta ra Félix savaha ra seña chi ra Pablo vatyí nacahan ra. Ta ra Pablo quichaha catyí ra:

—Chité tyi cha cuaha xaan cuiya nyacá ñahun ñuu ihya. Ta yucuan chaha sii vavaha cuñi vatyí nuu maun cuacutuñi chi yuhu vityin.

¹¹ Tatu ndaca tuhun cuacotton tyi cha iyó ri noo uchi uvi quivi cha chahin Jerusalén. Chahin yucuan vatyí sacahni chi Nyoo.

12 Ta yori chihin cuvī yuhi. Ni ña sanaquiqui chi ñáyivi chichi vehe ñuhu cahnu. Ñahri maa sacuvī, ni ri chichi vehe ñuhu, ni ri chichi ñuu.

13 Ta cuatyī cha tyaá ra ihya siqui, ña ndicha maa.

14 Soco noo cha catyī chi ndo vityin vatyī yuhu sacahní chi Nyoo cha sacahnū sutu chahni. Sacahní chi ra kuhva sañahá ra Jesucristo. Ta catyī maa ra ihya tyi ña vaha. Soco yuhu chinó iñi ndi maa tuhun cha nyaá nu libru ley cha tyaá ra Moisés. Ta chinó iñi tandihī tuhun catyaa ra profeta cuenda Nyoo ñandihī.

15 Ta suri chinó iñi vatyī Nyoo cusanan-doto ra ñáyivi chihī, ñu vaha ta ñu quiñi iyó, tari chinó iñi tucu maa ra ihya.

16 Ta yucuan chaha tyicuan ri nduquí kuhva cha cachi cói nuu Nyoo, ta nuu ñáyivi ñandihī.

17 'Cuaha cuiya chica noi inga ityi. Yaha cuan ta cuanuhī nya Jerusalén ñui vatyī nacuhva cuende xuhun chi ñu ndahvi ñu yihī cuenda Nyoo, ta vatyī kuhve noo cha kuhve chi Nyoo.

18 Yuhu tyicuan caa sacuví chichi vehe ñuhu cahnu, ta kuhva ra Israel ityi Asia, nyehe ra chii yucuan cha yaha cha sandundihī chii nuu Nyoo kuhva catyī maa nu ley ndi. Soco ña cuaha ñáyivi nyicu, ta ni ña naquiqui ñu.

19 Ican ra cha nyehe chii cuan, cuñí chi cha quichi ra ta kuhva ra cuenda tatu iyó cha sacuvī.

20 O nacatyī maa ra cha canyicu ihya tatu nañihī ra cuatyī yuhu quivi cutuñi chii nuu ra nu chiyo junta ra cacuví nuu chi ñu Israel.

21 O vasi cuví chi cha cuenda noo ri tuhun cahin chihin nuu ra nyicú junta cuan tyehe caa: “Nyoho nducú ndo cuatyī chahi cha cuenda tyi chinó iñi cha nandotó ñáyivi chihī” —catyī ra Pablo.

22 Ta ra Félix chitó vaha ra yoso caa cuahan tuhun ñu nyicón chi ra Cristo. Ta catyī ra chi ra canyicu cuan:

—Vaha ri vityin. Na quichi xihna comandante Lisias. Tyicuan ta cusandai tuhun ndo —catyī ra.

23 Tyicuan ta tachī ra Félix chi capitán na cunatyihī ra chi ra Pablo vehe caa. Soco ma

ñihī xaan saha cumi ra chi ra. Ta na kuhva ra kuhun ra tahan ra nu ñohó ra, ta cahan ra chihin ra.

24 Yaha kuhva quivi ta nachaa ra Félix inga chaha chihin cu Drusila ñasihī ra. Ta cuví ña ñaha Israel. Ta tachī ra na quichi ra Pablo vatyī cuñí ñu tyasoho ñu yoso caa tuhun cha chinó iñi ra chi ra Jesucristo.

25 Ta ra Pablo cahan ra tuhun yoso caa tahan chi sacuvi yo cha vaha, yoso caa cunyaca ñaha maa yo chi yo ta ma sacuvi yo cha quiñi caa. Ta cahan tucu ra yoso caa cucutuñi chi yo nuu Nyoo quivi tahan chi. Ta ra Félix yuhvi xaan ra cuví, ta catyī ra chi ra:

—Cuahan vityin. Ta na nanuña xihne, ta cana mai chuun inga chaha —catyī ra chi ra.

26 Ta ra Félix cuñí maa ra tyi ra Pablo cucuhva ra xuhun chi ra, tacuhva vatyī numi ri saña ra chi ra. Yucuan chaha vatyī tyito tyito ri cana ra chi ra, vatyī ndatuhun ra chihin ra.

27 Uvi cuiya yaha, tyicuan ta nicunyaa ra Porcio Festo cuví ra gobernador tyiño nuu ra Felix. Ta ra Felix cuñí ra cuvaha ra nuu ra Israel ta sandoo ra chi ra Pablo vehe caa.

25

Nu cutuñi chi ra Pablo nuu ra Festo

1 Tyicuan ta cha cu uñi quivi cha cuví ra Festo tyiño, quita ra ñuu Cesarea cuan ta cuahan ra nya ñuu Jerusalén.

2 Chaá ra Jerusalén, tyicuan ta chaá coyo ra cuví nuu chi tata sutu ta ra cuví tyiño ñu Israel ta cachican ra cuatyī chaha ra Pablo.

3 Ta chican ra noo tumañi iñi cahnu chi ra Festo. Cuñí ra vatyī tachī ra Festo tyiño na quichi nyaca sindaro chi ra Pablo nya Jerusalén. Vatyī maa ra cuñí ra cahni ra chi ra ityi vachi ri ra.

4 Soco ra Festo nacahan ra, ta catyī ra:

—Ra Pablo ñohó ra vehe caa nya Cesarea. Ta yuhu tyaí kuhva cha cunuhi yucuan cha numi ri.

5 Yucuan chaha, nyoho cha cuví ndo tyiño ñuu ihya, kuhun maa ndo chihin. Tyicuan ta cuví cacan ndo cuatyī chaha ra tatu iyó cha sacuvī ra —catyī ra Festo chi ra.

6 Uña o uchi ri quivi chi nyaa ra Festo Jerusalén, ta cuanuhū ra Cesarea. Ta cha

inga quiví chaꝝ ra chichi vehe tyiño ra vatyí cutuñi chi ra ca iyó cuatyí nuu ra. Tyicuan ta canꝝ ra chi ra Pablo.

⁷ Cuhva cha quihví ra Pablo, catuhvꝝ ra Israel cha quichí coyo nya Jerusalén, ta quichahaꝝ catyaa ra cuatyí cahnu síqui ra. Soco ñahri maa cha ndaa catavꝝ ra.

⁸ Tyicuan ta cahan ra Pablo ta catyí ra:

—Yuhu ni noo cuatyí ta sacuvi que, ni síqui ley ñu Israel, ni síqui vehe ñuhu cahnu Jerusalén, ni síqui rey cahnu Roma —catyí ra.

⁹ Soco vatyí cuñí ra Festo ndoo vaha ra chihin ra Israel, ndacá tuhun ra chi ra Pablo:

—¿Atu cuñún cahun Jerusalén vatyí sandáí tyiñon nyicuan? —catyí ra chi ra.

¹⁰ Ta ra Pablo catyí ra:

—Cha nyaí nu maun. Ta maun cuví ra cuví tyiño cuenda rey cahnu Roma. Ihya cuví nu tahán chi cutuñi chíí, vatyí ra cuenda ñuu Roma cuví. Ta chitó vahun tyi ñahri maa sacuví chi ñu Israel.

¹¹ Tatu sacuví noo cuatyí cahnu cha tahán chi cahñi ndo chíí, ma nduqui cuhva caqui. Soco tatu ña ndicha tuhun cha cahán ra Israel ihya, yori cha iyó ityi chíí cha cuhva cuenda chíí chi ra cuñí cahñi chíí. Chiquén vatyí cuhin nuu rey cahnu vatyí cutuñi chíí nuu maa ra —catyí ra Pablo chi ra Festo.

¹² Tyicuan ta ra Festo cha yahaꝝ cha cahan tahan ra chihin ra tyinyeé chí ra chihin tyiño, ta catyí ra chi ra Pablo:

—Chicón cha cutuñi chuun nuu rey cahnu. Vaha. Cua cahun nuu maa ra —catyí ra chi ra.

Nu nacatyí ra Festo tuhun ra Pablo chi ra Agripa

¹³ Yahꝝ suhva quiví, tyicuan ta chaꝝ rey Agripa chihin cu Berenice nya Cesarea, vatyí cuacuhva ñu nocumi chi ra Festo.

¹⁴ Quita suhva quiví chinyicu ñu yucuan, ta nacatyí ra Festo tuhun ra Pablo chi rey. Ta catyí ra:

—Iyó noo rayí ihya cha sandoꝝ ra Félix vehe caa.

¹⁵ Ta cha chahin Jerusalén, ra cuví nuu chi tata sutu, ta ra cacuví mandoñi ñu Israel chahaꝝ cuenda ra noo tutu cuatyí ra, ta chicán ñu na cúvi ra.

¹⁶ Ta catyí yuhu chi tandihí ra vatyí ña tuhvꝝ ra cuví tyiño cuenda Roma chahñi chi noo ñáyiví tatu ta cahan tahan ca ñu ta nducu ñu cuhva sacacu ñu chi ñu.

¹⁷ Yucuan chaha, quiví quichi coyo ra cacuví nuu chi ñu Israel cuan, ña sacunají cuhva. Ta cha inga quiví chahin vehe tyiño vatyí cutuñi chi ra cha cacahán ra tuhun. Ta tachí tyiño na quichi ra cuan.

¹⁸ Soco ra catyáá cuatyí síqui ra, ña cuaha maa tuhun cacahan ra. Ta cuñí maa yuhu vatyí cahnu cuatyí cuatyaa ra síqui ra.

¹⁹ Cuñí ra cuan cuatyí chihin ra cha cuenda tuhun costumbre, cuhva chinó iñi ñu Israel. Cahán ra tuhun noo ra cha nañí Jesús cha chíí. Ta ra Pablo catyí ra vatyí iyó ra.

²⁰ Ta ña chité yoso caa sacuvi chihin tuhun cha tyicuan caa, ta ndacꝝ tuhin chí ra Pablo tatu cuñí ra cahun ra Jerusalén, vatyí cutuñi chí ra cuenda tuhun ihya.

²¹ Soco maa ra chicán ra cha cutuñi chí ra nuu rey cahnu Augusto nya Roma. Yucuan chaha ñohó ca ra vehe caa nyacua nya cuví tachi chí ra nuu ra Augusto —catyí ra Festo chí rey Agripa.

²² Tyicuan ta ra Agripa catyí ra chí ra Festo:

—Cuñí tucu yuhu cuiñi cha cahán ra cuan —catyí ra.

Ta ra Festo catyí ra chí ra:

—Tyaan cuiñun cha cahán ra —catyí ra chí ra.

²³ Tuví inga quiví ta chaꝝ ra Agripa chihin cu Berenice. Iyo xaan caa ñu quihví coyo ñu chichi vehe vatyí rey cuví ñu. Quihví tucu comandante ta ra cacuví tyiño ñuu cuan. Tyicuan ta ra Festo catyí ra na quichi ra Pablo.

²⁴ Tyicuan ta quichaha catyí ra Festo:

—Yoho Rey Agripa, ta nyoho tata, cha nyicu ndo ihya. Nyehe ndo chí ra ihya. Tandihí ñu Israel ñuu Jerusalén ta ñu Cesarea cahan ñu síqui ra. Ta ña sandihí ñu cha catyí ñu chíí vatyí tahán chí cúvi ra.

²⁵ Soco cha cuenda yuhu ñahri cuatyí ra cha tahán chí cúvi ra. Ta suri maa ra chicán cha cutuñi chí ra nuu ra Augusto. Yucuan chaha cutachi chí ra.

²⁶ Soco vatyí ñahri cuatyí ra ñihí, yucuan chaha ña ñihí tuhun tyai nu tutu cha

cusacuhin chi ra nyacá ñaha chi yo. Yucuan chaha canē chi ra Pablo nuu ndo, ta nuu yoho Rey Agripa, tacuhva tyi ndaca tuhun chi ra ta cote ñáá cha tahán chi sacote chi rey cahnu.

²⁷ Vatyí ña vaha cha sacuhín chi ra tatu ñahri tuhun cahín ñáá cuatyí ra.

26

Nu quichaha cahán ra Pablo nuu rey Agripa

¹ Tyicuan ta ra Agripa catyí ra chi ra Pablo:

—Cuví cahun vityin —catyí ra chi ra.

Ta ra Pablo sandaa ra ndaha ra ta catyí ra tyehē caa:

² —Sii xaan cuñí vatyí cuví cahin nuu yoho, rey Agripa, ta cuví catyí mai chuun yoso caa tandihí cuatyí cha tyaá ra Israel síqui.

³ Vatyí, yoho chitón tandihí costumbre cha iyó chi yo ñu Israel. Ta chitón tuhun tuhva yo cuví yuhu. Yucuan chaha chiquén chuun nacuiñi vahun cha cahín.

Nu catyí ra Pablo chi ra Agripa yoso caa ñáyivi ra cha ni cumañi ca quihvi ra cuenda ra Cristo

⁴ "Tandihí ñu Israel chitó ñu yoso caa chiye nyata ni luhli nya ñui. Ta chitó ñu cuhva chiye nya Jerusalén.

⁵ Ta suri chitó ñu vatyí nyata luhli cuví noo fariseo. Ta ra fariseo vaha xaan caquichahá ra costumbre yo. Ta na catyí maa ñu tatu ña ndicha cha cahín.

⁶ Ta vityin nanyaí ihya ta cutuñi chii cha cuenda vatyí chinó iñi cha sanandotó Nyoo chi ñáyivi chihí, tari cuhva catyí ra chi sutu chahnu yo ta cha naha.

⁷ Ndi uchi uvi tahan ityi ñáyivi Israel ñu vachi tata sutu chahnu yo nyatú tucu ñu nyehē ñu tyi ndicha cusanandoto Nyoo chi ñáyivi chihí. Ta yucuan chaha nyita ri sacuví ñu tyiño nuu Nyoo sacahnu ñu chi ra ñicahñu ta cha cuaa. Vatyí suri cha cuenda tuhun ihya tyaá ra Israel cuatyí síqui vityin, yoho rey Agripa.

⁸ ¿O ña chinó iñi nyoho vatyí Nyoo sanandotó ra chi ñu chihí?

⁹ "Ta quiñi cuan suri mai chica xiñi vatyí vaha cha tachi tuñi chi ñáyivi chinó iñi chi ra Jesús ra ñuu Nazaret.

¹⁰ Ta tyicuan caa chinyacuví nya Jerusalén chihin ndusu yuhu ra cacuví nuu chi tata sutu. Ta cuaha ñu cha chinó iñi chi ra Cristo tyihí vehe caa. Ta tatu cachahñi ra chi ñu, vaha xaan cuñi.

¹¹ Cuaha chaha sanyehí tindoho chi ñu ta sahí fuerza chi ñu nacahan ña vaha ñu síqui ra Jesús. Tyehē caa chinyacuví tandihí ri vehe ñuhu ñu Israel. Ta xaan xaan cuñi nyehi chi ñu. Ta chica nyiquen chi ñu nyacua nya inga ñuu.

Nu nacatyí tucu ra Pablo yoso caa nanduví ra, ra cuenda ra Cristo (Hch. 9.1-19; 22.6-16)

¹² "Ta yucuan chaha cuahin quiñi cuan nya ñuu Damasco chihin ndusu yuhu ra cuví nuu chi tata sutu.

¹³ Soco yoho Rey, ityi cuahin ñáá cuhva ora, nyehí noo nduva ñuhu quichí andivi, ñihi ca ican saha ñuhu ñanyii. Sandundichin chi nicachico nu cuahin ta ra cuahan coyo chihin.

¹⁴ Tyicuan ta tandihí ndi nduva ndi nu ñuhú. Ta chiñi noo ndusu cha cahán chihin, chihin sahan yo hebreo, ta catyí chi chii: "Saulo, Saulo, ¿ñáá tuhun cha chicá nyicon chii? Tari noo quiñi chañi nyaa ti chata cha xaan cha saquehén ityi ra chi ti, tyicuan caa cuñún sañicuehun suri chi maun", catyí ndusu cuan chii.

¹⁵ Tyicuan ta catyí yuhu: "¿Yóó yoho tata?" Ta Sutu Mañi yo catyí ra chii: "Yuhu cuví ra Jesús, ra cha chicá nyicon chi.

¹⁶ Ndi cuita ta cuñanyaun, vatyí yuhu tuví nuun tacuhva vatyí cuasacuvun tyiño nui, vatyí cuacuvun cha ndaa cha nyehun vityin. Ta cucuvun cha ndaa cha nyehun chii nu cuahan ca chi.

¹⁷ Cusacaqui chuun ndaha ra Israel, ta ndaha ra cha ñima ra Israel cuví. Nu nyicú ñu tachí chuun vityin.

¹⁸ Vatyí na nuñon nuu ñu, ta sañahun chi ñu cha ndicha, ta ma sacuvi ca ñu cha ña vaha. Soco sacuvi ñu cha vaha nu ndichin Nyoo vatyí quita ñu chichi ndaha ra ña vaha ta ndihvi ñu ndaha Nyoo tacuhva vatyí tyicuan caa cusahi ticahnu iñi cuatyí ñu ta cunaquehen ñu cha vaha cha chahá Nyoo chi ñáyivi yihí cuenda ra", catyí Sutu Mañi yo chii.

19 Yucuan chaha rey Agripa, sacuví cha catyí Sutu Mañi yo ra Jesucristo chii nu sañaha ra chi ra chii.

20 Ta cahin tuhun ra xihna ca chihin ñu nyicu ñuu Damasco. Yaha cuan ta cahin chihin ñu ñuu Jerusalén ta tandihí ityi Judea. Ta cahín chihin ñu cha ñima ñu Israel cuví ñandihí. Sacote chi ñu nandu uvi ñi ñu cuatyí ñu, ta nandihví ñu chichi ndaha Nyoo cha ndicha cuii. Na nasama ñu cuhva iyó ñu chihin cha sacuvi ñu cha vaha.

21 Cha cuenda ihya catiín ra Israel chii chichi vehe ñuhu cahnu. Ta cacuñi ra cahñi ra chii.

22 Soco maa Nyoo tyinyeé chii. Ta iyó que nya vityin. Ta cahín tuhun Nyoo chihin tandihí ñáyivi, ñu ndahvi ta ñu tyayíi. Ta ña cahín inga tuhun cha ña catyí ra Moisés ta ra profeta, vatyí cucuvi nu cuahan ca chi.

23 Vatyí catyí ra vatyí tahán chi cha cunyehe ra Cristo tindoho. Ta cha yaha cha cúvi ra, cunandoto ra. Ta ican ra cuví ra cunandoto xihna ca. Ta cusacata ra tari noo ñuhu ityi cuahan ñáyivi vatyí sacotó ra yoso caa cacu añima ñu, ñu Israel ta ñu cha ñima ñu Israel cuví —catyí ra Pablo.

Ra Pablo cuñí ra cha nachino ñi rey Agripa ta cunyicon ra chi ra Cristo

24 Cuhva cha catyí ra Pablo tuhun ihya, ra Festo canachaá ra, ta catyí ra:

—¡Loco yoho Pablo! cha cuenda cha cuaha xaan sacuahún ta ndulocon —catyí ra Festo chi ra.

25 Soco ra Pablo catyí ra chi ra:

—Ña loco yuhu, yoho tata Festo. Soco cha cahín, maa maa ri tuhun ndicha cuví.

26 Ihya nyaá rey Agripa. Ta chitó vaha ra tuhun ihya. Yucuan chaha cahín chihin cha ña cahán nui. Vatyí chité tyi chító tucu maa ra tuhun ihya, vatyí ñima tuhun xehe cuví.

27 Yoho rey Agripa, ¿atu chinó ñun tuhun cha catyaa ra profeta cuenda Nyoo ta cha naha? Yuhu chité vatyí chinó ñun —catyí ra Pablo chi ra Agripa.

28 Tyicuan ta ra Agripa catyí ra chi ra:

—Suhva cuii ri ca ta nachino ñi tuhun cahun ta quihvi cuenda ra Jesús —catyí rey Agripa chi ra Pablo.

29 Tyicuan ta ra Pablo catyí ra:

—Cuví ri suhva, o cuví ri cuaha soco chi Nyoo chiquén vatyí na nduvi ndihun ñáyivi cuenda ra Jesús tari mai. Ta ñima yoho ri, soco tandihí ri ñáyivi, ñu chiñí tuhun cahín. Noo ri cha ña cuñí, cha quihí cadena ndahando tari mai vityin —catyí ra Pablo.

30 Cha yaha cha catyí ra Pablo tuhun ihya, ndicuita rey ta gobernador ta cu Berenice, ta tandihí ra canyicú yucuan.

31 Ta cha yaha quita coyo ñu, ta cacatyí ñu chi tahan ñu:

—Ñahri cuatyí ra ihya cha ñihi xaan. Ña tahán chi cúvi ra. Ta ni ña tahán chi cohon ra vehe caa —catyí ñu.

32 Ta ra Agripa catyí ra chi ra Festo:

—Cuví saña yo chí ra, tyehe ta ñima maa ra chicán cha cutuñi chi ra nuu ra cuví rey cahnu —catyí ra.

27

Nu tachí ra Festo chi ra Pablo nya ñuu Roma

1 Quivi cha catyaa ra Festo ta ra Agripa cuhva tyi tachí ra chi ndi nya ñuu Roma ityi Italia, nacuhva cuenda ra chi ra Pablo ta suhva ca ra chi noo capitán cha nañi Julio. Yihí ra noo batallón sindaro, cha nañi Cuenda Ra Augusto.

2 Ta cuahan tucu ra Aristarco chihin ndi ñandihí. Ra ñuu Tesalónica cha nyaá ityi Macedonia cuví ra. Tyicuan ta quihví ndi chichi noo barcu cha quichi ityi ñuu Adramitio ta cuhun chi ñuu cha nyicú yuhu tyañuhu ityi Asia.

3 Cha inga quivi cha ndi puerto Sidón. Ta ra Julio vaha ñáyivi cuví ra chihin ra Pablo. Ta chaha ra cha cunyehe ra chi ra tahan ra ñuu cuan.

4 Yaha cuan ta quita ndi Sidón ta casandaá ra sahma barcu cuan ta chihin fuerza tatyí ri cuahan ndi. Ta vatyí caa tatyí siqui ndi yaha ndi chiyo xehe ca ñuhú Chipre. Vatyí ña ñihi xaan caa tatyí chiyo cuan.

5 Yaha sava ndi tyañuhu ityi nuu Cilicia ta Panfilia, ta chaá ndi noo ñuu cha nañi Mira ityi Licia. Ta noo ndi barcu cuan.

6 Yucuan nañihí capitán cuenda sindaro nonga barcu cha quichi nya ñuu Alejandría ta cuahan chi Italia. Ta catyí capitán na quihví ndi barcu cuan vatyí cuhun ca ndi nu cuahan ndi.

⁷ Cuaha quiví chica ndi cuee ri. Ta chihin cha cuaha tindoho ta chaá ndi yatyin ri ñuu Gnido. Ta cha cuenda cha ñihi xaan caá tatyí, ña chaha chi cha cuhun ndi ityi nuu, ta yaha ndi yatyin ri ñuu Salmón. Ta nacuíco ndi ityi yuhu ñuhú Creta.

⁸ Nducú ndi cuhva cha cuhun ndi yuhu tyañuhu cuan ta chaá ndi nu nañí Buenos Puertos yatyin ri ñuu Lasea.

⁹ Cha cuaha xaan quiví yaha ta cha yíca xaan nanduví cha caca noo ndi ityi nu tyañuhu. Vatyí cha yaha quiví vico ayuno nu ña chachi ñu Israel. Ta cha cuyatyin yoo vichin. Yucuan chaha ra Pablo chaha ra tuhun chi ra sacaca barcu cuan,

¹⁰ ta catyí ra:

—Nyoho ra canyicú ihya, cuiñi ndo tuhun cahín. Nyehe vatyí yíca xaan cuhva cuahan yo. Ta tuví iñi vatyí cuaha xaan cusacunaa yo. Cunaa barcu ta cha nyisó chi ta nyacua nya maa yo ñandihí. Vaha taxin ca nandoo yo ihya —catyí ra chi ra.

¹¹ Soco capitán cuenda sindaro cuan quichaha ca ra chi ra sacacá barcu chihin chitoho barcu ta ñima ca chi ra Pablo.

¹² Ña cuví yaha ndi yoo vichin yucuan tyi ñihi xaan tuhvá caa tatyí, ta yíca xaan cuenda barcu. Yucuan chaha tandihí ra ta catyí ra:

—Vaha ca cha quita yo ihya ta nducu yo cuhva chaá yo nya ñuu Fenice suri ñuhú Creta ihya. Yucuan cuví noo nu vaha cun-yaa barcu vatyí nyaa ñuu cuan chiyo caña ñanyii —catyí ra.

Nu ñihi xaan caá tatyí nu tyañuhu

¹³ Tyicuan ta quichahá caa chiin tatyí cha quichi ityi sur. Ta cuñí maa ra vatyí vaha xaan vatyí ñima tatyí ñihi cuví, ta cuví cuhun ra chihin barcu ra ñicañi ri yuhu tyañuhu ñuhú Creta cuan.

¹⁴ Ña cuaha ri chicá ra ta quichaha caa noo tatyí xaan cha quichí ityi norte. Ta tyandahá chi barcu inga ityi.

¹⁵ Ta ña cuví ca cuhun ndi ityi nuu ca cha cuenda tatyí cuan. Ta saña ndaha ndi nacuhun maa barcu chihin tatyí nya ityi cuñí maa chi.

¹⁶ Ta tyandahá tatyí chi ndi ityi chiyo satyin noo ñuhú luhlu cha nañí Clauda. Ta chihin cha yí xaan naquehen ndi lancha

luhlu cha xitá quiñoho barcu, ta natyihí ndi ityi chichi barcu coto nyee chi.

¹⁷ Ta cha yaha natyihí ra lancha cuan, yucuan ta chahñi vaha ra yoho nicachico barcu vatyí coo fuerza chi. Ta yuhví ra coto tahan ra nu yaxin ndutya ta quihví barcu cuan chichi ñiti vita iyó yuhu tyañuhu nu nañí chi Sirte, yucuan chaha sanoo ra sahna barcu ta chaha ra cha cuhun barcu yoso cuhva tyandahá tatyí.

¹⁸ Ta cha inga quiví suri ñihi xaan caá tatyí. Yucuan chaha quichaha catuchi ra carga nu tyañuhu.

¹⁹ Ta cha cu uñi quiví quehen ndi ndaha tyiño barcu ta tyihí ndi nu tyañuhu.

²⁰ Ta cuaha quiví ña nyehe ndi ni ñanyii ta ni tiño. Ta ñihi tatyí nañí chi ndi. Yucuan chaha ña tyaa ca ndi cuhva cha cacu ndi.

²¹ Cuaha quiví yaha ta ña chachí ndi. Tyicuan ta catyí ra Pablo chi tandihí ra:

—Nyehe ndo, vaha ca tyehe ta quichaha ndo chii quiví cuan, ta ndoo taxin yo Creta cuan. Ta vityin nyehé xaan yo tindoho ihya ta cuaha ndaha tyiño sacunaá yo.

²² Soco vityin ma caca xaan iñi ndo vatyí ni noo yo ta ma cuví yo. Barcu ihya cuví cha cunaa.

²³ Vatyí Nyoo nyacá ñaha ra chii, ta sacuví tyiño nuu ra, sanyehe ra noo visión chii cuñi. Ta tuví noo ángel nui.

²⁴ Ta catyí ángel cuan chii: “Ma yuhvun, Pablo. Vatyí cuñí chi cha cahun tuhun Nyoo nuu rey cahnu Augusto nya Roma. Ta cha cuendon cusacacu Nyoo tandihí ra canyicu chuhun chichi barcu”, catyí ángel cuan chii.

²⁵ Yucuan chaha nyoho cha ñohó ndo chichi barcu, saní ndo iñi ndo. Vatyí yuhu chinó iñi chi Nyoo. Ta chitó vahi vatyí cuví tari cuhva catyí ángel cuan chii.

²⁶ Vasi cuanyee barcu soco cuachaa yo noo ñuhú luhlu —catyí ra Pablo chi tandihí ndi.

²⁷ Noo cha cuaa quiví ndihí chahun quiví chica ityi ndi nu tyañuhu, ñohó ndi nu tyañuhu Adria. Ta chata cuan chata ihya tyandahá tatyí chi barcu ndi nu tyañuhu. Ta vasi ora ñuu cuví cuhva cuan ta tuví iñi ra sacacá barcu cuan tyi cuachaa ndi noo ñuhú.

28 Tyicuan ta tyicuhva ra cha cono ndutya. Ta nyehe ra tyi oco chahun in tahan metro iyó. Cuahan ndi chiin ca ityi nuu ca. Ta tyicuhva tucu ra inga chaha. Ta iyó oco ucha metro.

29 Ta cayuhví ra coto nañi barcu cuan chata yuu. Yucuan chaha casanoó ra cumi tahan caa vee cha nyaa gancho nuu, ityi chata barcu. Ta ña iñi ca ra cha cundichin.

30 Ta ra sacacá barcu cuan catyaa ra cuhva cacono xehe ra. Ta yucuan chaha quichaha casanoó ra lancha cuan nu ndutya ityi nuu barcu cuan. Ta sahá ri maa ra tyi inga caa casanoó ra.

31 Soco ra Pablo sacotó ra chi capitán ta chi sindaro ta catyí ra:

—Tatu ma ndoo ra cuan chichi barcu. Nyoho ma cuvi cacu ndo —catyí ra chi ra.

32 Tyicuan ta sindaro cachahnya ra yoho lancha. Ta casanacava ra nu ndutya.

33 Ta cha ñaa ca cuan ra Pablo catyí ra chi tandihí ra:

—Cha iyó uchi cumi quivi cha ta cachi ca yo.

34 Catyí chi ndo, na cachi yo vityin. Niñi xaan cuñi chi cha cachi yo ta ndunye coño ñuhu yo. Vatyí cucacu yo ta ni noo ixi xiñi yo ta ma cunaa.

35 Ta cha catyí ra tuhun ihya, ra Pablo quehen ra noo pan ta nacuhva ra tyahvi nyoo chi Nyoo nuu tandihí ra. Tyicuan ta tahvi ra ta quichaha chachi ra.

36 Tyicuan ta tandihí ca ra canduni ca iñi ra ta cachachi ra ñandihí.

37 Ta cha tandihí ndi cha ñohó ndi chichi barcu cuan, quita uvi ciento uñi xico chahun in tahan ñáyivi.

38 Cuhva cha ndihí ca chachi ra ta tuchi ra yitin cha yihí trigu nu tyañuhu na nduñahma ca barcu.

Nu nyeé barcu

39 Yahá cuan ta cundichin. Ta canyehe ra cha sacacá barcu noo ñuhú, soco ña canicohon nuu ra nya cuví cuan. Nyehe ra noo nu iyó ñiti. Ta catyaa ra cuhva nyehe ra tatu cuví sacahun ra barcu yucuan.

40 Cachahnya ra yoho cha nuñi caa vee cuan. Ta sandoó ra chichi tyañuhu. Ta casandutaya ra vitu cha sanacuico barcu. Tyicuan ta casandaá ra sahma cha tuhvá

chitacaá ityi nuu barcu. Ta quichaha quehen tatyí sahma cuan, ta sacuhún chi barcu nya nu iyó ñiti cuan.

41 Ta chaá barcu cuan noo nu nañi tahan ndutya. Ta nyee xiñi chi chichi ñiti. Ta ña cuví ca natava ra. Ta suhva ca cha ña quihvi chichi ñiti, ñihi xaan cañi tyañuhu chi chi, nyacua tahvi cuatyí chi.

42 Tyicuan ta sindaro cacuñi ra cahñi ra chi ndi cuii maa ra cuahan cuacutuñi chi nuu ra cuví rey cahnu, coto cacono ra.

43 Soco capitán sindaro cuñi ra sacacu ra chi ra Pablo. Yucuan chaha ña chaha ra cahñi ra chi ra, soco catyí ra vatyí nya ra cachitó sutya, na cuhun cuee ra nu ndutya ta quita ra nya ñuhú ityi.

44 Ta tandihí ca ra cha ña cacuví sutya, na quehen ra vitu cha nyisó barcu, ta suhva ra chihin yiquin vitu barcu cha tahvi tyañuhu. Ta tyicuan caa cacacu tandihí ndi ta quita ndi ñuhú ityi.

28

Nu ñohó ra Pablo ñuhú Malta

1 Cuhva cha cha yahá cacu ndi ta catyí ñáyivi iyó ñuhú cuan vatyí nu nyaá ndi nañi chi Malta, o Melita.

2 Ta vaha xaan tyiñuhu ñu chi ndi. Ta sanatahan ñu ñuhu vatyí coón savi ta vichin xaan. Ta catyí ñu chi tandihí ndi, natuhva ndi yuhu ñuhu cuan natava ndi cha vichin ndi.

3 Tyicuan ta ra Pablo naquehen ra suhva nducu tyihí ra nu ñuhu. Ta noo coo quita chichi nducu cuan, cha cuenda cha ihñi. Ta chachi yihí ti ndaha ra Pablo ta ndoo ti tacaá ti ndaha ra.

4 Cuhva cha canyehe ñáyivi ñuhú cuan tyi tacaá coo cuan ndaha ra, quichaha catyí ñu chi tahan ñu:

—Ra ihya vasi noo ra chahñi ñáyivi cuví ra, vatyí vasi cacu ra nu tyañuhu soco ña chahá Nyoo cha coo ca ra cha cuenda cuatyí ra —catyí ñu.

5 Soco ra Pablo naquisi ra chi coo cuan, ta canacava ti nu ñuhú, ta ñahri cuví chi ra.

6 Tandihí ñu nyatú ñu ñáá cuhva ndaa nu tyaá ti, o ñáá cuhva cúvi ra. Soco cha yahá nyatu xaan ñu, ta nyehe ñu vatyí ñahri maa cuví chi ra. Tyicuan ta nasama ñu cuhva chicá xiñi ñu, ta quichaha catyí ñu:

—Minoo nyoo cuví ra —catyí ñu.

⁷ Yatyin ri cuan nyaá ñuhú ra cha cuví nuu ñuhú cuan. Publio nañi ra. Ta vaha xaan cahān ra chihin ndi. Ta tyiñuhu xaan ra chi ndi, ndoo ndi vehe ra uñi quivi.

⁸ Ta cuhví xaan sutu ra chihin cahñi ta cha chiyó ra. Ta ra Pablo chahan ra chinyehē ra nu catuví ra. Ta chican tahvi ra chaha ra. Ta tyiso ra ndaha ra siqui ra ta nduvaha ra.

⁹ Yaha cuan ta quichaha caquichi tucu inga ñu cuhví cha iyó ñuu cuan. Ta nduvaha tucu ñu.

¹⁰ Ta tandihí ñu tyiñuhu xaan ñu chi ndi. Ta quivi quihvi ndi chichi barcu cha cuacuhun ndi, chaha ñu tandihí cha cuchihuhu chi ndi ityi cahun ndi.

Nu chaq ra Pablo ñuu Roma

¹¹ Uñi yoo ñoho ndi Malta cuan. Tyicuan ta ñihí ndi noo barcu cha quichi nya ñuu Alejandría ityi Egipto. Ta ndoo chi Malta nya yaha yoo vichin. Ta nya noo cha natava ñu, noo xiñahñu nyoo Cástor ta nyoo Pólux, xiñi chi. Quihvi ndi barcu cuan ta cuahan ndi.

¹² Ta chaq ndi ñuu Siracusa. Ta yucuan ndoo ndi uñi quivi.

¹³ Ta yucuan ta quita ndi ta cuahan ndi ityi yuhu tyañuhu nyacua nya chaq ndi ñuu Regio. Ta cha inga quivi cuan caa xaan tatyí cha quichi ityi sur ta chica ndi uvi quivi ta chaq ndi ñuu Puteoli.

¹⁴ Yucuan ñihí tahan ndi chihin suhva ra hermano. Ta catyí ra chi ndi cha ndoo ndi noo vitya chihin ra. Yaha cuan ta quita ndi ta cuahan ndi nya ñuu Roma.

¹⁵ Ta ñu yihí cuenda Nyoo ñuu Roma cuan ñihí ñu tuhun tyi cua cha ndi. Ta chahan coyo ñu chisatahan ñu chi ndi ityi. Suhva ñu nyatú ñu chi ndi Nuyahví Apio. Ta inga ñu ñihí tahan ñu chihin ndi nya nu nañi Tres Tabernas. Ta cha nanyehē ra Pablo chi ñu, nacuhva ra tyahvi nyoo chi Nyoo. Ta ndun ca iñi ra.

¹⁶ Cuhva cha chaq ndi Roma cuan, capitán cuan nacuhva cuenda ra chi ra ca iyó cuatyí cuan chi noo ra cuví nuu chi ra sahá cumi vehe caa. Ta chaha ra cuan cha coo siin ra Pablo. Ta noo ri sindaro sahá cumi chi ra.

Nu cahán ra Pablo tuhun Nyoo ñuu Roma

¹⁷ Uñi quivi cha yaha chaq ndi yucuan. Tyicuan ta tachí ra Pablo tyiño naquichí coyo ra cacuví nuu cuenda ñayivi Israel cha iyó ñuu Roma cuan. Ta cuhva cha ndu in ri ra, quichaha catyí ra chi ra:

—Nyoho yañi, vasi ñahri sacuvi chi ñu Israel tahan yo, ta ni ñahri sacuvi siqui costumbre sutu chahnu yo, soco chaha cuenda ra Israel chii chi ra ñuu Roma. Ta ñohi vehe caa Jerusalén ndaha ra ñuu Roma.

¹⁸ Ta cha cutuñi chi, ta cuñi ra nyacá ñaha casaña ra chii. Vatyí ñahri cuatyí cha chahnu cha tahan chi cúv.

¹⁹ Soco cha cuenda cha nduxaán xaan ra Israel siqui, chican taxin cha cutuñi chii nuu maa rey chahnu. Vasi ñahri cuatyí cuacauen siqui ñu ñui nuu ra.

²⁰ Yucuan chaha canē chi nyoho vatyí cohon nui chi ndo, ta sacoté chi ndo vatyí nuhñi yuhu chihin cadena vityin cha cuenda cha yihí iñi yo, ñu Israel, chi Nyoo —catyí ra Pablo.

²¹ Tyicuan ta catyí ra Israel chi ra Pablo:

—Ña chitó maa ndi tuhun yoho. Ta yori casacoto chi ndi, ni chihin carta, ta ni ta yori ca quichi ityi Judea sacoto cha caun, o cahān ña vaha ñu sicun.

²² Soco cuñi ndi cuiñi ndi tuhun chicá xiñi yoho. Vatyí chitó ndi vatyí tandihí ri ityi cahán ña vaha ñayivi siqui tuhun cha ihya —catyí ra Israel chi ra Pablo.

²³ Tyicuan ta catyihí tahan ra tuhun nya quivi quichi coyo ra inga chaha. Ta cha chaq quivi cuan, chaq coyo cuaha ñayivi nu iyó ra Pablo. Ta nya ñaha ri ta nya cha cuaa cahán ra Pablo tuhun yoso caa nyacá ñaha Nyoo aña yo. Ta chihin ley ra Moisés ta tuhun cha catyaa ra profeta Nyoo ta cha naha, sañahá ra chi ñu vatyí ra Jesús cuví ra cha sacacú chi yo, vatyí cuñi ra tyi nachino iñi ñu chi ra.

²⁴ Yihí ñu chinó iñi ñu cha catyí ra Pablo. Ta inga ñu ña chinó iñi ñu.

²⁵ Ta vatyí ña in ri chino iñi ñu ta siin siin tuhun cahán ñu, ta quichaha cuahan coyo ñu. Ta ra Pablo catyí ra chi ñu:

—Ndicha xaan cha catyí Tatyí Ii chi sutu chahnu yo chihin yuhu ra profeta Isaías ta cha naha. Vatyí catyí ra tyehe caa:

²⁶ Cuahan ta catyi chi ñáyivi ihya tyehe caa:

Nyoho cucuiñi ndo tuhun Nyoo.

Soco ma cutuñi iñi ndo.

Ta cunyehe ndo chihin chiti nuu ndo cha sacuví Nyoo.

Ta ma tuvi iñi ndo.

Tyicuan caa catyi chi ñu.

²⁷ Vatyí añañima ñu cha ndundava xaan.

Ta chiñi ri maa ñu tuhun Nyoo.

Ta natahán chiti nuu ñu,
tacuhva cha ma cuvi nyehe ñu.

Ta ñicunyasí soho ñu.

Yucuan chaha ña chiñi ñu, ta ndundava añañima ñu.

Yucuan chaha ña cuñi ñu quihvi ñu chichi ndahi na sanduvahi chi ñu, catyi Tatyí li chihin yuhu ra Isaías ta chaha naha.

²⁸ 'Coto vaha nyoho vatyí vityin ta ityi nuu ca cuhin cusacote chi ñu cha ñima ñu Israel cuví vatyí sacacú Nyoo chi ñu. Ta maa ñu cuatyasoho ñu, —catyi ra Pablo chi ñu.

²⁹ Cuhva cha catyi ra Pablo tyehe caa, ra Israel cuahan coyo ra suri cuví yuhu ra chihin ra tahan ra tuhun cha cahan ra Pablo chihin ra.

³⁰ Uvi cuiya nanii ndoo ra Pablo vehe nu nyaá ra cuenda yoo ñuu Roma cuan. Ta vaha cahán ra chihin tandihi ñu chahan vehe ra.

³¹ Ta chihin cha nii iñi ra ta cahan ra tuhun yoso caa nyacá ñaha Nyoo añañima yo. Ta sañahá ra tuhun Sutu Mañi yo ra Jesucristo. Ta yori chasí cha cahán ra.

Carta Cha Sacuhun Ra Apóstol Pablo Chi Ñáyivi Ñuu Roma Cha Yihí Cuenda Nyoo

Nu sacuhun ra Pablo tutu chi ñu cuenda Nyoo ñu Romā

¹ Yuhu ra Pablo cuví noo ra sacuví tyiño nuu ra Jesucristo. Nacana ra chii, ta nacachi ra chii vatyí cuví apóstol chi ra, tacuhva vatyí sacote chi ñáyivi yoso caa sacacu Nyoo aña yu.

² Ihya cuví tuhun cha catyí Nyoo chi yo tyi cusacuvi ra, ta chicunya nu tutu tuhun ra tandihi cha tya ra profeta ta cha naha.

³ Ican ihya cuví tuhun Sutu Mañi yo Jesucristo Sehe Nyoo cha cahán chi tuhun, vatyí quichi ra siqui ñuhu ñayivi chihin coño ñuhu ra tari coño ñuhu maa yo. Tata rey David cuví chi ra.

⁴ Ta Nyoo chihin Tatyí li ra sacoto cachi ra chi yo vatyí Sehe ra cuví chi ra, vatyí sanandoto ra chi ra chihin cha ndicha ñuhu ra.

⁵ Ta cha cuenda maa ra Jesucristo chaha Nyoo tumañi iñi chi nyuhu cha cahun ndi cucaca ndi tyiño ra, tacuhva nachino iñi ñáyivi chi ra nichanu ñuhu ñayivi, ta quichaha ñu chi ra.

⁶ Ta mahñu ñu cuan, ñohó tucu nyoho vatyí suri nacana tucu ra Jesucristo chi nyoho.

⁷ Sacuhín tutu ihya chi tandihi nyoho cha iyó ndo ñuu Roma. Cuñí Nyoo chi ndo ta nacana ra chi ndo vatyí coo ndo noo ñayivi cachi cha sacahnu ndo chi ra. Na naquehen ndo cha vaha ta cha taxi ri cuñí aña ndo cha chahá Sutu yo Nyoo ta Sutu Mañi yo Jesucristo chi yo.

Nu catyí ra Pablo vatyí cuñí ra cahun ra ñuu Roma

⁸ Cha xihna ri chahí tyahvi nyoo chi Nyoi chihin sivi ra Jesucristo, cha cuenda tandihi nyoho. Vatyí tandihi ri ityí cahán ñu tuhun vatyí chinó xaan iñi ndo chi ra Jesucristo.

⁹ Ta tyiño nuu Nyoo sacuví yuhu chihin cha tandihi aña. Ta cahín tuhun yoso caa sacacu ra chi yo cha cuenda Sehe ra. Ta Nyoo cuví ra testigu vatyí chitó ra tyi tyicuan ri nichón iñi chi ndo cuhva cha chicán tahvi chi ra. Ta chicán tahvi cha cuenda ndo.

¹⁰ Chiquén chi Nyoo na cuví cuhva cuñí ra, ta cuhin nu nyicú ndo, vatyí cha naha xaan cuñí cuhin.

¹¹ Vatyí cuñí tyinyei chi ndo, ta naquehen ndo cha vaha cha chahá Nyoo ta cuní ca iñi ndo.

¹² O cuñí chi catyí vatyí saní yo iñi tahan yo chihin cha chinó iñi yo, tari chinó iñi nyoho ta yuhu ñandhi.

¹³ Yañi, cuñí tyi coto ndo vatyí cuaha xaan chaha cuñí cunyehi nu nyicú ndo, soco nya vityin ta ña chaha chi cuhva chii. Cuñí vatyí cuní ca iñi ndo tari nduní ca iñi ñu vehe ñuhu inga ñuu nu chahin. Vatyí tatu nduní iñi ndo, nduní tucu iñi yuhu.

¹⁴ Vatyí nyaá siqui cha cahin tuhun Nyoo chihin tandihi ñáyivi, an cuví ri ñu ñuu Grecia, an cuví ri ñu inga ñuu, an cuví ri ñu chiñi tuñi, an cuví ri ñu ña cutuñi iñi. Tahán chi cha cahin chihin tandihi ri ñu.

¹⁵ Yucuan chaha, cha cuenda yuhu, cuñí xain cahan tiquí tuhun Nyoo chihin nyoho cha iyó ndo ñuu Roma chiña.

Tuhun Nyoo iyó xaan cha ndicha ñuhu chi

¹⁶ Yuhu ña cahán nui cahín tuhun Nyoo, vatyí ihya cuví fuerza Nyoo cha sacacú chi tandihi ñáyivi cha chinó iñi chi ra. Ta cha xihna ri chi ñu Israel. Ta cha cu uvi, ñu inga ñuu.

¹⁷ Vatyí tuhun Nyoo ihya, sañahá chi chi yo yoso caa sacuvahá Nyoo chi yo nuu ra chihin cha chinó iñi yo chi ra. Ta suri cha cuenda cha chinó iñi yo, coo yo ñayivi chaa chihin ra. Tyehe caa nyaá nu tutu tuhun Nyoo: “Ñu cha nduvaha aña saha Nyoo, coo ñu noo ñayivi chaa chihin cha chinó iñi ñu chi ra.”

Tandihí ñáyivi ta iyó cuatyí ñu

¹⁸ Ta nyehé yo vatyí nya nu nyaá Nyoo nya andivi ta tachí tuñi ra chi ñáyivi quiñi iyó, ñáyivi ña vaha. Ta cha quiñi iyó ñu, ña chahá chi coto ñu cha ndicha.

19 Chitó vaha ñu tyi tuhun vaha cuví tuhun Nyoo vatyí suri maa Nyoo sañahá ra chí ñu.

20 Vatyí vasi ña nyehé yo chí ra, cuví coto yo vatyí iyó ra vatyí nyehé yo tandihí cha savahá ra. Nyata chinó ñuhu ñáyivi ta tandihí cha savahá ra ta sañahá chí chí yo vatyí maa ra cuví Nyoo, ta tunyee iñi cha iyó chí ra ma ndihí maa. Yucuan chaha ma cuví catyí ñáyivi tyi yori Nyoo iyó.

21 Ta vasi cha chitó ñu tyi iyó noo Nyoo cahnu, soco ña sacahnú ñu chí ra tari cuhva tahán chí cha sacahnu yo chí ra. Ni ña nacuhva ñu tyahvi nyoo chí ra. Soco maa maa ri tuhun cha ñima ri tuhun chicá xiñi ñu. Ta cha cuenda cha ndava añima ñu, cutondo cha chiñi tuñi xiñi ñu ta ndoq ñu nu ñaa iñi.

22 Vasi catyí ñu tyi chitó xaan ñu soco ñu tondo cuví ñu.

23 Vatyí cha nuu cha sacahnú ñu chí Nyoo ra cahnu ca cuví, ra ña tuhva chihi; sacahnú ñu chí xitohyo cha caá tari caá ñáyivi tuhva chihi. Ta nyacua nya xitohyo cha tari caá saa, ta coo, ta quití cha cumi tahan chaha, ta sacahnú ñu.

24 Yucuan chaha saña ndaha ndihí Nyoo chí ñu na sacuvi ñu tandihí cha quiñi caa cha quichí cuví iñi ñu. Yucuan chaha maa maa ri tuhun cha cahán nuu yo nyacuví ñu chihin tahan ñu.

25 Vatyí ña chinó iñi ñu cha ndicha vaha Nyoo. Vatyí noo cha ña ndicha, yucuan chinó iñi ñu. Ta sacuvahá ca ñu, ta casacahnú ca ñu cha savahá Nyoo ta ña cuñí ñu sacahnú ñu chí maa maa ra. Vatyí chí maa ra tahán chí sacahnú yo tyicuan ri maa. Ta na cuví chí tyicuan caa.

26 Yucuan chaha saña ndaha Nyoo chí ñu na sacuvi ca ñu cha chahá ticahan nuu chí ñu. Vatyí nyacua nya ñusihí nasama ñu cuhva nyacuví ñu, vatyí ca iyó ñu chihin tahan sihi ñu, ta ña tahán chí tyicuan caa.

27 Ta tyicuan caa tucu rayi, casandihí ra cha ca iyó ra chihin ñasihí ra, ta quichí cuví iñi ra cacoo ra chihin tahan yí ra. Ta canyacuví ra chihin ra tahan ra, tuhun cha chahá ticahan nuu chí ra. Ta cha cuenda cuan tachí tuñi Nyoo chí ra ta tiví ra cha cuenda cha quiñi caa cha canyacuví ra.

28 Ta chaha cha ña cuñí ca ñáyivi na coto nuu ñu chí Nyoo, yucuan chaha saña

ndaha ra chí ñu na caca maa xiñi ñu cha quiñi caa, ta sacuvi ñu cha ña tahán chí sacuvi ñu.

29 Vatyí tandihí nuu cha ña vaha sacuvi ñu. Iyó ñu chihin inga rayi ta ñima yí ñu cuví. Ta iyó ra chihin inga ñusihí ta ñima ñasihí ra cuví. Quiñi xaan iyó ñu. Quichí cuví xaan iñi ñu coo ca chí ñu. Nyacuví ñu cha quiñi caa. Nyiyó xaan iñi ñu cha chí inga ñáyivi. Chahñí ñu. Iyó ñu tisihi chihin tahan ñu. Sandaví ñaha ñu chí tahan ñu. Ta quiñi xaan ca iyó ñu. Ta ñi ñu cuendu.

30 Cahán ña vaha ñu siqui inga ñáyivi. Ta tasi cuñí ñu nyehe ñu chí Nyoo. Tyityi iñi ñu. Ta cahnu sahá ñu chí ñu. Casanducuahá ca ñu cha quiñi caa. Ta ña quichahá ñu chí sutu ñu, ta chí sihi ñu.

31 Ña cuñí ñu tyasoho ñu tuhun vaha. Ña sacuví ñu tuhun cahán ñu. Yori maa chí cuñí ñu. Ta ña casahá ñu ticahnu iñi chí tahan ñu. Ña ndahvi cuñí ñu nyehe ñu chí tahan ñu.

32 Maa ñu chitó vaha ñu ñáá cha catyí Nyoo tyi sacuví ñu, chitó ñu vatyí ñu casacuví cha ña vaha, tahán chí tuhun chihi chí ñu ta cuhun ñu anyaya. Soco maa ñu sañihí ca ñu sacuví ñu. Ta nyacua si cuñí ñu tatu sacuví inga ñáyivi cha quiñi caa.

2

Tachí tuñi Nyoo chí ñáyivi soco chihin cha ndicha

1 Yucuan chaha ñahri siqui tyaá ndo, nyoho ñu cha nyehé cha caá inga ñu ta cahán ndo. Ñahri saha, savahri ñu, yóo ri ñu cuví ndo. Vatyí tatu nyehún cha caá inga ñu ta cahún, suri maun sacouñ cuatyun. Vatyí suri ñn ri cha sacuvún chihin ñu nyehún ta cahún.

2 Vatyí chitó yo vatyí Nyoo tachí tuñi ra chí ñu nyacuví tyehe caa, soco chihin cha ndicha ta chihin cha ndaa, tachí tuñi ra.

3 Ta yoho cha cahán nyaun chí inga ñu, suri ñn ri cha sacuvún chihin ñu. Cutachi tuñi Nyoo chuun cha cahún tyehe caa.

4 ¿Ñáá tuhun ña quichahún cha cundahvi cuñí Nyoo nyehé ra chí yo ta cunyeé xaan ra cha sacuví yo? Vaha xaan ñáyivi cuví ra chihin yo. ¿Atu ña tuví iñun vatyí cha cuenda cha cundahvi cuñi ra nyehé ra chuun, ta nyatú ra cha nasamon cuhva iyón?

⁵ Soco yoho ndava xaan añimon. Ta ña cuñún nasamon cuhva iyón. Ican cuan cuví cuatyun cha sacayá xaun, ta cuxaan ca cuñí Nyoo nyehé ra chuun ta ñihi ca cutachi tuñi ra chuun quiví cutachi tuñi ra chi ñáyiví. Ta cunyehe yo tyi chihin cha ndaa ta chihin cha ndicha tachí tuñi ra chi yo.

⁶ Tatu sacuví yo cha ña vaha, cutahan chi cha ña vaha chi yo. Tatu sacuví yo cha vaha cutahan chi cha vaha chi yo quiví cutachi tuñi ra chi yo.

⁷ Ta cuhva ra ñáyiví cha ma naa ca maa coo ñu cha nanducú cha vaha ta cha cahnu cuví Nyoo, ñu nanducú cuvaha nuu ra, ñu cha cuñí coo tyicuan ri maa. Cuhva ra tandihí cuan chi ñu cha cuenda vatyí sacuví ñu maa maa ri cha vaha chihin cha cama iñi ñu.

⁸ Soco ñihi xaan cutachi tuñi ra chi ñáyiví sacuví cuhva cuñí maa, ta ña cuñí ñu quichaha ñu tuhun ndicha Nyoo, ta sacuví ñu cha ña vaha.

⁹ Cuaha xaan tindocho ta tucuihya iñi cunyehe tandihí ñu casacuví cha ña vaha. Ta cha xihna ri cutachi tuñi ra chi ñu ñuu Israel, ñáyiví cuenda ra. Ta tyicuan caa tucu cutachi tuñi ra chi ñu cha ñima ñu Israel cuví.

¹⁰ Soco chi tandihí ñu cha sacuví cha vaha, Nyoo cucuhva ra cha cucahnu ñu chihin ra, cha xihna ri chi ñu Israel, tyicuan ta chi ñu cha ñima ñu Israel cuví. Ta cucatyí ra tyi sñ cuñi ra chihin ñu. Ta cucuhva ra cha taxi ri coo añima ñu.

¹¹ Vatyí Nyoo ña cachí ra chi yo. Cuví ri yo ñu chitó, o cuví ri yo ñu ña chitó, ñn ri cuhva cuñí maa ra chi yo.

¹² Vatyí tandihí ñu casacuví cuatyí ta ña chitó ñu ley cha chahá Nyoo chi ra Moisés, cunaa ñu nuu Nyoo soco ñima cha cuenda tuhun cha catyí ley cuan. Ta ñu casacuví cuatyí ta chitó vaha ñu ley cha chahá Nyoo chi ra Moisés, cutachi tuñi Nyoo chi ñu yoso cuhva catyí suri maa nuu ley cuan.

¹³ Vatyí ñu cha chiñí ley, ta ña nyacuví ñu cuhva catyí Nyoo, ñima ñáyiví vaha cuví ñu nuu ra. Soco tyehe ta iyó noo ñu sacuví cuhva catyí ley, ican ñu cuan, vaha ñu nuu Nyoo.

¹⁴ Tatu ñima ñu Israel cuví ñu ta ña chitó ñu ley cuan, soco tuví iñi ñu yoso caa coo

ñu; cha tuví iñi ñu chichi añima ñu, ican cuví ley ñu.

¹⁵ Vatyí chihin cuhva iyó ñu, sañahá ñu vatyí añima ñu ñohó ley Nyoo. Cha chiñi tuñi ñu cuví cha ndaa cuenda ñu, vatyí suri maa ñu tuví iñi ñu tatu vaha o ña vaha cha nyacuví ñu.

¹⁶ Cha tyaa Nyoo tyiño chi ra Jesucristo vatyí coo quiví cusandaa ra cuatyí tandihí ñáyiví iyó siqui ñuhu ñáyiví cha cuenda tandihí tuhun xehe cha sacuví ñu. Tari cuhva catyí tuhun Nyoo cha cahín chihin ndo, tyicuan caa cusandaa ra cuatyí yo.

Ñu Israel nyicón ñu ley cha chahá Nyoo chi ra Moisés

¹⁷ Soco yoho catyún tyi ra Israel cuvún. Ta catyún tyi sacuvún cuhva catyí ley cha chahá Nyoo chi ra Moisés, ra cuví nuu chi ñu Israel quiví cuan. Ta cahnu sahún chuun tyi catyún tyi caá tuhun Nyoo añimon.

¹⁸ Ta chitón cuhva cuñí Nyoo ta ley cuan sañahá chi chuun cha nacachún cha vaha, catyún.

¹⁹ Ta vaha xaan sañahún ityi chi ñu cuaa, cuñí maun. Vaha xaan sacatón ñuhú chi ñu cuahan nu ñaa iñi, cuñí maun.

²⁰ Ta cuñí maun vatyí chitón saquehen ityun chi ñu cha ña chitó. Ta vatyí chitón tandihí cui ley ta cha ndicha, chitón yoso caa sañahun chi ñu ña chitó, cuñí maun.

²¹ Tatu tyicuan caa yoho sañahun chi inga ñáyiví, ¿ñáá tuhun ña sañahun chi maun? Tatu suri maun catyún vatyí ña tahán chi suhu yo, ¿ñáá tuhun cha tyi maun suhún?

²² Tatu suri maun catyún vatyí ña tahán chi coo inga ñusihí chi noo rayñi, o inga rayñi chi noo ñaha sihi, ¿ñáá tuhun cha vatyí maun tyicuan caa sacuvún? Tatu tasi cuñún chi xitohyo, ¿ñáá tuhun cha suhún cha tyayñi cha iyó nu nyicú chi chichi vehe ñuhu?

²³ Cahnu sahún chuun vatyí chitón ley Nyoo, soco ticahan nuu chahún chi Nyoo cha cuenda cha ña sacuvún ley cuan.

²⁴ Yucuan chaha vatyí nu tutu tuhun Nyoo catyí chi tyehe caa: “Ñu cha ñima ñu Israel cuví, cahán ña vaha ñu siqui Nyoo cha catyí nyoho”, catyí chi.

25 Ndicha vatyí cha sacuví ñu tuhun cha tahnyá chiin ñi xiñi ndivun ta leun, cha saha ñu circuncidar chuun cuví cuan, tari noo seña cha sañahá vatyí ñáyivi chi Nyoo cuvún. Tuhun cuan tyinyeé chi chuun soco tatu quichahún tandihi ley cha chahá Nyoo chi ra Moisés ñandihí. Soco tatu ña sacuvún cha catyí ley cuan, tari quivi cha ña sacuvun costumbre circuncisión cuví cuan.

26 Soco tatu ñu cha ña sacuví tuhun cuan, ta sacuví ñu cuhva catyí ley Nyoo, cusaha Nyoo tari cha sacuví ñu costumbre circuncisión cuan, vasi ña sacuví ñu.

27 Ra cha ña sacuví costumbre cuan, soco quichahá ra cuhva catyí ley, cusanatuví ra chi yoho cha ña quichahún, ta yoho, ra chitó ley ta ra sacuví costumbre circuncisión cuvún.

28 Vatyí ñima cha cuenda vatyí ñu Israel cuví ndo ta chihin cuan ta cuví ndo ñáyivi chi Nyoo. Ta ni ñima cha cuenda cha sacuví ndo tuhun circuncisión.

29 Vatyí ñáyivi nyaá ley Nyoo aña, ican ñu cuví ñu ñu Israel cha ndicha vaha. Tari quivi tyaá Tatyí li seña cuan aña ñu, ta ñima ñi ri ñu. Tatyí li Nyoo sacuví cuan, ñima ley cha nyaá nuu tutu. Ta ñáyivi ihya cucuví ñu ñu vaha nuu Nyoo, ta ñima nuu ñáyivi ri.

3

1 Tatu tyicuan caa, ¿ñaá cha tyinyeé chi yo cha cuví yo ñu Israel? ¿O atu tyinyeé chi chi yo cha sacuví yo tuhun circuncisión?

2 Cuaha cuhva tyinyeé chi. Cha xihna ri, Nyoo chahá ra ley maa ra chi yo ñu Israel.

3 Soco yoso caa tatu yihí ñu Israel ta ña chinó iñi ñu cuhva catyí Nyoo, ¿atu cha catyí ñu cuan ta ma sacuví ca Nyoo cuhva catyí ra?

4 ¡Ñima! Soco na saha yo cuenda vatyí Nyoo ndicha ra. Sacuví ra tandihi cuhva cha catyí ra. Vasi tandihi ñáyivi cahán ñu cuendu. Vatyí nu tutu Nyoo catyí chi tuhun ra tyehe caa:

Sutu Mañi yuhu, cunyehe ñáyivi vatyí ñahri cuendu cahún.

Ta cunyehe vaha ñu chuun vatyí ndicha cha cahún.

5 Chitó yo vatyí vaha ca quetuví noo cha ndi tatu nyaá noo cha mecu xiin. Ndi

xaan ca nyehe cuan. Cha ndicha cuví cuan. Soco catyí ñáyivi vatyí tyicuan caa tucu maa Nyoo chihin yo, ndi xaan ca natuví ra tatu yoó ta cunyacuví ca yo cha quiñi caa. Sacahnú yo chi ra cuví cuan, catyí ñu. Tyicuan ta ña tahán chi tachi tuñi ra chi yo, catyí ñu. Soco tatu tachí tuñi ra chi yo, ña vaha ra vatyí yoó sacahnú yo chi ra, catyí ñu.

6 Ña vaha cuhva cahán ñu, vatyí tyehe ta ña vaha Nyoo ma cuví tachi tuñi ra chi yo. Soco chitó yo tyi tahán chi tachi tuñi ra chi yo cha cuenda cuatyí yo.

7 Tatu nyehe yo tyi vaha Nyoo chihin cuatyí sacuví ñáyivi, ¿atu tahán chi tachi tuñi ra chi ñu? Catyí ñu tyi ña tahán chi, soco ña ndicha.

8 Tyehe ta ndicha cha cahán ñu cuan, vaha taxin ca sacuví yo maa maa ri cha quiñi caa tacuhva nyehe ñáyivi tyi Nyoo vaha ra. Yihí ñu catyí ñu tyi tyicuan caa sañahá ndi. Ta cutachi tuñi Nyoo chi ñu chaha cha catyí tyi cahán ñu cuendu siqui ndi.

Tandihí yo ta iyó cuatyí yo

9 Ta yoso caa ¿atu vaha ca yoó ñu Israel ta ñima ca inga ñáyivi? ¡Ñima! Vatyí cha yaha sañahi chi ndo vatyí iyó cuatyí tandihí yo. An cuví ri yo ñu Israel, an cuví ri yo ñu cha ñima ñu Israel cuví, soco iyó maa cuatyí yo.

10 Tyicuan caa catyí nu tutu Nyoo, nu catyí chi tyehe caa:

Yori maa ñáyivi vaha iyó, cha ni ña noo maa.

11 Yori ñu cutuñi iñi tuhun Nyoo.

Yori maa nanducú chi Nyoo.

12 Tandihí ñu sandoo ñu chi Nyoo, ta tandihí ñu ta sacuna ñu chi ñu.

Yori maa ñu sacuví cha vaha.

Cha ni ña noo maa.

13 Tari noo ñaña ndiyi cha tacohó yuhu cuví sucun ñu.

Vatyí quiñi xaan cahán ñu.

Ta cahán ñu cuendu. Tari cha venenu coo yihí yuhu ñu vatyí cahán uhvi ñu chi tahan ñu.

14 Maa maa ri ca maa cha quiñi caa cahán ñu.

15 Yatyí xaan ñu cha cacahñi ñu chi tahan ñu.

16 Chahá xaan ñu tundoho ta tucuihya iñi chi ñáyivi chihin cuhva iyó ñu.

17 Ta ña chitó ñu yoso caa cuhva coo taxi ri ñu chihin Nyoo, ni chihin tahan ñu.

18 Ni ña chicá iñi ñu tatu tachi tuñi Nyoo chi ñu noo quívi, catyí chi nu tutu Nyoo.

19 Chitó yo vatyí tandihí cha catyí ley chahnu cha quehen cuenda ra Moisés, catyí chi cha cuenda ñu nyicón ley cuan, tacuhva vatyí ma cuví catyí ñu tyí ñahri cuatyí ñu. Soco coto ñu vatyí cutahan chi cutachi tuñi Nyoo chi ñu vatyí iyó cuatyí ñu. Ta tyicuan caa tucu tandihí ñáyivi iyó siqui ñuhu ñáyivi.

20 Ni minoo ñáyivi ma cuví cuvaha ñu nuu Nyoo cha cuenda tyí sacuví ñu cuhva catyí ley. Soco ley cuan nyaá chi cha cuenda vatyí sacotó chi chi yo tyí iyó cuatyí yo.

Cha cuenda cha chinó iñi yo chi Nyoo ta cuvaha yo nuu ra

21 Soco vityin sandoó yo inchiyo xiin ley cuan ta cua nyehe yo vatyí iyó noo cuhva cuvaha yo nuu Nyoo. Suri maa Nyoo sañahá ra chi yo nu tutu tuhun ra cha tyaa profeta ta cha naha. Tatu sacuahá yo yucuan, coto yo noo cha ndicha.

22 Vatyí cha cuenda cha chinó iñi yo chi ra Jesucristo ta cuvaha yo nuu ra, ta sahá ra tuhun tyí ñahri cuatyí yo. Ta ña cachí ra chi yo tatu ñu Israel cuví yo o ñima.

23 Tandihí ri ñáyivi sacuví ñu cuatyí, ta cañi xaan nyaá ñu chihin cuhva cuñí Nyoo, ta cha tyaquí Nyoo ma cuví cunyaa chihin ñu.

24 Soco cha cuenda cha vaha ñáyivi cuví Nyoo chihin yo, chahá maa ra cha cuvaha yo nuu ra, ta ña tñin cuenda ca ra cuatyí yo. Vatyí chahnyá ra Cristo Jesús cuatyí yo.

25 Nyoo saquichí ra chi ra Cristo vatyí cati ñiñi ra ta cúvi ra nu cruzi cha catyí cuatyí yo. Ta vityin cuví saha Nyoo tucahnu iñi chi yo tatu chinó iñi yo chi ra Cristo. Ta cuví chi tyehe caa, tacuhva nyehe ñáyivi tyí Nyoo vaha ra. Ta tyembu chahnu, Nyoo ña tñin cuenda ra cuatyí ñáyivi cha cuenda vatyí cuchaa chi noo quívi cha cuquichi ra Cristo ta sanaa ra cuatyí ñu.

26 Ta tyicuan caa cuví tacuhva vatyí nyehé ñáyivi vatyí Nyoo tyicuan ri vaha ra, ta sahá ra tuhun tyí vaha tandihí ñu chinó iñi chi ra Jesús.

27 ¿Atu cuví sacahnu yo chi yo vityin? Ma cuví. ¿Ñáá tuhun? Cha cuenda vatyí ma cuví catyí yo vatyí sacuví yo cha catyí ley, ta yucuan chaha vaha yo nuu Nyoo. Vatyí cha cuenda cha chinó ri iñi yo chi ra ta cuvaha yo nuu ra.

28 Cha chitó vaha yo vityin vatyí Nyoo sacuvahá ra chi yo nuu ra chihin cha chinó iñi yo chi ra, ta ñima chihin cha sacuví yo cha catyí ley ta cuvaha yo nuu ra.

29 ¿Atu Nyoo cuenda ñu Israel ri cuví ra? ¿Atu ñima suri ra cuví Nyoo ñu cha ñima ñu Israel cuví? Suri Nyoo tucu ñu cuan cuví chi ra.

30 Vatyí noo tuhun ri maa ra iyó. Ta ican ra sacuvahá ra chi yo nuu ra cha cuenda cha chinó iñi yo chi ra. Cuví ri yo ñu sacuví tuhun circuncisión cuan, o cuví ri yo ñu ña sacuví.

31 Tatu tyicuan caa, ¿atu ña vaha ca ley chahnu cuan? ¡Ñima cha ña vaha ca! Vaha. Soco vityin chihin fuerza maa ra Cristo sañahá yo vatyí ndi maa cha catyí ley cuan ta ndicha.

4

Cuhva chiyo ra Abraham sañahá chi chi yo yoso caa cuvaha yo nuu Nyoo

1 ¿Ñáá cha catyí yo cha cuenda ra Abraham sutu chahnu yo? ¿Ñáá cuenda catyí Nyoo vatyí vaha ra?

2 Tyehe ta cuvahá ra nuu Nyoo cha cuenda cha sacuví ra cha vaha, yucuan ndicha, cuví sacahnu ra chi ra, soco ñima nuu Nyoo.

3 Vatyí ¿ñáá catyí nu tutu tuhun Nyoo? Catyí chi vatyí ra Abraham chinó iñi ra chi Nyoo, ta cha cuenda cha chinó iñi ra chi Nyoo, Nyoo sahá ra tuhun tyí vaha ra.

4 Vaha, vityin cuacuhve noo cuhva chi ndo: Tatu minoo ra sacuví ra noo tyiño, yahvi cha quehén ra ñima cha ñihi caha ra cuví, soco yahvi tyiño sahá ra, ican cuví.

5 Soco tatu noo ra cha ña saha tyiño ta ñihi ra cha ñihi ra, noo cha ñihi caha ra cuví. Ta tyicuan caa cuví chihin noo ra cha ña nducu cuhva cacu cha cuenda cha sacuví ra ley, soco chinó iñi ra vatyí Nyoo sahá ra tucahnu iñi chi ñu iyó cuatyí, Nyoo cusaha

ra tuhun tyi vaha ra cha cuenda cha chinó iñi ra chi ra.

⁶ Ra David cahan ra tuhun tusi iñi cha iyó chi ñáyivi cha saha Nyoo tuhun vatyí vaha ta ña tñn cuenda ra cuatyí cha sacuvi ñu.

⁷ Tyehe caa catyí ra David:

Ñáyivi cha saha Nyoo tucahnu iñi cuatyí, si xaan cuñi ñu, vatyí Nyoo ña tñn cuenda ra cuatyí ñu.

⁸ Si xaan cuñi ñu ña tñn cuenda Nyoo cuatyí.

⁹ ¿Atu cha cuenda ri ñu sacuvi tuhun cha tahnya ñi cuví tusi iñi ihya, o cuví tucu chi cha cuenda ñu ña sacuvi cuan? Cha yaha sañahi chi ndo vatyí Nyoo saha ra tuhun tyi vaha ra Abraham cha cuenda cha chinó iñi ra chi ra.

¹⁰ Soco ¿ama saha ra tuhun tyi vaha ra? ¿Atu cha ni cumañi ca sacuvi ra Abraham tuhun circuncisión cuan, o cha yaha? Ñima nya cha yaha, soco cha ni cumañi ca.

¹¹ Yaha cuan ta sacuvi ra Abraham tuhun cuan, tari noo seña ri o sellu vatyí Nyoo cha yaha saha ra tuhun tyi vaha ra cha cuenda cha chinó iñi ra chi ra. Ta cha cuenda ihya cuví ra Abraham tari noo sutu tandihí yo ñu chinó iñi Nyoo vasi ña sacuvi yo tuhun circuncisión. Ta tyicuan caa, Nyoo saha ra tuhun vatyí vaha yo.

¹² Ndicha vatyí ra Abraham cuví tucu ra sutu ñu casacuví tuhun cuan, soco tatu chinó tucu iñi ñu chi Nyoo tari chinó iñi tucu maa ra Abraham sutu chahnu yo, quivi cha ta sacuvi ca ra tuhun cuan.

Chihin cha chinó iñi yo ta ñihi yo cha chahá Nyoo chi yo

¹³ Vatyí Nyoo catyí ra chi ra Abraham ta chi sehe ra vatyí cuhva ra cha cunyaca ñaha ñu ñuhu ñáyivi chihin ra. Soco savaha Nyoo promesa cuan, ñima cha cuenda vatyí ra Abraham sacuvi ra cha catyí ley, soco cha cuenda vatyí chinó iñi ra chi Nyoo, ta Nyoo saha ra tuhun vatyí vaha ra.

¹⁴ Tyehe ta maa maa ri ñu cha sacuvi cuhva catyí ley, cuñihi ñu noo cha cucuhva Nyoo, ñahri yahvi nyaá cha chinó iñi yo chi Nyoo, ta ni ñahri yahvi nyaá cha catyí ra tyi cuhva ra chiyo.

¹⁵ Vatyí ley cuan sañahá chi vatyí tahán chi tachi tuñi Nyoo chi yo tatu ña sacuvi yo cuhva catyí chi. Soco tyehe ta ñahri ley iyó, ñahri cuatyí yo coo.

¹⁶ Yucuan chaha cuñihi yo promesa Nyoo cha cuenda cha chinó iñi yo chi ra, tacuhva vatyí cuví chi noo tumañi iñi cha chahá ra chi tandihí yo cha cuví yo ñáyivi chi ra Abraham. Ñima ñu chinó ri iñi chi Nyoo ta quichahá ley cuan cuñihi, soco cuñihi tucu ñu cha ña ita iñi ley, soco chi Nyoo ri chinó iñi ñu tari chinó iñi ra Abraham. Ican ra cuví sutu tandihí ñáyivi cha chinó iñi chi Nyoo.

¹⁷ Vatyí tari catyí Nyoo nu tutu ra tyehe caa: “¿Yoho cucuvun tari noo sutu cuaha xaan ñáyivi?”, coo siqui ñuhu ñáyivi”, catyí ra chi ra Abraham. Ta cha catyí ra tyicuan caa, cuñi chi vatyí vatyí cuví yo sehe ra Abraham nuu Nyoo. Chinó iñi ra Abraham chi Nyoo, vatyí Nyoo sanandotó ra ndiyi, ta chihin tuhun cahan ra sacoó ra cha cumañi ca coo.

¹⁸ Ra Abraham chinó iñi ra chi Nyoo vasi ma cuví ñihi ra promesa cuan tyaá maa ra cuhva, vatyí cha chahnu xaan ra. Soco yihí iñi ra cha cuñihi ra. Ta tyicuan caa, ñihí ra promesa Nyoo ta cuví ra sutu cuaha ñáyivi, tari cuhva catyí Nyoo chi ra: “Tyehe caa cucucuaha ñáyivi chuun”, catyí ra chi ra.

¹⁹ Ra Abraham ña sandihí ra cha chinó iñi ra, vasi cha noo cientu cuiya ra ta tuví iñi ra vatyí cha cuñi cúvi ra. Tari maa ra ta tari cu Sara ñasihí ra, ma cuví ca coo sehe ñu, tyí cha chahnu xaan ñu.

²⁰ Soco ña ndu uvi iñi ra cha cuñihi ra cha catyí Nyoo tyi cuhva ra chi ra. Soco chinó iñi ra chihin cha ñi iñi ra. Ta yihí ca iñi ra chi Nyoo. Ta sacahnú ra chi ra,

²¹ cha cuenda vatyí chitó vaha ra vatyí Nyoo iyó tunyee iñi chi ra cha cusacuví ra cha catyí ra chi ra.

²² Yucuan chaha Nyoo saha ra tuhun tyi vaha ra cha cuenda cha chinó iñi ra chi ra.

²³ Saha Nyoo tuhun vatyí vaha ra Abraham chaha cha chinó iñi ra chi ra. Ña chicunyaá nuu tutu vatyí noo ri ra Abraham cuvaha ra,

²⁴ soco chicunyaá tucu nuu tutu cha cuenda yoó. Vatyí saha Nyoo tuhun tyi vaha tucu yo vatyí chinó iñi yo chi ra, vatyí

ican ra sanandoto chi ra Jesús, Sutu Mañi yo.

²⁵ Ta maa ra chaha cuenda chi ra Jesús tyi cúvi ra cha cuenda cuatyí yo, ta nandoto ra tacuhva vatyí cuví cuvaha yo nuu ra.

5

Vityin cha nicoo vaha yo chihin Nyoo, cuaha cha vaha cucuhva ra chi yo

¹ Ta cha yahá nduvaha ñima yo nuu Nyoo cha cuenda cha chinó ñi yo chi ra, nicoo vaha yo chihin ra cha cuenda Sutu Mañi yo Jesucristo.

² Vatyí cha cuenda ra Cristo ñihí yo cha vaha Nyoo cha cuenda cha chinó ñi yo chi ra. Yucuan chaha ñi ñi yo ta sñi cuñí yo, ta yihí vaha ñi yo vatyí cucuhva ra cha cucahnu cuví yo chihin ra.

³ Ta ñima yucuan ri cusñi cuñí yo, tahán tucu chi cusñi cuñí yo quívi nyehé yo tindoho. Vatyí chitó yo vatyí cha nyehé yo tindoho cuan cutuhva ca yo coo cha cama ñi yo.

⁴ Ta tatu chihin cha cama ñi yo, yahá yo tindoho, quita vaha yo nuu Nyoo. Ta yucuan ta chitó vaha yo tyi cuñihi yo ndi maa cha cucuhva ra chi yo.

⁵ Tatu yihí ñi yo chi maa ra, ma cucahan nuu yo nyehé yo chi ra, vatyí cuñí xaan ra chi yo cha cuenda Tatyí li ra cha chaha ra cunyaa ñima yo.

⁶ Vatyí quívi cha ña ñihí ca yo yoso caa sacuvi yo chihin cha cuaha cuatyí yo, quívi cuan quichí ra Cristo, quichí cúvi ra cha cuenda yo ñu iyó cuatyí.

⁷ Chitó yo vatyí yori caña ñi cúvi tyiño nuu noo ñáyivi. Vasi xityi ri caña ñi ñu cuhva ñu ñáyivi ñu cha cuenda noo ñu vaha xaan.

⁸ Soco yucuan cuví nu sañaha Nyoo vatyí cuñí ra chi yo, vatyí quichí cúvi ra Cristo cha cuenda yo vasi iyó xaan cuatyí yo.

⁹ Ta vityin cha cha yahá cuvaha yo nuu Nyoo cuenda cha chihí ra Cristo, yucuan chaha chitó vaha yo tyi ma cahun ca yo anyaya nu cutachi tuñi Nyoo chi ñáyivi ña chinó ñi chi ra.

¹⁰ Quívi cuan xaan cuví ñi yo chi Nyoo, soco sanicoo vaha ra chi yo chihin ra cha cuenda cha chihí Sehe ra. Yucuan chaha

chitó vaha yo tyi cusacacu ndihi ra chi yo vatyí iyó ñáyivi ra Cristo ñima yo vityin cha iyó vaha yo chihin ra.

¹¹ Ta ñima ihya ri, soco cusñi tucu cuñí yo chihin Nyoo cha cuenda Sutu Mañi yo Jesucristo, vatyí cha cuenda ra nicoo vaha yo chihin Nyoo.

Ra Adán ta ra Cristo

¹² Cha cuenda noo rayñi quihvi cuatyí siqui ñuhu ñáyivi ta chicoo tuhun chihí. Ta tuhun chihí cuan chicoo chi siqui tandihí ñáyivi vatyí tandihí ñu sacuví ñu cuatyí cha cuenda ra Adán.

¹³ Nyata ni cumañi ca cuhva Nyoo ley chi ra Moisés ta cha iyó cuatyí siqui ñuhu ñáyivi, soco ña tñn Nyoo cuenda cuatyí ñáyivi ta ni cumañi ca cuhva ra ley cuan.

¹⁴ Soco nyacua nya quívi ra Adán ta nyacua nya quívi ra Moisés, chinyaca ñaha tuhun chihí chi ñu cha sacuví cuatyí, vasi ñima tahan cuatyí ra Adán cuví, cha ña quichaha ra chi Nyoo. Ta ra Adán cuví ra tari noo xiñahñu noo ra cha cua quichi.

¹⁵ Soco cuatyí ra Adán ña ndiquí tahan chi chihin tumañi ñi cha chaha Nyoo chi yo. Vatyí cha cuenda cuatyí noo rayñi cuan, cuaha xaan ñáyivi chihí. Soco sacacú Nyoo chi yo cha caha ri, cha cuenda noo ri rayñi ta ican ra ihya cuví ra Jesucristo. Ta cahnú xaan ca cuví cuan. Ta cha cuenda cha vaha chi cuaha ñáyivi cuví.

¹⁶ Cuatyí noo ri rayñi ra Adán cuan, ma cuví ndiquí tahan chi chihin cha sacacú Nyoo chi yo. Vatyí cha cuenda cuatyí noo ri ra cuan, Nyoo tachí tuñi ra chi ñáyivi. Soco vityin chihin cha ñahri tyiyahví yo, Nyoo sacacú ra chi yo ta sahá ra tuhun tyi vaha yo nuu ra, vasi cuaha xaan cuatyí sacuví yo.

¹⁷ Ndicha vatyí quichaha nyaca ñaha tuhun chihí siqui ñuhu ñáyivi cha cuenda cuatyí noo ri rayñi. Ta cha tyicuan caa chitó yo vatyí cahnú ca cuví cha vaha cha sacuví nonga ra, ra Jesucristo. Vatyí tandihí ñu cha ñihí cha vaha cha chahá Nyoo, cha cuvaha ñu nuu ra, ta iyó ñu ñáyivi chaa chihin tunyee ñi ra Jesucristo.

¹⁸ Tari cha catyí cuatyí ra Adán ta tachí tuñi Nyoo chi tandihí ñáyivi iyó siqui ñuhu ñáyivi, tyicuan caa tucu cha cuenda cha

vaha cha sacuvi ra Jesucristo, Nyoo saha ra tuhun tyi vaha ñáyiví nuu ra ta chahá ra noo ñayiví vaha coo tandihí ñu.

¹⁹ O cuñí chi catyí tyehe caa: Cha cuenda cha ña quichaha ra Adán cuan nu cahán Nyoo, cuaha xaan ñu chicoo cuatyí ñu. Ta suri tyicuan caa tucu cha catyí cha quichaha ra Cristo nu cahán Nyoo, cuaha xaan ñu cucuvaha ñu nuu Nyoo.

²⁰ Vatyí Nyoo chaha cuenda ra ley cuan chi ra Moisés tacuhva nacoto ñáyiví tyi iyó cuatyí ñu. Ta vasi quetuví xaan cuatyí yo cha cuenda ley cuan, soco Nyoo cahnu ca tucahnu iñi iyó chi ra chihin yo vatyí cuñí xaan ca ra chi yo.

²¹ Tari chinyaca ñaha cuatyí chi yo ta chaha chi tuhun chihí chi yo, tyicuan caa tucu nyacá ñaha tumañi iñi Nyoo chi yo vityin ta sacuvaha ra chi yo nuu ra vatyí coo yo noo ñayiví cha ma naa ca maa cha cuenda Sutu Mañi yo Jesucristo.

6

Ma sacuvi ca yo cuatyí soco sacuvi yo cuhva catyí ra Cristo

¹ ¿Yoso caa catyí yo vityin? ¿Atu cusacuvi ca yo cuatyí tacuhva vatyí sañaha Nyoo vatyí cuaha xaan tucahnu iñi iyó chi ra?

² Ma sacuvi ca yo. Yoó cha yaha ndu uvi iñi yo cuatyí yo. Tari quiví chihí cuatyí yo cuví cuan. Ta ¿yoso caa cuví sacuvi ca yo vityin? Ma cuvi ca.

³ ¿Atu ña chitó nyoho vatyí cha ndu ñn ri yo chihin ra Cristo Jesús cha cuenda cha condutyá yo? Tari quiví chihí yo chihin ra cuví cuan.

⁴ Vatyí cha cuenda cha condutyá yo, tari quiví cha quihví yo chichi ñuhú ñn ri chihin ra Cristo quiví chihí ra cuví cuan. Ta tari nandoto ra Cristo chihin cha ndicha ñuhu Sutu yo Nyoo, tyicuan caa tucu maa yo, tacuhva vatyí coo yo noo ñayiví chaa chihin ra.

⁵ Ta ñn ri coño ñuhu nanduví yo chihin ra, tari quiví chihí yo ñn ri chihin ra cuví cuan, ta cha tyicuan caa, cunandoto tucu yo tari nandoto ra.

⁶ Ta chitó yo vatyí tandihí cuhva chiyo yo ta ityi chata ca, cha yaha chihí chi nu cruzi chihin ra Cristo, tacuhva vatyí coño ñuhu

cuatyí yo ma cuvi ca cunyaca ñaha chi chi yo.

⁷ Vatyí ñu cha yaha chihí, ma cuvi ca sacuvi ñu cuatyí.

⁸ Ta tatu cha yaha chihí yo chihin ra Cristo, chinó iñi yo vatyí cucoo tucu yo chihin ra.

⁹ Ta chitó yo vatyí cha yaha chihí ra Cristo, noo ri chaha nandoto ra, ta ma cúvi ca ra. Ñahri ca tunyee iñi iyó chi tuhun chihí cha cunyaca ñaha ca chi chi ra.

¹⁰ Yaha cha chihí ra Cristo cha catyí cuatyí ñáyiví, nandoto ra cha ma cúvi ca maa ra. Ta vityin iyó ra cha cuenda maa Nyoo.

¹¹ Ta tyicuan caa tucu maa yo, ma sacuvi ca yo cuatyí. Saha yo tuhun tyi cha yaha chihí yo cha cuenda cuatyí cuan. Soco coo yo cuhva cuñí Nyoo cha cuenda cha ñn ri cuví yo chihin ra Cristo Jesús Sutu Mañi yo.

¹² Yucuan chaha yoó ma cuhva yo ityi cha cunyaca ñaha ca cuatyí chi coño ñuhu yo. Ma cuhva yo ityi chi coño ñuhu yo cha saniñi chi chi yo cha sacuví yo noo cha ña vaha cha cuñí chi.

¹³ Ma cuhva yo ityi chi coño ñuhu yo cha sacuví chi cha quiñi caa. Soco cuhva cuenda yo chi yo chí Nyoo, tari noo ñáyiví cha chihí ta nandoto. Cuhva cuenda yo coño ñuhu yo chí Nyoo tacuhva vatyí sacuvi yo cha vaha.

¹⁴ Vatyí cuatyí yo ma cuvi ca chasaha chi chi yo. Vatyí ley cha tyaa ra Moisés, ña nyacá ñaha ca chí chi yo, soco cha cacu añima yo ta iyó yo cha cuenda tumañi iñi cha chahá Nyoo chi yo.

Cuví yo tari noo musu cha sacuví cha vaha

¹⁵ Iyó yo cha cuenda tumañi iñi cuan, ta vityin ña nyacá ñaha ca ley chi yo. ¿Ta tatu ña nyaca ñaha ca ley chi yo, atu tahán chi sacuvi ca yo cuatyí? Ña tahán chi.

¹⁶ Nyoho chitó vaha ndo vatyí tatu cuví ndo musu noo ra, tahán chi sacuvi ndo cha catyí ra cuan. Ta tyicuan caa cuví yo musu ra cha tuhvá yo quichahá chi. Yucuan chaha tatu quichahá yo cha cuñí cuatyí cha sacuvi yo, tari noo chitoho yo cuví cuatyí cuan, vatyí quichahá yo chí cuan. Ta cunaa yo chihin cuan. Soco tatu quichahá yo chí Nyoo, cusaha ra tuhun tyi vaha yo.

17 Soco tyahvi nyoo chi Nyoo, tyi nyoho nu quichi chi cuvī ndo noo musu chi cuatyī vatyī quichahā ndo chi cuan. Soco vityin chihin cha nī iñi ndo quichahá ndo tuhun Nyoo cha sañahá ñu chi ndo.

18 Cha yahā cundaā cuatyī ndo, ta vityin ña nyacá ñaha ca chi chi ndo. Ta vityin cuvī ndo noo musu cha cua sacuvi cha vaha.

19 Cahín noo kuhva cha ña yī ri chihin ndo vatyī ta cutuñi vaha ca iñi ndo tuhun Nyoo. Quivī cuan chahā cuenda ndo coño ñuhu ndo chi cha quiñi caa ta cha ña vaha vatyī sacuvī ndo cha ña vaha. Vityin naçuhva cuenda ndo coño ñuhu ndo chi Nyoo tacuhva vatyī coo ndo noo ñayivī cachi, ta maa maa ri cha vaha sacuvi ndo nuu ra.

20 Quivī cuvī ndo musu cha quiñi caa, ña cuvī sacuvi ndo cha vaha.

21 Soco ¿ñáá cha ñihī ndo chihin cuan? Maa ri tīcahan nuu chahā cuan chi ndo. Ta ña tuvī iñi ndo. Maa ri tuhun chihi ta anyaya nyisó cuan.

22 Soco vityin ña nyacá ñaha ca cuatyī chi ndo. Ta vityin cha sacuvī ndo tyiño nuu Nyoo. Ta ihya ndicha tyinyeé chi chi ndo vatyī chihin ihya cuvī coo ndo noo ñáyivī cachi. Ta nu ndihī tuhun tyicuan ri maa cucoo ndo chihin Nyoo.

23 Cha sacuvī yo cuatyī, ican cuan chahá tuhun chihi chi yo. Soco tumañi iñi cha chahá Nyoo chi yo, ican cuan cuvī ñayivī cha ma naa ca maa. Ta ican cuan chahá ra ta ñahri tyiyahvi yo, cha cuenda cha ñin ri cuvī yo chihin ra Cristo Jesús, Sutu Mañi yo.

7

Ña nyacá ñaha ca ley chahnu chi ñu yihí cuenda ra Cristo

1 Yañi, nyoho ñu chitó ley cuvī ndo, chitó ndo vatyī ley nyacá ñaha chi chi noo ñáyivī cha ni ri ca cha iyó ñu.

2-3 Ta cuñun, noo ñaha tandaha, catyī ley vatyī coo ña chihin yī ña nyacua nya cúvi ra. Ta tatu iyó ña chihin inga rayī cha ni ri cha iyó yī ña, chicoo cuatyī ña nuu Nyoo. Soco tatu cha yahā chihi yī ña, ña nyacá ñaha ca ley cuenda ñu tandaha chi ña, ta cuvī tandaha ña chihin inga ra, ta ma coo cuatyī ña nuu Nyoo.

4 Ta tyicuan caa tucu nyoho yañi. Cha chihi ndo cha cuenda ley chahnu ta cuvī ndo ñu cuenda ra Cristo vatyī ican ra cuvī yī ndo vityin. Ta ican ra cuvī ra cha nandotq, tacuhva vatyī cuvī cotyño Nyoo chi yo ta sacuvi yo cha vaha.

5 Quivī chiyo yo kuhva cuñi coño ñuhu yo, ley chahnu cha tyaa ra Moisés, tacuhva sanaquiqui ri chi chi yo cha sacuvi yo cha quiñi caa, vatyī catyī chi tyi ma sacuvi yo. Soco sacuvī yo, ta yucuan cuvī cha chahā tuhun chihi chi aña yo.

6 Soco vityin ña nyacá ñaha ca ley chahnu cuan chi yo, vatyī cha yahā chihi cha quiñi caa yo chihin ra Cristo. Ta vityin cuvī sacuvi yo tyiño nuu Nyoo vatyī iyó yo ñayivī chaa cha chahá Tatyī Ii Nyoo chi yo, ta ña sacuvī ca yo tari sacuvī yo quivī nyicon xaan yo ley chahnu cuan.

Ley Nyoo, ican sañahá vatyī iyó cuatyī yo

7 Ta vityin yoso caa, ¿atu ña vaha ley cuan? Ñima cha ña vaha. Vaha. Soco tyehe ta ña tuvī ley cuan, ma cote ñáá cha cuvī cuatyī. Ni ma cote tyi ña vaha cha quichi cuvī iñi cha chii inga ñáyivī, tyehe ta ña catyī ley cuan vatyī ña vaha.

8 Tyehe ta ñahri ley cuan, ma cote ñáá cha cuvī cuatyī, ta ma cuñi xain sacuvi, soco quivī cha chité ñáá cha cuvī cuatyī, yucuan quivī quichī cuvī xaan iñi sacuvi, vatyī naquiqui cha quiñi caa cha iyó chi. Soco tyehe ta ñahri ley, ma coto yo tyi iyó cuatyī.

9 Ta quivī cha ña chite ñáá tuhun cahan ley cha chahā Nyoo chi ra Moisés, chica iñi vatyī ñahri cuatyī iyó nuu Nyoo. Soco quivī chite ley cuan, ta chite vatyī tahañ chi cunai nuu Nyoo vatyī iyó cuatyī.

10 Catyī ley cuan tyi tatu quichahí chi chi, cucoi tyicuan ri maa. Soco cha nuu cha ñihi tahvi añaime chihin ley cuan, cunaa ndihī nuu Nyoo.

11 Ta cuatyī cha iyó chii, sandavi ñaha chi chii vatyī chotyño chi ley chahnu cuan tacuhva vatyī tahañ chi cunai nuu Nyoo, vatyī ña quichahī nu cahan ley cuan.

12 Ley cha chahā Nyoo chi ra Moisés, vaha xaan, vatyī tuhun cha chahā maa Nyoo cuvī, ta tandihī cha catyī ra vatyī sacuvi yo, vaha xaan ta cuñi xaan.

¹³ Ta ley vaha cuan, ¿atu ican cuan sativí chii? Ñima. Cuatyí cha sacuví, ican sativí chii, yucuan chaha tahán chí cunai nuu Nyoo. Vatyí ley vaha cuan, ican cuví cha sañahá chii vatyí cuatyí cuví cha sacuví. Ta cha tyicuan caa, sañahá ley vatyí quiñi xaan caa cha sacuví yo cuatyí.

¹⁴ Ta chitó yo vatyí ley cuan, Nyoo chaha. Ta ñahri cuatyí ley cuan. Soco mai iyó cuatyí vatyí sacuví cha quiñi caa ta nyacá ñaha cuatyí cuan chii.

¹⁵ Ña cutuñí iñi ñáa cha tahin. Vatyí cuñí sacuvi cha vaha, ta ña cuví sacuvi. Ta cha ña vaha cha ña cuñí sacuvi, ican cuan sacuví.

¹⁶ Cuñí xain sacuvi cha vaha, soco ña cuví sacuvi, ta cha tyicuan caa tiin cuenda vatyí ley chahnu Nyoo, vaha chí.

¹⁷ Ñima ca mai sacuví cha ña vaha, soco cuatyí cha iyó chii, ican cuan sacuví cha ña vaha.

¹⁸ Vatyí chité vatyí iyó cuatyí cha cuenda coño ñuhi. Yucuan chaha ñahri cha vaha sacuví, vatyí quichí cuví iñi sacuvi cha vaha, soco ña cuví.

¹⁹ Cuñí sacuvi cha vaha, soco ña sacuví ta sañihí que sacuvi cha ña vaha.

²⁰ Ta tatu sacuví cha ña cuñí sacuvi, ñima ca mai sacuví, soco cuatyí cha iyó chii, ican cuan sacuví.

²¹ Ta tyehe caa iyó noo cha tahin, tatu cuñí sacuvi cha vaha, maa ri cha ña vaha sacuví.

²² Vatyí chichi añime tahán xaan iñi ley Nyoo.

²³ Soco iyó inga ley chichi coño ñuhi, ta ña tahán iñi chí cuhva cha tahán iñi añime. Ta chahá chí cha cunyaca ñaha cuatyí cha iyó chichi coño ñuhi chii.

²⁴ ¡Ndahvi yuhu ra ndahvi! ¿Yóo ra cusacacu chii tacuhva ma cunai nuu Nyoo chihin cuhva ña vaha cha nyacuví coño ñuhi?

²⁵ Noo tuhun ri maa Nyoo sacacú ra chii cha cuenda ra Jesucristo. ¡Tyahvi nyoo chí Nyoo cha cuenda cuan! Ta vityin nyehí vatyí chihin añime cuñí sacuví ley Nyoo, soco coño ñuhi cuñí chí sacuví chí ley cuatyí.

yo noo ñayiví chaa

¹ Soco vityin, Nyoo ma tachi tuñi ca ra chí ñu ndu ñin ri chihin ra Cristo Jesús, ta ña iyó ca ñu cuhva cuñí coño ñuhu ñu, soco iyó ñu cuhva cuñí Tatyí li ra.

² Ta tyicuan caa tucu yuhu, Tatyí li Nyoo nyacá ñaha chii vityin vatyí ndachí chí chii, ta chahá chí noo ñayiví chaa coi cha cuenda cha ñin ri cuví chihin ra Cristo Jesús. Ta vityin ña nyacá ñaha ca ley cuatyí ta tuhun chíhi chii.

³ Nyoo sacuví ra noo cha ña cuví sacuvi ley cha quehen cuenda ra Moisés, vatyí ña cuví chasaha chí coño ñuhu cuatyí yo cha nyacá ñaha chí yo. Yucuan chaha Nyoo saquichí ra chí Sehe ra. Quichí ra chihin noo coño ñuhu tari maa yo, ta chihí ra cha cuenda cuatyí yo, ta sandihí ra tuhun cha nyacá ñaha cuatyí chí yo.

⁴ Sacuví Nyoo tyehe caa tacuhva cuví sacuvi yo cuhva catyí ley ra, vatyí ñima ca cuhva cuñí coño ñuhu yo iyó yo, soco iyó yo cuhva cuñí Tatyí li Nyoo.

⁵ Vatyí ñu iyó cuhva cuñí coño ñuhu, cuhva cuñí chí chicá xiñi ñu, soco ñu iyó cuhva cuñí Tatyí li Nyoo, cuhva cuñí Tatyí li Nyoo chicá xiñi ñu.

⁶ Ta ñu chicá xaan xiñi maa maa ri tuhun cha cuñí coño ñuhu ñu, cunaa ñu nuu Nyoo. Soco ñu chicá xiñi cuhva cuñí Tatyí li. Iyó cha taxi ri añima ñu ta cucoo ñu ñayiví tyicuan ri maa chihin Nyoo.

⁷ Ñu cha maa maa ri cuhva cuñí coño ñuhu chicá xiñi, ñu xaan iñi chí Nyoo cuví ñu, vatyí ni ña cuñí ñu ta ni ña cuví sacuvi ñu cha catyí ley ra.

⁸ Yucuan chaha ñu iyó cuhva cuñí coño ñuhu, ña cuví sacuvi ñu cuhva tahán iñi Nyoo.

⁹ Soco nyoho ña iyó ca ndo cuhva cuñí coño ñuhu, vatyí tatu ndicha cha iyó Tatyí li Nyoo añima ndo, iyó ndo chihin cha ñin ri cuví ndo chihin Tatyí li Nyoo. Ñu cha yori Tatyí li ra Cristo ñohó añima, ñima ñu cuenda ra Cristo cuví chí ñu.

¹⁰ Soco ñu iyó ra Cristo añima, nyitó añima ñu vatyí sanduvaha Nyoo. Soco coño ñuhu ñu chihí chí cha catyí cuatyí.

¹¹ Nyoo sanandoto ra chí ra Jesús cha yaha cha chihí ra. Ta tyicuan caa tucu nyoho, tatu iyó Tatyí li Nyoo añima ndo,

8

Tatyí li Nyoo tyinyeé chí chí yo ta cuví coo

cusanandoto tucu Nyoo chi coño ñuhu ndo chihin Tatyí Ii ra.

¹² Ta tyicuan caa yañi, nyaá noo cha nyaá siqui yo cha sacuvi yo, soco ñima cha sacuvi yo cuhva cuñi coño ñuhu yo.

¹³ Vatyí tatu iyó ndo maa maa ri cuhva cuñi coño ñuhu ndo, cunaa ndo nuu Nyoo. Soco tatu iyó ndo cuhva cuñi Tatyí Ii Nyoo chihin tunyee ñi ra, cuví chasaha ndo chi cha quiñi caa cha cuñi coño ñuhu ndo ta cuconyito ndo cha ndicha cuii.

¹⁴ Vatyí tandihí ñu sacuví cuhva saquehén ityí Tatyí Ii Nyoo, sehe Nyoo cuví chí ñu.

¹⁵ Nya quiñi cha tiñ cuenda yo Tatyí Ii Nyoo ta ña yuhví ca yo chí ra, vatyí ñima tari noo ra nyacá ñaha chihin cha xaan cuví ra, ta vityin nanduví yo sehe ra. Tatyí Ii sacahán chi yo na cahan yo chihin Nyoo tyehe caa: “Sutu Mañi yuhu”, catyí yo chí ra.

¹⁶ Ta suri maa Tatyí Ii cuan ndu ñin ri chí chihin cha chiñi tuñi yo ta sacoto chí chí yo vatyí cha cuví yo sehe Nyoo.

¹⁷ Ta cha cuenda cha cuví yo sehe ra, iyó ityí chí yo cha ñihi yo cha vaha cha catyí Nyoo tyí cuhva ra chí yo, ñin ri chihin ra Cristo. Vatyí tatu ñin ri nyehé yo tindocho chihin ra Cristo, suri ñin ri cucahnu yo chihin ra.

¹⁸ Chité vatyí tindocho cha nyehé yo vityin, noo cha luhlu ri cuví cha nuu cha tyaqui cha cunyehe yo nachaa yo nuu nyaá Nyoo.

¹⁹ Tandihí cha savaha Nyoo cuñi xaan chí nyehe chí, ta nyatú chí quiñi cha cusañaha ra yóo cha cuví tandihí sehe ra.

²⁰ Vatyí tandihí cha savaha Nyoo tiví chí. Vasi ña cuñi chí tiví chí soco Nyoo chaha ra cha tiví chí cha cuenda cuatyí cha sacuvi ñáyivi. Soco catyí Nyoo tyí coo quiñi ta cunduchaa tucu chí inga chaha.

²¹ Tandihí cha savaha Nyoo ta cunduchaa tucu chí inga chaha, ta ma cutivi ca, quiñi cha cunasama Nyoo cuhva iyó chí vityin. Ta cucusi cuñi chí ñin ri chihin tandihí sehe Nyoo vatyí ma tiví ca chí.

²² Chitó yo vatyí tandihí cha savaha Nyoo ta nyehé xaan chí tindocho. Cahnu xaan tindocho nyehé chí tari cha uhvi cha nyehé noo ñaha sihi cha cacú sehe ña.

²³ Ta ñima maa ri maa chí nyehé tindocho, soco nyehé tucu yoó. Vasi cha natñin cuenda yo Tatyí Ii cha chaha quiñi Nyoo chí yo, soco cahnu xaan tindocho nyehé yo, vatyí cuñi xaan yo cha tahán ri chí quiñi cha cunanduvi yo sehe ra. Vatyí cunasama ra cuhva iyó coño ñuhu yo.

²⁴ Vasi ta ñihi ca yo tandihí cuan soco chitó yo tyí cuñihi yo vatyí chino ñi yo ta chihin cuan cacu yo. Tatu nyatú yo cha cutahan chí chí yo, cuñi chí catyí vatyí ta ñihi ca yo. Tatu cha yaha ñihi yo chí chí, ma cuatu ca yo.

²⁵ Soco tatu yihí ñi yo cha ñihi yo noo cha ta nyehe ca yo, cuñi chí cha cuatu yo chihin cha cama ñi yo.

²⁶ Ta suri tyicuan caa tyinyeé tucu Tatyí Ii chí yo chihin cha vita cuñi yo vatyí ña chitó yo yoso caa cacán tahvi yo chí Nyoo cuhva tahán chí. Ta Tatyí Ii cuan chicán tahvi chí chí Nyoo cha cuenda yo chihin noo tuhun cha ña cuví nacatyí yo.

²⁷ Chitó maa Nyoo ñáa cha caá ñima yo, ta chitó ra ñáa cha cuñi Tatyí Ii ra cacán chí, vatyí chicán chí cuhva cuñi maa ra cha cuenda ñáyivi cuenda ra.

²⁸ Chitó yo vatyí ñáyivi, ñu cuñi vavaha chí Nyoo, tandihí cha cuví chí ñu ta tyinyeé chí chí ñu, vatyí maa ñu cuví ñu nacachí ra, tari cuhva tyaá ra cuhva chí ñu.

²⁹ Vatyí nya quiñi xihna ri, ta cha ñohó nuu Nyoo yóo cuví ñu cucunyicon chí ra. Ta tyaá ra cuhva chí ñu vatyí cucuvi ñu tari Sehe ra, ra Jesucristo, tacuhva vatyí cucuvi ra ra cha ñihi ca cha nuu tandihí ca yañi ra, ñu yihí tuhun Nyoo.

³⁰ Ta ñu cha tyaá Nyoo cuhva tyí cuvi ñu sehe ra, nacana tucu ra chí ñu. Ta ñu cha nacana ra, suri sacuvaha ra chí ñu nuu ra. Ta ñu cha sacuvaha ra chí, chaha ra cha cucahnu cuvi ñu chihin ra.

³¹ ¿Ñáa cha catyí yo cha tyicuan caa? Tatu Nyoo ta nyaá ra tumañi ñi chí yo, ¿yóo cha cuví tyaá cuatyí siqui yo? Yori.

³² Nyoo ña catyí ra cha ma cuhva cuenda ra sehe ra, soco chaha cuenda ra chí ra vatyí cúvi ra cha cuenda tandihí yo. Ta tatu tyicuan caa, ¿atu ma cuhva tucu ra tandihí ca cha chiñuhú chí yo ñin ri chihin Sehe ra? Cuhva ra.

³³ ¿Yóó cha cuví tyaa cuatyi siqui ñu cha nacachi Nyoo? Yori. Vatyí Nyoo ican ra cuví ra saha ra tuhun tyi vaha ñu nuu ra.

³⁴ ¿Yóó cha cuví catyi tyi cuhun yo anyaya? Yori. Vatyí ra Cristo cuví ra chihí cha cuenda cuatyi yo, ta nandoto ra ta vityin nyaá ra chiyo vaha ndaha Nyoo, ta chicán tahvi ra nuu Nyoo cha cuenda yo.

³⁵ Ñahri cha cuví sacuachiyo chi yo chihin cuhva cuñi xaan ra Cristo chi yo. Vatyí vasi nyehé xaan yo tindoho, vasi iyó tisihi, vasi cahán ñáyivi chi yo cuenda tuhun Nyoo, vasi iyó tama, o ñahri sahma yo, vasi yuhví yo, vasi chihi yo, soco ma cuví sacuachiyo tandihí tindoho cuan chi yo chihin cuhva cuñi ra chi yo.

³⁶ Vatyí tyehe caa cahán chi nu tutu Nyoo tuhun tindoho cha cunyehe yo:

Cha cuendon, Sutu Mañi yuhu, ta cuñi caháni ñáyivi chi ndi tandihí quivi.

Ta tari noo mbee cha cua caháni ñu, tyicuan caa sacuvi ñu chi ndi, catyí chi.

³⁷ Soco vasi yahá yo tandihí tindoho cuan, soco cucuvi vaha ca chasaha yo cha cuenda ra cha cuñi xaan chi yo.

³⁸ Yucuan chaha chitó vahi vatyí ñahri maa cha cuví sacuachiyo chi yo chihin cuhva cuñi xaan Nyoo chi yo. Ni tuhun chihi, ni ñáyivi iyó yo, ni ángel, ni tatyí ña vaha, ni cha cuví vityin, ni cha cucuvi ityi nuu ca, ni noo cuan, ta ma cuví sacusiin chi chi yo chihin Nyoo.

³⁹ Ni cha iyó nu sucun, ni cha iyó nu cono xaan, ni nonga cha savaha Nyoo, ma cuví sacusiin chi chi yo chihin Nyoo, ra cuñi xaan chi yo cha cuenda ra Cristo Jesús Sutu Mañi yo.

9

Nyoo nacachi ra chi ñu ñuu Israel

¹ Cahín cha ndicha, tari tuhvá cahán noo ra chinó iñi chi ra Cristo. Ña sandaví ñahi, vatyí Tatyí li Nyoo ican saquehén ityi cha chiñi tuñi xiñi. Yucuan chaha chitó vahi vatyí cha ndicha cahín nu catyí tyi

² cuihya xaan cuñi ta tyicuan ri uhvi cuñi añime

³ cha cuenda ñu ñui ñu Israel. Cuñi xain chi ñu. Ta nyacua cuhve añime na cuhun

maa nu uhvi, tyehe ta cuví cacu añima ñu cha tyicuan caa.

⁴ Ta maa ñu, tata ra Israel vachi ñu. Ta Nyoo naquehen cuenda ra chi ñu tari cha sehe ra. Ta sañaha ra cuhva caá ra chi ñu, tyi cahnu xaan ra cuví ra, vatyí chinyaa ra chihin ñu. Ta natyihí tahan ra tuhun chihin ñu, ta chaha ra ley ra chi ra Moisés vatyí cuhva ra chi ñu. Ta sañaha ra cuhva cuñi ra cha sacahnú ñu chi ra. Ta catyí ra chi ñu yoso caa cusacuvi ca ra cha vaha chihin ñu nu cuahan ca chi.

⁵ Tata ñu sutu chahnu yo cuví chi ñu, ta tata ñu, ican cuví chi ra Cristo cuenda coño ñuhu ra. Ican ra cuví Nyoo. Ta ican ra cuví ra nyacá ñaha tandihí cha iyó. ¡Na sacahnu yo chi ra tyicuan ri maa! ¡Ta na cuví chi tyicuan caa!

⁶ ¿Atu catyí vatyí ña sacuvi Nyoo tari cuhva catyí ra chi ñu Israel ta cha naha? Ñima. Soco cuñi chi coto yo tyi ña tandihí ñáyivi Israel cuví ñu ñu Israel cha ndicha.

⁷ Ña tandihí ñu tata ra Abraham ta cuví ñu sehe ra cha ndicha. Vatyí tuhun cha cahán maa Nyoo chihin ra, cahán chi cha cuenda noo ri sehe ra. Vatyí catyí Nyoo chi ra tyehe caa: “Cha cuenda ra Isaac sehun cucoo ñáyivi chuun.”

⁸ Ihya sañahá chi yo vatyí ñima cha cuenda tata cha vachi ñáyivi ta cuví ñu ñáyivi cuenda Nyoo. Soco tandihí ñáyivi chinó iñi tuhun catyí Nyoo tyi cusacuvi ra, ican ñu cuví ñu sehe ra cha ndicha.

⁹ Vatyí cha catyí Nyoo tyi cuhva ra chi ra Abraham, ican cuví ihya: “Quivi cha tahán chi, cuquichi nu nyicú ndo ta cu Sara cucoo noo sehe ña”, catyí Nyoo chi ra.

¹⁰ Ta ñima yucuan ri. Vatyí ni nduvi sehe cu Rebeca, in ri sutu ra, sutu chahnu yo, ra Isaac.

¹¹⁻¹² Soco cha ni cumañi ca cacu ndotyin, ta sacuvi ca ndotyin ni cha vaha, ni cha ña vaha, ta catyí Nyoo chi cu Rebeca: “Sehun cha ñihi ca cucuvi ra musu ra cha luhlu ca.” Sacuvi Nyoo tyicuan caa vatyí cachí ra chi ñáyivi cha cuñi maa ra, ta ñima cha cuenda cha sacuvi ñu.

¹³ Tari catyí ra nu tutu ra tyehe caa: “Cuñi que chi ra Jacob, ta chi ra Esaú ña cuñi.”

¹⁴ ¿Tu tyicuan caa ñáá cha cucatyí yo?

¿Atu cuví catyi yo tyi ña vaha cha sacuví Nyoo? ¡Ma cuvi!

¹⁵ Vatyí catyí ra chi ra Moisés tyehe caa: “Cu cundahvi cuñi yóo ñáyivi cuñi mai cundahvi cuñi.”

¹⁶ Ta tyicuan caa chitó yo vatyí ma cundahvi cuñi Nyoo nyehe ra chi ñáyivi cha cuenda cuhva cuñi maa ñu, o cha cuenda cha sacuvi ñu. Soco cuhva cuñi maa Nyoo cucuvi. Vatyí maa ra cuví ra cundahvi iñi yóo chi cuñi maa ra.

¹⁷ Vatyí nu tutu ra, catyi ra chi rey Egipto tyehe caa: “Sacuví rey chuun tacuhva sañahí tunyee iñi cha iyó chii chi ndo, ta tandihi ñáyivi cucoto ñu yóo ra cuví yuhu”, catyí Nyoo.

¹⁸ Ta tyicuan caa Nyoo cundahvi cuñi ra yóo ñáyivi cuñi maa ra. Ta suri sandundavá tucu ra añima ñu cuñi maa ra sandundava ra.

¹⁹ Ta cu catyun chii: “Tatu tyicuan caa, ¿ñáá tuhun cha tyaa Nyoo cuatyí siqui ñáyivi? Vatyí ¿yóo cha cuví nacahnu cuhva cuñi ra? ¡Yori!”

²⁰ Soco ña vaha cuhva chicá iñun cha tyicuan caa. Vatyí yori cuví catyi tyi ña vaha cha sacuví Nyoo. ¿Yóo ra cuví yoho vatyí nacahun nu cahán Nyoo? ¿Atu cuví catyi quisí ñuhú cuan chi ñu cha savaha chi chi vatyí ña tahán iñi chi cuhva cha savaha ñu chi chí? Ma cuvi.

²¹ Vatyí ñu cha savahá ndaha tyiño iyó ityi chi ñu savahá maa ñu ñáá cha cuñi ñu chihin nyahyu cuan. Chihin nyahyu cuan cuví savaha ñu noo quisí finu xaan. Ta cuví savaha tucu ñu noo cha ndahvi ri.

²² Tyicuan caa tucu Nyoo, iyó ityi chi ra cha tachi tuñi ra chi ñáyivi quiñi iyó cha cuenda cha sacuví ñu cha ña vaha. Ta cuví sañaha ra chi ñu tyi iyó xaan tunyee iñi chi ra. Soco sanyee xaan ra iñi ra chihin ñáyivi cuan. Ta chi maa ñu tahán chi tachi tuñi ra. Ta tahán chi sanaa ra chi ñu.

²³ Ta iyó tucu ityi chi ra cha saha ra tucahnu iñi chi ñu savaha maa ra vatyí sañahá ra tyi cahnu ra cuví ra. Maa ñu cuví ñu ñu cachí ra vatyí cuñihi ñu tandihi cha vaha, ta cucoo ñu gloria chihin ra.

²⁴ Ta suri maa yo cuví ñu cuan. Vatyí Nyoo cana ra chi yo. Yihí yo cuví yo ñu Israel, ta yihí yo cha ñima ñu Israel cuví yo.

²⁵ Tari catyí Nyoo nu tutu cha tyaa ra Oseas tyehe caa:

Ñu cha ñima ñu ñui cucatyí yuhu tyi ñáyivi chii cuví chi ñu.

Ñu cha ña cuñi, cunacuñi chi ñu, catyí Nyoo.

²⁶ Ta suri nu catyi Nyoo chi ñu tyehe caa: “Nyoho ñima ñáyivi chii cuví ndo.” Ta suri yucuan cunacatyí tucu ra chi ñu: “Sehe yuhu, ra cuví Nyoo nyito, cuacuvi ndo.”

²⁷ Soco cha cuenda ñu Israel catyí ra Isaías tyehe caa: “Vasi cuaha xaan ñáyivi ñu Israel tari cha cuaha niyiti iyó yuhu tyañuhu, soco suhva ri ñu cucacu.

²⁸ Vatyí Sutu Mañi yo numi ri cusacuvi ra tandihi cha catyi ra tyi cusacuvi ra siqui ñuhu ñáyivi chihin cha cachi.”

²⁹ Tari catyi tucu ra Isaías ta ityi chata ca tyehe caa:

Tyehe ta Sutu Mañi yo ra nyacá ñaha tandihi cha iyó andivi, ta ma sacacu ra chi suhva yo, cunaa tandihi yo, Tari naa ñáyivi Sodoma ta ñu Gomorra ta cha naha.

Ñu Israel nducú ñu cuhva cuvaha ñu nuu Nyoo soco ña ñihí ñu cuhva

³⁰ ¿Tatu tyicuan caa, ñáá cha catyí yo? Ñáyivi cha ñima ñu Israel cuví, ña nanducu ñu cuhva cuvaha ñu nuu Nyoo, ta ican ñu cuví ñu cuvahá nuu ra cha cuenda cha chinó iñi ñu chí ra.

³¹ Ta ñu Israel nyicón xaan ñu ley, tyi cuñi maa ñu tyi cuvaha ñu nuu Nyoo chihin cuan, soco ña cuví.

³² ¿Ñáá tuhun? Vatyí cuñi ñu cuvaha ñu nuu Nyoo chihin cha sacuví ñu ley cuan, ta ña cuñi ñu cuvaha ñu nuu ra chihin cha chinó iñi ñu chí ra. Yucuan chaha vatyí tari cha catyihí chaha ñu chihin noo yuu cuví chi cuan.

³³ Yuu cuan cahán Nyoo tuhun nu tutu ra tyehe caa:

Ñuu Sión, yucuan tyai chi noo rayi cha cuví tari noo yuu.

Noo yuu cha sanduvá chi ñáyivi cuví ra. Soco ñu chinó iñi chi ra ma cucahan nuu ñu, catyí Nyoo nu tutu ra.

10

¹ Yañi, cuñi xain chihin cha tandihi añime cha cacu ñu Israel. Ta cha chicān tahvi xain cha cuenda ñu.

2 Cha ndicha cuví vatyí cuñí xaan ñu sacahnú ñu chi Nyoo, soco ña ñihí ñu cuhva yoso caa tahán chi sacuví ñu.

3 Vatyí ña chitó ñu yoso caa sacuvahá Nyoo chi ñáyivi nuu ra. Ta nducú ñu cuhva sacuvaha maa ñu chi ñu, ta ña nacuhvá cuenda ñu chi ñu chi ra tacuhva sacuvaha maa ra chi ñu.

4 Vatyí ra Cristo cha quichí ra ta sacuví ra tandihí cha catyí ley, ta sacuví ra vatyí tandihí ñu chinó iñi chi ra, cuvaha ñu nuu Nyoo.

5 Catyí ra Moisés vatyí cuví cuvaha ñáyivi, soco tatu quichahá ñu cha catyí ley, vatyí catyí ra tyehe caa: “Ñu cha quichahá tandihí cha catyí ley, coo ñu noo ñáyivi cha ma naa ca maa.”

6 Soco cha cuvaha yo nuu Nyoo cha cuenda cha chinó iñi yo chi ra Cristo, catyí nuu tutu Nyoo tyehe caa: “Ma caca xiñun vatyí cuñí chi cha cundaa noo ra andivi ta cusanoo ra chi ra Cristo tacuhva sacacu ra chi yo.” Ma caca xiñun tyicuan caa vatyí cha yaha quichi ra Cristo.

7 Ni ma caca xiñun vatyí cuñí chi cha cunoo noo ra chichi ñuhú vatyí sanandoto ra chi ra Cristo, vatyí cha yaha nandoto ra.

8 Ma caca xiñun tyicuan caa vatyí tyehe caa catyí nu tutu Nyoo: “Tuhun Nyoo yatyin nyaá chi chihin ndo, yuhu ndo ta aña ndo nyaá chi.” Ta suri tuhun cuan sacoto ndi chi ndo, tuhun cha quichí ra Cristo ta nandoto ra. Ican cuví tuhun cha tahán chi chinó iñi yo.

9 Tatu chihin yuhun catyún vatyí ra Jesús cuví Sutu Mañi yo, ta chihin aña mon chinó iñun tyi Nyoo sanandoto ra chi ra cha yaha chihí ra, cucacu aña mon.

10 Vatyí chihin aña yo cuñí chi chino iñi yo chi ra Cristo tacuhva cuví cuvaha yo nuu Nyoo, ta chihin yuhu yo tahán chi catyí yo tyi chinó iñi yo, tyicuan ta cacu aña yo.

11 Tuhun Nyoo catyí chi: “Ni noo ñu cha chinó iñi chi ra ta ma tahan ñu ticahan nuu.”

12 Vatyí Nyoo ñin ri cuhva nyehé ra chi ñu Israel ta chi ñu inga ñuu. Vatyí suri maa ra cuví ra ra nyacá ñaha chi tandihí yo. Ta nasocó xaan ra chi tandihí yo cha chicán tahvi yo chi ra.

13 Vatyí tyehe caa catyí tuhun Nyoo:

“Tandihí ñu cha chicán tahvi chi ra Jesús cucacu aña ñu.”

14 Soco ¿yoso caa cucacan tahvi ñu chi ra tatu ta chino ca iñi ñu chi ra? Ta ¿yoso caa cuchino iñi ñu chi ra tatu ta cuiñi ca ñu tuhun ra? Ta ¿yoso caa cuiñi ñu tuhun ra tatu ta yori ca cañan tuhun ra chihin ñu?

15 Ta ¿yoso caa cucahan ñu yihí tuhun Nyoo chihin ñu, tatu yori tachi chi ñu? Tari catyí nu tutu Nyoo: “Ñana cha tyaqui nu chaa ñu cañan tuhun vaha nuu ñáyivi.”

16 Soco ña tandihí ñu ta quichahá ñu tuhun cha sacacú Nyoo aña yo. Vatyí tyehe caa catyí ra Isaías: “Sutu Mañi yuhu, yori cuñí chino iñi tuhun cañan ndi”, catyí ra.

17 Yucuan chaha cha chiñí xihna yo tuhun ra Cristo, tyicuan ta chino iñi yo chi ra.

18 Soco ndacá tuhin ihya: ¿Atu ña chiñi ñu Israel tuhun Nyoo? ¡Chiñi ñu! Vatyí nu tutu Nyoo catyí chi tyehe caa:

Sutu Mañi yuhu, cha sacoto ñáyivi tuhun maun nicahnu siqui ñuhu ñáyivi, catyí chi nu tutu Nyoo.

19 Soco ndacá tuhin inga chaha tyehe caa: ¿Atu ña chinó iñi ñu Israel cha cuenda tyi ta nacoto ca ñu tuhun Nyoo? ¡Chitó ñu! Vatyí cha xihna ri ra Moisés tyaa ra tuhun cañan Nyoo chihin ñu Israel tyehe caa:

Nyoho, cucuquiñi cuñi ndo vatyí cucuhve cha vaha chi noo ityi ñáyivi cha ñima ri tuhun, ñáyivi cha ña cutuñi iñi.

Ta cunaquiqui tisihi ndo nyehé ndo chi ñu, catyí Nyoo.

20 Ta ra Isaías caña iñi ra catyí ra tyi ñu cha ña nducú chi Nyoo, nañihí ñu chi ra. Ta sañahá ra chi ra chi ñu cha ña ndacá tuhun tuhun ra.

21 Ta tyaa tucu ra Isaías tuhun cañan Nyoo chihin ñu Israel tyehe caa: “Ndiyaca cane chi ñáyivi chii, nacuhva cuenda ñu chi ñu chii, soco ña quichahá ñu. Ndava xaan iñi ñu”, catyí Nyoo.

11

Yihí ñu Israel cha ñihí ñu cuhva cacu aña ñu

1 ¿Atu ña cuñi ca Nyoo chi ñu Israel? Ñima cha ña cuñi ca ra chi ñu, vatyí suri ra Israel

cuví tucu yuhu. Vatyí tata ra Abraham ta tata ra Benjamín cuví.

² Nyata cha naha cachí Nyoo chi ñu Israel tacuhva cuvi ñu ñáyiví chi ra. Ta vityin ñima cha sacuachiyó ndíhi ra chi ñu, vatyí chitó ndo cha catyí nu tutu Nyoo nu chicán tahvi ra Elías, profeta Nyoo, ta catyí ra tyi ña vaha sacuví ñu Israel, ta catyí ra tyehe caa:

³ “Sutu Mañi yuhu, chahñi ñu chi ra cuví profeta maun, ta satani ñu arta vehe ñuhu maun. Noo tuhun ri ca mai ndoo, ta cuñí ñu cahñi ndíhi ñu chii”, catyí ra.

⁴ Soco nacahan Nyoo ta catyí ra chi ra Elías: “Ñima maa ri maun ndoo. Ucha ca mil ñáyiví naquehen vahi cha ña chicuñi chiti ñu nuu xitohyo nyoo Baal”, catyí Nyoo chi ra.

⁵ Ta suri tyicuan caa vityin, ndoo suhva ñu sacahnú chi Nyoo. Ican ñu nacachi Nyoo chii tyi cusaha ra tucahnu iñi chi ñu.

⁶ Vatyí cha cuenda cha vaha ñáyiví cuví Nyoo ta sahá ra tucahnu iñi chi yo. Tyehe ta chihin cha vaha ñáyiví cuví maa yo ta sahá Nyoo tucahnu iñi chi yo, cuñí chi catyí tyi ñima ca chihin cha vaha maa ra ta sacacú ra chi yo.

⁷ Ta ¿yoso caa? Ñu Israel nanducu xaan ñu cuhva cuvaha ñu nuu Nyoo soco ña ñihí ñu cuhva. Soco ñu cha nacachi maa Nyoo chii, ñihí ñu cuan cuhva. Ta inga ñu Israel cuan ndundavá xaan añima ñu.

⁸ Tari catyí nu tutu Nyoo tyehe caa: “Nyoo chahá ra noo cuhva chi ñu cha ma cutuñi iñi ñu. Ta chahá ra chiti nuu cha ña cutuñi iñi ñu cha nyehe ñu. Ta chahá ra soho ñu soco ña cutuñi iñi ñu cha chiñi ñu, ta nyacua nya vityin ta tyicuan caa ñu.”

⁹ Ta suri catyí tucu ra David tyehe caa: Sii xaan cuñí ñu chihin vico cha iyó ñu, soco yucuan cuví trampa cha sanacava chi ñu. Ta cha cuenda cuan ta cutachi tuñi Nyoo chi ñu.

¹⁰ Ta tari cha cunducuaa ñu vatyí ma ndichin ca nyehe ñu cha ndicha.

Ta tyicuan ri cucoso cha vee chata ñu, catyí ra David tuhun ñu Israel cha ña chinó iñi chi Nyoo.

Yoso caa cuvaha ñu cha ñima ñu Israel cuví nuu Nyoo

¹¹ Ta vityin ndaca tuhin ihya: ¿Atu cha cuenda cha ña quichahá ñu Israel cuan nu cahán Nyoo, ta ndoó ri maa ñu cha ma cacu ca añima ñu? Ñima. Vatyí cha cuenda cha ña quichahá ñu chi ra cha saquichí Nyoo, yucuan chaha sacacu Nyoo chi inga ñu cha ñima ñu Israel cuví. Ta tyicuan caa ta cuquiñi cuñí ñu Israel vatyí nachino iñi inga ñáyiví. Ta cha tyicuan caa ta cuquichi cuvi tucu iñi ñu cha cacu añima ñu.

¹² Tatu cha cuenda cha ña quichahá ñáyiví Israel cuhva cha chahá Nyoo chi ñu, cuví chi cha vaha cha cuenda tandíhi ca ñáyiví, vatyí chahá chi cuhva, ta cuaha xaan ñu nachino iñi ñu chi ra Cristo, nyaca cuví quiví cundíhvi tucu ñu Israel cuenda Nyoo inga chaha. Yucuan quiví, vaha xaan ta tyaqui xaan cucuvi.

¹³ Ta iyó suhva cha cuñí catyí chi nyoho cha ñima ñu Israel cuví ndo, vatyí ra Jesús tyatyíño ra chii cha cuhin nu iyó ñáyiví cha ñima ñu Israel cuví. Ta chité vatyí ñiñi xaan cuví tyiño cha chahá maa Nyoo chii.

¹⁴ Ta cuñí tiqui vatyí cunyehe ñáyiví Israel ñu ñui cuhva chinó iñi ndo chi Nyoo, ta cuquichi cuvi iñi tucu suhva maa ñu sacuvi ñu tyicuan caa. Ta tyicuan caa ta cacu añima ñu.

¹⁵ Vatyí cha cuenda cha ña natíin cuenda Nyoo chi ñu Israel cuví cuvaha inga ñáyiví nuu ra. Vaha xaan cha tyicuan caa ta nyaca cuví quiví cunatíin cuenda tucu ra inga chaha chi ñu Israel, cucuvi tari cha cunandoto ñu nu chihí ñu.

¹⁶ Tatu vaha noo pan cha savahá yo cha xihna ri chihin yuchan pan cuan, vaha tandíhi ca yuchan cuan. Ta tatu vaha yoho noo yutun, tandíhi ca soco tun, ta vaha. Ta tyicuan caa tucu ñu Israel, cuñí Nyoo chi ñu cha cuenda cha vaha ra cha vachi ñu tata.

¹⁷ Ta ñu Israel cuví ñu tari noo soco noo tu olivo vaha cha cumí Nyoo. Ta chahnya Nyoo chi suhva ñu vatyí ña chinó iñi ñu chi ra. Ta chaha tu olivo cuan natyaa tahan ra soco noo tu olivo cuhu. Ta maa ndo cuví tari tu olivo cuhu cuan. Ta tari cha natyaa tahan ra chi ndo chaha tu olivo cha xihna ri cuan. Ta tyicuan caa ndu in ri ndo chihin tu olivo Nyoo ta naquehen ndo tandíhi cha vaha cha iyó chi ra.

¹⁸ Soco ma saha ndo tyi vaha ca ndo ican

saha inga ñu cha cuví soco tu olivo cha chahnya Nyoo. Vatyí tatu cuñí maa ndo tyi vaha ca ndo, cuñí chi nichon iñi ndo vatyí ñima maa ndo nyisó ndo chi yoho yutun cuan, soco maa yoho yutun cuan nyisó chi ndo.

¹⁹ O catyí ndo: “Ican, soco chahnya Nyoo soco yutun cuan tacuhva nicunyaa maa ndi chaha tun.”

²⁰ Vaha. Soco chahnya Nyoo soco cuan cha cuenda tyi ña chinó iñi ñu chi ra. Ta nyoho nicunyaa ndo yucuan, soco cha cuenda cha chinó ri iñi ndo chi ra. Yucuan chaha ma sacahnu ndo chi ndo, soco saha ndo cuenda chi ndo.

²¹ Vatyí tatu ña saha Nyoo ticahnu iñi chi ñu cha cuví soco vaha cuan, ni chi nyoho ta ma saha ra ticahnu iñi tatu ña chinó vaha iñi ndo chi ra.

²² Nyehe yoso cha vaha Nyoo, soco tyicuan tucu xaan ra chihin ñu cha ña natiin cuenda tumañi iñi chahá ra. Soco chihin nyoho, vaha xaan ñáyivi cuví ra. Soco cuñí chi cha naquehén vaha ndo tumañi iñi cha chahá ra vatyí tatu ña naquehén vaha ndo, cucahnya tucu ra chi nyoho.

²³ Soco tatu nachino tucu iñi ñu Israel inga chaha, cu nicunyaa tucu ñu nu coyó ñu. Vatyí Nyoo iyó tunyee iñi chi ra cha natyatan tucu ra chi ñu cuan inga chaha.

²⁴ Vatyí tatu nyoho cha ñima ñu Israel cuví ndo, ta quehen Nyoo chi ndo cha cuví ndo tari soco noo yutun olivo cuhu, ta natyaa tahan ra chi ndo chihin tu olivo vaha cha cumí ra, ¡ta nyaca cuví ñu Israel cha cuví ñu soco tu olivo vaha! ¡Cunatyaa tahan chaa ra chi ñu inga chaha chaha tu olivo nu coyó ñu!

Nu ndihí ta cucacu tucu ñu Israel

²⁵ Vatyí yañi, cuñí cha coto ndo noo tuhun xehe cha sacuví Nyoo, tacuhva vatyí ma caca xiñi ndo vatyí chitó xaan ndo. Vatyí ñu Israel ndundava ñima ñu suhva quivi, nyacua nya cha cuví nachino iñi inga ñáyivi chi Nyoo.

²⁶ Ta cha yaha quihvi inga ñu cuenda Nyoo, tyicuan ta tandihí ñu Israel cucacu ñima ñu, vatyí nu tutu Nyoo catyí chi tyehe caa:

Ra cha cusacacu chi ñáyivi, ityi Sión cuquichi ra.

Ta cusacanyaha ra cuatyí cha iyó chi ñáyivi chi ra Jacob.

²⁷ Ta ihya cuví tuhun cha cunatyíhi tahin chihin ñu, quivi na sacuachiye cuatyí ñu, catyí Nyoo nu tutu ra.

²⁸ Cuxaán xaan ñu Israel chihin Nyoo cha cuenda tuhun vaha ra Cristo cha cacu ñima yo. Ta tyicuan ta cuví chino iñi maa ndo. Soco Nyoo tacuhva cuñí ri maa ra chi ñu Israel tata ra Abraham, ta ra Isaac, ta ra Jacob vatyí cachino iñi ra chi ra quivi cachiyó ra, ta yucuan chaha cachí ra chi ra.

²⁹ Vatyí noo cha cha yaha chaha Nyoo ña natinyaá ra. Ni ña ndu uvi iñi ra cha yaha nacana ra chi yo.

³⁰ Nyoho, ta ityi chata ca, nacahnú ndo nu cahán Nyoo. Soco vityin, Nyoo cundahvi cuñí ra nyehé ra chi ndo cha cuenda vatyí ñu Israel nacahnú ñu nu cahán ra.

³¹ Nacahnú ñu nu cahán Nyoo vityin tari nacahnú maa ndo quivi cuan. Ta tari cundahví cuñí Nyoo nyehé ra chi ndo vityin, tyicuan caa tucu cucundahvi cuñi ra nyehe ra chi ñu Israel ñandihí.

³² Vatyí Nyoo chaha ra ityi chi tandihí ñáyivi cha nacahnú ñu nu cahán ra, tacuhva vatyí cundahvi cuñi ra nyehé ra inuu ri chi tandihí yo.

³³ ¡Ñana cha cahnu cuví cha tyayí Nyoo! ¡Ñana cha vaha cha chitó xaan ra, ta cha chiñi tuñi ra! Ma cuvi nacatyí yo cuhva chicá iñi ra, ni ma chaa yo cutuñi iñi yo cuhva sacuví ra.

³⁴ Vatyí ¿yóó cha cutuñi iñi cuhva chicá xiñi Sutu Mañi yo? ¿O yóó cha sañahá chi ra? Yori.

³⁵ Vatyí yori cha cuví cuhva xihna ca noo cha vaha chi Nyoo ta cha cuenda cuan ta quihí iñi ñu vatyí na cuhva tucu Nyoo chi ñu.

³⁶ Vatyí tandihí maa cha iyó, maa Nyoo savaha, ta chinó chi ta iyó chi cha cuenda ra. ¡Cahnu xaan ca cuví Nyoo tyicuan ri maa! Ta na cuvi chi tyicuan caa.

12

Na coo yo noo ñáyivi cha sacuvi yo cuhva cuñi Nyoo

¹ Yucuan chaha yañi, chacú ndahvi nuu ndo cha cuenda cha ndahvi cuñí Nyoo nyehé ra chi yo, na nacuhva cuenda yo

coño ñuhu yo chi ra, tari noo ofrenda cha nyitó, ta cachi coo yo nuu ra, vatyí yucuan cuví cuhva tñn cuenda ra cha sacahnú yo chi ra.

² Ta ma coo ca yo cuhva iyó ñáyiví iyó síqui ñuhu ñáyiví ihya. Soco na nasama yo cuhva iyó yo chihin cha nduchaa cuhva chicá xiñi yo. Ta tyicuan caa ta coto yo yoso cuhva cuñí Nyoo chihin yo vatyí coto yo nya cha vaha, ta nya cha tahán iñi ra. Ta coto yo ñáá ndihí cha tahán chi sacuvi yo.

³ Nyoo, cha catyí cha vaha ñáyiví cuví ra, ta tyatyíño ra chíi vatyí cuví apóstol chi ra, yucuan chaha catyí chi tandihí nyoho vatyí ni noo ndo ta ma caca xiñi ndo tyi vaha ca ndo. Soco caca vaha xiñi ndo yoso cuhva iyó ndo chihin yoso cuhva cha vaha chaha Nyoo chi ndo ñn ri chihin cha chinó iñi ndo chi ra.

⁴ Vatyí cha noo coño ñuhu, cuaha xaan cuhva iyó chi, ta ña ñn ri maa tyiño saha chi. Chití nuu yo, noo tyiño sahá chi, ta soho yo inga tyiño sahá chi.

⁵ Ta tyicuan caa tucu yoó vasí cuaha yo, soco noo ri coño ñuhu ra Cristo cuví yo, cha cuenda cha ñn ri cuví yo chihin ra, ta ñn ri cuví yo chihin tahan yo. Tari cha noo ri coño ñuhu cuví tandihí ri yo.

⁶ Sñn sñn tyiño chaha Nyoo chi yo, yoso cuhva cha cuñí maa ra cuhva ra chi noo noo yo. Ta cuñí chi cotyiño vaha yo cha vaha cuan. Tatu chaha Nyoo cha vaha cha sahá yo profetizar, na chino iñi yo tyi ican cuan chaha ra chí yo, ta na naquehen yo tuhun sacoto ra chí yo ta nacatyí yo chí ñáyiví.

⁷ Tatu chaha ra cha vaha cha sacuví yo tyiño nuu inga ñu, cuñí chí sacuví vaha yo. Tatu chaha ra cha cuví sañaha yo chí inga ñu, cuñí chí cunyaa yo tyiño cuan.

⁸ Tatu chaha ra cha cuví cuhva yo tuhun chí ñáyiví na ndu ññ iñi ñu, cuñí chí cunyaa yo tyiño cuan. Ta ñu cha chaha Nyoo xuhun chí, cuñí chí cuhva ñu chihin cha ññ iñi ñu. Tatu chaha Nyoo cha saquehen ityun chí ñu yihí cuenda ra, chihin cha ññ iñun sacuvun. Tatu chaha Nyoo cha tyinyeé yo chí ñu chiñuhú cha chiñuhú chíi, cuñí chí sacuví yo chihin cha sñ cuñí yo.

Nu catyí ra Pablo yoso caa sacuvi yo cha

yihí yo cuenda ra Cristo

⁹ Cuñi ndo chihin cha ndicha chí tahan ndo. Ta cutasi cuñi ndo chí cha ña vaha. Ta cunyicon ndo cha vaha.

¹⁰ Cuñí chí cha cuñí ndo chí tahan ndo cuenda Nyoo tari cha tahan ndo cha ñn ri síhi ñn ri sutu ndo. Ta quichaha ndo chí ñu ta saha ndo ñáyiví chí ñu.

¹¹ Sañihi ndo iñi ndo. Ma cusuchan ndo. Ta sacuvi ndo tyiño nuu Sutu Mañi yo chihin cha ññ añima ndo.

¹² Sñ cuñi ndo coo ndo ñáyiví, vatyí chitó ndo vatyí cucoo ndo chihin Nyoo nu cuahan ca chí. Sañyee ndo iñi ndo tatu nyehé ndo tindoho. Ta ma sandihí maa ndo cha cacan tahvi ndo chí Nyoo nyita ri.

¹³ Tyinyee ndo chí ñu yihí cuenda Nyoo chihin ñáá cha chiñuhú chí ñu. Vaha tyiñuhu ndo chí ñu chaa vehe ndo.

¹⁴ Vaha cahan ndo síqui ñu cha cahán chí ndo. Ta ma soco ndo chí ñu. Cacan tahvi ndo cha cuenda ñu nuu Nyoo tacuhva na nasoco ra chí ñu.

¹⁵ Cusñ cuñi ndo chihin ñu sñ cuñí, ta cuacu ndo chihin ñu chacú chaa cha cuihya cuñí ñu.

¹⁶ ñn ri cuví ndo chihin tahan ndo. Ta ma cahnu saha ndo chí ndo. Inuu ri saha ndo chí ndo chihin ñu ndahvi. Ma saha ndo cha chitó xaan ndo.

¹⁷ Ma sacuvi ndo cha ña vaha chihin ñu sacuví cha ña vaha chihin ndo. Soco saññi ndo sacuvi ndo cha vaha nuu tandihí ñáyiví.

¹⁸ Saññi ndo cha coo taxi ri ndo chihin tandihí ñáyiví.

¹⁹ Yañi luhli, tatu yoó cha sataxi iñi chí ndo, ma tachi tuñi ri maa ndo chí ñu, soco saña ndo ta natyaa ndo ndaha Nyoo na tachi tuñi maa ra chí ñu. Vatyí nu tutu Nyoo catyí chí tyehe caa: “Yuhu tahán chí tachi tuñi, yuhu cutiyahvi chí ñu”, catyí Sutu Mañi yo.

²⁰ Ta suri catyí tucu ra: “Tatu ra xaan iñi chuun ta chisocó ra, cuhva cha cachi ra, ta tatu ityi ra ndutya, cuhva coho ra. Vatyí cha sacuvún tyehe caa, sacuvún cha nyacua nducuaha soho ra chihin ticahan nuu.”

²¹ Ma cuhvon cha cunyaca ñaha cha ña vaha chuun, soco saññun ta cuví chasahun chí cha ña vaha chihin cha sacuvún cha vaha.

13

¹ Tandihí ñáyivi cuñí chi cha quichaha ñu chi ra cacuví tyiño cuenda gobiernu. Vatyí yori ra cuví tyiño cha ñima Nyoo tyaa tyiño chi ra. Ta ra cuví tyiño cha iyó, maa Nyoo tyiso chi ra.

² Yucuan chaha, ñu cha ña quichahá chi ra cacuví tyiño, cuñí chi catyi vatyí ña quichahá ñu cuhva catyi Nyoo. Ta ñu cha sacuví tyicuan caa, chicoo cuatyí ñu cha cuenda cuan, ta cucutuñi chi ñu.

³ Vatyí ra cacuví gobiernu, ña nyaá ra cha cuenda cha sayuhví ra chi ñu cha sacuví cha vaha, soco nyaá ra vatyí tachi tuñi ra chi ñu sacuví cha ña vaha. ¿Atu cuñún coun chihin cha ña yuhvun chi ra cacuví tyiño? Cachi coun, ta cunyehe ra tyi vaha ñáyivi cuvún.

⁴ Vatyí nyaá ra tyiño vatyí sacuví ra tyiño nuu Nyoo cha cuenda cha vaha chuun. Soco tatu ña cachi iyón, yucuan ndicha cuñí chi cuyuhvun chi ra. Vatyí ña nyaá ri maa ra, soco nyaá ra vatyí tachí tuñi ra chi ñáyivi cha sacuví cha ña vaha, vatyí tyiño cuan tyaa Nyoo chi ra.

⁵ Yucuan chaha ñiñi cuñí chi cha quichaha ndo chi ra cacuví tyiño, ñima cha cuenda cha yuhvi ndo coto tachi tuñi ra chi ndo, soco cha cuenda vatyí chitó ndo tyi tyicuan caa tahán chi sacuví ndo.

⁶ Ta sijn ri cha cuenda cuan tyiyahví ndo xuhun cha tava ra cuví tyiño cha cuenda cha sanduvahá ra ñuu ndo. Vatyí yucuan cuví tyiño tahán chi cunyaa ra, ta cha tyicuan caa tyiño nuu Nyoo sacuví ra.

⁷ Cuhva ndo cha tahán chi chi minoo minoo ñáyivi. Tyiyahví ndo cha cuenda ñáa cha tahán chi tyiyahvi ndo cha cuenda cha vaha chi ñuu ndo. Ta quichaha ndo chi ñu cha tahán chi quichaha ndo. Ta saha ndo ñáyivi chi ñu cha tahán chi saha ndo ñáyivi.

⁸ Ma coso yica ndo chi ni noo ñáyivi. Soco cuñi ndo chi tahan ndo, vatyí tatu cuñi ndo chi tahan ndo sacuví ndo tandihí cha catyi ley Nyoo cha tyaa ra Moisés vatyí sacuví yo.

⁹ Catyí ley Nyoo tyehe caa: “Ma coo inga ñusihi o rayi chuun tatu ñima ñasihun o yun cuví. Ma cahñun chi ñáyivi. Ma suhun. Ma cahun cuendu siqui ni noo ñáyivi. Ma quichi cuví iñun cha chii ñáyivi.”

Tatu ndicha cha cuñún chi tahan, tari cha cuñún chi maun, sacuví tucun tandihí ihya ta tandihí ca inga ca ley.

¹⁰ Tatu cuñún chi tahan, ñahri cha ña vaha cua sacuvun chi ñu. Chihin cha cuñí yo chi tahan yo, sacuví yo tandihí cha catyi ley Nyoo cha tyaa ra Moisés.

¹¹ Chihin tuhun ihya saha yo cuenda quivi iyó yo. Vatyí cha chaá chi cuhva cha ndoyo yo ta ma cundihñi yo. Vatyí quivi nachino iñi yo chi ra Cristo, naha xaan ca nyaá quichi quivi cucacu ndihí añaima yo, soco vityin cha cuyatyin.

¹² Cha cua yaha cha cha cuaa. Ta cha cua cundichin. Yucuan chaha cuñí chi sandihí yo cha sacuví yo cha sacuví ñu iyó nu ñaa iñi. Ta tahán chi sacuví yo cuhva sacuví ñáyivi iyó nu ndichin.

¹³ Cachi cuñí chi coo yo. Vatyí nu ndichin Nyoo iyó yo. Ta ma coho yo ndixi, ta ma coo yo vico nu chihi xaan ñu ndixi. Ta ni ma coo yo chihin savaha ri ñusihi o rayi. Ni ma coo viciu chi yo. Ta ma cutasi cuñi yo nyehe yo chi tahan yo. Ta ma nyiyo iñi yo nyehe yo chi ñu.

¹⁴ Soco coo yo chihin tunyee iñi Sutu Mañi yo Jesucristo, tari noo sahma cuví tunyee iñi ra tyi ndihvi noo yo. Ta ma quihí iñi ndo cha sacuví ndo cuhva cuñí coño ñuhu ndo.

14

Ma cahan nyaun chi tahan

¹ Tatu noo ñáyivi yihí cuenda Nyoo ta chiin ri chinó iñi ñu chi ra, ña vaha cha ma tñin cuenda ndo chi ñu. Vaha natñin cuenda ndo chi ñu soco ma cuví yuhu ndo chihin ñu siqui tuhun cha chicá uvi iñi ñu.

² Vatyí yihí ñáyivi cuñí maa ñu vatyí cuví cachi ñu tandihí. Ta yihí tucu ñu cha ña chinó vaha iñi ñu, ta maa maa ri yucu chachí ñu.

³ Soco ñu chachí tandihí cuan, tahán chi cha tñin cuenda ñu chi ñu cha chachí yucu ri. Ta ñu chachí yucu ri, ma cahan nyaun ñu chi inga ñu cuan. Vatyí Nyoo tñin cuenda ra chi ñu cuan.

⁴ Vatyí ¿yóo ñu cuví yoho vatyí cahan nyaun chi ñu cha sacuví tyiño nuu inga ra? Vatyí tatu vaha o ña vaha sacuví ñu soco nyehe maa ra cuví nuu chi ñu chihin

ñu. Ta vaha cuquita ñu vatyí Sutu Mañi yo iyó tunyee iñi chi ra ta cutyinyee ra chi ñu tacuhva quita vaha ñu.

⁵ Inga tucu cuhva: Yihí ñu cha sacahnú ca ñu chi noo qui_vi ta ñima ca inga qui_vi. Ta yihí tucu ñu cha cuñí maa ñu vatyí inuu ri tandihí qui_vi. Tahan tahan yo cuñí chi coto vaha yo yoso cuhva chicá xiñi yo.

⁶ Ñu cha naquehén vaha noo qui_vi, naquehén vaha ñu cha cuenda cha sacahnú ñu chi Sutu Mañi yo. Ta ñu cha ña naquehén vaha cuan, suri cha cuenda cha sacahnú ñu chi Nyoo cuví. Ta ñu cha chachí tandihí cuan, suri chachí tucu ñu cha cuenda cha sacahnú ñu chi Sutu Mañi yo, ta nacuhva ñu tyahvi nyoo chi Nyoo tyi chaha ra cha cachi ñu. Ta ñu cha ña chachí tandihí, ña chachí ñu cha cuenda cha sacahnú ñu chi Sutu Mañi yo ta suri nacuhva tucu ñu cuan tyahvi nyoo chi ra.

⁷ Vatyí ni noo yo ña iyó yo chihin fuerza maa yo. Ni ñima maa yo catyí ama cúvi yo.

⁸ Vatyí tatu iyó yo, iyó yo tacuhva sacuvi yo tyiño nuu Nyoo, ta tatu chihí yo, chihí yo tyi Sutu Mañi yo naquehen cuenda ra añima yo. Yucuan chaha tatu iyó yo, o chihí yo soco chi Sutu Mañi yo cuví chi yo.

⁹ Vatyí ra Cristo chihí ra ta nandoto tucu ra vatyí tacuhva cunyaca ñaha ra chi ñu nyitó ta chi ñu chihí.

¹⁰ Soco yoho, ¿ñáá tuhun cha nyehé nyaun chi yañun? ¿o ñáá tuhun cha ña natíin cuendon chi ra? Vatyí tandihí yo cutahan chi cucuhva cuenda yo chi yo nuu Nyoo vatyí cutuñi chi yo nuu ra.

¹¹ Vatyí nu tutu Nyoo catyí chi tyehe caa: Cha ndicha ndicha cuii vatyí yuhu nyité, catyí Sutu Mañi yo.

Ta tandihí cuii ñáyivi cunacuiñi chiti ñu nui. Ta tandihí ñu cunacoto nuu ñu chii cha cuví Nyoo.

Ta cusacahnu ñu chii chihin nuu tandihí ñáyivi, catyí Nyoo.

¹² Yucuan chaha noo noo maa yo ta nacuhva yo cuenda cha sacuvi yo chi Nyoo.

Ma sanacavon nu cuatyí chi yañun

¹³ Yucuan chaha, ña tahán ca chi cahan nyaa yo chi tahan yo. Soco nducu yo cuhva cha ma sanacava yo chi ñu nu cuatyí coto sandihí ñu tuhun cha chino iñi ñu.

¹⁴ Yuhu chité vatyí ñahri cha ma cuví cachi, vatyí chinó vaha iñi chi Sutu Mañi yo Jesucristo, ta maa ra sañahá chii. Soco tatu yihí ñu chicá xiñi ñu tyi yihí cha ña vaha cachi ñu, cha cuenda maa ñu, ña vaha.

¹⁵ Soco tatu cha cuenda cha chachún ta quiñi cuñí yañun, ña ndicha cha cuñún chi ra, ñima ca cuhva cuñí Nyoo sacuvún. Ma cuhvon cha tiví noo ñu chihin cha chachún vatyí ra Cristo chihí ra cha cuenda ñu.

¹⁶ Ma cuhva ndo cha cahan ña vaha ñu siqui noo cha chaha Nyoo ityi chuun tyi cachun.

¹⁷ Vatyí cha nyacá ñaha Nyoo chi yo cuví chi noo cha cachi coo yo nuu ra. Cusií cuñi yo ta taxi ri cuñi añima yo cha cuenda Tatyí li Nyoo cha nyaá añima yo. Ta ña niñi tuhun cha chachi yo o cha chihí yo.

¹⁸ Ñu sacuví tyiño nuu ra Cristo tyehe caa, sií cuñí Nyoo nyehé ra chi ñu, ta catyí tucu ñáyivi tyi vaha ñáyivi cuví ñu.

¹⁹ Yucuan chaha cuñí chi cha sañihi ca yo cha coo taxi ri yo chihin ñáyivi. Ta tyicuan caa ta cuví tyinyee yo chi noo noo tahan yo na cuahnu yo chihin tuhun Nyoo.

²⁰ Ma sativun tyiño sahá Nyoo añima inga ñáyivi cha cuenda noo cha chachí run. Ndicha vatyí tandihí cha chachí yo ta vaha. Soco ña vaha cha cachi yo tatu chihin cuan sanacavá yo nuu cuatyí chi inga ñu.

²¹ Yucuan chaha, vaha ca cha ma cachi yo coño, ni cha ma coho yo vinu, tatu quiñi cuñi yañi yo chihin cuan. Ma sanacava yo chi ñu nu cuatyí. Ma casi yo chihin noo cha sacuvi yo nu chinó iñi ñu chi Nyoo.

²² Tatu chinó iñun vatyí cuví cachun tandihí, vaha. Soco ma cahun tuhun cuan chihin inga ñu. Noo tuhun ri maun chihin Nyoo coto tuhun cuan. Sií xaan cuñí yo tatu ña chicá uvi iñi yo noo cha chaha Nyoo ityi chi yo cha sacuví yo.

²³ Soco ñu cha chachí ñáá cha chachí ñu, ta chicá uvi iñi ñu, chicoo cuatyí ñu, vatyí ña chinó vaha iñi ñu tyi cuví cachi ñu. Ta tandihí cha sacuví yo chihin cha ña chiño iñi yo tyi chaha Nyoo ityi chi yo tyi sacuvi yo, cuatyí cuví.

15

Na sacuvi yo cha tahán iñi tahan yo, ta ñima cha tahán iñi ri maa yo

¹ Yoó cha ñihi nyaá yo chihin Nyoo, cuñí chi cha tyinyee yo chí ñu cha ña ñihi nyaá chihin Nyoo. Ta ma nducu yo cha tahán iñi ri maa yo.

² Tahan tahan yo cuñí chi cha sacuvi yo cuhva tahán iñi inga ñu cha cuenda cha vaha chí ñu, tacuhva cuví cuahnu ca ñu chihin tuhun Nyoo.

³ Vatyí ní ri ra Cristo ña sacuvi ra cuhva tahán iñi maa ra, soco cuví chí ra tari catyí nu tutu Nyoo tyehe caa: “Tandíhi cha cahán ñáyivi chí Nyoo, chí ra Cristo cahán ñu”, catyí chí.

⁴ Vatyí tandíhi cha chicunyaá nu tutu Nyoo ta ityi chata ca, chicunyaá chí cha cuenda cha cutuhva yo, tacuhva cuví cuatu yo cha cuñihi yo chihin cha cama iñi yo. Ta vaha cuñí añima yo cha cuenda cha sacuahá yo nu tutu Nyoo.

⁵ Ta Nyoo ican ra chahá cha cama iñi yo, ta chahá ra cha vaha cuñí añima yo. Na tyinyee ca ra chí yo cha coo yo chihin cha ñin ri cuví yo chihin tahan yo tari cuhva iyó ra Cristo Jesús.

⁶ Vatyí tacuhva tandíhi yo ñin ri noo cuhva sachanu yo chí Nyoo Sutu ra Jesucristo ra nyacá ñaha chí yo.

Ñáyivi ñima ñu Israel cuví, cucuiñi ñu tuhun Nyoo

⁷ Yucuan chaha tñin cuenda vaha yo chí tahan yo tacuhva vatyí sachanu yo chí Nyoo tari tñin cuenda vaha ra Cristo chí maa yo cha cuenda vatyí sachanú ra chí Nyoo.

⁸ Vatyí catyí yuhu chí ndo vatyí ra Cristo quichí tyinyee ra chí yo cha cuví yo ñu Israel, tacuhva sacuvi ra cha catyí Nyoo chí sutu chahnu yo tyi cusacuvi ra. Ta tyicuan caa ta sañahá ra Cristo vatyí Nyoo sacuvi ra cha catyí ra tyi sacuvi ra.

⁹ Ta quichí tucu ra Cristo tacuhva vatyí ñu cha ñima ñu Israel cuví sachanu tucu ñu cuan chí Nyoo, vatyí Nyoo ndahvi cuñí ra nyehe ra chí ñu, tari catyí nu tutu Nyoo tyehe caa:

Yucuan chaha cusacahni chuun chihin nuu ñu cha ñima ñu Israel cuví, tandíhi ityi ñu iyó siqui ñuhu ñáyivi.

Ta cucate yaa cha cuenda cha sachanú chuun nuu ñu, catyí chí.

¹⁰ Ta inga tucu nu catyí chí nu tutu Nyoo tyehe caa:

Cusi cuñi nyoho ñu cha ñima ñu Israel cuví. Cusi cuñi ndo chihin ñu Israel cha cuví ñu ñáyivi cuenda Nyoo.

¹¹ Ta inga tucu nu catyí chí nu tutu Nyoo tyehe caa:

Sacahnu ndo chí Sutu Mañi yo, nyoho ñu cha ñima ñu Israel cuví.

Tandíhi ñáyivi sachanú ñu chí ra cha cuenda cha cahnu xaan cuví maa ra.

¹² Tyaa tucu ra Isaías nu tutu Nyoo tyehe caa:

Cucacu minoo ra vachi tata ra Isaí.

Cuquichi ra vatyí cunyaca ñaha ra chí ñu cha ñima ñu Israel cuví.

Ta maa ñu cuquichi iñi ñu chí ra vatyí cusacacu ra chí ñu.

¹³ Nyoo ican ra chahá tunyee iñi chí yo ta chitó yo tyi cuhva ra cha cuhva ra chí yo. ¡Na sacutu ra chí ndo chihin tushi iñi! Ta coo cha taxi ri cuñí añima ndo cha cuenda cha chinó iñi ndo chí ra, tacuhva vatyí chihin tunyee iñi Tatyí Ii ra ta quichi vaha iñi ndo cha cucuhva ra chí ndo.

¹⁴ Yañi luhli, chitó vahi vatyí nyoho vaha xaan ñáyivi cuví ndo ta chitó ndo tandíhi, ta chitó vaha ndo cuhva ndo tuhun chí tahan ndo.

¹⁵ Soco nu carta ihya ñihi xaan cahín siqui tandíhi tuhun cha tyai, tacuhva cha ma naa iñi ndo. Tyehe caa sacuvi chí cuenda tyi Nyoo chahá ra tumañi iñi chíi

¹⁶ cha sacuvi tyiño nuu ra Jesucristo nu nyicu ñu cha ñima ñu Israel cuví. Ta tyiño cha sacuví, ican cuví cha cahín tuhun Nyoo yoso caa sacacu ra añima ñáyivi. Tyehe caa sacuví tacuhva vatyí ñu cha ñima ñu Israel cuví, cuví nacuhva cuende chí ñu chí Nyoo tari noo ofrenda cha tahan iñi ra, vatyí cha ndundí ñu nuu ra cha cuenda Tatyí Ii ra.

¹⁷ Cha cuenda cha nacuhva cuende chíi chí ra Cristo Jesús, yucuan cuenda cuví cusi cuñi ta chité tyi vaha quitá tyiño sacuví nuu Nyoo.

¹⁸ Vatyí ña cañá iñi cahin cha ña nyehi. Soco nacatyí cha sacuvi ra Cristo nu chicá noi cahín tuhun Nyoo tacuhva vatyí ñu cha ñima ñu Israel cuví quichaha ñu chí Nyoo. Ta ihya ndicha cha cahín.

¹⁹ Vatyí chihin seña ta milagru ta chihin tunyee iñi Tatyí Ii ra sacuvi ra. Ta tyicuan

caa cahín tuhun cha cacu añima ñu sahá ra. Quichahí nya Jerusalén ta tandihí ityi ta nyacua nya Ilírico.

²⁰ Ta tyicuan caa saniñí cahin tuhun cha cacu añima yo maa maa ri nu ta cuiñi ca maa ñáyivi tuhun ra Cristo, tacuhva vatyí ma saha tyiñe nu quichahá saha tyiño inga ra.

²¹ Tari catyí nu tutu Nyoo tyehe caa: Cucoto ñáyivi cha ta coto ca maa tuhun ra. Ta cucutuñi iñi ñu cha ta ñaha ca maa cuiñi tuhun ra, catyí chí.

Nu tyaá ra Pablo cuhva cha cuhun ra ñuu Roma

²² Yucuan chaha ña cuví maa tuhun cha cuhin cunyehi nu nyicú ndo, vasi cuaha xaan chaha cuñi cuhin.

²³ Soco vityin cha ndihí tyiño sahí ityi ñuu ihya. Ta cha cuaha xaan cuiya cuñi cuhin cunyehi nu nyicú ndo ta cunyai suhva quívi chihin ndo.

²⁴ Nyehí tatu cuhin cunyehi nu nyicú ndo quívi cuhin España. Ta cha yaha cha cunyehi chí ndo, nyehi tatu cuví tyinyee ndo chíi ta cuchaa ndihí nu cuahin.

²⁵ Soco vityin cuahin ñuu Jerusalén ta nyisé suhva cha cutyinyee chí ñu cuenda Nyoo yucuan.

²⁶ Vatyí ñu vehe ñuhu ityi Macedonia ta ityi Acaya nacuaan iñi ñu cha tava ñu suhva xuhun vatyí sacuhun ñu chí ñu ndahvi ñu cuenda Nyoo cha iyó Jerusalén.

²⁷ Tyehe caa quichí cuví iñi ñu sacuví ñu. Ta ndicha vatyí tahán chí sacuví ñu. Vatyí tari maa ñu Israel, ñu chinó iñi chí ra Cristo, chahá ñu tuhun Nyoo chí ñu cha ñima ñu Israel cuví, tyicuan caa tahán chí chí ñu cuan tyinyee tucu ñu chí ñu Israel chihin cha iyó chí ñu.

²⁸ Yucuan chaha, tatu cha yaha sandai tyiño ihya, ta cha yaha nacuhva cuende xuhun ihya chí ñu Jerusalén, tyicuan ta cuhin nya España ta yahi nu nyicú ndo.

²⁹ Chitó vahi vatyí na cuhin nu nyicú ndo, cuchai chihin cha tyitu añime chihin cha vaha Nyoo cha chahá ra Cristo chíi.

³⁰ Yañi, chacú ndahvi nuu ndo na cu ñin ri ndo chihin, chihin tindoho cha nyehí, ta çacan tahvi ndo chí Nyoo cha cuende vatyí cuñi ndo chí Sutu Mañi yo Jesucristo, ta vatyí chahá Tatyí Ii Nyoo cha cuñi ndo chíi.

³¹ Çacan ndo cha cuende, na sacacu Nyoo chíi ndaha ñu ña chinó iñi chí ra Cristo ityi Judea cuan. Ta çacan ndo cha cuenda cha nyisé ihya cha cuenda ñu cuenda Nyoo ñu Jerusalén cuan, na natíin cuenda vaha ñu.

³² Vatyí tatu Nyoo ta cuñi ra, chihin cha sñi cuñi quichi nyehi chí ndo ta cuví nyitati ñin ri chihin ndo.

³³ Ta Nyoo ra chahá cha taxi ri coo añima yo, na cunyaa ra chihin tandihí ndo. Ta načuvi tyicuan caa.

16

Nu sacuhún ra Pablo nocumi chí ñu amigo ra

¹ Sacoté chí ndo cha cuenda hermana Febe vatyí tyinyee xaan ña chí ñu yihí cuenda Nyoo ñuu Cencrea.

² Tíin cuenda vaha ndo chí ña tari tíin cuenda Sutu Mañi yo, tari tahán chí sacuví ñu yihí cuenda Nyoo. Ta tyinyee ndo chí ña chihin tandihí cha chiñuhu chí ña, vatyí cuaha xaan ñu tyinyee ña chí, ta chí yuhu ñandihí.

³ Cuhva ndo nocumi chí cu Priscila ta chí ra Aquila ñu cha cutahan chihin ndi nu tyiño cha sacuví ndi cuenda ra Cristo Jesús.

⁴ Chahnya iñi ñu ñáyivi ñu quívi cuan cha cuenda cha sacacu ñu chíi, yucuan chaha vatyí nacuhvé tyahvi nyoo chí ñu. Ta ñima yuhu ri, soco tandihí tucu ñu cha ñima ñu Israel cuví, ta yihí tucu ñu cuenda Nyoo.

⁵ Cuhva tucu ndo nocumi chí ñu yihí cuenda Nyoo cha candú ñin ri vehe cu Priscila ta ra Aquila. Vachi tucu nocumi chí ra tahin, ra Epeneto. Ican ra cuví ra cha xihna ca chino iñi chí ra Cristo ityi Acaya.

⁶ Cuhva ndo nocumi chí cu María. Sahá tyiño xaan ña nu nyicú ndo.

⁷ Cuhva ndo nocumi chí ñu ñui, ra Andrónico ta ra Junias, ra tahin cha ñoho chihin vehe caa. Cahnu tyiño casahá ra cuenda Sutu Mañi yo chihin tandihí ca ra sahá tyiño cuenda Nyoo. Ta xihna ca ra cachino iñi chí ra Cristo ican saha yuhu.

⁸ Cuhva ndo nocumi chí ra Amplias ra tahin cuenda Sutu Mañi yo.

⁹ Cuhva ndo nocumi chí ra Urbano, ra tahan yo cuenda tyiño ra Cristo Jesús, ta chí ra Estaquis ra tahin ñandihí.

10 Cuhva ndo nocumi chi ra Apeles. Nyehé yo tyi ndicha cha chinó iñi ra chi ra Cristo. Ta nocumi chi ñáyivi chi ra Aristóbulo ñandihí.

11 Cuhva ndo nocumi chi ra ñui, ra Herodión, ta chi ñáyivi chi ra Narciso ñu cha chinó iñi chi Sutú Mañi yo.

12 Vachi nocumi chi cu Trifena ta chi cu Trifosa, ñu casahá tyiño chihin Sutú Mañi yo. Ta chi hermana yo cu Pérsida, ñaha cha sahá tyiño xaan nu tyiño Sutú Mañi yo.

13 Cuhva ndo nocumi chi ra Rufo, noo ra cahnu cuví ra nuu Nyoo vatyí chinó vaha iñi ra chi Sutú Mañi yo. Ta vachi tucu noo cumi chi síhi ra Rufo. Cuví ña tari síhi.

14 Cuhva ndo nocumi chi ra Asíncrito, chi ra Flegonte ta chi ra Hermas, ta chi ra Patrobas, chi ra Hermes ta chi ra hermano cha canyicú chihin ra.

15 Cuhva tucu ndo nocumi chi ra Filólogo ta chi cu Julia ta chi ra Nereo chihin cuhva ra, ta chi ra Olimpas ta chi tandihí ñu cuenda Nyoo cha nyicú chihin ñu.

16 Nacuhva ndo noo cumi chi noo noo tahan ndo cuenda Nyoo. Tandihí ñu yihí cuenda ra Cristo saquichí ñu nocumi chi ndo.

17 Yañi, chacú ndahvi nuu ndo, na saha ndo cuenda chi ñu cuñí sasñin chi ndo, ta nducú ñu cuhva cha nduva ndo chihin tuhun Nyoo, vatyí ñima tyicuan caa cutuhva ndo tuhun ra Cristo. Ma cutahan ndo chihin ñu cuan.

18 Vatyí ñu cuan ñima tyiño nuu Sutú Mañi yo Jesucristo sacuví ñu, soco cuhva cuñí maa ñu sacuví ñu. Ta sandahví ñaha ñu añima ñáyivi ndahvi chihin tuhun vita cahán ñu.

19 Tandihí ñáyivi chitó yoso caa quichahá vaha ndo chi Nyoo. Yucuan chaha cusñi xaan cuñí chihin ndo, ta cuñí vatyí natyihí tuñi vaha iñi ndo sacuvi ndo cha vaha. Ta ñaha cutuhva ndo sacuvi ndo cha ña vaha.

20 Nyoo ra iyó tandihí cha taxi ri añima, numi ri cuhva ra cha saha ganaa ndo chi ra ña vaha, ta cuhva ra cha cuañi ndo síqui ra. Na nasoco Sutú Mañi yo Jesucristo chi ndo.

21 Ra Timoteo ra cuví ra tahin nuu tyiño sacuví ndi nuu Nyoo, saquichí ra nocumi chi ndo. Ta tyicuan caa tucu ra Lucio, ta ra Jasón, ta ra Sosípater, tandihí ra ñui cuan casaquichí ra nocumi chi ndo.

22 Yuhu ra Tercio savahi tutu ihya cha cuenda ra Pablo, suri saquichí tiqui nocumi chi ndo tyi ñin ri yihí yo cuenda Sutú Mañi yo.

23 Saquichí ra Gayo nocumi chi ndo ñandihí. Vehe ra nyaí suri ihya ndú ñin ri ndi tandihí ñu yihí cuenda Nyoo. Ra Erasto ra cuví tesorero ñuu ihya, saquichí ra nocumi chi ndo, ta yañi yo ra Cuarto ñandihí.

24 Na cocumi Sutú Mañi yo Jesucristo chi tandihí ndo. Ta na cuví chi tyicuan caa.

Nu ndihí cahán ra Pablo ta sacahnú ra chi Nyoo

25 Ta vityin na sacahnu yo chi Nyoo, vatyí maa ra cuví ra cucuhva cha cunñi iñi ndo, ta ma sandihí ndo cha chinó iñi ndo tuhun ra cha sacacú ra añima yo. Ican cuví tuhun cahín ta tuhun cha sañahí cha cuenda ra Jesucristo. ñin ri cuví chi chihin tuhun cha ñoho xehe ta cha naha nyata ni cumañi chinó ñuhu ñáyivi.

26 Soco vityin sañahá Nyoo chi yo cha cuenda tutu cha casandoo ra profeta, ra cachaha cuenda tuhun ra ta cha naha. Catiyí Nyoo, ra iyó tyicuan ri maa, tyi vityin tahán chi coto tandihí ñáyivi tacuhva chino iñi ñu chi ra ta quichaha ñu tuhun cahán ra.

27 Nyoo noo tuhun maa ra, ta chiñi tuñi xaan ra. Na sacahnu yo chi ra cha cuenda ra Jesucristo tyicuan ri maa. Ta na cuví chi tyicuan caa.

Carta Cha Xihna Ri Sacuhun Ra Apóstol Pablo Chi Ñáyiví Ñuu Corinto Cha Yihí Cuenda Nyoo

*Nu tyaá ra Pablo noo tutu chi ñáyiví ñuu
Corinto cha yihí cuenda Nyoo*

¹ Yuhu ra Pablo, nacana Nyoo chii vatyí cuñí ra cha cuví noo apóstol ra Jesucristo, o cuñí chi catyí vatyí tachi ra chii nacaque tyiño ra. Yuhu chihin ra Sóstenes yañi yo

² saquichí ndi noo carta ihya chi ndo cha nyicú ndo vehe ñuhu cuenda Nyoo cha nyaá ñuu Corinto. Ñáyiví chi Nyoo cuví ndo vityin, cha cuenda cha ndu ñin ri ndo chihin ra Cristo Jesús. Nyoo nacana ra chi ndo vatyí nanduvi ndo noo ñáyiví vaha cuenda ra, chihin tandihí ñáyiví cha sacahnú chi Sutu Mañi yo Jesucristo tandihí ri ityi. Vatyí cuví ra Nyoo cuenda ñu ta cuenda maa yo ñandihí.

³ Nyoo Sutu yo ta Sutu Mañi yo Jesucristo na nasoco ra chi ndo, ta nacuhva ra cha taxi ri coo aña ndo.

*Yoso caa nasocó Nyoo chi ñu yihí cuenda
ra*

⁴ Tyicuan ri nacuhvé tyahvi nyoo chi Nyoo cha catyí maa ndo, vatyí chaha ra cha vaha chi ndo cuenda ra Cristo Jesús.

⁵ Ta cha ñin ri cuví ndo chihin ra Cristo, Nyoo chahá ra tunyee ñni ra chi ndo tacuhva cuví cahán ndo tuhun ra. Ta chahá ra cha chiñi tuñi vaha chi ndo.

⁶ Ta tandihí cha catyí chi ndo, tuhun ra Cristo, cuahán chino cava ñayiví ndo vityin.

⁷ Yucuan chaha ñahri cha cumañí chi ndo. Chahá Nyoo tandihí cha vaha chi ndo cha ni ri ca cha nyatú ndo quiví quichi Sutu Mañi yo Jesucristo.

⁸ Nyoo cusaha cuenda ra chi ndo nyacua nya naa ñayiví tacuhva yori cuví catyí ñáa cha catyí chi ndo quiví quichi Sutu Mañi yo Jesucristo.

⁹ Nyoo tyicuan ri sacuví ra tari cuhva catyí ra. Ta maa ra cuví ra nacana chi ndo tyi cu ñin ri ndo chihin Sehe ra, ra Jesucristo, Sutu Mañi yo.

*Tatu yihí yo cuenda Sutu Mañi yo, ña
vaha cha cusin yo*

¹⁰ Yañi, chiquén chi ndo chihin sivi Sutu Mañi yo Jesucristo, na ñin ri cuví ndo ta ma cusin ndo. Ta ñin ri cuhva caça xiñi ndo. Ta ñin ri tuhun quihí ñni ndo.

¹¹ Catyí chi ndo tyehe caa, yañi, tyi catyí ñáyiví chi ra Cloé chii, vatyí iyó tisihí nu nyicú ndo.

¹² Vatyí nyoho sin sin cuhva cahán ndo. Noo ndo catyí ndo: “Yuhu, cuenda ra Pablo yihí.” Inga ndo catyí ndo: “Yuhu, cuenda ra Apolos yihí.” Inga ndo catyí ndo: “Yuhu, cuenda ra Pedro yihí.” Inga ndo catyí ndo: “Yuhu cuenda ra Cristo yihí.”

¹³ ¿Atu tahvi sava ra Cristo? ¿Atu chihí yuhu ra Pablo nu cruzi cha catyí ndo? ¿Atu condutyá ndo chihin sivi yuhu? Ñima.

¹⁴ Tyahvi nyoo chi Nyoo vatyí yuhu ña sacondutyé chi ni noo nyoho. Soco noo ri sacondutyé chi ra Crispo ri chihin ra Gayo ri.

¹⁵ Tyicuan caa ta ni noo ndo ta ma cuví catyí ndo vatyí condutyá ndo chihin sivi.

¹⁶ Aan, ta suri sacondutyá tiqui chi ñáyiví chi ra Estéfanos. Soco ña nicohón ñni cha sacondutyé chi inga ndo.

¹⁷ Vatyí ra Cristo ña tachi ra chii tyi sacondutyé. Soco tachi ra tyiño chii vatyí cahin tuhun ra yoso caa sacacú ra chi yo. Soco ña cahín chihin cha chiñi tuñi ñayiví ihya, coto catyí ñáyiví chii tyi ñahri yahvi nyaá cha chihí ra Cristo cuenda cuatyí yo.

*Vaha ca cha chiñi tuñi Nyoo ta ñima ca
cha chiñi tuñi ñayiví ihya*

¹⁸ Tuhun cha chihí ra Cristo nu cruzi cha catyí cuatyí yo, ñima ri tuhun cuví cuan cha cuenda chi ñáyiví cha cunaa nu cuví anyaya. Soco cha cuenda chi maa yo cha cuví yo ñáyiví cacú aña, tunyee ñni cha chahá Nyoo chi yo cuví cuan.

¹⁹ Vatyí tyicuan caa tucu catyí maa tuhun Nyoo:

Cusanai cha chiñi tuñi ra cuñí maa tyi chitó

xaan.
Ta cha chitó xaan ra chiñi tuñi cutave ñin
chiyo xiin, catyí Nyoo.

²⁰ Ñahri tuhun cha chitó xaan ra chiñi tuñi, ta ra sacuhva, ta ra chitó xaan nacahan ñáa ndihí tuhun iyó siqui ñuhu ñayiví ihya. Vatyí cha chiñi tuñi cha iyó siqui ñuhu

ñayiví ihya, cha ñima ri tuhun nasahá Nyoo chí cuan.

²¹ Nyoo chihin cha chiñi tuñi ra tyaá ra cuhva vatyí ma cuví cohon nuu ñáyiví chí ra chihin cha chiñi tuñi cha iyó síqui ñuhu ñayiví ihya, soco tyaá ra cuhva vatyí sacacú ra chí ñu chinó iñi tuhun cha cahan noo ñáyiví nuu ñu. Vasi ñima ri tuhun cuví tuhun cuan cha cuenda ñu cha ña ñohó nuu chí Nyoo.

²² Vatyí ñáyiví Israel cuñí ñu nyehe ñu milagru. Ta ñu Grecia maa maa ri maa cha chiñi tuñi ñayiví ihya nanducú ñu.

²³ Soco yoó sacotó yo tuhun ra Cristo, ra chihí nu cruzi. Ta ñáyiví Israel cahan nuu ñu chiñí ñu tuhun ihya. Ta ñu cha ñima ñu Israel cuví, cuñí maa ñu tyi tuhun cha ñima ri tuhun cuví ihya.

²⁴ Soco cha cuenda chí ñu nacana Nyoo, an cuví ri ñu ñu Israel, o ñu Grecia, ra Cristo cuví tunyee iñi ta cha chiñi tuñi Nyoo.

²⁵ Vatyí cuñí maa ñáyiví vatyí noo cha ñima ri tuhun cuví cha sacuví Nyoo. Soco chiñi tuñi xaan ca Nyoo ta ñima ca ñáyiví iyó síqui ñuhu ñayiví ihya. Ta cuñí maa ñayiví tyi ña ñihí fuerza Nyoo. Soco ican cuan cuví fuerza cha ñihi ca cha nuu fuerza tandihí ñáyiví.

²⁶ Yañi, cuñí chí coto ndo vatyí Nyoo nacana ra chí ndo vasi maa ri ñáyiví soho cuví ndo, ta mañi ndo cuví ndo ñáyiví tyayíi o ñáyiví chitó xaan cha chiñi tuñi ñayiví ihya.

²⁷ Soco Nyoo nacachí vaha ra chí ñáyiví soho. Vatyí cuhvá ñu ticahan nuu chí ñu cuñí maa tyi chíñi tuñi xaan. Ta nacachí vaha ra chí ñáyiví ñahri fuerza vatyí cuhva ñu ticahan nuu chí ñu cuñí maa tyi iyó xaan fuerza.

²⁸ Nyoo nacachí vaha ra chí ñáyiví ndahví cha cuñí maa ñáyiví tyi ña chiñuhú ñu. Nacachí ra chí ñáyiví cha ña cuñí nyehe ñáyiví chii, vatyí sanocuee ra chí ra cuví tyiño nahnu.

²⁹ Tyicuan caa sacuví Nyoo tacuhva tyi yori sacahnú chii nuu ra.

³⁰ Soco maa maa Nyoo sacu ñin ri ra chí yo chihin ra Cristo Jesús. Ta sacuví ra tyi ra Cristo cuhva ra cha chíñi tuñi chí yo, ta sacuvahá ra chí yo ta sandundá ra chí yo nuu Nyoo vatyí tyiyahví ra chihin ñiñi ra

cha catyí cuatyí yo, tacuhva cuví cacu yo.

³¹ Yucuan chaha sacuví yo tari cuhva catyí nuu tutu Nyoo tyehe caa: “Tatu yóo cha cuñí cuyaa, vaha na cuyaa maa soco chihin Nyoo.”

2

Tuhun ra Cristo, ra chihí nu cruzi

¹ Soco yañi, quiví chahin chicahin tuhun Nyoo chihin ndo, ña cahin tuhun cha chíñi tuñi ñuhu ñayiví ihya.

² Soco maa ri maa tuhun ra Jesucristo, yoso caa chihí ra nu cruzi cha catyí cuatyí yo tyai xiñi ta nacatyí chí ndo.

³ Ta chái nu nyicu ndo tari cha ñahri fuerze. Ta ñihí chihin cha yuhvi.

⁴ Ta cuhva cha cahin nuu ndo, ña cahin chihin tuhun tyaquí tuhun cha chíñi tuñi tari cahan noo ra chitó xaan. Ñima. Soco chihin fuerza maa Tatyí li Nyoo cahin chihin ndo.

⁵ Tacuhva vatyí nachino iñi ndo chí Nyoo soco cha cuenda fuerza maa Nyoo. Ta ñima cha cuenda cha chíñi tuñi ñayiví ihya.

Nyoo chahá ra cha cohon nuu yo chí ra chihin Tatyí li ra

⁶ Soco suvita ri tyi cahan ndi tuhun cha chíñi tuñi chihin ñu cha ñihi ca nyaá chihin tuhun Nyoo. Soco cha chíñi tuñi Nyoo, ta ñima cha chíñi tuñi ñuhu ñayiví ihya, ni ri cha chíñi tuñi ra nyacá ñaha síqui ñuhu ñayiví. Vatyí maa ra cucunaa ra.

⁷ Soco tuhun xehe cha chíñi tuñi maa Nyoo cahan ndi. Vatyí Nyoo chicumí xehe ra minoo tuhun vaha nya ta ni cumañi chino ñuhu ñayiví ihya. Vatyí tyaá ra cuhva tyi cucacu añima yo ta cunyaa yo noo nu vaha chihin ra tyicuan ri maa.

⁸ Ta tuhun ihya ta cutuñi ca iñi ni noo ra nyacá ñaha ñuhu ñayiví ihya. Vatyí tyehe ta cutuñi iñi ra, ma catyaa ra chí Sutu Mañi yo, ra nyacá ñaha gloria, nu cruzi.

⁹ Soco tari cuhva catyí maa tuhun Nyoo: Nyoo sanduvahá ra noo cha vaha xaan tyi cuhva ra chí ñáyiví cha cuñí chí ra.

Ta ni noo ñáyiví ta nyehe ca ñu, ta ta cuiñi ca ñu, ta ta ndichi ca xiñi ñu yoso cuhva cha vaha cha chahá Nyoo chí yo, catyí tuhun Nyoo.

10 Soco Nyoo chahá ra Tatyí li ra vatyí cutuñi iñi yo tuhun ihya. Vatyí Tatyí li ra sañahá chi tandihí chi yo nyacua nya tuhun cha xehe ca cha cumi maa Nyoo.

11 Ma cuví coto noo ra cha chicá xiñi inga ra. Soco suri maa ra chitó ra cha chicá xiñi maa ra. Ta tyicuan caa tucu noo ri Tatyí li Nyoo chitó cha yihí iñi maa Nyoo.

12 Yoó ñima cha chiñi tuñi ñuhu ñayivi naquehen yo, soco maa Nyoo chahá ra Tatyí li ra chi yo vatyí sacoto chi chi yo yoso caa cha tyaqui cha chahá Nyoo chi yo.

13 Tuhun cha cahán ndi chihin ndo ihya, tuhun cha sañahá maa Tatyí li Nyoo chi ndi cuví. Ñima tuhun cha cutuhva ri maa ndi chihin cha chiñi tuñi xiñi ndi. Nacatyí ndi tuhun cha sañahá Tatyí li Nyoo chi ndi chi ñu cha yihí Tatyí li Nyoo chi.

14 Soco ñu cha ña yihí Tatyí li Nyoo chi, ña cutuñi iñi ñu ta ña cuñi ñu cuiñi ñu cha sañaha Tatyí li Nyoo chi ñu, vatyí cuñi maa ñu tyi tuhun cha ñima ri tuhun cuví cuan. Vatyí ñn ri maa ñu cha yihí Tatyí li Nyoo cuví cutuñi iñi ñu tuhun cuan.

15 Soco ñu yihí Tatyí li Nyoo cuví cutuñi iñi ñu. Ta chitó ñu tatu vaha o ña vaha ñáá noo tuhun. Soco ma cuví catyí inga ñayivi tatu vaha o ña vaha cha caá ñima maa ñu.

16 Vatyí tuhun Nyoo catyí chi: “Yori chitó tuhun cha chicá xiñi Sutu Mañi yo. Yori cuví sañahá chi Nyoo”, catyí tuhun Nyoo. Soco yoó cha yihí yo Tatyí li Nyoo, chitó yo cha chicá xiñi ra Cristo.

3

Ña tahán chi cunyicon yo chi noo ra yañi yo, chi Nyoo na cunyicon yo

1 Soco yañi, quivi cuan ña cuví cahin chihin ndo tari cahín chihin ñu saquehen ityi Tatyí li Nyoo chi, soco cahín chihin ndo tari cahín chihin ñu ni nachino iñi chi Nyoo, tari cha vatyí ni nyihí ndo chihin tuhun ra Cristo cuví cuan.

2 Cahín chihin ndo chihin tuhun cha ña yihí ri cutuñi iñi ndo. Tari chahá yo sicui coho cha lee cha ta cuví ca cachi nyayu, tyicuan caa sacuví chihin ndo. Vatyí nyoho, quivi cuan ta cuví ca chi ndo. ¡Ta ni vityin ta ta cuví ca chi ndo!

3 Vatyí ni chicá ca xiñi ndo cuhva chicá xiñi ñayivi iyó siqui ñuhu ñayivi ihya. Nyiyó

iñi ndo. Iyó tisihi nu nyicú ndo. Cacusin ndo. Ni chicá ca xiñi ndo tuhun ñuhu ñayivi ihya. Ta nyacuví ndo tari nyacuví ñayivi cha ña ñohó nuu Nyoo.

4 Vatyí yihí ndo catyí ndo: “Yuhu cuenda ra Pablo yihí.” Ta inga ndo catyí ndo: “Yuhu cuenda ra Apolos yihí.” Cuñi chi catyí tyi nyacuví ndo tari nyacuví ñayivi ña ñohó nuu chi Nyoo.

5 Vatyí zyóo ra cuví yuhu, ra Pablo? Ta zyóo ra cuví ra Apolos? vatyí cañi tahan ndo cha catyí ndi. Vatyí noo ra casacotó tuhun Nyoo chi ndo cuví ndi. Ta yucuan chaha nachino iñi ndo chi Sutu Mañi yo. Ta noo noo ndi sacuví ndi tyiño cha catyí maa Nyoo tyi sacuvi ndi.

6 Yuhu tachí chiti tuhun Nyoo ñima ndo. Ta ra Apolos chosó ra. Soco Nyoo sacuahnu ra tuhun ra ñima ndo.

7 Ta yucuan chaha ni ri ra cha tachí ta ni ri ra cha chosó, ñahri ra cuví ra. Soco Nyoo cuví ra tandihí. Vatyí maa ra sacuahnú ra tuhun ra ñima ndo.

8 Ra cha tachí ta ra cha chosó, ñn ri ra cuví ra. Ta cuñihi ra nu vaha sahá Nyoo yoso cuhva tyiño sahá noo noo ra.

9 Ta tyicuan caa nyuhu, sahatyiño ndi soco tyiño nuu Nyoo. Ta nyoho cuví ndo tari noo ñuhú nu sahá tyiño Nyoo.

Cuví tucu ndo tari noo vehe cha cuahán savaha Nyoo.

10 Catyí Nyoo tyi yuhu cuví tari noo ra cuví nuu cha sama vehe. Vatyí chaquin cuhva vehe cuan ta tyihí chaha chi ñuhú. Ta inga ra samá ityi siqui. Soco cuñi chi sahá ra cuenda yoso cuhva samá ra siqui cuan.

11 Ta yori cuví cacun inga cuhva vatyí cha caá cuhva cuan. Vatyí suri maa ra Jesucristo cuví cuhva cuan.

12 Ta siqui cuhva cuan cuví sama yo chihin xuhun cuaan, chihin xuhun cuichin, chihin yuu tyaqui, o chihin vitu, o chihin tuñama o chihin ndaha numa.

13 Soco quivi cutuñi chi ñayivi, cunyehe ra Cristo tyiño saha noo noo yo. Vatyí cuquichi ra chihin ñuhu. Ta ñuhu cuan cucahmi chi nya cha ña vaha.

14 Ta tatu yihí ñu sacuvi ñu tyiño vaha, ma cayu chi. Cuñihi ñu cha cuhva Nyoo chi ñu.

15 Soco tatu tyiño sahá ñu ta ndi cayu, cunaa tandihi tyiño sahá ñu. Cacua maa ñu soco tari noo ra cha cuyatyí ca quita nu ñuhu. Vatyí chiiñ cuí ri ca ta cayu ra.

16 ¿Atu ña chitó ndo vatyí vehe ñuhu Nyoo cuví chi ndo, ta Tatyí Ii Nyoo iyó ra añima ndo?

17 Tatu nya noo ñu sativí vehe ñuhu Nyoo, Nyoo cusanaa ra chi ñu, vatyí vehe ñuhu Nyoo, cha ii cuví. Ta vehe ñuhu cuan ican cuví maa yo.

18 Ni noo ndo ta ma sandavi ñaha ndo chi ndo. Tatu nya nyoho cuñí maa ndo tyi chitó xaan ndo cha chiñi tuñi ñayiví ihya, ndahvi saha ndo chi ndo tari noo ra cha ña chitó maa. Tyicuan ta Nyoo cuhva ca ra cha chiñi tuñi vaha chi ndo.

19 Vatyí cha chiñi tuñi ñayiví ihya cuví chi noo cha ñima ri tuhun nuu Nyoo. Vatyí tuhun Nyoo catyí chi: “Nyoo sanacavá ra chi ra chitó, suri maa nu trampa cha savaha ra.”

20 Ta catyí tucu chi: “Sutu Mañi yo chitó ra vatyí cha chicá xiñi noo ra chitó, cha ñima ri tuhun cuví.”

21 Yucuan chaha ni noo ndo ña tahán chi sacahnú ndo chi ndo tatu nyicón ndo chi noo rayi. Vatyí tandihi cha iyó ta chi maa ndo cuví, tyi maa Nyoo chaha ra chi ndo.

22 Yuhu ra Pablo, ra Apolos, ra Pedro, maa Nyoo chaha ra chi ndi chi ndo tyi nacatyí ndi tuhun ra chi ndo. Ta ñuhu ñayiví ihya, ñayiví iyó yo, tuhun chihi, cha cuví vityin, cha cuvi nu cuahan ca chi, tandihi ta chi maa ndo cuví.

23 Ta siin ri, maa ndo, chi ra Cristo cuví chi ndo, ta ra Cristo, chi Nyoo cuví chi ra.

4

Ma sacahnu yo chi yo ta ni chi noo yañi yo

1 Cuñí chi vatyí nyehé ndo chi ndi tari noo ra sahá tyiño chihin ra Cristo. Vatyí tyaa Nyoo tyiño chi ndi vatyí sañaha ndi tuhun xehe ra cha ña chitó ñayiví nu quichi chi.

2 Ta cuñí chi vatyí nyuhu cha cuví ndi musu Nyoo nyita ri quichahá ndi tandihi cha catyí ra chi ndi.

3 Soco cha cuenda yuhu, ña quichahí tatu cahán ndo chii. O tatu cutuñí chii nuu noo

ra cuví tyiño, ñahri cuende. Ta ni ri mai ta ña catyí tyi vahi.

4 Vasi tuví iñi mai tyi ñahri ca cuatyí, soco ña cuñí chi catyí vatyí ñahri cuatyí nuu Nyoo. Vatyí nuu maa Sutu Mañi yo cucutuñí chi yo.

5 Ican tuhun, nyoho ma cahan ndo chi ndi. Cuatu ndo quivi quichi ra Cristo. Ta maa ra cutava nu ndichin cha ñohó xehe nu ñaa iñi. Vatyí cusanatuyi ra cha caá añima noo noo yo. Tyicuan ta Nyoo cuyiyahvi ra yoso cuhva sacuvi noo noo yo.

6 Yañi, cahín tuhun ihya chihin ndo cuenda cha vaha chi maa ndo. Vatyí nyehé ndo cuhva iyé, ta cuhva iyó ra Apolos. Vatyí ña cahnu sahá ndi chi ndi. Ta tyicuan caa tucu maa ndo, cutuhva ndo sacuvi ndo tari catyí nu tutu Nyoo: Ma cahnu saha ndo chi ndo. Ta ñima chi noo ri ra cuñi ndo. Soco inuu ri cuhva cuñi ndo chi tandihi ñayiví.

7 Ni noo ndo ta ña cahnu ca ra cuví ndo ican saha inga ndo. Vatyí cha iyó chi ndo maa ri maa cha chahá Nyoo cuví. Yucuan chaha ña tahán chi cha sacahnú ndo chi ndo, vatyí ñima maa ndo ñihí.

8 Cha cuhva cha cuñí maa ndo vatyí tandihi tuhun Nyoo chitó ndo, ta ñahri ca cha cumañí chi ndo. Ta cuñí maa ndo tyi Rey cuví ndo. Ta ña chiñuhú ca nyuhu chi ndo, cuñí maa ndo. Vaha tyehe ta tyicuan caa, tacuhva vatyí cuvi tucu nyuhu rey chihin ndo.

9 Nyuhu cha cuví ndi apóstol, tari maa cha sandoq Nyoo chi ndi nya chata ca, cahvi iñi. Vatyí nyehé xaan ndi tindoho. Cuví ndi tari noo ra iyó cuatyí, ta tari quivi cha yahá policía chihin ndi ityi cahnu vatyí tacuhva tyi nyehe ñayiví ta ángel chi ndi.

10 Sahá ñayiví tyi ra tondo cuví ndi cha cuenda ra Cristo. Ta nyoho cuñí maa ndo tyi chitó xaan ndo tuhun ra Cristo. Nyuhu cuví ndi tari noo ra cha ñahri fuerza, cha ni ri ca cha nyoho cuñí maa ndo tyi cuaha xaan fuerza ndo iyó. Tasi cuñí nyehe ñayiví chi ndi, ta chi nyoho sahá ñu ñayiví.

11 Nya vityin, nyehé ndi tindoho. Chisocó ndi. Ityi ndi ndutyá. Cumañí sahna ndi. Ñahrí vehe ndi iyó. Ta ñayiví, tasi iñi ñu chi ndi.

¹² Ta chitatú ndi cha sahá tyiño ndi chihin ndaha ndi. Cahán ñáyivi chi ndi. Soco naçahán ndi chihin cha vaha nu cahan ñu. Chicá nyicon ñu chi ndi soco cunyeé ndi.

¹³ Cahán ña vaha ñu síqui ndi. Soco ña yatyín iñi ndi, vita ri chaha ndi tuhun chi ñu. Sahá ñu tari noo mihin chi ndi. Sahá ñu tari noo cha ña chiñuhú ca chi ñáyivi chi ndi. Tyicuan caa sacuví ñu nyacua nya vityin.

¹⁴ Sacuhín tuhun ihya chi ndo, soco ñima ticahan nuu चाहिं chi ndo. Soco चाहिं tuhun chi ndo tari चाहिं tuhun chi sehi tyi cuñí chi ndo.

¹⁵ Soco vasí uchi mil ra sacuahá sañahá tuhun ra Cristo chi ndo, soco ña cuaha sutu ndo iyó. Yuhu cuví sutu ndo cha cuenda tuhun ra Cristo Jesús. Vatyí sañahí chi ndo yoso caa cacú aña ndo.

¹⁶ Ta tyicuan caa catyí chi ndo na cunyicon ndo cuhva iyé.

¹⁷ Yucuan chaha tachí chi ra Timoteo, sehi cuenda Sutú Mañi yo, nu nyicu ndo. Nñi xaan iñi ra nyicón ra chi Nyoo. Ta cuñí xain chi ra. Maa ra cuasanicohon ra iñi ndo yoso cuhva iyé, vatyí chinó iñi chi ra Cristo. Cusañaha ra chi ndo yoso cuhva sañahí tandihi ri vehe ñuhu.

¹⁸ Yihí nyoho cahnu sahá ndo chi ndo. Cuñí maa ndo vatyí ma cuhun que nu nyicú ndo.

¹⁹ Soco tyaí cuhva tyi cunyehe nu nyicu ndo cha numi ri, tatu Sutú Mañi yo ta cuñí ra. Tyicuan ta cunyehe tatu ndicha cha iyó fuerza Nyoo chi ra cahnu sahá chii chiña, o tatu cacahán ri maa ra.

²⁰ Vatyí tatu ndicha cha चाहá ra cha cunyacá ñaha Nyoo chi ra, ma cahan ri ra. Soco cuatuví iñi yo vatyí nyaá fuerza Nyoo chihin ra.

²¹ ¿Ñáá cha cuñí nyoho vii? ¿Atu cha quichi tachi tuñi chi ndo, o cha quichi nyehi chi ndo chihin cha vita iñi?

5

Nu cutuñi chi noo ra chiyo chihin sihi queen

¹ Catyí ñu chii vatyí iyó noo nyoho cha iyó ndo chihin sihi queen ndo. Ihya cuví noo cuatyi cha cahnu xaan, vatyí ni ñu ña ñohó nuu chi Nyoo ta ña nyacuví ñu tari nyoho.

² ¿Ta tyicuan caa ta cahnu sahá ndo chi ndo cha nuu cha cucuihyá iñi ndo! Cuñí chi vatyí catyi ndo chi ra cha nyacuví cha quiñi caa cuan vatyí ma cutahan ca ra chihin ndo.

³⁻⁴ Vasí ña nyaí chihin ndo chihin coño ñuhi, soco cohon iñi ndo vatyí ñohó iñi tuhun ndo, tari cha nyaá mai chihin ndo cuví cuan. Ta cha sandai tyiño ra cha sacuví cuatyi cuan chihin sívi maa Sutú Mañi yo Jesucristo. Cuñí chi tyi ndu ñn ri ndo. Ta saha ndo tuhun tyi nyaí chihin ndo. Ta cunyaa fuerza maa Sutú Mañi yo Jesús chihin ndo ñandihí.

⁵ Tyicuan ta cuñí chi vatyí nacuhva cuenda ndo chi ra cuan chi cuihna, tacuhva nativi ndihí coño ñuhu ra. Ta cuhva cuví cacu aña ra quivi quichi Sutú Mañi yo Jesucristo.

⁶ Ña tahán chi sacahnu ndo chi ndo chihin cha sacuví ndo. Vatyí nyehé ndi ndo nyacuví ra cuan cha quiñi caa. ¿Atu ña chitó ndo noo tuhun cha catyí chi vatyí chihin chiin ri yuchan iya ta nandaa nani yuchan pan?

⁷ Tava ñehe ndo yuchan iya chahnu cha cuví cha ña vaha cha sativi chi ndo. Tyicuan ta cuvi ndo tari pan cha ñahri yuchan iya yihí chihin, cha tuhva yo chachí cha vico pascua. Ta pan cuan, ican cuví ndo vatyí ra Cristo cuví mbee cha chihi cha catyi cuatyi yo.

⁸ Yucuan chaha tahán chi cachi coo yo cuenda cha chihí maa ra Cristo cha catyi yo. Ta sandoó yo cha quiñi caa cha sacuví yo ityi chata cha cuví tari yuchan iya chahnu. Ta cahán yo maa maa ri cha ndicha chihin cha ñi iñi yo. Vatyí cuví chi tari pan cha ñahri yuchan iya yihí.

⁹ Nu inga carta cha yaha saquichi chi ndo, catyi chi ndo vatyí nyoho ma cohon naha ndo tuhun chihin ñu cha sacuví cha iyó ri maa chihin ñusihi o rayi.

¹⁰ Ta cha catyi chi ndo tyehe caa, ñima cha cuachiyo ndo ingaña ri nu nyicú ñu cha iyó chihin rayi o ñusihi, ta ñima yñi ñu o ñasihi ra cuví, o ñu nyiyó iñi, o ñu suhú, o ñu sacahnú xitohyo. Vatyí tatu tyicuan caa, cuñí chi cha quita ndo ingaña ri ñuhu ñayivi.

¹¹ Soco cha cuñí catyí chi ndo vatyí ma

cohon naha ndo tuhun chihin noo ñu cha catyí vatyí hermano cuví ñu, ta iyó ri maa ñu chihin rayíi o chihin ñusíhi ta ñima yíi ñu o ñasíhi ra cuví, o nyiyó íñi ñu, o sacahnú ñu xitohyo, o cuendu ñu, o chihí ñu ndixi, o suhú ñu. Ñu cha caá tyehe caa, ni cha ma cunyaa ndo cachi ndo chihin ñu.

12-13 Vatyí yoó ña tahán chi sahá yo cuenda chi ra ña ñohó nuu chi Nyoo. Nyoo cuví ra sahá cuenda chi ñu cuan. Soco nyoho cuñí chi sahá ndo cuenda chi ñu yíhi cuenda Nyoo. Yucuan chaha tavá ñehe ndo chi ra iyó cuatyí chiña nu nyicu ndo.

6

Ma cacan yo cuatyí chaha noo yañi yo cuenda Nyoo nuu ra cuví tyiño

1 ¿Yoso caa quichi cuví íñi nyoho chicán ndo cuatyí chaha tahan ndo nuu ra cuví tyiño cha ña yíhi cuenda Nyoo chihin ndo, cha nuu cha sacotó ndo chi ra yíhi cuenda Nyoo, tacuhva canyehé ra nya ra iyó cuatyí?

2 ¿Atu ña chitó ndo vatyí suri maa ndo cusandaa ndo cuatyí ñáyivi iyó síqui ñuhu ñáyivi ihya nu cuahan ca chi? Ta tatu maa ndo cusandaa ndo cuatyí cuan, ¿atu ma cuví sandaa ndo noo tyiño cha ñima ri tuhun ihya?

3 ¿Atu ña chitó ndo vatyí nyacua nya ángel ta cutuñi chi ra nuu yo? ¿Ta nyaca cuví noo tuhun luhlu ñáyivi ihya!

4 Yucuan chaha tatu iyó tisihi nu nyicú ndo, ¿ñáá tuhun cuahan ndo nuu ra cuví tyiño cha ña chitó tuhun Nyoo?, ta ñahri tyiño cuví ra cuan vehe ñuhu nu nyicú ndo.

5 Ihya ndicha tuhun catyí chi ndo, na coo chiin ticahan nuu nuu ndo. ¿Atu yori ndicha cuii noo ra cuví sandaa noo tyiño yañi yo nu canyicú nyoho chiña?

6 Vatyí cuahan ndo cua cacan ndo cuatyí chaha yañi yo cuenda Nyoo nuu noo ra cuví tyiño cha ña chiño íñi chi Nyoo.

7 Cha iyó tisihi nu nyicú ndo, ña vaha. Vaha taxin ca cunyeer ri ndo tatu sacuvi ñu cha ña vaha chihin ndo. Saña ndo, na suhu maa ñu cha chíi ndo.

8 ¿Soco nyoho suri maa ndo sataśi ndihi ca íñi ndo chi ñáyivi, ta nyacua nya cha chíi yañi ndo ta suhú ndo!

9-10 ¿Atu ña chitó ndo vatyí ñu quiñi iyó ma quiñi ñu nu nyacá ñaha Nyoo? Ma sandavi ñaha ndo chi ndo. Ma quiñi tandihi ñu iyó ri maa chihin ñusíhi o chihin rayíi cha tyicuan ri caa. Ta ni ri ñu cha sacahnú xitohyo, ni ri ñáyivi cha iyó ñasíhi o yíi, ta cavá noo ñu chihin inga ñaha o chihin inga rayíi, ni ra iyó chihin tahan yíi, ni ra suhú, ni ra nyiyó íñi cha tyayíi, ni ra chiñí, ni ri ñu cuendu, ni ri ñu chitó yoso caa sacuvi cha quiñi caa, ma ñihi ñu cha vaha nu nyacá ñaha Nyoo.

11 Vatyí tyicuan caa cuví suhva nyoho. Soco Nyoo cha sandundi ra añima ndo chihin Tatyí Ii ra. Cha sacuvaha Sutu Mañi yo Jesucristo chi ndo nuu Nyoo.

Coño ñuhu yo cuví vehe ñuhu Nyoo

12 Catyí chi tuhun vatyí libre iyó yo cha sacuvi yo tandihi cha cuñí yo. Cha ndicha cuví. Soco ña tandihi ta cuví chi cha vaha chi yo. Ndicha libre iyó yo cha sacuvi yo tandihi, soco saha yo cuenda tatu cha vaha cuví o cha ña vaha. Ta ma cuhva yo cha cunyaca ñaha chi chi yo.

13 Catyí ñáyivi vatyí chahá Nyoo nyayu cha cuenda chichi yo. Ta chaha ra chichi yo cha cuenda cha cachi yo nyayu. Cha ndicha cuví. Soco ninduvi cuan cusanaa Nyoo quivi naa ñáyivi. Ta ña ndicha cha coño ñuhu yo cuví cha cuenda cha sacuvi yo cha ña vaha chihin ñusíhi o chihin rayíi. Vatyí coño ñuhu yo cuenda Sutu Mañi yo cuví. Ta maa Sutu Mañi yo cuví ra cuenda coño ñuhu yo.

14 Tari sanandoto Nyoo chi ra Cristo Jesús, tyicuan caa cusandoto ra chi yo chihin tunyee íñi ra.

15 ¿Atu ña chitó ndo vatyí tandihi yo cha yíhi yo cuenda ra Cristo nanduvi yo noo coño ñuhu chihin ra? Ta noo noo yo cuví tari suhva ri coño ñuhu ra. ¿Atu quehen yuhu chiin coño ñuhu ra Cristo ta sativi chihin noo ñaha cata íñi? Ña tahán chi cunyacuvi yuhu tyicuan caa.

16 ¿Atu ña chitó ndo vatyí tatu noo rayíi ndu ñu ri ra chihin noo ñaha cata íñi, noo ri coño ñuhu nanduví ra chihin ña? Vatyí nu tutu Nyoo catyí chi tyehe caa: “Cha ninduvi ñu, noo ri nanduvi ñu.” Ta ña tahán chi cu

ñin ri ra yihí cuenda Nyoo chihin ñaha cata iñi.

¹⁷ Soco tatu noo ñáyivi nacuhvá cuenda ñu añaima ñu chi ra Cristo, yucuan cuví nu quihví Tatyí li ra añaima ñu ta noo ri nanduví ñu chihin ra.

¹⁸ Sanaa ndo iñi ndo tatu quichi cuvi iñi ndo chi ñusihí o rayíi tatu ñima ñasihí ndo o ñima yíi ndo cuví. Vatyí tandihí inga nu cuatyí cha nyacuví ñáyivi ña sativí chi coño ñuhu ñu. Soco ñu nyacuví cuatyí chihin cha iyó ñu chihin ñusihí o rayíi cha tyicuan ri caa, sativí ñu coño ñuhu ñu.

¹⁹ ¿Atu ña chitó ndo vatyí coño ñuhu yo cuví vehe Tatyí li cha chaha Nyoo chi yo, vatyí cunyaa ra chihin yo? Yoó ñima maa yo nyacá ñaha yo chi yo, Nyoo cuví ra nyacá ñaha chi yo.

²⁰ Vatyí Nyoo sata ra chi yo ta yahvi xaan chaha ra chi yo. Yucuan chaha cuñí chi vatyí sacahnú yo chi Nyoo chihin coño ñuhu yo, ta chihin cha chiñi tuñi yo vatyí ninduvi cuan, chi maa Nyoo cuví.

7

Chahá ra Pablo tuhun yoso caa coo ñu tandahá noo ñáyivi vaha

¹ Ta vityin cuacatyí tuhun cha ndaca tuhun ndo chii nu tutu cha sacuhun ndo chii. Ndicha vatyí vaha cha ma tandaha yo.

² Soco vatyí iyó xaan tuhun cha quichí cuvi iñi ñáyivi cha coo ñu chihin ñáyivi cha tyicuan ri caa. Yucuan chaha cuñí chi vatyí tahan tahan rayíi coo noo ñasihí ra, ta tahan tahan ñusihí coo noo yíi ñu.

³ Na sacuvi rayíi cuhva tahán chi chihin ñasihí ra. Ta tyicuan caa tucu maa ñusihí, na sacuvi ñu cuhva tahán chi chihin yíi ñu.

⁴ Ñaha síhi cuan ma cuvi cunyaca ñaha ri maa ña coño ñuhu ña. Vatyí chi yíi ña cuví coño ñuhu ña. Tyicuan caa tucu maa yíi ña, ma cuvi cunyaca ñaha ri maa ra coño ñuhu ra vatyí chi ñasihí ra cuví coño ñuhu ra.

⁵ Coto ñaha ma cuhva ndo chi ndo chi tahan ndo. Tatu cuñí ndo nanducu ndo chi Nyoo chihin oración, ñin ri cuhva caca xiñi ninduvi ndo. Ta ma cuhva ndo chi ndo chi tahan ndo suhva quivi. Yaha cuan tyicuan ta cuhva tucu ndo chi ndo chi tahan ndo coto ma cunye ndo. Ta coto nducu nyehe ra ña vaha chi ndo ta cuhun ndo cunducu

ndo inga ñusihí o inga rayíi. Ta ña vaha cha tyicuan caa.

⁶ Cha catyí chi ndo tyehe caa ñima cha catyí tyi tandaha ndo. Ña saniñí chi ndo cha tandaha ndo. Soco cuví tandaha ndo tatu cuñí ndo.

⁷ Cha cuenda chi yuhu, vaha ca coo maa ri maa ndo tari mai. Soco Nyoo sñin sñin fuerza chahá ra chi noo noo yo. Yihí yo chahá ra fuerza chi yo vatyí cuvi coo maa ri maa yo. Ta yihí yo ña chaha ra fuerza cha coo maa ri maa yo.

⁸ Chi ñu tyivaa ta chi ñu chihí yíi, chahí tuhun chi ñu. Vaha ca cha ma coo yíi ñu tari mai.

⁹ Soco tatu ma cunye ñu cha ma coo yíi ñu, vaha ca cha tandaha ñu ta ñima ca cha quichi ri cuvi iñi ñu tandaha ñu, ta ña tandaha ñu.

¹⁰ Soco ñu cha yaha tandaha, catyí chi ñu vatyí ma sanandoo ñu chi yíi ñu. Cha ndicha cuví vatyí mandamiento ihya ñima cha ndichí xiñi ri cuví soco maa Sutu Mañi yo catyí.

¹¹ Soco tatu noo ñaha síhi ta sanandoo ña yíi ña, cuñí chi vatyí ndoo ña cunyaa ña cha ma tandaha ca ña. O naquehen ña chi yíi ña. Ta suri tyicuan caa, ña tahán chi sanandoo rayíi chi ñasihí ra.

¹² Ta cha cuenda chi yuhu catyí chi inga ndo tuhun ihya. Vatyí tatu ñasihí noo hermano ta ña chinó iñi ña chi Nyoo, soco ndoó ña vaha cha cunyaa ña chihin ra, ñahri ityi iyó chi ra cha sanandoo ra chi ña.

¹³ O tatu yíi noo hermana, ta ña chinó iñi ra chi Nyoo, soco ndoó ra vaha cha cunyaa ra chihin ña, ñahri ityi iyó chi ña cha sanandoo ña chi ra.

¹⁴ Vatyí cha yaha nasoco Nyoo chi rayíi cha ña chinó iñi cuan cha cuenda cha ñin ri cuví ra chihin ñaha cha chinó iñi cuan. Ta cha yaha nasoco tucu Nyoo chi ñaha cha ña chinó iñi chi Nyoo cha cuenda cha ñin ri cuví ña chihin ra chinó iñi. Tatu ña nyacuví ndo tyicuan caa, sehe ndo cucuvi ndotyin tari sehe ñu cha ña chinó iñi chi Nyoo. Soco cha cuenda cha sacuví ndo tyicuan caa, nasoco Nyoo chi sehe ndo.

¹⁵ O tatu rayíi o ñusihí cha ña chinó iñi chi Nyoo, ta cuñí ñu sanandoó ñu chi tahan ñu cha chinó iñi chi Nyoo, na sanandoo maa

ñu. Tyicuan ta ra hermano o ñaha hermana ndoó ñu libre. Vatyí maa Nyoo cuñí ra vatyí coo vaha yo chihin cha ñahri tisihi.

¹⁶ Vatyí ña chitó minoo ñaha sihi tatu cacu añima yí ña saha ña. Ta ni ri noo rayí ña chitó ra tatu cacu añima ñasihi ra saha ra.

¹⁷ Ta tyicuan caa catyí chi ndo vatyí coo ndo yoso cuhva catyí Sutu Mañi yo chi ndo. Ta yoso cuhva iyó ndo quivi nacana Nyoo chi ndo. Ta tyicuan caa catyí chi tandihi ñu yihí cuenda Nyoo noo noo vehe ñuhu.

¹⁸ Tatu Nyoo ta nacana ra chi noo nyoho ta cha yaha sacuvi ñu costumbre circuncisión chi ndo, ma caca iñi ndo. Soco tatu nacana ra chi noo ndo cha ña sacuvi ñu costumbre cuan chihin ndo, ña tahan ca chi sacuvi ndo vityin.

¹⁹ Ña niñi xaan cha sacuví yo, o cha ma sacuvi yo costumbre circuncisión cuan. Soco cha niñi ca cha quichahá yo tuhun cahán Nyoo.

²⁰ Tahan tahan ndo cuñí chi ndoó ndo yoso cuhva cha iyó ndo quivi cha nacana Nyoo chi ndo.

²¹ Vatyí tatu iyó chitoho ndo cha nyacá ñaha chi ndo quivi cha nacana Nyoo chi ndo, ma caca iñi ndo, soco tatu chahá chi cuhva cha ndoó ndo libre, cuñí chi nducu ndo cuhva ta ndoó ndo libre.

²² Vatyí quivi nacana Nyoo chi noo ra cha iyó chitoho, nduvi ra tari noo ra cha libre iyó, vatyí sacuví ra tyiño nuu Sutu Mañi yo. Ta suri tyicuan caa tucu ra cha iyó libre quivi cha nacana Nyoo chi ra. Vityin ra Cristo nyacá ñaha chi ra.

²³ Sata Nyoo chi nyoho. Ta yahvi xaan chaha ra chi ndo. Yucuan chaha ma cuhva ndo cha cunyaca ñaha rayí chi ndo. Ta ma sacuvi ndo tyiño nuu ra.

²⁴ Ta tyicuan caa catyí chi ndo yañi, coo ndo tari cuhva chiyo ndo quivi nacana Nyoo chi ndo.

²⁵ Ta tyicuan tucu ñu cha ta tandaha ca. Ñahri tuhun chaha Sutu Mañi yo chii cha cuenda ndo. Soco catyí chi ndo yoso cuhva ndichí xiñi. Ta cuví naquehen ndo tuhun cahán tyi cha chitó ndo vatyí cha ndahvi cuñí Nyoo nyehe ra chii ta chaha ra tyiño ihya chii.

²⁶ Cha cuenda chi yuhu, vaha taxin ca ma tandaha ndo. Vatyí cuaha xaan tindoho

ñayivi cha iyó yo vityin.

²⁷ Soco tatu cha iyó ñasihi noo hermano, ma nducu ra cuhva cha sanandoo ra chi ña. O tatu ta coo ca ñasihi ra, ma nducu ra chi ña.

²⁸ Soco tatu tandaha ra, ñima cuatyí cuví. O tatu noo ñaha tyivaa tandaha ña, suri ñima cuatyí cuví. Soco ñu tandaha cuaha xaan tindoho cunyehe ñu ñayivi ihya. Ta yucuan chaha catyí chi ndo vatyí vaha ca cha ma tandaha ndo. Vatyí ña cuñí cha nyehé ndo tindoho ta tisihi cuan.

²⁹ Yañi, cha vityin ta ityi nuu ña cuaha ca quivi nyaá. Cuñí chi vatyí ra cha iyó ñasihi cuví ra tari noo ra cha yori ñasihi. Vatyí nyita ri tahan chi caca xiñi ra tuhun Nyoo.

³⁰ Ta tatu nyaá ndo tucuihya iñi, ma quichaha ndo tucuihya iñi cuan, o tatu nyaá ndo tusi iñi, soco ma quichaha xaan ndo tusi iñi cuan. Ta tyicuan caa tucu tatu iyó xuhun ndo, ma quichaha xaan ndo xuhun cuan. Nacuhva ndo tandihi cuan chi Nyoo.

³¹ Ta ra iyó xaan cha chii ñayivi ihya, ma quichaha xaan ra chi cuan, soco cotyiño ra tyiño Nyoo. Vatyí ñayivi cha nyehé yo ihya cha cuahan sandihi xaan chi.

³² Cuñí vatyí nyoho ma caca xaan xiñi ndo tuhun cha iyó ñayivi ihya. In ri maa tuhun Nyoo caca xiñi ndo. Noo ra tyivaa cha ta tandaha ca chicá xiñi ra yoso caa sacuví ra cuhva cuñí maa Sutu Mañi yo.

³³ Soco tatu cha tandaha ra, chicá xiñi ra yoso caa coo vaha ra ñayivi cuhva tahan iñi ñasihi ra.

³⁴ Ta sin cuhva iyó noo ñusihí cha cha yaha tandaha, ta sin cuhva iyó tucu noo ñusihí cha cumañi ca tandaha. Ñaha cha cumañi ca tandaha chicá xiñi ña in ri maa tuhun Sutu Mañi yo. Ta chicá xiñi ña yoso caa sacahnú ña chi Nyoo chihin coño ñuhu ña ta chihin cha ni añima ña. Soco ñaha cha cha yaha tandaha chicá xiñi ña yoso caa coo vaha ña ñayivi ihya cuhva tahan iñi yí ña.

³⁵ Catyí tuhun ihya chi ndo cuenda cha vaha chi maa ndo. Ñima cha saniñi chi ndo. Soco vatyí coo vaha ndo noo ñayivi chihin cha ñahri sayangá chi ndo. Ta in ri tyiño Nyoo sacuvi ndo.

³⁶ Soco nya nyoho chicá xiñi ndo vatyí vaha cha tandaha ndo vatyí cha cuayaha

quíví ndo; vaha, tandaha ndo tatu cuñí ndo. Ñima cuatyí cuví cuan.

³⁷ Soco tatu inga ndo cha nacuaan vaha iñi ndo vatyí cuandoo ndo cha ma tandaha ndo, vaha tucu.

³⁸ Tu tandaha ndo, vaha. Tu ma tandaha ndo, vaha ca.

³⁹ Soco catyí nu ley Nyoo chi yo vatyí tahán chi cunyacá ñaha rayí chi ñasihi ra cha ni ri ca cha iyó ra. Soco tatu chihí ra, iyó ityí chi ña cha tandaha ña yóo chihin cuñí maa ña. Soco tatu ra yihí cuenda Nyoo cuví ra.

⁴⁰ Soco vaha ca coo ña ñayívi tatu ma tandaha ña inga chaha. Ihya cuví cha chicá xiñi yuhu. Ta chahí tuhun ihya chi ndo chihin Tatyí li maa Nyoo, cahví iñi.

8

Nu sañahá ra Pablo vatyí ma sacoo yo cuatyí inga ñáyívi

¹ Ta vityin cuanacatyí chi ndo cuenda nyayu cha chahá ñu chi xitohyo. Tandihí yo cha ñohó nuu ca yo chi Nyoo, chitó yo tatu vaha o ña vaha cachi yo nyayu cuan. Ta cha cuenda cha chitó yo, yucuan chaha cahnu xaan sahá yo chi yo ta satíví cuan chi yo. Soco cha cuñí yo chi tahan yo sandunyeé cuan chi yo.

² Tatu yihí ndo cha cuñí maa ndo tyi chitó ndo, cha cuenda vatyí ta coto ca ndo yoso cuhva cuñí chi cuví cuan.

³ Soco Nyoo ñohó nuu ra chi ñu ni vaha iñi cuñí chi ra.

⁴ Ta vityin cha cuenda cha cachi yo nyayu cha iyó vico xitohyo: cha chitó vaha yo vatyí noo xitohyo ñahri maa vale chi, vatyí noo ri maa Nyoo iyó.

⁵ Vasi cuñí maa ñáyívi vatyí cuaha xaan Nyoo iyó nu ñuhu ñayívi ihya ta andívi,

⁶ soco cha cuenda chi maa yo noo ri Nyoo Sutu yo iyó. Ta maa ra savaha ra tandihí cuíi maa cha iyó. Ta yoó iyó yo cha cuenda maa ra. Ta iyó tucu noo ri Sutu Mañi yo Jesucristo. Ta maa ra savaha tandihí maa cha iyó, nyacua nya chi maa yo.

⁷ Soco ña tandihí yo chitó yo tuhun ihya. Vatyí suhva ñu tahan yo cuenda Nyoo, ta ni cumañi ca quihví ñu cuenda Nyoo, sacahnú ñu xitohyo. Ta cha caan ñu sacahnú

ñu chi cuan ta cuñí maa ñu tyi nyitó xitohyo cuan. Vatyí ña ni vaha iñi ñu nyicón ñu chi Nyoo. Ta tatu chachí ñu nyayu cha chahá ñáyívi chi xitohyo cuan, cuñí maa ñu vatyí chicoó cuatyí ñu cuenda xitohyo cuan nuu Nyoo.

⁸ Soco Nyoo ñahri cuenda ra tatu chachí yo, o ña chachí yo. Ñima vatyí chachí yo ta ña vaha ca yo nuu Nyoo, ta ñima cha cuenda cha ña chachí yo ta vaha ca yo.

⁹ Soco saha ndo cuenda nya ndo chachi nyayu cuan ta chitó ndo vatyí ñahri cuatyí ndo chicoo. Cuví sanacava ndo nuu cuatyí chi ñu ni quihví ri cuenda Nyoo, vatyí ñu cuan cuñí maa ñu tyi chicoo cuatyí ñu tatu chachí ñu nyayu cuan.

¹⁰ Vatyí tatu yoho cha chiton tuhun ihya, ta cunyaun ta cachun noo cha iyó vehe xitohyo, ta noo ra yañi yo cha ña ñihi vaha cuahán ra chihin Nyoo nyehé ra chuun yucuan, ra yañi yo cuan cucachi ndihí ra chuhun.

¹¹ Ta ra yañi yo cutíví aña ra vatyí cuñí maa ra tyi chicoo cuatyí ra. Ta ra cuan chihí ra Cristo cha cuenda ra. Ta vityin chicoo cuatyí ra cuñí maa ra. Ta yoho cha chitón, sicun cuhun cuatyí cuan.

¹² Yucuan chaha tatu sanacavá yo chi noo yañi yo cha ña ñihí vaha cuahán chihin Nyoo, chicoó cuatyí yo nuu ra Cristo.

¹³ Yucuan chaha tatu sanacavé chi noo yañi yo nuu cuatyí cha cuenda cha chachí, vaha taxin ca ma cachi ca mai coño, tacuhva cha ma sanacave chi ra nuu cuatyí.

9

Cha tahán chi sacuví ra apóstol Nyoo

¹ Yuhu cuví noo ra apóstol Nyoo. Ta yori ñáyívi nyacá ñaha chii. Vatyí nyehí chi ra Jesús Sutu Mañi yo. Ta suri maa ndo cuví cha ndaa tyi ndicha cuví yuhu noo apóstol Nyoo, vatyí chinó iñi ndo tuhun Nyoo cha sacote chi ndo.

² Vasi ña cuñí ñáyívi chinó iñi ñu cha apóstol Nyoo cuví, soco cha cuenda nyoho ican cuví. Vatyí cha cuenda cha chinó iñi ndo chi Sutu Mañi yo, cuví ndo cha ndaa vatyí ndicha cha apóstol cuví.

³ Ihya cuví tuhun cuacahin cuenda ñu cha cahán nyaa chii.

⁴ Iyó chi ityi chii cha quehín tandihí cha chahá ñu cachi ta cha chahá ñu cohi.

⁵ Ta sñin ri cha coo noo ñasihí cha chinó iñi chi Nyoo, tari yañi ra Jesús, ta ra Pedro ta tandihí ca ra apóstol.

⁶ O chicá xiñi ndo vatyí yuhu ri ta ra Bernabé tahán chi saha tyiño ndi chihin ndaha ndi ta sata ndi cha chiñuhú chi ndi. ¿Atu ña tahán chi chi nyuhu sandoo ndi tyiño cuan ta cahan ndi tuhun Nyoo?

⁷ Ra cha cuví sındaro tyiyahví gobiernu chi ra ta chotyíño ra xuhun cuan. Ta ra cha tachí yoho tichaha ndiví, chachí ra tichaha ndiví cha quita nu iyó tyiño saha ra. Ta ra cha sahá cumi mbee chihí ra sicui tí.

⁸ Ta ma cuñi ndo vatyí tuhun ihya cha ndichi xiñi ri mai cuví. Vatyí nu ley cha tyaa ra Moisés catyí chi tyehe caa:

⁹ “Ma tyihi ndo yoho yuhu quití cha sandundí trigo, vatyí tahán maa chi cachi tí suhva trigu nu sahá tyiño tí.” Ndicha vatyí Nyoo catyí ra tyehe caa soco ñima vatyí cuniñi xaan cuñi ra chihin quití.

¹⁰ Soco na cutuñi ca iñi yo vatyí tari ra tahví ñuhu ta ra cha tachí, tahán chi vatyí cuita iñi ra vatyí cunaquehen ra cha quita nu saha tyiño ra.

¹¹ Ta tyicuan caa, tatu nyuhu quichi cahan ndi tuhun Nyoo chihin ndo, tari quiví cha quichi tachí ndi chiti cuví cuan. Ta tahán chi tyi tyinyeé ndo chi ndi cha cuenda cha sacotó ndi tuhun Nyoo chi ndo.

¹² Tatu tyinyeé ndo chi inga ra cha ña quichí tyihi tuhun Nyoo nu nyicú ndo, tahán ca chi cha tyinyeé ndo chi nyuhu, vatyí nyuhu tyihí ndi tuhun Nyoo nu canyicú ndo.

Soco ña cahán ri ndi, ta cunyeé ndi tandihí. Ta ña sayangá ndi chi ndo chihin cha chiñuhú chi ndi. Tacuhva cha ma sandihí ndo tuhun ra Cristo.

¹³ Chitó ndo tyi ra sahá tyiño vehe ñuhu ñáyiví Israel, iyó ra chihin cha iyó vehe ñuhu cuan. Vatyí tahán chi tavá sñin ra suhva coño quití vatyí cachi ra. Ta tandihí ca coño cuan cucahmi ra tari cuhva catyí maa Nyoo chi ra.

¹⁴ Ta suri tyicuan caa catyí Sutu Mañi yo, vatyí tahán chi tyinyeé ñu yihí cuenda Nyoo chi ra cahán tuhun Nyoo chihin ñu.

¹⁵ Soco yuhu ni noo chaha ña chiquen cha tahán chi chii. Ta ni ña tyaí tuhun ihya vatyí cuñí cha cuhva ndo cha cuhva ndo chii. Vatyí tatu chiquén cha tahán chi chii, ña sñi cuñí cahín tuhun Nyoo. Vaha taxin ca cuñí cha cúvi ta ñima ca cha caquen xuhun chi ndo.

¹⁶ Cha cuenda chi yuhu ñima cha cahnu sahá chii cha cahín tuhun Nyoo. Soco vatyí nyaá siqui cha sacuví. Soco ndahví cuví yuhu ra ndahví tatu ma cahin tuhun Nyoo ihya.

¹⁷ Yucuan chaha tatu sacuví chihin cha iyó iñi, cuñihi yahví. Soco tatu sacuví chihin fuerza, suri cuví chi, vatyí noo tyiño cha tachí maa Nyoo chii tyi sacuví, tahán chi cha sacuví.

¹⁸ Ta tyicuan caa, yahví cha ñihi, ican cuví cha sñi cuñí cahín tuhun ra Cristo. Ta ña chiquén cha tahán chi chii cha cuenda cha cahín tuhun ra.

¹⁹ Vasi ñima musu cuví yuhu. Soco nanduví musu tandihí ñáyiví. Vatyí tyicuan caa saha ganaí cuaha ca ñáyiví cuenda ra Cristo.

²⁰ Tatu ñohí nu nyicú ra Israel, nanduví tari maa ra tacuhva vatyí tyasoho ra tuhun cahin. Vatyí cuñi saha ganai chi ra cuenda ra Cristo. Vatyí ra cuan iyó ra cuhva catyí ley ra Moisés. Ta yuhu sacuví tari cuhva catyí ley cuan. Soco ñima ley cuan nyacá ñaha chii.

²¹ Soco tatu cuñí saha ganai chi ñu ña quichahá ley ra Moisés, sacuví tari cuhva sacuví ñu. Vatyí tacuhva saha ganai chi ñu. Soco ley maa Nyoo nyacá ñaha chii vatyí chihin ley ra Cristo chicá noi ta ña cuví cunyacuví cha quiñi caa tari nyacuví maa ñu.

²² Tatu nyaí chihin noo ra cha ta coo vaha ca fuerza Nyoo chii, nanduví tari maa ra, vatyí tacuhva cahan que tuhun Nyoo chihin ra. Ta ndunyeé ca iñi ra chihin tunyee iñi Nyoo. Nanduví yuhu tari cuhva caa noo noo ñáyiví, vatyí tacuhva tyasoho ñu tuhun Nyoo cha cahín ta cacú añima ñu.

²³ Tyicuan caa sacuví tacuhva cuví sacoté tuhun Nyoo chi ñáyiví. Vatyí tacuhva ñihi tumañi iñi cha chahá maa Nyoo chi yo.

²⁴ Chitó ndo vatyí noo sihva cha chinó ñu, tandihí ñu chinó, soco noo ri ñu sahá ganaa.

Tyicuan caa tucu maa yo, cuñí chi cha ñihi cunyicon yo chi Nyoo tacuhva sahá ganaa yo nu vaha cha chahá ra chi yo.

²⁵ Tandihí ñu cuahan síhva, sandoo ñu tandihí cha satyoño chi ñu vatyí cuñí ñu sahá ganaa ñu. Ta ñu cuan, cusaha ganaa ñu, soco noo corona numa cha tañi tyehe ri na ityi. Ta yoó nducú yo cuhva soco cha sahá ganaa yo noo cha ma tiví ca maa.

²⁶ Cha cuenda yuhu ña chinó tondo ri mai, ni ña cañí tahan tondo ri mai.

²⁷ Soco ñihi nyacá ñahi chi coño ñuhi. Ta saniñí quichahí chi Nyoo. Coto suri mai cha yaha sañahí chi inga ra ta ndoí.

10

Nu sañahá ra Pablo vatyí ma tyaa xiin yo Nyoo

¹⁻² Yañi, ña cuñí cha naa iñi ndo cha cuví chi sutu chahnu yo ta cha naha. Nyoo tyinyee ra chi ñu, ta tachí ra noo vico vatyí cahun ityi nuu ñu coto cunaa ñu. In ri nanduví ñu chihin ra Moisés, ra cuví nuu chi ñu, ta yaha sava ñu tyañuhu. Ta cha tyicuan caa, tari cha condutyá ñu chihin vico cuan ta chihin tyañuhu cuví cuan.

³ Ta tandihí ñu chachí ñu in ri nyayu cha chahá maa Nyoo.

⁴ Ta tandihí ñu chihí ñu in ri ndutyá cha chahá maa Nyoo. Vatyí ndutyá cuan tava ra chata noo yuu cha cuahan chihin ñu. Ta yuu cuan ra Cristo cuví.

⁵ Soco vasi nyehe ñu cuaha milagru cha sacuví Nyoo, cuaha ñu ña quichahá ñu tuhun cahan ra chihin ñu. Ta chihí ñu chiqui ndi cuan, ta yucuan ndoo ñu.

⁶ Tandihí tuhun ihya chahá chi noo cuhva chi yo. Vatyí tacuhva ma cuñi yo sacuví yo cha ña vaha tari sacuví ñu cuan.

⁷ Yucuan chaha ma sacahnu nyoho chi xitohyo, tari chinyacuví suhva ñu cuan ta cha naha, tari catyí nu tutu Nyoo tyehe caa: “Ta cachiyó ñu vico, ta cachachí ñu, ta cachihí ñu.”

⁸ Ta ma coo ri maa yo chihin inga ñusihí o chihin inga rayí tatu ñima ñasihí yo cuví, o yí ñu cuví, tari chinyacuví suhva ñu cuan. Ta noo ri quiví chihí oco uñi mil ñu cha cuenda cha chinyacuví ñu cha quiñi caa cuan.

⁹ Ta Sutu Mañi yo cama iñi ra, soco ña tahán chi nducú nyehe yo chi ra. Tari chinyacuví suhva ñu cuan. Ta cachihí ñu cha tyaa coo chi ñu, cha cuenda cha cuñi ñu nducú nyehe ñu chi ra.

¹⁰ Ta ni ma cahan ña vaha ndo síqui Nyoo, tari cahan ña vaha suhva ñu cuan síqui ra. Ta saquichí ra ángel cuenda ra ta chahñi ra chi ñu.

¹¹ Tandihí ihya cuví chi sutu chahnu yo cha chiyó ta cha naha. Ta chicunyaa chi nu libru Nyoo tari noo cuhva vatyí sacotó ra chi yo cha iyó yo ñayiví ihya vityin, nu cuahán sandihí chí.

¹² Ta tyicuan caa tatu tuví iñi maa ndo tyi vaha cuahán ndo chihin Nyoo, ñasaha ndo cuenda coto canacava ndo saha ra ña vaha.

¹³ Tindoho cha nyehé ndo, cuñí maa ndo tyi noo ri maa ndo nyehé tindoho cuan. Soco inuu ri nyehé tandihí ca ñu. Soco cuví cunyeé iñi ndo chi Nyoo, ta maa ra ma cuhva ra nyehé ndo tindoho cha ma cunyeé ca ndo. Soco tatu chaa tindoho chí ndo, tyicuan ta Nyoo cunducu ra cuhva cha quita ndo chichi tindoho cuan ta cuví cunyeé ndo.

¹⁴ Yucuan chaha yañi, ma sacahnu ndo chi xitohyo.

¹⁵ Cahín chihin ndo tari cahín chihin noo ra tyihí tuñi iñi. Yucuan chaha saha ndo cuenda cha catyí chí ndo. Ta nyehe ndo tatu ndicha o ña ndicha tuhun cahín chihin ndo.

¹⁶ Quiví cha nicohón iñi yo tyi chihí ra Cristo nu cruzi, chihí yo vinu ta chachí yo pan. Ta vinu cuan cuñí chí catyí vatyí in ri cuví yo chihin ra Cristo cuenda ñiñi ra. Ta chachí yo pan ta cuñí chí catyí vatyí in ri cuví yo chihin ra cuenda coño ñuhu ra.

¹⁷ Vatyí vasi cuaha yo, soco tandihí yo chachí yo noo ri pan. Ta yucuan chaha tandihí yo nduví yo noo ri coño ñuhu ra.

¹⁸ ¿Atu nicohón iñi ndo yoso caa iyó ñu Israel? Chachí tucu maa ñu quiti cha chahá ñu chí Nyoo, ta cha cuenda cha nyacuví ñu cha tyicuan caa, in ri cuví ñu chihin cuan.

¹⁹ Ñima cha catyí chí ndo tyi vale xitohyo cha sacahnú ñu ña ñohó nuu chí Nyoo. Ña vale, ni ri coño cha chahá ñu chí xitohyo cuan ta ña vale.

²⁰ Soco catyí chi ndo vatyí ñu ña ñohó nuu chi Nyoo chahá ñu cha chahá ñu, soco chi ra ña vaha. Ta ñima chi Nyoo. Ta ña tahán chi cha ndu ñn ri ndo chihin ra ña vaha.

²¹ Vatyí ma cuvi coho yo copa Nyoo ta suri cuhva cuan ta coho tucu yo copa ra ña vaha. Ta ma cuvi cachi yo nu mesa Nyoo. Ta suri cuhva cuan cachi yo nu mesa ra ña vaha.

²² Ma cuhva yo tisihi chi Nyoo vatyí maa ra iyó ca fuerza chi ra ta ñima ca maa yo.

Sacuvi yo ñáá cha sacuvi yo, soco cha cuenda cha vaha chi tahan yo

²³ Catyí chi tuhun: “Cuví sacuvi yo ñáá cha cuñí yo. Soco ña tandihi ta cuví chi cha vaha chi yo.” Ta ndicha cuví sacuví yo cha cuñí yo. Soco ña tandihi ta tyinyeé chi chi yo cha cuahnu yo chihin tuhun Nyoo.

²⁴ Ma nanducu yo cha vaha chi maa ri maa yo, soco na nducu tucu yo cha vaha chi inga ñu.

²⁵ Cachi ndo ñáá coño cha xicó ñu nuyahvi. Ta ma ndaca tuhun ndo ta ma ndichi xiñi ndo yóo chi cuenda cuví.

²⁶ Vatyí ñuhu ñayivi ta tandihi cha iyó nuu chi, chi maa Nyoo cuví.

²⁷ O tatu noo ñu ña chinó iñi chi Nyoo, catyí ñu chi ndo cha cucachi ndo vehe ñu, ta tatu cuñí ndo cuhun ndo, cuhun ndo ta cachi ndo tandihi cha chahá ñu cachi ndo. Ta ma ndaca tuhun ndo ñáá cuenda cuví.

²⁸ Soco tatu nya noo ñu catyí ñu chi ndo: “Nyayu ihya nyayu cha chaha cuenda ñu chi xitohyo cuví”, catyí ñu. Ma cachi ca ndo tacuhva cha ma nducuihya cuñi añima ñu cha catyí chi ndo tyicuan caa.

²⁹ Cahín tuhun ihya cuenda inga ñu ta ñima cuenda maa ndo.

Soco yihí ndo catyí ndo: “¿Ñáá tuhun cha sahá xaan ra ihya cuenda chi yuhu cha catyí inga ñáyivi?”

³⁰ Tatu nacuhvé tyahvi nyoo chi Nyoo cuhva cha cuacachi, ñáá tuhun catyí inga ra cuan tyi ña vaha cachí”, catyí ndo.

³¹ Cuacatyí chi ndo tyehe caa, tatu chachí ndo, o chihí ndo, o sacuví ndo ñáá ca cha sacuví ndo, sacuví ndo soco chi maa Nyoo sacahnu ndo chihin cha sacuví ndo.

³² Ta ma cuhva ndo cuhva cha canacavá noo tahan ndo, ni ra Israel, ni ñáyivi cha ñima ñu Israel cuvi, ni ñu yihí cuenda Nyoo.

³³ Tari yuhu, nanduquí cha vaha cuví chi ñáyivi. Ña nanduquí cha vaha chi mai, soco cha vaha chi inga ñáyivi nanduquí. Vatyí tacuhva cacu añima ñu.

11

¹ Cuñí vatyí cunyicon ndo cuhva nyacuví. Tari mai nyiquén cuhva nyacuví ra Cristo.

Yoso caa coo ñusihí nu ndu ñn ri yo

² Yañi, sii xaan cuñí vatyí tyicuan ri nicohón iñi ndo chii. Ta quichahá ndo cha sañahí chi ndo.

³ Soco cuñí tyi coto ndo vatyí ra Cristo cuví xiñi noo noo rayi, ta rayi cuví xiñi ñasihí ra, tari Nyoo cuví ra xiñi ra Cristo.

⁴ Tatu noo rayi, nyasí xiñi ra ta chicán tahvi ra o cahán ra tuhun cha chahá Nyoo chi ra, ticahan nuu chahá ra chi ra cuví xiñi ra.

⁵ Soco tatu noo ñaha sihi ña chasí ña xiñi ña cuhva cha chicán tahvi ña, o cuhva cha cahán ña tuhun cha chahá Nyoo chi ña, tari cha satya ndi xiñi ña cuví cuan. Ta ticahan nuu chahá ña chi ra cuví xiñi ña.

⁶ Tatu noo ñaha sihi ña chasí ña xiñi ña, vaha taxin ca nacahnya ña tandihi ixi xiñi ña. O tatu cahán nuu ña cha satya ndi ixi xiñi ña, nacasi ña xiñi ña.

⁷ Ña tahán chi casi rayi xiñi ra. Vatyí cuhva caá Nyoo caa ra, vatyí nyacá ñaha ra chi ñasihí ra, tari nyacá ñaha Nyoo chi ra. Soco noo ñaha sihi chahá ña cha cunyaca ñaha yi ña chi ña.

⁸ Vatyí quivi savaha Nyoo chi rayi, ña savaha ra chi ra chihin yiqui naha ñaha sihi. Soco chihin yiqui naha rayi savaha Nyoo chi ñaha sihi.

⁹ Ta cha catyí rayi, ta chinó ñaha sihi.

¹⁰ Yucuan chaha ñusihí cuñí chi cunyasi xiñi ñu. Vatyí ican cuan cuví noo seña vatyí nyacá ñaha yi ñu chi ñu. Ta cha cuenda cha vaha chi ángel cuví.

¹¹ Soco tyaa maa Nyoo cuhva vatyí chiñuhú rayi chi ñusihí. Ta chiñuhú ñusihí chi rayi.

¹² Vatyí ndicha ñaha sihi chinó ña chihin yiqui naha rayi, tari quivi cha sacacu ra chi

ña cuví cuan. Soco nya cua nya quivi cuan ta maa ña quichaha sacacu ña chi rayii. Ta nya cua nya vityin ñusihí ta rayii maa Nyoo chahá cha coo ni nduvi tahan ñu.

¹³ Nyehe maa ndo. ¿Atu vaha quetuví cha ña nyasí xiñi ñusihí ta chicán tahvi ñu chichi vehe ñuhu?

¹⁴ Vatyí cha chitó ndo vatyí ticahan nuu cuví chi rayii tatu nañi xiñi ra.

¹⁵ Soco ñusihí, vaha cha cunañi xiñi ñu vatyí Nyoo chahá ra ixi nañi chi ñu vatyí casi chi xiñi ñu.

¹⁶ Soco tatu yóo cha cuñi cuví yuhu cha catyí tuhun ihya, cuñi chi coto ndo vatyí ni nyuhu ta ni vehe ñuhu Nyoo, ñahri inga costumbre iyó chi ndi.

Nu sañahá ra Pablo chi ñu vatyí ña vaha cuhva chachí ñu Santa Cena

¹⁷ Yañi, nonga tuhun cuacatyí chi ndo. Vatyí ña sii cuñi chihin ndo, vatyí ndu ñin ri ndo, soco ña chahá chi cha vaha chi ndo. Ta sativí chi chi ndo.

¹⁸ Ta cuaha xaan ñáyivi nacatyí chii vatyí cuhva cha ndu ñin ri ndo cha cuacoo culto, iyó ndo cha tavá ñin ndo chi ndo. Ta suhva ri chinó iñi, ta suhva ña chinó tucu iñi. Soco vasi ndicha.

¹⁹ Vasi cuñi chi coo tisihí nu nyicú ndo tacuhva coto yo nya ndo ndicha cha yihí cuenda Nyoo.

²⁰ Soco tatu tyicuan caa iyó tisihí nu nyicú ndo, ñima Santa Cena chachí ndo cuví cuan.

²¹ Vatyí cuhva cha cuacachi ndo, chachí ri ndo cha nyisó ndo. Ta ña nyatú ndo nya ndu ñin ri tahan ndo. Ta yihí ndo cuaha chachí ndo. Ta chiñi ndo chihin vinu. Ta yihí ndo ña ñihí ndihí ndo cha cachi ndo.

²² ¿Atu ñahri vehe ndo cachi ndo ta coho ndo? Vatyí cha nyacuví ndo tyehe caa, ña cuñi nyehé ndo vehe ñuhu Nyoo cuví cuan. Ta chahá ndo ticahán nuu chi ñu ñahri maa iyó chi. ¿Atu tahán chi catyí chi ndo vatyí vaha cuhva nyacuví ndo, cuñi maa ndo? Ña tahán chi tyi ñahri noo cha cachi caa nyacuví ndo.

Ra Pablo chahá ra tuhun chi ñu, ñáá tuhun quehén ñu Santa Cena

(Mt. 26.26-29; Mr. 14.22-25; Lc. 22.14-20)

²³ Vatyí yuhu suri maa Sutu Mañi yo sañaha tuhun ihya chii. Ta suri maa tuhun ihya sañahi chi ndo. Cha cuaa cha ni cumañi ca cuhva cuenda ra Judas chi Sutu Mañi yo chi ra xaan iñi chi ra, ra Jesús quehen ra noo pan.

²⁴ Ta cha yahá nacuhva ra tyahvi nyoo chi Nyoo ta tahvi sava ra. Ta catyí ra: “Cachi ndo. Vatyí tari coño ñuhi cuví pan ihya. Ta cha catyí ndo ta cucúvi yuhu. Sacuvi ndo tyehe caa vatyí nicohon iñi ndo chii”, catyí ra Jesús.

²⁵ Ta cha yahá cha cacuxiñi ra ta quehen ra Jesús copa ta catyí ra: “Chihin copa vinu ihya natyihí tahan Nyoo tuhun chaa chihin ndo vityin. Vatyí vinu cha yihí chichi copa ihya, ñihí cuví. Tahan ri cuacoho ndo, coho ndo cha cuenda cha nicohón iñi ndo chii”, catyí ra Jesús cha cuaa cuan.

²⁶ Ta tahan ri cha ndu ñin ri yo ta chachí yo pan ta chihí yo vinu sacotó yo chi ñáyivi vatyí cha catyí cuatyí yo chihí Sutu Mañi yo. Ta tyicuan caa sacotó yo chi ñáyivi nyacua nya quivi quichi tucu ra.

Ra Pablo chahá ra tuhun chi yo yoso caa sacotó yo Santa Cena

²⁷ Tatu chachí yo pan ta chihí yo vinu noo cuhvá cha ña chitahán iñi Nyoo, chicoó cuatyí yo. Vatyí ña sahá yo ñáyivi coño ñuhu ta ñihí ra Cristo.

²⁸ Yucuan chaha cuñi chi sahá yo cuenda tatu vaha cuahán yo chihin Nyoo cha ni ri ca cha cumañi cachi yo pan ta coho yo vinu.

²⁹ Vatyí tatu chachí yo ta chihí yo chihin cha ña sahá yo cuenda ñáá tuhun chihi ra Cristo, Nyoo cutachi tuñi ra chi yo.

³⁰ Yucuan chaha cuaha xaan nyoho cuhví ndo, ta ñahri vaha fuerza ndo. Ta yihí ndo cha chihí ndo.

³¹ Soco tatu sahá vaha yo cuenda chi yo, Sutu Mañi yo ma tachi tuñi ra chi yo.

³² Soco tatu Sutu Mañi yo ta tachi tuñi ra chi yo tyicuan caa, vatyí tacuhva ma cunaa yo chihin ñáyivi iyó siqui ñuhu ñáyivi ihya.

³³ Ta tyicuan caa nyoho yañi, tatu cuandu ñin ri ndo cha cuacoo Santa Cena, cuatu ndo chi noo noo tahan ndo ta cachi ndo ta coho ndo ñin ri.

³⁴ Soco tatu nya noo nyoho chisocó ndo, cachi ndo nya vehe ndo tacuhva cha ma tachi tuñi Nyoo chi ndo.

Ta inga tuhun cusandaa mai quivi cha quichi nyehi nu nyicu ndo.

12

Cha vaha cha chahá Tatyí Ii Nyoo chi yo

¹ Yañi, cuñi vatyí coto ndo ñáá ndihi cha vaha cha chahá Tatyí Ii Nyoo chi noo noo yo.

² Chitó ndo vatyí quivi cha ña ñoho nuu ndo chi Nyoo, chahá ndo chi ndo cha cun-yaca ñaha xitohyo cha ña cuví cahan.

³ Yucuan chaha cuñi tyi coto ndo vatyí tatu noo ra catyí tyi ña vaha ra Jesús, ñima Tatyí Ii Nyoo yihí chi ra. Soco tatu noo ra cha catyí tyi ra Cristo cuví Sutu Mañi yo, Tatyí Ii Nyoo yihí chi ra.

⁴ Siin siin cha vaha naquehén noo noo yo, soco maa Tatyí Ii Nyoo ican chahá.

⁵ Siin siin cuhva sahá tyiño yo soco tyiño nuu noo ri maa Sutu Mañi yo sacuvi yo.

⁶ Siin siin tunyee iñi chahá ra chi noo noo yo. Soco noo ri maa Nyoo cuví ra chotyíño chi tandihi yo.

⁷ Chi noo noo yo chahá ra tunyee iñi Tatyí Ii ra, tacuhva tyi tyinyeé yo chi tandihi ñu yihí cuenda ra.

⁸ Chi suhva ñu chahá Tatyí Ii Nyoo vatyí cahán ñu chihin cha chiñi tuñi maa ra. Ta chi inga ñu chahá ra cha nacoto ñu ta cahan ñu tuhun cha sacotó Nyoo chi ñu.

⁹ Ta chi inga ñu chahá ra cha chinó vavaha iñi ñu chi ra. Ta suri maa Tatyí Ii ra chahá ra tunyee iñi chi inga ñu vatyí cuví sanduvaha ñu chi ñu cuhví.

¹⁰ Ta chi inga ñu chahá ra tunyee iñi vatyí cuví sacuvi ñu milagru. Ta inga ñu chahá cuenda ñu tuhun cahán Nyoo. Ta chi inga ñu chahá ra vatyí cuví cohon nuu ñu Tatyí Ii Nyoo ta tatyí ña vaha. Ta chi inga ñu chahá ra tunyee iñi ra vatyí cuví cahan ñu inga sahan cha ña chitó ñu. Ta chi inga ñu chahá ra tunyee iñi vatyí cuví nacoto ñu ta nacatyí ñu inga sahan cha cahán tahan ñu.

¹¹ Soco tandihi tuhun ihya, noo ri maa Tatyí Ii Nyoo chahá. Soco siin siin cuhva chahá ra chi noo noo yo, yoso cuhva cuñi maa ra.

Chichi cha tandihi yo ta nduví yo noo ri coño ñuhu ra Cristo

¹² Ra Cristo cuví ra tari noo coño ñuhu, Vatyí cuaha cha nyaá chi coño ñuhu. Nyaá xiñi. Nyaá ndaha. Nyaá chaha. Ta chichi cha tandihi cuan nanduví chi noo ri coño ñuhu.

¹³ Ta tyicuan caa tucu tandihi yo, an cuví yo ñu Israel, o ñu Grecia, o ñu iyó chitoho, o ñu yori chitoho, condutya yo vatyí cuví yo noo ri coño ñuhu cuenda ra Cristo. Vatyí noo ri maa Tatyí Ii ra chahá ra tyi quihí chi tandihi yo.

¹⁴ Noo coño ñuhu cuaha xaan cuenda yihí tahan. Ñima minoo ri cuenda.

¹⁵ Tyehe ta cuví cahan chaha yo ta catyí chi: “Yuhu ñima coño ñuhu cuví vatyí ñima ndaha cuví.” Ñima vatyí catyí chi tyicuan caa ta ñima coño ñuhu cuví chi.

¹⁶ O tyehe ta cuví cahan soho yo ta catyí chi: “Yuhu ñima coño ñuhu cuví vatyí ñima chiti nuu cuví.” Ñima tyi catyí chi tyicuan caa ta cusandihí chi cha cuví chi coño ñuhu.

¹⁷ Tyehe ta tandihi coño ñuhu yo cuví chiti nuu yo, yoso caa cuví cuñi yo. O tyehe ta tandihi coño ñuhu yo cuví soho yo, yoso caa cuví tahñi yo.

¹⁸ Soco Nyoo tyaá ra noo noo cuan nu cuñi maa ra.

¹⁹ Tatu iin cahnu ri caa coño ñuhu yo, ñima coño ñuhu cuví. Ta ña vaha quetuví.

²⁰ Soco vasi cuaha cha nyaá chi yo, vaha quetuví vatyí nyaá tandihi cha cuví coño ñuhu chi yo.

²¹ Tyehe ta cuví cahan chiti nuu yo, ñahri ityi iyó chi chi cha catyí chi chi ndaha yo: “Ña chiñuhú yoho chii.” Ta ni xiñi yo ta ñahri ityi iyó chi chi cha catyí chi chi chaha yo: “Ña chiñuhú yoho chii.”

²² Ña vaha cha catyí chi tyicuan caa. Vatyí vasi luhlu ri noo coño ñuhu yo cha cuñi maa yo tyi ña chiñuhú chi yo, ican cuan cuví cha chiñuhú ca chi yo.

²³ Ta nu cuñi vaha yo, ican cuan sacuihnó vaha ca yo. Ta nu cuñi maa yo tyi ña tyaqui, ican cuan sacuvií ca yo.

²⁴ Ta nu tyaqui ca, ña cuñi chi sacuvii yo. Soco maa Nyoo sandu iin ri ra coño ñuhu yo, tacuhva vatyí nu cuñi maa yo tyi ña tyaqui, sacahnú ca yo.

25 Tacuhva cha ma cusin coño ñuhu, tahan tahan chi cuñi chi quihí iñi chi cha catyi inga tahan chi.

26 Tatu suhva coño ñuhu yo nyehé chi tindoho, tandihí ri chi nyehé, ñima noo ri chi. Ta tatu suhva chi cusí cuñi chi, tandihí ri chi ta cusí cuñi chi, ñima noo ri chi.

27 Ta maa yo cuví yo coño ñuhu ra Cristo. Ta suhva suhva coño ñuhu ra cuví noo noo yo.

28 Ta Nyoo cuatyaa ra chi noo noo yo vehe ñuhu tacuhva tyinyeé yo chi tahan yo. Cha xihna ca cuatyaa ra chi ra apóstol. Cha cu uvi, chi ra profeta, o ra cachahá cuenda tuhun cahán Nyoo cuví cuan. Ta cha cu uñi, chi ra casañahá. Ta yaha cuan, ra cha casacuví milagru, ta ra cha casanduvahá chi ñu cuhví, ta ra cha catyinyeé chi ñáyivi, ta ra casahacuendá vehe ñuhu, ta ra cha cacahán inga sahan cha ña chitó ra.

29 Ña tandihí yo cuví yo apóstol. Ña tandihí yo cuví yo noo profeta. Ña tandihí yo cuví yo ra sañaha. Ña tandihí yo sacuví yo milagru.

30 Ña tandihí yo chahá Nyoo vatyí sanduvahá yo ñu cuhví. Ña tandihí yo cahán yo inga sahan cha ña chitó yo. Ña tandihí yo cuví nacoto yo ta nacatyí yo ñáá cha cuñi chi catyí noo cha cahán yo chihin inga sahan.

31 Ta nducu ndo cuhva ñaquehen ndo cha vaha ca cha chahá Nyoo. Soco cuasañahi noo ityi cha vaha ca chi ndo.

13

Chahá ra Pablo tuhun chi yo yoso caa tahán chi cha cuñi yo chi ñáyivi

1 Tatu yuhu ta cuví cahin cuaha ri nuu sahan iyó síqui ñuhu ñáyivi ihya, ta cuví cahan tiqui sahan ángel ñandihí, soco tatu ñahri cha cuñi chi Nyoo ta chi ñáyivi, cuví tari noo tambu cha nañi ri maa o noo caa cha chacú ndaxin ri maa.

2 Tatu cuví cuhva cuende tuhun cahan Nyoo, o tatu cutuñi iñi tandihí tuhun xehe ca, ta chité tandihí, ta ña cuñi chi Nyoo ta chi ñáyivi, ñahri maa tuhun. Tatu chinó vavaha iñi chi Nyoo nyacua cuví catyi chi ra na tohon ra noo yucu cuan ta natyaa ra

inga ityi, ta sacuví ra cha chiquén, soco tatu ña cuñi chi Nyoo ta chi ñáyivi, ñahri ra cuví.

3 O tatu cuhve tandihí cha iyó chii chi ñu ndahvi, ta nyacua cuhva cuende ñáyivi tyi cayu coño ñuhi, soco tatu ña cuñi chi Nyoo ta chi ñáyivi, ñahri maa tuhun.

4 Tatu cuñi yo chi Nyoo ta chi ñáyivi, ña ihñi tisihi yo. Vaha ñáyivi cuví yo. Ña nyiyó iñi yo cha chahá Nyoo chi inga ñu, ña cahnu sahá yo chi yo, ta ña yaá yo.

5 Tatu cuñi yo chi Nyoo ta chi ñáyivi, ña quiñi iyó yo. Ña nanducú yo maa ri cha vaha chi maa yo. Ña cuxaán yo. Ña ndoó tisihi añima yo.

6 Tatu cuñi yo chi Nyoo ta chi ñáyivi, ña cusí cuñi yo ñáá ndihí cha ña vaha sacuví ñáyivi. Soco cusí cuñi yo cuenda cha vaha ta cha ndicha.

7 Tatu cuñi yo chi Nyoo ta chi ñáyivi, cunyeé yo nyehe yo tindoho sahá ñáyivi. Chinó iñi yo tyi cusacuvi ñu cha vaha. Nyatú yo cha nasama ñu cuhva iyó ñu. Chihin cha cama iñi yo ta cunyeé yo tandihí.

8 Cha cuñi yo chi Nyoo ta chi ñáyivi ma ndihí maa, soco coo quivi cha ma coo ca tuhun cha sahá yo profetizar. Ta ma cahan ca yo inga sahan cha ña chitó yo, ta tandihí tuhun cha chitó xaan yo cundihí.

9 Vityin chiin ri chitó yo ta chiin ri sahá yo profetizar.

10 Soco quivi quichi ra Cristo, cunduvaha tandihí ta cucoto yo tandihí, ta cundihí tuhun cha chitó yo chiin ri.

11 Quivi cu luhlí cahin ta chica xiñi tari ra cuatyaa. Soco quivi chahní sandoj cha nyacuví tari ra cuatyaa.

12 Ta tyicuan caa tucu, cuví yo tari ra cuatyaa vityin. Tari cha nyehé yo nu ino cha ña ndichin vaha. Soco quivi quichi ra Cristo ta cunyehe vaha yo chihin nuu yo chi ra. Chiin ri chitó yo cha vityin. Soco quivi cuan tandihí cuii ta cucoto yo, tari ñohó nuu Nyoo chi yo.

13 Iyó uñi tahan cha ma ndihí maa: cha chinó iñi yo chi Nyoo, cha cuatu yo cha ñihí yo cha cuenda ra Cristo, ta cha cuñi yo chi Nyoo ta chi ñáyivi. Soco chichi cha ñanduñi tahan cuan, cha chiñuhú ca chi yo, cha cuñi yo chi Nyoo ta chi ñáyivi.

14

Nu sañahá ra Pablo yoso caa cahán yo inga sahan cha ña chitó yo

¹ Na sañihi yo cuñí yo chi Nyoo ta chi ñáyivi. Ta na nducu yo cuhva naquehen yo tunyee iñi cha chahá Tatyí Ii Nyoo chi yo. Na nducu xihna yo cha cuhva cuenda yo tuhun cahán Nyoo, o sahá yo profetizar cuví cuan.

² Vatyí tatu cahán yo inga sahan cha ña chitó yo, cahán yo soco chihin Nyoo. Ñima chihin ñáyivi. Vatyí ni noo ñu ta ña cutuñí iñi ñu. Vatyí tuhun xehe cuví tuhun cha cahán yo cha cuenda Tatyí Ii Nyoo.

³ Soco tatu sahá yo profetizar, cutuñí iñi ñu. Ta chahnu ca ñu chihin tuhun Nyoo. Ta tyicuan caa sanduní yo ta sandunyeé ca yo iñi ñáyivi.

⁴ Tatu cahán yo inga sahan cha ña chitó yo, maa ri maa yo ndunyeé yo. Soco tatu sahá yo profetizar, ndunyeé cuñi tandihí ñu yihí cuenda Nyoo.

⁵ Yuhu cuñí vatyí tandihí ndo cahán ndo inga sahan cha ña chitó ndo. Soco vaha ca cha saha ndo profetizar. Vatyí tyinyeé ca chi chi ñu nyicú vehe ñuhu ta ñima ca cha cahán yo inga sahan. Soco tatu noo ndo cuví nacoto ndo ñáá tuhun cahán noo tahan ndo chihin inga sahan, nacatyí ndo. Tyicuan ta cuví tyinyee chi chi tandihí ndo.

⁶ Yucuan chaha yañi, tatu yuhu ta chai nu nyicu ndo, ta cahín inga sahan, ña tyinyeé chi chi ndo. Soco tatu cahín noo cha sanyehe Nyoo chii, o noo cha sacoto ra chii, o noo profesia, o noo cha sañahi chi ndo, tyinyeé chi chi tandihí cuí maa ndo.

⁷ Tatu tiví yo noo cutu, o sacucacu yo noo guitarra ta ña quita vaha ndusu cuan sahá yo, ma coto yo ñáá yaa cuví.

⁸ Ta tatu nu iyó cuatyí ta ña tyacú vaha trompeta, yori coto ñáá cuhva tahán chi cañi tahan ra.

⁹ Ta tyicuan caa yoó, tatu cahán yo inga sahan cha ña cutuñí iñi ñáyivi, ma coto ñu ñáá tuhun cahán yo. Tari cha cuví yuhu ri maa yo cuví cuan.

¹⁰ Cuaha xaan nuu sahan iyó ñáyivi ihya. Ta noo noo nuu sahan ta iyó iyó ri cha cuñí chi catyí.

¹¹ Soco tatu ña cutuñí iñi sahan cha cahán inga ñáyivi chihin, ma cuvi ndatuhin chihin ñu. Ta ni ri maa ñu ma cuvi ndatuhun ñu chihin yuhu. Cuví ñu tari ñu inga ñuu cha cuende.

¹² Yucuan chaha nyoho cha cuñí xaan ndo naquehén ndo tunyee iñi cha chahá Tatyí Ii Nyoo, nducu ndo noo tunyee iñi cha vaha ca cutyinyee chi ñáyivi vehe ñuhu.

¹³ Yucuan chaha nyoho cha cahán ndo inga sahan, çacan ndo chi Nyoo vatyí cuvi nacoto ndo ta nacatyí ndo chi tahan ndo.

¹⁴ Vatyí tatu nacuatí chi Nyoo chihin noo sahan cha ña cutuñí iñi, espíritu mai cha yihí chichi coño ñuhi ican nacuatú soco cha chihí tuñi xiñi ña cutuñí iñi chi.

¹⁵ Yucuan chaha cuñí chi çacan tahvi chi Nyoo chihin inga sahan. Soco cuñí tucu chi cha çacan tahvi chi ra chihin sahan cha cutuñí iñi. Ta cuñí tucu chi cha cate chihin sahan cha ña cutuñí iñi, Soco cuñí tucu chi cha cate chihin sahan cha cutuñí iñi yo ñandihí.

¹⁶ Vatyí tatu maa maa ri chihin sahan cha chahá Tatyí Ii Nyoo chuun, sacahnún chi ra, ma cutuñí iñi ñáyivi cha ña chitó ñáá cha cuví cuan. Ta ma cuvi sacahnu ñu Nyoo chuhun.

¹⁷ Vasi vaha tuhun cahún, cuhva cha nacuhvón tyahvi nyoo chi Nyoo tyicuan caa, soco ña tyinyeé chi chi inga ñáyivi vatyí ña cutuñí iñi ñu tuhun cahún.

¹⁸ Soco yuhu nacuhvé tyahvi nyoo chi Nyoo vatyí cuaha ca chaha cahin inga sahan ta ñima ca tandihí nyoho.

¹⁹ Soco chichi vehe ñuhu tahan ca iñi cahín vasi ohon tahan tuhun cha cutuñí iñi ndo vatyí sañahi chi inga ndo, ta ñima ca cha cahín uchi mil tuhun cha ña cutuñí iñi ndo.

²⁰ Chahnu cuhva çaca xiñi ndo, yañi. Ta ma lee xaan cuhva çaca xiñi ndo. Soco lee cuhva cunyacuvi ndo. Vatyí cha lee ña nyacuví chi cha quiñi caa.

²¹ Catyí Nyoo nu libru ley ra tyehe caa: “Cucahin chihin ñáyivi ihya chihin yuhu ñáyivi inga ñuu ta chihin inga sahan. Cha ña cutuñí iñi ñu. Soco ni ri tyicuan caa ta ma quichaha ñu chii”, catyí Sutu Mañi yo.

²² Yucuan chaha tuhun cha cahán yo inga sahan cuví chi tari noo seña chi ñu cha ña chino iñi tuhun ra Cristo. Soco tuhun

cha sahá yo profetizar, cuví chi cuenda ñu cha chinó iñi chi ra.

²³ Vatyí tatu ndu ñin ri ndo, ta tandihí ndo cahán ndo inga sahan ta quihví noo ñu cha ña yihí cuenda Nyoo, cucatyí ñu tyi ña vaha cuñí xiñi ndo.

²⁴ Soco tatu tandihí ndo sahá ndo profetizar, ta quihví noo ñu cha ña yihí cuenda Nyoo, o noo ñu ña cutuñí vaha iñi tuhun Nyoo, coto ñu tyi iyó cuatyí ñu cha cuenda tyi cutuñí iñi ñu cha cahán ndo.

²⁵ Ta tandihí cha caa chichi añima ñu cunacoto ñu. Ta nicuiñi chiti ñu ta sacahnu ñu chi Nyoo. Ta catyí ñu vatyí ndicha ndicha cuii cha nyaá Nyoo chihin ndo.

Yoso caa sacó yo culto minoo cha cachi minoo cha ndaa

²⁶ Yucuan chaha yañi, tatu cuandu ñin ri yo, cuiso noo noo yo yaa cha cata yo, o cha sañaha yo, o ñáá cha sanyehe o sacoto Nyoo chi yo, o cahan yo inga sahan, o cha nacoto yo ta nacatyí yo yoso caa cuahán tuhun inga sahan cuan. Soco tandihí ihya nacuvi chi noo cha chahá tunyee iñi maa Nyoo chi tandihí yo cha yihí yo cuenda ra.

²⁷ Tatu cuacahan yo inga sahan nu ndu ñin ri yo, cuñí chi cahan uvi yo o uñi ri yo, soco noo noo ri yo cahan. Ma cahan yo ñin ri. Ta sñin ri cuñí chi cha nacatyí noo yo tuhun cahán tahan yo.

²⁸ Soco tatu yori cuví nacatyí ñáá tuhun cahán yo, vaha taxin ca ma cahan ca yo chihin inga sahan nu ndu ñin ri yo. Cahan yo inga sahan soco xehe ri chihin Nyoo tacuhva cuiñi ri maa yo.

²⁹ Tyicuan caa tucu tatu sahá yo profetizar, cahan uvi yo, o uñi ri yo. Ta tandihí ca yo saha yo cuenda tatu vaha cha cahán tahan yo.

³⁰ Soco tatu sacoto Nyoo ñáá noo ca tuhun chi inga ñu cha canyicú chiñi tuhun cuan. Tyicuan ta ñu cha xihna ri, cuñí chi sandihí ñu cha cahán ñu tacuhva cuvi cahan inga ñu cuan.

³¹ Ta tyicuan caa tandihí ndo cha naquehén ndo tuhun cha chahá Nyoo chi ndo cuví nacatyí noo noo ndo. Vatyí tacuhva cutuhva tandihí ca ndo ta cunñi ca iñi ndo.

³² Ñu cha sahá profetizar cuví cuatu noo ñu nya ndihí cahán inga ñu. Vatyí noo ri Nyoo cuví ra cha nyacá ñaha chi noo noo yo.

³³ Vatyí Nyoo cachi iyó ra ta ña iñi ndaa iñi noo nyacuví ra.

Quehen ndo cuhva vaha nyacuví inga hermano nu ca ndu ñin ri ra.

³⁴ Ñusihí taxi ri na coo ñu. Cuñí chi quichaha ñu chi yñi ñu tari catyí ley Nyoo.

³⁵ Tatu ñáá cha cuñí ñu coto ñu, na ndaca tuhun ñu chi yñi ñu nya vehe ñu. Vatyí ña vaha quetuví cha cahán ñusihí nu ndu ñin ri yo.

³⁶ Tatu sñin cuhva chicá xiñi ndo, cuñí chi nicohón iñi ndo vatyí ñima chihin ndo quichaha tuhun Nyoo. Ta ñima nyoho ri naquehén tuhun Nyoo.

³⁷ Tatu nya noo ndo cuñí maa ndo vatyí profeta cuví ndo, o tatu cuñí maa ndo tyi Tatyí li saquehén ityi ra chi ndo, cunacoto ndo vatyí cha catyí chi ndo ihya, mandamiento Sutu Mañi yo cuví.

³⁸ Soco tatu ña cuñí ndo naquehén ndo tuhun ihya, ni nyuhu ta ma naquehen ndi tuhun cahán ndo.

³⁹ Ta tyicuan caa yañi, na nducu ndo cuhva saha ndo profetizar. Ta ma casi ndo cha cahán ñu inga sahan.

⁴⁰ Soco sacuvi ndo tandihí chihin cha ndaa ta chihin cha cachi.

15

Yoso caa nandotō ra Cristo

¹ Vityin yañi, cuñí vatyí nicohon iñi ndo tuhun ra Cristo, cha sacacú chi yo, cha cahin nuu ndo quivi cuan. Ta ican naquehén ndo ta ñi iñi ndo chinó iñi ndo.

² Ta suri cha cuenda tuhun ra Cristo cacú añima ndo tatu cuahán ndo tari cuhva sañahí chi ndo. Soco tatu natyihí caxiin ndo cuahan ndo, ñahri maa tuhun cha chinqo iñi ndo chi Nyoo.

³ Cha xihna ri sacote tuhun cha cutuhve chi ndo. Ta sañahí chi ndo vatyí ra Cristo chihí ra cha catyí cuatyí yo, tari catyí nu libru Nyoo vatyí cucuvi.

⁴ Tyicuan ta chicuchi ñu chi ra. Soco nu ndu uñi quivi nandotō ra tari catyí tucu nu libru Nyoo.

⁵ Tyicuan ta tuv̄i ra Cristo nuu ra Pedro ta yahā cuan ta nuu ndi uchi uvi tahan ra chicá tyiño ra.

⁶ Yahā cuan ta noo chaha tuv̄i ra nuu yaha ca ohon cientu yañi yo. Ta cuaha ca ñu cuan iyó ca ñu vityin. Soco suhva ñu cha yahā chih̄i ñu.

⁷ Yahā cuan ta tuv̄i ra nuu ra Jacobo. Yahā cuan ta nuu tandih̄i ra apóstol.

⁸ Ta nu ndih̄i tuv̄i tucu ra nuu yuhu, cha cuv̄i tari noo ra cuatyaa cha cacu ta ta chaa ca yoo cacu. (Vatyi ta cutuñi ca iñi tuhun Nyoo cuv̄i cuan.)

⁹ Vatyi cha nuu tandih̄i ca ra apóstol cuv̄i yuhu noo cha ñima ri tuhun. Ta ni ña nañé cha cuv̄i apóstol vatyi chicā nyicon xain chi ñu ñohó cuenda Nyoo.

¹⁰ Soco Nyoo vaha xaan ñáyiv̄i cuv̄i ra chihin. Ta ñima cha caha ri sahā ra tumañi iñi chii cha cuv̄i noo ra chicá tyiño ra. Ta ñihi ca sahá tyiñe ican saha inga ra. Soco ñima mai sahá tyiñe vatyi maa Nyoo nyaá chihin. Ta ican ra sacuv̄i tandih̄i cuan.

¹¹ Soco ñahri saha, an yuhu, an inga ra cuan. Soco tuhun cahán ndi chihin ndo, ican ihya cuv̄i tuhun cha chinó iñi ndo.

Nu sañahá ra Pablo vatyi cha ndicha cuv̄i vatyi cunandoto ñu ndiyi

¹² Tatu cahán ndi tuhun cha nandoto ra Cristo mahñu ñu ndiyi chihin ndo, ¿ñáá tuhun cha yih̄i ndo catyí ndo vatyi ma nandoto ñu ndiyi?

¹³ Vatyi tatu ma nandoto ñu ndiyi, ni ri ra Cristo ta ña nandoto ra cuv̄i cuan.

¹⁴ Tyehe ta ña nandoto ra Cristo, tuhun cha cahán ndi chihin ndo ñahri maa vale. Ta ni ri cha chinó iñi ndo, ñahri maa tuhun.

¹⁵ Tatu tyehe ta ña ndicha cha sanandoto Nyoo chi ra Cristo, cuv̄i ndi noo ra cuendu tyi catyí ndi vatyi sanandoto Nyoo chi ra. Ta tatu ña ndicha cha nandoto ñu ndiyi, ña ndicha cha sanandoto Nyoo chi ra Cristo.

¹⁶ Vatyi tyehe ta ma nandoto ñu ndiyi, ni ri ra Cristo ta ña nandoto ra.

¹⁷ Ta tatu ña nandoto ra Cristo, ñahri maa tuhun cha chinó iñi ndo cha sandachí ra cuatyí ndo. Ta tacuhva iyó ri maa cuatyí ndo.

¹⁸ Ta ñu yih̄i cuenda ra ta cachih̄i ñu, cuanaa ri maa ñu cuv̄i cuan.

¹⁹ O tyehe ta ihya ri ñáyiv̄i tyinyeé ra Cristo chi yo, ta ma nandoto yo quiv̄i quichi ra, cuv̄i yo noo ñu tondo cha nuu tandih̄i ca ñáyiv̄i.

²⁰ Soco chitó vaha yo vatyi cha ndicha cuv̄i cha nandoto ra Cristo. Ta ican ra cuv̄i cha nandoto xihna ca mahñu ñu ndiyi.

²¹ Vatyí cha catyí cuatyí ra Adán ta chicoó tuhun chih̄i. Yucuan chaha tahán chi cuv̄i yo. Soco cha catyí cha nandoto ra Cristo tahán chi nandoto tucu ñu yih̄i cuenda ra.

²² Ta tari tandih̄i ñáyiv̄i chih̄i cha cuenda ra Adán, tyicuan caa tucu cunandoto tandih̄i ñu cuenda ra Cristo.

²³ Soco noo noo yo cunandoto yo quiv̄i tahan chi chi yo. Xihna ca ra Cristo nandoto. Yaha cuan ta quiv̄i quichi tucu ra inga chaha cunandoto tucu ñu yih̄i cuenda ra.

²⁴ Yaha cuan ta cundih̄i tuhun ñuhu ñáyiv̄i ihya ta ma cunyaca ñaha ca ra cuv̄i tyiño nahnu, ta tatyí ña vaha. Vatyí ra Cristo cuatinyaa ra fuerza chi ra cuan. Ta cunacuhva cuenda ra chi Nyoo Sutu ra.

²⁵ Vatyí ra Cristo cunyaca ñaha ra nyacua nya quiv̄i cuhva Nyoo cha cuv̄i chasaha ra chi tandih̄i ra xaan iñi chi ra.

²⁶ Ta nya nu ndih̄i, cusanaa ra tuhun chih̄i.

²⁷ Vatyí cha yahā nacuhvā cuenda Nyoo tandih̄i chi ra Cristo vatyí cunyaca ñaha ra. Soco nu catyí chi vatyí tandih̄i natyaa Nyoo ndaha ra, cuñí chi catyí vatyí ma cunyaca ñaha ra chi maa Nyoo vatyí ican maa Nyoo natyaa tandih̄i cuan ndaha ra.

²⁸ Soco quiv̄i saha ganaa ra Cristo tandih̄i, tyicuan ta maa ra cha cuv̄i ra Sehe Nyoo, cunacuhva cuenda ra tandih̄i chi Nyoo Sutu ra. Vatyí Nyoo cucuvi ra Nyoo cuenda tandih̄i maa cha iyó.

²⁹ Tatu tyehe ta ña nandoto ñu chih̄i, ¿ñáá tuhun yih̄i ñu condutyá ñu tyiño nuu ñu chih̄i?

³⁰ Ta tyicuan caa tucu mai, tatu ma nandote, ¿ñáá tuhun ndoí vaha cha ndi quiv̄i nyatí tuhun chih̄i?

³¹ Tandih̄i quiv̄i nyatí tuhun chih̄i. Soco ñahri caa vatyí sí cuñi chihin ndo. Vatyí chinó iñi ndo chi Sutu Mañi yo Jesucristo.

³² Ñáá ri tuhun nyeh̄i tindoño ñuu Éfeso tatu tyehe ta ma nandoto ca yo. Vaha taxin

ca sacuvi yo tari catyí ñáyiví: “Na cachi yo, na coho yo vatyí tyaan isa cúvi yo”, catyí maa ñáyiví cha ña chitó.

³³ Ma cuhva ndo cha sandavi ñaha ñu chi ndo. Vatyí iyó tucu tuhun cha catyí: “Tatu ñu tahan yo quiñi iyó ñu, cuví sativí ñu cuhva vaha cuahan yo.”

³⁴ Saha ndo cuenda cuhva iyó ndo. Ta ma sacuvi ca ndo cha quiñi caa. Vatyí chihin cuhva iyó suhva ndo chité tyi ña ñohó nuu ndo chi Nyoo. Catyí chi ndo tyehe caa vatyí nacoo ticahan nuu nuu ndo.

Nu sañahá ra Pablo yoso caa cusanan-doto Nyoo chi yo quiví quichi ra Cristo

³⁵ Soco yihí ndo ndacá tuhun ndo: “¿Yoso caa cunandoto ñu chihí? ¿Ñáá coño ñuhu cucuiso ñu?”

³⁶ ¡Tondo xaan xiñi ndo! ¿Atu ña chitó ndo vatyí tatu tachí yo noo chiti yutun, cuñí chi cha tyahyu soo chiti cuan? Tyicuan ta cañá noo yutun. (Chihí chiti cuan tacuhva na coo yutun cuan ñáyiví.)

³⁷ Vatyí cha tachí yo ñima maa tun tachí yo. Soco chiti tun, an cuví ri nuñi, o trigo, o ñáá ndihí ca chiti.

³⁸ Ta cha cañá cuan Nyoo sacuví ra yoso cuhva cuñí maa ra chi noo noo cha cañá cuan. Vatyí siin siin cuhva caa noo noo nuu chiti.

³⁹ Ta tyicuan caa tucu tandihí coño ñuhu, ña in ri caá chi. Siin caa coño ñuhu ñáyiví. Siin caa coño ñuhu cuiñi. Siin caa coño ñuhu saa. Siin caa coño ñuhu tiyaca.

⁴⁰ Ta tyicuan caa tucu cha iyó andiví. Siin caa cha iyó yucuan. Ta siin caa tucu cha iyó ñuhu ñáyiví ihya. Ta cha iyó nya andiví tyaquí xaan, ta cha iyó siquí ñuhu ñáyiví tyaquí tucu cuan soco siin caa.

⁴¹ Cha ndichin ñanyii, ña inuu ri chihin cha ndichin yoo. Ta ña inuu ri chihin cha ndichin tiño. Ta tiño ña inuu ri chihin inga tucu tiño.

⁴² Ta tyicuan caa tucu tuhun cha nandoto yo. Vatyí chicuchi yo noo coño ñuhu yo cha tuhva tyahyu. Ta cunandoto yo soco chihin noo cha ma cúvi ca maa.

⁴³ Chicuchi yo noo cha numi ri tyahyu. Soco cunandoto noo cha tyaquí. Tyihí yo noo coño ñuhu pehe chichi ñuhú. Ta cunandoto noo cha nyee.

⁴⁴ Vatyí chicuchí yo coño ñuhu yo cuenda ñáyiví ihya chichi ñuhu. Ta cunandoto noo cha ñima ca cuenda ñáyiví ihya cuví, soco cuenda Nyoo andiví. Tatu iyó coño ñuhu yo ñáyiví ihya. Suri coo tucu noo cha ñima ca cuenda ñuhu ñáyiví, soco cuenda andiví.

⁴⁵ Catyí tuhun Nyoo vatyí ra Adán ra cha chiyo cha xihna ri, chaha Nyoo ñáyiví coo ra. Soco ra Adán cu uvi, ra cuví Cristo, cuví ra Tatyí li ta chahá ra noo ñáyiví cha ma naa ca maa chi yo.

⁴⁶ Yucuan chaha, cha xihna ri tahán chi coo yo chihin coño ñuhu cuatyí yo. Ta yaha cuan ta coo yo cuenda Tatyí li Nyoo.

⁴⁷ Rayí cha chinqo cha xihna ri, chihin ñuhú chinqo ra. Ra cuenda ñuhu ñáyiví cuví ra. Ta rayí cu uvi cha cuví Sutu Mañi yo, ra cuenda andiví cuví ra.

⁴⁸ Tandihí yo nyisó yo coño ñuhu cha chinqo chihin ñuhú, tari coño ñuhu ra Adán. Ta cha cucuiso yo andiví cuví chi tari nyisó ra Cristo ra quichí nya andiví.

⁴⁹ Tari ndacú yo chi rayí, ra cha chinqo chihin ñuhú, tyicuan caa tucu cundacu yo chi ra Cristo ra quichi nya andiví.

⁵⁰ Ta cuñí catyí chi ndo yañi, vatyí coño ñuhu yo ma cuví quihví chi andiví nu nyacá ñaha Nyoo. Noo cha tañi tyehe ri tiví ma cuví quihví noo nu ña tiví.

⁵¹ Soco cuñí tyi coto ndo noo tuhun xehe cha yori maa chitó. Vatyí ña tandihí yo cucúvi yo. Soco tandihí yo ta cunasama cuhva caa yo.

⁵² Ta in yaha cui ri, tari noo cha ndahvá nuu ri yo, nu ndihí tiví ángel trompeta. Vatyí cutiví ángel trompeta ta ñu ndiyí cunandoto ñu cha ma cúvi ca maa ñu. Ta Nyoo cunasama cuhva caá ñu.

⁵³ Vatyí cuñí chi tyi nasama Nyoo coño ñuhu yo chihin noo cha ma naa ca maa.

⁵⁴ Ta quiví cuan nasama coño ñuhu yo ta quehen yo cha ma tiví maa. Cua cuví tari catyí nu libru Nyoo tyehe caa:

“Nyoo cuví chasaha ra chi tuhun chihí.”

⁵⁵ Yoho, Tuhun Chihí, ¿nya nyaa tunyee iñi chuun vityin vatyí cahñun chi ndi? ¿Nya nyaa cha cua saha ganaun vityin, yoho Tuhun Chihí?

⁵⁶ Vatyí cuatyí yo ican chahá cha cahñi tuhun chihí chi yo. Ta ley chahnu, ican cuví cha chahá fuerza chi chi.

57 Soco tyahví nyoo chi Nyoo, yañi. Vatyí sahá ganaa yo síqui cuan cha catyí Sutu Mañi yo Jesucristo.

58 Yucuan chaha yañi, na cuinanyaa yo chihin Nyoo chihin cha ñi iñi yo. Tyicuan ri na saha tyiño yo nu tyiño Sutu Mañi yo. Vatyí tyiño sahá yo chihin Sutu Mañi yo, ñima cha sahá tyiño caha ri maa yo cuví.

16

Chahá ra Pablo tuhun chi ñu Corinto yoso caa tyinyee ñu chi tahan ñu cuenda Nyoo

1 Ta tuhun cha tyinyeé ndo xuhun chi ñu ndahvi, ñu yihí cuenda Nyoo. Cunyacuvi ndo tari catyí chi ñu nyicú tandihí vehe ñuhu ityi Galacia.

2 Ma cuatu ndo nya quichi ta cuhva ndo xuhun. Soco tahan tahan nu ndihí vitya ri ta tyihí sñn ndo cha tahán chi cuhva ndo chi ñu, yoso cuhva cha chahá Nyoo chi ndo.

3 Ta quiví cha quichi, cutachi nya ra cha cuñi maa ndo vatyí cunyaca ra xuhun cuan chihin carta chi tahan yo cha canyicú nya Jerusalén.

4 Ta tatu tahan tucu chi cuhin, cuhun coyo ra chihin.

Yihí iñi ra Pablo nya ndihí nu cucahan ra tuhun ra Cristo

5 Cuhin nu nyicu ndo Corinto chiña, soco cuhun xihne ityi Macedonia. Vatyí ityi cuan cuyahi.

6 Ta tatu chahá chi cuhva cundoí chihin ndo nyacua nya yahá yoo vichin. Tyicuan ta cuví tyinyeé ndo chiin chii ta cuhin inga ñuu.

7 Ña cuñi cha ñn yaha ri yahi nu nyicu ndo. Vatyí cuñi ndoi suhva quiví chihin ndo tatu Sutu Mañi yo ta cuñi ra.

8 Soco cunyai ñuu Éfeso ihya, nyacua nya yaha quiví cha sanducahnú ñu Israel vico Pentecostés. Tyicuan ta quichi nu nyicu ndo.

9 Cundoí suhva ihya vatyí vasi cuaha xaan ñáyiví ña cuñi nyehe ñu tuhun Nyoo, soco chahá xaan chi cuhva cahín tuhun Nyoo chihin ñáyiví ñuu ihya.

10 Tatu chaa ra Timoteo, na cunyaa ra chihin ndo. Ta vaha tyiñuhu ndo chi ra.

Vatyí sahá tyiño tucu maa ra cuenda Sutu Mañi yo tari mai.

11 Ta vaha ço iñi ndo nyehé ndo chi ra. Ta tyinyee ndo chiin chi ra tyi quichi ra nu nyaí. Vatyí nyatí chi ra chihin inga yañi yo.

12 Ta yañi yo, ra Apolos, chacu ndahvi xain nuu ra nacuhun ra chihin inga yañi yo nu nyicu ndo. Soco ña cuñi ra. Soco cuhun maa ra nacuhva chi cuhva chi ra, na.

Chahá ra Pablo nocumi chi tandihí ñu yihí cuenda Nyoo ñuu Corinto

13 Sañihi ndo chinó ca iñi ndo chi Nyoo. Ta cuní iñi ndo ta nacoo vaha fuerza Nyoo chi ndo.

14 Tandihí cha sacuví ndo, sacuvi ndo cha cuenda cha cuñi ndo chi Nyoo ta chi tahan ndo.

15 Chitó ndo yañi vatyí ñáyiví chi ra Estéfanos xihna ca ñu chinó iñi tuhun ra Cristo ityi Acaya chiña. Ta vityin sacuví ñu tyiño nuu ra hermano.

16 Ta catyí chi ndo vatyí saha ndo ñáyiví chi ñu cha iyó tari iyó ñu chiña, ta chi tandihí ñu cha tyinyeé ta sahá tyiño cuenda Nyoo.

17 Ta cusí xaan cuñi cha quichí coyo ra Estéfanos ta ra Fortunato ta ra Acaico. Vatyí maa ra catyinyeé ra chi ndi. Vatyí tandihí ndo ña cuví quichi ndo vatyí cañi xaan ñuu ndo.

18 Soco maa ra quichí coyo ra. Ta sandunyeé ca ra iñi chihin tuhun Nyoo. Tari sanduní ra iñi nyoho ñandihí. Ta vaha ço iñi ndo nyehé ndo tyiño casacuví ra. Vatyí maa ra ñn ri chi Nyoo canyicón ra.

19 Ta vachí nocumi chi ndo sahá tandihí yañi yo ta tahan yo cha ndu ñn ri ityi Asia ihya. Ta vachi tucu nocumi chi ndo sahá ra Aquila ta cu Priscila, ta ñu yihí cuenda Nyoo cha ndu ñn ri vehe ñuhu nu cuví vehe ñu.

20 Vachi nocumi chi ndo sahá tandihí yañi yo, ta nacuhva maa ndo nocumi chi noo noo ndo nu nyicú ndo chiña.

21 Nocumi cha vachí chi ndo ihya, yuhu ra Pablo tyai chihin ndahi.

22 Tatu nya ñáyiví ña cuñi chi Sutu Mañi yo Jesucristo, nacuhun ñu anyaya. Soco yuhu catyí: ¡Sutu Mañi yuhu, ñaha!

23 Ta nasoco Sutu Mañi yo Jesucristo chi tandihí ndo.

²⁴ Ta catyí chi ndo vatyi yuhu cuñí chi tandihí ndo cha cuenda ra Cristo Jesús. Ta nacuví chi tyicuan caa.

Carta Cha Cu Uvi Sacuhun Ra Apóstol Pablo Chi Ñáyivi Ñuu Corinto Cha Yihí Cuenda Nyoo

Nu sacuhún ra Pablo noo tutu chi ñu ñuu Corinto cha yihí cuenda Nyoo

¹ Yuhu ra Pablo, cuví noo ra apóstol ra Jesucristo vatyí Nyoo nacachí vaha ra chii. Ta yuhu ta ra Timoteo yañi yo tyaá ndi noo tutu ihya chi ndo cha cuví ndo ñáyivi ñuu Corinto cha yihí cuenda Nyoo, ta chi tandihí ñu yihí cuenda Nyoo nicacahnu ityi Acaya chiña.

² Nyoo Sutu yo ta Sutu Mañi yo Jesucristo na nasoco ra chi ndo ta nacuhva ra cha taxi ri coo añima ndo.

Nu chicá noo ra Pablo sacotó ra tuhun ra Cristo nyehé xaan ra tindocho

³ Na sacahnu yo chi Nyoo Sutu Sutu Mañi yo Jesucristo. Vatyí ican ra cuví Nyoo Sutu yo. Ta cundahvi xaan cuñi ra nyehé ra chi yo. Ta maa ra tyicuan ri naquehén ndahvi ra chi yo.

⁴ Ta cuhva cha nyehé yo tindocho maa ra naquehén ndahvi ra chi yo. Vatyí tyicuan caa ta cuví naquehen ndahvi tucu maa yo chi ñu nyehé tindocho tari naquehén ndahvi tucu maa ra chi yo.

⁵ Vatyí cha cuenda ra Cristo, nyehé xaan ndi tindocho ta suri cha cuenda ra Cristo naquehén ndahvi xaan Nyoo chi ndi.

⁶ Tatu nyehé ndi tindocho cha cuenda cha sacotó ndi tuhun ra Cristo chi ndo, soco cha cuenda cha vaha chi ndo cuví vatyí tyicuan ta Nyoo naquehen ndahvi tucu ra chi ndo, ta sacacu ra chi ndo. Ta tatu Nyoo ta sandunyeé ra iñi ndi, cuví tucu chi cha cuenda cha sandunyeé tucu ra iñi maa ndo ta cacu ndo, ta sñn ri tacuhva cha cunyeé ndo tindocho cha nyehé ndo. Vatyí ñn ri tindocho nyehé yo.

⁷ Vatyí chitó vaha ndi tatu nyehé ndo tindocho cha cuenda ra Cristo tari cha nyehé nyuhu, maa ra cunaquehen ndahvi ra chi ndo, tari naquehén ndahvi tucu ra chi nyuhu.

⁸ Yañi, cuñi ndi tyi coto ndo vatyí cuaha xaan tindocho nyehé ndi ta chinyaa ndi ityi Asia. Ñihi xaan chiyo tindocho nyacua cha ñahri ca fuerza ndi cahvi iñi ndi. Ta tyaá ndi cuhva vatyí cha yaha chihí ndi ta quita ndi yucuan.

⁹ Cuñi maa ndi vatyí cha cha cuacúvi ndi. Ta ña cuví sacacu ndi chi ndi. Soco yucuan sañaha chi chi ndi na nachinó ca iñi ndi chi Nyoo ra sanandotó ndiyi.

¹⁰ Nyoo sacacu ra chi ndi ndaha tuhun chihí quivi cuan, ta sacacú ca ra chi ndi nya vityin. Ta chitó ndi vatyí tyicuan ri cusacacu maa ra chi ndi.

¹¹ Tatu tyinyeé ndo chi ndi chihin cha chicán tahvi ndo chaha ndi, ta tatu cuaha ñáyivi chicán tahvi chaha ndi, cunacuhva ñu tyahvi nyoo chi Nyoo cha cuenda tyi ñihí ñu tuhun tyi Nyoo chahá ra cha vaha chi ndi, vatyí chicán tahvi ñu chaha ndi.

Nu nacatyí ra Pablo ñáá tuhun ña chaq ñaha ra ñuu Corinto

¹² Iyó noo tuhun cha cusñi xaan cuñi ndi, vatyí yoso ri sandaví ñaha ndi. Vatyí cachi cuhva iyó ndi. Ta ndaa cuhva iyó ndi xihna ca chihin tandihí ri ndo, ta chihin inga ñáyivi ñandihí. Ta ñima chihin cha chiñi tuñi maa ndi iyó ndi tyehe caa, soco cha cuenda tyi tyinyeé xaan maa Nyoo chi ndi.

¹³⁻¹⁴ Ta nu tutu cha sacuhún ndi chi ndo, maa maa ri tuhun cha cuví sacuhaha ndo, ta cha cuví cutuñi iñi ndo, tyaá ndi. Vityin cuahán cutuñi iñi ndo suhva. Ta nyatú ndi na cutuñi vaha ca iñi ndo tandihí tuhun cuan. Tacuhva cusñi cuñi ndo chihin ndi quivi quichi Sutu Mañi yo. Ta cusñi cuñi tucu maa ndi chihin ndo.

¹⁵⁻¹⁶ Ta cha cuenda cha cusñi iñi yo tyehe caa, tyají cuhva quivi cuan cha cuhun xihne nu nyicú ndo. Yihí iñi cha cuhin nu nyicú ndo, quivi cha yahí cha cuahín nya Macedonia ihya. Ta quivi cha nayaha tiqui cha chahín Macedonia, cuhin inga chaha nu nyicú ndo. Tyicuan caa ta cuví cusñi iñi ndo chihin yuhu uvi chaha, tyají cuhva. Ta tyicuan caa ta cuví tyinyee ca ndo chii ta cuhin ityi Judea.

¹⁷ O cuñi maa ndo vatyí ña tyají cuhva cha cuhin nu nyicu ndo. Ta vasi cuñi maa ndo vatyí sacuví tari ñáyivi iyó siqui ñuhu

ñayiví ihya. Vatyí catyí ñu tyi cuhun ñu, ta ña sacuví ñu.

¹⁸ Maa Nyoo chitó ra vatyí ndicha cha cahín. Ta ña tuhvé sandavi ñahi.

¹⁹ Vatyí yuhu ta ra Silvano ta ra Timoteo cahán ndi chihin ndo. Vatyí tuhun maa ra Cristo maa maa ri tuhun ndicha cuví.

²⁰ Tyi cha cuenda maa ra ñihí yo tandihí cha vaha cha catyí Nyoo tyi cucuhva ra chi yo. Yucuan chaha cuhva cha sacahnú yo chi Nyoo, o chicán tahvi yo chi ra, catyí yo: “Amén”. Vatyí chitó yo tyi cuacuhva ra cha vaha chi yo cha cuenda ra Cristo.

²¹ Ta Nyoo sanduní ca ra ñi ra nu sandu ñin ri ra chi yo chihin ra Cristo. Ta nacachi ra chi yo.

²² Ta tari cha tyaa ra tuñi ra chi yo cuví cuan. Vatyí chaha ra Tatyí Ii ra quihí aña yocha cuenda cha cuñihi ca yo ñáa ca cha cucuhva ra chi yo.

²³ Na naquehen Nyoo chii vityin ri tatu ña ndicha tuhun cua catyí chi ndo. Ta cuhun que nu nyicú ndo Corinto chiña vatyí tatu cuhin tyaí cuhva cha cahin chiin chi ndo. Yucuan chaha ña cuñí ñahi cuhin vatyí nacuaan ñi nyehí chi ndo. Ta Nyoo chiñí ra vatyí ndicha cha cahín.

²⁴ Ñima cha cuñí ndi cunyaca ñaha ndi chi ndo yoso cuhva chinó ñi ndo chi Nyoo. Vatyí chinó vaha ñi ndo. Soco cha cuñí ndi tyinyeé ca ndi chi ndo na coo ca tusí ñi maa Nyoo aña ndo.

2

¹ Yucuan chaha ña cuñí quichi tiqui nu nyicu ndo coto cuhva que tucuihya ñi chi ndo.

² Vatyí tatu yuhu ta sanducuihyé ñi ndo, yori ca cuví sandusí ñi mai. Vatyí ma cuví ca sandusí ndo ñi tatu cha yaha sanducuihyé ñi ndo.

³ Yucuan chaha sacuhin tuhun cuan chi ndo. Vatyí tatu cuhin soco ma sanducuihya ndo ñi chihin cuhva iyó ndo. Vatyí tahán chi sandusí ndo ñi. Ta tatu sí cuñí yuhu, chité tyi tandihí yo ta cusí ñi yo.

⁴ Quiví cha tyai carta cuan chi ndo, chica xaan xiñi. Ta nducuihya xaan ñi nyacua chaquí. Soco ñima cha sacuhin carta cuan chi ndo vatyí cuñí cha nducuihya ñi ndo.

Soco vatyí coto ndo vatyí yaha xaan cuñí chi ndo.

Nu chahá ra Pablo tuhun chi ñu yoso caa saha ñu ticahnu ñi

⁵ Tucuihya ñi cha chaha ra chiña, ñima ñin ri chi yuhu chaha ra. Chaha tucu ra chiin chi tandihí nyoho ñandihí. Catyí tyehe caa tacuhva cha ma yaha xaan cahín.

⁶ Vaha ri, cha iyó vaha. Ma cahan ca ndo chi ra. Ma tachi tuñi ca ndo chi ra.

⁷ Ta vityin tahán chi vatyí saha ndo ticahnu ñi chi ra. Ta naquehén ndahvi ndo chi ra, coto yaha xaan nducuihyá ñi ra.

⁸ Yucuan chaha catyí chi ndo sañaha ndo cha cuñí ndo chi ra.

⁹ Sacuhin carta cuan chi ndo quiví cuan vatyí cuñí cote tatu sacuví ndo cuhva chahí chi ndo.

¹⁰ Ta vityin tatu sahá ndo ticahnu ñi, sahá tucu yuhu ticahnu ñi yóo cha chahá tisihí chi yo. Tatu ndicha cha chahá ra tisihí chii. Soco sahá ticahnu ñi chi ra cha cuenda cha vaha chi nyoho. Vatyí yucuan cuhva cuñí maa ra Cristo.

¹¹ Vatyí chitó yo vatyí tatu ma saha yo ticahnu ñi chi tahan yo, cuihna cutyihí ra cha quiñi caa aña yo. Vatyí maña xaan ra. Ta cuví sacañi tahan ra chi yo.

Ña ndoo ra Pablo ñuu Troas vatyí ña nañihi ra chi ra Tito

¹² Quiví chají ñuu Troas cha cuacahin tuhun ra Cristo, chahá chi cuhva cha sahá tyiñe tyiño nuu Sutu Mañi yo yucuan.

¹³ Soco ña sí maa cuñí añaime. Vatyí ña nañihi chi yañi yo, ra Tito. Yucuan chaha ña ndoo que ñuu cuan cahin chihin ñu. Ta vachi ityi Macedonia ihya.

Cahán ra Pablo tuhun ra Cristo chihin cha ñi ñi ra

¹⁴ Soco tyahvi nyoo chi Nyoo vatyí tyicuan ri sahá ganaa yo chihin fuerza ra Cristo Jesús. Vatyí sacotó yo tuhun ra chi ñáyiví. Ta tuhun ra cha cahán yo, cuví chi tari noo xico vixi chahan cha caña tandihí ri ityi nu cuahán yo.

¹⁵ Ta yóo cuví yo tari noo xico vixi cha chahá cuenda ra Cristo chi Nyoo. Ta caña xico cuan mahñu ñu cha cacu añaime, ta mahñu ñu cha ma cacu añaime ñandihí.

¹⁶ Soco cha cuenda ñu cha ma cacu añaime cuan, quiñi chahán, tari noo xico ndiyí cuví

tuhun cha sacotó yo chi ñu, cuñí maa ñu. Vatyí sacotó yo yoso caa cucuvi ñu vatyí ña chinó iñi ñu chi ra Cristo. Soco cha cuenda ñu cha cacú añima, vixi xaan chahán, Vatyí sacotó yo yoso caa coo ñu ñayiví cha ma naa ca maa. Soco ¿yóó cha cuví sacuvi tyiño ihya?

¹⁷ Nyuhu ña sacuví ndi tari sacuví cuaha ra cachicá noo. Ra cuan cuñí ra xuhun. Tuhun ra Cristo ñima noo cha xicó yo cuví. Soco cahán ndi chihin cha ñi iñi ndi tuhun ra vatyí ñn ri cuví ndi chihin ra, ta Nyoo ta ra Cristo tachí ra chi ndi.

3

Tuhun chaa cha quichi cacun ra Cristo

¹ Ta cha cahán ndi tuhun ihya, ¿atu cha cuñí ndi sayaa ndi chi ndi, cuñí maa ndo? Ñima tyicuan caa. Ta yoó ¿atu chiñuhú cha cuiso yo tutu cha catyí chi vatyí vaha ñayiví cuví yo, tari tuhva inga ra canyiso? Ñima.

² Vatyí nyoho cuví ndo carta ndi cha tyaa Nyoo añima ndi. Vatyí cuví nyehe ñayiví yoso caa nasamā Nyoo cuhva iyó ndo. Ta coto ñu tyi maa maa ri cha vaha sañahá ndi chi ndo.

³ Ta cachi nyehé ñu tyi cuví ndo carta cha tyaa ra Cristo vatyí nyehe ñu, ta nyuhu nacuhva cuenda ndi carta cuan chi ñu. Ta ñima chihin tinta tyaa Tatyí Ii Nyoo nyitó añima ndo. Ta ni ñima nu yuu chicunyaa.

⁴ Cahán ndi tyehe caa vatyí chitó ndi vatyí Nyoo cuacuhva ra cha quita vaha tyiño sahá ndi. Vatyí tyinyeé ra Cristo chi ndi.

⁵ Ma caña iñi ndi caca xiñi ndi tyi iyó tunyee iñi maa ndi cha sacuví ndi ñáá cha sacuví ndi. Soco tandihí cha sacuví ndi maa Nyoo sacuví.

⁶ Maa Nyoo chahá ra tunyee iñi ra chi ndi, ta sacotó ndi tuhun chaa cha natyihí tahan ra tuhun chihin yo. Vatyí Tatyí Ii ra chahá ñayiví chaa coo yo. Ta ley chahnu cuan cha chahā Nyoo chi ra Moisés, sacuhún chi chi yo anyaya vatyí ña cuví quichaha yo tandihí ley cuan.

⁷ Ley chahnu cuan, chicunyaa chihin letra chata yuu ta cha naha. Ta cuhva cha chaā ra Moisés chihin cuan, tyaquí xaan xiño nuu ra nyacua nayuhví ñu Israel nanyehē ñu nuu ra. Soco suvita ri tyi cha

tyaquí cuan numi ri ndihí. Soco tatu tyaquí cuví cuan,

⁸ tyaquí ca cuví tuhun chaa cha quichí nyaca Tatyí Ii Nyoo chi yo. Tyaquí xaan ca cuan.

⁹ Tatu ley chahnu cha sacuhún chi yo anyaya, tyaquí xaan cuví, nyaca cuví tuhun cha saváha chi yo nuu Nyoo. Tyaquí xaan ca cuví cuan.

¹⁰ Vatyí ley chahnu tyaquí xaan cuví quiví cuan, cuñí maa ñayiví. Soco vityin chitó yo tyi ña tyaquí xaan cuví. Vatyí tyaquí xaan ca maa tuhun ra Cristo cha sacacú chi yo nuu Nyoo.

¹¹ Vatyí tatu tyaquí xaan cuví cha ñn yaha ri chiyó, nyaca cuví noo cha ma ndihí ca maa.

¹² Chitó ndi tyi ma naa cuan. Yucuan chaha cahán ndi chihin cha ñi iñi ndi. Ña cahán nuu ndi ta ña yuhví ndi.

¹³ Ña sacuví ndi tari sacuví ra Moisés. Vatyí chasí ra nuu ra chihin noo sahma, tacuhva cha ma nyehe ñu Israel nu cunaa cha xiño cuan.

¹⁴ Soco quiví cuan ña cutuñí iñi ñu. Ta nyacua nya vityin ta ña cutuñí iñi ñu. Vatyí tatu sacuahá ñu ley cuan tari quiví cha nyasí nuu ñu. Vatyí ña cutuñí iñi ñu. Soco noo tuhun ri maa ra Cristo nuñá ra nuu yo.

¹⁵ Ta nyacua nya vityin tatu sacuahá ñu Israel ley ra Moisés, ña cuví cutuñí iñi ñu. Vatyí tari noo cha nyasí nuu ñu.

¹⁶ Soco tatu nacuhvá ñu añima ñu chi Sutu Mañi yo, maa ra cunuña ra nuu ñu.

¹⁷ Vatyí Sutu Mañi yo, Tatyí Ii cuví ra. Ta tatu nyaá Tatyí Ii Sutu Mañi yo añima yo, sacotó ra chi yo tyi ña nyacá ñaha ca ley chahnu chi yo.

¹⁸ Yucuan chaha tandihí yo ña nyasí ca nuu yo. Ta vityin cuví yo tari noo ino, tacuhva cuví nyehe ñayiví cha vaha Sutu Mañi yo. Ta cuahán nduvaha ca yo yoso cuhva sacuví Tatyí Ii Sutu Mañi yo chi yo.

4

¹ Yucuan chaha ma ndu uvi maa iñi ndi, vatyí Nyoo nyehé ndahvi ra chi ndi. Ta tyaa tyiño ra chi ndi tyi cahan ndi tuhun ra chihin ñayiví.

² Ña sacuví ndi cha xehe vatyí ticahan nuu cuví cuan. Ña chicá noo ndi sandaví

ñaha ndi chi ñáyiví. Maa maa ri tuhun Nyoo sañahá ndi. Ña nasacá noo ndi tuhun Nyoo chihin inga tuhun. Soco chihin nuu Nyoo chacú ndahvi ndi nuu tandihí ñáyiví, na saha vaha ñu cuenda vatyi maa maa ri cha ndicha sañahá ndi.

³ Nyuhu ña tyihí xehe ndi tuhun Nyoo. Soco cha cuenda chi ñu cha cua cunaa ñohó xehe.

⁴ Cuihna, ra nyacá ñaha cha quiñi caa ñuhu ñayiví ihya, ican ra chasí cha chiñi tuñi xiñi ñu cha ña chinó iñi chi Nyoo. Vatyi coto nyehe ñu cha ndichin Nyoo. Ta coto cutuñi iñi ñu yoso caa sacacú ra Cristo chi yo. Vatyi ra Cristo nyitó ra ta cuví ra xiñahñu Nyoo.

⁵ Cuhva cha cahán ndi chihin ñáyiví, ña cahán ndi tuhun maa ndi. Soco sacotó ndi tyi ra Jesucristo cuví ra Sutu Mañi yo. Ta nyuhu cuví ndi noo musu ndo cha catyi cha cuñí ndi chi ra.

⁶ Vatyi suri maa Nyoo catyi vatyi na ndundichin nu ñaa iñi quiñi chinó ñuhu ñayiví. Ican ra chahá ra cha ndichin coo añima yo, tacuhva vatyi chihin cha ndichin cha chahá ra Cristo chi yo, cuví cutuñi ca iñi yo tyi cahnu xaan ca cuví maa Nyoo.

Chihin cha chinó ri iñi yo chi Nyoo coo yo noo ñayiví chaa

⁷ Coño ñuhu yo cuví tari noo quisí ñuhú, vatyi noo cha ñima ri tuhun cuví. Vatyi tyicuan caa ta cuví nyehe ñáyiví tunyee iñi cha cahnu xaan cha iyó chi yo, maa Nyoo chahá, ta ñima tunyee iñi maa yo cuví.

⁸ Yucuan chaha vasi iyó tisihi tandihí ri ityi nu cuahán ndi, soco ña ndu uví iñi ndi. Vasi ña cutuñí iñi ndi tandihí cha cuví chi ndi, soco chitó ndi tyi quitá vaha ndi.

⁹ Vasi chicá nyicon ñu chi ndi soco ñima maa ri maa ndi nyicu. Vatyi Nyoo nyaá ra chihin ndi. Vasi cha chacun taxin ñu chi ndi soco ña chihí ndi.

¹⁰ Tandihí ri ityi nu cuahán ndi ta nyatú ndi tuhun chihí cha catyi tuhun ra Jesús. Vatyi yucuan cuhva nyehé ñu tyi iyó ndi ñayiví chaa cha chahá ra chi yo.

¹¹ Vatyi nyuhu tandihí quiñi, cha yatyin cuví ndi cha cuenda ra Cristo tacuhva cuví nyehe ñáyiví vatyi yihí ñayiví ra Cristo añima ndi.

¹² Nyatú ndi tuhun chihí cha cuenda cha cahán ndi tuhun Nyoo. Soco cha tyehe caa, nañihí ndo ñayiví chaa.

¹³ Chinó iñi ndi chi Nyoo tari chinó iñi ra David. Ta tyaa ra nu libru Salmos: “Chinó iñi chi Nyoo, yucuan chaha cahín tuhun ra”, catyi ra David. Ta tyicuan caa tucu nyuhu. Chinó iñi ndi chi Nyoo. Ta yucuan chaha cahán ndi tuhun ra.

¹⁴ Vatyi chitó ndi vatyi Nyoo ra sanandoto chí Sutu Mañi yo Jesucristo, cusanan-doto tucu ra chi yo. Ta ñin ri chihin nyoho, cunyaca ra chi yo nya gloria nu nyaá ra.

¹⁵ Tandihí ihya cuví cha vaha chi maa ndo ta chi inga ñáyiví. Vatyi cuaha cha vaha Nyoo cuñihi ndo. Ta cuaha ndo nacuhvá ndo tyahvi nyoo chi ra, ta sacahnú ndo chi ra.

¹⁶ Yucuan chaha ña ndu uví maa iñi ndi. Vasi coño ñuhu ndi cha cuahán sandihí xaan chi. Soco ñayiví chaa cha iyó ndi cuahán nduchaa chí tahan tahan quiñi.

¹⁷ Tindoho cha nyehé ndi ñayiví ihya, tindoho ñin yaha ri cuví. Vatyi chahá chí cha cunañihi ndi noo nu vaha ca cha ma ndihí maa nu nyaá Nyoo.

¹⁸ Vatyi ñima cha cuví nyehe yo sahá ndi cuenda. Sahá ndi cuenda soco cha ña nyehé yo. Vatyi cha cuví nyehé yo ñayiví ihya, ña naha maa chiyo. Soco cha ña cuví nyehé yo, yucuan cuví cha ma ndihí ca maa.

5

¹ Ta chitó ndi vatyi quiñi cuví yo, coño ñuhu yo cunaa chi. Vatyi cuví chí tari noo vehe cha ña naha maa chiyo. Soco Nyoo cumí ra noo nu cunyaa añima yo, noo cha ma naa ca maa nya andiví. Ta ñima cha cacú chihin ndaha rayi ñayiví ihya cuví.

² Ndicha, cha ni ri ca cha iyó yo chichi coño ñuhu yo, nducuihyá xaan cuñi yo, vatyi nyatú tuhva yo nicoo yo chichi cha chahá Nyoo chi yo nya andiví.

³ Vatyi cohon añima yo chichi cha chahá Nyoo tacuhva cha ma cuvityiaá yo.

⁴ Cha ni ri ca cha iyó yo chichi coño ñuhu yo cha cuví tari noo vehe ri, nducuihyá iñi yo vatyi ña cuñi yo quita ri maa añima yo chichi coño ñuhu cuan ta cuvityiaá chí. Soco cuñi yo cha coo añima yo chichi cha

ma naa ca maa nya andiví ta tyicuan ri maa cuacoo yo.

⁵ Ta Nyoo tyaa ra cuhva vatyí tyehe caa cucuvi chí yo. Ta chahá quíyí ri ra Tatyí lí ra chí yo. Vatyí tacuhva coto yo tyí cuví naquehen ca yo tandihí ca cha cuacuhva ra chí yo.

⁶ Ta yucuan chaha ma yuhví yo cha cúví yo. Vatyí chitó yo tyí cha ní ri ca cha iyó yo chichí coño ñuhu ihya ñáyiví, ña yatyín nyaá yo chihin Sutu Mañi yo andiví.

⁷ Vityín ña cuví nyehe yo chí ra, soco chihin cha chiño ri ñi yo chí ra, iyó yo ñáyiví ihya.

⁸ Soco yihí vaha ñi yo chí ra ta cha cuñí yo quita yo chichí coño ñuhu ihya vatyí cahun yo cucunyaa yo chihin Sutu Mañi yo.

⁹ Yucuan chaha sañihi ca ndi nducú ndi cuhva yoso caa cha tahan ñi Sutu Mañi yo sacuví ndi. Cuví ri cha iyó ca ndi chihin coño ñuhu ñáyiví ihya. O cuví ri cha yori ca ndi, vatyí cha nyaá ndi chihin Sutu Mañi yo nya andiví.

¹⁰ Vatyí tahan tahan yo ta cahun yo nuu ra Cristo cucuhva yo cuenda nu nyaá cutuñi chí yo nuu ra. Ta cuñihi yo cha tahan chí chí yo, yoso cuhva cha vaha o cha ña vaha cha sacuví noo noo yo quíyí chíyo yo chihin coño ñuhu yo ñáyiví ihya.

Nu sacotó ra Pablo yoso caa nicoo vaha yo chihin Nyoo

¹¹ Vatyí chitó ndi vatyí Sutu Mañi yo cutachi tuñi ra chí ndi tatu ma sacuví ndi tuhun cahán ra. Yucuan chaha nducú ndi cuhva cahán ndi chihin ñáyiví na nacuhva cuenda ñu chí ñu chí Nyoo. Ta Nyoo chitó ra vatyí tyicuan ri sacuví ndi. Ta chitó tucu maa ndo ñandihí.

¹² Ñima cha cuñí ndi cuyaa ndi chihin cha cahán ndi tyehe caa, soco cha cuñí ndi vatyí nicohón ñi ndo vatyí tuhun ndicha sacotó ndi, ta cuví cusí ñi ndo chihin ndi. Ta cuñihí ndo cuhva cahán ndo chihin inga ra cha sacahnú chí. Catyí ra tyí vaha iyó ra, soco ñima cha ndicha caa añima ra.

¹³ Tatu ña vaha cuñí xiñi ndi, cuñí maa ñáyiví tyí cahín tuhín tyehe caa, soco cha cuenda maa Nyoo. Soco tatu vaha cuñí xiñi ndi, ta cachi tuhun cahán ndi, soco cha cuenda tyí cuñí ndi tyinyeé ndi chí ndo.

¹⁴ Soco saníñi ndi chí ndi cha sacotó ndi tuhun ra Cristo chí ñáyiví. Vatyí chitó ndi tyí cuñí xaan ra chí ñu. Ta chitó ndi tyí chíhí ra cha catyí cuatyí tandihí cuii maa ñáyiví. Ta yucuan chaha chíhí tucu yo cha ma sacuví ca yo cha ña vaha cha chinyacuví yo nu quichí chí.

¹⁵ Ra Cristo chíhí ra cha catyí tandihí yo vatyí tacuhva cha ma coo ca yo cuhva cuñí maa yo. Coo yo soco cuhva cuñí maa ra. Vatyí chíhí ra ta nandoto ra cha cuenda yo.

¹⁶ Cha cuhva cha vityín, tatu nyehé yo chí noo ñáyiví, ma caca xiñi yo nyehe yo chí ñu tari chicá xiñi ñáyiví cha ña ñohó nuu chí Nyoo. Noo quíyí tyicuan caa chicá xiñi vatyí ra Cristo cuví ra noo ra ñuhu ñáyiví ri. Vityín ña chicá ca xiñi tyicuan caa.

¹⁷ Vatyí quíyí nacuhva cuenda yo chí yo chí ra Cristo, maa ra sanduchaa ra añima yo. Ta tandihí tuhun cha chicá xiñi yo nu quichí chí, ña chicá ca xiñi yo vityín. Vatyí maa ra nacuhva ra nonga cha chíhí tuñi chaa chí yo.

¹⁸ Ta tandihí ihya maa Nyoo sacuví, vatyí sanícoo vaha ra chí yo chihin ra cha cuenda maa ra Cristo Jesús. Ta catyí ra chí yo vatyí na sacoto yo chí ñáyiví vatyí Nyoo cuñí ra cha nicoo vaha ñu chihin ra.

¹⁹ Vatyí chihin cha chíhí ra Cristo cha catyí cuatyí yo, ñáyiví nicoo vaha ñu chihin Nyoo. Ta Nyoo sahá ra tuhun tyí ñahri ca cuatyí ñu. Ta chí nyuhu, catyí ra vatyí sacotó ndi tuhun ihya chí ñu.

²⁰ Ta vityín cuví ndi ra chicá tyiño ra Cristo. Ta tari cha maa Nyoo chacú ndahví nuu ndo, vatyí tyiño maa ra chicá ndi. Ta yucuan chaha chacú ndahví ndi nuu ndo chihin sívii ra Cristo, na nicoo vaha ndo chihin ra.

²¹ Ra Cristo ña sacuví ra ní minoo cuatyí. Soco Nyoo tachí ra chí ra síqui ñuhu ñáyiví ihya, quichí cúví ra tari noo ra iyó cuatyí cahnu. Tacuhva vatyí cuví sacacu ra chí yo. Ta cha cuenda maa ra Cristo saha Nyoo tuhun tyí vaha yo nuu ra.

6

¹ Yañi, ñi ri tyiño Nyoo sacuví yo. Yucuan chaha chacú ndahví xaan ndi nuu ndo vatyí ma coo ndo tari cha ña ñohó nuu ndo

Nyoo. Cotyiño ndo tandihi cha vaha cha chahá ra chi noo noo ndo.

² Vatyí catyí Nyoo nu tutu tyehe caa:

Quiví tahañ chi tyi sacaqui chuun, yuhu chiñi nu cahun ta tyinyeñ chuun, catyí Nyoo.

Saha ndo cuenda tyi vityin cuví quivi tahañ chi. Vityin cuví quivi sacacú Nyoo chi yo.

³ Nducú xaan ndi cuhva cha ma nyehe nyaa ñáyivi tyiño Nyoo cha sacuví ndi, coto ma chino iñi ñu chi Nyoo.

⁴ Soco cuñí ndi vatyí nyehé ñu vatyí ndicha cha cuví ndi musu Nyoo vatyí cunyeé ndi ñáá ndihi cha cuví chi ndi, tandihi tindoho, tandihi tisihi.

⁵ Vasi cañi ñáyivi chi ndi, vasi tyihí ñu chi ndi vehe caa, vasi canachaá ityi ñu siqui ndi, soco cunyeé xaan ndi. Ta ñihi xaan sahá tyiño ndi nyacua ña quixí ndi. Ta yahá ndi soco.

⁶ Ta tandihi maa ihya cunyeé ndi vatyí ndicha ndicha cuii cha cuví ndi musu Nyoo. Yucuan chaha cachi iyó ndi. Ta chitó ndi cha ndicha. Ta cunyeé ndi chihin cha ña chihí ndi tisihi tandihi cha cuví chi ndi. Ta vaha ñáyivi cuví ndi. Ta cuñí ndi chi ñáyivi. Ta nyaá maa Tatyí Ii Nyoo chihin ndi.

⁷ Cahán ndi maa ri tuhun ndicha maa Nyoo. Ta nyaá fuerza ra chihin ndi. Ta chotyíño ndi tandihi cha vaha cha chahá maa ra chi ndi, tacuhva cuví chasaha ndi chi ra ña vaha.

⁸ Iyó quivi cuñí nyehe ñáyivi chi ndi. Ta iyó quivi ña cuñí nyehe ñu chi ndi. Iyó quivi vaha cahán ñu siqui ndi. Ta iyó quivi quiñi cahán ñu siqui ndi. Iyó chaha catyí ñu vatyí ra cuendu cuví ndi. Soco maa maa ri cha ndicha cahán ndi.

⁹ Sahá ñu chi ndi tari noo ra ña ñohó nuu ñu. Soco ñu yihí vaha cuenda Nyoo ñohó nuu vaha ñu chi ndi. Iyó quivi cha yatyin ri cúvi ndi, soco iyó ca ndi. Ta iyó quivi tachí tuñi ñu chi ndi, soco ña chihí ndi.

¹⁰ Vasi iyó quivi cha nducuihyá iñi ndi, soco tyicuan ri si cuñí ndi. Vatyí tyiño Nyoo sacuví ndi. Vasi ndahvi ndi, soco cuaha ñáyivi ñihi ñu cha vaha chihin tuhun cha chahá Nyoo chi ndi. Vasi ñahri maa iyó chi ndi, soco iyó tandihi cha vaha Nyoo chi ndi.

¹¹ Cahán ndi chihin ndo yañi, cha cuví ndo ñáyivi ñuu Corinto chiña. Catyí cachi ndi chi ndo chihin cha ñi ña ñima ndi vatyí ndicha cha cuñí ndi chi ndo.

¹² Nyuhu, ña quiñi cuñi ndi nyehe ndi chi ndo. Maa ndo cuví ñu ña vaha cuñi nyehe chi ndi.

¹³ Chacú ndahvi ndi nuu ndo tari chacú ndahvi noo rayi nuu sehe ra, nuña ndo ñima ndo, ta ma quiñi cuñi ndo nyehe ndo chi ndi, vatyí maa ndi ña quiñi cuñi ndi nyehé ndi chi ndo.

Cuví yo vehe Nyoo vatyí ñohó ra ñima yo

¹⁴ Ma ndu ñin ri ndo chihin ñu ña chinó iñi chi Nyoo. Vatyí ña nacachí tahañ ñima ndo chihin ñu cuan. Vatyí cha vaha ma cuví ndu ñin ri chihin cha ña vaha. Ta cha ndichin ma cuví ndu ñin ri chihin cha ña iñi.

¹⁵ Vatyí ra Cristo ña ndu ñin ri ra chihin ra cuví cuihna. Ta tyicuan caa tucu ñu chinó iñi chi ra Cristo, ña nacachí tahañ chi tatu ndu ñin ri ñu chihin ñu ña chinó iñi chi ra.

¹⁶ Ña chahá chi cha sacahnú yo Nyoo ta sacahnú tucu yo chi cha cuví xitohyo. Vatyí maa yo cuví yo vehe Nyoo nyitó. Tari catyí maa ra tuhun ihya ta cha naha:

Coi ta caca noi chihin ñu.

Ta yuhu cucuvi Nyoo ñu,

ta maa ñu cucuvi ñu ñáyivi chii, catyí Nyoo.

¹⁷ Yucuan chaha catyí tucu ra quivi cuan:

Quita ndo mahñu ñu ña chinó iñi chii.

Ta ma cutahan ndo chihin ñu.

Ta ma sacuvi ndo cha ña vaha.

Tyicuan ta cunaquehin chi ndo.

¹⁸ Ta sutu ndo cucuvi chii.

Ta maa ndo cucuvi ndo sehi, catyí Sutu Mañi yo, ra iyó tandihi tunyee iñi chii.

7

¹ Ican ihya cuví cha chahá Nyoo chi yo. Yucuan chaha yañi, cuñí chi nducu yo cuhva cuvaha yo nuu Nyoo. Ma sacuvi yo cha quiñi caa ni ri ma caca xiñi yo cha ña vaha. Na ndu cuiti coo yo vatyí sahá yo ñáyivi chi Nyoo.

Nu nacatyí ra Pablo yoso caa nasama ñu cuhva iyó ñu

² Yañi, chacú ndahvi ndi nuu ndo, na cuvaha coo iñi ndo nyehé ndo chi ndi vatyí ñahri cha sacuvi ndi chi ni noo ndo. Ta ni ña

sativí ndi chi ndo. Ni noo ndo ta ña sandaví ñaha ndi chi ndo.

³ Cha catyí chi ndo tyehe caa ñima cha cahín chi ndo. Vatyí cha yaha catyí tiquí chi ndo ta ityí chata ca, vatyí ndicha cha cuñí chi ndo. Vatyí ñin ri ñu cuví yo chihin Nyoo. Tatu iyó yo soco ñin ri cuví yo. O tatu cúvi yo soco ñin ri cuví tucu yo.

⁴ Ñahri maa cha chica iñi chihin nyoho. Sii xaan cuñí nyehi chi ndo. Ta yucuan chaha vasi nyehé ndi tindoho ihya, cuní ca iñi ndi. Ta cusii xaan ca cuñi ndi.

⁵ Nya quiví chaá ndi Macedonia ihya, ta ta nyitatu ca maa ndi. Vatyí cuaha xaan tisihi ta tindoho nyehe ndi tandihi ri ityí chahan ndi. Ta cañi tahan ñu chihin ndi. Ta yuhví ndi.

⁶ Soco Nyoo, tyicuan ri sanduní ca ra iñi yo tatu cuihyá cuñi yo. Ta sanduní ra iñi ndi cuhva cha chaá ra Tito.

⁷ Ta ñima cha cuenda cha chaá ri ra. Soco cha cuenda cha nduní iñi ra sahá nyoho. Nacatyí ra chi ndi vatyí cuñí xaan ndo nyehe ndo chi ndi. Ta chacu xaan ndo cha cuihya iñi ndo. Ta cuñi ca ndo chii, na. Ta cha cuenda cuan ndusii xaan ca cuñí vityin.

⁸ Soco quiví cuan chicá xaan xiñi vatyí चाहि tucuihya iñi chi ndo chihin tutu cha sacuhin chi ndo. Ta ndu uví iñi cha sacuhin tutu cuan chi ndo. Soco suhva ri quiví, nducuihya iñi ndo. Ta vityin ña chicá ca xiñi cha cuenda tucuihya iñi cha चाहि chi ndo.

⁹ Ta vityin cusii xaan cuñí, ñima cha cuenda tucuihya iñi cha chiyó ndo, soco cha cuenda vatyí tucuihya iñi cuan sanandichí chi ndo ndaha Nyoo. Nyoho cunyeé ndo tucuihya iñi cuan yoso cuhva tahán iñi Nyoo, yucuan chaha cha vaha sacuví ndi chihin ndo chihin tucuihya iñi cuan.

¹⁰ Iyó tucuihya iñi cha maa Nyoo चाह, tacuhva ndu uvi iñi yo cuatyí yo ta nañihi yo ityí vaha cuhun yo nu nyaa ra. Ta ña tahán chi cha cuxaán yo chi Nyoo cha cuenda cuan. Soco tucuihya iñi cha iyó chi ñu cha ña ñohó nuu chi Nyoo, ñima tucuihya iñi chi Nyoo cuví cuan. Vatyí ña tyinyeé chi chi ñu tacuhva cha ma cuhun ñu anyaya.

¹¹ Nyoho cunyeé ndo tucuihya iñi yoso cuhva tahán iñi Nyoo. Soco vityin nyehé ndo vatyí cuaha xaan cha vaha nañihí ndo cuenda cha cucuihya iñi ndo. Ta sandaa vaha ndo tyiño ra cuan. Cuxaán ndo chi ra. Ta nyacua cuñi ndo tachí tuñi ndo chi ra. Tandihí cuan, ta nayuhví ndo chi Nyoo. Ta nacatyí vaha ndo yoso caa cuahan. Yaha cuan ta nyacua quichí cuvi iñi ndo nyehe ndo chii. Ta cha cuenda cha sacuví ndo tari cuhva cuñi Nyoo, cuñi chi catyí vatyí ñahri cuatyí ndo cha cuenda cuan.

¹² Yucuan chaha quiví sacuhin carta cuan chi ndo ñima cha cuenda cha chicá xaan xiñi cuenda ra cha sacuví cuatyí cuan. Ta ni ñima cuenda ra cha nyehe tisihi cuan. Soco cha cuenda maa ndo, vatyí cuñi tyi coto ndo yoso cuhva chicá xiñi ndo tuhun ndi nuu Nyoo vatyí cuñi ndo tyinyeé ndo chi ndi.

¹³ Yucuan chaha nduvaha cuñi añima ndi. Ta sii xaan cuñi ndi vatyí chitó ndi tyi cuñi ndo chi ndi.

Ta sii ca cuñi ndi cha nyehé ndi vatyí chaha xaan ndo tunyee iñi añima ra Tito. Vatyí vaha xaan tyiñuhu ndo chi ra.

¹⁴ Catyí chi ra Tito cha cumañi ca cuhun ra nu nyicú ndo vatyí vaha cutyasoho ndo tuhun cha sacuhin chihin ra. Ta vityin sii cuñi vatyí chinó cava tuhun cahín chihin ra. Maa maa ri cha ndicha cahín chihin ndo. Ta tyicuan caa ndicha tucu tuhun cha catyí chi ra Tito.

¹⁵ Ta cuñi xaan ra chi ndo vatyí nicohón iñi ra vatyí nyoho sacuví ndo tandihí cuií cha catyí ra chi ndo. Ta cuhva cha chaá ra, ndahvi sahá ndo chi ndo nuu ra. Ta vaha xaan cahan ndo chihin ra. Ta vaha xaan quichaha ndo chi ra.

¹⁶ Ta sii xaan cuñi vatyí chité tyi tyicuan ri sacuví ndo cha vaha.

8

Tahán chi tyinyeé yo chi ñu yihí cuenda Nyoo chihin cha iyó vaha iñi yo

¹ Ta vityin yañi, cuñi ndi nacatyí ndi chi ndo vatyí cuaha xaan tyinyee Nyoo chi ñu yihí cuenda ra, ityí Macedonia ihya.

² Vasi cuaha xaan tindoho nyehé ñu, soco sii xaan ca cuñi ñu chihin Nyoo. Ta vasi

ndahvi ñu soco cuaha cha iyó chi ñu chahá ñu, tari maa cha tyayii ñu.

³ Ta yuhu cuví noo cha ndaa vatyi nyehi tyi chihin cha iyó vaha iñi ñu chahá ñu yoso cuhva cha iyó chi ñu. Ta nyacua yaha ca chahá ñu.

⁴ Chacú ndahvi xaan ñu nuu ndi tyi nacuhvá ndi cha tyinyeé tucu maa ñu chi ñu tahan yo nya Jerusalén.

⁵ Cuaha ca sacuvi ñu cha nuu cha yihí iñi ndi. Vatyi cha xihna ca cha sacuvi ñu, nacuhva cuenda ñu chi ñu chi Nyoo chihin cha ñi vaha iñi ñu. Ta quichahá vaha ñu tuhun Nyoo cha sacote chi ñu, vatyi yucuan cuhva cuñí maa Nyoo.

⁶ Ta cha nyehi tyi tyehe caa chinyacuvi ñu Macedonia ihya, yucuan chaha catyi chi ra Tito vatyi na sandihi ndihi ra tyiño vaha cha quichahá ra cha nacaya ra xuhun nu nyicú ndo.

⁷ Nyoho vaha xaan sacuví ndo tandihi ri. Chinó xaan iñi ndo chi Nyoo. Vaha xaan sañahá ndo tuhun ra. Ta vaha cutuñí iñi ndo. Ta ñi xaan iñi ndo sacuví ndo tyiño nuu ra. Ta vaha xaan ñáyivi cuví ndo chihin ndi. Ta tyicuan caa tucu tahán chi cha tyinyeé ndo chi ñu ndahvi ñu yihí cuenda Nyoo noo cuhva vaha xaan.

⁸ Ñima tyi catyí chi ndo tyehe caa ta cuñí ndo tyi cha saniñí chi ndo. Soco cha cuñí vatyi nyehé ndo cha vaha cha nyacuví ñu yihí cuenda Nyoo inga ityi. Ta tyicuan caa tucu maa ndo sañahá ndo chi inga ñáyivi tyi ndicha vaha ñáyivi cuví ndo chihin tahan ndo.

⁹ Vatyi cha chitó maa ndo yoso cha cuñí Sutu Mañi yo Jesucristo chi yo. Vatyi maa ra tyayii xaan ra. Soco sandundahvi ra chi ra cha catyi yo tacuhva vatyi cuví sandutyayii ra chi yo.

¹⁰ Chahí tuhun ihya chi ndo cha cuenda cha vaha chi maa ndo. Na sañihi ndo chihin tuhun cha quichahá ndo quiyava. Ñima tacuhva sacuvi ri ndo, soco sacuvi ndo chihin cha iyó vaha iñi ndo.

¹¹ Ta tari chahá ndo chihin cha iyó vaha iñi ndo, tyicuan caa sacuvi tucu ndo vityin. Ta cuhva ndo yoso ri cuhva cha iyó chi ndo.

¹² Vatyi tatu noo ñáyivi ñi vaha iñi ñu, cuñí ñu cuhva ñu yoso ri cuhva cha iyó chi

ñu, Nyoo naquehén ra cha chahá ñu. Vatyi Nyoo ña chicán ra cha ñahri iyó chi yo.

¹³ Ñima cha cuñí vatyi nyehe ndo tindoho cha cuenda cha tyinyeé ndo chi inga ñu tacuhva ma nyehe ca ñu cuan tindoho.

¹⁴ Soco vityin cha iyó chiin chi ndo, tahan chi cha tyinyeé ndo chi ñu ndahvi cuan. Ta inga chaha maa ñu cucuhva cha chiñuhú chi maa ndo. Tyehe caa tahán chi tyinyeé chi tahan ri yo tacuhva tyi ninoo yo ta ni inga yo ma nyehe yo tindoho.

¹⁵ Vatyi tyehe caa catyí chi tuhun Nyoo: “Ra cha cuaha xaan cumí, ña ndoó ca chi ra. Ta ra cha chiin ri cumi, ña cumañí chi ra”, catyí tuhun Nyoo.

Ra Tito chihin ra tahan ra tyaá ra cuhva cahun ra ñuu Corinto

¹⁶ Soco tyahvi nyoo chi Nyoo vatyi chahá ra cha vaha coo añaima ra Tito tyi chicá xiñi ra tuhun ndo tari chicá xiñi yuhu.

¹⁷ Ta quehén ra tuhun cha catyí chi ra cha cahun ra nu nyicú ndo. Tyi cha yihí xaan iñi tucu maa ra tuhun ndo. Ta yucuan chaha vityin vachí ra nu nyicú ndo chihin cha iyó vaha iñi maa ra.

¹⁸ Ñin ri chihin ra Tito tachí ndi chi noo ra yañi yo. Ta vaha xaan hermano cuví ra, ta tyicuan caa catyí tandihi ñáyivi yihí cuenda Nyoo.

¹⁹ Ta siin ri nacachi vaha maa ñu yihí cuenda Nyoo chi ra yañi yo ihya vatyi cahun ra chihin ndi cunyaca ndi xuhun chi ñu ndahvi nya Jerusalén. Ta cuñí ndi sacahnú ndi chí Sutu Mañi yo cha sacuví ndi tyiño ihya. Ta suri sañahá ndi vatyi cuñi xaan ndi tyinyeé ndi chi tandihi ñu yihí cuenda Nyoo.

²⁰ Ta cuñí ndi sacuví ndi tyehe caa tacuhva cha ma quihí yuhu ñáyivi tuhun ndi cha cuenda cha nacayá ndi xuhun cha cuacuhva ndi chi ñu ndahvi.

²¹ Ta nducú xaan ndi cuhva sacuví ndi noo cuhva cachi. Tatu ñáá noo cha cuasacuvi ndi soco chihin cha cachi iyó ndi chihin nuu Sutu Mañi yo ta chihin nuu ñáyivi ñandihí.

²² Ta chihin ra Tito ta inga yañi yo cuan, vachí inga tucu ra yañi yo, vatyi nyehé ndi vatyi ñi xaan iñi ra. Ta vityin yaha ca cuhva, vatyi vaha cuñí ra nyehé ra chi ndo

cha cuenda cha chinó xaan iñi ra tyi cuñí ndo sacuví ndo cha vaha nuu Nyoo.

²³ Tatu yóo cha ndaca tuhun tuhun ra Tito, catyi ndo chi ñu tyi ra tahin cuví chi ra. Ta sahá tyiño ra chihin, ta tyinyeé ra chi ndo chihin tuhun Nyoo. Ta tatu ndaca tuhun ñu tuhun inga uvi ca ra yañi yo ihya, catyi ndo chi ñu vatyí maa ñu yihí cuenda Nyoo saquichí chi ra. Ta vaha xaan sacuvi ra tyiño nuu ra Cristo.

²⁴ Yucuan chaha sañaha ndo chi ra ihya vatyí ndicha ndo cha cuñí ndo chi ra. Tyicuan ta coto tandihí ñu yihí cuenda Nyoo vatyí tahán chi cha cahín tuhun ndo tyicuan caa.

9

Nu chahá ra Pablo tuhun yoso caa cuatyinyee ñu chi ñu ndahvi ñu yihí cuenda Nyoo nya Jerusalén

¹ Ta cuenda xuhun cha nacayá ndo cuenda ñu ndahvi ñu yihí cuenda Nyoo, ña cuñí chi cha sacuhin tuhun chi ndo.

² Vatyí cha chité cha vaha caá aña ndo. Yucuan chaha chihin cha sñi cuñí nacatyí chi ñu ityi Macedonia ihya, vatyí nyoho ñu ityi Acaya, nya ta quiyava quichaha cuñí ndo tyinyeé ndo. Ta cuaha xaan ñu Macedonia cunñi ca iñi ñu cha tyinyeé tucu maa ñu.

³ Soco suvita ri yuhu cutachi chi yañi yo ihya nu nyicú ndo. Vatyí sanumi ndo ta sacaya ndo xuhun, tari cuhva catyí vatyí yihí iñi ndo sacuví ndo. Vatyí tacuhva cha ma catyi ñu Macedonia ihya vatyí ña ndicha cha cahín siqui ndo cha cuenda cuan.

⁴ Vatyí coto cuhun nya noo ra Macedonia chihin, ta nyehe ra vatyí ñahri maa nacayá ndo. Ta cuquehin ticahan nuu cha cuenda cha ñahri cumi ndo. Ta vihi ca maa ndo. Vatyí cha yaha catyí vatyí cuatyinyee ndo.

⁵ Yucuan chaha cuñí mai vatyí vaha cha cuhun xihna ca ra yañi yo ihya nu nyicú ndo tacuhva tyinyeé ra chi ndo cha sacañá tahan ndo xuhun cha yihí iñi ndo tyi cuhva ndo. Tacuhva tyi quiví quichi soco tandihí ta cha iyó vaha. Vatyí cha iyó vaha iñi maa ndo cuví, ta ñima noo cha saniñi ndi chi ndo.

⁶ Ta ñicohon iñi ndo tuhun ihya: Ra cha chiin ri tachí, chiin ri tyiño sahá ra chicoó. Ta ra cuaha tachí, cuaha tyiño sahá ra chicoó.

⁷ Ta tahan tahan yo cuñí chi cuhva yo yoso cuhva quichi cuvi aña yo. Ñima chihin cha ña ñi iñi yo o chihin fuerza. Vatyí Nyoo cuñí ra chi ñu cha chahá chihin cha sñi cuñí.

⁸ Nyoo cuví cuhva ra cuaha, ndihí ndoo ndihí cuiti nuu cha vaha chi ndo. Vatyí tyicuan ta coo tandihí ri cha chiñuhú chi ndo. Ta ndoo ca ta cuví tyinyee ndo chi ñáyivi chihin tandihí ri nuu chiñuhú chi ñu.

⁹ Tuhun Nyoo catyí chi tyehe caa: Minoo ra vaha, chahá ra cha iyó chi ra chi ñu ndahvi.

Ta tumañi iñi cha sacuví ra cuan, yucuan cuví cha ña chinaá nuu Nyoo, catyí chi.

¹⁰ Nyoo chahá ra chiti tachí yo. Ta chahá tucu ra cha cachi yo. Cuhva tucu ra cuaha ca chiti tachi ndo ta cuhva ra cuvaha chi. Ta chihin cha chahá ndo, cusacuvi ra tyi cuaha cha vaha cucunyaa aña ñáyivi.

¹¹ Tyicuan caa ta coo tandihí ri nuu cha tyayí chi ndo, tacuhva cuvi tyinyee ndo chi tahan ndo. Ta maa ñu cuan, cuanacuhva ñu tyahvi nyoo chi Nyoo cha cuenda cha tyinyeé yo chi ñu.

¹² Vatyí cha tyinyeé yo tyehe caa chi ñu yihí cuenda Nyoo, uvi tahan cha vaha sacuví yo. Noo cha chahá yo cha chiñuhú chi ñu. Ta inga cha nacuhvá xaan ñu tyahvi nyoo chi Nyoo.

¹³ Maa ñu cusacahnu ñu chi Nyoo. Vatyí chihin cha tyinyeé ndo chi ñu, nyehé ñu vatyí ndicha cha quichahá ndo tuhun ra Cristo. Ta cuhva ñu gloria chi Nyoo cha tyinyeé xaan ndo chi ñu ta chi tandihí ñáyivi.

¹⁴ Ta cucacan tahvi ñu chaha ndo. Ta cucuñi ca ñu chi ndo cha cuenda cha vaha cha chahá Nyoo chi ñu cha cuenda ndo.

¹⁵ Tyahvi nyoo chi Nyoo vatyí chahá ra noo cha vaha xaan chi yo. Nyacua ña ñihí yo cuhva nacatyí yo.

10

Iyó ityi chi ra Pablo tyi saha ra cuenda chi ñu cha sacotó ra tuhun Nyoo chii

¹ Yuhu ra Pablo chiquén noo tumañi iñi chi ndo chihin cha vita iñi. Tari cha vita iñi ra Cristo. Vatyí yihí ndo catyí ndo vatyí tatu ñáá tuhun sacoté chi ndo chihin tutu, ñihi xaan cahín chihin ndo. Soco tatu nyái chihin ndo, vita xaan cahín, catyí ndo.

² Vaha. Soco quiví cuhin nu nyicú ndo, ma saniñi ndo chii cha cahin chi ndo. Soco chité tyi cuñí chi cha sañahí chi suhva ndo yoso cuhva cha ñihi cahín. Vatyí yihí ndo catyí ndo vatyí sacuví tari sacuví noo ra ña yihí cuenda Nyoo.

³ Ndicha vatyí ñáyiví cuví ndi. Soco ña cañí tahan ndi tari cañí tahan ra ñayiví ihya.

⁴ Vatyí cha xaan cha cañí tahan ndi chihin, ñima cha xaan ñayiví ihya cuví. Soco maa tunyee iñi Nyoo cuví, vatyí cuví chasaha ndi tandihí maa fuerza nyacua nya fuerza tatyí ña vaha.

⁵ Ta tyicuan caa cuví chasaha ndi chi tandihí tuhun cha cahán ñáyiví siqui tuhun Nyoo, ta tandihí cha cahnu sahá chii cha chasi nu quichahá yo tuhun Nyoo. Tandihí cuhva chicá xiñi yo siqui ñuhu ñayiví ihya, chahá yo na cunyaca ñaha ra Cristo vatyí quichahá yo chi maa ra.

⁶ Ta quiví cuquichaha vaha tandihí ndo chi ra Cristo, tatu nya nonga ndo ña cuñí ndo quichahá ndo, tyaá ndi cuhva cha tachi tuñi ndi chi ndo.

⁷ Soco nyoho sahá ndo cuenda cuhva caá ri noo ñáyiví. Ta ña sahá ndo cuenda cuhva caá añima ñu. Ta tatu nya noo nyoho chitó vaha ndo vatyí cuenda ra Cristo yihí ndo, coto tucu ndo vatyí yihí tucu nyuhu cuenda rā.

⁸ Vatyí vasi yaha cuhva cahín, ña tahán chi cha cucahan nui. Vatyí maa Sutu Mañi yo chahá ra ityi chii cha cunyaca ñahi cha cuenda cha vaha chi maa ndo, tacuhva ñihi ca ndo tunyee iñi Nyoo. Ta ñima cha sativí chi ndo.

⁹ Ña cuñí vatyí catyí ndo vatyí sayuhví chi ndo chihin cha cahín nu tutu cha sacuhín chi ndo.

¹⁰ Vatyí yihí ndo catyí ndo vatyí nu tutu cha saquichí chi ndo ñihi xaan cahín chihin ndo. Soco tatu mai chaa nu nyicú ndo cuví noo ra ña ñihí tuhun cahan, catyí ndo. Ta

tuhun cha cahín, maa maa ri tuhun cha ña chiñuhú cuví, catyí ndo.

¹¹ Soco ñu cha catyí tyehe caa cuñí chi cha coto ñu vatyí tari cuhva cahín nu tutu, tyicuan caa cusacuvi tiqui nachai nu nyicú ndo.

¹² Ndicha ña cañá iñi ndi sandu inuu ri ndi chi ndi chihin ra casayaá chi tyi cahán ra tuhun maa ra. Vatyí casacuví ra cha ña tahán chi. Vatyí nyehé ra cuhva chicá xiñi maa ra ta cuhva cuahan inga ra, ta cuñí maa ra tyi vaha cuahan ra. Ta ña cutuñí iñi ra tyi tahán chi nanducú ra cuhva cuñí Nyoo.

¹³ Nyuhu ma sacahnu ndi chi ndi chihin cha ña tahán chi chi ndi. Nyoo cuví ra sañahá ñáá cuví tyiño cha tahán chi cha sacuví ndi. Ta maa ra chahá cha quichi ndi nya nu nyicú ndo Corinto chiña.

¹⁴ Tyehe ta ñima xihna ca ndi sacoto tuhun Nyoo chi ndo, ña tahán chi sahá ndi cuenda chi ndo. Soco tahán maa chi vatyí xihna ca maa ndi chaa ndi nu nyicú ndo chihin tuhun ra Cristo.

¹⁵ Soco nyuhu ña sayaá ndi chi ndi chihin tyiño sahá inga ra. Ña catyí ndi tyi tyiño maa ndi cuví. Soco yihí iñi ndi vatyí cunachino vaha ca iñi ndo chi Nyoo. Tyicuan ta cuví sañaha ca ndi tuhun ra Cristo chi ndo, soco yoso cuhva tahán chi chi ndi.

¹⁶ Ta yihí iñi ndi cha cahan ndi tuhun ra Cristo chihin ñáyiví nya ndihí ñuu nu cañi ca cha nuu nu nyicú ndo chiña, nu ta coto ca ñu tuhun ra. Tacuhva cha ma catyí ñáyiví vatyí cuyaa ndi chihin tyiño sahá inga ra.

¹⁷ Soco tatu nya noo yoó cuñí yo cuyaa yo, na cuyaa yo soco chihin Sutu Mañi yo.

¹⁸ Vatyí nuu Nyoo ña quitá vaha ra catyí tyi vaha maa. Soco tatu cahán Nyoo tuhun noo ra ta catyí ra tyi vaha sacuví ra, ican ra cuan cuví ra quitá vaha nuu Nyoo.

11

Nu chahá ra Pablo tuhun chi ñu Corinto na saha ñu cuenda coto sandaví ñaha ra cuendu chi ñu

¹ Vaha tyehe ta cunyeé ndo chiin cha ñima ri tuhun cha cuacatyí chi ndo. (Vasi ña tahán chi cha sacoté tuhun mai, soco cuñí chi cha nacotó ndo yoso caa cuñí ra

cuan sandaví ñaha ra chi ndo.) Ta yucuan chaha vasi yoso ca caa soco cunyeende cha cuacatyí chi ndo.

² Vatyí cuiñó xain chi ndo. Ta maa Nyoo chahá cha cuiñe chi ndo, vatyí mai ican tyihí chi ndo ityi ra Cristo. Ta cuiñí tyi cuiñí ndo chi ra tari noo ñaha tyivaa cha cuiñí xaan ña chi noo ri maa ra cha cuatandaha ña chihin.

³ Soco chicá xiñi cha cuenda ndo, coto cuví chi ndo tari cuví chi cu Eva. Vatyí sandaví ñaha coo chihin maña ti chi ña. Ta coto casandaví ñaha ra cuan chi ndo. Ta coto ndusiñ caa cuhva nacacá xiñi ndo tuhun ra Cristo. Ta sandihí ndo tuhun cha sacahnú ndo chi noo tuhun ri maa ra.

⁴ Ta nyoho tañi tyehe xaan ri tyasohó ndo nu cacahán ra tuhun ra Jesús soco ña ndicha ra. Vatyí ñima tuhun ra Jesús cha sacotó ndi chi ndo cuví. Ta vaha xaan cuiñí ndo nacacá xiñi ndo siñ ca tuhun cha ña chachí tahan chihin tuhun Tatyí Ii Nyoo cha naquehen ndo quiví xihna ri. Ñima tuhun ra Cristo cha sacacú chi yo cacahán ra cuan. Ta nyoho tañi tyehe xaan ri tyasohó ndo chi ra.

⁵ Soco tuví iñi tyi ra cha cacatyí tyi apóstol Nyoo cacuví ra, ñima ra vaha xaan cuví ra cuan cha nuu yuhu. Soco nyoho, nyicón ndo chi ra.

⁶ Vasi ña ñihí vahi cuhva cahín, cuiñí maa ndo. Soco cutuñí vaha iñi tuhun Nyoo. Ta yucuan sañahá ndi chi ndo chihin tandihí cuhva sacuví ndi.

⁷ O cuiñí maa ndo vatyí ña vaha cuhva sacuví quiví cha cahín tuhun ra Cristo chihin ndo. Vatyí ña quehín yahvi chi ndo. Ta sandundahví chii cha cuenda cha cuiñí cha cacu ndo.

⁸ Ñáyiví inga vehe ñuhu tyinyee ñu chii. Vatyí maa ñu chaha xuhun chii. Ta yuhu quehín xuhun cuan ta sacuví tyiño nuu ndo.

⁹ Ta quiví cha chinyaj chihin ndo ña chahí tindoho chi ni noo ndo vasi iyó cha chiñuhu chii. Vatyí ra hermano cha quichi coyo nya ityi Macedonia, ican ra chaha tandihí cha chiñuhu chii. Ta saha vavahi cuenda chii vatyí ña cuiñí cuhve tindoho chi ndo. Ta tyicuan ri sacuví que.

¹⁰ Vatyí chitó vahi tyi maa maa ri tuhun ndicha ra Cristo cahín, ta chité tyi ma cuhve cha tinyaa ni noo ndo, cha cuví ndo

ñu ityi Acaya chiña, cha vaha cuiñí cha ña chiquén cha coo yahvi chi ndo.

¹¹ ¿Ñáá tuhun cha cahín tyehe caa? ¿Atu cha cuenda cha ña cuiñí chi ndo? Ñima. Nyoo chitó ra yoso cha cuiñí chi ndo.

¹² Ta cuasacuvi que tari cuhva sacuví mai. Vatyí ña cuiñí cuhve ityi chi ra cachicá noo yanga vatyí cacatyí ra tyi sacuví ra tari cuhva sacuví ndi soco ña ndicha.

¹³ Vatyí cacatyí ra cuan vatyí apóstol cuví ra. Soco ña ndicha ra. Vatyí cuví ra noo ra sandaví ñaha ta nasahá ra chi ra tari noo ra apóstol ra Cristo.

¹⁴ Ta ihya ñima cha iyo cuiñí yo cuví. Vatyí cuihna cuví nasaha ra chi ra tari noo ángel cha xiño tuví chihin cha ndichin Nyoo.

¹⁵ Yucuan chaha ra cha nyicón chi ra ña vaha, nasahá tucu maa ra chi ra tari noo ra cha sacuví cha vaha. Soco coo quiví cutachi tuñi Nyoo chi ra cha cuenda cha ña vaha cha sacuví ra.

Tindoho cha nyehé ra Pablo nu chicá noo ra tyiño Nyoo

¹⁶ Inga chaha catyí tiqui chi ndo vatyí ni noo ndo ta ma caca xiñi ndo vatyí loque cha cahín tyehe caa. Soco tatu tyicuan caa chicá xiñi ndo, saña ndo chii na cahín chihin ndo tari noo ra loco. Vatyí tyicuan caa ta cuví sacahnu tucu yuhu chiin chii.

¹⁷ Ñima Sutu Mañi yo catyí chii vatyí sacahni chii tyehe caa. Soco cahín tari cahán noo ra loco.

¹⁸ Vatyí cuaha ra cha cacatyí vatyí tyiño Nyoo cachicá ra, ta ñima, vatyí cahnu xaan casahá ra chi ra. Yucuan chaha cusacahnu tucu yuhu chii ñandihí.

¹⁹ Nyoho, chitó xaan ndo, cuiñí maa ndo. Ta quiví ri tyasohó ndo nu cacahán ra cuan. Ta tondo xaan cacuví ra.

²⁰ Soco nyoho ñahri cuenda ndo cha saniñí ra chi ndo cha sacuví ndo tyiño nuu ra. Suhú ra chi ndo ta ña tuví iñi ndo. Sandaví ñaha ra chi ndo. Ta ña cuiñí nyehe ra chi ndo. Ta nyacua cañi chihin ndaha ra chi ndo. Ta maa ndo cunyeé xaan ndo cha sacuví ra chi ndo.

²¹ Vasi cahán nuu ndi soco cua catyí ndi, nyuhu vita xaan cuiñí ndi yucuan chaha ña cañá iñi ndi sacuví ndi chi ndo tyicuan caa.

Soco inga ra cuan cañá ndicha cuii iñi ra sacotó ra tuhun maa ra. Ta yuhu tucu cañá iñi vasi cahín tari noo ra loco.

²² Tatu ñáyivi hebreo cuví ra, suri cuví tucu yuhu. Ta tatu ñáyivi Israel cuví ra, ican cuví tucu yuhu. Ta tatu vachí ra tata ra Abraham, suri vachi tucu yuhu.

²³ Ta tatu ra sacuví tyiño nuu ra Cristo cuví ra, vihi ca yuhu. Vatyí yaha ca cuhva sacuví tyiño nuu ra Cristo. Vasi cahín tari noo ra loco vatyí catyí tyicuan caa. Soco ndicha. Vatyí ñihi ca sahá tyiñe ican saha ra cuan. Ta cha cuaha ca chaha ndohi chihin ñhi ican saha ra cuan. Ta cuaha ca chaha ñohi vehe caa ican saha ra cuan. Ta cuaha chaha cha cha yatyin cúvi, soco ña chihí.

²⁴ Ta ohon tahan chaha cacañi ra Israel chii chihin ñhi. Cha noo chaha cañi ra chii, oco chahun cumi tahan chaha sahvi ra ñhi chate.

²⁵ Ta uñi chaha cañi ra chii chihin yutun. Ta noo chaha cacañi ra chii chihin yuu. Ta uñi tahan chaha nyeë barcu cha yihí. Ta chichi cha uñi tahan chaha cuan, noo chaha ndoi nu tyañuhu noo ñuu ta noo quivi.

²⁶ Cha cuaha xaan cha cuví chii nu chica noi. Ta cha cuaha chaha cuñi tyañi chihin yuvi ndutya. Ta cuaha cha cuví chii. Quita ra suhu nu cuahin. Nyacua nya ra ñui, ra Israel, ta sataśi iñi ra chii. Ta ra inga ñuu ñandihi. Ta cuaha cha cuví chii ityi chichi ñuu, ityi nu chiqui, ityi nu tyañuhu. Ta cuaha cha cuví chii mahñu ra cha catyí vatyí hermano cuví ta ñima hermano cuví ra.

²⁷ Ta ñihi sahá tyiñe ta chitati. Ta cuaha xaan chaha ña quixi. Yahí soco: soco xita ta soco ndutya. Cuaha chaha sahi ayunar, o ña chachí ta nanduqui chi Nyoo cuví cuan. Cuaha chaha yahí cha vichin. Ta ni sahme ta ñahri.

²⁸ Ta sin ri nyaá siqui vatyí saní que iñi tandihí ndo: nyoho ta ñu inga ñuu cha yihí cuenda Nyoo.

²⁹ Vatyí tatu noo ndo vita cuñi ndo, yuhu tari cha vita cuñi cha cuenda ndo. O tatu sacco ñu cuatyí nya noo ndo, yuhu quehín tisihi ta ticahan nuu.

³⁰ Tatu cuñi chi cha sacote tuhun tacuhva nacoto ndo tyi ndicha cuví yuhu noo musu Nyoo, cusacote soco cha cuví chii. Vatyí

sañahá chi tyi ñahri maa fuerza mai iyó chii.

³¹ Nyoo sutu Sutu Mañi yo Jesucristo, tahán chi cha sacahnú yo chi ra tyicuan ri maa. Ta chitó maa ra vatyí ndicha cha cahín, ñima cuendu cahín.

³² Quivi chinyai Damasco (ñuu nu nicachico yihí barda) ra cha cuví gobernador cha sacuví tyiño nuu rey Aretas ñuu Damasco cuan, cuatyaá ra chí sindaro yuvehe cahnu ñuu cuan, tyi casahá cuenda ra. Vatyí tatu quite yuvehe ñuu cuan catiin ra chii ta cunyaca ra chii vehe caa.

³³ Soco ñáyivi iyó chaha barda cuan iyó ventana ñu. Ta ityi ventana sanoq ñu chii. Yihí chichi noo tica cahnu. Ta tyicuan caa sacacu Nyoo chii ndaha gobernador cuan.

12

Noo cha chaha Nyoo vatyí nyehe ra Pablo

¹ Ñahri maa ñihí chihin cha cahín tuhun mai, soco cuanacatyí cha sañahá Sutu Mañi yo chii.

² Ñohó nui chi noo ra cha yihí cuenda ra Cristo. Ta cha iyó uchi cumi cuiya quehen Nyoo chi ra ta chahan ra nya nu cu uñi toto andivi. Soco ña chité tatu chahan ra chihin coño ñuhu ra o chihin cha chiñi tuñi xiñi ra. Ña chité. Nya ri ca maa Nyoo chitó ra.

³⁻⁴ Soco chité vatyí ra cuan chinyaca Nyoo chi ra nya nu iyó ñáyivi vaha, ñu cha chihí. Ña chité tatu chahan ra cuan chihin coño ñuhu ra o chihin cha chiñi tuñi xiñi ra. Noo tuhun ri ca maa Nyoo chitó. Ta nu chahan ra cuan chiñi ra tuhun xehe. Ta ñahri ityi iyó chí ñáyivi cha nacatyí ñu tuhun xehe cuan.

⁵ Tahán chí sacahní chii chihin cha sañahá Nyoo chii quivi cuan. Soco ña sacahní chii cha cuenda cuan. Sacahní chii, soco chihin cha ñahri fuerza mai iyó chii.

⁶ Tatu cuñi tiqui cahín tuhun mai, ñima noo tuhun tondo ri cuví. Vatyí maa maa ri cha ndicha cuacatyí. Soco ma catyí vatyí coto cahnu xaan sahá ñáyivi chii. Vaha ca nyehe ñu cuhva vaha iyé ta cuhva vaha sañahí, tyicuan ta coto ñu tatu ra vaha o ra ña vaha cuví.

⁷ Ña cuñi Nyoo cha sacahnú xain chii chihin cha sañahá ra chii. Yucuan chaha

chahá ra cha sanyehé xaan cuihna t̄ndoho chii. Tari uhvi nu quiñi noo iñu cahnu, tyicuan caa uhvi chii. Vatyí tyicuan caa ta ma cuví cuyai chihin cha sañahá Nyoo chii.

⁸Ta cha uñi chaha chiquen chi Sutu Mañi yo na tinyaa ra t̄ndoho cuan siqui.

⁹Soco maa Sutu Mañi yo catyí ra chii tyehe caa: “Chahí tandihí cha vaha cha iyó chii chuun. Vatyí yucuan cuví cha chiñuhú chuun. Vatyí tatu ñáyivi ta ñahri maa tunyee iñi maa ñu iyó chi ñu, yucuan ta cuví cunyaa maa maa ri tunyee iñi mai chihin ñu”, catyí ra. Yucuan chaha si xaan cuñi cha ñahri fuerza mai iyó chii. Vatyí tyicuan caa ta cuví cunyaa tunyee iñi ra Cristo chihin.

¹⁰Yucuan chaha si xaan cuñi cha ñahri tunyee iñi mai iyó chii. Vasi cahán ñáyivi chii, vasi chicá nyicon ñu chii, vasi ñahri cha iyó chii, vasi cuaha cha cuví chii, soco si xaan cuñi cha nyehí t̄ndoho cha cuenda maa ra Cristo. Vatyí tatu ñahri fuerza mai iyo chii, soco ñihi ca cuñi chihin fuerza maa Nyoo.

Chicá xiñi ra Pablo tuhun ñu yihí cuenda Nyoo ñuu Corinto cuan

¹¹Cahín tari noo ra loco. Soco maa ndo cuñi ta cahín tyicuan caa vatyí ña sahá ca ndo ñáyivi chii. Vatyí maa ndo tahán chi cuyaa ndo chihin. Vasi noo ra cha ñima ri tuhun cuví yuhu, soco nyaca cuví ra cha catyí tyi apóstol cuví ra, ta ña ndicha ra. Cuñi maa ra tyi vaha xaan ca ra cha nuu inga ra chicá tyiño Nyoo.

¹²Nyehe ndo yoso caa tyiño Nyoo cha sacuvi mahñu ndo. Ta chihin cha cama iñi ta cunyej tandihí t̄ndoho cha nyehi. Ta cuaha xaan milagru sañaha Nyoo chi ndo tacuhva coto ndo vatyí ndicha cha cuví yuhu noo ra chicá tyiño maa ra.

¹³¿Atu vaha ca cuhva tyiñuhí chi yañi yo inga ñuu cha nuu nyoho? Ñima. Inuu ri cuhva tyiñuhí chi tandihí ndo. Noo ri cha ña sacuví chihin nyoho cha ña cuñi cuhve t̄ndoho chi ndo. Saha ndo ticahnu iñi chii tatu ña vaha cuhva sacuví.

¹⁴Ta vityin cha iyó vahi cha quichi nyehi nu nyicu ndo. Cha cu uñi chaha vityin. Ta ñahri t̄ndoho tyai siqui ndo. Vatyí ñima cha iyó chi ndo vachí nanduquí. Chi maa ndo

cuví cha cuñi yuhu. Vatyí sutu, ican tahan chi cuhva cha chiñuhú chi sehe. Ta ñima sehe nducú cha chiñuhú chi sutu.

¹⁵Yucuan chaha yuhu nyacua si cuñi cusanaí cha iyó chii cha cuenda cha vaha chi ndo. Ta nyacua si cuñi cuhve ñayivi cha cuenda ndo. Soco ta caa ri vatyí tatu cuñi que chi ndo, maa ndo ña cuñi vaha ndo chii.

¹⁶Ta vasi chitó cachi ndo vatyí ña chahí t̄ndoho chi ndo, soco yihí ndo catyí ndo vatyí sandaví ñahi chi ndo ta ña tuví iñi ndo.

¹⁷¿Atu sandaví ñahi chi ndo chihin nya noo ra cha tachí nu nyicu ndo quivi cuan?

¹⁸¿Atu sandaví ñaha ra Tito chi ndo quivi tachí chi ra chihin inga yañi yo cuan nu nyicu ndo? Ña sandaví ñaha ra chi ndo. Vatyí nyuhu ña tuhvá ndi sandaví ñaha. Vatyí ñn ri cuhva iyó ndi. Ta ñn ri cuhva sacuví ndi.

¹⁹Vasi chicá xiñi ndo vatyí cuahan ndi tumañi iñi chi ndi cha cuenda tuhun cha cahán ndi ihya, soco ñima tyicuan caa. Vatyí tandihí tuhun ihya cahán ndi cha cuenda cha vaha chi maa ndo tacuhva cohon nuu ca ndo chi Nyoo. Vatyí ndicha cha cuñi ndi chi ndo. Ta cahán ndi soco chihin nuu Nyoo ta cha cuenda maa ra Cristo.

²⁰Chicá xiñi coto iñi ndaa iñi noo nyicú ndo ta chaí. Ta ma cutahan iñi cuhva nyicú ndo. Ta maa ndo ma cutahan iñi ndo cuhva cucahin chi ndo. Yuhví coto coo tisihi, coto nya ndo quichí cuvi iñi ndo cha chii noo tahan ndo, coto nya ndo cuxaán ndo chi tahan ndo, coto nducú ndo maa maa ri cha vaha chi maa ndo, coto nya ndo ñi ca ndo cuendu, coto cahán cuehe ndo chi tahan ndo, coto nya ndo cahnu sahá ndo chi ndo. Yuhví coto nyehi tyi ña cachi ña ndaa nyicú ndo.

²¹Ta yuhví coto cha cuhin inga chaha nu nyicú ndo, Nyoi cuhva ra cha cucahan nui cha cuenda nyoho. Ta chicá xiñi coto quita ndutya nui cha cuenda cha nyacuví ndo. Vatyí yihí ndo sacuví ndo cuatyí nu quichi quivi. Ta nya vityin ta ña ndu uví iñi ndo cha ca iyó ndo chihin ñusihi ta ñima ñasihi ndo cuví, ta iyó ndo chihin rayi ta ñima yí ndo cuví. Ta ña sandihí ndo tuhun cha sacuví ndo ñáá ndihí cha ña vaha.

13

Chahá ra Pablo tuhun chi ñu Corinto, na saha vaha ñu cuenda chi ñu tatu vaha cuahán ñu chihin Nyoo

¹ Qui^{vi} cha cuquichi inga chaha nu nyicu ndo cuví chi chaha cu uñi. Yucuan ta cuvi cundaa tyiño ñu cha sacuví cuatyí. Soco cuñí chi uvi o uñi cha ndaa.

² Vatyí qui^{vi} chahin nu nyicú ndo cha cu uvi chaha, catyí chi ra sacuví cuatyí cuan, na sandihí ra tuhun. Ta vityin catyí tiqui inga chaha chi ra, ta chi tandihí ndo. Vatyí tatu cha quichi inga chaha, ta sacuví ca ndo cuatyí cuan, ma cundahvi cuñi nyehi chi ndo.

³ Tyicuan ta coto ndo cha cuñí xaan ndo coto ndo. Vatyí ndicha ndicha cha chihin fuerza maa ra Cristo cahín. Vatyí ra Cristo ñima noo ra ñima ri tuhun cuví ra. Yucuan chaha sañahá ra tunyee iñi ra chi ndo.

⁴ Ndicha vatyí chihí ra nu cruzi tari noo ra cha ñahri tunyee iñi iyó chii. Soco nandoto ra ta iyó ra chihin tunyee iñi Nyoo. Ta tyicuan caa tucu maa ndi vasi ñahri fuerza maa ndi iyó chi ndi. Soco ñn ri cuví ndi chihin ra Cristo. Ta iyó ndi chihin tunyee iñi maa Nyoo vatyí tyicuan caa ta cuvi tyinyee tucu nyuhu chi nyoho.

⁵ Saha ndo cuenda chi ndo tatu ñi vaha iñi ndo cuahán ndo chihin Nyoo. Saha ndo cuenda vatyí ra Cristo ñohó ra ñima ndo tatu chinó vaha iñi ndo chi ra. Soco tatu ñima chihin cha ñi iñi ndo cuahán ndo chata Nyoo, ra Cristo ña nyaá ra chihin ndo.

⁶ Soco chitó vahi tyi coo qui^{vi} cunacoto ndo tyi vaha cuhva tyinyeé ndi chi ndo tacuhva cuví cuhun vaha ndo chihin ra Cristo.

⁷ Ta chicán tahvi xaan ndi chi Nyoo chaha ndo, tacuhva vatyí ma sacuvi ndo cha ña vaha. Ñima cha cuñí ndi tyi catyí ñáyivi tyi vaha ndi. Soco cha cuñí ndi vatyí nyoho sacuví ndo maa maa ri cha vaha. Ñahri saha vasi catyí ñáyivi, an vaha, an ña vaha cuhva cha sacuví ndi.

⁸ Vatyí nyaá siqui ndi cha sacuví ndi cha vaha. Ma cuvi tixehe ndi tuhun ndicha. Noo ri cha cuví sacuvi ndi, cha sañahá ndi tuhun ndicha.

⁹ Yucuan chaha cusí xaan cuñí ndi cha ñahri fuerza maa ndi iyó chi ndi, ta cuhva

tyi nyee cuñí ndo chihin fuerza maa Nyoo. Ta tyicuan ri chicán tahvi ndi chaha ndo na vaha ca cuhun ndo chihin Nyoo nyacua nya cha ñahri ca cumañi chi ndo.

¹⁰ Sacuhín carta ihya chi ndo cha ñi ri ca cha cumañi quichi nu nyicú ndo. Vatyí sanduvaha ndo chi ndo. Tyicuan ta ma cuñi ca chi cha cahín chi ndo qui^{vi} chai nu nyicu ndo. Vatyí ndicha cha chaha Nyoo ityi chii cha sahí cuenda chi ndo. Soco chaha ra tyiño ihya chii vatyí sandunyeé que iñi ndo. Ta ñima cha sanducuihyá ndihí que iñi ndo.

¹¹ Ta nu ndihí cahín, yañi, catyí chi ndo, na nducu ndo cuhva ñicoo vaha ndo ta sii cuñi ndo. Nanducu ndo cuhva coo cuiti ndo nuu Nyoo cha ñahri cumañi chi ndo. Na cuní iñi ndo, na coo vaha ndo chihin tahan ndo. Ta Nyoo ra cuñí xaan chi ndo, ta ra chahá cha taxi coo ñima ndo na cunyaa ra chihin ndo.

¹² Ta nacuhva maa ndo nocumi chi noo noo tahan ndo chihin cha sii cuñí ndo nyehé ndo chi ñu.

¹³ Ta vachí nocumi chi ndo sahá tandihí ñu yihí cuenda Nyoo ñuu ihya.

¹⁴ Nacuhva Sutu Mañi yo Jesucristo cha vaha coo ñima ndo. Ta nacoto ndo tyi Nyoo cuñí xaan ra chi ndo. Ta na cunyaa Tatyí li ra chihin ndo. Ta nacuvi chi tyicuan caa.

Carta Cha Sacuhun Ra Apóstol Pablo Chi Ñáyivi Ityi Galacia Cha Yihí Cuenda Nyoo

Ra Pablo tyaá ra noo carta chi ñu ityi Galacia cha yihí cuenda Nyoo

¹ Yuhu ra Pablo cuví noo apóstol. Soco ñima ñáyivi tachí chii. Ta ñima rayhi catyi vatyi ñihí yuhu tyiño ihya. Soco maa ra Jesucristo ta maa Nyoo Sutu yo chaha ra tyiño ihya chii. Vatyi ican Nyoo sanandoto chí ra Cristo mahñu ñu chihí.

² Yuhu ta tandihí yañi yo cha nyicú chihin, tyaá ndi carta ihya chi nyoho ñu yihí cuenda Nyoo tandihí vehe ñuhu Galacia.

³ Nyoo Sutu yo ta Sutu Mañi yo Jesucristo nasoco ra chí ndo ta nacuhva ra cha taxi ri coo añima ndo.

⁴ Vatyi maa ra Jesucristo chaha ra ñáyivi ra tyiño nuu yo cha catyi cuatyí yo. Vatyi tacuhva sacacú ra chí yo mahñu ñu quiñi iyo cha iyó siqui ñuhu ñáyivi ihya vityin. Vatyi tyicuan caa tyaá maa Nyoo Sutu yo cuhva tyi sacuvi ra Cristo.

⁵ Yucuan chaha na sacahnu yo chí maa Nyoo tyicuan ri maa. Ta na cuví chí tyicuan caa.

Ñahri ca inga cuhva cuví cacu añima yo

⁶ Iyo xaan cuñí vatyi nyoho numi xaan cuahan sandoó ndo chí Nyoo, ra nacana chí ndo tyi nicoo vaha ndo chihin ra cha cuenda tumañi iñi cha sahá ra Cristo chí yo. Ta vityin siin caa ityi natyihi ndo cuahan ndo. Ta cuñi maa ndo tyi cucacu ndo chihin cuan.

⁷ Soco ñahri ca inga cuhva cuví cacu añima yo. Soco iyó ra cuñí satondo xiñi ndo. Ta cuñí ra sativi ra tuhun cha sacacu ra Cristo chí yo.

⁸ Ñahri saha, an cuví ri nyuhu, an cuví ri noo ángel cha quichi nya andivi, soco tatu tyehe ta cahán noo ndi tuhun ra Cristo nuu ndo, ta siin caa, ta ñima tari cuhva sañaha ndi chí ndo quivi cuan, Nyoo cutachi tuñi ra chí ndi.

⁹ Cha catyi tuhun ihya chí ndo quivi cuan soco cuacatyí tiqui inga chaha chí ndo vityin. Tatu yóo cha cahán tuhun cha cacú añima yo chihin ndo ta siin caa, ta ñima cuhva cha chiñi ndo quivi xihna ri, Nyoo cutachi tuñi ra chí ra cahán tyicuan caa.

¹⁰ Cha catyi tuhun ihya chí ndo, ñima cha nduquí cuhva savahi chii nuu ñáyivi. Soco nduquí cuhva savahi chii nuu Nyoo. Tyehe ta nduquí cuhva savahi chii nuu ñáyivi, ñima noo ra sacuvi tyiño nuu ra Cristo cuví.

Yoso caa cha nanduvi ra Pablo noo ra chicá tyiño Nyoo

¹¹ Soco coto ndo tuhun ihya yañi, vatyi tuhun ra Cristo cha cahán yuhu, ñima tuhun cha ndichí xiñi ñáyivi cuví.

¹² Ñima ñáyivi sañaha chii. Yori sañaha chii. Soco suri maa ra Cristo sacotó chii.

¹³ Vatyi nyoho chiñi ndo yoso caa chinyacuvi quivi cuan, quivi ñohi cuenda ñu Israel. Ta chitó ndo yoso caa cha xaan chica nyiquen chí ñu yihí cuenda Nyoo. Ta nduquí cuhva sativi cuhva chinó iñi ñu.

¹⁴ Ta ñohi cuenda ñu Israel, yuhu cuví ra cuahan ityi nuu ca ta ñima ca suhva ca ra tahin cha siin ri cuiya ndi. Vatyi cuñi xaan que sacuvi yoso cuhva chinyacuvi maa sutu chahni ta ityi chata ca.

¹⁵ Soco nya ta ni cumañi caqui ta tyaá Nyoo cuhva tyi cusaha ra tumañi iñi chii. Ta nya cha chaa maa chí quivi cha tyaá ra cuhva, yucuan ta nacana ra chí. Vatyi cuñi xaan ra chí.

¹⁶ Ta tyicuan caa sacuvi ra vatyi cohon nui chí Sehe ra. Tacuhva vatyi cahin tuhun Sehe ra, ra Cristo, chihin ñáyivi cha ñima ñu Israel cuví, tacuhva cacu añima ñu. Ta quivi cha cuví tyehe caa, ña nduquí cuhva cha catyi ñáyivi chí ñáa cha tahán chí sacuvi.

¹⁷ Ta ni ña chahin nya Jerusalén nu canyicu ra apóstol, vasi cha chicha ca ra chihin tuhun Nyoo, vatyi maa ra cha naha cana Nyoo chí ra ta ñima ca yuhu. Soco chahin nya Arabia. Tyicuan ta cuanuhu tiqui inga chaha nya Damasco.

¹⁸ Cha yaha uñi cuiya tyicuan ta chahin nya Jerusalén, ta chicohon nui chí ra Pedro. Ta ndoj chihin ra chahun quivi.

¹⁹ Soco ña nyehi chí inga apóstol. Noo ri ra Jacobo yañi Sutu Mañi yo nyehi.

²⁰ Ta chihin nuu Nyoo ta catyí chi ndo vatyi tuhun cha catyí chi ndo nu tutu ihya, cha ndicha cuví.

²¹ Cha yahá cha chahin Jerusalén ta chahin ityi Siria ta ityi Cilicia.

²² Soco ra yañi yo cha canyicu vehe ñuhu ra Cristo cha nyaa nicacahnu Judea, ña ñoho nuu maa ra chii.

²³ Tacuhva cha cachiñi ri ra cahán ñu tuhun, vatyi catyí ñu: “Ra cha chicá nyicon chi yo quivi cuan, vityin cahán noo ra nuu ñáyivi na nachino iñi ñu chi ra Cristo. Ta quivi cuan cuñi ra sativi ra tuhun ra Cristo”, catyí ñu.

²⁴ Ta ra canyicu vehe ñuhu ra Cristo casacahnu ra chi Nyoo cha cuenda cha sacuvi Nyoo chihin tyicuan caa.

2

Ra nyisó tyiño vehe ñuhu Jerusalén, ndoo ra vaha cuhva sahá tyiño ra Pablo

¹ Cha yahá cha uchi cumi cuiya, chahin Jerusalén inga chaha chihin ra Bernabé. Ta chahan ra Tito chihin ndi.

² Chahin nyicuan vatyi maa Nyoo sañaha chii vatyi tahán chi cuhin Jerusalén. Ta nacatyí chi ñu yoso caa sañahí tuhun ra Cristo chi ñu cha ñima ñu Israel cuví. Quita siin chihin ra cha canyiso tyiño vehe ñuhu, ta chahí cuenda chi ra yoso caa tuhvé cahin chihin ñu. Coto ma candoo ra vaha ta cacatyí ra vatyi yuhu sahá tyiño caha ri mai.

³ Soco candoo ra vaha. Vatyi ni ri chi ra Tito ta ña saniñi ra cha sacuvi ra costumbre circuncisión. Ta ra Tito ñima ra Israel cuví ra.

⁴ Ndicha vatyi quihvi xehe suhva ra cha catyí vatyi yañi yo cuví chi ra, soco ñima. Vatyi cuñi ra nyehe nyaa ra cuhva iyó yo. Vatyi libre iyó yo cha cuenda ra Cristo Jesús. Soco cuñi ra cuan tyi cunyaca ñaha tucu ley chahnu chi yo.

⁵ Soco ni noo cuhva ta ña chaha ndi cha cunyaca ñaha ra cuan chi ndi. Vatyi cuñi ndi vatyi nyoho ma saña ndo cha ndicha tuhun ra Cristo cha cacu aña yo.

⁶ Soco maa ra canyisó tyiño vehe ñuhu, ñahri tuhun chaha chaha ra chii. Ta vasi cahnu tyiño canyisó ra cuan, soco cha cuenda chi yuhu, ñahri saha. Vatyi Nyoo ña

sahá ra cuenda cuhva tyiño nyisó yo. Soco aña yo sahá ra cuenda.

⁷ Cha nuu cha catyí ra canyiso tyiño vehe ñuhu cuan chii ñáá ndihi tuhun, maa ra canacoto ra vatyi maa Nyoo tachí chii vatyi cahin tuhun ra Cristo chihin ñu cha ñima ñu Israel cuví. Tari tachí ra chi ra Pedro vatyi cucahan ra suri tuhun ra Cristo cuan chihin ñu Israel.

⁸ Vatyi suri maa Nyoo tachí chi ra Pedro tyi cuví ra apóstol cuenda ñu Israel. Ta tachí tucu ra chi yuhu tyi cuví apóstol ra Cristo cuenda ñu cha ñima ñu Israel cuví.

⁹ Yucuan chaha ra Jacobo, ra Pedro ta ra Juan ra cacuví nuu yucuan, nicohón nuu ra vatyi Nyoo chahá ra tunyee iñi chii cha cahin tuhun ra Cristo chihin ñáyivi. Ta chaha ra ndaha ra chii, ta chi ra Bernabé vatyi candoo ra vaha cha sahatyiño ndi mahñu ñu cha ñima ñu Israel cuví. Ta maa ra casahatyíño ra mahñu ñu Israel.

¹⁰ Noo ri vatyi catyí ra chi ndi vatyi na nicohon iñi ndi ta natyinyee ndi chi ñu ndahvi. Ta ican cuvi cha nanducú xain cuhva sacuvi tandihi quivi.

Ra Pablo cahán ra chi ra Pedro vatyi ña vaha cha nyacuví ra

¹¹ Soco quivi chahan ra Pedro ñuu Antioquía, cahán vavahi chi ra chihin nuu ra vatyi ña vaha cha nyacuví ra.

¹² Vatyi cha xihna ri vaha sacuvi ra vatyi chachí ra chihin ñu cha ñima ñu Israel cuví, nyacua nya cha chaá suhva ñáyivi Israel cha tachí ra Jacobo. Tyicuan ta quichaha ña chachí ca ra chihin ñu. Tyicuan caa sacuvi ra vatyi yuhví ra coto cahan ra itá iñi costumbre circuncisión cha chaá coyo cuan chi ra.

¹³ Tyicuan ta inga ra Israel cha yihí cuenda ra Cristo ndu ñn ri ra chihin ra Pedro. Ta sacuvi ra cha ña vaha cuan. Vatyi ndu uví yuhu ra tari ndu uví yuhu ra Pedro. Ta nyacua nya ra Bernabé ta ndutahan ra chihin ra.

¹⁴ Soco nyehi vatyi ña vaha cuahán nyacuvi ra. Ñima tari cuhva catyí tuhun ra Cristo. Yucuan chaha catyí chi ra Pedro chihin nuu tandihi ñu canyicu cuan: “Yoho cuvún noo ra Israel. Ta iyón tari iyó ñáyivi cha ñima ñu Israel cuví. ¿Yoso caa cha

cuñún saniñun chi ñu tyi sacuvi ñu costumbre cha sacuvi ñu Israel? Ta ni maun ta ña sacuví con”, catyi yuhu chi ra.

¹⁵ Maa yo cha cuví yo ra Israel nya ta cacu yo, ña sacuví yo cuatyí tari sacuví ñu cha ñima ñu Israel cuví.

¹⁶ Soco chitó yo vatyí ma cuvi saváha yo chi yo nuu Nyoo chihin cha nanducú yo cuhva sacuvi yo ley chahnu cha tyaa ra Moisés. Soco nduvahá yo nuu Nyoo cha cuenda cha chinó ri ñi yo chi ra Jesucristo. Yucuan chaha chinó tucu ñi maa yo chi ra. Vatyí tyicuan caa ta ñicoo vaha yo chihin Nyoo. Ta ñima cha cuenda cha nducú yo cuhva sacuvi yo cha catyí ley. Vatyí ni noo yo ta ña nduvahá yo nuu Nyoo chihin cha nanducú yo cuhva sacuvi yo cuhva catyí ley chahnu.

¹⁷ Soco vityin tatu nducú yo cuhva nduvaha yo nuu Nyoo cha cuenda ra Cristo, cuñí chi catyí vatyí nacoto yo tyi iyó tucu cuatyí yo tari iyó cuatyí ñu cha ñima ñu Israel cuví. Tatu tyicuan caa, ¿atu cuñí chi catyí vatyí ra Cristo sacuví ra tyi iyó cuatyí yo vatyí sandoq yo ley ta nachino ñi yo chi ra? Ñima.

¹⁸ Soco tyehe ta naquehen tucu yo ley cha cha yaha sandoq yo, yucuan ndicha coo cuatyí yo.

¹⁹ Vatyí ley cuan sañahá chi chii vatyí tahán chi cúvi, ta yucuan chaha sandihí tuhun cha nduqui cuhva caqui chihin ley cuan, ta chihí cha cuenda chi cuví cuan, tacuhva cuvi coi cha cuenda Nyoo.

²⁰ Yuhu, tari cha chihí nuu cruzi ñn ri chihin ra Cristo. Ta ñima ca ñayiví mai iyé soco ra Cristo iyó ra añime. Ta ñayiví ra cha iyé vityin, iyé soco chihin cha chinó ñi chi ra cha cuví ra Sehe Nyoo. Ican ra cuñí ra chii, ta chihí ra cha catyí cuatyí yuhu.

²¹ Ña cuñí yuhu sacuachiye cha vaha Nyoo. Vatyí tatu tyehe ta cuví cacu añima yo cha cuenda ley, ñahri tuhun chihí ra Cristo cuví chi cuan.

3

Naquehén yo Tatyí Ii Nyoo cha cuenda cha chinó ñi yo chi ra Cristo

¹ ¡Ñana cha tondo iyó nyoho ñu canyicu Galacia chiña! ¿Yóo cha sativí chi ndo vatyí

ña cuñí ca ndo quichaha ndo tuhun cha ndicha? Cachi xaan chaha ndi cuenda tuhun ra Jesucristo chi ndo. Ta cutuñi vaha ñi ndo ñáa cuenda chihí ra nu cruzi.

² Noo ri cuñí ndaca tuhun chi ndo. ¿Atu naquehen ndo Tatyí Ii Nyoo cha cuenda cha sacuví ndo cha catyí ley ra Moisés, o cha cuenda cha chinó ñi ndo tuhun ra Cristo cha chiñi ndo?

³ ¿Yoso caa cha tondo xaan iyó ndo vityin? Ta quiví xihna ri vaha xaan quichaha ndo chi Nyoo chihin tunyee ñi Tatyí Ii ra. Soco vityin, ¿yoso caa cuñí ndo coo ndo ñayiví chaa chihin fuerza maa ndo?

⁴ ¿Atu cha caha ri nyehe ndo cha sacuví Tatyí Ii Nyoo chihin ndo? Ñima cha caha ri cuví, cahví ñi.

⁵ ¿Ñáa tuhun chahá Nyoo Tatyí Ii ra chi ndo, ta sacuví ra milagru mahñu ndo? Ñima cha cuenda vatyí nducu ndo cuhva sacuvi ndo cha catyí ley, soco cha cuenda vatyí chinó ñi ndo tuhun ra Cristo cha chiñi ndo.

⁶ Ra Abraham, chinó ñi ra tuhun cahan Nyoo chihin ra, yucuan chaha cuví ra noo ra vaha nuu Nyoo.

⁷ Yucuan chaha tahán chi coto ndo vatyí ñu cha ndicha cuví ñayiví chi ra Abraham, ican ñu cuan chinó ñi ñu chi Nyoo.

⁸ Ta cha naha ndoo tuhun Nyoo nu tutu. Ta catyí chi vatyí nu cuahán ca chi quiví, cusacuvi Nyoo tyi nduvaha ñayiví cha ñima ñu Israel cuví nuu ra cha cuenda cha chinó ñi ñu chi ra. Yucuan chaha catyí Nyoo chi ra Abraham ta cha naha: “Tandihí ri maa ñu cunasoque cha cuenda maun”, catyí Nyoo chi ra.

⁹ Yucuan chaha ñu cha chinó ñi chi ra Cristo, Nyoo nasocó ra chi ñu ñn ri chihin ra Abraham, vatyí chinó ñi tucu maa ra.

¹⁰ Ñu cha itá ñi ley cha tyaa ra Moisés, cutachi tuñi Nyoo chi ñu. Vatyí tuhun Nyoo catyí. “Tandihí ñu cha ña sacuví tandihí cuii maa tuhun cha nyaá nu libru ley cuan, cutachi tuñi Nyoo chi ñu.”

¹¹ Ta ndicha vatyí yori yo nduvaha yo nuu Nyoo cha cuenda cha itá ñi yo ley cuan. Vatyí tuhun Nyoo catyí chi: “Ra nduvahá nuu Nyoo cha cuenda cha chinó ñi ra, coo ra ñayiví”, catyí tuhun Nyoo.

12 Ta ley ra Moisés ña cu ñin ri chi chihin cha chinó ñni yo chi ra Cristo. Vatyí catyí ley cuan: “Yóó ñu cha sacuvi tandihí cuii ley ihya, coo ñu ñayiví cha cuenda cuan”, catyí chi.

13 Ra Cristo natava ra chi yo ndaha ley cha catyí tyi tahán chi cutuñi chi yo cha cuenda cuatyí yo. Vatyí maa ra nanduvi ra noo ra iyó cuatyí tyiño nuu yo. Vatyí catyí tuhun Nyoo: “Ñima ra vaha cuví ra cha chihí ta tacaá nu yutun.”

14 Tyicuan caa cuví tacuhva vatyí cha cuenda ra Cristo Jesús ta nasocó Nyoo chi ñáyiví cha ñima ñu Israel cuví, tari catyí ra chi ra Abraham tyi cunasoco ra chi ra. Ta chihin cha chinó ñni yo chi Nyoo, naquehén tandihí yo Tatyí li cha catyí Nyoo tyi kuhva ra chi yo.

Ley chahnu sañahá chi chi yo vatyí iyó cuatyí yo, soco ña sacacú chi chi yo

15 Yañi, cuacuhve noo kuhva chi ndo, kuhva iyó yo siqui ñuhu ñayiví ihya. Tatu noo ra catyí ra vatyí cucuhva ra cha cucuhva ra chi inga ra. Ta tatu cha yaha tyihí ra firma, yori cuví satani. Ta yori cuví natyiso suhva ca siqui.

16 Ta vityin, Nyoo catyí ra tyi cucuhva ra cha cucuhva ra chi ra Abraham ta chi nonga ra cha vachi tata ra. Ña catyí nu tutu Nyoo vatyí kuhva ra chi cuaha ra vachi tata ra, soco chi nonga ri ra. Ta ican ra cuan cuví ra Cristo.

17 Cha catyí yuhu, ican cuví ihya: Nyoo natyihí tahan ra tuhun chihin ra Abraham. Ta ñin ri tuhun cahán ra. Tyicuan ta yaha cumi ciento oco uchi cuiya ta cha ley cha tyaa ra Moisés. Soco ma cuví casi ley cuan nu natyihí tahan Nyoo tuhun chihin ra Abraham. Ta ma cuví casi chi nu naquehen yo cha catyí Nyoo tyi kuhva ra chi yo.

18 Tyehe ta naquehén yo cha tahán chi chi yo cha cuenda ley ra Moisés, cha caha ri cuví tuhun natyihí tahan Nyoo chihin yo. Soco vatyí Nyoo catyí ra chi maa ra Abraham vatyí kuhva maa ra chi ra.

19 Tatu tyicuan caa, ¿ñáá cuenda vaha ley ra Moisés? Chaha Nyoo ley cuan soco cha yaha catyí ra tyi kuhva ra cha cucuhva ra chi yo. Vatyí ley cuan sanatuví chi cuatyí yo. Ta ndoo chi nyacua nya quiví quichi

ra Cristo ra cuví tata ra Abraham. Ta chi maa ra Cristo catyí Nyoo tyi kuhva ra cha cucuhva ra. Ta ángel Nyoo chaha cuenda ley cuan chi ra Moisés. Ta ra Moisés chaha ra chi ñáyiví.

20 Soco Nyoo noo tuhun ri maa ra cahan ra chihin ra Abraham quiví cuan. Ta ña chiñuhú cha nducu ra noo ra nacatyí tuhun cuan chi ra Abraham.

21 ¿Atu cuñí chi catyí vatyí ley cha tyaa ra Moisés ña chachí tahan chihin cha catyí Nyoo tyi kuhva ra chi yo? Ñima. Soco tyehe ta cuví coo yo ñayiví chaa cha cuenda ley cuan, yucuan ndicha nduvaha yo nuu Nyoo cha cuenda chi. Soco ma cuví.

22 Vatyí catyí nu tutu Nyoo tyi iyó cuatyí tandihí cuii ñáyiví. Vatyí tyicuan caa ta ñu chinó ñni chi ra Jesucristo cuví ñihi ñu ñayiví chaa cha catyí Nyoo tyi kuhva ra chi yo.

23 Ta ni cumañi ca quichi tuhun cha chinó ñni yo chi ra Cristo, ley cuan chicumí chi chi yo tari cha ñoho yo vehe caa. Vatyí nyatu yo nyacua nya sañaha Nyoo chi yo yoso caa chino ñni yo chi ra.

24 Ta ley cuan cuví tari noo ñu cha sahá cumi chi ra cuatyaa. Vatyí ley saha cumi chi yo tari ra cuatyaa nyacua nya quiví quichi ra Cristo. Ta cuví chinó ñni yo chi ra ta nduvaha yo nuu Nyoo.

25 Ta vityin cha cha quiví cha chinó ñni yo chi ra Cristo, ña sahá cumi ca ley cuan chi yo tari noo ra cuatyaa.

26 Vatyí tandihí yo cuví yo sehe Nyoo vatyí chinó ñni yo chi ra Cristo Jesús.

27 Ta tandihí yo condutyá yo ta ndu ñin yo chihin ra Cristo. Vatyí nyaá ra añima yo.

28 Ña ñiñi xaan ca cha cuví yo, an ñu Israel, an ñu Grecia, an cuví ri yo ñu libre iyó, an cuví yo ñu iyó chitoho. An cuví yo rayi, an cuví yo ñusihi, soco ña chiñuhu ca cuan. Vatyí cha ñin ri cuví yo chihin ra Cristo, noo ri cuví yo chihin ra.

29 Ta tatu cuenda ra Cristo yihí ndo, ndicha cha ñáyiví vachi tata ra Abraham cuví ndo. Ta ñihí ndo cha catyí Nyoo chi ra Abraham tyi kuhva ra chi ra.

4

1 Cuacuhve minoo kuhva chi ndo. Noo ra cuehe tatu chihí sutu cue, ta sandoo sutu cue tandihí cha tyayí ra chi cue, ra cuehe

ihya ma cuvi cotyiño ñaha cue cha tyayii sutu cue. Nyacua nya quivi cuahnu cue ta cuvi cotyiño cue. Ta cha ni ri ca cha ta cuahnu ca cue, cuví cue tari noo musu ri. Vasi chi maa cue cuví tandihi cha tyayii sutu cue.

² Iyó ra cumí chi cue nyacua nya chaa cuiya cue cha catyi sutu cue, tyi naquehen cue cha tyayii cuan.

³ Ta tyicuan caa cuvi maa yo. Cha ni ri ca cha ta quichi ca ra Cristo, cuvi yo tari noo musu ri chi cha nyacá ñaha siqui ñuhu ñayivi.

⁴ Soco quivi tahan chi, Nyoo tachi ra chi Sehe ra, sacacu noo ñaha sihi chi ra. Ta chinyacá ñaha ley chahnu chi ra.

⁵ Tachi Nyoo chi ra tacuhva sacacú ra chi yo ndaha ley cuan. Vatyí tyicuan caa ta Nyoo naquehén cuenda ra chi yo tari sehe ra.

⁶ Ta vatyí sehe ra nanduví yo, Nyoo tachi ra Tatyí Ii ra Cristo cunyaa ñima yo. Ta cha cuenda Tatyí Ii ra caná chaa yo chi Nyoo ta catyí yo: “Sutu Mañi yuhu.”

⁷ Yucuan chaha sehe Nyoo cuvun ta ñima ca noo musu ri. Ta cha cuenda cha cuvún sehe Nyoo, chahá ra cha vaha cha tahn chi chuun cha cuenda ra Cristo.

Chicá xiñi ra Pablo cha cuenda ñu yihí cuenda Nyoo

⁸ Quivi ta cohon nuu ca ndo chi Nyoo, cuvi ndo musu noo cha ñima Nyoo cuví.

⁹ Soco vityin ñohó nuu ndo Nyoo, o maa Nyoo ñohó nuu ra chi ndo. ¿Yoso caa cha cuñi ndo natin tucu ndo noo tuhun ndahvi cha ñima ri tuhun, ta nanduvi tucu ndo musu inga chaha?

¹⁰ Nyoho sanducahnú ndo quivi vico, quivi natyacú yoo, ta vico cuiya.

¹¹ Yuhví xain coto vaha ñahri maa tuhun sahá tyiñe chihin ndo.

¹² Yañi, chacú ndahvi nuu ndo na nanduvi ndo tari mai (cha ña nyacá ñaha ca ley chii). Vatyí yuhu cha nanduví tari maa ndo, soco ñima cha sativi ndo chii.

¹³ Vatyí cha chitó ndo quivi chahan nui ñuu ndo yihí noo cuehe chii. Ta chaha chi kuhva chahin tuhun ra Cristo chihin ndo.

¹⁴ Ta cuehe cuan cuvi tari noo prueba cha cuenda vatyí ña tyaa xiin ndo chii. Soco vaha naquehen cuenda ndo chii, tari

noo ángel Nyoo, ta tari cha vatyí suri maa ra Cristo cuví.

¹⁵ ¿Nya nyaa cha sii xaan cuvi chi ndo chihin vityin? Vatyí yuhu cuví cha ndaa vatyí quivi cuan, nyacua caña iñi ndo catava ndo chiti nuu ndo ta kuhva ndo chii, tyehe ta cuvi nduvahi chihin cuan.

¹⁶ Ta vityin, ¿atu cuñi maa ndo tyi nanduví yuhu noo ra cha xaan cahnu iñi ndo cha cuenda vatyí catyí cha ndicha chi ndo?

¹⁷ Ñáyivi cuan, cuñi xaan ñu chi ndo, catyí ñu. Soco ñima chihin cha vaha. Vatyí cha cuñi ñu cuan, cha sacanyaha ñu chi ndo chi ndi. Ta cunyicon ndo chi maa ñu.

¹⁸ Soco vaha cha cuñi yo chi ñáyivi, soco chihin cha vaha, ta tyicuan ri maa. Ta ñima in yaha ri kuhva cha nyaa ri yuhu chihin ndo.

¹⁹ Sehe luhli, inga chaha nyehí tindoho ta cha uhvi cha catyí ndo. Tari noo sihi cha yihí cha uhvi chi ña tatu cuacacu sehe ña. Ta cunyehe que tindoho nyacua nya ndunyehe vaha ndo chihin fuerza maa ra Cristo.

²⁰ Vaha tyehe ta nyaí chihin ndo vityin vityin. Tacuhva cuví cahan vii chihin ndo inga kuhva. Vatyí ña chité yoso caa caca xiñi cha cuenda ndo.

Nacoo yo cha cuenda Nyoo ta ñima ca cha cuenda ley chahnu

²¹ Nyoho cha cuñi ndo cha cunyaca ñaha ley ra Moisés chi ndo, catyí ndo chii. ¿Atu ta cuñi ca ndo cha catyí ley cuan?

²² Catyí chi vatyí ra Abraham chiyo uvi tahan sehe ra. Noo sehe ra chiyo chihin ñaha cha cuvi musu ñasihí ra. (Chinañi ña Agar.) Ta nonga sehe ra chiyo chihin cu Sara cha cuvi ñasihí vaha ra.

²³ Cacú sehe ñaha cha cuví musu cuan tari cacú tandihi ra cuatyaa. Soco sehe ñasihí vaha ra Abraham cacú cue tacuhva chino cava cha catyí Nyoo chi ra Abraham vatyí kuhva ra noo sehe chi ñasihí ra.

²⁴ Ta chihin ihya iyó noo cha cuñi chi catyí chi chi yo. Nanduvi ñusihí cuan cuvi ñu tari uvi tahan tuhun cha natyihí tahan Nyoo chihin yo. Noo tuhun cuan cuenda yucu Sinaí. Ta ñáyivi yihí cuenda ley cuan cuví ñu tari cu Agar, vatyí noo musu ri cuvi tucu maa ña chihin sehe ña.

25 Tari cu Agar, ta tari yucu Sinaí cha nyaá Arabia, tyicuan caa tucu ñuu Jerusalén quivi vityin. Vatyí ñáyivi ñuu cuan nyaá ñu ndaha ley chahnu. Tari noo musu ley cuan cuví ñu.

26 Soco nya andivi iyó inga Jerusalén, cha cuví ñuu yo. Ta yori nyacá naha chi chi. Ta cuví chi tari sihi yo.

27 Ta catyí tuhun Nyoo:

Cusi ñi yoho, ñaha sihi cha ña cuví coo sehe.

Yoho yori sehung.

Cana chaa chihin cha si cuñun, yoho cha ña ñoho nuu cha uhvi cha cacu sehe.

Vatyí ñaha sihi cha sanando yí chi, coo ca sehe ña ta ñima ca ñusihi cha iyó yí, catyí tuhun Nyoo.

28 Yañi, yoó cuví yo tari ra Isaac, ra cuví sehe cu Sara. Cuví yo sehe ra Abraham cuenda tuhun cha natyihí tahan Nyoo chihin ra.

29 Ta ra cha cuví sehe ñaha cha cuví musu cuan xaan ñi ra chi ra Isaac cha cuví sehe ñasihi vaha ra Abraham. Tyicuan caa cuví tucu vityin. Ra cha cuñí vatyí sacuví yo cha catyí ley, xaan ñi ra ta chicán nyicon ra chi yo cha cuví yo ñáyivi nacacu chaa chihin Tatyí Ii Nyoo.

30 Soco ¿ñáa cha catyí tuhun Nyoo? Catyí chi: “Tava ñehe chi ñaha cha cuví musu cuan chihin sehe ña. Vatyí sehe ña ma cuvi naquehen cue cha tahán chi chi sehe ñasihi vaha ra Abraham”, catyí tuhun Nyoo.

31 Yucuan chaha, yañi, ñima tari sehe ñaha cha cuví musu cuan cuví yo. Soco cuví yo tari sehe ñasihi vaha ra Abraham.

5

Ñihi cuinanyaa yo chihin cha ña nyacá ñaha ca ley chi yo

1 Ra Cristo sacacu ra chi yo ndaha ley chahnu cuan. Yucuan chaha saha ndo cuenda coto nanduvi ndo musu inga chaha cuenda ley.

2 Tyasoho ndo, yuhu ra Pablo catyí chi ndo. Tatu cuhva ndo cha saha ñu circuncidar chi ndo, ta cuñí maa ndo tyi cucacu ndo chihin cuan, ma cuvi tyinyee ra Cristo chi ndo.

3 Cuñí catyí inga chaha chi ndo vatyí tandihí ra cha cuñí cacu chihin cha saha ñu

circuncidar chi ra, cuñí chi vatyí sacuvi ra tandihí cuí cha catyí ley ra Moisés ñandihí.

4 Tandihí nyoho cha nducú ndo nduvahá ndo nuu Nyoo cha cuenda ley cuan, cha saña tahan ndo chihin ra Cristo cuví cuan. Ta saña ndaha ndo tumañi ñi cha chahá Nyoo chi ndo.

5 Soco yoó chihin cha tyinyee Tatyí Ii Nyoo chi yo ta chinó ñi yo chi ra Cristo. Ta itá ñi yo nduvahá yo nuu Nyoo.

6 Vatyí tatu ñi ri cuví yo chihin ra Cristo Jesús, ñahri tuhun cha sacuví yo costumbre circuncisión, o cha ña sacuví yo. Cha vale ca tatu chinó ñi yo chi ra Cristo. Ta chihin cha chinó ñi yo coo yo, chihin cha cuñí yo chi noo noo tahan yo.

7 Nyoho vaha cuahán ndo quivi cuan. ¿Yoó cha sativi chi ndo? Ta ña tyasohó ca ndo cha ndicha.

8 Tuhun cha sañahá ñu cuan, ñima tuhun Nyoo ra nacana chi yo cuví.

9 Vatyí tari nandaá yuchan pan chihin chiin ri yuchan iya, tyicuan caa tucu noo ri ñáyivi quiñi caa cuví sativi ñu chi cuaha ñáyivi.

10 Nyoo cutachi tuñi ra chi ñáyivi cha sativi chi ndo. Ñahri cuenda ra yóo ñu cuví ñu. Soco yuhu chitó vahi tyi Sutu Mañi yo cutyinyee ra chi ndo tacuhva vatyí nyoho ma caca xiñi ndo inga cuhva cha ña sañahí chi ndo.

11 Ta cha cuenda chi yuhu, yañi, tyehe ta catyí vatyí ñu chinó ini chi ra Cristo cuñí chi cha sacuvi ñu costumbre circuncisión, ra Israel ma caca nyicon ra chii. Ta ma cuquiñi ca cuñi ra chihin tuhun ra Cristo cha chihí nu cruzi cha catyí cuatyí yo.

12 Soco ra sayangá chi ndo chiña, vaha cha quita ra nu nyicu ndo, tacuhva cha ma sayanga ca ra chi ndo.

13 Vatyí nyoho, yañi, nacana Nyoo chi ndo vatyí coo ndo libre. Soco ñima cha cuenda cha iyó ndo libre ta cuví sacuvi ndo ñáa ndihí cha cuñí coño ñuhu ndo. Soco sacuvi ndo tyiño nuu tahan ndo chihin cha cuñí ndo chi ñu.

14 Vatyí iyó noo tuhun Nyoo cha catyí chi: “Cuñi ndo chi tahan ndo tari cuñí ndo chi maa ndo”, catyí chi. Ta tatu ndicha ndicha cha cuñí yo chi tahan yo, ña yí sacuví yo tandihí cha catyí ley chahnu.

15 Saha ndo cuenda vatyi tatu cahán ndo ta satasí ñni ndo chi tahan ndo, cutivi nu nyicu ndo.

Cuhva cuñi coño ñuhu yo ta cuhva iyó yo chihin Tatyí Ii Nyoo

16 Cha cuñi catyi chi ndo ican cuvi ihya: Coo ndo chihin tunyee ñni Tatyí Ii Nyoo. Tyicuan caa ta ma cuvi ca sacuvi ndo cuhva ña vaha cuñi ndo.

17 Vatyi cha sacuvi yo cha ña vaha cha cuñi yo, ñima cuhva cuñi Tatyí Ii Nyoo cuvi. Vatyi Tatyí Ii Nyoo ña cuñi chi cha sacuvi yo cha ña vaha. Ta coño ñuhu yo ña cuñi chi sacuvi chi cuhva cuñi Tatyí Ii Nyoo. Ña nacachí tahan cha cuñi Tatyí Ii Nyoo chihin cha cuñi coño ñuhu yo. Ta yucuan chaha ma cuvi sacuvi yo cha cuñi yo.

18 Soco tatu sacuvi yo cha catyi Tatyí Ii Nyoo chi yo, ma cuvi ca cunyaca ñaha ley chi yo.

19 Ña xehe caa ñu sacuvi cuhva ña vaha cha cuñi coño ñuhu. Yihí ra, iyó ñasihí ra ta iyó inga ñu chi ra. Ta yihí ñu iyó yí ñu ta iyó inga ra chi ñu. Ta yihí ñu sacuvi ñu cha ña vaha chihin coño ñuhu ñu ta iyó viciu chi ñu.

20 Yihí ñu sacahnú ñu xitohyo. Yihí ñu satasí ñu. Yihí ñu tasi cuñi nyehe ñu chi tahan ñu. Yihí ñu cañi tahan ñu. Yihí ñu cuiño ñu. Ta yihí ñu yatyin ñni ñu. Yihí ñu chicá xiñi ñu maa maa ri cha vaha chi maa ñu. Ta yihí ñu iyó división nu nyicu ñu. Vatyi cacañi tahan ñu. Ta tyicuan caa ta cusín ñu.

21 Ta yihí ñu nyiyó ñni ñu cha tyayí. Ta yihí ñu cachahñi chi tahan ñu. Ta yihí ñu tuhva ñu chiñi. Ta yihí ñu chachí cuahyi ñu. Ta sacuvi ñu cuaha ca cha sacuvi ñu. Ta catyi chi ndo tari catyi chi ndo quivi cuan. Vatyi tandihí ñu cha sacuvi tyehe caa ma cuvi naquehen cuenda ñu nu nyacá ñaha Nyoo.

22 Soco cha chahá Tatyí Ii Nyoo, ican cuvi ihya: cha cuñi yo chi Nyoo ta chi tahan yo, cha si cuñi yo, cha taxi cuñi añima yo, cha cama iyó yo chihin ñáyivi, cha masu ñni yo, cha vaha ñáyivi cuvi yo, cha ña cundihñi yo sacuvi yo cha vaha chihin ñáyivi, cha chinó ñni yo chi ra Cristo.

23 Ta inga cha chahá Tatyí Ii Nyoo chi yo, ican cuvi ihya: cha ndahvi sahá yo chi yo, cha ña sacuvi yo cuhva cuñi coño ñuhu yo. Tatu sacuvi yo tandihí cha vaha ihya, ni noo ley ta ma cuvi catyi chi tyi iyó cuatyí yo.

24 Ta yoó cha yihí yo cuenda ra Cristo Jesús, cha sandihí yo tuhun cha sacuvi yo cuhva ña vaha cha cuñi coño ñuhu yo.

25 Ta tari cha iyó yo ñáyivi chaa cha cuenda Tatyí Ii Nyoo, tyicuan caa cuñi tucu chi cha quichahá yo cha saquehen ityi ra chi yo.

26 Ma cahnu saha yo chi yo. Ta ma sacañi tahan yo chi tahan yo. Ma quichi cuvi ñni yo cha chii inga tahan yo.

6

Tahán chi tyinyee yo chi tahan yo

1 Yañi, tatu nanyehé yo sacuvi noo tahan yo cuatyí. Nya yo cha ñihi nyaá yo chihin Tatyí Ii Nyoo tyinyee yo chi ñu na ndunyee ñu inga chaha. Soco cuñi chi cahán vii yo chihin ñu chihin cha vita ñni yo. Ta cuñi chi sahá yo cuenda chi yo coto nducu nyehe tucu cuihna chi maa yo.

2 Na tyinyee yo chi tahan yo ñáá cha cuvi chi ñu. Tatu tyicuan caa sacuvi yo, quichahá vaha yo chi ra Cristo cuvi cuan.

3 Tatu nya noo yo cuñi maa yo vatyi cahnu ñu cuvi yo, ta ñahri ñu cuvi yo, suri chi maa yo sandavi ñaha yo.

4 Ma saha yo tuhun tyi vaha yo tari vaha noo hermano cha vaha chicá chihin Nyoo. Nasaha xihna yo cuenda tatu vaha cha nyacuvi yo. Tyicuan ta coto yo tatu vaha sacuvi yo ta cusí cuñi yo.

5 Vatyi tahán chi cunyee noo noo yo ñáá ndihí cha tyisó Nyoo siqui yo.

6 Ta cuñi chi tyinyeeé ndo chihin cha chiñuhú chi ra cha sañahá tuhun Nyoo chi ndo.

7 Ta ma sandavi ñaha ndo chi ndo. Nyoo yori cuvi cuacu nyaa chi ra. Vatyi tandihí cha tachí ñáyivi, ican cuan cunaquehén ñu. Vatyi tatu sacuvi ñu cha vaha, cha vaha naquehén ñu. Soco tatu sacuvi ñu cha ña vaha, cha ña vaha cuñihi ñu.

8 Tatu noo ñáyivi nyacuvi ñu cuhva ña vaha cha cuñi coño ñuhu ñu, suri maa cha

sacuví ñu cusativi chi chi ñu. Soco tatu nyacuví ñu cuhva cuñí Tatyí Ii Nyoo, Tatyí Ii Nyoo cucuhva noo ñayivi chaa cha ma naa ca maa tyi coo ñu.

⁹ Yucuan chaha ma cutatu yo cha sacuví yo cha vaha. Vatyí tatu ma ndu uvi iñi yo, coo quivi ta naquehen yo cha vaha.

¹⁰ Yucuan chaha tahan ri chaha cha chahá chi cuhva, na sacuvi yo cha vaha chihin tandihí ri ñáyivi. Ta cha xihna cuii ri sacuvi yo cha vaha chihin ñu yihí cuenda Nyoo.

Cusi xaan cuñí ra Pablo vatyí nyehé ra tindoho cha cuenda ra Cristo

¹¹ Nyehe ndo ñana cha nahnu letra tyai chihin ndahi nu tutu ihya vityin.

¹² Ñu cha cuñí saniñí chi ndo vatyí sacuvi ndo costumbre circuncisión, saniñí ra chi ndo vatyí cuñí ra cuvaha ra nuu ñáyivi. Ña cuñí ra nyehe ra tindoho cha cuenda ra Cristo, ra chihí nu cruzi.

¹³ Vatyí ni maa ra cha sacuvi ra costumbre circuncisión cuan ta ña quichahá ra tandihí cha catyí ley. Soco cuñí ra cha sacuvi nyoho costumbre cuan. Vatyí tyicuan caa ta cuví sacahnu ra chi ra vatyí sacuví ndo cuhva catyí ra.

¹⁴ Soco yuhu ña cuñí sacahni chii cha cuenda ñáá ndihí tuhun. Soco si xaan cuñí cha chihí Sutu Mañi yo Jesucristo nu cruzi cha cuenda yuhu. Vatyí cha cuenda cha chihí ra nu cruzi, tari quivi cha yaha chihí cha quiñi caa cha iyó ñayivi ihya. Ta cha yaha chihí tucu mai cha cuenda cuan.

¹⁵ Vatyí tatu nyicón yo chi ra Cristo Jesús, ña niñi xaan cha sacuvi yo costumbre circuncisión o cha ña sacuvi yo. Noo cha niñi ca, cha nanduví yo noo ñáyivi chaa.

¹⁶ Tandihí ndo cha iyó ndo tyehe caa, naquehen ndo cha taxi ri coo aña ndo. Ta na cundahvi cuñi ra nyehe ra chi tandihí ndo, ñu cha ndicha cuví ndo ñáyivi cuenda ra.

¹⁷ Cha vityin ta nu cuahán chi ityi nuu ca, ni nonga ndo ta ma cuhva ca ndo tisihi chii. Vatyí tandihí pehla cha nyaá coño ñuhi, cuñí chi catyí vatyí ndicha cha cuví yuhu noo ra chicá tyiño Sutu Mañi yo Jesús.

¹⁸ Yañi, Sutu Mañi yo Jesucristo na nasoco chi tandihí ndo. Ta tyicuan caa na cuvi chi.

Carta Cha Sacuhun Ra Apóstol Pablo Chi Ñáyivi Ñuu Éfeso Cha Yihí Cuenda Nyoo

*Nu sacuhún ra Pablo noo tutu chi ñu ñuu
Éfeso cha yihí cuenda Nyoo*

¹ Yuhu ra Pablo cuví noo apóstol ra Jesucristo. Vatyí yucuan cuhva cuñí maa Nyoo. Tyaí noo carta ihya chi tandihí ndo cha yihí ndo cuenda Nyoo ñuu Éfeso chiña, ta ní ñi ndo chinó ñi ndo chi ra Cristo Jesús. Ta ñi ri cuví ndo chihin ra.

² Na nasoco Nyoo ta Sutu Mañi yo Jesucristo chi ndo. Ta nacuhva ra cha taxi ri coo aña ndo.

Cha ñi ri cuví yo chihin ra Cristo, Nyoo nasocó xaan ra chi yo

³ Na sacahnu yo chi Nyoo, ra cuví Sutu Sutu Mañi yo Jesucristo. Vatyí nasocó xaan ra chi yo chihin tandihí nuu cha vaha cha iyó andivi cha cuenda cha ñi ri cuví yo chihin ra Cristo.

⁴ Vatyí nyata ni cumañi ca savaha ra ñuhu ñayivi ta nacachi vaha ra chi yo tyi cu ñi ri yo chihin ra Cristo. Vatyí tyicuan caa cundundi yo nuu ra chihin cha ñahri ca cuatyí yo. Cha cuenda cha cuñí ra chi yo,

⁵ ta nyata cha naha ta tyaá ra cuhva chi yo vatyí nanduvi sehe ra chi yo cha cuenda ra Jesucristo. Tyicuan caa sacuvi ra vatyí yucuan cuhva cuñí maa ra.

⁶ Yucuan chaha tyicuan ri sacahnú yo chi ra. Vatyí vaha xaan ñayivi cuví ra. Ta cahnu xaan tumañi ñi chahá ra chi yo. Vatyí sacu ñi ri ra chi yo chihin Sehe ra, ra cha cuñí xaan ra chi.

⁷ Ta cha cuenda cha cuñí xaan Nyoo chi yo, natava ra chi yo ndaha ra ña vaha, tacuhva cha ma cutuñi chi yo. Vatyí chihin cha chati ñi Sehe ra, sandachí ra cuatyí yo. Ta tyicuan caa sahá Nyoo tcahnu ñi chi yo.

⁸ Ta vatyí cahnu xaan tumañi ñi sahá ra chi yo, chahá xaan ra cha chiñi tuñi ra chi yo.

⁹ Ta chahá ra cha cutuñi ñi yo tuhun ra cha ña chito ñayivi. Vatyí sacotó ra chi yo yoso cuhva tyaá ra cuhva tyi sacuvi ra chihin tandihí cha iyó cha cuenda ra Cristo.

¹⁰ Vatyí coo quivi cuchino cava cha tyaá ra cuhva tyi sacuvi ra. Vatyí cusandu ñi ri ra tandihí cha iyó ihya ñayivi ta cha iyó andivi, ta tandihí cucunyaa ndaha ra Cristo. Vatyí maa ra cucunyaca ñaha ra tandihí.

¹¹ Cha cuenda ra Cristo ñihí tucu maa yo cha tahán chi chi yo. Vatyí Nyoo nyata cha naha nacachi ra chi yo tyi cu ñi ri yo chihin ra Cristo. Tyicuan caa tyaá Nyoo cuhva tyi cusacuvi ra. Ta maa ra sacuvi tandihí yoso cuhva nyehé maa ra tyi vaha.

¹² Ta tyehe caa sacuvi ra tacuhva vatyí nyuhu cha nachino ñi ndi chi ra Cristo cha xihna ri, coo ndi soco cha sacahnu ndi chi Nyoo cha cuenda cha cahnu cuví maa ra.

¹³ Ta tyicuan caa tucu nyoho. Vatyí quivi chiñi ndo tuhun Nyoo cha ndicha vaha, catyi ñu chi ndo tuhun ra Cristo yoso caa sacacú ra chi yo. Ta chinó ñi ndo chi ra. Ta ndu ñi ri ndo chihin ra. Ta tari cha tyaá Nyoo tuñi ra chi ndo cuví cuan, vatyí chaha ra Tatyí Ii ra cohon aña ndo, tari cuhva catyi ra tyi sacuvi ra.

¹⁴ Ta ican maa Tatyí Ii cuví cha chaha quivi ri Nyoo chi yo tacuhva cuví naquehen ca yo cha cucuhva ra chi yo. Vatyí tyinyeé Tatyí Ii ra chi yo nyacua nya quivi ndihí sacacu ra chi yo, cha cuví yo ñayivi chi ra. Ta tandihí ihya sacuvi ra chihin yo tacuhva sacahnu yo chi ra. Vatyí maa ra cahnu ca ra cuví ra.

¹⁵⁻¹⁶ Yucuan chaha, cuhva cha chicán tahvi chi Nyoo, ña sandihí tuhun cha nacuhvé tyahvi nyoo chi ra cha cuenda ndo. Vatyí ñihí tuhun tyi chinó vaha ñi ndo chi Sutu Mañi yo Jesucristo. Ta cuñí xaan ndo chi tandihí ñu tahan yo ñu yihí cuenda Nyoo.

¹⁷ Chiquén chi Nyoo Sutu Sutu Mañi yo Jesucristo. Vatyí ican ra cuví ra cahnu ca. Ta chiquén chi ra nacuhva ra cha chiñi tuñi Tatyí Ii ra chi ndo, tacuhva cutuñi ñi ndo cha sañahá ra chi ndo. Vatyí cohon nuu vaha ca ndo chi ra.

¹⁸ Ta chiquén chi ra, na nuña ra cha chiñi tuñi xiñi ndo, na coto ndo ñaá cha cuñi ra

cha naquehen ndo cha cuenda cha cana ra chi ndo. Ta na coto ndo ñana cha tyaqui ta tyayii cha chahá Nyoo chi yo ñu yihí cuenda ra.

¹⁹ Ta chiquén chi Nyoo tyi cuhva ra cha coto ndo ñana cha cahnu tunyee iñi iyó chi ra, nyacua ña cuví tyicuhva yo. Ta ican cuan tyinyeé chi yo cha chino iñi yo chi ra. Ta suri maa chihin tunyee iñi ihya

²⁰ Nyoo sanandoto ra chi ra Cristo. Ta cuatyaa ra chi ra chiyo vaha ra nya andivi.

²¹ Ta yucuan cuví nu sacahnú xaan ca Nyoo chi ra Cristo cha nuu tandihí ca cha nyacá ñaha siqui ñuhu ñayivi ihya ta andivi ñandihí. Cuví ri tandihí rey, o cuví ri ra cuví tyiño nahnu, o cuví ri ángel andivi. Soco yori yóo ca ra cahnu ñayivi ihya ta niri ñayivi cha cua coo. Vatyí noo tuhun ri maa ra Cristo cuví ra cahnu cuví.

²² Ta tandihí cuíi maa chaha Nyoo tyi cunyaca ñaha ra Cristo. Ta suri chi maa ra chaha Nyoo vatyí cuví ra xiñi o nuu chi ñu yihí cuenda ra.

²³ Vatyí yoó, cha yihí yo cuenda ra, cuví yo coño ñuhu ra. Ta maa yo ta maa ra cuví chi noo coño ñuhu nani ra. Ta maa ra cuví ra sandunani tandihí.

2

Sacacú Nyoo chi yo cha cuenda cha cuñi ra chi yo

¹ Nyoo chaha ra noo ñayivi chaa chi ndo tyi coo ndo quivi ndu in ri ndo chihin ra Cristo, vasi nicaa ni iñi ndo cuatyí quivi cuan. Ta tari maa cha chihí añima ndo tyi ñahri maa ñayivi Nyoo chinyaa añima ndo.

² Ta chinyacuví ndo cuhva nyacuví ñayivi ña ñohó nuu Nyoo. Ta chinyicon ndo chí cuihna ra cuví nuu. Ta ican ra cuví tatyí ña vaha cha tyiyuhú chi ñu ña quichahá nu cahán Nyoo.

³ Ta suri tyicuan caa chiyo tucu yoó quivi cuan. Vatyí chinyacuví yo cha ña vaha cha quichi cuví iñi yo cha cuñi coño ñuhu yo. Ta sacuví yo yoso cuhva chica xiñi yo. Ta cha cuenda tuhun cha chinyacuví yo tahan chí tachi tuñi Nyoo chi yo inuu ri chihin tandihí ca ñu sacuví cha ña vaha.

⁴ Soco Nyoo cundahvi xaan cuñi ra nyehe ra chi yo. Vatyí cuñi xaan ra chi yo.

⁵ Ta vasi cuaha xaan cuatyí yo quivi cuan, tari quivi cha chihí añima yo chihin cuatyí cuan, soco Nyoo chaha ra cha conyito añima yo noo ñayivi chaa, vatyí sacú in ri ra chi yo chihin ra Cristo. Ta cha cuenda tumañi iñi cha saha Nyoo chi ndo ta cacu ndo.

⁶ Ta tari quivi cha sanandoto Nyoo añima yo quivi nandoto ra Cristo Jesús. Vatyí iyó yo noo ñayivi chaa cha chaha maa Nyoo tyi coo yo. Ta tari quivi cha cuatyaa ra chi yo andivi.

⁷ Ta sacuví Nyoo tyehe caa tacuhva vatyí nu cuahán ca chi quivi cusañaha ra chí tandihí ñayivi yoso cuhva cha cahnu tumañi iñi chaha ra chi yo cha cuenda ra Cristo Jesús. Vatyí vaha xaan ñayivi cuví ra chihin yo tyi sacú in ri ra chi yo chihin ra Cristo.

⁸ Vatyí cha sacacú Nyoo chi yo cuví chi noo cha chahá ra chi yo. Ta naquehén yo tumañi iñi cuan chihin cha chinó iñi yo chí ra. Ta cha sacacú Nyoo chi yo ñima noo cha cuví sacuví maa yo cuví. Vatyí yucuan cuví noo tumañi iñi cha sacuví ra chihin yo.

⁹ Ñima cha cuenda cha sacuví yo cha vaha ta cuita iñi yo cha sacacú cuan chí yo. Tyehe ta cuví chi tyicuan caa, cahnu cusaha yo chí yo.

¹⁰ Nyoo sacuví ra vatyí nduvaha añima yo chihin cha ndu in ri yo chihin ra Cristo Jesús. Ta sacuví ra tyehe caa tacuhva vatyí cuví sacuví yo cha vaha. Vatyí maa ra tyaa ra cuhva nu quichi quivi vatyí tyicuan ri sacuví yo cha vaha.

Cuví ri yo ñu Israel, o cuví ri yo ñu inga ñuu, soco cha cuenda ra Cristo in ri ñayivi chí Nyoo cuví tandihí yo

¹¹ Yucuan chaha nicohon iñi ndo cuhva chiyo ndo nu quichí quivi, tyi cuví ndo ñayivi cha ñima ñu Israel cuví. Ta catyí ñayivi Israel tyi ñu cha ñima ri tuhun cuví ndo cha ña sacuví ndo costumbre circuncisión tari sacuví maa ra. Ta cha cuenda cuan cuñi maa ra Israel tyi vaha ra nuu Nyoo ta nyoho ña vaha ndo.

¹² Nicohon iñi ndo vatyí nu quichi chí, yori ra Cristo chinyaa añima ndo. Ta ña in ri cuví ndo chihin ñu Israel. Ta ña chito ndo tuhun cha tyihí tahan Nyoo chihin ra Abraham: tuhun cha catyí Nyoo tyi cuhva

ra cha nicoo vaha yo chihin ra. Chiyo maa ndo ñuhu ñayivi ihya chihin cha yori Nyoo nyaá chihin ndo, ta ña yihí iñi ndo cha cuñihi ndo.

¹³ Ta quivi cuan cañi xaan chinyaa ndo chihin Nyoo. Soco vityin ñin ri cuví ndo chihin ra Cristo Jesús. Maa ra Cristo chihí ra. Ta chati niñi ra cha catyi ndo. Ta yucuan chaha cuví cuyatyin ndo nuu Nyoo.

¹⁴ Vatyí ra Cristo sanicoo vaha ra chi yo chihin Nyoo. Ta sandu ñin ri ra chi ninduvi yo. Sandu ñin ri ra chi nyuhu cha cuví ndi ñu Israel chihin nyoho cha cuví ndo ñu inga ñuu. Ta sanduvaha ra cuhva iyó yo. Vatyí tari noo cha sanduva ra noo nama vehe cha nanyaa mahñu, cha chasi nu cu ñin ri yo.

¹⁵ Maa ra Cristo sandihí ra tuhun ley chahnu chihin cha chaha cuenda ra coño ñuhu ra tyi cúvi ra nu cruzi. Vatyí tandihí ley cuan sasñin chi chi yo. Tyi nyuhu sacuvi ndi costumbre cha catyí ley cuan. Ta nyoho ña sacuvi ndo. Soco ra Cristo sandu ñin ri ra chi yo quivi chaha ra noo cuhva chaa tyi coo yo. Ta tyicuan caa sanicoo vaha ra chi yo.

¹⁶ Vatyí chihí ra nu cruzi cha catyi cuatyí yo. Ta sacuvi ra vatyí nanduvaha coo yo chihin Nyoo. Ta tyicuan caa sanaa ra cha ña cuñi nyehe yo chi tahan yo.

¹⁷ Ra Cristo quichí ra ta cahan ra tuhun vaha Nyoo chihin yo: chihin nyoho cha cañi ca chinyicu ndo chihin Nyoo ta chihin nyuhu ñu Israel, ñu chitó tuhun Nyoo. Catyí ra chi yo vatyí na nicoo vaha yo chihin Nyoo.

¹⁸ Vatyí chaha cha catyi cha chihí ra Cristo cha cuenda yo cuví natuhva ninduvi yo chi Nyoo Sutu yo. Vatyí noo ri Tatyí Ii ra nyaá añima yo: an cuví ri yo ñu Israel, an cuví ri yo ñu cha ñima ñu Israel cuví.

¹⁹ Yucuan chaha nyoho ña cuví ca ndo ñu inga ñuu. Soco nanduvi ndo ñáyivi ñuu Nyoo ñin ri chihin tandihí ñu yihí cuenda ra. Nanduvi ndo ñáyivi chi ra.

²⁰ Ta cuví tucu ndo tari noo vehe. Ta ra apóstol, ta ra profeta, ra cachahá cuenda tuhun Nyoo cacuví ra tari ra catyihí yuu chaha vehe. Vatyí suri maa ra Cristo cuví yuu cha niñi ca cha yihí chaha vehe cuan.

²¹ Ta cha cuenda maa ra Cristo cuahan ndaa vehe cuan ta vehe cuan ican cuví maa yo ñin ri chihin ra. Ta cuahan sandu ñin ri ra chi tandihí yo ta nanduví yo tari noo vehe ii nu nyaá maa Sutu Mañi yo.

²² Ta tyicuan caa tucu nyoho chihin tandihí ñu yihí cuenda Nyoo, nanduví ndo tari noo nu iyó Nyoo. Vatyí nyaá Tatyí Ii ra añima tandihí yo.

3

Nyoo tachí ra tyiño chi ra Pablo vatyí cahan ra tuhun ra chihin ñu cha ñima ñu Israel cuví

¹ Yucuan chaha yuhu ra Pablo ñohí vehe caa ihya vatyí sacoté tuhun ra Cristo Jesús chi nyoho cha ñima ñu Israel cuví ndo.

² Tahán chi natyihí tuñi iñi ndo tyi cahnu xaan tumañi iñi chahá ra chii cha cuenda cha vaha chi ndo, tyi sacoté chi ndo.

³ Vatyí cha yaha catyí suhva chi ndo yoso caa sañaha Nyoo chii noo tuhun xehe.

⁴ Ta cuhva cha sacuha ndo tuhun cha yaha catyí chi ndo, cuví coto ndo yoso caa chaha Nyoo tyi cutuñi iñi tuhun ra Cristo cha ña chitó ñáyivi.

⁵ Vatyí nu quichí chi, ña sañaha Nyoo chi ñáyivi, tari sañahá ra chi apóstol ta ra cacuví profeta cha vityin. Vatyí Nyoo chihin Tatyí Ii ra sañahá ra chi yo cha vityin.

⁶ Ta tuhun xehe cuan, ican cuví ihya: vatyí nyoho cha ña cuví ndo ñu Israel, ñin ri cha cutahan chi chi ndo chihin nyuhu cha cuví ndi ñu Israel. Vatyí noo ri coño ñuhu ra Cristo cuví yo. Ta cuñihi yo cha catyí Nyoo tyi cuhva ra chi yo cha cuenda maa ra Cristo Jesús.

⁷ Saha Nyoo tumañi iñi chi yuhu vatyí chaha ra tunyee iñi ra chii tyi sacoté tuhun vaha ihya chi ñáyivi.

⁸ Soco cha cuenda chi yuhu cuví noo ra luhlu, noo ra ndahvi ca cha nuu tandihí ca ñu yihí cuenda Nyoo. Soco sahá Nyoo tumañi iñi ihya chii. Vatyí tacuhva cahin tuhun ra Cristo chihin ñu cha ñima ñu Israel cuví. Ta sacoté chi ñu ñana cha tyayii cha cuñihi ñu cha cuenda ra Cristo.

⁹ Tyatyíño Nyoo chii tyi sacote chi tandihí ñáyivi yoso caa tyaá ra cuhva nyata ni cumañi ca savaha ra tandihí cha iyó. Ta cha

naha ña chaha Nyoo cha coto ñáyivi tuhun ihya.

¹⁰ Tyicuan caa cuví tacuhva vatyí vityin tandihí ra nyacá ñaha andivi cunyehe yoso caa cha vaha cha sacuví Nyoo chihin yo cha cuví yo ñu yihí cuenda ra. Ta cucoto ra tyi chiñi tuñi xaan Nyoo.

¹¹ Tandihí ihya chachí tahan chihin cha tyaa Nyoo cuhva tyi sacuvi ra chihin Sutu Mañi yo Jesucristo cha cuenda cha vaha chi yo.

¹² Ta cha cuenda maa ra Cristo iyó chi ityi chi yo cha chaá yo nuu Nyoo chihin cha ña yuhví yo. Vatyí chinó iñi yo chi ra Cristo.

¹³ Yucuan chaha chacú ndahvi nuu ndo tyi ma ndu uvi iñi ndo chi Nyoo cha nyehi tindoho cha cuenda ndo. Vatyí cuví chi cha cuenda cha vaha chi maa ndo. Ta cusii cuñi ndo cha cuenda ihya.

Chicán tahvi ra Pablo chaha ñu, na cohon nuu ca ñu chi ra Cristo

¹⁴ Yihí iñi yoso cuhva cha vaha cha tyaa Nyoo Sutu yo cuhva tyi cuhva ra chi yo. Ta yucuan chaha chicuñi chiti nuu ra.

¹⁵ Maa ra cuví ra Sutu tandihí ñáyivi cuenda ra: ñu cha cuahan coyo andivi, ta ñu cha iyó ca siqui ñuhu ñáyivi. Tandihí yo cuví yo ñáyivi chi ra.

¹⁶ Ta chiquén chi ra na sandunyeer ra iñi ndo chihin Tatyí Ii ra cha nyaá aña ndo. Vatyí maa ra cahnu xaan ca cha tyayii ra chahá ra chi yo.

¹⁷ Ta na coo ra Cristo aña ndo vatyí chinó iñi ndo chi ra. Ta coo ndo chihin cha cuñi Nyoo chi ndo. Vatyí tari yihí vaha yoho noo yutun chichi ñuhú, tyicuan caa cunyaa vaha aña ndo chihin Nyoo.

¹⁸ Tyicuan ta cuacoo tunyee iñi ra chi ndo tacuhva cuvi çutuñi vaha iñi ndo chihin tandihí ñu yihí cuenda ra vatyí cuñi xaan ra Cristo chi yo. Nyacua ña ñihí ca yo cuhva catyi yo yoso cuhva cha cuñi ra chi yo.

¹⁹ Vatyí yaha xaan cahnu cuan. Nyacua ma cuvi cohon nuu yo yoso cha cuñi ra chi yo. Soco cuñi cha nacoto ndo yoso cha cuñi ra chi yo. Tyicuan ta ñahri ca cumañi chi ndo. Vatyí Nyoo nyaá maa ra chihin ndo.

²⁰ Ta vityin na sacahnu yo chi Nyoo, ra cha iyó xaan ca tunyee iñi chii. Vatyí cuaha vavaha ca cha cuví sacuvi ra cha

nuu cuhva cha chicán maa yo chi ra o cha nuu cuhva cha chicá xiñi yo. Vatyí suri chihin tunyee iñi ra cha iyó chi yo, sacuví ra tandihí.

²¹ Yoó ñu chino iñi chi Nyoo, na sacahnu yo chi ra tyicuan ri maa, ta tandihí tyembu cha cuenda cha sacuvi ra Cristo Jesús. Ta na cuvi chi tyicuan caa.

4

Cha cuenda Tatyí Ii Nyoo ñn ri cuví tandihí yo cha yihí yo cuenda ra Cristo

¹ Yucuan chaha yuhu cha ñohí vehe caa cha cuenda Sutu Mañi yo chacú ndahvi nuu ndo na cachi coo ndo tari cuhva tahan chi coo ñu cha nacana Nyoo chii. Vatyí chi nyoho nacana Nyoo tyi cuví ndo ñáyivi chi ra.

² Ndahvi saha ndo chi ndo. Ta vaha cahan ndo chihin ñáyivi. Cama cuvi iñi ndo. Ta cunyeer ndo ñáá cha sahá noo noo tahan ndo chi ndo chihin cha cuñi ndo chi ñu.

³ Nducu ndo cuhva cha tyicuan ri cu ñn ri ndo chihin tahan yo. Vatyí maa Tatyí Ii Nyoo tyinyee chi yo, na coo vaha yo chihin tahan yo.

⁴ Vatyí iyó noo ri coño ñuhu ra Cristo. Ta ican cuan cuví tandihí yo. Ta tari cha noo ri Tatyí Ii Nyoo iyó, tyicuan caa tucu iyó noo cha chitó cachi yo tyi cunaquehen yo tyi nacana ra chi yo.

⁵ Ta iyó noo ri Sutu Mañi yo nyacá ñaha chi yo. Ta noo ri chi maa ra chinó iñi tandihí yo. Ta noo ri cha cuenda maa ra condutya yo.

⁶ Ta noo ri Nyoo iyó ta maa ra cuví ra Sutu tandihí yo. Ta maa ra nyacá ñaha chi tandihí yo. Ta chotyíño ra chi tandihí yo yoso cuhva cuñi maa ra. Ta nyaá ra aña tandihí yo.

⁷ Chaha ra Cristo noo cuhva chi noo noo yo, vatyí sacuvi yo tyiño nuu ra yoso cuhva cuñi maa ra cuhva ra.

⁸ Yucuan chaha cahan Nyoo tuhun ra Cristo nu catyí chi:

Cuvi chasaha ra chi ra xaan iñi chi ra, ta nandaa xica ra andivi chihin ñu tava ra ndaha ra ña vaha.

Ta chaha ra cuhva yoso cuhva cusaha tyiño ñu tyiño nuu ra, catyí chi.

⁹ ¿Ta ñáá cha cuñí chi catyi cha nandaa xica ra cuan? Cuñí chi catyi vatyí noo xihna ra nya yuvi ca nu ñuhu ñayiví.

¹⁰ Ra cha noo cuan, nandaa tucu ra nya nu sucun ca andiví. Vatyí tyicuan caa ta cuví sacutu ra tandihí maa ta cunyaa ra chihin yo tandihí ityi.

¹¹ Ta suri maa ra Cristo chaha ra cha vaha chi yo. Chi suhva yo chaha ra tyi cuvi yo apóstol ra. Ta chi inga yo chaha ra cha cuhva cuenda yo tuhun cha chahá ra chi yo, o saha yo profetizar cuví cuan. Ta chi inga yo chaha ra tyi sacoto yo chi ñáyiví yoso caa sacacú ra añima yo. Ta chi inga yo chaha ra cha quihí ndaha yo chi ñu yihí cuenda ra, ta chi inga yo chaha ra cha cuví sañaha yo tuhun ra chi ñu.

¹² Tyicuan caa chaha Nyoo tyiño chi yo vatyí cunyaa yo tyiño cha sandunyeé yo iñi tahan yo vatyí cuví yo coño ñuhu ra.

¹³ Nyacua nya cu ñin vaha tandihí yo cha cuenda cha chinó vaha iñi yo chi Sehe Nyoo. Ta cohon nuu vaha yo chi ra. Tyicuan caa ta cutu yo chihin tandihí cha vaha cha chaha ra Cristo chi yo.

¹⁴ Yucuan ta ma cuvi ca yo tari ra cuaryaa. Vatyí totyehe ri chino iñi ndotyín ñáá noo tuhun cha ñima ri tuhun sandaví ñaha ñu chi ndotyín. Ta coto cutondo xiñi yo tyicuan caa chihin tuhun cha ña ndicha cha sañahá ñu sandaví ñaha.

¹⁵ Soco cha nuu cha cuví yo tari ra cuaryaa, cuñí chi cha cahán yo cha ndicha chihin cha cuñí yo chi Nyoo ta chi ñáyiví. Ta ndunyeé ca añima yo chihin ndi cha vaha cha iyó chi Nyoo. Ta cuahnu yo chihin ra Cristo, cha cuví ra nuu chi yo.

¹⁶ Ta cha cuenda ra Cristo tandihí yo cha cuví yo coño ñuhu ra, ñin ri cuvi yo. Tari yihí tahan noo coño ñuhu, ta sahá tyiño tahan tahan nu yihí tahan chi, yoso cuhva tyiño cha tahán chi chi, ta tyicuan caa tyinyeé chi chi coño ñuhu, na coo vaha chi ta cuahnu chi, ta tyicuan caa yoó, cuñí yo chi tahan yo ta tyinyeé yo chi ñu.

Ñayiví chaa cha tahán chi coo yo cha cuenda ra Cristo

¹⁷ Ican ihya cuví cha chahí cuenda chi ndo, catyí Sutu Mañi yo. Ta cuñí chi cha quichaha ndo. Ma coo ca yo tari iyó ñu ña

ñohó nuu chi Nyoo. Vatyí maa ri maa cha chiñi tuñi tondo chicá xiñi ñu.

¹⁸ Ta ña cutuñí iñi ñu, tyi ñima ñayiví Nyoo iyó ñu. Vatyí ña chitó ñu, cha cuenda cha ndava añima ñu.

¹⁹ Ña cahán ca nuu ñu cha sacuví ñu cha ña vaha. Ta nacuhva cuenda ñu chi ñu chi cha quiñi caa. Cuaña xaan cha ña vaha quichi cuvi iñi ñu.

²⁰ Soco ñima tyicuan caa cutuhva yo. Vatyí ñima tyicuan caa cuhva iyó ra Cristo.

²¹ Tatu ndicha tyi chiñi yo cha cahan ra chihin yo, ta cutuhva yo cha ndicha cha sañaha ra chi yo,

²² ma coo ca yo cuhva chiyo yo quiví cuan. Vatyí chiyo yo ñayiví chahnu quiñi caa. Vatyí cha quichi cuvi iñi yo sandaví ñaha chi chi yo.

²³ Nacuhva cuenda yo chi yo chi Nyoo na nasama ra cuhva chicá xiñi yo.

²⁴ Ta nacoo yo noo ñayiví chaa chihin noo añima chaa cha savahá Nyoo. Ta cuvi yo noo ñu vaha cha ndicha ndicha, noo ñu cachi iyó nuu Nyoo tari maa ra.

²⁵ Yucuan chaha ma cahan ca yo cuendu. Cahan yo maa maa ri cha ndicha chihin tahan yo. Vatyí ñin ri ñáyiví cuvi yo.

²⁶ Tatu cuxaan yo, saha yo cuenda coto sacuvi yo cha ña vaha. Ta suhva ri cuhva cuxaan yo. Ma cuxaan yo ndiyaca.

²⁷ Ta ma cuhva yo cuhva chi ra ña vaha.

²⁸ Ra cha tuhva suhu quiví cuan, ma suhu ca ra vityín. Soco saha tyiño vaha ra chihin ndaha ra. Tyicuan caa ta coo cha chii ra, tacuhva cuvi tyinyee ra chi ñu cha chiñuhú chii.

²⁹ Ma cahan yo cha quiñi caa. Cahan yo, soco maa ri cha vaha cha tyinyee ta sacuahnu chi ñu chiñi tuhun cahán yo.

³⁰ Ta ma cuhva yo tucuihya iñi chi Tatyí Ii Nyoo. Vatyí chaha Nyoo Tatyí Ii ra chi yo tari noo tuñi ra tyaá ra añima yo nyacua nya quiví ndihí sacacú ra chi yo.

³¹ Ta ma xaan cuñi yo. Ta ma cuxaan yo. Ta ma quihí tisihi iñi yo. Ma cana chaa yo siqui tahan yo. Ma cahan uhvi yo chi tahan yo. Ta ninoo cha ña vaha ma caca xiñi yo.

³² Soco vaha ñáyiví cuvi yo chihin tahan yo. Ta cundahvi cuñi yo nyehe yo chi ñu. Ta saha yo ticahnu iñi chi ñu, tari Nyoo sahá

ra ticahnu iñi chi maa yo cha cuenda ra Cristo.

5

Yoso caa tahán chi coo ñáyiví yihí cuenda Nyoo

¹ Yucuan chaha nanducu yo cuhva coo yo tari cuhva iyó maa Nyoo. Vatyí sehe ra cuví chi yo. Ta cuñí xaan ra chi yo.

² Vita cuví iñi yo. Cuñi yo chi tahan yo, tari ra Cristo cuñí ra chi yo. Ta tari noo mbee luhlu cha tuhva tata sutu cachaha ra chi Nyoo ta cha naha, tyicuan caa chaha cuenda ra Cristo chi ra cha cuenda yo. Ta sii xaan cuñí Nyoo cha cuenda cha chaha cuenda ra chi ra.

³ Soco vityin cha cuví yo ñáyiví yihí cuenda Nyoo, ña tahán chi sacuví yo cha quiñi caa chihin coño ñuhu yo. Ni ña tahán chi cha cahán yo cha quiñi caa. Ta ni ma nyiyo iñi yo.

⁴ Ma cahan yo tuhun cha chahá ticahan nuu. Ni ri ma cahan yo noo tuhun cha ñima ri tuhun. Vatyí ña tahán chi cahan yo cha tyicuan caa. Soco cha nuu cha cahán yo cha ña tahán chi, na nacuhva yo tyahvi nyoo chi Nyoo.

⁵ Vatyí cha chitó yo vatyí tandihí ñu cha sacuví cha quiñi caa, ma quihvi ñu nu nyacá ñaha ra Cristo chihin Nyoo. Ra iyó chihin ñusihi ta ñima ñasihi ra cuví, o ñu iyó chihin rayi ta ñima yí ñu cuví, ñu nyiyó iñi, ma quihvi ñu nu nyacá ñaha Nyoo. Vatyí cha nyiyó iñi yo tari cha sacahnú yo xitohyo cuví cuan. Vatyí tavá xiin yo chi Nyoo.

⁶ Ma cuhva yo cha sandavi ñaha ñáyiví chi yo chihin tuhun cha ña ndicha, tuhun cha ñima ri tuhun. Vatyí tachí tuñi Nyoo chi ñu cha ña quichahá chi ra.

⁷ Ta ni ma cutahan yo chihin ñu cuan.

⁸ Vatyí chiyó yo nu ñaa iñi quiví cuan. Soco vityin iyó yo nu ndichin chihin Nyoo. Cachi coo yo tari tahán chi coo ñu chitó tuhun Nyoo.

⁹ Vatyí Nyoo sacundichín ra aña yá yo ta sacuvi yo cha vaha ta cha ndicha.

¹⁰ Saniñi yo cutuhva yo cuhva tahán iñi Sutu Mañi yo.

¹¹ Ma sacuvi yo cha nyacuví ñu nyicú nu ñaa iñi. Vatyí ñahri cha vaha ñihí ñu chihin cuan. Soco sacoto yo chi ñáyiví tyi ña vaha cuan.

¹² Vatyí cahán nuu yo cha cahán yo tuhun cha nyacuví ñu cuan cha xehe ri.

¹³ Soco quiví quita cha ñohó xehe nu ndichin, tyicuan ta cucoto yo cha ndicha. Vatyí cha ndichin Nyoo sanatuví tandihí cha ñohó xehe.

¹⁴ Yucuan chaha iyó nu catyí chi: Yoho cha quixun, ndicuita mahñu nu nyicú ñu chihí chiña.

Ta ra Cristo cusacata ra ñuhu nu cuahún, catyí chi.

¹⁵ Yucuan chaha saha yo cuenda cuhva iyó yo. Ta ma coo yo tari noo ra soho. Coo yo tari noo ra chitó.

¹⁶ Ma sacunaa yo quiví yo. Na cahan yo tuhun Nyoo chihin ñáyiví. Vatyí vityin quiñi xaan caa ñáyiví iyó yo, ta ña naha ca iyó yo.

¹⁷ Yucuan chaha ma tondo xaan cohon iñi yo. Soco nandichi xiñi yo cuhva cuñí maa Sutu Mañi yo tyi sacuví yo.

¹⁸ Ma coho yo ndixi. Vatyí ican cuan sativí chi yo. Soco cuhva yo na cunyaca ñaha vaha Tatyí Ii Nyoo aña yá yo.

¹⁹ Cahan yo chihin tahan yo soco chihin cha sacahnú yo chi Nyoo. Cata yo salmo cuenda ra. Cata yo yaa cha chahá Tatyí Ii chi yo. Sacahnu yo chi Sutu Mañi yo chihin cha tandihí aña yá yo.

²⁰ Tyicuan ri nacuhva yo tyahvi nyoo chi Nyoo Sutu yo cha cuenda tandihí maa, vasi sii cuñí yo, vasi nyehé yo tindoho. Nacuhva yo tyahvi nyoo chi ra chihin sivi Sutu Mañi yo Jesucristo.

Na coo vaha yo chihin tahan yo cuenda ra Cristo, catyí ra Pablo

²¹ Quichaha yo nu cahán inga tahan yo cuenda ra Cristo. Vatyí sahá yo ñáyiví chi ra Cristo.

²² Nyoho ñu iyó yí quichaha ndo cha cahán Sutu Mañi yo. Ta tyicuan caa tucu quichaha ndo nu cahán yí ndo.

²³ Vatyí rayi ican ra cuví nuu chi ñasihi ra, tari cuhva cuví ra Cristo nuu chi ñu yihí cuenda ra. Ta suri maa ra sacacú ra chi yo cha cuví yo coño ñuhu ra.

24 Soco tari tahán chi cha quichahá ñu yihí cuenda ra Cristo chi ra, tyicuan caa cuñi tucu chi cha quichahá ñusihi tandihi cha catyí yí ñu.

25 Ta rayí cuñi chi cha cuñi ra chi ñasihi ra, tari cuñi ra Cristo chi yo cha yihí yo cuenda ra. Ta chahá ra ñayivi ra cha catyí yo.

26 Tacuhva vatyí sandundi ra aña yá yo. Ndi aña yá yo vatyí nacatyá ra quivi cha nachino iñi yo tuhun cahán ra ta condutyá yo.

27 Ndoq aña yá yo tari ndoq noo sahama, ña yacua ca chi, ña tiyi ca chi. Vatyí ra Cristo sandundi ra chi yo cha cuví yo ñu yihí cuenda ra. Tacuhva cuví nacuhva cuenda ra chi yo chi Nyoo, soco vaha yo, ñahri ca cuatyí yo.

28 Ta tyicuan caa tucu cuñi chi cha cuñi rayí chi ñasihi ra, tari cha cuñi ra chi coño ñuhu ra. Vatyí tatu cuñi ra chi ñasihi ra, tari cha cuñi ra chi maa ra cuví cuan.

29 Vatyí yori noo yo cha ña cuñi nyehe yo chi coño ñuhu yo. Soco sacachí yo ta sacuihnó yo chi coño ñuhu yo. Ta ra Cristo suri tyicuan caa sacuví ra chihin ñu yihí cuenda ra.

30 Vatyí coño ñuhu ra cuví yo. Ta noo noo yo cuví yo suhva coño ñuhu ra ta yiqui ra.

31 Catyí tuhun Nyoo: “Rayí sandoó ra chi sutu ra ta chi sihi ra. Ta ndu in ri ra chihin ñasihi ra. Ta noo ri nanduví ñu.”

32 Ta yuhu catyí vatyí ihya cuví noo tuhun xehe cha cahnu xaan. Ta cuñi chi catyí tyi ra Cristo ndu in ri ra chihin ñu yihí cuenda ra.

33 Ta sin ri cuñi tucu chi catyí vatyí tahan tahan ndo cuñi ndo chi ñasihi ndo, tari cuñi ndo chi maa ndo. Ta nyoho cha cuví ndo ñusihi, saha ndo ñayivi chi yí ndo.

6

1 Nyoho cha cuví ndo sehe, tahán chi cha tyasoho ndo nu cahán sutu ndo ta sihi ndo. Vatyí cuñi ndo chi Nyoo.

2-3 Nu tutu Nyoo nyaá cha xihna ri sacuvi yo ta nañihi yo cha cucuhva Nyoo chi yo. Catyí chi: “Saha ndo ñayivi chi sutu ndo, chi sihi ndo. Tyicuan caa ta si xaan cuacoo ndo. Ta naha xaan cuacoo ndo ñayivi ihya”, catyí Nyoo.

4 Ta nyoho cha iyó sehe ndo, ma nanducu ndo cha cuxaan sehe ndo. Soco sañaha ndo tuhun Nyoo chi ñu, ta yoso caa quichaha ñu chi ndo ta chi Nyoo.

5 Ta nyoho cha cuví ndo musu, quichaha ndo chi chitoho ndo siqui ñuhu ñayivi ihya. Saha ndo ñayivi chi ñu. Quichaha ndo chi chitoho ndo chihin cha ñi iñi ndo. Tatu sacuví ndo tyicuan caa, chi ra Cristo quichahá ndo cuví cuan.

6 Ma saha tyiño ndo cuhva cha nyehe ri chitoho ndo tacuhva vatyí catyí ñu tyi vaha ndo. Soco saha tyiño vaha ndo tari cha vatyí sacuví ndo tyiño nuu ra Cristo. Ta tyicuan caa sacuví ndo cuhva cuñi Nyoo chihin cha ñi aña yá ndo.

7 Chihin cha iyó vaha iñi ndo sacuvi ndo. Tari cha sahá tyiño ndo nuu Sutu Mañi yo ta ñima nuu ñayivi.

8 Vatyí cha chitó yo tyi tahan tahan yo, an cuví ri yo musu, an ñima, soco cutiyahvi Sutu Mañi yo chi yo yoso cuhva cha vaha cha chinyacuví yo.

9 Ta nyoho cha iyó musu ndo, suri vaha coo ndo chihin musu ndo. Ta ma sayuhvi ndo chi ñu. Vatyí chitó ndo tyi ña cahnu ca maa ndo cha nuu musu ndo. Inuu ri cuví ndo nuu Nyoo ra cuví chitoho yo nya andivi. Vatyí maa ra ña cachi ra chi yo.

Tunyeé iñi cha chahá Nyoo chi yo chayihí yo cuenda ra

10 Ta vityin sandunyeé yo iñi yo chihin cha in ri cuví yo chihin Sutu Mañi yo. Vatyí iyó xaan tunyeé iñi chi ra.

11 Ta tari noo sindaro sahá cuenda ra chi ra, tyicuan caa tucu yoó, nasaha cuenda vaha yo chi yo chihin tandihi cha cuvi tyinyee Nyoo chi yo. Tyicuan caa ta cuvi chasaha yo chi cuihna. Vatyí nducú xaan ra cuhva sandavi ñaha ra chi yo.

12 Tyicuan caa coo yo chihin tunyeé iñi Nyoo. Vatyí ñima chihin ñayivi cañi tahan yo. Soco cañi tahan yo chihin tatyí ña vaha cha ña nyehé yo. Vatyí ican cuan cuví cha nyacá ñaha chi ñayivi cha nyacuví cha quiñi caa.

13 Yucuan chaha saha cuenda vaha yo chi yo chihin tandihi cha cuví tyinyee Nyoo chi yo, tacuhva cuvi chasaha yo chi ra ña vaha ñaá quivi nducu tin ra chi yo. Coto cana cava yo saha ra.

14 Tari noo sindaro ñihi nanyaá ra chihin noo sincho yíhí chichi ra, tyicuan caa ñihi cujnanyaa yo chihin tuhun cha ndicha vaha. Tari cacú noo sindaro vatyí tyaá ra noo caa pecho ra, tyicuan caa Nyoo cusacacu ra chi yo ndaha ra ña vaha, tatu maa ri cha vaha sacuvi yo.

15 Ta tari natyihi sindaro bota chaha ra ta nyatú tuhva ra cha cuhun ra cuatyí, tyicuan caa cuatu tuhva yo chihin tuhun Nyoo. Na sacoto yo chi ñáyiví yoso caa nicoo vaha ñu chihin ra.

16 Ta tari sindaro chasí ra chi ra chihin noo caa tacuhva ma nañi nduva chi ra, tyicuan caa cuñí chi nachino vaha iñi yo chi Nyoo tacuhva cha cuví chasaha yo tandihí cha sacuvi ra ña vaha chi yo.

17 Ta tari sahá cuenda sindaro xiñi ra chihin noo caa, tyicuan caa nacuhva cuenda yo chi yo chi Nyoo, na sacacu ra chi yo. Ta naquehen yo tuhun cha chahá ra chi yo. Vatyí tari noo mityí Tatyí li ra cuví tuhun cuan. Vatyí chihin tuhun ra sahá ganaa yo chi cuihna.

18 Ta nyita ri cahan yo chihin Nyoo. Ta Tatyí li ra cuatyinyee chi yo tacuhva cacan tahví yo chi ra. Ta cuacu ndahví yo nuu ra. Ta tyicuan caa cuatu tuhva ri yo. Ta ma ndu uvi iñi yo. Tyicuan ri cacan tahví yo cha cuenda tandihí ñu yíhí cuenda Nyoo.

19 Ta nacuatú tucu ndo chahi, tacuhva vatyí ñihi que tuhun cahin. Ta ma yuhví sacote tuhun ra Cristo chi ñáyiví. Vatyí ta cha naha ña chito ñáyiví tuhun ra.

20 Ta cha cuenda cha sacoté tuhun ra Cristo ñohí vehe caa ihya vityin. Soco Nyoo tachí chii vatyí cahin tuhun ra chihin ra nyicú vehe caa ihya. Cacan tahví ndo cha cuende, tacuhva cuví cahin chihin cha ña yuhví, tari cuhva tahán chi cahin.

Tachí ra Pablo chi ra Tíquico tyi cuhun ra nu nyicu ñu

21 Ta ra Tíquico yañi yo, cunacatyí ra tandihí tuhun chi ndo. Maa ra ñi iñi ra sahá tyiño ra cuenda Sutu Mañi yo. Ta cuñi xaan yo chi ra.

22 Tachí chi ra nu nyicú ndo tacuhva sacoto ra chi ndo yoso caa iyó ndi ihya, tacuhva nduní ca iñi ndo chino iñi ndo chi Nyoo.

23 Ta Nyoo Sutu yo ta Sutu Mañi yo Jesucristo nacuhva ra cha taxi ri coo añima tandihí ra yañi yo. Ta na cuhva Nyoo cha chinó vaha iñi ra chi ra. Ta vityin suri Nyoo nacuhva ra cha cuñi ca ra chi ra ta chi ñáyiví.

24 Ta na nasoco ra chi tandihí yo cha nyita ri cuñi yo chi Sutu Mañi yo Jesucristo chihin cha ñi iñi yo. Ta nacuvi chi tyicuan caa.

Carta Cha Sacuhun Ra Apóstol Pablo Chi Ñáyivi Ñuu Filipos Cha Yihí Cuenda Nyoo

Ñohó ra Pablo vehe caa, ta tyaá ra noo carta chi ñu yihí cuenda Nyoo ñuu Filipos

¹ Yuhu ra Pablo ta ra Timoteo sacuví ndi tyiño nuu ra Jesucristo. Ta tyaá ndi carta ihya chi tandihí ndo cha cuví ndo ñu ñuu Filipos cha yihí cuenda Nyoo. Ta chi ra cayihí ndaha vehe ñuhu, ta chi ra canyehe tyiño vehe ñuhu, ta chi tandihí ndo.

² Na nasoco Nyoo Sutu yo ta Sutu Mañi yo Jesucristo chi ndo. Ta nacuhva ra cha taxi ri coo ñima ndo.

Nu chicán tahvi ra Pablo chaha ñu yihí cuenda Nyoo ñuu Filipos

³ Tahan ri cha nicohón iñi chi ndo, nacuhvá xain tyahvi nyoo chi Nyoo cha cuenda ndo.

⁴ Ta chicán tahvi chi Nyoo cha cuenda ndo chihin cha sñi cuñí ñime.

⁵ Vatyí nyata quiví xihna ri cha chiñi ndo tuhun ra Cristo ta nya vityin ta ña sandihí ndo tuhun cha tyinyeé ndo chii. Vatyí ñin ri tuhun ra Jesucristo sacotó yo chi ñáyivi.

⁶ Quiví naquehen cuenda Nyoo ñima ndo, maa ra chahá tunyee iñi chi ndo, na sacuví ndo tyiño nuu ra. Ta chité tyi tyicuan ri cuacuhva ra chi ndo nyacua nya quiví quichi ra Cristo inga chaha.

⁷ Tahán chi cha caca xiñi tyehe caa cha cuenda ndo, vatyí cuñí xain chi ndo. Vatyí ñin ri nasocó Nyoo chi yo. Vasi ñohí vehe caa, o vasi nanyaí nuu ra cuví tyiño, soco sacoté tuhun Nyoo chi ra canyicú vehe caa ihya, ta chi ra cuví tyiño, na cacoto ra tyi ndicha tuhun ra Cristo.

⁸ Nyoo chitó ra vatyí cuñí xain chi tandihí nyoho tari cuñí ra Jesucristo chi ndo.

⁹ Ta chicán tahvi xain chi Nyoo na cuvita ca iñi ndo, ta cuñi ca ndo chi ñáyivi. Ta suri coo ca cha chiñi tuñi Nyoo chi ndo,

¹⁰ tacuhva vatyí tyicuan ri coto ndo nacachi ndo cha vaha ca. Ta tyicuan caa ta

cachi coo ndo ta ma coo ca cuatyí ndo quiví quichi ra Cristo.

¹¹ Maa ra cutyinyee ra chi ndo. Ta tyicuan ri cusacuví ndo maa maa ri cha vaha, ta cha ndaa. Tyicuan caa ta cusacahnu ñáyivi chi Nyoo tyi cahnu xaan ca cuví maa ra ta sacuví ra tyicuan caa chihin ndo.

Maa maa ri tyiño Nyoo sacuví ra Pablo vatyí ñohó ra Cristo ñima ra

¹² Ta cuñí tyi coto ndo yañi vatyí tandihí cha cuví chii tyinyeé xaan chi chii nu cahín tuhun Nyoo chihin ñáyivi.

¹³ Vatyí chitó tandihí sindaro vehe rey ta tandihí inga ñáyivi ihya vatyí ñohí vehe caa cha cuenda cha nyiquén chi ra Cristo.

¹⁴ Ta cuaha xaan ra yañi yo cuenda Sutu Mañi yo cuní ca iñi ra cha cuenda cha ñohí vehe caa. Ta naá cha yuhvi ra vatyí cachitó ra vatyí tyinyeé Nyoo chi yo. Ta ñihi ca cacahán ra tuhun Nyoo chihin ñáyivi.

¹⁵ Ta ndicha vatyí yihí ra, cahán ra tuhun ra Cristo soco cha cuenda cha tasi cuñí ra nyehé ra chii, o cuñí ra na cunyicon ñáyivi chi ra. Soco yihí ra cahán ra tuhun ra Cristo chihin ñáyivi, soco chihin cha vaha chicá xiñi ra.

¹⁶ Yihí ra cacahán ra tuhun ra Cristo cha cuenda cha cuñí ra chi ra. Vatyí chitó ra vatyí maa Sutu Mañi yo quichí nyaca ra chii ihya. Vatyí cotyíño ra chii, ta sacoté chi ñáyivi tyi ndicha cha sacacú ra ñima yo.

¹⁷ Soco inga ra cuan ñima cha ñi iñi ra cahán ra tuhun ra Cristo, soco cuñí ra cuhva ra tisihí chii nu ñohí vehe caa ihya.

¹⁸ Soco cha cuenda chi yuhu ñahri saha, vasi sacuví ra chihin cha vaha chicá xiñi ra o chihin cha ña vaha. Soco tuhun ra Cristo ícan casacotó ra. Ta sñi xaan cuñí cha cuenda cuan.

¹⁹ Ta cusñi ca iñi vatyí chité vatyí chichi cha tandihí cha cuví chii, Nyoo cuasacacu ra chii. Tyahvi nyoo chi Nyoo vatyí chicán tahvi xaan nyoho cha cuende nuu Nyoo. Ta tyinyeé xaan Tatyí Ii ra Cristo chii.

²⁰ Chitó vahi vatyí Nyoo cutyinyee ra chii cha ma cucahan nui, ta ma yuhvi cahín chihin cha ñi iñi tuhun ra Cristo. Ñahri cuende, an coo que ñayivi, an cuví, soco cuñí vatyí vityin ta ityi nuu ca saha ñáyivi

cuenda cuhva iyé ta coto ñu tyi ra Cristo cahnu ca cuví ra.

²¹ Vatyí cha cuenda yuhu tatu iyé, sacuvi tyiño nuu ra Cristo ihya siqui ñuhu ñayivi. Soco tatu cúvi, cuñihi cha tyaqui cha iyó andivi.

²² Soco tatu iyó que, vaha xaan. Vatyí sahá tyiño que cha cuenda cha vaha maa Sutu Mañi yo. Yucuan chaha ña chité nya ityi cuhin, an cuhin ityi andivi, an cuhin cucahan que tuhun Nyoo chihin ñayivi, ña chité.

²³ Yhi xaan cote nya cha cuñí, vatyí iyó quivi cuñí cha coo que. Soco iyó quivi ña cuñí. Vatyí cha cuñí cunuhi cucunyai chihin ra Cristo. Vatyí vaha ca cuan.

²⁴ Soco cha cuenda cha vaha chi nyoho, vaha ca cha ndoí chihin ndo.

²⁵ Yucuan chaha chité vatyí cundoí suhva ca ñayivi ihya. Vatyí cuñí chi cha tyinyeé que chi ndo tacuhva cuvi cuhun ca ndo ityi nuu ca ta cu sii cuñí ndo chihin cha chinó iñi ndo chi Nyoo.

²⁶ Ta quivi cunyehe nu nyicu ndo, tyicuan caa ta cuvi cusii ca iñi yo cha ñn ri cuví yo chihin ra Cristo.

²⁷ Cuñí chi cha coo yo yoso cuhva tahán chi coo noo ñu yihí cuenda Nyoo. Vasi nyaí chihin ndo, o cañi nyaí, soco cuñí cote tuhun ndo vatyí nyoho vaha cuahan ndo chihin Nyoo. Ta ñn ri sahá tyiño ndo tacuhva nachino iñi ñayivi tuhun ra Cristo.

²⁸ Ta ma yuhvi ndo ñáá cha sacuví ñu xaan iñi chi ndo cuenda tuhun Nyoo. Vatyí cha tyicuan caa, cachi xaan sañahá chi chi yo vatyí cunaa ñu. Ta sañahá tucu chi chi yo vatyí cha cacú aña yosa sahá maa Nyoo.

²⁹ Vatyí tari chahá ra Cristo ityi chi yo cha chinó iñi yo chi ra, tyicuan caa tucu chahá ra cha nyehé yo tindoho cha cuenda ra.

³⁰ ñn ri cuhva nyehé yo tindoho ta sacotó yo tuhun ra Cristo, ta cha chitó ndo yoso caa nyehi tindoho, ta vityin suri chitó ndo vatyí ña sañé cha sahá tyiñe tuhun Nyoo.

2

Tyayii xaan ra Cristo, soco quichi cúvi ra tari noo ra ndahvi

¹ Ndicha vatyí ra Cristo sanii xaan ra iñi yo cha ñn ri cuví yo chihin ra. Ta vaha cuñí yo cha cuenda cha cuñí ra chi yo. Ta ndicha

tucu vatyí nyaá Tatyí li Nyoo chihin yo. Ta ndicha tucu cha ndahvi cuñí yo nyehé yo chi tahan yo.

² Tatu ndicha tandihi ihya, cuhva ndo cha cusii cuñí chihin cha ñn ri cuví ndo. Ta cuñí ndo chi tahan ndo tari cuñí ra Cristo chi ndo. Ta ñn ri cuhva caca xiñi ndo. Ta ñn ri cuhva sacuvi ndo.

³ Ma sacuvi ndo cha vaha chi maa ri maa ndo, soco sacuvi ndo cha vaha chi ñayivi ñandihí. Ta ma cahnu saha ndo chi ndo. Ndahvi saha yo chi yo. Ta tahan tahan yo saha yo tuhun vatyí vaha ca inga ñayivi ta ñima ca maa yo.

⁴ Ta tahan tahan yo caca xiñi yo cha cuenda cha vaha chi inga ñayivi, ta ñima cha vaha chi maa ri maa yo.

⁵ Caca xiñi ndo tari chicá xiñi ra Jesucristo.

⁶ Vasi cuví ra Nyoo, soco ña cahnu saha ra chi ra ta ña quichi cuvi iñi ra cha sacahnú ñayivi chi ra, tari sacahnú ñu chi Nyoo Sutu ra.

⁷ Soco sandoo ra tandihi tunyee iñi ra ta tandihi cha tyayii ra ñn chiyo xiin. Ta quichi nanduví ra noo ñayivi ndahvi quivi cacu ra siqui ñuhu ñayivi.

⁸ Ta ndahvi saha ra chi ra, vatyí nanduví ra noo rayii ri.

Ta chihin cha iyó vaha iñi ra ta quichaha vaha ra chi Nyoo nyacua chaha ra cha cahni ñayivi chi ra.

Tari noo ra quiñi iyó saha ñu chi ra, vatyí nu cruzi chihí ra.

⁹ Yucuan chaha Nyoo sacahnú xaan ra chi ra.

Ta chahá Nyoo noo sivi chi ra, noo sivi cha cahnu xaan ca cuví nuu tandihi maa sivi.

¹⁰ Vatyí tacuhva tatu cuiñi yo sivi ra Jesucristo, tandihi yo ta cuiñi chiti yo. tandihi cha iyó andivi.

Ta tandihi cha iyó siqui ñuhu ñayivi, ta chichi ñuhú, cucuiñi chiti ta sacahnú chi ra.

¹¹ Vatyí tandihi cha iyó ta nacoto nuu vatyí ra Jesucristo cuví ra nyacá ñaha chi tandihi maa cha iyó.

Tyicuan caa cunyehe chi tyi cahnu xaan ca cuví maa Nyoo Sutu yo.

Ñu yihí cuenda Nyoo cuví ñu tari noo cha ndichin siqui ñuhu ñayivi ihya

12 Yañi, cuñi xain chi ndo. Ta tari cha quichaha ndo chii quivi chinyai chihin ndo, quichaha tucu ndo chii vityin cha cañi nyaí. Nducu xaan ndo cuhva na nyehe ñáyivi tyi ndicha cha sacacú Nyoo chi ndo. Ta saha ndo cuenda cuhva coo ndo chihin ra.

13 Vatyí maa Nyoo sacacú cha vaha añaíma ndo. Ta tyinyeé ra chi ndo tacuhva vatyí quichi cuvi iñi ndo quichaha ndo nu cahán ra, ta sacuvi ndo cuhva cuñi ra.

14 Tatu cuasacuvi ndo ñáá cha cuasacuvi ndo, nducu ndo cuhva cha ma coo tisihi, ta ma cañi tahan ndo.

15 Tyicuan ta ma coo ni noo cuatyí ndo. Cuvi ndo noo ñáyivi cachi iyó, cuvi ndo ñáyivi ñahri cuatyí, tari tahán chi coo ñáyivi cuenda Nyoo mahñu ñáyivi quiñi iyó ihya. Cuñi chi cha cuvi ndo tari noo ñuhu cha sandichín nu ñaa iñi siqui ñuhu ñáyivi ihya.

16 Cahán yo tuhun Nyoo chihin ñáyivi vatyí ican cuan chahá ñáyivi chaa cha iyó yo. Sacuvi ndo tyicuan caa, tyicuan ta quivi cuquichi ra Cristo, yuhu vaha coo iñi cha cuenda nyoho, vatyí ña sacotó cahi tuhun Nyoo chi ndo.

17 Ta vasi cahñi ñáyivi chi yuhu, cha catyí tuhun Nyoo, soco si xaan cuñi ta cuñi cusii cuñi ndo chihin vatyí tyicuan caa sacañá tahin cha cucuhva cuenda yo chi Nyoo, cha cuenda cha chinó iñi ndo chi ra.

18 Ta tahán chi cha cusii iñi tucu nyoho chihin yuhu ñandihí.

Nu tachí ra Pablo chi ra Timoteo ta ra Epafrodito nu nyicu ñu yihí cuenda Nyoo ñuu Filipos cuan

19 Tatu Sutu Mañi yo ta cuñi ra cutachi chi ra Timoteo quichi nyehe ra nu nyicú ndo. Ta quivi ndichi ra nu nyaí cucusii xaan cuñi. Vatyí cunacatyí ra chii yoso caa nyicú ndo.

20 Vatyí noo tuhun ri maa ra chicá xiñi ra cha cuenda cha vaha chi maa ndo tari chicá xiñi yuhu. Ta yori yóo ca ra chicá xiñi tyicuan caa.

21 Vatyí tandihí ca ra, maa maa ri cha cuenda chi maa ra nanducú ra. Ta ña nanducú ra yoso caa cuhva cuñi ra Jesucristo.

22 Chitó ndo vatyí ra Timoteo, vaha cuahan ra chihin Nyoo, ta cha cuenda chi yuhu cuvi ra tari noo sehi. Ta tyinyeé xaan ra

chii cha cahán ndi tuhun ra Cristo chihin ñáyivi.

23 Ta nyaá sacuhin chi ra nu nyicú ndo. Soco nya coto xihne ñáá catyí ra cuvi tyiño, tatu ña naha ca ñohí.

24 Vatyí chitó vahí tyi Sutu Mañi yo numi ri cuhva ra cha cuhin cunyehe nu nyicú ndo.

25 Ta vaha cha cunuhu ra Epafrodito yañi yo nu nyicu ndo. Tachí ndo chi ra vatyí quichi tyinyeé ra chii nu tyiño sahi. Ta tñn tahan xaan ndi chihin ra ña vaha cha cuvi ndi sindaro ra Cristo.

26 Ta cuñi xaan ra Epafrodito cunuhu ra nu nyicú ndo, vatyí chicá xaan xiñi ra cha chitó ndo tyi cuhvi ra.

27 Vatyí ndicha cuhvi xaan ra ta cha yatyin maa cha cúvi ra. Soco Nyoo cundahvi cuñi ra nyehe chi ra, ta chi yuhu ñandihí. Ta ña chaha ra cha cúvi ra. Ña cuñi ra cha coo ca tucuihya iñi chii.

28 Yucuan chaha yuhu cuñi xain cha ndichi ra nu nyicú ndo. Vatyí chité tyi nyoho cundusii xaan cuñi ndo cha nanyehe ndo chi ra. Tyicuan ta ma caca ca xiñi tuhun ndo. Vatyí cha nanyehé ndo chi ra tyi iyó vaha ra.

29 Yucuan chaha vaha naquehen ndo chi ra chihin cha si cuñi ndo, vatyí yañi yo cha cuenda maa Sutu Mañi yo cuvi chi ra. Ta tyicuan ri saha ndo ñáyivi chi yañi yo cha iyó tari caa cuhva iyó ra.

30 Vatyí cha yatyin maa cha cúvi ra cha cuenda cha sacuvi ra tyiño ra Cristo. Soco ña yuhvi ra vasi cúvi ra cha cuenda cha tyinyeé ra chii. Vatyí maa ndo ña cuvi quichi tyinyeé ndo chii vatyí cañi xaan nyicu ndo.

3

Nu sañahá ra Pablo yoso caa ndu ndi yo nuu Nyoo

1 Ta vityin yañi, cusii iñi ndo chihin Sutu Mañi yo. Cha cuenda chi yuhu ñahri sahá cha cha yaha tyaj tuhun ihya chi ndo, cutyaa tiqui inga chaha. Vatyí cha vaha chi maa ndo cuvi.

2 Saha ndo cuenda chi ndo chihin ra cha quiñi iyó chiña. Nyacuví ra cuhva cuñi ra ña vaha. Vatyí catyí ra tyi cuñi chi sacuvi yo costumbre circuncisión ta cacu yo.

³ Soco yoó noo circuncisión cha ndicha savaha Nyoo chi yo. Vatyí maa yo sacahnú yo chi ra chihin Tatyí li ra cha ñohó añima yo. Ta cusii cuñí yo vatyí cuenda maa ra Cristo Jesús yihí yo. Ta ña itá iñi yo tyi cacu yo chihin cha sacuví yo costumbre.

⁴ Tyehe ta cuví cacu yo chihin cha sacuví yo, yuhu vihi ca caquí cha nuu tandihí ñu sacuví tyicuan caa.

⁵ Vatyí uña quivi ta saha ñu circuncidar chii. Vatyí tata ra Israel vachi. Ta tata ra Benjamín sehe ra Israel cuví. Ta tata ñu cahán sahan hebreo cuví. Yucuan chaha yuhu hebreo cuví. Ta sijn ri quichaha xain ley chahnu quivi cuan, vatyí fariseo cuví.

⁶ Ta cha cuenda cha cuñi quichahí ley, ta chican nyicon xain chi ñu yihí cuenda ra Cristo. Ta ña cuñi nyehi chi ñu. Ta quichahí tandihí maa ley chahnu, vatyí nducu xain cuhva quichahí nu cahán ley cuan.

⁷ Soco tandihí cha cuñi mai vatyí vale xaan quivi cuan, vityin ña vale ca cuan. Vatyí maa ra Cristo cuví ra itá iñi.

⁸ Ta sijn ri tandihí cha sacuví, chitó mai vatyí ña vale cha cuenda cha chicohón nui chi ra Cristo Jesús, Sutu Mañi yuhu. Vatyí yucuan cuví cha tyayii xaan ca. Ta cha cuenda ra Cristo tandihí cha sacuví ta ityi chata ca cuví chi noo cha ñima ri tuhun vityin. Yucuan chaha sandoj in chiyo xiin tandihí cuan. Vatyí cuñi cohon nuu que chi ra Cristo.

⁹ Ta cha cuñi yuhu nacu in ri que chihin ra. Vaha iyé cha cuenda tyi chinó iñi tyi sacacú ra chi yo. Ñima cha cuenda cha quichahí ley Nyoo ta vaha iyé, soco cha cuenda vatyí chinó iñi tuhun cahán ra, vatyí sacacú ra chi yo. Ta cha cuenda cha chinó ri iñi yo, ra Cristo naquehén cuenda ra chi yo.

¹⁰ Cha cohon nuu que chi ra Cristo yucuan cuví cha cuñi. Nyoo sanandoto ra chi ra Cristo chihin tunyee iñi ra. Ta cuñi tyi coo ca tunyee iñi cuan chii. Ta cuñi cunyei tindoho cha tahán chi nyehí. Ta cuñi cha cúvi tandihí cha ña vaha cha cuñi coño ñuhi, tari chihí ra Cristo cha catyi cuatyí yo.

¹¹ Vatyí nanducú xain cuhva cha cunandote noo ñayivi chaa chihin Nyoo nya andivi.

Cuhun ca yo ityi nuu ca chihin Nyoo

¹² Ñima tyi catyí chi ndo tyi ñahri ca cha cumañi chii, ta vaha xain. Soco cuahin ityi nuu ca. Vatyí cuñi naquehin cha chahá ra Cristo chii. Vatyí xihna ca maa ra naxita ra chii ityi ra.

¹³ Yañi, ña catyí chi ndo tyi cha ñihí tandihí cha vaha cuan. Soco sanaí iñi cha quichi ityi chata. Ta sañihí cuhin ityi nuu ca.

¹⁴ Tacuhva tyi chaí nu nyaá cha tahán chi chii. Vatyí caná Nyoo chi yo nya andivi. Vatyí cunaquehen yo cha catyí ra chi yo vatyí cuhva ra cha cuenda cha in ri cuví yo chihin ra Cristo Jesús.

¹⁵ Tyehe caa tahán chi caca xiñi tandihí yo cha ñihí nyaá yo chihin Nyoo. Soco tatu ñima tyehe caa chicá xiñi nya noo nyoho, Nyoo cucuhva ra cha cutuñi iñi ndo.

¹⁶ Soco noo ri tyi cuñi chi cha quichahá vaha yo tuhun cha cha yaha sacoto Nyoo chi yo.

¹⁷ Yañi, quehen ndo cuhva iyé ta cuhva cahín. Ta saha ndo cuenda chi ñu iyó tari cuhva sañahá ndi chi ndo.

¹⁸ Vatyí ticuiti chaha catyí chi ndo, saha ndo cuenda chi ra cuendu. Ta vityin catyí tiqui chi ndo inga chaha chihin cha chaquí cha cuihya iñi, vatyí cuaha xaan ra xaan iñi chi ra Cristo. Vatyí catyí ra tyi noo cha ña niñi xaan cuví cha chihí ra Cristo nu cruzi.

¹⁹ Soco quivi quichi tucu ra Cristo, cuhun coyo ra cuan anyaya. Vatyí sacuví ra cuhva cuñi coño ñuhu ra. Ta chahnu sahá ra chi ra chihin cha tahán chi coo ticahan nuu nuu ra. Ta itá iñi ra maa maa ri cha iyó ihya ñayivi ri.

²⁰ Soco yoó nya andivi nyaá ñuu yo. Ta suri ityi cuan nyatú yo chi Sutu Mañi yo Jesucristo, ra sacacú chi yo.

²¹ Ta cuquehen ra coño ñuhu pehe yo. Ta cusananduvi ra chi yo tari coño ñuhu maa ra. Ta chihin tunyee iñi cha iyó chi ra cha nyacá ñaha ra tandihí, cusacuvi ra tyicuan caa.

4

Tyicuan ri na cusii cuñi yo chihin Sutu Mañi yo

¹ Yañi, cuñi chi ndo. Ta cuñi xain nyehi chi ndo. Ta sii xaan cuñi chihin ndo. Ta

chité tyi ña cahán cahi tuhun Nyoo chihin ndo. Vatyí ñí xaan iñi ndo nyicón ndo chi ra. Na cuinyaña ca ndo chi Nyoo chihin cha ñí iñi ndo.

² Ta vityin chiquén chi cu Evodia, ta chi cu Síntique, nanduvaha coo ñu chihin tahan ñu. Ta na coo ñu tari cha cuhu ñu cuenda Sutu Mañi yo.

³ Yoho, yañi, ñi iñun sahá tyiñon chihin, ta chiquén chuun na tyinyeun chi ñu tahan yo ihya. Vatyí tyinyeé xaan ñu chii chihin cha sacoto ñu tuhun Nyoo cha cacu añima yo chihin ra Clemente ta suhva ca ñu ñandihí. Ta nyaá sivi ñu nuu tutu Nyoo nya andivi.

⁴ Ta tyicuan ri maa cusí iñi ndo chihin Sutu Mañi yo. Ta catyí tiquí chi ndo inga chaha, na cusí iñi ndo chihin ra.

⁵ Ta tandihí ñáyivi na nyehe ñu chi nyoho vatyí ndicha noo ñáyivi vaha cuví ndo. Ta ñicohon iñi ndo vatyí cha nyaña yatyin quivi quichi Sutu Mañi yo.

⁶ Ta ma ndahvi xaan cuñi ndo ñáá ndihí cha cuví chi ndo. Nyita ri ñacatyí ndo chi Nyoo ñáá ndihí cha cuví chi ndo. Ta çacan tahvi ndo chi ra ñáá ndihí cha chiñuhú chi ndo. Ta yaha cuan ta nacuhva ndo tyahvi nyoo chi ra.

⁷ Ta cha sacuví ndo tyehe caa, Nyoo cuhva ra cha taxi ri coo añima ndo. Ta cahnu xaan ca cha vaha cuví cuan. Ta ni noo ñáyivi ta ña cuví cutuñi iñi ñu yoso cuhva cha cahnu cuan. Ta cha taxi maa Nyoo cusaha cumi añima ndo ta cha chiñi tuñi xiñi ndo. Vatyí ñin ri cuví ndo chihin ra Cristo Jesús.

Na caca xiñi yo maa maa ri cha vaha

⁸ Yañi, nu ndihí tuhun çaca xiñi ndo maa ri cha ndicha vaha, cha cachi iyó, cha ndoo iyó, cha ndí, cha ñahri cha quiñi caa, cha tyaquí, cha vaha. Çaca xiñi ndo maa maa ri maa cha vaha tacuhva cuví sacahnu yo chi Nyoo.

⁹ Sacuvi ndo cha sañahí chi ndo. Tuhun cha chiñi ndo cahin, cha nyehe ndo chinyacuví, sacuvi ndo. Ta Nyoo ra chahá cha taxi coo añima yo, cucunyaa ra chihin ndo.

Tyinyeé ñu Filipos chi ra Pablo chihin cha iyó chi ñu

¹⁰ Sii xaan cuñi. Ta sacahní chi Sutu Mañi yo cha cuenda cha tyinyeé ndo chii inga

chaha. Ta chité vatyí tyicuan ri cuñi ndo tyinyeé ndo chii. Soco ña chahá chi cuhva chi ndo.

¹¹ Ñima tyi catyí chi ndo tyehe caa ta cuñi ndo tyi iyó cha chiñuhú chii, vatyí yuhu cha cutuhve cha cusí cuñi chihin ñáá ri cha iyó chi.

¹² Vatyí yuhu chité yoso caa coo ndahvi ta chité yoso caa coo tyayí. Vatyí cha cutuhve coi chihin cha iyó o chihin cha ñahri cha cachi, o tatu nyacua ndoo ca, o tatu ñahri tucu, ndoi vaha.

¹³ Tandihí ta cuví chasahí vatyí maa ra Cristo cuví ra tyineé chii.

¹⁴ Soco nyoho yañi vaha xaan cha tyinyeé ndo chii chihin tindocho cha nyehé xain.

¹⁵ Cha chitó nyoho ñu Filipos yoso caa cuví quivi quichaha cahin tuhun Nyoo chihin ndo. Ta quite Macedonia chiña tyi cuasacote tuhun Nyoo inga ñuu. Ta noo tuhun ri nyoho tyinyeé ndo chii chihin xuhun, vatyí vaha xaan cuñi ndo cha cahin tuhun Nyoo chihin ndo.

¹⁶ Ta siin ri cha ni ri ca cha chinyai Tesalónica, cuaha ri chaha tyinyeé ndo chii.

¹⁷ Ñima cha chicá xiñi cha cuenda cha cuhva ca ndo chii, soco cha cuñi vatyí nyoho coo ca cha vaha chi ndo nuu Nyoo.

¹⁸ Ta vityin cuhva, ñahri cha cumañi chii. Nyacua ndoo ca cha sacuhun ndo chii chihin ra Epafrodito. Ta cha chahá ndo cuan cuacuví chi tari noo xico vixi, xico vaha cha chaá nuu Nyoo. Yucuan cuví cha tahán iñi ra.

¹⁹ Ta Nyoo cuhva ra tandihí cha chiñuhú chi ndo. Cha cuenda ra Cristo cucuhva ra tandihí cha vaha cha tyayí cha cumí ra nya andivi.

²⁰ Chi Nyoo Sutu yo na sacahnu yo tyicuan ri maa. Ta na cuví chi tyicuan caa.

Sacuhún ra Pablo nocumi chi ñu Filipos

²¹ Chahí nocumi chi tandihí ndo cha yihí ndo cuenda ra Cristo chiña. Ta vachi tucu nocumi chi ndo sahá yañi yo cuenda Nyoo cha nyicú chihin ihya.

²² Ta ñáyivi cha nyicú vehe ra nyacá ñaha ñuu Roma ihya, ta tandihí ca ñu yihí cuenda Nyoo ñuu ihya chahá ñu nocumi chi ndo.

²³ Ta na nasoco maa Sutu Mañi yo Jesucristo chi tandihî ndo. Ta na cuvi chi tyicuan caa.

Carta Cha Sacuhun Ra Apóstol Pablo Chi Ñáyivi Ñuu Colosas Cha Yihí Cuenda Nyoo

*Nu sacuhún ra Pablo noo tutu chi ñáyivi
ñuu Colosas cha yihí cuenda Nyoo*

¹⁻² Yuhu ra Pablo cuví noo apóstol ra Jesucristo. Vatyí tyicuan caa cuhva cuñí maa Nyoo. Yuhu chihin ra Timoteo yañi yo, tyaá ndi noo carta ihya chi ndo ñu ñuu Colosas cha yihí vaha cuenda Nyoo ta cuenda ra Cristo. Nyoo Sutu yo nasoco ra chi ndo ta nacuhva ra cha taxi ri coo aña ndo.

*Nu chicán tahvi ra Pablo chaha ñu yihí
cuenda Nyoo ñuu Colosas*

³ Tyicuan ri cha chicán tahvi ndi chaha ndo. Ta nacuhvá ndi tyahvi nyoo chi Nyoo Sutu Sutu Mañi yo Jesucristo cha cuenda ndo.

⁴ Vatyí ñihí ndi tuhun vatyí chinó xaan iñi ndo chi ra Cristo Jesús. Ta cuñí xaan ndo chi tandihí ñu cha yihí cuenda ra.

⁵ Tyicuan caa sacuví ndo vatyí chitó vaha ndo vatyí cucoo ndo chihin Nyoo nya andiví. Nya quiví chiñi ndo tuhun Nyoo cha ndicha vaha, quihí iñi ndo vatyí sacacú ra Cristo aña ndo.

⁶ Ta suri maa tuhun ra Cristo cha cahan ra Epafra chihin ndo, ican cuan chityá tandihí ri ityi tari chityá tucu nu canyicú ndo. Ta cuaha ñáyivi nacuhvá cuenda ñu chi ñu chi Nyoo, tari nacuhvá cuenda nyoho chi ndo ñandihí. Ta cuhva cha chiñi ndo tuhun ra Cristo, ta chito ndo vatyí ndicha vaha cha cuñí Nyoo chí yo.

⁷ Ican ihya sañaha yañi yo ra Epafra chi ndo. Vatyí ñin ri tuhun Nyoo sahá tyiño ndi chihin ra. Ta ican ra cuví ra sacuví tyiño nuu ra Cristo cha cuenda ndo.

⁸ Maa ra sacoto tuhun ndo chi ndi, vatyí cuñí xaan ndo chí tahan ndo. Vatyí maa Tatyí Ii Nyoo chahá cha vaha coo aña ndo.

⁹ Yucuan chaha nyacua nya quiví chito ndi tuhun ndo ta ña sandihí ndi tuhun cha

nacuatú ndi chaha ndo. Ta chicán ndi chi Nyoo nacuhva ra cha chiñi tuñi ra chí ndo cha cuenda Tatyí Ii ra. Ta cuacutuñi iñi ndo tacuhva coto vaha ndo ñáá ndihí cha cuñí Nyoo tyi sacuví ndo.

¹⁰ Tyicuan caa ta cuví coo ndo tari cuhva tahán chi coo ñu yihí cuenda Nyoo. Ta na sacuvi ndo tari cuhva cuñí maa ra. Tacuhva sacuvi ndo tandihí nuu cha vaha ta cohon nuu vaha ca ndo chí ra.

¹¹ Ta chicán tucu ndi vatyí na sandunye ca ra chí ndo chihin tunyee iñi cahnu ra vatyí cuví cunye ndo tandihí cuii chihin cha cama iñi ndo.

¹² Ta chihin cha sñi cuñí ndo, ta nacuhvá ndo tyahvi nyoo chí Nyoo Sutu yo, vatyí chahá ra cha coo ndo noo ñáyivi chaa. Vatyí natava ra chí ndo nu quiñi caa, ta nanyita ndo nu ndichin nu nyacá ñaha ra chí tandihí ñu yihí cuenda ra. Ta cuhva ra tandihí cha vaha cha tahán chí chí ñu yihí cuenda ra.

¹³ Nyoo tava ra chí yo nu ñaa iñi ta nacuhvá cuenda ra chí yo chí ra Cristo vatyí cunyaca ñaha ra chí yo. Vatyí ican ra Cristo cuví Sehe Nyoo. Ta cuñí xaan Nyoo chí ra.

¹⁴ Nasata Nyoo chí yo chihin ñiñi ra Cristo ta saha ra tucahnu iñi cuatyí yo.

*Nduvaha iyó yo chihin Nyoo cha cuenda
cha chihí ra Cristo cha catyí cuatyí yo*

¹⁵ Nyoo, ña nyehé yo chí ra. Soco nanduví ra ñáyivi tacuhva cuví cohon nuu yo chí ra. Ta ican ra cuví Cristo Sehe Nyoo. Nya ta ñi cumañi ca chinó ñáyivi ta cha iyó maa ra Cristo.

¹⁶ Ta Nyoo chaha ra tyi savaha maa ra Cristo tandihí cha iyo andiví ta siqui ñuhu ñáyivi. Ta savaha ra cha cuví nyehe yo ta cha ña cuví nyehe yo. Savaha ra ángel. Ta savaha ra chí ra ña vaha ta chí tatyí ña vaha ñandihí. Ta tandihí cha nyacá ñaha siqui ñuhu ñáyivi ihya, maa ra savaha. Ta tandihí ihya chinó chí tacuhva cotyíño ra yoso cuhva cuñí maa ra.

¹⁷ Ra Cristo cha iyó maa ra nya ta ñi cumañi coo tandihí maa cha iyó. Ta tyicuan ri chahá ra cha conyito tandihí maa cha savaha ra.

¹⁸ Ta maa yo cha yihí yo cuenda ra Cristo, ñin ri cuví yo chihin ra. Cuví yo coño ñuhu

ra. Ta maa ra Cristo, cuví xiñi yo, vatyí maa ra cuví nuu chi yo. Ta ican ra cuví cha nandoto cha xihna ca. Yucuan chaha cuví ra nuu chi tandihí cha iyó.

¹⁹ Vatyí maa Nyoo cuñí ra tyi coo tandihí tunyee iñi ra chi ra Cristo.

²⁰ Ta cuñí tucu ra vatyí cha cuenda ra Cristo ta nicoó vaha tandihí cha iyó chihin ra. Yucuan chaha chahá Nyoo cha chihí ra Cristo. Ta chatí niñi ra nu cruzi. Vatyí cuñí ra cha nicoó vaha tandihí cha iyó siqui ñuhu ñayiví ta andiví chihin ra.

²¹ Ta nu quichí chi, xaan cuví iñi ndo chi Nyoo cuhva cha chicá xiñi ndo cha cuenda cha ña vaha cha chinyacuví ndo.

²² Soco Nyoo sanicoo vaha ra chi ndo chihin ra vatyí tachí ra chí Sehe ra, ra Cristo vatyí quichí cuví ra nu cruzi. Ta nyehe ra tindoho chihin coño ñuhu ra ta chihí ra, tacuhva vatyí cuhva cuenda ra chi ndo chí Nyoo, soco ñahri ca cuatyí ndo.

²³ Yucuan chaha cuñí chi vatyí sañihí ca ndo chinó iñi ndo. Ta ma sandihí ndo cha yihí iñi ndo tuhun ra Cristo cha chiñi ndo tyi cusacacu ra añima ndo. Ican tuhun ihya, cuví cha cacahán ra nicacahnu ñayiví. Ta sacuvi Nyoo vatyí yuhu ra Pablo tyinyeí cahín tuhun ihya chihin ñayiví.

Nu catyí ra Pablo vatyí nyaá siqui ra cha sañahá ra tuhun ra Cristo tandihí ri vehe ñuhu

²⁴ Vityin cusí cuñí cha cuenda cha nyehí tindoho chihin coño ñuhi cha catyí ndo. Vatyí cha tyicuan caa sacañá tahin tindoho cha nyehe ca ra Cristo cha cuenda yo cha cuví yo coño ñuhu ra.

²⁵ Yuhu cuví noo ra cahán tuhun ra Cristo vatyí tyicuan caa tyinyeí chí tandihí ñu yihí cuenda ra. Vatyí maa Nyoo catyí ra vatyí cahin tandihí tuhun ra cha cuenda cha vaha chi ndo.

²⁶ Sañahí tuhun cha ñohó xehe nya ta tyembu chahnu, nya ta ni cumañi ca chino ñayiví. Nyoo chicumi xehe ra. Soco vityin cuñí ra cha coto tandihí cuii maa ñu yihí cuenda ra.

²⁷ Ta chí ñu cha ñima ñu Israel cuví tari nyoho, cuñí Nyoo sacotó ra noo tuhun vaha xaan, noo tuhun xehe chí ndo. Ta tuhun xehe cuan ican cuví ihya, vatyí ra Cristo ñohó ra añima ndo cha yihí ndo

cuenda ra. Ta cha cuenda maa ra cuñihí ndo gloria nu cunyaa yo chihin Nyoo.

²⁸ Tuhun maa ra Cristo cahán ndi. Ta chahá ndi tuhun chí tandihí ñayiví. Ta sañahá ndi chí ñu tandihí cha chiñi tuñi, tacuhva cuahnu ñu ta nyacua nya cha ñahri ca cumañi chí ñu cha ñin ri cuví ñu chihin ra Cristo.

²⁹ Yucuan chaha tyi ní iñi sahá tyiñe chihin tunyee iñi ra Cristo ta ñihi xaan chotyíño tunyee iñi cuan chí.

2

¹ Vatyí cuñí cha coto ndo vatyí chicá xiñi cha cuenda ndo. Ta chicán tahvi xain cha cuenda tandihí ndo ta cha cuenda ñu Laodicea, ta tandihí inga ñu cha ta nyehe ca chí.

² Chiquén chí Nyoo na cuní ca iñi ndo, ta cu ñin ri ndo chihin cha cuñí ndo chí tahan ndo. Ta cutuñi vaha ca iñi ndo yoso caa cohon nuu ca ndo chí ra Cristo. Vatyí ican ra cuví tuhun cumí xehe Nyoo ta cha naha. Soco vityin sacotó ra chí yo tuhun ihya.

³ Maa ra Cristo chahá ra tandihí cha vaha ta cha chiñi tuñi chí yo. Tatu ñohó nuu yo chí ra Cristo, ñohó nuu yo chí Nyoo.

⁴ Catyí chí ndo tyehe caa tacuhva cha ma sandavi ñaha ñayiví chí ndo chihin tuhun tyaquí.

⁵ Vasí ña nyaí chihin ndo, soco cohon iñi ndo vatyí ñohó iñi tuhun ndo. Ta sñi cuñí nyehi chí ndo. Vatyí vaha xaan cuhva cuahán iyó ndo. Ta nñi xaan iñi ndo cuahan ndo chata ra Cristo.

⁶ Yucuan chaha tari chinó iñi ndo chí noo tuhun ri maa ra Cristo quiví nañihí ndo chí ra, tyicuan caa cuñí tucu chí coo ndo ta ñin ri cuví ndo chihin ra.

⁷ Ta cuinyaña ca ndo chí ra. Ta quihí vaha yoho ndo chihin ra. Ta saní ca ndo iñi ndo chihin cha chino iñi ndo, tari cuhva sañaha ñu chí ndo. Ta nyita ri nacuhvá ndo tyahvi nyoo chí Nyoo.

Ñayiví chaa cha chahá ra Cristo chí yo

⁸ Saha ndo cuenda vatyí iyó ñayiví cuñí ñu sandavi ñaha ñu chí ndo chihin tuhun cha ndichí ri maa xiñi ñayiví, tuhun cha ña ndicha. Vatyí ñima chí ra Cristo chinó iñi ñu cuan. Noo costumbre ri nyicón ñu cuan. Ta nyicón ñu chí cha nyacá ñaha siqui ñuhu ñayiví ihya.

9 Soco cha sañahá ñu cuan, ñima cha ndicha cuví. Vatyí Nyoo ta tandihí cha cahnu cuví ra, tandihí cuan ta nyaá chihin ra Cristo. Vatyí maa ra Cristo cuví Nyoo.

10 Ta cha nyaá ra Cristo chihin ndo, tyitú añaíma ndo chihin Nyoo. Ta ra Cristo ican ra cuví ra nuu chi tandihí ángel ta tatyí cuihna cha nyacá ñaha.

11 Quiví nañihí ndo chi ra Cristo, quihví ra añaíma ndo. Ña nduvaha ndo nuu Nyoo chihin costumbre circuncisión cha itá xaan iñi ra Israel. Maa ra Cristo sacuachiyó tandihí cha ña vaha cha tuhva ndo sacuví. Saha ra circuncidar añaíma ndo cuví cuan soco ñima chihin ndaha ra.

12 Quiví condutya ndo chichi ndutya, tari quiví chihí ndo chihin ra Cristo cuví cuan. Tyicuan ta quita ndo chichi ndutya, tari quiví nandoto ndo chihin ra Cristo, vatyí chinó iñi ndo tyi Nyoo chihin tunyee iñi ra sanandoto ra chi ra Jesús.

13 Nu quichí chi ña ñohó nuu ndo chi Nyoo. Vatyí sacuví xaan ndo cuatyí. Ta cuví ndo tari noo ñáyiví chihí chihin cuatyí cuan. Ta ña saha ñu circuncidar chi ndo. Soco vityin Nyoo saha ra ticahnu iñi tandihí cuatyí ndo. Ta chaha ra cha coo ndo noo ñáyiví chaa chihin cha ñn ri cuví ndo chihin ra Cristo.

14 Sanatuví ley chahnu cuan cuatyí yo. Ta catyí chi tyi tahán chi cuhun yo anyaya vatyí ña quichahá yo chi chi. Soco ley cuan Nyoo sacuachiyó ra quiví chihí ra Cristo nu cruzi.

15 Quiví cha chihí ra nu cruzi cuví chasaha ra chi cuihna ta chi tandihí tatyí ña vaha cha nyacá ñaha. Chihin nuu tandihí maa ángel Nyoo sacotó ra vatyí cahnu ca cuví maa ra ta ñima ca cuihna.

Nu chahá ra Pablo tuhun tyi nanducú yo cha vaha cha chahá Nyoo

16 Yucuan chaha ña tahán chi quihí yuhu ñáyiví chi yo cha cuenda cha chachí yo o cha chihí yo, o cha cuenda cha ña naquehén vaha yo noo quiví vico. Cuví ri quiví cha natyacu yoo, o cuví ri quiví nyitatu yo.

17 Tandihí cuan cuví chi tari noo xiñahñu ri cha cuquichi ityi nuu. Ta vityin cha quichí ra Cristo ta ican ra cuví ra cha ndicha vaha sacacu chi yo.

18 Ma cuhva ndo cha casi ñáyiví nu naquehen ndo noo cha cuacuhva Nyoo chi ndo. Maa ñu ndahví sahá ñu chi ñu soco ña ndicha ñu, ta sacahnú ñu chi ángel. Ta sahá ñu tyi ñyehe ñu cha sañaha Nyoo chi ñu. Ta cahnu sahá ñu chi ñu chihin cha chicá xiñi ñu tuhun ñáyiví ihya.

19 Ñu cuan ñima chi ra Cristo ra cuví xiñi nyicón ñu. Yucuan chaha nyacuví ñu tandihí cuan. Soco yoó cha nyicón yo chi ra, maa ra cuví nuu chi yo. Ta sandu ñn ri ra chi yo chihin ra. Ta sacahnú ca ra chi yo chihin tunyee iñi ra tari cuhva cuñí maa Nyoo.

20 Tari quiví chihí coño ñuhu cuatyí ndo chihin ra Cristo cuví cuan. Ta ña nyacá ñaha ca tuhun ñuhu ñáyiví ihya chi ndo. ¿Ñáá tuhun cha iyó ca ndo tari caa iyó ñáyiví cha ña ñohó nuu Nyoo? Ta quichahá ca ndo cha cahán ñu cha sacuví costumbre cuan.

21 Vatyí catyí ñu chi ndo tyehe caa: “Ma tñun ihya chihin ndahun, ma cachun ihya. Coto ma cacun”, catyí ñu.

22 ¿Ñáá tuhun cha quichahá ca ndo tuhun cahán ñu cuan? Vatyí maa maa ri cha ndichí xiñi ñáyiví cuví. Vatyí nyayu noo cha ñn yaha ri cuví. Ma tiví ndo nuu Nyoo cha cuenda cha cachi ndo.

23 Ndicha vatyí costumbre ihya tari maa cha vaha cuví, cuñí maa ñáyiví. Vatyí sanyehé ñu tindoho coño ñuhu ñu. Ta cuñí ñu tyi vaha sacahnú ñu chi Nyoo tatu sacuví ñu tyicuan caa. Soco ña chaá cuan nuu Nyoo. Vatyí ma cuví tinyaa cuan cha quiñi caa cha cuñi coño ñuhu ñu.

3

1 Chahá Nyoo noo ñáyiví chaa chi yo vatyí nandoto ra Cristo. Ta vityin nyaá ra chiyo vaha Nyoo andiví. Yucuan chaha na nducu yo cha vaha cha chahá Nyoo chi yo nya andiví.

2 Caca xiñi ndo cha vaha cha chahá Nyoo chi yo nya andiví. Ta ma caca xaan xiñi ndo tuhun cha iyó siqui ñuhu ñáyiví ihya.

3 Vatyí nyoho cha yaha chihí ndo ñn caa ri chihin ra Cristo. Ta vityin iyó ndo ñn ri chihin ra chihin Nyoo.

4 Ta quiví quichi tucu ra Cristo, ra chahá ñáyiví chaa cha iyó ndo, tyicuan ta cunyehe

ñáyiví tyi cahnu xaan ca ra cuví maa ra. Ta cunanyehe tucu ñu chi nyoho in caa ri chihin ra. Ta cutahan tucu maa ndo quichi ndo nu tyaquí cuan chihin ra.

Yoso caa chiyo yo costumbre nu quichi chi ta yoso caa cuñí chi coo yo chihin Nyoo vityin

⁵ Yucuan chaha cuñí chi cha nanducú yo cuhva na cúvi tandihí cha quiñi caa cha quichí cuvi iñi coño ñuhu yo. Ta ni noo yo ta ma coo ri maa yo chihin ñusihí o chihin rayíi. Ta ma sacuvi yo cha ña vaha cha cuñí coño ñuhu yo, o inga cha ña vaha. Ta ma nyiyo iñi yo cha tyayíi. Vatyí tari cha sacahnú yo xitohyo, o tavá xiin yo chi Nyoo cuví cuan.

⁶ Cha cuenda tandihí cha ña vaha cuan cuxaán xaan Nyoo chihin ñu cha ña quichahá nu cahán ra. Ta cutachi tuñi ra chi ñu vatyí sacuví ñu cha ña vaha cuan.

⁷ Ta suri tyehe caa chinyacuví tucu maa ndo quiví ña ñohó nuu ndo chi Nyoo.

⁸ Soco vityin ma sacuvi ca yo tandihí cha ña vaha cuan. Ma cuxaan ca yo. Ma cahan uhvi ca yo chi tahan yo. Ta ma cahan cuehe yo chi tahan yo. Ta ma cahan ca yo cha quiñi caa. Ma quita tuhun quiñi caa yuhu yo.

⁹ Ma ñiñi ca yo cuendu. Vatyí quiví ta ityi chata ca, quiví ña ñohó nuu yo chi Nyoo, tyicuan caa chinyacuví yo. Soco vityin ña nyacá ñaha ca tandihí cuan chi yo.

¹⁰ Vatyí ñayiví cha iyó yo vityin, ñayiví chaa cuví. Noo ñáyiví chaa nanduví yo. Ta nduchaá ca yo tari cuhva caá Nyoo, ra savahá chi yo, nyacua nya cohon nuu vaha yo chi ra.

¹¹ Ña niñi cha cuví yo ñu Israel, an ñu Grecia, an ñu inga ñuu. Ta ña niñi cha sacuví yo costumbre circuncisión, an cha ma sacuvi yo. Cuví ri yo noo ra chiñi tuñi o cuví ri yo noo ra soho. Cuví ri yo ra iyó chitoho, o cuví ri yo ra yori nyacá ñaha chi yo, ña niñi xaan ca tuhun cuan. Niñi ca cha in ri cuví tandihí yo chihin ra Cristo, vatyí maa ra cuví tandihí.

¹² Nyoo cuñí ra chi yo ta nacachí vaha ra chi yo vatyí cuví yo ñáyiví chi ra. Yucuan chaha na coo yo ñayiví chaa tari tahán chi coo ñu yihí cuenda ra. Na cundahvi cuñi yo

nyehé yo chi tahan yo. Na cuví yo ñáyiví vaha. Ndahvi saha yo chi yo. Na cumasu iñi yo. Cunyee yo tandihí tisihí tindoho chihin cha siñi cuñí yo.

¹³ Na cucama iñi yo chihin noo noo tahan yo. Ta saha yo ticahnu iñi chi tahan yo tatu ñáa cha sacuví ñu chi yo. Tari sahá ra Cristo ticahnu iñi chi yo, tyicuan caa cuñí chi cha sacuví tucu maa yo.

¹⁴ Ta siñi ri cuñi yo chi tahan yo. Ta nducu yo cuhva coo vaha yo chihin ñu. Vatyí ican cuan cuví cha sacu in ri chi yo. Ta ican cuan cuví cha niñi ca.

¹⁵ Ta cha taxi maa Nyoo na coo añaima yo. Vatyí ra Cristo nyacá ñaha chi yo. Nyoo nacana ra chi yo vatyí tacuhva in ri cuví yo cuenda ra Cristo. Ta tyicuan ri nacuhva yo tyahvi nyoo chi ra cha cuenda ihya.

¹⁶ Ta tuhun ra Cristo na sacutu añaima yo. Sañaha ca yo tuhun ra chi tahan yo. Ta saní ca yo iñi tahan yo chihin cha chiñi tuñi Nyoo. Sacahnu yo chi Nyoo chihin cha cata yo yaa, o salmo. Ta cata yo yaa cha chahá maa Tatyí li Nyoo chi yo chihin cha niñi añaima yo. Ta tyicuan ri nacuhva yo tyahvi nyoo chi Nyoo.

¹⁷ Tatu ñáa tyiño sahá yo, o ñáa tuhun cahán yo, sacuvi yo soco tari cha tyi tyiño maa Sutu Mañi yo Jesús sacuví yo. Ta nacuhva yo tyahvi nyoo chi Nyoo cha cuenda maa ra Cristo.

Chahá ra Pablo tuhun yoso caa nducú yo cuhva coo vaha yo chihin ñáyiví

¹⁸ Nyoho cha iyó yíi ndo, cuhva ndo cha cunyaca ñaha yíi ndo chi ndo. Vatyí yucuan cuhva tahán chi coo ndo, vatyí yihí ndo cuenda Sutu Mañi yo.

¹⁹ Ta nyoho rayíi, cuñi ndo chi ñasihí ndo. Ta ma nduxaan ndo chi ña.

²⁰ Nyoho cha cuví ndo sehe quichaha ndo chi sutu ndo ta chi sihi ndo. Vatyí yucuan cuhva cuñi maa Sutu Mañi yo.

²¹ Nyoho cha cuví ndo sutu ta sihi, ma cahan xaan ndo chi sehe ndo, vatyí coto nducuihya iñi chi.

²² Ta nyoho cha cuví ndo musu, quichaha ndo chi chitoho ndo. Ñima cuhva cha nyehé ri ra chi ndo quichaha ndo chi ra, tacuhva vatyí vaha cuñí ra nyehe ra chi ndo. Soco sacuvi ndo chihin cha tandihí

añima ndo. Vasi ña nyehé ra. Vatyí Nyoo nyehé ra chi ndo.

²³ Tandihí ri tyiño sacuví yo, sacuvi yo chihin cha ní ñni yo. Saha yo tuhun tyi tyiño nuu maa Sutu Mañi yo sacuví yo. Ta ñima maa ri maa tyiño nuu ñáyivi.

²⁴ Vatyí chitó yo vatyí maa Sutu Mañi yo cucuhva ra noo cha tahán chi chi yo vatyí sacuví yo tyiño nuu ra Cristo. Vatyí ican maa ra cuví chitoho yo cha ndicha vaha.

²⁵ Soco tatu sacuví yo cha ña vaha, Nyoo cutachi tuñi ra chi yo cha cuenda cha ña vaha cha sacuví yo. Ta tandihí yo ñn ri ñáyivi cuví yo nuu ra. Vatyí Nyoo ña cachi ra ñáyivi cuñí ra.

4

¹ Nyoho cha iyó musu ndo, cuñí chi tyi vaha ñáyivi cuví ndo chihin musu ndo. Nícohon ñni ndo vatyí iyó tucu noo chitoho maa ndo nya andivi. Ta maa ra nyehé ra chi ndo.

² Ta tyicuan ri cacán tahvi ndo chihin cha ní ñni ndo. Ta nacuhva yo tyahvi nyoo chi Nyoo cha cuenda tandihí maa.

³ Cacán tahvi ndo chaha ndi, vatyí nanuña ca Sutu Mañi yo xiñi ñáyivi ta tyasoho ñu tuhun ra Cristo cha cahán ndi nuu ñu. Vatyí tari noo tuhun xehe cuví tuhun ra Cristo chi ñu, vatyí ña chitó ñu tyi ican ra cuví ra sacacú chi yo. Ta cha catyi tuhun ihya ñohí vehe caa.

⁴ Cacán tahvi ndo chahi tacuhva cuví sañahí chi ñu yoso cuhva cuvi cutuñi vaha ñni ñu tuhun ra Cristo, tari cuhva tahán chi tyi sacuví.

⁵ Cachi coo ndo chihin ñu ña ñohó nuu chi Nyoo. Vatyí tyicuan caa ta cuví cahan ndo tuhun Nyoo chihin ñu.

⁶ Cuñí chi vatyí ndatuhún yo maa maa ri cha vaha, ta cha cachi, (ta cha tahán ñni ñáyivi) tari tahán chi cunyacuvi yo cha yihí yo cuenda ra Cristo. Tyicuan ta cuví coto yo yoso caa cunacahan yo tatu ñáá noo tuhun ndacá tuhun ñu chi yo.

Nu sacuhún ra Pablo nocumi chi ñu ñuu Colosas cha yihí cuenda Nyoo

⁷ Ra Tíquico, yañi yo, ra sahá tyiño tyiño Sutu Mañi yo chihin, maa ra cunacatyí ra chi ndo yoso caa cuahán nyaí.

⁸ Yucuan chaha tachí chi ra nu nyicu ndo vatyí nacatyí ra chi ndo yoso caa nyicú ndi. Ta sanduní ca ra ñni ndo.

⁹ Ta chihin ra Tíquico vachi tucu ra Onésimo, yañi yo. Ta ñni ñni ra. Ta cuñí yo chi ra. Cuví ra noo ra ñuu ndo. Maa ra cucanacatyí ra chi ndo tandihí cha cuví nu nyai.

¹⁰ Ra Aristarco, ra tahin cha ñohó ndi vehe caa, saquichí ra nocumi chi ndo. Ta saquichí tucu ra Marcos, yañi cunducuatyi ra Bernabé, nocumi chi ndo. Ta cha sacote chi ndo tuhun ra Marcos. Tatu chaa ra nu nyicu ndo, vaha cacán ndo chihin ra.

¹¹ Vachi tucu nocumi chi ndo sahá ra Jesús, ra cha nañi tucu Justo. Ta chichi cha tandihí ñu Israel cha yihí cuenda Nyoo, uñi tahan ri ra ihya sahá tyiño ra tuhun Nyoo chihin. Ta nduní xaan ca ñni sahá ra.

¹² Vachi tucu nocumi chi ndo sahá ra Epafra, ra ñuu ndo. Ta maa ra sacuví ra tyiño nuu ra Cristo. Tyicuan ri chicán tahvi ra chaha ndo chi Nyoo tyi nacaca vaha ndo chihin Nyoo. Nacuhva cuenda vaha ndo chi ndo chi Nyoo tacuhva cuvi sacuvi ndo cuhva cuñí ra.

¹³ Ta yuhu cuví cha ndaa vatyí ra Epafra chicán tahvi xaan ra cuenda ndo, ta cuenda ñu cha nyicu nya ñuu Laodicea ta ñuu Hierápolis.

¹⁴ Vachi tucu nocumi chi ndo sahá ra Lucas, ra cha cuví doctor cha cuñí xaan yo chi. Ta vachi tucu nocumi chi ndo sahá ra Demas ñandihí.

¹⁵ Cuhva ndo nocumi chi yañi yo ta tahan yo cha nyicu ñuu Laodicea. Ta cuhva ndo nocumi chi cu Ninfas ta chi tandihí ñu yihí cuenda Nyoo cha ndu ñn ri vehe ña.

¹⁶ Tatu yaha sacuaha ndo carta ihya, ta sacuhun ndo nu canyicu ñu yihí cuenda Nyoo nya Laodicea na sacuaha tucu maa ñu. Ta sacuaha tucu maa ndo carta cha sacuhin chi ñu Laodicea.

¹⁷ Catyi ndo chi ra Arquipo vatyí na sacuvi vaha ra tyiño cha chahá Sutu Mañi yo chi ra tyi sacuví ra.

¹⁸ Yuhu ra Pablo saquichí nocumi ihya chi ndo. Ta ma naa ñni ndo cha ñohí vehe caa. Ta Nyoo na nasoco ra chi ndo. Ta na cuví chi tyicuan caa.

Carta Cha Xihna Ri Sacuhun Ra Apóstol Pablo Chi Ñáyiví Ñuu Tesalónica Cha Yihí Cuenda Nyoo

*Nu tyaq ra Pablo ta ra tahan ra noo tutu
chi ñu yihí cuenda Nyoo*

¹ Yuhu ra Pablo chihin ra Silvano ta ra Timoteo, tyaá ndi tutu ihya chi ndo cha cuví ndo ñu yihí cuenda Nyoo ñuu Tesalónica chiña. Vatyí ñn ri cuví ndo chihin Nyoo Sutu yo ta chihin Sutu Mañi yo Jesucristo. Ta Nyoo Sutu yo ta Sutu Mañi yo Jesucristo na nasoco ra chi ndo. Ta na cuhva ra cha coo cha taxi ri añima ndo.

*Vaha xaan chinó ñni ñu Tesalónica cuan
chi Nyoo*

² Tyicuan ri nacuhvá ndi tyahvi nyoo chi Nyoo cha cuenda tandihí ndo. Ta nyita ri chicán tahvi ndi cha cuenda ndo.

³ Tyicuan ri yihí ñni ndi tuhun ndo nuu Nyoo Sutu yo ta nicohón ñni ndi vatyí ñni ñni ndo chinó ñni ndo chi Nyoo ta sacuví ndo tyiño nuu ra. Ta ñni sahá tyiño ndo cha cuenda cha cuñí ndo chi ra. Ta chihin cha ñni ñni ndo yihí ñni ndo cha cuañihi ndo cha cuenda ra Jesucristo.

⁴ Vatyí chitó ndi tyi Nyoo nacachi vaha ra chi nyoho yañi. Ta cuñí xaan ra chi ndo.

⁵ Vatyí quiví cahan ndi tuhun Nyoo yoso caa sacacú ra añima yo chihin ndo, ñima chihin tuhun yuhu ri cahan ndi, soco tyinyee xaan Tatyí Ii chi ndi, ta cuaha xaan sacuvi ra chihin tunyee ñni ra. Ta cahan ndi chihin cha chitó vaha ndi tyi tuhun ndicha Nyoo cuví. Ta nyehe vaha ndo yoso caa chiyó ndi quiví chinyaq ndi chihin ndo. Tyicuan caa chiyó ndi cha cuenda cha vaha chi maa ndo.

⁶ Ta quichaha iyó ndo cuhva iyó ndi, ta cuhva iyó Sutu Mañi yo. Vatyí natin cuenda ndo tuhun Nyoo, vasi cuaha tindoho nyehe ndo cha cuenda cuan. Soco siñ xaan cuñí ndo vatyí maa Tatyí Ii chahá tusiñ ñni cuan chi ndo.

⁷ Ta cha tyicuan caa, tyinyee xaan ndo chi tandihí ñu yihí cuenda Nyoo nicahnu

ityi Macedonia chiña ta nicahnu ityi Acaya ihya ñandihí, vatyí nyehé ñu cuhva iyó ndo chihin Nyoo.

⁸ Ñima ityi Macedonia ta Acaya ri, soco tandihí ri ityi nu chiñí ñu tuhun ndo chitó ñu tuhun Sutu Mañi yo ta chitó ñu vatyí chinó xaan ñni ndo chi Nyoo. Ta yucuan chaha nyacua ña ñni ca cha cahan ndi tuhun Nyoo chihin ñu.

⁹ Vatyí suri maa ñu nacatyí ñu chi ndi yoso caa cha vaha xaan tin cuenda ndo chi ndi quiví cuan. Nacatyí ñu yoso caa sandihí ndo tuhun cha sacahnu ndo xitohyo ta quichaha sacuvi ndo tyiño nuu Nyoo nyitó, Nyoo cha ndicha.

¹⁰ Ta nacatyí tucu ñu yoso caa nyatú ndo naquichi tucu ra Jesús Sehe Nyoo inga chaha ityi andiví. Ican ra cuví ra cha sanandoto Nyoo chii. Ta maa ra cuví ra ra sacacú chi yo tacuhva cha ma tachi tuñi Nyoo chi yo quiví sacutuñi ra chi ñáyiví.

2

Tyiño sahá ra Pablo ñuu Tesalónica

¹ Nyoho yañi, chitó ndo vatyí ñima cha caha ri cahan ndi chicahan ndi tuhun Nyoo ñuu ndo.

² Vatyí chitó ndo yoso caa nyehe ndi tindoho saha ñáyiví ñuu Filipo cha ni cumañi ca chaq ndi ñuu ndo. Ta vasi nyehe xaan ndi tindoho ñuu cuan soco quiví chaq ndi ñuu ndo cahan tucu ndi tuhun Nyoo chihin ndo chihin cha ña yuhví ndi. Ta vasi xaan xaan nanduví ñáyiví ñuu ndo, soco tyinyee xaan Nyoo chi ndi ta sacoto ndi chi ndo yoso caa sacacú ra añima yo.

³ Vatyí tuhun cha chaha ndi chi ndo maa maa ri cha ndicha cuví. Ta ñahri cha quiñi caa chicá xiñi ndi. Ta ni ñima cha cuñí ndi sandavi ñaha ndi chi ndo.

⁴ Ñahri cha ña vaha cahan ndi, vatyí Nyoo nyehé ra chi ndi, ta maa ra tyatyíño ra chi ndi vatyí sacoto ndi chi ndo yoso caa sacacú ra añima yo. Ta yucuan cuví cha cahan ndi tari cuhva tyatyíño ra chi ndi. Vatyí ña cuñí ndi cuvaha ndi nuu ñáyiví, soco nuu Nyoo cuñí ndi cuvaha ndi, vatyí maa ra nyehé ra ñáa cha caa añima yo.

⁵ Ta nyoho chitó ndo vatyí ni noo chaha ña cahan ndi chihin tuhun tyaqui cha cuñí

ndi sandavi ñaha ndi chi ndo. Ta ni ñima cha cuñi ndi saha ganaa ndi xuhun ta cahan ndi tuhun ihya chihin ndo. Nyoo cuví ra cha ndaa tyi ndicha cha cahín ihya.

⁶ Ta ni noo chaha ña nanducú ndi cuhva cha sacahnu ñáyivi chi ndi, ni nyoho, ni inga ñu. Ndicha, iyó ityi chi ndi cha cunyaca ñaha ndi chi ndo tyi maa ra Cristo tachí ra chi ndi, soco ña cuñi ndi coso ndi siqui ndo cha tyicuan caa.

⁷ Soco cuñi ndi tyinyee ndi chi ndo. Tari noo sihi sacuahnú ña chi sehe ña, sahá cuenda ña chi cue, tyicuan caa cuñi ndi tyinyee ndi chi ndo.

⁸ Cuñi xaan ndi chi nyoho, ta cahvi iñi ndi vatyí ñima tuhun Nyoo ri cuhva ndi chi ndo, soco nyacua nya ñáyivi ndi ñandíhi, cha cuenda cha cuñi ndi chi ndo.

⁹ Nyoho yañi, nicohón iñi ndo yoso caa saha tyiño ndi quivi chinyicú ndi chihin ndo. Sahá tyiño ndi ñicahñu ta cha cuaa vatyí ña cuñi ndi coso ndi siqui ni noo ndo cha ni ri ca cha cahán ndi tuhun Nyoo chihin ndo.

¹⁰ Ta nyoho cuví ndo cha ndaa, ta Nyoo ñandíhi, vatyí maa ri cha vaha ta cha ndaa chinyacuví ndi quivi chinyaa ndi chihin ndo cha cuví ndo ñu chinó iñi chi ra Cristo. Maa maa ri cuhva cuñi Nyoo chinyacuví ndi, ta ña chaha ndi cuhva vatyí cahan ña vaha ndo siqui ndi.

¹¹ Ta chitó tucu ndo yoso caa sanduní ndi iñi noo noo ndo chihin tuhun chaha ndi chi ndo. Sandunyeé ndi iñi ndo tari noo ra chihin sehe ra.

¹² Ta catyi ndi chi ndo nacachi coo ndo tari tahán chi coo ñu yihí cuenda Nyoo. Vatyí maa ra nacana chi ndo vatyí coo ndo nu nyacá ñaha ra, ta nyehe ndo cha tyaqui gloria ra.

¹³ Yucuan chaha tyicuan ri nacuhvá ndi tyahvi nyoo chi Nyoo, vatyí quivi chiñi ndo tuhun ra cha cahan ndi chihin ndo, natíin cuenda ndo vatyí nacotó ndo tyi tuhun Nyoo cuví ta ñima tuhun ñáyivi ri. Ta ndicha cha tuhun Nyoo cuví, vatyí sacuvi chi vatyí chino iñi ndo chi Nyoo ta nasama ndo cuhva iyó ndo.

¹⁴ Yaha cuan ta nyehe tucu maa ndo tindocho saha ñáyivi ñuu ndo, tari nyehe tucu ñu yihí cuenda ra Cristo Jesús nicahnu

ityi Judea. Tyicuan caa sanyehe tucu ñu Israel ityi Judea cuan tindocho chi ñáyivi tahan yo cuenda ra Cristo cuan.

¹⁵ Ta ican ñu Israel cuan cachahñi chi Sutú Mañi yo Jesús tari cachahñi tucu ñu chi ra profeta, ra cachaha cuenda tuhun cahan Nyoo ta ityi chata ca. Ñu Israel cuan tava ñehe ñu chi ndi. Ñima cuhva cuñi Nyoo iyó ñu. Ta tasi cuñi ñu nyehe ñu chi tandíhi ñáyivi.

¹⁶ Tatu cuñi ndi cahan ndi tuhun Nyoo chihin ñu cha ñima ñu Israel cuví tacuhva cacu ñu, ña chahá ñu Israel cuan cahan ndi. Ta cha cuenda cha chasí ñu nu cahán ndi, cucuaha ca cuatyí ñu. Ta vityin nu ndíhi tuhun cutachi tuñi xaan Nyoo chi ñu.

Nu catyi ra Pablo vatyí cuñi ra cunyehe ra nu nyicú ñu Tesalónica inga chaha

¹⁷ Yañi, cha yaha cha quita ndi ñuu ndo vasi ña naha nyehe ndi chi ndo soco ñohó xaan iñi ndi chi ndo. Ta chihin cha ñi iñi ndi cuñi ndi cunyehe ndi nu nyicú ndo inga chaha.

¹⁸ Ta nducú ndi cuhva cuhun ndi soco ña cuví. Ta yuhu ra Pablo ñandíhi, cuaha xaan chaha nduqui cuhva cuhun ndi, soco tahan ri chaha cha cuñi ndi cuhun ndi ta ña chaha ra ña vaha.

¹⁹ Soco ¿yóó chi ita iñi ndi? Ta ¿yóó chi cuenda cusí cuñi ndi, ta vaha cuñi ndi? ¿Atu ñima cha cuenda maa ndo cusí xaan cuñi ndi nuu Sutú Mañi yo Jesucristo quivi quichi ra inga chaha?

²⁰ Vatyí cha cuenda cha vaha cuahan ndo chihin Nyoo ta nyehé yo tyi ña caha ri sahá tyiño ndi. Ta sí xaan cuñi ndi cha cuenda cuan.

3

¹ Ta yucuan chaha ña cunyeé que cha ma cote yoso caa cuahan ndo chihin Nyoo. Ta natyai iñi tyi ndoi ñuu Atenas.

² Ta tachí chi yañi yo ra Timoteo na cuhun ra cunyehe ra chi ndo. Maa ra sacuví ra tyiño nuu Nyoo vatyí in ri chihin ndi cahán ra tuhun yoso caa cacú aña yó sahá ra Cristo. Tachí ndi chi ra nu nyicú ndo na sanduní ca ra iñi ndo ta sandunyeé ca ra iñi ndo tacuhva vatyí chinó ca iñi ndo chi Nyoo.

³ Tyicuan caa ta ni noo ndo ta ma ndu uvi iñi ndo cha cuenda cha nyehé ndo tindoho. Vatyí nyoho chitó ndo vatyí nyaá yo cha nyehe yo tindoho tyehe caa.

⁴ Vatyí ta ninyaá ca ndi chihin ndo, catyí ndi chi ndo vatyí cha cuñí quichi quiví cha nyehé yo tindoho. Ta chitó vaha maa ndo tyi tyicuan caa cuví.

⁵ Yucuan chaha ña cunyeé que cha cuñí cote tuhun ndo. Ta tachí tyiño chihin ra Timoteo na nyehe ra yoso caa cuhva cuahan chinó iñi ndo chi Nyoo. Vatyí yuhví coto sandavi ñaha cuihna chi ndo ta nandihví tucu ndo nu quiñi caa inga chaha. Vatyí tu tyicuan caa, cucunaa tandihí tyiño saha ndi nu nyicú ndo.

⁶ Soco vityin cha nachaa ra Timoteo cha chahan ra nu nyicú ndo ñuu Tesalónica chiña. Ta nacatyí ra chi ndi vatyí ní iñi ndo chinó iñi ndo chi Nyoo. Ta cuñí xaan ndo chi tahan ndo. Ta catyí ra tyi tyicuan ri nicohón iñi ndo chi ndi ta cuñí xaan ndo nyehe ndo chi ndi, tari nyuhu, cuñí tucu maa ndi nyehe ndi chi ndo.

⁷ Yucuan chaha, yañi, vasi cuaha cha cuví chi ndi ta nyehé ndi tindoho, soco vaha xaan cuñí ndi cha chitó ndi vatyí nyoho vaha chinó iñi ndo chi Nyoo ta ña sañá ndo chi ra.

⁸ Tari quiví cha nduchaa ñayiví ndi, cuñí maa ndi cuhva cha nacoto ndi vatyí nyoho ñihi cuahan ndo chihin Nyoo.

⁹ Nyacua ña ñihí ndi cuhva nacuhva ndi tyahví nyoo chi Nyoo cha cuenda ndo. Vatyí sñi xaan cuñí ndi nuu Nyoo cha cuenda vatyí vaha cuahan ndo chihin ra.

¹⁰ Chicán tahvi xaan ndi chi Nyoo ñicahñu ta cha cuaa, vatyí cuñí ndi cuhun ndi cunyehe maa ndi chi ndo. Tyicuan ta cuví sandunanñi ndi cha chinó iñi ndo.

¹¹ Ta vityin nyatú ndi na tyinyee maa Nyoo Sutu yo ta Sutu Mañi yo Jesucristo tacuhva cuví cuhun ndi nu nyicú ndo.

¹² Ta na tyinyee ca Sutu Mañi yo Jesucristo chi ndo tacuhva cuñí ca ndo chi noo noo tahan ndo ta chi tandihí ñayiví tari cuñí nyuhu chi nyoho.

¹³ Tacuhva vatyí cunñi ca iñi ndo ta cunduvii ndihí añima ndo. Ta ma coo ca cuatyí ndo nuu Nyoo Sutu yo quiví quichi tucu

Sutu Mañi yo Jesucristo chihin tandihí ca ñu yihí cuenda ra.

4

Cuhva cha tahán iñi Nyoo cha coo yo

¹ Vityin yañi, chacú ndahvi ndi nuu ndo ta chahá ndi tuhun chi ndo chihin ndusu yuhu Sutu Mañi yo Jesucristo, na coo ca ndo tari cuhva sañaha ndi chi ndo, cuhva tahán iñi Nyoo. Ta sañihi ca ndo coo ndo tyicuan caa noo noo quiví.

² Nyoho cha chitó ndo yoso caa chaha ndi cuhva chi ndo tari chaha tucu maa Sutu Mañi yo Jesús cuhva chi ndi.

³ Cha cuñí Nyoo, ican cuví ihya: Cha nacuhva ndihí ndo chi ndo chi ra tacuhva sanduvii ndihí ra añima ndo. Ta ni noo ndo ta ma coo ndo chihin noo ñaha sihi o rayñi tatu ñima ñasihí o yñi ndo cuví.

⁴ Ta tahan tahan ndo cuñí chi coto ndo yoso caa coo ndo chihin ñasihí ndo. Coo vii ndo chihin ña chihin cha cuñí ndo chi ña.

⁵ Ñima chihin cha quichi cuví iñi ndo cha quiñi caa tari nyacuví ñayiví cha ña ñohó nuu chi Nyoo.

⁶ Ta ni noo ndo ta ma sandavi ñaha ndo chi yañi ndo ta coo ndo chihin ñasihí ra. Vatyí Sutu Mañi yo, ñihi xaan tachí tuñi ra chi ñu sacuví tyicuan caa, tari cuhva catyí ndi chi ndo.

⁷ Vatyí Nyoo nacana ra chi yo vatyí tacuhva sacuvi yo cuhva cuñí maa ra, ta ñima noo cuhva quiñi caa.

⁸ Ta yucuan chaha yóo ñu cha ña cuñí tyasoho tuhun ihya, ñima tuhun ñayiví ri ña tyasohó ñu, soco tuhun Nyoo ña tyasohó ñu. Vatyí suri maa Nyoo chaha ra Tatyí Ii ra chi ndo.

⁹ Soco tuhun cha cuñí yo chi tahan yo, ña chiñuhú cha tyai nu tutu ihya tuhun cuan. Vatyí suri maa Nyoo cha sañaha ra chi ndo vatyí cuñi yo chi tahan yo cuenda Nyoo.

¹⁰ Ta tyicuan caa cuñí ndo chi tandihí tahan yo nicahnu Macedonia chiña. Soco chacú ndahvi nuu ndo yañi, vatyí na cuñi ca ndo chi ñu noo noo quiví.

¹¹ Nducu ndo cuhva coo vii ndo. Ta ma tyihí ndo chi ndo nu ña tahán chi, soco ñn ri tyiño maa ndo caca xiñi ndo. Ta saha tyiño ndo chihin ndaha ndo tari cuhva catyí ndi chi ndo quiví cuan.

¹² Tyicuan caa sacuvi ndo tacuhva vatyí ñáyívi ña ñohó nuu Nyoo cuasaha ñu ñáyívi chí ndo. Ta ñahri cuacumañi chí ndo.

Yoso caa cucuvi quívi quichi Sutu Mañi yo Jesús inga chaha

¹³ Yañi, ña cuñí ndi cha ma coto ndo ñáá cha cuví chí ñáyívi chíhí, vatyí coto nducuihya iñi ndo tari nducuihyá iñi ñáyívi cha ma tahan chí nyehe chí Nyoo.

¹⁴ Ta tari cha chinó iñi yo vatyí chíhí ra Jesús ta nandoto ra, tyicuan caa chinó tucu iñi yo vatyí Nyoo cusanandoto ra chí ñu ndiyí cha chinó iñi chí ra.

¹⁵ Yucuan chaha catyí ndi chí ndo tari sañaha Sutu Mañi yo chí ndi. Vatyí yoó cha nyitó yo nyacua nya quívi quichi ra, ñima xihna ca yo cuhun ican saha ñu cha yaha chíhí.

¹⁶ Vatyí suri maa Sutu Mañi yo cunoo xica ra andívi, ta cucana chaa ra vatyí maa ra cuví ra nyacá ñaha. Ta cucana chaa noo ra cuví nuu chí ángel. Ta cunatívi trompeta Nyoo. Tyicuan ta ñáyívi cha yíhí cuenda ra Cristo ta chíhí ñu, xihna ca ñu cunandoto.

¹⁷ Yaha cuan ta yoó cha nyitó ca yo cun-
daa xica yo ñn ri chíhin ñu nu vico, nu cunañihi tahan yo chíhin Sutu Mañi yo ityi andívi. Ta yucuan ta cucunyaa yo chíhin ra tyicuan ri maa.

¹⁸ Yucuan chaha sanduníi ndo iñi tahan ndo chíhin tuhun ihya.

5

¹ Soco ama o ñáá quívi cucuvi tuhun ihya, ña ñiñi cha cahin tuhun cuan chíhin ndo yañi.

² Vatyí cha chitó vaha maa ndo vatyí ma tuvi ri iñi yo ta cuchaa quívi quichi tucu Sutu Mañi yo. Vatyí tari cuhva quíhvi noo ra suhu vehe ñáyívi cha cha cuaa, tyicuan caa cucuvi.

³ Vatyí quívi cha catyí ñáyívi vatyí vaha xaan iyó ñu, ta ñahri maa cha yuhvi ñu, tyicuan ta sana iñi ñu ta quichi tndoho cuan síqui ñu. Tari noo ñaha síhi cha cuacacu sehe, sana iñi ña ta quíhvi cha uhvi chí ña. Ta tyicuan caa cucuvi chí ñáyívi quívi quichi Sutu Mañi yo, vatyí ma cuví cono ñu.

⁴ Soco nyoho yañi, ñima ca nu ñaa iñi nyicú ndo ta catyí ndo vatyí sana iñi ndo ta

cuchaa chí quívi Sutu Mañi yo, tari sana iñi ñáyívi tatu quíhvi ra suhu vehe ñu.

⁵ Vatyí tandíhi yo chitó yo yoso caa tahán chí coo yo vatyí Nyoo sandundichin ra añima yo, ta ña iyó ca yo nu ñaa iñi tari ñu ña ñohó nuu Nyoo.

⁶ Yucuan chaha ma cuví yo tari inga ñu cuan. Tari quívi cha quixí ñu vatyí ña quichahá ñu cha ndichi Sutu Mañi yo. Soco yoó cuatu tuhva yo ta cachi coo yo.

⁷ Vatyí ñu quixí, quixí ñu cha cha cuaa, ta ñu chíhi xaan ndixí, chíhí ñu cha cha cuaa.

⁸ Soco yoó cha cuví yo ñu cuenda cha ñicahñu, nacachi coo yo. Ta tari noo sindaro sahá ra cuenda chí ra chíhin noo cha tyaá ra pechu ra, tyicuan caa saha yo cuenda chí yo chíhin cha ñi iñi yo chinó iñi yo chí Nyoo, ta chíhin cha cuñí yo chí tandíhi ñáyívi. Ta tari sindaro sahá cuenda ra xiñi ra chíhin noo caa, tyicuan caa cuñí chí cha sahá yo cuenda chí yo chíhin cha yíhí iñi yo tyi cacu yo.

⁹ Vatyí Nyoo ña tyaá ra cuhva chí yo vatyí tachi tuñi ra chí yo, soco nacachí ra chí yo vatyí cacu yo cha cuenda Sutu Mañi yo Jesucristo.

¹⁰ Vatyí ra Jesucristo chíhí ra cha cuenda yo vatyí tacuhva coo yo ñn ri chíhin ra. Ñahri saha vasi cha chíhí yo o iyó ca yo, soco tandíhi yo coo yo ñn ri chíhin ra.

¹¹ Yucuan chaha sanduníi ca ndo iñi tahan ndo ta sanduníi ca ndo iñi ñu, tari cuhva cuahan nyacuví ndo vityin.

Nu chaha ra Pablo tuhun chí ñu

¹² Soco yañi, chacú ndahvi ndi nuu ndo, na saha ndo ñáyívi chí ra sahá tyiño nu nyicú ndo. Vatyí nyisó ra tyiño cuenda Sutu Mañi yo ta chahá ra tuhun chí ndo.

¹³ Cuñí chí cha saha xaan ndo ñáyívi chí ra chíhin cha cuñí ndo chí ra. Vatyí sacuví ra tyiño Sutu Mañi yo. Ta vaha coo ndo chíhin tahan ndo cuenda Nyoo.

¹⁴ Ta tyatyíño ndi chí ndo yañi, vatyí cuhva ndo tuhun chí ñu cha ña cuñí saha tyiño. Ta sanduníi ndo iñi ñu cha ña ñi ca iñi. Ta tyinyee ndo chí ñu vita cuñí vatyí ta chino vaha ca iñi ñu. Ta cucama iñi ndo chíhin tandíhi ñáyívi.

¹⁵ Saha ndo cuenda coto sacuvi ndo cha ña vaha chíhin ñu nyacuví cha ña vaha

chihin ndo. Nducu ndo cuhva sacuvi ndo cha vaha chihin tahan ndo cuenda Nyoo ta chihin tandihí ñáyívi.

¹⁶ Tyicuan ri cusí cuñi ndo.

¹⁷ Ta çacan tahvi ndo tyicuan ri maa.

¹⁸ Nacuhva ndo tyahvi nyoo chi Nyoo cha cuenda tandihí cha cuví. Vatyí ican ihya cuví cha cuñí Nyoo cha sacuvi yo cha cuví yo ñu chinó iñi chi ra Cristo Jesús.

¹⁹ Ma ndahva ndo ñuhu Tatyí li cha nyaá aña ndo.

²⁰ Ma cuacu nyaa ndo tuhun Nyoo cha cahán noo ra cahán tuhun chahá Nyoo.

²¹ Tin cuenda ndo tandihí cha cahán ra. Ta naquehen ndo cha vaha.

²² Cuachiyo ndo nuu tandihí cha quiñi caa.

²³ Ta maa Nyoo ra iyó cha taxi ri chii, na sanduvii ca ra aña ndo tacuhva vatyí in ri chi maa ra nacuhva cuenda ndo chi ndo. Ta na cocumi ra aña ndo ta cha chiñi tuñi ndo ta coño ñuhu ndo tacuhva vatyí ma coo ca cuatyí ndo quiví quichi tucu Sutu Mañi yo Jesucristo.

²⁴ Ra cha nacachí chi ndo, cuví cunyeé iñi yo chi ra, vatyí maa ra cusacuvi ra tandihí maa ihya.

Nu ndihí cahán ra Pablo ta chahá ra nocumi chi ñu

²⁵ Yañi, çacan tahvi ndo cha cuenda ndi.

²⁶ Ta nacuhva ndo nocumi chi tandihí yañi yo cuenda Nyoo.

²⁷ Tyatyíñé chi ndo chihin ndusu yuhu Sutu Mañi yo vatyí sacuahá ndo carta ihya nuu tandihí tahan yo cuenda Nyoo.

²⁸ Ta na nasoco Sutu Mañi yo Jesucristo chi ndo. Ta na cuvi chi tyicuan caa.

Carta Cha Cu Uvi Cha Sacuhun Ra Apóstol Pablo Chi Ñáyiví Ñuu Tesalónica Cha Yihí Cuenda Nyoo

*Nu tyaq ra Pablo ta ra tahan ra noo tutu
chi ñu ñuu Tesalónica cha yihí cuenda Nyoo*

¹ Yuhu ra Pablo chihin ra Silvano ta ra Timoteo, tyaá ndi noo tutu ihya tyi sacuhun ndi chi ndo cha cuví ndo ñu yihí cuenda Nyoo ñuu Tesalónica chiña. Vatyí ñn ri cuví ndo chihin Nyoo Sutu yo ta chihin Sutu Mañi yo Jesucristo.

² Ta na nasoco Nyoo Sutu yo ta Sutu Mañi yo Jesucristo chi ndo. Ta na cuhva ra cha taxi ri coo añima ndo.

*Nu catyi ra Pablo yoso caa cusacutuñi
Nyoo chi ñu iyó cuatyí quiví quichi ra Cristo*

³ Nyoho yañi, tyicuan ri cuñí chi cha nacuhva ndi tyahvi nyoo chi Nyoo cha cuenda ndo, vatyí tyicuan caa tahan chi cha sacuví ndi cha cuenda cha ñihi ca cuahan chinó iñi ndo chi Nyoo noo noo quiví, ta ñn ri cuñí xaan ca ndo chi tahan ndo.

⁴ Yucuan chaha ñi cuñí ndi cahán ndi tuhun ndo chihin nuu ñu yihí cuenda Nyoo inga ca vehe ñuhu. Vatyí nyoho cama xaan iñi ndo ta vaha xaan chinó iñi ndo chi Nyoo cha ni ri ca yahá ndo tandihí tindoho sanyehé ñáyiví chi ndo.

⁵ Ihya sañahá chi yo vatyí vaha cuhva sacutuñi Nyoo chi yo, vatyí nu ndihí tuhun cusaha Nyoo tuhun vatyí naña tucu nyoho quihví ndo nu nyacá ñaha ra. Vatyí cha cuenda tuhun ra, nyehe xaan ndo tindoho vityin.

⁶ Ta cha cuenda chi Nyoo, vaha cha cutiyahvi ra chihin tindoho chi ñu sanyehé tindoho chi ndo.

⁷⁻⁸ Ta chi nyoho cha nyehé ndo tindoho sahá ñu, cuhva ra cha nyitatu ndo tari cuhva tucu ra chi nyuhu, quiví cuquichi tucu Sutu Mañi yo Jesucristo nya andiví chihin ángel cha iyó xaan tunyee iñi ra chi, quichi ra chihin ñuhu cha cayú. Vatyí cutachi tuñi ra chi ñáyiví ña ñohó nuu Nyoo,

ñu ña quichahá tuhun ra, tyi cuví ra Sutu Mañi yo Jesucristo, ra quichí sacacu chi yo.

⁹ Ñu cuan, cundoho ñu ta ma ndihí maa cha ndoho ñu, ta cunaa ñu nuu Sutu Mañi yo Jesucristo vatyí ma nyehe ñu chi ra. Ni ma nyehe ñu ñana cha cahnu cuví ra chihin tunyee iñi ra

¹⁰ quiví cuquichi ra. Vatyí quiví cuan ñu yihí cuenda ra cusacahnu ñu chi ra, tandihí ri ñu chinó iñi chi ra. Ta mahñu ñu, ñohó tucu nyoho vatyí chinó iñi ndo cha ndaa cha chaha ndi chi ndo.

¹¹ Yucuan chaha tyicuan ri chicán tahvi ndi chaha ndo, na tyinyee Nyoo yo chi ndo tacuhva na saha ra tuhun vatyí naña ndo cha cuví ndo ñáyiví nacachí ra. Ta chicán tahvi tucu ndi chaha ndo na tyinyee ra chi ndo tacuhva cuvi sacuvi ndo cha vaha chihin tunyee iñi ra. Ta tandihí tyiño sahá ndo nuu ra cuacacu vaha, suri cha cuenda tunyee iñi chahá ra chi ndo vatyí chinó iñi ndo chi ra.

¹² Tacuhva sacahnu ñáyiví siví Sutu Mañi yo Jesucristo, vatyí nyehé ñu cuhva iyó ndo. Ta maa ra cusacahnu ra chi ndo nuu ñáyiví cha cuenda tumañi iñi cha chahá Nyoo chi ndo cha cuenda ra.

2

Ra cha ñahri maa ley Nyoo iyó chi

¹ Ta cha cuenda quiví cuquichi Sutu Mañi yo Jesucristo nu cusandu ñn ri ra chi yo, cuñí cahin vityin, nyoho yañi. Vatyí chacú ndahvi nuu ndo,

² ma yatyí xaan cutondo xiñi ndo. Ni ma nayuhvi ndo vatyí nyacua nya tatyí ñavaha ta cucatyí chi chi ndo vatyí cha chaa quiví Sutu Mañi yo, ta nyacua nya ra cahán tuhun Nyoo ta cucatyí ra vatyí cha chaa quiví cuan, ta cutyaa ra nu carta ta cucatyí ra tyi yuhu sacuhin carta cuan chi ndo.

³ Ni noo cuhva ma cuhva ndo cha sandavi ñaha ñu chi ndo. Vatyí cha ni cumañi ca chaa quiví cuan cuaha xaan ñu cusandihí ñu cha chino iñi ñu chi Nyoo ta cundicuita rayí cha ñahri ley Nyoo iyó chi, ra cacu vatyí cunaa cuví ra cuan.

⁴ Ican ra cuví ra xaan iñi chi Nyoo. Cundicuita ra síqui tandihí cha nyisó siví Nyoo. Tandihí cuhva sacahnú ñáyiví chi Nyoo cunducuita ra síqui. Ta nyacua nya

chichi vehe ñuhu cahnu Nyoo ta cucunyaa ra ta cunyaca ñaha ra, cusaha ra tyi Nyoo cuví ra.

⁵ ¿Atu ña nicohón iñi ndo vatyí ta ni nyaa que chihin ndo cahin tuhun ihya chihin ndo?

⁶ Soco vityin nyoho chitó ndo ñáá tuhun cha ña ndicuita ñaha ra tacuhva vatyí ndicuita ra soco nya quiví tahán maa chi.

⁷ Cha iyó tuhun cha ña quichahá ñáyiví chi Nyoo siqui ñuhu ñayiví, soco iyó xehe chi, vatyí iyó noo cha chasí, ta ña chahá cuan cha nducuaha chi. Soco quiví canyaha cuan, cunduñihi cha quiñi caa cuan.

⁸ Tyicuan ta cundicuita ra quiñi caa cuan ta Sutu Mañi yo cucahñi ra chi ra chihin tatyí yuhu ra ta cusanaa ra chi ra chihin cha xiño ra quiví cuquichi ra.

⁹ Ra quiñi caa cuan, cuenda cuihna cuquichi ra. Ta tandihí tunyee iñi cuihna cucoo chi ra, ta cusandavi ñaha ra chi ñáyiví chihin seña ta milagru ta cha iyó.

¹⁰ Tandihí ri nuu cha ña vaha cucotyíño ra tacuhva cuvi sandavi ñaha ra chi ñáyiví cha cucunaa. Vatyí ñu cuan ña cuñi ñu quichaha ñu cha ndicha tacuhva cuvi cacu ñu.

¹¹ Ta yucuan chaha cucuhva Nyoo vatyí cusandavi ñaha cha ña vaha cuan chi ñu. Ta cuchino iñi ñu cha ña ndicha.

¹² Tacuhva vatyí cutachí tuñi ra chi tandihí ñu vatyí ña cuñi ñu chino iñi ñu cha ndicha. Ta tahán ca iñi ñu sacuví ñu cha ña vaha.

Nu cahan ra Pablo tuhun ñu cha nacachi Nyoo vatyí cacu ñu

¹³ Soco tyicuan ri cuñi chi cha nacuhva ndi tyahvi nyoo chi Nyoo cha cuenda nyoho yañi. Vatyí cuñi xaan Sutu Mañi yo chi ndo. Vatyí Nyoo nacachi ra chi ndo nyata quiví xihna ri vatyí cuacacu ndo cha cuenda cha sanduvaha Tatyí Ii ra añima ndo ta cha cuenda cha chinó iñi ndo cha ndicha.

¹⁴ Yucuan cuenda nacana Nyoo chi ndo quiví cahan ndi tuhun ra chihin ndo tacuhva vatyí cuñihi ndo chiin cha cahnu cuví Sutu Mañi yo Jesucristo.

¹⁵ Yucuan chaha sanñi ndo iñi ndo, nyoho yañi. Ta ma naa iñi ndo tuhun cha sañaha ndi chi ndo ta ni nyaa ca ndi chihin ndo. Ni

ma naa iñi ndo tuhun cha tyaa ndi nu tutu cha sacuhun ndi chi ndo.

¹⁶⁻¹⁷ Sutu Mañi yo Jesucristo ta Nyoo Sutu yo cuví ra cha cuñi chi yo. Ta cha cuenda tumañi iñi cha chahá ra chi yo sanduní ra iñi yo tyicuan ri maa. Ta chahá ra cha cuita iñi yo coo yo chihin ra. Ta na nacuhva maa ra cha si cuñi añima ndo. Ta na sandunaní ra iñi ndo, tacuhva cuvi cahan ndo ta sacuvi ndo tandihí nuu cha vaha.

3

Nu chicán ra Pablo na cacan tahvi ñu chaha ra

¹ Nu ndihí tuhun, nyoho yañi, cacan tahvi ndo chaha ndi tacuhva vatyí numi ri chaa tuhun Sutu Mañi yo tandihí ri ityi. Ta na quichaha ñáyiví ta natin cuenda ñu tari natin cuenda nyoho.

² Cacan tahví tucu ndo tacuhva vatyí na cacu ndi ndaha ñáyiví ña vaha, ñu quiñi iyó. Vatyí ña tandihí ñáyiví chinó iñi ñu chi Sutu Mañi yo.

³ Soco Sutu Mañi yo ndicha ra. Ta maa ra cuasaquehen ityi ra chi ndo, ta cuasaha cuenda ra chi ndo coto tin ra ña vaha chi ndo.

⁴ Ta cunyeé xaan iñi ndi chi Sutu Mañi yo vatyí nyoho sacuví ndo tari cuhva catyí ndi chi ndo, ta cusacuvi ca ndo.

⁵ Ta vityin na tyinyee ca Sutu Mañi yo chi ndo tacuhva cuñi ca ndo chi ñáyiví tari maa ra cuñi ra chi ñu. Na tyinyee ra chi ndo na cucama iñi ndo cuhva nyehe ndo tindoho, tari ra Cristo cunyeé xaan iñi ra nu nyehe ra tindoho.

Tahán chi cha saha tyiño yo

⁶ Ta vityin chihin ndusu yuhu Sutu Mañi yo Jesucristo, catyí ndi chi ndo, nyoho yañi, ma cutahan ndo chihin yañi yo ra ña cuñi saha tyiño, ta ña iyó ra cuhva sañaha ndi chi ndo.

⁷ Vatyí nyoho chitó ndo yoso caa tahán chi coo ndo tari cuhva sañaha ndi chi ndo. Vatyí nyuhu ña chinyicu ndi chihin ndo cha ña sahá tyiño ndi.

⁸ Ta ni ña chachi ndi cha chii ndo cha ña tyiyahvi ndi. Soco saha tyiño ndi ñicahñu ta cha cuaa vatyí ña cuñi ndi coso ndi siqui ni noo ndo.

⁹ Vasi iyó chi ityi chi ndi cha cacan ndi cha tyinyee ndo chi ndi, soco nyuhu saha tyiño ndi vatyí cuñí ndi sañaha ndi noo cuhva vaha cunyicon ndo.

¹⁰ Vatyí quiví chinyaa ndi chihin ndo, catyí ndi chi ndo vatyí ñu cha ña cuñí saha tyiño, ma cachi ñu.

¹¹ Cahán ndi siqui ihya vatyí ñihí ndi tuhun vatyí yihí ndo chicá noo yanga ri ndo ta ñahri maa tyiño sahá ndo.

¹² Chi nyoho cha iyó ndo tyicuan caa, catyí ndi chi ndo chihin ndusu yuhu maa Sutu Mañi yo Jesucristo, na casaha tyiño vaha ndo, ta yaha ndo noo noo quiví.

¹³ Yañi, ma cutatu ndo sacuvi ndo cha vaha.

¹⁴ Tatu iyó noo ra ña cuñí quichaha tuhun cahán ndi nu tutu ihya, saha ndo cuenda chi ra ta ma cutahan ndo chihin ra tacuhva na cucahan nuu ra.

¹⁵ Soco ma cuxaan iñi ndo chi ra, soco cuhva ndo tuhun chi ra vatyí yañi yo cuví ra.

Nu ndihí cahan ra Pablo

¹⁶ Sutu Mañi yo taxi ri iyó aña ra, ta suri maa ra na cuhva ra cha taxi ri coo aña ndo tandihí ri cuhva tandihí ri quiví. Ta nacuhva ndo cha cunyaa vaha ra chihin tandihí ndo.

¹⁷ Yuhu ra Pablo tyaí nocumi ihya chi ndo chihin ndahi, ta chihin letre. Ta tyehe caa tyihí firme nu tandihí carte. Ta tyehe caa tuhvé tyai.

¹⁸ Ta Sutu Mañi yo Jesucristo na nasoco ra chi tandihí ri ndo. Ta na cuví chi tyicuan caa.

Carta Cha Xihna Ri Sacuhun Ra Apóstol Pablo Chi Ra Timoteo

Nu tyaa ra Pablo noo tutu chi ra Timoteo

¹ Yuhu ra Pablo cuví noo apóstol chi ra Jesucristo vatyí tachí ra chii na caque tyiño ra. Maa Nyoo cuví ra sacacú chi yo. Ta ícan ra catyí tyi sacuvi tyiño ihya, ta Sutu Mañi yo Jesucristo ñandihí. Vatyí maa ra cuví ra cha yihí iñi yo.

² Tyaí tutu ihya chi yoho Timoteo vatyí sehe vahi cuví chuun cha cuenda cha chinó iñun tuhun ra Cristo cha sacote chuun. Ta cuñí vatyí nasoco Nyoo Sutu yo ta Sutu Mañi yo Jesucristo chuun. Ta na nyehe ndahvi ra chuun. Ta na coo ca cha taxi ri añimon saha ra.

Nu sañaha ra Pablo chi yo yoso caa saha yo cuenda tuhun cha ña ndicha

³ Quiví quite ñuu Éfeso chiña cha cuaquichi ityi Macedonia ihya, catyí chuun na ndoun Éfeso chiña ta catyun chi suhva ñu vatyí ma sañaha ñu tuhun cha ña ndicha. Ta vityin catyí tiqui chuun na sacuvi con tari cuhva catyí chuun quívi cuan.

⁴ Catyun chi ñu cuan vatyí ma tyaa ñu xiñi ñu tuhun tyisu, ni tuhun cha cuví chi noo noo sutu chahnu ñu. Vatyí cha nuu cha tyinyeé chi chi yo, satondó chi xiñi yo. Maa maa ri cha ñima ri tuhun cuví yuhu yo. Ña tyinyeé chi chi yo cha chinó iñi yo cha sacuví ca yo cha catyí Nyoo.

⁵ Soco tuhun cha catyí maa yo chi ñáyivi, cha cuñi yo chi tahan yo chihin cha cacú añima yo cha sanduvaha Nyoo. Cuñi yo chi ñu chihin cha vaha chicá xiñi yo ta chihin cha ndicha chinó iñi yo chi Nyoo.

⁶ Soco yihí ñu saña ñu tuhun ihya ta quita caxiin ñu chihin tuhun cha ñima ri tuhun.

⁷ Cuñi ñu cuví ñu ñu sacuahá cuenda ley chahnu Nyoo soco ni maa ñu ta ña cutuñi iñi ñu tuhun cahán ñu.

⁸ Chitó yo tyi ley cuan, vaha chi, soco cotyíño yo tari cuhva tahán chi.

⁹ Cuñi chi coto yo vatyí ni noo ley ña chicunyaá chi cha cuenda ñu vaha. Soco

nyaá chi cha cuenda ñu nacahnú nu cahán Nyoo, ñu iyó cuatyí, ñu quiñi iyó, ñu ña saha ñáyivi chi Nyoo. Nyaá tucu chi cha cuenda ñu chahñi chi sutu, chi sihi, ta cha cuenda tandihí ñu chahñi.

¹⁰ Nyaá ley cuan cha cuenda ñu iyó chihin rayí o ñusihí ta ñima yí ña o ñasihí ra cuví. Nyaá chi cha cuenda ra ca iyó chihin tahan yí, ta cha cuenda ñu suhu cha chii ñáyivi, ta ñu cuendu, ta ñu cha catyí: “Chito vaha Nyoo”, ta ña ndicha cha cahán ñu. Ta suri nyaá tucu ley cuan cha cuenda yóo ñu cha ña nyicon cuhva cahan tuhún Nyoo.

¹¹ Ta tuhun tyaquí xaan cha sacoto Nyoo chi yo cha cuenda ra Cristo, ícan cuví tuhun cha nacuhva cuenda Nyoo chii vatyí sacote chi ñáyivi. Maa ra cuví ra cha sacahnú yo.

Chahá ra Pablo tyahvi nyoo chi Nyoo vatyí nyehé ndahvi ra chi ra

¹² Nacuhvé tyahvi nyoo chi Sutu Mañi yo Jesucristo cha cuenda tunyee iñi cha chaha ra chii ta nyehe ra chi tari noo ra chinó vaha iñi, ta natyaa tyiño ra chii vatyí sacuví tyiño nuu ra.

¹³ Tyehe caa sacuvi ra chihin vasi ta ityi chata ca yuhu cahan ña vahi siquí ra. Chica nyiquen chi ra ta cahan cuehi chi ra. Soco Nyoo cundahví cuñi ra nyehe ra chii, vatyí yuhu ta chino ca iñi chi ra, ta ña chite cha chinyacuví.

¹⁴ Ta tyinyeé xaan Sutu Mañi yo chii. Ta chaha ra cha chino xaan iñi yo chi ra, ta cha cuñi xaan yo chi ñáyivi vatyí ñn ri cuví yo chihin ra.

¹⁵ Ta ndicha, cha ndicha vaha cuví tuhun ihya. Ta tahán chi cha chino iñi yo, vatyí ra Cristo Jesús quichí ra siquí ñuhu ñáyivi ihya vatyí sacacú ra chi ñu iyó cuatyí. Ta yuhu cuví noo ra quiñi caa ca cha nuu tandihí ñu cuan.

¹⁶ Yucuan chaha xihna que tava Nyoo chii nu quiñi caa vatyí tacuhva sañaha ra Jesucristo chi ñáyivi tyi cuñi xaan ra chi ñu. Tacuhva vatyí nachino iñi ñu ta cucoo ñu noo ñáyivi chaa cha ma naa ca maa.

¹⁷ Yucuan chaha na sacahnu yo chi ra cha tyicuan ri nyacá ñaha, ra cha ñahri tuhun chihi iyó chí, ra cha ña cuví nyehe yo chí, ra cha noo ri maa ra cuví Nyoo ta chító ra tandihí cha chiñi tuñi. Na sacahnu yo chi

ra ta na cunyaca ñaha ra tyicuan ri maa. Ta na cuvi chi tyicuan caa.

¹⁸ Ihya tuhun चाहि chuun, yoho Timoteo sehi, vatyí cañi tahan vahun chihin tatyí ña vaha chihin cha chinó iñun, ta chihin cha vaha cuñi añimon tyi chitón tyi vaha sacuvun noo cha sacuvún vatyí suri tuhun ihya cachaha ra hermano chuun chihin ndusu Nyoo.

¹⁹ Ta ma sandihun cha chinó iñun chi Nyoo ta sacuvun cha vaha na vaha cuñi añimon. Vatyí sava ra sandihi ra tuhun ihya, yucuan chaha caquita xiin ra.

²⁰ Tyicuan caa sacuvi tucu ra Himeneo ta ra Alejandro. Ta yucuan chaha nacuhva cuende chi ra chi cuihna, na cacutuhva ra yoso caa tahán chi sacuvi ra ta ma cahan ña vaha ca ra chi Nyoo.

2

Nu sañaha ra Pablo yoso caa cacan tahvi yo

¹ Catyí chi ndo vatyí cha nuu tandihi ca, tahán chi cha cacan tahvi ndo chi Nyoo cha cuenda tandihi ñáyivi. Ta nacuhva ndo tyahvi nyoo chi Nyoo cha cuenda ñu.

² Cacan tahvi ndo cha cuenda ra cacuvi rey ta cha cuenda tandihi ra cacuvi tyiño. Cacan tahvi ndo cha cuenda ra tacuhva cuvi coo vaha yo, coo taxi yo, coo yo noo ñáyivi cachi nuu Nyoo ta nuu ñáyivi. Ta cusaha ñu ñáyivi chi yo.

³ Vatyí ihya cuví cuhva tahán iñi Nyoo ra cha sacacú chi yo.

⁴ Ta maa ra cuñi ra vatyí cacu tandihi ñáyivi. Ta cuñi ra cha nacoto ñu cha ndicha.

⁵ Vatyí iyó noo ri Nyoo. Ta iyó noo ri ra cuví chaa nuu Nyoo tyiño nuu yo. Ican ra cuví ra Cristo Jesús. Ta cuví ra ñáyivi tari maa yo.

⁶ Ta maa ra Jesucristo chaha ra ñáyivi ra tyiño nuu tandihi ñáyivi. Tyiyahvi ra cuatyí yo tacuhva cuvi cacu tandihi yo. Ta chinó cava cuan quivi tyaa maa Nyoo cuhva.

⁷ Cha cuenda ihya, tyatyíño Nyoo chii, vatyí cahin tuhun ra, ta cuví apóstol ra, tachí ra chii vatyí sañahi chi ñu cha ñima ñu Israel cuví, yoso caa nachino iñi ñu cha ndicha. Ta nyoho chitó ndo tyi ña tuhvé cahín cuendu vatyí cuenda ra Cristo yihí.

⁸ Yucuan chaha cuñi vatyí cacan tahvi rayi tandihi ri ityi. Ta na coo ra noo ñáyivi ndii. Ta na sacahnu ra chi Nyoo chihin cha nacoñehe ra ndaha ra nuu Nyoo. Ta vaha caça xiñi ra. Ta ma coo ra tisihi chihin ñáyivi. Ta ni ma xaan ra.

⁹ Tyicuan caa tucu ñusihí. Cachi cuhva cuihno ñu, tari cuhva tahán chi cuihno ñu yihí cuenda Nyoo. Ta ma iyo xaan cuihno ñu. Ma iyo xaan sanduvii ñu xiñi ñu. Ñima chihin xuhun cuaan o yuu tyaqui, o chihin sahna yahvi xaan sanduvii ñu chi ñu.

¹⁰ Soco chihin cha cachi coo ñu ta chihin cha sacuvi ñu cha vaha na sanduvii ñu chi ñu, tari tahán chi sacuvi ñu nacuhva cuenda chi chi Nyoo.

¹¹ Ta taxi ri cunyaa ñusihí ta tyasoho ñu tuhun Nyoo. Ta saha ñu ñáyivi chi ra chahá tuhun chi ñu.

¹² Vatyí ña चाहि cha sañaha ñusihí. Ni ña चाहि cha cunyaca ñaha ñu chi rayi. Soco taxi ri na cunyaa ñu.

¹³ Vatyí xihna ca chi ra Adán savaha Nyoo ta yaha cuan ta chi cu Eva.

¹⁴ Ta ñima chi maa ra Adán sandavi ñaha ra ña vaha, soco chi ñasihí ra cuvi sandavi ñaha ra ta chicoo cuatyí ña.

¹⁵ Soco ñusihí cucacu añima ñu cha cuenda cha sacacú ñu sehe ñu, ta sacuahnú vaha ñu chi chi. Soco tatu chinó vaha iñi ñu chi Nyoo ta cuñi ñu chi ra ta chi ñáyivi, ta cachi coo ñu nuu Nyoo ta nuu ñáyivi ñandihí.

3

Yoso caa tahán chi coo ra yihí ndaha chi ñu yihí cuenda ra Cristo

¹ Ndicha tuhun ihya: Tatu minoo ndo cuñi ndo quindaha ndo chi ñáyivi yihí cuenda ra Cristo, vaha xaan tyiño quichí cuvi iñi ndo sacuvi ndo.

² Soco niñi cuñi chi vatyí ra yihí ndaha vehe ñuhu cuvi ra noo ra ñahri cuatyí iyó. Ta cuñi chi cha coo noo ri ñasihí ra. Ta cuñi chi cha cuvi ra noo ra tyihi tuñi vaha iñi yoso caa cunyacuvi, noo ra vaha nuu ñáyivi. Ta cuñi chi vatyí vaha cuví ra chihin ñáyivi chaa vehe ra. Ta coto ra yoso caa sañahá ra.

³ Ma cuvi ra noo ra tuhvá chihi ndixi, ni ma cuvi ra noo ra nanducú tisihi. Ta ma cuvi ra noo ra nducu xuhun noo cuhva ña

vaha. Soco cuñí chi cha vaha ñáyivi cuví ra, ta cuví ra noo ra ña tuhva cañi tahan. Ta ma cuví ra noo ra cuñí xaan xuhun.

⁴ Ta cuví ra noo ra yihí ndaha vaha ñasihi ta sehe: Noo ra nyacá ñaha chi sehe tacuhva vatyí quichaha ñu chi ra, ta saha ñu ñáyivi chí ra.

⁵ Vatyí tatu ña chitó ra cunyaca ñaha ra vehe ra, ¿yoso caa cusaha cumi ra vehe ñuhu Nyoo?

⁶ Ta noo ra nichaa chihin tuhun Nyoo ña tahán chi quindaha ra vehe ñuhu vatyí coto sacahnu ra chi ra ta tachi tuñi Nyoo chi ra, tari tachí tuñi ra chi cuihna vatyí cahnu sahá ra chi ra.

⁷ Ta siin ri cuñí chi vatyí cuví ra noo ñáyivi vaha nuu ñu ityi chata, coto tahan ra ticahan nuu ta cana cava ra chichi ndaha cuihna.

Yoso caa tahán chi coo noo ra tyinyee chihin tyiño vehe ñuhu

⁸ Ta tyicuan caa tucu ra tyinyeé chihin tyiño vehe ñuhu. Na cachi coo ra. Ma cuví ra noo ra cuendu, ta ma cuví ra noo ra tuhva chihi ndixi ñandihí. Ta ni ma nyiyo iñi ra saha canaa ra xuhun chihin noo cuhva ña vaha.

⁹ Cuñí chi vatyí cutuñí vaha iñi ra yoso caa tahán chi chino iñi yo chí Nyoo ta coto vaha ra tyi vaha cuahan ra chihin Nyoo.

¹⁰ Ta cuñí tucu chí cha nyehe xihna yo tatu vaha iyó ra chihin Nyoo tyicuan ta cuví sacuvi ra tyiño vehe ñuhu.

¹¹ Ta tyicuan caa tucu ñusihi, cuñí chí vatyí cuví ñu ñáyivi vaha. Ma ñi ñu cuendu. Ta cachi coo ñu. Ta niñi cuñí ñu chihin tandihí ri tyiño.

¹² Noo ra tyinyeé chihin tyiño vehe ñuhu na coo noo ri ñasihi ra. Ta cuñí chí vatyí coto vaha ra cunyaca ñaha ra chí sehe ra ta ñáyivi nyicú vehe ra.

¹³ Vatyí ra tyinyeé, tatu vaha sacuvi ra tyiño cha tahán chí sacuvi ra, cuahan ca ra ityi nuu chihin Nyoo. Ta cuní ca iñi ra cahan ra tuhun cha chinó iñi ra chí ra Cristo.

Noo tuhun xehe cuenda cuhva chino iñi yo

¹⁴⁻¹⁵ Yihí iñi cha cuhin cha numi ri cunyehe nu nyaún. Soco tatu cucuei, yucuan chaha tyaí ihya chuun tacuhva coton yoso

caa tahán chí coo ñáyivi cuenda Nyoo. Vatyí maa yo cuví yo vehe ñuhu Nyoo nyitó. Ta cuñí chí vatyí sañihi ca yo sañaha yo cha ndicha cha cumí yo chí inga ñáyivi.

¹⁶ Cha ndicha cuví vatyí yaha xaan cuhva cahnu tuhun xehe cha sanatuvi Nyoo, vatyí coo yo tari iyó maa ra:

Nyoo nanduví ra rayi ta chicoo ra chichi noo coño ñuhu tari maa yo.

Ta catyí Tatyí li vatyí vaha ra.

Ta nyehe ángel chí ra.

Nicahnu ñuhu ñayivi cahán ñu tuhun ra.

Ta chinó iñi ñáyivi chí ra nicacahnu ñuhu ñayivi.

Ta cuanuhu ra nya gloria.

4

Nu catyí ra Pablo vatyí yihí ñu ma chino ca iñi ñu nu cuahan chí tyembu

¹ Soco cahán cachi Tatyí li ta catyí chí vatyí nu cuandihí tyembu yihí ñu ma chino ca iñi ñu chí ra Cristo vatyí cutyasoho ñu tuhun cahán tatyí ña vaha cha sandavi ñaha chí ñu. Ta cunyicon ñu ndusu ñuhu cuihna.

² Cutyasoho ñu tuhun cahán ñu cuendu. Ta ñu cuendu cuan ña tuví ca iñi ñu cuhva nyacuví ñu vatyí cha ndundava xaan aña ñu. Tari cha cayu aña ñu chihin noo caa ihñi ta ndundava chí cuví cuan.

³ Cucasi ñu cuan nu tandaha ñáyivi. Ta cucatyí ñu vatyí ña vaha cha cachi yo suhva nuu nyayu. Vasi chitó yo tyi tandihí nuu cha cachi yo, Nyoo savaha. Ta tandihí yo cha chinó iñi yo chí Nyoo ta chitó yo cha ndicha, cuví cachi yo ta nacuhva yo tyahvi nyoo chí ra.

⁴ Vatyí tandihí cha savaha Nyoo ta vaha. Ta ña tahán chí catyí yo tyi ña vaha. Cuví cachi yo tatu nacuhva yo tyahvi nyoo chí Nyoo.

⁵ Vatyí ndundí chí cha cuenda tuhun Nyoo ta cha cuenda cha chicán tahvi yo chí Nyoo.

Yoso caa noo ra vaha sacuví tyiño nuu ra Jesucristo

⁶ Tatu sañahún tuhun ihya chí tandihí yañi yo, cua cuvun noo ra vaha cahán tuhun ra Cristo Jesús. Ta tuhun cha chinó

iñi yo ta tandihí tuhun ra Cristo cha nyicón, cua tyinyee chi chuun.

⁷ Soco ma quichahun tuhun cuendu, tuhun tondo cha iyó ñáyiví ihya. Vaha ca sañahun chuun sacuvun maa maa ri cuhva cuñí Nyoo.

⁸ Cha saniñí yo ndunye coño ñuhu yo tyinyeé chi suhva chi yo. Soco cha saniñí yo sacuví yo cuhva cuñí Nyoo, tyinyeé chi chi yo tandihí ri cuhva, vatyí tyinyeé chi chi yo ñáyiví ihya. Ta tyinyeé tucu chi chi yo cha coo vaha yo nu cuchaa yo andiví.

⁹ Ta ndicha, cha ndicha vaha cuví tuhun ihya ta tandihí yo tahán chi cha chinó iñi yo.

¹⁰ Ta suri cha cuenda ihya sahá tyiño yo ta nyehé yo tindocho vatyí nyatú yo naquehen yo cha vaha cha chaha Nyoo nyito chi yo. Vatyí maa ra cuví ra sacacú chi tandihí ñáyiví, ta xihna ca chi yoó cha chinó iñi yo chi ra.

¹¹ Ihya tuhun cua sañahun chi ñáyiví, ta cusaniñun chi ñu na cutuhva ñu.

¹² Cachi sañahun chuun coto ma saha ñu ñáyiví chuun cha cuenda cha cuvún noo ra tyivaa. Soco sañahun noo cuhva vaha chi ñu chihin cuhva iyón, chihin cuhva cahun. Sañahun chi ñu, chihin cuhva cha cuñún chi Nyoo ta chi ñáyiví, chihin cuhva chicá xiñun, chihin cuhva chinó iñun, ta chihin cuhva sacuvún maa maa ri cha vaha.

¹³ Cha ni ri ca cha cumañi chai nu nyicú ndo, sacuahá con tuhun Nyoo nuu ñu yihí cuenda Nyoo. Cuhva tuhun chi ñu ta sañahun chi ñu yoso caa caca vaha ñu ityí Nyoo.

¹⁴ Sañahun cuenda nyatu cha chaha Nyoo chuun quiví cha tyiso ra yíndaha vehe ñuhu ndaha ra sicun ta cañan ra yoso cuhva chahá Tatyí Ii Nyoo chi ra.

¹⁵ Tyaa vaha xiñun tuhun ihya ta sacuvun. Tacuhva vatyí nyehe ñáyiví yoso caa cuahun ityí nuu ca chihin Nyoo.

¹⁶ Saha cuenda chuun chihin cuhva iyón. Ta saha cuenda cuhva sañahun chi ñáyiví ta ñaha saña ndahun cha vaha. Tatu tyicuan caa sacuvún cuacacun, ta cucacu ñu chiñí tuhun sañahun ñandihí.

5

Nu chahá ra Pablo tuhun chi ra Timoteo

yoso caa cuhva ra tuhun chi ñu yihí cuenda ra Cristo

¹ Ma cahun chi noo ra chahnu, soco cuhva tuhun chi ra tari cha sutun cuví chi ra. Ta chi ra tyivaa cuhva tuhun chi ra tari cha yañun cuví chi ra.

² Ta chi ñu chahnu tari cha sihun cuví chi ñu. Ta chi ñu tyivaa, tari cha cuhvon cuví chi ñu. Ta sacuvun chihin cha vaha chicá xiñun.

³ Tyinyee chi ñu ndahvi ñu chihí yí tatu yori ñáyiví chi ñu cha tyinyee chi ñu.

⁴ Soco tatu iyó noo ñaha chihí yí ta iyó sehe ña, o sehe ñañi ña, cuñí chi cha cutuhva xihna maa ñu cha tyinyee ñu chi ña. Na nichon iñi ñu yoso caa saha cuenda sihi ñu chi ñu ta luhlu ñu. Ta tyicuan caa tahán chi cha saha cuenda tucu ñu chi ña vityin. Vatyí cha tyehe caa vaha xaan, ta cha tahán iñi Nyoo cuví.

⁵ Soco ñu chihí yí cha ndoo noo tuhun ri maa, chi Nyoo tyihí ñu iñi ñu ta tyicuan ri chicán tahvi ñu chi ra ñicahñu ta cha cuaa.

⁶ Soco noo ñaha chihí yí cha nducú tusí iñi cha iyó ñáyiví ihya, tari quiví cha chihí ña cha cuenda tuhun Nyoo cuví cuan, vasi iyó ña.

⁷ Sacoto tuhun ihya chi tahan yo tacuhva cha ma ñihi ñáyiví cuhva cahan ñu chi ñu.

⁸ Soco tatu yihí yo cha iyó ñáyiví chi yo cha chihí yí ta ña chicá xiñi yo cha cuenda ñu, ta cha xihna ri cha cuenda ñu vehe yo, tari quiví cha ña chinó iñi yo chi Nyoo cuví cuan. Ta cahnu ca cuatyí yo ta ñima ca ñu cha ña chinó iñi chi Nyoo.

⁹ Nu tutu cha nyaá sivi ñu chihí yí, na cunyaa sivi ñu, soco ñu cha yahá ca uñi xico cuiya. Ta cuví cunyaa sivi ñu tatu noo ri yí ñu chiyo.

¹⁰ Ta cuñí chi tatu ñohó nuu vaha ñáyiví chi ñu cha cuenda cha vaha cha sacuví ñu: tatu sacuahnu vaha ñu sehe ñu, tatu chaha ñu cha cachi ñu cha vehe ñu, tatu sacuví ñu tyiño nuu yañi yo chihin cha tandihí añima ñu chihin cha ndahvi sahá ñu chi ñu, tatu tyinyee ñu chi ñu nyehé tindocho, tatu tyehe caa sacuví ñu tandihí nuu cha vaha, cuví cunyaa sivi ñu.

¹¹ Soco ma tyihí ndo sivi ñu cha ta chaa ca uñi xico cuiya coto coo quiví ta quichi cuví

iñi ñu tandaha ñu inga chaha ta sandihí ñu tuhun sacuví ñu tyiño nuu ra Cristo.

¹² Ta tyicuan caa cucoo cuatyí ñu vatyí ña sacuví ca ñu cuhva catyí ñu.

¹³ Ta siin ri tatu chicá noo suchan ri maa ñu tahan tahan vehe ñáyivi. Ta ñima yucuan ri soco chicá noo ndihí ñu chihin cuendu ñu. Ta tyihí ñu chi ñu noo nu ñahri cuenda ñu. Ta cahán ñu cha ña tahán chi.

¹⁴ Yucuan chaha vaha taxin ca na tandaha ñu inga chaha. Na coo sehe ñu. Na saha cuenda ñu vehe ñu. Ta ma cuhva ñu ityi chi ñu xaan iñi chi yo vatyí cahan nyaa ñu chi yo.

¹⁵ Tyehe caa catyí chuun vatyí yihí ñu cha saña ñu chi Nyoo ta na nyicon ñu chi ra ña vaha.

¹⁶ Tatu noo ñu yihí cuenda Nyoo ta iyó noo ñáyivi chi ñu cha chihí yí, cuñí chi cha tyinyee ñu chi ñu, tacuhva cha ma cuvi ñu noo carga chi vehe ñuhu. Ta tyicuan caa ta cuví tyinyee ñu vehe ñuhu chi ñu chihí yí cha ndicha ndicha chiñuhú chi.

¹⁷ Ra chahnu ra nyisó tyiño vehe ñuhu, cuñí chi vatyí saha xaan ñu ñáyivi chi ra. Ta cha xihna ca chi ra cahán tuhun Nyoo ta ra sañahá chi ñu.

¹⁸ Vatyí tuhun Nyoo catyí chi: “Ma tyihun yoho yuhu sindiqui nu saha tyiño ti tacuhva vatyí cuvi cachi ti chiin.” Ta catyí tucu chi: “Iyó ityi chi ra cha sahá tyiño cha ñihí ra yahvi ra.”

¹⁹ Tatu tyaá ñu cuatyí siqui noo ra chahnu ra nyisó tyiño vehe ñuhu, ta tatu ña quita uvi o uñi tahan cha ndaa, ma quichahun chi ñu tyaá cuatyí cuan.

²⁰ Soco ñu sañihi ca sacuvi cuatyí cuñí chi cha catyí ndo chi ñu chihin nuu tandihí ñu nyicú vehe ñuhu tacuhva vatyí tandihí ca ñu na cuyuhvi ñu sacuvi ñu cha ña vaha.

²¹ Tyatyíne chuun chihin nuu Nyoo ta chihin nuu Sutu Mañi yo Jesucristo, ta chihin nuu ángel cha nacachi ra. Ta catyí chuun vatyí quichahun cha catyí ihya ta ma cuhun tumañi iñi chi noo ra ta ni chi inga ra.

²² Ma numi xaan ri tyaa tyiño chi noo ra cha cuvi ra tyiño vehe ñuhu. Coto ndoo cuatyí sacuví ra sicun. Saha vahun cuenda chuun chihin tandihí cha sacuvún ta ma cuhvon ityi chi cha ña vaha.

²³ Ta vatyí iyó noo cuehe chichun, ma cohun maa ri maa ndutya, soco cohun chiin vinu ñandihí.

²⁴ Yihí ñáyivi quetuví ri cuatyí ñu cha cumañi ca cutuñi chi ñu. Ta yihí ñu nya cha yaha cutuñi chi ñu ta cuquetuvi cuatyí ñu.

²⁵ Ta tyicuan caa tucu cha vaha cha sacuví yo, ña xehe caá. Soco vasi ña tuví cha numi ri, ñima tyicuan ri cucohon xehe chi.

6

¹ Ñu cha cuvi musu cuñí chi cha saha vaha ñu ñáyivi chi chitoho ñu. Tyicuan ta ma ñihi ñáyivi cuhva cahan ña vaha ñu siqui Nyoo ni siqui tuhun ra, cha sañahá yo.

² Ta tatu noo musu iyó chitoho ra cha yihí cuenda Nyoo, ña tahán chi cha ma saha ra ñáyivi chi ra vatyí yañi ra cuenda Nyoo cuví chi ra. Soco ñihi ca cuñí chi cha sacuví ra tyiño nuu ra, vatyí chinó tucu iñi maa ra chi ra Cristo, ta Nyoo cuñí ra chi ra. Sañaha tuhun ihya chi ñu hermano ta cuhva tuhun chi ñu na sacuvi ñu.

Cuhva iyó yo ta cusí cuñi yo

³ Tatu iyó noo ra cha sañahá inga tuhun cha ña chachí tahan chi chihin tuhun vaha cha sañahá Sutu Mañi yo Jesucristo, ta ni ri chihin tuhun vaha cha cuahan sacuaaha yo,

⁴ cuví ra noo ra cahnu sahá chi. Ta tahán xaan iñi ra cuvi yuhu ra siqui noo cha ñima ri tuhun. Tari noo cuehe cuví cuan. Ta cha cuenda tuhun ihya cacú tisihi ta tuhun nyiyo iñi, tuhun cha cahán ña vaha chi tahan, ta tuhun cha ña vaha cuñi nyehe chi tahan.

⁵ Ta tyicuan ri cañí tahan ñu vatyí quiñi chica xiñi ñu, vatyí ña chitó ñu cha ndicha. Nyacua cuñí maa ñu tyi cusaha ganaa ñu xuhun chihin tuhun Nyoo. Ma cutahan ndo chihin ñu cuan.

⁶ Ndicha vatyí cha sacuví yo cuhva catyí Nyoo ta ndoo yo vaha chihin cha cha chaha ra chi yo cuví chi tari noo cha tyayí iyó chi yo.

⁷ Vatyí ñahri nyiso yo vachi yo ihya ñáyivi. Ta ñahri cuiso yo cunuhu yo quivi cúvi yo.

⁸ Soco tatu iyó cha cachi yo ta sahna ñihnó yo, na cusí iñi yo, ta na ndoo yo vaha chihin yucuan ri.

⁹ Soco ñu cuñí cutyayí, nducú nyehe ra ña vaha chi ñu. Caná cava ñu chichi xayuy

ra. Cutondó xiñi ñu chihin cha cuaha xaan cha quichi cuví iñi ñu. Ta sativi chi chi ñu ta nu ndihi tuhun cutivi ndihi ñu ta cunaa ñu.

¹⁰ Vatyí cha cuñí xaan yo xuhun, yucuan cuví nu caña tandihí ca nuu cha ña vaha. Ta yihí ñu cha tyehe caa cuñí xaan ñu xuhun, ta cha cuenda cuan sandihí ñu tuhun cha chinó iñi ñu tuhun Nyoo. Ta yucuan cuví nu suri chi maa ñu sanyehé ñu tindoho.

Lucha cha iyó chi yo cha chino iñi yo chi Nyoo

¹¹ Soco yoho cuvún noo rayií cuenda Nyoo. Caca cono chi tandihí cha quiñi caa cuan. Ta cuhun chata cha cuiti. Vaha coun nuu Nyoo. Cuní iñun chihin ra. Cuñun chi ñáyivi. Coo cha cama iñun chihin tandihí cha cuví chuun. Ta masu cuví iñun.

¹² Ñihi sacuvun tyiño nuu Nyoo vatyí tyicuan caa tahán chi tyi chinó iñi yo chi ra. Ta ma saña ndahun ñayivi cha cha ma naa ca maa cha chaha Nyoo chi yo. Vatyí ican cuenda cuan nacana Nyoo chuun, quivi catyí cachun tyi chinó iñun nuu cuaha xaan ra cuví cha ndaa.

¹³ Ta chihin nuu Nyoo, ra cha chaha ñayivi coo tandihí cha iyó, ta chihin nuu ra Cristo Jesús ra cha chaha vaha cuenda nuu ra Poncio Pilato, catyí chuun vityin,

¹⁴ na sacuvun tandihí cha catyí chuun tacuhva ma cuhvon cuhva cha cahan ñáyivi chuun nyacua nya quivi quichi Sutu Mañi yo Jesucristo.

¹⁵ Na chaa maa quivi, Nyoo cusaquichi ra chi ra Cristo inga chaha. Ican ra cuví ra cha sacahnu yo, ta noo tuhun ri maa ra cuví Nyoo ra iyó xaan tunyee iñi chii. Rey cuví ra cuenda tandihí ca ra cuví rey. Ta nyacá ñaha ra chi tandihí ca ra cha nyacá ñaha.

¹⁶ Noo ri maa ra cuví ra ra ñahri tuhun chihi iyó chii. Ta iyó ra nu ndichin nu yori maa tuhva. Ta ni noo ñáyivi ta nyehe ca ñu chi ra. Ta ni ña cuví nyehe ñu chi ra. Chi maa ra na sacahnu yo. Ta na cunyaca ñaha ra tyicuan ri maa. Ta na cuví chi tyicuan caa.

¹⁷ Ta ñu cha iyó cha tyayí chi ñayivi ihya, catyí chi ñu vatyí ma cahnu xaan saha ñu chi ñu. Ta ma cuita iñi ñu chi cha tyayí cha iyó chi ñu. Vatyí coto coo quivi ta ndihi cha tyayí cuan. Soco na cuita iñi ñu chi Nyoo nyitó, vatyí maa ra cuví ra chahá tandihí.

Ta cuaha chaha ra chi yo tacuhva cusí cuñi yo.

¹⁸ Catyun chi ñu tyayí na sacuvi ñu cha vaha ta ñi iñi ñu cuhva ñu cha iyó chi ñu chihin cha ma uhvi cuñi ñu.

¹⁹ Tyicuan ta coo cha tyayí ñu andivi ta cutyinyee chi chi ñu nu cuahan ca chi quivi. Ta tyehe caa cuví coo ñu ñayivi cha ma naa ca maa.

Nu ndihi chahá ra Pablo tuhun chi ra Timoteo

²⁰ Yoho Timoteo saha cumi vahun tyiño cha chaha Nyoo chuun. Ma tyasohun tuhun cha sñn caa, tuhun cha ñima ri tuhun. Ma quichahun tuhun cha catyí ñu vatyí cha chiñi tuñi cuví, vatyí ña ndicha.

²¹ Vatyí cha cuenda cuan yihí ñu cha quitá caxiin ñu ityi Nyoo. Ta ña chinó vaha ca iñi ñu cha ndicha.

Ta Nyoo na nasoco ra chi ndo.

Ta na cuví chi tyicuan caa.

Carta Cha Cu Uvi Cha Sacuhun Ra Apóstol Pablo Chi Ra Timoteo

Nu tyaa ra Pablo noo tutu chi ra Timoteo

¹ Yuhu ra Pablo cuví noo apóstol ra Jesucristo vatyí tachí ra chii na caque tyiño ra. Vatyí tyicuan caa cuñí maa Nyoo, tyi cuñí ra cha sacote chi ñáyiví vatyí chahá ra noo ñayiví chaa chi tandihí ñu cha ndu ñin ri chihin ra Cristo Jesús vatyí nacuhva cuenda ñu chi ñu chi ra.

² Tyai tutu ihya chí yoho Timoteo. Ta cuñí xain chuun tyi tari cha sehi cuví chuun. Ta cuñí vatyí Nyoo Sutu yo ta Sutu Mañi yo Jesucristo na nasoco ra chuun. Ta na nyehe ndahvi ra chuun. Ta na coo ca cha taxi ri cuñí añimon saha ra.

Nu catyi ra Pablo chi ra Timoteo tyi nacatyí ra chi ñáyiví tyi cuenda ra Cristo yihí ra

³ Tyicuan ri nicohón iñi tuhun yoho cuhva cha chicán tahvi chí Nyoo ñicahñu ta cha cuaa. Ta nacuhvé tyahvi nyoo chí ra cha cuendon. Nuu maa ra sacuví yuhu tyiño chihin cha vaha chicá xiñi, tari sacuví tucu ñáyiví chii ta cha naha.

⁴ Tyicuan ri nicohón xaan iñi chuun ta nicohón xaan iñi tuhun yoso caa chacun quiví cuachiye chiña. Ta cuñí xain nyehi chuun inga chaha ta cusii iñi chuhun.

⁵ Vatyí nicohón iñi yoso caa chinó xaan iñi cu Loida chiton chí Nyoo, ta cu Eunice sihun ñandihí. Tyicuan caa tucu yoho chinó xaan iñun vityin.

⁶ Yucuan chaha chahí tuhun chuun vatyí na saniun iñun ta cotyíño nyatu cha cahun tuhun Nyoo cha chahá ra chuun quiví tyisé ndahi sicun.

⁷ Nyoo ña chahá ra cha yuhvi yo. Soco chahá ra noo tunyee iñi cahnu chí yo. Ta chahá ra vatyí cuñí yo chí tahan yo. Ta chahá ra cha cunyaca ñaha vaha yo chí yo.

⁸ Yucuan chaha ma cahan nuun cahun tuhun Sutu Mañi yo. Ta ñi ri cha ma cahan nuu cha cuenda cha ñohí vehe caa cha cuenda ra. Soco chihin tunyee iñi chahá Nyoo chuun ta chihin cha iyó vaha iñun

cunyeun tindocho cha vachi siqui yo cha cuenda tuhun Nyoo.

⁹ Vatyí ican ra sacacú chí yo. Ta nacana ra chí yo vatyí coo yo noo ñayiví ii. Ñima cha cuenda cha vaha cha sacuví yo ta nacana ra chí yo, soco vatyí tyicuan caa tyaa ra cuhva nyata ñi cumañi ca chinó ñuhu ñayiví. Vatyí nya quiví cuan cuñí ra chí yo cha ñin ri cuví yo chihin, ra Cristo Jesús.

¹⁰ Ta vityin cha quichí ra Jesucristo sacacú ra chí yo, nacoto yo vatyí tyicuan caa cuñí ra chí yo. Ta nu quichí ra, sataní ra tandihí tunyee iñi cha iyó chí tuhun chihi. Ta chihin tuhun vaha cahan ra, tava ra nu ndichin tuhun cha coo yo noo ñayiví chaa cha yori cuví sativí.

¹¹ Nyoo tyaa ra tyiño chii vatyí cahin tuhun ihya chihin ñáyiví. Tachí ra chii vatyí cuví noo apóstol chí ra, ta sañahí chí ñu cha ñima ñu Israel cuví.

¹² Yucuan chaha nyehí tandihí tindocho ihya. Soco ña cucahán nui vatyí chitó mai yóo chí chinó iñi. Vatyí nacuhva cuende chii chí ra, ta chitó vahi vatyí cuví saha cuenda ra chí nyacua nya quiví quichi tucu ra.

¹³ Cunyicon tuhun vaha cha chahí chuun. Ta coun chihin cha chinó vaha iñun chí Nyoo. Tyicuan ri cuñun chí ñáyiví tahan yo. Vatyí yucuan cuví cha chahá Nyoo chí yo tyi ñin ri cuví yo chihin ra Cristo Jesús.

¹⁴ Ta maa Tatyí Ii cha iyó añima yo na tyinyee chuun ta saha cumun tuhun vaha cha chahá Nyoo chuun.

¹⁵ Cha chitón vatyí tandihí ra ityi Asia chiña casandoq ra chii, tari ra Fígelo ta ra Hermógenes.

¹⁶ Soco ra Onesíforo na nyehe ndahvi Sutu Mañi yo chí ñáyiví chí ra vatyí cuaha xaan chaha quichí sandunyee ra iñi. Ta ña cucahan nuu ra cha cuenda cha ñohí vehe caa.

¹⁷ Soco quiví chinyaa ra ñuu Roma ihya, ña sandihí ra tuhun cha nanducu ra chii nyacua nya cha nañihí ra chii.

¹⁸ Sutu Mañi yo nacuhva ra cha ñihi ra tumañi iñi quiví cha cutuñi chí yo nuu ra. Chitó vahun yoso cuhva tyinyee ra Onesíforo chí yo nya ñuu Éfeso chiña.

2

Noo sindaro vaha ra Jesucristo

¹ Ta yoho sehe luhli, sandunyeeyee iñun chihin tunyee iñi cha चाहá ra Cristo Jesús chuun cha cuenda cha ñn ri cuví yo chihin ra.

² Tuhun cha chiñun cha cahin nuu cuaha ñáyivi, nacatyí chi ra cha ñi iñi chinó iñi chi Nyoo, ra cha cacuví sañaha chi inga ñu.

³ Ta cunyeun tindocho tari noo sindaro vaha ra Jesucristo.

⁴ Ni noo ra cuví sindaro ta ma cuví tyihi ra chi ra chihin inga tyiño. Vatyí cuñi chi sacuvi ra maa maa ri cha catyí ra cuví nuu chi ra.

⁵ Ta tyicuan caa tucu ra canyasiquí, ma saha canaa ra cha tahán chi saha canaa ra tatu ma cunyasiquí ra tari cuhva tahán chi.

⁶ Noo ra sahá tyiño chichi cuhu, tahán chi cha saha tyiño xihna ra, yucuan ta cachi ra cha quitá nu iyó tyiño sahá ra.

⁷ Caca xiñun tuhun cha catyí chuun ihya, ta maa Sutu Mañi yo cucuhva ra cha cutuñi iñun tandihi.

⁸ Nícohon iñi tuhun ra Jesucristo, ra cha nandoto cha yahá nyehe ra tindocho ta chihí ra. Cuví ra tata rey David. Ta ican ihya cuví tuhun Nyoo cha cacu añima yo cha चाहá ra vatyí cahin tuhun.

⁹ Ta cha cuenda tuhun ihya cunyeí tandihi tindocho nyacua nuhñi chihin cadena tari noo ra quiñi iyó. Soco tuhun Nyoo ña nuhñi chi.

¹⁰ Yucuan chaha cunyei tandihi tindocho cha cuenda cha vaha chi tandihi ca ñu nacachi Nyoo chi, tacuhva vatyí cuví cacu tucu tandihi ñu. Chihin cha ndu ñn ri yo chihin ra Cristo cuacacu yo ta cuñihi yo noo nu tyaquí xaan cha ma ndihi ca maa.

¹¹ Ihya cuví cha ndicha xaan:
Tatu cúvi yo cha cuenda ra, coo tucu yo chihin ra.

¹² Tatu cunyeé yo tindocho, cucunyaca ñaha yo chihin ra.

Tatu catyí yo tyi ña yihí yo cuenda ra, maa ra cucatyí ra tyi ñima ñáyivi cuenda ra cuví chi yo.

¹³ Tatu sandocho yo chi ra, soco maa ra tyicuan ri sacuví ra cuhva catyí ra.
Vatyí maa ra ña tuhvá ra nasama ra tuhun cahán ra.

Tatu sahá tyiño vaha yo, cuaquita vaha yo

¹⁴ Sanicohun iñi ñu tuhun ihya, ta catyun chi ñu chihin nuu Sutu Mañi yo na sandihi ñu cha cuví yuhu ñu cha ñima ri tuhun. Vatyí cha cuví yuhu ñu tyehe caa, ñahri maa tuhun. Tyi sativí ñu chi ñu tyasohó tuhun cahán ñu.

¹⁵ Saníñun ta cuhva cuendon chuun nuu Nyoo tari noo ra sahá tyiño vaha. Vatyí ñahri cha cucahan nuun tatu chotyíño vahun tuhun ndicha yoso cuhva tahán chi.

¹⁶ Ñaha tyasohun tuhun cha ñima ri tuhun ñáyivi ihya. Vatyí ñahri maa tyinyeé chi chi yo. Soco sativí ca chi chi yo nuu Nyoo

¹⁷ vatyí tari quihvi xico ndiyi noo nu cahvi, tyicuan caa cuví tuhun cuan vatyí sativí chi chi yo. Ta cuaha ñu cuativí cha cuenda cuan. Ican cuví cha cuví chi ra Himeneo ta ra Fileto.

¹⁸ Vatyí caquita caxiin ra ityi vaha ta catyí ra vatyí tari quivi cha yahá nandoto yo ta ma nandoto ca coño ñuhu yo. Ta tyicuan caa satondocho ra cuhva chinó iñi suhva ñu.

¹⁹ Ta vasi yihí ñu nducaxiin ñu, soco Nyoo chacun ra cha ndicha, ta yucuan cuví cha ma nasama maa. Ta nyisó chi noo seña cha catyí: “Sutu Mañi yo ñohó nuu ra chi ñu cuenda ra.” Ta catyí tucu chi: “Tandihí ñu nyisó sivi ra Cristo na quita ñu nu quiñi caa.”

²⁰ Chichi noo vehe cahnu, ñima maa maa ri ndaha tyiño chino chihin xuhun cuaan ta xuhun cuichin iyó. Iyó tucu cha chino chihin vitu ta chihin nyahyu. Yihí cuan chotyíño ñu chi nu vaha, ta yihí cuan cha chotyíño ñu nu ñima ri tuhun.

²¹ Tyicuan caa tucu maa yo tatu ña tinn cuenda yo tuhun cha ñima ri tuhun ñáyivi ihya, cuví yo noo ñáyivi cha chotyíño Nyoo chi, tari noo vaso xuhun cuaan. Ta cuñi chi vatyí cundhi vasu cuan, tyicuan ta cuví cotyíño ra chi yo cha cuenda tandihi nuu vaha.

²² Ma caca xiñun tari chicá xiñi ra tyivaa ñáyivi ihya. Vatyí maa maa ri cha quiñi caa chicá xiñi ra. Coo noo ñáyivi cuiti. Chino vaha iñun chi Nyoo. Cuñun chi Nyoo ta chi ñáyivi. Coo taxi run chihin tandihi ñu

yihí cuenda Nyoo, ñu cha chihin cha vaha añima chicán tahvi chi Sutu Mañi yo.

²³ Ta ma quichahun tuhun cha ñima ri tuhun cha cuví yuhu ñáyivi. Vatyí chitón tyi chihin cuan cacú tisihi.

²⁴ Ta noo ra sacuví tyiño nuu Sutu Mañi yo, ña tahán chi cañi tahan ra. Soco tahán chi cha vaha ñáyivi cuví ra chihin tandihi ñáyivi. Ta cuñi chi cha ñihi vaha ra cuhva sañaha ra tuhun Nyoo. Ta cuñi tucu chi cha cama cuví iñi ra chihin ñáyivi.

²⁵ Ta chihin cha masu iñi ra cuñi chi cha sandundoo ra chi ñáyivi ndava iñi. Ta cutu ra nasama Nyoo cuhva iyó ñu ta nacoto ñu cha ndicha.

²⁶ Ta tyicuan caa ta cunducachi iñi ñu ta cuaquita ñu chichi ndaha ra cuví cuihna vatyí cha vityin nyacuví maa ra yoso cuhva cuñi ra chihin ñu.

3

Yoso caa cucoo ñáyivi nu cuandihí ca quívi

¹ Ta cuñi tucu chi cõton vatyí nu cuandihí tyembu cuquichi quívi cha yíi xaan coo yo.

² Vatyí cucoo ñáyivi ñu cuñi xaan suri chi maa. Ta cucuñi xaan ñu xuhun. Ta yaa xaan cucuvi ñu. Ta cahnu cusaha ñu chi ñu. Cucahan ña vaha ñu siqui Nyoo. Ta ma quichaha ñu nu cahán sutu ñu ta sihi ñu. Ma nacuhva ñu tyahvi nyoo chi Nyoo, ni chi tahan ñu. Ma quichaha ñu chi Nyoo.

³ Ma cuñi ñu chi tahan ñu. Ma coo ticahnu iñi chi ñu chihin ñáyivi. Cuñi ñu cuendu. Ma cuví cunyaca ñaha ñu coño ñuhu ñu. Xaan xaan cucuvi ñu. Ta ma cuñi nyehe maa ñu cha vaha.

⁴ Cunaxico tuhun ñu chi tahan ñu. Ta ndava xaan cucuvi iñi ñu. Ta cucaña iñi ñu sacuvi ñu ñáá ndihí cha cuñi ñu. Ta maa maa ri cha quichi cuví iñi ñu cunanducu ñu, ta ma nanducu ñu chi Nyoo.

⁵ Cunyicon ñu noo cuhva tari cha chinó iñi ñu chi Nyoo, soco ña ndicha ñu. Vatyí chasí ñu cha sañahá Nyoo tunyee iñi ra. Ma cutahun chihin ñu caa tyicuan caa.

⁶ Vatyí mahñu ñu ihya iyó ra cha quihvi ra chichi vehe ta sandavi ñaha ra chi ñusihi cha ñahri cha chiñi tuñi xiñi. Ta nyisó ñusihi cuan cuatyí, vatyí nyicón ñu tandihí cha quichi cuví iñi ñu.

⁷ Tyicuan ri cuñi ñu coto ñu tandihí tuhun chaa soco ña cuví cutuñi iñi ñu ñáá cha cuví cha ndicha.

⁸ Ta ñu cucoo cha cahin tuhun ihya, cucuvi ñu tari maa ra Janes ta ra Jambres, ra tasi cha cachiyo ta cha naha. Ta cuñi ra saha canaa ra chi ra Moisés. Ta tyicuan caa tucu ñu cucoo nu cuahan ca chi. Ma tahan iñi ñu sacuvi ñu cha vaha. Quiñi cucaca xiñi ñu. Ta ma chino iñi ñu cha vaha.

⁹ Soco cuhva cunyacuvi ñu ma cuví cutya chi vatyí ña xehe caa tyi cha ñima ri tuhun cuví cha cusacuvi ñu, tari cha chinyacuví ra Janes ta ra Jambres.

Nu ndihí tyatyíño ra Pablo chi ra Timoteo

¹⁰ Soco yoho chitó vahun tyi yuhu ñima tyicuan caa iyé. Vatyí chitón tuhun cha sañahí, ta cuhva iyé. Ta chitón ñáá cha nanduquí ta yoso cuhva chinó iñi chi Nyoo. Ta chitó tucun yoso caa cunyeé iñi cha cahán ñáyivi chii. Ta chitón yoso cha cuñi chi ñu.

¹¹ Ta chitón yoso caa cunyeí tindoho nu chicán nyicon ñáyivi chii. Chitón cha cuví chii, tandihí tindoho cha nyehi cha catyí tuhun Nyoo ñuu Antioquía, ta ñuu Iconio, ta ñuu Listra. Soco Sutu Mañi yo sacacu ra chii chichi tandihí cuan.

¹² Cha ndicha cuví vatyí tandihí yo cha cuñi yo coo yo cuhva cuñi ra Cristo Jesús cunyehe yo tindoho saha ñáyivi.

¹³ Soco ñu quiñi iyó ta ñu sandaví ñaha, quiñi xaan ca cunanduvi ñu. Vatyí cusandaví ñaha ñu chi ñáyivi ta cusandaví ñaha ñáyivi chi ñu.

¹⁴ Soco yoho sañihun coun chihin cha cutuhvon. Vatyí chitón yóo cha sañaha chuun ta chitó vahun tyi cha ndicha cuví.

¹⁵ Nya ta ni luhlun ta chitón cha nyaá nu tutu tuhun Nyoo. Ta yucuan cuví cha chahá cha cutuñi ca iñun tacuhva cacun cha cuenda cha chinó iñun chi ra Cristo Jesús.

¹⁶ Tandihí tuhun cha nyaá nuu tutu Nyoo, ta maa Nyoo chaha. Ta tyinyeé xaan chi chi yo nacoto yo yoso caa tahán chi chinó iñi yo. Sañahá chi chi yo cuhva caa yo. Sandundoó chi chi yo. Ta sañahá chi chi yo yoso caa coo yo noo ñáyivi vaha nuu Nyoo.

¹⁷ Tyehe caa tyinyeé tuhun Nyoo chi yo tacuhva vatyí cuví yo noo ra cuiñi cuenda Nyoo. Ta cuatu tuhva yo sacuvi yo tandihí cha vaha.

4

¹ Tyatyíñe chuun nuu Nyoo ta nuu Sutu Mañi yo Jesucristo, vatyí maa ra cusandaa ra cuatyí ñu nyitó ta ñu chihí quiví quichi ra cunyaca ñaha ra chihin tunyee iñi ra.

² Cahan tuhun Nyoo chihin ñáyiví. Tyicuan ri saniñun sacuvun. Cahan tuhun Nyoo nuu ñu tatu chahá chi cuhva o vasi ña chahá chi cuhva. Cuhva tuhun chi ñu, cañyí cuhva caa ñu tacuhva cunyicon vaha ñu chi ra Cristo. Ta cuatun nasama ñu cuhva iyó ñu chihin cha cama iñun. Ta sañahun chi ñu yoso caa tahán chi coo ñu.

³ Vatyí coo quiví ma cunye ca iñi ñáyiví tyasoho ñu tuhun vaha. Soco cunducu ñu cuaha xaan ra sacuaha cha sañahá maa maa ri cha tahan iñi maa ñu cuiñi ñu.

⁴ Ta cusacuachiyo xiin ñu cha ndicha. Ta cucuñi ñu cuiñi ñu noo tuhun cha ña ndicha.

⁵ Soco yoho saha cuenda chuun chihin cha vaha chica xiñun. Cunyeun tindoho. Cahan tuhun Nyoo chihin ñáyiví. Sacuvi vahun tyiño chahá Nyoo chuun.

⁶ Yuhu cha cuñí cuiñi ri nacuhva cuende ñayiví cha cuenda tuhun Nyoo, vatyí cha nyaña yatyin tuhun chihi chii.

⁷ Cha cañi tahin tari cuhva tahán maa chi ta cha sandihí tyiño cha chahá Nyoo chii. Ta ña sandihí tuhun cha chinó iñi chi ra.

⁸ Ta vityin nu cuahan ca chi quiví, nyatú tuhva noo cha tahán chi chii cha cuacuhva Sutu Mañi yo chii. Ta ñima chi maa ri mai cuhva ra, soco cuhva tucu ra chi tandihí ca ñu cha nyatú chi ra. Vatyí noo ri maa ra cuví ra vaha sacutuñí.

Nonga tyiño tyaa ra Pablo chi ra Timoteo

⁹ Saniñi ta quichun cha numi ri, quichi nyehun nu nyai.

¹⁰ Vatyí ra Demas sandoo ra chii vatyí cuñí ca ra cha iyó ñayiví ihya. Ta cuahan ra nya ñuu Tesalónica. Ta ra Crescente cuahan ra nya ityi Galacia. Ta ra Tito cuahan ra ityi Dalmacia.

¹¹ Noo ri maa ra Lucas nyaá chihin. Nanducu chi ra Marcos ta na quichi ra

chuhun quiví quichun. Vatyí chiñuhú xaan ra chii nu tyiño Nyoo.

¹² Tachí chi ra Tíquico ñuu Éfeso.

¹³ Quiví quichun cuison sahma cocon cha sandoj ñuu Troas vehe ra Carpo. Tyicuan caa tucu libri, quihí ndahun quichi. Ta cha niñi ca tuti.

¹⁴ Ra Alejandro ra cañi mityi cuan, cuaha xaan cha ña vaha chinyacuví ra chihin. Ta maa Sutu Mañi yo cutiyahví chi ra cha cuenda cha chinyacuví ra chihin.

¹⁵ Saha cuenda chuun chihin ra. Vatyí xaan xaan cuñí ra siqui tuhun Nyoo cha cahán yo.

¹⁶ Cha xihna ri quiví sacaqui chii nuu ra cuví tyiño, yori maa tyinyee chii. Casandoo noo tuhun maa ra chii. Na saha Nyoo ticahnu iñi chi ra cha cuenda cuan.

¹⁷ Soco Sutu Mañi yo tyinyee xaan ra chii. Ta chahá ra tunyee iñi chii tacuhva cuví cahan cachi tuhun ra nuu ñu, ta chiñi tandihí ñu cha ñima ñu Israel cuví. Ta sacacu Nyoo chii cha cachi ndicaha chii.

¹⁸ Ta cuasacacu ca ra chii ndaha tandihí cha ña vaha. Ta cuasaha cuenda ra chii nyacua nya nachaa quiví cunyai chihin ra nu nyaca ñaha ra. Chi maa ra na sacahnu yo tyicuan ri maa. Ta na cuvi chi tyicuan caa.

Nu ndihí cahan ra Pablo ta chahá ra nocumi chi ñu

¹⁹ Ihya vachi nocumi chi cu Prisca ta chi ra Aquila ta chi ñáyiví chi ra Onesíforo.

²⁰ Ndoo ra Erasto ñuu Corinto. Ta ndoo ra Trófimo ñuu Mileto vatyí cuhví ra.

²¹ Saniñun ta quichun cha ni cumañi ca chaa yoo vichin.

Vachi nocumi chuun sahá ra Eubulo ta ra Pudente ta ra Lino ta cu Claudia ta tandihí ca ñáyiví tahan yo cuenda Nyoo ihya.

²² Na cunyaa Sutu Mañi yo chuhun. Ta Nyoo na nasoco ra chi tandihí ndo.

Carta Cha Sacuhun Ra Apóstol Pablo Chi Ra Tito

Nu tyaa ra Pablo noo tutu chi ra Tito

¹ Yuhu ra Pablo sacuví tyiño nuu Nyoo. Ta cuví noo apóstol ra Jesucristo, o cuñí chi catyi vatyí tyatyíño maa ra chii vatyí tyinyei chi ñu nacachi maa Nyoo, na nachino iñi ñu chi ra, ta cohon nuu ñu cha ndicha, ta coo ñu cuhva cuñí Nyoo.

² Ta cuatu tuhva ñu coo ñu ñáyiví chaa cha ma naa ca maa andiví. Vatyí ta ni cumañi ca chino ñuhu ñáyiví ta catyi Nyoo vatyí cucuhva ra noo ñáyiví chaa chí yo. Ta maa ra ña cuendu ra.

³ Ta vityin chaá quiví cha tyaa Nyoo cuhva tyi nacoto yo tuhun ra. Maa ra cuví ra sacacú chi yo, ta chaha ra tyiño chi yuhu cha cahin tuhun ra chihin ñáyiví.

⁴ Sacuhín tutu ihya chuun, Tito, vatyí tari noo sehe vahi cuví chuun cha cuenda tuhun Nyoo, vatyí ñin ri chinó iñi yo chi ra Jesucristo. Cuñí vatyí Nyoo Sutu yo ta Sutu Mañi yo Jesucristo, ra sacacú chi yo, na nasoco ra chuun, ta na nyehe ndahví ra chuun, ta na coo ca cha taxi ri añimon sahá ra.

Tyiño chaha ra Pablo chi ra Tito tyi sacuvi ra ñuhu Creta

⁵ Sandoj chuun ñuhu Creta vatyí sandaun tyiño Nyoo cha nyaá cundaa. Ta tyison ra chahnu ra quindaha vehe ñuhu tahan tahan ñuu tari cuhva catyi chuun.

⁶ Vatyí ra nyisó tyiño ihya cuñí chi coo ra noo cuhva cha ma cahan ñáyiví chi ra. Noo ri ñasihí ra coo. Ta tandihí sehe ra cuñí chí cha chinó iñi ñu chi Nyoo, ta cachi coo ñu ta ma ndava iñi ñu tacuhva cha ma tyaa ñáyiví cuatyí siqui ñu.

⁷ Vatyí ra yindahá chi ñu yihí cuenda Nyoo, Nyoo tyatyíño cuan chi ra. Yucuan chaha ñiñi cuñí chí vatyí cuví ra noo ra vaha. Ñima noo ra chahnu sahá chii, ni ñima noo ra tyityi iñi, ni ñima noo ra tuhvá chiñi. Ñima noo ra quixin cuatyí, ni ñima noo ra cuñí xuhun cha ña saha ganaa vaha ra.

⁸ Soco tyicuan ri sií cuví chi ra tatu chaa ñáyiví vehe ra. Ta tahan chi cuhva ra nu

coo ñu. Cuñí chi cuví ra noo ra cha sacuví cha vaha. Noo ra chitó yoso caa nyaca ñaha ra chi maa ra. Na cuví ra noo ra ndaa iyó, noo ra sacahnú vaha chi Nyoo. Ta chitó vaha ra cuhva tahán chi sacuvi ra ta saníñi ra sacuvi ra.

⁹ Ta cunyicon vaha ra tuhun ndicha cha sañahá yo chi ra. Tyicuan ta coto ra sanduní ra iñi inga ñu chihin tuhun vaha ihya. Ta chi ñu catyí tyi ña ndicha tuhun cahan yo, coto ra yoso caa sañaha ra chi ñu tyi ña vaha cahan ñu siqui tuhun Nyoo.

¹⁰ Vatyí cuaha xaan ra ndava iñi iyó. Cuaha ra cahan cha ñima ri tuhun, cuaha ra sandaví ñaha. Ta cuaha xaan ca ñáyiví Israel sacuví tyicuan caa.

¹¹ Cuñí chí cha casí yo yuhu ra cuan, vatyí cuaha xaan ñáyiví satondó ra xiñi. Vatyí cha cuenda cha cacuñí ra xuhun ta sañahá ra noo tuhun cha ña tahán chi.

¹² Ta suri maa noo ra Creta, noo ra chiñi tuñi, ra cahan nuu ñu catyí ra tyehe caa: “Ñu Creta, cuendu xaan ñu. Tari quití cuví ñu. Cuahyí ñu ta suchan ñu”, catyí ra cuan.

¹³ Ta cha ndicha catyi ra cuan. Yucuan chaha cuñí chí cha cahan ñihun chihin ñu na saña ñu tuhun cuan, tacuhva vatyí vaha na chino iñi ñu chi ra Cristo.

¹⁴ Tacuhva cha ma tyasoho ca ñu tyisu cha ñima ri tuhun cha canasavaha ri maa ñu Israel. Ta ni ma tyasoho ca ñu tuhun cahan ñáyiví cha ña cuñí coto cha ndicha.

¹⁵ Cha cuenda ñáyiví cha vaha chicá xiñi, tandihí ta vaha chí ñu. Soco cha cuenda ñu cha ña chinó iñi ta ña vaha chica xiñi, ñahri maa cha vaha chí ñu vatyí nyacua nya cuhva chicá xiñi ñu ta cuhva tuví iñi ñu ta ña vaha ta quiñi caa.

¹⁶ Catyí ñu vatyí ñohó nuu ñu chí Nyoo, soco chihin cha ña vaha nyacuví ñu nyehé yo tyi ña ndicha ñu. Vatyí quiñi yihí iñi ñu ta ndava iñi ñu. Ta ma cuví sacuvi ñu noo cha vaha.

2

Tuhun vaha cha chaha Nyoo tyi sañaha yo

¹ Soco yoho, sañaha tuhun vaha tari cuhva sañahá tuhun Nyoo chí yo.

² Sañahun vatyí ra chahnu, cachi coo ra, tacuhva vatyí na saha ñáyiví ñáyiví chí ra. Ta tyicuan ri cachi caca xiñi ra. Vii cuhun

ra chihin cha chino iñi ra. Cuñí chi cha cuñí ra chi Nyoo ta chi ñáyivi. Ta cunyehe iñi ra tandihi.

³ Ta tyicuan caa tucu ñu chahnu. Catyi chi ñu na coo ñu noo cuhva cha tahán iñi Nyoo. Ta ma ñi ñu cuendu. Ma coho ñu ndixi. Ta na sañaha ñu cha vaha iyó ñu,

⁴ na nyehe ñu nicaa tandaha. Tacuhva vatyi cuñi ñu chi yii ñu ta chi sehe ñu.

⁵ Na caca vaha xiñi ñu. Ta saha vaha ñu cuenda cuhva iyó ñu. Na saha cuenda vaha ñu vehe ñu. Ta vaha ñáyivi cuvi ñu. Na cuhva ñu cha cunyaca ñaha yii ñu chi ñu tacuhva vatyi yori cuvi cahan ña vaha siqui tuhun Nyoo.

⁶ Ta tyicuan caa tucu ra tyivaa. Cuhva tuhun chi ra na cacachi coo ra.

⁷ Ta maun cuñí chi cha sañahun maa ri cha vaha chihin cuhva iyón chi ra. Sañahun chi ra chihin cha cachi ta cha ndaa.

⁸ Maa ri tuhun vaha cahun tacuhva vatyi yori cuvi tyaa cuatyí sicun. Tyicuan ta ra xaan iñi chi ndo cucahan nuu ra vatyi ma ñihi ra cuhva cahan ña vaha ra siqui ndo.

⁹ Cuhva tuhun chi ra yañi yo ra iyó chitoho, na caquichaha ra chi chitoho ra. Na sacuvi vaha ra tandihi cha catyí ra. Ta ma na cahan ra nu cahan ra.

¹⁰ Ta ma tin ri maa ra cha chii chitoho ra. Soco na saha vaha ra ñáyivi chi ra, tacuhva vatyi cunyehe ñáyivi vatyi vaha xaan tuhun Nyoo ra sacacú chi yo.

¹¹ Vatyi Nyoo sañahá ra vatyi vaha xaan ñáyivi cuví ra. Ta cuñí ra sacacu ra chi tandihi ñáyivi.

¹² Chihin cuan sañahá Nyoo chi yo vatyi na saña yo cha quiñi caa cha nyacuví ñáyivi ña ñohó nuu chi ra ta cha quichi cuvi iñi ñu. Ta cachi coo yo siqui ñuhu ñáyivi ihya, tari cuhva cuñí Nyoo.

¹³ Ta sañahá tucu ra chi yo yoso caa cuatu tuhva yo cha vaha cha cuñihi yo quivi quichi tucu ra Jesucristo. Vatyi cucusi xaan cuñi yo cuhva cha cunyehe yo cha tyaqui quivi quichi ra cuví Nyoo yo ra cahnu ca, ra cha sacacú chi yo.

¹⁴ Chaha ra ñáyivi ra tyiño nuu yo tacuhva sacacu ra chi yo ndaha tandihi cha quiñi caa. Ta sandundi ra chi yo tacuhva na cuvi yo ñáyivi cuenda ra, ta cha yaha

tuhun cuan cuñí ra vatyi sacuvi yo maa maa ri cha vaha.

¹⁵ Ican ihya cuñí chi sañahun chi ñáyivi. Sanduniun iñi ñu. Ta cahun nuu ñu chihin ndusu yuhu Nyoo tatu ña vaha sacuvi ñu. Ta ma sacuvun ni noo cha ña vaha. Tyicuan ta ma cuvi ñihi ñu cuhva cahan nyaa ñu chuun.

3

Cuhva cha tahán chi sacuvi ñu yihí cuenda Nyoo

¹ Sanicohun iñi ñu tahan yo cuenda Nyoo na quichaha ñu chi gobiernu ta chi ra cacuví tyiño. Ta chihin cha ñi iñi ñu na sacuvi ñu ñáá tyiño vaha cha catyí ra cuví tyiño tyi sacuvi ñu.

² Ta ma cahan ña vaha ñu siqui ni noo ñáyivi. Na taxi ri coo ñu. Vaha ñáyivi na cuvi ñu. Na masu cuvi añima ñu chihin tandihi ñáyivi.

³ Vatyi nyacua nya maa yo ta tyicuan caa cuvi yo ta ityi chata ca. Tondo xaan chiyo yo. Ta ndava xaan cuvi iñi yo. Ñahri noo ityi vaha chica noo yo vatyi ra cuví cuihna sandahvi ñaha ra chi yo. Chinyaca ñaha cuhva ña vaha cha cuñi coño ñuhu yo chi yo. Ta chinyacuví yo tandihi maa cuhva cuñi chi. Tandihi cha iyó chi inga ñáyivi ta cuñi yo coo chi yo. Tasi cuñi yo nyehe yo chi tahan yo. Ta ñáyivi ña cuñi nyehe ñu chi yo.

⁴ Soco Nyoo vaha ñáyivi cuví ra ta sacacu ra chi yo. Yucuan cuvi nu sañaha ra vatyi cuñi ra chi tandihi ñáyivi.

⁵ Ñima cha cuenda cha cachi iyó yo ta sacacu ra chi yo, soco cha cuenda cha ndahvi cuñi ra nyehe ra chi yo. Ta chihin ñiñi ra Jesús nacatya yo cuatyí yo ta nacacu chaa yo, ta chahá Tatyí Ii ra noo ñáyivi chaa coo yo.

⁶ Ta chaha xaan Nyoo cha coo Tatyí Ii ra añima yo cha cuenda maa ra Jesucristo ra sacacú chi yo.

⁷ Chihin tumañi iñi cha chaha ra chi yo ta sacuvaha ra chi yo nuu ra. Ta vityin nyatú yo cunanyehe yo noo cha cha yaha chaha ra chi yo, noo ñáyivi cha ma naa ca maa.

⁸ Tandihi tuhun ihya ndicha xaan. Ta cuñi vatyi cahun tuhun ihya nuu ñu chinó iñi chi Nyoo chihin cha ñi iñun, tacuhva

na saha cuenda ñu chi ñu, ta sacuvi ñu cha vaha. Vaha xaan tuhun ihya, ta cuatyinyee chi chi tandihí ñáyiví tatu quichahá ñu.

⁹ Soco ma tyasohun nu cuví yuhu ñu tuhun cha ñima ri tuhun. Ma tyasohun tuhun cahán ñu vatyí ñu cuan ñañí xaan cuñí ñu coto ñu yoso caa vachi tata yo. Ma quichahun chi ñu cañí tahan cha cuenda ley cha tyaq ra Moisés ta cha naha. Ñahri maa tyinyeé cuan. Cha ñima ri tuhun cuví.

¹⁰ Tatu iyó ñu cuñí ñu sacusiin ñu chi ñu nyicú vehe ñuhu, çana chi ñu noo chaha o uvi chaha ta çatyí chi ñu tyí ña vaha sacuví ñu. Ta tatu ña quichahá ñu, çasi nu quichi ñu.

¹¹ Vatyí ma chihin yucuan ri chitón vatyí ña vaha añima ñu tatu tyicuan caa nyacuví ñu. Chicoo cuatyí ñu. Ta suri maa ñu sacunaá ñu chi ñu.

Tyiño tyaq ra Pablo chi ra Tito

¹² Cutachi chi ra Artemas, o chi ra Tíquico nu nyaún. Quiví chaa ra, nducu cuhva ta cuhun ñuu Nicópolis vatyí cuñihi tahan yo yucuan. Vatyí tyaí cuhva cuyahi yoo vichin yucuan.

¹³ Nducu cuhva tyinyeun chi ra Zenas ra chitó xaan ley, ta chi ra Apolos ta cuhva cha chiñuhú chi ra nu cachicá noo ra tuhun Nyoo.

¹⁴ Na cutuhva ñu yihí cuenda Nyoo sacuvi ñu cha vaha ta tyinyee ñu tatu iyó cha cumañi chi inga ñu. Tyicuan ta ña caha ri nyicón ñu chi Nyoo.

Nu ndihí cahan ra Pablo

¹⁵ Tandihí ra nyicu chihin, chahá ra nocumi chuun, Tito. Ta na cuhva nocumi chi tandihí ñu cuñí chi ndi cha cuenda cha iin ri cuví yo cuenda Nyoo. Na nasoco Nyoo chi tandihí ndo.

Carta Cha Sacuhun Ra Apóstol Pablo Chi Ra Filemón

Nu tyaq ra Pablo noo tutu chi ra Filemón

¹⁻² Yuhu ra Pablo ta ra Timoteo yañi yo, tyaá ndi tutu ihya chi yoho, Filemón, tyi ra tahan ndi nu tyiño Sutu Mañi yo cuvún. Ñohí vehe caa ihya cha cuenda ra Jesucristo ta sacuhún ndi tutu ihya chuun ta chi ra Arquipo, ra cuvi sindaro ra Jesucristo chihin yo, ta chi cu Apia, ta chi tandihí ñu ndu ñin ri vehun.

³ Na nasoco Nyoo Sutu yo ta Sutu Mañi yo Jesucristo chi ndo. Ta na coo cha taxi ri cuñi añima ndo sahá ra.

Nu catyi ra Pablo vatyí ra Filemón vita xaan ñi ra ta chino vaha ñi ra chi Nyoo

⁴ Tyicuan ri nacuhvé tyahvi nyoo chi Nyoi cha cuendon nu nichón ñi tuhun, nu chicán tahvi chi ra.

⁵ Vatyí ñihí tuhun tyi chinó vaha ñun chi Sutu Mañi yo Jesucristo, ta cuñi xaan chi ra ta chi ñu yihí cuenda ra.

⁶ Ñáyivi cha sacotón yoso caa cuhva chinó ñun chi Nyoo, nachino ñi tucu maa ñu chi ra ta vityin chicán tahvi cha cuenda ñu, na coto vaha ñu tandihí cha vaha cha chahá Nyoo chi yo cha cuenda ra Cristo Jesús.

⁷ Siñ xaan cuñi, ta vaha xaan cuñi añime vatyí cuñi xaan chi ñu tahan yo, ta sandunyeún ñi ñu.

Nu chicán ra Pablo noo tumañi ñi chi ra Filemón cha cuenda ra Onésimo

⁸ Vasi iyó chi ityi chíi cha catyi chuun ñáa cha tahán chi sacuvun vatyí apóstol cuví, soco ña cuñi saniñi chuun.

⁹ Vaha ca cha caquen noo tumañi ñi chuun cha cuenda cha cuñi yo chi Nyoo vatyí yuhu ra chahnu cuví ta ñohí vehe caa cha cuenda ra Cristo Jesús.

¹⁰ Chiquén noo tumañi ñi chuun cha cuenda ra Onésimo vatyí nanduví ra sehi cha cuenda Sutu Mañi yo nu ñohí vehe caa ihya.

¹¹ Quivi cuan musu cuví ra chuun, ta chaha xaan ra tisihi, soco vityin musu vaha cuví ra, tyi vaha sacuví ra tyiño nui ta tyicuan caa tucu cusacuvi vaha ra tyiño nuu maun.

¹² Ta vityin sacunuhí chi ra chuun. Ta cuñi vatyí ñaquehen cuenda vahun chi ra tari cha mai cuví.

¹³ Vasi cuñi cha ndoo ra ihya chihin, ta tyinyee ra chíi tyiño nuu maun cha ñiri ca cha ñohí vehe caa cha cuenda tuhun Nyoo,

¹⁴ soco ña cuñi cha ndoo ra tyiño nuun tatu ña ndoun vaha, vatyí tacuhva sacuvun tumañi ñi chíi soco chihin cha iyó vaha ñun ta ñima ca chihin cha saniñi chuun.

¹⁵ Ra Onésimo chaha xaan ra tisihi chuun quivi cuan, soco vaha xaan nanduví ra vityin, vasi yucuan cuenda canyaha ra chuun ta vityin nachaa ra nu nyaún vatyí cuacunyaa ra chuhun tyicuan ri maa

¹⁶ soco ñima tari noo musu ri, soco tari noo ra vaha ca. Vatyí yañi yo cuví chi ra. Ta cuñi xain chi ra, ta vihi ca yoho, tahán chi cha cuñi con chi ra. Vatyí ñima noo yañun cuenda coño ñuhu ri cuví chi ra. Soco yañun cha cuenda Sutu Mañi yo cuví chi ra ñandihí.

¹⁷ Tatu ndicha cha ra tahun cuví chíi, cuñi vatyí ñaquehun chi ra Onésimo tari cha chi yuhu ñaquehún.

¹⁸ Tatu iyó cha sacuví ra chuun, o tatu yosoyicá ra chuun, tyiyahvi mai.

¹⁹ Yuhu ra Pablo tyaí tuhun ihya vatyí cutiyahvi cha yosoyicá ra chuun, cha nuu cha tahán chi catyi chuun vatyí yosoyicón nyacua nya ñayivun chíi.

²⁰ Chiquén chuun, yañi, na sandusiun ñi ta ñaquehun chi ra Onésimo chihin cha vaha. Sanduchaa añime chihin cha ñin ri cuví yo cha cuenda ra Cristo.

²¹ Tyaí tutu ihya chuun vatyí chité tyi cuaquichahun tuhun cahín. Ta chité vatyí ñima yucuan ri, soco cuaha ca cuasacuvun.

²² Ta nonga cha chiquén chuun tatu ma sanduvahun chíi noo nu cuví cunyai chihin ndo. Ta cuñi vatyí caçan tahvun cha cuende, na cuhva Nyoo cha cuhin nu nyaá ndo.

Nu ndihí caçan ra Pablo ta chahá ra nocumi chi ñu

²³ Vachi nocumi chuun sahá ra Epafras, ra ñoho chihin vehe caa cha cuenda ra Cristo Jesús.

²⁴ Ta vachi tucu nocumi chuun sahá ra Marcos, ta ra Aristarco ta ra Demas, ta ra Lucas, ra catyinyeé chii chihin tyiño Nyoo.

²⁵ Na nasoco Sutu Mañi yo Jesucristo chuun. Ta na cuvi chi tyicuan caa.

Carta Cha Chino Cha Cuenda Ñáyivi Israel, Ñu Cahán Sahan Hebreo

Nyoo cahán ra chihin yo chihin yuhu Sehe ra

¹ Ta tyembu chahnu cahán Nyoo cuaha xaan chaha, ta cuaha xaan cuhva, chihin sutu chahnu yo, ñu chiyó ta cha naha. Cahán ra chihin yuhu ra cacuvi profeta, ra cha cachahá cuenda tuhun cahán ra.

² Ta vityin nu cua ndihi tyembu ihya, cahán ra chihin yo chihin yuhu Sehe ra. Ta tandihi maa ta natyaa ra ndaha Sehe ra. In ri cuví ra chihin Sehe ra ta savahá ra ñuhu ñayivi.

³ Cha cahnu ta cha tyaqui cuví Nyoo iyó chi Sehe ra, vatyí suri ican ra cuví maa maa xiñahñu Nyoo. Ta chihin tunyee iñi tuhun cahán ra, nyisó cuenda ra tandihi cha iyó. Ta cha yaha sandachi ra cuatyí yo, ta chicunyaá ra chiyo vaha Nyoo, ra cha cahnu ca cuví. Ta vityin nyacá ñaha ra chihin ra nya andivi.

Cahnu ca cuví Sehe Nyoo ta ñima ca ángel

⁴ Ta tyicuan caa cahnu xaan ca nanduvi Sehe Nyoo ta ñima ca tandihi ángel. Ta cahnu ca sivi chahá Nyoo chi ra ta ñima ca ángel cuenda ra.

⁵ Vatyí Nyoo ña catyí ra ni noo chaha chi ni noo ángel tyehe caa:

Yoho cuvún Sehi.

Ta yuhu chahí ñayivi coun vityín.

Ta ni ña cahán ra tuhun ni noo ángel tyehe caa:

Yuhu cucuvi Sutu ra.

Ta maa ra cucuvi Sehi.

⁶ Soco quivi saquichi Nyoo chi Sehe nuu ra siqui ñuhu ñayivi, catyí ra:

Na sacahnu tandihi ángel cuende chi ra.

⁷ Ta cahán tucu ra tuhun ángel cuenda ra ta catyí ra:

Sacuví vatyí tatyí cuví ángel cuende,

ta tari yaa ñuhu cuví ra sacuví tyiño nui, catyí Nyoo.

⁸ Soco tuhun Sehe ra catyí ra tyehe caa:

Nyoo cuvún, ta cua cunyaca ñahun tyicuan ri maa chihin cha ndaa ta chihin cha ndicha.

⁹ Vatyí cuñún cha vaha ta cutasi cuñún cha ña vaha.

Yucuan chaha vatyí yuhu, ra cha cuví Nyoo cuendon, cuaha ca tusi iñi chahí chuun, ta ñima ca chi ra tahun.

¹⁰ Ta catyí tucu Nyoo chi Sehe ra tyehe caa: Yoho, ra nyacá ñaha cuvún. Ta quivi xihna ri savahun ñuhu ñayivi ta chihin ndahun savahun andivi.

¹¹ Maa ñuhu ñayivi ta andivi cundihí chi, soco yoho, cundoun tyicuan ri maa.

Tandihí maa cuan cu cuchahnu tari sahma.

¹² Ta cunicava tahnu chi tari noo vestido. Ta cunasama chi tari nasamá ñayivi sahma ñu.

Soco yoho suri maa ra cuvún tyicuan ri maa.

Ta ma ndihí maa ñayivun, catyí Nyoo chi Sehe ra.

¹³ Nyoo ni noo chaha ña catyí ra chi ni noo ángel tari catyí ra chi Sehe ra tyehe caa:

Cunyaun chiyo vahi nyacua nya cha caquin chi ra xaan iñi chuun chahun.

¹⁴ Soco tandihí ángel, tatyí cacuví ra ta tyaa Nyoo tyiño chi ra cha caca ra ta tyinyee ra chi ñu cucacu añima.

2

Cahnu xaan cuví tuhun cha sacacú Nyoo añima chi yo

¹ Yucuan chaha vatyí cuñí chi cha quichahá xaan ca yo tuhun ndicha cha chiñi yo, coto cunuhu yo ityi quiñi caa.

² Ta cha naha catyí Nyoo chi ángel, na cuhva ra ley ra chi ra Moisés. Nyoo catyí ra tyi tahán chi quichaha ñayivi. Ta ñu casacuvi cuatyí ta ña quichahá ñu ley ra, tachí tuñi ra chi ñu tari cuhva catyí maa ley cuan.

³ Cahnu xaan cuhva sacacú Nyoo añima yo. ¿Yoso caa cucacu añima yo tatu sacunaa yo cuhva cuan? Cha xihna ri suri maa Sutu Mañi yo Jesucristo cahán ra tuhun yoso caa cuví cacu añima yo. Ta yaha cuan ta ñu cha cachiñi tuhun cahán ra, chitó ñu tyi ndicha ta canacatyí tucu ñu chi maa yo.

⁴ Ta sin ri, Nyoo sañahá cachi ra chi yo chihin cuaha milagru ta cha iyo, vatyí ndicha cha sacacú ra chi yo. Ta chahá ra

Tatyí li ra chi yo s̄in s̄in cuhva, yoso cuhva cha cuñí maa ra. Ta chihin tandihí cuan sañaha ra chi yo vatyí ndicha cha sacacu ra añima yo.

Ra Jesucristo cuví ra cha cua sacacu añima yo

⁵ Nyoo, ña chaha ra cha cunyaca ñaha ángel chi ñuhu ñáyiví chaa cha cahán yo tuhun vityin.

⁶ Vatyí iyó noo nuu cahán chi nu tutu Nyoo tyehe caa:

Nyoo Suti ¿yóó ra cuví rayí vatyí nicohon iñun tuhun ra?

¿Yóó ra cuví Sehe ra vatyí t̄in cuendon chi ra?

⁷ Vatyí suhva quiví, ndahvi ca sacuvun chi ra, ican saha ángel.

Soco yaha cuan sacahnú xaun chi ra. Ta sahá xaun ñáyiví chi ra.

Ta chahun cha cunyaca ñaha ra siqui tandihí cha savahun.

⁸ Tandihí cuan natyaun ndaha ra.

Tandihí maa, Nyoo chaha cha cunyaca ñaha ra, cuví chi cuan. Soco nyehé yo vatyí cumañi ca quichaha tandihí cuan chi ra.

⁹ Soco nyehé yo chi ra Jesús vatyí suhva ri quiví, sanocuee Nyoo chi ra ican saha chi ángel. Soco cha cuenda cha cuñí xaan Nyoo chí yo, chaha cuenda ra chi ra Jesús cha cúvi ra cha cuenda tandihí yo. Ta vityin sahá xaan Nyoo ñáyiví chi ra ta sacahnú xaan ra chi ra cha cuenda t̄ndoho cha nyehe ra quiví chihí ra.

¹⁰ Tandihí maa cha iyó, cha cuenda maa Nyoo cuví. Ta maa ra savaha. Ta cuñí ra vatyí tandihí sehe ra ta chi maa ñu cucuvi tandihí cha tyaqui cha iyó gloria. Ta chihin t̄ndoho cha sanyehe ra chi ra Jesucristo Sehe ra, sacuvaha ra chi ra. Vaha xaan quita ra.

¹¹ Sehe Nyoo cuví chi ra Cristo, ra sacacú añima ñáyiví. Ta suri sehe Nyoo nanduví chi ñáyiví ñu chinó iñi chi ra. Yucuan chaha vatyí ña cucahan nuu ra Cristo catyí ra yañi ra chi ñu, vatyí in ri sutu ra chihin ñu.

¹² Vatyí catyí ra Cristo nu tutu Nyoo tyehe caa:

Cucahin tuhun maun chihin yañi.

Ta cucate yaa cuendon nu ndú in ri ñu.

¹³ Catyí tucu ra tyehe caa:

Yuhu cuita iñi chi Nyoo.

Ta catyí tucu ra:

Ihya nyaí chihin sehi, cha chaha Nyoo chi, catyí ra.

¹⁴ Ta tandihí yo cha cuví yo sehe ra, coño ñuhu cuví yo ta yihí ñiñi yo, yucuan chaha ra Jesús ñandihí, suri coño ñuhu ta ñiñi ñáyiví nyiso ra suhva quiví, tacuhva cuví chaa tuhun chihí chi ra, ta tyicuan caa ta sataní ra chi cuihna, ra cha chiyo tunyee iñi chi cha cahñi chi ñáyiví.

¹⁵ Ta tyicuan caa sacacu ra chi ñu cha yuhví chi tuhun chihí. Chiyo ñu tari noo musu ra ña vaha vatyí yuhví ñu cha cúvi ñu.

¹⁶ Cha ndicha vatyí ña quichí tyinyee ra chí ángel, soco chí ñáyiví tata ra Abraham quichí tyinyee ra.

¹⁷ Yucuan chaha cuñi chí cha nduvi ra tari ñáyiví, tacuhva cuví ra noo ra ndicha cundahvi cuñi chí yo. Ta tyicuan caa cuví ra tata sutu cahnu cha cuenda yo nuu Nyoo. Ta tyicuan caa ta sacuachiyó ra cutatyí ñáyiví cha cuenda t̄ndoho cha nyehe ra.

¹⁸ Vatyí maa maa ra nyehe t̄ndoho quiví nducú nyehe ra ña vaha chí ra, yucuan chaha, vityin cuví tyinyee tucu ra chí maa yo tatu nducú nyehe ra ña vaha chí yo.

3

Cahnu ca cuví ra Jesús ta ñima ca ra Moisés

¹ Yañi, nyoho chaha cuenda ndo chí ndo chí Nyoo. Ta cuví tucu ndo ñu cha nacana Nyoo chí vatyí coo ndo chihin ra andiví. Ta cha cuenda cha nyehe ra Cristo Jesús t̄ndoho tyiño nuu ndo, yucuan chaha, nyehe vaha ndo cuhva vaha iyó ra. Vatyí ican ra cuví ra cha saquichí Nyoo chí vatyí cuví ra tata sutu cahnu cuenda yo cha chinó iñi yo tuhun Nyoo.

² Ta maa ra quichaha ra tandihí cha catyí Nyoo cha sacuvi ra, tari quichaha tucu ra Moisés ta cha naha, ta sacuvi ra tyiño cha tahan chí sacuvi ra nuu ñáyiví sehe Nyoo.

³ Ta ra Jesucristo cahnu ca ra cuví ra, ta ñima ca ra Moisés. Vatyí noo ra cha savahá vehe, cahnu ca cuví ra ta ñima ca maa vehe cuan.

⁴ Tahan tahan vehe, iyó ra savaha chí chí, soco Nyoo cuví ra cha savaha tandihí maa cha iyó.

⁵ Ra Moisés, quichaha vaha ra chi Nyoo ta sacuvi ra tyiño nuu ra cha cuenda ñáyivi Israel ta cahan ra tuhun cha cusacoto Nyoo nu cuahan ca chi ityi nuu.

⁶ Soco ra Cristo ra cuví Sehe Nyoo, suri quichaha vaha ra chi Nyoo ta ican ra nyacá ñaha vehe Nyoo. Ta vehe cuan ican cuví maa yo, tatu saní ca yo iñi yo cuhun yo ityi nuu chihin Nyoo ta itá iñi yo chi ra nyacua nya nu ndihi, ta tyicuan ri cusí cuñi yo nyatú yo cha cuñihi yo.

Ñu chinó iñi chi Nyoo, nyitatu ñu chihin Nyoo

⁷ Yucuan chaha cuñi chi saha cuenda yo chi yo, tari catyí Tatyí Ii Nyoo nuu tutu Nyoo tyehe caa:

Tatu chiñi ndo tuhun cahan Nyoo chihin ndo vityin,

⁸ ma sandava ndo aña ndo, tari sacuvi ñu ña quichaha chi Nyoo quivi canducú nyehe ñu chi ra nu chica noo ñu chiqui ndi cuan.

⁹ Tyehe caa catyí Nyoo: Ñáyivi cuan nducu nyehe ñu chii, vasi chichi cha uvi xico cuiya nyehe ñu cha sacuvi.

¹⁰ Yucuan chaha cuxain chi ñu, ta catyí tyehe caa: “Tyicuan ri chicá uvi iñi ñu, ta ña cuñi ñu coto ñu ityi mai.”

¹¹ Yucuan chaha cuxain chi ñu, ta catyí cachi chi ñu, vatyí ma quihvi ñu nyitatu ñu chihin, catyí Nyoo.

¹² Yañi, saha ndo cuenda chi ndo coto cu ña vaha aña ndo ta coto yoso ri caa ta sandoo ndo chi ra cuví Nyoo nyitó cha cuenda cha ña chinó ca iñi ndo chi ra.

¹³ Soco saní ndo iñi tahan ndo tahan tahan quivi, cha ni ri ca cha chahá ca chi cuhva vityin, tacuhva vatyí ni noo ndo ta ma sandavi ñaha cha quiñi caa chi ndo, ta ndundava aña ndo.

¹⁴ Vatyí tatu saní yo iñi yo chihin Nyoo nyacua nya nu ndihi ñayivi, yucuan ta in ri cuñihi yo cha vaha chihin ra Cristo.

¹⁵ Catyí chi nu tutu Nyoo vatyí saha yo cuenda chi yo tyehe caa: Vityin tatu nyoho ta chiñi ndo cha catyí Nyoo.

Ma sandava xaan ndo aña ndo, tari sacuvi ñu ña quichaha chii, catyí Nyoo.

¹⁶ ¿Yóo ñu cha cachiñi tuhun cahan Nyoo ta ña tyasohó ñu? Tandihí ñu Israel cha tava ra Moisés Egipto ta cha naha, ican ñu cuan.

¹⁷ Ta ¿yóo chi cuxaan Nyoo chichi cha uvi xico cuiya? Suri chi ñu cuan, ñu cha chicoo cuatyí. Ta cachiñi ñu nu chiqui ndi nu chica noo ñu.

¹⁸ ¿Ta yóo chi catyí cachi Nyoo tyi ma quihvi ñu, cunyitatu ñu chihin ra? Chi ñu cha ña tyasohó nu cahan ra.

¹⁹ Nyehe yo vatyí ña cuví quihvi ñu cuan vatyí ña chinó iñi ñu chi ra.

4

¹ Yucuan chaha, cha ni ri ca cha iyó ca quivi cuví quihvi yo cunyitatu yo chihin Nyoo, cuñi chi saha yo cuenda coto ma cuvi quihvi nya noo nyoho nu cunyitatu yo chihin Nyoo.

² Vatyí chiñi tucu yoó tuhun Nyoo cha sacacú ra aña yo, tari chiñi maa ñu Israel cuan. Soco ñahri maa tuhun cha chiñi ñu, vatyí chiñi ndi ri maa ñu, ta ña chinó iñi ñu.

³ Soco yoó cha chinó iñi yo, ican yo cuví ñu quihvi nyitatu chihin Nyoo. Ta cha cuenda ñu ña chinó iñi cuví chi tari catyí Nyoo tyehe caa:

Yucuan chaha cuxain chi ñu ta catyí cachi chi ñu vatyí ma quihvi ñu nyitatu ñu chihin, catyí Nyoo.

Soco cha nyaá nu nyitatu yo chihin Nyoo vatyí nyitatu Nyoo cha sandihí ra tyiño sahá ra nyata savaha ra ñuhu ñayivi.

⁴ Vatyí yihí nu catyí chi nu tutu Nyoo cha cuenda quivi cu ucha nu ndihi vitya. Tyehe caa catyí chi:

Nyoo nyitatu ra nu cu ucha quivi, vatyí ndihí tyiño saha ra.

⁵ Ta inga tucu chaha catyí chi nu tutu Nyoo tyehe caa:

Ni noo quivi ma quihvi ñu nu cunyitatu ñu chihin, catyí Nyoo.

⁶ Ñu cuan, ñu cha xihna ri cachiñi tuhun cha sacacú Nyoo aña yo, ña quihvi ñu cha cuenda vatyí nacahnu ñu nu cahan Nyoo. Soco nyaá cha quihvi inga ñu.

7 Vatyí cha yaha nacahnu ñu Israel cuan nu cahān Nyoo, natyaa tucu ra cuhva vatyí nya inga quiví cuví quihví yo cunyitatu yo chihin ra, ta ican cuví quiví vityin. Ta cahān Nyoo tuhun quiví vityin chihin cha catyí ra David. Nyaá chi nu tutu Nyoo tyehe caa:

Vityin tatu nyoho ta chiñí ndo cha catyí, Ma sandava xaan ndo añima ndo, catyí Nyoo.

8 Tyehe ta chinyaca ra Josué chi ñu Israel cuan nu cunyitatu ñu chihin Nyoo, ma cahān ca Nyoo inga chaha tuhun cha cuenda inga quiví.

9 Soco nyaá ca nu cuví nyitatu ñu yihí cuenda Nyoo chihin ra.

10 Vatyí ñu quihví nyitatu chihin Nyoo, ña chicá ca iñi ñu soco nyitatu añima ñu tari nyitatu Nyoo quiví ndihí tyiño saha ra.

11 Cuñí chi saniñi yo chinó iñi yo chi Nyoo tacuhva cuví nyitatu yo chihin ra, coto yoso ri caa nya noo nyoho sacuvi ndo tari sacuvi ñu Israel cuan vatyí ña cuñí ñu chino iñi ñu chi ra.

12 Vatyí tuhun Nyoo, nyitó chi, ta iyó tunyee iñi chi chi. Ta xaan ca chi ta ñima ca mityi cha xaan ninduvi chiyo yuhu, ta nyee chi nyacua nya chichi añima yo ta nyacua nya chichi cha chiñi tuñi xiñi yo, nyacua nya chichi tuhun xehe cha caá añima yo. Ta sañahá cachi Nyoo ñáá cha chicá iñi yo ta ñáá cha caá añima yo tatu vaha o ña vaha.

13 Ñahri maa cha savaha Nyoo ta cuví tixehe nuu chi chi ra. Tandihí maa ta nyehé ra. Ta chi ra nyaá nacuhva cuenda yo cha sacuvi yo.

Ra Jesús cuví ra tata sutu cahnu cha cahán chaha yo nuu Nyoo

14 Ra Jesús Sehe Nyoo, cuví ra tata sutu cahnu cha cuenda yo, vatyí quihví ra nuu Nyoo ta cahán ra chaha yo. Yucuan chaha cuñí chi cha ma sandihí yo cha chinó iñi yo chi ra.

15 Vatyí ra cuví tata sutu cha cuenda yo cuví naquehen ndahvi ra chi yo tatu cuihya cuñí yo chihin Nyoo, vatyí chitó tucu maa ra cha cuví tindocho cha nyehe yo vatyí nyehe tucu maa ra tandihí nuu tindocho, saha ra ña vaha cha nducú nyehe ra chi ra, soco maa ra Jesús, ñahri cuatyí ra chicoo.

16 Yucuan chaha cuví tuhva yo nuu nyaá Nyoo ta cahān yo chihin ra chihin cha ña yuhví yo vatyí cuñí xaan ra chi yo, ta ndahvi cuñí ra nyehe ra chi yo. Ta cha cuenda cha vaha ñáyiví cuví ra, tyinyeé ra chi yo nu nyehe yo tindocho.

5

1 Tandihí ra cuví tata sutu cahnu ca cuenda ñu Israel, ñáyiví cuví ra. Ta na cachi Nyoo chi ra vatyí cahān ra chaha tandihí ñu nuu Nyoo, ta cuhva cuenda ra cha chahá ñu chi Nyoo, ta cahñi ra quití cha cuenda cuatyí ñu.

2 Ta suri vachi quiví ndahvi cuñí ra cacuví sutu cha nducú nyehe ra ña vaha chi ra, yucuan chaha cuví cundahvi cuñi ra nyehé ra chi ñáyiví ña chitó maa, ta tyinyeé ra chi ñu quitá caxiin ityi vaha Nyoo, na ndu uvi iñi ñu cuatyí ñu.

3 Ta cha cuenda cuatyí maa ra ta cha cuenda cuatyí ñáyiví, cachahñí ra quití ta chahá cuenda ra chi Nyoo na cahnya ra cuatyí ñu.

4 Yori sacuvi ri maa sutu chi. Maa Nyoo cuví ra canā chi ra, ta chahā ra cha cuví ra tata sutu, tari sacuvi ra chihin ra Aarón ta cha naha.

5 Ta tyicuan caa tucu ra Cristo, ñima maa ra sacuvi ra sutu chi ra, soco maa Nyoo chahā cha cuví ra, tari catyí maa ra tyehe caa:

Yoho cuví Sehi.
Yuhu chahí ñáyiví coun vityin, catyí Nyoo chi ra Cristo.

6 Tari catyí tucu ra chi ra nu inga nu cahán chi tyehe caa:

Yoho cuvún tata sutu tyicuan ri maa.

Cuvún tari ra Melquisedec.

7 Ta quiví chiyo ra Cristo ihya siqui ñuhu ñáyiví, chicān tahvi ra chi Nyoo, ta chacu chaa ra ta cahān ra chihin Nyoo vatyí ican ra cuví ra iyó tunyee iñi chii cha sacacu chi ra ndaha tuhun chihi. Ta Nyoo chiñí ra tuhun cahān ra vatyí sacuvi ra tandihí cha catyí Nyoo.

8 Yucuan chaha vasi Sehe Nyoo cuví chi ra Cristo, soco cutuhva ra cha quichaha ra chi Nyoo chihin cha nyehe ra tindocho.

9 Ta cha yaha cha sacuvaha Nyoo chi ra, tyicuan ta cuví ra ra sacacú añima ñáyiví tacuhva coo ñu chihin Nyoo tyicuan ri

maa, tandihí ñu cha quichahá tuhun cahán ra.
 10 Vatyí Nyoo tyaá tyiño chi ra cha cuví ra tata sutu cahnu, tari ra Melquisedec.

Yica xaan cha sandihí yo cha chinó iñi yo tuhun Nyoo

11 Cuaha xaan nyaá cahan yo siqui tuhun ihya, soco yí xaan nacatyí yoso caa cuahan, vatyí nyoho ña cuñí ndo cutuñi iñi ndo.

12 Cha naha xaan chinó iñi ndo chi Nyoo, cuñí chi cha cuví ndo ra sacuahá ta sañaha ndo chi inga ñu. Soco nyoho ni cuñí chi cha nacatyí tucu ndi inga chaha chi ndo tuhun cha xihna ri chiñi ndo tuhun Nyoo. Tari cha lee cuví ndo chihin tuhun Nyoo, vatyí tari cha chaxin ca ndo cha nuu cha cachi ndo nyayu.

13 Ta ñu cuví tari cha lee cha chaxín, ta chaa ca ñu cutuñi iñi ñu yoso caa coo vaha ñu nuu Nyoo.

14 Soco nyayu vaha cuví chi cha cuenda ñu chahnu chihin tuhun Nyoo: ñu cha cutuñi vaha iñi tuhun ra, nacotó ñu nya cha vaha ta nya cha ña vaha.

6

1 Yucuan chaha ma ndoo ri yo chihin cha xihna ri cutuhva yo tuhun ra Cristo, cahun yo ityi nuu ca tacuhva cuví yo ñáyivi chahnu chihin tuhun Nyoo. Ma ndoo ri yo chihin tuhun cha yaha cutuhva yo, ta cuñun tuhun cha ma nducu yo cuhva cha cuvaha yo nuu Nyoo chihin cha sacuví yo cha vaha, ta tuhun nachino iñi yo vatyí sacacú Nyoo chi yo.

2 Ma ndoo yo chihin tuhun cha yaha sacuvi yo, tari cha condutya yo, tari cha tyisó yo ndaha yo siqui ñu chiñó iñi chi Nyoo na nasoco ra chi ñu, tari tuhun cha cunandoto tandihí ñáyivi cha yaha chihí, ta tari tuhun cha cucutuñi chi tandihí ñáyivi nuu Nyoo ta yihí ñu cahun ñu anyaya tyicuan ri maa. Ma ndoo ri yo chihin tandihí cuan.

3 Soco tatu Nyoo ta chaha ra, sacuvi yo ihya: cahun yo ityi nuu ca.

4-6 Vatyí ñu cha yaha naquehen cuenda cha ndichin Nyoo noo chaha, chitó ñu cha chahá Nyoo, ta nyaá Tatyí Ii Nyoo chihin ñu. Ta cha chitó ñu yoso caa cha vaha

tuhun Nyoo, ta cha ñihi ñu tunyee iñi Nyoo. Ta chihin tunyee iñi cuan cunyaca ñaha Nyoo ñuhú ñáyivi chaa. Tatu cha yaha naquehen cuenda ñu tandihí cha vaha cuan noo chaha, ta yaha cuan ta sandihí ñu cha chinó iñi ñu chi Nyoo, ma cuvi ca cha ndu uvi iñi ñu inga chaha. Vatyí suri maa ñu tari cha tyaá ñu chi ra Cristo nu cruzi inga chaha, vatyí chahá ñu cha cuacu nya ñáyivi chi ra.

7 Añima ñáyivi cuví tari noo ñuhú nu sahá tyiño ñu, vatyí noo ñuhú tahan ri chaha cha coon savi, chihí ñuhú cuan ndutya savi cuan. Tatu vaha ñuhú cuan ta vaha cuvaha cha tachí ñu nuu chi, cunasoco Nyoo chí ñuhú cuan.

8 Soco tatu cañá iñu ta cañá nyava nuu chi, ñahri maa tuhun. Ta cusoco Nyoo chí ñuhú ña vaha cuan ta cucayu chi. Ta tyicuan caa tucu cucuvi chí ñu cha sandihí cha chinó iñi chí Nyoo.

9 Yañi, vasi cahán ndi tyicuan caa, soco chitó vaha ndi vatyí nyoho sacuví ndo cha vaha, maa maa ri cha sacuví ñu cha cacú aña sacuví ndo, ta ña sacuví ndo tari ñu cuví tari ñuhú ña vaha cuan.

10 Vatyí Nyoo, ra vaha cuví ra, ta ma naa iñi ra cha sacuví ndo. Ta nyehé ra vatyí cuñí xaan ndo chí ñu yihí cuenda Nyoo, vatyí tyinyee ndo chí ñu, ta tyinyee ca ndo chí ñu nya vityin.

11 Cuñí ndi vatyí na cuní ca iñi ndo nyacua nya quichi Sutu Mañi yo, tyicuan caa ta cuñihi ndo tandihí cha nyatú ndo.

12 Ña cuñí ndi cha cusuchan ndo, soco saha ndo cuenda chí ñu cha chinó vaha iñi chí Nyoo ta sacuvi ndo tari sacuví ñu. Vatyí ñu chinó vaha iñi chí Nyoo chihin cha cama iñi ñu, ican ñu ñihí cha catyí Nyoo tyi cuhva ra chí yo.

13 Vatyí ta cha naha catyí Nyoo chí ra Abraham, vatyí cuhva ra noo cha cuhva ra chí ra. Ta Nyoo tyaá ra cuhva cha cuhva ra, ta noo ri tuhun cahan ra vatyí maa ra, Nyoo cuví ra.

14 Ta tyehe caa catyí ra: “Cha ndicha vatyí cunasoco xain chuun ta cuaha xaan sehun cucuhve”, catyí ra chí ra Abraham.

15 Ta ra Abraham chihin cha cama iñi ra, nyatú ra tuhun cahan Nyoo chihin ra, ta

tyicuan caa naquehen cuenda ra cha catyi Nyoo tyi cuhva ra chi ra.

¹⁶ Tatu noo ñáyivi cuacuhva ñu noo cha cuacuhva ñu chi tahan ñu ta tyanaha ñu sivi noo ra cahnu ca. Ma chihin yucuan ri.

¹⁷ Ta yucuan chaha vatyí Nyoo minoo ri tuhun cahan ra, vatyí cuñi ra cha coto ñáyivi vatyí ndicha tuhun cahán ra, ta ña nasamá ra tuhun cahán ra.

¹⁸ Yucuan chaha iyó uvi tahan cha ma cuví nasama chi. Noo cuví cha catyi Nyoo tyi cuhva ra nyatu chi ra Abraham, ta cha cu uvi, noo ri tuhun cahan ra vatyí maa ra, Nyoo cuví ra. Ta Nyoo ña cahán ra cuendu. Yucuan chaha tandihí yo cha nyañaá yo chi ra, ni ñi yo cunyeé ñi yo chi ra, ta nyatú yo cha tyaá ra cuhva cha cuhva ra chi yo.

¹⁹ Tari noo barcu cha nuhñi noo caa vee, coto cuhun chi chihin tatyí, ta tyicuan caa quihí ñi yo cha sacacú ra Cristo ñi yo. Ta cha quihí ñi yo chi ra, nuhñi yo chihin Nyoo ra nyaá inga chiyo cortina, o nya gloria cuví Cuan.

²⁰ Vatyí ra Jesús cha quihvi ra yucuan ta nuña ra ityi nu cuhun yo nu nyaá Nyoo. Ta ican ra Jesús cuví ra minoo tata sutu tyicuan ri maa, tari ra Melquisedec.

7

Ra Jesús cuví tata sutu tari ra Melquisedec

¹ Ra Melquisedec cha cahín tuhun, cuví ra rey ñuu Salém, ta cuví ra tata sutu cuenda Nyoo, ra cuví ra cahnu ca. Quivi cha cuandichi ra Abraham cha chahan ra chicaní tahan ra chihin suhva ra cacuvi rey, ta cuví chasaha ra chi ra, tyicuan ta quitá ra Melquisedec ityi nuu ra ta nasoco ra chi ra.

² Ta ra Abraham uchi uchi tinyaa ra siquí cha saha ganaa ra nu chicaní tahan ra, ta chaha ra chi ra Melquisedec. Ta sivi ra Melquisedec cuan cuñi chi catyí: “Rey, ra cuví ra vaha.” Ta rey ñuu Salem cuan cuví ra, yucuan chaha cuví ra: “Rey vaha cha chahá cha taxi coo ñi yo ñáyivi.”

³ Ña catyí tuhun Nyoo yóo cha cuví sutu ra ta sihi ra, ni ña cahán chi tuhun yóo ñáyivi chi ra. Ni ri ña cahán chi tuhun ama cacu ra, ni ama chihí ra. Yucuan chaha

cuví ra tari caá Sehe Nyoo, noo tata sutu tyicuan ri maa.

⁴ Soco, vityin nyehe ndo yoso cha cahnu cuví ra Melquisedec, vatyí ra Abraham tinyaa ra uchi uchi siquí cha saha ganaa ra chi ra cacuvi rey cuan nu chicaní tahan ra, ta chaha ra chi ra Melquisedec.

⁵ Tyehe ta tata ra Abraham cuví ra Melquisedec, ta cuví ra sutu, ma catyí yo tyi ra cahnu ca cuví ra. Vatyí nu cuahan ca chi ityi nuu ta suri maa ley Nyoo saniñi chi ñáyivi tata ra Abraham nacuhva ñu uchi uchi cha saha ganaa ñu chi ra cacuví sutu tata ra Leví, vasi tata ra Abraham cacuví chi ra tari maa ñu.

⁶ Ta ra Melquisedec, ñima tata ra Leví cuví chi ra, ta ni ñima tata ra Abraham, soco vita ri tyi quehen ra uchi uchi siquí tandihí cha ñihí ra Abraham. Ta nasoco ra Melquisedec chi ra Abraham, ra cha chaha Nyoo promesa chii.

⁷ Ta chitó cachi yo vatyí cahnu ca cuví ra cha nasoco cuan, ta ñima ca ra cha nasoco ra chi.

⁸ Nyehe yo vatyí cahnu ca ra cuví ra Melquisedec cha nuu inga ra caquehen cuenda uchi uchi siquí cha iyó chi ñáyivi, vatyí rayi ri cacuví ra cuan, ta tuhva chaa tuhun chihi chi ra. Soco tuhun ra Melquisedec cahán chi nu tutu Nyoo ta catyí chi tyi ñahri tuhun chihi iyó chi ra.

⁹ Ta ra Leví, chihin sehe ra, ra cacuví tata ra Abraham, ican ra cacuví tata sutu cha tahan chi caquehen cha uchi uchi siquí cha iyó chi ñáyivi. Soco tari quivi tyiyahvi tucu ra Leví cuan uchi uchi cha saha ganaa ra chi ra Melquisedec cuví cuan, vatyí ra Abraham tyiyahvi ra.

¹⁰ Vatyí ra Leví, tata ra Abraham cucuvi chi ra, vasi ta cacu ca ra quivi chisatahan ra Melquisedec chi ra Abraham.

¹¹ Ta ra cacuví tata ra Leví suri tata ra Aarón cacuví chi ra, ican ra cacuví sutu cuenda yo ñu Israel, ta cha cuenda ra cuan quichi ley chahnu Nyoo. Ta vityin tyehe ta cuví nduvaha coo yo chihin Nyoo cha cuenda cha sacuví yo cha catyí ley cuan, yucuan ndicha ña ñi ca cha quichi ra Cristo ra cuví tata sutu tari ra Melquisedec, ta ñima tari ra Aarón.

¹² Vatyí tatu Nyoo ta nasama ra chi ra cuví sutu, cuñi tucu chi cha nasama ley

ñandihí.

¹³ Ta Sutu Mañi yo cha cahán tutu Nyoo tuhun, ñima tata ra Leví ta ra Aarón cuví ra, soco tata inga sehe ra Israel cuví chi ra. Ta ni noo ra vachi tata cuan ta ña tuhvá ra cuví sutu.

¹⁴ Vatyí chitó vaha yo vatyí Sutu Mañi yo tata ra Judá, sehe ra Israel vachi ra, ta ra Moisés ñahri maa tuhun tata ra Judá cahán ra quívi cahán ra tuhun ra cacuví sutu.

¹⁵ Ta yucuan nyehé vaha yo, vatyí Nyoo natyaa ra inga sutu tari ra Melquisedec.

¹⁶ Ñima tari catyí ley quichí ra, vatyí ley catyí chi yóo chi tata cua quichi noo ra cuví sutu, ta ña quichí ra tata cuan, soco quichí ra vatyí iyó cha ndicha ñuhu Nyoo chihin ra ta ñahri tuhun chihí nyisó ra.

¹⁷ Vatyí ican ihya cuví cha cahán Nyoo tuhun ra:

Yoho cuvún tata sutu tyicuan ri maa,

Tari ra Melquisedec.

¹⁸ Yucuan chaha sacuachiyó Nyoo ley chahnu cuan vatyí ña cuví maa tyinyee chi chi ñáyivi, ta ña chiñuhú.

¹⁹ Vatyí ley cha chahá Nyoo chi ra Moisés, ña sanduvahá maa chi añaima yo. Ta vityin, tyiño nuu ley chahnu cuan, iyó inga tuhun vaha ca cha yihí iñi yo. Ta chihin ihya tuhvá yo chi Nyoo vatyí sanduvahá ra Cristo cuhva coo yo chihin Nyoo.

²⁰⁻²¹ Nyoo tyaa ra cuhva ta tyanahá ra vatyí cuhva ra noo sutu cha cahnu ca chi yo. Soco sutu cha iyó vityin ña tyanahá Nyoo quívi tyisó ra chi ra. Vatyí nuu tutu Nyoo catyí chi tyehe caa:

Sutu Mañi yo, ñin ri tuhun cahan ra, ta ma nasama ra cuhva catyí ra tyehe caa:

“Yoho cuvún Sutu tyicuan ri maa,

tari cuví ra Melquisedec”, catyí Nyoo.

²² Yucuan chaha ra Jesús chahá ra noo tuhun vaha ca chi yo, ta ñima ca tuhun cha xihna ri cuan.

²³ Vatyí cha cuaha xaan ra cacuví sutu, soco chaa chaa ri tuhun chihí chi ra.

²⁴ Soco ra Jesús ñahri tuhun chihí iyó chi ra, ta ña ndihí tuhun cha cuví ra sutu.

²⁵ Yucuan chaha tyicuan ri maa cuví sacacu ra añaima ñu natuhvá chi Nyoo cha cuenda ra, vatyí iyó maa ra tyicuan ri maa, vatyí cacan tahvi ra chi Nyoo cha cuenda ñu.

²⁶ Yucuan chaha ra Jesús cuví sutu cha chiñuhú chi yo. Ta maa ra, ii ra, ñahri cha quiñi caa sacuví ra, ta ni ñahri cuatyí ra. Ta ña cutahán ra chihin ñu iyó cuatyí. Ta sucun ca nyaá ra, ican saha andívi.

²⁷ Ñima tari inga ra cacuví tata sutu cuan, vatyí cuñi chi cha cacahñi ra chi quití ta cuhva cuenda ra chi Nyoo ndi quívi. Ta cha xihna ri, na naa cuatyí maa ra, ta yaha cuan ta naa cuatyí ñáyivi. Soco ra Jesús noo ri chaha, chahá cuenda ra chi ra chi Nyoo na naa cuatyí tandihí yo.

²⁸ Ley Nyoo cha quehen cuenda ra Moisés, tyisó chi chi ra cacuví nuu chi tata sutu, soco ra iyó cuatyí cacuví ra. Soco yahá cuan ta chahá Nyoo noo tuhun chaa, ta ñin ri tuhun cahan ra. Ta tyisó ra chi Sehe ra cha cuví ra Sutu cahnu ca, ta maa ra cuví ra noo ra vaha tyicuan ri maa.

8

Natyihí tahan Nyoo tuhun chaa chihin yo quívi chihí ra Jesús cha cuenda yo

¹ Ta chichi cha tandihí cha cahín nuu tutu ihya, ican ihya cuví cha niñi ca tuhun: Ra cuví tata sutu cahnu chi yo cuví ra noo ra vaha tyicuan ri maa, ta chicunyaá ra nu tyayu chichi gloria chiyo vaha Nyoo.

² Ta cuví ra Sutu noo nu cuví vehe ñuhu cha ndicha vaha nu nyaá Nyoo. Maa Sutu yo Nyoo savahá vehe cuan, ta ñima rayíi.

³ Tandihí ra cacuví tata sutu tyisó Nyoo chi ra, vatyí cuhva cuenda ra ofrenda chi Nyoo ta cahñi ra quití na naa cuatyí ñáyivi chihin niñi ti. Ta yucuan chahá niñi cuñi chi cuhva cuenda tucu ra Jesucristo niñi ra chi Nyoo.

⁴ Tyehe ta siqui ñuhu ñáyivi nyaá ra cuví ra sutu, ni ñima sutu cuví ra tatu tyicuan caa. Vatyí siqui ñuhu ñáyivi, iyó ca ra cacuví sutu cha cachahá cuenda ofrenda chi Nyoo tari cuhva catyí ley cha tyaa ra Moisés.

⁵ Soco ra cacuví sutu siqui ñuhu ñáyivi, sacuví ra tyiño nuu Nyoo soco tari cuhva cuví andívi. Cuví chi noo xiñahñu tyiño sahá ra Cristo. Ta chitó yo vatyí tyicuan caa, vatyí quívi cha cua savahá ra Moisés vehe ñuhu cuan ta cha naha, Nyoo catyí ra chi ra tyehe caa: “Saha vaha cuenda, ta savahun tari cuhva caá cha sañahi chuun

quíví chinyaun nu yucu cuan”, catyí Nyoo chí ra.

⁶ Soco ra Cristo ra cuví sutu cahnu chi yo, vaha ca cuhva sacuví ra, vatyi cha cuenda maa ra, natyihí tahan Nyoo noo tuhun vaha xaan ca chihin yo, vatyi vaha ca cha cucuhva ra chi yo.

⁷ Vatyi tyehe ta cuví cacu añima yo chihin tuhun xihna ri cha natyihí tahan Nyoo chihin yo, ña chiñuhú ca cha natyihí tahan chaa ra tuhun chihin yo cha cu uvi chaha.

⁸ Soco Nyoo nyehe ra vatyi ña vaha maa sacuví ñáyiví cuan, ta cahán ra tuhun ñu nu tutu ra tyehe caa:

Cuchaa chi quíví vatyi cunatyihí tahin tuhun chaa chihin ñáyiví Israel ta ñu Judá, catyí Sutu Mañi yo.

⁹ Ñima tari natyihí tahin tuhun chihin ñáyiví chahnu ñu, quíví tñin ndaha ñu ta tave chí ñu ñuu Egipto.

Vatyi ña sacuví ñu tuhun cha natyihí tahin chihin ñu,

ta yucuan chaha sañe chí ñu, catyí Sutu yo Nyoo.

¹⁰ Tuhun cha cunatyihí tahin chihin ñu ñuu Israel nu cuahan ca chí, tyehe caa cucuvi, catyí Sutu Mañi yo:

Chichi cha chiñi tuñi xiñi ñu, cutyai ley mai, ta chichi añima ñu cutyai.

Tyicuan ta mai cucuvi Nyoo ñu, ta maa ñu cucuvi ñu ñáyiví chii.

¹¹ Tyicuan ta ña niñi ca cha sañahá ñu chí tahan ñu, ni chí yañi ñu, tacuhva vatyi cohon nuu ñu chí yuhu cha cuví Nyoo ñu.

Vatyi tandihí ñu, cucohon nuu ñu chii, nyacua nya ñu luhlu ca ta nyacua nya ñu chahnu ca.

¹² Ta cusahi ticahnu iñi cha quiñi caa cha sacuví ñu.

Ta ma nichon ca maa iñi cuatyí ñu, catyí Sutu Mañi yo.

¹³ Quíví cha cahán Nyoo tuhun cha natyihí chaa ra tuhun chihin yo, cuñí chí catyí vatyi cha sacuchahnu ra cha xihna ri cuan. Ta numi ri cundihi tuhun cha cuví cha chahnu cuan.

9

Nu sañahá chí yoso caa vehe ñuhu cha iyó siqui ñuhu ñáyiví ta vehe ñuhu nu cuví andiví

¹ Quíví natyihí tahan Nyoo tuhun cha xihna ri chihin ñáyiví, chahá ra cuhva chí ñu yoso caa sacahnu ñu chí ra, soco chichi noo vehe ñuhu cha nyaá siqui ñuhu ñáyiví ihya.

² Tyehe caa chino vehe ñuhu cuan: Chata noo cortina nyaá cuarto cha xihna ri nu tayucú cañileru, ta nanyaá mesa nu catuví pan ii. Ta chicunañi cuarto cuan Nu Ii.

³ Chata cortina cu uvi, yucuan cuví nu chicunañi Nu Ii Xaan Ca.

⁴ Ta yucuan nanyaá noo arta xuhun cuaan nu chahmí ra cutu. Ta nanyaá caja, cha natyihí tahan Nyoo tuhun chihin yo, ta iñi xuhun cuaan nicacahnu. Ta chichi cuan ñohó casitu xuhun cuaan cha ñohó maná. Ta ñohó yutun cha natyacú cha chindahá ra Aarón. Ta ñohó tucu yuu cha nyaá ndi uchi mandamientu.

⁵ Ta siqui caja cuan nyicú cha tari caa ángel, ta cuñí chí catyí vatyi nyaá Nyoo yucuan. Ta chihin ndichin ángel cuan cachasí ra nu cuví nu tuhva Nyoo sahá ra ticahnu iñi cuatyí ñáyiví. Cha vityin ña cuví nacatyí ca ndi siqui tuhun ihya.

⁶ Ta tyicuan caa cuví vehe ñuhu cuan. Ta ndiquíví ri caquihví ra cacuví sutu chichi cuarto cha xihna ri nu nañi Nu Ii, tacuhva sacahnu ra chí Nyoo.

⁷ Soco cuarto cu uvi Nu Ii Xaan Ca cuan iyó maa minoo ra cuví nuu chí sutu, ta yucuan ra cuví quihví yucuan, noo chaha cha noo cuiya. Ta cuhva cha quihví ra, cuñí chí cuiso ra niñi quití vatyi cuhva cuenda ra chí Nyoo cha cuenda cuatyí maa ra ta cuatyí ñáyiví.

⁸ Ta cha tyicuan caa sañahá Tatyí Ii Nyoo chí yo vatyi, ta cuví ca chaa yo nuu Nyoo vatyi ni nyaá ca cuarto cha xihna ri cuan.

⁹ Tandihí maa ihya cuví chí tari noo xiñahñu ri cha cuenda tuhun chaa cha chacun Nyoo vityin: vatyi noo cha chahá cuenda ñu chí Nyoo ña tyiñyee chí chí ñu na caca vaha iñi ñu.

¹⁰ Vatyi tandihí cuhva sacuví ra cacuví sutu cuan cahán chí maa ri cuenda ñáá cha cuví cachi ñáyiví, ta ñáá cha cuví coho ñu, ta yoso caa cundundi coño ñuhu ri ñu. Ta catuví cuhva cuan, nyatu chí nya quíví cacun Nyoo inga cuhva vaha ca.

¹¹ Soco vityin cha yaha quichí ra Cristo

ta maa ra cuví tata sutu cahnu cha cuenda tuhun vaha ca cha chacun Nyoo. Quihví ra chichi vehe ñuhu vaha ca, ta ndí ca, vatyí maa ra cuví sutu. Ta ñima rayí savahá vehe ñuhu cuan o cuñí chi catyí, ñima vehe ñuhu ñuhu ñayiví ihya cuví.

¹² Ra Cristo quihví ra vehe ñuhu nu cuví gloria Nu Ii Xaan Ca. Soco ñima ca cha cuhva cuenda ra ñíni mbee luhlu, o becerro, soco ñíni maa ra chahá cuenda ra. Ta tyicuan caa quihví ra noo ri chaha nu ndíhi tuhun, ta tyicuan caa ta cuví sacacu ra chi yo tyicuan ri maa.

¹³ Niñi toro, ta ñíni ndixihyu, ta ñiyaa becerro cha cachahmí ra nu arta, tuhva ra catyicu ra chata ñu ca iyó cuatyí, ta coño ñuhu ri ñu sandundí chi cuan nuu Nyoo.

¹⁴ Ta tatu tyicuan caa, ¡Ñana cha cahnu ca tunyee iñi iyó chi ñíni ra Cristo! Vatyí tyinyee Tatyí Ii chi ra ta chahá cuenda ra chi ra chi Nyoo chihin cha ñahri cuatyí ra. Ta ñíni ra sandachí chi cha ña vaha cha caá aña yoyacuhva ma cuita ca iñi yo ley cha chahá tuhun chihi chi yo, ta tyicuan caa ta cuví sacuvi yo tyiño nuu ra cuví Nyoo nyitó.

¹⁵ Yucuan chaha ra Jesucristo cuví ra cha cahán chaha yo cha cuenda tuhun chaa cha natyihí tahan Nyoo chihin yo. Ta cha cuenda cha chihí ra, iyó ticahnu iñi cuatyí cha sacuvi yo quiví chinyaca ñaha tuhun cha xihna ri cuan chi yo. Ta yoó, ñu nacana Nyoo chi cuví yo, cuví naquehen cuenda yo noo cha ma ndíhi ca maa, cha catyí maa ra tyi cuhva ra chi yo.

¹⁶ Vatyí tatu iyó noo tutu cha sandoo noo ra chihí, ta catyí tutu cuan ñáá ndíhi cha cuñíhi ñáyiví chi ra tatu chihí ra; cuñí chi cha coto vaha ra cuví tyiño tatu ndicha cha chihí ra cha sandoo tutu cuan; tyicuan ta cuví sacaca ra tyiño cuan ta nasacha ra cha tahán chi chi ñu cuan.

¹⁷ Vatyí cha niri ca cha iyó ra cha sandoo tutu cuan, ma cuví cundaa tyiño cha quehen cuenda ñu cha tahán chi chi ñu, soco nya cuví ra, tyicuan ta cuví quehen cuenda ñu.

¹⁸ Yucuan chaha chihí quiti ta chatí ñíni ti quiví natyihí tahan Nyoo tuhun cha xihna ri cuan chihin yo.

¹⁹ Quiví cuan, ra Moisés sacoto ra tandíhi

ley Nyoo chi tandíhi ñáyiví. Yaha cuan ta quehen ra noo sahna cuaha cha chinq chihin ixi mbee ta chihin noo soco yutun cha nañí hisopo, satyí ra nu ñíni becerro ta nu ñíni ndixihyu luhlu, nasaca ra chihin ndutya, ta tyicu ra chata libru ley Nyoo ta chata tandíhi ñáyiví ñandíhi.

²⁰ Tyicuan ta quichaha catyí ra chi ñu: “Ican ihya cuví ñíni cha cuví cha ndaa vatyí natyihí tahan Nyoo tuhun chihin ndo”, catyí ra.

²¹ Ta suri tyicu tucu ra Moisés ñíni nu cuví vehe ñuhu cuan, ta siqui tandíhi cha cachotyíño ra yucuan nu casacahnú ra chi Nyoo.

²² Tyicuan caa sacuvi ra vatyí catyí ley Nyoo tyi tandíhi ta chihin ñíni, cuñí chi ndundí nuu Nyoo. Ta catyí tucu chi vatyí ma saha Nyoo ticahnu iñi cuatyí tatu ma cati ñíni.

Niñi ra Cristo, ican cuan tinyaa cuatyí yo

²³ Ta yucuan chaha cuñí chi cha sacuvi tata sutu tyicuan caa, vatyí ndundí tandíhi cuan, vatyí cuví chi noo xiñahñu cha iyó ityi andívi. Soco tandíhi cha cuenda ityi andívi, cuñí chi noo ñíni vaha ca cha cuhva cuenda yo, ta ñima ca tari ñíni quiti cuan. Cuñí chi ñíni ra Cristo.

²⁴ Vatyí ra Cristo ña quihví ra chichi noo vehe ñuhu cha savahá ñáyiví cha cuví xiñahñu ri. Soco quihví ra chichi vehe ñuhu cha ndicha vaha cha cuví gloria. Ta vityin cahán ra chaha yo nuu Nyoo.

²⁵ Ra cuví nuu chi sutu cuenda ñu Israel quihví ra Nu Ii Xaan Ca cuan tahan cuiya vatyí cuhva cuenda ra ñíni cha ñima ñíni ra cuví. Soco ra Cristo, ña cuaha chaha cuñí chi cuhva cuenda ra chi ra.

²⁶ Vatyí tyehe ta tyicuan caa, cuaha chaha cuñí chi cha nyehe ra tindoho ta cúvi ra nyata chinq ñuhu ñayiví ta nya vityin. Soco vityin cha cua cuyatyin cundíhi tuhun ñayiví, noo ri chaha quichí ra Cristo, ta chahá cuenda ra chi maa ra tacuhva vatyí cuví tinyaa ra cuatyí yo.

²⁷ Noo ri chaha, cuví yo ta yaha cuan ta cucutuñi chi yo.

²⁸ Ta tyicuan caa tucu ra Cristo, noo ri chaha, chahá cuenda ra chi ra tacuhva tinyaa ra cuatyí cuaha xaan ñáyiví. Yaha cuan ta cuquichi ra cha cu uvi chaha, ñima

ca cha quichi tinyaa ra cuatyí, soco cha quichi sacacu ra chí ñu cha nyatú chi ra.

10

¹ Vatyí ley Nyoo cha tyaa ra Moisés, cuví chi tari noo xiñahñu ri, cha cuenda cha vaha ca cha cuquichi. Soco ñima maa cha ndicha vaha cuví. Vatyí ley cuan, ma cuví maa sanduvaha chi chí ñu nanducú chi Nyoo. Vatyí tahan cuiya ri chahá cuenda ra cuví nuu chí tata sutu cuenda ley chahnu ñiñi quití. Soco ma cuví cacu aña yó chihin cuan.

² Vatyí tyehe ta cuví sanduvaha ley cuan chí ñu, cundihi tuhun cha chahá cuenda ra ñiñi ndicuiya ri. Vatyí tatu cha ndundi ñu noo chaha cha cuenda tandihi maa, ma caca ca xiñi ñu vatyí iyó cuatyí ñu ta ña chiñuhú ca cha cuhva cuenda ra inga chaha.

³ Soco tahan cuiya ri chahá cuenda ra ñiñi, ta ican cuan sanicohón chí ñi ñu vatyí iyó cuatyí ñu.

⁴ Vatyí ñiñi toro ta ñiñi ndixihyu, ma cuví maa tinyaa chí cuatyí yo.

⁵ Yucuan chaha ra Cristo, quivi cuaquichi ra siqui ñuhu ñayivi ihya, catyí ra chí Nyoo tyehe caa:

Ña cuñún cha cahñi ñayivi quití ta cuhva cuenda ñu chuun, yucuan chaha savahun noo coño ñuhu chii. (Vatyí tyicuan caa ta cuví cuhva cuende chii chuun.)

⁶ Ta vatyí ña tahán iñun cha cahmi ñu quití ta cuhva cuenda ñu chuun cha cuenda cha tinyaa cuatyí ñu.

⁷ Catyí yuhu: “Ma yuhu, vachi ihya vatyí sacuvi cuhva cuñún, Nyoo Suti, tari cuhva cahán chí tuhin nu libru ley maun”, catyí ra Jesucristo.

⁸ Cha xihna ri, catyí ra Jesucristo vatyí Nyoo, ña cuñí ra cha cuhva cuenda ñu chí quití chí ra. Ni cha cahmi ñu quití cha cuenda cha tinyaa cuatyí ñu, ña cuñí Nyoo, catyí ra. Vasi maa ri tuhun cha catyí ley chahnu vatyí sacuví yo cuví, soco ña tahán iñi Nyoo, catyí ra.

⁹ Ta yahá cuan ta catyí tucu ra: “Ma yuhu vachi ihya, vatyí sacuvi cuhva cuñún, Nyoo Suti.” O cuñí chí catyí, sacuachiyó Nyoo

cuhva chahnu cuan, ta nacuvi chí inga cuhva chaa ihya.

¹⁰ Nyoo sandundi ra chí yo vatyí ra Jesucristo sacuvi ra cuhva cuñi Sutu ra, ta chahá cuenda ra coño ñuhu ra. Noo ri chaha chihí ra ta ndihí tyiño sahá ra.

¹¹ Tandihí ra cacuví tata sutu ñuu Israel, ndi quivi sacuvi ra tyiño nuu Nyoo, ta tyicuan ri chahá cuenda ra suri maa cha tuhvá maa ra chahá cuenda chí Nyoo, vasi ña cuví tinyaa chí cuatyí yo.

¹² Soco ra Jesucristo, noo ri chaha chahá cuenda ra chí ra chí Nyoo cha cuenda cuatyí yo. Tyicuan ta chicunyaá ra tyayu gloria chiyo ndaha vaha Nyoo.

¹³ Ta yucuan nyatú ra nyacua nya cacun Nyoo chí ra xaan iñi chí ra chaha ra.

¹⁴ Vatyí chihin noo ri chaha cha chihí ra Cristo ta cuví sanduvaha ra aña ñayivi cuenda Nyoo, tyicuan ri maa.

¹⁵ Ta suri tyicuan caa catyí tucu Tatyí Ii Nyoo chí yo. Vatyí cha xihna ri catyí ra chí yo nu tutu tuhun Nyoo tyehe caa:

¹⁶ Tuhun cha cunatyihí tahin chihin ñu quivi cuan, tyehe caa cucuvi, catyí Sutu Mañi yo:

Cutyai ley mai chichi aña ñu, ta cutyai chichi cha chí ñi tuñi xiñi ñu, catyí Nyoo.

¹⁷ Ta yahá cuan ta catyí tucu ra:

Ma nicohon ca maa iñi cuatyí ñu, niri cha quiñi caa cha chinyacuvi ñu, catyí Sutu Mañi yo.

¹⁸ Ta cha yahá sahá Nyoo ticahnu iñi cuatyí, ña cuñí ca chí cha cahñi ñayivi chí quití, ta cuhva cuenda ñu chí Nyoo cha cuenda cuatyí ñu.

Cuñí chí nanducu yo chí Nyoo

¹⁹ Yucuan chaha yañi, cuví quihvi maa yo Nu Ii Xaan Ca cuan nu nyaá Nyoo, cha cuenda vatyí cha chatí ñiñi ra Jesucristo ta tinyaa ra cuatyí yo.

²⁰ Cha nuña ra Cristo noo ityi chaa, ityi cuhun yo nu conyito aña yo. Vatyí maa maa cuhva cha chihí ra ta ndatá cortina cha chasí nu chinyaá Nyoo. Cha tahnya cortina, ican cuví cha chihí ra, tacuhva nuña ityi quihvi yo ta chaa yo nu nyaá Nyoo.

21 Ra Jesús cuví sutu cha nyacá ñaha nu cuví vehe Nyoo andívi.

22 Yucuan chaha cuñí chi nanducu yo chi Nyoo chihin noo cha ndicha ta chihin cha ñi iñi yo chinó iñi yo chi ra, vatyí maa ra sandundi ra añaima yo, tacuhva ma quíhi ca iñi yo vatyí iyó cuatyí yo, vatyí tarí cha nacatya ra coño ñuhu yo chihin ndutya cuii, na ndu ñi yo nu Nyoo.

23 Na cuní ca iñi yo chino iñi yo chi Nyoo ta ma ndu uvi iñi yo vatyí Nyoo cuhva ra cha catyí ra vatyí cuhva ra chi yo.

24 Ta cuñí chi nanducu yo cuhva tyinyee yo chi tahan yo, na cuñi ca ñu chi tahan ñu ta sacuvi ca ñu cha vaha.

25 Ña tahán chi quehen yo cuhva caá ñu cha sandíhi cha quíchi nu ndu ñn ri yo, soco cuñí chi cha sanduní yo iñi noo noo tahan yo. Ta yaha ca cuhva cuñí chi tyinyee yo chi tahan yo vityin cha nyehé yo vatyí Sutu Mañi yo cha cuñí chaa quívi quíchi ra ta cucutuñi chi tandíhi ñáyívi.

26 Vatyí tatu cha yaha chicohon nuu yo cha ndicha, ta ña quichahá yo ta tyicuan ri sacuví ca yo cuatyí, ñahri ca cuhva coo ticahnu iñi cuatyí yo.

27 Ta cutachi tuñi Nyoo chi yo. Ta cutyíhi ra chi yo nu cucayu ñáyívi cha xaan iñi chi ra, ta cundíhi tuhun ñu.

28 Tatu noo ñáyívi Israel ña quichaha ñu cuhva catyí ley ra Moisés, ta chiyo uvi o uñi testigu, cúvi ñu cuan cha cuenda cuatyí ñu, ta yori cundahvi cuñi nyehe chi ñu.

29 Ta nyaca cuví ñu cha ña quichaha ca chi Sehe Nyoo ta sahá ñu tyi ñiñi ra cha sanduvaha añaima ñu cha ñima ri tuhun cuví. Ta chihin ñiñi cuan natyíhi tahan Nyoo tuhun chihin yo. Soco cahán ña vaha ñu síqui Tatyí Ii Nyoo cha chahá tumañi iñi chi yo. Yaha ca cuhva cutachi tuñi Nyoo chi ñu cuan.

30 Vatyí chitó yo vatyí Sutu Mañi yo, ican ra catyí ra tyehe caa: “Yuhu tahán chi tachi tuñi chi ñáyívi, yuhu catyí cha cuví chi ñu.” Ta catyí tucu ra vatyí cutuñi chi ñu nuu ra.

31 Ndicha cha iyó Nyoo, ta yucuan chaha tahán chi cuyuhvi yo chi ra, coto tachi tuñi ra chi yo cha cuenda cuatyí yo.

32 Soco ma naa iñi ndo quívi natíin cuenda ndo cha ndichin Nyoo chichi añaima

ndo, vatyí quívi cuan cunyeé xaan iñi ndo cha nyehe ndo tindocho cha cuenda ra.

33 Yíhi nyoho cahán ñáyívi chi ndo, ta sanyehe ñu tindocho chi ndo nu tuvi. Ta yíhi nyoho uhvi xaan cuví chi ndo cha nyehe ndo cha cuví chi tahan ndo cha tyicuan caa, ta cunyeé xaan ndo.

34 Ta cundahvi iñi ndo chi ñu ñoho vehe caa, ta chihin cha síi cuñí ndo cunyeé ndo quívi tinyaa ñu cha iyó chi ndo, vatyí chitó ndo vatyí andívi iyó ca cha vaha ca cha cuenda ndo, ta ña ndíhi maa cuan.

35 Yucuan chaha ma sandíhi ndo cha quíhi iñi ndo chi ra Cristo, vatyí nu cuahan ca chi ta cuñi ndo cha vaha ca vatyí chinó iñi ndo.

36 Cuñí chi cha coo cha cama iñi ndo tacuhva cuví sacuvi ndo cuhva cuñí Nyoo, ta tyicuan caa ta naquehen ndo cha catyí ra tyi cuhva ra.

37 Vatyí nu tutu Nyoo catyí chi tyehe caa: Ña naha ca ta cuquichi ra cha tahán chi quíchi, ta ma cucuee ca ra.

38 Ta catyí Sutu Mañi yo tyehe caa: “Ñu cha sanduvahí añaima, chihin cha chinó ri iñi ñu chi yuhu, ta conyito añaima ñu.

Soco tatu cunuhu chata ñu, ma cusí cuñi yuhu chihin ñu”, catyí Nyoo.

39 Soco maa yo ña sacuví yo tari sacuví ñu cuanaa añaima, vatyí ñu chinó iñi chi Nyoo cuví yo, ta tyicuan caa cucacu añaima yo.

11

Cuhva cuñí chi cha chinó iñi yo chi Nyoo

1 Cha chinó iñi yo chi Nyoo ican cuví cha chitó vaha yo tyi cuñi yo cha nyatú yo, ta chitó vaha yo vatyí noo cha ndicha vaha cha ña nyehé yo vityin, cuñi yo vatyí chinó iñi yo chi Nyoo.

2 Ñáyívi chiyo ta cha naha, chinó iñi ñu chi Nyoo, ta yucuan chaha quitá vaha ñu nuu ra.

3 Cha cuenda cha chinó iñi yo chi Nyoo, ta chitó yo vatyí savaha ra ñuhu ñáyívi chihin tuhun cahán ra. Ta chitó yo vatyí tandíhi cha nyehé yo vityin, chinó chi ta cha naha chihin cha ña tuhva yo nyehé.

4 Cha cuenda cha chinó iñi ra Abel chi Nyoo, ta chaha cuenda ra noo cha chaha

ra chi Nyoo. Ta vaha ca cha chaha ra ta ñima ca cha chaha ra Caín, yañi ra. Ta yucuan chaha natiin cuenda Nyoo chi ra tari noo ra vaha, ta natiin cuenda ra cha chaha ra. Yucuan chaha vasi cha chihj ra Abel, soco tari quivi cahán ca ra tuhun chihin yo vityin, yoso caa tahán chi chino iñi yo chi Nyoo.

5 Cha cuenda cha chinq xaan iñi ra Enoc chi Nyoo, ta cuanuhj ra chihin Nyoo chihin cha ña chihj ra. Ta ña nañihj ca ñu chi ra, vatyí naquehen Nyoo chi ra. Ta nu tutu Nyoo, catyí chi vatyí cha ni cumañi ca naquehen Nyoo chi ra Enoc, sacuví ra maa ri maa cuhva tahán iñi Nyoo, yucuan chaha naquehen ra chi ra.

6 Soco ma cuví sacuvi yo cha tahán iñi Nyoo tatu ña chinó iñi yo chi ra. Vatyí tatu cuñí yo nanducu yo chi ra, cuñí chi cha chinó iñi yo tyi iyó ra. Ta cuñí tucu chi chinó iñi yo vatyí cucuhva ra cha vaha chi ñu nanducú chi ra.

7 Cha cuenda cha chinq iñi ra Noé chi Nyoo, ta quichaha ra tuhun cahan Nyoo, cha catyí Nyoo chi ra noo cha cucuvi ityí nuu ca. Ta vasi tañaha ca nyehe ra soco cha cuenda cha chinó iñi ra chi Nyoo, ta savaha ra barcu cuan ta sacacu ra chi ñáyivi chi ra. Ta cha cuenda cha chinq iñi ra chi Nyoo, sandoj ra cuatyí ñu siqui ñu cha ña quichahá chi Nyoo, na tachi tuñi ra chi ñu. Ta cha cuenda cha chinq iñi ra Noé chi Nyoo cuvaha ra nuu ra.

8 Ta cha cuenda cha chinq iñi ra Abraham chi Nyoo, ta quichaha ra chi ra quivi cana ra chi ra. Yucuan chaha quita ra ñuu ra ta cuahan ra nu cucuhva Nyoo ñuhú cha cundoo chi ra. Quita ra ñuu ra chihin cha ña chitó ra nya cuahan ra.

9 Cha cuenda cha chinó iñi ra Abraham, yucuan chaha chiyo ra nu ñuhú cha ta cuhva ca Nyoo chi ra. Chiyo ra noo vehe sahma ri, ta suri tyicuan caa tucu ra Isaac, sehe ra, ta ra Jacob, sehe ñañi ra. Vatyí suri catyí tucu Nyoo chi ñinduvi ra cuan tyi cucuhva ra ñuhú cuan chi ra.

10 Vatyí ra Abraham nyatú maa ra noo ñuu vaha ca cha cucuhva Nyoo chi ra, ta maa Nyoo chacun cuhva ñuu cuan ta maa ra savaha ra, ta chicha cimientu tyihi ra chaha.

11 Ta suri chinq iñi tucu cu Sara cha catyí Nyoo chi ña cha cucoo sehe ña. Ta vasi cha chahnu xaan ña, soco chaha Nyoo fuerza ra chi ña, ta chicoj sehe ña. Tyicuan caa cuví vatyí chinq iñi cu Sara cha catyí Nyoo chi ña.

12 Yucuan chaha vasi cha nyaña quivi cha cúvi ra Abraham, soco chicoj sehe ra. Ta yaha cuan cuaha xaan ñáyivi cacu cha cuví ñu tata ra. Tari cha cuaha tiño andivi, ta tari cha cuaha niyiti yuhu tyañuhu, vatyí ña cuví nacakvi yo.

13 Tandihj ñu cuan cachihj ñu cha ni cumañi ca naquehen cuenda ñu cha catyí Nyoo tyi cuhva ra chi ñu. Soco vasi ta naquehen cuenda ca ñu ta chihj ñu soco nyehe cachi vaha ñu chihin cha chinó iñi ñu. Ta sñ xaan cuñí ñu. Ta chihin cuan cutuñí iñi ñu ta cahán ñu tuhun vatyí noo ñu yahá ri siqui ñuhu ñáyivi ihya cuví ñu.

14 Vatyí ñu cacahán tyehe caa, cuñí chi catyí vatyí ni nanducú ñu noo nu coo ñu.

15 Tyehe ta chicá ca xiñi ñu ñuu nu quita ñu, totyehe cuví cunuhu ñu nyicuan.

16 Soco vatyí cuñí ñu noo ñuu vaha ca, o cuñí chi catyí nya gloria, yucuan chaha Nyoo ña cucahan nuu ra cha cuví ra Nyoo ñu. Vatyí cumí ra noo ñuu nu cuví coo ñu.

17 Ta cha cuenda cha chinq iñi ra Abraham chi Nyoo, yucuan cuenda quichaha ra nu cahan Nyoo ta tyaaj ra cuhva cha cahñi ra chi sehe mañi ra ra Isaac, quivi nducu nyehe Nyoo chi ra tu ndicha cha chinó iñi ra, vasi suri maa Nyoo catyí ra

18 vatyí cuaha xaan ñáyivi cucuvi tata ra chihin ra Isaac cuan.

19 Soco ña yuhvi ra Abraham cuacuhva cuenda ra sehe ra chi Nyoo, vatyí chitó ra vatyí Nyoo, iyó tunyee iñi chi ra nyacua nya cha sanandotó ra ndiyi. Ta tari quivi sanandotó Nyoo chi sehe ra, vatyí cha nyaá cha cua cahñi ra chi ra, ta nacuhva Nyoo chi sehe ra chi ra inga chaha.

20 Ta ra Isaac chinq tucu iñi ra chi Nyoo. Ta yucuan chaha catyí ra vatyí sehe ra, ra Jacob ta ra Esaú, cuñihi ra cha vaha nu cuahan ca chi.

21 Ta ra Jacob chinq iñi ra chi Nyoo, cuhva cha cua cúvi ra. Ta catyí ra vatyí tahan tahan sehe ñañi ra, sehe ra José,

cuñihi ra cha vaha. Ta sacahn̄u ra chi Nyoo nu nanyaá ra chihin yutun cha tuv̄i ra.

²² Ta ra José ñandih̄i, chinq̄o iñi ra chi Nyoo, ta catȳi ra, cuhva cha cua cúvi ra, vatyi ñu Israel, ñáyiv̄i chi ra, cu quita coyo ñu ñuu Egipto cuan nu cuahan ca chi. Ta sandoq̄o ra tyiño chi ñu, vatyi na naquehen ñu yiqui ra quiv̄i quita ñu ñuu cuan.

²³ Cha cuenda cha chinq̄o iñi sutu ra Moisés ta sih̄i ra chi Nyoo, yucuan chaha quiv̄i cacu ra, nyehe ñu tyi noo cha lee tyaqūi xaan cuv̄i ra. Ta yih̄i iñi ñu cha cusacacu Nyoo chi ra ta ma cúvi ra, vasi catȳi rey cuan vatyi cúvi nd̄i ra cuatyaa. Ta ña yuhv̄i ñu ta tixehe ñu chi cue uñi yoo.

²⁴ Ta ra Moisés tucu, chinq̄o iñi ra chi Nyoo. Ta quiv̄i cha chahn̄u ra, ña cuñi ca ra cha cuvi sih̄i ra chi ñaha sehe rey ñuu Egipto cuan.

²⁵ Ta ni ña cuñi ra ndoo ra ñuu Egipto cuan vatyi cus̄i iñi ra o cunyacuvi ra cha quiñi caa. Vatyi chitó ra tyi tuhun ñn yaha ri cuv̄i cuan. Soco vaha taxin ca cuñi ra nyehe ra t̄ndoho chihin ñáyiv̄i cuenda Nyoo.

²⁶ Ra Moisés, vaha ca cuñi ra cha nyehe ra t̄cahan nuu cuenda ra Cristo vatyi cahnu ca cha tyaȳi cuv̄i cuan chi maa ra ta ñima ca tandih̄i cha tyaȳi cha iyó ñuu Egipto. Vatyi chitó ra tyi cua cuhva Nyoo cha vaha chi ra.

²⁷ Ta cha cuenda cha chinq̄o iñi ra Moisés chi Nyoo, ta quita ra ñuu Egipto, ta ña yuhv̄i ra cha cuxaán rey cuan. Ta sanyee xaan ra iñi ra. Tari cha vatyi nyehe ra chi Nyoo cha ña nyehé yo.

²⁸ Cha cuenda cha chinq̄o iñi ra Moisés chi Nyoo ta sanducahn̄u ra vico cha cahñi ñu noo mbee luhlu, ta tach̄i ra nacahyu ñu niñi ti yuvehe ñu, tacuhva vatyi ma cahñi ángel Nyoo chi ni noo sehe nuu ñu Israel.

²⁹ Ta cha cuenda cha chinq̄o iñi ñu Israel chi Nyoo ta yah̄a sava ñu Tyañuhu Cuaha, tari cha yah̄a ñu noo ñuhú ityi. Ta cuhva cha cacuñi tucu ra Egipto cayaha ra, ña cuv̄i yaha ra vatyi nacasi Nyoo tyañuhu cuan siqui ra ta cachih̄i ra chichi ndutya cuan.

³⁰ Ta cha cuenda cha chinq̄o iñi ñu Israel chi Nyoo, ta chico ñu ucha tahan chaha chata ñuu Jericó, ta tandih̄i cuii maa nu sama chata ñuu cuan canacoyo.

³¹ Ta cha cuenda cha chinq̄o iñi cu Rahab, ñaha cata iñi cuan, chi Nyoo, ta ña chih̄i ña ñn ri chihin ñu ñuu ña, ñu ña quichah̄a chi Nyoo, vatyi maa ña, tyinyee vaha ña chi ra Israel, ra chahan coyo chinyehe tatu cuv̄i chasaha ra tinyaa ra ñuu ña chi ra nyacá ñaha ñuu cuan.

³² ¿Ñáá ca cha cuv̄i catyi vityin? Cuaha xaan cuhva cucuñi chi chii tatu cahín tuhun ra Gedeón, ra Barac, tuhun ra Sansón, ra Jefté, ta tuhun ra David, ta ra Samuel ta tuhun ra cacuv̄i profeta Nyoo ta cha naha.

³³ Cha cuenda cha cachinq̄o iñi ra chi Nyoo, ta yih̄i ra saha ganaa ra chi inga ñuu nahnu. Ta yih̄i ra vaha xaan chinyaca ñaha ra ñáyiv̄i cuenda Nyoo. Yih̄i ra ñih̄i ra cha catȳi Nyoo tyi cuhva ra chi ra. Yih̄i ra chasi ra yuhu ndicaha.

³⁴ Yih̄i ra ña cayu ra chihin ñuh̄u chichi horno nu catyih̄i ra chi ra. Yih̄i ra cacu ra cha cahñi ñáyiv̄i chi ra chihin mityi. Yih̄i ra cha ñahri fuerza chi ra, soco candunyeer ra, ta chiyo xaan fuerza chi ra chichi cuatyi cuan, ta cuv̄i chasaha ra chi sindaro cuenda ñu xaan iñi chi ra.

³⁵ Ta chicoq̄o suhva ñusih̄i, nandoto ñáyiv̄i chi ñu.

Ta inga ñáyiv̄i chih̄i ñu chihin cha cuaha xaan t̄ndoho sanyehe ñáyiv̄i chi ñu, soco ña sandoq̄o ñu chi Nyoo vasi chih̄i ñu cha catȳi ra, vatyi chitó ñu, vatyi tatu ma sandih̄i ñu cha chinó iñi ñu chi Nyoo, cunandoto ñu ta cucoo ñu noo ñáyiv̄i vaha xaan ca.

³⁶ Ta inga ñu nyehe ñu t̄ndoho cha cahán nyaa ñáyiv̄i chi ñu ta cañi ñu chi ñu. Ta inga ñu chinuhñi ñu chihin cadena ta cuahan ñu vehe caa.

³⁷ Yih̄i ñu chihin yuu chahñi ñáyiv̄i chi ñu. Yih̄i ñu chahnya ra chihin cierra chi ñu. Yih̄i ñu nducu nyehe ñáyiv̄i chi ñu. Yih̄i ñu chih̄i ñu cha chahñi ñáyiv̄i chi ñu chihin mityi. Yih̄i ñu chica noo ñu ta ñahri sahna ñu. Chihin ñi mbee ri ta ñi ndixihyu ñihno ñu. Ndahvi xaan ñu. Ta cuihya xaan cuñi ñu. Ta sanyehe ñáyiv̄i cha ña ñohó nuu Nyoo t̄ndoho chi ñu.

³⁸ Ta ñáyiv̄i ña ñohó nuu Nyoo ña nañá ñu cha cu ñn ri ñu chihin ñáyiv̄i ndahvi cuan vatyi vaha ñu nuu Nyoo. Chica noo

ndahvi ñu ityi chiqui ndi, ityi yucu. Chiyō ñu chichi yavi yuu ta yavi ñuhú.

³⁹ Tandihí maa ñu vasi cañan vaha Nyoo siqui ñu cha cuenda cha chinó iñi ñu chí ra, soco ña ñihí ñu cha catyí Nyoo cha cuhva ra chí ñu.

⁴⁰ Vatyí natyaa ra cuhva, cha cuhva ra nonga cha vaha ca chí ñu vatyí natyihí ra cuenda chí yo ta ñin ri cutahan chí chí yo chihin ñu cuan.

12

ñin ri chí ra Jesús tahán chí cuita iñi yo

¹ Tandihí ñáyiví cuan quita vaha ñu vatyí chino iñi ñu chí Nyoo. Ta vityin chihin cuan sanduní ñu iñi yo ta nyatú ñu nyehe ñu tatu quita vaha yo. Yucuan chaha cuñí chí cha sacuachiyo xiin yo tandihí cha sayangá chí yo, tandihí cuatyí cha nyicón chí yo. Ta chihin cha cama iñi yo ta cuhun yo ityi nuu ca chihin Nyoo.

² ñin ri chí ra Jesús quihí nuu yo, vatyí maa ra chaha ra cha chinó xaan iñi yo chí Nyoo, ta chaha ra tandihí cuhva tahán chí chino iñi yo. Ta cha ni cumañi ca cúvi ra, chitó ra vatyí sñi xaan cucuvi chí ra cha yaha cúvi ra. Yucuan chaha, chaha ra cha cahñi ñáyiví chí ra. Ña quichaha ra tichan nuu cha cúvi ra tari chíhi noo ra iyó cuatyí, ta vityin nyaá ra chiyo vaha Nyoo gloria.

³ Saha ndo cuenda cuhva chiyo ra Jesús, vatyí nyehe xaan ra tindoho saha ñu iyó cuatyí. Yucuan chaha ma cutatu ndo, ta ma ndu uvi iñi ndo cha nyicón ndo chí ra.

⁴ Vatyí nyoho ta chaa ca ndo nyehe ndo tindoho cha cuenda cha cañi tahan ndo chihin cha quiñi caa, tari nyehe ra Cristo tindoho ta chíhi ra.

⁵ ¿Atu cha naa iñi ndo tuhun chaha Nyoo chí ndo tari cha sehe ra chí ndo? Catyí ra tyehe caa nu tutu ra:

Sehe luhli, ma cuxaun tatu saquehen ityi chuun.

Ma nducuihya iñun tatu cahín chuun.

⁶ Vatyí ra saquehén ityi yuhu chí, chaha cha cuñí chí ra, vatyí sehi cuví chí ra, catyí Nyoo.

⁷ Cunyee ndo ta cutuhva ndo tatu saquehen ityi ra chí ndo, vatyí Nyoo, sehe vaha ra saha ra chí ndo. Vatyí tandihí ra iyó sehe, saquehén ityi ra chí sehe ra.

⁸ Vatyí tatu ña saquehén ityi Nyoo chí ndo, ñima sehe vaha ra cuví chí ndo, soco tatu saquehén ityi ra chí ndo, sehe vaha ra cuví chí ndo.

⁹ Ta sñin ri, ta nyihi yo, sutu yo ihya ñáyiví saquehen ityi ra chí yo, ta saha yo ñáyiví chí ra. Ta nyaca cuví Nyoo, tahán tucu chí saha yo ñáyiví chí Sutu yo Nyoo, tyicuan ta coo añaima yo tyicuan ri maa.

¹⁰ Sutu yo cuenda coño ñuhu yo, saquehen ityi ra chí yo suhva ri quiví, yoso cuhva cha cuñi chí. Soco Nyoo saquehén ityi ra chí yo cha cuenda noo cha vaha ca chí yo, vatyí sa ii ra chí yo tari maa ra, cha ii ra.

¹¹ Ndicha vatyí ña tahán iñi yo cha ndohó yo vatyí uhvi chí yo. Soco chihin cha ndoho yo, cutuhva yo coo yo noo ñáyiví vaha.

Yica xaan tatu ma quichaha yo cha catyí Nyoo chí yo

¹² Yucuan chaha sandunyee ndo iñi ndo, ta ma quihí iñi ndo cha ma cuví cunyicon ndo chí ra Cristo.

¹³ Ta nanducu ndo cuhva coo vaha ndo chihin Nyoo, nanducu ndo cuhva caca ndoo ndo chihin ra. Tyicuan ta maa ra cuhva ra fuerza chí ndo ta nduyaha ndo nuu Nyoo ta ma cucuihya ca cuñi ndo.

¹⁴ Saniñi ndo coo vaha ndo chihin tandihí ñáyiví. Ta coo ndo noo ñáyiví cachi. Vatyí tatu ña cachi iyó yo, chihin Sutu Mañi yo Nyoo, ma nyehe yo chí ra.

¹⁵ Saha ndo cuenda chí ndo coto yihí ndo, ma ñihí ndo tumañi iñi cha iyó chí ra. Ta saha ndo cuenda chí ndo, coto cuví ndo tari noo yutun cha chahá chíti uva, ta coto quehen ñáyiví cha caá ndo ta tiví ñu nuu Nyoo.

¹⁶ Ta ni noo ndo ta maa coo ndo chihin ñáyiví tatu ñima ñasihí ndo o yñi ndo cuví. Ni ma cuñi ndo vatyí tuhun Nyoo noo cha ñima ri tuhun cuví, vatyí tyicuan caa sacuví ra Esaú, vatyí chihin noo nyayu ri, xico ra tandihí cha tahán chí chí ra cha cuví ra sehe nuu sutu ra.

¹⁷ Ta chitó ndo vatyí cha yaha cuan ta cuñi ra Esaú cha nasoco sutu ra chí ra, soco ña cuví ca. Ta vasi chacu vavaha ra, soco ña ñihí ca ra cuhva nasama ra cuhva cha chinyacuví ra.

¹⁸ Ta maa ndo chaa ndo nuu nyaá Nyoo soco ñima tari chaa ñu Israel cuan quiví

chahan ñu noo yucu nu cuví yucu Sinaí. Ta yucuan nyehe ñu cayu ñuhu, ta nduñaã iñi, ta ñihi xaan tatyí.

¹⁹ Ta chiñi ñu nativi cutu cuihya ta cahan Nyoo chihin ñu. Ta ñu cha chiñi tuhun cahan ra, chacu ndahvi ñu tacuhva ma cahan ca ra chihin ñu, vatyí yuhvi xaan ñu

²⁰ cha cuenda vatyí ña cunyeë iñi ñu tuhun cha chaha ra chi ñu. Vatyí catyí ra tyehe caa: “Tatu quihvi noo ñáyivi, cahñi ndo chi ñu chihin yuu o chihin lanza, cuví ri ñu ñáyivi o quití”, catyí Nyoo chi ñu.

²¹ Yuhvi xaan ñu cha nyehé ñu yucuan, vatyí nyacua nya ra Moisés ta catyí ra: “Ñihi xain chihin cha yuhví”, catyí ra.

²² Soco yoó ña nyehe yo cha yuhvi cuan vatyí noo yucu cha nañi Sión nu cuví ñuu Nyoo nyitó chaa yo. O cuñi chi catyí ñuu Jerusalén cha nyaá andivi, nu nyicú cuaha mil ángel.

²³ Candú ñin ri yo vatyí sacahnu yo chi Nyoo vatyí ndú ñin ri tandihi ñu cha cuví sehe Nyoo cha nyicú sivi nu tutu nya andivi. Ta chaa yo nuu Nyoo cha cuví juee chi tandihi ñáyivi. ñin ri nyicú yo chihin añima ñu vaha cha sanduvaha maa Nyoo.

²⁴ Ta natuhva ndo chi ra Jesús ra cuví ra cahán chaha yo vityin cha natyihí tahan Nyoo tuhun chaa chihin yo. Ta chati niñi ra. Ta ican chi chahá noo cha vaha ca ta ñima ca cha chahá niñi ra Abel. (Vatyí ra Abel chihí ra ta tachí tuñi Nyoo chi yañi ra. Soco chihí ra Jesús, ta iyó tucahnu iñi cuatyí yo.)

²⁵ Yucuan chaha saha yo cuenda coto ma quichaha yo chi ra cha cahán chihin yo. Vatyí ñu Israel cuan, ña cacu ñu cha ña cuñi quichaha nu cahan Nyoo quivi cahan ra nu cuví yucu Sinaí ihya siqui ñuhu ñáyivi. Ta nyaca cuví yoó, ma cuví maa cacu yo tatu nacuhva yo chata yo chi ra cha cahán chihin yo nya andivi vityin.

²⁶ Quivi cuan ndusu Nyoo sacanda chi ñuhu ñáyivi. Soco vityin catyí chi tyehe caa: “Noo ri ca chaha cusacande ta ñima ñuhu ñáyivi ri, soco andivi ñandihí.”

²⁷ Ta cha catyí ra vatyí cusacanda ra nonga chaha, cutuñi iñi yo vatyí cuacuachiyo tandihi cha nyaá ii ri cha savaha Nyoo. Ta cundoo cha ma cuví nacanda.

²⁸ Nu chahá Nyoo cunyaa yo chihin ra nu nyacá ñaha ra, ma nacanda cuan. Yucuan chaha na nacuhva yo tyahvi nyoo chi ra, ta sacahnu yo chi ra chihin cha ñi iñi yo, ta chihin cha saha yo ñáyivi chi ra, vatyí tyicuan caa tahan iñi ra.

²⁹ Vatyí Nyoo cuenda yo, cuví ra tari noo ñuhú cha chahmí tandihí, ta tyicuan caa cusanaa ra tandihí cha ña vaha.

13

Na coo yo cuhva tahan iñi Nyoo

¹ Ma sandihí ndo cha cuñi ndo chi tandihí ñu yihí cuenda Nyoo tari cha tahan ndo chi ñu.

² Ta ma naa iñi ndo cha cuvaha ñáyivi cuví ndo chihin ñáyivi cha chaá vehe ndo. Vatyí iyó chaha cha cuenda cha vaha ñáyivi cuví ndo, ta chaha ndo nu coo ñáyivi; chi ángel, chaha ndo nu coo, ta ña tuví iñi ndo.

³ Ma naa iñi ndo chi ra ñohó vehe caa tari cha ñohó tucu maa ndo vehe caa chihin ra. Ta tyicuan caa tucu ñu nyehé tindoho sahá ñáyivi. Saha ndo tyi nyehé tucu maa ndo tindoho tari nyehé ñu, tyicuan ta cundahvi cuñi ndo chi ñu ta tyinyee ndo chi ñu. Vatyí chitó ndo yoso caa uhvi chi ñu cuan tyi ñáyivi cuví ñu tari maa ndo.

⁴ Cha tandaha ndo, noo cha vaha cuví. Ta nyoho cha tandaha ndo tahan chi saha ndo ñáyivi chi yhi ndo o chi ñasihí ndo. Vii coo ndo chihin tahan ndo, vatyí Nyoo cutachi tuñi ra chi ñu iyó yhi ta iyó inga ra chi ñu, o ra iyó ñasihí ta iyó inga ñusihí chi ra.

⁵ Ma cuñi xaan ndo xuhun. Ndo ndo vaha chihin cha iyó chi ndo, vatyí Nyoo catyí ra: “Ma sañe chuun ta ni ma sandoo ñihne chuun”, catyí ra.

⁶ Yucuan chaha cuví catyí yo chihin cha ñi iñi yo:

Sutu Mañi yo cuví ra tyinyeé chii,
Ma yuhvi ñáá cha sacuvi ñáyivi chii.

⁷ Nícohon iñi ndo chi ra cayihí ndaha vehe ñuhu, ra cacahán tuhun Nyoo chihin ndo. Nacaca xiñi ndo vatyí maa ra cachi iyó ra nuu Nyoo, ta cunyicon ndo cuhva cha vaha xaan chinó iñi maa ra chi Nyoo.

⁸ Ra Jesucristo ña nasamá ra. Ican ra cuví ra ta tyembu chahnu, ta ican ra cuví ra vityin. Ta ican ra cuví ra nuu cuahan ca chi tyicuan ri maa.

⁹ Ma cuhva ndo cha sandavi ñaha ñáyivi chi ndo chihin tuhun siin caa cha sañahá ñu. Vaha ca cha cu niñi ñi ndo chihin cha cuñi Nyoo chi yo, ta ñima ca tuhun cha sañahá ñu cuan: cha yica cha cachi yo. Ña tyinyeé maa cuan chi ñu nyacuví tyicuan caa.

¹⁰ Iyó noo arta cha cuenda yo. Nu chati niñi ra Cristo nu cruzi, ican cuan cuví. Ta ñu cuñi cacu chihin cha quichahá ñu ley chahnu cha quichahá ra cacuvi sutu ta cha naha, ma cuví tyinyee ra Cristo chi ñu.

¹¹ Ra cuví sutu cahnu cuenda ñu Israel chinyaca ra niñi quiñi Nu Ii Xaan Ca cuan cha cuenda cuatyí ñáyivi, soco coño ti chinyaca ra ityi chata ñuu vatyi cayu chi.

¹² Ta tyicuan caa tucu ra Jesús, tyaa Nyoo tyiño chi ra cha nyehe ra tindoho ta cúvi ra ityi chata ñuu Jerusalén, tacuhva vatyi sandundi ra chi yo chihin niñi ra.

¹³ Ma cahan nuu yo nyehe yo tindoho ticahan nuu cha cuenda ra Cristo, tari nyehe tucu maa ra cha cuenda yo quiñi chahan ra chicúvi ra ityi chata ñuu Jerusalén. Tari quiñi cha cuahan tucu yoó ityi chata ñuu cuví chi cuan tatu ña cahán nuu yo nyehe yo tindoho cha cuenda tuhun ra.

¹⁴ Vatyi ihya siqui ñuhu ñayivi, ñahri noo ñuu cha tyicuan ri maa cucoo iyó. Soco nanducú yo noo ñuu cha cuquichi, cha yaha ndihí tuhun ñuhu ñayivi ihya.

¹⁵ Yucuan chaha vityin cha ñohó ra Cristo añima yo, tahán chi cha saniñi yo ta sacahnu yo chi Nyoo chihin yaa, ta chihin cha cahan yo tuhun cha cahnu cuví ra.

¹⁶ Ta ma naa ñi ndo cha sacuví ndo cha vaha. Ta tyinyee ndo chi tahan ndo chihin cha iyó chi ndo, vatyi ican ihya cuví cha tahán ñi Nyoo.

¹⁷ Quichaha ndo tuhun cahán ra casaquehén ityi chi ndo, ta cuhva ndo chi ndo cunyaca ñaha ra vatyi nyicú ra tyiño casahá cumi ra añima ndo. Ta coo quiñi cutahan chi cunacuhva ra cuenda tyiño casahá ra chi Nyoo. Nducu ndo cuhva sacuví ndo cha vaha, tacuhva vatyi chihin cha siñi cuñi ra cuhva ra cuenda ndo nuu Nyoo, vatyi tatu ña sacuví ndo cha vaha, chihin cha cuihya ñi ra cuhva ra cuenda ndo, ta nyoho, ma quita vaha ndo nuu Nyoo.

¹⁸ Vaha cuñi añima ndi chihin Nyoo, ta cuñi ndi cha cacan tahvi ndo chaha ndi vatyi cuñi ndi sacuví ca ndi cha vaha.

¹⁹ Ta chiquén noo tumañi ñi chi ndo cha cacan tahvi ndo chiin chahi tacuhva vatyi nacuhva Nyoo cuhin cucunyai cha numi ri chihin ndo inga chaha.

Nu ndihí cahan ra ta nacuhva ra nocumi chi ñu

²⁰ Nyoo ican ra iyó cha taxi chi ra, ican ra sanandoto ra chi Sutu Mañi yo Jesucristo, ra cuví ra sahá vaha cuenda chi yo tari cha cuví yo mbee sana ra. Ra Cristo chati niñi ra, ta chihin cuan natyihí tahan Nyoo tuhun chaa cha ma ndihí ca maa chihin yo.

²¹ Na cuhva Nyoo cha vaha chi ndo tacuhva cuví sacuvi ndo cuhva cuñi ra. Ta na sacuvi maa ra cha cuñi maa ra cha cuenda ra Jesucristo chihin tandihí maa yo. ¡Na sacahnu yo chi ra Cristo tyicuan ri maa! ¡Na cuví chi tyicuan caa!

²² Yañi, chacú ndahvi nuu ndo, na cun- yee xaan ñi ndo chihin tuhun cha chahí ihya chi ndo, vatyi ña cuaha xaan tyai nu tutu ihya chi ndo.

²³ Coño ndo vatyi ra yañi yo, ra Timoteo, cha quitá ra vehe caa. Ta tatu nachaa ra cha numi ri, cuhun ra chihin, na cuhin cunyehe nu nyicú ndo.

²⁴ Cuhva ndo nocumi chi tandihí ra sañahá chi ndo, ta chi tandihí ra yañi yo cuenda ra Cristo. Ñu Italia ihya, tachí ñu nocumi chi ndo.

²⁵ Ta Nyoo na nasoco ra chi tandihí maa ndo. Ta na cuví chi tyicuan caa.

Carta Cha Sacuhun Ra Santiago Chi Ñu Yihí Cuenda Ra Cristo

Nu chahá ra Santiago nocumi chi ñu

¹ Yuhu ra Santiago cuví noo ra sacuví tyiño nuu Nyoo ta nuu Sutu Mañi yo Jesu-cristo. Sacuhín nocumi chi ndo cha cuví ndo cha uchi uvi ityi ñáyivi Israel ñu yihí cuenda ra Cristo. Ta quití cuatyí ndo siin siin ñuu.

Cha chiñi tuñi cha chahá maa Nyoo

² Yañi, cuñí chi vatyí sií cuví chi ndo tatu cuaha nuu tindocho nyehé ndo.

³ Vatyí chitó ndo tatu nyehé ndo tindocho tari cha vatyí Nyoo nducu nyehé ra tatu ndicha cha chinó iñi ndo chi ra cuví cuan. Ta tyicuan caa ta cua cutuhva ca ndo cha cucama iñi ndo.

⁴ Saña ndo na quichi maa tindocho siqui ndo, vatyí ican cuví cha sacoo cha cama iñi ndo. Ta tatu cha chicoo cha cama iñi ndo ta cucuvi ndo noo ñáyivi chicha chihin tuhun Nyoo, ta cuacunye ndo tandihí cuí maa tindocho cha vachi ca siqui ndo.

⁵ Tatu nya noo nyoho cumañi cha chiñi tuñi chi ndo, caçan ndo chi Nyoo. Ta Nyoo cuhva ra. Ta ñima chiin ri chahá ra chi ñu chicán chi ra. Ta ña tyicuhvá ra cuhva chahá ra. Ta ña natyihí ra nuu yo cha cuenda cha chahá ra chi yo.

⁶ Soco cuñí chi caçan yo chi ra chihin cha chinó vaha iñi yo. Ta ma quihí iñi yo vatyí ma cuhva ra chi yo. Vatyí ñu cha ña chinó vaha iñi, cuví ñu tari ndutya yuhu tyañuhu cha tyandahá tatyí chii siin siin ityi.

⁷⁻⁸ Ta tyicuan caa maa ñu cuan, siin siin cuhva chicá xiñi ñu, vatyí siin cha chicán ñu vityin ta siin cha chicán ñu tyaan, ta ña ni iñi ñu sacuví ñu noo cha sacuví ñu. Ña tahán chi quihí iñi ñu vatyí cuñihi ñu cha cuacuhva Sutu Mañi yo chi ñu.

⁹ Tatu iyó noo ra yañi yo, ndahvi ra, cuñí chi cusí cuñí ra vatyí Nyoo nacoñehé ra chi ra.

¹⁰ Soco tatu noo ra yañi yo, tyayí ra, cuñí tucu chi cha cusí cuñí ra tatu ndundahvi

ra, vatyí ra tyayí cuví ra tari noo ita cha nyaá nu cuhu, vatyí ña naha maa chiyó chi.

¹¹ Vatyí tatu cañá ñanyii ta ihñi vavaha cuhu cuan, na ityi chi. Ta ita cuan canacavá ri ta ndihí cha tyaqui chi. Ta tyicuan caa tucu ra tyayí, cuquichi tuhun chihi chi ra ta ndoó maa tyiño sahá ra.

Yoso caa cunyeé yo tindocho

¹² Ñana cha sií cuví chi ndo cha cunyeé ndo chihin cha cama iñi ndo ñáá tindocho cha vachí chi ndo. Vatyí tatu cunyeé ndo, cuñihi ndo tari noo corona. Vatyí Nyoo cucuhva ra chi ñu cuñí chi ra, cha coo ñu ñáyivi chaa chihin ra.

¹³ Tatu nya noo nyoho quichí cuví iñi ndo cha sacuvi ndo cha ña vaha, ma cuñi ndo vatyí Nyoo sacuví cha caca xiñi ndo tyicuan caa. Vatyí Nyoo ña quichí cuví iñi ra sacuví ra cha ña vaha. Ta ni ña tyiyuhú ra chi yo cha sacuví yo cha ña vaha.

¹⁴ Soco tatu nya noo ndo quichí cuví iñi ndo sacuví ndo cha ña vaha, suri cha cuenda cha chicá xiñi maa ndo cha ña vaha, yucuan chaha canacava ndo nu cuatyí.

¹⁵ Tatu cuhva xaan yo cuhva cha quihí tuhun ña vaha iñi yo, cuacoo noo quivi ta cuasacuvi yo cuhva ña vaha cuan, ta tyicuan caa cacu cuatyí yo nuu Nyoo. Ta Nyoo tachi tuñi ra cuatyí cuan ta cuchaa tuhun chihi chi yo.

¹⁶ Yañi yuhu, cuñí xain chi ndo. Ma sandavi ñaha ndo chi ndo.

¹⁷ Tandihí cha vaha ta cha vii cha ñihí yo, quichi chi nya ityi siqui vatyí maa Nyoo chahá ra. Ta maa ra savaha ra ñuhu cha iyó andivi: tiño, ta yoo, ta ñanyii. Ta Nyoo tyicuan ri cuví ra Nyoo, ta ni chiin ña tuhvá ra nasama ra cuhva cuví ra.

¹⁸ Ta chahá ra ñáyivi chaa cha iyó yo cha cuenda tuhun ndicha cha cahán ra. Vatyí xihna ca yo cuví cha nduchaá cha nuu tandihí ca cha savaha ra. Vatyí tyicuan caa cuñi maa ra.

Noo ityi cha ndicha cha tahán chi cunun yo

¹⁹ Yucuan chaha yañi, noo noo yo ta cuñí chi cha yatyí çohon iñi yo cha tyasoho yo, soco cuñí chi cha ma yatyí xaan nacahán yo ta ma yatyí xaan cuxaan yo.

²⁰ Vatyí ñáyiví cha cuxaán, ña nyacuví ñu cha tahán iñi Nyoo.

²¹ Yucuan chaha saña ndo cha ña vaha ta cha quiñi caa cha cuaha xaan iyó siqui ñuhu ñáyiví. Ta ñatñin cuenda vaha ndo chihin cha masu iñi ndo tuhun Nyoo cha tachí ra añima ndo. Vatyí tuhun Nyoo cuan iyó tunyee iñi chi chi vatyí sacacú chi añima yo.

²² Soco sacuvi yo yoso cuhva sañahá tuhun Nyoo. Ta ma cuiñi ri maa yo vatyí tatu tacuhva chiñi ri maa yo, suri chi maa yo sandavi ñahá yo.

²³ Vatyí ñu cha chiñi ri maa tuhun Nyoo ta ña sacuví ñu, cuví ñu tari noo ñu cha nyehé chi nu ino.

²⁴ Ta nyehé ñu yoso caa nuu ñu, ta yaha cuan ta cuahan ñu ta naá ri iñi ñu yoso cuhva caá nuu ñu.

²⁵ Soco inga ñu cha nyita ri tyasohó tuhun Nyoo, vatyí sacuví vaha ñu cha chiñi ñu. Ta tyicuan ri sahá vaha ñu cuenda cha catyí ley Nyoo, cha cuví ley vaha ca, ley cha chahá libertad chi yo tyi tava chi chi yo ndaha ra ña vaha. Ta ñu nyacuví tyicuan caa si xaan cucuvi chi ñu.

²⁶ Tatu nya noo ñáyiví cuñi maa ñu vatyí ityi Nyoo cuahan ñu, soco ña nyatú yuhu ñu cahan ñu, suri chi maa ñu sandahvi ñahá ñu. Ta cha catyí ñu tyi ityi Nyoo cuahan ñu, cha ñima ri tuhun cuví.

²⁷ Vatyí ityi ndicha, ityi vaha nuu Nyoo Sutu yo ican cuví ihya: Cha tyinyeé yo chi ñu nyehe tindocho, ñu yori sutu ta sihi, ta ñu chihí yí. Ta inga, cha sahá vaha yo cuenda chi yo coto sacuvi yo cha quiñi caa cha sacuví ñu ña ñohó nuu Nyoo.

2

Ña tahán chi cuñi yo chi noo ñáyiví ta chi inga ñu ma cuñi yo. Inuu ri tahan chi cuñi yo chi ñu

¹ Yañi yuhu, nyoho chinó iñi ndo chi Sutu Mañi yo Jesucristo ra cha cahnu ca cuví, ta ña tahán chi cha vaha ca cahan ndo chihin noo ri ñáyiví, ta chihin inga ñu ma cahan ndo.

² Vatyí tatu quihví noo ra tyayí nu nyicu ndo, yíhí xehe xuhun cuaan ndaha ra, ta finu sahma ra, ta quihví tucu nonga ra cha ñihno sahma chahnu ri.

³ Ta nyoho tatu vaha ca tyiñuhu ndo chi ra cha vaha ñihno cuan, ta catyí ndo chi ra: “Cunyaa ihya noo nu vaha.” Ta chi ra ndahvi cuan catyí ndo chi ra: “Yoho cuñanyaa yucuan o cunyaa ihya nu ñuhú”, catyí ndo chi ra.

⁴ Ña vaha tatu sacuví ndo tyicuan caa, vatyí ña inuu ri sahá ndo ñáyiví chi ñu, ta cha tyicuan caa, ña vaha cha chicá xiñi ndo.

⁵ Yañi, tyasoho ndo tuhun ihya. Nyoo nacachí vaha ra chi ñu ndahvi ihya ñáyiví, vatyí ta cuhva cuví ñu ñu tyayí chihin cha chinó xaan iñi ñu chi Nyoo, ta cuñi ñu nu vaha nu nyacá ñaha ra. Vatyí ican ihya cuví cha catyí ra tyi cuhva ra chi ñu cuñi chi ra.

⁶ Soco nyoho chahá ndo tichan nuu chi ñu ndahvi. Ta çatu ña chitó ndo vatyí ñu tyayí, ican ñu cuví ñu cha chahñi ndahvi chi ndo? Ta chinyacá ñu chi ndo nuu ra cuví tyiño.

⁷ Ta çatu ña chitó ndo vatyí ican ñu cuví ñu cahan ña vaha siqui ra Cristo? Ta cuenda ra Cristo yíhí ndo.

⁸ Tatu ndicha cha sacuví ndo tandihí cha catyí ley Nyoo ra cuví rey cuenda yo, vaha nyacuví ndo. Tari catyí tuhun Nyoo: “Cuñi ndo chi tahan ndo tari cuñi ndo chi maa ndo.”

⁹ Soco tatu chi noo ri ñu cuñi ndo. Ta chi inga ñu ña cuñi ndo, chicoó cuatyí ndo. Ta iyó cuatyí ndo nu ley Nyoo.

¹⁰ Vatyí tatu noo ñáyiví sacuví ñu tandihí cha catyí ley, ta cumañi ñu noo ri cha catyí chi, cuví chi tari cha tandihí ley ña sacuví ñu.

¹¹ Vatyí Nyoo catyí ra vatyí ma coo inga ñusihi o inga rayí chi ñu, tatu iyó yí ñu o iyó ñasihi ra. Ta suri maa ra catyí vatyí ma cahñi yo. Yucuan chaha tatu noo ñu ña sacuvi ñu cuatyí cha ña iyó inga rayí o inga ñusihi chi ñu soco chahñi ñu, suri ña quichahá ñu cha catyí ley.

¹² Soco yoó cucutuñi chi yo nu ley ra Cristo cha sacacú chi yo. Yucuan cuenda tahan chi nducu yo cuhva cahan yo ta nducu yo cuhva coo yo.

¹³ Vatyí ñu cha ña cundahvi cuñi nyehe chi inga ñu, Nyoo cusacutuñi ra chi ñu, soco ma cundahvi cuñi ra nyehé ra chi ñu. Soco ñu cha ndahvi cuñi nyehé chi inga ñu, cuquita vaha ñu cuhva cha cutuñi chi ñu.

¿Ñáá cha sacacú chi yo, cha chinó iñi yo o cha sacuví yo cha vaha?

¹⁴ Yañi, ñáá ri tuhun tatu catyí ndo vatyí chinó iñi ndo, soco ñahri cha vaha nyacuví ndo. ¿Atu cuví cacu ndo chihin cha chino iñi ri ndo chi Nyoo?

¹⁵ Vatyí tatu noo ñu tahan yo cumañí sahma ñu, cumañí cha cachi ñu,

¹⁶ ta minoo nyoho catyí ndo chi ñu: “Cuahan ta Nyoo na cocumi ra chuun. Na coo ca sahmon ta cha cachun”, catyí ndo. Soco ña chahá ndo cha chiñuhú chi ñu. ¿Ñáá ri tuhun cuan?

¹⁷ Ñahri yahvi nyaa cha catyí yo vatyí chinó iñi yo chi Nyoo, ta ña tyinyeé yo chi tahan yo.

¹⁸ Vasi yihí ndo cua catyí ndo: “Yoho chihin cha chinó iñun chi Nyoo ta cuñun cacun, ta yuhu caqui soco chihin cha vaha ñáyivi cuví ta chihin cha tyinyeí chi tahan yo.” Vaha. Soco yuhu catyí chuun, ¿atu cuví sañahun chii tyi ndicha chinó iñun chi Nyoo tatu ña vaha ñáyivi cuvún ta ña tyinyeún chi tahan? Ma cuví. Soco yuhu chihin cha tyinyeí chi tahan yo sañahí chuun vatyí chinó vaha iñi chi Nyoo.

¹⁹ Ta yoho chinó vavaha iñun tyi iyó noo ri Nyoo. Vaha cha chinó iñun. Soco cuihna chinó tucu iñi ra cuan tyi iyó noo ri Nyoo. Ta nihí ra chihin cha yuhví ra vatyí ma cacu ra.

²⁰ Ma tondo xaan caca xiñun. Na cutuñi iñun vatyí tatu chinó iñi yo ta ña sacuví yo cha vaha, ñahri yahvi nyaa cha chinó iñi yo.

²¹ Ra Abraham sutu chahnu yo, cuví ra noo ra vaha nuu Nyoo cha cuenda cha sacuví ra cha catyí Nyoo. Vatyí chahá ra chi sehe ra, ra Isaac chi Nyoo tari cuhva catyí Nyoo chi ra.

²² Nyehún vatyí chinó iñi ra Abraham chi Nyoo ta chaha cha chinó iñi ra ta sacuví ra tuhun cha catyí Nyoo chi ra tyi sacuví ra. Ta nu sacuví ra cuhva catyí Nyoo chi ra, yucuan cuví nu natuvi vaha cha chinó iñi ra chi Nyoo.

²³ Ta tyicuan caa ching cava tari cuhva catyí nu tutu Nyoo tyehe caa: “Ra Abraham ching iñi ra chi Nyoo ta yucuan chaha Nyoo sahá ra tuhun tyi vaha ra nuu ra.” Ta iyó inga nu catyí chi: “Ra Abraham, nanduvi ra amigo Nyoo.”

²⁴ Ta tyicuan caa nyehe yo vatyí vaha yo nuu Nyoo cha cuenda cha nyacuví yo cha vaha, ta ñima cha cuenda cha chinó ri iñi yo chi ra.

²⁵ Ta tyicuan caa tucu cu Rahab ñaha cata iñi cha chiyó ta cha naha. Yahá cha sacuví ña cuatyí, sacuví ña cha vaha quivi chaha ña nu cacohon xehe ra cha tachí ra Josué. Ta tyinyeé ña chi ra cha cuhun ra inga ityi. Ta cha cuenda cuan Nyoo sahá ra tuhun tyi vaha ña.

²⁶ Ta tyicuan caa tucu cuví noo coño ñuhu ñáyivi. Tatu ñahri ca cha nyitó ñu yihí chichi coño ñuhu cuan, ñahri ca vale chi. Ta tyicuan caa yoó, tatu ña sacuví yo cha vaha, ña vale cha chinó iñi yo.

3

Yoso caa saha cuenda yo cuhva cahan yo

¹ Nyoho yañi, ma vatyí xaan quichi cuví iñi ndo cuví ndo noo ra sañahá tuhun Nyoo. Vatyí nyuhu cha sañahá ndi tuhun Nyoo, tatu ña vaha sañahá ndi, cahnu ca cuatyí cuví, ta cuaha ca cutachi tuñi Nyoo chi ndi.

² Vatyí ni noo yo ta ña sacuví yo maa maa ri maa cha vaha. Soco tandihi yo cuaha ri cuhva sacuví yo cuatyí. Soco tatu noo yo cuví cunyaca ñaha vaha yo cuhva cahan yo tacuhva ma coo cuatyí yo cha cuenda cha cahán yo, cuñí chi catyí vatyí ñahri cuatyí yo vatyí cuví tucu cunyaca ñaha yo tandihi coño ñuhu yo.

³ Vatyí tatu tyihi yo yoho yuhu caballo cuví cunyaca ñaha yo chi ti, vasi cahnu ti.

⁴ Ta tyicuan caa tucu noo barcu cahnu, vasi cahnu chi soco chihin noo vitu luhlu ri cha nyaá chata chi, cuví sacuhun ra chi chi nya ityi nu cuñí maa ra, vasi ñihi tatyí.

⁵ Ta tyicuan caa tucu yaa yo. Cuví chi noo cha luhlu ri. Soco cahnu xaan cahnu xaan nanduvi noo tuhun luhlu ri cahan yaa yo. Tari nahnu cuví cayu chihin ñuhú lee cha tyaa yo chichi cuhu ta ndi maa yutun cayu.

⁶ Vatyí tyicuan caa yaa yo tari noo ñuhú luhlu cuví chi. Ta cuví chi tari noo cha quini caa cahnu cha ñohó chichi coño ñuhu yo, ta sativí chi chi coño ñuhu yo ta tandihi cuhva iyó yo ñáyivi, vatyí suri maa cuihna, ican tyiyuhú chi chi.

7 Ñáyivi cuví samasu ñu tandihí ri nuu quití: saa, coo, ta quití cha iyó chichi tyañuhu, ta samasú ñu chi tí.

8 Soco yori cuví samasu yaa yo. Vatyí cuví chi noo cha ña vaha cha ña chahá chi cha cunyaca ñaha yo chí chí. Tari noo coo, tyaá tí chí ñáyivi, tyihí tí venenu tí ta chíhi ñáyivi. Ta tyicuan caa yaa yo.

9 Vatyí suri chíhin yaa yo sacahnú yo chí Nyoo Sutu yo. Ta suri chíhin cuan cahán ña vaha yo chí ñáyivi cha savaha Nyoo tari cuhva caá maa ra.

10 Suri maa chíhin yuhu yo sacahnú yo chí Nyoo. Ta suri chíhin cuan cahán yo cha quiñi caa. Soco yañi, ña tahán chí cha sacuví yo tyicuan caa.

11 Vatyí, ¿atu cuví quita ndutya vixi ta ndutya uva noo ndohyo? Ma cuví.

12 Yañi, ¿atu cuví quita papaya nuu noo tumangu, o cuví cuhva tupapaya noo mangu? Ma cuví. Ta tyicuan caa ma cuví quita ndutya uhva ta ndutya vixi noo ndohyo.

Cha chíni tuñi cha vaha ca

13 Tatu yihí ndo cha chitó ndo ta iyó cha chíni tuñi chí ndo, sañaha ndo chíhin cha cachi iyó ndo. Ta sacuví ndo cha vaha chíhin cha ma cahnu saha ndo chí ndo, vatyí iyó cha chíni tuñi Nyoo chí ndo.

14 Soco tatu iyó tuhun nyiyo iñi ña vaha chíhi añima ndo, sacuví ndo cha sacuví ndo soco cha cuenda cha cuñi ndo cuvaha ndo nuu ñáyivi, ta cha tyicuan caa nyacuví ndo, ña tahán chí cuyaa ndo tyi iyó cha chíni tuñi chí ndo, vatyí cha cuyaa ndo, sandaví ñaha ndo cuví cuan, ta tixehe ndo cha ndicha.

15 Vatyí tatu chicá xiñi ndo tyicuan caa ñima cha chíni tuñi Nyoo cuví cuan, soco cuhva chicá xiñi ñu ña ñohó nuu Nyoo cuví. Cuenda cuihna cuví.

16 Vatyí tatu nyiyo iñi ndo ta cuñi ndo cuvaha ndo nuu ñáyivi, yucuan cuví nu ican ñima nyicú ndo. Ta iyó tucu tandihí inga nuu cha ña vaha nu nyicú ndo.

17 Soco tatu iyó cha chíni tuñi Nyoo chí ndo, ndaa iyó ndo, cachi iyó ndo. Ta nanducú ndo cuhva coo vaha ndo chíhin ñáyivi chíhin cha vita iñi ndo. Ta vaha ñáyivi cuví ndo. Ta cachi vaha chicá xiñi ndo. Ta cundahví cuñi ndo chí ñáyivi. Ta nducú

ndo cha vaha chí tandihí ñáyivi chíhin cha ñi iñi ndo.

18 Tatu nanducú yo cha coo vaha yo chíhin ñáyivi, ta sañihí yo coo taxi ri yo chíhin ñu, cuacoo yo noo ñáyivi cha cuíti.

4

Ma sacuvi yo cuhva cuñi coño ñuhu yo

1 ¿Ñáá tuhun iyó tisihi nu nyicu ndo? ¿Ñáá tuhun iyó cuatyí? Cha cuenda cha ña vaha cha cuñi coño ñuhu ndo. Vatyí tyicuan ri iyó cha cuñi ndo ta yucuan sacaíni tahan chí ndo.

2 Nyoho cuñi ndo coo ñáá ndihí cha coo chí ndo. Ta ñahri iyó chí ndo. Tyicuan ta sataí iñi ndo ta chahñi ndo tacuhva ñihí ndo. Iyo tahan ndo chíhin cha nyiyo iñi ndo ñáá cha nyehé ndo soco ña cuví ñihí ndo. Tyicuan ta caíni tahan ndo. Iyó cuatyí nu nyicú ndo soco ña ñihí ndo cha cuñi ndo. Vatyí ña chicán tahvi ndo chí Nyoo.

3 Ta tatu chicán tahvi ndo chí Nyoo, ñi ri ña ñihí ndo cha cuenda vatyí ña vaha chicán ndo. Vatyí cuñi ndo soco cha sanaa ndo cha caca noo ri maa ndo cuhva cuñi ñáyivi.

4 Ña ndicha cha chinó iñi ndo chí Nyoo. ¿Atu ña chitó ndo vatyí tatu nyacuví ndo cuhva cuñi ñáyivi, ñu xaan iñi chí Nyoo cuví ndo vatyí ña nyacuví ndo cuhva cuñi Nyoo? Yucuan chaha tatu yihí ndo nyacuví ndo cuhva cuñi ñáyivi, ñu xaan iñi chí Nyoo cuví ndo.

5 ¿Atu cha caha ri catyí nu tutu Nyoo vatyí Tatyí li cha chahá Nyoo coo añima yo, cuñi xaan chí chí yo, ta cuiño xaan chí chí yo? Cuñi Nyoo cha ñi ri chí maa ra cua cuñi xaan yo.

6 Soco tyinyeé ca ra chí yo tacuhva vatyí cuví nacuhva ndihí yo chí yo chí ra. Yucuan chaha catyí tucu tuhun Nyoo vatyí Nyoo ña tahán iñi ra chí ñu cahnu saha chí. Soco tyinyeé ca ra chí ñu nacotó tyi chíñuhu ra chí ñu.

7 Ican tuhun nacuhva vaha ndo chí ndo chí Nyoo. Ma quíchaha ndo nu cahán cuihna chíhin ndo. Ta maa ra cucacacono ra nyehe ra chí ndo.

8 Tuhva yatyin ndo chí Nyoo ta maa ra tuhva yatyin ra chí ndo. Nyoho ñu iyó cuatyí, sandundí ndo chí ndo. Ta nyoho

cha uvi nyaa xiñi ndo sandunii ndo iñi ndo ta cuhva ndo na sacutu Nyoo añima ndo chihin cha vaha, tyicuan ta cundundi ndo nuu ra.

⁹ Cücüihya cuñi ndo. Cuacu ndo. Na ndichi xiñi ndo vatyí ña vaha cuhva iyó ndo. Cha nuu cha cuacu ndo chihin cha sii cuñi ndo cuacu ndo chihin cha cuihya iñi ndo. Ta cha sii cuñi ndo na nanduvi chi tucuihya iñi.

¹⁰ Ndahvi saha ndo chi ndo nuu Sutu Mañi yo, ta maa ra cusanducahnu ca ra chi ndo.

Ma nyehe nyaa yo chi tahan yo

¹¹ Yañi, ma cahan ña vaha ndo siqui noo tahan ndo. Vatyí ñu cha cahán ña vaha siqui noo tahan, o nyehé nyaa ñu chi ñu, siqui ley Nyoo cahán ña vaha ñu ta nyehé nyaa ñu. Vatyí tatu nyehe nyaun, juez nasahún chuun cha nuu cha quichahún nu cahán ley cuan.

¹² Vatyí noo ri ra cuví ra cha chahá ley cuan. Ta suri ra cuví ra juez. Ta suri maa ra cuví ra ra sacacu chi yo, o sacunaa ra chi yo. Soco ¿yóo ñu cuví yoho vatyí nyehe nyaun chi inga ñu, ta sacutuñun chi ñu tari cha juez cuvún?

Ña chitó yo ñáá cha cucuvi chi yo tyaan, ta yucuan chaha ña tahán chi cahnu saha yo chi yo

¹³ Vityin cuiñi ndo tuhun ihya, nyoho cha catyí ndo: “Vityin o tyaan cuhun yo ñuu cuan, o inga ñuu cuan. Ta yucuan cunyaa yo noo cuiya vatyí sahatyiño yo ta saha ganaa yo xuhun”, catyí ndo.

¹⁴ Ta ni ña chitó ndo cha cucuvi tyaan. Vatyí ñayiví cha iyó yo cuví chi tari noo vico nuhu vatyí noo ri cuhva yíhi chi, ta tañi ri ta cha naa tucu chi.

¹⁵ Soco tahán chi catyí ndo tyehe caa: “Tatu Sutu Mañi yo ta cuñí ra, coo yo ta sacuvi yo ihya o yucuan.”

¹⁶ Soco nyoho nyee xaan ndo cuñí maa ndo ta cahnu sahá ndo chi ndo. Ta ña vaha tyicuan caa.

¹⁷ Vatyí tandíhi yo cha chitó yo sacuví yo cha vaha ta ña sacuví yo, chicoó cuatyí yo cha tyicuan caa.

5

Nu catyí ra Santiago ñáá cha cucuvi chi ñu tyayí

¹ ¡Cuiñi ndo tuhun ihya, nyoho ñu tyayí! Cuacu ndo chihin cha cuihya cuñi ndo, canachaa ndo cha cuenda tindocho cha cunyehe ndo.

² Vatyí cha tyayí cha sacayá ndo, cha cuñí tiví. Ta sahma finu ndo, ndii maa cha cuñi cachi tiquixin.

³ Xuhun cuaan ndo ta xuhun cuichin ndo cuxi vavaha chi. Ta yucuan chahá chi noo seña cha chinyacuví ndo. Ta tari quiví cha cucahmi chi chi ndo tari cayu ñuhu vatyí cucunaa ndo. Tyi sacayá xaan ndo cha tyayí ndo tyi cotyiño ndo tyaan.

⁴ Ta ña tyiyahví ndo yahvi cha tahán chi chi ñu ndahvi cha sahatyiño nu tyiño sahá ndo. Ta vityin chicán ñu cuatyí chaha ndo nuu Sutu Mañi yo ra nyacá ñaha ángel cha cuví sindaro cuenda ra. Ta maa Sutu Mañi yo chiñí ra tuhun cahán ñu ndahvi cuan.

⁵ Ihya siqui ñuhu ñayiví tyaqui iyó ndo, tyayí iyó ndo. Ta sacuví ndo yoso cuhva cuñí maa ndo. Tari nduxahan quini cha cucúvi, tyicuan caa nyoho, vatyí cucunaa ndo.

⁶ Ta nyoho tyaa ndo cuatyí chaha ñáyiví vaha. Ta chahñi ndo chi ñu. Ta ñu ndahvi cuan ña cuví sacacu ñu chi ñu.

Cuatu yo chi ra Cristo chihin cha cama iñi yo

⁷ Yucuan chaha, yañi, nyatú yo chihin cha cama iñi yo nyacua nya quiví quichi Sutu Mañi yo. Tari noo ra cha sahá tyiño chi cuhu nyatú ra nyacua nya cha coon savi cha xihna ri ta cha yaha savi nu ndíhi, tyicuan ta naquehen ra ñáá cha tachi ra.

⁸ Ican tuhun cuatu ndo chi Nyoo chihin cha cama iñi ndo. Ta cunii ca iñi ndo vatyí cha cuyatyin cha quichi Sutu Mañi yo.

⁹ Yañi, ma tyaa ndo cuatyí chaha tahan ndo, coto tachi tuñi Nyoo chi ndo. Vatyí Nyoo, juez cuví ra. Ta cha cuñi quichi ra.

¹⁰ Yañi, saha ndo cuenda cuhva chiyo ra profeta cha chaha cuenda tuhun Sutu Mañi yo ta cha naha, vatyí cuhva cha canyehé ra tindocho, cacunye xaan ra.

¹¹ Chitó yo vatyí sii xaan cuñí ra cha cunye tandíhi nuu tindocho. Tari ra Job. Chiñi

ndo tuhun yoso caa cunyeē ra t̄indoho cha nyehe ra. Ta chitó ndo vatyí nu ndihí tuhun, cuaha xaan cha vaha chaha Sutú Mañi yo chí ra. Vatyí Sutú Mañi yo iyó xaan t̄icahnu iñi chí ra. Ta cundahvi cuñi ra nyehe ra chí yo.

¹² Soco yañi, ma tyanaha ndo tacuhva chino iñi ñáyiví vatyí ndicha cha sacuví ndo. Ma tyanaha ndo ni tuhun andiví, ni tuhun ñuhu ñayiví, ni ma catyí ndo: “Chitó vaha maa Nyoo.” Tatu ndicha tuhun cahán ndo, ndicha catyí ndo. Soco tatu chitó ndo tyi ña ndicha, catyí ndo tyi ña ndicha, vatyí coto tachi tuñi Nyoo chí ndo.

¹³ Tatu nya noo nyoho nyehé ndo t̄indoho, caçan tahvi ndo chí Nyoo. Ta tatu nya noo ndo siñi cuñi ndo, caçta ndo yaa Nyoo.

¹⁴ Tatu nya noo ndo cuhví ndo, cuñi chí cana ndo chí ra nyisó tyiño vehe ñuhu vatyí cacan tahvi ra chaha ñu cuhví cuan ta tyihi ra acetye chí ñu chihin sivi ra Cristo.

¹⁵ Ta tatu chinó vavaha iñi ra chí Nyoo cuhva cha chicán tahvi ra, ñu cuhví cuan cucacu ñu. Ta Sutú Mañi yo cusanducuita ra chí ñu. Ta tatu sacuví ñu cuatyí, Nyoo cusaha ra t̄icahnu iñi cuatyí ñu.

¹⁶ Yucuan chaha nahma ndo cuatyí ndo nuu tahan ndo. Ta caçan tahvi ndo chaha tahan ndo vatyí na nduvaha ndo. Vatyí nu chicán tahvi noo ra vaha chicá chihin Nyoo iyó xaan tunyee iñi Nyoo.

¹⁷ Tari ra Elías ra profeta Nyoo ta cha naha. Cuví ra noo rayiñi tari maa yo. Ta chicán tahvi ra chí Nyoo vatyí ma coon savi. Ta ña coon savi uñi cuiya sisava.

¹⁸ Yahá cuan ta nacacān tahvi tucu ra chí Nyoo inga chaha. Ta nacoon savi inga chaha. Ta cuvahá chiti cha tachí ñáyiví nu ñuhú.

¹⁹ Yañi, tatu noo tahan ndo sandoo ñu tuhun ndicha Sutú Mañi yo, ta cuanuhu ñu ñayiví inga chaha, ta tatu tyinyeé ndo chí ñu na ndichi ñu ityí Nyoo inga chaha,

²⁰ coto ndo vatyí cha tyinyeé ndo chí ñu sacuví cuatyí cuan na ndihví ñu ityí Nyoo inga chaha, sacacú ndo añima ñu ndahvi cuan coto cuhun ñu anyaya. Ta sacuví ndo vatyí sahá Nyoo t̄icahnu iñi tandihí cuatyí ñu.

Carta Cha Xihna Ri Cha Sacuhun Ra Apóstol Pedro Chi Ñáyivi Yihí Cuenda Nyoo

Nu tyaa ra Pedro noo carta chi ñáyivi yihí cuenda Nyoo

¹ Yuhu ra Pedro cuví noo apóstol cuenda ra Jesucristo, ta cuñí chi catyí, vatyí maa ra tachi chii vatyí caque tyiño ra. Tyaí noo tutu ihya chi nyoho cha ña iyó ndo ñuu ndo, vatyí iyó ndo noo noo ñuu ityi Ponto, ta Galacia, ta Capadocia, ta Asia ta Bitinia.

² Chi nyoho nacachi vaha maa Nyoo Sutu yo vatyí nyata cha naha chito ra vatyí tyicuan caa cuquichaha ndo chi ra. Maa Tatyí li tyinyee chi ndo vatyí cuví nacuhva ndo chi ndo chi Nyoo, ta tyicuan caa cuví quichaha ndo chi ra Jesucristo, ta ndundií ndo chihin niñi ra. Na naquehen ndo cuaha ca cha vaha ta cha taxi ri coo añima ndo sahá maa Nyoo.

Noo cha yihí vaha iñi yo vatyí cuñihi yo

³ Sacahnu yo chi Nyoo Sutu Sutu Mañi yo Jesucristo vatyí ndahvi cuñí ra nyehé ra chi yo ta chahá ra cha nacacu chaa yo inga chaha tacuhva coo yo ñáyivi chaa cha ma naa ca maa. Ta yucuan cuví cha chaha cha cuita iñi yo cha cuñihi yo vatyí cha nandoto ra Jesucristo.

⁴ Ta Nyoo cuacuhva ra tandihi cha tahán chi chi yo cha cumí vaha ra nya andivi. Ta cuví chi noo cha ma naa ta ni ma tiví, ta ni ma ndahva chi tari ndahva ita.

⁵ Ta vatyí chinó iñi yo chi Nyoo maa ra sahá cumí chi yo chihin tunyee iñi ra nyacua nya cacu ndihi añima yo. Ta cusañaha ra chi yo ñáá cha cuñi chi catyi cha cacú yo nu cuandihí tyembu. Vatyí cha nyatú tuhva cuan chi yo.

⁶ Ta yucuan chaha sñi xaan cuñí ndo, vasi tahán chi cha nyehé ndo ndihi nuu tindoho suhva quivi.

⁷ Vatyí cha chinó iñi yo chi Nyoo, vaha ca ican saha xuhun cuaan. Vatyí xuhun cuaan cuví chi noo cha cundihí. Soco cuví

nyehé yo chihin ñuhu tatu vaha chi, vatyí chihin cha ihñi cundutya chi ta cucayu cha ña vaha yihí chihin chi. Soco ndoó xuhun cuaan vaha cuan. Tyicuan caa tucu nyehé Nyoo chi ndo tatu vaha chinó iñi ndo chi ra. Yucuan chaha nyehé ndo tindoho vityin. Soco tatu ña ndu uví iñi ndo cha chinó iñi ndo chi ra, cutuvi ndo nuu ra ta cusacahnu ñáyivi chi maa ra ta chi maa ndo quivi quichi Sutu Mañi yo Jesucristo inga chaha.

⁸ Nyoho cuñí ndo chi ra Jesucristo vasi ta nyehé ca ndo chi ra. Ta vasi ña nyehé ndo chi ra vityin, soco chinó iñi ndo chi ra, ta sñi xaan sñi xaan cuñí ndo nyacua ña ñihí ca ndo cuhva catyí ndo yoso cuhva cha sñi cuñí ndo.

⁹ Vatyí cucacu ndihi añima ndo ta yucuan cuví cha cuñihi ndo vatyí chinó iñi ndo chi Nyoo.

¹⁰ Siquí cuan canducu tuhun ra profeta Nyoo ta cha naha. Ta canducu xaan ra cuhva coto ra ñáá cha cuví cuan. Ta catyaa ra nu tutu cuenda tumañi iñi cha cucuhva Nyoo chi yo.

¹¹ Ta Tatyí li ra Cristo sacoto chi chi ra ñáá ndihi tindoho cunyehe ra Cristo, ta yaha cuan yoso caa cusanducahnu Nyoo chi ra. Ta profeta cuan canducu xaan ra cuhva cacoto ra yóo ra cucuvi ra Cristo cha cucuvi chi tyicuan caa, ta ama cucuvi tuhun cha catyi Tatyí li chi ra.

¹² Soco sacoto Nyoo chi ra vatyí tyiño cha casacuví ra, ñima cha vaha chi maa ra cuví, soco cha vaha chi maa yo cuví. Ta ican cuví cha sacoto ndi chi ndo vityin. Vatyí chihin tunyee iñi maa Tatyí li cha saquichi Nyoo, cahán ndi tuhun ra Cristo nuu ndo yoso caa sacacú ra chi yo. Ta ángel cacuñí xaan ra cacoto ra tuhun ihya.

Nacana Nyoo chi yo vatyí coo yo noo ñáyivi cachi

¹³ Yucuan chaha saha vaha ndo cuenda cha cua sacuvi ndo, ta cachi coo ndo. Quñi vaha iñi ndo cha cuacuhva Nyoo chi yo cha cuenda cha cuñí ra chi yo. Cuaha cuacuhva ra chi yo quivi quichi ra Jesucristo inga chaha.

¹⁴ Ta coo ndo tari noo sehe cha quichahá chi nu cahán sutu chi. Ma coo ndo tari chiyo ndo quivi ta ni cumañi ca cohon nuu

ndo chi Nyoo. Vatyí cha ña vaha cha cuñi coño ñuhu ndo chinyacá ñaha chi chi ndo.

¹⁵ Soco coo ndo noo ñayiví ndi, vatyí maa Nyoo, ra cha nacana chi ndo, ndi ra.

¹⁶ Vatyí tyicuan caa catyí Nyoo nu tutu ra. “Cundi ndo vatyí mai ndi”, catyí Nyoo.

¹⁷ Tatu tuhvá ndo chicán tahvi ndo chi Nyoo ta catyí ndo “Sutu Mañi yuhu” chi ra, saha ndo cuenda chi ndo ta saha ndo ñayiví chi ra cha ni ri ca cha iyó ndo siqui ñuhu ñayiví. Vatyí Nyoo ña sahá ra cuenda cuhva cahán yo. Soco sahá ra cuenda cuhva iyó noo noo yo, an cuví ri yo ñu tyayí, an cuví ri yo ñu ndahvi.

¹⁸ Nyoo nasama ra cuhva chiyó ndo, vatyí cuhva cuan ña vaha, Cuhva cha sanandoo Sutu chahnu ndo chi ndo cuví. Ta chitó ndo tyi Nyoo tyiyahvi ra tacuhva cuví cacu añima yo. Soco ñima chihin xuhun cuan o xuhun cuichin. Noo cha cundihi noo quiví cuví cuan.

¹⁹ Soco cha tyiyahvi maa Nyoo chihin niñi ra Cristo. Ta yucuan cuví noo cha vaha xaan ca. Ta ra Cristo cuví ra tari noo mbee luhlu quití vaha, ñahri nu pehe ti, tyicuan caa ra Cristo, ñahri cuatyí ra soco chihí ra.

²⁰ Ta nyata ni cumañi ca chino ñuhu ñayiví chicunyaa cuhva cha cucuvi chi ra Cristo tyehe caa. Soco ña cuví cha numi ri. Nyacua nya vityin nu cuandihí quiví, chinq cava tandihí cuan cha cuenda cha vaha chi maa yo.

²¹ Cha cuenda ra Cristo ta chinó iñi ndo chi Nyoo. Vatyí ican ra sanandoto chi ra Cristo cha yaha chihí ra. Ta sacahnú Nyoo chi ra. Ta yucuan chaha chinó vaha iñi ndo chi Nyoo tyi cunaquehen ra chi ndo.

²² Maa Tatyí Ii Nyoo tyinyeé chi ndo ta cuví quichahá ndo tuhun cha ndicha. Yucuan ta cuví cuñi ndo chi tahan ndo cuenda Nyoo chihin cha ni iñi ndo. Tyicuan caa cuñi chi cha cuñi ndo chi tahan ndo chihin cha vaha yihí añima ndo ta chihin tandihí fuerza ndo.

²³ Vatyí tari quiví cha nacacú chaa ndo, ñima tari cacu ndo chihin sutu ndo ihya ñuhu ñayiví, vatyí ra cuan numi ri chihi ra, soco nacacú chaa ndo chihin tuhun Nyoo cha ña tuhvá chihí vatyí tuhun Nyoo tyicuan ri maa iyó.

²⁴ Vatyí tyehe caa catyí tuhun Nyoo:

Tandihí ñayiví iyó siqui ñuhu ñayiví ihya cuví ñu tari cuhu.

Ta cha cahnu cha sacuví ñu cuví chi tari ita. Vatyí cuhu cuan na ityi, ta coyo ita cuan. (Ta tyicuan caa ñayiví, chihí ri ñu.)

²⁵ Soco tuhun Sutu Mañi yo tyicuan ri maa iyó.

Ican cuví tuhun cha cahan ndi chihin ndo: tuhun vaha cha sacacú Nyoo añima yo.

2

¹ Yucuan chaha na sandoo yo tandihí nuu cha quiñi caa. Ma sandavi ñaha yo chi ñayiví. Ma saha ri maa yo tyi vaha yo ta ña ndicha. Ma nyiyo iñi yo nyehe yo cha iyó chi inga ñayiví. Ñahri cuendu cahan yo.

² Soco tari cha lee cha ni cacú, nanducú vavaha chi cha caxin chi, tyicuan caa nducu ndo tuhun Nyoo tacuhva vatyí chihin cuan cuahnu ndo ta cohon nuu ca ndo chi Nyoo, nyacua nya cacu ndihí añima ndo,

³ tatu ndicha cha nacotó ndo vatyí Sutu Mañi yo, vaha xaan ñayiví cuví ra chihin yo.

Tari yuu nyitó, tyicuan caa cuví ra Cristo

⁴ Sayatyin ca ndo chi ndo chi Sutu Mañi yo. Vatyí cuví ra tari noo yuu nyitó. Ñayiví ña cuñi ñu cotyiño ñu yuu cuan. Soco Sutu Mañi yo cuví ra tari noo yuu tyaqui cha nacachí Nyoo.

⁵ Ta nyoho tucu cuví ndo tari yuu nyitó. Ta maa Nyoo tari noo ra savahá vehe cuví ra. Ta yucuan chaha cuhva ndo na sandu in ri ra chi ndo tacuhva cuví ndo tari noo vehe nu coo ra. Na cu in ri ndo ta cuhva ndo cha sandu ii Nyoo chi ndo tacuhva cuví sacuvi ndo tyiño nuu ra. Ta maa maa ri tyiño cha sacahnú ndo chi Nyoo cucunyaa ndo. Vatyí yucuan cuví cha tahán iñi Nyoo sacuvi yo chihin tunyee iñi maa ra Jesucristo.

⁶ Vatyí catyí tucu nuu tutu Nyoo tyehe caa:

Nyehe xihna, yuhu nacachí noo yuu cha chiñuhú ca ta tyaqui xaan ca, ta chaquín yuu cuan nu cuasavahi vehi nya Sión.

Ta ñu chinó iñi chi ra cha cuví yuu cuan, ma quehen ñu ticahan nuu. Tyicuan caa catyí Nyoo tuhun ra Cristo nuu tutu ra.

⁷ Yucuan chaha, cha cuenda yoó cha chinó iñi yo chi ra Cristo ra cuví yuu cuan, chiñuhú xaan ra chi yo. Soco cha cuenda ñu cha ña chinó iñi chi ra, cuví ra tari noo yuu cha cahán Nyoo tuhun nu tutu ra ta catyí chi tyehe caa:

Yuu cha ña cacuñi ra casavahá vehe co-tyiño ra, ican cuví yuu cha chiñuhú ca, catyí chi.

⁸ Ta catyí tucu chi:

Ican ra cuví yuu cha cuaha xaan ñu cunañi chaha ta nduva ñu.

Cuví ra noo cava cha sanduvá chi ñu, catyí chi nuu tutu Nyoo.

Tari cha nduvá ñu cuví cuan vatyí chiñi ñu tuhun Nyoo, ta ña quichahá ñu. Vatyí tyicuan caa nyaá vatyí cusacuvi ñu cuan.

Ñáyivi cha yihí cuenda Nyoo

⁹ Soco nyoho cuví ndo ñáyivi nacachi vaha Nyoo. Ta tari tata sutu cuví ndo tyi sacuví ndo tyiño nuu Nyoo, ra nyacá ñaha. Ta cuví tucu ndo noo ñáyivi ii nuu Nyoo. Vatyí cuví ndo ñáyivi chi maa ra, tacuhva vatyí cahan ndo tuhun cha vaha cha sacuví ra. Vatyí maa ra natava ra chi ndo nu ñaa iñi ta vityin cuahan ndo nu ndichin nu tyaqui.

¹⁰ Ta quivi ca cuan, cuví ndo ñáyivi cha ñima ri tuhun. Soco vityin ñáyivi chi Nyoo cuví ndo. Ta quivi cuan yori cundahvi cuñi nyehe chi ndo, soco vityin Nyoo cundahvi cuñi ra nyehé ra chi ndo.

Nu catyí ra Pedro vatyí coo yo, soco sacuvi yo tyiño nuu Nyoo

¹¹ Yañi, cuñi xain chi ndo. Chicá noo ndo siqui ñuhu ñáyivi ihya, soco ñima ca ra ñuhu ñáyivi ihya cuví ndo. Soco andivi cuví ñuu ndo. Yucuan chaha catyí chi ndo ma cuhva ndo ityi chi coño ñuhu ndo vatyí sacuvi ndo cha ña vaha cha cuñi chi. Vatyí tari quivi cañi tahan cuan chihin añima yo cuví cuan.

¹² Saha ndo cuenda cuhva iyó ndo mahñu ñu cha ña ñohó nuu Nyoo. Vatyí vasi cahán ña vaha ñu siqui ndo, ta catyí ñu vatyí ña vaha ndo, soco nyehé ñu cha vaha cha sacuví ndo ta cusacahnu ñu chi Nyoo nachaa chi quivi cha cuquichi nyehe ra cha sacuví yo.

¹³ Ta cha cuenda cha cuñi ndo chi Nyoo, quichaha ndo chi ra cuví tyiño ñuu nu iyó

ndo. Quichaha ndo chi ra cuví tyiño, cuví ri ra rey cahnu ca,

¹⁴ o cuví ri noo ra tachi rey chi vatyí tachi tuñi ra chi ra iyó cuatyí o tatu ñahri cuatyí yo ma tachi tuñi ra chi yo, soco cucatyí ra tyi vaha yo.

¹⁵ Vatyí Nyoo cuñi ra vatyí chihin cha vaha nyacuví ndo ta sandihi ñu tondo cha cuví yuhu ñu, ñu cahán cha ña ndicha vatyí ña chitó ñu tuhun cahán ñu.

¹⁶ Coo ndo tari cha yori nyacá ñaha chi ndo, soco ñima cha cuenda cuan ta cusacuvi tucu ndo cha ña vaha. Soco sacuvi ndo tyiño nuu Nyoo.

¹⁷ Saha ndo ñáyivi chi tandihi ñáyivi. Cuñi ndo chi ñu yihí cuenda Nyoo. Saha ndo cuenda vatyí Nyoo nyehé ra tandihi cha sacuví ndo. Saha ndo ñáyivi chi ra nyacá ñaha.

Uvi tahan cuhva nyehé yo tindoho

¹⁸ Nyoho cha cuví ndo musu, cuhva ndo cha cunyaca ñaha chitoho ndo chi ndo, ta quichaha ndo chi ra, vasi xaan ra o vasi vaha ra.

¹⁹ Vatyí tatu cunyeé yo tindoho cha sanyehé ñáyivi chi yo cha cuenda cha sacuví yo cha vaha nuu Nyoo, yucuan cuví cha chaá nuu Nyoo.

²⁰ Soco tatu sacuví ndo noo cha ña vaha ta tachi tuñi ñu chi ndo, ñahri maa tuhun cha cunyeé ndo tindoho cha nyehé ndo cha cuenda cuan. Soco tatu nyehé ndo tindoho cha cuenda cha sacuví ndo cha vaha, ta cunyeé ndo chihin cha cama iñi ndo, ican ihya cuví cha vaha nuu Nyoo.

²¹ Vatyí nacana Nyoo chi yo vatyí coo yo tyehe caa. Vatyí tyicuan caa tucu nyehe ra Cristo tindoho cha cuenda maa yo, na cutuhva yo ta quehen yo cha caá ra.

²² Maa ra ni noo cuatyí ña sacuvi ra. Ni noo chaha ña sandavi ñaha ra chi ninoo ñáyivi.

²³ Cuhva cha cahán ñu chi ra, ña nacahán xaan ra. Cuhva cha nyehé ra tindoho, ña tyanahá ra chi ñu. Soco natyaa ra chi ra ndaha Nyoo, vatyí Nyoo tuhvá ra sacutuñi ra chi ñáyivi chihin cha ndaa ta chihin cha ndicha.

²⁴ Vatyí chata maa ra Cristo nicoso ndi maa cuatyí tandihi yo cuhva cha tacaá ra nu cruzi cuan. Tyicuan caa cuví tacuhva

vatyí ma sacuvi ca yo cuatyí, ta coo yo noo ñayiví vaha. Vatyí cha cuenda cha ñicuehe maa ra, yoó nduvaha yo.

²⁵ Vatyí quiví cuan chica noo ndo tari mbee cha cuanaá. Soco vityin nacuhva cuenda ndo chi ndo chi ra Cristo, ra cuví pastor cha sahá cuenda añima yo.

3

Yoso caa tahán chi coo ñu tandaha

¹ Tyicuan caa tucu nyoho, ñu iyó yíi. Quichaha ndo chi yíi ndo. Vatyí tatu ña quichahá ra tuhun Nyoo soco cunachino íñi ra cha cuenda cha nyehé ra cuhva iyó ndo. Ta ña chiñuhú ri cha cuví yuhu xaan ndo chihin ra.

² Vatyí nyehé ra tyi cachi iyó ndo ta sahá ndo ñáyiví chi ra.

³ Ta ma caca íñi ndo tuhun cha sandutyakuí ndo chi ndo cuhva nyehé ndo, cuví ri chihin cha iyo xaan sanduvií ndo xiñi ndo, o cuví ri cha sandutyakuí ndo chi ndo chihin cha tyaa ndo xuhun cuaan chi ndo, o cuví ri cha cuihno ndo sahma vaha xaan. Ma nducu ndo tandihí cuan.

⁴ Soco nducu ndo cuhva ndutyakuí ndo chihin cuhva vaha iyó ndo. Vatyí cha vita íñi yo ta cha taxi ri iyó yo, yucuan cuví cha quitá chichi añima yo. Ta yucuan ña tuhvá cuan tiví. Vatyí ñahri nonga cha tyaquí ca nuu Nyoo tari cuan.

⁵ Vatyí tyicuan caa cuhva chiyo ñusihí cha yíhí íñi chi Nyoo ta cha naha. Tyicuan caa sandutyakuí ñu chi ñu, ta quichaha ñu chi yíi ñu.

⁶ Tari cu Sara, quichaha ña chi ra Abraham yíi ña. Ta catyí ña: “Tata”, chi ra. Ta nyoho tari sehe ña cuví chi ndo tatu sacuví ndo cha vaha tari maa ña. Ta ñahri cha yuhví ndo.

⁷ Ta tyicuan caa tucu nyoho ra iyó ñasihí. Cutuñi íñi ndo cuhva coo ndo chihin ñasihí ndo. Ta saha ndo ñáyiví chi ña, ñima vatyí yíca ca ña cha nuu nyoho. Soco vatyí ñin ri naquehen ndo tumañi íñi cha chahá Nyoo chi ndo. Ta yucuan cuví ñáyiví iyó ndo. Vaha coo ndo tyehe caa, tacuhva vatyí ñin cuenda Nyoo tuhun chicán tahvi ndo chi ra.

Nu catyí ra Pedro yoso caa tahán chi coo yo

⁸ Nu ndihí tuhun, cuñí chi cha ñin ri cuhva caca xiñi tandihí ndo. Ta cundahvi cuñi ndo nyehe ndo chi tahan ndo. Cuñi ndo chi tahan ndo cuenda Nyoo tari cha yañi ndo cuví. Vita cahan ndo chihin ñu. Ta ma cahnú saha ndo chi ndo. Vaha ñáyiví cuví ndo.

⁹ Ma sacuvi ndo cha ña vaha chihin ñu sacuví cha ña vaha chihin ndo. Ni ma cahan ndo chi ñu tatu cahán ñu chi ndo. Soco cha vaha sacuvi ndo chihin ñu. Vatyí Nyoo nacana ra chi ndo vatyí cunaquehen ndo cha vaha cha iyó chi ra.

¹⁰ Vatyí catyí tuhun Nyoo tyehe caa:

Ñu cha cuñí coo noo ñáyiví chihin tusí íñi, cuñí chi saha ñu cuenda cuhva cahán ñu.

Ta ma cahan ñu cha ña vaha, ta ni ma cahan ñu cuendu.

¹¹ Ta cuñí chi cha sandoo ñu cha ña vaha ta sacuví ñu cha vaha.

Nanducu ñu cuhva coo taxi ri ñu.

Ta ma saña ñu.

¹² Vatyí Sutu Mañi yo sahá cuenda ra chi ñu vaha.

Ta tyasohó ra nu chicán tahvi ñu chi ra.

Soco ñu sacuví cha ña vaha, xaan cuñí ra nyehé ra chi ñu.

¹³ ¿Yóo cha cuví sacuvi cha ña vaha chihin ndo tatu nyoho tyicuan ri nducú ndo cuhva sacuvi ndo cha vaha?

¹⁴ Soco vasi nyehé ndo tindoho cha cuenda cha sacuví ndo cha vaha, soco cucusí cuñi ndo. Ta ni ma nayuhvi ndo tatu tyanaha ñáyiví chi ndo.

¹⁵ Soco chichi añima ndo sacahnú ndo chi ra Cristo ta cuhva ndo na cunyaca ñaha ra chi ndo. Tyicuan ri caca íñi ndo tuhun Nyoo tacuhva vatyí tatu ndaca tuhun noo ñu chi ndo ñáá tuhun chinó íñi ndo chi ra, soco cuví nacuhva ndo cuenda chi ñu chihin cha ña cahnú saha ndo chi ndo ta chihin cha ndicha sahá ndo ñáyiví chi ra.

¹⁶ Cachi coo ndo tacuhva cha ma yuhvi añima ndo nuu Nyoo, vatyí tatu cahán ña vaha ñáyiví síqui ndo cha cuenda cuhva vaha iyó ndo chihin tuhun ra Cristo, soco suri maa ñu cucahan nuu ñu cha cuenda tuhun cahan ñu síqui ndo.

¹⁷ Tatu maa Nyoo cuñí ra cha nyehe yo tindoho, vaha ca cha nyehé yo cha cuenda cha sacuví yo cha vaha ta ñima ca cha cuenda cha sacuví yo cha ña vaha.

18 Vatyí suri ra Cristo nyehe ra tindocho ta chihí ra in chaha cuiri cha cuenda cuatyí yo. Ra vaha cuví ra ta chihí ra cha cuenda yo ñu iyó cuatyí. Vatyí tyicuan caa nuña ra ityi nachaa yo ityi nuu Nyoo. Chihí coño ñuhu ra, soco nandoto tucu ra chihin Tatyí li ra.

19 Tyicuan ta chihin Tatyí li ra chahan ra chicahan ra chihin aña cha ñohó vehe caa.

20 Ta ican ñu cuan cuví ñu ña quichaha chi Nyoo quivi chiyó ra Noé ta tyembu chahnu. Ta nyatú Nyoo chi ñu nandu uvi iñi ñu cuatyí ñu cha ni ri ca cha cuahan chino barcu cha savaha ra Noé. Soco ña cuaha ñu cacu quivi sahví ndutya ñuhu ñayivi. Uña tahan ri ñu cacu chihin ndutya vatyí nandaq barcu nu ñohó ñu nu ndutya cuan.

21 Ta tyicuan caa tucu maa yo tari quivi cacu yo chihin ndutya nu condutya yo. Cacu yo soco ñima cha cuenda cha nacatya yo coño ñuhu mecu yo. Soco cha cuenda cha chicán tahvi yo chi Nyoo na sanduvii ra aña yo ta sacacu ra chi yo cha cuenda cha nandoto ra Cristo.

22 Ta nandaa xica ra andivi, ta nyaá ra chiyo vaha Nyoo. Nyacá ñaha ra chi ángel ta tandihí cha nyacá ñaha chi ñáyivi.

4

Na sacuvi yo tyiño nuu tahan yo yoso cuhva chaha Nyoo chi yo

1 Yucuan chaha tari nyehe ra Cristo tindocho chihin coño ñuhu ra, sandunyeen do iñi ndo tacuhva cuví cunyeen do nyehé tucu nyoho tindocho. Vatyí ñu nyehé tindocho chihin coño ñuhu, ña sacuví ca ñu cha quiñi caa cha cuñi coño ñuhu ñu.

2 Tacuhva vatyí cuvi coo ñu cuhva cuñi Nyoo. Ta ma sacuvi ca ñu cuhva cuñi coño ñuhu ñu.

3 Vityin cha yaha chinyacuvi xaan ndo cha quiñi caa nu quichi chi. Sacuvi ndo cuhva tahan iñi ñu ña ñohó nuu Nyoo. Ta chiyo ndo yoso cuhva cuñi ndo, cuaha viciu sacuvi ndo, cuaha cha quichi cuvi iñi coño ñuhu ndo cha quiñi caa chinyacuvi ndo. Chiñi ndo chihin ndixi. Maa maa ri vico chiyo ndo. Ta quiñi xaan sacahnu ndo xitohyo cha ña tahan chi sacahnú ndo.

4 Ta vityin iyo cuñi ñu ña ñohó nuu Nyoo vatyí ña cutahán ca ndo chihin ñu ta ña sacuví ca ndo cha quiñi caa cuan. Ta yucuan chaha cahán ña vaha ñu siqui ndo.

5 Soco nyaá nacuhva ñu cuenda chi ra cha nyatú tuhva quivi sacutuñi ra chi ñu nyitó ta chi ñu chihí.

6 Yucuan chaha sacoto ra Cristo tuhun vaha chi ñu ndiyi ñandihí. Vatyí tacuhva cuvi coo aña ñu tari iyó Nyoo, vasi cha cutuñi chi ñu tari cutuñi chi tandihí ñáyivi iyó siqui ñuhu ñayivi quivi chihí coño ñuhu ñu.

7 Soco cha cuyatyin cha cundihí tandihí maa. Yucuan chaha cachi coo ndo ta cunyaa vaha ndo tyiño cha chicán tahvi ndo.

8 Ta cha xihna ri tahan chi cha cuñi xaan ndo chi tahan ndo. Vatyí tatu cuñi yo chi tahan yo, cuaha xaan chaha cusaha yo ticahnu iñi chi ñu, tyi maa Nyoo cuñi ra chi yo ta cuaha xaan chaha sahá ra ticahnu iñi chi yo.

9 Tatu chaá noo ñáyivi vehe ndo, vaha tyiñuhu ndo chi ñu ta ma cuñi ndo tyi sayangá ñu chi ndo.

10 Ta tahan tahan yo na sacuvi yo tyiño nuu inga yo, yoso cuhva cha chahá Nyoo chi yo. Vatyí cuñi chi cha cotyiño yo sin sin cha vaha cha chahá ra chi noo noo yo cha cuenda cha vaha chi inga tahan yo.

11 Tatu chaha Nyoo vatyí ñihi vahun tuhun cahun chihin ñáyivi, cahan soco maa maa ri tuhun cha chahá Nyoo. Tatu chaha ra tyi sacuvun tyiño nuu ñáyivi, na sacuvun chihin fuerza cha chahá ra. Tandihí cha sacuví ndo, sacuvi ndo tacuhva vatyí chihin tandihí cha nyacuví ndo sacahnú ndo chi Nyoo cha cuenda ra Jesucristo. Chi maa Nyoo tahan chi sacahnu yo. Ta na cunyaca ñaha ra chihin tunyee iñi ra tyicuan ri maa. Ta na cuvi chi tyicuan caa.

Cuvi cusí cuñi yo tatu nyehé yo tindocho cha cuenda ra Cristo

12 Yañi, cuñi xain chi ndo. Ma iyo xaan cuñi ndo tatu vachi tindocho ñihi siqui ndo. Ma cuñi ndo vatyí ña tahan chi nyehe ndo tindocho.

13 Soco cusí cuñi ndo vatyí cuvi nyehe ndo tindocho tari nyehe ra Cristo tindocho. Vatyí tyicuan caa ta cuvi cusí tucu cuñi

ndo na nyehe ndo cha cahnu cuví ra quiví cuquichi ra.

¹⁴ Tatu cahán ña vaha ñu siqui ndo vatyi nyicón ndo chi ra Cristo, cusí cuñi ndo, vatyi tyaqui xaan nyaá Tatyí li chihin ndo. Maa ñu cuan cahán ña vaha ñu siqui ra Cristo, soco nyoho sacahnú ndo chi ra.

¹⁵ Soco tatu nyehé ndo tindoho cha tyicuan caa, vaha, ta ñima ca cha nyehé ndo tindoho cha cuenda cha chahñi ndo, o cha suhú ndo, o cha sacuvi ndo cha ña vaha, o cha tyihí ndo chi ndo nu ña tahán chi.

¹⁶ Soco tatu nyehé ndo tindoho cha cuenda cha yihí ndo cuenda ra Cristo, ma cucahan nuu ndo. Soco sacahnu ndo chi Nyoo, vatyi chahá chi cuhva nyehe ndo chiin tindoho cha cuenda maa ra Cristo.

¹⁷ Vatyi cha cha quiví cha quichaha sacutuñi Nyoo chi tandihí ñáyivi. Ta xihna ca chi yoó cha cuví yo ñu yihí cuenda ra. Soco tatu tyehe caa tachí tuñi Nyoo chiin ri chi maa yo, ¿yoso caa cucuvi chi ñu cha ña quichahá tuhun Nyoo?

¹⁸ Tatu yí cacú añima ñu vaha, ¿yoso caa cucuvi chi ñu quiñi iyó, ñu iyó cuatyí?

¹⁹ Yucuan chaha tatu nyehé ndo tindoho cuhva cuñi Nyoo, cuñi chí cha sañihi ca ndo sacuvi ndo cha vaha. Ta tyaa ndo añima ndo ndaha Nyoo. Maa ra savaha chi yo, ta maa ra ndicha tuhun cahán ra ta cusacuví ra tari cuhva catyí ra.

5

Nu chahá ra Pedro tuhun chi yo

¹ Yucuan chaha chahí tuhun chi ra chahnu nu nyicú ndo. Vatyi ra chahnu cuví tucu yuhu. Ta cuví cha ndaa vatyi nyehí tandihí tindoho cha cuví chi ra Cristo. Ta cucutahin chihin tandihí ca ra quiví cunyicu yo chihin ra Cristo na quichi ra inga chaha chihin cha cahnu cuví ra.

² Tari noo ra sahá cumi mbee, tyicuan caa saha cumi ndo chi ñu yihí cuenda Nyoo ñu yihí ndaha ndo. Ta sacuvi ndo chihin cha iyo vaha iñi ndo tari cuhva cuñi Nyoo, ta ñima chihin fuerza. Ta ni ñima cha cuenda cha cuñi ndo xuhun. Soco sacuvi ndo tyiño chihin cha ñi iñi ndo.

³ Ta ñima tari cha maa ndo nyacá ñaha ndo chi ñu sahá cumi ndo. Soco chihin cuhva vaha iyó ndo chihin Nyoo, sañaha

ndo chi ñu cuví mbee sana Nyoo yoso caa tahán chi coo ñu.

⁴ Ta quiví quichi ra cuví nuu chi ra sahá cumi mbee, cunaquehen ndo noo cha vaha, noo cha tyaqui cha cucuhva Nyoo chi ndo. Noo cha ma tiví ca maa.

⁵ Tyicuan caa tucu nyoho ñu tyivaa, quichaha ndo chi ñu chahnu. Ta ñima ñi ri maa ñu tyivaa soco tandihí ri ndo quichaha ndo chi tahan ndo. Ta ndahvi saha ndo añima ndo. Vatyi:

Nyoo ña cuñi nyehe ra chi ñu cahnu sahá chi.

Soco tyinyeé ra chi ñu ndahvi sahá chii.

⁶ Ndahvi saha ndo añima ndo nuu Nyoo. Ta cuhva ndo chi ndo na cunyaca ñaha ra chí ndo tacuhva cuvi sacahnu ra chí ndo quiví cha tahán chi. Tyi maa ra iyó xaan fuerza chi ra.

⁷ Cuhva ndo tandihí tindoho cha chicá xiñi ndo chi Nyoo. Vatyi maa ra ñiñi cuñi ra chihin ndo.

⁸ Cachi cohon iñi ndo ta saha vaha ndo cuenda nya cha vaha ta nya cha ña vaha, vatyi cuhna, ra xaan iñi chí ndo, chicá noo ra tari noo ndicaha xaan nanducú ti yoó chí cachi ti, tyicuan caa chicá noo ra ña vaha, nducú xaan ra cuhva saha ganaa ra chí ndo.

⁹ Soco ñihi cunjanyaa ndo chihin cha ñi iñi ndo chinó iñi ndo chí Nyoo tacuhva cuvi chasaha ndo chí ra ña vaha. Ta nacoto ndo vatyi tandihí ñu ñohó cuenda ra Cristo nicahnu ñuhu ñayivi, nyehé tucu ñu cuan tindoho tari maa ndo.

¹⁰ Soco Nyoo tyinyeé ra chí yo, ta cha yaha nyehe ndo tindoho suhva ri quiví, Nyoo cusanducuti ca ra chí ndo, ñihi ca cunicunyaa ndo chihin ra ta cunacuhva ca ra fuerza chí ndo. Ta ican Nyoo cuví ra chahá tandihí cha vaha chí yo ta maa ra cana chí yo tyi cu ñi ri yo chihin ra Cristo tacuhva coo yo nu tyaqui chihin ra tyicuan ri maa.

¹¹ Na sacahnu yo chí ra ta na cunyaca ñaha maa ra tyicuan ri maa. Ta na cuví chí tyicuan caa.

Nu ndihí chahá ra Pedro nocumi chí ñu

¹² Sacuhín carta ihya chí ndo chihin ra Silvano, yañi yo. Ta cha cuenda chí yuhu, maa ra cuví noo ra ñi xaan iñi nyicón chí ra Cristo. Tyaj suhva nu tutu ihya chí

ndo vatyí chahí tuhun chi ndo ta catyí chi ndo vatyí cha vaha cha ñihí ndo cuví cha ndicha vaha cha chahá Nyoo chi yo cha cuenda cha cuñí ra chi yo. Ma saña ndo ihya.

¹³ Vachi nocumi chi ndo sahá ñu yihí cuenda Nyoo nya nu cuví ityi Babilonia. Tari nacachi Nyoo chi maa ndo, tyicuan caa nacachi tucu ra chi ñu cuan. Ta vachi nonga nocumi sahá ra Marcos sehi cha cuenda Sutu Mañi yo.

¹⁴ Cuhva ndo nocumi chi noo noo tahan yo chihin cha cuñí ndo chi ñu.

Na coo cha taxi ri cuñi añima tandihí ri ndo cha ñn ri cuví ndo chihin ra Jesucristo.

Ta na cuvi chi tyicuan caa.

Carta Cha Cu Uvi Cha Sacuhun Ra Apóstol Pedro Chi Ñáyivi Yihí Cuenda Nyoo

Nu tyaá ra Pedro noo tutu chi ñu yihí cuenda Nyoo

¹ Yuhu ra Simón Pedro sacuví tyiño nuu ra Jesucristo. Ta cuví noo apóstol chi ra. Cuñí chi catyí tyi tachí ra chíi vatyí caque tyiño ra. Tyaí tutu ihya chi nyoho cha chinó iñi ndo chi Nyoo tari cuhva cha tyaquí chinó iñi nyuhu. Vatyí yucuan cuví cha chino iñi yo vatyí vaha ra Jesucristo, ra cuví Nyoo, ra sacacú chi yo.

² Na naquehen ca ndo cha vaha cha chahá Nyoo chi yo. Ta na coo ca cha taxi ri aña ndo cha cuenda cha ñohó nuu ndo chi Nyoo ta chí Sutu Mañi yo Jesús.

Yoso caa coo ñu yihí cuenda Nyoo

³ Nyoo chihin tunyee iñi ra, chaha ra tandihí cha chiñuhú chi yo tacuhva cuvi coo cachi yo nuu ra ta saha yo ñáyivi chi ra. Tandihí ihya ñihí yo cha cuenda cha chicohon nuu yo chí ra cha cana chí yo. Vatyí chicohon nuu yo tyi cahnu cuví ra ta tyaquí xaan cha sacuví ra.

⁴ Ta chihin tandihí ihya, chaha ra cha catyí ra tyi cucuhva ra chí yo. Ta cahnu xaan ta yahvi xaan nyaá cuan. Vatyí cha cuenda ihya nanduvi yo tari maa ra. Vatyí sacanyaha ra cha quiñi caa cha quichí cuvi iñi yo, ta ma tiví yo tari tiví ñáyivi iyó siqui ñuhu ñayivi ihya.

⁵ Ta yucuan chaha cuñí chí cha chinó ca iñi yo chí Nyoo ta nducu yo cuhva cha coo cachi yo. Yaha cuan cuñí chí cha nducu yo cuhva ta cutuñi vaha iñi yo cuhva cuñi Nyoo chihin yo.

⁶ Ta yaha cuan cuñí chí cha saniñi yo cha cunyaca ñaha yo coño ñuhu yo ta cuhva chicá xiñi yo. Yaha cuan ta nducu yo cuhva cha cucama iñi yo. Yaha cuan ta nducu yo cuhva cha cuiti ca coo yo nuu Nyoo.

⁷ Yaha cuan ta nducu yo cuhva cha cuñi yo chí tahan yo. Yaha cuan nducu yo cuhva

cha cuvita xaan aña yo chihin tandihí ñáyivi.

⁸ Tatu tyehe caa iyó ndo ta tyicuan ri nducú ndo cuhva cha coo tandihí ihya chí ndo, Nyoo cucotyíño xaan ra chí ndo. Ta tatu sacuvi ndo tyehe caa, ña caha xaan ri chicohon nuu ndo chí Sutu Mañi yo Jesucristo.

⁹ Soco ñu cha ñahri ihya iyó chí, cuví ñu tari noo ra cuaa. Ña cutuñi iñi ñu cha tahan chí coto ñu. Ta naa iñi ñu tyi sandachí Nyoo cuatyí ñu ta ityi chata ca.

¹⁰ Yucuan chaha yañi, saniñi ndo coo ndo tyehe caa. Tyicuan ta cundicha vaha tyi cana Nyoo chí ndo ta nacachí ra chí ndo. Vatyí tatu sacuví ndo tyehe caa, ma canacava maa ndo.

¹¹ Tyicuan caa ta totyehe ri cuhva Nyoo cha quihvi ndo nu nyacá ñaha Sutu Mañi yo Jesucristo tyicuan ri maa. Maa ra cuvi ra sacacú chí yo.

¹² Yucuan chaha cuasanícohon que iñi ndo tuhun ihya, vasi cha chitó ndo, ta ñi iñi ndo sacuví ndo tuhun ndicha cha cutuhva ndo.

¹³ Ta cuhva cha cuñí mai, vatyí cha ñi ri ca cha iyé, vaha sanícohin iñi ndo coto naa iñi ndo tuhun ihya.

¹⁴ Vatyí chité tyi ña naha ca ta cusandoi ñayivi ihya. Vatyí tyicuan caa sacoto Sutu Mañi yo Jesucristo chíi.

¹⁵ Soco cuasaniñi tacuhva vatyí tatu yaha chihí soco nicohón iñi ndo tuhun ihya.

Nu nacatyí ra Pedro yoso caa nyehe ra cha cahnu cuvi ra Cristo

¹⁶ Ñima tyisu ri canatava ndi quivi sacoto ndi tuhun ra Jesucristo chí ndo. Vatyí cha nyehe vaha ndi chihin chíi nuu ndi cuví. Vatyí nyehe ndi cha cahnu xaan cuví Sutu Mañi yo Jesucristo. Ta sacoto ndi chí ndo tyi iyó xaan tunyee iñi chí ra ta cuquichi ra inga chaha.

¹⁷ Vatyí nyehe ndi nu sacahnu xaan Nyoo Sutu yo chí ra. Ta tyaquí xaan tyaquí xaan cuvi nu cahan Nyoo ta catyí ra: “Ican ihya Sehi. Ta cuñí xain chí ra. Ta si cuñí chihin ra”, catyí Nyoo tuhun ra Jesús quivi cuan.

¹⁸ Ta nyuhu chiñi ndi ndusu Nyoo cha quichí ityi andivi quivi cha nyicú ndi chihin Sutu Mañi yo nu yucu ii cuan.

19 Ta siin ri cumí yo nonga tuhun cha ndicha vaha cha catyaa ra profeta. Nyaá vaha nu tutu nu cahán chi tuhun ra Cristo. Ta vaha sacuví ndo tatu quichahá vaha ndo tuhun ihya. Vatyí cuví chi tari noo ñuhú ndichin cha cayú nu ñaa iñi nyacua nya cundichin ta caña ra Cristo tari cañá tiño cahnu cha ñaa ca, vatyí sandichín ra añima yo.

20 Soco coto vaha ndo vatyí cha minoo tuhun ri yo, ma cuví catyí yo ñáá cha cuñí chi catyí noo tuhun cha nyaá nu tutu Nyoo.

21 Vatyí ra cacuvi profeta ta cha naha, ña cahan ra cuhva cuñí ri maa ra. Soco cuhva cuñí Nyoo cahan ra. Ta Tatyí li saquehen ityi chi ra.

2

Ra casañahá cha ña ndicha (Judas 4-13)

1 Soco cachiyó tucu ra profeta cuendu nu nyicu ñu Israel ta cha naha, cacatyí ra tyí cuví ra profeta Nyoo. Ta tyicuan caa cuacoo tucu ra sacuahá ra sañahá cuendu nu nyicu ndo. Xehe ri cuasañaha ra tuhun cha ña ndicha cha cuví sativí chi ndo. Ta cuacatyí ra tyí ña ndicha Sutu Mañi yo ra sacacú chi ra. Yucuan chaha numi ri cucunaa ra cuan.

2 Ta cuaha xaan ñu cucunyicon ñu chi ra chihin cha quiñi caa cha sacuví ra. Ta cuaha xaan ñu cuahan ña vaha ñu siqui tuhun cha ndicha vaha ra Cristo.

3 Ta chaha cha iyo cuñi ra xuhun, ta cusandavi ñaha ra chi ndo chihin cha casañahá ra maa ri cha ña ndicha. Soco nyatú Sutu Mañi yo tachi tuñi ra chi ra vatyí cha naha iyó maa tuhun cha cunaa ra.

4 Vatyí ni ri chi ángel cha chicoo cuatyí quiví cuan ta ña saha Nyoo ticahnu iñi. Soco tuchí ra chi ra anyaya. Ta sandoo ra chi ra nu ñaa iñi, nuñí ra chihin cadena nyacua nya quiví cutuñi chi ra nuu Nyoo.

5 Ta ni ña saha Nyoo ticahnu iñi chi ñu chiyo ta cha naha. Yucuan chaha tachi ra savi xaan siqui ñáyiví quiñi iyó cuan. Ta sacacú ra chi noo tuhun ri maa ra Noé, ra cha cahan tuhun vatyí coo yo noo ñáyiví cachi. Ta cacú tucu ucha ca ñáyiví ñandihí.

6 Ta tyicuan caa tucu sacunaa Nyoo ñuu Sodoma ta ñuu Gomorra. Vatyí chahmi

ra nyacua nya cha ndihí maa nduví ñiyaa. Tacuhva vatyí cunyehe ñáyiví quiñi iyó cha cucoo nu cuahan ca chi.

7 Soco sacacú ra chi ra Lot vatyí cuví ra noo ra vaha nuu ra. Ta cuihya cuñí ra Lot nyehé ra cuhva iyó ñu quiñi iyó cuan.

8 Ta ndi quiví cuihya cuñi añima ra Lot quiví chiyo ra ñuu cuan, cha cuenda cha nyehé ra ta chiñi ra cha quiñi caa nyacuví ñu cuan. Vatyí maa ra, ra vaha cuví ra. Ta maa ñu maa maa ri cha ña vaha nyacuví ñu.

9 Ta tyicuan caa cuví sacacu Nyoo chi yo tatu iyó yo cuhva cuñi ra. Ta ñu quiñi iyó naquehén vaha Nyoo chi ñu vatyí cutachi tuñi ra chi ñu quiví cutuñi chi ñu nuu ra.

10 Ta yaha ca cutachi tuñi Nyoo chi ñu nyicón cha ña vaha cha cuñi coño ñuhu, ñu ña cuñi cha cunyaca ñaha Sutu Mañi yo chi. Ta cahnú sahá ñu chi ñu ta sacuví ñu maa ri cuhva cuñi maa ñu. Ta ñu cuan ña yuhví ñu cahan ña vaha ñu siqui ra nahnu ca ican saha maa ñu cuví ri siqui ángel, cuví ri siqui tatyí ña vaha, cuví ri siqui Nyoo.

11 Soco ángel, cahnú ca cuví ra cha nuu ñáyiví, soco ña cacañá iñi ra cahan ña vaha ra siqui ra nahnu ca cuan chihin nuu Sutu Mañi yo.

12 Soco ra cahán cuendu nu nyicú ndo cuví ra tari quití cha ña cutuñi iñi ta sacuví ti cuhva cuñi maa ti. Vatyí quití, ¿ñáá cuenda iyó ti? Iyó ti vatyí tñin rayí chi ti, ta cahñi ra chi ti. Tyicuan caa maa ra cuan. Cacahán ña vaha ra siqui cha ña cutuñi iñi ra. Ta cucúvi ra tari chihí quití.

13 Cunyehe ra tindoho tari sanyehé maa ra tindoho chi inga ñáyiví. Ta sii xaan cacuñí ra chihin cha quiñi caá nyacuví ra nu tuvi. Ticahan nuu chahá ra, tatu cha cutahan ra chihin ndo nu iyó ndo vico. Nyaá vavaha ra tusí iñi. Soco ña ndicha cuhva sañahá ra.

14 Ta tandihí ri ñusihí cha nyehé ra ta quichi cuví iñi ra. Ña chitatú ra cha casacuvi ra cha quiñi caa. Casandaví ñaha ra chi ñu ña ñihí nyaá chihin Nyoo. Vatyí xaan ra cha nducu ra cuhva maa maa ri cha cuenda maa ra. Nyaá cha cunaa ndihí ra minoo quiví.

15 Casandoo ra cuan ityi vaha ta naquehen ra ityi nu cucunaa ra. Casacuví ra tari sacuví ra Balaam sehe ra Beor.

Vatyi cuñí ra Balaam saha ganaa ra xuhun chihin cha ña vaha cha nyacuví ra.

¹⁶ Tyicuan ta noo burra nacahan ti chihin ra, tari cahán ñáyiví, ta ña chaha ti cha cahun ca ra Balaam chihin cuhva loco chicá xiñi ra.

¹⁷ Ta tyicuan caa tucu maa ra cha nyicú chihin ndo. Cacuví ra tari noo yavi ityi cha ñahri ndutya ñohó. Ta cuví ra tari noo vico cha tyandaha tatyí ñihi chi. Soco cha nyaá cha cohon ra nu ñaa iñi cahnu tyicuan ri maa cha cuenda cha nyacuví ra tyicuan caa.

¹⁸ Yaa vavaha cahán ra soco tandihí tuhun cahán ra cha ñima ri tuhun cuví. Ta chihin vicio ta chihin cha quichi cuvi iñi coño ñuhu yo casandaví ñaha ra chi ñu cha yaha quita mahñu cha quiñi caa.

¹⁹ Ta tyiyuhú ndihí ra chi ñu na cunyacuvi ca ñu cha quiñi caa vatyi yori nyacá ñaha chi ñu, catyí ra. Soco suri maa ra chahá ra cha cunyaca ñaha cha quiñi caa chi ra. Vatyi tatu chahá yo cha cunyaca ñaha noo cha cunyaca ñaha chi yo, musu cuan cuví chi yo.

²⁰ Vatyi ñu cha chicohon nuu chi Sutu Mañi yo Jesucristo, ra sacacú chi yo, cha yaha sandoo ñu cha quiñi caa ñáyiví ihya. Soco tatu natin tucu ñu tuhun ñáyiví ihya inga chaha, quiñi ca nanduví ñu ta ñima ca ta cuvi maa.

²¹ Vaha taxin ca tyehe ta ña chicohon nuu ñu ityi vaha cuan, ta ñima ca cha yaha chicohon nuu ñu ta nacuhva ñu chata ñu tuhun cha chaha Nyoo chi ñu.

²² Soco cuví chi ñu tari cuhva catyí noo tuhun cha iyó ñáyiví: “Ina nduchan ti, ta nacachí tucu ti cha nduchan ti. Ta quini chityí ti, ta ndihví tucu ti nu nyahyu inga chaha.”

3

Quiví cuquichi tucu Sutu Mañi yo

¹ Yañi, cuñí xain chi ndo. Ta ihya cuví carta cha cu uvi sacuhín chi ndo. Ta nu ninduvi tahan carta chahí tuhun chi ndo tacuhva vatyi caca vaha xiñi ndo.

² Ta ñicohon iñi ndo tuhun cha cahan ra cacuví profeta Nyoo, ta cha naha. Ta ñicohon tucu iñi ndo tuhun cha sañaha nyuhu chi ndo. Vatyi cuví ndi apóstol

cuenda Sutu Mañi yo Jesucristo ra sacacú chi yo.

³ Coto xihna ndo vatyi nu cundihí ca chi quiví cuquichi ñáyiví cucuacu nyaa ñu tuhun Sutu Mañi yo. Cucoo ñu yoso cuhva cha quiñi caa cha cuñí coño ñuhu ñu.

⁴ Ta cucatyí ñu: “Ra Jesucristo catyí ra vatyi cuquichi ra inga chaha. ¿Ta nya nyaá ra vityin? Vatyi nyata cachihí sutu chahnu yo ta nyata chinó ñuhu ñáyiví ta nya vityin ta cuhva caa ri maa”, cucatyí ñu chi ndo.

⁵ Vatyi maa ñu ña cuñí ñu coto ñu vatyi ta tyembu chahnu cahan Nyoo ta savaha ra andiví ta ñuhu ñáyiví. Quita ñuhu ñáyiví chichi ndutya ta chihin ndutya chinó chí.

⁶ Soco cha yaha savaha Nyoo ñuhu ñáyiví ta suri chihin ndutya cuanaa ñáyiví cuan quiví coon savi xaan.

⁷ Soco andiví ta ñuhu ñáyiví cha iyó vityin sahá cumi vaha Nyoo vatyi suri chihin ñuhu cucayu chi quiví cutuñi chi ñáyiví nuu ra. Tyicuan ta ñuhu cha cayu cuan cusanaa chi chi ñu ña quichahá chi Nyoo.

⁸ Soco yañi, cuñí xain chi ndo. Ta cuñí vatyi ma naa iñi ndo vatyi cha cuenda Sutu Mañi yo noo quiví tari cha noo mil cuiya cuví cuan, ta cha noo mil cuiya tari cha noo quiví cuví cuan chi ra.

⁹ Ñima cha ña cuñí ñaha Sutu Mañi yo quichi ra. Vasi yihí ñu chicá xiñi ñu cha tyicuan caa. Soco Sutu Mañi yo nyatú ra chi yo vatyi ña cuñí ra cha cunaa ni noo yo. Cuñí ra vatyi tandihí yo ndu uvi iñi yo cuatyí yo ta nasama yo cuhva iyó yo.

¹⁰ Soco quiví cuquichi Sutu Mañi yo, tari cuaquichi noo ra suhu cha cha cuaa, tyicuan caa cucuvi. Vatyi sana iñi yo ta cuquichi ra. Tyicuan ta cucunaa andiví. Iyo xaan cucachan cuhva cuan. Ta cucayu tandihí cha iyó andiví. Cundutya ndi cuii chihin cha ihñi xaan. Ta tyicuan caa cucayu tucu ñuhu ñáyiví ta tandihí cha iyó nuu chi.

¹¹ Ta tyicuan caa cutani tandihí. Yucuan chaha cuñí chi vatyi cachi coo yo tari cuhva cuñí Nyoo.

¹² Cuatu tuhva yo na chaa quiví quichi Nyoo. Nducu yo cuhva cha sanumi ra quichi ra. Quiví cuan cunaa andiví chihin

ñuhu. Tandihí cha iyó cundutya chihin cha ihñi.

¹³ Soco yoó nyatú yo noo andiví chaa ta noo ñuhu ñayiví chaa cha catyí Nyoo tyi cucuhva ra. Ta maa maa ri cha vaha chi Nyoo cucoo yucuan.

¹⁴ Yucuan chaha yañi, cha ni ri ca cha nyatú ndo na quichi Sutu Mañi yo, saníñi ndo tacuhva vatyí quiví quichi ra, vii iyó ndo chihin ra ta ñahri cha iñi ndo ta ñahri cuatyí ndo.

¹⁵ Ta tñin vaha ndo cuenda, vatyí Sutu Mañi yo nyatú ra chi yo vatyí cuñí ra vatyí cuaha ca ñáyiví cacu. Ta tyicuan caa tucu catyí ra Pablo yañi yo nu tutu cha sacuhun ra chi ndo. Vatyí chihin cha chiñi tuñi cha chaha Nyoo chi ra tyaa ra.

¹⁶ Ta tandihí ri nu carta ra ta cahán ra tuhun ihya chihin ndo. Vasi yihí tuhun cha yhi vavaha cutuñi iñi yo. Ta ñu cha ña cutuñi iñi, ñu cha ña ñihi nyaá chihin Nyoo, sñn caa cuhva natyihí tuñi iñi ñu tuhun cuan. Ta suri tyicuan caa sacuví tucu ñu chihin tuhun cha tyaa inga ra nu tutu tuhun Nyoo. Sñn caa cuhva natyihí tuñi iñi ñu. Ta cha tyicuan caa, sacunaá ñu suri chi maa ñu.

¹⁷ Yucuan chaha yañi, vityin cha chitó ndo tuhun ihya cha ni cumañi ca cuvi, saha ndo cuenda chi ndo, coto cunyicon ndo cuhva sandaví ñaha ra quiñi caa cuan, ta coto sandoo ndo cuhva vaha cha cuahan ndo.

¹⁸ Soco cohon nuu vaha ca ndo chi Sutu Mañi yo ra Jesucristo ra sacacú chi yo. Ta cuahnu ca ndo chihin tumañi iñi cha chahá ra chi ndo. Na sacahnu yo chi ra vityin ta tyicuan ri maa. Ta na cuvi chi tyicuan caa.

Carta Cha Xihna Ri Cha Tyaa Ra Apóstol Juan

Ñayiví chaa coo yo

¹ Ihya tyaaá ndi tuhun cha cha iyó maa quiví cha quichaha tandihi. Ta cuví chi tuhun cha chiñi ndi ta cha nyehe ndi chihin nuu ndi; vatyí nyehe ndi ta tiñi ndi chihin ndaha ndi. Ta ican tuhun ihya cuví tuhun cha chahá ñayiví chaa coo yo.

² Ñayiví chaa ihya quetuví quiví quichi ra Cristo. Maa ndi nyehe ndi ta chahá ndi cuenda tuhun chi; ta sacotó ndi tuhun ñayiví chaa cha ma naa ca maa ihya chi ndo. Vatyí ñayiví ihya, nyaá chi chihin Sutu yo Nyoo, ta vityin tuví chi nu nyicú yo.

³ Nacatyí ndi chi ndo cha nyehe ndi ta cha chiñi ndi tacuhva na cu ñin ri ndo chihin ndi, tari maa ndi, ndicha cuii vatyí ñin ri cuví ndi chihin Sutu yo Nyoo ta chihin Sehe ra, ra Jesucristo.

⁴ Ta tyaaá ndi tuhun ihya chi ndo tacuhva na coo tandihi tusi ñi cha chahá Nyoo chi ndo.

Nyoo, ñuhü ndichin cuví ra

⁵ Ican ihya cuví tuhun cahán ra Cristo chihin ndi. Ta chiñi ndi ta sacotó ndi chi ndo: Nyoo maa ri ñuhü ndichin iyó nu nyaá ra. Ta ñahri cha ñaa ñi, (ñahri cha ña vaha yihí ñi ra cuví cuan).

⁶ Tatu catyí yo vatyí ñin ri cuví yo chihin ra, soco sacuví yo cha ña vaha, nu ñaa ñi chicá noo yo cuví cuan. Sandaví ñaha yo. Ta ñahri tuhun ndicha cahán yo.

⁷ Soco tatu nu ndichin iyó yo, tari maa Nyoo iyó ra nu ndichin, tyicuan ta ñin ri cuví yo chihin tahan yo, ta ñiñi ra Jesucristo Sehe Nyoo, nacatyá chi ndi cuii maa cuatyí yo.

⁸ Tatu catyí yo vatyí ñahri cuatyí yo, suri chi maa yo sandaví ñaha yo, ta ñahri cha ndicha nyaá ña ñi yo.

⁹ Soco tatu nahmá yo cuatyí yo nuu Nyoo, yihí ñi yo chi ra vatyí vaha ra ta ña sandaví ñaha ra, soco sacuví ra cuhva catyí ra, ta cusaha ra ticahnu ñi cuatyí yo ta cusandachi ra ndi cuii maa cha quini caa yo.

¹⁰ (Nyoo catyí ra tyi iyó cuatyí yo), ta tatu catyí yo vatyí ñahri cuatyí yo, sahá yo tuhun tyi Nyoo, cuendu ra. Ta tuhun cahán ra, ñahri maa nyaá ña ñi yo.

2

Ra Cristo cuví ra cahán chaha yo

¹ Sehe nyihi, sacoté tuhun ihya chi ndo, tacuhva ma sacuvi ndo cuatyí. Soco tatu chicoo cuatyí minoo ndo, ma yuhvi ndo, vatyí iyó ra cahán chaha yo nuu Nyoo. Ta ican ra cuví ra Jesucristo, ra vaha.

² Ta maa ra cuví ra chahnyá cuatyí yo, vatyí chihí ra tyiño nuu yo cha cuenda cuatyí yo. Ta ñiñi cha cuenda maa ri maa yo, soco cha cuenda tandihi ñayiví.

³ Tatu quichahá yo tuhun cahán Nyoo, ñohó nuu yo chi ra.

⁴ Soco tatu noo ra catyí ra: “Yuhu, ñohó nui chi Nyoo”, soco tatu ña quichahá ra tuhun cahán ra, cuví ra noo ra cuendu. Ta ñahri tuhun ndicha caá ña ñi ra.

⁵ Soco ñu naquehén vaha tuhun cahán Nyoo, ican ñu cuan cuví ñu cuñí chi ra chihin cha ñi ña ñi. Ta cha tyicuan caa chitó yo tyi ñin ri cuví yo chihin ra.

⁶ Yóo cha catyí vatyí ñin ri cuví chihin Nyoo, tahan chí coo ra tari cuhva chiyo maa ra Jesucristo quiví chicá noo ra siqui ñuhü ñayiví.

Tuhun chaa cha cuñí yo chi tahan yo

⁷ Yañi yo, ñiñi noo tuhun chaa sacoté chi ndo, soco cuví chi noo tuhun chahnu cha chitó ndo nyata quiví xihna ri. Ta ican tuhun chahnu ihya cuví tuhun chiñi ndo.

⁸ Soco tari noo tuhun chaa cuví chi. Ta sacuví ra Cristo, ta chaha ra cha sacuví tucu maa ndo ñandihí. Ta cha tyicuan caa, cha ñaa ñi cuahan nocuee chi. Ta cha ndichin Nyoo cha sandundichin chi.

⁹ Ñu cha catyí vatyí nyaá ñu nu ndichin, ta ña cuñí nyehe ñu chi tahan ñu, ni nyaá ca ñu nu ñaa ñi.

¹⁰ Ta ñu cuñí chi tahan, nu ndichin nyaá ñu. Ta ñahri maa cha cuví sanacava chi ñu nu cuatyí.

¹¹ Soco ñu cha ña cuñí nyehe chi tahan, nu ñaa ñi nyaá ñu. Ta ña chitó ñu nya ityi cuahan ñu vatyí ña cuví nyehe ñu vatyí tari cha cuaa ñu.

12 Sacuhín tuhun ihya chi nyoho, ra cuatyaa sehi. Vatyí cha yaha saha Nyoo ticahnu iñi cuatyí ndo cha cuenda cha chihí ra Jesucristo tyiño nuu ndo.

13 Ta chi nyoho, cha cuví ndo sutu, sacuhín tuhun ihya chi ndo, vatyí ñohó nuu ndo chi ra iyó nyata cumañi cacu ñuhu ñayiví. Ta chi nyoho, ra tyivaa, sacuhín tuhun ihya vatyí cuví chasaha ndo chi ra ña vaha.

Ta chi nyoho, cha cuví ndo ra cuatyaa sehi, sacuhín tuhun ihya vatyí ñohó nuu ndo chi Sutu yo Nyoo.

14 Sacuhín tuhun ihya chi nyoho cha cuví ndo sutu, vatyí ñohó nuu ndo chi ra cha iyó nyata cacu ñuhu ñayiví. Ta sacuhín tuhun ihya chi nyoho ra tyivaa vatyí nyaá xaan fuerza chi ndo. Ta tuhun Nyoo caá aña ndo. Ta cuví chasaha ndo chi ra ña vaha.

15 Ma cuñi ndo cha quiñi caa cha iyó ñayiví ihya. Ni ma cuñi ndo cha iyó siqui ñuhu ñayiví. Vatyí ñu cuñi tandihí ihya, ña cuñi ñu chi Nyoo.

16 Vatyí tandihí cha iyó ñayiví ihya, cha ña vaha cha quichi cuví iñi coño ñuhu yo, ta cha nyehe yo ta quichi cuví iñi yo coo chi yo, ta cha cuñi yo cuyaa yo chihin cha iyó chi yo, tandihí ihya ñima cuhva chahá Sutu yo Nyoo chi yo cuví, soco maa maa ri cha chahá ñayiví ihya cuví.

17 Ta ñayiví ihya cuahan sandihí chi, chihin tandihí cha quiñi caa cha quichi cuví iñi ñáyiví. Soco ñu cha sacuví cuhva cuñi Nyoo, tyicuan ri maa cuacoo ñu chihin ra.

Ra xaan iñi chi ra Cristo

18 Sehe nyihí, cha nyaá yo nu cuandihí quiví. Ta nyoho chiñi soho ndo vatyí vachi noo ra cha ña cuñi nyehe chi ra Cristo, ta vityin cha cuaha xaan ra ña cuñi nyehe chi ra Cristo iyó vityin. Yucuan chaha nacoto yo vatyí cha nyaá yo nu cuandihí quiví.

19 Maa ra nu nyicú yo quitá coyo ra, vatyí ñima ra cuenda yo cuví chi ra. Vatyí tyehe ta ra cuenda yo cacuví chi ra, candoó ra chihin yo. Soco cuahan coyo ra tacuhva quetuví vatyí ña tandihí ñáyiví ta cuenda yo cuví ñu.

20 Soco chi nyoho chaha ra Cristo Tatyí Ii Nyoo cunyaa aña ndo. Ta chitó ndo tandihí.

21 Sacuhín tuhun ihya chi ndo ñima cha cuenda vatyí ña chitó ndo cha ndicha, soco vatyí chitó ndo. Ta ni noo cuendu ma quita cahan ñu sacuví cha ndicha.

22 ¿Yóo cha cuví ñu cuendu? Ñu catyí vatyí ra Jesus ñima ra Cristo cuví ra. Ta ñu cha catyí tyehe caa, ñu xaan iñi chi ra Cristo cuví ñu. Vatyí ña chinó iñi ñu chi Sutu yo Nyoo, ta ni ri chi ra Jesucristo Sehe Nyoo.

23 Tandihí cuii ñu ña chinó iñi chi Sehe Nyoo, yori Sutu yo Nyoo nyaá chihin ñu. Soco ñu catyí vaha chi ñáyiví vatyí ra Jesucristo cuví Sehe Nyoo, ñn ri cuví ñu chihin Nyoo ñandihí.

24 Yucuan chaha nyoho, tuhun cha chiñi ndo nya quiví xihna ri, naquehen vaha ndo chichi aña ndo. Tatu ndoó chi chichi aña ndo, ñn ri cuví ndo chihin Sehe Nyoo ta chihin Sutu yo Nyoo ñandihí.

25 Ta ra Jesucristo catyí ra vatyí cuhva ra noo ñayiví chaa cha ma naa ca maa coo yo.

26 Sacuhín tuhun ihya chi ndo cha cuenda vatyí cuaha xaan ra sandaví ñaha chi ndo iyó.

27 Soco ra Jesucristo chaha ra Tatyí Ii Nyoo cha cunyaa aña ndo, ta ña chiñuhú ca cha sañaha ni noo ñáyiví chi ndo. Vatyí suri maa Tatyí Ii Nyoo sañahá chi ndo ndi cuii maa tuhun. Ta cha ndicha cuví, ñima cuendu cuví. Yucuan chaha sañihi ca ndo cu ñn ri ndo chihin ra Cristo tari cuhva sañahá Tatyí Ii Nyoo chi ndo.

28 Ta vityin nyoho, ra cuatyaa sehi, cuinyaña yo chi ra Cristo tacuhva vatyí nachaa chi quiví quichi ra, ma cutucu cuñi yo chihin ra. Ta tyicuan caa tucu maa ra chihin yo. Ta ñn ri tacuhva cha ma tahan yo ticahan nuu nuu ra quiví quichi ra.

29 Cha chitó ndo vatyí ra Cristo vaha ra. Chitó tucu ndo vatyí tandihí ñu cha nyacuví cha vaha, sehe Nyoo cuví chi ñu.

3

Ñu cha cuví sehe Nyoo

1 Nyehe ndo, yoso cha cuñi Sutu yo Nyoo chi yo, vatyí nasaha ra sehe ra chi yo. Ta catyí ra: “Nyoho, sehi cuví chi ndo.” Yucuan chaha ñáyiví, ña cuñi nyehe ñu chi yo vatyí tyicuan caa tucu, ña cuñi nyehe ñu chi maa ra.

² Yañi, vityin cha cuví yo sehe ra. Soco ta coto ca yo yoso caa cucuvi yo. Soco chitó yo vatyí nachaa chí quívi quichi ra Jesucristo, cucuvi yo tari maa ra, vatyí cunyehe vaha yo chí ra tari cuhva caá ra.

³ Ta tandihí yo cha nyatú yo cha cucuvi tyehe caa, nducú yo cuhva ta sandundí ca yo añima yo, tari ndí maa Sutu Mañi yo Jesucristo.

⁴ Tandihí ñu sacuví cuatyí, ña quichahá ñu ley Nyoo. Vatyí cha sacuví yo cuatyí, ña quichahá yo ley Nyoo cuví chí cuan.

⁵ Cha chitó ndo vatyí ra Cristo quichí ra ñayívi tacuhva tinyaa ra cuatyí yo, ta maa ra ñahri cuatyí ra.

⁶ Tandihí yo cha ñn ri cuví yo chihin ra, ña sacuví yo cuatyí. Soco ñáyívi cha sacuví cuatyí, ta quehen cuenda ca ñu chí ra, ni ta cohon ca ra añima ñu.

⁷ Sehe luhli, ñaha sandavi ñaha ñáyívi chí ndo, vatyí ñu cha sacuví cha vaha, vaha ñu, tari maa ra Cristo vaha ra.

⁸ Soco ñu cha sacuví cuatyí, cuenda ra ña vaha yíhí ñu. Vatyí ra ña vaha sacuví ra cuatyí nyata quívi xihna ri. Soco yucuan chaha quichí ra Jesucristo, ra cha cuví Sehe Nyoo, tacuhva vatyí satani ra ndí cuii cha sacuví ra ña vaha.

⁹ Tandihí yo cha cha yaha nacacu chaa yo, nanduví yo sehe Nyoo, ta ña sacuví ca yo cuatyí, vatyí ñayívi Nyoo iyó yo. Yucuan chaha ña sacuví ca yo cuatyí, vatyí cha yaha nacacu chaa yo ta sehe Nyoo cuví chí yo.

¹⁰ Ta tyehe caa cuví nichon nuu yo chí ñu cha cacuví sehe Nyoo, ta ñu cuví sehe cuihna. Vatyí yóo ñu sacuví cha ña vaha o ña cuñí nyehe ñu chí tahan ñu, ñima ñáyívi cuenda Nyoo cuví ñu.

Na cuñi yo chí noo noo tahan yo

¹¹ Vatyí ican ihya cuví tuhun cha chiñi ndo quívi xihna ri: Cha cuñi yo chí noo noo tahan yo.

¹² Ña tahán chí sacuvi yo tari cuhva sacuví ra Caín. Cuví ra noo ra cuenda ra ña vaha. Ta chahñi ra chí yañi ra. ¿Ñáa tuhun chahñi ra chí ra? Cha cuenda vatyí vaha cuhva sacuví yañi ra, ta maa ra Caín chinyacuví ra cha ña vaha.

¹³ Yañi yo, ma iyo cuñi ndo tatu ña cuñí nyehe ñáyívi chí ndo.

¹⁴ Yoó chitó yo vatyí tari minoo ra chihí ta nandoto cuví yo vatyí iyó yo noo ñayívi chaa vatyí cuñí yo chí tahan yo. Ñu cha ña cuñí chí tahan, tari quívi ni cuví ca ñu tari noo ra chihí, ta ta nandoto ca ñu.

¹⁵ Yóo ñu cha xaan iñi chí tahan, tari noo ñu chahñi ñáyívi cuví ñu. Ta chitó ndo vatyí ni noo ñu chahñi, ma cuhva Nyoo ñayívi chaa cha ma naa ca maa coo añima ñu.

¹⁶ Nichón nuu yo ñáa cha cuví cha cuñí yo chí tahan yo vatyí ra Jesucristo sañaha ra chí yo. Vatyí maa ra cuñí ra chí yo, ta chaha ra ñayívi ra cha catyí yo. Ta tyicuan caa tucu maa yo, cuñi yo chí tahan yo ta cuhva yo ñayívi yo cha cuenda ñu.

¹⁷ Ta tatu yíhí yo iyó chiin chí yo síqui ñuhu ñayívi ihya, ta nyehé yo cumañi cha cumañi chí tahan yo, ta sahá ri yo cha ña nyehé yo, ¿atu cuñi yo chí Nyoo cha sacuví yo cha tyicuan caa? Ña cuñi yo chí ra cuví chí cuan.

¹⁸ Ra cuatyaa sehi, ñima chihin tuhun yuhu ri yo, cuñi yo chí tahan yo, soco na cuñi yo chí ñu chihin cha sacuví yo tumañi iñi, ta chihin cha ñi iñi yo.

Yoso caa sacuvi yo ta coo vaha yo chihin Nyoo

¹⁹ Tatu sacuví yo tyicuan caa, chitó yo tyi yíhí yo tuhun ndicha. Ta vaha iyó yo chihin Nyoo.

²⁰ Tatu chichi añima yo ta tuví iñi yo tyi iyó cuatyí yo, vihi ca cuví Nyoo, chitó ra cha caá añima yo.

²¹ Yañi, tatu tuví iñi yo tyi ñahri cuatyí yo, ma yuhvi cuñi yo nyehe yo chí Nyoo.

²² Ta ñáa ri cha cacan tahvi yo cuacuhva ra chí yo, vatyí quichahá yo tuhun cahán ra, ta sacuví yo cuhva tahán iñi ra.

²³ Ta ican ihya cuví tuhun chaha ra chí yo: Cha chíno iñi yo vatyí ra Jesucristo cuví Sehe ra. Ta cha cuñi yo chí noo noo tahan yo vatyí tyicuan caa tuhun cha chaha ra chí yo.

²⁴ Ta ñu cha quichahá tuhun chaha ra chí yo, iyó ñu cha ñn ri cuví ñu chihin ra, ta maa ra iyó ra chichi añima ñu. Ta cha cuenda Tatyí Ii ra cha chaha ra chí yo, chitó yo vatyí nyaá ra chihin yo.

4

Tatyí Ii Nyoo ta tatyí ña vaha

¹ Cuñí xain chi ndo, yañi. Ma chino iñi ndo tandihí ñáyiví cha catyí tyi cuenda Nyoo cahán ñu. Nyehe xihna ndo tatu nacachí tahan cha cahán ñu chihin tuhun Nyoo. Vatyí cuaha xaan ra cha catyí vatyí Nyoo sañahá chi ra. Soco ña ndicha.

² Soco tyehe caa cuví nicohon nuu ndo tatu Tatyí Ii Nyoo sacahán chi ra o ñima. Tandihí ra cha catyí vatyí quichí ra Jesucristo nya gloria ta cacu ra chihin coño ñuhu ñayiví ihya, ican ra cuan, sacahán Tatyí Ii Nyoo chi ra.

³ Soco ndi cui maa ñáyiví cha catyí vatyí ra Cristo ña chicá noo ra chihin coño ñuhu ñayiví ihya, ñima Nyoo sacahán chi ñu cuan, soco tatyí ña vaha, cha xaan iñi chi ra Cristo, ican sacahán chi ñu. Cha chiñi ndo vatyí nyaá quichi cuan. Ta vityin cha chicá noo chi siqui ñuhu ñayiví.

⁴ Ra cuatyaa sehi, ñáyiví chi Nyoo cuví ndo. Ta cuví chasaha ndo chi ra xaan iñi chi ra Cristo. Vatyí cahnu ca ra Cristo, ra nyaá añima ndo ta ñima ca ra ña vaha, ra cha chicá noo siqui ñuhu ñayiví ihya.

⁵ Maa ñu cuan, ñu cuenda ñayiví ri ihya cuví ñu. Yucuan chaha cahán ñu tuhun ñayiví ihya. Ta ñu cuenda ñayiví ihya tya-sohó ñu tuhun cahán ñu.

⁶ Soco yoó cuví yo ñu cuenda Nyoo. Ta ñu cuenda Nyoo tyasohó ñu tuhun cahán yo, soco ñu yihí tatyí ña vaha añima, ña cuñí ñu tyasoho ñu. Ta tyicuan caa cuví nicohon nuu yo chi ñu yihí Tatyí Ii Nyoo ta ñu yihí tatyí ña vaha.

Nyoo cuñí xaan ra chi tandihí ñáyiví

⁷ Yañi yo, na cuñi yo chi tahan yo, vatyí Nyoo sañahá ra chi yo yoso caa cha tahan chi cuñi yo chi ñu. Tandihí yo cha cuñi yo chi tahan yo sehe Nyoo cuví chi yo, ta ñohó nuu yo chi Nyoo.

⁸ Soco ñu cha ña cuñi chi tahan, ta cohon nuu ca ñu chi Nyoo, vatyí Nyoo cuñi xaan ra chi yo ta chi tandihí ñáyiví.

⁹ Ta sañahá Nyoo vatyí cuñi ra chi yo chihin cha chahá ra noo Sehe mañi ra tyi quichí ra siqui ñuhu ñayiví ihya, vatyí cuhva ra noo ñayiví chaa coo yo.

¹⁰ Nyehe xihna, yoso cha cuñi Nyoo chi yo. Ñima vatyí xihna ca yo cuñi yo chi ra, soco xihna ca maa ra cuñi ra chi yo. Ta tachí ra chi Sehe ra vatyí tacuhva cúvi ra tyiño nuu yo ta cahnya ra cuatyí yo.

¹¹ Nyoho yañi, tatu cuñi Nyoo chi yo cha tyicuan caa, tahan tucu chi cuñi maa yo chi tahan yo.

¹² Vasi ni nonga ñáyiví, ta nyehe ca ñu chi Nyoo, soco tatu cuñi yo chi noo noo tahan yo, Nyoo nyaá ra añima yo. Ta tyicuan caa ñi vaha iñi yo cuñi yo chi ra.

¹³ Ta chitó yo vatyí nyaá yo chichi ndaha ra, ta maa ra nyaá añima yo vatyí chahá ra Tatyí Ii ra cunyaa añima yo.

¹⁴ Ta nyuhu nyehe vaha ndi ta cuví ndi cha ndaa vatyí Sutu yo Nyoo saquichí ra chi Sehe ra tacuhva vatyí sacacu ra chi yo cha cuví yo ñáyiví iyó siqui ñuhu ñayiví.

¹⁵ Tandihí ñu nachinó iñi chihin cha ñi iñi ñu ta catyí ñu vatyí ra Jesús cuví ra Sehe Nyoo, Nyoo nyaá ra chichi añima ñu. Ta maa ñu nyaá ñu chichi ndaha ra.

¹⁶ Ta yoó cha nacoto yo ta nachino iñi yo tyi Nyoo cuñi ra chi yo, ta chi tandihí ñáyiví. Ta ñu cha cuñi chi tahan, chichi ndaha Nyoo nyaá ñu. Ta Nyoo nyaá ra chichi añima ñu.

¹⁷ Vatyí tatu cuñi yo chi Nyoo chihin cha ñi iñi yo ma yuhvi cuñi yo nyehe yo chi ra, nachaa chi quiví cutuñi chi tandihí ñáyiví nuu ra. Vatyí tari cuhva iyó maa ra Jesucristo, tyicuan caa iyó yo siqui ñuhu ñayiví ihya.

¹⁸ Nyoo cuñi ra chi yo, ta tatu cuñi yo chi ra, ñahri maa cha yuhví yo. Tatu ñi iñi yo cuñi yo chi Nyoo ña nuña ca nu quihí tuhun yuhví añima yo, vatyí Nyoo tava ñehe ra tandihí maa cuan. Vatyí tatu yihí cha yuhvi cuñi yo, yihí cha cuenda vatyí iyó cuatyí yo. Ta yuhví yo cha cutachi tuñi Nyoo chi yo. Vatyí tatu yuhvi cuñi yo, yuhví yo vatyí ña cuñi vaha yo chi Nyoo.

¹⁹ Yoó cuñi yo chi Nyoo vatyí xihna ca maa ra cuñi ra chi yo.

²⁰ Tatu yoó cha catyí: “Yuhu cuñi chi Nyoo”, catyí ñu, soco ña cuñi nyehe ñu chi tahan ñu, noo ñu cuendu cuví ñu. Vatyí tatu ña cuñi nyehe ñu chi tahan ñu cha nyehe

ñu, ¿atu cuví cuñí ñu chi Nyoo cha ña nyehé ñu? Ma cuví.

²¹ Ta Nyoo chahá ra tuhun ihya chi yo: Ñu cha cuñí chi Nyoo, tahán chi cha cuñí tucu ñu chi noo noo tahan ñu ñandihí.

5

Cha ñi ñi yo chinó ñi yo chi Nyoo sahá ganaa yo chi cha ña vaha

¹ Tandihí ñu chinó ñi tyi ra Jesús cuví Cristo cha saquichí Nyoo, sehe Nyoo cuví chi ñu; ta tatu cuñí yo chi noo sutu, cuñí tucu yo chi tandihí sehe ra.

² Tatu cuñí yo chi Nyoo ta sacuví yo cha catyí ra, chitó yo vatyí cuñí tucu yo chi ñu sehe Nyoo.

³ Vatyí cha cuñí yo chi Nyoo ican cuví cha quichahá yo tuhun chahá ra chi yo. Ta tandihí tuhun cha chahá ra chi yo ña yí sacuvi yo.

⁴ Vatyí tandihí yo cha cuví yo sehe Nyoo, cuví chasaha yo chi cha ña vaha cha iyó ñayiví ihya chihin cha chinó ñi yo chi Nyoo.

⁵ Ñu cha chinó ñi vatyí ra Jesús cuví Sehe Nyoo, ican ñu cuan cuví chasaha chi cha ña vaha cha iyó ñayiví ihya.

Tatyí Ii Nyoo cuví cha ndaa cuenda ra Jesús ra cuví Sehe Nyoo

⁶ Ra Jesucristo quichí ra síqui ñuhu ñayiví ihya. Ta chitó yo tyi ndicha cha Sehe Nyoo cuví chi ra nu condutyá ra, ta nu chatí ñiñi ra ñandihí. Ñima noo ri nu condutyá ra. Soco nu chatí ñiñi ra ñandihí. Ta Tatyí Ii Nyoo cuví cha ndaa tyi tyicuan caa cuví. Ta maa ri cha ndicha cahán Tatyí Ii Nyoo.

⁷ Iyó ñi tahan testigu cha nyaá andiví: Sutu yo Nyoo ta ra Cristo ra cuví Tuhun Cahán Nyoo, ta Tatyí Ii Nyoo. Ta nduñi tahan ihya cuví noo ri, ta ñi ri cuhva cahán nduñi tahan.

⁸ Ta iyó ñi tahan testigu síqui ñuhu ñayiví ihya: Tatyí Ii Nyoo cha nyaá ñiñi yo catyí vatyí ican ra Jesús cuví Sehe Nyoo. Yucuan cuví noo. Ta nu condutyá ra Jesús, Nyoo catyí ra vatyí ican ra cuví Sehe ra. Yucuan cuví cha cu uvi. Ta nu chatí ñiñi ra Jesús, yucuan cuví cha cu ñiñi cha sañahá chi vatyí ra Jesucristo cuví ra Sehe Nyoo.

Ta tyicuan caa nduñi tahan cuan ñi ri cuhva cahán.

⁹ Yoó tuhvá yo naquehen yo tuhun cahán ra cuví testigu síqui ñuhu ñayiví ihya. Soco Nyoo cahnú ca cuví ra ta ñiñi ca ra ñuhu ñayiví ihya. Ta ican ra catyí ra vatyí ra Jesús cuví Sehe ra.

¹⁰ Ñu cha chinó ñi tyi Sehe Nyoo cuví chi ra Jesús, chitó ñu chichi ñiñi ñu tyi ndicha. Ñu cha ña chinó ñi chi ra, tari quiví cha sahá ñu tuhun tyi Nyoo ra cuendu cuví ra, vatyí ña cuñí ñu chino ñi ñu cha cahán Nyoo tumañi ñi cuenda Sehe ra, ra Jesús.

¹¹ Ta ican ihya cuví tuhun cahán Nyoo chihin yo: Catyí ra tyi chahá ra noo ñayiví chaa coo yo tatu chinó ñi yo vatyí ra Jesucristo cuví Sehe ra.

¹² Ñu cha nyaá Sehe Nyoo ñiñi, iyó ñu ñayiví chaa ihya. Ta ñu cha yori Sehe Nyoo nyaá ñiñi, ñahri ñayiví chaa cuan iyó ñu.

Nu ndihí cahan ra Juan ta chahá ra tuhun chi ñu

¹³ Sacuhín tuhun ihya chi nyoho cha chinó ñi chi ra Jesús Sehe Nyoo, tacuhva coto ndo tyi cha iyó ndo ñayiví chaa cha maa ca maa.

¹⁴ Cunyeé xaan ñi yo chi Nyoo vatyí chitó yo vatyí tatu chicán yo cha chicán yo chi ra ta cuhva cuñí ra cuví, maa ra chiñí ra tuhun cahán yo.

¹⁵ Ta tatu chitó yo tyi chiñí ra tuhun cahán yo, chitó tucu yo tyi cha ñiñi yo cha chicán yo chi ra.

¹⁶ Tatu nyehé yo noo ñu tahan yo sacuví ñu noo cuatyí, soco noo cuatyí cha ña sacunaá chi chi ñu nuu Nyoo, cuví cacan tahví yo chi ra cha cuenda ñu. Ta cusaha ra ticahnú ñi cuatyí ñu tacuhva coo ca ñu nuu ra. Soco iyó noo cuatyí cha sativí chi ñayiví nuu Nyoo. Ña tahan chi cacan tahví yo cha cuenda ñu cha sacuvi cuatyí cuan.

¹⁷ Tandihí cha ña vaha cha sacuví ñayiví, cuatyí cuví. Soco iyó cuatyí cha ña sativí ndihí chi chi yo nuu Nyoo.

¹⁸ Chitó yo vatyí ñu cha nacacú chaa saha Nyoo, ña sañihí ñu sacuvi ñu cuatyí. Vatyí Sehe Nyoo sahá cuenda chi ñu ta ña chahá ra cha ñiñi ra ña vaha chi ñu.

¹⁹ Ta yoó chitó yo tyi cuenda Nyoo yihí yo. Tandihí ca ñáyiví, cuenda ra ña vaha yihí ñu, vatyí nyacá ñaha ra chi ñu.

²⁰ Chitó tucu yo vatyí cha quichí Sehe Nyoo. Ta chahā ra cha chiñi tuñi vatyí cohon nuu yo chí Nyoo, ra ndicha vaha. Ta nyaá yo chichi ndaha ra cuví cha ndicha, ra cuví Sehe Nyoo, ra Jesucristo. Ican ra cuví Nyoo cha ndicha, ican ra cuví ñáyiví chaa cha ma naa ca maa.

²¹ Nyoho ra cuatyaa sehi, saha ndo cuenda chi ndo chihin cha sacahnú ñáyiví, ta ni ñima Nyoo cuví.

Ta na cuví chi tyicuan caa.

Carta Cha Cu Uvi Cha Tyaa Ra Apóstol Juan

Nu catyí ra Juan vatyí cuñí xaan ra chi ñu yihí cuenda Nyoo

¹ Nyoo nacachi ra chuun, yoho Hermana. Ta yuhu cha cuví ra chahnu vehe ñuhu, sacuhín tutu ihya chuun ta chi tandihí sehun. Ta cuñí xain chi ndo chihin cha ñi iñi. Ta ñima yuhu ri cuñí chi ndo soco tandihí ca ñu cha nacotó cha ndicha ñandihí.

² Cuñí chi ndo cha cuenda cha ndicha cha ñohó chichi añima yo. Ta tyicuan ri maa cunyaa cha ndicha cuan chihin yo.

³ Sutu yo Nyoo ta Sutu Mañi yo Jesucristo Sehe Nyoo na nasoco ra chi ndo ta na nyehe ndahvi ra chi ndo. Ta na coo cha taxi ri añima ndo, chihin cha ndicha, vatyí cuñí xaan ra chi ndo.

⁴ Si xaan cuñí cha chité tuhun suhva sehun ta nyehí vatyí iyó ñu tari cuhva catyí cha ndicha, tari cuhva catyí Sutu yo Nyoo tyi sacuvi yo.

⁵ Ta vityin, Hermana, chacú ndahvi nuun, na cuñi yo chi noo noo tahan yo. Ican ihya cuví cha tyaí nu tutu ihya. Ta ñima noo tuhun chaa cha chahá Nyoo chi yo cha vityin ri cuví cha cuñí yo chi noo noo tahan yo. Soco ican ihya cuví tuhun cha catyí Nyoo chi yo nyata quivi xihna ri.

⁶ Ta cha cuñí yo chi ra, ican cuví cha sacuví yo tandihí cha catyí ra chi yo. Ican ihya cuví cha catyí Nyoo tyi sacuvi yo. Ta nyoho, chiñi ndo tuhun ihya nya quivi xihna ri. Na coo ndo chihin cha cuñí ndo chi Nyoo ta chi ñáyivi.

Nu catyí ra Juan vatyí saha cuenda yo chi yo chihin ñu chicá noo sandavi ñaha

⁷ Catyí chuun tyehe caa vatyí cuaha xaan ra casandaví ñaha cachicá noo ra nicahnu siqui ñuhu ñayivi. Cacatyí ra vatyí ña ndicha cha quichi cacu ra Jesucristo chihin coño ñuhu ñayivi ihya. Ra cacatyí tyicuan caa, sandaví ñaha ra chi ñáyivi. Ta cuví ra noo ra xaan iñi chi ra Cristo.

⁸ Yucuan chaha, saha ndo cuenda chi ndo chihin tuhun cha sañahá ra coto sacunaa ndo cha vaha cha sacuví ndo, ta coto

ma ñihi ca ndo tandihí cha cuacuhva Nyoo chi ndo.

⁹ Yóo ñu cha ña ndoó vaha chihin cha sañahá ra Cristo chi yo ta sañahá ñu inga tuhun, yori Nyoo nyaá chihin ñu cuan. Soco ñu ndoó vaha ta quichahá tuhun cha sañahá ra Cristo, nyaá Sutu yo Nyoo ta ra Jesucristo Sehe ra chihin ñu cuan.

¹⁰ Tatu chaa noo ra vehe ndo, cua nyehe ra nu nyicú ndo ta cuñí ra sañaha ra tuhun cha ña sañahá ra Jesucristo, ma cuhva ndo vehe ndo cunyaa ra, ni ma tyinyee ndo chi ra.

¹¹ Vatyí tari quivi cha ñi ri cha ña vaha sacuví yo chihin ra tatu naquehén cuenda vaha yo chi ra cuan.

Nu ndihí cahan ra Juan

¹² Cuaha xaan ca tuhun tyaí cuhva sacote chi ndo, soco ña cuñí sacote chi ndo chihin tutu. Soco nyatí cuhin nu nyicú ndo. Tyicuan ta ndatuhun vaha maa yo, tacuhva cusí ca cuñi yo.

¹³ Ihya vachi nocumi chuun sahá sehe cuhun. Nacachi tucu Nyoo chi maa ña ñandihí.

Carta Cha Cu Uñi Tyaa Ra Apóstol Juan

Nu catyí ra Juan vatyí ra Gayo vaha cuahan ra chihin Nyoo

¹ Yuhu cha cuví ra chahnu vehe ñuhu, sacuhín carta ihya chi yoho, Gayo, vatyí yoho cuvún noo ra tahin cha cuñí xain chihin cha ñi ñi.

² Yañi, chicán tahvi chi Nyoo cha cuendon vatyí na coo vahun. Ta tari cuhva cuahan vahun chihin Nyoo, ta tyicuan caa tucu, na nasoco Nyoo chuun tacuhva cha ma tñin cuehe chuun.

³ Vatyí cusí xaan cuñi quivi quichí coyo suhva ra yañi yo. Ta canacatyí ra vatyí cha ndicha vaha iyón cuhva cha sañaha ra Cristo. Ta ican cuví cha ndicha vaha.

⁴ Nahri ca cha si cuñí tari cha chité vatyí sehi sacuví vaha ñu cuhva catyí tuhun ndicha.

⁵ Cuñí xain chuun, yañi. Vaha xaan sacuvún, vatyí tyiñuhún chi ra yañi yo, ta cha vaha xaan ca cha sacuvún vatyí tyiñuhún chi ra yañi yo inga ñuu cha chaa vehun.

⁶ Chihin nuu tandihí ñu vehe ñuhu canacatyí ra vatyí cuñí xaun chi ra. Ta saha tumañi ñi, yoho Gayo, tyinyee con chihin cha chiñuhú chi ra yañi yo vatyí sañihi ca ra cuhun coyo ra nu cuahan ra. Vatyí tyicuan caa tahán ñi Nyoo cha sacuvi yo.

⁷ Vatyí tyiño nuu Jesucristo cachicá noo ra. Ta ña cacuñí ra cha tyinyee ñáyivi cha ña ñohó nuu Nyoo chi ra.

⁸ Yucuan chaha vatyí maa yo tahán chi nyehe yo ñáá ndihí cha chiñuhú chi ra. Ta tyicuan caa ta cutahan yo chihin ra nu cahán ra tuhun ndicha.

Nu catyí ra Juan vatyí ra Diótrefes, ña vaha sacuví ra

⁹ Yuhu sacuhin noo carta chi ñu nyicú vehe ñuhu, soco ra Diótrefes sacuví ri maa ra nuu chi ra, ta ña tyasohó ra tuhun cahín.

¹⁰ Yucuan chaha tatu cuhin chiña, cusandai tyiño chihin ra cha cuenda tuhun cahán ra, vatyí cahán ña vaha ra siqui yo. Ta siin ri tatu yóo hermano chaa, ña naquehén cuenda ra chi ra. Ta tatu ñu

nyicú vehe ñuhu naquehén cuenda ñu chi ra, chasí ri ra, ta tavá ñehe ra chi ñu vehe ñuhu.

¹¹ Cuñí xain chuun, yoho yañi. Ma sacuvun cuhva ña vaha tari cha sacuví ra, soco sacuvun cha vaha. Vatyí ra sacuví cha vaha, ra cuenda Nyoo cuví ra, soco ra sacuví cha ña vaha, ña ñohó nuu ra chi Nyoo.

Nu catyí ra Juan vatyí vaha xaan cuhva chinó ñi ra Demetrio

¹² Tandihí ñu ta vaha cahán ñu siqui ra Demetrio. Ta vaha xaan quichahá ra tuhun Nyoo, ta suri ican cuan sañahá chi tyi ra vaha cuví ra. Ta siin ri nyuhu tucu cuví ndi cha ndaa cha cuenda ra, ta nyoho chitó ndo vatyí tuhun ndicha cahán ndi.

Nu ndihí cahan ra Juan

¹³ Cuaha xaan tuhun tyaí cuhva sacote chuun, soco ña cuñí sacote chuun chihin tutu.

¹⁴ Soco nyatí cuhin nu nyaún cha numi ri, tyicuan ta ndatuhun vaha ca maa yo.

¹⁵ Na coo cha taxi ri añimon. Ra tahan yo cha iyó ityi tyehe saquichí xaan ra nocumi chuun. Ta sahun tumañi ñi cuhvon nocumi chi noo noo ra tahan yo cha iyó ityi chiña.

Carta Cha Sacuhun Ra Apóstol Judas Chi Ñáyivi Yihí Cuenda Nyoo

*Nu tyaa ra Judas noo tutu chi ñu nacana
Nyoo chi*

¹ Yuhu ra Judas cuví noo ra sacuví tyiño nuu ra Jesucristo. Ta yañi ra Jacobo cuví chii. Tyaí noo carta ihya chi ndo cha cuví ndo ñáyivi cha nacana Nyoo Sutu yo. Ta naquehén vaha ra chi ndo vatyí cuví ndo ñáyivi cuenda ra. Ta vityin cumí vaha ra chi ndo cha cuenda cha ñin ri cuví ndo chihin ra Jesucristo.

² Nyoo na nyehe ndahvi ra chi ndo. Ta na cutuñi ca iñi ndo yoso caa cha cuñi ra chi yo. Ta na coo cuaha ca cha taxi ri cuñi añima ndo, saha ra.

*Nu cahan ra Judas siqui ñáyivi cha sañahá
cha ña ndicha
(2 Pedro 2.1-17)*

³ Cha naha xaan yihí iñi tyaí noo carta chi nyoho yañi, vatyí cuñi cahin chiin siqui yoso caa sacacu Nyoo añima yo. Soco vityin cuñi chi cha tyaí tutu ihya chi ndo vatyí saniñi chi ndo cunñi iñi ndo chihin tandihi fuerza ndo ta cuhun ndo ityi nuu ca chihin cha chinó iñi ndo tuhun vaha cha chaha Nyoo chi yo. Vatyí noo ri chaha chaha ra ta ñin caña ri chaha ra tandihi cha tahán chi chi yo vatyí chinó iñi yo cha cuví yo ñu yihí cuenda ra.

⁴ Vatyí yihí ra quihví xehe ra nu nyicu ndo. Ta cuñi ra sandavi ñaha ra chi ndo. Catyí ra vatyí cha yaha saha Nyoo ticahnu iñi chi yo ta yucuan chaha cuví sacuvi yo yoso cuhva quichi cuví iñi coño ñuhu yo. Soco ra canyacuví tyicuan caa, cuví ra noo ra cucunaa. Vatyí tyicuan caa catyí Nyoo nya tyembu chahnu, vatyí canyacuví ra cha quiñi caa cha ña tahán chi sacuvi ra. Vatyí ña caquichahá ra chi Nyoo ta ña chinó iñi ra cha Nyoo cuví noo ra cahnu ca, ra nyacá ñaha chi yo. Ta ñi ri ra Jesucristo Sutu Mañi yo, ña cahnu xaan cuví ra, cacatyí ra.

⁵ Vasi cha chitó ndo cha sacuvi Nyoo ta cha naha, soco cuñi sanicohín iñi ndo vatyí

Sutu yo Nyoo tava ra chi sutu chahnu yo ñu Israel ñuu Egipto, sacacu ra chi ñu ndaha ñáyivi ñuu Egipto cuan. Soco yaha cuan sanaa ra tandihi maa ñu cha ña chinó iñi chi ra.

⁶ Ta tyicuan caa tucu ángel. Ii ra. Ñahri cuatyí ra. Soco suhva ra caquita ra nu cuatyaa Nyoo chi ra cha cuenda cha ña quichahá ra chi ra. Yucuan chaha Nyoo cumí ra chi ángel cuan, nuñí ra chihin cadena nu ñaa iñi. Nyatú ra cha sacutuñi Nyoo chi ra na chaa chi quivi cahnu.

⁷ Tyicuan caa tucu ñáyivi ñuu Sodoma ta ñuu Gomorra, ta ñu ñuu cuatyaa cha chiyo nicachico ñuu cuan. Sanaa Nyoo chi ñu cha cuenda cha quiñi caa cha chinyacuví ñu. Ca chiyó ri maa ra chihin ñusihí. Ta ñusihí ca chiyó ri maa ñu chihin noo ra ta chihin inga ra. Ta cuaha ca cha quiñi caa chinyacuví ñu vatyí rayi ca chiyó ra chihin tahan yí ra ñandihí. Soco cha cuenda cuan, nyehe ñu tindoho nu cayu ñu, quivi chahmi Nyoo ñuu ñu. Ta yucuan sañahá chi chi yo vatyí ñu sacuvi cha quiñi caa, cucayu ñu chihin ñuhú cha ma ndahva ca maa.

⁸ Ta tyicuan caa tucu ra cacuñi sativi chi ndo. Vasi cha chitó vaha ra cha sacuvi Nyoo ta ityi chata ca, soco maa ra chicá iñi ra vatyí tyaqui xaan cuacoo ra nu cuahan ca chi chihin cha nyacuví ra tyicuan caa. Soco ndahvi ra vatyí tari quivi cha tahán ra noo ñumahna tyaqui cuví cuan. Sativi ra coño ñuhu ra ta ña cuñi ra cha cunyaca ñaha Sutu Mañi yo chi ra. Ta cahan ña vaha ra siqui ra nahnu ca cha nuu maa ra, cuví ri siqui ángel, cuví ri siqui tatyí ña vaha, cuví ri siqui Nyoo.

⁹ Soco ángel Miguel cha cuví ra noo ra cahnu nuu Nyoo, ta ña caña iñi ra sacuvi ra tyicuan caa. Vatyí quivi cañi tahan ra chihin ra ña vaha cha cuenda coño ñuhu ra Moisés, ña caña iñi ra cahan ña vaha ra siqui ra ña vaha. Noo ri cha catyí ra chi ra: “Maa Sutu Mañi yo na tachi tuñi ra chuun cuenda cha ña vaha cha nyacuvún”, catyí ángel Miguel cuan chi ra.

¹⁰ Soco ra cha sayangá chi ndo cuan, cahan cuehe ra vatyí ña chitó ra. Ta sacuvi ra tari sacuvi quiti. Vatyí quiti ña cutuñi iñi ti. Nyacuví ri maa ti cha cuñi coño ñuhu ti. Ta tyicuan caa tucu ra cuan. Chihin cha

quiñi caa nyacuví ra, sativí ra chi ra.

¹¹ ¡Ndahvi ra ndahvi cuan! Vatyí quehen ra cha caa ra Caín. Ta cha cuenda cha cuñí ra saha ganaa ra xuhun, quitá caxiin ra tari quitá caxiin ra Balaam. Ta cucunaa ra tari cuanaa ra Coré, vatyí chihí ra cuan cha cuenda cha nacahnú ra nu cahán ra cuví nuu chi ra.

¹² Ra cha sayangá chi ndo chahá ra ticahan nuu chi ndo nu ndu ñin ri ndo. Vatyí chachí ra ta chihí ra, chihin cha sii cuñí ra. Ta ña cahán nuu ra cha ña sahá ra ñáyivi chi Nyoo. Ta noo ri maa ra sacuvahá ra chi ra. Cuví ra tari noo vico cha tyandahá tatyí chí, ta cuñí maa yo tyi cua coon savi, ta ña coón ra. Cuví ra tari noo yutun cha ña chaha chiti. Vatyí noo yutun cha ña chahá chiti cuví tun tari noo yutun chihí vasi nyitó tun. Ta sijn maa cha cucúvi vaha tun vatyí cucahnya ñáyivi chi tun. Tari cha uvi chaha chihí tun cuví cuan. Ta tyicuan caa maa ra, tari cha uvi chaha chihí ra vatyí chitó ra tuhun vaha ta ña cuñí ra sacuvi.

¹³ Tari ndutya yuhu tyañuhu tatu cha nduxaan chi, iyo xaan nicuinanyaa chi. Soco ñin yaha ri tyicuan ta ndoo maa ri maa tiñi ta mihin nu niyiti cuan. Tyicuan caa maa ra, sandoó ra cha quiñi caa añima ñáyivi. Ta cuví ra tari tiñoo andivi cha cuanaa. Soco cha nyaá maa cha cundoo ra nu ñaa iñi cahnu tyicuan ri maa.

¹⁴ Tuhun maa ra cuan cahan ra Enoc ta cha naha. Ra Enoc tata cu ucha ra Adán cuví ra. Ta cahan ra tuhun cha chaha maa Nyoo chi ra, ta catyí ra: “Nyhé chí Sutu Mañi yo cha vachí ra chihin cuaha mil ángel cuenda ra

¹⁵ vatyí nyehe ra cha sacuvi tandihí ñáyivi. Ta tachí tuñi ra chí tandihí ñu quiñi iyó cha cuenda tandihí cha ña vaha cha chinyacuví ñu, ta cha cuenda tuhun quiñi caa cha cacahán ñu siqui ra”, catyí ra Enoc ta cha naha.

¹⁶ Ra cha sayangá chi ndo, ña ndoó ra vaha chihin cha chahá Nyoo chí ra. Cahán ra chí Nyoo ta chí ñáyivi ta iyó ra tari cuhva quichi cuví iñi coño ñuhu ra. Cahán ra chihin cha cahnu sahá ra chí ra. Tatu cahan vaha ra chihin noo ñáyivi soco cha cuenda cha cuñí ra cuvaha ra nuu ñu.

Nu chahá ra Judas tuhun chí ñu yihí cuenda Nyoo

¹⁷ Soco nyoho yañi, ma quichaha ndo chí ra cuan. Soco nicohon iñi ndo tuhun cha cahan ra apóstol cuenda Sutu Mañi yo Jesucristo.

¹⁸ Cacatyí ra chí ndo vatyí nu cuasandihí ca chí quivi ta cuacoo ra cucuacu nyaa tuhun Nyoo. Ta coo ra yoso cuhva quichi cuví iñi maa ra chihin cha quiñi caa ra.

¹⁹ Ta ican ra ihya cacuví ra cuñí sacusijn chí yo. Vatyí quichahá ra cuhva cuñí coño ñuhu ra ta ñahri Tatyí Ii Nyoo nyaá chihin ra.

²⁰ Soco nyoho yañi, cunij ca iñi ndo chihin cha chinó iñi ndo chí ra Cristo. Ta caçan tahvi ndo chí ra chihin tunyee iñi Tatyí Ii maa ra.

²¹ Ta tyicuan ri ñihi cuinyañaa ndo chí Nyoo, ta coto ndo vatyí cuñí xaan ra chí ndo. Ta cuatu tuhva ndo quivi chaa yo nu coo yo ñáyivi chaa cha ma naa ca maa. Vatyí ican cuví cha cuacuhva Sutu Mañi yo Jesucristo chí yo cha cuenda cha ndahvi cuñí ra nyehé ra chí yo.

²² Ta ndahvi cuñi nyehe ndo chí ñu cha ña ñij vaha iñi.

²³ Ta inga ñu, tyinyee ndo chí ñu tacuhva cacu ñu. Tari quivi cha tava ndo chí ñu nu cayú ñuhu. Ta chí inga ñu cundahvi cuñi ndo nyehe ndo chí ñu, soco saha ndo cuenda chí ndo chihin cha quiñi caa cha sacuví ñu, coto sacuvi ndo tari sacuví ñu. Nyacua nya sahna ñihno ñu ta ña vaha cha cuenda cha sacuví ñu cha quiñi caa.

Nu ndihí cahan ra Judas ta sacahnú ra chí Nyoo

²⁴⁻²⁵ Noo ri Nyoo iyó, ta chiñi tuñi xaan ra. Ta ican ra cuví ra cha sacacú chí yo. Ta iyó xaan tunyee iñi chí ra cha sahá cuenda ra chí yo ta sanduvií ra chí yo cha ñahri cuatyí yo coo quivi cunyaca ra chí yo nu nyaá ra chihin cha cahnu cuví ra. Ta sijn xaan cucuvi chí yo.

Na coto yo ñana cha cahnu xaan ca cuví ra. Chí maa ra na sacahnú yo vatyí cahnu xaan ca maa ra. Ta iyó xaan ca tunyee iñi chí ra. Noo tuhun ri maa ra nyacá ñaha tandihí. Nyacá ñaha ra ta ityi chata ca, vityin. Ta tyicuan ri maa cunyaca ñaha ra. Ta na cuví chí tyicuan caa.

Cha Sañaha Ra Jesucristo Chi Ra Apóstol Juan

Cha nyehe ra Juan

¹ Ican ihya cuví noo cha catyí Nyoo chi ra Jesucristo vatyí na sacoto ra chí ra casacuví tyiño nuu ra. Sañaha ra ñáá ndihí cha cucuvi cha numi ri. Noo ángel tachí ra Jesucristo vatyí sañaha ra chí yuhu ra Juan.

² Ta cahín cha ndaa ta cha ndicha cuenda tandihí cha nyehí. Ta cuví cha ndaa cuenda tuhun Nyoo ta cuenda tandihí cha sacoto ra Jesucristo.

³ Sii xaan cuñí ñu sacuaha tuhun cha nyaá nu tutu tuhun Nyoo ihya. Ta sii xaan cuñí ñu chiñí tuhun cha cahán chí ta quichahá ñu, vatyí tandihí tuhun cha nyaá nuu tutu Nyoo, cha nyaña yatyin quiví cha cunyehe yo.

Nu sacuhun ra Juan tutu chi ndi ucha tahan vehe ñuhu

⁴ Yuhu ra Juan sacuhín tutu ihya chí ndi ucha vehe ñuhu ñuu cha nyicú ityi Asia. Nyoo ta ndi ucha tahan Tatyí li ra cha nyicú nuu ra nu nyaá ra nyacá ñaha ra nu tyayu chichi gloria, na nasoco ra chí ndo. Ta na coo cha taxi ri ánima ndo sahá ra. Nyoo ican ra cuví ra iyó vityin, ta iyó maa ra quiví quichaha tandihí, ta ican ra cuquichi.

⁵ Ta naquehen tucu ndo cha vaha cuan sahá ra Jesucristo ñandihí. Vatyí ican ra cuví ra cha ndaa vaha ta ra ndicha. Ta cuví tucu ra noo ra cha nandoto cha xihna ri ta tyicuan ri maa cucoo ra. Ta iyó ityi chí ra ta nyacá ñaha ra chí ra cacuví rey cha iyó siquí ñuhu ñayiví ihya. Ican ra cuví ra cha cuñí xaan chí yo. Ta sandachí ra cuatyí yo chihin niñi ra.

⁶ Ta sacuví ra rey chí yo. Ta sacuví ra tata sutu chí yo tacuhva vatyí sacuvi yo tyiño nuu Nyoo Sutu ra. ¡Na sacahnu yo chí ra. Ta na cunyaca ñaha ra tyicuan ri maa! Ta tyicuan caa na cuví.

⁷ ¡Nyehe ndo! ¡Cha vachi ra Cristo nu vico andiví! Tandihí ñáyiví cunyehe ñu chí ra. Nyacua nya ñu cha sañicuehe chí ra ta cunyehe ñu chí ra. Ta tandihí ñu cucuacu chaa ñu chihin cha yuhví ñu na nanyehe

ñu chí ra inga chaha vatyí suri maa ra cuví. Cha ndicha, tyicuan caa cucuvi.

⁸ Catyí Nyoo:

—Yuhu cuví ra xihna cui, ta yuhu cuví ra cundoo nu ndihí tuhun —catyí Sutu yo Nyoo, ra iyó tandihí tunyee iñi chí. Ican ra cuví ra iyó vityin. Ta iyó maa ra nu quichaha tandihí, ta ican ra cuquichi.

Noo cuhva tyaquí cha sañaha Nyoo chí ra Juan cuenda ra Cristo

⁹ Yuhu ra Juan cuví yañi nyoho. Ta ñn ri nyehé yo tindoho. Ta ñn ri nyacá ñaha Nyoo chí yo. Ta ñn ri cunyee xaan yo ñáá ndihí cha cuví chí yo vatyí tyinyeé ra Jesucristo chí yo. Ñoho yuhu vehe caa noo ñuhú cha nañí Patmos cha nyaá mahñu tyañuhu. Ñohi vehe caa cha cuenda vatyí cahín tuhun Nyoo cha quichí sañaha ra Jesucristo.

¹⁰ Ta cuví chí noo quiví cha sacahnú yo chí Sutu mañí yo. Ta ñihi xaan chinyaa Tatyí li Nyoo chihin. Ta chiñi noo ndusu ñihi xaan ityi chate, tari noo ndusu cha ñihi xaan tari ndusu trompeta.

¹¹ Ta catyí chí chii tyehe caa:

—Yuhu cuví ra xihna cui, ta yuhu cundoi nu ndihí tuhun. Tyaq nuu noo libru tuhun cha nyehun, yoho Juan. Ta sacuhun chí ndi ucha vehe ñuhu cha nyicú ityi Asia. Sacuhun chí ñu nyicú vehe ñuhu ñuu Éfeso, chí ñu vehe ñuhu ñuu Esmirna, chí ñu vehe ñuhu ñuu Pérgamo, ta chí ñu vehe ñuhu ñuu Tiatira, ta chí ñu vehe ñuhu ñuu Sardis, ta chí ñu vehe ñuhu ñuu Filadelfia, ta chí ñu vehe ñuhu ñuu Laodicea —catyí ndusu cuan.

¹² Tyicuan ta nanyocave vatyí cuñí nyehí yoo chí ndusu cha cahán chihin cuan. Ta nanyehí ucha tahan cañileru xuhun cuan.

¹³ Ta mahñu ucha tahan cañileru cuan, nyehí chí noo ra cha caá tari caá noo rayii ñuhu ñayiví ihya. Ñihnó ra noo sahma cañi nya nu chaha ra. Ta yihí ra noo sinchu xuhun cuan, ta nya nu nyaá pechu ra chitahan sinchu cuan.

¹⁴ Ta cuichin ixi xiñi ra, tari ixi mbee cuichin, tari cha cuichin catyí. Ta tari cha cayú ñuhu chiti nuu ra.

¹⁵ Ta xiñó chaha ra tari xiñó noo caa cha nañí bronce cha tuhva nducuaha nu

cayú ñuhu chichi noo horno. Ta ñihi xaan ndusu ra tari ndusu cha cuaha vavaha yuvi nahnu.

¹⁶ Ta yihí ndaha ra ucha tahan tiño andivi chiyo vaha ra. Ta tari caa noo mityi cha xaan ninduvi chiyo yuhu, (tyicuan caa tuhun cahán ra cha quitá yuhu ra). Ta tari caá cha ñihi xaan nyehé ñanyii cha xiño vavaha, tyicuan caá nuu ra.

¹⁷ Cuhva cha nanyehi chi ra, nduve chaha ra tari maa cha chihj. Soco maa ra tyiso ra ndaha chiyo vaha ra siqui, ta catyí ra chii:

—Ma yuhvun. Yuhu cuví ra xihna cuiri, ta yuhu cundo nu ndihi tuhun.

¹⁸ Iquen cuví ra cha nyitó. Ta vasi chihj soco vityin cuaco tyicuan ri maa. Ta iyó ityi chii cha catyí ama tahan chi tuhun chihi chi noo noo ñáyivi, ta iyó ityi chii cha catyí tatu cuhun ñu anyaya.

¹⁹ Tyaa nu libru tandihi cha nyehún, cha iyó vityin, ta cha cucoo nu cuahan ca chi.

²⁰ Ican ihya cuví tuhun xehe cuenda ndi ucha tiño andivi cha nyehún yihí ndaha chiyo vahi, ta cha cuenda ndi ucha cañileru xuhun cuaan cuan: Ndi ucha tiño andivi cuan cuñi chi catyí: ra cha cahán tuhin ucha tahan vehe ñuhu cuan. Ta ndi ucha cañileru cuan cuñi chi catyí ndi ucha vehe ñuhu cuan.

2

Tuhun cha sacuhun ra chi ñu nyicú vehe ñuhu ñuu Éfeso

¹ Sacuhun tutu chi ra cahán tuhin chihin ñu nyicú vehe ñuhu cha nyaá ñuu Éfeso. Ta catyun chi ra tyehe caa: “Tyehe caa catyí ra cha yihí ndaha ucha tiño chihin ndaha chiyo vaha ra. Ta chicá noo ra mahñu ndi ucha cañileru xuhun cuaan:

² Yuhu chité tandihi cha sacuví ndo. Chité vatyí ñihi xaan tyiño sacuví ndo. Ta cunyeé xaan iñi ndo. Ta chité vatyí ña cunyeé iñi ndo nyehé ndo chi ñu quiñi iyó. Ta chité vatyí tuhva ndo nducu nyehe ndo chi ra cha catyí vatyí tyiño Nyoo chica noo ra soco ña ndicha ra.

³ Cunyeé xaan iñi ndo. Ta nyehé xaan ndo tindoho ta cha sahá tyiño xaan ndo cha cuende chihin cha ña ndu uvi iñi ndo.

⁴ Soco iyó noo cha caá ndo nui. Vatyí ña cuñi vaha ca ndo chii tari quivi xihna ri.

⁵ Yucuan chaha nichon iñi ndo nya maa maa cuví nu ña vaha sacuvi ndo. Ta nasama ndo cuhva iyó ndo. Ta sacuvi ndo tari cuhva chiyo ndo quivi natin cuenda ndo notuhun Nyoo. Tatu ma nasama ndo cuhva iyó ndo, numi ri cuhin nu nyaá ndo, ta tinyai cañileru ndo nu nyaá chi. Soco tatu ndu uvi iñi ndo cuatyí ndo, ma tinyai.

⁶ Soco iyó tucu cha vaha nyacuví ndo. Vatyí ña cuñi nyehe ndo cha quiñi caa cha sacuví ñu yihí cuenda ra Nicolás. Tyicuan tucu yuhu ña cuñi nyehí yucuan.

⁷ Ta nyoho cha cutuñi iñi ndo, tyasoho ndo ñáa cha catyí Tatyí Ii Nyoo chi nyoho ñu nyicú vehe ñuhu. Catyí ra tyehe caa: Tatu cuví chasaha ndo chi ra ña vaha, cuhve cha cachi ndo chiti yutun cha chahá cha conyito aña ndo. Ta yutun cuan nanyaá tun nya nu iyó Nyoo andivi, ta cuñihi ndo tandihi cha vaha cha iyó yucuan.”

Tuhun cha sacuhun ra Jesucristo chi ñáyivi nyicú vehe ñuhu ñuu Esmirna

⁸ Sacuhun tucu tutu chi ra cahán tuhin chihin ñu nyicú vehe ñuhu cha nyaá ñuu Esmirna, ta catyun chi ra tyehe caa: “Tyehe caa catyí ra cuví cha xihna cuiri, ra cundoo nu ndihi tuhun, ra cha chihj ta nandoto:

⁹ Yuhu chité tandihi cha sacuví ndo. Ta chité tindoho cha nyehé xaan ndo. Ta chité cha ndahvi ndo. Soco chihin tuhun Nyoo, tyayii ndo. Ta chité yoso caa ñu cha catyí vatyí ñu Israel cuví ñu, ta cahán ña vaha ñu siqui ndo. Ta ni ñima ñu Israel cuví ñu vatyí noo ityi ñu yihí cuenda ra ña vaha, ra nañi Satanás, cuví ñu.

¹⁰ Soco ma yuhvi ndo cha cunyehe ndo tindoho. Vatyí ra ña vaha cutyihí ra vehe caa chi suhva nyoho, vatyí cunducu nyehe ra chi ndo tatu cusaña ndo chi Nyoo. Ta uchi quivi cunyehe ndo tindoho. Soco cunyicon vaha ndo chi Nyoo nyacua nya quivi cúvi ndo. Ta yuhu cuhve ñayivi coo ndo chihin Nyoo.

¹¹ Ta nyoho cha cutuñi iñi ndo tyasoho ndo ñáa cha catyí Tatyí Ii Nyoo chi nyoho ñu nyicú vehe ñuhu. Catyí ra tyehe caa:

tatu cuví chasaha ndo chi ra ña vaha, ña tahán chi cuhun ndo anyaya, nu cutachi tuñi Nyoo chi añima ña vaha.”

Tuhun cha sacuhun ra Jesucristo chi ñu nyicú vehe ñuhu ñuu Pérgamo

¹² Sacuhun tucu tutu chi ra cahán tuhin chihin ñu nyicú vehe ñuhu ñuu Pérgamo. Ta catyun chi ra tyehe caa: “Tyehe caa catyí ra cha nyisó mityi cha xaan ndinduvi chiyo yuhu:

¹³ Yuhu chité tandihi cha sacuví ndo. Ta chité vatyi iyó ndo nu nyacá ñaha cuihna, ra nañi Satanás. Soco tyicuan ri chinó iñi ndo chii. Ta vasi nu canyicú ndo chiña chahñi ñu chi ra Antipas, ra cha cuví noo cha ndoo cuende, vatyi chiña chicá noo ra cha nañi Satanás cuan. Soco ni ri maa chahñi ñu chi ra, nyoho ña sandihi maa ndo tuhun cha chinó iñi ndo chii.

¹⁴ Soco catuví suhva cha caá ndo nui: Vatyi nu nyicú ndo nya Pérgamo chiña, yihí ra cha ña cacuñi ra saña ra cuhva cha sacuví ra Balaam. Ta maa ra Balaam tyiyuhú ra chi ra Balac, na sacachi ra chi ñu Israel nyayu cha chiyo nu sacahnú ñu chi xitohyo. Tyiyuhú ra chi ra nacatyí ra chi ñu vatyi ñahri caa cha coo ñu chihin tahan ñu vasi ñima yñi ñu cuví, o vasi ñima ñasihí ra cuví.

¹⁵ Ta suri iyó suhva ñáyivi mahñu ndo cha ña cacuñi ñu saña ñu cuhva sañahá ra cuenda ra Nicolás. Ta yuhu ña cuñi nyehi cuhva sañahá ra cuan.

¹⁶ Yucuan chaha numi ri nasama ndo cuhva iyó ndo. Vatyi tatu ma nasama ndo cuhva iyó ndo, cuquichi siqui ndo cha numi ri ta cucañi tahin chihin ñu cuan chihin cha tari mityi cha quitá yuhi.

¹⁷ Ta nyoho cha cutuñi iñi ndo, tyasoho ndo ñáa cha catyí Tatyí Ii Nyoo chi nyoho ñu nyicú vehe ñuhu: tatu cuví chasaha ndo chi ra ña vaha, cucuhve cha cachi ndo noo pan maná cha ñohó xehe. Ta cucuhve noo yuu cuichin chi ndo. Ta nu yuu cuan cucunyaa noo sivi chaa cha yori chitó. Ta noo tuhun ri ñu cuquehen cuenda cuan cucoto.”

Tuhun cha sacuhun ra Jesucristo chi ñu nyicú vehe ñuhu ñuu Tiatira

¹⁸ Sacuhun tucu tutu chi ra cahán tuhin chihin ñu nyicú vehe ñuhu cha nyaá Tiatira.

Ta catyun chi ra tyehe caa: “Tyehe caa catyí Sehe Nyoo, ra cha caá chiti nuu tari noo cha cayú ñuhu. Ta tari caá noo caa finu cha nañi bronce cha xiño xaan, tyicuan caa chaha ra:

¹⁹ Yuhu chité tandihi cha sacuví ndo. Ta chité yoso cuhva cha cuñi ndo chi ñáyivi. Ta chité cuhva cha chinó xaan iñi ndo chii. Ta tyinyee ndo chi tahan ndo. Ta cunyee xaan iñi ndo. Ta chité vatyi cuaha ca cha vaha sacuví ndo vityin ta ñima ca ta nu quichaha.

²⁰ Soco iyó noo cha caá ndo: Vatyi chahá ndo ityi chi ñaha cha nañi Jezabel na sañaha ña chi ndo. Catyí ña vatyi cuenda Nyoo cahán ña. Soco chihin tuhun cha sañahá ña, sandaví ñaha ña chi ñu sacuví tyiño nui. Vatyi sañahá ña cha coo ñu chihin inga rayñi o ñusihí ta ñima yñi ñu o ñasihí ra cuví. Ta sañahá ña cha cachi ñu nyayu cha chiyo nu sacahnú ñu chi xitohyo.

²¹ Yuhu cha nyatu xain cha nasama ña cuhva iyó ña, soco ña cuñi ña nasama ña. Vatyi ta sandoo ca ña cha iyó ña chihin rayñi ta ñima yñi ña cuví.

²² Ta vityin cua quehen noo cuehe chi ña. Ta cua cuhvi ña. Ta ma cuvi nducuita ña. Ta ñu sacuví cha quiñi caa chihin ña, tatu ma ndu uvi iñi ñu, cucuhve noo tindoho nyehe ñu.

²³ Ta cucahñi chi sehe ña. Ta tyicuan caa, coto tandihi ñu nyicú vehe ñuhu, vatyi yuhu chité tandihi cha chicá xiñi ñu, ta tandihi cha caá añima ñu. Ta chi tahan tahan nyoho cucuhve cha tahán chi chi ndo yoso cuhva cha sacuví ndo.

²⁴ Soco chi tandihi ca nyoho ñuu Tiatira, cha ña quehen ndo cuhva cha sañahá ña, ni ña sacuví ndo cha catyí maa ñu tuhun nahnu cuenda ra ña vaha, ña tyaí inga tuhun cha yñi siqui ndo.

²⁵ Soco ma saña ndo cuhva cha vaha nyacuví ndo nyacua nya quichi.

²⁶ Ta nyoho tatu cuví chasaha ndo chi ra ña vaha, ta sacuví ndo cuhva cuñi nyacua nya nu ndihi tuhun, cucuhve ityi chi ndo cha cunyaca ñaha ndo chi ñu ñuhu ñáyivi.

²⁷ Tari chaha Suti ityi chii cha cunyaca ñahi, tyicuan caa cucunyaca ñaha ndo. Tari cha chihin noo yutun caa cutachi tuñi ndo chi ñu. Tari tahvi cuatyí minoo quisi ñuhú, tyicuan caa cusacuvi ndo chihin ñu.

28 Ta cuhve tiñooh cahnu andiví cunyaa chihin ndo. Ta ican yuhu cuví cuan.

29 Ta nyoho cha cutuñí iñi ndo tyasoho ndo ñáá cha catyí Tatyí Ii Nyoo chi nyoho, ñu nyicú vehe ñuhu.”

3

Tuhun cha sacuhun ra Jesucristo chi ñu nyicú vehe ñuhu ñuu Sardis

1 Sacuhun tucu tutu chi ra cahán tuhin chihin ñu nyicú vehe ñuhu ñuu Sardis. Ta catyun chi ra tyehe caa: “Tyehe caa catyí ra cha yihí ndaha ndi ucha Tatyí Ii Nyoo ta ndi ucha tiñooh andiví: Yuhu chité tandihí cha sacuví ndo. Ta vasi catyí ñáyiví tyi nyitó ndo soco cha cuenda chi yuhu, chihí ndo.

2 Saha cumi vaha ndo chiin ri ca cha vaha cha iyó chi ndo. Vatyí cha cuñí ndihí tuhin nu nyicú ndo. Vatyí nyehí vatyí cha sacuví ndo, ña vaha maa nuu Nyoo.

3 Nícohon iñi ndo tuhun vaha cha cutuhva ndo. Cunyicon ndo cuhva cuan, ta ñasama ndo cuhva iyó ndo. Vatyí tatu ma naquehen vaha ndo cha vaha, sana iñi ndo ta cuquichi síqui ndo, tari tuhva ra suhu quichi.

4 Soco iyó suhva nyoho ñu Sardis chiña cha ña sacuví ndo cha quiñi caá. Ña sacanyahyu ndo sahma ndo cuví cuan. Ta maa ndo cucuihno ndo sahma cuichin chihin. Ta cucaca noo ndo chihin, vatyí tyicuan caa tahán chi chi ndo.

5 Ta nyoho tatu cuví chasaha ndo chi ra ña vaha, cucuihno ndo sahma cuichin chihin. Ta ma sanai sívi ndo nu libru ñu cuaconyito chihin Nyoo. Ta cunacoto nui chi ndo, chihin nuu Suti, ta chihin nuu ángel.

6 Ta nyoho cha cutuñí iñi ndo, tyasoho ndo ñáá cha catyí Tatyí Ii Nyoo chi nyoho ñu nyicú vehe ñuhu.”

Tuhun cha sacuhun ra Jesucristo chi ñu nyicú vehe ñuhu Filadelfia

7 Sacuhun tucu tutu chi ra cahán tuhin chihin ñu nyicú vehe ñuhu ñuu Filadelfia. Ta catyun chi ra tyehe caa: “Tyehe caa catyí ra ii, ra ñahri cuatyí, ra cha ndicha vaha, ra cha ndaha ndaha ticu rey David, ra cha nuñá yuvehe ta ni noo ñu ta ma cuvi

nacasi ñu. Ta tatu nacasi ra, ni noo ñu ta ma cuvi nuña ñu. Tyehe caa catyí ra:

8 Yuhu chité tandihí cha sacuví ndo. Ta nuu ndo nuñe noo yuvehe. Ta yori cuví nacasi, (vatyí चाहि cha cahan ndo tuhun Nyoo chihin ñáyiví, ta yori cuví casi). Ta vasi chiin ri fuerza ndo, soco quichahá ndo tuhun cahín, ta ña catyí ndo vatyí ña ñohó nuu ndo chii.

9 Ta ñu cuenda ra ña vaha, ñu cuendu, ñu catyí vatyí ñu Israel cuví ñu, ta ñima, cusacuiñi chiti chi ñu nuu ndo, tacuhva coto ñu tyi yuhu cuñí chi ndo.

10 Ta sacuví ndo cha catyí, vatyí cun- yee iñi ndo. Ta yucuan cuenda cusaha cuende chi ndo chihin tándoho cahnu cha cusaquichi síqui tandihí ñáyiví, vatyí cunducú cote chihin tandihí ñu iyó síqui ñuhu ñáyiví tatu cuñí ñu chii.

11 Numi ri cuquichi. Saha vaha ndo cuenda cuhva iyó ndo, coto yóo cha tinyaa premio cha cuñihi ndo.

12 Nyoho tatu cuví chasaha ndo chi ra ña vaha, cahnu ca tyiño cucuvi ndo nuu Nyoí. Ta ma canyaha ca ndo nu nyaá Nyoo. Ta cutyai sívi Nyoí chi ndo, ta sívi ñuu Nyoí, ñuu Jerusalén chaa cha cusaquichi Nyoí nya andiví, ta suri cutyaa tiqui sívi chai chi ndo ñandihí.

13 Ta nyoho cha cutuñí iñi ndo, tyasoho ndo ñáá cha catyí Tatyí Ii Nyoo chi nyoho ñu nyicú vehe ñuhu.”

Tuhun cha sacuhun ra Jesucristo chi ñu nyicú vehe ñuhu ñuu Laodicea

14 Sacuhun tucu tutu chi ra cahán tuhin chihin ñu nyicú vehe ñuhu ñuu Laodicea. Ta catyun chi ra tyehe caa: “Tyehe caa catyí ra cha ndicha vaha, ra cuví cha ndaa vaha cha cahán cha ndicha, ra cha savaha tandihí cha iyó chihin Nyoo.

15 Yuhu chité tandihí cha sacuví ndo. Ta chité vatyí ni ña cuñí vaha ndo chii. Ta ni ña cuñí tucu ndo saña ndihí ndo chii. Vaha tyehe ta saña ndihí ndo chii, o sañihi ndo quichaha ndo tuhun cahin, vaha.

16 Soco vatyí chiin ri cuñí ndo chii, ta ni ña saña ndihí ndo chii, ta ni ña cuñí ndo sacuvi ndo tuhun cahin, yucuan chaha cusanaa ndihí iñi tuhun ndo.

17 Vatyí nyoho catyí ndo tyehe caa: Yuhu tyayii, vaha iyé, ta ñahri ca maa cha

chiñuhú chii, catyí ndo. Ta ña chitó ndo vatyí cuví ndo noo ra ña sii cuñí, noo ra ñahri iyó chi, noo ra ndahvi, noo ra cuaa, noo ra vityiyaa cuví ndo.

¹⁸ Yucuan chaha chahí tuhun chi ndo vatyí chi mai sata ndo xuhun cuaan vaha cha yahá nu ñuhú ta ña cayú, tacuhva na cutyayí ndo. Ta chi mai sata ndo sahma cuichin vatyí cuihno ndo, tacuhva cha ma cucahan nuu ndo vatyí vityiyaa ndo. Ta tyihí ndo colirio chiti nuu ndo tacuhva na nanyehe ndo.

¹⁹ Yuhu chahí tuhun chi ñu cha cuñí xain chi. Ta tachí tuñi chi ñu ñandíhi. Yucuan chaha catyí chi ndo, nasama ndo cuhva iyó ndo ta sacuvi ndo cha vaha.

²⁰ Yuhu nanyaí yuvehe añima ñáyivi ta sacachén. Tatu nya noo ñu chiñí ñu ndusi, ta nuña ñu yuvehe, yuhu quihvi ta cuxiñi chihin ñu. Ta maa ñu cuxiñi ñu chihin mai.

²¹ Cucuhve cha cunyaa ndo chihin nu nyacá ñahi tatu cuví chasaha ndo chi ra ña vaha. Tari yuhu cuví chasahi chi ra, ta vityin nyaí chihin Suti nu nyacá ñaha ra.

²² Ta nyoho cha cuví cutuñi iñi ndo, tyasoho ndo cha catyí Tatyí Ii Nyoo chi nyoho ñu nyicú vehe ñuhu” —catyí ra Jesucristo.

4

Noo cuhva cha sacahnú ñu chi Nyoo nya gloria

¹ Cha yahá tuhun cuan, ta nyehi noo yuvehe tacoho nya andivi. Ta noo ndusu cha tari caa ndusu trompeta chiñi cha cahán chihin cha xihna ri ta catyí chi chii:

—Ndaa ihya ta cusañahi chuun cha cuacuvi nu cuahan ca chi —catyí ndusu cuan chii.

² Ta caa cuhva ri cuan ta tuví iñi vatyí ñihi vavaha nyaá Tatyí Ii Nyoo chihin. Ta nanyehi noo tyayu nanyaá nya andivi. Ta nyaá noo ra nuu tyayu cuan.

³ Ta ra nyaá cuan, xiño nuu ra tari xiño noo yuu vaha cha nañí jaspe ta cornalina. Ta nicachico yuhu tyayu cuan nyaá noo coo yahnyi, ta xiño ti tari yuu cha nañí esmeralda.

⁴ Ta nicachico tyayu cuan nyehi oco cumi ca tahan tyayu. Ta nyicú oco cumi tahan ra cha vaha chahnu. Cañihnó ra sahma

cuichin. Ta yihí corona xuhun cuaan xiñi ra.

⁵ Ta nu nanyaá tyayu cha nyaá mahñu cuan, yucuan quitá minoo tacha. Ta vaa ri ca maa cuví. Ta ñihi xaan cahán savi. Ityi nuu tyayu cuan cayú ucha tahan ñuhú. Ta ucha tahan Tatyí Ii Nyoo cuví cuan.

⁶ Ta ityi nuu tyayu cuan iyó tucu noo cha tari caa tyañuhu, xiño xaan tari ino.

Nicachico yuhu tyayu cuan ta mahñu tyayu cuan, tayucú cumi tahan cha nyitó cha tari caa quitá ta tari caa ñáyivi caa. Ta cuaha xaan chiti nuu cuan nyicú, tari ityi nuu ta tari ityi chata.

⁷ Cha xihna ri cha nyitó ihya, tari caá noo ndicaha caá. Ta cha cu uvi tari caá noo sindiquí caá. Ta cha cu uñi, tari caá nuu rayí caá nuu. Ta cha cucumi tari caá noo tasu cha cuahan ndava, tyicuan caá.

⁸ Ta ndi cumi tahan cha nyitó ihya, tahan tahan chi ta nyaá iñu tahan ndichin chi. Ta nicahnu maa chi nyaá chiti nuu chi, tari ityi chata chi ta tari ityi chichi ndichin chi. Ta ndiyaca ta ñiyaca ta ña chicuita chi catyí chi tyehe caa:

Ra ii xaan cuvún, ra ndi xaan cuvún, ra ñahri cuatyí cuvún,

Sutu Mañi yuhu, Nyoo, iyó tandíhi tunyee iñi chuun.

Ra cha iyó nu quichaha tandíhi cuvún, Ta ra iyó vityin. Ta ra cha nyaá cha cuquichi.

⁹ Ta cachahá ndi cumi tahan cha nyitó cuan gloria chi Nyoo. Ta sacahnú chi chi ra, ta canacuhvá chi tyahvi nyoo chi ra nyaá nu tyayu cahnu cuan, ra cha iyó tandíhi tyembu. Ta tahan ri chaha cha casacuvi chi tyicuan caa,

¹⁰ ta ndi oco cumi ra cha vaha chahnu cuan chicuiñi chiti ra ta casacahnu ra chi ra iyó tandíhi tyembu. Ta catyihí ra corona ra nu tyayu cahnu cuan. Ta cacatyí ra tyehe caa:

¹¹ Sutú Mañi nyuhu, Nyoo cuvún chi ndi. Chi yoho tahán chi cha cuhva ndi gloria, ta sacahnú ndi chuun.

Ta tahán chi cha cunyaca ñahun.

Vatyí maun savahá tandíhi cha iyó.

Ta cha cuenda cha iyó iñi maun ta chicoo tandíhi, cacatyí ra.

5

Nu nyehe ra Juan noo libru ta noo Mbee Luhlu cha cuví ra Jesucristo

¹ Tyicuan ta chiyo vaha ra cha nyaá nu tyayu cahnu cuan, nyehi yihí ndaha ra noo libru tari caá noo tutu cha natuví yo. Ta nyaá letra ityi nuu ta ityi chata. Ta nyasí chi chihin ucha tahan sellu.

² Ta nyehi noo ángel cha nyee xaan. Ta chaa xaan cahán ra ta ndacá tuhun ra:

—¿Yóo ra tahán chi nuña libru ihya ta sacanyaha ra sellu ihya? —catyí ra.

³ Soco ni ityi andivi ta ni ityi nu ñuhu ñayivi, ta ni ityi chichi ñuhú, ta yori maa cha cuví nuña libru cuan. Ta ni cha nyehe ñu nuu, ta ma cuví.

⁴ Ta yuhu chacu chaa xain, vatyí yori maa quitá cha cuví nuña libru cuan. Yori maa cuví sacuaha, ta yori cuví nyehe nuu chi.

⁵ Tyicuan ta noo ra cha vaha chahnu cuan catyí ra chii:

—Ma cuacu con. Vatyí ra cuví ndicaha o cuñi chi catyí, ra nyacá ñaha, ra vachi tata ra Judá, ra vachi tata rey David, ican ra cuví chasaha ra tacuhva cuví nuña ra nu libru cuan ta cahnya ra ndi ucha sellu cuan —catyí ra.

⁶ Tyicuan ta mahñu tyayu cuan ta mahñu ndi cumi cha nyitó cuan, ta mahñu ra cha vaha chahnu cuan, nyehi chi noo Mbee Luhlu. Nanyaá ti ta caa ti cha chahñi ñayivi chi ti. Ucha tahan ndiqui ti ta ucha tahan chiti nuu ti nyaá. Ta chiti nuu cuan ican cuví ndi ucha tahan Tatyí Ii Nyoo cha tachi ra nicacahnu siqui ñuhu ñayivi.

⁷ Ta ra cuví Mbee Luhlu cuan chahan ra ta quehen ra libru cuan cha yihí ndaha chiyo vaha ra nyaá nu tyayu cuan.

⁸ Cuhva cha quehen ra libru cuan, ndi cumi cha nyitó cuan ta ndi oco cumi ra cha vaha chahnu cuan cachicuiñi chiti ra nuu ra cuví Mbee Luhlu cuan. Ta tahan tahan ra cha vaha chahnu cuan nyisó ra arpa, noo cha tari caá guitarra caá. Ta canyisó tucu ra copa xuhun cuaan tyitu yihí cutu. Ta cutu cuan cuví chi tandihi cha chican tahvi ñu cuenda Nyoo.

⁹ Ta cachitá ra noo yaa chaa, ta catyí ra tyehe caa:

Yoho cuví ra tahán chi cha quehun libru ihya, ta cahnyon ndi ucha sellu cha nyaá nu chi.

Vatyí chihun saha ñayivi. Ta chihin niñun saton chi ndi vatyí coo vaha ndi chihin Nyoo.

Ta cuví ndi ñayivi ñuu nyihi ta ñuu nahnu nicacahnu ñuhu ñayivi, ñayivi sin sin sahan cahán, ñayivi sin sin tata.

¹⁰ Chahun ityi chi ndi vatyí cuví ndi rey ta cuví ndi sutu cha cuenda Sutu yo Nyoo.

Ta cucunyaca ñaha ndi chi ñayivi iyó siqui ñuhu ñayivi, cacatyí ra, chitá ra.

¹¹ Yaha cuan ta nanyehi, ta chiñi ndusu cha cahán cuaha xaan ángel, tayucú ra nicachico yuhu tyayu cahnu cuan, ta nu nyicú cumi tahan cha nyitó cuan, ta nu nyicú ra cha vaha chahnu cuan. Ta cuenda millón ángel nyicú cuan, nyehi.

¹² Ta chihin cha ñihi cahan ángel cuan, ta cacatyí ra:

Ra cuví Mbee Luhlu cha chahñi ñayivi, tahán chi cha cunyaca ñaha ra, ta naquehen cuenda ra cha tyayii.

Tahán chi naquehen cuenda ra cha chiñi tuñi.

Tahán chi cha naquehen cuenda ra tandihi tunyee iñi.

Tahán tucu chi cha cuhva yo gloria chi ra, ta sacahnu yo chi ra.

Ta cahnu xaan ca ra cuví maa ra, cacatyí ángel cuan.

¹³ Ta chiñi tiqui cha cahán tandihi cha savaha Nyoo, tandihi cha iyó andivi, ta siqui ñuhu ñayivi, tandihi cha iyó chichi ñuhú, ta chichi tyañuhu, tandihi cha savaha Nyoo catyí chi tyehe caa:

Cahnu xaan ca cuví ra cha nyaá nu tyayu.

Cahnu xaan ca cuví ra cuví Mbee Luhlu.

Ta nacuhva yo gloria chi ra.

Ta na cunyaca ñaha ra tandihi maa tyembu, catyí tandihi cha savaha Nyoo.

¹⁴ Ta ndi cumi cha nyitó cuan catyí chi:

—¡Tyicuan caa na cuví! —catyí chi.

Ta ndi oco cumi ra cha vaha chahnu cuan, cachicuiñi chiti ra ta casacahnu ra chi ra iyó tandihi tyembu.

6

Nu chahnyā ra Jesucristo ndi ucha tahan sellu

¹ Tyicuan ta nyehi nu chahnyā ra cuví Mbee Luhlu cuan sellu cha xihna ri chichi cha ndi ucha tahan cuan. Ta chiñi cahán noo cha nyitó cha cumi tahan cuan, chihin noo ndusu cha tari caá cha cahán savi ta catyí chi:

—¡Ñaha, ta nyehun! —catyí chi chii.

² Tyicuan ta nanyehi ta nyehi noo caballu cuichin, ta ra yosó chi ti cuan ndaha ra noo arco. Ta ñihí ra noo corona quihí xiñi ra vatyí saha ganaa ra, ta cuasaha ganaa ca ra.

³ Ta cuhva cha chahnyā ra cuví Mbee Luhlu cuan sellu cu uvi, chiñi cha catyí cha nyitó cu uvi cuan tyehe caa:

—¡Ñaha ta nyehun! —catyí cuan chii.

⁴ Ta quita inga caballu, tyacu cuaha. Ta ra cha yosó chi ti chicoo ityi chi ra vatyí tinyaa ra cha taxi ri iyó ñayivi, tacuhva cahñi ñu chi tahan ñu. Ta ñihí ra noo mityi cahnú quindaha ra.

⁵ Ta cuhva cha chahnyā ra cuví Mbee Luhlu cuan sellu cu uñi, ta chiñi cha catyí cha nyitó cu uñi cuan tyehe caá:

—¡Ñaha ta nyehun! —catyí cuan chii.

Ta nanyehi, ta nyehi noo caballu toon. Ta ra yosó chi ti, yihí ndaha ra noo ticatya.

⁶ Ta chiñi noo ndusu mahñu cumi tahan cha nyitó cuan, ta catyí cuan:

—Tari cuhva xuhun yahvi ñu cha noo quivi, yucuan cuhva yahvi noo litru nuñi. Tyicuan caa tucu uñi litru cebada. Ta ma sativun acetye ta vinu —catyí ndusu cuan.

⁷ Ta cuhva cha chahnyā ra cuví Mbee Luhlu cuan sellu cu cumi, chiñi cha cahán cha nyitó cucumi cuan, ta catyí chi, tyehe caa:

—¡Ñaha ta nyehun! —catyí chi.

⁸ Ta nanyehi ta nyehi noo caballu cuaan. Ta ra yosó chi ti nañi ra Tuhun Chihi. Ta chata ra vachi inga ra cha nañi Ra Nyacá Ñaha Nu Nyicú Ndiyí. Ta cañihí ra tunyee iñi cha cahñi ra chi cuaha xaan ñayivi iyó siqui ñuhu ñayivi. Vatyí chichi cha sava ñayivi iyó siqui ñuhu ñayivi, cucahñi ra sava ñu. Ta cucahñi ra chi ñu chihin cha sanacanda ra cuatyí, ta chihin tama, ta

chihin cuehe, ta chihin quiti xaan iyó siqui ñuhu ñayivi.

⁹ Cuhva cha chahnyā ra cuví Mbee Luhlu cuan sellu cu ohon, nyehi xiu arta. Yucuan ñohó ñima ñu cha chihí cha cuenda tuhun Nyoo tyi sacoto ñu tuhun ra chi ñayivi.

¹⁰ Ta tyehe caa catyí ñu chihin noo ndusu chaa xaan:

—Sutu Mañi yuhu, ra ii cuvún. Ta sacuvún cha catyún. ¿Ama cutachi tuñun chi ñayivi cha cahñi chi ndi cha catyí tuhun maun? —catyí ñu.

¹¹ Tyicuan ta cañihí noo noo ñu cuan sahma cuichin cuhno ñu. Ta catyí ra chi ñu na canyitatu ñu suhva ca quivi, nyacua nya cha caña tahan tandihí ca tahan ñu, ñu sacuví tyiño nuu ra Cristo, ñu cha tahán chi cucúvi tari cuhva chihí maa ñu.

¹² Cuhva cha chahnyā ra cuví Mbee Luhlu cuan sellu cu iñu, nanyehi ta quichi noo cha taán cahnú. Ta nduñaa ñayivi, tari sahma ñu nyaá tucuihya iñi, toon xaan nduvi. Ta yoo andivi cuan nanduvi tari niñi.

¹³ Ta tiño andivi canacoyo ti nya nu ñuhu ñayivi. Tari sanacoyo tu higo chiti yutya tun tatu yahá noo tatyí ñihi.

¹⁴ Tari natuví yo noo tutu tyicuan caa cuanaa ri andivi. Ta tandihí yucu ta tandihí ñuhú cha nyicú mahñu tyañuhu nacanda chi ta nasama chi nu nyaá chi.

¹⁵ Ta tandihí rey cha iyó siqui ñuhu ñayivi in ri chihin ra nahnu, ta ra tyayii, ta ra cacuví nuu chi sindaro, ta ra iyó xaan fuerza chi, ta tandihí ñu cacuví musu, ta ñu cha ña cuví musu, tandihí ri ñu cuan caquihvi xehe ñu chichi yavi yuu cha iyó yucu nahnu, ta chichi yavi ñuhú.

¹⁶ Ta catyí ñu chi yucu cuan ta chi yuu cuan tyehe caa:

—Canacoyo ndo siqui ndi, ta tixehe ndo chi ndi nuu ra nyaá nu tyayu andivi, coto tachi tuñi ra cuví Mbee Luhlu cuan chi ndi.

¹⁷ Vatyí cha cha quivi cahnú cha cutachi tuñi ra chi ndi. ¿Ta yóo cuví cha cuví cunyee cuan? —catyí ñu.

7

Nu ñihí ñu Israel sellu cunyaq tyaan ñu

¹ Cha yahá tuhun ihya ta nyehi cumi tahan ángel catayucú ra ndi cumi chiyo nu

quichi tatyí síqui ñuhu ñayiví. Ta ña chaha ra yaha tatyí cuan vatyí cava chi síqui ñuhu ñayiví. Ni ña chaha ra cha cava chi nuu tyañuhu, ni síqui yutun catayucú nuu ñuhú.

² Ta nyehe tiqui inga ángel, vachi ra ityi nu caña ñanyii, ta nyisó ra sellu Nyoo nyitó. Ta ángel cuan canachaa ra chihin cha ñihi ndusu ra chi inga cumi ca ángel cuan, ra cha ca iyó ityi chi vatyí casativí ra nuu ñuhu ñayiví ta nuu tyañuhu. Ta catyí ra chi ra:

³ —Ma sativí ñaha ndo nuu ñuhu ñayiví, ni nuu tyañuhu, ta ni nuu yutun cha ñiri ca cha ta sañaha ca ndi yóo ñu cuví musu Nyoo, vatyí cutyaa ndi noo sellu tyaan ñu —catyí ángel cuan.

⁴ Ta chiñi nacatyí ra yoso tahan ñáyiví tyaá ra sellu cuan: cientu uvi xico cumi mil tahan ñu Israel.

⁵ Uchi uvi mil ñu tata ra Judá chicunyaá sellu, ta uchi uvi mil ñu tata ra Rubén, inga uchi uvi mil ca ñu cuenda tata ra Gad,

⁶ uchi uvi ca mil cuenda tata ra Aser, uchi uvi mil ca cuenda tata ra Neftalí, uchi uvi mil ñu tata cuenda ra Manasés,

⁷ ta uchi uvi mil cuenda tata ra Simeón, uchi uvi mil cuenda tata ra Leví, ta uchi uvi mil cuenda tata ra Isacar,

⁸ uchi uvi mil ñu cuenda tata ra Zabulón, ta uchi uvi ca mil ñu cuenda tata ra José, ta uchi uvi mil ca ñu cuenda tata ra Benjamín. Tandihí ñu cuan ta chicunyaá sellu Nyoo chi ñu.

Nu nyehe ra Juan chi ñu ñihno sahma cuichin

⁹ Cha yaha tuhun cuan ta nanyehí ta nyehí cuaha xaan ñáyiví nyicú. Ta yori cuví nacahvi chi ñu, vatyí nyicú ñáyiví tandihí ri ñuu nyihi ta ñuu nahnu iyó síqui ñuhu ñayiví. Ta nyicú ñáyiví siin siin sahan cahán. Ta nyicú ñáyiví tandihí ri tata. Ta catayucú ñu nuu ra nyaá nu tyayu, ta nuu ra cuví Mbee Luhlu. Ta cañihno ñu sahma cuichin. Ta cayihí ndaha ñu ndaha ñoo.

¹⁰ Ta tandihí ñu chihin cha ñihi ndusu ñu, ta canachaa ñu ta catyí ñu:

—Sutu yo Nyoo, ra nyaá nu tyayu gloria, ta ra cuví Mbee Luhlu, ican ra sacacú chi yo —cacatyí ñu canachaa ñu.

¹¹ Ta tandihí ángel catayucú ra nicachico yuhu tyayu cuan, ta nicachico chata ra cha vaha chahnu cuan, ta nicachico chata ndi

cumi tahan cha nyitó cuan. Ta cachicuiñi chiti ra chihin nuu ra nya nu ñuhú nuu ra nyaá tyayu cuan. Ta casacahnú ra chi ra. Vatyí Nyoo cuví ra.

¹² Ta cacatyí ra:

Tahán chi tyehe caa chuun:

Sacahnú ndi chuun ta chahá ndi gloria chuun vatyí chiñi tuñi xaun.

Nacuhvá xaan ndi tyahvi nyoo chuun.

Ta sacuvahá ndi chuun vatyí iyó xaan tunyee iñi chuun, ta cuaha xaan fuerza iyó chuun, Nyoo Sutu ndi cuví chuun. Ta tyicuan ri na cuví chi tandihí tyembu, catyí ra.

¹³ Tyicuan ta noo ra cuví ra cha vaha chahnu cuan ndaca tuhun ra chii ta catyí ra:

—¿Yóo ñu cañihno sahma cuichin ihya? ¿Ta nya ityi quichi coyo ñu? —catyí ra.

¹⁴ Ta yuhu catyí chi ra:

—Tata, yoho chitón.

Ta catyí ra chii:

—Ican ñu ihya cuví ñu cayaha nu tindocho cahnu. Ta canacatyá ñu cuatyí ñu, ta ndu-cuichin sahma ñu chihin ñiñi ra cuví Mbee Luhlu.

¹⁵ Yucuan chaha nyicú ñu ityi nuu tyayu nu nyaá Nyoo. Ta sacuví ñu tyiño nuu ra ndiyaca ta ñiyaca chichi vehe ñuhu ra. Ta ican ra cuví ra nyaá nu tyayu gloria ta cusaha cumi ra chi ñu vatyí cua cunyaá ra chihin ñu.

¹⁶ Ta ma nyehe ca ñu tindocho chihin soco, ni chihin cha ityi ñu ndutya. Ta ni ma cahmi ca ñanyii chi ñu. Ni ma sayanga ca cha ihñi chi ñu.

¹⁷ Vatyí ra cuví Mbee Luhlu cha nyaá mahñu tyayu cuan cusaha cumi ra chi ñu, tari sahá cumi yo mbee. Ta cunyaca ra chi ñu nu coho ñu ndutya cha chahá cha cuconyito ñu tandihí tyembu. Ta Nyoo cunacuhva ra tandihí ndutya nuu ñu —catyí ra chii.

8

Nu chahnya ra Jesucristo sellu cu ucha ta quita noo ángel chihin noo cuu xuhun cuaan

¹ Cuhva cha chahnya ra cuví Mbee Luhlu sellu cu ucha nu libru cuan, ndutaxin ri nya andiví tari noo cha sava hora.

² Yaha cuan ta nyehi chi ndi ucha ángel catayucú ra nuu Nyoo. Ta caquehen cuenda ra ucha tahan trompeta.

³ Yaha cuan ta quichi inga ángel chihin noo cuu xuhun cuaan cha tuhvá yihí cutu. Ta chicuinanyaá ra ityi nuu arta cuan. Ta quehen cuenda ra cuaha xaan cutu, vatyí cuhva cuenda ra ñin ri chihin cha chicán tahvi ñáyivi chi Nyoo. Nuú arta xuhun cuaan cha nyaá ityi nuu tyayu Nyoo, yucuan chaha cuenda ra.

⁴ Ta quitá ñuhma cutu cuan, nandaá chi nu nyaá Nyoo ñin ri chihin cha chicán tahvi ñu cuenda ra.

⁵ Tyicuan ta ángel cuan quehen ra cuu cuan. Tyicuan ta sacutu ra chihin titi ñuhu cha quitá arta cuan. Ta tuchi ra siqui ñuhu ñayivi. Ta quichaha cahan savi, ta iyo cuví. Ta quihvi tacha, ta quichaha taan.

Nu tiví ángel trompeta

⁶ Tyicuan ta ndi ucha ángel cha canyisó ndi ucha trompeta cuan, cha nyatú tuhva ri ra vatyí cativi ra.

⁷ Ángel cha xihna ri cuan quichaha tiví ra trompeta ra. Ta quichaha coon savi yuu ta saca ñiñi chihin chi, ta saca ñuhu cha cayú chihin. Ta cayú cha yatyin cha sava ñuhu ñayivi. Ta cha yatyin cha sava yutun cayú chihin tandihí cuhu cuii.

⁸ Ta ángel cu uvi cuan tiví tucu ra trompeta ra. Ta canacava tari noo yucu cha cayú ñuhu mahñu tyañuhu. Ta cha yatyin sava tyañuhu cuan nduvi chi ñiñi.

⁹ Ta cha yatyin sava quití cha iyó chichi tyañuhu cuan chihí ti. Ta cha yatyin sava barcu cha iyó cuan, catahvi cuatyí.

¹⁰ Ta ángel cu uñi tiví ra trompeta ra. Ta canacava noo tiñoó cahnu andivi, suri cayú ñuhu chi ti tari ñuhu ñiti. Canacava ti siqui cha yatyin ri sava yuvi nahnu ta siqui cha yatyin ri sava ndohyo.

¹¹ Ta tiñoó cahnu cuan nañi ti Ajenjo. Ta cha yatyin ri sava ndutya cha iyó, nanduvi chi Ajenjo cha cuví noo veneno cha uva xaan. Ta cuaha xaan ñáyivi chihí cha cuenda ndutya cuan, vatyí ndu uva chi.

¹² Ta ángel cu cumi cuan nativi ra trompeta ra ta cha yatyin sava ñanyii nduñaa, ta cha yatyin sava yoo, ta cha yatyin cha sava tiñoó andivi cuanaa ti. Ta

cha cuenda cha nduñaa suhva ñanyii cuhva cuan, nduñaa cumi tahan hora cha noo noo quivi. Ta cha cuenda cha tiví yoo ta tiñoó, yucuan chaha ña cacuví sandichin chi cumi tahan hora cha noo noo ñuu.

¹³ Yaha cuan ta nanyehi ta chiñi vatyí noo ángel ndavá ra mahñu andivi. Ta chihin cha ñihi ndusu ra ta catyí ra tyehe caa:

—¡Ndahvi cuví ñu iyó siqui ñuhu ñayivi vatyí nyaá tiví uñi ca tahan ángel trompeta ra! —catyí ángel cuan.

9

¹ Ta ángel cu ohon cuan nativi ra trompeta ra. Ta nyehi chi noo ra cuan, tari tiñoó andivi caá ra. Ta canacava ra siqui ñuhu ñayivi. Ta quehen cuenda ra cuan ndaha ticu cha cuenda yavi cono cha ñahri maa nu chitahan chi.

² Tyicuan ta nuña ra yavi cuan. Ta cuaha ñuhma nandaá tari maa ñuhma cha quitá chichi noo horno cahnu. Ta ñuhma cuan chasi chi nuu ñanyii ta nasaca noo chihin tatyí. Ta nduñaa ñayivi.

³ Ta mahñu ñuhma cuan caquitá coyo pinchi. Ta candava coyo ti siqui ñuhu ñayivi. Ta chicoo ityi chi ti vatyí tyaa ti chi ñáyivi tari tisuhma cha iyó siqui ñuhu ñayivi.

⁴ Quehen ti tuhun vatyí ma satasi iñi ti, ni chi cuhu cha iyó nu ñuhu ñayivi, ta ni noo cuhu cuii, ta ni noo yutun, soco chi ñáyivi cha ñahri sellu Nyoo nyaá tyaan ñu. Chi ñu cuan cutyaa ti.

⁵ Soco ñahri ityi iyó chi ti cha cahñi ti chi ñáyivi, soco tacuhva tyaa ri ti chi ñu. Ta coo xico uhvi chi ñu chichi cha ohon yoo. Ta cha uhvi cuan, tari caá xico tisuhma cha tyaa chi ñáyivi tyicuan caá.

⁶ Ta quivi cuan ñáyivi cunanducu ñu tuhun chihí. Soco ma nañihi ca ñu. Ta vasi cuñi ñu cúvi ñu, soco tuhun chihí cucono ri chi chi ñu vatyí ma cúvi ñu.

⁷ Tari caá caballu nahnu cha cachicá cuatyí, tyicuan caá pinchi cuan. Ta xiñi ti yihí tari caá noo corona xuhun cuaan. Ta tari caá nuu rayi, caá nuu ti.

⁸ Ta ixi xiñi ti tari caá ixi xiñi ñusihí caá. Ta tari caá noho ndicaha caá noho ti.

⁹ Ta soo ti tari caa, tyicuan caa. Ta ñihi xaan cachan ndichin ti. Tari cachan

cha cuaha xaan carreta caballo cuhva cha cachinó ti nu iyó cuatyí.

¹⁰ Ta tari caá suhma t̄isuhma caá suhma ti, vatyi yihí iñu. Ta chihin cuan cuví tyaá ti chi ñáyiv̄i chichi cha ohon yoo.

¹¹ Ta pinchi cuan iyó noo ra cuví nuu chi ti. Ta ican cuví noo ángel cha nyacá ñaha yavi cahnu ta cono cha ñahri nu chitahan. Ta cha chihin sahan hebreo nañí ra Abadón. Ta chihin sahan griego nañí ra Apolión, ta cuñí chi catyi: Ra Sanaa.

¹² Yahá noo t̄indoho cuan, soco cumañi uvi ca.

¹³ Ta ángel cu iñu cuan nativ̄i ra trompeta ra. Ta chiñi noo ndusu cha quitá chichi ndi cumi ndiqui tutun arta xuhun cuaan cha nyaá nuu Nyoo.

¹⁴ Ta ndusu cuan catyí chi ángel cu iñu cha nyisó trompeta cuan, tyehe caa:

—Ndachi chi ndi cumi ángel cha canuhñi yatyin yuhu yuvi cahnu Eufrates —catyí ndusu cuan.

¹⁵ Tyicuan ta ndachi ndi cumi ángel cuan, vatyi cha nyatu tuhva xaan ra maa maa cuhva cuan maa maa quiv̄i cuan, maa maa yoo cuan, maa maa cuiya cuan, vatyi cahñi ra chi cha yatyin cha sava ñáyiv̄i iyó siqui ñuhu ñayiv̄i.

¹⁶ Ta chiñi yoso tahan sindaro chihin caballo ra, ta quitá uvi cientu millón tahan ra.

¹⁷ Ta tyicuan caa nyehi caballo cuan chihin visión, cha sanyehē Nyoo chii. Ta pechu ra cayosó chi ti cuan, yihí noo caa tyacu cuaha, tyacu azu ta tyacu cuaan. Ta tari caá xiñi ndicaha caá xiñi caballo ra. Ta chichi yuhu ti quitá ñuhu ta ñuhma ta azufre.

¹⁸ Ta cha yatyin sava ñáyiv̄i iyó siqui ñuhu ñayiv̄i cachih̄i chihin uñi tahan cha caquitá yuhu caballo cuan; ñuhu ta ñuhma ta azufre.

¹⁹ Vatyi tunyee iñi cha iyó chi ti, chichi yuhu ti ta suhma ti nyaá. Vatyi tari caá coo, caá suhma ti. Tari noo xiñi coo tyicuan caa nuu suhma ti. Ta chihin cuan sañicuehé ti chi ñáyiv̄i.

²⁰ Soco tandih̄i ca ñu cha candoo, cha ña cachih̄i chihin cuehe cuan, ña sacucuita ñu cha sacuví ñu cha ña vaha. Ta ni ña sacucuita ñu cha sacahnú ñu chi tatyí ña vaha ta chi xitohyo. Vatyi cuví cuan noo

xuhun cuaan, xuhun cuichin, bronce, yuu, yutun. Cha ña cuví nyehe, ni ña chiñi ta ni ña cuví caca cuví cuan.

²¹ Ni ña casandih̄i ñu cha chahñi ñu, ta cha satasí ñu. Ta ña sandih̄i ñu cha iyó ñu chihin rayi ta chihin ñusih̄i ta ñima yñ ñu cuví, ta ñima ñasih̄i ra cuví. Ta ña sandih̄i ñu cha suhú ñu.

10

Ángel cha nyisó libru luhlu

¹ Tyicuan ta nyehi inga ángel cha iyó xaan tunyee iñi chii, cha vachi noó ityi andiv̄i mahñu noo vico. Ta noo coo yahnyi nyaá xiñi ra. Ta xiño xaan nuu ra tari ñanyii. Ta tari cha cayú ñuhu chaha ra, tyicuan caá.

² Ta yihí ndaha ra noo libru luhlu cha tanuña nuu. Ta chinanyaá ra chaha chiyo vaha ra nu tyañuhu. Ta chaha chiyo satyin ra chinanyaá ra siqui ñuhu ñayiv̄i.

³ Tyicuan ta ñihi xaan cana chaa ra, tari ndusu ndicaha cha nduxaan ti. Ta cuhva cha canachaa ra, chiñi ucha tahan ndusu cha siin siin caa tari cha cahán savi, tyicuan caa ndusu ra.

⁴ Ta cha yahá cha chiñi cha cahan ndi ucha ndusu cuan, tyicuan ta cuatyai nuu tutu. Soco chiñi noo ndusu ityi andiv̄i, ta catyí chi chii tyehe caa:

—Çocumi xehun tuhun cha chiñun cahan ndi ucha ndusu cuan. Ta ma tyaun nuu tutu —catyí ndusu cuan chii.

⁵ Tyicuan ta ángel cha nyehi cha chañi nu tyañuhu ta siqui ñuhu ñayiv̄i, nacoñehē ra ndaha chiyo vaha ra ityi andiv̄i.

⁶ Ta ángel cuan tyanahá ra vatyi cahan ra noo cha ndicha cuenda Nyoo, ra nyitó tyicuan ri maa, ra cha savahá andiv̄i ta ñuhu ñayiv̄i ta tyañuhu ta tandih̄i cha iyó nuu chi. Ta catyí ra:

—Ñahri ca cha cucuee.

⁷ Vatyi cuhva cha cuquichaha tiv̄i ángel cu ucha cuan trompeta ra, yucuan cuhva cuchino cava tuhun xehe cha yihí iñi Nyoo tyi sacuvi ra, tari cuhva sacoto ra chi ra casacuví tyiño nuu ra, ra cacuví profeta cuenda ra —catyí ángel cuan.

⁸ Ta ndusu cha chiñi yuhu, cha quita ityi andivi, cahan tucu chi chihin inga chaha, ta catyí chi chii tyehe caa:

—Cuahan, ta quehun libru luhlu cha tanuña nuu, cha yihí ndaha ángel cha chañi nu tyañuhu ta nu ñuhu ñayivi —catyí chi.

⁹ Tyicuan ta chahin nu nyaá ángel cuan ta chiquen libru luhlu cuan nacuhva ra chii, ta catyí ra chii:

—Quehen, ta cachun, vixi xaan tari tyañuñu. Soco chichun cundu uva chi —catyí ra chii.

¹⁰ Tyicuan ta quehin libru luhlu cha yihí ndaha ángel cuan, ta chachi. Vixi xaan tari tyañuñu. Soco cha yaha cha chachi, uva xaan nduvi chi chichi.

¹¹ Tyicuan ta catyí ra chii:

—Cuñi chi cha cunacatyun inga chaha tuhun cha cahán Nyoo siqui ñayivi cuaha xaan ñuu nyihi ta ñuu nahnu, ta siqui ñayivi siin siin sahan cahan, ta siqui ra cacuvi rey —catyí ra chii.

11

Uvi tahan ra cacuvi cha ndaa

¹ Tyicuan ta cachaha ra noo ndoo cha tari caá noo yutun cha tyicuhvá chi. Ta cacatyí ra chii tyehe caa:

—Nducuita ta tyicuhvon vehe ñuhu Nyoo ta arta ra, ta nacahvun yoso tahan ñu tuhva sacahnú chi Nyoo yucuan.

² Soco ma tyicuhvon nuquehe cha nyaá ityi chata vehe ñuhu cuan. Vatyí cha cuenda ñu inga ñuu cuví. Ta ican ñu cuan cucuaca chaha ñu ñuu ii cuan chichi cha uñi cuiya sisava.

³ Ta yuhu cutachi uvi testigu cucahan ra cha cuende cha ni ri ca cha chichi noo mil uvi cientu uñi xico quivi. Ta cacuihno ra sahma tucuihya iñi.

⁴ Ta ican ninduvi testigu cuan cuví uvi tahan yutun olivo ta uvi tahan cañileru cha tayucú nuu Sutu Mañi yo, ra nyacá ñaha siqui ñuhu ñayivi.

⁵ Tatu yóo ñu cuñi satasi iñi chi ninduvi testigu cuan, cuquita ñuhu yuhu ninduvi ra, ta cahmi chi tandihi ñu xaan iñi chi ra. Ta tyicuan caa cucuvi ñu cuñi satasi iñi chi ra.

⁶ Testigu cuan iyó ityi chi ra cha cacasi ra nu ma coon savi cha niri ca cha cachahá

cuenda ra tuhun cahán Nyoo chi ñayivi. Ta iyó tucu ityi chi ra cha casananduvi ra niñi chi ndutya. Ta iyó tucu ityi chi ra cha casanyehe ra tindoho chi ñu iyó siqui ñuhu ñayivi chihin tandihi ri nuu cuehe, yoso tahan chaha cha cacuñi maa ra.

⁷ Soco cuhva cha cua ndihi cuhva cuenda ra tuhun Nyoo chi ñayivi, cuquita noo quiti xaan yavi cono cuan, ta cucañi tahan ti chihin ninduvi testigu cuan. Ta cucuvi chasaha ti chi ra. Ta cucañi ti chi ra.

⁸ Ta coño ñuhu ra cundoo maa cava calle ñuu nu chihí Sutu Mañi yo nu cruzi. Ta tari Sodoma ta Egipto nanduvi ñuu cuan, (cha cuenda cha ña vaha cha sacuvi ñayivi ñuu cuan).

⁹ Ta chichi cha uñi quivi sisava, cunyehe tandihi ñayivi coño ñuhu ra, ñayivi tandihi ñuu nyihi, ñayivi tandihi ri tata, ta ñayivi siin siin sahan cahán, ta ñayivi ndihi ri ñuu nahnu, cunyehe ñu coño ñuhu ra. Ta ma cuhva ñu cha quihí coño ñuhu ra chichi ñuhú.

¹⁰ Ta ñu cha iyó siqui ñuhu ñayivi cu cusii xaan cuñi ñu cha cuenda cha cachihí ra cuan. Ta nyacua cutachi ñu regalo chi tahan ñu cha sii cuñi ñu, vatyí cachihí ninduvi rayii cha cachaha cuenda tuhun cahán Nyoo chi ñu. Vatyí chaha xaan ra tindoho chi ñu cha cuhva cha cuñi maa ñu.

¹¹ Soco cha yaha cha uñi quivi sisava, Nyoo sanandoto ra chi ra, ta candicuita tucu ra inga chaha. Ta tandihi ñu nyehe canandoto ra, canayuhvi xaan ñu.

¹² Tyicuan ta ninduvi testigu cuan cachiñi ra noo ndusu ñihi xaan ityi andivi. Ta catyí chi chi ra tyehe caa:

—Ndaa ndo ityi siqui ihya —catyí ndusu cuan chi ra.

Ta candaq ra ityi andivi chichi noo vico. Ta canyehe ñu xaan iñi chi ra nu canandaá ra.

¹³ Ta cuhva cuan quichi noo cha taan cahnu. Ta chichi ñuu cuan canacoyo cuaha xaan vehe. Ta chichi cha uchi uchi tahan vehe, canacoyo noo noo. Ta cha tandihi chichi ñuu cuan chihí ucha mil ñayivi cha cuenda cha taan cuan. Ta ñayivi ña chihí, casacahnu ñu chi Nyoo, ra nyaá andivi, cha cuenda cha yuhvi ñu.

¹⁴ Yaha tindoho cu uvi cuan, soco numi ri cuquichí tindoho cu uñi.

Nu tiví ángel trompeta cu ucha

¹⁵ Ta ángel cu ucha nativí ra trompeta ra. Ta canatyacu ndusu ñihi xaan ityi andiví, ta catyí chi tyehe caa:

Tandihí nu nyacá ñaha rey siqui ñuhu ñayiví ihya, cha yaha nanduvi chi Sutu yo Nyoo ta chi ra Cristo.

Ta maa ra cucunyaca ñaha tyicuan ri maa, catyí ndusu cuan.

¹⁶ Tyicuan ta ndi oco cumi ra cha vaha chahnu, ra canyicú nuu tyayu nu nyaá Nyoo, cachicuiñi chiti ra chihin nuu ra nya nu ñuhu. Ta casacahnú ra chi Nyoo.

¹⁷ Ta cacatyí ra:

Nacuhvá ndi tyahvi nyoo chuun, Sutu Mañi nyuhu.

Nyoo ra iyó tandihí tunyee iñi chii cuvún.

Yoho iyón vityin, ta iyón nu quichaha tandihí ta nya cha cuquichun.

Vatyí cha naquehen cuendon tunyee iñun.

Ta cha quichahun nyaca ñahun vityin.

¹⁸ Ta ñáyiví tandihí ñuu nahnu cuxaan ñu.

Soco cha chaá quiví cha tachi tuñun chi ñu.

Ta cha chaá quiví cha cucutuñi chi ñu ndiyí.

Ta cucuhvon cha vaha cha tahán chi chi ñu sacuví tyiño nuun, ñu chaha cuenda tuhun cahún,

ñu cha nacuhvá cuenda añima chi maun, ta sacahnú ñu sivun.

Vasí cahnu ñu cuví ñu ta vasí ndahvi ñu.

Ta chaá cuhva cha sanaun chi ñu sativí chi ñáyiví siqui ñuhu ñayiví, cacatyí ra.

¹⁹ Tyicuan ta nuña yuvehe ñuhu Nyoo cha nyaá andiví, ta chichi vehe ñuhu natuví caja cuenda cha natyihí tahan ra tuhun chihin yo. Ta quihví tacha. Ta vaa ri maa cuví, ta cahan savi. Ta chiyó noo cha taan. Ta ñihi xaan coon savi yuu.

12

Nu chican nyicon noo coo cahnu chi noo ñaha sihi

¹ Tyicuan ta tuví noo seña cahnu andiví. Vatyí quitá noo ñaha sihi ta siquí noo ña ñanyii tari cha ñihnó ña vestido. Ta chañí ña siqui yoo. Ta yihí noo corona cha uchi uvi tiño andiví xiñi ña.

² Ta ñaha sihi ihya ñohó sehe ña. Ta chacú cha vavaha ña chihin cha uhvi cha cacú sehe ña, vatyí nyehé xaan ña tindoho cha cua cacu sehe ña.

³ Tyicuan ta quitá nonga seña ityi andiví. Ta nyehí noo coo cuaha cahnu. Ta nyaá ucha xiñi ti, ta uchi ndiquí ti. Ta tahan tahan xiñi ti yihí noo corona.

⁴ Ta chihin suhma ti sanacoyo ti cha yatyin cha sava tiño andiví siqui ñuhu ñayiví. Ican coo ihya chicuiñi ti nuu ñaha cha cua cacu sehe cuan, vatyí ta cha cacu ri cue ta cachi ti chi cue.

⁵ Ta ñaha cuan sacacú ña noo rayii. Ta ican ra cuacunyaca ñaha tandihí ñáyiví iyó siqui ñuhu ñayiví. Ñihi xaan cua cunyaca ñaha ra tari cha chihin noo yutun caa vee. Ta cha yaha cacú ra, naxitá Nyoo chi ra nu nyaá ra nu tyayu ra.

⁶ Ta ñaha cuan chingó ña cuahan ña noo ñuhú ityi, nu sanduvaha Nyoo noo nu coo ña, vatyí yucuan cucuhva ra cha cachi ña cha ni ri ca cha noo mil uvi cientu uñi xico quiví.

⁷ Yaha cuan ta chiyó noo cuatyí nya andiví, nu cañi tahan ángel cahnu Miguel ta tandihí ángel cuenda ra chihin coo cahnu cuan. Ta coo cuan ta tandihí tatyí ña vaha cuenda ti, cacañi tahan chihin ra Miguel.

⁸ Soco ña saha ganaa ti cha cañi tahan ti. Ta ña ñihí ca ti nu ndoo ti nya andiví chihin tatyí ña vaha cha candihí chihin ti.

⁹ Tyicuan ta tavá ñehe Nyoo chi ti, cuví ti Coo Chahnu, cha nañí cuihna ra cuví nuu, ra cha sandaví ñaha chi tandihí ñáyiví iyó siqui ñuhu ñayiví. Maa ra ta tatyí ña vaha cuenda ra cacanacoyo ra nya nu ñuhu ñayiví.

¹⁰ Tyicuan ta chiñi noo ndusu ñihi nya andiví. Catyí chi tyehe caa:

—Cha chaá nu cacú añima yo vityin. Cha saha ganaa tunyee iñi Nyoo. Cha nyacá ñaha Nyoo yo vityin chihin ra Cristo Sehe ra. Vatyí cha tavá ñehe ra chi ra cha tyaa xaan cuatyí siqui ra yañi yo ndiyaca ta ñiyaca nuu Nyoo.

¹¹ Ta ra yañi yo cacuví chasaha ra chi ra chihin ñiñi ra cuví Mbee Luhlu, ta chihin tuhun Nyoo cha cacahan ra tuhun chihin ñáyiví. Vatyí ña yuhvi ca ra cha cucú ra.

¹² Yucuan chaha cusii cuñi nyoho cha iyó ndo andiví. Soco jndahvi nyoho ñu iyó siqui ñuhu ñayiví ta nu tyañuhu! Vatyí cuihna canacava ra nya andiví ta nyacua nya siqui ñuhu ñayiví nu nyicú ndo. Ta xaan xaan

ra vatyi chitó ra vatyi suhva ri ca quiví ra nyaá.

¹³ Ta cha nyehe coo cahnu cuan vatyi nacava ti nu ñuhu ñayiví, chica nyicon ti chi ñaha cha sacacu sehe cuan.

¹⁴ Soco ñaha cuan ñihí ña uvi tahan ndichin nahnu tasu, tacuhva cuví ndava ña ta cono ña chi coo cuan nyacua nya ñuhu ityi cuan. Ta yucuan cuví nu cuñihi ña cha cachi ña chichi cha uñi cuiya sisava.

¹⁵ Ta coo cuan tuchí ti ndutya chihin yuhu ti, vatyi cono noo yuvi cahnu, vatyi satyañi chi ñaha cuan.

¹⁶ Soco ñuhu ñayiví tyinyee chi ña, vatyi ndata chi ta quihví yuvi cahnu cha tuchí coo cahnu cuan chihin yuhu ti.

¹⁷ Ta cha cuenda cha ña cuví chasaha ti chi ña, cuahan ti cua cañi tahan ti chihin ñáyiví vachi tata ña, ñu cha quichahá tuhun cahán Nyoo, ñu nyicón cha ndicha cha cahán ra Jesucristo chihin cha ñi ñi ñu.

13

Nu nyehe ra Juan uvi quití quiñi caa

¹ Chicuinanyaí nu ñiti yuhu tyañuhu cuan. Ta nyehí quitá noo quití quiñi xaan caa nuu tyañuhu. Ta nyaá ucha xiñi ti, ta uchi ndiquí ti. Ta tahan tahan ndiquí ti yihí noo corona. Ta xiñi ti nyaá noo tuhun cha cahán ña vaha siqui Nyoo.

² Quití quiñi caa ihya caá ti tari caá noo cuiñi. Ta tari caá chaha yihí caá chaha ti. Ta yuhu ti tari caá yuhu ndicaha caá. Ta coo cahnu cuan chaha ti ityi chi quití quiñi caa cha cunyaa ti nu tyayu ti. Ta chaha ti ityi chi ti cha cunyaca ñaha ti chi ñáyiví.

³ Ta noo xiñi quití quiñi caa cuan tari maa cha nyaá noo nu cahví cahnu. Soco nu cahví cuan nduvaha. Ta iyo xaan cuñi tandihí ñáyiví iyó siqui ñuhu ñayiví. Ta nanyicón ñu chi quití quiñi caa cuan.

⁴ Ta sacahnú tucu ñu chi coo cahnu cuan, vatyi chaha ti ityi chi quití quiñi caa cuan. Ta sacahnú tucu ñu chi quití quiñi caa cuan, ta catyí ñu:

—¿Yóó cha cuví chi tari cuví chi quití quiñi caa ihya? ¿Ta yóó cha cuví cañi tahan chihin ti? —catyí ñu.

⁵ Ta ñihí tucu quití quiñi caa cuan ityi vatyi cahan ña vaha ti ta cahan quiñi caa

ti siqui Nyoo. Ta cua cunyaca ñaha ti chichi cha uvi xico uvi yoo.

⁶ Ta tyicuan caa sacuví ti. Cahán ti siqui Nyoo. Ta cahán ña vaha ti siqui nu nyaá Nyoo. Ta cahán ti chi ñu nyicú andiví.

⁷ Ta chicoo tucu ityi chi ti cha sacoo ti cuatyi siqui ñu cuenda Nyoo nyacua nya cuví chasaha ti chi ñu. Ta chicoo ityi chi ti siqui ñáyiví ndihí ri tata, ñáyiví siñ siñ sahan cahan, ñáyiví tandihí ri ñuu nyihi, tandihí ri ñuu nahnu,

⁸ tandihí ñu cha ma ñihi ñayiví chaa coo chihin ra cuví Mbee Luhlu, ra cha chihí. Ma ñihi ñu vatyi nyata ni cumañi chingo ñuhu ñayiví ta ñahri siví ñu nyaá nu libru ra. Tandihí ñu cuan cusacahnu ñu chi quití quiñi caa cuan.

⁹ Ta ñu cutuñí ñi, na quichaha ñu tuhun ihya:

¹⁰ Ñu cunyaca vehe caa chi inga ñu, suri cuhun tucu maa ñu. Ta ñu cha cachahñí chihin cha xaan, suri chihin cuan cucúvi tucu maa ñu. Yucuan chaha cuñi xaan chi cha cunye xaan ñi ñu cuenda Nyoo. Ta cuñi chi cha chino ñi ñu chi ra.

¹¹ Yahá cuan ta nyehí inga quití quiñi caa. Quitá ti chichi ñuhú. Quití ihya nyaá uvi ndiquí ti cha tari caá ndiquí mbee luhlu. Soco tari cahán noo coo xaan vavaha cahán ti.

¹² Ta nyacá ñaha ti tari nyacá ñaha quití quiñi caa cha xihna ri cuan. Suri chihin nuu quití cha xihna ri cuan nyacá ñaha ti. Ta tyiyuhu ti chi ñuhu ñayiví ta ñu iyó siqui na sacahnu ñu chi quití quiñi caa cha xihna ri cuan, quití cha nduvaha nu cahví cahnu cha chinyaá chi ti.

¹³ Ta cuaha xaan milagru sacuví ti. Nyacua cuví sanacoyo ti ñuhu cayú ityi andiví chihin nuu ñáyiví.

¹⁴ Ta sandaví ñaha ti chi ñáyiví iyó siqui ñuhu ñayiví chihin seña cha cuví sacuví ti chihin nuu quití quiñi caa cha xihna ri cuan. Ta tachí ti nachino noo xiñahñu quití quiñi caa cha tahnya cahví chihin mityi, soco ña chihí ti.

¹⁵ Ta quití quiñi caa cu uvi cuan chicoo ityi chi ti cha cuhva ti cha conyito xiñahñu quití quiñi caa cha xihna ri cuan, vatyi xiñahñu cuan cuví cahan. Ta tachí xiñahñu cuan nacúvi tandihí ñáyiví ña cuñí sacahnu

chi chi.

¹⁶ Ta siin ri catyí ti vatyi na cunyaa noo tuñi chi tandihi ñáyivi, tandihi ñu nyihi, ñu chahnu, ñu tyayii, ñu ndahvi, ñu yori chitoho, ta ñu iyó chitoho. Ta cucunyaa tuñi cuan ndaha chiyo vaha ñu o tyaan ñu.

¹⁷ Ta yori maa cuví sata ta xico tatu ñahri tuñi cuan nyaá chi ñu. O tatu ñahri sivi ti, o número sivi ti nyaá chi ñu.

¹⁸ Tuhun ihya cuñi xaan chi cha chiñi tuñi. Ñu cutuñi iñi, na saha ñu cuenda número quiñi quiñi caa cuan. Vatyi número noo rayii cuví. Ta número ra cuan ican cuví iñu cientu uñi xico iñu.

14

Nu sacahnú cientu uvi xico cumi mil ñáyivi chi Nyoo chihin cha chitá ñu

¹ Yahá cuan ta nyehi chi ra cuví Mbee Luhlu, nanyaá ra nu yucu Sión. Ta chihin ra tayucú cientu uvi xico cumi mil ñáyivi cha nyaá sivi ra tyaan ta sivi Sutu ra.

² Tyicuan ta chiñi noo cha cayu cha quichi ityi andivi, tari cayu cuaha yuvi nahnu. Ta tari cahán savi cha ñihi xaan, o tari noo ndusu cha cuaha xaan ra casacuacú arpa.

³ Ta cachitá ñu noo yaa chaa nuu tyayu Nyoo, ta nuu ndi cumi cha nyitó cuan, ta nuu tandihi ra cha vaha chahnu cuan. Ta yori cuví cutuhva yaa cuan, iin ri maa cientu uvi xico cumi mil ñu cha cacu añima siqui ñuhu ñáyivi.

⁴ Ican ñu ihya cuví ñu cha ña chicoo cuatyi ñu chihin inga rayii ta ni ri rayii chihin inga ñusihí, vatyi ii ndoo ñu, ta nyicón ñu chi ra cuví Mbee Luhlu tandihi ri ityi nu cuahan ra. Cacú añima ñu ta cuví ñu ñu xihna ca chahá cuenda ñu chi ñu chi Nyoo ta chi ra cuví Mbee Luhlu.

⁵ Yori cuví catyi vatyi cuendu ñu, vatyi ni noo cuendu ña tuhvá ñu cahan. Yucuan chaha ñahri cuatyi ñu nuu Nyoo.

Tuhun cha sacoto uñi tahan ángel

⁶ Tyicuan ta nyehi inga ángel cuahan ndava ra andivi. Ta nyisó ra tuhun Nyoo cha ma ndihi ca maa, ta ican tuhun ihya cuví cha sacacú ra Cristo añima yo, Vatyi cusacoto ra tuhun ihya chi ñáyivi iyó siqui ñuhu ñáyivi, ñáyivi ndihi ri ñuu nahnu, ta

ndihi ri ñuu nyihi, ta ñáyivi ndihi ri tata, ta ñáyivi siin siin sahan cahan.

⁷ Ta ñihi xaan cahan ra ta catyí ra:

—Na yuhvi ndo chi Nyoo, ta sacahnu ndo chi ra. Vatyi cha chaa cuhva cha cua cutuñi chi ñáyivi. Sacahnu ndo chi ra savaha andivi ta ñuhu ñáyivi, ta tyañuhu ta ndohyo ndutya.

⁸ Tyicuan ta cuahan inga ángel cuan chata ra, ta catyí ra:

—Cha canacava ñuu Babilonia cahnú vi-tyin, cha taní chí. Vatyi ñu iyó ñuu cuan sañaha ñu chi inga ñáyivi iyó siqui ñuhu ñáyivi cha quiñi caa tari sacuví maa ñu. Tari quiñi cha sacuiñi ñu chi ñu chihin vinu ña vaha cuví cuan.

⁹ Ta nacahan ángel cu uñi chihin cha ñihi ndusu ra ta catyí ra:

—Tatu nya noo ñu sacahnú ñu chi quiñi quiñi caa cuan ta chi xiñahñu ti, o chahá ñu chi ñu cha cunyaa tuñi ti tyaan ñu, o ndaha ñu,

¹⁰ cunyehe xaan ñu tindoho vatyi cutyihí Nyoo chi ñu nu ñuhu, ta nu azufre tari cha cusacoho Nyoo noo vinu xaan chi ñu. Ta chihin nuu ángel ta chihin nuu ra cuví Mbee Luhlu cucuvi cuan.

¹¹ Ta ñuhma cha quitá nu nyehé ñu tindoho cuan tyicuan ri maa cuquita chi. Ta ma nyitatu maa ñu ndiyaca ta ñiyaca nu cohon ñu yucuan, vatyi sacahnú ñu chi quiñi quiñi caa cuan ta chi xiñahñu ti, o chahá ñu cha cunyaa tuñi sivi ti chi ñu.

¹² Yucuan chaha ñu yihí cuenda Nyoo, ñu quichahá tuhun cahán ra, ñi iñi ñu chinó iñi ñu chi ra Jesús ta cuñi chi cha cunyehe xaan iñi ñu cha nyehé ñu tindoho sacuvi inga ñáyivi.

¹³ Tyicuan ta chiñi noo ndusu cha quichi ityi andivi, ta catyí chí chí tyehe caa:

—Tya tuhun ihya: “Vityin ta ityi nuu ca, si xaan cucuvi chí ñu chihí ta chinó iñi ñu chí Sutu Mañi yo.” Ndicha, catyí Tatyí Ii Nyoo vatyi cunyatatu ñu chihin tyiño sahá ñu. Ta iin ri cahun cha vaha cha sacuví ñu chihin ñu.

Nu cutachi tuñi Nyoo chi ñáyivi

¹⁴ Tyicuan ta nanyehi ta nyehi noo vico cuichin. Ta siqui vico cuan nyaá noo rayii cha ndicha cui maa cha quichi nya gloria.

Ta yihí noo corona xuhun cuaan xiñi ra. Ta yihí ndaha ra noo mityi cutya ta xaan.

¹⁵ Ta quita nonga ángel chichi vehe ñuhu ta chaa canachaa ra chi ra nyaá siqui vico cuan. Ta catyí ra:

—Vityin saha tyiñon chihin mityun, ta na satacon cosecha cha iyó siqui ñuhu ñayivi. Vatyí cha chaa cuhva, ta cha iyó siqui ñuhu ñayivi cha chityí chi —catyí ra.

¹⁶ Tyicuan ta ra cha nyaá siqui vico cuan sayaha ra mityi ra siqui ñuhu ñayivi, ta nasataca ra cha iyó nuu chi.

¹⁷ Tyicuan ta inga tucu ángel quita chichi vehe ñuhu cha nyaá andivi. Ta nyisó tucu maa ra noo mityi cutya cha xaan vavaha.

¹⁸ Ta nu nyaá arta quita tucu nonga ángel cha iyó ityi chi cha cunyaca ñaha chi ñuhu cha cayú. Ta canachaa ra ta cana ra chi ra cha nyisó mityi cutya cha xaan cuan. Ta catyí ra chi ra:

—Saha tyiñon chihin mityi xaan cha nyisón chiña, ta na satacon vatu tichaha ndivi cha iyó siqui ñuhu ñayivi, vatyí cha chityí —catyí ra.

¹⁹ Ta ángel cuan sayaha ra mityi ra siqui ñuhu ñayivi ta chahnya ra tichaha ndivi cha iyó siqui ñuhu ñayivi. Ta tyihi ra noo nu tyihi ra vatyí cucuhñi ra ta quita ndutya chi. Ta cha tyehe caa cuñí chi catyí cha cutachi tuñi Nyoo chi ñayivi.

²⁰ Ityi chata ñuu cachahñi ra tichaha ndivi cuan, ta cuñí chi catyí vatyí cachihí cuaha xaan ñayivi, ta nu cuví cuan, cama xaan cama xaan ñiñi ñu chati. Ta chaa chi nya nu sucun nu nyaá frenu yuhu caballu ta tari cuhva noo uñi cientu kilómetro chinó ñiñi cuan.

15

Nu quita ángel chihin ucha ca tahan tindoho cha cunyehe ñayivi nu ndihi tuhun

¹ Nyehi nonga seña cahnu andivi, ta yuhvi xain cuví, vatyí nyehi ucha tahan ángel chihin ndi ucha tindoho. Chihin ihya cuví nu ndihi tindoho vatyí cundihí cha cuxaan Nyoo chihin ñayivi cha ña quichahá ñu tuhun cahán ra.

² Ta nyehe tiqui noo cha tari caa tyañuhu, xiño tari caá ino, nasaca chi chihin ñuhu cha cayú. Ta ñu cha yahá cuví chasaha chi

quití quiñi caa cuan ta chi xiñahñu ti, ñu cuví chasaha cha ma cunyaa número sivi ti cuan chi ñu, tandihí ñu tayucú ñu yuhu tyañuhu cha xiño cuan. Ta ndahá ñu arpa, cha chahá Nyoo chi ñu.

³ Ta chitá ñu yaa ra Moisés, ra sacuví tyiño nuu Nyoo, ta yaa ra cuví Mbee Luhlu. Ta tyehe caa catyí ñu:

Cahnu ta iyo xaan caá tandihí maa cha sacuvún.

Nyoo, Sutu ndi, iyó tandihí tunyee iñi chuun.

Ndoo xaan ta ndicha xaan ityun.

Yoho Rey cuvún cuenda tandihí ñayivi iyó siqui ñuhu ñayivi.

⁴ ¿Yóó cha ma yuhvi chuun, yoho Sutu Mañi nyuhu?

¿Yóó cha ma sacahnu chuun?

Vatyí noo tuhun ri maun cuví ra ii.

Ta cuquichi coyo ñayivi tandihí ñuu, ta cusacahnu ñu chuun.

Vatyí cha nyehe ñu cha vaha cha sacuvún, catyí ñu chitá cuan.

⁵ Cha yahá tuhun ihya ta nanyehi nuña yuvehe ñuhu nya andivi nu cumi vaha ñu tabla cha nyaá ley.

⁶ Ta chichi vehe ñuhu cuan quita coyo ndi ucha ángel cha canyisó ndi ucha tindoho cuan. Ta cañihno ra sahma finu, cuichin ta xiño. Ta cayihí ra sincho xuhun cuaan ta nya pechu ra chitahan.

⁷ Tyicuan ta noo cha nyitó cuan, chaha cuan noo noo copa xuhun cuaan chi ndi ucha tahan ángel cuan. Ta chichi copa cuan tyitu maa yihí cha xaan Nyoo cha cutachi tuñi ra chi ñayivi. Ta ican ra iyó ra tyicuan ri maa.

⁸ Ta chichi vehe ñuhu cuan chitu maa chihin ñuhma cha cuenda cha cahnu xaan cuví Nyoo ta cha cuenda tunyee iñi iyó chí ra. Ta yori maa cuví quihvi chichi vehe ñuhu cuan cha niri ca cha cumañi ndihi ndi ucha tindoho cha nyisó ndi ucha tahan ángel cuan.

16

Copa cha yihí tindoho cha cua saquichi ndi ucha tahan ángel cuan

¹ Tyicuan ta chiñi noo ndusu ñihi cha quita vehe ñuhu nu nyaá Nyoo. Ta catyí chí chi ndi ucha ángel cuan:

—Cuahan ndo cua coyo ndo cha ñohó chichi copa chiña siqui ñáyivi iyó siqui ñuhu ñayivi, vatyí Nyoo cutachi tuñi ra chi ñu —catyí ndusu cuan.

² Ángel cha xihna ri cuan chahan ra ta coyo ra cha ñohó chichi copa cuan siqui ñáyivi cha nyaá tuñi quití quiñi caa cuan chí, ñu cha sacahnú xiñahñu ti. Ta quitá noo nu cahvi xaan chi ñu, ta uhvi xaan.

³ Ta ángel cu uvi cuan coyo ra cha yihí chichi copa ra nu tyañuhu. Ta ndutya tyañuhu cuan nanduví niñi tari niñi noo ndiyi, ta tandihí cha nyitó chichi tyañuhu cuan cachihí.

⁴ Ta ángel cu uñi cuan coyo ra cha yihí chichi copa ra siqui yuvi nahnu ta siqui ndohyo ndutya ta cananduví chi niñi.

⁵ Tyicuan ta chiñi cha cahán ángel cuenda ndutya tyehe caa:

—Sutu Mañi yuhu, yoho cuvún noo ra vaha vatyí tachí tuñun chi ñáyivi tyehe caa, Sutu Mañi yuhu, Nyoo ii cuvún ta iyón vityin ta nu quichaha tandihí.

⁶ Vatyí maa ñu cachati ñu niñi ñáyivi cuendon ta niñi ra cacuví profeta cuendon. Ta vityin yoho tari cha cunasacohun niñi chi ñu vatyí tyicuan caa tahán chi chi ñu —catyí ángel cuan.

⁷ Ta chiñi tiqui vatyí cahan noo cha cahán ityi nu nyaá arta Nyoo tyehe caa:

—Ndicha, Sutu Mañi yuhu Nyoo, iyó tandihí tunyee iñi chuun. Vityin cha yaha tachi tuñun chi ñáyivi chihin cha ndicha ta chihin cha ndaa —catyí cuan.

⁸ Ta ángel cu cumi cuan coyo ra cha yihí chichi copa ra nu ñanyii. Ta chicoo ityi chi ñanyii cuan vatyí cahmi chi chi ñáyivi chihin ñuhu chi.

⁹ Ta tandihí ñu, quiñi xaan chahmí ñanyii chi ñu. Soco ña canasama ñu cuhva iyó ñu, ni ña casacahnú ñu chi Nyoo. Ta cahan ña vaha ñu siqui Nyoo ra cuví sanyehe tindoho chi ñu tyehe caa.

¹⁰ Ta ángel cu ohon cuan coyo ra cha yihí chichi copa ra siqui tyayu quití quiñi caa cuan. Ta nduñaa ri nu nyacá ñaha ti. Ta ñáyivi cuenda ti, nyacua nacachi yihí ñu yaa ñu cha cuenda cha nyehé xaan ñu cha uhvi.

¹¹ Soco ni tyicuan caa ta ña sandihí ñu cha sacuví ñu cha ña vaha. Ta cahan ña vaha ñu siqui Nyoo ra nyaá andivi cha cuenda cha uhvi chí ñu ta cha cuenda nu cahvi chí ñu.

¹² Ta ángel cu iñu cuan coyo ra cha yihí chichi copa ra siqui yuvi cahnu Eufrates. Ta yuvi cuan na ityi chí tacuhva vatyí nuña noo ityi cha yaha ra cacuví rey cha vachi coyo ityi nu caña ñanyii.

¹³ Tyicuan ta nyehí cha quitá yuhu quití quiñi caa cuan ta yuhu coo cahnu cuan ta yuhu ra cuví profeta cuendu. Vatyí caquita coyo uñi tahan tatyí ña vaha yuhu ra cuan. Tari caá sahva caá tatyí ña vaha cuan.

¹⁴ Ican ihya cuví tatyí cuihna cha casacuví milagru nahnu. Ta quitá coyo chí vatyí sandu ñin ri chí tandihí rey cha iyó siqui ñuhu ñayivi, vatyí cacañi tahan ra quivi cusañaha Nyoo tyi iyó tandihí tunyee iñi chí ra.

¹⁵ Ta catyí Nyoo:

—Nyehe ndo vatyí yuhu cha vachi tari noo ra suhu. Vatyí sana ri iñi ndo ta quihví ra suhu vehe ndo. Si xaan cucuvi chí ñáyivi nyatú tuhva ri quivi quichi. Ta vii cumí ñu sahma ñu (o cuñi chí catyí ñanima ñu) tacuhva cha ma cuvityiyaa ñu nu cua quichi, ta ma cucahan nuu ñu, catyí Nyoo.

¹⁶ Ta cundu ñin ri ra cacuví rey nu nañi chí chihin sahan hebreo Armagedón.

¹⁷ Tyicuan ta ángel cu ucha cuan coyo ra cha yihí chichi copa ra nu tatyí, ta nya vehe ñuhu andivi nu nyaá Nyoo nu tyayu ra, quitá noo ndusu chaa xaan ta catyí chí: —Cha cuví vityin —catyí ra.

¹⁸ Tyicuan ta vaa ri maa cuví ta cahán savi ta quihví tacha. Ta ñihi xaan taan siqui ñuhu ñayivi. Ta ndaha chicoo ñáyivi siqui ñuhu ñayivi, ta ña tuhva taan cha ñihi xaan tyicuan caa.

¹⁹ Ta nu taan cuan ndata ñuu cahnu cuan, uñi nu ndata. Ta tandihí ca ñuu siqui ñuhu ñayivi canacoyo. Ta Nyoo nichon iñi ra chí ñuu cahnu Babilonia cuan vatyí quiñi xaan sacuví ñu. Ta sanyehe xaan ra tindoho chí ñu vatyí cuxaan xaan ra chí ñu.

²⁰ Tandihí ñuhú cha iyó chichi tyañuhu ta tandihí yucu, ndihí cuanaa.

²¹ Ta nahnu xaan tucu savi yuu coon ityi andivi siqui ñáyivi. Ta vee xaan. Tari noo

cha uvi xico kilu vee noo noo savi yuu cuan. Ta ñáyiví cahan ña vaha ñu siqui Nyoo cha cuenda tindoho savi yuu cuan, vatyi cuví chi noo tindoho cahnu xaan cha cuenda ñu.

17

Nu cua tachi tuñi Nyoo chi noo ñaha cata iñi

¹ Tyicuan ta chichi cha ucha tahan ángel cha cayihí ndaha ucha copa cuan, quichi noo ra nu nyaí, ta catyí ra chii:

—Ñaha tyi cusañahi chuun yoso caa cucutuñi chi ñaha cata iñi cahnu cha nyaá siqui tyañuhu.

² Vatyi ra cacuví rey siqui ñuhu ñayiví casacuví ra cha quiñi caa chihin ña, ta ñáyiví cha iyó siqui ñuhu ñáyiví, tiví xaan ñu chihin cha quiñi caa cha sacuví ña —catyí ra chii.

³ Tyicuan ta nyehi noo cha sañaha Tatyí Ii Nyoo chii, ta chinyaca ángel cuan chii chiqui ndi nu yori maa ñáyiví iyó, ta yucuan nyehi chi noo ñaha, yosó ña siqui noo quití cuaha quiñi caa. Ta nyicú sivi cha cahan ña vaha siqui Nyoo chi ti. Ta ucha tahan xiñi ti nyaá ta uchi ndiqui ti.

⁴ Ta ñaha cuan ñihnó ña noo sahma tyacu nya ta tyacu cuaha. Ta cuaha xaan xuhun cuan iñi chi ña, yuu tyaqui ta perla ñandihí. Ta yihí ndaha ña noo copa xuhun cuan tyitú yihí chihin cha ña vaha ta cha quiñi caa cha sacuví ña.

⁵ Ta tyaan ña nyaá noo sivi cha cuví noo tuhun xehe cha ña cutuñi iñi ñáyiví. Vatyi catyí chi: “Ican ñaha sihi ihya cuví ñuu Babilonia cahnu, sihi tandihí ñu cha cata iñi ta tandihí cha ña vaha cha iyó siqui ñuhu ñayiví.”

⁶ Tyicuan ta tuví iñi vatyi ñaha cuan chiñi ña chihin cha chihí ña niñi ñu cuenda Nyoo, ta ñu cha cachihí cha cuenda cha cahan ñu tuhun ra Jesús. Ta cha nyehi cuan, iyo xaan cuñí.

⁷ Tyicuan ta catyí ángel cuan chii:

—¿Ñáa tuhun cha iyo xaan cuñún? Cua sacote chuun ñáa cha cuñí chi catyí tuhun xehe ñaha sihi ihya ta quití quiñi caa cha yosó ña, quití cha nyicú ucha xiñi ta uchi ndiqui.

⁸ Quití quiñi caa cha nyehun cuan, cuví ti noo quití cha chiyo ta vityin yori ca ti iyó. Soco cuquita ti chichi yavi cono xaan cha ñahri nu chitahan. Yucuan ñohó ti cha ni cumañi ca ndihí tuhun ti. Ta ñáyiví iyó siqui ñuhu ñayiví iyo xaan cucuñi ñu na nanyehe ñu chi quití quiñi caa cha chiyo tyicuan, soco vityin yori ca ti iyó, soco cuquichi ti inga chaha. Ñu cua nyehi chi ti cuan, cuví ñu ñu cha ñahri sivi nyaá nu libru Nyoo nyata quivi chino ñuhu ñayiví. Ican libru cuan cucatyí yóo ñáyiví cuconyito tyicuan ri maa.

⁹ Ihya cuví noo cha cuñí chi nacoto ndo: Ndi ucha xiñi ti cuan cuñí chi catyí ucha tahan yucu cha nyaá ñaha cuan siqui.

¹⁰ Ta xiñi ti cuñí tucu chi catyí ucha tahan rey. Ta ohon tahan rey cuan cha yaha chinyaca ñaha ra. Ta rey cu iñu nyacá ñaha ra vityin. Ta ra cu ucha, cumañi ca cucunyaca ñaha ra. Ta quivi quichi ra nu ndihí, ña naha cucunyaca ñaha ra.

¹¹ Ta chichi cha ucha tahan rey cuan, cunanyita noo ra inga chaha, ta ican ra cucuví ra rey cu uña. Ta ican tucu ra cuví quití quiñi caa cha chiyo quivi cuan, ta vityin yori ca ti soco cunanyita ti inga chaha. Ta cha yaha cunyaca ñaha tucu ti, yucuan cuví nu cua ndihí tuhun ti.

¹² Ta ndi uchi tahan ndiqui cha nyehun cuan, cuñí chi catyí ndi uchi tahan rey cha cumañi ca cacunyaca ñaha. Soco cucoo ityi chi ra cha cunyaca ñaha ra noo ora, ñn ri chihin quití quiñi caa cuan.

¹³ Ndi uchi tahan rey cuan ñn xaan ri cuhva cucaca xiñi ra. Ta cunacuhva ra tunyee iñi ra chi quití quiñi caa cuan. Ta tandihí ityi cha iyó chi ra cunacuhva ra chi ti.

¹⁴ Ta cucacañi tahan ra chihin ra cuví Mbee Luhlu. Soco ra cuví Mbee Luhlu cuan, cucuví chasaha ra chi ra. Vatyi ican ra cuví nuu chi tandihí ra nyacá ñaha. Ta cuví tucu ra nuu chi tandihí ra cacuví rey. Ta ñu nyicú chihin ra, Nyoo nacana chi ñu ta nacachi ra chi ñu. Ta ñn xaan iñi ñu nyicón ñu chi ra.

¹⁵ Ta catyí tucu ángel cuan chii ñandihí:

—Tandihí tyañuhu cha nyehun cuan, cha nyaá ñaha cata iñi cuan siqui, ican cuví

ñáyivi tandihi ñuu nyihi ta tandihi ñuu nahnu, ñu siin siin sahan cahan.

¹⁶ Ta ndi uchi ndiqui cha nyehun xiñi quití quiñi caa cuan cha cuví uchi tahan rey cuan, ican ra cuan cuasatasi iñi chi ñaha cata iñi cuan. Ta cusandoo ra chi ña cha notuhun ri maa ña. Ta cusanduvityiyaa ra chi ña. Ta cucachi ra coño ñuhu ña. Ta cutyihí ra chi ña nu cayú ñuhu.

¹⁷ Vatyí Nyoo saná ndaha ra añima rey cuan vatyí casacuvi ra cuhva cuñí maa ra. Vatyí ñin ri cuhva cucaca xiñi ra, ta cucuhva ra ityi chi quití quiñi caa cuan cha cunyaca ñaha ti tari rey nyacua nya chino cava tuhun cahán maa Nyoo.

¹⁸ Ñaha sihi cha nyehun cuan, ican cuví ñuu cahnu cha nyacá ñaha chi tandihi ra cuví rey siqui ñuhu ñayivi.

18

Nu cua tiví ñuu Babilonia

¹ Cha yahá tuhun ihya ta nyehi inga ángel cha vachi noó ityi andivi ta iyó xaan ityi chi ra. Ta ñuhu ñayivi ndichin xaan nduvi chihin cha ndichin ra.

² Ta ñihi xaan ndusu ra ta canachaá ra, ta catyí ra:

—Cha yahá tuhun ñuu Babilonia cahnu cuan. Ta cha nanduvi chi nu iyó ra ña vaha. Vehe tandihi nuu tatyí ña vaha cha nanduvi. Ta taca saa ña vaha nanduvi ñandihí.

³ Vatyí tandihi ñáyivi tiví ñu cha cuenda cuatyí sacuvi ñuu Babilonia cuan. Ta ra cacuví rey, ra nyacá ñaha siqui ñuhu ñayivi tari cha cachiyó ra chihin ñaha cuan cha cuví ñuu Babilonia. Casacuvi ra cuatyí chihin ña. Ta ra cha cuahan cuanaxico ñuu Babilonia cuan candutyayí ra chihin cha xico ra chi ñu ñuu cuan vatyí tandihi cuhva ta sanaa ñu xuhun ñu chihin cha cata iñi ñu.

⁴ Tyicuan ta chiñi nonga ndusu ityi andivi. Ta catyí chi:

—Quita ndo ñuu chiña, nyoho cha cuví ndo ñáyivi chii, tacuhva cha ma cutahan ndo sacuvi ndo cuatyí chihin ñu chiña, tacuhva ma cutahan ndo ndoho ndo tari maa ñu.

⁵ Vatyí cha caá ticuítí cuatyí ñu ñuu cuan, nyacua cha chaá chi nu nyaá Nyoo. Ta Nyoo cha nichon iñi ra cha ña vaha sacuvi ñu.

⁶ Cuhva ndo chi ñu suri maa cha chaha ñu chi inga ñáyivi. Ta uvi ca chaha sananyehe ndo tindoho siqui cha sacuvi ñu. Cuhva ndo noo tindoho cunyehe ñu cha ñihi uvi ca chaha ican saha cha chaha maa ñu chi inga ñáyivi.

⁷ Yucuan chaha cuhva ndo cha iyo xaan tahan ñu chihin ta sanyehe xaan ndo tindoho chi ñu tari cuhva cha sacahnu xaan ñu chi ñu ta cusí xaan iñi ñu. Vatyí catyí ñuu cuan chichi añima chi: “Ihya nyaí tari noo reina. Ñima ñaha chihí yí cuví, ta ni ma cunyehe tindoho”, chicá iñi chi.

⁸ Yucuan chaha chichi cha noo ri quivi cuquichi tindoho siqui ñuu cuan, cuquichi tuhun chihí, cuquichi tucuihya iñi ta coo tama ñuu cuan, ta cucayu chi chihin ñuhu. Vatyí iyó xaan tunyee iñi chi Nyoo Sutu yo ta cutachi tuñi ra chi ñu ñuu cuan.

⁹ Ra cacuví rey siqui ñuhu ñayivi ihya tari cha cachiyó ra chihin ñaha cha cuví ñuu cuan, cuacu chaa ra, cunducuihya xaan iñi ra na cananyehe ra ñuhma cha cayú ñuu cuan.

¹⁰ Ta nya sava ri cucuitayucu ra cha cuenda cha cayuhvi ra tindoho cuan. Ta cucatyí ra:

—¡Ndahvi yoho, ñuu cahnu Babilonia, ñuu cha chiyo xaan tunyee iñi chii! Vatyí noo tuhun cuhva ta chaá tindoho nyehún —cucacatyí ra.

¹¹ Ta ra cha canaxico ñáá ndihí cha canaxico, suri cucuacu chaa ra ta cucanducuihya iñi ra cha cuenda ñuu cuan. Vatyí yori ca sata cha canaxico ra.

¹² Vatyí xico ra xuhun cuan, xuhun cuichin, yuu tyaqui, perla, sahma lino finu, sahma seda, ta sahma tyacu nyaa, ta tyacu cuaha. Ta nyisó tucu ra tandihí nuu vitu cha vixi chahán ta ñáá ndihí cha chingó chihin noho landa, vitu tyaqui, ta caa cha cuví bronce, ta caa cha cuví hierro, ta yuu cha cuví mármol.

¹³ Ta nyisó tucu ra canela, ñáá ndihí ca cha vixi chahán, tari cutu, mirra, perfume, vinu, acetye, yutyí paan finu, ta trigu. Ta suri nyisó tucu ra quití cuenda carga, ta mbee, caballo, carru. Ta nyacua nya añima ndahvi cha cuví musu ra ta caxico ra.

¹⁴ Ta catyí ra chi ñáyivi ñuu cuan tyehe caa:

—Ñahri ca cha tyaqui cha chiyo chuun, cha tahán xaan iñun. Ta cha cuachiyō tandihī cha tyayūn. Ta ma cunañihī ca maun tandihī cuan —catyí ra.

¹⁵ Ra cha caxicó tandihī ihya, candutyayū ra cha cuenda cha sata ñu ñuu cuan cha xicó ra. Cañi cucuitayucu ra chihin cha cayuhvi ra cha cunyehe ñu cuan tindoho. Ta cucuacu chaa ra ta cunducuihya iñi ra.

¹⁶ Ta cucatyí ra:

—¡Ndahvi ñuu cahnu cuan! Cuvī chi tari noo ñaha sihi cha ñihno sahma lino finu, sahma tyacu nyaa ta tyacu cuaha. Ta iyo yihī ña xuhun cuan, ta yuu tyaqui ta perla.

¹⁷ ¡Vatyī noo tuhun ri kuhva ta ndihī cha tyayū xaan cuan! —cucatyí ra caxico cuan.

Ta tandihī ra cuvī capitán cuenda barcu, chihin ñu cañoho chichi, tandihī ñu casahá tyiño nu tyañuhu, nya sava candoó ñu.

¹⁸ Ta cha cananyehé ñu ñuhma cha cayú ñuu cuan, canachaa ñu, ta catyí ñu:

—¿Ñáá nonga ñuu chiyo tari ñuu cahnu ihya? Ñahri ca —cucatyí ñu.

¹⁹ Ta tyicu ñu niyaca xiñi ñu, ta chacu chaa ñu. Ta cuihya iñi ñu, ta canachaa ñu ta catyí ñu:

—¡Ndahvi nduvī yo cha cuanaa ñuu cuan! Vatyī chihin cha tyayū ñuu cahnu cuan ndutyayū tandihī yo, ñu chicá noo nu tyañuhu chihin barcu. ¡Ta vityin noo tuhun kuhva luhlu ri ta cuanaa chi! —catyí ñu.

²⁰ Soco cusū cuñi nyoho cha cuenda ñuu cuan, nyoho cha iyó andivi, nyoho ñu yihī cuenda Nyoo ta nyoho ra cachicá tyiño ra Cristo ta nyoho ra cacuvī profeta Nyoo. Cusū cuñi ndo vatyī cha cuenda ndo ta tachí tuñi Nyoo chi ñu cuan, ta cha cuenda cha ña vaha cha sacuvī ñu chihin ndo.

²¹ Tyicuan ta noo ángel cha iyó xaan tunyee iñi chi, nacoñehē ra noo yuu molino cahnu xaan ta tuchi ra cuahan nu tyañuhu, ta catyí ra:

—Suri tyehe caa cundihī tuhun ñuu Babilonia cahnu, Ta ni inga ca chaha ta ma nyehe ca ndo chi ñu.

²² Ta ma cuiñi con yaa ityi chichi ñuu cuan, vatyī yori ca cusacuacu arpa, ta ni flauta, ta ni trompeta, ta ma tivī ca ñu. Ta ni ma coo ca ra casahá tyiño ñáá ndihī tyiño. Ta ni ma tyacu ca cha cayu molino.

²³ Ta ni nonga ñuhu tima, ta ma cayu ca chichi ñuu cuan. Ta ni nonga chaha ta ma cuiñi yo ndusu ñu cha iyó ñu vico tandaha. Vasi ra canaxico cha chiyo ñuu cuan, ican ra cuvī ra cahnu ca cuvī nuu ñáyivī iyó siqui ñuhu ñayivī. Nyoho ñu Babilonia, sandavī ñaha xaan ndo chi tandihī ñáyivī iyó siqui ñuhu ñayivī chihin cha satai ndo.

²⁴ Vatyī cuaha xaan niñi ra cacuvī profeta Nyoo iñi chichi ñuu cuan vatyī chahñi ñu chí ra. Ta iñi tucu niñi ñu cuenda Nyoo, ta niñi tandihī ñu cha cachahñi ñáyivī nicahnu ñuhu ñayivī.

19

¹ Cha yaha cuan, ta chiñi noo ndusu cha cuaha vavaha ñáyivī nya andivi. Ta catyí ñu:

¡Cahnu xaan cuvī Nyoo! Sutu Mañi yo, Nyoo cuvī ra ra sacacu chi yo. Ta chi maa ra tahán chi cha sacahnu yo, tyi iyó xaan tunyee iñi chi ra.

² Vatyī vaha sacutuñi ra chihin cha ndaa ta chihin cha ndicha.

Tachí tuñi ra chi ñaha cata iñi cuan. Vatyī sativī xaan ña chí ñáyivī iyó siqui ñuhu ñayivī chihin cha quiñi caa cha sacuvī ña chihin ñu.

Ta yucuan chaha tachí tuñi ra chí ña, ta cha cuenda cha chahñi ña chí ñu sacuvī tyiño nuu ra.

³ Ta quichaha catyí ñu inga chaha:

—¡Cahnu xaan cuvī Nyoo! Ñuhma cha cayú ña, ma cucuita ca maa cha ndaa chí ityi siqui —catyí ñu.

⁴ Ta ndi oco cumi ra cha vaha chahnu ta ndi cumi tahan cha nyitó cha nyicú nu nyaá tyayu Nyoo, cachicuiñi chiti ra nya nu ñuhú. Ta casacahnú ra chí Nyoo nu nyaá ra nu tyayu ra. Ta catyí ra:

—¡Na cuvī chí tyicuan caa! ¡Cahnu xaan cuvī Nyoo! —cacatyí ra.

⁵ Ta nu nyaá tyayu Nyoo, tyacu noo ndusu, ta catyí chí:

Sacahnu ndo chí Sutu yo Nyoo Tandihī nyoho cha sacuvī ndo tyiño nuu ra, ta quichahá ndo chí ra, vasi nyihi ndo, o chahnu ndo.

Nu cua tandaha ra cuvī Mbee Luhlu chihin ñáyivī chinó iñi chí ra

⁶ Ta chiñi tiqui noo ndusu tari cha cuaha vavaha ñáyivi cahán, tari ndusu nu cuaha xaan yuvi ndutya, ta tari cha ñihi xaan cahán savi. Ta catyí chi:

¡Cahnu xaan cuví Sutu yo Nyoo! Vatyí cha quichaha nyaca ñaha ra ta iyó tandihí tunyee iñi chi ra.

⁷ Na cusii cuñi yo ta na cutu yo chihin tusii iñi. Na sacahnu yo chi ra.

Vatyí cha chaá cuhva cha cua coo yo vico tandaha ra cuví Mbee Luhlu.

Ta yoó cuacuvi yo tari noo ñasihí ra, cha nyatú tuhva ri yo quívi tandaha yo chihin ra.

⁸ Ta maa yo cucuihno yo sahma linu finu, ndii ta cuichin.

Vatyí sahma linu finu cuan cuñí chi catyí cha vaha cha sacuví ñáyivi cuenda ra.

⁹ Tyicuan ta quichaha catyí ángel cuan chi:

—Tyaa tuhun ihya nu tutu: “¡Sii xaan cuví chi ñu cha nyaá cahun vico tandaha ra cuví Mbee Luhlu!”

Ta catyí tucu ra chii tyehe caa:

—Ican ihya cuví tuhun ndicha Nyoo —catyí ra chii.

¹⁰ Tyicuan ta chicuiñi chiti chaha ángel Nyoo cuan vatyí sacahni chi ra, soco catyí ra chii:

—Ma sacahnun chii, vatyí musu Nyoo cuví tucu yuhu tari yoho, ta tari tandihí ra yañi yo cha nyicón tuhun ndicha ra Jesucristo. Chi Nyoo tahán chi sacahnu yo —catyí ra chii.

Vatyí tuhun ndicha ra Jesús, ican cuví cha chahá cuhva chi ra cacuví profeta, ra cha cachahá cuenda tuhun cahán Nyoo chihin yo.

Nu sañahá chi cuenda ra cha yosó caballu cuichin

¹¹ Tyicuan ta nyehi tanuña andivi. Tyicuan ta tuví noo caballu cuichin. Ta ra yosó chi ti nañí ra Ra Ndicha Cha Nii Iñi Sacuvi Tyiño Nu Nyoo. Vatyí chihin cha ndaa sacutuñi ra chi ñáyivi, ta cañi tahan ra chihin cha ña vaha chihin cha ndaa.

¹² Xiño xaan chiti nuu ra tari cha cayú ñuhu. Ta cuaha xaan corona yihí xiñi ra. Ta nyaá noo sívi chi ra cha noo tuhun ri maa ra chitó ra ñáá sívi nyaá chi ra.

¹³ Ta ñihnó ra noo sahma iñi niñi. Ta maa ra nañí ra Tuhun Cahán Nyoo.

¹⁴ Ta canyicón sindaro andivi chi ra, cañihnó ra sahma linu finu, sahma cuichin ta ndii. Ta cayosó ra caballu cuichin.

¹⁵ Ta chichi yuhu ra nañí Tuhun Cahán Nyoo cuan, quitá noo mityi cha xaan ni nduvi chiyo yuhu, vatyí chihin tuhun cahán ra cusañicuehe ra ñáyivi iyó síqui ñuhu ñayivi. Ta ñihi cunyaca ñaha ra chi ñu tari chihin noo yutun caa. Maa ra cutachi tuñi ra chi ñu tari noo ra cha sacunyihí tichaha ndivi chihin chaha ra. Ta cusacoho ra vinu uva chi ñu, ta ihya cuñí chi catyí tyí cuxaan Nyoo chihin ñu ta cutachi tuñi ra chi ñu vatyí chaha xaan ñu tisihí chi Nyoo ra iyó tandihí tunyee iñi chii.

¹⁶ Ta nu sahma ra ta nu sihin ra cuan nyaá letra cha catyí tyehe caa: “Ihya cuví Ra cuví nuu chi tandihí rey. Ta ican ra cuví nuu chi tandihí ra nyacá ñaha.”

¹⁷ Tyicuan ta nyehi chi nonga ángel nanyaá ra nu ñanyii. Ta chihin tandihí fuerza ra canachaa ra chi tandihí saa cha candavá ityi andivi, ta catyí ra chi ti:

—Ñaha ndo ta candu ñin ri ndo vatyí cuxiñi ndo cha chahá Nyoo cachi ndo.

¹⁸ Vatyí cachi ndo coño ra cacuví rey ta ra cuví nuu chi sindaro ta chi ra ndachan xaan saha chii. Ta cachi ndo coño caballu ta coño ñuhu ra cha cayosó chi ti. Cachi ndo coño tandihí ra, vasi ra yori chitoho o ra iyó chitoho, vasi ra nyihí o ra chahnu —catyí ra chi saa.

¹⁹ Tyicuan ta nyehi chi quití quiñi caa cuan ta chi ra cacuví rey cha iyó síqui ñuhu ñayivi chihin sindaro cuenda ra, vatyí candu ñin ri ra vatyí cacañi tahan ra chihin ra yosó caballu cuichin cuan ta chihin sindaro cuenda ra.

²⁰ Ta tiñ ra chi quití quiñi caa cuan ñin ri chihin ra cuví profeta cuendu cuan, vatyí chihin nuu quití quiñi caa cuan ta sacuvi ra cuendu cuan milagru, ta sandavi ñaha ra chi ñáyivi cha chahá chi cunyaa tuñi quití quiñi caa cuan, ta chi ñu sacahnú chi xiñahñu ti. Ta nyitó nyitó ra ta tuchi ra yosó caballu cuichin chi nduvi ra nu ñuhu cha cayú chihin azufre.

²¹ Ta tandihí ca ñu cachihí ñu chihin mityi xaan cha quitá yuhu ra cha yosó caballu

cuichin cuan. Ta tandihí maa saa, cachachi xaan ti coño ñu.

20

Nu sañahá chi cuenda noo mil cuiya

¹ Cha yaha tuhun cuan ta nyehí chi noo ángel vachi noó ityi andiví ta yihí ndaha ra ndaha tícú yuvehe yavi cono cuan. Ta yihí tucu ndaha ra noo cadena cahnu.

² Ángel ihya tñin ra chi coo cahnu cuan, quití cha cuví Coo Chahnu cuan, cha cuví cuihna. Ta chahñi ra chi ti chihin cadena noo mil cuiya.

³ Ta tuchi ra chi ti yavi cono cuan. Ta yucuan nacasi ra chi ti. Ta tyaa ra noo sellu yuvehe cuan tacuhva cha ma sandavi ñaha ca ti chi ñáyiví iyó siqui ñuhu ñáyiví, nyacua nya cha yaha noo mil cuiya. Ta cha yaha noo mil cuiya cuan ta cundachi tucu ti suhva ca quiví.

⁴ Yaha cuan ta nanyehí cuaha xaan tyayu tayucú. Ta nuu chi nyicú ñu cha chicoq ityi chi vatyí tachi tuñi ñu chi ñáyiví. Ta nyehé tiquí añima ñu chahnya ñáyiví xiñi cha cuenda cha cahán ñu tuhun Nyoo cha chahá cuenda ra Jesús chi ñu. Ta maa ñu, ña sacahnu ñu chi quití quiñi caa cuan, ni chi xiñahñu ti, ni ña chahá ñu chi ñu cha cunyaa tuñi ti tyaan ñu, ni ndaha ñu. Nyehí vatyí ican ñu ihya, canandoto ñu ta chicunyaca ñaha ñu chihin ra Cristo noo mil cuiya.

⁵ Ican ñu ihya cuví cha nandoto cha xi-hna ca. Soco inga ityi ndiyí ña nandoto ñu nyacua nya cha yaha mil cuiya cuan.

⁶ ¡Sií xaan cuñí ñu ii cuenda Nyoo, ñu cha tahán chi nandoto cha xihna ri! Ta ma cahun ñu tuhun chihi cu uvi nu cuví anyaya nu tachí tuñi Nyoo chi añima ña vaha. Vatyí cucuví ñu sutu cha cuenda Nyoo ta cuenda ra Cristo. Ta cucunyaca ñaha ñu mil cuiya chihin ra.

⁷ Ta cha yaha mil cuiya cuan, tyicuan ta cundachi cuihna nu ñohó ra vehe caa.

⁸ Ta cuquita ra, ta cusandavi ñaha ra chi ñáyiví nicahnu siqui ñuhu ñáyiví. Cuquita ra vatyí cusandavi ñaha ra chi ñáyiví Gog ta Magog, ñu xaan iñi chi Nyoo. Ta cusandu ñin ri ra chi sindaro ñuu cuan vatyí cahun ra cuatyí. Cuaha xaan ra, tari maa ñiti yuhu tyañuhu.

⁹ Tyicuan ta cuahan coyo ra nicacahnu siqui ñuhu ñáyiví. Ta cachasi cutya ra nu iyó ñu cuenda Nyoo ñuu Jerusalén nu cuñí xaan Nyoo. Soco Nyoo cusaquichi ra ñuhu ityi andiví ta cucahmi chi chi tandihí sindaro cuan.

¹⁰ Ta cuihna cha sandaví ñaha chi ñu, cutuchi Nyoo chi ra chichi anyaya cahnu nu cayú ñuhu chihin azufre, nu tuchi tucu ra chi quití quiñi caa cuan ta chi ra cha cuví profeta cuendu. Ta yucuan cunyehe ra tindocho tyicuan ri maa ndiyaca ta ñiyaca.

Nu cua cutuñi chi ñáyiví nu tyayu cuichin nu nyaá Nyoo

¹¹ Tyicuan ta nyehí noo tyayu cuichin cahnu. Ta nyehí chi ra nyaá nuu tyayu cuan. Ta chihin nuu ra ta cuanaa ñuhu ñáyiví ta andiví. Ta ñahri ca maa nu cucun- yaa chi.

¹² Ta nyehí chi tandihí ñu ndiyí, ñu chahnu ta ñu nyihi, tayucú ñu nuu Nyoo. Tyicuan ta canuñá libru cha nyaá tandihí cha sacuví ñu quiví chiyó ñu ñáyiví. Ta nuña tucu inga libru cha nyaá siví ñu cha cuconyito tyicuan ri maa chihin Nyoo. Ñu ndiyí cuan cuacutuñi chi ñu ñáá ndihí cha chinyacuví ñu cha nyaá nu tandihí libru cuan.

¹³ Ta tyañuhu nacuhva cuenda chi chi ndiyí cha cumí chi. Ta tandihí nu nyicú ñu chihí nu nyacá ñaha Tuhun Chihi, nacuhva cuenda chi ndiyí cha cumí chi. Ta tandihí ñu cuatahan chi chi ñu yoso cuhva cha casacuví ñu.

¹⁴ Tyicuan ta cundihí Tuhun Chihi cuan ta ñahri ca nu cuacunyicu ñu chihi, vatyí cutuchi Nyoo chi nanduvi tahan cuan chichi anyaya cahnu nu cayú ñuhu. Ta ican ihya cuví Tuhun Chihi Cu Uvi.

¹⁵ Ta yucuan tuchi ra chi ñu cha ñahri siví nyaá nu libru cha cuenda ñáyiví cha cua conyito chihin Nyoo tyicuan ri maa.

21

Nu nyehé ra Juan andiví chaa ta ñuhu ñáyiví chaa

¹ Yaha cuan ta nyehí noo andiví chaa ta noo ñuhu ñáyiví chaa, vatyí andiví ta ñuhu ñáyiví cha xihna ri cuanaa chi. Ta tyicuan caa tucu tyañuhu, cuanaa tucu cuan.

² Yuhu ra Juan nyehi ñuu ii Jerusalén chaa cha vachi noó ityi andivi nu nyaá Nyoo. Ta tyaqui xaan nduvij chi tari noo ñaha cha cua tandaha chihin noo ra, tyicuan caa nduvij chi.

³ Ta chiñi noo ndusu ñihi cha quita ityi andivi, ta catyí chi:

—Nyehe ihya! Nyoo, iyó ra mahñu ñáyivi. Ta cua coo ra chihin ñu. Ta maa ñu cua cuvi ñu ñuu ra. Ta cua cunyaa ra chihin ñu. Ta cua cuvi ra Nyoo cuenda ñu.

⁴ Ta Nyoo cunacuhva ra ndutya nuu ñu. Ta ma cúvi ca ñu. Ta ma cucuihya ca iñi ñu. Ma cuacu ca ñu vatyí ma nyehe ca ñu tindoho. Ta ma nyehe ca ñu cha uhvi. Vatyí tandihí cha chiyo, cha yahá tuhun —catyí chi.

⁵ Tyicuan ta Nyoo, ra cha nyaá nu tyayu cahnu, catyí ra:

—Nyehe. Sanduchaj tandihí maa cha iyó.

Ta catyí tucu ra:

—Tyaa tuhun ihya, vatyí tuhun cahín ihya, ndicha. Ta cuví cuní iñun vatyí tuhun cahín cuchino cava —catyí Nyoo chii.

⁶ Yahá cuan ta catyí tucu ra chii:

—Cha tandihí chinó cava vityin. Yuhu cuví ra xihna cuiri, ta yuhu cundoi nu ndihí tuhun. Ñáyivi cha ityi ndutya cha cuñi ñu tuhun yuhu, cucuhve ndutya cha chahá ñayivi cha ma naa ca maa coho ñu, ta ñahri cutiyahvi ñu.

⁷ Ñu cha cuví chasaha chi ra ña vaha, cuñihi ñu tandihí ihya, tari noo cha cundoo chi ñu. Ta yuhu cucuvi Nyoo cuenda ñu ta maa ñu cucuvi ñu sehi.

⁸ Soco ñáyivi cha yuhví xaan, ñu cha ña chinó iñi, ñu cha quiñi iyó, ñu cha chahñi ñáyivi, ñu iyó chihin rayii, ta ñima yí ñu cuví, o ra iyó chihin ñusihí ta ñima ñasihí ra cuví, ñu tasi, ñu casacahnú xitohyo, ta tandihí ñu cuendu, tandihí ñu cuan, tahán chi cahun ñu chichi anyaya cahnu nu cayú ñuhú chihin azufre, nu cuví Tuhun Chíhi Cu Uvi, nu tachi tuñi Nyoo chi añima ña vaha.

Nu nyehe ra Juan yoso caa cucuvi ñuu Jerusalén chaa

⁹ Tyicuan ta quichí noo ángel cha ucha tahan cuan, ra cha canyisó ndi ucha copa

tyitú chihin ndi ucha tahan tindoho cuan. Ta cahán ra chihin ta catyí ra:

—Ñaha, ta cusañahi chuun yóo ñu cuví ñu yihí cuenda ra Cristo, ñu cha cuví tari ñasihí ra, tyi ra cuví Mbee Luhlu cuví ra —catyí ra chii.

¹⁰ Ta Tatyí Ii Nyoo chinyaca chii noo yucu cahnu ta sucun. Ta sañaha ra ñuu ii, ñuu Jerusalén cahnu cuan chii. Maa maa cuhva cha vachi noó ñuu cuan ityi andivi nu nyaá Nyoo, sañaha ra chii.

¹¹ Xiño xaan ñuu cuan chihin cha tyaqui Nyoo. Xiño xaan tari caá noo yuu tyaqui, tari caá yuu jaspe, ta xiño tari ino.

¹² Nicachico ñuu cuan sucun xaan sama. Ta iyó uchi uvi tahan yuvehe. Ta noo ángel nanyaá tahan tahan yuvehe. Ta ndi uchi uvi tahan sívi tata ñáyivi Israel nyaá yuvehe cuan.

¹³ Uñi tahan yuvehe cuan nyaá ityi nu caña ñanyii. Ta uñi tahan ityi norte. Ta uñi tahan ityi tyañuhu. Ta uñi tahan ityi nu quee ñanyii.

¹⁴ Uchi uvi tahan yuu yihí nu sama ra nu cacú chaha chi. Ta nuu yuu cuan nyaá sívi ndi uchi uvi apóstol cuenda ra cuví Mbee Luhlu.

¹⁵ Ta ángel cha cahán chihin cuan, yihí ndaha ra noo yutun xuhun cuaan, vatyí chihin cuan cutyicuhva ra ñuhú ñuu cuan, ta yuvehe ta nu sama nicachico ñuu cuan.

¹⁶ Cumi tahan tutun ñuu cuan nyaá. Ta inuu ri cuhva cha quehen ta cha cañi. Ta ángel cuan tyicuhvá ra ñuu cuan chihin yutun xuhun cuaan cuan. Ta tyicuhvá ra, ta quita uvi mil uvi cientu kilómetro. Ta inuu ri cha cañi ta cha sucun ta cha quehen.

¹⁷ Tyicuan ta tyicuhvá ra nu sama nicachico ñuu cuan. Ta quita uñi xico cumi metru cha cocon, tari tyicuhvá ñáyivi, tyicuan caa tyicuhvá ángel cuan.

¹⁸ Chihin yuu jaspe samá yuhu ñuu cuan. Ta maa maa ri xuhun cuaan cuví ñuu cuan. Tari caá noo ino cha ndi vavaha, tyicuan caa.

¹⁹ Ta yuu cha cuví cimientu cuan tandihí ri maa nuu yuu tyaqui cuví: yuu cha xihna ri cuví jaspe; yuu cha cu uvi cuví yuu zafiro; yuu cha cu uñi cuví yuu ágata; yuu cha cu cumi cuví yuu esmeralda;

²⁰ ta yuu cu ohon cuví yuu ónice; ta cha cu iñu cornalina; ta cha cu ucha crisólito; ta cha cu uña berilo; ta cha cu ñin topacio; ta cha cu uchi crisoprasa; ta cha cu uchi ñin jacinto; ta yuu cu uchi uvi cuví amatista.

²¹ Ndi uchi uvi yuvehe cuan cuví chi uchi uvi tahan perla. Tahan tahan yuvehe cuan, ta chinq chi chihin noo ri perla. Ta nu cuví ityi cahnu ñuu cuan, maa ri maa xuhun cuan cuví, tari ino cha xiño.

²² Ni noo vehe ñuhu ña nyehí chichi ñuu cuan, vatyi Sutu yo Nyoo, ra iyó tandihí tunyee iñi chii, ican cuví vehe ñuhu ñu cuan, ta tyicuan caa tucu ra cuví Mbee Luhlu.

²³ Ñuu cuan ña chiñuhú cha sacundichín ñanyii. Ta ni cha ndichin yoo ta ña chiñuhú. Vatyi suri maa cha ndichin Nyoo chihin ra cuví Mbee Luhlu cuví cha sacundichin chichi ñuu cuan.

²⁴ Tandihí ñu cha cacu ña ñima, cucaca noo ñu nu ndichin ñuu cuan. Ta ra cacuví rey siqui ñuhu ñayiví cunyaca ra cha tyayii ra ta cuhva cuenda ra tandihí cha cahnu cacuví ra chi ñuu cuan.

²⁵ Ta ma nacunyasi yuvehe cha ñicahñu, ta yucuan ma coo cha cha cuaa.

²⁶ Ta tandihí cha tyayii, ta cha cahnu, cha iyó siqui ñuhu ñayiví cuchaa chi nya ñuu cuan.

²⁷ Soco ma cuvi quihvi cha quiñi caa. Ni noo ñu sacuví cha quiñi caa, ni ñu cuendu ma cuvi quihvi ñu. Noo ri maa ñu nyaá sivi nu libru ra cuví Mbee Luhlu cuquihvi ñu, vatyi cuconyito ñu chihin ra tyicuan ri maa.

22

¹ Tyicuan ta sañaha ángel cuan noo yuvi cuvi vavaha chii. Nduya cha chahá cha conyito yo cuví. Cuii vavaha tari noo yutyi finu. Ta quitá yuvi cuan nuu nyaá tyayu Nyoo ta nu nyaá ra cuví Mbee Luhlu.

² Mahñu ityi cahnu ñuu cuan ta ninduvi chiyo yuvi cuan, nanyaá yutun cha chahá cha conyito yo. Ta uchi uvi chaha cha noo cuiya chahá tun chiti. Tahan tahan ri yoo chahá tun chiti. Ta ndaha tun, vaha cha cuví tatan chi ñayiví iyó siqui ñuhu ñayiví.

³ Ñuu cuan, ñahri maa cha ña vaha cucoo vatyi yucuan nyaá Nyoo nu tyayu ra ta

cucunyaca ñaha ra chihin ra cuví Mbee Luhlu. Ta cusacahnu ñu cuenda ra chi ra.

⁴ Ta cunyehe ñu chi ra chihin nuu ñu. Ta cua cunyaa sivi ra tyaan ñu.

⁵ Ta ma coo ca cha cha cuaa yucuan. Ta ñu coo yucuan ma cuchihñuhu ñuhú lámpara chi ñu, ni ñuhú ñanyii. Vatyi Nyoo Sutu yo cusacundichin ra nu nyicú ñu. Ta maa ñu cucunyaca ñaha ñu chihin ra tyicuan ri maa.

Nu sañahá chi vatyi cha cuyatyin quichi ra Cristo

⁶ Tyicuan ta catyí ángel cuan chii:

—Ihya tuhun ndicha cuví, ta cuví cunii iñun vatyi cuchino cava tuhun ihya. Ta suri maa Sutu yo Nyoo ra cahán chihin yuhu ra cacuví profeta cuenda ra ta cha naha, ican ra tachí ra chi ángel ra, vatyi sañaha ra chi ñu sacuví tyiño nuu ra yoso caa cucuvi cha numi ri —catyí ra.

Ta catyí Sutu Mañi yo:

⁷ —¡Cha cuñi quichi! —catyí ra.

¡Siñi xaan cuñi ñu cha sacuví cuhva cahán tuhun Nyoo cha nyaá nu libru ihya!

⁸ Yuhu ra Juan, chiñi tuhun ihya. Ta nyehi tandihí ihya. Ta cha yaha nyehi ta chiñi, chicuiñi chiti chaha ángel cha sañaha cuan chii, vatyi sacahni chi ra.

⁹ Soco maa ra catyí ra chii:

—Ma sacahnun chii, vatyi yuhu, musu Nyoo cuví, tari yoho. Ta yañun cuví, tari ra yañi yo cha cacuví profeta cuenda Nyoo, ta tari tandihí ñu quichahá tuhun cha nyaá nu libru ihya. Chi Nyoo tahán chi sacahnu yo —catyí ra chii.

¹⁰ Ta catyí tucu ra chii:

—Ma tixehun tuhun Nyoo cha nyaá nu libru ihya, vatyi cha cuyatyin quivi cha cuchino cava chi.

¹¹ Soco saña chi ñu quiñi iyó, na sacuvi ca maa ñu cuhva cuñi maa ñu. Ta ñu sacuví cuatyí na sacuvi ca maa ñu. Soco ñu sacuví cha vaha, na sacuvi ca ñu cha vaha. Ta ñu ii, ñu nacuhva cuenda ñima chi Nyoo, na cu ñi ca iñi ñu chihin ra —catyí ra chii.

¹² Ta Sutu Mañi yo catyí ra:

—Nyehe ndo. Cha cuyatyin quivi quichi. Ta cutiyahvi chi tahan tahan ñayiví yoso cuhva cha sacuví ñu, tatu cha vaha o cha ña vaha.

¹³ Yuhu cuví ra xihna cuiri ta yuhu cundo nu ndihí tuhun, yuhu iyé nu quichaha tandihí ta cucoo que nu cundihí tuhun —catyí Sutu Mañi yo.

¹⁴ Sii xaan cucuvi chi ñu sanduvii sahma o añima cuví cuan, vatyí coo ityi chi ñu cachi ñu chiti yutun cha chahá cha conyito añima yo tyicuan ri maa. Ta cuví quihvi ñu yuvehe ñuu cuan.

¹⁵ Soco ñu cha sacuví cha quiñi caa, ñu tasi, ñu cha iyó chihin tahan, ta ñima ñasihí ra o yí ñu cuví, ñu chahñi ñáyivi, ñu sacahnú xitohyo, ta tandihí ñu ñii cuendu ta sandavi ñaha ñu, tandihí ñu cuan, cundoo ñu ityi chata ñuu cuan.

¹⁶ Ta catyí tucu Sutu Mañi yo:

—Yuhu ra Jesús, sacuhin chi ángel cuende vatyí sacoto ra tandihí tuhun ihya chi ñu nyicú vehe ñuhu. Yuhu cuví ñáyivi chahnu chi rey David. Ta vachi tiqui tata ra ñandihí. Ta cuví tiqui tiño cahnu cha xiño, cha caña cha ñaa ca —catyí ra.

¹⁷ Tatyí Ii Nyoo ta ñasihí ra cuví Mbee Luhlu cha cuví ñu cuenda ra, catyí ñu tyehe caa:

—Ñaha, Sutu Mañi yuhu —catyí ñu.

Ta ñu chiñi tuhun ihya, ta catyí ñu chi ra:

—Ñaha —catyí ñu.

Ta ñu ityi ndutya cha conyito yo chihin, ta tandihí ñu cuñi quichi, na quichi ñu ta coho ñu ndutya cha chahá cha conyito añima yo, ta ñahri cutiyahvi ñu.

¹⁸ Ta yuhu catyí chi tandihí ndo cha chiñi ndo tuhun Nyoo cha nyaá nu libru ihya, yuhu sacoté chi ndo noo tuhun ihya: Tatu nya noo ñáyivi sanducuaha ca ñu tuhun ihya, Nyoo cunatyiso ca ra tindhoo cha nyaá nu libru ihya siqui ñu.

¹⁹ Ta tatu nya noo ñáyivi tinyaa ñu suhva tuhun Nyoo cha nyaá nu libru ihya, Nyoo cu tinyaa ra cha tahán chi chi ñu cha nyaá nu libru cha cahán chi tuhun cha cuconyito ñu tyicuan ri maa ta cucoo ñu ñuu ii cuan. Ta ma tahan ca chi chi ñu cha vaha cha cahán nu libru ihya.

²⁰ Ta Sutu Mañi yo ra cha chahá cuenda ihya catyí ra tyehe caa:

—Cha ndicha vatyí cha cuñi quichi —catyí ra.

Ta yuhu catyí:

—Na cuvi chi tyicuan caa. Ñaha, Sutu Mañi yuhu, Jesús —catyí yuhu.

²¹ Na naquehen tandihí ndo cha vaha chahá Sutu Mañi yo Jesucristo chi yo. Ta na cuvi chi tyicuan caa.